

SAN MATEO

Jaayhui'my Jadu'n Nej Jesucristo Ytun Yjajti

Je Jesucristo ymij'ap ymijteedy

1 Cham ngapxa'ñ nmiydäga'ñich pin Jesucristo y'ap'ajt yteedy'ajt jadu'n nej yhui'my jaybety. Jesucristo je' oy ap'adyii teedy'adyii David etz Abraham.

²Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶Isaí oy ung'adyii rey David. Je rey David je' oy ytöxyijc'adyii huidi anajty Urías ytöxyijc'ajtpy. E je' ajcxy y'ung'ajti Salomón.

⁷Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹Uzías oy ung'adyii Jotam. Jotam oy

ung'adyii Acaz. Acaz oy ung'adyii Ezequías. ¹⁰Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹Josías oy ung'adyii Jeconías miid y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹²Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶Jacob oy ung'adyii José huidi oy ñäy'adyii María. E je María oy ung'adyii Jesús huidi yxii Cristo.

¹⁷Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzimy yajmajch ma Babilonia y'it, e ñañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty xii María, yi' ti anajty ycapxytungixy co ypiğaangixy miid José; e ma anajty ca'ni ñaybudigiiyigixy, chi María oy y'ungdzimigiy miid yi Dios yjihui'ñ ymic'ajt. ¹⁹José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyoty. Hue' janchtiy yhuinma'ñybaty co ixmadza'ñ ayüch ameech ca' pın yajnejhuñhua'ñ. ²⁰Huin'it ma jadu'n anajty nihuinmayy, chi Huindzin Dios tüg y'ángel ñayquëxici cumäyoty ma José, chi ñimaayi:

— José, David y'ap y'oc, ca' mijcajee mdzachhuinmay nej m'octöxyjic'adiiyb María, com yi' y'ung huidibi yajma'xung'adamy hue' miid Dios yjihui'ñ ymic'ajt ycixpi. ²¹Yi' ypadamy tüg y'ung e mxii möhuipy Jesús. Jadu'n yi' xii'adiiyb com jégix co yi' yajpocyñihuädzam ñaax ycajp.

²²Tüg'óciy jada ytundaayi yjajtaayi yciyx yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcaxiiyıp ma anajty jadu'n yjaybetyity:

²³Je töxyjäy huidibi ca' yëdjic miiddzinäy hue' je' ung tzimicip. Chi ypadamyb tüg je y'ung hue' je' yxii'adaanıp Emanuel.

Emanuel hue' yhuimbidzimy Dios miid iich ajt.

²⁴Co José ymäyhuijy, chi cuyduñ jadu'n nej anajty Dios y'ángel ti nimäy, chi huoy María jadu'n nej jihuiy töxyjic'adyii. ²⁵Per ni ca'

ajcxy jadu'n chinaay jadu'n nej jäy ypicy chinäy ixti cooni oy María y'ung yajma'xung'aty. Chi yxiimoy Jesús.

Madza' ni'ixpigiiy co'ixiiygixy pi'c'ung

2 Jesús yma'xung'ajty ma tüg cajp huidi xii Belén, jim ma Judea ñaaxjot, huin'it co anajty Herodes yrey'aty ma yi jimbi naaxjot. Chi huin'it yja'ty ma Jerusalén cajp nijëjity yëdyictjic huidibi anajty ti choñ ma xii ypidzimy, yi huidibi anajty ajcxy xii madza' ti ni'ixpigiiygixy. ²Chi ajcxy yajtiy:

— ¿Ma je judíojäy yrey tiibi yma'xung'aty? Ti iich ajcxy n'ijxi yi' ymadza' jim ma xii ypidzimy, e yi' iich ajcxy ya miñ nhuindzigihuaangixy.

³Co je rey Herodes jadu'n midooy, chi ooy ytigiiy tajpi maybi miid tüg'óciy cajpjäy jim Jerusalén.

⁴Huin'it je rey huomujctay tüg'óciy teedytjic huindzindijc huidibi anajty yaj'ixpijcp yi Dios yley, chi yajtiy ma anajty yma'xung'ada'ñ yi Cristo. ⁵Chi ajcxy y'adzooy:

— Jim Belén ma Judea ñaaxjot, com Dios y'ayucnajtzcaxiiybi jadu'n je' cojaay:

⁶E miich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma miich chona'ñ tüg Huindzin huidi ane' mam yi israeljäy.

⁷Huin'it Herodes oy yajhuoyii ameech huidibi anajty ti ijxcixy yi madza'. Chi tiybijcy yajxon mina anajty oga'n ti ijxcixy je madza'. ⁸E

huin'it ajcxy quejxy jim Belén. Chi jadu'n nimay:

— Níxcxix jim e ocnidíu ocyajtiugixy je pi'c'anäg; e co anajty ti mbatcixy, miñ miich ajcxy xyajnimáaygixyich jaydëbi iich nicxy nañ jadu'n nhuindzigíyich.

⁹Co jadu'n rey najtzcapyiday, chi ajcxy choñ. E je madza' tiibi anajty íjxcixy ma xii ypidzimy, chi ajcxy íjxy jayíjp je' anajty ñicxy ma je' ajcxy, ixti coní oy je madza' yhuäcxipy ma anajty je pi'c'anäg yajpaady. ¹⁰Co je rey íxpicytíjxc jadu'n íjxy yi madza', chi ajcxy oy janch jotucj ñayjíhuíyíi. ¹¹Co ajcxy ytíjctigíy, chi ajcxy íjxy je pi'c'anäg miid ytaj je María. Chi jada' ajcxy ñaygojxtinaydaaci huindzigíy ojadajty ajcxy je pi'c'anäg. Chi ajcxy yaj'ahuach yxuumy aguejtucy abíjctucy, chi ajcxy yajpidzimy oori, poom, etz tüg tzoy huídi yxii mirra. Chi ajcxy moy je pi'c'anäg. ¹²Chi cumäyjoty ajcxy nimaayi co ca' huaad yhuimbíjtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuynícx.

**Co José etz María
yqueegyñicxixy Egipto**

¹³Co je rey íxpicytíjxc ajcxy yhuimbíjttaayñi, chi cumäjoty José íjxy tüg Dios y'ánel, chi ñimaayi: — Pidíg, nicx jim Egipto ñaaxjot miid yi pi'c'anäg etz miid yi' ytaj, e jim mhui'mipy ixti cooní iich miich nimähuípy. Com yi Herodes y'ixtáhuamy yi' yi pi'c'anäg e yaj'öga'n yi'.

¹⁴Chi huin'it José ypidígy miid tzoñ coodz je pi'c'anäg miid ytaj,

chi ajcxy ñicxy jim Egipto. ¹⁵Jim ajcxy y'íjty ixti cooní oy y'ögy je Herodes. Jada je' jadu'n yajcuydun jadu'n nej Dios anajty ti yminañ ma yi' y'ayucnajtzcapyíybi: “Jim Egipto iich n'ung ti nhuoy.”

**Herodes pidacy y'ane'min co
huen pi'c'anäg yaj'öctäyíi ajcxy**

¹⁶Co Herodes oy huinma'n jayjyöy co ti anajty ooy yhuin'ííñyíi je rey íxpicytíjxc ajcxy co ca' anajty ti ñihuimbídyíi, chi ooy yjot'ambíjcy, chi ni'ane'mdíy co huen nicxy jim Belén etz majaty cajp mihuingon Belén, yaj'öctaaygixy tüg'óciy yi pi'c'anäg huídibi mejtz jimíjt etz huídibi ca'ni nigooty mejtz jimíjt. ¹⁷E jadu'n jada yajcuyduñ jadu'n nej anajty Dios y'ayucnajtzcapyíybi, je Jeremías, anajty ti cojaay:

¹⁸Jim Ramá yajmidoy co anajty chachjíy chachyäxy jäy ajcxy; yi Raquel tzachjíyib tzachyaaxp miid y'ung ajcxy ycixpi, ca' ajcxy anajty yjotucj'aty miid co anajty y'ung ti y'öctäy.

¹⁹Co oy y'öcni Herodes huin'it jim Egipto, Dios tüg y'ánel ñayguëxici cumäyjoty ma José. Chi ñimayi:

²⁰— Pidíg, miidnicx yi pi'c'anäg etz yi' ytaj jim ma yi Israel ñaaxjot jadügtecy com ti y'öctaayñi yi huídibi anajty yaj'ögam yi pi'c'anäg.

²¹Huin'it José ypidígy, miid nicxy yi pi'c'anäg etz yi' ytaj jim ma Israel ñaaxjot. ²²Per co José nejhuíy co je Arquelao yi' anajty jim ane'mb jadu'n nej anajty je yteedy Herodes, ooy chigíy nej ñicxip jim. E co jadu'n anajty ti ycumäy co ca' jim ñicxip, chi ajcxy

ñicxy jim Galilea ñaaxjot. ²³Co jim jyäty, chi jim chinaydacpijcy ma je cajp huidi yxii Nazaret. Jadayaabi je' jadu'n tun jajti jadu'n nej anajty ycojaayity ma Dios y'ayucnajtzcaxiiybi ñecy co Jesús xii'adiiyb Nazareno.

**Juan el Bautista y'ayuc
capxhuäcxy ma ñdz naax it**

3 Huin'it tiempo ñañ jadu'n Juan je Bautista (huidibi jäy yajniibejtpi) ymiñ tüg tigidum ma Judea ñaaxjot capxhuäc Dios y'ayuc, ²yminañ:

—Jothuimbíjtcix ma Dios com yi Dios y'ane'min huingoniñ yi'.

³Jada Juan yi' je' huidibi je profeta Isaías nigapxy yminañ:

Jim mijtigidum yajmidoy tüg ayuc minañ: “Ni'ixiiygixy yi mHuindzin ytü'aa, ni'ixiiygixy tüg tü'aa tiybi.”

⁴Je Juan hue' anajty yhuít'ajtpy iyujc nibijc (huidibi jäy ytijpy camello) e hue' anajty yhuinip iyujc ac, e yi' anajty yjicxy'ajtpy mu' etz tijaty iyujc päg jim tüg tigiduum. ⁵Chi chooñ jim Jerusalén jäy etz tüg'óciy huidijaty tzinaayb ma Judea ñaaxjot, ñañ jadu'n huidijaty tzinaayb ma Jordán mijniiba', ñicx ajcxy ma Juan amido'íjtíy yi' y'ayuc. ⁶Co anajty ajcxy nigapxtaaygixy yi ypocy huidi anajty ti tundigooygixy, huin'it anajty ajcxy Juan yajniibedyii ma Jordán mij nii.

⁷Per yi Juan y'ix co may fariseo jäy etz saduceo jäy miñ anajty ajcxy niibejtcixy, chi ajcxy nimay:

—iMiich ajcxy, m'ajuugy m'amigüg ahua'n iyujc! ¿Pin ti

xyajni'ixiiygixy nej jébi huaad mgögueeccixy yi ayo'n huidibi huingomb? ⁸Yajxon jäy'ajtcix tiydudägy huen niguëxígy co ti mjothuimbijtcixy. ⁹Ca' jadu'n mdzachminaangixy co Abraham xy'ap'adyii xy'oc'adyii. Hich miich ajcxy yam ndimnimaayb co Dios ixti jébi yi' yaj'ap'adyii yaj'oc'adyii Abraham jada tzaajot ca'ydi miich ajcxy. ¹⁰Yi jach ni'ixí yi' y'íjtni ma quipy y'íjx, tüg'óciy quipy huidi ca' oy ytim'aty yajpujxp yi', e chi jada' yajnögy jijnjoty. ¹¹Hich, janch yajniibejtpich miid nii, yi' yi' jadu'n nej tüg ixpejt co ti mjothuimbijtcixy; per jacminamb tzojc huidi ajcxy xyajniibedipy miid Dios yjihui'ñ etz miid jijn. Je' ymiid mic'ajtin etz cötujcín, nīgi ca'ydi iich, ni xycapaadyich nicxy ycig nyajtecyjendügyich. ¹²Ymiid mic'ajtin pijc-huäcxamy yi jäy jadu'n nej jäy huimbojy moc, abicy pidäga'ñ actz, abicy moc pajc. Yujcpiga'ñ moc pajc ma tze'x ninögihua'ñ yi moc actz moc jaam jijnjoty ma je jijn huidibi nicaminaaxii ycapich.

Co Jesús ñiibejty

¹³Huin'it Jesús chooñ ma Galilea ñaaxjot, chi ñicxy ma Jordán mij nii ma anajty Juan yjäy yajniibety, niibedam anajty yi' ñañ jadu'n.

¹⁴Juan ca'jadim'a'ixiy, chi nimay Jesús:

— Hich miich ixypy xyajniibejtpich, ¿e miich mimb ma iichi?

¹⁵Chi Jesús y'adzooy:

— Jadachambi oc'a'ixí jadu'n, com ooy yi' ycopityity co nguydundayim tüg'óciy tiibi Dios xyaj'ane'mim.

Huin'it Juan a'ixiyy chi yajniibejty Jesús. ¹⁶Co Jesús ñiibejtay, chi Jesús ijxy Dios yjihu'iñ ñigidägyii jadu'n nej tüg pi'cmuuxy. ¹⁷E huin'it yajmidoy tzajpcíxy tüg ayuc ymina'ñ:

— Jada je' iich n'ung'ajtypich huidibi ooy ndzocyich huidibi ooy miid jotcujc nayjihuüyijich.

Je mujcu' tuñ ijxta'ni Jesús

4 Chi Dios yjihu'iñ yajnicxy Jesús mjtig'aduum jaydēbi je ca'oybi yjot'ixiyyb yhuinma'ñ'ixiyyb. ²Jim y'ijty jaygay huixchigui'px xii huixchigui'px tzuum, e huin'itni ooy yiböccodyii. ³Chi je ca'oybi nimijhuägy Jesús ocjot'ixa'ñ oc-huinma'ñ'ixa'ñ, chi ñimay:

⁴—Pen Dios miich xy'ung'ajtp, ñima' jada tzaa huen naygojyii tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jäy tzajcaagyti'ajty nitzinähuipy, ñañ jadu'n nitzinähuipy tüg'óciy yi ayuc huidibi Dios ycapxp.”

⁵Chi je ca'oybi miidnicxy Jesús jim Jerusalén, chi ymiidpejty tzajptijc cöduum. ⁶Chi ñimay:

—Pen janch co miich Dios xy'ung'adyii, cödijpnax jiiby naaxcíxy, ca' yí' nej mjadipy com jaybety jadu'n ymiñ co jadu'n ymina'ñ:

Dios yquexyp yí' y'ángeles jigix xycuend'adipy xyhuidzipy miid yci', ca'ydi ninej mgönepy ma tzaagop.

⁷Chi Jesús y'adzooy:

—Ñañ jadu'n ymiñ jaybety: “Ca' mjot'ixiipy mhuinma'ñ'ixiipy yi mhuindzin Dios.”

⁸Jadüg'oc je ca'oybi ymiid'ajty Jesús ma tüg copñicx janch cijxpi, e jim yajni'ixiiday tüg'óciy naax cajp co ooy miidity oy'ajtin etz mic'ajt.

⁹E chi ñimay:

—Iich jada miich nmoydähuipy tüg'óciy, pen miich cojxtina' xyhuindzigiyich xy'ojadatyich.

¹⁰Huin'it Jesús y'adzooy:

—Huinhuäctutcich miich mujcu', com jadu'n yjaybetyty: “Tüg'pajc yi mHuindzin Dios yí' mhuindzigihuipy m'ojadadipy.”

¹¹Huin'it je ca'oybi huinhuäctucy Jesús, chi Jesús ñimiini ángeles ycuend'ajti.

Jesús ytung yajtzondacy jim Galilea

¹²Co Jesús nejhuüy co Juan ti anajty yajpidägy pujxtigoty, chi yhuimbijtni jadüg'oc jim Galilea. ¹³E ni ca' yhu'i'miyy jim Nazaret, chi ñicxy jim Capernaum, jim ma Zabulón etz Neftalí y'it. ¹⁴Jada je' jadu'n tuni jajti jadu'n nej Dios y'ayucnajtzcaxiyybi Isaías anajty ti cojaay:

¹⁵Zabulón etz Neftalí ñaaxjot. Je tü'aa huidibi mejypa' huidibi a'oy'amy ma Jordán mij nii. Jim Galileajäy chinäy huidibi ca' yjudiojäyity.

¹⁶Yi jäy ajcxy huidibi jim tzinaayb agootztuuby ijxpaty ajcxy tüg tiicxin jajin. Je huidijaty anajty ajcxy tzinaayb ma je jibicpi y'anicíy, chi ajcxy ycodicxiy tügí tiicxin jajin.

¹⁷Ixti huin'it Jesús ytiigiyy ayuccapxhuäcxp ymina'ñ:

—Jothuimbijtcix, yajmingix yajmejtcix mjot mhuinma'ñ ma Dios, com yi Dios y'ane'min huingonip yí'.

**Jesús nimay nimidaax je
acxmajtzpi: “Pajamgich”**

¹⁸Jesús tüyöyb anajty ma Galilea mejypa', co ijxpaty metz yëydjic ac tüg quëxpi, hue' anajty yi' je' je Simón, huidibi nañ jadu'n yxii Pedro, e je jadügpí hue' je' anajty Andrés. Acxmadzii anajty ajcxy yi' ytung'ajty e jim anajty ajcxy yi' tzachniigöhuich y'acxmadzi'ñ.

¹⁹Chi Jesús nimay ajcxy:

—Pajamgich, iich miich ajcxy nyajni'ixihuipy nej jäy myaj'ixpigipy je Dios ytiy'ajt.

²⁰Huin'it je' ajcxy ixmajtztay tüg'óciy yi' y'acxtzaay, chi ajcxy panicxy Jesús.

²¹Hueeni' jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tüg barco miid yteedy, yi' anajty ajcxy yi' jim chach'adagiïyb yi' huidibi mi'acxmajtzcixy. Chi ajcxy Jesús yhuoohui. ²²E huin'it ajcxy ixmajtztay je barco etz yi' yteedy, chi ajcxy panicxy Jesús.

Jesús yaj'ixpicy mayjä

²³Huidijttay Jesús ma tüg'óciy Galilea ñaaxjot, yaj'ixpicy jäy majaty je naymujctac cajp cajp. Capxhuäcxy yi' Dios ytiy'ajt etz nañ jadu'n pa'mjäy yajtzocoy huen ytimyhuidipá'mity anajty ajcxy ymiid. ²⁴Chi Jesús oy yajnejhuïyñi ma tüg'óciy yi' Siria ñaaxjot, e chi ajcxy miidmiñ ma Jesús tüg'óciy huidijaty anajty ajcxy ca'oybi miid, etz huidijaty anajty ajcxy cixuxy tecyxuxy, chi Jesús yajtzoooy.

²⁵Huin'it Jesús ypanicxi mayjä huidijaty anajty ajcxy tzinaayb ma

Galilea ñaaxjot etz yi' Decapolis jäy, nañ jadu'n Jerusalén jäy etz huidijaty tzinaayb ma Judea ñaaxjot, nañ jadu'n huidijaty anajty ajcxy tzinaayb a'oy'amy ma Jordán mij nii.

**Je tiy'ajt huidibi Jesús
ycapx ma tüg cögop**

5 Co Jesús ijxy tüg'óciy je mayjä, chi nicxy ma tüg copnicx, e chi jim y'ixtacy. E huin'it je' y'ixpijcpidijc ajcxy yjübigiïy. ²Chi Jesús ytiigiïy yaj'ixpijcp yminañ jadu'n:

Je pinjaty ajcxy jotcújcip

³—Janch jotcujc je jäy ajcxy huidibi nejhuïyb co yajmayjajtpy Dios y'oy'ajt, yi' ajcxy paatip Dios y'ane'min.

⁴Janch jotcujc je jäy ajcxy huidi yajpatp taj may, yi' ajcxy yajmöhüam jotcujc'ajtin.

⁵Janch jotcujc je jäy ajcxy huidibi yung naxpy jäy'ajtp, yi' ajcxy padaamb tüg'óciy je huidi Dios ti yaj'ahuanïyii.

⁶Janch jotcujc je jäy ajcxy huidibi cuydunamb huidibi Dios chojcpy, Dios yi' ajcxy pubediib.

⁷Janch jotcujc je jäy ajcxy huidibi pa'ayoob huenyimpinjäyity, Dios nañ jadu'n ajcxy pa'ayohuüib.

⁸Janch jotcujc je jäy ajcxy huidibi huädz yjot yhuinma'ñ, yi' ajcxy y'ixipy yi' Dios.

⁹Janch jotcujc je jäy ajcxy huidibi ca' ti tzip tzojccixy, com yi' ajcxy Dios ung'adiib.

¹⁰Janch jotcujc je jäy ajcxy huidibi yajnixiicp yajnigapxp miid je Dios ytiy'ajt ycixpi. Yi' ajcxy idamb ma Dios y'ane'min.

¹¹Janch jotcujc miich ajcxy co jäy jibic xytungixy co nigoob xyñihuambejticy etz capxcixy huidijaty ca' ytiy'ajitity miid iich ycixpi. ¹²Xondaaccix jotcuj'ajtcix co mbadaangixy tüg oy'ajtin jii by tzajpjoty. Nañ jadu'n ajcxy ixhuidijty pahuidijty je Dios y'ayucnajtzcaxxiybi jecy'ajty.

Miich ajcxy je tudägyjäy ya naaxhuiñ

¹³Jadu'n nej caan ca' yajpüch je tzüch jii cxy tim jadu'n miich ajcxy myajpaady ya naaxhuiñ. Pen je caan ca' miid ti xücx'ajtin, ¿nej jëbi nyajtuunim? Ca' y'oc'oyyajtunity, chi yajnajtzxidiñi, chi yhuaani tembejt hua'cpejt.

¹⁴Oc'lix tüg je cajp jim copcix, ca' jëbi mhuijtzyüdzim mgoyüdzim. ¹⁵Co tüg jiiñ nyajtoyicim, ca' huaad tu'tz ngöjupim. Hue janchtiy co nyajtiicxim cix, huin'it jëbi xycodicxtaayim jadu'n nej ajt nyajpaatim ma tijc. ¹⁶Nañ jadu'n miich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huidi miich ajcxy mdumyb. Huin'it ajcxy ojadadipy je mDios teedy huidibi jii by tzajpjoty.

Jesús yaj'ixpicy nej yi' yi Dios ycötujcin

¹⁷Ca' mhuinmay co iich ti nmiñich ya co nbigaanich je Dios y'ayuc je' huidibi anajty ti jaay Moisés etz je profetitijc. Ca' iich nyajmijaagixa'ñ je cötujcin, iich ti nmiñich co nguyduna'ñich jadu'n nej ymiñ jaaybety. ¹⁸Janch tiy'ajt jadu'n nej nimaaygixy, je huidibi mimb jaaybety jadu'n tundähuam

jajtähuam. Ni tüg letra oy mabaad ymüdzity nicxy ycayajcuyduñ. ¹⁹Je jäy huidibi ca' nimidooy je Dios ytiy'ajt oy yjadim mutzjaty etz yaj'ixpicy jäy jadu'n, je' ajcxy padamb je mutzpi tigiydac ma Dios y'ane'min. Paady je jäy huidibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpicy, je' ajcxy padamb tüg je mijpi tigiydac ma Dios y'ane'min. ²⁰Iich miich ajcxy nimaayb, pen ca' miich ajcxy jac'oy mdüngixy ca'ydí fariseos etz escribas ajcxy, ca' nimina mdigihuipy ma Dios y'ane'min.

Jesús yaj'ixpicy co ca'p huaad pin yjotmädy

²¹Miich ajcxy mnejhuiygixy jadu'n nej yi m'ap mdeedy ajcxy ayuc yajhui'my: "Ca' jäy myaj'ögip; e pin anajty jäy yaj'öcp ypaadip je tzaachypi." ²²Iich miich ajcxy jadu'n nimaayb pinjaty ymügügtijc mijotma'tp, je' Dios tiydunaanipy; e pin ymigüg xiidijp tzuudijp, yajtiydunipy je' ma Dios tiydundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

²³Pen myajnicxpy miich mhuidzigi'ñ ma Dios ytijc, e pen jim jäy metzgodyyi co mmigüg ti xyhuin'iinnaxy ti xyhuincapxynaxy yinjaty hueenjaty, ²⁴jim myajhui'm je huindzigi'ñ ma je altar yhuinduu, e nicx jayijp nayyaj'oyihuii miid je migüg, huin'it mhuumbedip e chimgiyecy je mhuidzigi'ñ.

²⁵Tzojc naygapxjotcidägi miid je midzip, pen yam miid tüyöy nii'am tü'am, ca' jecyity co je midzip xyciyegip ma juez, e je

juez xyciyegip ma je policia, e je' nicxy xypidägy pujxtigoty.
²⁶Janch tiy'ajt iich miich nimäy co ca' jiiby mbidzimipy ixti cooni mgüejtahuipy je meen.

Jesús yaj'ixpicy co ca'p ndundigooyimipy miid huingbi töxyjäy

²⁷Miich ajcxy mnejhuiyb co jecyip tiy'ajt ymina'n: "Ca' mmidundigoyipy huingbi töxyjäy."
²⁸Hich miich ajcxy nimaayb, pen ji pin huindixy tüg töxyjäy, e jot'adiiyb nejaty, ti je' anajty nitundigooyi ma yot yhuinma'n.

²⁹Pen yi mhuin a'oy'amybi xyajtundigoyamb tim yajpidzimb; jac'oy co tüg'idu'mbi mhuin ytigoyipy ca'ydí co cixyca'px mnicxipy jijnjoty. ³⁰E pen yi mgi' a'oy'amybi xyajtundigoyamb tim ixpux etz najtzjibibi' jiguem; jac'oy co tüg mgi' ytigoyipy ca'ydí co mminicxipy metz mgi' jijnjoty.

Jesús yaj'ixpicy co jäy ca'p huaad ytöxyijc ixmach mañ'ajtingixy

³¹Nañ jadu'n ymiñ jaaybety: "Pin ixmajtzp ytöxyijc, huen möhuipy tüg necy ti ycixpi co ñay'ixmáztzigixy."
³²Hich miich ajcxy nimaayb, pen ji pin ixmach ytöxyijc, e ca' anajty ti ytundigooyi miid huingbi yëydijc, je yëydijc anajty nigiydeyiyb ytöxyijc co anajty ytundigooyi miid huingbi yëydijc; pin yëydijc pijcp miid je töxyjäy huidibi anajty ti yaj'ixmach, pocytumy je' anajty.

Jesús yaj'ixpicy nej nguyduunim tiibi n'ahuaniiyim ma Dios yhuinduu

³³Miich ajcxy mnejhuiyb nej jecy'ajty m'aptijc mdeedytjic

ajcxy yajnimay: "Ca' nigo ti m'ahuaniihuipy, mguydunipy jadu'n nej anajty ti mmina'n." ³⁴⁻³⁶Per iich miich ajcxy nimaayb: ni mga'iibaadip ni mgacapxaadip; ni mgamina'nip; "y'ijxpy tzajpjotyipi," com yi' Dios chinaydac. E ni mgamina'nip, "y'ijxpy naaxhuiñybi," com Dios yajpatp oy ytimyaaajty. E ni mgamina'nip; "y'ijxpy Jerusalén," com jim je' Dios chajptijc; ni mga'iibaadip ni mgacapxaadip mgohuajc, com ca' mjaty myaj'ahuimbity poob o tzixy tüg cöhuay. ³⁷Hue' janchtiy, tiydudägy minaangixy: "oy" o "ca'." E pen miich ajcxy anaxy jaccapxp jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijtim

³⁸Miich ajcxy mnejhuiyb co jecy'ajty yajminañ: "Pen ji jäy mhuiin xyajpidzimi, nañ tim jadu'n yhuin myajpidzimipy; pen ji migüg mdiit xyajpidzimi, nañ jadu'n myaj'ahuimbidity." ³⁹Per iich miich ajcxy nimaayb: Ca' myaj'ahuimbidity jibicpi ma migügtijc; pen ji pin xycoxy ma mhuiñyijp tüg adu'mbi, jac tim mo' jadüg adu'm'amybi. ⁴⁰Pen ji pin xyxiy e xypigaani yi mnijen, najtz'ixi', huen xyajnicxi nañ jadu'n mjocx huit. ⁴¹Pen ji pin adzip tziy xyajminicxa'n tüg kilómetro jiguemity, yajnicx jac tim jadüg kilómetro. ⁴²Pen tijaty xypijctzoohui, mo'. E pen ji pin xyminuucxa'n, yajnuucx.

Co ndzojcm nmidzip

⁴³Jadu'n ymiñ jaaybety nej jecyip Moisés yjay: "Migüg'adii yi'

huidibi xymigüg'ajtp, e midzip'adii yi' huidibi xymidzip'ajtp." ⁴⁴Hich miich ajcxy nimaayb: Tzoc yi' huidibi ajcxy xymidzip'ajtp, etz mibijctzoohui ma Dios huen y'oy'ajtin paady yi' huidibi xyñigapx xyni'ojiiyb, e nañ mi'oyjäy'at yi' huidibi xyca'ixamb. ⁴⁵Huin'it miich ajcxy xy'ung'adiiby yi' Dios tzajpjotypi huidibi yxii yajtiicxp yajjajp ma oyjäydijc etz ma jibicjäydijc, nañ jadu'n yajtüy ma jibicjäydijc etz ma oyjäydijc. ⁴⁶Pen miich ajcxy mdzojcpy je huidibi xychojcp, ¿ti jäygidaacin yi' m'ocpadamyb? Nañ jadu'n yi' ajcxy yja'idiitzp yi' pocyjäydijc etz yi' yajcogüeijtpidijc. ⁴⁷Pen miich ajcxy mgapxpocxyp yi' mjugymigüg, ¿ti oybi yi'? Nañ jadu'n ajcxy yi' yja'idiitzp yi' huidibi ajcxy ca' Dios nejhuüiygixy. ⁴⁸Jäy'ajtcix tudägy jadu'n nej ajcxy yi' mdeedy tzajpjotypi ytudägy.

**Jesús yaj'ixpicy co
nduunim oy yjäy'ajtin**

6 Ca' mdungixy je oybi ma jäy y'ixy yhuindixy miid co mdzachyajuindixcaangixy co mdungixy oybi. Pen jadu'n m'idiitzcixy mDios Teedy huudi jiiby tzajpjoty tzinaayb, ca' ajcxy xymöhua'n je oy'ajtin. ²Paady co mbubedipy mmigüg, je ayoobi jäy huudi yajmayajtpy tijaty, ca' huaad mnigapxy mnimiydägy o mnaygömayii co anajty ti mmöy tijaty. Yi' jadu'n idiitzp je jäy huudi mij cix nayjihuiyip huudi anidaacp co huen jäy y'ixyii mijpidägyii co anajty jadu'n y'idich. Janch iich miich ajcxy jadu'n nimaaygix

co yi' ti patcixy je oy'ajtin. ³Co miich mmöhuipy mmigüg tijaty yajmayajtpy, hue' janchtiy mdunipy ca' myajnejhuüiipy huudi miid mnaymigüg'adyii. ⁴E co miich amoñ m'idipy, mDios Teedy huudi ijxp co amoñ tijaty mduñ, je' xymöhuamb tüg oy'ajtin mayjäyduum.

**Jesús yaj'ixpicy nej Dios
nmibijctzoohuim**

⁵Co miich ajcxy Dios mmibijctzoy, ca' jadu'n m'idiitzcixy jadu'n nej je jäy huudi capxtacp ma Dios huin aguy ahuac aguy. Yi' ajcxy capxtacp ma Dios huäctina' jiiby tzajptigoty jaydëbi jäy y'ixiiyb etz ymijpidägyiyb. Hich jëyi jadu'n nimaayb, co jadu'n oy'ajtin'adiiby. ⁶E co miich Dios mmibijctzoy, nicx tigoty etz m'agihuiipy je mdijc aguu. Huin'it Dios mibijctzou. E je Dios y'ijxpy ymidooyb co jadu'n mmibijctzoy, e je' je m'oy'ajtin xymöhuüipy mayjäyduum.

⁷Com Dios mmibijctzoy, ca' m'agapxiyo'cip je huudi anajty ti m'occapxpi, jadu'n nej ajcxy y'idiitzcixy huudi ca' nejhuüiygixy Dios ytiy'ajt. Yi' ajcxy huinma'ñypidägy co miid ajcxy ymay'ayuc huin'it ajcxy ymidoohuiiyb. ⁸Ca' jadu'n m'idiitzcixy jadu'n nej je' ajcxy; mDios ñejhuüiyb ti miich ajcxy myajmayajtpy ma anajty ca'ni mbijctzooyi. ⁹E jadu'n miich ajcxy Dios mibijctzohuiipy, jadu'n mina'nip:

Dios Teedy, miich huudibi
tzajpjoty tzinaayb; huindzigiy
miich mxii y'ity.

- ¹⁰ Huen miñ ya miich yi m'ane'min. Huen mdzojcin yajcuyduñ ma je jäy yjot yhuinma'nñ jadu'n nej yajcuyduñ jiiby tzajpjoty.
- ¹¹ Mooygich ajcxy ngaayin n'uucin jabom jabom.
- ¹² Méecxibich ajcxy nbocy ngaydey huidibi iich ajcxy ndundigooyb, jadu'n nej iich ajcxy meecxyich huidibi ajcxy xymidundigooybich.
- ¹³ Ca' m'a'ixiy co iich ajcxy nhuinma'nñ tigoyipich. Yajnihuaatzcich ajcxy ma yi jibicpi. Co miich yi' mje' je cötujcin, je mic'ajtin etz je oy'ajtin huinixii huinitiempo. Amén.
- ¹⁴ Pen miich ajcxy mhuinmeecxyp je huidibi xymidundigooygixp, je mDios Teedy huidibi tzajpjoty je' nañ jadu'n xyhuinmeecxip miich ajcxy mbocy. ¹⁵ E pen miich ajcxy ca' pin jäy mhuinmeecxy nej xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

**Jesús yaj'ixpicy nej huaad
n'ijtim jaygaay**

¹⁶ Com ajcxy m'ida'nip jaygaay jay'ügy (mina Dios mmibijctzoogixy), ca' mnaybidáaccigixy tajy may, jadu'n nej ajcxy iditzcixy yi' huidibi ajcxy minamb co Dios mibijccixy e ca' yjanchity. Yi' ajcxy yajtigajchpy yhuinyjip jigix jäy ajcxy oc'ixiib co jaygaay jay'ügy y'ijtcixy; jäy jadu'n oy'ajt'adiiyb. ¹⁷ Miich ajcxy co m'idipy jaygaay jay'ügy jotcujc naybidägii, caax mgohuajc

etz puj mhuin mjijp, ¹⁸ ca'ydí myajniguëxigy mayjäyjoty co m'ity jaygaay jay'ügy, hue' janchtiy myajniguëxig ma je mDeedy huidibi ca' yaj'ijxy; e je mDeedy huidibi ijxp huidibi miich ajcxy ca' mduñ ijxna' quëxna' yi' xymöhuipy oy'ajtin mayjäydum.

Je jugy'ajtin tzajpjoty

¹⁹ Ca' nigi m'adzocy huidibi ya naaxhuiñ, je' co ya huindigooyb oy ytimtijty huidibi yi huech yajhuindigooyb, huidibi tougaayip etz ma je meetzpi ajcxy meetzcixy pigëccixy tijaty. ²⁰ Je' miich nijot'ajtcixy je' oy'ajt huidibi miich ajcxy Dios xymöhuamb jiiby tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcixy pigëccixy tijaty. ²¹ Ma miich ajcxy miidity je oy'ajt nañ jiiby ajcxy mjot mhuinma'nñ pidäg.

Yi mhuin jadu'n yi' nej tüg tiëcxin

²² Yi mhuin yi' yi' jadu'nip nej tüg tiëcxin jajin ma mninix, e paady pen ca' miich yi' mhuin xyajtundigoy, tüg'ócüy mjot mhuinma'nñ huadz yi'. ²³ Pen miich mhuin xyajtundigoyb nañ jadu'n mjot mhuinma'nñ huadi miich miid ca' y'oyity, jadu'n yi' nej coodzpi ijac tim nigi ca' y'oyity ca'ydí je coodzpi!

Dios etz je comeñ'ajtin

²⁴ Ni tüg pin ca' huaad miid tuñ metz huindzin com mijotma'ti tüg je', e jadügpi chogipy; o ixtijipy tüg e jadüg ymigüg'adiiyb. Nañ

jadu'n ca' huaad miich ajcxy metz m'ojadajtcixy, Dios etz je meeñ.

Dios ycuend'ajtpy yi' yjáy

²⁵Paady iich miich ajcxy nimaaygixy: Ca' mdzachhuinmaaygixy ti ajcxy mnitzinähuiipy, ti ajcxy mgayipy m'ügipy o ti ajcxy mhuit'adiiyb mducxy'adiiyb. MDios yi' ti xymooygixy je mjogy'ajtin, e paady ycixpi yi' nejhuuiyb ti ajcxy myajmayajtpy. ²⁶Oc'ix miich ajcxy yi' joon huidi queec-huidijtp. Yi' ajcxy ycaniipcixy ycatungixy, nañ ni ca' yi' ajcxy yujepijccixy ma tze'x. Miich ajcxy mDios Teedy huidi tzajpjoty tzinaayb, je' moydaayb huidi ajcxy yi' yjiicxyp. E miich ajcxy mjactzoobatp ca'ydi yi' joon. ²⁷¿P'in ji ma miich ajcxy, ooy mij jahuinmay, jébi tüg nuux yjacyeegyí?

²⁸¿E na'amy co miich ajcxy mdzachnidajy mdzachnimay miid je mhuit mducxy ycixpi? Oc'ix miich ajcxy nej yoñ tüg je pijy huidi yajpatp tun nigap. Ni yi' ycatuñ ni piidy. ²⁹Per janch tiy'ajt jadu'n nej nimaaygixy, ni je comeeñyjay huidi yxií rey Solomón, ni ycaquipxíy je' yxojxin miid je pijy. ³⁰E pen mDios xojxpy jadu'n je aay ujtz cham etz tzojcy ytiitztäy ñicxtäy, jac nigí miich ajcxy Dios xymöhua'ñ huidibi myajmayajtpy, miich ajcxy huidibi hueeni mmibijcin. ³¹Paady ca' nigoobi mdzachhuinmaaygixy ma ajcxy mbaadip ti mgayipy m'ügipy o ti mhuit'adiiyb mducxy'adiiyb. ³²Yi' jäy ajcxy huidibi ca' mibicy yi' Dios oy tzach nijot'ajtcixy jadaayaabi, per miich mDeedy huidibi tzajpjoty

je' ñejhuuiyb ti miich ajcxy myajmayajtpy. ³³E pen miich ajcxy mbidacpy Dios jayijp ma mjot mhuinma'ñ etz mguydun ajcxy yi' y'ane'min, huin'it miich ajcxy Dios xymöhuiipy tijaty myajmayajtpy. ³⁴Paady ca' mhuinmaaygixy cham miid je jabom cixpi, je' co je jabombi ymimiñ je tajin mayin. Tzoc mijotcujc'ajtim je tajin mayin huidi cham nmínajx nyajnaxim.

Ca' mbocy ixxy yi' mmigüg

7 Ca' m'ix'ijxpy mba'ijxpy ti mmigügtijc ytundigooyb, jigix ca' Dios xytiydunipy chaachytunipy. ²Pen miich m'ix'ijxpy mba'ijxpy mmigügtijc ti ytundigooyb, nañ jadu'n miich Dios xytiydunipy xychaachytunipy, e yi' quipxi'ñ huidibi miich mhuamyb quipxi'ñ, nañ yi' Dios yajtunamyb ma miich. ³¿Nej co miich m'ixy huidibi mmigüg ytumyb e hueeni ytundigooyb, e ca' mnay'ixyii huidibi miich jac mij mdundigooybi? ⁴¿Nej jébi mmigüg m'ocnimäy: “Nbubedamybich miich ca'ydi mjacpocytuñ”, e miich yam m'ocmiidpi jac mij pocy? ⁵Miich c'i'm mnayhuin'iiñyii. Nicx jayijp mbocy mgaydey ocyajhuadz, huin'it jébi mbubety je mmigüg.

⁶Ca' mmöy yi' jibicjäydijc huidibi Dios yjé'ajty co nicx camij'ijx camijpidaaccixy; ni mgayegipy Dios y'ayuc ytiy'ajt ma yi' jäy ajcxy huidibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

⁷Mibijctzougix yi' Dios e yi' xymöhuiipy ajcxy; ixtaaygix, huin'it

mbáatcixipy; cogapxiygix e ahuádzip ajcxy mdijc aguu. ⁸Com pin tijaty pijtzoob ypaatp yi'; e pin tijaty ixtaayb ypaatp yi'; e pin cogapxiyb ma tijc aguu, yaj'ahuaatzip ytijc aguu.

⁹¿Nej ji jada' miich ajcxy nidügti co m'ung pijtzoohuipy tzajcaagy nej mmöhuipy tüg tzaaji? ¹⁰¿O pen ypijctzooby tüg acx nej mmöhuipy tüg tza'ñi? ¹¹Miich ajcxy oy mjibicjäyity e majatpy ajcxy nej m'ung m'anäg mmöhuipy je oybi. iNigi Dios Teedy tzajpjotypi möhua'ñ je oybi pinjaty pijtzoob!

¹²Tzinaaygix tiydudägy miid je mmigügtijc, pen miich ajcxy mdzojcpj co je mmigügtijc chinähuipy tudägy miid miich ajcxy; com jadu'n y'ane'my Moisés yley etz yi Dios y'ayuc najtzcaxxiyb ajcxy ñecy.

Je xützpi tü'aa

¹³Tigiyygix ma yi tigiyyidac xützpi: yi tigiyyidac etz yi tü'aa huidibi ja'tp ca'oydactuuby mij huin yi', e may jäy ajcxy oy ji ytigiiygixy. ¹⁴E janch je tigiyyidac etz yi tü'aa huidibi ja'tp ma je jugy'ajtin huinixiibi, xüdz je' etz tzip naxiyyñi; janch tim hueeni jäy huidibi ji nicxiyb.

Yi jäy yhuinma'ñ miid ñiguëxgy pen oyyäy o pen ca'

¹⁵Nayguend'ájtigix miid yi jäy anijjatypi huidibi ajcxy minamb co Dios ytiy'ajt yaj'ixpijcp, huidibi ajcxy huidijtp janch yung janch naxy ñaybidaaccixy nejihuüy ooy oy huinma'ñ miidity; nigoobi ajcxy jadu'n ñaybidägyii, ymiid ajcxy

jibic-huinma'ñ. ¹⁶Miich ajcxy jëbi m'ijxcapy nejaty ajcxy miidity chinaayin yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tiim tucy ma jaam'apy quipy. ¹⁷Je quipy huidibi ooy y'oyity, oy yi' ytiim'aty. Je quipy huidibi ca' y'oyity, ca' yi' oy ytiim'aty. ¹⁸E je oybi quipy ca' huaad ytiim'aty jibic. E je quipy huidibi ca' y'oyity ca' ytiim'aty oy. ¹⁹Tüg'óciy je quipy huidi ca' oy ytiim'aty, cixy yajpujxp je'. Chi jada' yajnögy. ²⁰Nañ jadu'n miich ajcxy jëbi mnejhuüy jadu'n nej jäy yjäy'aty co m'ixipy nej chinäy.

Ca' nidüg'óciy jäy ajcxy ytigihuipy ma Dios

²¹Ca' nminaanim nidüg'óciy jäy ajcxy ytigihuipy jiiby tzajpjoty huidibi xyñimaaybich: “Huindzin, Huindzin”, jëda'ajty ajcxy tigihuamb huidibi ycapxymidooyb je Dios chojcjn y'ane'min. ²²Mayjäy oy mina'na'ñ huin'it xii huin'it tiempo: “Huindzin, Huindzin”, ti iich ajcxy ngapxhuäcxy miich m'ayuc, e miid miich mxii ti iich ajcxy nyajpidzimy je ca'oybi; etz miid miich mxii ti nduñ iich ajcxy mij huinma'ñ. ²³Huin'it nimähuipy: “Caminaabi miich ajcxy ti nga'ixy'adyii; huinhuäctutcich miich jibic tumbidijc ajcxy.”

Je mejtznajxpi je tiy'ajt cop

²⁴Nidüg'óciy pinjäy huidibi xymibijcpich etz midooyb jadu'n nej iich n'ane'myich yi' ajcxy quipxyjaty miid je jäy huidibi cohuinma'ñ huidibi ytijc ycojp ma yhuingixity. ²⁵Co ymicpojtüy etz

ycomy je mij nii, ca' ypadyii niigom je tijc, je' co anajty cixy je' ycojyity. ²⁶Per yi' ajcxy huidibi midoob e ca' cuyduñ huidibi ngapxpich, je' jadu'nip nej tüg jäy huidi janch loci huidi ytijcoj ma pu' jot. ²⁷Co ymiñ je mic poj tuu, chi ycomy je mij nii. Chi yciday je ytijc; mij ayo'n oy yjajti.

²⁸Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹Com je' co Jesús anajty yaj'ixpicy nej tüg huidibi cõtujcin miid, ca' yjadu'nity nej je escribas ajcxy.

Jesús yajtzögy tüg jibic nibützpa'mmiidpi

8 Co Jesús oy chooni ma je cögop, chi ypagidaci mayjäy. ²Huin'it ñimiini tüg jäy jibic pützpa'mmiidpi. Chi ycojxtinay'ahuñiy ma Jesús yhuinduu. Chi minañ:

—Huindzin, pen m'a'ixiñyib jëbi xayajtzögyich.

³Huin'it Jesús nidoon je jäy. Chi nimay:

—Ndzojpcyich, jëbi mdzögy.

Co Jesús jadu'n nimay je pa'mjäy huin'itiy je ypützpa'm oy ytigooy.

⁴Chi Jesús nimay:

—Ca' pin myajnimäy; nicx janchtiy ma je teedy. Minicx tüg huindzigi'n huidi Moisés y'ane'my. Huin'it jëbi yi jäy ajcxy ixipy co ti m'agidägy.

Jesús yajtzögy tüg capitán romano ymang

⁵Co Jesús yja'ty jim Capernaum huin'it tüg capitán ñimiini e ccohuanñiy. ⁶Chi ñimaayi:

—Huindzin, jim iich tüg ndumbi ma iich ndijc huidi tim cöcnaayñip, ca' y'ocyücxni.

⁷Chi Jesús minañ:

—Iich nicxy nyajtzögy.

⁸Chi je capitán y'adzooy:

—Huindzin, ca'p iich n'oyjäyity, ca' yhuaadity mdigihuipy ma iich ndijc, jëyi miich nigoo capxy e ti anajty iich ndumbi chögy. ⁹Iich nañ jadu'n ane'my n'ityich, e nañ nmiidich soldadtijc c'lam. Co iich nimäy: “Nicx”, nicxp; e co iich nimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰Co Jesús jadu'n midooy, chi nigoo bi yciñxy ycuejty. Chi ajcxy nimay huidi pahuidijtip:

—Janch tiy'ajt jadu'n nej nimaaygixy, ma Israeljäy ymiñ, ca' jadu'n ti nbaadyich huidi oy mibicy jadu'n nej jadayaabi yëydijc.

¹¹Iich jadu'n nimaayb co mayjäy oy miinaangixy xiipidzimy'amy xiicidägy'amy, chi ixtäga'n quipxy miid Abraham, Isaac etz Jacob jiiby ma Dios y'ane'min. ¹²Je judójäy huidibi ixipy ajcxy jëbi yjatzinäy jiiby tzajpjoty, je' ajcxy nicxamb agootztuuby, jiiby ajcxy yjihuipy yäxipy etz y tiitzmúcxipy ytiitzqueedipy.

¹³Huin'it Jesús nimay je capitán: —Nicx ma mdijc. Jadu'n nej miich xymibicyich, ti iich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymüd töxyjäybi

¹⁴Chi Jesús nicxy ma Pedro ytijc. Chi ijxy je Pedro ymüd co jim cijx'am ycöcnäy miid je toyba'm.

¹⁵Co Jesús cínixajy huin'it je toyba'm ñajxy. Chi pidígy. Chi mic'amy ni'ixiixi je caayin uucin.

Jesús yajtzögy mayba'mjäy

¹⁶Co oy chu'iiyñi ycoodzyiñi huin'it yajmimiñ ma Jesús may je huidi ca'oybi miid. E miid yi' y'ayuc yjéda'ajty ypidzimday je ca'oybi, e huin'it tüg'óciy je pa'mjäy chooctay. ¹⁷Jadayaabi je' ytuni yjajti jigix yajcuyduñ jadu'n nej je profeta Isaías minañ: “Yi' ci'm ajt nyuu nba'm ti xyajtzocxaayim etz yi pijcin ixin ti yajnicxtäy.”

Je pinjaty anajty panicxam Jesús

¹⁸Co Jesús ijxy janch mayjäy anajty ti yjübigiyii, chi nimay co huen nájxcixy jim'amy meyy ninaxy. ¹⁹Huin'it ñimiini tüg escriba. Chi nimay:

—Huindzin, nbanicxamybich miich oy janch tim ma'amy ma anajty mnicy.

²⁰Chi Jesús y'adzooy:

—Je huaax ymiid je' ajcxy yjut, e je joon ymiid je' ajcxy ypeñ. Per iich, je jäy huidibi tzoon jii by tzajpjoty, ca' nmídidyich ma nmähuibich ma nbócxibich.

²¹E jadügpí ydiscípulo yminañ:

—Huindzin, nicx jayijp ndeedyich n'ocyajnaaxtigiyich huin'it nbanicxip.

²²Huin'it Jesús y'adzooy:

—Pamiingich, ixmajtcix yi öcpi huen ymi'öcpi yajnaaxtigiyii.

Jesús jijpcogapxy je micpoj etz je meyy co anajty ooy ypidígy

²³Huin'it Jesús oy ybarcotigiiyñi. Chi ypadzooni je ydiscípulos ajcxy.

²⁴E jim anajty ytüyöy mejyhuingíxy, huin'it mic poj ñaymibidzimi.

Janch mic y'ocpidicni je meyy jigo jigo je barco cayajnidigoy, pero Jesús anajty chachmaab. ²⁵Huin'it oy ymigapxyii yajmäybidígyii je' ydiscípulos ajcxy. Chi ñimaayi:

—iHuindzin, ocyajtzogich ajcxy! iCheeby iich ajt n'ocquiinim!

²⁶Huin'it Jesús y'adzooy:

—¿Na'amy co mdzachtzigígyixni? iMiich ajcxy hueeni miidity mibijcin!

Huin'it Jesús ypidígy. Chi migapxy je poj etz je meyy. Huin'it je meyy etz je poj yhua'cxijptay. ²⁷E je' ydiscípulos ajcxy ni goobi y'occix y'occuejtni chachminaangíxy:

—¿Pin yéydijc jada jada', co je meyy je poj ti ycapxymidoyii?

Je Gadara jäy ajcxy huidibi anajty ca'oybi miid

²⁸Co Jesús yja'ty ma yi niiba' ma yi Gadara ñaax ycajp, chi metz yéydijc, huidi anajty ca'oybi miid oy yjijpcoyöyiyii anajty ajcxy, ti choon ma je öcpi jut. Yi jäy ajcxy ooy janch ahua'n, e ca' anajty huaad jim ni pin ñaxy ma je tü'aa. ²⁹E co anajty Jesús jim ñaxy huin'it janch ahua'n ymigapxqueeci:

—¿Ti miich mdunamyb miid iich ajcxy, Jesús, miich Dios y'ung? ¿Nej ti mmiñ jayijp co xychaachytúngixich ma ca'ni xii tiempo paady?

³⁰Jíguem ma anajty ajcxy je' yajpaady jim anajty may'idzim y'ojccixy. ³¹Chi je ca'oybi yminañ:

—Pen miich xyajpidzim iich ajcxy, xyaj'adigiiygyixy xyajjottigiiygyixy yi may'idzim.

³²Chi Jesús ñimay yi' ajcxy:
—Ñicxcix.

Huin'it ñihuaatzi je yëydijc je ca'oybi. Chi oy ytigiiygixy je ca'oybi ma je idzim. Huin'it je idzim oy ñiigöboyictäy. Jiiby ajcxy yjicxtäy.

³³E je jäy ajcxy huidibi anajty idzim ycuend'ajtp, huin'it ajcxy yqueegy miid je tzigi'ñ. Chi co ajcxy yja'ty cajpjoty, huin'it ajcxy ytigiiy miydaacpi jadu'n nej anajty ti ytuñyii ti yjadyi. ³⁴E huin'it chonday je mayjäy ma je cajp. Chi ajcxy ninicxy je Jesús. E co ajcxy ijxpaty, huin'it ajcxy cohuaniiy co huen pidzimni ma je naax je cajp.

Jesús yajtzögy tüg jäy címätpi tecymätpi

9 Chi Jesús ybarcitigiyy. Chi ñicxy jim'amy mejyñaxy. Chi oyjäty ma yci'mgajp. ²E jim yajmimiñ tüg yëydijc huidibi anajty címät tecymät. Yajciiy ymiñ ma'ndzaayjoty. E co Jesús ijxy co ymiid je miibjcin, chi ñimay je pa'mjäy:

—Jotcugi' miich, ti je mbocy nhuinmeecxyich.

³Huin'it nijëjity je escribas ajcxy, je ley yhuindzin, jot'ajti: “Jadayaabi yëydijc capxtigooyb yi' ma Dios co jadu'n ymina'ñ.” ⁴Com Jesús ñejhuiyy jadu'n nej anajty ajcxy je jäy tzachjot'ájtigixy, chi ajcxy ñimay:

—¿Nej co ajcxy jibic mdzachjot'ájtigixy jotjoty huinma'ñyjoty? ⁵¿Huidibi ca' chipity, co nminá'ñibich: “Ti yi mbocy nhuinmeecxich”, o co nminá'ñibich: “Pidig etz tüyöy”?

⁶Hich ndzojcpyich co miich ajcxy mhuinjihuñhuip co iich ti ndzooñich tzajpjoty e paady nmiidich je cötujcin ya naaxhuiñ e jëbi nhuinméecxibich pocyjäy ajcxy.

Huin'it Jesús ñimay je címätpi tecymätpi:

—Pidig, huijtzig yi mdögy etz nicxni ma mdiyc.

⁷Chi je címätpi tecymätpi ypidigy. Chi ñicxy ma ytijc. ⁸E co je mayjäy jadu'n ijxy, huin'it ajcxy ooy jihuiyy huinmay. Chi ajcxy ooy ojadaty yi Dios co anajty ti yecy je mic'ajtin ma mayjäy.

Jesús ñimay Mateo: “Pajamgich”

⁹Co Jesús oy chooni jim, huin'it ijxy tüg yëydijc, yxii Mateo, huidibi anajty ññaayb ma yajcogüejttac. Chi ñimay:

—Pajamgich.

Huin'it Mateo ytinayigy. Chi panicxy Jesús.

¹⁰Jadu'n ytuni yjajti co Jesús jim ycaý ma Mateo ytijc, e may nañ jadu'n ymiñ yajcogüejtpidijc etz pocyjäydijc. Chi ajcxy jim tú'ciy y'ixtactay miid Jesús etz miid yi' ydiscípulos. ¹¹Co je fariseos jadu'n ijxy ajcxy, chi ñimay ajcxy je' ydiscípulos:

—¿Na'amy co yi mHuindzin ycaýmucy miid je yajcogüejtpidijc je pocyjäydijc?

¹²Co Jesús jadu'n midooy huin'it ñimay ajcxy:

—Ca' yajmayjaty tzoydumbi huidi ca' ajcxy ypigyyi, jëyi huidi ajcxy pijcip. ¹³Ñicx ixpijccixy nej ymiñ jaaybety ma Dios ñecy: “Hich ndzojcpyich co miich ajcxy miid'adipy je pa'ayo'n, ca'ydi co

myajhuindzigiy tijaty iyujc.” Ca' iich ti nmiinich ma je jäy ajcxy huudibi ca' pocy miidity. Iich ti nmiinich miid yi pocyjäy ycixpi co huen jothuimbijttaaygixy ma Dios.

Amidoogixy Jesús miid je' ycixpi co jaygay y'ijtcixy

¹⁴Huin'it ajcxy ymiñ Juan ydiscipulos ma Jesús. Chi je ajcxy nimay Jesús:

—¿Na'amy co iich ajcxy etz fariseo ajcxy ayuu'ijtcixy, e yi' ajcxy huudibi xymiidhuudijtp ca' ajcxy ayuu'ijtcixy?

¹⁵Huin'it Jesús y'adzooy:

—¿Nej jëbi yaj'ayuu'aty jäy ajcxy huudi yajpaatpi ma je pijcpi yajnixiiduñyi, pen quipxyi yam yajpaady miid je huudibi pijcpi? Minamb je xii je tiempo mina je pijcpi yajtzonñiyb, huin'it janchtiy ajcxy jëbi y'ayuu'ajtcixy.

¹⁶Ni pin tue huit ca' agiyiy miid tüg pedas jemyhuit, com nigi je tue huit ñajtzciidziy, chi nigi o'ctiy yajtni.

¹⁷Ca' pin pidägy vino nii ma tucpi cochac, yciidzip je', e tüg'óciy anajty ti y'ayoodäy je vino nii miid ñigochac. Pidägipy ajcxy jemy vino ma jemy cochac, chi jadu'n ca' ayoohuipy je vino, ni huindigoyipy je cochac.

Je Jairo ñiix, etz je töxyjäy huudibi Jesús yhuut nïdoni

¹⁸Ma anajty Jesús jim ycapxy ymydägy huin'it ymiñ tüg mijjäy. Chi ñaygojxtinay'ahuuy ma Jesús yhuinduu. Chi yminañ:

—Nniixich ti y'ögy. Nicx ma iich ndijc etz mginixajipy, jugypigipy ya.

¹⁹Huin'it Jesús ypidigy. Chi ñicxy miid je ydiscipulos ajcxy. ²⁰Ma

anajty ajcxy jim ytüyöy huin'it ymiñ jixci'py'amy tüg töxyjäy huudi yxii ybo' ti mi'ijtiyñi majmetz jimijt. Chi nïdoni Jesús yhuutpa'. Huin'it ñajxy je' ypa'm. ²¹⁻²²Jadu'n anajty ti yjot'adyii: “Oy Jesús jëda'ajty yhuutpa' nnidónibich, ti iich anajty n'agidäygich.” Huin'it Jesús yhuac-huimbijty. Chi huindixpejty je töxyjäy. Chi nimay: —Jotcujc'at miich, ti m'agidägy jigix co xymibicyich.

E tim huin'it hora oychögy je pa'mjäy. ²³Chi Jesús oy yjäty ma je mijjäy ytijc. Chi ijxy je xuuxpidijc miid je ymüggtijc ajcxy huudi chachyaaxcixy co anajty ti y'ögy je töxy'anäg. ²⁴Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy niço nixiicy yajxiicy Jesús. ²⁵Co anajty je jäy ti ixquejxtäy, chi Jesús ytijctigiyy ma anajty je töxy'anäg huijtzñäy. Chi majch ma yci'. Chi ypidigy. ²⁶Chi je jäy oy yajnejhuuydaayñi ma je jimbi naax cajp nej anajty ti ytuñyi ti yjadyii.

Jesús yajtzögy metz jäy huintzpi

²⁷Ma anajty jim ti choñ huin'it metz jäy huintzpi ypamiini.

Chachñimäyii jadu'n:

—iPa'ayoogich ajcxy, miich David y'ap y'oc!

²⁸Chi Jesús yajpajäty ma anajty ti yjättägy. Co ytigiyy tigoty, chi Jesús yajtiy:

—¿Nej mmibijcpy miich ajcxy co jëbi nyajhuindixcixcixy?

Huin'it je' ajcxy y'adzooy:

—Mibijcy iich ajcxy, Huindzin.

²⁹Huin'it Jesús nidoñ je jäy ajcxy huintzpi ma yhuuin. Chi nimay ajcxy:

—Jadu'n nej miich ajcxy mmibicy, jadu'n ytuniib yjadiib.

³⁰Chi je' ajcxy y'ijxigy. Huin'it Jesús y'ane'min pidacy:

—Ca' huaad pin myajnejhuuygixy.

³¹Co je' ajcxy ñicxni, chi ajcxy ooy nigapxy nimiydacy co Jesús anajty ti yaj'ijxigixy.

Jesús yajtzögy tüg jäy uumbi

³²Co anajty je' jim ti chongixy, huin'it ajcxy mimiñ ma Jesús tüg yëydijc huidibi uum huidibi anajty ca'oybi miid. ³³E co Jesús yajpidzimy je ca'oybi, chi je mayjäy ooy ycixy ycuejty ajcxy. Chi ajcxy minaangixy:

—Ni camina jadu'n ycayaj'ixy ya ma jada Israel naax cajp.

³⁴Per je fariseos jadu'n yminaangixy co Jesús je' miid je ca'oybi ymic'ajt yajpidzimy ca'oybi ma jäy.

Jesús ymiid pa'ayo'n ma mayjäy

³⁵Jesús jadu'n yhuidijty cajp cajp yaj'ixpajcy majaty tzajptijc. Yajhuingapxäy je jäy Dios y'ayuc. Etz nañ jadu'n yaj'agidacy huen ytim huidi yuu huen ytim huidi pa'mity.

³⁶Co Jesús jadu'n ijxy je mayjäy, chi oy pa'ayooni co y' ajcxy ca' miidity ni pin huidibi jëbi ñajtzcapxiy Dios y'ane'min. Yi' ajcxy jadu'n yajpatp nej cöbixy huidi ca miidity cuend'ajtpi. Ca' nejhuuygixy pin y'ane'mip e pin ypanicxip. ³⁷Huin'it Jesús nimay y' ydiscípulos ajcxy:

—Tiy'ajt yi', janch mij je tung e hueeni je tumbidijc. ³⁸Paady

pijctzou miich ajcxy ma Dios co huen quexy tumbidijc ma yi' ytung.

Jesús huin'ixy je majmetz ydiscípulos

10 Huin'it Jesús huoy je nimajmetz discípulos. Chi moy ajcxy cötujcin jëbi huaad yajnihuäch je huidi ca'oybi miid. Etz nañ jadu'n yaj'agidägip huen ytim huidi yuu huen ytim huidi pa'mity.

²Jada je' je nimajmetzp yxii: Simón, huidi nañ jadu'n yajtijp Pedro, etz ymiguëx Andrés; Jacobo etz y'uch Juan, Zebedeo ymang; ³Felipe, Bartolomé, Tomás, Mateo, je yajcogüejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴Simón, je cananista; e Judas Iscariote, je huidi ycäyeyc Jesús agojix.

Jesús quejxy je' ydiscípulos ajcxy ayuccapxhuächxi

⁵Chi Jesús quejxy yi' nimajmetzpi, e jadu'n najtzcapxiy ajcxy:

—Ca' ajcxy mnicxipy ma je naax cajp ma ajcxy je jäy chinäy huidibi ca' ajcxy Israeljäyity. Ni mgatigihuipy ajcxy ma Samaria naax cajp. ⁶Nigi jac'oy co ajcxy mnicxipy ma je Israeljäy huidibi ca' nejhuuy huidi ca' paduñ Dios ytiy'ajtin.

⁷Nicx miich ajcxy capxhuäch Dios y'ayuc co ti yhuingoni Dios y'ane'min. ⁸Yaj'agidaaccixy yuujäy pa'mjäy huidijaty pützpa'm ymiid. Myajjugypijccixy tiibi ögy. Myajnihuádzip huidi ca'oybi ymiid. Ninigoobi miich jada cötujcin ti myajmooygixy, nañ ninigoobi yejccixy.

⁹Ca' ni ti meen mminicxcixy.
¹⁰Ca' mbijty mminicxcixy
 tü'amgixpi. Mminicxcixy jëda'ajty
 yi mhuit huïdi miid ma mninix.
 Ni mgaminicxip huingbi mgig etz
 mdajc; com ycopicity co je cajpjäy
 xyajcáaygixipy xyaj'úuccixipy miich
 ajcxy.

¹¹Co anajty mjäty miich ajcxy
 ma tüg cajp nidiu yajtiu pinjäy jim
 tudäcyip. Jim ajcxy mhui'mipy ma
 je' ytije ixti cooni ajcxy mdzoonip.

¹²Co anajty miich ajcxy mdigiy
 tigoty huin'it mgapxpóxcixipy je
 codijc jadu'n nej tzocy. ¹³E pen je
 codijc ymihuaad'ajpty, yejccixy
 jim iibocxin capxpocxin. E pen
 je jäy ca' ytudägyity, ñaadig'i'adip
 huïdi anajty ti mgapxcixy. ¹⁴E
 pen ca' pin xycöbīgaangixy, e ni
 pin xycamidohuaani ajcxy m'ayuc,
 pidzimgix jim ma je tijc o ma je
 cajp. Chi ajcxy mdecy huinnebipy,
 je' je' je tiy'ajt co ca' miich ajcxy
 ti pocy miidity. ¹⁵Janch tiy'ajt
 jadu'n nej nimaaygixy co anajty
 je xii tiempo paady ma anajty
 yajtiyduna'n je naaxhuiñyjäy, jac
 nigí yajtzaachytuna'n yí' ajcxy
 ca'ydi yi jäy ajcxy huïdibi tzinaayb
 ma Sodoma cajp etz ma Gomorra
 cajp.

Ixhuïdijtín pahuïdijtín

¹⁶iOcmidoogix! Hich yam miich
 ajcxy nguejxyp majaty yi jäy
 huïdi jibic-huinma'n miid. Jadu'n
 nipaady nej iich nguexyich
 cöbixy ma je lobi. Huijy cujc
 ajcxy mnaypidägiib jadu'n nej
 tza'n, per yung naxy jadu'n nej
 muuxy. ¹⁷Mnayguend'adiib ajcxy
 je' co yi jäy ajcxy xyciyegaangixy

ma ajcxy mjtungmiidpi etz
 myajhuobaangixy ma je
 judíojäy ajcxy ñaymujctac, ¹⁸ixti
 xyajnicxaangixy ajcxy ma je
 gobernador etz je reydiyc ajcxy
 miid iich ycixpi; e jim iich miich
 ajcxy xyñigapxipy ma je jäy ajcxy
 yhuinduu, e nañ jadu'n majaty
 anajty je jäy ajcxy huïdibi ca'
 yjudiojäyity. ¹⁹Co anajty ajcxy
 xyajcidiigiy je mjtungmiidpi,
 ca' ajcxy oy mhuinmaayipy nej
 m'ocnimähuipy. Co anajty paady
 je tiempo, huin'it iich miich ajcxy
 myajnimähuipy nej ajcxy mgapxipy.
²⁰E je ayuc huïdibi miich anajty
 ajcxy mgapxpy, ca' miich anajty je'
 ajcxy m'ayuc'ájtigixy, je Dios Teedy
 anajty yjihui'n, je Espiritu Santo,
 xyajcapxp miich ajcxy.

²¹Huin'it yi jäy ajcxy
 ñaygiyegáanigixy miñ xyipy tüg
 quëxtijc co huen yaj'ögyii. E
 je ungdeedy ciyega'n y'ung; je
 ung'anäg mibidiga'n je ytaj yteedy
 etz yaj'öcip ajcxy. ²²Tüg'óciy je jäy
 ajcxy ca' ajcxy xy'ix'anipy xychoga'
 nipy miid iich nxii ycixpi. E pin
 xymibijcpich amumdügjot ixti
 mabaad y'ögy, yí' ajcxy y'alma
 tzögipy. ²³E co anajty miich ajcxy
 jäy xy'ixhuïdity xypahuidity ma
 tüg cajp, nicxcix ma huingbi cajp.
 Janch tiy'ajt jadu'n nej nimaaygixy
 co ca'ni anajty mgapxhuäcxtäy ayuc
 tiy'ajt ma tüg'óciy je Israelcajp co
 nhuimbidiipyich, iich, je jäy huïdibi
 tzoon tzajpjoty.

²⁴Tüg yaj'ixpijcpí jac nigí mij'ajtin
 miidity ca'ydi je huïdi ixpijcp, e
 tüg huindzin jac nigí mij'ajtin
 miidity ca'ydi je' ytumbi. ²⁵Jëb
 jotcuje idipy je discípulo co jadu'n

yajpaadipy jadu'n nej yhuindzin, e je tumbi jotcujc idipy nej yhuindzin. Pen jäy minamb co iich nmiidich ca'oybi, jac nigí ymina'na'n co miich ajcxxy miidity.

Pin jēbi yajtzigīy

²⁶Ca' ajcxxy mdzigīy yi jäy ajcxxy. Ca' ji ni ti yūch ity nicx ycaniguēxīg; nañ ni ti ji ycajatuñ ayūch ameech nicx ycajajnejhuīy. ²⁷Huidi iich miich ajcxxy ayūch nyajniimaayb, capxpizimigix miich yi' mayjäyjoty, e huidi ajcxxy midooyb ameech, capxpizimigix miich yi' mic ma tūg cōgop. ²⁸Ca' ajcxxy mdzigīhuip je jäy huidib ninicx yaj'ōcp etz ca' huaad yi' ajcxxy yaj'ōgy je alma. Yi' miich ajcxxy mdzigīyigixy je Dios huidib pidacp je alma etz je ninicx mijjiinjoty.

²⁹¿Nej ca' jäy ajcxxy toogy metz pi'cjoon miid tūgpi pi'cmeēñ? Per ca' ni tūg huaad ycäy naaxhuñ, pen ca' tzocy je mDios Teedy huidi jiiby tzajpjoty. ³⁰Miich ajcxxy mgōhuay ac michoy yi'. ³¹Paady miich ajcxxy ca' mdzigīhuipy, jac nigí miich ajcxxy mdzoubaady ca'ydi je joon.

Pinjaty ca'p midzōydu'n

Jesucristo mayjäyjoty

³²Yi jäy ajcxxy huidi xymibijcpich etz xyñidiy'ajtyich ma jäy yhuinduu, nañ jadu'n iich yi' nidiy'ajtyich ma iich nDeedy huidibi jibby tzajpjoty. ³³Per je jäy ajcxxy huidi iich xycoyūtzpich ma mayjäy ajcxxy yhuinduu, nañ jadu'n yi' ngoyūtzpich ma iich nDeedy yhuinduu huidibi jibby tzajpjoty.

Miid Jesús ycixpi yjiijity naymidzip'adii

³⁴Ca' miich ajcxxy mhuinmay co iich ya ti nmiñich miid co nmōhuaangixy jotcujc'ajtin ya naaxhuñ. ³⁵Iich ti nmiñich co nyajtziptunipyich jäy miid yteedy; töxyjäy miid ytaj etz xecy miid yxecy. ³⁶E jadu'n miich ajcxxy mdzip'adiiyb mgí'mjuogy mgí'mmigūg.

³⁷Yi jäy ajcxxy huidibi tzojcp ytaj yteedy jac nigí ca'ydi iich, ca' yi' ypaadyii co njäy'adiiybich; e pin ymang o ñiix tzojcp nigí ca'ydi iich, ca' ypadyii co njäy'adiiybich; ³⁸e pin ca' yci'mdzojcin y'ljxmajztzäy etz ca' ñaybidägyii ycixjot huinjot ma iich, ca' mihuaadity nicx njäy'adiiybich. ³⁹Pin yjugy'ajtin najtztzogyiyb, yajtigoyipy yi'; e pin yjugy'ajtin tigooyb miid iich ycixpi, ypaadipy jugy'ajtin huinixii tzajpjoty.

Premio nganar'ajtim

⁴⁰Pin miich ajcxxy xycōbijcp, iich yi' anajty xycōbijcp; e pin iich anajty xycōbijcp, nañ ycōbijcipy anajty je huidibi iich ti xyquejxyich ya naaxhuñ. ⁴¹Je huidibi cōbijcp je jäy huidibi Dios y'ayuc capxhuacxip, je' co yi' ymiñ miid Dios ycixpi, yi' jadu'mbi je oy'ajtin ypaadipy. Nañ jadu'n je huidi cōbijcp je oybi jäy miid co oy yjäyity, yi' jadu'mbi oy'ajtin ypaadipy. ⁴²Je huidi yaj'ucp tūg vaso ñi ma huenyimpinjäy miid co xymibicyich, janch iich miich nimaaygixy, ypaadipy oy'ajtin.

Juan je Bautista yquexyōybi

11 E co Jesús anajty ti najtzcaxpydäy je tiyy'ajt

ma je nimajmetzpi ydiscípulos ajcxy, chi Jesús ñicxy yaj'ixpíjcp etz ayuccapxhuácxp majaty cajp huinduy agonbi.

²E Juan je Bautista hue' je' anajty yajpaady pujxtigoty. E co nejhuiy tijaty mijhuinma'n anajty Jesús ytumyb, chi quejxy metz je' ydiscípulos ajcxy ma Jesús yajpaady.

³Chi Juan ydiscípulos ajcxy y'amidooy Jesús:

—¿Nej miich je' je Cristo huídibi anajty minamb o jébi iich ajcxy huingbi n'ahuijxcixy?

⁴Chi Jesús y'adzooy:

—Ñicxcix miich ajcxy nimaaygix yi Juan, je Bautista, tijaty miich ajcxy m'ijxpy mmidooyb co ndumybich. ⁵Miich ajcxy yajmiidmiydäg je Juan, jadu'n nej je huintzpi nyajhuindicxigiyich; je cimät tecymät nyajtzoocypich; je huídibi jibic nibützpa'm ymiid nyajtzoocpyich; je' ajcxy huídibi cönat nyajmidohuécpyich; je öcpi ajcxy nyajjugypíjcpych; etz je ayoobtjic, je huídibi yung naxy yjothuinma'n nyajmiidmiydacypich Dios y'ayuc. ⁶Jotcujc yi' ajcxy pinjaty xymibíjcpich amumdügjot etz ca' ni nej yjotmetzci' miid iich.

⁷Co Juan je Bautista ydiscípulos ajcxy ñicxni, chi Jesús ytigiüy nimiydaccoty Juan je Bautista ytung ma je mayjäy, chi yminañ:

—¿Ti miich ajcxy oy m'ixy jim mijtigüduum? ¿Tüg nähuaax huídibi poj xijpi? ⁸¿Ti ajcxy oy m'ixy? ¿Ti oy m'ixy, tüg jäy huídibi ooy y'oyxöxyity? ⁹¿Ti miich ajcxy oy m'ixy? ¿Nej ti m'ixy tüg Dios y'ayucnajtzcaxíybi? Janch co ti m'íjxcixy tüg jäy jac mij ca'ydí tüg

Dios y'ayucnajtzcaxíybi. ¹⁰Je' jada je jäy huídibi Dios nigapxy ma ñecy co Dios jadu'n yminañ:

Cham nguexyich iich

nguexyöyp jayíj ma miich.

Je' yaj'oyíhuip je jäy yjot yhuinma'n miid iich ycixpi, tím jadu'n nipaady nej jihuüy jäy tü'aa yaj'oyíy co rey ymiinañ.

¹¹Co yi jäy ajcxy huídibi ti chinaaygixy ixti chambaad ni pin ti ca' yajpaady mij jadu'n nej Juan je Bautista; per pinjaty iich xymibíjcp, yi' jac mij naxam ma Dios y'ane'my ca'ydí Juan.

¹²Maabi Juan je Bautista ytundigüy, ixti chamni janch mayjäy amumdügjot ñejhuíhua'n Dios y'ayuc, je' co ajcxy ytigíhua'n ma Dios y'ane'my. ¹³Tüg'óciy ajcxy je Dios y'ayucnajtzcaxíybi etz Moisés ycötujcin ñigapxy ajcxy je ané'min ixti cooni Juan oy ymiñ. ¹⁴Pen miich ajcxy mibíjcp Moisés ycötujcin etz Dios y'ayucnajtzcaxíybi ajcxy, Juan je Bautista je' je' je Elías huídibi anajty miinamb. ¹⁵Pinjaty mido'n miid huen mido'mbigípy iich n'ayuc.

¹⁶Jesús yjacminañ:

—¿Pin miid n'ocyajtügíhuibyich yi jäy huídí ajcxy cham tzinaayb? Tím jadu'n yi' ajcxy nej pi'ctíj huídibi ajcxy iyíy ma mayjäy yjuygixy ytooccixy, miyaaxcixy midinaaygixy ymígügtíj:

¹⁷“Tí njayajxúxyich flauta e ni ca' ti m'ejtzcixy; ti iich ajcxy öcpi njahuinyäxich, e miich ajcxy ca' ti myäxy.” ¹⁸Chi Juan, je Bautista, anajty miñ, e je' ca' yca'y'ügy. E

miich ajcxy minaangixy co Juan ca'oybi ymiidity. Jada pi'c'anactijc nipaady nej miich ajcxy. ¹⁹Chi iich je' je jäy huidibi tzoon tzajpjoty nmiinich, e caaybich uucpich, e miich ajcxy minaangixy: "Ijxcix, cha tüg yëydijc, janch cax janch vino'ucp huidibi migüg'ajtpy yajcuejtpidijc etz pocyjäydijc." Je Dios tiy'ajt ji je' ñiguëxgy.

Je cajn huidibi ca' ycapxymidoogixy

²⁰Chi Jesús ojcoty je maygajpjäy ma anajty may mijhuinma'n ti tuñ, com je mayjäy ca' anajty yjothuimbidaangixy ma Dios. Chi Jesús yminañ:

²¹—iAy miich ayoob ajcxy huidibi tzinaayb jim Corazín! iAy miich ayoob ajcxy huidibi tzinaayb jim Betsaida! Co ixypy iich ti nduñich jecy'ajty je mijhuinma'n mijtzög'ajtin ma je Tiro etz Sidón cajn, jadu'n nej iich ti nduñich ma miich ajcxy, ti ixypy je Tiro jäy etz Sidón jäy nijothuimbijtcixy etz ñaaygixy sacco nijen nicuyjam icuyjam, je' je tiy'ajt co ooy ytajcixy ymaygixy miid ypocy ycixpi. ²²Paady miich ajcxy yam nimaaygixy. Co anajty Dios tiyduna'n je naaxhuiñybi jäy, huin'it miich ajcxy Dios xychaachytuna'n jac nigí, ca'ydi je jäy ajcxy huidibi jecy'ajty tzinay jim Tiro etz Sidón.

²³Miich ajcxy, Capernaum jäy, mnaybidáacigixy jadu'n nej jihuüy mdigihuaangixy jilby tzajpjoty. Per ca' yjadu'nity. Mdigihuum miich ajcxy ayoodactuuby. Ayo'n tzaachypi mbadaangixy. Co ixypy iich ti nduñich jecy'ajty je mijhuinma'n mij tzög'ajtin ma

Sodoma cajn, jadu'n nej ti nduñich ma miich ajcxy mgajp, chambaad ixypy ity yi jadu'mbi cajn, ca' ixypy Dios cayajtigooy. ²⁴Paady iich miich yam nimaaygixy. Co anajty Dios tiyduna'n je naaxhuiñyjäy, huin'it miich ajcxy myajtzaachytuna'n jac nigí, ca'ydi je jäy huidibi jecy'ajty tzinay ma Sodoma ñaaxjot.

Mingixy ma iich e mbóocxcixipy

²⁵Chi Jesús ytigiyy Dios miibijctzooyb, yminañ:

—Dios Teedy, iich miich n'iibaatpich ngapxpaatpich. Miich miid je mij cötujcin jilby tzajpjoty etz ya naaxhuiñ. Com miich ti mnajtzcapxiy yi m'ixpijcin ma je ayoobtijc huidibi tzinaayb jotxeemy, e ti myüch yi m'ixpijcin ma yi ixpijcytiyc cohuinma'ñydijc. ²⁶Jadu'n, Tat, ti mduñ, com jadu'n miich ti mdzocy ti mjäygidägy.

²⁷Jesús yjacminañ:

—Iich nDeedy ti xyajcädigiydäyich tüg'óciy mic'ajt oy'ajt. Ni pin ca' ijxcapy pin je' y'ung, jëyi nDeedyich tügpajc. Ni pin ca' ijxcapy pin je' nDeedy'ajtpyich, jëyi iich, je Dios y'ung tügpajc, etz jacjadyi hidibi iich, je Dios y'ung, nyajñiguëxigamyich. ²⁸Min ma iich nidüg'óciy miich ajcxy hidijaty taj mayb myajpatp ma mjot mhuinma'n, iich miich ajcxy nmöhuamyb jotcujc'ajtin. ²⁹Cöbicy miich ajcxy iich n'ane'min iich ngötujcin, jadu'n nej huaj yuub ajcxy cöbicy ycögi'. Ijxpicy ajcxy iich ndiy'ajt etz cuydun iich n'ayuc, com iich nmiidich mecxtujcin etz ca' iich amij agix nayjihuiyijich.

³⁰Ca' iich n'ane'min ymicity, e iich ndung ca' nimijaajity.

**Je discípulos ajcxy moc cojc
yajmujcp pocxxiiduum**

12 Chi tüg xii Jesús yhuidity miid ymigügtijc ma tüg camjot. E hue' anajty sábado xii, je pooxín xii. Chi Jesús ydiscípulos ajcxy oy anajty yubögyii. Chi ajcxy ytiigüy trigo tiim nixajtzutp etz yjiicxy ajcxy je ypajc. ²E co je fariseos ajcxy ijxy nej Jesús ydiscípulos ajcxy y'idüitzcixy, chi ajcxy nimay Jesús:

—Oc'ix nej miich mdiscípulos ajcxy y'idich. Hue' ajcxy tumyb huidibi ca' huaad ma sábado xii yajtuñ.

³Per Jesús minañ:

—¿Nej ca' miich ajcxy mgapxyñi ma Dios ñecy, jadu'n nej David etz ymigügtijc ajcxy idich jecy'ajty co yuböccoti? ⁴Pues yi' ajcxy tigiüy ma Dios ytijc. Chi cay ajcxy je tzajcaagy huidibi anajty jäy ajcxy ti yajhuindzigüy Dios. Je' je tzajcaagy huidibi teedy ajcxy anajty paatip cayipy. ⁵¿Nej ca' miich ajcxy ti mgapxyñi Moisés ycötujcin necy co je teedy ajcxy jëbi ytuñ ma Dios ytijc sábado xii, e ca' nan tundigooyb je' ajcxy?

⁶Hich miich ajcxy nimaaygixyp, jac nigü mij cötújcin nmídidyich, ca'ydi je cötujcin huidibi je teedy ajcxy yajtuñ ma Dios ytijc. ⁷Pen miich ajcxy ti mhujñihuüy nej yhuimbüdzimy jada Dios y'ayuc, co Dios jadu'n yminañ: “Hich ndzojcpy co miich ajcxy miid'idipy pa'ayo'n ca'ydi co ajcxy myegipy huindzigüñ.” Pen miich ajcxy ti

mhujñihuüy jada ayuc, ca' ixypiy mbocyl'ixy ma iich nmigügtijc huidibi ca' ma ti ytundigooy. ⁸Hich, je jäy huidibi tzoon tzajpjoty, nmídidich ane'min, jaydëbi nimäyich je jäy ajcxy ti jëbi tungixy sábado xii.

Je yëydijc huidiibi anajty ycítüdzip

⁹Chi Jesús choñ jim, ñicxy ma je judíojäy ñaymujctac. ¹⁰E jiiy ma je naymujctac anajty tüg yëydijc huidibi ycítütz. Je fariseo ajcxy xihuamyb Jesús, paady ajcxy y'amidooy, yminañ:

—¿Nej jëbi tüg pa'mjäy chögy sábado xiiji?

¹¹Chi Jesús y'adzooy:

—Pen ya ma miich ajcxy ji tüg jäy huidibi cöbixy yjutcögäy sábado xii, ¿nej ca' je' ñicxy yajpidzimy mic'amy? ¹²Nigü tzobaatp tüg yëydijc ca'ydi tüg cöbixy, paady Moisés ycötujcin ca' capx'aducy co tüg oy'ajtin nduunim sábado xii, je pooxín xii.

¹³Chi Jesús nimay je yëydijc:

—Xajtiu yi' mgü'.

¹⁴Co xajtiüy yci', chi choocy, e hui'my quipxyjaty miid je yci' oybi. Chi je fariseos ajcxy yjotmätcoty, yhuinma'ñ ixtaaygixy ajcxy nej huaad Jesús ocyaj'occcixy.

**Tüg ayucnajtzcaxiiyün
miid Jesús ycixpi**

¹⁵E co Jesús nejhuiüy nej yi' ajcxy yhuinma'ñ miidüty, chi jim choñ. E ooy mayjäy ypanicxi Jesús, Jesús yajtzoocpy anajty tüg'óciy pinjaty pa'm miid. ¹⁶Jesús ane'my je pa'mjäy ajcxy co ca' huaad nigapxy nimiüdygy co yi' je' je

Cristo. ¹⁷ Jadu'n Jesús ane'my je pa'mjäy jigix ycixipy ycá'pxipy je ayuc huidibi je profeta Isaiás yjaay jecy'ajty, co Dios jadu'n yminañ:

¹⁸ Jada je' iich ndumbi huidi ti nhuin'ixyich. Yi' iich ooy ndzocyich njihuiyich etz ooy njotcujcich miid yi'. Iich yi' nmöhuamybich iich njihuiñ mic'ajt. Yi' capxhuäcxip iich n'ayuc jadu'n nej ndzaachytunañich naaxhuiñyäj ajcxy miid ajcxy ypocy ycixpi.

¹⁹ Yi' ni ymügütjic ca' ojañ, ni ycayäxañ, ni ycatinähuañ, ni pin ca' midoohuipy ma cajn cujc.

²⁰ Ca' yi' tzaachytunañ ayoobitjic etz huidibi ayo'ndumb ijtp. Etz nañ ni ca' yajtigoyañ huidibi ayoobitjic yco'ögy'ungdjic yjijp'ijxpy. Jadu'n nej jäy cayajhuindigoy tzajcapy huidi huiddyip etz ni cayajpich je mecha huidibi uuxy uuxy tiicxp. Ixti mabaad anajty yajcopicy y'ane'min tudägypi.

²¹ E yi' mayjäy ooy yjijp'ixañyii.

Xigixy Jesús co miidity mujcu' ymic'ajt

²² Chi miid miñ ajcxy ma Jesús tüg jäy huidibi huinzip etz uum. Je' anajty miid ca'oybi. Chi Jesús yajtzoogy, e chi y'ijxigy etz ycapxigy. ²³ Co Jesús jadu'n tuñ, chi je mayjäy ytigiiy huinmay'ahuidijt, chi ajcxy yminañ:

—¿Nej jada je', je David y'ap y'oc huidibi rey'adam?

²⁴ Per co je fariseos ajcxy nejhuui nej je jäy huinmay, chi ajcxy yminañ:

—Jadaabi yëydjic yajpidzimy ca'oybi miid je mujcu' huindzin ymic'ajt (ca' yi' yjëjity je Cristo).

²⁵ Per Jesús nejhuuiyb anajty ti je fariseos ajcxy yhuinmaayb, chi yminañ:

—Pen tügpicy tungmiidpi ixipy ñaybjic-huäcxigixy, etz ñaymidziptzoonigixy ixipy ac jëyi, pues cixipy yi' ajcxy y'ane'min. Pen tüg cajn o tügpicy jugymigüg ixipy ñaybjic-huäcxigixy, pues ca' ajcxy y'idaangixy tügmucy.

²⁶ Pen Satanás, je ca'oybi huindzin, yajpidzimy ixipy ca'oybi ma je jäy ajcxy, chi ci'm ixipy je ca'oybi ti ñaybjic-huäcxigixy, e je Satanás ymic'ajt ca' y'idañ. ²⁷ Miich ajcxy minamb co iich nyajpidzimyich ca'oybi miid je ca'oybi huindzin, je Beelzebú ymic'ajt. Pen tiy'ajt jadu'n nej miich ajcxy minañ, je jäy ajcxy huidibi xymijnicxpejt miich ajcxy, ¿nej yi' ajcxy paady mic'ajt ma je mujcu' co ajcxy yajpidzimy ca'oybi ma je pa'm jäy? Pues ca', paady yi' ajcxy tiy'ajt yecp co miich ajcxy ti mgapxtigoy co yminaangixy co iich nyajpidzimyich ca'oybi miid Satanás ymic'ajt. ²⁸ Per iich nyajpidzimyich ca'oybi ma pa'mjäy miid Dios yjihuiñ ymic'ajt. Paady miich ajcxy nejhuuiyb co ti ymiñ yjäty je Dios y'ane'min ma miich ajcxy.

²⁹ (Dios ycötujcin jac mic ca'ydi je ca'oybi ycötujcin, paady jëbi nyajpidzimyich ca'oybi.) ¿Nej jëbi tüg jäy ytigiiy ma tüg micpi jäy ytjic etz pigaani tijaty yi' ymiid, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jëb

pijciꝑ tijaty ymiid. ³⁰Pinjaty ca' xymijnicxpetyich, xymidzipich yi'. Pinjaty ca' tuñ miid iich co jāy nyaj'ixꝑicyich, hue' je' ajcxy jāy yajhuinma'ñydiꝑooyb.

³¹Janch iich miich ajcxy nimāy co Dios jēbi huinmecxip tūg'óciy pocy huidibi jāy ytungixꝑ etz tūg'óciy jibicꝑi huidibi jāy ycapxcixꝑ. Jēyi janchtiy co pinjaty capxtigooyb miid je Espiritu Santo, je Dios yjihui'ñ ymic'ajt, ca' Dios huinmecxip nimina. ³²Pinjaty jibic xyñigapꝑich xyñimiydꝑich, je' huinmecxam. Per je huidibi jibic ñigapꝑy je Espiritu Santo, je' ca' huinmecxa'ñ ni jadachambi tiempo, etz ni camina xii.

Yi quipy yi' ytiim yi' miid yaj'ijxcapy

³³Pen miich ajcxy mnejhuñhuamy je quipy pen oy quipy, o pen ca', jēbi mnejhuñhuipy co je quipy nicxy ytiim'aty. Pen oy je ytiim, miich mina'nip co oy je quipy. E pen ca' oy ytiim'aty, huin'it miich ajcxy mina'nip co ca' y'oyity je quipy.

³⁴Jibic jāy miich ajcxy, jadu'n nipaady nej jihuñy ahua'n iyujc xy'ung'ajtp. Pen miich ajcxy jibic jāy'ajtp, ¿nej jēbi miich ajcxy oybi ayuc mgapꝑy? Jadu'n nej jāy ajcxy yjot yhuinma'ñ miidity, ac tim jadu'n ajcxy ycapxy. ³⁵Je jāy huidibi oy ayuc ycapꝑy, ymiid oyjot oyhuinma'ñ paady oy ayuc capxy. Je jāy huidibi jibic ayuc capꝑ, ymiid jibic jot jibic huinma'ñ, paady jibic ayuc capxy.

³⁶Iich miich ajcxy nimay co anajty paady je xii je tiempo mina Dios tiyduna'ñ je naaxhuñyñyāy, huin'it ajcxy y'adzohuipy miid huen tim

huidibi ayuc huidibi anajty ajcxy ti mgapxy. ³⁷Com nejyaty miich anajty ajcxy ti mgapxy je m'ayuc jadu'n miich ajcxy Dios xytyidunip. Com miid yi' mgi'm ayuc yi' miid m'oybidzimipy mhuätzpidzimipy. E nañ jadu'n miid yi' mgi'm ayuc yi' miid mbocycāhuipy.

Jibicjāydijc ajcxy pijctzoogixy tūg'ijxpejt mijhuinma'ñybi

³⁸Chi nijējity fariseos ajcxy etz escribas ajcxy Jesús nimayi:

—Huindzin, n'ixamy iich ajcxy miich tūg' m'ijxpejt.

³⁹Chi Jesús y'adzooy:

—Yi jibic jāydijc ajcxy etz ajcxy huidibi ca' mibiga'ñ Dios ypijctzooyb tūg'ijxpejt huidibi tzomb tzajꝑjoty. Per Dios ca' yega'ñ jadūg'ijxpejt. Ti Dios yecy tūg'ijxpejt ma Jonás. ⁴⁰Com jadu'n nej Jonás jecy'ajty ijxpejt yecy co y'ijty tugiig' xii tugiig' tzuum mejyoty ma acx ymoxac, nañ tim jadu'n iich, je jāy huidibi tzoon tzajꝑjoty, nyegamy ijxpejt jadachambi tiempo co n'idipyich tugiig' xiim etz tugiig' tzuum naaxjoty. ⁴¹Je mayjāy huidibi anajty tzinaayb ma Nínive cajꝑ, ti jothuimbijtcixy etz ti ixmach ajcxy huidijaty jibicꝑi ajcxy ytumyꝑ co Jonás capxhuäcxy Dios y'ayuc ma yi' ajcxy. Cha iich ngapxhuäcxyich Dios y'ayuc ma miich ajcxy, etz jac nig'i cōtujcin nmīididyich, ca'ydi Jonás; e ca' miich ajcxy mjothuimbity. Paady co anajty Dios tiyduna'ñ je naaxhuñyñyāy, je Nínive jāy miich ajcxy xyajꝑocycāhuam. ⁴²Nañ jadu'n je tōxyjāy reina huidibi tzinaꝑ jecy'ajty ma madza'cruudz

ypidzimy, yi' je' xidahuam je jäy
ajcxy huidibi tzinaayb jadachambi
tiempo, etz yajpocycähuiib ajcxy.
Je reina tzoon jiguëgy nicxy
co amido'ida'n je rey Salomón
ma capxhuäcxí Dios y'ayuc. Ji
naaxhuin jadachambi tüg Dios
ytiy'ajtmiidpi jac nigi ymijity,
ca'ydí Salomón anajty, e ca' je jäy
ajcxy mijpidäga'n.

**Je jibic espíritu co
jadüg'oc yhuimbity**

⁴³⁻⁴⁴ Yi jäy ajcxy huidibi cham
tzinaayb, quipxyjaty ajcxy miid je
ca'oybi. Co je ca'oybi ypidzimy ma
je jäy, chi je' ñicxy jim mijtigüduum
y'ijxtacy. Co ca' paty ypocxtac,
huin'it ymina'n: "Huimbidaambich
ma je jäy yjot yhuinma'n ma iich ti
n'octzombi." Co je ca'oybi yjäty ma
anajty ti chinäy, chi paty je jäy yjot
yhuinma'n ooy yhuätzity etz yajxon
ypedigity oy oyduñ. ⁴⁵ Chi je ca'oybi
ñicxy oy yajtzoñ jahuixtujc ca'oybi
jac jibicpi ca'ydí je'. Chi ajcxy
ytiigiyy ma je jäy yjot yhuinma'n, e
chinay ajcxy jiiby. Huin'it je jäy
jac'octiy oy yjajtni, ca'ydí jadu'n nej
anajty jayijp'aty.

Jesús ytaj etz y'uch miguëx ajcxy

⁴⁶ Jesús yaj'ixpijcpy anajty je
mayjäy, co oy yja'ty je' ytaj etz
y'uch miguëx ajcxy. Hue' ajcxy
yhuí'my tiba'y. Je' ajcxy anajty
ymigapxamy Jesús. ⁴⁷ Chi jäy
yajnimay Jesús:

—Yi mdaj etz m'uch miguëx
ajcxy, chiiby ajcxy tiba'y, miich
xyjamigapxamb.

⁴⁸ Jesús y'adzooy, nimay je jäy
huidibi ytaj y'ayuc yajnajxi ma yi':

—¿Pin jäy miich ajcxy mdijy co
iich ndaj'adyii etz iich n'uch'adyii
nmigüg'adyii?

⁴⁹ Huin'it Jesús nitziihuiiy je'
ydiscípulos ajcxy e yminañ:

—Jada iich ndiscípulos ajcxy
jadu'n nipaady nej iich ndaj etz iich
n'uch nmiguëx. ⁵⁰ Huen ytiimpinity
huidibi ytumyb iich nDeedy
chojcin, huidibi jiiby tzajpjoty, pues
jadu'n yi' ajcxy nipaady nej iich
ndaj etz iich n'uch miguëx.

**Je ayuccapxhuäcxpi
y'ijxpejt (niipi ijxpejt)**

13 Je huin'it xii Jesús choñ
ma je tijc. Chi ñicxy ma
je mejypa' jim oy y'iñay'ihuüy. ² E
co mayjäy ooy ñaymujci jim ma
anajty Jesús iñay, chi Jesús ytiigiyy
barcojoty. Per tüg'óciy je mayjäy
yhuí'mday ma mejypa'. ³ Jesús
ytiigiyy jäy yaj'ixpijcp miid jihuimbity
ayuc, yminañ:

—Tüg jäy choñ trigotiim huijp.
⁴ E ma anajty jim ytiimhuijy, huin'it
je ytiim oy naagity ycäy ma tü'aa.
Chi jada' je joon ajcxy oy ymiin
etz ypiihuügy je tiim. ⁵ Nijëjity
ytiim ycäy ma tzaanicx ma anajty
hueeni naax. Jada tiim tzojc ymujxy.
⁶ Com hueeni anajty je naax ma je
tzaanicx, chi co oy xi'an ypadyii,
chi ytiitztay, com ca' anajty je ytictz
yeegity. ⁷ Nijëjity tiim oy ycäy ma
ujtz'aayjot ma apyjot, e ujtz'öctay je
trigo mang. ⁸ Per je tiim huidibi ca'u
ma oy ñaax, je' yon yajxon e tiim'ajt
may'amy; tüg ypi'cpajc iipxmajc
oy yco'ity, jadüg pi'cpajc tugí'px oy
yco'ity, jadüg pi'cpajc migo'px oy
yco'ity. ⁹ Pinjaty mido'n miid huen
mido'mbicy jada ayuc.

Ti ycixpi je ijxpejt

¹⁰Chi je' ydiscipulos ajcxy nimijhua'cy Jesús, chi ajcxy yajtiy: —¿Na'amy co myajtuñ jihuimbit ayuc co myaj'ixpicy je mayjäy?

¹¹Chi Jesús y'adzooy, yminañ: —Miich ajcxy jaydëb mnejhuïhuïpy huidibi Dios ñigapxyp ñimiydacpy coyüch'amy ma y'ane'min. Jacjadyi jäy ca' ajcxy huinjihuïhuïpy. ¹²Pinjaty ymiid yajmöhuijpi ñigi, pinjaty hueen miid yajpigipy ñigi, oy ixypiy hueen jadim miidity. ¹³Paady jihuimbit'amy nyajñimaayich; jaydëbi pinjaty ijxcixy, ñipatpy nejihuïy ca' ti ijxcixy; etz co ajcxy midoogixy, ca' ajcxy huinjihuïy, ñipatpy nejihuïy ca' ti midoogixy. ¹⁴Jadayaabi ytunyii yjadyi jadu'n nej je profeta Isaías jaaybejty yajhui'my ma jadu'n yminañ:

Miich ajcxy midohuamy, per ca' mhujihuïhuangixy. Miich ajcxy m'ixamy, nañ ca' mhujihuïhuangixy huidibi ti m'ijxcixy.

¹⁵Com jadayaabi jäy ooy ajcxy yjot yhuinmañ ti y'ahuimbity juuñ. Nej ajcxy yjamidoy, ca' ajcxy ymidohu'mgixy. Nej ajcxy ja'ixy, ca' y'ijxhui'mgixy. Nej ajcxy yjahuinjihuïyigixy, per ca' yhuinjihuïy ma yjot yhuinmañ. Yi' ajcxy ca' yjothuimbidaangixy ma iich, jaydëb nyajñidzögibich ajcxy.

¹⁶Per jotcujc miich ajcxy, co miich ajcxy ijxhui'my miid mhuiin huidibi ndumyich, e mmido'mbicy ajcxy iich n'ayuc. ¹⁷Janch tiy'ajt jadu'n nej iich miich nimaaygixy. Janch

tiy'ajt co may profetas ajcxy etz tudägy jäy ajcxy huidibi tzinaayb jecy'ajty, ooy ajcxy ja'ixañ huidibi miich ajcxy m'ijxyp cham, per ca' ajcxy icy. E ooy ajcxy jamidohuañ je ayuc huidibi miich ajcxy midooyb cham, per ca' ajcxy midoy.

Jesús najtzcapxiy je ijxpejt ma je niipi

¹⁸Amido'it miich ajcxy, jadu'n nej yhuimbizimy jada jihuimbit ayuc maabi je tiim huijpi. ¹⁹Je jäy ajcxy huidibi amido'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinmañ, jadu'n ajcxy nipaady nej trigo tiim huidibi cäb tüguc, e je joon ajcxy mic'amy ypiimujctay. ²⁰⁻²¹Je jäy ajcxy huidibi amido'ijtp Dios y'ayuc janch jotcujc, per co agapxiyb paady, co tzaachypi minaxy yajnaxy miid Dios y'ayuc ycixpi, chi mic'amy ajcxy ixmajtzn Dios y'ayuc, jadu'n ajcxy nej je trigotiim huidibi ti ycäy ma tzaanix, huidibi ca' oy ytictz miidity. ²²Je jäy ajcxy huidibi amido'ijtp Dios y'ayuc, e co ñicxni, chi jäy digooyñi Dios y'ayuc miid jotcujc'ajtin tzinaayin, comeen'ajtin etz adzojcin. Jadu'n ajcxy nipaady nej trigotiim huidibi ti ycäy ujtjoty, e ca' ytiim'aty miid co oy y'ujtz'ögy. ²³Je jäy ajcxy huidibi amido'ijtp etz cöbijcp yajxon Dios y'ayuc amumdügjot etz Dios y'ayuc ytumyib ma ajcxy yjot yhuinmañ, jadu'n ajcxy nipaady nej je tiim huidibi ti ycäy ma oy ñaax etz ti ytiim'aty may'amy. Tüg pi'cpajc iipx majc oy yco'ity, etz jadüg pi'cpajc tugipx oy yco'ity, etz jadüg pi'cpajc mig'opx oy yco'ity.

**Je ijxpejt co je jibic ujtz
ymuxy ma je trigo cam**

²⁴Chi Jesús yaj'ixpíjcy jadüg jihuimbit ayuc, ymíñañ:

—Je Dios y'ane'mín jadu'n nipaady nej tüg yëydíjç huidibí trigo tíim huíjç ma je' ycam. ²⁵Per co ajçxy yma'óctay nidüg'óciy je cogam, chi ytígíiç tüg ymidzip ma je ycamjot. Chi je midzip jibic ujtz tíim oy huíjç ma je trigo cam. Chi ñicxñi. ²⁶E co je trigo oy yooñ, chi ypíjç. Nañ jadu'n je jibic ujtz oy yooñ. ²⁷Chi je ytumbidíjç oy yhuindzin yajnimay: “Huindzin, ¿nej ca' ti mnípy ac trigotíim? ¿Nej co jim nañ jadu'n jibic ujtz yajpaady?” ²⁸Chi je cogam ymíñañ: “Huen jada' nmidzipich jadu'n ti y'idíçh.” Chi je tumbidíjç y'amidoohui: “¿Nej mdzojçpy co íich ajçxy nhuijçigibich je jibic ujtzi?” ²⁹Chi je cogam ymíñañ: “Ca'. Pen miich ajçxy mhuijçíçpy je jibic ujtz, ca' jecyíty co m'ahuijçmugípy nañ jadu'n je trigo. ³⁰Ixmatz, huen je jibic ujtz yeegy tüg mucy miid je trigo, íxti cooni anajty ypidígy je cosecha. Co cosecha paty, huin'tit nguexa'ñich je ndumbidíjç co huen jayíjç pujçígy je jibic ujtz etz axotzípy etz nõgípy. E co yajpidíçtay je jibic ujtz, chi yajpidíçípy je trigo e pidáçípy ma je tze'x.”

Je ijxpejt ma je mostazapajç

³¹⁻³²Nañ jadu'n Jesús yaj'ixpíjcy jadüg jihuimbit ayuc, ymíñañ:

—Je Dios y'ane'mín jadu'n nipaady nej tüg mostazapajç huidibí tüg jáy ñiip ma je' ycam. E je mostaza ytiim je' jac tim mutz

ca'ydi ni huidibí ujtz tíim. Per co je mostaza ytiim ymux etz yoñ, chi y'ahuimbíjty jac mij ca'ydi jacjadyii ujtz. E hue' ñicxy yjaty janch mij, íxti joon ajçxy oy yqueec miíñ yqueec xíjpy jim, pidágy je ype'ñ ma je mostaza y'aacx.

**Je ijxpejt ma je levadura
huidibí ca' y'oyity**

³³Nañ jadu'n Jesús yaj'ixpíjç jadüg jihuimbit ayuc, ymíñañ:

—Je Dios y'ane'mín jadu'n nipaady nej levadura huidibí tüg töxyjáy ypidacpy miid je harina, jigíç je harina oy ypidígy.

Nej anajty Jesús yajtuñ je ijxpejt

³⁴Tüg'óciy Jesús yaj'ixpíjç je mayjáy, jihuimbit'amy yaj'ixpíjç, e ni ti ca' jáy yaj'ixpíjcy cayajnimáy jihuimbit ayuc. ³⁵Jadu'n Jesús ytuuñ, jigíç yajcuyduñ je ayuc huidibí je profeta Isaías yjaayhui'm jecy'ajty, co jadu'n ymíñañ:

Íich ngapxamyíç ac tim
jihuimbit ayuc. Íich
nigapxamybich tíjaty huidibí
ca' pin nejhuíy, mabaad Dios
oga'n yajcojy je naaxhuiñybi.

**Jesús capxticxni nej yhuimbídzimy
je jibic ujtz ma je trigo cam**

³⁶Chi Jesús capxycíjç miid je mayjáy, chi ñicxy ma tüg tíjç. Chi ytígíy tígoty miid je' ydiscípulos ajçxy. Chi Jesús ydiscípulos ajçxy nimíjhua'cy Jesús, ymíñañ ajçxy: —Tun may'ajt íich ajçxy xyajhuinjhuíygy je jihuimbit ayuc co ti mnigapxy je jibic ujtz ma je trigo cam.

³⁷Chi Jesús yajnimay:

—Hich, je jäy huidibi tzoon tzajpjoty, jadu'n iich nipaady nej je jäy huidibi niip je oybi tiim ma je ycam. ³⁸Je cam jadu'n nipaady nej tüg'óciy naaxhuiñyjäy. Je oybi tiim jadu'n nipaady nej je jäy ajcxy huidibi cöbïjcp Dios y'ane'min. Je jïbic ujtz jadu'n nipaady nej je jäy ajcxy huidibi cöbïjcy ajcxy je mujcu' y'ane'min. ³⁹Je jäy huidibi niipy je jïbic ujtz, jadu'n yi' nipaady nej je ca'oybi. Je jïbic ujtz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huidibi yajpidic je cosecha, nipaady nej je ángeles ajcxy. ⁴⁰Jadu'n nej je jïbic ujtz oy yajpujxïgy etz yajpidacy jïinjoty, nañ tim jadu'n nicxy yjaty miid je jäy ajcxy huidibi cöbïjcp je mujcu' y'ane'min co anajty je naaxhuiñ cixy ytigoy. ⁴¹Co anajty je naaxhuiñ ycixy ytigoy, chi iich, je jäy huidibi tzoon tzajpjoty, nguexamyich n'ángeles huen yajmujctäy je jäy huidibi je ymïgüg yajtundïgooyb, etz yi huidibi ajcxy jïbic-huinma'n tumb. ⁴²Co yajmujctähuipy je jïbicjäydïjc, chi ajcxy yajpidägïpy mijjïinjoty, jïiby ajcxy yäxa'n etz ytiitzmucxy ytiitzqueecy miid je ayo'n ycixpi. ⁴³Per je jäy ajcxy huidibi cuydumb Dios chojcin, idam ajcxy miid Dios Teedy jïiby tzajpjoty. Ymii'idamy ajcxy tüg oy'ajti, jadu'n nipaadip nej je xii ytiicxin yjajin. Pen miich ajcxy mido'n miid, mido'mbïjc ajcxy iich n'ayuc.

Je y'ïjxpejt je meeñ huidii yüchïp

⁴⁴Je Dios y'ane'min jadu'n nipaady nej meeñ huidibi yüch ijtp ma tüg cam. Per co tüg jäy paady je

meeñ, chi mic'amy jadüg'oc yüdztigach. Chi ooy yxondägy. Chi ñicxy etz tooctäy tüg'óciy huidibi ymiid etz juy je naax.

Je y'ïjxpejt je perla huidibi tzoohuip

⁴⁵Nañ jadu'n Dios y'ane'min jadu'n nipaady nej tüg ajuuyb adoocpi huidibi ijxtaayb tüg oybi perla huidibi tzoobatp. ⁴⁶E co anajty paady tüg perla huidibi janch tzhou, chi ñicxy tooctigoydäy tüg'óciy huidibi ymiid etz juy je perla.

Je acxmadzi'n y'ïjxpejt

⁴⁷E nañ jadu'n Dios y'ané'min jadu'n nipaady nej tüg acxmadzi'n huidibi jäy miid ycojïibi by mejyjoty. Chi jïiby ytigiy huen ytim huidibi acxity. ⁴⁸E co anajty je acxmadzi'n y'uch miid je acx, chi je jäy ajcxy yajpidzïmy ma mejypa'áy. Chi iñay ajcxy jim mejypa'áy etz huin'ïjxy ajcxy je oyjatypi acx etz pidaaccixy ma ycach. Je acx huidijaty ca' y'oyity, je' ajcxy y'ixjïbijp. ⁴⁹Tim jadu'n nej ti yjaty miid je acx, nañ jadu'n jada'n, co anajty ycixy ytigoy je naaxhuiñ. Huin'it je ángeles ajcxy ñicxa'n huindu'my naaxhuiñ huin'ixa'n je jïbic jäydïjc e pidäga'n ajcxy abicy, nañ jadu'n huin'ixa'n je oy jäydïjc, e pidäga'n ajcxy nañ jadu'n abicy. ⁵⁰Chi je ángeles ajcxy pidäga'n je jïbicjäydïjc mij jïinjoty. Jïiby jïinjoty ajcxy yäxa'n ytinähua'n etz ytiitzmucxaangixy ytiitzqueedaangixy miid je ayo'n miid je tzaachypi ycixpi.

Je jäy huidibi jajtpe nej oybi etz nej jïbicpi yajpidzïmity

⁵¹Chi Jesús y'amidooy ajcxy:

—¿Nej mhujnhuhiiyb miich ajcxy tüg'óciy huiidibi iich ti ngapxich?

Chi ajcxy y'adzooy:

—Huindzin, ti nhujnhuüy iich ajcxy.

⁵²Chi Jesús ajcxy nimay:

—Nidüg nidüg escriba co ti ixpicytäy tüg'óciy Dios ytiy'ajt y'ane'min huiidibi tzajpjoty tzoön, hue' jadu'n nipaady nej tüg codijc comeenybi huiidijaty ymiid yjaty nej yajpidzimipy jemybi etz tucpi.

Jesús yajpaady jim Nazaret

⁵³Co Jesús yaj'ixpijctay jada jihuimbit ayuc, chi choón jim.

⁵⁴Co Jesús choón jim, chi ñicxy ma yci'mnaax yci'mgajp. Chi Jesús ytiñiy ma je judio ñaymujctac, e ytiñiy yaj'ixpijcp. Chi je mayjäy jiiyb ooy jihuüy huinmay nej yi' yaj'ixpicy, yminañ ajcxy:

—¿Ma jada' jada yeydijc ti paady jada ixpijcin? ¿Ma mic'ajt paady co ooy mijhuinma'ñ tzachtuñ?

⁵⁵Jadayaabi yeydijc hue' yteedy'ajtpy je tzejtzpi, etz ytaj'ajtpy María. E iich ajcxy n'ix'ajtpyich je y'uch ajcxy; Jacobo, José, Simón, etz Judas.

⁵⁶Nañ jadu'n ya chinay ma iich ajt je' y'uch ajcxy töxyjäy. ¿Ma oy ti paady jada ixpijcin jada mic'ajtin?

⁵⁷Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amyity tüg'óciy je mayjäy ajcxy ooy yajmij'aty yi jäy ajcxy huiidibi najtzcapxiy Dios y'ayuc, ca'ydi huiidibi y'ayucnajtzcapxiy ma yci'mnaax yci'mgajp yci'mjiin yci'mdijc.

⁵⁸Ma yci'mnaax yci'mgajp Jesús ca' jaty nej mijhuinma'ñ tunip

anjaty, miid co je jäy ajcxy ca' mijpidägyii.

Juan el Bautista co y'ögy

14 Je huin'it tiempo Herodes huiidibi anajty ane'mb jim Galilea tiy'ajt paty nej Jesús ytuñ. ²E yi' nimay je ymidungmiidpidijc:

—Yjiibi jäy huiidibi tzachtumb mijhuinma'ñ, yi' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt miid jaydeb mijhuinma'ñ tuñ.

³Herodes ti anajty ni'ane'mdiy co Juan huen yajmach, e yajpidägyi pujxtigoty. Jadu'n Herodes tuñ miid Herodías ycixpi. Je Herodías je' anajty miid jayjip'aty ti ypicy Felipe, je Herodes y'ajch, chi ti ixmajch Felipe, chi ypijcy miid Herodes.

⁴Juan ti anajty nimäy Herodes co ti ytundigooy co ti picy miid Herodías.

⁵Je rey Herodes ooy anajty jayaj'öga'ñ yi Juan, per tzigiyyb anajty miid je mayjäy. Com je mayjäy ti anajty mibicy ajcxy co Juan hue' anajty tügi Dios tiy'ajt miidpi, tüg profeta. ⁶Co Herodes yjimijtpetty, chi anajty ñayñixiidiuñyi, e chi Herodías ñiix ñicxy ejtzp ma Herodes yhuinduu. Je rey ooy jäygidacy nej anajty Herodías ñiix y'ejch. Paady Herodes Herodías ñiix nimay:

⁷—Dios iich yam ngapxpatpy co nmöhuamyb ti mdimypijctzooyb.

⁸Chi Herodías nimay je' ñiix co huen pijctzoohui je Juan, je Bautista, ycohuajc ma tüg texy. Chi Herodías ñiix je rey nimay:

—Ndzojycpich co miich xymöhuip Juan, je Bautista, ycohuajc ma tüg texy.

⁹⁻¹⁰Co jadu'n midooy je rey, chi ytigiiy tajp maybi mij cajee. Per co ti anajty Dios capxpaatni, ymíanaani mayjäy yhuinduu co ymöhuamyb tijaty ypijctzooyb. Paady ane'my tüg soldado co huen nicxy yajtzoñyii Juan ycohuajc, e möhuipy Herodías ñiix. ¹¹Huin'it je soldado oy je Juan ycohuajc yajminajci jiiiby pujxtigoty. Chi moy je töxy'anäg, e je töxy'anäg yejcnajxni ma ytaj.

¹²Huin'it xii je Juan ydiscípulos ajcxy yja'ty. Chi ajcxy oy yajnaaxtigiy je Juan ñinicx. Chi ajcxy oy Jesús yajnimäy.

Jesús yajcay migoox mil jäy

¹³Co Jesús nejhuiiy ti anajty ti ytuñyii ti yjadyii miid Juan, chi ytigiiy ma tüg barco naydüg, e nicxni ma tüg it ma ca' pin chinäy. Co je mayjäy nejhuiy co Jesús ti ñicxy, chi ajcxy chonday canaag agajp, nicxy ajcxy ma Jesús yajpaady, hue' tecygi'm ajcxy nicxy.

¹⁴Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huídibi anajty ajcxy jim ymiid miin. ¹⁵Com ti anajty chuu'iiñi, paady je' ydiscípulos ajcxy nimijhua'cy Jesús, e nimay ajcxy:

—Ti chuu'iiñ, e ca' ya pin china'y, paady capxcíxy miid jada mayjäy ajcxy, jaydëb ajcxy nicxy ixtäy ycaayin y'uucin ma yi mutz cajp ajcxy huingtonbi.

¹⁶Chi Jesús ymíanañ:

—Ca' ycopicyity co ajcxy nicxy jicxy ixtäy. Miich ajcxy möhuip caayin uucin.

¹⁷Chi je' ajcxy ymíanañ:

—Per iich ajcxy jëyi yeeby nmíidity migoox tzajcaagy etz metz acx.

¹⁸Chi Jesús ymíanañ:

—Mimiingix yam'amy.

¹⁹Chi Jesús nimay je mayjäy co huen iñay'ihuíydaaygixy ma pi'cmíy'ung nicx. Huin'it Jesús je migooxpi tzajcaagy conigy etz je metzpi acx. Chi ypa't'lijxy jiiiby tzajpcíxy, e yajnaxxy Dioscojuipy. Chi tujc-huäcxy je tzajcaagy etz moy je' ydiscípulos ajcxy, co huen yajhuäcxcíxy ma je mayjäy. ²⁰Nidüg'óciy je mayjäy ajcxy ycaay cüxyi. Co je mayjäy ycaayday, chi je discípulos ajcxy yajmujcy je cayduc jicxtuc, e yaj'ujch ajcxy majmetz cach. ²¹Migoox mil anajty ajcxy je yëydijctjic huídibi cay uuc. E ca' ajcxy míchoy je töxyjäydijc ajcxy etz je y'ung y'anäg ajcxy.

Jesús yöy niihuingíxy

²²Chi Jesús ane'my yi' ydiscípulos ajcxy co huen barco tigiigyixy mic'amy, jigix ñicxipy ajcxy jim mejy ninaxy. Nami yi' ydiscípulos ajcxy choñ barcojoty, Jesús ycapxcíjxy miid je mayjäy huen níxcixni. ²³Co anajty Jesús ti ycapxcíxy miid je mayjäy, chi ñicxy naydüg ma tüg cögop Dios mibijctzoobi. Co ycoodziñ Jesús naydüg anajty yajpaady. ²⁴Co ycoodziñ, mejy cujc anajty je barco cujc nicxy. E je niñ ooy anajty ymijjétpety ma je barco, je' co ooy anajty mic yjanchpojoy. ²⁵E co oy ymoñy, huin'it Jesús ymijhua'cy ma je' ydiscípulos ajcxy, ñicxy adüyöyb mejyhuingíxy. ²⁶E co je discípulos ajcxy ijxy co Jesús

anajty ymiin mejyhuingíxy, chi ajcxy ooy ñay'adzigiíyí. Ooy ajcxy yaaxqueecy ymíañ ajcxy:

—Hue' iich ajt iixmaniíyím.

²⁷Chi Jesús mic'amy ymígapxy ajcxy etz nimay:

—Huinmic jotmic naybídáacigíxy, iich yí! Ca' mdzigíyigíxy.

²⁸Chi oy Pedro Jesús ymígapxyii, nimaayí:

—Huindzin, pen janch miichity, ane'mgich co huen iich miich ninícxíp adüyöyíp mejyhuingíxy.

²⁹Chi Jesús Pedro nimay:

—Min.

Huin'it Pedro yminajcy ma je barco etz ñícx ma Jesús adüyöyíp mejyhuingíxy. ³⁰Per co Pedro jihuí'ñybíjcy jadu'n nej anajty ooy mic yjanchpojy, chi ooy chigíy, chi oy oga'n ytigíyñi quimbi, chi yaaxqueecy, ymíañ:

—iHuindzin, iich yajtzóocigich!

³¹Huin'it Jesús oy yci' mimajtzí, chi nimay:

—Miich, janch hueeni mmibíjcin. ¿Nej co ca' yajxon xymibícyich?

³²Co Pedro etz Jesús ytigíyí barcojoty, huin'it je mic poj ñajxy.

³³Huin'it je' ajcxy jilby barcojoty ycojxtinay'ihuiydaay ma Jesús yhuinduu. Chi ymíañ ajcxy:

—Janch tiy'ajt co miich Dios xy'ung'adyii.

Jesús yajtzoocay je pa'mjäy ajcxy jim Genesaret

³⁴Co ajcxy ymejyñajxtay, chi ajcxy oy ja'ty ma je Genesaret naaxjot. ³⁵E co je jäy ajcxy nejhuíy co Jesús ti yjäty ma yí! ajcxy naaxjot, chi ajcxy tiy'ajt quejxy ma tüg'óciy cajp etz rancho huinduy

agonbi co Jesús yjimity. Chi je mayjäy miid miin tüg'óciy je pa'mjäy ma Jesús. ³⁶Chi ajcxy cohuaníy Jesús, pen jeb je pa'mjäy ñidoñyíi je yhuit. E tüg'óciy je huídijaty ñidoníp je' yhuit, je' ajcxy choocay y'agidactay.

Huidi jäy yaj'ahuimbijty janch jibic

15 Chi ymiin ma Jesús nijéjty fariseo jäy ajcxy, je huindzindíjce huídibi tzachpadumb judío ycostumbre. Nañ jadu'n miin nijéjty escribas, je huindzindíjce huídibi ajcxy nijaydutp anajty Dios ñecy. Je fariseos etz escribas ajcxy ti choongíxy anajty jim Jerusalén, chi ajcxy y'amídooy Jesús:

²—¿Na'amy co miich mdiscípulos ajcxy ca' cuydungíxy judío ñi'ap costumbre? Yí! ajcxy ycaaygíxy y'uuccíxy, e ca' jayíj y'cibujcíxy, ca' ixpucíxy ixjétcíxy ypocy.

³Chi Jesús y'adzooy, yajtiyí:

—¿Na'amy co miich ajcxy mgapxycómídadögy Dios? Mdzachcuydungíxy mgi'mgostumbre ma yjapadyii mguydungíxy ixypy Dios ycótújcin.

⁴Com Dios ti y'ane'my ma ycótújcin: “Yajmíj'at mdaj mdeedy, e pinjaty jibic nigapxy ni'ojíyib ytaj yteedy, ögípy yí!” ⁵Per miich ajcxy minamb co tüg je yéydíjce jébi nimäy ytaj yteedy: “Ca' iich miich ajcxy nbubedañ, com ti n'ahuaníyich ma Dios tüg'óciy tijaty nmiídich.” ⁶Chi huen ytimpinity jadu'n minamb, ca' ocpubedaaníp ytaj yteedy, e jadu'n miich ajcxy myajtigoy Dios y'ane'min com tzachtunaangíxy mgi'mgostumbre.

⁷Miich ajcxy naybidaacíp jadu'n nej

jihuüy tudägy jäy, e ca' yjanchity. Janch tiy'ajt jadu'n nej jecyip Isaías jaaybejty yajhui'my co Dios jadu'n yminañ:

⁸ Jadaaabi jäy xyajmij'ajtpich ahuac aguy, per ca' ajcxy xyajmij'atyich cixyot huinjot.

⁹ Naadigi' co ajcxy xyhuin'fiygixyich xyhuinyáaxcixyich. Mnayyaj'ixp'ijcigixy ayuc tiy'ajt huídibi jäy ajcxy ti cojy ti maacxy.

¹⁰ Huin'it Jesús huomujctay je mayjäy, yminañ:

—Amidoo'ijtcixy iich n'ayuc etz mhujnjihuüyigixip. ¹¹ Ca' ji ni ti jicxxy huídibi jäy ypidacpy ma y'ahuac nicxxy yajpocycäy. Yi' janchity je jibic ayuc huídibi pidzim ma jäy ajcxy y'ahuac, y' ajcxy yajpocycähuüib.

¹² Chi ymiiñ ma Jesús je' ydiscípulos ajcxy, chi ajcxy ñimaayi:

—¿Nej miich mnejhuüy co je fariseos ajcxy ñijotma'tpy co ajcxy midoy je ayuc jadu'n nej miich minañ?

¹³ Chi Jesús y'adzooy, yminañ: —Huen tim huídibi ane'min huídibi ca' Dios ti pidägy, Dios yajtigoyam, tim jadu'n nej jäy ajcxy huixigxy utz huídibi ca' y'oy'ujtzity.

¹⁴ Ixmajtcix y' fariseos etz escribas ajcxy. Ca' ajcxy huinjihuüy Dios ytiy'ajt. Jadu'n ajcxy nipaady nej jäy huintzpi, e co tüg huintzpi huizthuidity jadüg huintzpi, chi nimetz nicxxy yjutcögägixy.

¹⁵ Huin'it Pedro nimay Jesús: —Yajhuinjihuüy iich ajcxy jada jihuimbit ayuc.

¹⁶ Chi Jesús yminañ:

—¿Nej miich ajcxy nañ jadu'n ca' mhujnjihuüy jada jihuimbit ayuc?

¹⁷ ¿Nej ca' miich ajcxy mnejhuüy co tüg'óciy huídibi tigüyb ma miich ajcxy m'ahuac, je' nicxp ma miich ajcxy mjot etz ypidzimy ma ajcxy mninixc? ¹⁸ Per je jäy huídibi jibic capxp, capxp je' je jibic ayuc huídibi ymiid ma yjot yhuinma'ñ. Jada jibic ayuc yajpocychimäp je jäy. ¹⁹ Yi' jibicpi huídibi tzomb ma jäy ajcxy yjot yhuinma'ñ, y' je' jäy'aj'ögii huinma'ñ, je töxyjäy migapxtigoyii huinma'ñ, meedzii huinma'ñ, je indägii huinma'ñ, je piitz capx huinma'ñ. ²⁰ Yijadu'mbi jibic-huinma'ñ yajpocycäb jäy ajcxy ma Dios. Per co jäy ajcxy ycaay y'ügxy, ma ca'ni ajcxy pocy ixpujcixy jayijp, ca' je' ypocycäy ajcxy ma Dios.

Tüg töxyjäy huídibi ca' judíojäy mibijc Jesús

²¹ Chi Jesús jim choon, nicxxy ma je Tiro etz Sidón naaxjot. ²² Jim anajty tüg töxyjäy chinäy. Jada töxyjäy hue' anajty cananeajäy, canan judíojäy. Chi y' nimiiñ Jesús, chi nimay:

—Huindzin, David y'ap y'oc, pa'ayoogich. Hich nmiidich tüg niix huídibi ymiid ca'oybi etz oy tzaachypa paady.

²³ Per ca' ni nej Jesús y'adzoohui. Huin'it je' ydiscípulos ajcxy miñ ma Jesús, e ycohuaniiy, minañ ajcxy: —Capxycix miid jada töxyjäy, com nigo xypayaax xypadinaayim.

²⁴ Chi Jesús yminañ:

—Dios iich ti xyquexyich jeda'ajty ma je israelitasjäy huídibi y'alma tigoyam.

²⁵ Chi je töxyjäy ymijhua'ci ma Jesús, e ycojxtinay'ihuiy ma je yhuinduu, chi yminañ:

—Huindzin, tun may'ajt pubejtcich.

²⁶ Chi Jesús yminañ:

—Ca' jadu'n y'oyity co n'ixmadzipich je israelitasjäy (Dios yjäy), e nbedipich miich ajcxy. Co jadu'n ndunipich, jadu'n nipaadip nej jäy ajcxy y'idich co ajcxy pijci je ajcxy y'ung ycaagy, e möy je uc.

²⁷ Huin'it je töxyjäy y'adzooy:

—Janch tiy'ajt jadu'n nej miich mina'ñ, per ixti ycaayb je uc je tzajcaagy y'abu'x huidibi cáb ma yhuindzin mesa.

²⁸ Chi Jesús je töxyjäy nimay:

—Janch mij mmibijcin. Hich ndunaamybich jadu'n nej miich mdzocy.

Huin'it hori je töxyjäy ñiix choocy.

Jesús yajtzögy mayba'mjäy

²⁹ Chi Jesús jim choon. Chi ñajxy ma Galilea mejypa'. Chi ypejty ma tüg cögop, jim inay'ihuiy. ³⁰ E huin'it oy mayjäy miidmiin pa'mjäy huidibi huintz, uum, cimucy tecymucy, etz huen tim huidibi pa'mjäy. Pidacy ajcxy je pa'mjäy ma Jesús yhuinduu, e yi' yajtzoocay. ³¹ E je mayjäy ooy tzachjihuiy tzachhuinmaay ajcxy co anajty je uumbi ti capxigy, je huintzpi ti y'ixigy, je cimucpy tecymucpyi ti yöyigy. Chi je mayjäy ytiigi yibaady capxpaady Dios, je Dios huidibi je Israel jäy ymijpidacpy.

Jesús yajcay midaax mil jäy

³² Chi Jesús mijhuoy je' ydiscipulos ajcxy, nimay:

—Ooy nba'ayooyich jadayaab jäy ajcxy. Com cujc midugiig xii ijtcixy ya miid hich etz ca' ajcxy miidity ti ycaayipy. Ca' nguexhuimbida'ñich ajcxy ayuu ma ytijc, ca' yjetyity yajpa'mgojip ajcxy tü'am.

³³ Chi je' ydiscipulos ajcxy minañ: —¿Per ma n'ocpatim ti jada jäy ajcxy ycaayipy yjicxipy ya ma jada abac it ma ca' pin chinäy? Co ooy mayjäyity.

³⁴ Chi Jesús yajtiy:

—¿Naag jii by tzajcaagy miich ajcxy mjacmiidity?

Chi ajcxy y'adzooy:

—Jëyi huixtujc tzajcaagy etz huen acx.

³⁵ Chi Jesús nimay je mayjäy co huen inay'ihuiydaaygixy naaxcixy.

³⁶ Chi Jesús conigy je huixtujcpi tzajcaagy etz je huenip acx, e yajnax Dioscojuyip ma Dios. Chi tujc-hua'cx etz moy je' ydiscipulos ajcxy. E yi' ajcxy yajhua'cx je jicxy picy ma je mayjäy. ³⁷ Chi je mayjäy nidüg'óciy ycaay cüxi. Jesús ydiscipulos ajcxy yajpidigy huixtujc cach cayduc uuctuc tiibi anajty yconaxy. ³⁸ E je huidibi ajcxy cay hue' anajty naybátigixy nimidaax mil, abicy je töxyjäydijc etz pi'ctijc ajcxy. ³⁹ Chi Jesús ycapxycixy miid je mayjäy huen ajcxy nixcixyñi ma ytijc. Chi Jesús ytiigi ybarcojoty etz ñicxni ma Magdala naax jot.

Je fariseos etz je saduceos ajcxy pijtzoogixy tüg ijxpejt mijhuinma'ñybi

16 Chi je fariseos etz saduceos y'oy ajcxy ix y Jesús. Yi' ajcxy ijxta'n octunaangixy miid Jesús, paady ajcxy pijtzooy co Jesús

huen yaj'ixyii ajcxy tüg ijxpejt huidibi tzomb tzajpjoty. ²Chi Jesús y'ladzooy je' ajcxy:

—Co miich ajcxy m'ixy tzuu yi tzajp tzaptz, chi miich ajcxy mina'n com jabom oy tiempo yajpada'n. ³Per co miich ajcxy m'ixy jopy je tzajp tzaptz etz huimbicy, chi ajcxy mina'n co ca' y'oyity yi tiempo. Miich ajcxy ooy mnaybidägyii nejihuiy ooy m'ixpicyity ma Dios ytiy'ajt, e ca' yjanchity. Miich ajcxy jëbi yi tzajp myajcapxy, per ca' mnejhuiygixy nej yhuimbizimy yi mijhuinma'n ijxpejt huidibi Dios ytumyb ma jadachambi xii tiempo. ⁴Yi jäy ajcxy huidibi cham tzinaayb, ooy yjibicjäyity ajcxy, ca' ajcxy capxymidoy Dios. Yi' ajcxy chojcpy co nyaj'ixipyich tüg ijxpejt mijhuinma'n huidibi tzomb tzajpjoty. Ca' Dios yaj'ixa'n ajcxy jadüg mijhuinma'n, com miid miich ajcxy jaybetyity je mijhuinma'n ijxpejt huidibi Dios ytuun miid Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpijcin

⁵Co Jesús etz ydiscípulos ajcxy yja'ty ma jadüg niiba', chi je' ajcxy yjäydgoy je tzajcaagy. ⁶Chi Jesús ymina'n:

—Naygüend'ájtigix miid yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷Chi Jesús ydiscípulos ñayñimáayigixy miñ xyipy:

—Paady jadu'n ymina'n, je' co ti iich ajt je tzajcaagy njäydgooym.

⁸Jesús nejhuiy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy minaangixy co ca' ajcxy tzajcaagy miidity? Janch hueeni miich ajcxy mmibijcin. ⁹¿Nej ca'ni miich ajcxy mhuiñihuiyi? ¿Nej ca' mjäymechyii co iich migoox tzajcaayg nyajhuäcxy etz ni migoox mil je yëydijctijc anajty huidibi ajcxy cay? ¿E ni mga'ajihuiyii ajcxy naag cach cayduc uuctuc ti myajpidigy? ¹⁰¿E ni mga'ajihuiyii ajcxy co huixtujc tzajcaagy nyajhuäcxyich ma nimidaax mil yëydijc ajcxy huidibi caay etz naag cach cayduc uuctuc myajpidigy ajcxy? ¹¹¿Nej co ca' miich ajcxy mhuiñihuiy, co ca' iich yam nigapxy yi tzajcaagy huidibi miich ajcxy ti mjäydgoy, co ti nyajnimaygixy je levadura huidibi je fariseos etz saduceos ajcxy ymiid?

¹²Huin'tit Jesús ydiscípulos ajcxy huinñihuiy co Jesús ca' anajty je' ti yajnimäyii ajcxy co huen naygüend'ájtigixy miid tzajcaagy levadura. Hue' janchtiy Jesús yajnimay ajcxy co huen naygüend'ájtigixy miid je fariseos etz saduceos ajcxy y'ixpijcin.

Pedro nidiy'aty co Jesús yi' je' je Cristo

¹³Co Jesús yja'ty ma Cesarea Filipino naaxjot, chi Jesús y'amidooy je' ydiscípulos ajcxy:

—¿Nej jäy ajcxy ymina'n, pñic iich?

¹⁴Chi ajcxy ymina'n:

—Nijëjity jäy ymina'n co miich je' Juan je Bautista. Nijëjity jäy ymina'n co miich je' Elías, e nijëjity ymina'n co miich je' Jeremías o jadüg profeta (huidibi tzinay jecy'ajty).

¹⁵Chi Jesús yminañ:

—¿E miich ajcxy nej minaangixy, pin iich?

¹⁶Huin'it Simón Pedro y'adzooy:

—Miich je' je Cristo, je Dios y'ung.

¹⁷Chi Jesús y'adzooy:

—Jotcujc miich Simón, Jonás y'ung, je' co ni pin xycayajnimäy jada tiy'ajt, tügpajc je Dios Teedy nDeedyich huidibi jiiby tzajpjoty, yi' ti xyajnejhuüy jada tiy'ajt. ¹⁸Hiich miich nimaayb co miich mxii'adiiyb Pedro, e hue' yhuimbizimy tzaa (hue' je', je tzaa tija'n je ayuc huidibi Simón ycapxy co je Cristo hue' je' anajty Dios), e ma jada tzaa ji ngoja'nich iich ndzajptijc (hue' yhuimbizimy, ma iich n'ane'min chondäga'n), e ni ca' oybi ymic'ajt ycamimadägiipy. ¹⁹Hiich miich nmöhuamby je cötujcjin jadu'n nipaady nej tüg ahuaast huidibi miid myaj'ahuädziy Dios y'ayuc ytiy'ajt. Tüg'óciy huidibi miich mgapx'aducjpy ya naaxhuiñ, Dios nañ jadu'n capx'adugipy jiiby tzajpjoty, e huidibi miich ya naaxhuiñ ca' capx'aducy, Dios nañ ca' capx'adugipy jiiby tzajpjoty.

²⁰Huin'it Jesús nimay je' ydiscípulos ajcxy, co ca' huaad ni pin nimäy co yi' je' je Cristo.

Jesús nigapxy je' y'öcin

²¹Ixti huin'itni Jesús ytiigiyy ajnimay je' ydiscípulos ajcxy co nicxamb jim Jerusalén etz co jim ooy y'ayoohua'n. Jim Jerusalén je judfo mijjäydijc, je teedytjic huidibi tungmiidpi, etz yi' escribas ajcxy ooy chaachytuna'nyii etz yaj'öga'nyii. Per codugiig xii huin'it yjugypiga'n jadüg'oc. ²²Huin'it

Pedro miidnicxy Jesús ahuingujc, e oy ooy, yminañ:

—Huindzin, ca' Dios tzocy nicx jadu'n mjaty. Miid miich ca' jëbi jadu'n mjadipy.

²³Per Jesús yhuäc-huimbijty, chi nimay Pedro:

—Huinhuäctuutcich Pedro, je mujcu' miich jadu'n xyajcapxp. Ca' nigoo xy'adzipyich. Ca' miich mhuinma'nybidägy nej Dios tzocy. Yi' janchtiy miich mhuinma'n'ajtpy nej jäy ajcxy tzocy.

²⁴Huin'it Jesús je' ydiscípulos ajcxy nimay:

—Pen je pinjaty xypamina'nich, huen yci'mdzojcin ixmajtztäy etz huen yhuinma'nypidägy co ayoohipy miid iich ycixpi, ixti mabaad y'ögy. ²⁵Huen pinjäy huidibi ca' ayoohua'n miid iich ycixpi, hue' je' yajtigoyamy yi' yjugy'ajtin. Per pinjaty xypanixpich oy nej ytimyjadipy, hue' je' ypadamyb yjugy'ajtin huidibi ca' ycixipy ytigoyipy nimina. ²⁶¿Ti jäygidaacin yi' co tüg jäy y'ocnayyapadiiyb yi' meeñ etz mic'ajtin huindu'my ñaaxhuiñybi, e yjugy'ajtin cixipy tigoyipy tücci'y? ¿Jadu'nyii jëbi jäy y'alma yjugy'ajtin occojuyi? Nigi choohuüty jäy ajcxy y'alma yjugy'ajtin, ca'ydi jac ni ti. ²⁷Hiich, je jäy huidibi tzoon tzajpjoty, miinaambich jadüg'oc ya naaxhuiñ miid je ángeles ajcxy etz miid nDeedyich y'oy'ajtin. Huin'it micuejtähua'n tüg'óciy je jäy nej anajty ti ytuungixy, pen oy, o ca' y'oyity. ²⁸Janch tiy'ajt jadu'n nej nimaaygixy co ji ya naagity huidibi ca' y'öga'n ixti cooni

xy'ixipyich jadüg'oc co iich anajty nmiin ane'mbi.

Co Jesús ñinixc yajtigach

17 Codudujc xii huin'it Jesús miidnicxy Pedro, Jacobo, etz y'uch Juan ma tüg mijcop, ma tüg cop huidibi ooy ycixity. ²E jim copcixy Jesús ñinixc ñaygojtigajtzi ma Pedro, Jacobo etz Juan ajcxy yhuinduu. Jesús yhuiñyijp ytigiiy adiiexp nej je xii ytiicxin. E Jesús yhuít y'ahuimbijty janch poob jadu'n nej tüg tiicxin. ³E timetiini oy ijxcixy Moisés etz Elías ycapxy miydägy anajty miid Jesús. ⁴Chi Pedro nimay Jesús:

—Huindzin, oy y'oyity co iich ajt ya. Pen miich mdzocpy jëbi iich ajcxy nyaj'oyiy tugiig tjcquemy. Tüg miich mje!, tüg Moisés yje!, etz tüg Elías yje!.

⁵Pedro capxp anajty, tim huin'itiy tüg joc yajnidigoyday je' ajcxy huidibi ooy adiiexp anajty. E ma je joc yajmidoy tüg ayuc huidibi yminañ:

—Jadayaabi yëydijc iich je' n'ung'ajtpy huidibi ooy ndzocy njihuiyich etz yi' iich miid njotucjcity. Amidoo'it miich ajcxy yi' y'ayuc.

⁶Co Pedro, Jacobo, etz Juan jadu'n midooy je ayuc choon jocjoty, chi ajcxy ooy chigiiy etz ñayñitziitcidaaci ajcxy.

⁷Huin'it ajcxy Jesús ñimiini etz nidoñ ajcxy, e yminañ:

—Pidiccix, ca' mdzigiyyigixy.

⁸E co ajcxy y'ijxigy, ca' anajty jim Elías etz Moisés. Naydügpajc Jesús yjac-hui'my miid je' ajcxy. ⁹E co ajcxy yminajcy ma je cop, chi ajcxy Jesús nimay:

—Ca' ni pin miich ajcxy nyajnimähuipy jadu'n nej ti m'ijxcixy cham, ixti cooni iich anajty ti njugypicyich jadüg'oc ma anajty ti n'ögich.

¹⁰Huin'it je' ydiscípulos ajcxy yajtiy Jesús:

—¿Nej co yi' escribas, yi' ajcxy huidibi nijaydutp etz yajniguejp Dios y'ayuc, yminaangixy co Elías yi' miinaam jayijp etz axam je Cristo?

¹¹Chi Jesús y'adzooy:

—Janch tiy'ajt co Elías ymiinañ etz yaj'oyiydähuamy tüg'óciy miid Dios ycixpi. ¹²Per iich miich ajcxy nimaayb co Elías ti y'oy. E je jäy ajcxy ca' nejhuüy pin yi', e ooy jibic tuuñ ajcxy, nej tim tzojccixy. E nañ jadu'n iich, je jäy huidibi tzoon tzajpjoty ayoohuaambich ma yi' ajcxy.

¹³Huin'it je' ydiscípulos ajcxy huinjihuüy co Jesús hue' anajty ñigapxyp je Juan, el Bautista.

Jesús yajtzögy tüg jäy mo'tpa'mmiidpi

¹⁴Co Jesús, Pedro, Jacobo etz Juan yjäty jim ma je mayjäy ajcxy, chi ñimiini tüg jäy. Chi je jäy ycoxtinay'ihuüy ma Jesús yhuinduu, chi yminañ:

¹⁵—Huindzin, iich nmang pa'ayoohuic. Je' co ymiid mo'tpa'm etz oy yaj'iyoooyii. Canaag'oc ti ycäy jiiñjoty niñjoty. ¹⁶Paady iich ti nmiidmiinich ma miich mdiscípulos ajcxy, per ca' ajcxy ymadacy yajtzögipy.

¹⁷Chi Jesús y'adzooy:

—Miich ajcxy huidibi jugy'ajtp jadachambi xii tiempo, ca' miich

ajcxy mmibiga'n Dios, ca' miich ajcxy mgapxymidoohua'n Dios. ¿Naag xii naag tiempo iich miich ajcxy njacmimexxtugipy? Yajmiingix yi yeeg'anäg.

¹⁸Co je yeeg'anäg yajmiidja'ty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

¹⁹Jac co hueeñi, je' ydiscipulos ajcxy miidmiydac Jesús ahuingujc, chi ajcxy yajtiy ma Jesús:

—¿Nej co iich ajcxy ca' ti nmadägy nicx nyajpidz'imgixyich je ca'oybi ma je yeeg'anäg?

²⁰Chi Jesús yminañ:

—Je' co miich ajcxy hueeni mmibijcin. Janch tiy'ajt jadu'n nej nnimaaygixy, co ixypy miich ajcxy xy'ocmibicyich, ooy ixypy jëda'ajty jadu'n nej je jac mutzpi ujtz t'im, huin'it jëbi ixypy mnimäy jadayaabi cop co huen jiihuäcy ya etz huen nicxy huingduum, chi ñicxip je cop. Ni ti ji ycatzipity pen janch miich ajcxy miidity mibijcin. ²¹Jadayaabi picy ca'oybi pidzimipy co Dios nmibijctzoohuim mictägy etz ayuu'ijt, ca' jac ti huinma'ñ.

Jesús nigapxy jadüg'oc y'öcin

²²⁻²³Co anajty ajcxy yhuidity tügmucy jim ma Galilea y'it, chi Jesús nimay je' ydiscipulos ajcxy:

—Iich, je jäy huidibi tzoon tzajpjoty, yajcüyegipyich ma jäy. E yi' ajcxy xay'ögibich etz codugüg xii njugypigipyich jadüg'oc. Co je' ydiscipulos ajcxy jadu'n midooy, chi ajcxy ooy yjotmaybaty.

Je cogüejtin ma je tzajptijc

²⁴Co Jesús yja'ty miid je' ydiscipulos ajcxy jim ma je

Capernaum cajp, chi huidi anajty ajcxy meen yajmujcp miid tzajptijc ycixpi, oy ajcxy ijxcixy je Pedro, chi ajcxy y'amidooy:

—¿Nej miich mhuindzin ycuejcpy meen miid tzajptijc ycixpi?

²⁵Chi Pedro y'adzooy:

—Cuejty.

E huin'it hora co anajty Pedro ytigiy tigoty, chi Jesús jayijp ymigapxy, ñimay:

—Simón, ¿nej mmina'n? ¿Pin je rey ajcxy yajcuejcpy? ¿Yi' yjäy o huingjäy?

²⁶Chi Pedro y'adzooy:

—Ma huingjäy huidibi ane'my ijtp.

Chi Jesús y'adzooy:

—Ah, ca'tz yi' yjäy huaad ti cuejtcixy. ²⁷Per ca' ndzocyich co je cogüejtpi nyajcpxmayiyim, nicx miich ma yi' mij laguun e cohuidzi' jii by mxu'ñ, e je acx huidibi anajty jayijp huoomb, je' myajpidzimipy, e ma y'ahuac jii by mbaadipy tüg meen, yajpidzim je meen e nicx cuet miid iich ycixpi etz miid miich ycixpi.

¿Pin je' jac nigij mijip?

18 Je huin'it hora je' ydiscipulos ajcxy

ymijhuäctay Jesús etz yajtiy:

—¿Pinjäy je'jac nig ymiid je mij'ajtin ma Dios y'ane'my jii by tzajpjoty?

²Chi Jesús mijhuoy tüg je pi'c'anäg. Chi pidacy je pi'c'anäg cujc'amy ma yi' ajcxy. ³Chi Jesús yminañ:

—Janch tiy'ajt iich miich ajcxy nimäy, pen ca' miich ajcxy jothuimbijtcixy etz naybidaaccixy mhunma'ñ jadu'n nej jada

pi'c'anäg huinma'n̄ miid, pues ca' mdig'ihuipy ma Dios Teedy y'ane'my jiiby tzajpjoty. ⁴Paady, pinjaty miid yhuinma'n̄ yung nax jadu'n nej jadyaabi pi'c'anäg miid yhuinma'n̄ yung nax, je' je' je' huidiib jac n̄gi mij'ajt̄n ymiid jiiby ma Dios y'ane'my. ⁵Hueñypinity huidibi miid iich ycixpi cöbicipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngöbicyich, hue' jadu'n nipaady nej jihuüy ti xycöbicyich ti xychocyich.

**Je huidibi ooy ycojotmayity
co nbocycähuim**

⁶Hueñypinity huidibi jibic-huinma'n̄ ymibidzimy, e yajpocycäy yi jadu'mbi pi'ctijc huidibi ajcxy xymijnicxpejtpich, jac'oy ixypy co yi jadu'mbi jäy ytimyñayyöcxodz̄ȳii tüg paandzaa etz ñayñajtzjibibihuipy mejjoty. ⁷Ooy ayo'n̄ity ooy jibicity co ji naaxhuiñybi yajpaady tijaty huidibi yajtundigooby jäy ajcxy. Ni mina xii ca' tigoy y'idipy tijaty huidi yajtundigoy je jäy ajcxy. Per mij ayo'n pada'n̄ miid yi Dios pinjaty cojp tundigooyii. ⁸Pen miich mgi' o miich mdecy xyajtundigooyb, jac'oy ixypy co mdim'ixpuxy etz ixjibipy jiguem. Nigi oy co mdig'ihuipy ciduc tecytuc jiiby tzajpjoty etz ca'ydi co mdig'ihuipy miid metz mgi' etz metz mdecy mijjijnjoty huidibi nimina ycapich. ⁹E pen yi mhuiin tug xyajpocycähuamb, tim yajpidzim etz ixcätz jiguem. Com jac'oy mdig'ihuipy miid tüg mhuiin ma jugy'ajt̄n huinixiibi, ca'ydi co mdig'ihuipy miid metz mhuiin ma yi jiin huidibi camina xii ycapich.

Je y'ijxpejt, je cöbixy huidibi tigooy

¹⁰Ca' m'ixtjicxy ni tüg pi'c'anäg huidibi xymibijcpich. Yi' ajcxy je' y'ängeles tim ijt̄ib jiiby tzajpjoty ma Dios Teedy, iich nDeedy yhuinduu. ¹¹Iich je jäy huidibi tzoon tzajpjoty, ti nmiin̄ich ya naaxhuiñ, je' co nyajnitzöga'n̄ich je jäy ajcxy y'alma huidibi tigoyam. ¹²¿Nej miich ajcxy mina'n̄? Pen tüg jäy ymiid migo'px cöbixy, etz pen yöydiagooyb nidügti cöbixy, ¿nej ca' jēbi ixmach je nimida'px majmocx midaax cöbixy etz nicxy ixtäy je jadügpi huidibi yöydiagooy? ¹³E pen ypatpy je tügpi huidibi yöydiagooyb, chi ooy xondägy miid co anajty ti paady huidibi anajty ti ytigooy, ca' jadu'n yxondägy miid je nimida'px majmocx midaax huidibi ca' anajty ti yöytigooygixy. ¹⁴Tim jadu'n nipaady miid Dios Teedy jiiby tzajpjoty, ca' tzocy co ni tüg jäy y'alma tigoyipy.

**Nej huaad tüg mmigüg
nhuinmeecxim**

¹⁵Pen miich mmigüg xytuñ jibic, miidmiydac ahuingujc e yajhuinjihu'i' ma ti ytundigooy, pen xy'ayuchuinjihuiyib ti anajty mminaymigügpiigyii je mmigüg. ¹⁶Pen ca' xy'ayuc-huinjihuiy, chi huominipy tüg o metz mmigüg huidibi jēbi nidiy'ajt'adipy miich m'ayuc. ¹⁷E pen nañ ca' je' ajcxy ayuc-huinjihuihua'n̄, miidnicxip ma mibijcpidijc yöymujctac e jim ajcxy myajnaxipy jadu'n nej tüg huidibi ca' Dios mibicy etz jadu'n nej tüg yajcogüejtpi huidibi ooy pocymiidity. ¹⁸Janch tiy'ajt

hich miich ajcxy nimäy, tüg'óciy huidibi miich ajcxy mgapx'adujcxy ya naaxhuiñ, Dios nañ jadu'n capx'adugipy jiiby tzajpjoty, e huidibi miich ajcxy ya naaxhuiñ ca' capx'aducy, Dios nañ ca' capx'adugipy jiiby tzajpjoty. ¹⁹E nañ jadu'n hich miich ajcxy nimäy, pen ya naaxhuiñ miich ajcxy nimetz mnaygápxigixy co tijaty mmibijctzohuaangixy ma Dios, Dios, hich nDeedy huidibi jiiby tzajpjoty, xymóhuipy huidibi ajcxy mbijctzooyb. ²⁰Com ma miich ajcxy nimetz o nidugüg naymújcigixy, jim hich n'ity cujc'amy ma miich ajcxy.

²¹Chi Pedro y'amidooy Jesús yminañ:

—Huindzin, ¿naag'oc huaad nhuinmeecxyich y!' ajcxy huidibi xymidundigooybich? ¿Nej nméecxibich ixti cooni huixtujc'oci?

²²Chi Jesús y'adzooy:

—Ca' yhuixtujc'ócity, hue' meecxipy midaax migo'px jamida'px majmocx midaax'oc.

Je tumbi y'ijxpejt huidibi ca'p ymigüg huinmeecxy

²³Dios y'ane'min jiiby tzajpjoty jadu'n nipaady nej tüg rey huidibi huijtz'oyiib miid je ytumbidijc jajadu'ni ajcxy yjacminucxy'adyii. ²⁴Je rey ytimyhuijtz'oyiichondacyñi anajty cuentas, co oy yjädy tüg ytumbi huidibi anajty minuucxy'ajtip canaag millón. ²⁵Com je' ytumbi ca' anajty miidity ti miid migüediib je' yhuindzin. Huin'it je huindzin ane'my co

huen je' ytumbi yajtoocnax quipxyi miid y'ungdöxyijc etz tüg'óciy tijaty ymiid, jaydéb ñuucxy y'adujctáhuipy. ²⁶Huin'it ytumbi ycoxtinay'ihuiiy ma yhuindzin yhuinduu etz nimay: “Huindzin, pa'ayoogich, etz hich miich nmigüejtáhuipy.” ²⁷Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸E mic'amy co je' ypidzimy pujxtigoty, chi yminaybati tüg ymigüg huidibi anajty miid quipxyi ti ytuñ. Je' anajty minuucx'ajtip tim hueeni, chi je' yöcmimadziy je' ymigüg huidibi miid ytuñ, chi nimay: “Cuet huidibi mnuucx'ajtpy ma hich.” ²⁹Huin'it ymigüg ycojxtinay'ihuiiy ma je' yhuinduu. Chi minuucxtaacy nimay: “Pa'ayoogich. hich miich nmigüejtáhuipy.” ³⁰Chi je jadügpi ca' mecxtujcin yajtuñ. Chi oy ymigüg pidägy pujxtigoty, ixti cooni anajty micuedyii. ³¹Co je jacjadyii ymidumbidijc oy ix yjadu'n nej ti yajtuñ je' ymigüg, chi ooy ajcxy jihuiiy. Chi ajcxy nicx ma je yhuindzin etz yajnimayday tüg'óciy nejyaty anajty ti ijxcixy. ³²Huin'it je' ajcxy yhuindzin oy yajhuoyii je huidibi minuucx'ajtip canaag millón. Chi nimay: “Miich ooy mdzachjibicjäyity. Ti hich miich nhuinmeecxi tüg'óciy je mnuucxy, miid co miich pa'ayoohuin mbijctzooy ma hich. ³³E miich nañ jadu'n ixypy ti mba'ayoy je migüg huidibi miid mmiduñ, huidibi xyminuucxy'ajtp, jadu'n nej hich miich ti nba'ayooy.” ³⁴Chi je huindzin ooy chachjotma'ty, chi pidacy

ane'min co huen yajtzaachytuñ je' ytumbi mabaad cuejttäy tüg'óciy huidibi ñuucxy'ajtpy. ³⁵Chi Jesús ycapxycíjxni, minañ:

—Tím jadu'n nej jada rey ti tuñ miid je ytumbi, nañ tím jadu'n Dios tunipy miid miich ajcxy, pen ca' nidüg nidügti miich ajcxy ca' mhuinmeecxy je mmigügtijc amumdüjot.

Jesús yaj'ixpicy miid co jäy ytöxyijc ixmach

19 E co Jesús capxtay jada ayuc, chi choñ Galilea, chi oy yjädy ma Judea it jim Jordán mij nii ñinaxy. ²Chi ooy mayjäy ypaníxci, e jim yajtzoocy huidijaty anajty yuu miid pa'm miid.

³Huin'it nijëjity je fariseos ajcxy nimiin Jesús co yajmachcähuaangixy anajty. Chi ajcxy y'amidooy:

—¿Nej janch co Dios ti xymooyim cötujcin co jëbi tüg yëydijc ixmadzip ytöxyijc miid tím hueeni ti capxy ti ayuc?

⁴Chi Jesús y'adzooy:

—¿Nej ca'ni miich ajcxy m'ixy mgapxy ma ymiin jaybety ma Dios ñecy co je naaxhuiñybi chondacy, co Dios oga'n yajcojy tüg'óciy tijaty huidibi j'ajtp co “Dios yajcojy tüg yëydijc etz tüg töxyjäy?” ⁵Nañ jadu'n Dios yminañ: “Je yëydijc y'ixmadzip ytat yteedy etz pudigihuipy je' ytöxyijc. E je yëydijc etz ytöxyijc tú'ciy idaangixy.” ⁶Paady ca' ñimetzity ajcxy, com je yëydijc etz ytöxyijc tügmucy y'idaangixy. Com Dios ti huijtmucy je yëydijc miid je töxyjäy, paady ca' huaadity co

jäy ajcxy huijtzhuäcxyp tiibi Dios huijtmucy.

⁷Huin'it je fariseos ajcxy y'amidooy Jesús:

—¿Na'amy co Moisés cötujcin ti yejcy jecy'ajty co tüg yëydijc jëbi huaad ixmach ytöxyijc, e möhuipy ñinecy ñidiy'ajt e jadu'n jëbi ixmach?

⁸Chi Jesús yminañ:

—Moisés jada cötujcin ti xymooygixy co jëbi m'ixmajtczicy mdöxyijc miid co miich ajcxy mdzachcöjuuñity, ca' mgapxymidohuaangixy Dios. Per co je naaxhuiñybi chondacy ca' anajty jadu'nity. ⁹Janch tiy'ajt jadu'n nej iich miich ajcxy nimaangixy co je yëydijc huidibi yajjayhuäcxp miid je ytöxyjäy, e je ytöxyjäy ca' anajty ti ytundigooyb miid huingbi yëydijc, hue' je' yëydijc ytundigooy co ixmach ytöxyijc etz ypijctigach miid huingbi. Nañ tím jadu'n pen tüg yëydijc ypicy miid tüg töxyjäy huidibi ñäy ti y'ixmachyii, hue' tundigooyb anajty je yëydijc.

¹⁰Co Jesús ydiscipulos ajcxy midooy jada ayuc, chi ajcxy yminañ:

—Pen jadu'n jëdu'n je tiy'ajt co je yëydijc ca' huaad ixmadzip ytoxyjäy, jac'oy co ca' nbjicim.

¹¹Chi Jesús yminañ:

—Ca' tüg'óciy je jäy huinjihuüy jadayaabi tiy'ajt. Jëyi ajcxy huinjihuüip pin ajcxy Dios pidaaci co huinjihuüip. ¹²Ji canaagnax je ayuc je huinmañ nej ca' yjëbity ypigipy je yëydijc. Naagity pi'ctijc yma'xung'aty e ca' yca'pxity ñinicxy, paady ca' picy ajcxy. E nijëjity je yëydijc ca' huaad

ypicy, miid jëgixpi co anajty je'
ti ymijaapigiyii. E nijëjity yëdyjc
hui'my jaybicy miid jëgixp co ajcxy
ytuñ ma Dios ytung, je Dios huidibi
ane'myb tzajpjoty. Pinjaty cöbigamy
iich n'ayuc huen cöbicy.

Jesús conucxy maybi'ctijc

¹³Chi naagity je jäy miidnicxy
y'ung y'anäg ma Jesús jaydëb
yajcñixajipy etz Dios miibjctzoy
miid y' ajcxy ycixpi. Chi Jesús
ydiscipulos ajcxy oty je jäy ajcxy
huidibi anajty miid miimb je y'ung
y'anäg, nimaaygixy co ca' jadu'n
y'oyity. ¹⁴Per Jesús yminañ:

—Huen miid miñ ajcxy pi'c'anäg
ma iich, ca' mjijpcogapxiygixy.
Com pinjaty ymibijcp iich ngapxy
n'ayuc, jadu'n nej jadaaabi
pi'c'anäg ajcxy ymibicy, je' ajcxy
tigihuam ma Dios y'ane'my jiiby
tzajpjoty.

¹⁵Chi Jesús cñixajy je pi'c'anäg
ajcxy. Chi ñicxni.

Tüg yeeg'anägnip comeeñybi miidmiydägy Jesús

¹⁶Chi tüg yëdyjc oy icy Jesús.
Chi y'amidooy:

—Huindzin, çti jada' co oy iich
ndunipyich jaydëb nbaadibich
jugy'ajtin huidibi ca' ycixipy
ytigoyipy?

¹⁷Chi Jesús y'adzooy:

—¿Na'amy co xyñimäyich co oy
huindzin iich? Dios tügpajc oyip,
ca' jac pin. Pen miich mdzojpcy
co mbada'ñ jugy'ajtin huidibi
ca' ycixipy ytigoyipy nimina
mguydunipy je Dios ycötujcin
huidibi Moisés ycojaay jecy'ajty.

¹⁸Chi je yeeg'anäg yajtiihuimbijty:

—¿Huidibi cötujcin miich mdijp?

Chi Jesús yminañ:

—Ca' migüg myaj'ögipy. Ca'
migüg ytöxyjc migapxtigooyipy. Ca'
mmeedzip. Ca' mmigüg mhuin'iinip.
¹⁹Yajmij'at mdaj mdeedy. Mdzogipy
mjihuñhuip miich mmigügtijc, tim
jadu'n nej miich ci'm mnaychogyii.

²⁰Chi je yeeg'anäg Jesús nimaayi:

—Ti nguydunäyich
jadaaabi cötujcin ajcxy maabi
iich nbi'c'atyich. ¿Ti jada
njacyajtigoy'ijtpyich?

²¹Chi Jesús jadüg'oc y'adzooy:

—Pen miich m'idam tudägy,
nicx tootigoyda' huidijaty miich
miid, etz mo' je meeñ je jäy ajcxy
huidijaty ayoob. Co jadu'n mdunipy,
chi mbaadipy oy'ajtin jiiby tzajpjoty.
Co jadu'n mdooctähuipy tijaty
miich miid, chi miinip jadüg'oc ma
iich nyajpaadyich, e pajamgich.

²²Co je yeeg'anäg jadu'n midooy,
chi ñicxni taj may com ooy anajty
chachcomeeñity.

²³Huin'it Jesús nimay je'
ydiscipulos ajcxy:

—Janch tiy'ajt jadu'n nej
nimaaygixy co ooy ymijhuinma'ñity
co tüg comeeñyjäy ytigihuipy
ma Dios y'ane'my jiiby tzajpjoty.

²⁴Jadüg'oc nmına'ñich co ooy
chipity co tüg comeeñyjäy tigihuipy
ma Dios y'ane'my, nigì ca' chipity
co tüg camello ñaxipy ma tüg
xu'ñ'ijx yxutity.

²⁵Co Jesús ydiscipulos ajcxy jadu'n
midoy, chi ajcxy ooy jihuüy huinmay.
Chi ajcxy ñay'amidoohui miñ xyipy:

—¿Pin jëbi paady je' y'alma
nïdzocin?

²⁶Chi Jesús ajcxy huindicxpejty
etz nimay:

—Je huidibi jäy ajcxy chipjihuiyb, miid Dios ca' ni ti chipity.

²⁷Huin'it Pedro ymina'ñ:

—Huindzin, iich ajcxy ti n'ixmajtztäyich tüg'óciy huidijaty anajty iich ajcxy nmiid etz nbanicx iich ajcxy miich. ¿E ti jada' iich ajcxy nbaadaamybich?

²⁸Chi Jesús y'adzooy:

—Janch tiy'ajt nmina'ñich co anajty je xii je tiempo paady mina Dios yajtigajtztähuipy je tzajp etz naaxhuiñybi, co anajty iich, je jäy huidibi tzoon tzajpjoty, n'ityich ma ngötujctacich oybi jiiby tzajpjoty, chi miich ajcxy huidi ti xypahuidityich, miich ajcxy mbadamy majmetz cötujctac, e miich ajcxy mdiydunipy je majmetz picypi Israeljäy ajcxy. ²⁹E tüg'óciy jäy ajcxy huidibi ti ixmajtztäy yjiiñ ytijc, y'uch ymigüg, y'ung ytöxyjic, y'ung y'anäg, ytaj yteedy, o ycam ytu' miid iich ycixpi, yi' ajcxy ypadamyb migo'px'oc, ca'ydi huidibi ti ixmach. E ypadamy je jugy'ajtin huidibi ca' ycixipy ytigoyipy ni mina. ³⁰Mayjäy ajcxy huidibi cham ymiid mij'ajtin cötujcin, tzajpjoty ca' ajcxy miid'ada'ñ mij'ajtin cötujcin. E mayjäy huidibi cham ca' miidity ajcxy mij'ajtin cötujcin, tzajpjoty ymiid'adamy ajcxy mij'ajtin cötujcin.

Je naymiduniptijc y'ijxpejt

20 Jadu'n Jesús ymina':
—Je Dios y'ane'min jiiby tzajpjoty jadu'n nipaady nej tüg cogambi huidibi ooy mij cam miidity. Chi je cogam jopyñi choñ ma oy nicxy ixtäy tumbidijc ajcxy

huidibi yajpidigipy yi uva cosecha.

²Chi ycapxytuñ miid nidüg nidüg ytumbi co mujuya'ñ tüg denario meeñ tüg xiibi. Chi quejxy nidüg nidüg ytumbi ma je uva cam. ³Chi petyxii je cogam ñicxy jadüg'oc tumbi ixtaayb. Chi paty cajp cujc nijëjity tumbi huidibi ca' ti tung miidity. ⁴Chi je cogam je tumbi ajcxy nimay: “Ñicx miich ajcxy tuñ ma iich ngosecha. Cham nmujuyipy jadu'n nej ytiy'ajtity.” Chi ñicxy ajcxy midumbi. ⁵Chi je cogam ñicxy jadüg'oc cujcxii tumbi ijxtaayb. Nañ jadu'n nicxy jadüg'oc minacyxii. ⁶Nañ tim jadu'n tzuu jadüg'oc je cogam ñicxy tumbi ijxtaayb, chi paty nijëjity cajpcujc huidibi ca' ti tung miidity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷Chi je' ajcxy y'adzooy: “Je' co ca' iich ajcxy pin ti xycapxytuñ.” Chi je cogam ajcxy nimay: “Ñicx miich ajcxy tun ma iich nnaaxjot. Cham iya nmujuyipy jadu'n nej ypaadyii.” ⁸Co oy ycodziyñi, chi je huindzin nimay je huidibi nigop'ajtp je tung: “Ñicx mijhuoodäy je tumbidijc etz mujuyipy. Mujuy jayijp huidibi ti ymiin axam tumbi etz jim nicxy myajcogixiy ma huidibi anajty ti miin jayijp tumbi.” ⁹Chi ajcxy jayijp yajmujuy je tumbi ajcxy huidibi anajty ti ytigiñy tumbi axam. Chi yajmujuy ajcxy jadu'n nej anajty jäy ñaymujuyii je tüg xiibi. ¹⁰Co miin je tumbi ajcxy je huidibi ajcxy jayijp tigiñy tumb. Chi ajcxy jot'ajti co jac'anaxy yajmujuya'ñ. Per quipxyjaty ajcxy paty tüg meeñ nidüg'óciy je tumbidijc. ¹¹E co

ajcxyc quipxyjaty yajmujuy, chi ajcxyc ytiigiij jotma'tpi. ¹²Chi ajcxyc nimay je cam huindzin: “¿Na'amy co quipxyjaty iich ajcxyc ti xymujuyich miid je huidibi ti miin axam tumbi? Yi' ajcxyc tög jaxigy ti ytuñ, e iich ajcxyc tög xii je anbi ti ngöbicyich.” ¹³Chi je cam huindzin y'adzooy, nimay nidügti je' ajcxyc: “Miich, iich nmigüg, ca' iich jibic ti nduñich miid miich. ¿Nej ca' iich ajt ngapxytuunim co jadu'n nmujuya'n tög denario meeñi? ¹⁴Con yi mmeen, e nicxni. Jadu'n ndzocyich co quipxyjaty nmujuya'nich miich miid huidibi ti ymiñ axam ma je tung. ¹⁵¿Nej ca' huaad iich nduñich miid iich nmeen nej ndzócyichi? ¿O co xyajca'oy'ixyich, co iich ooy n'oyjäyity?” ¹⁶E huidibi ajcxyc jaccogixiib, yi' ajcxyc jayjip'adam. E huidibi ajcxyc jayjip'ajtp cham, yi' ajcxyc yjaccogixihuamb. May ooy yjayajhuoomiñ e hueeni huidi huin'ixjipy.

**Jesús capxypidzimy
jadü'oc co y'öga'n**

¹⁷E co Jesús anajty ñicxy ma Jerusalén tü'aa, chi miid nicxy ahuingujc je nimajmetzpi ydiscipulos. Chi ajcxyc nimay:

¹⁸—Jadu'n nej miich ajcxyc m'ijxy mnejhuüy cham iich ajt nba'ttiigiim jim Jerusalén. Jim Jerusalén iich, je jäy huidibi tzoon tzajpjoty, xyajcicyegaamich je teedy migtungmiidpi etz escribas ajcxyc. Nyajtiyduna'nich etz pidäga'n ajcxyc ané'min co n'ögibich. ¹⁹E yi' ajcxyc xycicyega'nich ma je huidibi ca' yjudiojäyity, jigix xyñixigibich xyajxigibich, xycoxipich, etz

xyajcruutzpedipich ajcxyc. E co n'ögibich, chi njugypigipyich codugiig xii.

**Huidibi Jacobo etz Juan
ytaj ypijctzou**

²⁰Chi je Zebedeo ytöxyijc nimiiñ Jesús miid metz je ymang; Jacobo etz Juan. Huin'it je ungdaj huingojxtinay'ihuüy Jesús, pijctzoy may'ajt. ²¹Chi yajtiij Jesús:

—¿Ti mdzocjpy?

Chi je ungdaj y'adzooy:

—Tun may'ajt möhuipy iich metzpi yi nmang yi jacmigtung ma miich m'ane'min, jaydeb iñahuipy ma miich mmijc, tög a'oy'amy etz jadüg anajty'amy.

²²Chi Jesús y'adzooy:

—Miich ajcxyc ca' mhuiñihuüy ti ajcxyc mbijctzooyb. ¿Nej mminaxa'n myajnaxa'n miich ajcxyc je tzaachypi huidibi iich nminaxamy nyajnaxamyich? Jadu'n nej jihüy m'üga'n ajcxyc je ta'm nii huidibi iich n'ügamy e mbaada'n je niibeitin huidibi iich nbadamyb.

Chi je' ajcxyc y'adzooy:

—Jëbi.

²³Chi Jesús ymina'n:

—Janch tiy'ajt nej miich ajcxyc mina'n co mminájxcixipy myajnájxcixipy je tzaachypi huidibi nnaxa'nich. Per ca' iich cötujcin nmiididyich co iich miich ajcxyc nbidägipy migtungmiid, co myajpaadip tög ma iich nmijc a'oy'amy e jadüg anajty'amy. Hue' janchtiy Dios Teedy ymiid ni'ixi' pinjaty ti huin'ixy jaydeb yajnicxip je migtung ma iich n'ane'mdac.

²⁴Co je nimajcpi ydiscipulos ajcxyc nejhuüy jadu'n nej Jacobo etz Juan

pijctzooy may'ajt ma Jesús, chi ajcxy ooy mijotma'ty Jacobo etz Juan.

²⁵Huin'it Jesús mijcapxy je' ydiscípulos ajcxy, chi nimay jadu'n: —Miich ajcxy mnejhuiy co yi jäy ajcxy huidibi mijtungmiidpi ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt miid ma je maybi naax cajp, mic ajcxy ane'my je jäy ajcxy. ²⁶Per miich ajcxy ca' mjadu'nity nej je mijtungmiidpi ma je maybi naax cajp. Pñjaty miich ajcxy je mij tung yajnicxip, copicy ñaybidägiyb nej tüg tumbi. ²⁷Pen ji miich ajcxy nidüg nigohuajc'ada'ñ, copicy ñaybidägiyb nej tüg tumbi. ²⁸Com iich nañ jadu'n, je jäy huidibi tzoon tzajpjoty, ti nmiñich ya naaxhuiñ jaydëbi nbubedipyich yi mayjäy ajcxy. E canan yi' ajcxy xypubedipich. Ngäyegaamyich njugy'ajtin ma yi o'cin miid je mayjäy ycixpi, jaydëbi ngohua'nich jäy ajcxy y'alma huidibi tigoyam.

Jesús yajtzoocy metz jay huintzpi

²⁹E co Jesús etz ydiscípulos ajcxy ycajppidzimy jim Jericó, chi ypanicxi ajcxy mayjäy. ³⁰E jim anajty iñaay nimetz huintzpi tūba'áy. E co ajcxy nejhuiy co jim anajty ñaxy Jesús, chi ajcxy yaaxpi jojcpí:

—Huindzin, David y'ap y'oc, tun may'ajt iich pa'ayoog.

³¹Chi je mayjäy ajcxy ojcooty je metzpi jäy huintzpi, nimay ajcxy co huen amoñ. Per je huintzpi nígi minan'idich:

—Huindzin, David y'ap y'oc, tun may'ajt iich pa'ayoog.

³²Huin'it Jesús ytinayxijp, e ymíñañ:

—Ocmin miich ajcxy ya.

Huin'it yajtiy:

—¿Ti mdzojcpy ndunipyich miid miich?

³³Chi ajcxy ñímaayi:

—Huindzin, ndzojcpyich co xyajhuindicxi'ibich.

³⁴Huin'it Jesús pa'ayoogoty ajcxy. Chi ajcxy nidoni ma je' yhuin, e mic'amy je huintzpi ajcxy y'ijxígy. Chi Jesús ajcxy panicxy.

Jesús ytiigi y jim Jerusalén

21 E co anajty Jesús etz je mayjäy ajcxy ti mihuingoni Jerusalén, chi yja'ty ma Betfagé cajp mihuingon je Olivos cögop. E jim Jesús quejxy nimetz ydiscípulos ajcxy. ²Chi ajcxy nimay:

—Nícxcix ma je cajp huidibi jim'amy. E jim tüg burro ycoxochity miid y'ung. Coguejtüdüp ajcxy je burro e yajmiingix ya ma iich. ³E pen jim pin nej xyñimäy, nima' co je Huindzin yajtunam, e yajhuimbida'ñ mic'amy.

⁴Jadayaabi oy jadu'n ytuñiy yjadyii ycixy yca'pxy jadu'n nej je profeta jecyip jaay, co jadu'n ymíñañ:

⁵Yajnima' je jäy ajcxy huidibi tzinaayb jim Sión (Jerusalén), oc'ijxcix, chi miñ ajcxy je mrey, yung nax yjot yhuinma'ñ miidity je mrey, etz burrocíxy miñ. Ma tüg burro mang huidibi ytaj tzimy yajyöyp.

⁶Chi je metz ydiscípulos ajcxy cuyduñ nej anajty Jesús ti y'ane'myí. ⁷Yajja'ty ajcxy je burro

miid ymang. Chi Jesús ydiscípulos ajcxy jiibe'ñ je metzpi burro miid ajcxy yjocxhuit, chi Jesús yaj'iñay je burro mang. ⁸E je mayjäy ooy yajhuinyëbiy ajcxy je tü'aa miid yhuit, chi ajcxy oy ypxy quipy y'aacx. Chi ajcxy pidacy ma je tü'aa. ⁹E jim ñajxy je burro, e je mayjäy huidibi nicxp jayijp, e ñañ jadu'n huidibi anajty mimb axam, ooy ajcxy ytigiiy huambi jihuiyb, chach minaangixy:

—iHosana! iGloria a Dios! iOoy ycömayity Dios! Huen capxpaady idipy jada yëydijc huidibi mimb ma yi nHuindzin Dios yxii etz miid ymic'ajt. iGloria a Dios!

¹⁰Co Jesús ytigiiy jim Jerusalén, chi tüg'óciy je mayjäy huinmay'ahuidijty, chi ñay'amidóohuigixy miñ xyipy:

—¿Pín yi' yjiibi jäy?

¹¹Chi mayjäy y'adzooy:

—Yi' je' je profeta Jesús huidibi tzoon ma Nazaret cajp ma Galilea it.

¹²Huin'it Jesús ytigiiy ma Dios ytiyc. Chi ixquejtay tüg'óciy je ajuybi adoocpi huidibi anajty yajpatp jiiby. Chi tijhuimbijttay tüg'óciy je mesa ma anajty jäy jim ymeeñyhuingogongixy, etz ñañ jadu'n tijhuimbijttay je muuxytoocpi ññaybejt. ¹³Chi jadu'n nimay ajcxy:

—Jaaybety jadu'n ymiiñ ma Dios ñecy: “ñich ndijc je' yi' ma jäy ajcxy Dios mibijctzoy”, per miich ajcxy hue' yi' mhua'ñ meetzpi tiyc.

¹⁴E co anajty jiiby tzajptigoty Jesús, chi jiiby ñimiini huidijaty anajty huintz, huidijaty anajty cïma'ty tecyama'ty, chi Jesús yajtzoocay. ¹⁵Per je teedy ajcxy

huidibi mijtungmiid etz je escribas ajcxy ooy mijotma'ty Jesús co ajcxy ijxy nejhuuiy jadu'n nej Jesús anajty tuñ mijhuinma'ñ. Etz ñañ jadu'n ajcxy ijxy co je pi'c'anäg anajty ajcxy yhuaangixy yjihuiygixy jiiby tzajptigoty, yminaangixy: “iHuen cömay'idipy je rey David y'ap y'oc!” ¹⁶Chi je teedy etz escribas ajcxy Jesús nimay:

—¿Nej ca' miich mmidooy nej je pi'c'anäg chach minaangixy?

Chi Jesús y'adzooy:

—Nmidooybich. ¿Nej ca' miich ajcxy mgapxyñi Dios ñecy ma ymiiñ jaaybety co jadu'n ymina'ñyi?:

Ti may'ixpxicy iiy ma je pi'ctijc ma'xungdijc jaydëbi ajcxy iibaadip capxpaadip Dios.

¹⁷Chi Jesús ycapxycijxy miid je teedy etz escribas ajcxy etz choon jiiby tzajptigoty. Chi ñicxy ma Betania cajp, e jim yajnajxy je tzumbi.

Jesús capxpojcy je higueri ca'p anajty ytiim'aty

¹⁸E co yxiimiy ytiicxigy, chi Jesús yhuimbijty Jerusalén. E ma anajty tim ytüyöy, jim yuuböccooti. ¹⁹E jim ijxy ma tüba' tüg cop je higueri quipy. Chi ninicxy. Chi pä'tijxy, per ca' anajty ni tüg ytiim, jëda'ajty je' y'aay. Chi Jesús nimay je higueri quipy:

—iNi ca minaa xii mdiim'adipy!

E mic máciiyi je higueri quipy ytiich. ²⁰E co je' ydiscípulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co yi higueri quipy mic'amy ti ytich?

²¹Chi Jesús y'adzooy:

—Janch tiy'ajt jadu'n nej nnímaaygixy. Pen miich ajcxy miid je mibíjcin, etz ca' ajcxy mmibíjcy aametz jotmetz, jébi mǐjhuinma'n mdungixy nej iich ti nduñich. E nañ jadu'n jébi jac mǐjpi mǐjhuinma'n mdunípy ajcxy. Jébi ajcxy tun cop mnímäy: “Quëg ya, tigi' meyjoty” e xycapxymídohuípy ajcxy je tun je cop. ²²E tüg'óciy tijaty miich ajcxy mbíjctzooyb huen ytimytijyíty, pen mmibíjcp ajcxy, mbaadip ajcxy.

Jesús ycótújcin

²³Co Jesús yja'ty Jerusalén, chi ytigíy jadüg'oc ma Dios ytíj. E jíiby anajty yaj'ixpícy je mayjäy, chi ñimiini je teedy mǐjtungmiidpi etz judío mǐjjäydíj ajcxy. Chi ajcxy y'amídoohuí:

—¿Ma cötujcin ti mbaady co jadu'n mduñ tzajtígoty? ¿Pin jada cötujcin ti xymöy?

²⁴Chi Jesús y'adzooy:

—Nañ jadu'n iich miich ajcxy nyaj'amídoohuamy tüg ayuc. Pen m'adzooyb ajcxy jada ayuc, huin'it iich miich ajcxy nyajnimáhuípy ti cötujcin iich miid nduñ huidíjaty.

²⁵¿Pin quejxy je Juan, je Bautista, yajniibejtpí, Dios o jäy ajcxy?

Chi ajcxy ñayñimáayígixy miñ xyípy:

—Co ixípy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmibíjcy Juan?” ²⁶Per nañ jadu'n ca' huaad nmínaaním co jäy ajcxy yajniíbíjcy Juan, com nejhuiyím co yí mayjäy mibíjccíxy co je' anajty Dios tüg y'ayucnajtzcaxíybi.

²⁷E paady ajcxy jadu'n adzooy Jesús:

—Ca' iich ajcxy nejhuiyígixy.

Huin'it Jesús ymínañ:

—Nañ jadu'n iich ca' nigapxa'ñich pin je' ycötujcin miid nduñich huidíjaty.

Je metzpi ung íjxpejt

²⁸Chi Jesús ymínañ:

—¿Nej m'oc'íxy m'ocjaygugi' jadyaabi íxpejt? Tüg je yéydíj ymiid anajty metz je' ymang. Chi nimay je mǐjpi: “Nícx cham m'octuñ ma iich n'uva cam.”

²⁹Huin'it je' ymang y'adzoohuí: “¿Ca' nnícx'a'ñich!” Chi jaccóhueñyí je' ymang yhuinmaydíjajch, chi ñícxxy tumbí. ³⁰Chi je ungedeedy oy íxy je ymang mutzpi. Chi nañ jadu'n nímáay co huen nícxxy tuñ. Chi je' ymang mutzpi y'adzooy: “Oy, cham nícxibích.” Per ca' ñícxxy.

³¹¿Huidí je' nidügti ycuýduuñ nej anajty yteedy tzocy?

Chi ajcxy ymínañ:

—Je' ymang mǐjpi huidíbi jayíjp nímay.

Huin'it Jesús nímay ajcxy:

—Janch tiy'ajt jadu'n nej nímáaygixy co je huidíbi ajcxy yajcogüejtpí etz je töxyjäy ajcxy huidíbi tundígooyb miid yéydíj, je' ajcxy tigíhuamb jayíjp ma Dios y'ane'my jíiby tzajpjoty, ca'ydí miich ajcxy.

³²Paady ycíxpi oy ymiin je Juan huidíbi jäy ajcxy yajniibejt, Juan yajni'ixíyígixy je mayjäy nej ajcxy jébi yjothuimbidípy ma Dios. E miich ajcxy ca' mibíjcy jadu'n nej Juan ymínañ. Per je' ajcxy huidíbi yajcogüejtp etz je

töxyjäydijc huidibi tundigooyb miid yëydijctijc, ymibijc je' ajcxy Juan. Oy miich ajcxy mja'ijxy, per ca' mjothuimbidaangixy etz ca' mibigaangixy.

**Je naymiduuniptijc
jibicjäybi ajcxy y'ijxpejt**

³³Chi Jesús yminañ:

—Oc'amidoo'ijtcix jadayaabi ijxpejt. Ji anajty tüg je huidibi nihuindzin'ajtp mijpi je tundac. Chi je cogam uvas cojy ma je ytundac etz jügajy. Chi yaj'oyiyy ma anajty jëbi je uvas ñii yajnigidägaani. Nañ jadu'n cojy tüg tzaaboch cixpi, jigix jëbi cuend'aty ycam. Co yaj'oyiyday, chi je cogam yejcy pijctzoy je ycam ma je jäy ajcxy huidibi naymidunaanip. Chi oy chooni je cogam nicxy viaje tumbi.

³⁴Je huin'it tiempo co yhuaad'ajtni je cosecha, chi je cogam quejxy nijëjity ytumbi jim ma huidibi anajty ti yajpijctzoy je ñaax co huen möyii je huidibi yi' paadaanip.

³⁵Per je jäy huidibi anajty ti naax pijctzoy, chi ajcxy majch je tumbi. Chi ajcxy ooy huinhuojpy jiphuojpy tüg. Chi ajcxy huingäch jijpcäch jadüg. Chi ajcxy je midugiigpi yaj'o'cy. ³⁶Chi je conaax cogam huingbi ytumbidijc quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷Chi yci'm'ung oy quejx cogixiyyñi. Hue' jot'ajti co yajmij'adiyyb je' y'ung. ³⁸Per co ajcxy je tumbidijc ijxpaty je cogam je' y'ung, chi ajcxy ñaygapxi:

“Tzoc ajt yaj'o'cim je cogam ymang, com yi' je' mihui'mamb je' yteedy je yjugy'ajtin je ypidägy.

E co ajt nyaj'o'cim, chi iich ajt nmihui'mim je cam.” ³⁹Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰Huin'it Jesús yminañ:

—Co anajty ti miiñ je conaax je cogam, çti jada' y'octunipy miid je tumbidijc ajcxy?

⁴¹Chi je teedytjyc etz mijjäydijc y'adzooy:

—Je cogam yaj'ögipy yjiibi jibicjäydijc, ca' ajcxy pa'ayoohuipy, etz yegipy je uvas cam pijctzoy ma je huingbi jäy huidibi yegipy je pidägy huidibi cogam paatip.

⁴²Chi Jesús yminañ:

—¿Nej ca'ni miich ajcxy mgapxy ma miiñ jaaybety ma Dios ñecy? Jadu'n yminañ:

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tüg tzaa oybi huidibi je pojtzpidijc ca' ajcxy yajtuna'ñ, e je' je' oy ti yhui'mni ma anajty yjaccopicyity. Je Huindzin Dios jada tung ti tuñ, e ooy oy n'ijxim yi' ytung.

⁴³E paady jadu'n iich miich ajcxy nimäy co miich ajcxy myajpiga'ñ yi m'it mluagar jiiby tzajpjoty ma Dios y'ane'my etz yajmöhua'ñ je huingbi jäy je huidibi amuumdügjot naygiyejcip ma Dios. ⁴⁴Pinjaty ca' cöbiga'ñ jada mij'ane'mbi, ayo'n ypadaamb, ytimnipatp nej jihuüy jim ycixciday ma je tzaa nicx, tijhuidz yjajtähuipy. O pen je mij'ane'mbi midziptzoñ je jäy, chi ytigoydähuipy ajcxy, tim jadu'n nej jihuüy je tzaa ñigidaagoodyii ajcxy, e janch jaam pux nicxy yjaty.

⁴⁵Co ajcxy midooy, chi je teedytjic etz je fariseostjic huiñjihuiñ co y'i' ajcxy yajñigapxyp, ⁴⁶chi Jesús ajcxy jamadzaañ. Per tzigiñyb anajty ajcxy miid je mayjäy, je' co je mayjäy anajty mibijccixy co Jesús najtzcaxñyb Dios ytiy'ajt.

Je ixcpejt ma jäy anajty pijcpidijc nixiuduñ

22 Chi Jesús jadüg'oc ytiñiy capxp miid ixcpejt, yminañ jadu'n:

²—Je Dios y'ane'min jadu'n nipaady nej je rey ymang ocnixiuduñ co ti ypicy. ³Chi je rey quejxhuäcxtay je ytumbi co huen nicxy huoomujtaaygixy je huidijaty anajty ti yaj'nimaaygixy co mingixipy ma ytuna'ñyii yjada'ñyii je pijcin. Per ca' je' ajcxy ymiina'ñ ma je pijcin nixiuduñ. ⁴Chi quejxnip huingbi ytumbi, nimay ajcxy: “Nimaaygix je tiibi oy jayijp'aty mnimaaygix jadu'n co huen mmiingixy ma yam je caayin uucin ni'ixi' y'ity. Ti je huaj nicxpi nyaj'ögyich. E ni'ixi' ijtaayñi, huen miñ ajcxy ma je pijcin ytuna'ñyii yjada'ñyii.” ⁵E je' ajcxy tiibi anajty yaj'nimaaygixy, ca' ajcxy je' ytimy tuñ cuendi. Nijëjity ajcxy ñicxy ma ytundac. Nijëjity ajcxy ñicxy toocp yejcp; ⁶e nijëjity ajcxy majch je rey yquejxyöyb ajcxy, chi ajcxy oy chaachytuñ, chi yaj'o'cy. ⁷Chi je rey ooy chachjotma'ty. Chi je soldados ajcxy quejxy co huen nicxy yaj'öctäyii je jäyyaj'öcp ajcxy etz ytoydañuip je ycajp. ⁸Chi je rey nimay je ytumbi ajcxy: “Ni'ixi' ijttäy ma jadayaabi je pijcin yajñixiduna'ñ. Per je huidibi ajcxy

ti yajñimäy ca' ajcxy mihuaadity co ymingixipy. ⁹Nicx miich ajcxy majaty jäy yjiin ytjic. Nimaaygixy tüg'öciy pinjaty ajcxy mbaty, co huen miingixy ma je pijcpi.” ¹⁰Chi ñicxy je rey ytumbi ajcxy. Chi ajcxy miidmiinday je mayjäy, je oyjäybi etz je jibicjäybi. Chi y'ujtztay je rey ytjic miid je mayjäy. ¹¹Huin'it je rey ytiñiy mayjäyjoty, ixa'ñ anajty huidijaty ti yajhuomiñ. E jiiby tüg yëydjic ti ixcpaty huidibi ca' anajty ti ñayxoxyii, jadu'n nej jäy nayxóxigixy co ajcxy nicxy ma tüg pijcin. ¹²Huin'it je rey minañ: “Migüg, ¿nej ya ti mdigiy tigoty, e ca' mxojx miidity nej ypaadyii?” E je yëydjic amoñyi je' yhui'my. ¹³Chi je rey nimay huidibi anajty jim pubejtp: “Cixotz tecyotz jada yëydjic etz pidäg agootztuuby. E jiiby yjihuipy yäxipy, jiiby ytiñtz huiñqueedip miid jotmay.” ¹⁴Com may je jäy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüeجتin ñimiydägy

¹⁵Je huin'it tiempo je fariseos ajcxy tuñ quipxycapxy co anajty xihuaangixy nihuambedaangixy Jesús. ¹⁶E jadu'n ajcxy quejxy ma Jesús yajpaady naagity huidibi minicxpejt je fariseos ajcxy ytiy'ajt etz naagity huidibi mijnicxpejt je Herodes ytiy'ajt. Chi ajcxy Jesús nimay:

—Huindzin, nejhuñyibich iich ajcxy co miich mgapxy je tiy'ajt. Tudägy myaj'ixpicy jäy ajcxy jadu'n nej huaad ajcxy cuychinaaygixy Dios ytiy'ajt. E ca' mgüendituñ nej jäy ajcxy yminaangixy. Tú'ciy miich mduñ miid comeeñyjäy etz

miid ayoobtjic, ca' huin'ixpety myaj'ixpicy. ¹⁷Nejhuihuamy iich ajcxy nej miich mina'n pen tiy'ajt jadu'n: ¿Nej ndundigooyim ma Dios ycötujcin, co ngüejtim ma César, je romano mij'ane'mbi?

¹⁸Per Jesús ñejhuiyb anajty ajcxy yjibic-huinma'n, e chi ajcxy nimay:

—Ooy miich ajcxy

naybidáacigixy nej jihuüy ooy mdudägyity, e ca' yjanchity.

¿Na'amy co ajcxy xychachjot'ixy xychachhuinma'n'ixyich?

¹⁹Yaj'ijxcich tüg meen huidi miid migüéjtigixy César.

Chi ajcxy mimiiñ tüg meen. ²⁰Chi co Jesús y'ijxy je meen, chi yajtiüy:

—¿Pin y'ahuinax e pin yxii cixjaay ma jada meen?

²¹Chi ajcxy y'adzooy:

—Je romano mij'ane'mbi y'ahuinax etz yi' yxii.

Huin'it Jesús je' ajcxy nimay:

—Mo' je César huidibi yi' yjè'ajtpy, etz mo' Dios huidibi Dios yjè'ajtpy.

²²E co ajcxy jadu'n midooy, chi ajcxy ooy jihuiüy huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypijcin co pin ti y'ögy

²³Je huin'it xii je saduceos ajcxy oy ixty Jesús. Yi' ajcxy ymina'n co ca' yjugypiga'n je öcpi ajcxy. E jadu'n ajcxy huinma'n pidägy, e yminaangixy:

²⁴—Huindzin, jadu'n miiñ ma Moisés ycötújcin co je yëydjic huidibi ypijcychinaayb miid ytöxyijc, e pen öcp je yëydjic, e ca' ni tüg y'ung yajhui'my, copicy co co'öcytöxyjäy ypijctigadzipy miid je yëydjic ymiguëx. ²⁵Pues

jii ma iich ajcxy anajty tüg quëx je yëydjic nihiixtujc. Je ungoob ypijcy, e chi ix'ögy ytöxyijc, e ca' ni tüg y'ung yajhui'my. Chi je miguëx ypijctigajch miid je töxyjäy. ²⁶Nañ jadu'n je mimetzpi yëydjic ix'o'cy ytöxyijc. Nañ jadu'n je midugiigpi yëydjic ix'o'cy ytöxyijc. E jadu'n oytuñyii yjadyii miid je töxyjäy co ti anajty miiddzinay'abidzimdäy je nihiixtujcpi yëydjic tüg quëxpi. E je nihiixtujcpi ajcxy ix'o'cy je töxyjäy, e ca' ni tüg y'ung ajcxy yajhui'my. ²⁷Chi nañ jadu'n oy y'öcni je töxyjäy. ²⁸E co anajty xii tiempo paty, co anajty Dios yajjugypicy yi' tiibi ajcxy y'ögy, ¿huidibi jada' ajcxy nidügti je yëydjic töxyijc'adaanip je töxyjäy? Com ti ajcxy jadu'n nihiixtujcpi miiddzinay'abidzimigixy.

²⁹Chi Jesús je' ajcxy y'adzooy:

—Miich ajcxy ca' mhuinjihuüy je tiy'ajt, com ca' mnejhuiygixy Dios y'ayuc ytiy'ajt, e com ni ca' mnejhuiygixy je mic'ajt huidibi Dios ymiid. ³⁰Pues co anajty yjugypijccixy je jäy tiibi y'öccixy, chi ca' ajcxy ypiga'n, e nañ jadu'n ni ca' ajcxy ñaymöhuiyb y'ung huen pijccixy. Hue' ajcxy yjugy'adaangixy chinähuaangixy jiiby tzajpjoty, tim jadu'n nej je ángeles ajcxy chinaaygixy jugy'ajtcixy. ³¹Per je tiy'ajt co jäy ajcxy tiibi y'öccixy yjucypigaangixy jadüg'oc, jëbi mbaatcixy jada tiy'ajt ma Dios ñecy. Dios ci'm jadu'n minañ: ³²“Iich je' je Dios huidibi Abraham, Isaac etz Jacob yDios'ajtpy.” Com yi' Dios ca' yi' yDios'aty ma yi' öcpi ajcxy. Yi' Dios Dios'ajtp yi' ma yi' juugypí ajcxy.

³³E co je mayjäy jadu'n midooy, chi ajcxy ooy tzachjihuiiy tzachhuinmaay je Jesús y'ixpijcin.

Je ane'min huidibi ooy ycopicyity

³⁴E co je fariseos ajcxy nejhuiiy co Jesús anajty ti yaj'amoñyii je saduceos ajcxy, chi ajcxy ñayyömujectaayi. ³⁵E jim anajty tüg leyhuindzin huidibi Jesús anajty jot'ixyp huinma'n'ixyp, chi y'amidooy:

³⁶—Huindzin, ¿ma yi maybi Dios ycötujcin, huidibi y' jaccopicyip?

³⁷Chi Jesús y'adzooy:

—Tzoc jihui' etz yajmij'at nHuindzin'ajtim Dios miid tüg'óciy m'aa mjot, etz miid tüg'óciy m'alma, etz miid tüg'óciy mhuinma'n.

³⁸Jada je' jadu'n je Dios ycötujcin huidibi jaccopicyip, etz huidibi tim jayijpip. ³⁹Je mimetzpi Dios ycötujcin jahueengi tú'ciy ñaybadyii miid je jayijpi, y' huidibi jadu'n minamb: “Tzocjccix jihuiiygix yi mmigügtijc, tim jadu'n nej mnaychogyii nayjihuiiyii ci'm.”

⁴⁰Jada Dios metzpi ycötujcin jaccopicy jacmic'ajt miid ca' jac huidibi cötujcin huidibi Moisés etz je profetas ajcxy yejc.

¿Pin je' y'ung je Cristo?

⁴¹E ma anajty jim tügmucy yjac'ijtcixy je fariseos, huin'it Jesús yajtiy:

⁴²—¿Nej miich ajcxy huinmay miid Cristo? ¿Pin je' y'apmang?

Chi ajcxy y'adzooy:

—Je David je' y'apmang.

⁴³Chi Jesús ajcxy nimay:

—¿Na'amy co David anajty ti ymina'n co Cristo hue' je' y'!

yhuindzin? Jadu'n ti capxy David anajty miid je Dios yjihui'n ymic'ajt, ymina'n:

⁴⁴Je Huindzin Dios nimay iich nHuindzin: “Íña' ma iich n'a'oy'amy, ixti cooni iich miich nyajmimadägip ma je mmidzip ajcxy.”

⁴⁵¿Nej jëbi David ymij'ap'adyii je Cristo? Com David ci'm ymina'n co Cristo y' je' yhuindzin.

⁴⁶E nitüg'aa ajcxy yca'adzohuimbijty. E jadu'n nej je xii tiempo yjacnicx anajty ca' ni pin ocjacyajtiyñi huidijaty ayuc.

Jesús xiy ajcxy je fariseos etz escribas

23 Chi Jesús nimay je mayjäy etz y' ydiscipulos ajcxy:

²—Je escribas etz je fariseos ajcxy chachnaygömáayigixy co y' ajcxy jajtp nej capxti'cxipy je cötujcin huidibi Moisés yjaay jecy'ajty. ³Oy co ajcxy mguydunipy jadu'n nej y' ajcxy xyaj'ixpijccixy Dios y'ayuc, capxymidoogix nej xyñimaaygixy per ca' mdungixy huidibi y' ajcxy ytumb, com y' ajcxy oy ycapxcixy e ca' ajcxy cuydungixy. ⁴Yi' ajcxy nigo yajcojcxixy canaag costumbre huidi je jäy ajcxy ca' mimadäga'n, e ca' ajcxy pa'ayoy je jäy, tim jadu'n nipaady nej jihuiy tüg tziy ty mooygixy jemxyp' hidibi ca' je jäy ajcxy mimadäga'n, e yi escribas etz fariseos ajcxy ni ca' ycihuax yajpaadaangixy je tziy. ⁵Tüg'óciy huidi y' ajcxy ytumyb, je' ajcxy ytumyb co huen jäy ajcxy ixyii, jaydëbi yajcömay ajcxy. Yi' ajcxy yajhuimboc-huiñiyigixy etz ñayyajcihuinñiyigixy Dios y'ayuc.

Nayxojxcixy miid huit yooñjatypi co chachcömayaangixy. ⁶Ooy ajcxy tzocy iñaybejt ma je' iñäy je ane'mbi ma jäy ajcxy yxiiduñ. Ooy ajcxy tzocy yi cödumbi iñaybejt ma je naymujctac. ⁷Yi escribas etz fariseos ajcxy oy tzojccixy co ajcxy yajcapxpooxip huindzigi'n'amy mayjäyduum. Etz nañ jadu'n ajcxy tzocy co jäy ajcxy yajmij'adiiyyb nej huindzindijc ixpicytjic. ⁸Miich ajcxy ca' jadu'n m'a'ixihuipy co ajcxy xytijipy huindzin com nidüg'óciy miich ajcxy mnaymigüg'ájtigixy, etz tügpajc je' huidibi miich ajcxy mhuindzin'ajtpy y' je' Cristo. ⁹E nañ jadu'n miich ajcxy ya naaxhuiñ, ca' oy ni pin mdeedy'adiiyyb co miid miich ajcxy tügpajc je mDeedy, huidibi jiiby tzajpjoty. ¹⁰E nañ ni mganaydijiiyyb ajcxy mij ane'mbi, com yi Cristo je' tügpajc miich ajcxy mmij'ane'mbi. ¹¹Je pin jaccapxymidoob ymiügütjic, je' je' mij'ajtin miid ma miich ajcxy. ¹²Pinjaty huidibi ci'm naygömayip, tzöydu'nbaadip je', e pinjaty naybidaacip nicy xeemy, je' je' capxpaady y'idipy.

¹³iAy miich ayoob ajcxy fariseos etz escribas ajcxy! Miich ajcxy mnaybidáacigixy nej jihuüy ooy mdudägyjäy, e ca' yjanchity. Miich ajcxy mgoyüchpy je Dios ytiy'ajtin nej huaad jäy ajcxy ytiygiy jiiby tzajpjoty ma Dios y'ane'my. Ni miich ajcxy mgatigiyygixy, e nañ ni mga'a'ixiiyygixy co huingbi ytiygihuip.

¹⁴iAy miich ayoob ajcxy fariseos etz escribas ajcxy! iMiich ajcxy m'aaniidacp! Miich ajcxy myajcijxtaayi yi

co'ögy ytöxyjäy ypidägy miid ajcxy m'adzojcin, e mdungixy ooy jecy tzajpcapxycapxi, jigix capxpaady mbidzimipy. Dios nigi chaachytunip miich ajcxy miid mbocoy ycixpi, ca'ydi jac pin jäy.

¹⁵iAy miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'n je m'ixpijcin ma je tügpä jäy. E co ajcxy je' myajmibicy, huin'tit mejtz jadu'n'iyyi je pocy anajty miidity je jäy, ca'ydi miich ajcxy.

¹⁶iAy miich ayoob ajcxy huidibi jadu'n idiitzp nej tügi huintzpi huinhuoy! Miich ajcxy minamb co pen tüg jäy tuñ yhuandaacin, e iibaati capxpaati Dios ytijc, chi ca' cuyduñ je huandaacin. Per pen iibatpy capxpatpy je oori huidibi jiiby ma Dios ytijc, huin'tit janchity cuyduñ je huandaacin. ¹⁷Tzuudijc locidijc huidibi ca' huinjihuüy je tiy'ajt. ¿Huidibi jaccopicyip: je oori o je Dios ytijc ma je oori yoxy ity?

¹⁸Nañ jadu'n miich ajcxy mina'n: "Pen tüg jäy huandaacin tuñ, e capxpaady je altar ma Dios yajhuindzigiy, chi ca' cuyduñ je huandaacin. Per pen capxpaady je huindzigi'n' tüzich ma je altar ma Dios yajhuindzigiy, chi cuyduñ yhuandaacin." ¹⁹iTzuudijc locidijc huidibi ca' huinjihuüy je tiy'ajt! ¿Huidibi jacmij'ajtin ymiid je huidibi ti yajyoxy o je altar? ²⁰Pinjaty capxpatp je Dios ytijc ma Dios yajhuindzigiy y'agapxmuctaayb anajty huidijaty jiiby yajpaatp ma Dios yajhuindzigiy. ²¹Pinjaty capxpatp je

Dios ytijc, ca' anajty jëyi capxpaady
Dios ytijc, nañ ycapxpatp anajty
Dios huidibi jiiby tzinaayb.

²²Pinjaty capxpatp je tzajp, nañ
capxpatp anajty Dios y'ane'mdac
quipxyi miid Dios huidi tzinaayb
jiiby.

²³iAy miich ayoob ajcxy
fariseos etz escribas ajcxy,
huidi naybidaacip tudägy, e ca'
yjanchity! Miich ajcxy mooyb
Dios je tügpicy je majcpi huidibi
je' paatip, ixti yi tzajnimang, yi
ruda etz je pi'c'ujtz'ay ung. Per
ca' ajcxy mduñcuenti je cötujcin
huidibi jaccopicity. Miich ajcxy
ca' mdzinäy tiydudägy miid
je migügtijc. Miich ajcxy ca'
mmiidity pa'ayo'n miid je' ajcxy
huidibi ayoob jottigooyb, etz ca'
mmibijccixy Dios. Jada ixypy ajcxy
mbaadumyb, e mooygixy Dios
je tügpicy je majcpi. ²⁴iTzuudijc
locitijc! Miich ajcxy ti m'anajxyp je
uux, e mgojinnaxcixy je camello,
je mijpi iyujc.

²⁵iAy miich ayoob ajcxy
fariseos etz escribas ajcxy, miich
ajcxy naybidaacip nej tudägy
jäy, e ca' yjanchity! Jiiby jotjoty
huinma'ñyjoty miich ajcxy miidity
jibicpi. Miich ajcxy miid je
ca'oy'ixii etz je adzojcin. Tim jadu'n
nipaady nej jihuiy myajhuächpy
ajcxy yi tasi ninicx yi texy ninicx,
e chi myajhui'my jibicpi ma tasiyot
ma texyot. ²⁶iTzuudijc miich ajcxy!
Jayijp yajhuädz jiiby jotjoty texy
tasi, huin'it hui'm nañ jadu'n huädz
nigix'amy.

²⁷iAy miich ayoob ajcxy fariseos
etz escribas ajcxy, miich ajcxy
naybidaacip nej tudägy jäy, e

ca' yjanchity! Jadu'n miich ajcxy
nipaady nej öcpi jut. Je öcpi jut
nigix janch oy yquëxigy, per jiiby
jutjoty utz jiiby miid je öcpi pajc
etz miid jibicpi. ²⁸Jadu'n ajcxy
mguëxigy mayjäyduum nej jihuiy
ooy m'oyjäyity, per jiiby jotjoty
miid jibic-huinma'ñ.

²⁹iAy miich ayoob ajcxy
fariseos etz escribas ajcxy, miich
ajcxy naybidaacip nej tudägy
jäy, e ca' yjanchity! Miich ajcxy
mgo'aboztcixy yajxon je öcpi
jut ma profeta ajcxy ñaaxtihiy,
etz mxoxy ajcxy miid je pijy ma
ñaaxtihiy je tudägy jäy ajcxy,
³⁰e miich ajcxy nayñimaayigixy
miñ xyipy: “Co ixypy anajty
n'octzinaayim jecy'ajty ca'
ngapubejtim co ajt nmij'ap
nmijteedy yaj'ögy je profetas
ajcxy etz je tudägy jäy ajcxy.”
³¹Miid jada ycixpi miich ajcxy
nejhuiyb co miich ajcxy m'ap'adyii
mdeedy'adyii je jibicjäydijc
ajcxy huidibi yaj'öc je profetas.
³²iMiich ajcxy yajc'jxcixy je jibicpi
huidibi ajcxy mmij'ap mmijteedy
yajtzondac!

³³iJadu'n miich ajcxy nipaady
nej mayxoox! Ca' miich ajcxy
madägipy cöguëgipy je tzaachypy
jiiby ayoodactuuby. ³⁴E paady
nguexaamybich ma miich ajcxy
profetas etz huidibi ixpicyp
ma Dios y'ayuc, etz huidibi
xyaj'ixpigamb ajcxy yi Dios ñecy.
Per miich ajcxy myaj'ögamyb
myajcruutzpedamyb nijëjity, etz
nijëjity mgoxamyb mhuobamyb
ajcxy jiiby tzajtigoty etz
m'ixhuidida'ñ mbahuidida'ñ
ajcxy cajp cajp. ³⁵Je mijpocy

xyñigidaccoda'ñ miich ajcxy, judu'n nej je oyjäy ñi'py temy yojcy jecy'ajty, oga'ñ chondacy miid je oyjäy Abel etz ycocigixy miid Zacarías, je Berequías y'lung huidibi miich ajcxy mmij'ap mmijteedy myaj'o'c jilby tzajtigoty ma altar. ³⁶Janch tiy'ajt judu'n nej nimaaygixy co je mijpocy ñigidaccoda'ñ je jäy ajcxy huidibi tzinaayb jadachambi tiempo.

**Jesús yäxy miid Jerusalén
cajp ycixpi**

³⁷iMiich ajcxy Jerusalén jäy!
iMiich ajcxy Jerusalén jäy!
Jerusalén jäy huidibi jecy'ajty yaj'ögy je profetitjic etz ycögächpy ajcxy je Dios ycocapxy. Canaag'oc ti njayajtügmujectähua'ñich miich ajcxy, judu'n nej tzeydaj yajtügmujectäy je' y'ung ma yqueec pä't, per miich ca' m'a'ixiigixy. ³⁸Oc'ix miich ajcxy nej mdijc abac yhui'maangixy. ³⁹Janch tiy'ajt judu'n nej nimaaygixy co camina miich ajcxy xy'ixipyich jadüg'oc, ixti cooni paadipy je xii je tiempo co jäy ajcxy ymina'nipy: "Cömay yi huidibi miimb miid nhuindzin Dios yxii etz ymic'ajt."

**Jesús ymina'ñ co Dios
ytijc yhuindigoyipy**

24 Ma anajty Jesús ti ypidzimni ma Dios ytijc, nicxp anajty, huin'it Jesús ydiscípulos ajcxy ñimijhuäci. Yi' ajcxy anajty yaj'ixiydähuaamyb je Dios ytijc, com ooy anajty chachmijtjicity.

²Chi Jesús yminañ:

—Huindix miich ajcxy jada maybi mijjaty ytijc. Miinipy xii

tiempo mina tüg'óciy jada tijc nicxy yhui'my taj xit, ca' ma tzaamacxy. Huindigoydähuiipy tüg'óciy.

**Je tiy'ajt ma ca'ni naaxhuiñybi
ycixa'ñyi ytigoya'ñyi**

³Chi oy ñicxni ajcxy ma Olivos cögop. E co anajty jim, Jesús y'iñäy, chi ñimaayi ameech je' ydiscípulos ajcxy:

—Hich ajcxy nejhuñhuamyb mina jëdu'n ytuna'ñyii yjada'ñyii. ¿Ti je' quëxigamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴Chi Jesús nimay ajcxy:

—Mnaygüend'adiib ajcxy, ca'ydi pin xyhuin'iingixy. ⁵Ooy mayjäy ñaybidägáanigixy miid iich nxii, naybidägáanigixy co je' ajcxy je Cristo, ymina'na'ñ ajcxy: "Hich je' je Cristo." ⁶Co miich ajcxy ayuc midohuiipy co jäy ajcxy chachtziptungixy ñayñibidigigixy xi ya, chi ca' ajcxy mdzigíyigixip, com ooy ycopicity co judu'n jayijp ytuniiyb yjadiiyb. Ca' nan hue' je' anajty tim cijp tim tigooyb je xii je tiempo. ⁷Nayñibidigiiib naax cajp miid huingbi naax huingbi cajp, e gobierno miid huingbi gobierno. E miinip mic'ujx canaag'it etz mij yuu etz mij pa'm xi ya. ⁸Jada tzaachypí ayo'n oga'ni anajty chondägy huidibi nminaxaanim nyajnaxaanim. ⁹Huin'it xii huin'it tiempo miich ajcxy myajciyegipy, jigix xychaachytúngixipy e xyaj'ögixipy. E tüg'óciy je maynaaxhuiñyjäy xyca'ixáangixipy, miid iich nxii ycixpi. ¹⁰Je huin'it tiempo may je jäy ajcxy yajtigoya'ñ ymibijcin. E

nañ jadu'n ñayca'oy'ixáanigixy etz ñayñigapxáanigixy ñi'ojihuáanigixy miñ xyipy. ¹¹Ooy may quëxigaangixy aaniidaacpidijc mina'naangixy co Dios y'ayuc ytiy' ajt nimiydaci, e mayjáy oy huin'iinaangixy. ¹²E je' co ajcxy xii jimijt ñajtninixiiyñi jac tím nigí jibicpi tunaangixy, ca' ajcxy y'ocnaychójinipy miñ xyipy. ¹³Per pinjaty tiydudágy panixp je mibijcin, je' ajcxy ypaadip y'alma nidzoocin. ¹⁴Copicy co jayijp yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydëbi jäy ajcxy nidüg'ocij nejhuüy Dios ytiy'ajt. Huin'it je naaxhuiñybi yciyxni ytiagooyñi.

¹⁵⁻¹⁶Je profeta Daniel jaay jecy'ajty jada ayuc (miich ajcxy pinjaty capx jada necy huinjihuüyigixy) ma minañ: Miich ajcxy co m'ixy pinjaty jibic-huinma'ñ tumb nej ca' ypanyii ma Dios ytiyc, huidibi ooy ycodzigijty, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzóocixipy mic'amy ma tungop. ¹⁷Pinjaty huidibi yajpatp ma ytjencix ca' nicxy tijaty yajpidzimy ma ytjic. ¹⁸Yi jäy ajcxy huidibi yajpatp camjoty, ca' ajcxy huimbidiipy co yajpidzimipy tijaty ma ytjic. ¹⁹Huin'it tiempo ayo'n ypadamy je töxyjäy ajcxy huidibi anajty y'ungdzim'ijt, e nañ jadu'n je' ajcxy huidibi miid y'ungma'xung. ²⁰May'ajt ajcxy mbijctzoohuipy yi Dios co jada jadu'mbi ayo'n ca' ytuniyb yjadiiyb ma anajty ytiichtiempojty, etz ma anajty pocxinxijoty. ²¹Huin'it oy ayo'n jotmay ytuna'nyii yjada'nyii huidibi

nicamina ycatuñyii ycajadyiini mabi naaxhuiñybi chondágy e nicamina jadu'n ycajactuniyb ycajacjadiiyb. ²²Pen ca' Dios capx'aduga'ñ yjiibi ayo'n xii ayo'n tiempo, ni pin ca' chögipy. Per Dios ycapx'adugamy yjiibi ayo'n tiempo miid je mibijcpidijc yciixpi huidibi Dios ti huin'ixy. ²³Co yi jadu'mbi xii tiempo anajty ymiñ, ca' mmibijccixipy, pen ji pinjaty xyñimaaygixy: "Ijxcix, cha yajpaady je Cristo", o "Jim'amy yajpaady je Cristo." Ca' mmibijccixipy. ²⁴Pues miinip jäy ajcxy huidibi huin'iinaangixy ymigügtjic. Ci'm ñayyajnaáanigixy jadu'n nej jihuüy je' yCristity, e ymináangixipy co capxhuäcxy ajcxy Dios y'ayuc, e ca' yjanchity. Ytunip ajcxy mijhuinma'ñ etz mijpi ijxpejt, ixti jëbi jahuin'ingixip je mayjáy huidibi Dios ti yhuin'ixy. Per ca' Dios a'ixihuipy co yhuin'iiniyb y' yjäy. ²⁵Ti ich yi' jayijpni nigapxich. ²⁶E co pinjaty ajcxy xyñimähuipy: "Chim je' je Cristo mijtigidumb", ca' ajcxy mninixcip. O co pinjaty ajcxy xyñimähuipy: "Chiiby je' tigoty yhuingoyüch", ca' ajcxy mmibigipy. ²⁷Ich je' je jäy huidibi tzoon tzajpjoty, nhuimbidaambich ya naaxhuiñ miid je tiicxin je jájin, jadu'n nej je huidzuc huidi tiicxp xiibdzimyb ixti xiigidágy. ²⁸Ma je öcp ninicx yajpaady jim ñimujctähua'ñ je luud ajcxy.

Nej jada' je' Dios y'ung ymiinipy

²⁹Co anajty ti ñaxy je ayo'n xii ayo'n tiempo, huin'it je xii ycoodziygidäga'ñ, je po' ca' ytiicxa'ñ, je madza' ycädähua'ñ etz

janch mic je tzajp yücxa'ñ. ³⁰Co yi jadu'mbi ytuniyb yjadiyb, chi quëxiga'ñ tzajpjoty je i|xpejt co ñich, je jäy huidibi tzoon tzajpjoty, nhuimbida'ñich ya naaxhuiñ. E chi tüg'óciy je mayjäy tájip máyip yjihuïhuipy yäxipy, chi ajcxy ixipy je jäy huidi tzoon tzajpjoty miñ anajty jocjoty miid ymic'ajt y'oy'ajt. ³¹Chi nguexipyich ángeles ajcxy co huen mic yaxxüxy ajcxy ytrompeta, jigix yömujectähuipy tüg'óciy pinjaty huin'ixyp xi ya ma ajcxy yajpaady ya naaxhuiñ; ma xii pidzimyb, ma xii cidägy, ma jünboj pidzimyb, ma tichpoj pidzimyb.

³²Jim miich ajcxy i|xpejt mbigipy ma je higueri quipy jadu'n nej je xii tiempo ymiñ cidägy. Co je higueri quipy jadüg'oc pidägipy je' y'aay'ung, huin'it miich ajcxy nejhuïhuipy co yhuingoni mina ypottigiyñi. ³³Tim jadu'n nej tiy'ajt mbijccixy ma je higueri quipy co jada ajcxy jadu'n ixipy nejhuïhuipy co yhuingoni anajty je xii je tiempo jün'aguy tijc'aguy. ³⁴Janch tiy'ajt jadu'n nej nimaaygixy co tüg'óciy ytuna'ñyii yjada'ñyii ma ca'ni anajty je jäy y'öctäy huidibi anajty jactzinaayb huin'it tiempo. ³⁵Je tzajp etz je naaxhuiñybi cixam tigoyam yi', per ñich n'ayuc ca' ycixa'ñ ytigoya'ñ nimina.

³⁶Ca' ni pin nejhuïy je xii je hora mina nhuimbida'ñich ya naaxhuiñybi. Ni je ángeles ajcxy canejhuïy, ni je Dios y'ung canejhuïy. Tügpaic je Dios Teedy nejhuïy.

³⁷Com jadu'n nej yjajty ya naaxhuiñ jecy'ajty, co je Noé chinay, nañ tim jadu'n yjadiy co anajty

nhuimbityich, yi jäy huidibi tzoon tzajpjoty, ya naaxhuiñ. ³⁸Jecy'ajty co anajty ca'ni je ayo'nduu ymiñ ya naaxhuiñybi, hue' je' mayjäy ajcxy chinay agujc jotcujc, ycaaygixy y'uuccixy etz yajpijccixy je y'ung y'anäg, ixti cooni paty je xii tzuu co ytigiy Noé barcojoty. ³⁹Je mayjäy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e öctay ajcxy je jäy nijoty. Jadu'n nej yjajty jecy'ajty miid je mayjäy huidibi tzinaayb anajty quipxy miid Noé, nañ tim jadu'n yjada'ñ miid je jäy ajcxy huidibi tzinähuiy jac jiini co ñich anajty nhuimbityich ya naaxhuiñ jadüg'oc. ⁴⁰Je huin'it tiempo co nhuimbidityich jadüg'oc ya naaxhuiñ, chi metz yëdyjc yajpaadipy ma ytundac, tüg je' yajminicxa'ñ, e tüg je' yhui'ma'ñ. ⁴¹E mejtz töxyjäy yajpaadip anajty yjich, tüg je' yajminicxa'ñ, e tüg je' yhui'ma'ñ.

⁴²E paady miich ajcxy ni'ixi ijtcix, xyjijp'ixipyich com ca' mnejhuïygixy mina miich ajcxy je mHuindzin ymiina'ñ. ⁴³Mnejhuïygixy miich jada co ixipy je ungedeedy nejhuïy ti hora je meetzpi miina'ñ, ca'p je' ymähuipy, e ca'p a'l'ixihuipy co je meetzpi ytigihuipy tigoty. ⁴⁴Nañ tim jadu'n miich ajcxy ni'ixi ijtcix, je' co ñich, je jäy huidibi tzoon tzajpjoty, nhuimbida'ñich ma ca' ni pin anajty nejhuïy.

**Je tumbi tudägyi etz je
huidibi ca'p ytudägyty**

⁴⁵¿Huidibi tumbi je' ya huidibi tumb miid yhuindzin janch

cixyjot huinijot huidibi miid
ixpijcin, huidibi je' yhuindzin
mooyipy ane'min ma ytijc, huidibi
yajnidagihuiipy ma ymigügtijc
caayin uucin mina ypadyii?

⁴⁶Janch jotcuyc je tumbi co
yhuimbiditye je' yhuindzin, e je'
cuyduñ jadu'n nej je' yhuindzin ti
ñimäyii. ⁴⁷Janch tiy'ajt jadu'n nej
nimaaygixy co je huindzin ytumbi
yajnigohuajc'adyii tüg'óciy huidibi
ymiid. ⁴⁸Pen je tumbi jibicjäybi
mina'n jotjoty huinma'n'yjoty:
"Huäcxijpni iich je nhuindzin."

⁴⁹E chi nimaajtztägip ymigügtijc,
e ytigihuiip caaybi uucpi miid
amügyjäydijc; ⁵⁰chi je tumbi
yhuindzin minipy ma ytijc huidi
xií mina je tumbi ca' anajty aa'ixy
jijp'ixy e ni je hora anajty canejhuüy.
⁵¹Chi huindzin tzaachytunip je'
ytumbi, etz ypidägipy miid je
jacjadyii jäy ajcxy yajpaady huidibi
naybidáacigixp nej tudägyjäyity e
ca' yjanchity. Jiiby ayoodactuuby
yjihua'n yäxa'n etz huinmucxa'n
huingueeda'n ytiitz miid jotmay.

Je ijxpejt ma je majcpi töxy'anäg

25 Co anajty nhuimbityich
jadüg'oc ya naaxhuiñybi
jadu'n nipaadip nej je nimajcpi
töxy'anäg co ñicxy ajcxy
ñayjijpcobadihuáanigixy miid
je yëydijc huidi pigamb. Chi
minicxy ajcxy aceite lámpara co
yajticxaangixy. ²⁻⁴Nimigoox je
töxy'anäg huidi cohuinma'nity
etz ahuing minicxy jadüg quiig
ujtz miid aceite. E nimigoox je
töxy'anäg ca'pi ajcxy cohuinma'nity,
e ca' ajcxy ahuing minicxy jadüg
quiig aceite. ⁵E je yëydijc huidibi

anajty pigamb huäcxijpni ooy, chi
je töxy'anäg ajcxy ooy ytigiiñi
mä'uuybi. ⁶E mijcuctz ajcxy
midoy co tüg jäy mic mina'n: "Chi
miin je yëydijc huidibi pigamb,
nicx jijpcobadiiygixy." ⁷E huin'it
je nimajcpi töxy'anäg ajcxy
ypidictay. Chi ajcxy yjin ni'ixiiy
nidüg nidüg. ⁸Chi je nimigooxpi
huidibi ca' ycohuinma'nity
nimay je nimigooxpi huidibi
cohuinma'nip: "Iich ajcxy hueeni
mooygich yi m'aceite, co pidzaanip
iich ajcxy njiin." ⁹Chi y'adzooy
je cohuinma'niby ajcxy: "Ca'
nyega'nich, je' co ca' iich ajcxy nje'
yhuaadihua'n. Nicx miich ajcxy juy
jim ma ytoogyii." ¹⁰E ti anajty ajcxy
ñicxy aceite juuyb je huidibi ajcxy
ca' ycohuinma'nity, co oy yjäty je
yëydijc huidibi pigaanip. Chi je
cohuinma'niby ajcxy miid tigiy
tigoty je yëydijc huidibi pigaanip.
Chi tijc yaj'agiyy. ¹¹E com jecyñi
oy yhuimbity ajcxy je huidibi ca'
ycohuinma'nity. Chi ajcxy yminañ:
"iHuindzin, Huindzin, ocyaj'ahuadz
mdijc!" ¹²Chi je' y'adzooy: "Ca' iich
miich ajcxy n'ixy'adyii."

¹³Chi Jesús yminañ:
—Nayñi'ixiiygix, je' co
ca' mnejhuiygixy mina iich
nhuimbida'nich jadüg'oc ya
naaxhuiñ.

Je ijxpejt ma je meeñ

¹⁴Co iich anajty nhuimbida'nich
jadüg'oc ya naaxhuiñybi, jadu'n
nipaadip nej jadayaabi ijxpejt, co
anajty tüg comeenyjäy chona'n
viajetumbi, chi je' ytumbi ajcxy
mooy je meeñ co huen cuend'ajtcixy.
¹⁵Je ymidügpi tumbi moy migoox

mil meen̄. Je mimetzpi moy mejtz mil. E je ymidugiigpi moy tüg mil. E jadu'n ajcxy moy nije' nije' nej huaad cuend'ajtcixy. Chi choñ je huindzin vijetumbi. ¹⁶Je tumbi huidibi cidigiyyi migoox mil meen̄, ytiigy ajuybi adoocpi. Chi je' ymeen̄ y'ung'ajty jamigoox mil. ¹⁷Nañ jadu'n huidibi cidigiyy mejtz mil, ytiigy tumbi miid je meen̄. Chi je' ymeen̄ y'ung'ajty ja mejtz mil. ¹⁸Je huidibi cidigiyy tüg mil hue' oy pidägy je meen̄ tützjoty. Chi tajiy, e yützi je yhuindzin ymeen̄. ¹⁹E com jecyñi oy yhuimbity je huindzin. Chi ytiigy cuenta yaj'oyiyyb miid je ytumbi ajcxy. ²⁰Chi miin̄ jayijp je huidibi anajty ti cidigiyyi migoox mil meen̄. Chi je tumbi yajcidigiyy je' yhuindzin majc mil meen̄. Chi yminañ: “Miich ti xymooyich migoox mil meen̄, e iich ti nyaj'ung'atyich jamigoox mil.”

²¹Chi je' yhuindzin minaañ: “Janch jotcujc iich cham co jadu'n ti mduñ miid je hueenbi meen̄. Miich ooy mdudägy etz oy ti mduñ, e paady njacmöhuaryb jacmay. Tigi' ma iich, e xondäg miid iich.” ²²Chi ymiñ je huidibi anajty ti cidigiyyi mejtz mil meen̄. Chi nimay je yhuindzin: “Miich xymooyich mejtz mil meen̄, e ti nyaj'ung'atyich jamejtz mil.” ²³Huin'it je' yhuindzin ñimaayi: “Janch jotcujc iich cham, co jadu'n oy ti mduñ miid iich nmeen̄, e paady njacmöhuaryb jacmay. Tigi' xondäg miid iich.”

²⁴E co oy yja'ty je huidibi cidigiyyb tüg mil meen̄, chi nimay je' yhuindzin: “Huindzin, hue' ndijyich miich myëdyjc'aty janch jibic jäy. Miich cosecha myajpidicpy

ma ca' ti mnipy etz miich mgosecha myajpidicpy ma ca' ti ti mhuijy. ²⁵Paady ooy ndzigiyich co je meen̄ ngayaj'ung'adipyich. E co miich mhuimbida'ñ, mdzogamy je mmeen̄, e paady je mgi'mmeen̄ ti nyüchich, je' co ndzigiyich co nicxy nyajtigooyich miich mmeen̄. Cha je meen̄ huidibi ti xymooyich.”

²⁶Chi je' yhuindzin ñimaayi: “Jibic tumbi miich, ooy mnuuxity. ¿Nej ti mnejhuüy miich co iich cosecha nyajpidigyich ma ca' ti ti nnibyich, etz cosecha nyajpidigyich ma ca' ti ti nhuijyich? ²⁷Oy co ixipy miich je iich nmeen̄ ti myejc'anuucxy, e jim ixipy y'ung'at. E cham co ti nhuimbityich cham ixipy je nmeen̄ich xycidigiyyich miid nimeen̄'ung.”

²⁸Chi je huindzin nimay je jacjadyi tumbidijc: “Pijci ajcxy yi meen̄ huidi ymiid, e mooygix yi huidibi majc mil ymiid. ²⁹Je huidibi oy tumb jacyajmöhuaryb je' anaxy, e ymiid'adamy je' conaxpi. Je' huidibi hueen miid yajpigamb je' huidi ymiid, je' co ca' oy ti ytuñ miid je hueenbi. ³⁰Yi jiibi tumbi huidibi ca' oy ytuñ, pidäg ajcxy agootztuuby ma yjihuipy yäxipy, ma ytiitz huinmuucx huingueedip miid jotmay.”

Co anajty naaxhuiñyjäy ajcxy yajtiyduñ

³¹Co iich, je jäy huidibi tzoon tzajpjoty, nhuimbity iich anajty jadüg'oc ya naaxhuiñybi, huin'it n'ixtäga'ñich ma iich n'ane'mdac etz ane'ma'ñich miid iich nmij'ajtín etz n'oy'ajtín. ³²Chi tüg'óciy je naaxhuiñyjäy yajtügmujtähua'ñ

ma iich. Nhuäcxamybich jadüg jadüg jadu'n nej jäy ajcxy huäcxy je cöbixy etz je chiibo ajcxy.

³³Nbidägaamybich a'oy'amy je jäy ajcxy huidibi oy ti ytungixy miid iich. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huidibi jibic ti ytungixy miid iich. E yi' ajcxy jadu'n nipaadip nej chiibi.

³⁴Chi nnimähuibich yi jäy ajcxy huidibi a'oy'amy: “Miingix miich ajcxy huidibi Dios Teedy ti xyconuucxy ajcxy. Je'ájtigix ane'mdac huidibi ijtp ni'ixi miid miich ajcxy ycixpi maabi naaxhuiñybi chondägy. ³⁵Ma anajty iich nyuubögyii miich ajcxy ti xyajcaayich; ma anajty iich ndidzäyii, miich ajcxy ti xyajniñ'ügyich; ma anajty iich nihuidityich, miich ajcxy jättac ti xymöyich; ³⁶ma anajty iich je nhuit ti nyajmayjatyich, miich ajcxy ti xymöyich je huit; ma anajty iich nbigyijich, miich ajcxy ti xycuend'átyich; etz co anajty iich pujxtigoty nyajpaady, miich ajcxy ti xycogapxiyich.”

³⁷Huin'it ymina'na'n je jäy ajcxy huidibi oy ti ytungixy miid iich: “Huindzin, ¿mina iich miich ajcxy ti n'ixy ayuu, e ti nyajcay? O ¿mina iich miich ajcxy ti n'ixy co mdidzäyii, e ti nyajniñ'ügy? ³⁸¿Mina iich miich ajcxy ti n'ixy co miich nihuidity, e ti nmöy jättac? O ¿mina mhuit ti myajmayjaty, e ti nmöy je mhuit? ³⁹¿Mina iich miich ajcxy ti n'ixy, co miich mbigyii, e oy ti ngüend'aty? etz ¿mina iich miich ajcxy ti n'ixy co pujxtigoty myajpaady, e oy ti

ngogapxiy?” ⁴⁰Iich, je mij'ane'mbi, n'adzohuimbidityich: “Janch tiy'ajt jadu'n nej nnimaaygixy co yi jäy ajcxy huidibi oy ti ytungixy miid pinjaty huidibi xymijnicxpejtpich, nañ jadu'n oy ti ytungixy miid iich. Ca' ñéjity co jäy ajcxy yminañ co ca' ypinity je jäy huidibi xymijnicxpejtpich.”

⁴¹Chi iich, je mij'ane'mbi, nimähuibich je jäy ajcxy huidibi yajpatp: “Huinhuäctuuticich miich ajcxy jibicjäydijc. Nicxy miich ajcxy mijjijnjoty, huidibi ijtp ni'ixi miid je mujcu' ycixpi etz miid je' y'ángeles ajcxy ycixpi. ⁴²Ma anajty iich nyuubögyii, ca' miich ajcxy xyajcaayich; ma anajty iich ndidzäyii, ca' miich ajcxy xyajniñ'ucyich; ⁴³ma anajty nihuidityich, ca' miich ajcxy xyajjättägyich; ma anajty iich nhuit xytigoy'íjtigich, ca' miich ajcxy huit xymooyich; etz ma anajty iich nbigyii e nyajpaadyich pujxtigoty, ca' miich ajcxy xycogapxiyich.” ⁴⁴E chi je' ajcxy ymina'na'n: “Huindzin, ¿mina iich ajcxy miich ti n'ijxcixy co anajty miich yubögyii tidzäyii, o co anajty mnihuidity? ¿Mina ti n'ijxcixy co ca' mhuit miidity, o co mbigyii, o co anajty pujxtigoty myajpaady, e ca' iich ajcxy miich nbubejty?”

⁴⁵Chi iich, je mij'ane'mbi, n'adzohuañich: “Janch tiy'ajt jadu'n nej nnimaaygixy. Huen tim pinity huidibi ca' miidity pa'ayo'n miid je' ajcxy huidibi xymijnicxpejtpich, oy jäy yjamina'n co ca' ypinity, iich miich ajcxy anajty jadu'n ti xytuñich.” ⁴⁶E jada ajcxy nicxip huinixii ayoodactuuby, e

yi tudägypi ajcxy nicxip ma yi jugy'ajtín huinixíibi.

**Je huinma'ñ nej anajty
Jesús madzaangixy**

26 Co Jesús nigapxtay tüg'óciy jadayaabi ayuc, chi nímay yí' ydiscípulos ajcxy:

²—Miich ajcxy mnejhuíiyb co huixtic je amayxii, je pascua xii. Pascua xiíjoty iich, je jáy huidibi tzoon tzajpjoty, nyajcíyega'ñich ma nmídzípich etz xyajcruutzpeda'ñich, xyaj'óga'ñich ajcxy.

³Je huin'lit xii je teedy huidibi tungmiid ajcxy, je escribas, etz je mijjädijc ajcxy ñayyöymujctayi ma je' ytiba' je teedy huídi jacmíjtungmiid huídi anajty yxii Caifás. ⁴E jím ma Caifás ytiba' jím ajcxy huinma'ñy'ixtay nej jébi yajmachycägixy Jesús miid anii etz yaj'ógaangixy. ⁵Chi ajcxy ñayñimaayi miñ xyípy:

—Ca' y'oyity co xiíjoty nmajtzim Jesús. Ca' jecyity co je mayjáy xymíjotma'ttayim etz ytigíhuip ajcxy huambi jihuíiybi.

**Tüg töxyjäy pidacy aceite
ma Jesús ycohuaje**

⁶Jesús anajty yajpaady Betania ma Simón ytíjc, je Simón huidibi anajty ymiid je jíbic nübüd z pa'm. ⁷E ma anajty Jesús ycaay, huin'lit ymiñ tüg töxyjäy miid tüg quíig ujt z miid perfume huidibi ooy oy yxuugy, jada perfume ooy anajty choohuíty. Chi je töxyjäy yaj'ahuäch je quíig, e yajcöyogiy Jesús je perfume huidibi ooy oy yxuugy. ⁸Co Jesús ydiscípulos ajcxy jadu'n ijxy, chi ajcxy mijotma'ty je

töxyjäy. Chi ajcxy ñayñimaayi miñ xyípy:

—¿Ti co jada perfume huidibi ooy oy xuugy ayoy? ⁹Tzou ixípy ooy jada yajtoocy, jaydēbi ixípy miid yajpubet je ayooóitíjc.

¹⁰E co Jesús nejhuiiy nej ajcxy ymiñañ, chi nímay:

—¿Na'amy co m'amayiy jadayaabi töxyjäy? Yí' huidibi ti tuñ, je' yí' tüg oybi. ¹¹Je ayooóitíjc ca' ytigoy'ida'ñ ma miich ajcxy nimina. Huen huidibi xii huen huidibi tiempo jébi miich ajcxy mbubedípy ayooóitíjc. Hich ca' n'ida'ñich jecy ya miid miich ajcxy. ¹²Jada töxyjäy ti pidägy ma iich nninícx perfume huidibi ooy oy xuugy, jayíjp ca'ni nnaaxtigíyich. Jadu'n je' jíjp'ijxpy mina nnaaxtigíhua'ñich. ¹³E huentimma'amyity je Dios y'ayuc anajty yajcapxhuächy huindu'my naaxhuíñ jím yajnigapxa'ñ jadu'n nej je töxyjäy ti tuñ cham miid iich, e jadu'n je mayjáy jäy medzípy jada töxyjäy.

**Judas cíyecy yi Jesús
ma ymidzip agojiix**

¹⁴Chi nidüg je' ydiscípulos huidibi yxii Judas Iscariote oy nímay je teedy mijtungmiidpi, ¹⁵nímay ajcxy:

—¿Ti ajcxy xymöhuibich co ngíyegípyich Jesús?

Chi ajcxy moy iipxmajc plata meeñ. ¹⁶Co ajcxy meeñ ymooy, chi mic'amy Judas yhuinma'ñ'ixtay nej jébi cíyecy Jesús ma ymidzip.

Jesús y'adzuu'ajty pascua xiíjoty

¹⁷Je ymidügpi xii, je amayxii, je pascua xii ma anajty yajcay je

tzajcaagy huidi ca' levadura miidity, huin'it je' ydiscípulos ajcxy nimiin Jesús. Chi ajcxy yajtiy:

—¿Ma mdzocy co iich ajcxy ni'ixi'huip huidi mgayamy je pascua xii cixpi?

¹⁸Chi Jesús y'adzooy:

—Nix miich ajcxy jim Jerusalén ma tüg jäy ytijc, e mnimähuip: “Iich nHuindzin jadu'n minamb co yhuingoñ je' yxii yhora, e paady ma miich mdijc y! tuna'n je pascua xii adzu'ajtín miid ydiscípulos ajcxy.”

¹⁹Huin'it Jesús ydiscípulos ajcxy cuyduñ jadu'n nej Jesús anajty ti ñimäyii. Chi ni'ixi'y ajcxy je pascua adzuu'ibi.

²⁰E co chu'iiy, chi Jesús y'ixtacy ma je mesa miid je nimajmetzpi ydiscípulos. ²¹E ma anajty ycaaygixy, huin'it nimay je nimajmetzpi:

—Nidügti miich ajcxy huidibi xyciyegaambich ma nmidzipich.

²²Huin'it ajcxy yajtay taj may. Chi ajcxy yajtiy:

—Huindzin, ¿nej iich jada'ji?

²³Chi Jesús y'adzooy:

—Yi huidi miid ndocxmucyich, yi' je' jadu'n xyciyegaambich ma nmidzipich. ²⁴Janch tiy'ajt co iich n'öga'nich, jadu'n nej je profeta jaay jecy'ajty. ¡Ay ayoob je yëydijc huidi xyciyegaambich! Jac'oy co ca' ycama'xung'aty je huidibi xyciyegaambich.

²⁵Chi Judas yminañ:

—Huindzin, ¿nej iich jada'ji?

Chi Jesús y'adzooy:

—Miich jadu'n minamb.

²⁶E ma anajty ajcxy ycaay, huin'it Jesús tzajcaagy conigy. Chi yajnaxxy Dioscojuyip. E chi jada'

tujchuäcxy je tzajcaagy. Chi moy je nimajmetzpi ajcxy je tzajcaagy, e yminañ:

—Cay miich ajcxy jadayaabi tzajcaagy, yi' je' iich je nninixcixh.

²⁷Huin'it Jesús ciyigy je y'ügy. Chi yajnaxxy Dioscojuyip. E huin'it moy je ügy je nimajmetzpi ajcxy, e yminañ:

—Üc miich ajcxy jadayaabi ügy, ²⁸yi' je' iich je nni'pyich. Yi' ñigapxy co Dios ti yaj'aducy je jemybi ayuc. E iich nni'py ytemañ yoga'n miid je mayjäy ycixpi, jaydëbi ajcxy paadip je huinmecxin miid je ypocy ycixpi. ²⁹Janch tiy'ajt jadu'n nej nnimaaygixy, co ca' n'oc'ügaanich jadüg'oc je pascua xii ügy, ixti cooni je xii tiempo paadip co iich ajt n'uucim huinjemybi je pascua xii ügy ma iich nDeedy y'ane'min.

Jesús nigapxy co Pedro ycoyütza'nyii

³⁰E co ti y'iidäy, chi ajcxy choonñ ñixy ma Olivos cögop. ³¹Chi Jesús je' ydiscípulos ajcxy nimay:

—Nidüg'óciy miich ajcxy xy'ixmajtztähua'nich cham coodz. Je' co jaaybejty jadu'n miin ma je Dios ñecy: “Ögip je cuend'ajtpi, huin'it je cöbixy yöyhuäcxtähua'n.”

³²E co anajty iich njugypicyich jadüg'oc ma anajty ti n'ögyich, chi jayijpni nnicxa'nich ma Galilea, e jim naybaatim nidüg'óciy.

³³Chi Pedro yminañ:

—Oy yi jacjadyiibi migügtijcch xyjadim'ixmajtztäy, per ni camina xii iich miich n'ixmadzipy.

³⁴Chi Jesús Pedro nimay:

—Janch tiy'ajt jadu'n nimäyich, cham coodz ca'ni anajty je tzey

yaxigý, miich tugiig'oc mina'nip co ca' xy'ixy'adyiijich.

³⁵Chi Pedro yminañ:

—Oy iich ndim'ögip miid miich, ni camina ngaminá'nibich co ca' miich n'ix'adyii.

E nidüg'óciy je' ydiscípulos ac tim jadu'n yminañ.

Jesús mibijctzoy Dios jim Getsemaní

³⁶Chi Jesús ñicxy miid je' ydiscípulos ajcxy, oy yja'tcixy jim Getsemaní. Chi jim Jesús nimay je ydiscípulos ajcxy:

—Ya miich ajcxy oc'ña', miin iich n'ocnicxyich jim'amy Dios mibijctzoobi.

³⁷E chi Jesús ñicxy miid Pedro etz nañ jadu'n miid je Zebedeo ymang nimetzpi. E jim Jesús ñayjihuiiyi janch tajy may mij cajee. ³⁸E chi jim jajnimay je nidugiigpi discípulos:

—Nayjihuiiybich taj may ma njot nhuinma'ñ, ixti mabaad anajty n'ögich miid tájin máyin. Hui'm miich ajcxy ya miid iich etz ca' mmaagixy.

³⁹Huin'it Jesús ñajtzoyöiyi miji'm jahui'. Chi jim ñaygojxtinaydaci naaxcixy, e ytiigi Dios mibijctzoobi, yminañ:

—Dios Teedy, iich nDios, pen jëbi jadu'n, mduñ may'ajt pájcgich jadayaabi tzaachypi ayo'n, per ca' yjadu'nity nej iich ndzojcin mdunipy, jadu'n mdunipy janchtiy nej miich mdzojcin.

⁴⁰Huin'it Jesús yhuimbijty jim ma anajty ti yajhui'my je nidugiigpi. E oy paady ac tim maab anajty ajcxy. Chi nimay je Pedro:

—¿Nej ca' madäga'ñ miich ajcxy co m'idipy juugy tüg hora miid iich

ycixpi? ⁴¹Hui'mi' ya, juugy m'idipy etz mibijctzoo Dios, jaydeb ca' je ca'oybi xymimadägip. Janch tiy'ajt co jotjoty ooy mnijot'ajtcixy com tunaangixy yi oybi. Per yi mminicx ca' ymadäga'ñ nicxy tuñ oybi.

⁴²Chi mimetz'oc Jesús ñicxy oy Dios mibijctzoy, yminañ:

—Dios Teedy, pen copicy co iich nbaadibich je ayo'n, huen jadu'n yjadiiyb miid iich nej miich mdzojcin.

⁴³Chi jadüg'oc Jesús huimbijty ma je nidugiigpi discípulos, e oy pátnibi maab ajcxy, je' co ca' anajty ajcxy mimadägy máhuui. ⁴⁴Chi yajhui'my ajcxy, e midugiig'oc ñicxy Dios mibijctzoobi. E nañ tim jadu'n oy minaanip jadu'n nej anajty ti y'ocminamb. ⁴⁵Chi jadüg'oc huimbijtni jim ma je nidugiigpi, chi nimay ajcxy:

—¿Máagixni? Póxcix jadachambi. Ti je tiempo yhuaad'ajtni mina iich, je jäy huidibi tzoon tzajpjoty, nyajciyega'ñich ma yi jibicjäydijc ajcxy. ⁴⁶Pidiccx, tzoc jámim, chi ymiin je huidibi xyciyegaambich ma nmidzipich.

Tzomy mach ajcxy Jesús yajnicxy

⁴⁷Jesús capxni anajty jim co jyaty je Judas. Judas hue' je' nidügti je majmetzpi discípulos huidibi Jesús yhuin'ijx. E je Judas miid ja'ty mayjäy, je huidibi anajty ti quexy je judío teedy mjtungmiidpi etz je mijjäydijc. E je mayjäy hue' anajty ajcxy miid ypujx etz quipy. ⁴⁸Judas, je huidibi anajty cïyepc Jesús, ti anajty jayijp yecy tüg ijxpejt huidibi miid jëbi ajcxy ijxcapy Jesús. Jadu'n jayijp Judas ycapxtuñ miid je' ajcxy, e yminañ:

—Je jäy huidibi anajty ndzücxypich, yí' je' Jesús. Májtzcix.

⁴⁹Huin'it Judas nimijhuágy Jesús co capxocxa'ñ, chi yminañ:

—iHuindzin!

Chi tzücx.

⁵⁰Chi Jesús ñimayi:

—Migüg, ¿na'amy co xyñimijhuágyich?

E co jadu'n ñimay, chi mic'amy yí' ajcxy majch Jesús. Chi ajcxy yajnicxy tzumy mach.

⁵¹E huin'it nidüg je Jesús ymigüg, juudy je ypujx. Chi tatzpujxtucy je teedy mijtungmiidpi ytumbi. ⁵²Chi Jesús ñimay je' ydiscípulo:

—Pidäg yí mbujx ma ytijc. Com pinjaty tziptumb miid pujx, nañ jadu'n y'ögipy miid pujx. ⁵³¿Nej ca' mnejhuüy co iich jëbi nbijctzooyich cham adzu'x may ángeles, je huidibi xyñihuá'nibich ma nmidzipich?

⁵⁴¿Per nej ycixipy yca'pxipy nej miin jaaybety, jadu'n nej cham ytuñyí yjadyí miid iich ycixpi?

⁵⁵Chi Jesús ñimay je mayjäy:

—Miich ajcxy ti xyñidzoniyich miid je pujx miid je quiipy. ¿Nej mdijy iich meetzpi o jäy yaj'öcpich? iich jabom jabom anajty iñäyich nyaj'ixpicyich miich ajcxy jilby ma Dios ytijc. E ca' miich ajcxy xymajchich. ⁵⁶Huinjihui' miich ajcxy co tüg'öciy yam ytuñyí yjadyí ca'px tim jadu'n nej je profeta ajcxy cojaay jecy'ajty.

Huin'it nidüg'öciy je' ydiscípulos ajcxy yqueectay. Chi Jesús yhui'my naydügpajc.

Jesús ma naymujcpidijc yhuinduu

⁵⁷Je' ajcxy huidibi anajty ti mach Jesús, yajnicx ajcxy jim ma Caifás

ytijc. E jim ma Caifás ytijc ma anajty ti ñayyöymujctáayigixy je escribas etz je mijjäydijc ajcxy. ⁵⁸E je Pedro anajty axam nicxy jigüegy jihuüy, ixti cooni yajja'ty ma Caifás ytiba'. Chi jim ytigiy. Chi ixtacy miid je cuend'ajtpi ajcxy, je' co oc'ixa'ñ ocnejhuñhua'ñ nej Jesús yjada'ñ.

⁵⁹Je teedy ajcxy mijtungmiidpi etz tüg'öciy je judíojäy mijtungmiidpi ajcxy huinma'ñ ixtaaygixy nej jëbi Jesús yajpocycägixy miid ajcxy xihuín, e jadu'n jëbi mooygixy yí o'cin. ⁶⁰Mayjäy ñihuambejty Jesús miid anii, per ni pin anajty ca' miidity tiy'ajt co Jesús anajty ti ytundigooy miid judíojäy ajcxy ycötujcin. Jac com jecy miin metz testigos miid aanii. ⁶¹Je' ajcxy yminañ:

—Jadayaabi yëydijc minañ co jëbi nyajhuindigooyich Dios ymijtzajptijc, e codugiig xii ti anajty nyaj'oyiyich jadüg'oc.

⁶²Huin'it je teedy mijtungmiidpi ytinayigy, e ñimay Jesús:

—¿Nej co ca' m'adzooy? ¿Nej janch tiy'ajt nej jadayaabi metzpi testigo ymina'ñ?

⁶³Per Jesús ca' y'adzooy. E huin'it je teedy mijtungmiidpi ñimaayi:

—Ñimaayg iich ajcxy Dios ycixpi, pen janch miich je' je Cristo je Dios y'ung.

⁶⁴Chi Jesús yminañ:

—Miich jadu'n minamb. Nañ jadu'n iich miich ajcxy ñimäy, co iich je jäy huidibi tzoon tzajpjoty, miich ajcxy xy'ixipyich tzajpjoty ma Dios ymijc a'oy'amy. Nañ jadu'n miich ajcxy xy'ixipyich jocjoty co anajty nhuimbityich jadüg'oc ya naaxhuñ.

⁶⁵Chi je teedy jacmijtungmiidpi oy yhuít huindzeczy huinma'ch, chi yminañ:

—Jadayaabi yëydijc ti capxtigooy Dios. ¿Ti testigo njac-huaanim? Miich ajcxy ci'm ti mmidoogixy co yi' ti ycapxytigooy ma Dios, e minañ: ⁶⁶¿Nej miich ajcxy minaangixy?

Chi ajcxy yminañ:

—Ti ycapxytigooy, copicy co y'ögipy.

⁶⁷Chi ajcxy huindzuju jįptzujy etz cojxy ajcxy. Chi jacjadyii huingoju jįpcojxy. ⁶⁸E chi ajcxy nimay:

—Pen janch co miich je' je Cristo octiygapx pin ti xycoxy.

Pedro ymina'ñ co ca'p Jesús ix'yadyii

⁶⁹Je huin'it moñi Pedro anajty iñay tibägujc. Chi ñimiini tüg töxy'anäg tumbi, chi ñimaayi:

—Miich nañ jadu'n ti mhuidity miid Jesús je Galilea jäy.

⁷⁰Chi Pedro yminañ mayjäyjoty:

—Ca' nhuinjihuüyich ti mgapxy.

⁷¹Pedro hue' anajty pidzimnip co ñimiini huingbi töxy'anäg. Chi je töxy'anäg nimay je' ymügügtijc:

—Jadayaabi yëydijc ti yhuidity nañ jadu'n miid Jesús je Nazaretpi.

⁷²Chi Pedro jadüg'oc coyüch je Jesús cixyjot huinjot yminañ:

—Ca' n'ixy'adyiijich yįiibi yëydijc.

⁷³Jac co hueeni, je jäy huidibi anajty ajcxy jimip ñimay ajcxy je Pedro:

—Janch co miich nañ jadu'n anajty miid mhuidity yi Jesús, com yi m'ayuc yi' xyajniquëxcp.

⁷⁴Chi Pedro tigiyy capxpí janch oy ñinej minañ huinjot:

—Ca' n'ix'adyiijich yi yëydijc.

E tim huin'ítij je tzey yaxigy.

⁷⁵Chi Pedro jäymejtzcody jadu'n nej anajty Jesús ti ñimäyii: “Ma ca'ni anajty tzey yaxigy cham coodz, miich tugüig'oc xycoyützibich.” Chi Pedro pidzimny tiba', e jiiby oy yaxy mibaad yjotcidägy.

Chi Jesús yajcäyeycy ma Pilato

27 E co oy yxiimiy yticxiy, chi je teedy mijtungmiidpi etz je mijjäydijc ajcxy quipxycapxy co yaj'ögaangixy Jesús. ²Chi ajcxy yajnicxy cixoch oy ajcxy cäyeycy ma Poncio Pilato je gobernador.

Judas ñayyöctiyyi

³Co je Judas je huidibi anajty ti cäyeycy Jesús, co ijxy co yaj'ögaanip Jesús, chi oy yjotmaybaatni. Chi conhuimbijty je iipxmajcpi plata meen ma je teedy mijtungmiidpi etz mijjäydijc ajcxy. ⁴Chi Judas nimay je teedy mijtungmiidpi etz je mijjäydijc ajcxy:

—Hich ti ndundigooyich co ti ngäyeyyich yi tudägyjäy ma miich ajcxy.

Chi je' ajcxy y'adzooy:

—Ti iich ajcxy n'occuent. Miich yi' mnigixp tiibi mduñ.

⁵Huin'it Judas cohuijy je meen jiiby tzajtīgoty. Chi ñicxy. Chi ñayyöctiyyi.

⁶Huin'it je teedy mijtungmiidpi yajpidigy je meen. Chi ajcxy ñayñimaayi miñ xyipy:

—Jadayaabi meen ca' yjëbity co nbidaacim ma ofrenda ñigidägy. Je' co yi' yjëjity je huidi ni'py ti tzoo'adyii.

⁷Huin'it je teedy ajcxy tuñ je quipxycapxy co juyaangixy

miid je meen tüg naax huidibi jäy ytiyp, tütznaax it, ma ajcxy yajnaxtigihuiipy pinjaty ca' ycocajpity jim Jerusalén. ⁸Ixti chambaad jadu'n xii'adyii jejimbi it: Ni'py naax. ⁹E jadu'n ycixj yca'px nej je profeta Jeremías yminañ: “E jadu'n ajcxy je' yajpidigy meen iipx majcpi plata meen (je' choou nej anajty ajcxy Israeljäy ti yajnigödugiy), ¹⁰e miid je meen ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

¹¹Jesús yajpaady jim anajty ytinäy ma je gobernador Poncio Pilato yhuinduu, chi y'amidoohui: —¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹²Je judío teedy ajcxy huidibi miytungmiidpi etz je mijjäydijc tzachxigixy Jesús ma je gobernador. Ni jadu'ñyi Jesús ca' y'adzooy.

¹³Chi je Pilato ñimay Jesús:

—¿Nej ca' mmidooy nej yi' ajcxy yxiyi?

¹⁴Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocnejhuiiyñi ti ycapxipy.

Jesús ycüdujcy y'o'cin

¹⁵Je gobernador jadu'n anajty ycostumbre miidity co jimijt jimijt najtzmazzy tüg machyjäy pascua xiijoty, je huidibi je mayjäy ti ytimychojcpy. ¹⁶E jim anajty tüg je machjäy huidibi anajty ajcxy ix'yajttaayb, e yxiijity Barrabás. ¹⁷E

co anajty jim ti ytügmujctaaigy, chi Pilato ajcxy y'amidooy:

—¿Pin miich ajcxy mdzojcpy co iich nnajtzmazzyhuidibi? ¿Najtzmazzyich Barrabás o Jesús huidibi jäy ajcxy ytiyp je Cristo? ¹⁸Pilato ñejhuiyb anajty co mañ'ajtingix anajty ti cyejccixy Jesús.

¹⁹Jimni anajty iñäy Pilato me je ycütojctac co je ytöxyjc tiy'ajt quejxy ma yi', yminañ: “Ca' huaad myajtzaachytuñ yi tudägyjäy. Je' co iich amygoodz ti ngumäyich janch jibic miid yi' ycixpi.”

²⁰Per je teedy ajcxy etz je mijjäydijc ti anajty capxyjotcidaaccixy je mayjäy co huen yajnajtzmazzy Barrabás etz huen yaj'öccixy Jesús. ²¹Paady co jadüg'oc je gobernador y'amidooy je mayjäy:

—¿Huidibi machyjäy mdzojcpy co nnajtzmazzyhuidibi?

Chi je mayjäy y'adzooy:

—Najtzmazzy Barrabás.

²²Chi Pilato y'amidooy je mayjäy: —¿E nej ndunipyich yi Jesús, huidibi jäy ytiyp Cristo?

Huin'it ajcxy nidüg'öciy y'adzoday:

—iYajcruutzpet yi Jesús!

²³Chi Pilato yminañ:

—Pues, ¿nej ti ytundigooy?

Per je mayjäy nigoob y'adzoday:

—iYajcruutzpet! iYajcruutzpet!

²⁴Pilato yjapubedaan Jesús, per co ijxy nejhuiy co je mayjäy ca' ni nej niducy. Hue' ajcxy oy ytiigiyy huambi jihuiybi, chach ñayñajtztijiygixy miid jot'an. Huin'it Pilato capxyñiguejxy je

huádz nii. Chi ytiigi y cibujp ma je mayjäy yhuinduu, e yminañ:

—Ca' hich ngo'adzohuipyich jadayaabi tudägyyëdyjc y'o'cin. Miich ajcxy y! mgo'adzohuipy.

²⁵Chi je mayjäy y'adzoday:

—hich ajcxy ngo'adzohuipyich y! y'o'cin miid n'ung anäg etz n'ap n'oc.

²⁶Chi Pilato najtzmaziy je Barrabás. Per Pilato ane'my co huen Jesús yajhuojp. E co yajhuojtay, chi cäyeycy, co huen yajcruutzpedyii.

²⁷Chi Pilato ysoldados ajcxy yajniçxy Jesús ma agujtjic. E jilby tüg'óciy soldadtjic ñayyömuçjic ma Jesús. ²⁸Chi je soldado ajcxy je' yhuít yajniçenducy. Chi ajcxy yajniçeny je tzapx huit huídibi je rey ajcxy yajtuumyb. ²⁹Chi ajcxy tacy tüg corona miid apy. Chi ajcxy yajcöjeny ma Jesús. E huin'it ajcxy a'oy'amy yajcögabiyy tüg je paxy. Chi ajcxy huingoxtinay'ahuüyy. Chi ajcxy nixiicy yajxiicy, e yminaangixy:

—iOoy ymijity yjanchity, je judíos ajcxy yrey!

³⁰Chi ajcxy huindzujy jÿjptzujy. Chi ajcxy yajcögajptucy je paxy, e yajcöhuojpÿgy ajcxy. ³¹E co ajcxy nixiictay yajxiictay, chi yajniçenducy je rey yhuít etz yajniçeny je yci'm huit. Chi ajcxy yajniçxy ma yajcruutzpedaangixy.

Co Jesús yajcruutzpejti

³²E jim ma anajty hueeni ti ytüyöy, jim ti paty tüg Cirene yëdyjc anajty yxiijity Simón. Chi ajcxy adzip nimay Simón co huen jaccapi Jesús ycruudz.

³³E co ajcxy yja'ty ma tüg je it yxiijip Gólgota, jadu'n yhuimbizim

Öcpi Cohuajc Cögop. ³⁴E jim ajcxy Jesús jayaj'tuga'n vino temhuidity miid tzooy, jigix ca' jihuihuip je tzaachypi. Per co uucmajch, chi jihui'nybiçco co ca' y'oy'uucnity.

³⁵E co anajty ajcxy yajcruutzpety Jesús, chi je soldadtjic suerte ijxy, pin jëbi ocj'adyii Jesús yhuít, chi yciçxy yca'pxy jadu'n nej je profeta cojaay jecy'ajty: “Yajhuäçipy ajcxy hich nhuit e miid hich nhuit yciçpi ixiçy ajcxy suerte.” ³⁶E jim anajty ajcxy iñaaygixy cuend'ajtcixy. ³⁷Je xihuín ayuc huídibi ajcxy yjaay ma Jesús ycöduu jadu'n yminañ: “Jadayaabi je! Jesús, je judíos ajcxy je yrey.”

³⁸Quipxy miid Jesús ajcxy yajcruutzpejty metz meetzpi. Tüg a'oy'amy, e jadüg anajty'amy.

³⁹Je mayjäy huídibi ajcxy naxiçyb anajty ma Jesús, ooy anajty oy ycöjigiñ, nixigxy yajxiçy ajcxy Jesús, ⁴⁰yminañ ajcxy:

—Bah, miich huídibi Dios ytjic jidaanip, e codugiç xii huingbi myajpidiça'n. Miich ci'm cham naygohuäni, e minac cruudzçxy, pen janch miich Dios xy'ung'adyii.

⁴¹Nañ jadu'n je teedy ajcxy huídibi mijtungmiidpi, etz je escribas, etz je fariseos ajcxy etz je mijjädjic nixiicy yajxiicy ajcxy Jesús, ñayñimáayigixy miñ xyipy:

⁴²—Huingbi ti cohua'n, e ca' jaty nej ci'm ñaygohua'niçyb. Pen janch co y! jëjity je Cristo je Israel jäy rey, huen minacy jadachambi ma cruudz, huin'it nmibijcim. ⁴³Yi' ti pidägy ymibijcin ma Dios; huen jadachambi je Dios yajniçzögyii, pen janch Dios chogyii; y! ti yminañ co Dios y'ung'adyii.

⁴⁴Nañ jadu'n je metzpi meetzpi ajcxy huidibi cruudzpejt quipxy miid Jesús nixiicy yajxiicy ajcxy ooy Jesús.

Jesús y'ögy cruudzcíxy

⁴⁵Co ycuycxiijiyi, chi ycoodziyday tüg'óciy naaxhuiñybi. E jadu'n je naaxhuiñybi y'ijty coodz, ixti minacy yxii. ⁴⁶Huin'ítiy Jesús ycapxyqueecy janch mic yminañ: —Elí, Elí, ¿lama sabactani? —yi jadu'mbi ayuc hue' yhuimbidzimy: Dios Teedy, Dios Teedy, ¿ti co ti xy'ixmachich?

⁴⁷Nijëjity jáy huidibi anajty jim yajpatp huington ma Jesús co jadu'n midoogixy Jesús y'ayuc, chi ajcxy yminañ:

—Jadayaabi yëydijc cham yaaxtaayb je profeta Elías.

⁴⁸Huin'it nidüg jáy ñicxy janch poygy etz oy yajtzoñ je pixy. Chi je pixy yajxoogy miid je xun vino. Chi pidacy je pixy ma je paxyjijp. Chi yujctijy ma Jesús y'ahuac co huen ügy. ⁴⁹Huin'it nijëjity ajcxy yminañ:

—Ixmatz, tzoc ajt oc'ijxim, pen nimiinip Elías, pen janch yajnidzögyii.

⁵⁰Jadüg'oc Jesús yaaxqueegy janch mic. Chi oy y'o'cni. ⁵¹Co Jesús y'o'cy, tim huin'ítiy jim ma Dios ytijc je mapxy yhuit yciitzhua'cxy tinä'amy. E nañ jadu'n je naaxhuiñybi ooy chuyuy miid uyx micpi etz je mijjatychaa oy jiitzhua'cxy. ⁵²May öcpi jut y'ahuach etz yjugypijcy mayjäy tiibi anajty y'o'ccixy tiibi anajty mibijccixy Dios. ⁵³Co Jesús yjugypijcy, chi je may'öcpi tiibi

anajty jugypijccixy etz tiibi anajty pidzimgixy ma öcpi jut, chi ajcxy ytigiyy ma je Dios ycajp, je Jerusalén. E mayjäy ajcxy ijxy. ⁵⁴Co je mic uyx oy ñaxy etz jac tijaty anajty ti ytuñyii ti yjadyii, chi je capitán etz miid jadyii ymigügtijc huidibi anajty cuend'ajtp Jesús ooy ajcxy chigiy yjihuiy, e minaangixy: —Janch tiy'ajtp co yjiibi yëydijc Dios yi' anajty y'ung.

⁵⁵May anajty nañ jadu'n töxyjäydijc ymij'ijxcixy jiguem huidibi anajty ajcxy Jesús ti miiddzoon jim Galilea. Yi' anajty ajcxy Jesús ypubejtp. ⁵⁶E ma je' ajcxy jim anajty chooñty, María Magdalena, María huidibi Jacobo etz José ytaj'ajtpy, etz je huidibi Zebedeo y'ung ytaj'ajtpy.

Jesús yajnaaxtigiiyi

⁵⁷Co oy chuu'iiyñi ycoodziyñi, huin'it chooñ ma Arimatea tüg comeeñyjäy huidibi yxii José. E je' ymijnicxpejty anajty Jesús. ⁵⁸Chi José ninicxy Pilato oy pijctzou Jesús ñinicx. Huin'it Pilato pidacy y'ane'min co huen möyii. ⁵⁹Chi José ycidiigiyyi Jesús ñinicx. Chi huinmojch miid tüg poob sábana. ⁶⁰Chi yajnaaxtigiy ma je yci'm jut jemybi huidibi anajty ti yajtzejtztüty ti yajpädüty ma tüg tzahuingueetz. Chi adiguejctujcy je öcpi jut miid tüg tzaa. ⁶¹Chi José ñicxni. E jim yhu'i'my María Magdalena etz je jadügpi María, y'iñäy ajcxy ymihuingon öcpi jut.

Je cuend'ajtpi ajcxy ma Jesús ñaaxtigiiyi

⁶²E com jabom ma anajty Jesús ixiiybi ti y'ögy, ma anajty ti

ni'ixiydäy miid je sábado xii ycixpi, chi je teedy ajcxy huídibi tungmiid etz je fariseos ajcxy ñayyöymujci ma je Pilato. ⁶³Chi ajcxy yminañ:

—Huindzin, yi' iich ajcxy njäymejchpyich co je aniidacpi yminañ ma anajty yjuugyity co codugiig xii jugypiga'ñ jadüg'oc co anajty ti y'ögy. ⁶⁴E paady tunmay'ajt quexipy soldados ajcxy ma Jesús ti ñaaxtigiy huen cuend'ajtcixy ixti cooni tugiig xiibi paadipy. Ca' yjegyity co ñiminiib adzuum agoodz je' ajcxy huídibi mijnicxpejtíp etz tzimguëgipy ajcxy Jesús ñinix. E chi nicxy jäy yminañ: “Ti yjugypicy je öcpi.” Chi anajty jac'anaxy je anii ti yjajtni ca'ydi je jayijpi.

⁶⁵Chi Pilato ajcxy nimay:

—Miich ajcxy miid tüg picy soldados huídib cuend'ajtp ma miich ajcxy. Níxcix miich ajcxy yaj'adujccixy je öcpi jut, jadu'n nej m'a'ixiiygixy.

⁶⁶Chi ajcxy choni ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huídibi ajcxy je jut yaj'adiguejtujcy.

Co Jesús yjugypijcy

28 E com jabom co yximiy yticixgy je domingo xii, huin'it ñicxy María Magdalena etz je jadügpí María ma Jesús ñaaxtigiy. ²Chi tüg mij uix ñajxy. Huin'it ycidacy Dios tüg y'ángel huídibi tzomb tzajpjoty. Chi jidigejcy je tzaa ma je öcpi jut aguu. Chi y'ixtacy ma tzaa nicx. ³Janch adíicxp je ángel anajty yhuinjijp jadu'n nej huídizuc, e je yhuít janch

poob'ögy. ⁴E co je soldados ajcxy ijxpaty je ángel, chi ajcxy ooy chuyuygooty. Chi ajcxy yhui'my jahuengi ögy. ⁵Huin'it je ángel y'adzooy je metz töxyjäy:

—Ca' miich ajcxy mdzigiy. Hich nejhuíybiich co miich ajcxy m'ixtäy Jesús je huídibi ajcxy yajcruudzpejty. ⁶Per ca' je' cham ya. Ti je' yjugypicy, jadu'n nej yminañ. Min miich ajcxy oc'ix ma ñaaxtigiy. ⁷Nícx miich ajcxy jottigooyb ma je' ydiscípulos ajcxy e nima': “Ti Jesús yjugypicy jadüg'oc, e yi' ñicxip jim Galilea e jim ajcxy mmiidnaybadiiyb.” Hich miich ajcxy yam nnímaaygixy.

⁸Huin'it je töxyjäy ajcxy chooñ janch poyigy ma anajty ti ñaaxtigiy Jesús. Chi ajcxy ñicxy miid tzigi'ñ, per agujc jotcujc. Poyigy ajcxy oy tiy'ajt yecy ma je discípulos ajcxy. ⁹E jim anajty je metzpi töxyjäy ytüyöy, timetini Jesús ñayguëxici ma je' ajcxy yhuinduu. Chi Jesús ajcxy capxocxy. Chi je' ajcxy mihuingoñ Jesús etz mineeni je' ytecy. Chi ajcxy huindzigiiygixy.

¹⁰Jesús minañ:

—Ca' mdzigiiygixy. Nícx miich ajcxy nima' je nmigügtijcich co huen ajcxy nicxy jim Galilea, e jim naybadiiybich miid yi' ajcxy.

Huídibi ajcxy je soldadotijc ñigapx

¹¹E tüyöybñi anajty je töxyjäy nimetzpi co nijjëjity je soldados ajcxy chooñ ma Jesús ñaaxtigiy ñicxy jim Jerusalén, miidmiydäga'ñ je teedy huídibi tungmiidpi nej anajty ti ytuñyíi ti yjadyii ma Jesús ñaaxtigiy. ¹²E huin'it je teedy ajcxy ñayyöymujctayi miid je mijjäydic,

tunaangixy quipxy capxy. Huin'it je teedy ajcxy etz je mijjädijc moy ajcxy je soldados may meen. ¹³Chi ajcxy nimay:

—Miich ajcxy mina'nip co maab anajty miich ajcxy mijcoodz co ymiiñ Jesús ydiscípulos ajcxy etz tzimgueeci Jesús ñinix. ¹⁴Etz pen ymidooyb anajty yi gobernador, iich ajcxy ngapxjotcidägich, jigix ca' nej xytúngixipy.

¹⁵E huin'it ajcxy je soldados ycidigiiyi je meen. Chi ajcxy ñicxy cuyduñ jadu'n nej anajty ajcxy ti ñimäyii. E ixti chambaad jadu'n judíojäy capx je ayuc.

Huidibi Jesús yajnibijc ydiscípulos ajcxy

¹⁶E jadu'n ajcxy ñicxy je nimajctügpi Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús ti ñimäyigixy. ¹⁷E co ajcxy ijxpaty

Jesús, chi ajcxy oy huindzigiiy. Per jim nijējity huidibi ca' mibijcy co anajty yjējity. ¹⁸Huin'it Jesús ymijhua'cy ma yi' ajcxy, e nimay:

—Iich ti nyajmōyich je cōtujcīn jiiiby tzajpjoty etz ya naaxhuiñ. Iich ti nyajmōyich je mij cōtujcīn, jaydēbi n'ane'myich jiiiby tzajpjoty etz ya naaxhuiñ. ¹⁹E paady nicx miich ajcxy huindu'my naaxhuiñ capxhuāxcix je ayuc, jaydēbi jāy ajcxy xymibigipyich. Tüg'óciy jāy ajcxy huidibi xymibijepich myajniibedipy ajcxy miid Dios yxii, Dios y'ung yxii, etz miid je Espíritu Santo yxii. ²⁰Miich ajcxy myaj'ixpigipy je mayjäy co copicy cuydunipy ajcxy iich ngōtujcīn tüg'óciy jadu'n nej ti n'ane'myich miich ajcxy. E miich ajcxy mnejhuiiyb co nmīd'ityich miich ajcxy huinixii huinītiempo, ixti mabaad naaxhuiñybi anajty yciixpi ytigooy. Jibaad ycixy. Amén.

SAN MARCOS

Jaayhui'my Jadu'n Nej Jesucristo Ytun Yjajti

1 Jadu'n oga'n chondacy je oybi ayuc tiy'ajt jadu'n nej Jesucristo, je Dios y'ung ytun etz yjajti.

²Je Dios y'ayucnajtzcaxhiybi je Isaías jecy'ajty jayhui'my jadu'n nej Dios nimay je Cristo:

Nguexaamyich iich ngogapxy jayijp ma nidüg nidüg cajp ma miich mnicxa'n jac'axam, jigix jëb je cogapxy nimähuiipy je jäy ajcxy co huen nayñi'ixíyigixy ma yjot yhuinma'n miid miich ycixpi, jadu'n nipaady nej jihuüy jäy ajcxy ni'ixiy tü'aa co tüg rey yjada'n.

³Nañ jadu'n jadüg it Isaías jayhui'my jada ayuc ma jadu'n yminañ:

Jim mįjtigüduum jäy ajcxy midoy co tüg jäy y'ayuccapxhuäcxy, jadu'n yminañ: “Nayñi'ixíyigix ma mjot mhuinma'n ajcxy jaydëb naybaatim miid ajt nHuindzin Dios. Ixmájtzcixy yi mjibicjot mjibic-huinma'n. Jadu'n nipaady nej jäy ajcxy yajtiy tü'aa huidibi ooy y'adijy y'a'och.”

⁴Jim mįjtigüduum anajty Juan je Bautista miñ e ytigiiy mayjäy yajniibejtpi. Chi Juan capxhuäcxy Dios y'ayuc ma je mayjäy ajcxy huidibi anajty mimb niibejtp. Juan ayuc capxhuäc co copicy co jäy ajcxy huen jothuimbįtzcixy etz ixmájtzcixy ajcxy je yjibichuinma'n, etz niibejtzcixy, jigix jëbi Dios yhuinmecxiib ajcxy ypocy.

⁵Tüg'óciy je mayjäy ajcxy huidibi anajty tzinaayb jim Judea ñaaxjot etz jim Jerusalén mimb anajty ajcxy ma Juan, e y'amidoo'ijty anajty ajcxy je'y'ayuc. Co je jäy ajcxy capxidziimy nej anajty ypocytungixy, chi Juan yajniibejty ajcxy ma je Jordán mįjni.

⁶Juan hue' anajty yhui'tajtpy camello nibijc, e nañ jëyim anajty miid ñayhuiñyii, e hue' anajty yjicx'ajtpy mu' etz uxpäg. ⁷Juan ycapxhuäcxyp anajty Dios y'ayuc ma je mayjäy, e yminañ: —Iich jayijp ti nmiñich ngapxhuäcxy Dios y'ayuc. Jac'axam minipy tüg jäy huidibi jacnigi mic'ajt miidity ca'ydi iich, ca' xypaadyich nicxy nguejyich yi' ycighuin. ⁸Iich ti nyajniibetyich

miich ajcxy miid nii. Per je jäy huidibi yjacmiid Dios ymic'ajt, ca'ydi iich. Yi' xyaj'adig'ihuip xyajjotig'ihuip Dios yjihui'n ymic'ajt, jadu'n nipaadip nej jihuüy xyajniibedip miid Dios yjihui'n ymic'ajt.

Co Jesús ñiibejty

⁹Je huin'it xii huin'it tiempo Jesús choon ma je cajp huidibi yxii Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it xii Juan yajniibejty Jesús ma je Jordán mijni. ¹⁰Pidzimb anajty Jesús ma je mijni, e tim huin'ityi Jesús iix co je tzajp anajty y'ahuäch, e iix je Espíritu Santo choon tzajpjoty, e ycidägy ma yi'. Jadu'n je Espíritu Santo yquëxägy anajty nej tüg muuxy. ¹¹Chi Jesús midooy capxy ayuc choñ tzajpjoty, nimäyii:

—Hich miich n'ung'ajtpy. Ooy iich miich ndzocy njihuüy. Ooy jotcujc najjihuüyijich miid miich.

Je mujcu' tuñ ijxta'ni ma Jesús

¹²Huin'it mic'amy je Espíritu Santo yajnicxy Jesús mijtig'iduum. ¹³E hue' Jesús yhui'miy jim mijtig'iduum huixchiguipx xii ahua'n iyujc agujc. Huin'it je mujcu' jot'ijxy yhuinma'n'ijxy je Jesús. Chi je ángeles ajcxy miñ ypubejty ypuđigiüy je Jesús.

Jesús ytung yajtzondägy jim Galilea

¹⁴Ti anajty Juan yajpidägy pujxtigoty, jac'axam Jesús ñicxy jim Galilea. Jim Galilea Jesús capxhuächxy Dios y'ayuc etz yi Dios y'ané'min. ¹⁵Jesús yminañ:

—Ti je xii je tiempo yhuaad'ajtni. Ti nigoody je xii je tiempo mina Dios pidäga'n yi' y'ané'min ya naaxhuiñ. Jothuimbijtcix ajcxy, etz ixmajtzcix ajcxy mjibicjot mjibic-huinma'n. Mibijccix Dios y'ayuc jadu'n nej jëb ajcxy m'alma ñidzögipy.

Jesús huodzoñ midaax jäy huidibi anajty acxmajtzp

¹⁶Jesús huidijtp anajty ma je mejypa' huidib yxii Galilea mejy, co oy'ijxpaady Simón etz y'uch Andrés. Simón etz Andrés acxmadzii anajty ytung'ajtpy, ytipidacpy anajty y'acxmadzi'n mejyjoty co ajcxy Jesús ijxpaty. ¹⁷Chi Jesús nimay Simón etz Andrés:

—Min miid iich. Hich miich ajcxy huingbi tung nmöhuipy. Jadu'n mdung nipaadip nej jihuüy mjäymájtzcixipy.

¹⁸Mic'amy Simón etz Andrés ajcxy ixmajch y'acxmadzi'n, e ñicxy ajcxy miid Jesús.

¹⁹Chi Jesús yjacyöy anajty hueen, e ijxpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyiüy je y'acxmadzi'n. ²⁰Chi Jesús mijhuooy ajcxy Jacobo etz Juan, e nimay co huen nicxy miid yi'. Mic'amy je' ajcxy ixmajch yteedy, je Zebedeo, barcojoty miid ytumbi, chi ajcxy ñicxy miid Jesús.

Tüg jäy huidibi anajty jibic espíritu miid

²¹Huin'it Jesús miid ymigügtijc yja'ty jim Capernaum. Je huin'it sábado, je poocxin xii, Jesús

ytigiïy ma je judíoïjây ajcxy ñaymujctac jim Capernaum, chi yjâyayaj'ixpíjctzondacy. ²²Je mayjây ooy ajcxy jihuiïy huinmay je ayuc huidibi Jesús anajty ajcxy yaj'ixpíjcp. Com Jesús hue' anajty yaj'ixpícy jadu'n nej jihuiïy yci'm'ané'min miidíty. Ca' Jesús anajty yaj'ixpícy jadu'n nej je jây ajcxy huidibi yaj'ixpíjcp anajty Moisés ycötújcin je jécyïp. ²³E ma je naymujctac tüg yëydíjc huidibi miid anajty ca'oybi. Chi je ca'oybi ooy mic ycapxcoody, e ymínañ:

²⁴—¿Ti co xy'amayïy iich ajcxy, Jesús huidibi tzomb jim Nazaret? ¿Nej ti mmiñ co xyajhuindígoýáangixyichi? Iich n'íjxcajpy miich, e nejhuiïybich co miich je' je Huätzpi Dios.

²⁵Chi Jesús ix'oïy je ca'oybi, e nimay:

—Amon miich, e pidzimb ma jada yëydíjc.

²⁶Huin'it je ca'oybi yajyajch yajquidy je yëydíjc, e mic yaaxqueegy, e ypidzimy ma je yëydíjc. ²⁷Tüg'óciy je mayjây jiiïy ma je naymujctac ooy ajcxy ñay'adzigiïyi, e ñayñimaayi ajcxy miñ xyïpy:

—¿Ti jada' yi'? Jada yëydíjc ymiid jemybi ixpíjcin. Yi' miid mic'ajt etz ane'm'ajt, paady ycixpi yi' ane'my yi ca'oybi, e ycapxmidoohuip.

²⁸Mic'amy je mayjây ajcxy huidijaty tzinaayb ma tüg tüg cajp jim Galilea nejhuiïy ajcxy nej Jesús tuñ, e cömaaygixy Jesús.

**Jesús yajtzögy Simón
Pedro ymíd töxyjâybi**

²⁹Tim huin'ítïy Jesús ypidzimy ma je naymujctac, chi ñicxy miid

Jacobo etz Juan jim ma Simón etz Andrés ytíjc. ³⁰Simón ymíd töxyjâybi píjcp anajty. Cíjx'am anajty y'lity, e mic anajty ooy ytoyii. Tim huin'ítïyi Jesús ñimaayi co Simón ymíd ooy mic ypigyïi. ³¹Chi Jesús nimíjhuägy je pa'mjäy. Chi majtzi yci', e huijtzígy. Tim huin'ítïy yi toyii y'ixmajtzi, e chi yajcay yaj'luucy Jesús etz ymígügtíjc.

Jesús yajtzögy may pa'mjäy

³²Co xii oy ycidacni, e chuu'iiyñi, chi je mayjây miid miñ ajcxy ma Jesús tüg'óciy pa'mjäydíjc, etz huidijaty ajcxy ca'oybi ymiid. ³³Tüg'óciy je mayjây ajcxy ma je jimbi mij cajp nimujcy je tíjc ma Jesús anajty ti yjättägy. ³⁴Jesús yajtzooctay tüg'óciy je may pa'mjäy huenytimytiibámity, etz yajpidzimy may ca'oybi majaty jây ajcxy. Per Jesús ca' anajty a'ixïy nicxy je ca'oybi ñigapxyii, com y'ixy'ajttaayb anajty ajcxy Jesús.

**Jesús y'ayuc tiy'ajt
capxhuäcxy jim Galilea**

³⁵Tim mooñi Jesús ymaybidígy, ca' anajty xiiimiiyñi, e ypidzimy ma je cajp. Chi ñicxy ma tüg mjígtígdium Dios miibíjctzooobi.

³⁶Huin'it je Simón etz je ymígügtíjc ooy ajcxy jalíjxtây Jesús. ³⁷Co ajcxy paty je Jesús, chi ajcxy nimay:

—Tüg'óciy je mayjây xyjadim'ixtây.

³⁸Chi Jesús nimay Simón etz je ymígügtíjc ajcxy:

—Tzoc ajt jámim ma yi jacjadyii cajp huinduy agonbi, jaydëb ngapxhuäcxibich Dios y'ayuc nañ jadu'n ma yi jây ajcxy jim. Paady ycixpi ndzooñich tzajpjoty, jigix jëbi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp jim Galilea ycapxhuäcx anajty Dios y'ayuc ma nidüg nidüg judíojäy ñaymujctac, e yajpidzimy anajty ca'oybi majaty jäy.

**Jesús yajtzögy tüg jäy
n'ibützpa'mmiidpi**

⁴⁰ Tüg jäy huídibi ymiid anajty jibic pützpa'm, je micpi, chi nimijhuägy Jesús, e ycojxtinay'ahuüy ma Jesús yhuinduu, yminañ:

—Pen miich jadu'n tzojcpy, jëb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinicx, e yminañ:

—Ndzojcpyich, cham nyajtzögy.

⁴² Co Jesús jadu'n yminañ, chi mic'amy je jäy huídibi anajty miid je jibic püdzc chögy. ⁴³⁻⁴⁴ Mic'amy Jesús ycapxc'jxy miid je jäy huídibi anajty ti chögy, e nimay:

—Ix pin myajnimäy co ti mdzögy. Nicx jayjip jliby ma Dios ytjic ma je judío teedy ajcxy, e mo' Dios yhuindzigi'n jadu'n nej Moisés ycötújcin ane'my, jigix jëbi huädz mbidzimipy ma Dios ycötújcin. Cuydun miich huídibi Moisés ñajtz'ane'miyy jecy'ajty, jigix jëbi je mayjäy ajcxy nejhuühuip co ti mdzögy.

⁴⁵ Per je yëydjic ca' capxymidoy Jesús. Co ñicxy, chi ytigiiy capxy yajyöybi jadu'n nej anajty ti yajtzögyii. Com je mayjäy nejhuühyb huídibi anajty Jesús ti tuñ, paady ycixpi Jesús ca' anajty ocjajtni nej ytigühuipy ijxna' jigue'xna' majaty cajp. Hue' anajty huídity ma ca' pin chinäy. Per miñ anajty y'oy'ixyii

huenyitimypinjäyity, chooñ ma nidüg'óciy cajp huinduy agonbi.

**Jesús yajtzögy tüg jäy
c'ima'tpi tecyma'tpi**

2 Ti anajty xii tiempo ñajzn'nicxiiyñi co Jesús yhuimbijty jadüg'oc jim Capernaum. Je mayjäy ñejhuühyb anajty co Jesús yajpaady ma tüg tijc. ² Chi mic'amy mayjäy ñayyöymujci ma anajty Jesús yajpaady, e ca' anajty tigiydac ma je tijc, miid co tzach mayjäy anajty ti miingixy. Y'adujctaa'yb anajty ajcxy je tijc'aguu. E Jesús ycapxhua'xyp anajty Dios y'ayuc.

³ Huin'it xii, midaax yëydjic ciymiñ cijx'am ma Jesús yajpaady tüg pa'mjäy huídibi yci' ytecy ti yxujxtäy anajty. ⁴ E com ca' anajty ni nej y'oy'iy nej yajjädip ajcxy ma Jesús je pa'mjäy, je' co anajty chach újtzity je tijc miid je mayjäy, chi ajcxy yajcöhuaach hueeni je tijcnicx ma anajty Jesús yajpaady. Chi ajcxy cödiyñajxy je pa'mjäy cijx'am. ⁵ Co Jesús ijxy je jäy ajcxy ymib'jcin, chi nimay je pa'mjäy:

—Migügich, yi mbocy ti yajhuinmecxtäy.

⁶ Per nijëjity huindzindjic huídibi ajcxy nijaydutp anajty Dios ñecy co ajcxy midoy nej Jesús yminañ, chi ajcxy yminañ jotjoty huinma'ñyoty: ⁷ “¿Nej co jada jäy jadu'n yminañ co ti yajhuinmecxy jada pa'mjäy ypocy? Capxtigooyb yi' miid Dios. Com ca' nipinjäy jëb ypocyhuinmecxy. Tügpa'jc Dios yi' huídibi jëb ypocyhuinmecxy.” ⁸ Per Jesús ñejhuühyb anajty nej je' ajcxy chachminañ jotjoty huinma'ñyoty, paady mic'amy yminañ:

—¿Na'amy co

mdzachhuinmaaygixy?

⁹¿Huidibi jada jac'oooy co nnimäyich yi pa'mjäy: “Ti mbocy yajhuinmecxytäyi.” O jac'oooy co nnimähuibich: “Pidig, e yajpidig yi mdögy, e tüyöy?” Tú'ciy yi!

¹⁰Chi Jesús yjacminañ:

—Jadachambi janchtiy nyajuëxiga'nich co hich, je jäy huidib tsoon tzajpjoty, e huidibi cham yajpaady ya naaxhuin, nmïidich mic'ajt jaydëb nhuinmecxyich jäy ypocy.

Co Jesús jadu'n yminañ, chi nimay je pa'mjäy huidibi yci' ytecy anajty xuxy:

¹¹—Hich miich yam jadu'n nimäy: “Tinayig, yajpidig yi mmabejt e nicx ma mdijc.”

¹²E mic'amy je pa'mjäy ypidigy, e yajpidigy ymabejt, chi ytüyöychoñ jiiy ma je mayjäy ajcxy anajty y'ixy yhuindixy. Paady ycixpi tüg'óciy je mayjäy ooy jihuïy huinmay etz jäymejch ojadajty ajcxy Dios, yminaangixy:

—Niminaabi ajt jadu'n nga'íjxim mijhuinma'n jadu'n nej cham ti n'íjxim.

Jesús nimay je Leví: “Pajamgich”

¹³Chi jadüg'oc Jesús ycajppidzimy, ñicxy jim ma mejypa!. E co mayjäy ñayöymujcy jim ma Jesús anajty yajpaady, chi Jesús yaj'ixpijc je mayjäy. ¹⁴Co Jesús yjactüyöy anajty, chi ijxpaady Leví je Alfeo ymang. E Leví ñaayb anajty ma je yajcogüejtac jäy yajcogüejt p anajty. Chi Jesús nimay Leví:

—Pajamgich.

Tim huin'ítiy Leví ytinayigy, ixmajch ytung, e panicxy Jesús.

¹⁵Jadu'n yjajti co tüg xii Jesús caayb anajty me Leví ytijc. Mayjäy huidibi ytung'ajtpy anajty yajcogüedii, etz jacjadyii jäy huidibi anajty tundigooyb miid judío jäy ycostumbre y'íñaaygixy ma je caydac quipxy miid Jesús etz je' ydiscípulos ajcxy. Com may jäy anajty ooy Jesús tzach miid huidíjtcixy. ¹⁶Jim anajty ma Leví ytijc nijëjity fariseojäy, je huindzindijc huidibi tzach padumb judíojäy ycostumbre. E co je' ajcxy ijxy co Jesús caayb uucp anajty tügmucy miid tüg'óciy je mayjäy ajcxy huidibi tundigooyb miid judíojäy ytij'ajt ycötújcin, etz yajcogüejtpidijc, chi ajcxy migapxy Jesús ydiscípulos, je' ajcxy huidibi mijnicxpejtp anajty Jesús, nimay ajcxy:

—¿Nej co Jesús miich ajcxy mHuindzin ycaymucy y'ucmucy miid yi yajcogüejtpidijc ajcxy, etz jacjadyii jäy ajcxy huidibi tundigooyb miid judíojäy ycötújcin?

¹⁷Co Jesús jadu'n midoy nej je fariseo jäy nigapxyii, chi ajcxy nimay:

—Ca' tzocy tzozdumbi yi jäy ajcxy huidibi mic'ajtp oy'ajtp. Yi' janchtiy yi huidibi ajcxy yuuba'm ymiid chojpcy ajcxy tzozdumbi. Nañ tim jadu'n yi jäy ajcxy huidibi ca' ypocymiidity, ca' ajcxy tzocy pocyhuinmeecxin. Hich ti nmiñich co nyajjothuimbidipyich pocyjäydijc. Hich ca' ti nmiñich co nyajjothuimbidipyich oyjäydijc tudägyjäydijc.

**Jesús yaj'amidoogixy nej
co jäy y'ity jaygay**

¹⁸Jadu'n yjajti tüg tiempo ayuu'ijtp anajty je jäy ajcxy huidibi mijnicxpejtp anajty Juan je Bautista. Nañ jadu'n ayuu'ajtp anajty je fariseojäy ajcxy. Chi nijëjity ajcxy ymiñ ma Jesús e amidoy:

—¿Nej co yi jäy ajcxy huidibi mijnicxpejtp ajcxy Juan etz nañ jadu'n yi fariseojäy ajcxy ayuu'ajtp ajcxy, e je jäy ajcxy huidib miich xymijnicxpejtp, ca' y'ayuu'ájtcixy?

¹⁹Chi Jesús y'adzooy:

—Co ya nyajpaadyich ya naaxhuiñ, ca' ycopácity co iich ndiscípulos ajcxy y'ayuu'adip. Jadu'n nipaady nej jäy ajcxy huidibi pójcin nixiidumy ca' ajcxy y'ayuu'aty ma yam yi pójcin nixiiduñ, e peni ca'ni je pójcpi ymígügtijc y'ixmajtztäyii. Nami je pójcpi ca'ni choñ, chi ca' pín y'ayuu'adañ huidibi nixiidum je pójcin. ²⁰E paadip je xii je tiempo mina ca' nmíid'ida'níich ya naaxhuiñ yí' huidibi ajcxy xymijnicxpejtpich, e huin'it ajcxy y'ayuu'adaangixy.

²¹Com jemybi Dios y'ayuc nyaj'ixpicpyich, paady ca' ytügüy miid je jécyip ayuc huidibi je fariseo jäy ajcxy yaj'ixpíjcpy. Jadu'n nej miich ajcxy mnejhuíy co ni pín ca' agiyíy Tuc huit miid tüg pedas jemy huit, con je' co je jemy huit niimujcp je', e chi nigi najtzcíidzihuip je Tuc huit. ²²E nañ ni pín ca' jëb huaad pidägy jemy vino ma Tuc cochac. Je' co je vino jemybi yciidzamy je Tuc cochac, e chi y'ixyojctähuip je vino etz je cochac ñitigoydähuip. Hue' janchtiy

jëb ajcxy pidacy jemy vino ma jemy cochac.

**Je discípulos ajcxy yajmújcixy
je moc cojc sábado xii**

²³Tüg sábado xii Jesús miid ydiscípulos ajcxy ñaxiiy ma tüg trigo cam. E huin'ítiiy je ydiscípulos ajcxy ytiigiíy je trigo tujcp. ²⁴Co je fariseo jäy ajcxy ijxy jadu'n nej Jesús ydiscípulos ajcxy anajty tujcmujc trigo tiim, chi ajcxy nimay Jesús:

—Ix miich. ¿Na'amy co miich mdiscípulos túngixy huidibi judío ycötújcín capx'adujcpy sábado xii?

²⁵Per Jesús yminañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tügtecy jecy'ajty, co David etz ymígügtijc yuu'ögaangixy anajty? ²⁶Je huin'it tiempo jecy'ajty co je judío teedy Abiatar mijtungmiidpi anajty ma Dios ytijc, chi David ytigíy ma Dios ytijc, e caay je tzajcaagy huidibi ti anajty yoxy ma Dios yhuinduu. Dios ycötújcín yminañ co je teedy ajcxy ycaagy'ajtpy jada tzajcaagy, ca' jac'ooyñipin. Nañ jadu'n David moy je tzajcaagy je jäy huidib anajty ajcxy ymiid.

²⁷Nañ jadu'n Jesús yjacminañ:

—Íich, je jäy huidibi tzoon tzajpjoty, nmíidich ané'mín, jaydëb nimäyich je jäy ajcxy ti jëb túngixy sábado xii. ²⁸Com Dios ti ixmach je sábado xii, paady ycixpi, iich je jäy huidibi tzoon tzajpjoty, nmíidich ané'mín jaydëb nimäyich jäy ajcxy co jëb tijaty tuñ sábado xii.

Je yëydijc huidibi anajty yci' tídzip

3 Jesús ytigíy jadüg'oc ma je judío naymujctac. Jiiby anajty

tüg yëydjic huidibi anajty ymiid tüg yci' títz. ²Je fariseojäy jilby ma je naymujctac y'ijx'ijtpy anajty Jesús, co anajty nejhuñhuañ pen Jesús yajtzögamy je pa'mjäy sábado xii, jigix jëbi ajcxy xihuip Jesús co ti ytundigoy miid judíojäy ycötújcin. ³Jesús nimay je jäy huidibi miid tüg yci' títz:

—Pidig, min ya ma iich.

⁴Huin'it Jesús y'amidoy je jäy ajcxy e nimay:

—¿Nej miich ajcxy minaangixy: Nej jëbi jada nduñich je oybi o je jibicpi sábado xiijoty? ¿Jëbi nyajtzögich jäy o jëbi nyajtigoyich jugy'ájtin?

Per je jäy amoñ ajcxy ijty, ca' ajcxy je' y'adzooy. ⁵Huin'it Jesús huindixpejty je jäy ajcxy miid chip y'ahua'n, e miid jotmay, je' co ooy ajcxy jotjuuñity, e chi nimay je yëydjic:

—Xajtiu yi mgí!

Chi je yëydjic xajtiy yci', e chi yci' oy chögy. ⁶Chi je fariseojäy ypidzimday ma je naymujctac, ooy yjotmädy ajcxy, e ñicxy ajcxy ñaymújcip miid je jadügpicy judío huindzindjic huidibi ymiñicxpejt je rey Herodes. Huinmañ ixtaayb anajty ajcxy nej jëb ocyaj'ögip Jesús.

Mayjäy ma tüg niiba'

⁷Per Jesús chooñ miid yi' ydiscípulos ajcxy, ñicxy ma mejypa'. E ooy mayjäy huidibi ajcxy tzomb Galilea ñaaxjot etz Judea ñaaxjot panicxy ajcxy Jesús. ⁸Nañ jadu'n mayjäy panicx ajcxy Jesús huidibi ajcxy tzomb jim Jerusalén, huidibi ajcxy tzomb jim Idumea ñaaxjot,

huidibi ajcxy tzomb jim Jordán mijñii ñinaxy ma xii ypidzimyb, huidibi ajcxy tzomb jim Tiro etz Sidón ñaaxjot. Ñicxtäy je mayjäy ma Jesús yajpaady, com ñejhuñiyb anajty ajcxy je mijhuinmañ huidibi Jesús anajty ytumyb. ⁹Com tzach mayjäy anajty ymiingixy, paady Jesús ni'ane'mdiy ma yi ydiscípulos ajcxy tüg barco ma jëb iñäy, ca'ty je mayjäy ooy y'adijyii y'agodyii.

¹⁰Com Jesús ti anajty yajtzögy may jäy, paady ycixpi tüg'óciy je pa'mjäy nimujcy Jesús, adzip tzachñidonaangixy. ¹¹Co je jäy ajcxy huidibi ca'oybi ymiid ijxpaty Jesús, chi ajcxy ñayhuíjojtaci ma Jesús yhuinduu, e mic ycapxcooty, ymiinaangixy:

—Miich je' Dios y'ung.

¹²Per Jesús nimay mictägy je ca'oybi ajcxy co ca' huaad nigapxcixy nimiyaaccixy pin je' anajty.

Jesús huin'ixy majmetzpi discípulos

¹³Huin'it Jesús ypejty ma tüg cögop, e capxyñiguexy co huen miñ ma yi' je ymiügügtjic huidibi yhuin'ixamy co ytunam miid yi'. Chi ajcxy ymiñ ma Jesús. ¹⁴Chi Jesús yhuin'ijx majmetz ajcxy huidibi ymiid'idamy, e huidibi yquexamy y'ayuccapxhuäcxp. ¹⁵Jesús moy je majmetzpi discípulos ajcxy huidibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷Jada je nimajmetzpi discípulos ajcxy yxii nidüg nidüg: Simón, je huidibi Jesús yxiimoy Pedro; Jacobo miid y'uch Juan, yi Zebedeo

y'lung y'anäg, je huídibi ajcxy Jesús yxiimoy Boanerges (je ayuc Boanerges jadu'n yhuimbídzimy: "Enee ymang").¹⁸ E jacjadyii huídib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huídibi Alfeo ymang'ajtpy; Tadeo; e je jadügpí Simón, je cananista.¹⁹ Nañ jadu'n Jesús huin'ijxy Judas Iscariote, je huídibi agojix cýejc Jesús ma ymidzip.

**Yajnībijccixy Jesús co
miídity mujcu' ymic'ajt**

(Co jadu'n huin'ijxtaay je majcmetzpi discípulos ajcxy), Jesús ytigíiy ma tügtijc miid yí' ajcxy.²⁰ Huin'ítity tzach mayjáy ñayyöymújcigixy ma je tíjc ma Jesús y'ity, ixti Jesús etz ymigügtijc ca' y'oyiy nej jéb ycaaygixy y'uuccixy.²¹ Co Jesús y'amigügtijc jadu'n nejhuíy, chi ajcxy nimiin Jesús yajnícxaangixy anajty mach, com hue' anajty tíjcixy co Jesús ylociib.

²² Nijējity escribas ajcxy, je huindzindijc huídibi nijaydutp anajty Dios ñecy, miin ma Jesús co choñ ajcxy Jesusalén, yminaangixy:

—Jada Jesús ymiid Beelzebú, je ca'oybi yhuindzin, ma y'aa yjot. E yí' yajpidzimy je ca'oybi ajcxy ma jáy ajcxy yjothuinma'n miid Beelzebú ymic'ajt.

²³ Chi Jesús huoomiñ ma yí' je escribas ajcxy, e yajmiidmiydacy ajcxy tüg jihuimbit ayuc. Chi Jesús yminañ:

—¿Nej tiy'ajt jada nej miich ajcxy mina'n co Satanás jéb ci'm ñayyajpidzimyii ma jáy ajcxy y'aa

yjot? Ca' tiy'ajt nej miich ajcxy mina'n.²⁴ Pen tügpicy tungmiidpi ixypiy ñaybijc-huá'cxigixy, etz ñaymidziptzóonigixy ixypiy ac jéyi. Pues cixip yí' ajcxy y'ané'min.²⁵ Nañ jadu'n pen tügpicy tüg juugy tüg migüg ixypiy ñaybijc-huá'cxigixy, ca' ajcxy y'idaangixy tügmucy.²⁶ Nañ jadu'n pen Satanás ixypiy ti ñaybijc-huá'cxiyi, e ci'm ixypiy ti nayñibidigyii, ca' ixypiy yí' ymic'ajt ida'n. Hue' janchtiy Satanás cixipy tigoyipy. (Paady ca'tiy'ájtity nej miich ajcxy yminañ.)²⁷ Ca' ni pin jéb huaad ytigíhuíp ma tüg micpi jáy ytijc etz meedzipy tijaty ymiid, pen ca' jayijp cixoch tecyoch je jáy micpi. Pen ti cixoch tecyoch ixypiy je micjáy, huin'it janchtiy mimadägipy, e píjcip tijaty ymiid.

²⁸ Janch iich miich ajcxy nimäy co Dios jéb huinmeecip tüg'óciy pocy huídibi jáy ytúngixp etz tüg'óciy jibicpi huídibi jáy ycapxp.²⁹ Jéyi janchtiy co pinjaty capxtigooyb miid je Espíritu Santo, je Dios yjihui'n ymic'ajt, ca' Dios huinmecxi nimina. Huinixii y'ida'n pocymiid.

³⁰ Miid co jáy ajcxy chach yminaangixy co Jesús anajty miídity ca'oybi, paady Jesús jadu'n yminañ.

Jesús ytaj etz y'uch miguëxy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytínaaygixy tiba'y, e chi ajcxy capxñigüejxy Jesús.³² Je mayjáy huídibi anajty ajcxy iñaayb jühuiditi ma Jesús, yminañ ajcxy:

—Miich mdaj etz m'uch cheeby ajcxy t'iba'y miich ixtaayb.

³³Chi Jesús ymínañ:

—¿Pínjáy miich ajcxy mdijy co iich ndaj'ladyii etz iich n'uch'adyii?

³⁴Huin'it Jesús huind'ixpejty je jáy ajcxy huídibi anajty iñaayb ajcxy jühuidity ma je', e ymínañ:

—Tüg'óciy jada jáy ya jadu'n ajcxy nipaady nej iich ndaj etz iich n'uch.

³⁵Huenyitimyp'ínity huídibi ajcxy cuydumb yi Dios chójcin, yí' je' jadu'n nipaady nej iich n'uch, iich n'ajch, iich ndzi' etz iich ndaj.

Je niipi y'ixpejt

4 Jadüg'oc Jesús ytigiiy yaj'ixp'ijcpi ma mejypa'. E ooy mayjáy ymujcpejty ma anajty Jesús yajpaady. Miid co ooy anajty chachmayjáyity, paady Jesús ytigiiy ma tüg barco jahuengi mejyjoty. Jesús iñaayb anajty barcojoty, e je mayjáy iñaayb anajty ajcxy ma mejypa'. ²Huin'it Jesús yaj'ixp'ijcy je mayjáy miid canaag jihuimbit ayuc. Co yaj'ixp'icy, chi ymínañ:

³—Amidoo'ijtcix miich ajcxy iich jada n'ayuc. Tüg jáy choon niipi. ⁴Co je niipi yhuíjpy anajty trigo tiim, chi je trigo tiim nijéjity oy ycáy tím tügujc. Chi je joon ajcxy ymiin' jácxy je trigo tiim huídibi tügujc ti ycáy. ⁵⁻⁶E nijéjity trigo tiim oycáy ma tzaanixc, ma nihueñ oyñaax yajpaady. E je trigo tiim ca' tzíp mujx je', je'co ca'anajty ooy naax mápxity. E co je xií ypidzimy, chi no'cy je trigo mang, com ca' anajty ytictz miid'ity naaxjoty, chi ytiich. ⁷E nijéjity trigo tiim oycáy ma apygot. Co jada trigo tiim ymujxy, chi y'ujtz'ógtáy

je trigo mang, e ca' ytiim'ajty.

⁸Per jacjadyii trigo tiim oycáy ma oyñaax, chi ymujxy, e ytiim'ajt may'amy: tüg pi'c pajc iipxmajc oycó'ity, jadüg pi'c pajc tugí'px oycó'ity, jadüg pi'c pajc miço'px oycó'ity.

⁹Co Jesús je miydägií yajmay, chi ymínañ:

—Pínjaty miid ytátzac, pin midohuamy, huen mido'mbicy jada ayuc.

Ti yi' ñigapxyp yi iixpejt

¹⁰Co je mayjáy ñicxni, e Jesús yhuí'my naydüg, chi je nimajmetzpi ydiscípulos ajcxy etz jacjadyii huídib mijnicxpejt Jesús ñimíjhua'cy, e amidoy nej yhuimbizimy je jihuimbit ayuc.

¹¹E Jesús ymínañ:

—Miich ajcxy jaydëb mnejhuíhuípy huídibi Dios ñigapxy ñimiydacpy coyúch'amy ma y'ané'min ycótújcin. Jacjadyii jáy ajcxy jihuimbit'amy nyajmiidmiydaacyich. ¹²Jadu'n jihuimbit'amy nyaj'ixp'ijcpiyich je mayjáy, jaydëb co pínjaty iixp, ca' ajcxy ixípy; etz pínjaty midoob, ca' ajcxy mido'mbigípy. E jadu'n ca' ajcxy yjothuimbidip, e nañ ni ycayajmeecxípy ajcxy ypocy.

Jesús najtzcapxíy nej yhuimbizimy je niipi y'ixpejt

¹³Chi Jesús yjacmínañ:

—¿Nej ca' miich ajcxy mhuinjihuíy jada jihuimbit ayuc? Pen ca' miich ajcxy mhuinjihuíy jada jihuimbit ayuc, ca' miich ajcxy mhuinjihuíhuíp yi jacjadyii jihuimbit ayuc. ¹⁴Je huídibi

capxhuäcxp Dios y'ayuc, jadu'n yi' nipaady nej je huídibi niip trigo tiim. ¹⁵Je jäy ajcxxy huídibi amidoo'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxxy yjot yhuinmañ, jadu'n ajcxxy nipaady nej trigo tiim huídibi cáb tüguc, e je joon ajcxxy mic'amy piimujctay. ¹⁶⁻¹⁷Je jäy ajcxxy huídibi amidoo'ijtp Dios y'ayuc janch jotcujc, e mißjccixy tzojccíx, chi ajcxxy ixmajtzi Dios y'ayuc co agapxiyb paady, e co tzaachypi minaxy yajnaxy miid Dios y'ayuc ycixpi. Jadu'n ajcxxy nipaady nej je trigo tiim huídibi ti ycäy ma tzaanicx. ¹⁸⁻¹⁹Je jäy ajcxxy huídibi amidoo'ijtp Dios y'ayuc, e co ñicxni, chi jäydi gooyñi Dios y'ayuc miid jotcujc'ájtín tziinaayín, etz comeeñ'ájtín etz adzójcin. Jadu'n ajcxxy nipaady nej trigo tiim huídibi ti ycäy ujtzjoty, e ca' ytiim'aty miid co oy y'ujtz'ögy. ²⁰Je jäy ajcxxy huídibi amidoo'ijtp etz cöbijcp Dios y'ayuc amumdügjot etz Dios y'ayuc tumb ma ajcxxy yjot yhuinmañ, jadu'n ajcxxy nipaady nej je trigo tiim huídibi ti cáb ma oyñaax etz ytiim'aty may'amy: tüg pi'cpajc iipxmajc, etz jadüg pi'cpajc tugi'px, etz jadüg pi'cpajc mi go'px.

Je lámpara ñi'ijxpejt

²¹Chi Jesús yjacminañ: —Co jäy ajcxxy jindicxi'ñ nöctzoy, chi canan ajcxxy cöjupyy miid tu'tz, ni ca' ajcxxy pidacy cijxpa'tci'py, hue' janchtiy pidaaccixy ma jindicxpejt jaydëb mij ytiicxy. ²²E nañ ni ca' ni pin ni ti jëb ameech tunipy, e nicxy ycayajnejhuüy. E ca' ni pin ni ti ayüch tunipy, e nicxy ycayajnejhuüy.

²³Pinjaty ytätzac ymiid, pin midoohuamb, huen mido'mb'jccixy iich n'ayuc.

²⁴Nañ jadu'n Jesús yminañ: —Cuentdúngix jada ayuc huídibi miich ajcxxy yam mmidooyb. Yi quipxi'ñ huídibi ajcxxy myajquipxiyb, nañ jadu'n yi' miid Dios ajcxxy xyquipxyhuimbidiy, e ixti jacyajmöhuij ajcxxy huídijaty midoob iich n'ayuc. ²⁵Pinjaty ymiid, yajmöhuij ñigi, pinjaty hueen miid, yajpigipy ñigi (oy ixipy hueen jadim miidity).

Je tiim huídibi yeecp ñi'ijxpejt

²⁶Nañ jadu'n Jesús yminañ: —Yi Dios y'ané'min jadu'n yi' nej co tüg jäy nicxy ñipy ma ycamjot. ²⁷Chi jada' co ñiipstay ñicxni ma ytijc e ymi'o'cni ymäybi'digni com jabom, e jadu'n yajnaxy canaag xii tzuu. E je moc pajc mujxp je' etz yomb. Per je cogam ni ca' nejhuüy nej je moc yoñ, ma mic'ajt paady. ²⁸Je' co yi naax ci'm mic'ajt miidity jaydëb yajyoñ je moc. Jayijp ypidzimy je moc ung, jac'axam ypidzimy yi moc pijy, e chi jada' ytiim'ajtni. ²⁹Co je moc ymajaani, chi je jäy ajcxxy nicxy moc tzijcp, com ti yhuindiy je moc.

Ijxpejt ma je mostazi pajc

³⁰Nañ jadu'n Jesús yminañ: —¿Nej m'oc'a'ixiigyixy yi Dios y'ané'min? ¿Ti miid n'ocyajquipxyhuibich? ³¹Jadu'n Dios y'ané'min nipaady nej mostaza pajc huídibi tüg jäy nicxy niipy ma ycam. Yi mostaza pajc jacniigi ymútzity ca'ydi jacjadyii ujtzpajc huídibi yajpatp ya naaxhuiñ. ³²E

co yajnipy je mostaza pajc, chi yoñ, e chi yeegy ooy janch mij, ca'ydi jacjadyii ujtz. E janch mij yeegy tüg'óciy yci' y'aacx, ixti joon ajcxy pe'mb ma je yci'y'aacx y'anicíy.

**Nej anajty Jesús yecy je tiy'ajt
miid je ijxpejt ycixpi**

³³Jadu'n anajty Jesús yaj'ixpicy je mayjäy ajcxy Dios ytiy'ajt miid canaag jihuimbit ayuc, ixti mibaad ajcxy jëb huinjihuíy. ³⁴Ac jihuimbit ayuc Jesús yajnimay je mayjäy. Per miid y'ydiscípulos Jesús ycapxtícxtaayb anajty je jihuimbit ayuc.

**Jesús capxtícx nej
huimbidzimy je ijxpejt**

³⁵Je huin'it xii co ycoodziíy, chi Jesús nimay yi ydiscípulos ajcxy: —Tzoc ajt jámim jim'amy ahuin ma yi jadügpi mejypa'.

³⁶Huin'it Jesús ydiscípulos ajcxy ixmajztay je mayjäy, e miid tzoñ Jesús barcojoty. Nañ jadu'n jacjadyii barco ajcxy choñ quipxy miid Jesús ydiscípulos ajcxy ybarco. ³⁷Je huin'it coodz tüg poj miin janch mic. E je mejy nigoo anajty y'ocpidigni. Janch tigiiyb anajty ni barcojoty, jagoo jagoo yca'ujztay je barco miid ni. ³⁸Jesús maab anajty ma je barco ijx ma tüg mabejt. Chi yajmäybidigi, e nimay ajcxy:

—Huindzin, ¿nej ca'mduñcuend co iich ajt yam nguinaanim?

³⁹Huin'it Jesús ymäybidigy, e jijpcogapxiy je poj. Etz nimay je mejy: —iAmon! iHuäcxip!

Chi mic'amy je poj ymongidactay yhuäcxijptay jadu'nyi. ⁴⁰Huin'it Jesús yminañ:

—¿Na'amy co mdzachtzigiiygixy ajcxy? ¿Nej ca' mmibíccixy co nmiidich Dios ymic'ajt?

⁴¹Jesús ydiscípulos ajcxy ooy chigiiy, e ñayñimaayi ajcxy miñ xyipy:

—¿Pin jäy jada' jada Jesús? Ooy chachmijhuinma'ñ co yi poj etz je mejy ycapxymidoyii.

**Je Gadarajäy huidibi
anajty ca'oybi miid**

5 Chi Jesús miid ydiscípulos ajcxy oyja'tcixy ma je mejypa' ma je Gadara jäy ñaaxjot. ²Tim mic'amy co Jesús ybarcobidzimy, chi nimiin tüg jäy huidibi ca'oybi miid anajty. Hue' anajty choñ ma öcpi jut. ³Je yëydjic, ca'oybimiidpi, tzinaayb anajty ma öcpi jut. E ni pin anajty ycamimadägyii. Ni pin camimadacy nicx cixoch tecyoch jada je ca'oybimiidpi, e ni ca' ajcxy mimadacy miid cadena. ⁴Canaag'oc ajcxy jacíxojch jatecyxojch miid cadena, e ypojtaayb anajty je cadena. Ni pin camihuinma'ñybaady nej jëb ocmimadaaccixy je ca'oybimiidpi. ⁵Je ca'oybimiidpi xiim tzuum anajty yhuidity tüg yuugjot etz ma öcpi it, janch mic anajty yäxytinäy. E chachnayajtzaachiyii anajty miid tzaa.

⁶Jiguëgy anajty je ca'oybimiidpi ymiin, co ijxpaty Jesús, chi poigy ninicxy Jesús, e ycojxtinay'ahuíy ma Jesús yhuinduu. ⁷Je ca'oybimiidpi mic migapxcooty Jesús, e nimay:

— Jesús, je mijpi Dios y'ung, ¿na'amy co xymidziptzoñich? May'ajt nbijctzooybich ma Dios co

ca' ich jëb huaad xychaachytuñich.

⁸Je ca'oybi jadu'n yminañ, com Jesús ti anajty nimäy:

—Ca'oybi, pidzim ma jada yëydjic.

⁹Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ich nxii hue' je' “ni may”, com ni may ich ajcxy huidibi yajpatp ma jada yëydjic.

¹⁰Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar. ¹¹Huigon anajty je cop ma anajty may idzim yjixcixy. ¹²Chi je ca'oybi ajcxy may'ajt pijctzoy, e nimay ajcxy:

—Najtzquexiigy ma yi may idzim, jigix jëbi n'adigiyich njottigiyich yi may idzim.

¹³Chi Jesús jadu'n a'ixiy co jëbi adigiigyixy jotigiigyixy je may idzim. Chi je ca'oybi ypidzimday ma je yëydjic, e yajtigiyday je may idzim ajcxy. Jim anajty yajpaady jahuengi mejtz mil idzim. Chi je idzim ylocjydaay, e ycögänaxtaay ajcxy ma tüg tzajjip, e oy ycädaaygixy niijoty, e chi ajcxy ñii'ögtay.

¹⁴Je idzim cuend'ajtp ajcxy ooy ajcxy ñay'adzigiyyi, e nicxtay ajcxy poigy ma ytjic. E oy nimiyaaccixy cajpjoty etz majaty tundac nej anajty ajcxy y'idzim y'öctaaygixy. Mayjäy ajcxy choñ mic'amy oy ijxcixy nej anajty ti ytunyii ti yjadyii. ¹⁵Co je mayjäy ajcxy yja'ty ma Jesús yajpaady, chi ajcxy ijxy je yëydjic huidibi anajty mayca'oybi ymiid. Ijxy ajcxy co iñäy huit miid etz huijycujc, ti

anajty y'oyiy. E huin'it ooy ajcxy je mayjäy ñay'adzigiyyi. ¹⁶Je jäy ajcxy huidibi anajty huindixcp co anajty je ca'oybimiidpi ti y'oyiy, etz ijxcixy nej ti ytunyii ti yjadyii miid je may idzim, chi yajmiydactay je maycajpyäy jadu'n nej anajty ti ijxcixy. ¹⁷Huin'it ajcxy pijctzoy may'ajt ma je Jesús, co huen tzooñ ma ajcxy je ñaaxjot.

¹⁸Co Jesús ytiigy jadüg'oc ma je barco, chi je yëydjic huidibi anajty ca'oybi ti ñibidzimyii ti ycöbidzimyii, pijctzoy may'ajt ma Jesús co huen a'ixiy möhuip co huen miid'idyii Jesús. ¹⁹Per Jesús ca' a'ixiy co ymiid'idyii, chi nimay:

—Huimbit ma mdjic etz mjugymigüg, e yajmiidmiydäg jada mijpi tung mijpi huinma'ñ huidibi je Huindzin Dios ti tuñ miid miich. Miidmiydägipy jadu'n nej je Huindzin Dios ti xypa'ayoy.

²⁰Chi je yëydjic yhuimbijtni, e huidijtp anajty cajp cajp jim Decápolis ñaaxjot, e nimiydactay tüg'óciy jadu'n nej Jesús ti yajtzögyii, e tüg'óciy je mayjäy ooy jihuüy huinmay.

Je Jairo ñiix etz je töxyjäy huidibi Jesús yhuit nïdoni

²¹Co Jesús huimbijty barcojoty ma je mejypa' ma anajty ti chooñ, chi mayjäy ymiin ma Jesús yajpaady, chi Jesús yhuäcxijpy ma je mejypa'. ²²Huin'it Jesús ñija'ti tüg mjtungmiidpi ma yi judfojäy ajcxy ñaymujctac. Je yëydjic hue' anajty xiijty Jairo. Co Jairo ijxpaty Jesús, chi ñayhuiojotac ma Jesús yhuinduu. ²³Jairo may'ajt pijctzoy, yminañ:

—Huindzin, ögaanip iich nniix. Tun may'ajt nicxy ma iich ndijc, e mgñixájip ma iich nniix, jigix jëbi mayajtzögip, e yjactzinähuip.

²⁴E Jesús nicxp anajty miid Jairo, e mayjäy panicxy anajty Jesús. E je mayjäy ooy anajty tzach'adij'y tzach'agodiy Jesús. ²⁵E ma je mayjäy ymiin anajty tüg töxyjäy pa'm miid, jécyiin anajty ymijtacni. Majmetz jimijt yxii ybo' anajty cuje payöy, ca' anajty y'oc-huäcxijpni je ni'py. ²⁶Jada töxyjäy ti anajty yajtzoyduñ miid may tzozdumbi, ti anajty ymeeñ yajtundäy ma je tzozdumbi ajcxy. E je'ni anajty ypa'm'ity. Ni ti pubéjtin ti capaady, ixti nigi anajty ypa'm mijhua'n.

²⁷Jada töxyjäy ti anajty ayuc midoy nej Jesús anajty pa'mjäy yajtzögy, paady nimiin etz nimijhuägy jixci'py'amy, chi nidooni Jesús yhuitpa'. ²⁸Jada töxyjäy nayñimaayi jotjoty huinmañyoty: “Co nnidónibich Jesús yhuitpa', miid tim yi'yi ndzögibich.” ²⁹Co je töxyjäy nidoñ Jesús yhuitpa', tim huin'itiy mic'amy yhuäcxijp je ni'py. Huin'it je töxyjäy jihuiy co anajty ti chögy.

³⁰E Jesús jihuiy co anajty ti yajtzögy tüg jäy miid ymic'ajt, paady ni'ixhuimbijty je mayjäy huidibi anajty pamíinip, y'amidooy ajcxy:

—¿Pín iich nhuit ti xyñidoní?

³¹Huin'it Jesús ñimaayi ajcxy ydiscípulos:

—Miich m'ijxpy co yi mayjäy yxach'adij'y yxach'agodiy, e miich mina'n: “¿Pín ti xyñidónich?”

³²Per Jesús huindicxypejty je mayjäy jühuidity ma yi', oc'ixa'n

ocnejhuñhua'n pín anajty ti ñidonyii. ³³Huin'it je töxyjäy, com ñejhuiiyb anajty jadu'n nej Jesús ti yajtzögyii, paady nimijhua'cy Jesús janch tziyuuyb miid tzigi'n ñayhuijotaci ma yi' yhuinduu. ³⁴Jesús ymina'n: —Töxyjäy huidibi ooy ndzócyich, ti mdzögy miid co ti xymibícyich. Nicx agujc jotcuje, ti mba'm ñaxy.

³⁵Capxp miydacp anajty Jesús miid je töxyjäy co nijëjity jäy ñimiini, choñ ma je judío jäy ñaymujctac mijtungmiidpi ytijc, e nimay je töxy'anäg yteedy:

—Yi mniix ti je y'ögy. Ca' huaad mjac'amayy nüg yi Huindzin Jesús.

³⁶Per Jesús ca' tuñcuend jadu'n nej ajcxy yjamina'n, chi nimay je naymujctac huindzin:

—Ca' mdzigy, mibic nigoda'ajty.

³⁷E ni ca' jac'a'ixiy nicxy yjacmiidnicxyii jacpínjaty. Jëda'ajty miidnicxy je Pedro, Jacobo etz Juan, je Jacobo y'uch. ³⁸E co Jesús ytijctigiyy ma yi naymujctac huindzin ytijc, chi ijxy jadu'n nej jäy jiiby chachne'mgixy chachjiygyxy chachyaaxcixy. ³⁹Co Jesús tijctigiyy, chi nimay je jäy ajcxy:

—¿Nej co nigoo ajcxy mdzachne'mni, e mdzachyáaxcixni? Yi pi'c töxy'anäg ca' yi' ti y'ögy, maab yi'.

⁴⁰Per nigooob ajcxy Jesús nixiicy co jadu'n ymina'n. Huin'it Jesús yajpídzimday tüg'óciy pínjaty anajty jiiby tigoty, e miid tijc tigy jëda'ajty je ungedeedy etz ungday, e nañ je tugiigpi ydiscípulos huidibi anajty ti miid miin. Chi ajcxy ytigy jiiby ma anajty je töxy'anäg yajpaady. ⁴¹Chi Jesús májtzy yi töxy'anäg yci', e chi nimay:

—Talita, cumni —jadayaab ayuc hue' yi' yhuimbídzimý: Töxy'anäg, iich miich yam nimaayb, pidög.

⁴²Huin'ítíy je töxy'anäg, je huidibi anajty majmetz yjimíjt, ypidög e ytüyöychoñ. E tög'ócíy yi mayjäy ooy ajcxy jihuíy huinmay. ⁴³Huin'it Jesús najtzcaxíiy co ca' huaad pín yajnimay jadu'n nej je töxy'anäg ti chögy, nañ jadu'n ni'ane'mdíy co huen ajcxy yajcay je pi'c töxy'anäg.

Jesús yajpaady jim Nazaret

6 Huin'it Jesús chooñ ma je jimbi it lugar, e yhuimbíjty ma yci'mgajp. E miid ñícxý yi' ydiscípulos ajcxy. ²Sábado xiíjoty Jesús ytígíy yaj'ixpijcp ma je mayjäy huidibi yöymújccixp ma je judío jäy ñaymujctac. E je mayjäy huidibi amidoo'íjtp anajty ooy jihuíy huinmay ajcxy, e ñayñimaayi ajcxy miñ xyípy:

—¿Ma jada' jadayaab jäy ti ni'ixpigíy jadayaab ixpíjcn? ¿Ma ti paady jada huíjy'ajt cuje'ajt huidibi ymiid? ¿Ma jada' ti paady yi mic'ajt huidibi miid mijhuima'ñ tummyb? ³Je' jada je tzejtzpi, yi María y'ung. Yi' y'uch ymigüg, yi Jacobo, yi José, yi Judas, etz yi Simón. Nañ jadu'n yi' y'uch töxyjäybi cha ajcxy chinäy quípxy miid iich ajt.

E je mayjäy ca'ajcxy anajty ixa'ñ cöbígá'ñ Jesús. ⁴Huin'it Jesús nimay je mayjäy ajcxy:

—Huenma'ámyity tög'ócíy je mayjäy ooy yajmíj'aty je jäy ajcxy huidibi najtzcaxíiyb Dios y'ayuc. Jëyi janchtiy, ma yci'm naax ma yci'mgajp ca' je jäy ajcxy yajmíj'adyii, etz nañ ytím jadu'n yi' y'amígügtíjct etz ymíjín ymidíjct.

⁵Ma yci'm naax yci'm gajp Jesús ca' jaty nej mijhuinma'ñ tunípy miid co ca' ajcxy mijpidägyii. Jëyi yci'pidacy ma nijëjity pa'mjäy etz yajtzoocy. ⁶Jesús ooy jihuíy huinmay nej je jäy ajcxy ca' ymíjpidägyii ma yci'm naax yci'm gajp. Chi Jesús chooñ jim ñícxý ma jacjadyii cajp huinduy agonbí, e yaj'ixpijcy anajty je mayjäy ajcxy.

Jesús quexy ydiscípulos ayuccapxhuäcxp

⁷Huin'it Jesús mijhuoy je majmetz ydiscípulos ajcxy, e chi quejxhuäcxý nimetz nimetz ma canaag cajp. E chi mooy mic'ajt, jigix jëb yajpidzimy ajcxy ca'oybi ma jäy ajcxy. ⁸Nañ jadu'n y'ane'my Jesús je' ydiscípulos ajcxy co ca' huaad ti miníxcxicy tü'amgíxpi, jëyi jëb miníxcxicy tög taje nidüg nidügti. Ca' huaad miníxcxicy ymorral, e ca' huaad miníxcxicy ycaagy, e ca' huaad miníxcxicy ymeen. ⁹Jëyi je ycíg etz je yhuít huidibi anajty ajcxy ymiid huen miníxcxicy. ¹⁰Chi Jesús yminañ:

—Co anajty ajcxy mjättaccixy ma tög tíjct, jim ajcxy mhuí'mípy ixti coon mdzóoníp ma yijimbi cajp. ¹¹Pen mdigíyigíxcp ma tög cajp, e je jäy ajcxy ca' ajcxy xycöbígá'ñ, ca' ajcxy amido'lida'ñ miich m'ayuc, mbidzimíxcp ma je cajp, chi mhuinhuópcixipy mgíg. Jada je' je tíy'ajt co ca' ajcxy mjotcújcity. Janch iich miich ajcxy nimäy co Dios anajty ytiyduñ jada naaxhuín jäy, jacnigi tzaachypí paada'ñ yi jäy ajcxy huidibi ajcxy anajty ca' xycöbígá'ñ, ca'ydi je' ajcxy huidibi tzinaay jecy'aty ma Sodoma etz Gomorra cajp.

¹²Chi je nimajmetzpi ajcxy chon Dios y'ayuccapxhuäcxy co huen jäy ajcxy jothuimbíjtcixy, huen ixmajtzaaygixy yi pocyuni. ¹³Nañ jadu'n ajcxy yajpidzimy ca'oybi majaty jäy, e pidaaccixy aceite majaty pa'mjäy, e yajtzóoccixy anajty.

Co Juan je Bautista y'ögy

¹⁴Huin'it je rey Herodes nejhuiy co Jesús canaag mijhuinma'n tzachytuñ anajty, com tüg'óciy je mayjäy anajty nimiyaaccixy Jesús. Herodes yminañ co Juan je Bautista ti yjugypicy jadüg'oc ma anajty ti y'ögy, paady mic'ajt miidity jaydëb mijhuinma'n tuñ. ¹⁵Nijëjity jäy yminaangixy:

—Jesús yi' je' Elías.

E naagity jäy yminángixy:

—Yi' je' tüg Dios tiy'ajtmiidpi huidibi quipxyiiby miid je Dios ytiy'ajtmiidpi huidibi tzinay jecy'ajty.

¹⁶Co Herodes nejhuiy nej je mayjäy nimiyaaccixy Jesús, chi yminañ:

—Janch jada co Juan ti yjugypicy, je huidibi nni'ane'mdiyich co huen yajminagyii ycohuajc.

¹⁷Miid Herodías, Herodes ytöxytjic ycixpi, Herodes n'ane'mdiy co Juan yajmach, e pidägyii pujxtigoty. Jada Herodías jayijp ypijcy miid je rey Herodes y'ajch Felipe, per ti anajty ixmach Felipe, e ypijctigajch miid je ycapy Herodes. ¹⁸Hue' anajty Juan ti nimay Herodes:

—Ca' jadu'n paadyii co yi m'ajch Felipe ytöxytjic miich miiddzinaayi.

¹⁹Paady ycixpi Herodías mijotma'ty Juan, e ytimy

yaj'ögamy anajty. Per ca' mic'amy yhuinma'nybaty nej ocyaj'ögip; ²⁰com je rey Herodes ñejhuiy co tudägy jäy huadz jäy anajty je Juan, e tzigiyyb anajty miid Juan. Paady ycixpi anajty je rey Herodes Juan miidity cuend'aty pujxtigoty. Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbizimy, per jotcujc anajty amido'ijty.

²¹Huin'it Herodías ypat huinma'n nej jëb yaj'ögy Juan je huin'it xii co je rey Herodes anajty ñayñixiiduñyii. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yi mic jäydjic huidibi ajcxy tzinaayb naag naag cajp jim Galilea. ²²Xiiduñyoty anajty co Herodías ñiix oy y'ech ma je rey anajty yajpaady miid je may jäy huidibi anajty yajcaayb yaj'uucy. E jadu'n nej je Herodías ñiix y'eich, ooy je rey jadu'n jäygidacy, etz tüg'óciy je jäy je huidijaty anajty miid ajcxy ycaaygixy y'uuccixy. Chi je rey nimay je töxy'anäg:

—Pijctzóohuigich ti mdimdzojpcy, iich miich nmöhuipy.

²³Je rey ñigi capxcödujcy janch cixyot huinjot co möhua'n ti ytimy ypijctzooyb, ixti jëb jamöy cujhuäcxy yi' y'ané'min, mibaad anajty ane'my je naaxjot. ²⁴Chi je töxy'anäg ñicxy ma ytaj oy amidoy, nimay:

—¿Ti nbijctzohuípich?

Chi je' ytaj y'adzooy:

—Pijctzoohui yi Juan je Bautista ycohuajc.

²⁵Mic'amy je Herodías ñiix nihuimbity je rey e yminañ:

—Ndzojcy pich co xymöhuibich mic'amy je Juan je Bautista ycohuajc ma tüg texy.

²⁶Co jadu'n midoy je rey, chi ytigiiy tajp mayb janch mijcajee. Per ti y'octunipy. Com ti anajty jadu'n capxcöduy, ti anajty mayjäy midoy ti anajty ti yaj'ahuanïy je töxy'anäg, ca' y'ayuc yajxiicy.

²⁷Paady ycixpi je rey mic'amy ane'my tüg soldado, co huen nicxy yajtzoni Juan ycohuajc. ²⁸Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texy, e yajc'idigiy je töxy'anäg, e je töxy'anäg yajc'idigiy ytaj.

²⁹Co je jäy ajcxy huidibi anajty mijnicxpejtp Juan ñejhuïy ajcxy co je rey ti yaj'ögy Juan, chi ajcxy y'oy e yajpidici Juan ñinïcx, e yajnaaxtigiiy ajcxy.

Jesús yajcaay migoox mil yëydijc

³⁰Co je majmetzpi apóstoles ajcxy yhuimbijty huidibi anajty Jesús ti quexy y'ayuccapxhuäcxpi ma canaag cajp, chi ajcxy yajmiidmiydacy Jesús tüg'óciy tijaty anajty ti túngixy, etz tüg'óciy ayuc huídijaty ti yaj'ixpíjccixy.

³¹Huin'it Jesús nimay je nimajmetzpi huidibi anajty ti quexy y'ayuccapxhuäcxpi:

—Tzoc jámim ma tüg it ma ca' pin, jaydëb nbócxim tüg xii metz xii.

Paady ycixpi Jesús jadu'n yminañ, com tzach mayjäy ja'ttiib tzondiib ma Jesús yajpaady, e ca' ajcxy tiempo anajty mfidity mina ycáaygixipy y'uúccixipy miid je mayjäy ycixpi. ³²E Jesús miid ydiscípulos ajcxy ñicxy barcojoty

ma ca' pin. Ac jëyi ajcxy nicxy ca' jac pin jäy miid nicxy. ³³E mayjäy ijxy co Jesús ajcxy choñ, e nañ ijxcajpy pin anajty tzoñ barcojoty. Paady mayjäy choñ ma canaag cajp tegyi'm, ñíxcixy poyigy anajty ma Jesús ñicxa'ñ. Mayjäy oy yja'ty jayijp ca'ydí Jesús ajcxy, e jim ajcxy yöymujctay. ³⁴Co Jesús ybarcopidzimy, chi ixty janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huidibi ca' miidity ycuend'ajtpi. Chi Jesús ytigiy yaj'ixpíjcp, canaag nax ixpíjcin anajty yecy. ³⁵⁻³⁶Co anajty ti chu'iiyñi, chi Jesús ydiscípulos ajcxy ñimaayi:

—Ca' ni pin chinäy ma jadayaabi it lugar, e ti chu'iiyñi. Capxycix miid jada mayjäy ajcxy, jaydëb ñíxcixyñi ma yi cajp huinduy agonbi, huen nicxy júygixipy ycaayin y'uucin.

³⁷Huin'it Jesús y'adzooy yi' ydiscipulos ajcxy:

—Miich ajcxy móoygix jada mayjäy caayin úcin.

Chi ajcxy Jesús y'adzooy:

—¿Huaad iich ajcxy nicxy njuy mejtz migo'px denario tzajcaagy, jígix ycaiyipy y'ügipy jada mayjäy?

³⁸Chi Jesús y'amidooy ydiscípulos ajcxy:

—¿Naag tzajcaagy miich ajcxy miidity ya? Nicx íjxcix.

Co ajcxy tiy'ajt paty, chi ajcxy Jesús nimay:

—Hich ajcxy nmiid migoox tzajcaagy etz metz acx.

³⁹Chi Jesús ni'ane'mdiy co je mayjäy huen ixtaaccixy naaxcixy tügpicyjaty. ⁴⁰Chi je mayjäy

y'ixtactay canaagpicy. Canaagpicy migo'px jatypi, e canaagpicy huixchiguipxmajcjatypi.

⁴¹Chi Jesús conígy je migooxpi tzajcaagy etz je metzpi acx, e ypa't'lijxy tzajpcíxy, e yajnaxxy Dios cojuyip ma Dios miid je tzajcaagy etz je acx ycixpi. Huin'it Jesús tujc-huäcxy je migooxpi tzajcaagy, e yajc'idigiy je' ydiscípulos ajcxy, jaydëb ajcxy yajhuäcxip ma je mayjä. Nañ jadu'n Jesús yajc'idigiíy je metzpi acx je' ydiscípulos ajcxy, jaydëb yajhuäcxip ma je mayjä. ⁴²Nidüg'óciy je mayjä ajcxy yca'y y'uucy cüxyi. ⁴³Co je mayjä yca'yday, chi je discípulos ajcxy yajmujcy je cayduc tzüztuc, e yaj'ujch ajcxy majmetz cach. ⁴⁴Migoox mil anajty ajcxy je yëydjctjic huídibi cay uuc.

Jesús yöy niihuingíxy

⁴⁵Huin'it Jesús ane'my je' ydiscípulos ajcxy co huen barcotigiíygyxy mic'amy. Huen nicx'icxixy jay'ijp jim Betsaida jim mejy ñinaxxy. Co yi discípulos ajcxy ybarcotigiyday, chi Jesús ycapxycíjxy miid je mayjä. ⁴⁶Co anajty Jesús ti ycapxycíxy miid je mayjä, chi ñicxy ma tüg cögop Dios miibjctzoob. ⁴⁷Co ycoodziíyñi je discípulos ajcxy anajty yajpaady mejyoty ma je barco. Jesús naydüg anajty yajpaady mejypa'. ⁴⁸Jesús y'ijx co je'ydiscípulos ajcxy anajty ti y'anucxiíygyxy miid mejycabi, je' co je barco anajty chachjijpcobojy. E co oy moñy, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discípulos

ajcxy. ⁴⁹Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmañiíygyxy. ⁵⁰Com tüg'óciy yi discípulos ajcxy anajty ti ijxcixy Jesús, e ooy ajcxy chigiíy, paady mic'amy Jesús migapxy je' ydiscípulos ajcxy, e ñimay:

—Jotmic naybidáacigíxy, ca' mdziíygyxy. Hich yi'.

⁵¹Huin'it Jesús ybarcotigiíy, e mic'amy je poj yxeemy, e je discípulos ajcxy ooy jihuiy huinmay. ⁵²Ooy ajcxy jihuiíygyxy huinmaaygyxy, com ca' ajcxy huinjihuiíygyxy anajty nej Jesús je mayjä yajcay miid je migooxpi tzajcaagy. Com je'ni anajty ajcxy ooy yjotjuuñity ycojuuñity.

Jesús yajtzögy pa'mjäy ajcxy jim Genesaret

⁵³Chi ajcxy ymejch ma je mejypa' ma je Genesaret ñaxjot. E coxojch ajcxy je barco ma mejypa'. ⁵⁴Co ajcxy ybarcopidzimy, chi mic'amy je mayjä ajcxy jim ijxajpy Jesús. ⁵⁵Poyígy je jäy ajcxy choon, e yajyöyñajxtay je cajp ajcxy huindy agonbi, capxhuäcxcixy co Jesús anajty ti yjädy jim. E jäy ajcxy yajmiindzondacy may pa'mjäy cijx'am jim ma anajty Jesús yajpaady. ⁵⁶E hueñytim ma'amyity anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccixy pa'mjäy majaty majaty yi mij tüba', e cohuaníygyxy Jesús co huen nidoñyíi yi yhuitpa', e tüg'óciy huídijaty anajty ajcxy nidomb, najxp ajcxy anajty je' ypa'm.

Huidi jäy yaj'ahuimbijt pocyjayity

7 Huin'it ymiñ ma Jesús nijëjity fariseojäy ajcxy, je

huindzindjic huidibi tzachpadumb judío ycostumbre. Nañ jadu'n miid miñ nijëjity escribas, je huindzindjic huidibi ajcxy nijaydutp anajty Dios ñecy. Hue' je fariseos etz escribas ajcxy anajty ti choongixy Jerusalén.

²Je fariseos etz escribas ajcxy ijxy co Jesús ydiscípulos ajcxy ytigüy caaybi uucpi jaygübuju, ca' anajty cuydúngxixy judíojäy ycostumbre. ³(Com yi fariseojäy etz jacjadyii judíojäy ajcxy cuydumby anajty ajcxy ñi'ap costumbre, e ixpocypújcixy jayjip ma ca'ni ytigüygixy caaybi uucpi. Com yi judíojäy ajcxy co ajcxy ñicxy mayjäyjoty etz yhuimbjtcixy jadüg'oc ma ytijc, ca' ajcxy ycaay xti cooni jayjip ajcxy yc'büjcixy canaag'oc. ⁴Yi judíojäy ymiid canaagnax costumbre huidibi cuydúngxixyp jadu'n nej ajcxy yajhuaatzcixy ajcxy ytaasi ytexy ytütz etz ypujxtexy.)

⁵Chi je fariseos etz escribas ajcxy y'amidooy Jesús, nimaayi:
—¿Na'amy co miich mdiscípulos ajcxy ca' cuydúngxixy judíojäy ñi'ap costumbre? ¿Na'amy co ajcxy ycaaygixy y'úccixy, e ca' jayjip ixpújcixy yi' ypocyi?

⁶Chi Jesús y'adzooy:
—Janch tiy'ajt jadu'n nej je Dios ytiy'ajtmüidpi Isaías jayhui'my jecy'ajty miid miich ajcxy ycixpi. Miich ajcxy huidibi naybidaacip jadu'n nej jihuüy ajcxy tudägyjäy, e ca' yjánchíty. Com jadu'n Isaías jaybeyty co Dios jadu'n yminañ:
Jada jäy jadu'n ajcxy ycapxcixy ymiydaaccixy jadu'n nej jihuüy xyajmij'atyich. Per ca'

ajcxy xyajmij'atyich cixyjt huinjot.

⁷Naadigí co ajcxy xyhuin'ügixich xyhuinyáaxcixich.

Ñayyaj'ixpújcigixy ayuc tiy'ajt huidibi jäy ajcxy ti cojy ti macxy.

⁸Chi Jesús yminañ:

—Miich ajcxy ti m'ixmájtzcixy Dios ycötújcín, e myajmij'ájtzcixy ayuc huinma'ñ huidibi jäy ci'm ti cojy ti macxy. ⁹Miich ajcxy ca' mgüendtúngxixy Dios ycötújcín Dios ytiy'ajt jigix jëbi cuydúngxixy mgi'm costumbre. ¹⁰Com Moisés je cötújcín ypidac jecy'ajty: “Yajmij'at mdaj mdeedy”, e “Pinjaty jibic nigapx ni'ojüyb ytaj yteedy, copicy y'ögip.” ¹¹E miich ajcxy minañ co tüg jäy nimähuip ytaj yteedy co ca' pubeda'ñ ajcxy jadu'n nej padyii, miid co tüg'ócixy tijaty yi' ymiid huidibi ytaj yteedy jë'adánip, hue' ti ahuanüy nigoo ma Dios.

¹²E pen jadu'n minañ, chi miich ajcxy minaangixy co ca' copicyty mbubéjtcixipy mdaj mdeedy.

¹³Miich ajcxy midundigooyb Dios ycötújcín miid mgostumbre huidibi myajnaxyp myajtigüyb, etz jacjadyii jibic-huinma'ñ myaj'ixpújcixy.

¹⁴Jadüg'oc Jesús mijhuoy yi mayjäy ajcxy, e chi nimay:

—Mido'mbújccix miich ajcxy iich n'ayuc, e mhujnhuühuip ajcxy. ¹⁵Ca' yi' yajpocycähuüyb huidibi jäy ajcxy ypidacy ma yhuin y'ahuac. Yi' janchtiy huidibi pidzim ma jäy ajcxy yjot yhuinma'ñ, yi' yi' yajpocycähuüib. ¹⁶Miich ajcxy mmiid mdätzac, mido'mbújccix iich n'ayuc.

¹⁷Co Jesús ixmajch je mayjäy, e ytijctigiïy, chi je discípulos ajcxy yaj'amidoohui nej yhuimbídizimy jada ayuc. ¹⁸Chi Jesús ydiscípulos ajcxy nimay:

—¿Nej nañ jadu'n miich ajcxy ca' mhuiñjihuiy jada ayuc? ¿Nej ca' mhuiñjihuiygixy co huidibi tigiïy ma yi jäy y'ahuac (yi caayin uucin), ca' yi' yajpocycäy yi jäy? ¹⁹Yi caayin uucin hue' yi jäy ypidägy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n ymína'ñ, chi nejhuiyim co Dios ca' capx'aducy ni ti caayin ni ti uucin. ²⁰E Jesús yjacmínañ:

—Dios yajpocycähuij jäy ajcxy miid huidibi pidzimb ma ajcxy yhuinma'ñ. ²¹⁻²²Ma yi jäy ajcxy yhuinma'ñ jiiby chooñ jibic-huinma'ñ; jiiby chooñ migapxtigoyii töxyjäy yhuinma'ñ; jiiby chooñ je tundigooyii yëydijc miid töxyjäy etz töxyjäy miid yëydijc huinma'ñ; jiiby chooñ jayyaj'ögii huinma'ñ; jiiby chooñ meedzi huinma'ñ; jiiby chooñ mügii huididii huinma'ñ; jiiby chooñ jibic-huinma'ñ; jiiby chooñ je huin'iini huinma'ñ; jiiby chooñ nayca'oy'ixii huinma'ñ; jiiby chooñ je piitzcapxi huinma'ñ; jiiby chooñ je amij agix huinma'ñ; jiiby chooñ je tzuu huinma'ñ je loci huinma'ñ. ²³Yi jadu'mbi jibicpi jiiby chooñ ma jäy ajcxy yjot yhuinma'ñ, paady jibicpi jäy ajcxy túngixy, e ypocycäy ajcxy ma Dios.

**Tüg töxyjäy huidi ca'
yjudiojäyity mibijc Jesús**

²⁴Chooñ Jesús ma yijimbi it, e ñicxy jim ma Tiro etz Sidón

ñaaxjot. Jesús ytigiy ma tüg jäy ytijc, e ca' anajty tzocy co je mayjäy ñejhuihuiyib ma y'ity. Per ca' jajty ñicx yhuingoyüch. ²⁵Mic'amy tüg töxyjäy nejhuiy ma Jesús anajty yajpaady. Hue' je töxyjäy ypi'cniix ymiid anajty ca'oybi. Je töxyjäy ymiin ma Jesús, e ycojxtinay'ahuïy ma yi' yhuinduu. ²⁶Je töxyjäy hue' anajty ycojápjity Sirofenicia (e hue' anajty griegojäy). Yi töxyjäy may'ajt pijctzoy ma Jesús co huen yajpidzimy je ca'oybi ma ypi'cniix yjot yhuinma'ñ. ²⁷Chi Jesús je töxyjäy nimay:

—Ooy ycopicyity co nbubedipyich jayijp Dios yjäy (yi judíojäy). Jadu'n nipaady nej tüg ungedeedy. Tim copicy co je ungedeedy yajcayipy jayijp yci'm ung, e ca' möhuij uc je huidibi y'ung yajjicxaamy.

²⁸Chi je töxyjäy y'adzooy:

—Huindzin, tiy'ajt nej miich mmína'ñ, per nañ jadu'n yi uc ajcxy yjiiexyp je caagy abu'x huidi cáb naaxcixy ma mesipa't ma je jäy y'ung ajcxy ycaay.

²⁹Chi Jesús je töxyjäy nimay:

—Tiy'ajt jadu'n nej iich miich ti xy'adzooy, paady ycixpi jëb mhuididipy ma mdiyc jotcujc, je ca'oybi ti ypidzimy ma mniix yjot yhuinma'ñ.

³⁰Co je töxyjäy huimbijty ma ytijc, chi paty ypi'cniix cijx'am, ti anajty je ca'oybi ñibídizimiyi ycobídizimiyi.

**Jesús yajtzögy tüg jäy huidibi
cönat etz ahuí'mb**

³¹Chi Jesús jim tzojci chooni Tiro ñaaxjot. Chi chooñ jim ñicxy anajty Galilea, e ñicxy ma je tü'aa huidibi najxp Sidón etz je cajp huidibi

yajpatp jim Decápolis ñaaxjot, chi yja'ty ma Galilea mij laguunba'.

³² Jim ajcxy miid miñ tüg jáy huídibi cónátip etz aahui'mb. Chi ajcxy may'ajt pijctzooy ma Jesús huen cñixajy je pa'mjäy. ³³ Chi Jesús miidnicxy je pa'mjäy ahuinguujc ma ca' mayjäy, e pidacy ycihua'x ma je pa'mjäy ytätzac. Chi chujy, e huin'it nidoni je ytoodz. ³⁴ Chi Jesús ypa't'ijxy tzajpcíx, e ymicxejy, e chi yminañ Aramaico'amy:

—Efata —jada ayuc hue' yhuimbídzimy: Ahuádz.

³⁵ E mic'amy je jáy cónatpi ytätzac y'ahuaach etz ytoodz yungüy etz ycapxni yajxon. ³⁶ Chi Jesús ane'my je pa'mjäy etz ymigügtijc co ca' huaad ni pin yajmiidmiydägipy jadu'n nej anajty ti chögy. Co Jesús jadu'n mictägy ane'my co ca' huaad ni pin yajmiidmiydägipy je mijhuinma'ñ huídibi ytumyb, chi nigi je pa'mjäy etz ymigügtijc miidmiydaaccixy hueñypñity. ³⁷ Je mayjäy ooy tzachjihuuy huinmay ajcxy, ñayñimaayi ajcxy miñ xyipy: —Jada Jesús ooy oy chachtuñ.

Ymimadactaayb yi'huenytmityñijity, ixti yajmidohuicpy yi' yi cónatpi etz yajcapxigy yi uumbi.

Jesús yajcay midax mil yëydije

8 Je huin'it xii je huin'it tiempo mayjäy anajty ti ñaymújicigixy ma Jesús yajpaady, e ca' anajty je mayjäy ajcxy miidity ti ycaaygixipy y'úucxixipy. Jesús capxyñigüejxy je' ydiscípulos ajcxy, co huen miingixy ma yi' yajpaady. Co ajcxy ymiñ, chi nimay:

²—Ooy nba'ayooyich yi mayjäy. Yi' co cham midugiig xii maabi

ya miid y'ityich je mayjäy, e ni ca' ajcxy miidity ti ycaipy. ³ Co ixypy nguexhuimbityich ajcxy ma ytijc ayuu, ca' yjéyity yajpa'mgójipy ajcxy tü'am, com nijéjity ajcxy jiguégy ti choongixy.

⁴ Chi je discípulos ajcxy Jesús adzooy:

—¿Ma iich ajt nbaatim je caayin uucin huídibi jëb miid nyajcaayim nyaj'úucim jada mayjäy? Com mijtigüduum ya nyajpaatim ma ca' pin chinäy.

⁵ Chi Jesús y'amidooy je' ydiscípulos ajcxy:

—¿Naag tzajcaagy miich ajcxy miidity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen iñay'ahuüiygixy naaxcixy. Huin'it Jesús conigy je huixtujcpc tzajcaagy, e yajnaxxy Dioscojuyip ma Dios miid tzajcaagy ycixpi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymiid anajty nijéjity pi'c acx. Chi Jesús yajnaxxy Dioscojuyip ma Dios miid je pi'c acx ycixpi, e moy je' ydiscípulos ajcxy huen yajhuäcxtaygixy ma je mayjäy.

⁸ Chi je mayjäy nidüg'óciy ycaay cüxy, e co ajcxy ycaayday, chi je Jesús ydiscípulos ajcxy yajpidigy huixtujc cach cayduc jixxtuc tiibi anajty yconaxy. ⁹ Jahueeni anajty ycamidaaxmility je jáy huídibi ajcxy cay uuc cüxy. Chi Jesús ycapxy yciyxy miid je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigiy

miid ydiscípulos ajcxy, e chi ñicxy ajcxy jim Dalmanuta ñaaxjot.

**Yi fariseos ajcxy tüg ijsxpejt
pijctzoob mijhuinma'ñybi**

¹¹Nijëjity fariseos ajcxy, je huindzindijc huidibi padumb judío ycostumbre, ymiiñ ajcxy ma Jesús yajpaady, e ytigiy ajcxy iqxquípxcixy y'ixpijcin miid Jesús. Pijctzoogixy co Jesús huen yaj'ixyii ajcxy tüg ijsxpejt huidibi tzomb tzajpjoty.

Ijxta'n octunaangixy miid Jesús. ¹²Chi Jesús tajy may ñayjihuiiyi jotjoty huinma'ñyoty, chi ymicxejy, e ymíñañ:

—¿Na'amy co jada jäy ajcxy huidibi jugy'ajtp cham, pijctzoogixy ijsxpejt huidibi tzomb tzajpjoty? Janch iich miich nimaaygixy co ca' nyaj'ixaangixy ijsxpejt huidibi tzomb tzajpjoty.

¹³E Jesús ytimycapxycixy miid je fariseos ajcxy, e chi puyöyduuty ajcxy. Chi Jesús ybarcotigiy, e ñicxy miid ydiscípulos ajcxy ma mij laguun ñinaxy.

Fariseojäy ajcxy yaj'ixpíjcin

¹⁴Je' ydiscípulos ajcxy ti anajty jaydigoygixy je jicxy picy co ajcxy ybarcotigiy. Jëyi ajcxy mimiiñ tüg pi'c tzajcaagy. ¹⁵Chi Jesús ane'myb je' ydiscípulos ajcxy, e ymíñañ:

—Ca' mmijpidaaccixy yi fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huidibi ca' y'óyity.

¹⁶E je Jesús ydiscípulos ajcxy nimiydaaccixy Jesús y'ayuc ñayñimáayigixy ajcxy miñ xyipy:

—Je' co ca' iich ajt nmimiinim caayin uucin.

¹⁷E Jesús ñejhuiiyb anajty nej je' ydiscípulos ajcxy ñayñimaayi miñ xyipy, paady ymíñañ:

—¿Na'amy co

mdzachnimiydaaccixy je caayin uucin huidibi ti mjäy digoogixy? ¿Nej ca' mhujnihuiiygixy e ca' mguenditungixy iich n'ayuc? ¿Nej co ajcxy mdzachcöjuuñity? ¹⁸Miich ajcxy miid mhuiin: ¿Nej co ca' m'ijxcixy huidibi ndumybich? Miich ajcxy miid mdädzac: ¿Nej co ca' mmido'mbíjccixy iich n'ayuc? ¿Nej co ca' mjäyméjtzicxy ti ti nduñich?

¹⁹Jayhuin co ndujc-huäcxyich je migooxpi tzajcaagy e nyajcaayich migoox mil jäy: ¿Naag cach cayduc jicxtuc ti ajcxy myajpidigy?

Chi ajcxy y'adzooy:

—Hue' iich ajcxy nyajpidigyich majmetz cach cayduc jicxtuc.

²⁰Chi Jesús ymíñañ:

—E jayhuin co ndujc-huäcxyich je huixtucpi tzajcaagy, e nyajcaayich midaax mil jäy: ¿Naag cach cayduc ti ajcxy myajpidigy?

Chi ajcxy y'adzooy:

—Hue' iich ajcxy nyajpidigyich huixtuc cach cayduc jicxtuc.

²¹Chi Jesús ymíñañ:

—¿Nej chambaad miich ajcxy ca' mhujnihuiiy?

**Jesús yajtzögy tüg jäy
huintzpi jim Betsaida**

²²Jesús etz ydiscípulos ajcxy oy yjá'tcixy jim Betsaida. Jim Betsaida nijëjity jäy miid miin ma Jesús tüg huintzpi, e pijctzoy ajcxy may'ajt co huen nidoñ jigix je huintzpi y'ijxigipy. ²³Huin'it Jesús hujtztzooñ je huintzpi ma yci', chi miid cajppidzimy. E

chi Jesús yajjaaxy yi chujyñii je huintzpi yhuuin, etz ciniñaxajy, e chi amidoy pen y'lijxy anajty tigati yinjaty huenjaty. ²⁴Chi je huintzpi huindicxpejty Jesús, e nimay:

—N'lijxypich yëydijctijc, e jadu'n ajcxy yquëxigy nej quipy, per yöyp ajcxy.

²⁵E jadüg'oc Jesús yci' pidacy ma je huintzpi yhuuin, e chi je huintzpi yhuindicxpejty anajty, e chi yhuuin y'oyiyy yajxon, huin'it oy huädz y'lijxy. ²⁶E Jesús ycapxycjxy miid je', e quejxhuimbijty ma ytijc. Chi yminañ:

—Ca' mdig'ihuip cajpjoty, e ni pin jada mgayajmiidmiydägipy.

Pedro capxypidzimy co Jesús yi' je' je Cristo

²⁷Chi Jesús ñicxy miid ydiscípulos ajcxy jim ma nijëjity mutz cajp mihuingon je mij cajp Cesarea Filipino. E tü'am Jesús amidoy ajcxy ydiscípulos, nimay:

—¿Nej jäy yminaangixy pin iich?

²⁸Chi ajcxy je' ydiscípulos y'adzooy:

—Nijëjity jäy yminaangixy co miich je' je Juan, je Bautista. E nijëjity yminaangixy co miich je' je Elías. E jacjadyii yminaangixy co miich je' tüg Dios y'ayucnajtzcaxiyybi huidibi tügiyyb miid nijëjity Dios ytiy'ajtmiiidpi huidibi tzinaay jecy'ajty.

²⁹Jesús y'amidooy je' ydiscípulos ajcxy:

—Miich ajcxy, ¿nej miich mminaangixy pin iich?

Chi Pedro y'adzooy:

—Miich je' je Cristo.

³⁰Chi Jesús nimay je' ydiscípulos ajcxy co ca' huaad ni pin nimaaygixy, co yi' je' je Cristo.

Jesús capxypidzimy co y'öga'n

³¹Chi Jesús jacyaj'ixpijcy je' ydiscípulos ajcxy, e yminañ:

—Copicy co iich, je jäy huidi tzoon tzejpjoty, nyajnaxipyich mij tzaachpyi etz mij ayo'n. Yi mijjäydijc ajcxy, yi judío teedy mijtungmiidpi, etz yi escribas, je huindzindijc huidibi nijayduutcixyp Dios necy, ca' ajcxy xy'ixa'nñich, e xyaj'öga'n ajcxy, e codugiig xii njugypigipyich jadüg'oc co iich anajty ti n'ögy. ³²Co Jesús jadu'n nigapxy nimiydacy huädz huädz nej yjadañyii anajty, chi Pedro huobibzimy Jesús ahuingujc, chi ooy ogy. ³³Chi Jesús ni'lijxhuimbijty ydiscípulos ajcxy, e ogy je Pedro, ñimay:

—Huinhuäctuutcich, miich Satanás. Com miich ca' mhuinma'n mbidägy nej Dios tzocy. Y'i' janchtiy miich mhuinma'n'ajtpy nej jäy ajcxy tzocy.

³⁴Huin'it Jesús huoomiñ yi' ydiscípulos ajcxy etz yi mayjäy, e chi nimay:

—Pen ji pinjaty xypanicxa'nñich, huen jäydigoydäy yci'mdzójcin etz huen xypanicxich jabom jabom. Oy nej ytimyjadipy ytimy'ayoohuipy. Jadu'n nipaady nej jihuüy ajcxy anajty mgruudz mgabicxixy, etz naygyéjcgixy ma yi ó'cin huen ytimyñëjity miid iich ycixpi.

³⁵Huenpinjäy huidibi ca' yega'n yi yjugy'ajtin ma yi ó'cin miid iich ycixpi, hue' je' yajtigoyamy yi'yjugy'ajtin. E huenpinjäy huidibi yegamy yjugy'ajtin ma yi ó'cin miid iich ycixpi etz iich y'ayuc oybi ycixpi, hue' je' ypadamy

yi jugy'ájtín huídibi ca' cixipy tigoyipy ni minaa. ³⁶¿Ti oy'ájtín yi' co tüg jäy y'ocnayyajpadiiyb yi meen etz mic'ájtín (huídi yajpaatp ya ñaaxhuiñybi) e y'alma yjugy'ájtín cixipy tigoyipy tügcäy? ³⁷¿Jadu'ñyi jëb jäy y'alma yjugy'ájtínoccojuyi? Nīgi tzoohuin miídity jäy ajcxy y'alma yjugy'ájtín, ca' jac ti. ³⁸Huentimpíñity yi huídibi xymidzo'ydúnibich yi n'ayucich ndiy'ájtich ma yi pocyjäydijc yhuinduu huídibi tzinaayb cham ma jada naaxhuiñybi. Pues ñañ jadu'n iich, je jäy huídibi tsoon tzajpjoty, nmidzo'ydúnibich yi jadu'mbi jäy co iich anajty nhuimbity ya naaxhuiñybi miid iich nDeedy, je Dios Teedy, ymic'ajt y'oy'ajt etz miid tüg'ócíy yi may'ángeles ajcxy tudägypi.

9 Jadu'n Jesús yjacmíñañ: —Janch tiy'ajt jadu'n nej iich miich ajcxy cham nimäy, co nijëjity miich ajcxy huídibi cham ma iich nhuinduu, ca' m'ögaangixy, ixti cooni ajcxy jayijp m'ixipy je Dios y'ané'min etz ymic'ajt.

Co Jesús ñinícx yajtigajch

²Co tuctujc xii naxy, chi Jesús miid tzoón Pedro, Santiago etz Juan, e miidpa'ttigiíy ma tüg mijcop ma tüg it ooy ycíxity. E jim copcíxy Jesús ñinícx naygojtigajtzni ma Pedro ajcxy yhuinduu. ³Chi Jesús yhuit oy y'ahuimbity janch poob, e janch adícxp. E ni pin jadu'n yhuit cayajhuäch janch poob jadu'n nej je' anajty yhuit miídity. ⁴E chi oy nayguëxígyii ma ajcxy yhuindu Elías etz Moisés. Elías etz Moisés miydacp anajty ajcxy miid Jesús. ⁵Huin'it Pedro nimay Jesús:

—Huindzin, janch oy jadu'n co iich nyáajity. N'occojyich ajcxy tugiig tijcquemy: tüg miich mje'; tüg Moisés yje'; etz tüg Elías yje'.

⁶Com Pedro, Jacobo etz Juan ooy anajty chigiigixy, paady Pedro ca' anajty nejhuíy ti ycapxyp. ⁷Tim huin'ítíy tüg joc yajñidígoy je' ajcxy, e midooy ajcxy ayuc jocjoty, e je ayuc ymíñañ:

—Jada je' iich n'ung, huídibi ooy ndzocyich. Midom'biic miich ajcxy Jesús y'ayuc.

⁸E tim huin'ítíy Pedro, Jacobo etz Juan ajcxy yujc'ijxy, e yja'ijxhuídiyty ajcxy, e ca' ni pin ma ocjac'ijxni, jëda'ajty Jesús naydügpajc.

⁹⁻¹⁰Ti anajty choongixy copcíxy, e cidacp anajty ajcxy, co Jesús nimay Pedro, Jacobo etz Juan, co ca' huaad yajmiidmiydaaccixy pinjaty huídibi ajcxy anajty ti íjxcixy, ixti cooni iich, je jäy huídibi tsoon tzajpjoty, n'ögibich etz njugypigipyich jadüg'oc. Pedro, Jacobo, etz Juan ca' yjacmiydägy miid jacpinjaty huídibi anajty ti íjxcixy. Per ooy ajcxy huinmay etz naymiidmiydáacigixy miñ xyipy ti Jesús ytijamy co ymíñañ: “N'ögibich etz njugypigipyich jadüg'oc.” ¹¹Huin'it ajcxy Jesús y'amidooy:

—¿Na'amy co yi escribas ymíñañ co yi Elías huídibi chinay jecy'ajty jayijp miina'ñ ca'ydi je Cristo?

¹²Chi Jesús y'adzooy:

—Tiy'ajt jadu'n co miñ jaybety ma Dios ñecy jecy'ajty co Elías yhuimbidity jacyajp ca'ydi je Cristo, e yaj'oyiydähuipy huinjemybi tüg'ócíy miid Dios ycixpi. E ñañ tiy'ajt jadu'n co

jaybety ymiin ma Dios ñecy co je Cristo, je jay huidib tsoon tzajpjoty, yajnaxa'n ayo'n etz tzaachypi etz mayjäy ca' y'ixa'niiby. ¹³Ich miich ajcxy nimaayb co je Elías ti je' yhuimbity ya naaxhuiñ, e je mayjäy ti túngixy miid Elías nej anajty tím tzójcixy. E cuyduñ ajcxy nej jaybety miin ma Dios ñecy miid Elías ycíxpi.

**Jesús yajtzögy tüg mutz'anäg
huidibi ca'oybi miid**

¹⁴Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhuim'äy, chi ajcxy ijxy mayjäy jühuidity ma Jesús ydiscípulos ajcxy. Etz ijxy ajcxy nijëjty escribas huidibi ayuc tzachyajtzbibiyb miid Jesús ydiscípulos ajcxy. ¹⁵E co je mayjäy ijxcixy nejhuiygixy co Jesús ti yhuimbity anajty, chi mic'amy ajcxy ninicxy Jesús poyigy, e capxpocxcixy, e may je' ajcxy ooy jühuy huinmay. ¹⁶Chi Jesús y'amidooy je mayjäy, nimay:

—¿Ti ayuc miich ajcxy mdzachyayjomyb miid iich ndiscípulos ajcxy?

¹⁷Chi nidüg je jay ajcxy y'adzooy: —Huindzin, ti nmiidmiin iich nmang huidibi ymiid ca'oybi, e je ca'oybi ti yaj'umiyii. ¹⁸E janam jadzoc je ca'oybi yajyachyii yajquidyii iich nmang, e oy cäy naaxcixy, e ooy y'aa'opy ypidzimy, e nañ jadu'n oy ytiitz queety etz ñinicx janch ögy yhuim'y. Ti nbjctzoyich may'ajt miid miich mdiscípulos ajcxy co huen yajpidzimgixy je ca'oybi ma iich nmang, e ca' ajcxy ymadacy nicxy yajpidzimgixy.

¹⁹Jesús nimay je mayjäy: —Miich ajcxy huidibi jugy'ajtp jadachambi xii tiempo huidibi ca' mijpidägy Dios y'ayuc, ¿naag xii naag po' iich njac-hui'mmihuibich miid miich ajcxy? ¿Naag xii naag po' n'ocmimexxtuguipich miich ajcxy? Miidmiin yi mmang ya ma iich nhuinduu.

²⁰Chi ajcxy miidmiñ je pa'mjäy ma Jesús yhuinduu. E co je ca'oybi ijxpaady Jesús, chi mic'amy yajyajch yajquidy je pa'mjäy, e chi oy ciday naaxcixy, e ooy yajch yquidy, yajpidzimy ooy y'aa'opy ma y'ahuac. ²¹⁻²²Jesús y'amidooy je pa'mjäy yteedy:

—¿Minaag jimijt cujc yöy maabi mmang ypa'mbety?

Chi je ungdeedy y'adzooy: —Ma'xung anajty co pa'mbedyii. Canaag'oc je ca'oybi yajyachyii yajquidyii iich nmang, ixti ti oy ycogidahuiy jijnjoty etz nijjoty. Je ca'oybi canaag'oc jayaj'ögy iich nmang. Pen miich miid tzöc'ajt mic'ajt jaydëb xypubedipyich, tun may'ajt pa'ayoogich etz pubejtich.

²³Chi Jesús y'adzooy nimay je pa'mjäy yteedy: —Pen miich mibijcpi, ca' ti chípity ma pin mibijcp.

²⁴Mic'amy je pa'mjäy yteedy mic ycapxy yminañ:

—Nmibijcyich, pubéjtich nej huaad jacmij nmibicyich.

²⁵E co Jesús ijxy co nigü mayjäy chach ymiin poyigy ma yi', chi ix'ojy je ca'oybi, e yminañ:

—Miich ca'oybi huidib ti yajhuim'y jada pi'c'anäg uum etz nat, iich miich yam n'ane'myb: “Pidzim ma yi pa'mjäy, e

ca' mjactig'ihuipy ma yi' yjot yhuinma'n'ñ jadüg'oc."

²⁶Jayijp je ca'oybi yaaxqueecy janch mic, yajyajch yajquüdy je pa'mjäy. Co jadu'n tuñ, chi ypidzimy. Je pa'mjäy oy ñin'icx yhui'my nej jihuüy ti y'o'cni. Je mayjäy huídibi anajty ajcxy jim huind'icxp ym'inaangixy:

—Ti ayoob y'ögy.

²⁷Chi Jesús majtz je pa'mjäy yci', e yajpid'igy e huin'it je pa'mjäy ytinay'igy mic oy.

²⁸Co Jesús ytigüy ma tüg tijc, chi je' ydiscípulos ajcxy y'amidou ameech, minañ ajcxy:

—¿Na'amy co iich ajcxy ca' ti nmadägyich nej nyajpidzimip iich ajcxy yi ca'oybi?

²⁹Chi Jesús y'adzooy:

—Yijibi ca'oybi ca' yi' huaad ypidzimy jadu'ñyi. Hue' janchtiy copicy mibijctzou Dios mictägy, e huin'it ypidzimipy je ca'oybi ma je pa'mjäy. Ca' jac ni nej huaad ypidzimy yi jadu'mbi ca'oybi, jëyi co Dios nmibijctzoohuim n'fjt'im ayuu.

Jesús capxpidzimnip jadüg'oc co y'öga'n

³⁰Chi Jesús miid yi' ydiscípulos ajcxy choñ ma je jimbi it, e yajyöy'ñajxtay ajcxy Galilea naaxjot. Jesús ca' anajty tzocy co je mayjäy ñejhu'ihuüyb ma yi' ñicxy. ³¹Com Jesús hue' anajty yaj'ixpicy yi' ydiscípulos ajcxy, co ooy ycop'icyity co yi jäy huídibi tzoon tzajpjoty, yajc'yegipy ma yi ymidzip, etz yaj'ögüiyb, e co anajty ti y'ögy codugüig xii jadüg'oc yjugypigipy.

³²Jesús ydiscípulos ajcxy ca'

huinjihuüy anajty Jesús y'ayuc, e nañ jadu'n tzigüiyb anajty ajcxy co Jesús yaj'ójiip, paady ca' ajcxy amídooy nej huimbizimy yijibi ayuc.

¿Pin je' nigi jacm'ijip?

³³E Jesús miid ydiscípulos ajcxy oyjaty jim Capernaum. Co ajcxy ytigüiyb, chi Jesús yaj'amídooy ydiscípulos ajcxy, nimay:

—¿Ti ayuc miich ajcxy naymiidmiydáacigixy jim ma anajty mdüyöyigixy?

³⁴Per amonday ajcxy, com jëgixpi co anajty ajcxy ooy ti ñaymiidmiydáacigixy tüyöyjoty co pin jada' ajcxy nidügti ocjaccop'icyip. ³⁵Huin'it Jesús y'ixtacy, e chi mijhuoy je nimajmetzpi ydiscípulos ajcxy, chi ajcxy nimay:

—Pin naysajnaaxanip mij, huen ity nej jihuüy ca' ytiijity e huen capxmidoy ymügügtijc.

³⁶Chi Jesús tzen'igy tüg pi'c'anäg, e chi pidacy cujc'amy ma yi' ydiscípulos ajcxy. Chi tzen'igy jadüg'oc, e nimay ajcxy:

³⁷—Pin cöb'ijc tügpajc pi'c'anäg jadu'n nej jada pi'c'anäg miid iich nxi' ycixpi, iich yi' anajty ti xycöbicyich, e pin iich xycöb'ijcpich, ca nan iich anajty naydügpajc ti xycöb'ijcyich, nañ jadu'n anajty ti cöbicy huídi ti xyquejxich.

Pin iich ajt xycamidzip'ájt'im, iich ajt je' miid y'ity

³⁸Juan Jesús nimay:

—Huindzin, ti iich ajcxy n'ijxpaady tüg jäy co ca'oybi yajpidzimy miid miich mxii, e ti

ngapx'aducyich miid co ca' yi' iich ajt xypahuidjítim.

³⁹Per Jesús yminañ:

—Ca' mgapx'adugipy yi jadu'mbi jäy, com huenpínity huidibi mjihinma'n tumb miid iich nxii, ca' yi' jibic xyñigapxich. ⁴⁰Com yi huidibi ajt ca' xymidzip'ájtím, yi' yi' miid iich ajt nbidzímim. ⁴¹Janch janch iich miich ajcxy jadu'n nimäy co huenpínjáy huidibi ixypy miich ajcxy xyajni'uucp tüg vaso nii miid co miich ajcxy ti mmijnicxpety je Cristo, yi jadu'mbi jäy ypadamy yi' y'oy'ájtín ma Dios.

**Je huidibi ooy ycojotmáyity
co nicxy nbocycáhuim**

⁴²Huenpínity huidibi jibic-huinma'n mibidzimb, e yajpocycäy yi jadu'mbi pi'ctijc huidibi ajcxy xymijnicxpejtpich, jac'oy ixypy co yi jadu'mbi jäy ytimyñayajyöcxodzäyü tüg paandzaa etz ñayñajtzjibibihuiiyb mejyoty. ⁴³Pen miich mgi' xyajtundigoyamb jac'oy co mdim'ixpuxipy, com jac'oy co mdigihuipy ma yi jugy'ájtín huinixiibi ciduc, ca'ydi co Dios xypidägip miid metz mgi' jiiby jijnjoty ca'oydactuuby, ma yi jijn ni camina ycapich. ⁴⁴Jiiby ca'oydactuuby yi ucxyting ca' y'ögy etz ni jijn ycapich nicaminaaxii. ⁴⁵E pen miich yi mdecy xyajpocycáhuamb, ixpux, com jac'oy co mdigihuip ma yi jugy'ájtín huinixiibi tecytuc ca'ydi co mdigihuip miid metz mdecy jiiby ca'oydactuuyb, ma yi jijn ni camina ycapich. ⁴⁶Jiiby ca'oydactuuby yi ucxyting ca' y'ögy etz ni jijn

yca'pich ni caminaxii. ⁴⁷E pen yi mhuiin tüg xyajpocycáhuamb, tím yajpidzim, jac'oy yi' co mdigihuip ma yi Dios y'ane'mdac miid tügpajc mhuiin, ca'ydi co mdigihuip ca'oydactuuby miid metz mhuiin. ⁴⁸Ma yi ucxyting ni caminaxii yca'ögy etz yi jijn ni caminaxii ycapich, ⁴⁹e ma nidüg'óciy ñi'cägooda'n jijn xut jijn ye'n tím jadu'n nej jäy tzüch caan xiducy. ⁵⁰Yi caan ooy yi' y'óyity, pen ymiid xücx'ájtín. Co je caan ytigoy yxücx'ájtín, ca' ji ni ti huidibi jëb miid nyajxücxiiyim. Miid'ájtícix iich n'ayuc ma mjot mhuiinma'n, jadu'n iich n'ayuc nipaady nej caan, e tzina' miich ajcxy jotcujc miid mmigügtjic nidüg nidüg.

**Jesús yaj'ixpicy miid co
jäy ytöxyijc ixmach**

10 Chi Jesús chooñ jim Capernaum, nicxy jim Judea ñaaxjot ma je it lugar Jordán mijniñ ninaxxy xii ypidzimy'amy. E mayjäy ooy ñayyöymujci ma Jesús anajty yajpaady. E Jesús yaj'ixpijcy je mayjäy jadu'n nej anajty yaj'ixpicy'adyii. ²Chi nijëjity fariseos ajcxy ñicxy ma Jesús anajty yajpaady. Hue' ajcxy yhuinma'n pidaaccixy co anajty Jesús tzu'ixaangixy. Chi ajcxy y'amidooy, pen huaad tüg yëydjic ixmach ytöxyijc. ³Chi Jesús y'adzooy, yminañ:

—¿Nej Moisés yminañ ma yi' ycötújcín ñecy?

⁴Chi je fariseos ajcxy Jesús y'adzooy:

—Moisés cötújcín yecy co tüg yëydjic jëb huaad ixmach ytöxyijc,

e möhuipy ñinecy ñidiy'ajt co nej ñay'ixmájtzigixy, e jadu'n anajty ti y'oyiy nej jëb yi' ytöxyijc ixmach.

⁵Chi Jesús yminañ:

—Moisés cojaay jada

ycötújcín miid miich ajcxy ycxipi, co ooy miich ajcxy mdzachcapxycömídodaaccixy ca' mgapxymídohuaangixy Dios. ⁶Per co je naaxhuiñybi chondacy, co Dios oga'n yajcojy tüg'óciy tijaty huidi jil'ajtp, chi Dios yajcojy yëydijc etz töxyjäy. ⁷E je yëydijc ixmadzipy ytaj yteedy etz pudigihuiipy yi ytöxyijc. ⁸E je yëydijc etz ytöxyijc tú'ciy idaangixy. Paady je yëydijc tügmucy yajpaady miid ytöxyijc.

⁹Com yi huidibi Dios ti huijtzmucy, ca' ni pin huaad huijtzhuägy.

¹⁰Co Jesús miid ydiscípulos ajcxy yhuimbijt ma anajty ti yjättáccixy, chi Jesús ydiscípulos ajcxy yajtihuimbijtcixy je ayuc huidibi anajty ti yaj'ixpicy ma je píjcín.

¹¹Chi Jesús yminañ:

—Je yëydijc huidibi ti ixmach yi ytöxyijc, e picy miid huingbi, hue' yi' anajty ymidundigooyb yi ytöxyijc huidibi miid jayijp ypijcy. ¹²Nañ tim jadu'n co tüg töxyjäy ixmach je yëydijc huidibi miid ti ypicy jayijp, e ypijctigach miid huingbi yëydijc, hue' ymidundigooyb je yëydijc huidibi miid ti ypicy jayijp.

Jesús conucxy pi'ctijc

¹³Je huin'it tiempo jäy ajcxy miid miñ pi'ctijc ma Jesús, jaydëb cñixajy etz conuucxip. Co Jesús ydiscípulos ajcxy jadu'n ijxy co jäy ajcxy nimijhuägy Jesús miid ajcxy ypi'c'ung, chi je' ydiscípulos ajcxy

ix'ojy je jäy ajcxy. ¹⁴Co Jesús jadu'n ijxy nejhuiiy nej yi' ydiscípulos ajcxy y'idich, chi ogy ajcxy, yminañ:

—Ooy y'óyity co je pi'ctijc ajcxy xyñimijhuägyich, ca' miich ajcxy mgapxaducy. Com yi jäy ajcxy huidibi yajpatp ma Dios y'ané'min, jadu'n ajcxy nipaady nej pi'ctijc. ¹⁵Janch iich miich ajcxy nimäy co pinjaty huidibi ca' cöbiga'ñ Dios y'ané'min, jadu'n nej pi'ctijc cöbjccixy Dios y'ané'min, hue' yi jadu'mbi jäy ajcxy ca' ytigihua'n ma yi Dios y'itugar.

¹⁶Chi Jesús aminenmujectay je pi'ctijc ajcxy, e chi cñixajy etz conuucxicy.

Tüg mutz'anäg comeenybi ymiydägy miid Jesús

¹⁷Co Jesús chooñ jadüg'oc, chi ñimiini poyigy tüg yëydijc, ycojxtinay'ahuüy ma Jesús yhuinduu, e yminañ:

—Miich, oybi Huindzin, çti huaad ndunipyich jigix jëbi nbadipyich jugy'ájtín huidibi ca' ycixipy ytigoyipy?

¹⁸Chi Jesús yminañ:

—¿Na'amy co xyñimäyich co oy huindzin iich? Dios tügpajc óyip, ca' jac ni pin. ¹⁹Miich mnejhuiyb Dios ycötújcín huidibi jadu'n minaam: “Ca' mmigapxtigoyip töxyjäydijc; ca' mjäyay'ögipy; ca' mmeedzip; ca' m'hndaacip; ca' pin mhuin'ñinip; etz myajmij'adip mdaj mdeedy.”

²⁰Chi je jäy Jesús nimay:

—Huindzin, ti nguydündäyich jadaaab cötújcín ajcxy maabi iich nbi'c'atyich.

²¹Chi Jesús huindixpejty je yëydijc miid tzójcín jihuiiyin, e chi nimay:

—Per jactigoy'ijtni jadügnax. Nicx toog tüg'óciy huidijaty miich mmiid, etz mo' yi ayoobtjic. Co jadu'n mdunipy, chi mbaadipy oy'ájtín jiiby tzajpjoty. Co jadu'n mdooctáhuipy tijaty miich miid, chi minip jadüg'oc ma nyajpaadyich, e xypanícxibich, e mnaybidägiib cixyot huinjot oy nej mdímyjadipy miid iich ycixpi.

²²Co jadu'n je yéydjic midoy nej anajty Jesús ti nímäyíi, chi yhuí'my taj may e co ñícxni, chi ooy ytaj ymay, com hue' je' anajty ooy ycomeeñity.

²³Co Jesús jadu'n ixy co je comeeñybi taj may yhuimbijtni, chi huindícxpejty je' ydiscípulos ajcxy huidibi tinaayb júhuidity ma yi', e ymínañ:

—Ooy chachtzípity co tüg comeeñybi ytigíhuipy ma Dios y'it lugar.

²⁴Jesús ydiscípulos ajcxy ooy tzachhuinmay'ahuidity miid jada ayuc nej Jesús anajty ti ymínañ. Paady Jesús yjacmínañ jadüg'oc:

—Miich ajcxy migügtjic huidibi ooy ndzocyich, ooy chachtzípity co ytigíhuip ma Dios y'ane'mdac tüg comeeñyjäy huidibi tzachnijot'ajt ycomeeñ'adii. ²⁵Nígi chípity co tüg comeeñ jäy ytigíhuip ma Dios y'ane'my, ca'ydi co tüg camello ñaxipy ma tüg xu'ñ'íjx yxútity.

²⁶Co jadu'n ajcxy midoy nej Jesús ymínañ, chi ooy ajcxy yhuinmay'ahuidijty, e nayñimáayigixy miñ xyipy:

—Pen janch tiy'ajt jadu'n, ¿pinjäy jada' huaad jëb y'alma ñidzögipy?

²⁷Je huidibi jäy ajcxy ca' ni minaxii huaad ca' yaj'oyiy, Dios yi'

yaj'oyíhuip, com miid Dios ca' yi' ni ti chípity.

²⁸Chi Pedro ymínañ:

—Huindzin, occuendtun, iich ajcxy ti n'ixmajztäyich tüg'óciy tijaty anajty nmiidich, e iich ajcxy nbanicxpich miich.

²⁹⁻³⁰Chi Jesús y'adzooy, mínañ:

—Janch tiy'ajt nej iich miich ajcxy nímäy co huenpínity huidibi miid iich ycixpi ti ixmach ytjic, ti ixmach y'uch ymigüg ajcxy etz ytaj yteedy, etz ytöxyjic, etz y'ung ajcxy, etz nañ jadu'n ti ixmach ycam iich ycixpi, etz iich n'ayucich etz miid Dios ytjy'ajt ycixpi, yi' ypadamy nígi oy'ájtín ya naaxhuiñ, ixti ypadamy migo'px jadu'ñyi ytjic ajcxy, y'uch ajcxy, ytaj ajcxy, y'ung ajcxy, etz ypadamy nígi ymij cam, miid tzaachypi miid ayo'n miid iich n'ayuc ycixpi. Etz nañ jadu'n ma je xii tiempo huidibi mimb cidacpi ypadamy jugy'ájtín huidibi ca' ycixipy ytigoyipy. ³¹Ji yajpaady ya naaxhuiñ nijējity jäy huidibi cōmay ijtp, e co yjätty ajcxy tzajpjoty, chi ca' ajcxy cōmay ida'ñ. Nañ jadu'n ji yajpaady ya naaxhuiñ nijējity huidibi ca' cōmay y'ity, e co ajcxy yjädipy tzajpjoty, chi jiiby ajcxy cōmay y'idipy.

Jadüg'oc Jesús capxpídzímniip co y'öga'ñ

³²Jesús miid ydiscípulos tüyöyp anajty ajcxy, hue' anajty ypättigíyigixy jim Jerusalén. Jesús jayijp anajty ñícxny, e je' ydiscípulos ajcxy etz nañ jadu'n mayjäy panícxny anajty ajcxy Jesús. Je Jesús ydiscípulos ajcxy ooy chachhuinmay'ahuidíjtcixy,

e jacjadyii jäy huidibi anajty ypanícxxy Jesús ooy ajcxxy chigíyigixy. Chi Jesús huodzooñ abicy je majmetzpi ajcxxy, e yajmíidmíydactay je' ajcxxy jadu'n nej ytuna'nyii yjada'nyii jím Jerusalén co anajty ajcxxy jím yja'tcixy. ³³ Jesús je nimajmetzpi nimay:

—Miich ajcxxy m'íjxpy mnejhuiiyb co nnícxím cham jím Jerusalén. E jím Jerusalén, íich je jäy huidibi tzoon tzajpjoty, nyajcýyega'ñích mach ma yi Teedy míjtungmíidpi, etz ma yi escribas ajcxxy. E chi ajcxxy ane'mín pídagá'ñ co huen xyaj'ócíxích. Nañ jadu'n xycýyegaangíxích mach ma yi' ajcxxy huidibi ca' yjudíojäyítý. ³⁴ Yí' ajcxxy xyñíxígípy xyajxígíbyíxích, xyhuobípyíxích ajcxxy míid coochac, xyhuíndzuj xyjípztúzjíbích ajcxxy, e xyaj'ógíbích ajcxxy. Codugiig xii maabi anajty xyaj'óccíxyíxích, chi njugypígípyíxích jadüg'oc.

Jacobo etz Juan píjctzóogixy tüg may'ajt

³⁵ Huin'it Jacobo etz Juan, yi Zebedeo ajcxxy ymang, nimíjhuägy Jesús, nimay:

—Huíndzin, ndzojcpyíxích ajcxxy co mdunípy may'ajt jadu'n nej yam nimaagyxy.

³⁶ E Jesús ymínañ:

—¿Tí mdzojcpy co ndunípích míid miich ajcxxy ycíxpi?

³⁷ Chi ajcxxy ymínañ:

—Tun may'ajt co anajty mbaady yi m'ané'mín etz m'oy'ájtín, xymóhuíbích yi míj tung ma m'ané'mín jaydéb n'íñáhuíbích ma miich mmíjc. Nídügtí íich ajcxxy

n'íñáhuípy a'oy'amy ma miich etz jadüg anajty'amy.

³⁸ Chi Jesús nimay Jacobo etz Juan:

—Ca' miich ajcxxy mnejhuíy ti tí mbíjctzóogixy. ¿Nej myajnaxamyb miich ajcxxy je tzaachypi ay'o'n huidibi nyajnaxaamybích, jadu'n nej jíhuíy m'üga'ñ ajcxxy íich n'ügy e mbaada'ñ ajcxxy íich nniíbéjtín?

³⁹ Jacobo etz Juan y'adzooy:

—Íich ajcxxy nmímadağíbích mínaxípyíxích nyajnaxípyíxích ajcxxy yi tzaachypi huidibi mminaxamyb myajnaxamyb.

Chi Jesús ymínañ:

—Janch tíy'ajt jadu'n nej miich ajcxxy mína'ñ co mminaxaangíxy myajnaxaangíxy yi tzaachypi jadu'n nej íich mminaxaamyíxích nyajnaxaamyíxích yi tzaachypi, tím jadu'n nej jíhuíy m'ügaangíxy íich n'ügy, e mbadaangíxy íich nniíbéjtín. ⁴⁰ Per ca' íich cótújcín nmíidídyíxích co íich miich ajcxxy nbídagípy tungmíid, co myajpaadíp tüg ma íich nmíjc a'oy'amy, e jadüg anajty'amy. Hue' janchtíy Dios Teedy ymíid n'íxí' pínjaty tí huín'ixy jaydéb yajnícxíp je míjtung ma íich n'ané'mín.

⁴¹ Co je jacjadyii Jesús ydiscípulos ajcxxy nejhuiiy jadu'n nej Jacobo etz Juan may'ajt píjctzoy ma Jesús, chi ajcxxy ooy míjotmätý Jacobo etz Juan. ⁴² Per Jesús huomíñ yi jacjadyii ydiscípulos ajcxxy, e ymínañ:

—Jadu'n nej miich ajcxxy mnejhuiiygixy, yi jäy ajcxxy huidibi míjtungmíid ma je maybí naax cajp, mic ajcxxy ane'my je naax cajp. Nañ jadu'n yi' ajcxxy

huidibi mic'ajt miid ma je maybi naax cajp, mic ajcxy ane'my je jäy ajcxy. ⁴³Per miich ajcxy ca' mjadú'nity nej mjtungmiidpi ma je maybi naax cajp. Pinjaty ma miich ajcxy mjtung yajnicxaamb, copicy ñaybidägiyb nej tüg tumbi. ⁴⁴Pinjaty miich ajcxy huidibi nigohuajc'ajtp, copicy ñaybidägiyb nej tüg tumbi. ⁴⁵Com iich nañ jadu'n, je jäy huidibi tsoon tzajpjoty, ti nmiinich ya naaxhuiñ jaydeb nbubedipyich yi mayjäy ajcxy, e ca' nan yi mayjäy iich xpubedipy. Ti nmiinich jaydeb nyegipyich njugy'ájtín ma yi o'cin. E co jadu'n nyegipyich njugy'ájtín ma yi o'cin, chi ngohua'na'ñich yi jäy ajcxy y'alma.

**Jesús yajtzögy Bartimeo
huidi anajty huintzip**

⁴⁶Chi oy jäty Jesús miid ydiscípulos ajcxy jim Jericó. E co Jesús tzoñ Jericó ytübijcy jadüg'oc, chi yi' ydiscípulos ajcxy etz janch mayjäy ñíxcixy anajty miid Jesús. Co ajcxy ycajp pidzimy, chi tüba'ay anajty yajpaady tüg huintzipi huidibi limosna anajty ypijctzooyb jabom jabom. Hue' anajty yxii Bartimeo, e Timeo anajty xiijty yi' yteedy. ⁴⁷Co Bartimeo nejhuiy co Jesús je Nazaretpi najxp anajty ma je tü'aa, chi mic yaaxqueegy yminañ:

—Jesús, David y'ap y'oc, tun may'ajt iich pa'ayoog.

⁴⁸Chi je mayjäy ajcxy ogy je huintzipi, nimay ajcxy co huen amoñ. Per je huintzipi nigí yminan'idich:

—Miich, David y'ap y'oc, tun may'ajt iich pa'ayoog.

⁴⁹Chi Jesús ytinayxijpy, e yminañ: —Huomiingix yi huintzipi.

Chi je jäy ajcxy oy yajtzoongixy je huintzipi, nimaaygixy:

—Jotcugi', e pidig, com Jesús xyaaxtzoob.

⁵⁰Chi mic'amy je huintzipi, najtz'oxiyy je ñibe'ñ, chi ypidigy, e ninicxy Jesús. ⁵¹Chi Jesús je huintzipi y'amidooy:

—¿Ti mdzojepy ndunipyich miid miich ycixpi?

Chi je huintzipi yminañ: —Huindzin, ndzójepyich co xyajhuindicxigibich.

⁵²Chi Jesús je huintzipi nimay:

—Jëb mnicxy ma mdijc.

Com ti xymibicyich, paady ti mhuidicxigy.

Tim huiñ'it je huintzipi yhuin'oyiyy, e yhuindicxigy, e panicxy Jesús co ytübijcy jadüg'oc.

Jesús ytigy jim Jerusalén

11 Co Jesús etz je mayjäy oyjá'tcixy huingon ma je Jerusalén cajp ma yajpaady mejtz mutz cajp huidi xiijpy Betfagé etz Betania, huingon ma je cop huidibi xiijp Olivos, chi Jesús quejxy metz ydiscípulos huen nicxy jayjip. ²Jesús nimay je metzpi ydiscípulos: —Nícx miich ajcxy ma yijimbi cajp huingonbi. Co jim mjädipy, chi mic'amy mbaadip tüg burro ycoxóchity huidibi ca' pin yaj'iñayñi chambaad. Coguejtuutcix je burro e yajmiingix ya ma iich. ³Pen jim pinjaty xy'amidoogixy: “¿Na'amy co mmidzonaangixy yi burro?” Chi miich ajcxy mnimähuipy: “Je Huindzin (Jesús) yajtunamyb tzojc, e yajhuimbidamy mic'amy.”

⁴Chi je metzpi ydiscípulos ñicxy ma je cajp huingtonbi, e oypaatcixy tüg burro ycoxóchity huington ma tüg tijc'aguu. Chi ajcxy coguejtuuty je burro.

⁵Ycoguejtuutyp anajty ajcxy je burro co nijējity jāy jim huington ymīnañ:

—¿Ti mdungixyp? ¿Na'amy co mgoguejtuutcixy yi burro?

⁶Chi je metzpi Jesús ydiscípulos je jāy ajcxy yajmīdmīydacy Jesús y'ayuc nej anajty ti ñimāyīi. Je jāy ajcxy ymīnaangixy co jēb yajñicxcixy je burro. ⁷Mic'amy ajcxy mīja'ty je burro ma Jesús yajpaady. Je Jesús ydiscípulos ajcxy jīibe'ñ je burro ajcxy mīid yjocxhuit, chi Jesús yaj'ñay je burro. ⁸Mayjāy ajcxy ooy yēby yhuit tüguc ma Jesús anajty ñaxa'ñ, e jacjadyīi jāy pujxy ajcxy quipy'aacx, e pīdaaccixy tüguc.

⁹Je mayjāy huīdibi anajty ajcxy ñicxp jayījp etz axam ma Jesús, chi ajcxy ytīgīiy capxp mic, ymīnaangixy:

—iHosana! iGloria a Dios, ooy ycōmāyity Dios! Huen capxpaady y'idīpy jada yēydīc huīdibi mimb mīid yi nHuīndzīn Dios yxīi etz ymic'ajt. ¹⁰Huen capxpaady y'idīpy je ané'mīn huīdibi jada Jesús yajtzondacp cham. Jada je' je ané'mīn huīdibi nmīj'ap nmījteedy David anajty ymīid. Hosana, huen je tzajpjoty tzīnaayb ajcxy ībaatcixy capxpaatcixy jada mīj'ane'mbi.

¹¹E jadu'ñyi Jesús ycajptīgīiy jim Jerusalén, e ytīgīiy tīgoty ma Dios ytījc. Co huīndīcxtay tüg'óciy tījaty jīiby tzajtīgoty, chí chooñ

jīiby, e ñicxy jim ma je cajp huīdibi yxīi Betania. Chi Jesús je majmetz ydiscípulos ajcxy mīidnicxy.

Jesús capxpcy je higueri ca'pi anajty ytiim

¹²Je com jabom co ajcxy chooñ jim Betania, chi Jesús yubōccoti.

¹³Chi Jesús ijxpaty jīguēgy tüg higueri ooy anajty yco'aayity. Chi Jesús ñicxy ma je higueri yajpaady, ixa'ñ pen ymīid ytiim. Co Jesús ymech ma je higueri, chí ijxy co je higueri ca' anajty ytiim mīidity, jēyi mīidity anajty y'aay, com ca' anajty ni tiempity mīna higo ytiim'aty. ¹⁴Chi Jesús mīgapxy je higueri ñimay:

—Jadu'n nej tiempo yjacñicxni, ni pīn cacjcapadīpy higo tīim ma mīich.

Chi Jesús ydiscípulos ajcxy mīdooy nej Jesús ñimay je higueri.

Jesús quejpidzimday ajuybi adoocpi ma Dios ytījc

¹⁵Co ajcxy oy yjādy jim Jerusalén, co Jesús ytīgīy jadüg'oc jīiby ma Dios ytījc, chí Jesús yajpīdzimday je ajuyybi adoocpi ajcxy jīiby tzajptīgoty. Chi Jesús tījhuimbījtay je mesa ajcxy me je meeñ yajhuācxpi ytuñ ajcxy. Nañ jadu'n tījhuimbījty je jāy ajcxy īñaybejt huīdibi muuxy toocp. ¹⁶Jesús ca' anajty tzocy co pīnjaty mīdīgīhuīpy juydoogy ma Dios ytījc. ¹⁷Jesús yaj'ixpījcpy anajty je mayjāy, e ymīnañ:

—Ma Dios y'ayuc necy Dios jadu'n ymīnañ: “Hīch ndījc hue' je' tzajpcapxapxtac ma tüg'óciy jāy ajcxy chooñ ma nidüg'óciy naax

cajp ymiingixy Dios ojadajtp”, per miich ajcxy hue' yi' mhua'n meetzpitijc.

¹⁸Co ajcxy je teedy mijtungmiidpi etz je escribas nejhuuiy nej anajty Jesús ti y'idich jiiy ma Dios ytijc, chi ajcxy ooy ijxtaaygixy nej ajcxy jëb yaj'ögipy Jesús. Per ca' ajcxy yhuinma'nybaady mic'amy nej yaj'ögipy, tzigiyyb ajcxy miid je mayjäy com je mayjäy ooy tzachjihuiy huinmay jadu'n nej Jesús yaj'ixpájcigixy. ¹⁹Co oycoodziyñi, chi Jesús ycajppidzimy.

Je higuery ytiitzni

²⁰Je com jabom Jesús miid ydiscípulos ajcxy najxp anajty tím jopyñi ma je higuery anajty ytinäy. E je higuery ti anajty ytiitztay mabaad ytictz. ²¹Huin'it Pedro jäymejtzcooty nej Jesús nimay je higuery, chi Pedro Jesús nimay: —Huindzin, ix jada higuery huidibi ixiy mgapxpoj, ti yi' ytich.

²²Chi Jesús Pedro nimay: —Mibic yi Dios. ²³Janch iich miich ajcxy nimäy, co ixipy pin migapxy jada huigonbi cop, e nimäy ixipy: “Miich cop pidig, e nicx cidäg mejyoty”, pen ca' ti mijotmetzciy, e mibicy co jadaanip nej yi' ti ane'my je cop, chi jadu'n ytuniyy yjadiyyb. ²⁴Paady iich miich ajcxy nimäy co tüg'óciy tijaty miich ajcxy mbijctzooyb ma Dios, chi Dios xymöhuipy ajcxy huidibi ti mbijctzoogixy. Pen janch miich ajcxy mibicy co Dios ti xymoogixy ajcxy je huidibi ti mbijctzooyb. ²⁵Co miich ajcxy mgapxtaaccixy, pen ca' oy m'ity

ajcxy miid tüg jäy , huinméxcix yi mmidzip tím jayijp, jigix jëbi Dios Teedy huidib jiiy tzajpjoty xyhuinmeecxip miich ajcxy ma ti mdundigooygixy. ²⁶Pen ca' miich ajcxy mhuinmecxy yi mmidzip huidibi ti xymidundigooygixy, ca' miich ajcxy xyhuinmecxa'n Dios Teedy huidibi yajpatp tzajpjoty.

Jesús je' ycötújcín

²⁷⁻²⁸Je huin'it tiempo Jesús miid je' ydiscípulos ajcxy yhuimbijty jim Jerusalén. E co Jesús anajty yhuidity tzajtigoty, chi nijëjity huindzindijc huidibi nigohuajc'ajtp anajty je teedytjic etz escribas ajcxy huidibi nijayduutpi Dios ñecy, nimiiñ ajcxy Jesús, e yminañ ajcxy: —¿Pin cötújcín ti xymöy huidibi ti mduñ ya tzajtigoty? ¿Ma cötújcín ti mbaady co jëb m'ane'my ya tzajtigoty?

²⁹⁻³⁰Chi Jesús yminañ: —Iich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimähuipy ma iich ti nbaady yi mic'ajt etz yi cötújcín, co jadu'n nduñich jiiy tigoty ma Dios ytjic. ¿Pin yajniñbicy Juan, je Bautista, co huen jäy yajniñbety? ¿Dios, o naaxhuiñyjäy? Adzoogich ajcxy.

³¹Chi ajcxy ytiigiyy huinmay'ahuidijtpi, ñayñimáayigixy miñ xyipy: —Pen minaanim co Dios tzajpjotyti ti yajniñbicy Juan, chi Jesús xyñimáayimipy: “¿Nej co ca' miich ajcxy mibijcy Juan y'ayuc?” ³²Nañ ni ca' jëbi iich ajt nminaanim co jäy ajcxy ti quejxy Juan.

Com chigiiyb anajty jäy com ñejhuiiyb anajty ajcxy co Juan je Bautista Dios anajty ytiy'ajt ymiid.

³³Chi ajcxy Jesús ñimay:

—Ca' hich ajcxy nejhuiy pin ti yajñibicy Juan.

Chi Jesús ymiñañ:

—Hich ñañ jadu'n

ca' nnigapxa'ñich pin ti xycótujcmöyich co jëb nduñich huídibi ndumyibich.

Je naymidúniptijc jibicjäybi ajcxy y'ijxpejt

12 Je huin'lit xii Jesús jacmigapxy je mayjäy miid jihuimbit ayuc, ymiñañ:

—Ji yajpaady tüg yëydijc huídibi camuuxy ti cojy ma ycam, e ti co'aguemy je camuuxy cam, e yaj'oyiyy tügi tang ma huinmicxa'ñ je camuuxy. Ñañ jadu'n je yëydijc tüg poch yajpidägy ma ycamuuxy yaj'ixihua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yejcy ajuyducy ma nijëjity tumbidijc. Chi choon viaje tumbi jiguëgy it. ²Je huin'lit tiempo co yhuaad'ajtni je cosechi, chi je cogam quejxy tüg ytumbi jim ma je' ycam yajpaady, co hueen je tumbidijc yéjccixy je cosechi, jadu'n nej anajty ti ycapxytuñ miid je' ajcxy. ³Chi je cam tumbidijc ajcxy majch je cogam yquexyöyp, chi huinhuojpy jijphuojpy ajcxy. Chi ajcxy quejxhuimbijty jadu'ñyi, ni ti ajcxy camoy. ⁴Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mimetzpi quexyöyp etz yajtzachiy ajcxy ma ycohuajc, chi ajcxy ooy ogy oyñinej. ⁵Chi

je cogam jacquejxy jadüg ytumbi e ajcxy tumbidijc yaj'o'cy je midugiigpi quexyöpy. Chi je cogam jac tim quejxy jadyii ytumbi. Chi je tumbidijc ajcxy je cogam ytumbi huinhuojpi jijphuojpi nijëjity, e nijëjity ajcxy yaj'o'cy.

⁶Je cogam ymiid anajty tügpajc ymang huídibi anajty ooy tzocy jihuiy. Je' oy quejxcogixiy ma je ycam yajpaady. Je cogam huinmay jadu'n co je tumbidijc ajcxy yajmij'adiiyb je' ymang. ⁷Chi je tumbidijc ajcxy ñayñimaayi miñ xyipy: “Jada yëydijc je cogam jada ymang huídibi jë'adaanip je yteedy ypidägy. Tzoc yaj'ó'cim, e jadu'n je cam një'ájtím.” ⁸E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajjixci'py.

⁹Co Jesús jadu'n miydactay je jihuimbit ayuc, chi ymiñañ:

—¿Ti ytunamyb je cogam miid je tumbidijc ajcxy? Hue' min ci'm ma je' ycam, e yaj'öctähuiipy je tumbidijc ajcxy huídibi tundigoy. E yegipy pijctzoy je' ycam miid huingbi jäy ajcxy.

¹⁰¿Nej ca'ni miich ajcxy mgapxy yi Dios ñecy ma jadu'n ymiñañ?

Je yëydijc huídibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tzaa oyjatypi huídibi je pojtzpidijc ca' ajcxy yajtuna'ñ, e je' oy ti yhui'mni ma anajty yjaccopícyity.

¹¹Jada tung je Huindzin Dios ti tuñ, e ooy oy n'ijxim njäygidaacim.

¹²E huin'lit je judíojäy ajcxy ytungmiidpi ooy jamadzaañ anajty

Jesús, com ñejhuiyb anajty ajcxy co Jesús ñigapxyii yi' ajcxy. Com tzigiiyb anajty ajcxy miid je mayjäy, chi ajcxy tim huinyöyducy, chi ñïxcixni.

**Yajnidiiygixy pen jëbi
cogüéjtin yajyecy o pen ca'**

¹³Jac'axam je judíojäy ajcxy ytungmiidpi quejxy ajcxy ma Jesús yajpaady mejtzpicy ixpicytjic. Tügpiicy anajty ñaygomájtzigixy miid yi fariseos ajcxy, etz jadügpiicy ma je rey Herodes. Hue' anajty ajcxy huinma'ñ ixtaayb nej ajcxy ocxihuipy Jesús. ¹⁴Jada mejtzpicyipi ixpicytjic ñïcxy ajcxy ma Jesús, e yminañ ajcxy:

—Huindzin, iich ajcxy nejhuiyb co myaj'ixpijcy je tiy'ajt, ca' jäy mdzigiy, com ca' huin'ixpety myaj'ixpicy. Tú'ciy miich mduñ miid mic jäy, miid comeenyjäy, etz miid ayoob jäy. Tudägy jäy ajcxy myaj'ixpicy jadu'n nej huaad ajcxy cuychinaaygixy Dios ytiy'ajt. Nejhuihuaamybich ajcxy nej miich yaj'ixpijcpy je mayjäy. ¿Nej tundigooyim miid yi Dios ycötüjcin co nmigüéjtim César, je romano jäy mij'ane'mbi, o ca'ji? ¿Nej jëb nmigüéjtim, o ca'ji?

¹⁵Per Jesús ñejhuiyb anajty ajcxy yjibic-huinma'ñ, e chi ajcxy nimay:

—¿Na'amy co miich ajcxy xyjot'ixy xyhuinma'ñ'ixyich? Yajmiingix tüg meen jigix n'oc'ixipyich.

¹⁶Chi ajcxy mimiin tüg meen e co Jesús ijxy je meen, chi yminañ:

—¿Pin y'ahuanax etz pin yxii ijtp ma jada meen?

Chi ajcxy y'adzooy:

—Hue' yi' César.

¹⁷Chi Jesús yminañ:

—Mo' je César huidibi yi' yj'ajtpy, e mo' Dios huidibi Dios yj'ajtpy.

Chi ajcxy ooy jihuiy huinmay jadu'n nej anajty Jesús ti y'adzooy.

**Yajnidiiygixy pen je tiibi
öccixy jugypigipy jadüg'oc**

¹⁸Je huin'it tiempo nijëjity saduceos ajcxy ymiin ma Jesús. Yi saduceos ajcxy yminaangixy co ca' pin yjugypiga'ñ tiibi y'o'ccixy.

¹⁹Chi je saduceos ajcxy Jesús nimay:

—Huindzin, Moisés jayhui'my je cötüjcin co tüg yëdjic y'ögy, e co'ögy yhui'my je ytöxyjic e ca'ni ytöxyjic ung'ixy. Pues copicy je co'ögy ytöxyjäy ypigipy miid ña'y y'uch yëdjicpi jigix jëbi je töxyjäy y'ung'ixipy huidibi hui'mihuij jadu'n nej codijc cobidägy ma je yteedy y'ajch ypidägy. ²⁰Pues jim ma tüg cajp anajty chinäy huixtujc yëdjic tüg que'x. Je ungoob ypijcy, e chi ix'o'cy ytöxyjic, e ca' ni tüg y'ung yajhui'my. ²¹Je mimetzpi yëdjic ypijcy miid je co'ögytöxyjäy, e ña' jadu'n ix'o'cy ytöxyjic e ca' ni tüg ung yajhui'my. E ña' jadu'n je midugiigpi miid ypijcy je töxyjäy, e ña' jadu'n ix'o'cy je ytöxyjic, e ca' ni tüg y'ung yajhui'my. ²²E jadu'n oytuñyii yjadyii miid je töxyjäy co ti anajty miiddzinay'abidzimdäy je nihuixtujcpi yëdjic tüg que'xpi. E je nihuixtujcpi ix'o'cy ajcxy je töxyjäy, e ca' ni tüg y'ung ajcxy yajhui'my. E chi je töxyjäy oy y'öcni. ²³E co anajty xii tiempo paaty, co anajty Dios yajjugypicy yi tiibi ajcxy y'ögy, ðhuidibi

jada' ajcxy nidücti je yëydjic töxyjic'adaanip je töxyjäy? Com ti ajcxy jadu'n nihuixtujcpi miid tzinay'abidzimgixy.

²⁴Chi Jesús je saduceos ajcxy nimay:

—Miich ajcxy ca' mhuinjihuüy je tiy'ajt, com ca' mhuinjihuüyigixy Dios y'ayuc ytiy'ajt, e com ni ca' mnejhuüyigixy je mic'ajt huidibi Dios ymiid. ²⁵Pues co anajty yjugypjccixy je jäy tiibi y'ó'ccixy, chi ca' ajcxy ypigañ, e nañ jadu'n ni ca' ajcxy ñaymöhuiyb y'ung huen pjccixy. Hue' ajcxy yjugy'adaangixy chinähuaangixy jiiby tzajpjoty, tim jadu'n nej je ángel ajcxy chinaaygixy yjugy'ájtixy. ²⁶Per je tiy'ajt co jäy ajcxy tiibi y'ó'ccixy yjugypigaangixy, ¿nej ca'ni mgapxyni Moisés ytiy'ajt ma anajty Dios ymigapxyii co je aay ujtz anajty chachtoy? Chi yminañ: “ñich je' je Dios huidib Abraham, Isaac etz Jacob yDios'ajtpy.” ²⁷Com yi Dios ca' yi' yDios'aty ma yi öcpi ajcxy huidibi y'alma ti ycixy ti ytigoy. Yi Dios Dios'ajtp yi' ma yi juugypí ajcxy. Paady miich ajcxy ooy mij mdundigooygixy co ca' mhuinjihuüyigixy Dios ytiy'ajt.

Je ané'min huidibi ooy nīgi ycopícyity

²⁸Nañ jadu'n je huin'it tiempo nimiin Jesús tüg escriba. E yi' anajty y'amido'ijtpy co Jesús adzooy je jäy huidibi ca' mibicy co yi öcpi yjugypigipy ajcxy jadüg'oc. Jada escriba ñejhuüy co Jesús ooy oy ti y'adzooy je saduceos ajcxy, paady yi' Jesús amidooyi:

—¿Huidibi je' Dios y'ané'min jacmijpi?

²⁹Chi Jesús y'adzooy:

—Yi Dios ycötüjcin huidibi jaccopicyip, yi' je' huidibi minamb: “Midoogix Israel jäy, je Huindzin Dios huidibi nDios'ájtım, yi' je' ajt nHuindzin Dios tügpajcpi. ³⁰Tzoc jihui' etz yajmij'at mHuindzin Dios miid tüg'óciy m'aa mjet etz miid tüg'óciy m'alma, etz miid tüg'óciy mhuinmañ, etz miid tüg'óciy mmic'ajt.” Jada je' je jaccopicyip ané'min. ³¹Je mimetzpi Dios ycötüjcin jahueengi tú'ciy ñaybadyii miid je jayjpi, yi' huidibi jadu'n minamb: “Tzojccix jihuiygix yi mmigügtjic tim jadu'n nej mnaychogyii mnayjihuiyii ci'm.” Jada metz Dios ycötüjcin jaccopicy jacmic'ajt miid ca'ydi jac huidibi cötüjcin.

³²Chi je escriba yminañ:

—Ooy oy ti m'adzooy. Janch tiy'ajt jadu'n nej miich minañ, co ji yajpaady tügpajcpi Dios, e ca' ji jadüg Dios mic'ajt miidpi. ³³E janch tiy'ajt co copicy nmijpidaacim nyajmij'ájtım Dios cixyot huinijot miid tüg'óciy ajt nhuinmañ, miid tüg'óciy ajt n'alma, etz miid tüg'óciy ajt nmic'ajt. E copicy ndzójcin njihuiyim nmigügtjic tim jadu'n nej naychójcin nayjihuiyim ci'm. Jactzoobatp jada ca'ydi co tüg'óciy yi huindzigiñ huidibi anajty yajno'cpi miid Dios ycixpi.

³⁴Co Jesús ijxy jadu'n nej je escriba tiydudägy anajty ti y'adzoyii, chi yminañ:

—Jahuenjaty miich mmibjcin ytigoy'ityñi jaydeb mdigihuipy ma Dios y'ane'my.

Co Jesús anajty jadu'n ti y'adzooy je escriba, chi ca' jac pin ti ayuc yjacyaj'amidoohui.

¿Pin je' y'ung je Cristo?

³⁵ Jesús yaj'ixpijcpy anajty je mayjäy jiiby ma Dios ytijc, e yminañ:

—¿Na'amy co yi escribas ajcxy yminaangixy co Cristo hue' je' David y'ap y'oc? ³⁶ Com je Espíritu Santo ymoy David jada ayuc huidibi jaybety ma je Salmo necy ma jadu'n yminañ:

Yi Huindzin Dios nimay iich nHuindzin: “fña' ya a'oy'amy ma iich nmijc, ixti cooni anajty miich mmidzip ti nmimadactäyich, jadu'n nipaadipy nej jihuüy ti nbidägyich miich mmidzip jadu'n nej tüg tinaybejt.”

³⁷ ¿Per nej co yjadu'nity co jäy ajcxy yminaangixy co je Cristo David je' y'ap y'oc? ¿E David ci'm yminañ co je Cristo yi' yHuindzin'ajtpy?

Jotcujc anajty je mayjäy amidoo'ijti Jesús y'ayuc.

Jesús ca'p jäygidaci leyhuindzin ajcxy yhuinma'ñ

³⁸ Jesús yaj'ixpijcpy anajty je mayjäy, e yminañ:

—Naycuend'ajtigix miid yi escribas ajcxy. Com yi escribas ajcxy ooy jotcujc co nayxójxigixy miid yhuít oyjatypi yoñjatypi. Ooy ajcxy tzocy co yajcapxpóxcixipy huindzigi'ñ'amy mayjäyduum.

³⁹ Yi escribas ooy ajcxy tzójjcixy yi cödumbi iñaybejt ma je naymujctac, etz ooy ajcxy tzójjcixy iñaybejt ma yi cömaybi jäy

iñay ma jäy ajcxy yxiiidui. ⁴⁰ Yi escribas ajcxy yajcijxtaayipy yi co'ögy ytöxyjäy ypidägy miid ajcxy y'adzójcín. Yi' ajcxy ooy túngixy jecy tzajpcapxycapxií jigix ajcxy capxpaady idipy. Dios nīgi tzaachytunipy yi escribas ajcxy miid ypocy ycixpi, ca'ydi jac ni pin.

Je ayoobi töxyjäy y'ofrendi

⁴¹ Tüg xii anajty Jesús iñay jiiby tigoty ma Dios ytijc. fñaayb anajty ma je limosna caja huinduu. Jesús yhuindixcyp anajty je jäy ajcxy huidibi meen pidaaccixp ma je ofrenda caja. E maycomeeñyjäy ooy ymeeñ pidaaccixy janch may. ⁴² Tim huin'ítiy yja'ty tüg co'ögy töxyjäy janch ayoob pidacy metz pi'c meeñyhuäcxy, huidibi ca' ooy choobaady. ⁴³ Chi Jesús huoomujcy je' ydiscípulos, e nimay ajcxy:

—Janch tiy'ajt jadu'n nimaaygixy co jada co'ögy ytöxyjäy ayoob jac'anaxy jada ti pidägy ofrenda, ca'ydi jac ni pin. ⁴⁴ Tüg'óciy comeeñdyjc ajcxy ypidacpy ma y'ofrenda yi meen huidibi yajconajxyp. Jadayaabi co'ögytöxyjäy ti pidacy tüg'óciy huidibi anajty ymiid, je meen tüg'óciy huidibi anajty ñigayamy yi' ymooyb Dios.

Jesús ymina'ñ co Dios ytijc yhuindigoopyy

13 Co Jesús ypidzimy ma Dios ytijc, chi nidügti ydiscípulos ñimayi:

—Huindzin, ix jada maychaa mijjatypi etz jada maybi tijc ooy y'oy'oydúñity.

² Per Jesús y'adzooy, yminañ:

—Huindícx miich ajcxy jada maybi mijjaty ytíjc. Miníp tiempo mína tüg'óciy jada tíjc nícx yhuí'my taj xit, ca' ma tzaa macxy. Huindígoydáhuip tüg'óciy.

**Je tíy'ajt ma ca'ni naaxhuíñybi
ycíxa'ñi ytígoya'ñi**

³Jesús miid ydiscípulos ajcxy ñícx ma je cop huídibi xiíjip Olivos. Jim ajcxy colíjxnaxy je Dios ytíjc. Íñaayb anajty Jesús jim copcíxy co Pedro, Jacob, Juan etz Andrés ameech migapxy Jesús, ymínaangíxy:

⁴—Tun may'ajt íich ajcxy yajnímaayg mína jada ytuna'ñyíi yjada'ñyíi co huindígoydáhuip Jerusalén cajp. ¿Tí íjxpejt'adam co anajty jadayaabi jadu'n ytuna'ñyíi yjada'ñyíi?

⁵Chi Jesús y'adzooy ajcxy je' ydiscípulos ymínañ:

—Ix pínjaty xyhuín'íingíxy.

⁶Ooy jáy may ymíinañ miid íich nxíi. Ñaydíjáanígíxy co je' ajcxy je' je Cristo, ymína'na'ñ ajcxy: “Íich je' je Cristo.” E ooy jáy may huín'íinaangíxy.

⁷Co miich ajcxy ayuc mmídohuípy co jáy chachchiptúngíxy xíi ya, ca' mdzígíyígíxy, com ooy ycopícyíty co jada jadu'n jayíjip ytuníyib yjadiíyib. Ca' nan hue' je' anajty tím cíjxp tím tígooyb je xíi je tiempo. ⁸Nayñibidígíib tüg naax cajp miid huingbí naax cajp, e gobierno miid huingbí gobierno. E minípy mic ujx canaag'it etz mij yuu mijpa'm xíi ya. E jáy ajcxy ooy yhuánípy yjihuíhuípy ycanaymíjotcujc'ájtígíxy. Jada tzaachypí ayo'n tzonacní yí' anajty.

⁹Chi Jesús yjacmínañ:

—Nayguend'ájtígíx miich ajcxy, com yí mmídzíp ajcxy xymájtzcíxíp, e xycíy'éjccíxíp ma tungmíidpídíjic, e ychachytúngíxíp xyhuójpíxíp ma yí judíojáy ñaymujctac ajcxy. Xyajnícxíxíp mach ma rey etz ma gobernador ajcxy yhuínduu miid íich ycíxpi com miich ajcxy xymíbicyíich. E miich ajcxy tíy'ajt myegípy miid íich ycíxpi, íxti ma rey ajcxy etz ma gobernador ajcxy yhuínduu. ¹⁰Ca' anajty xíi tiempo paady mína ycíxa'ñ naaxhuíñybi, chí ajcxy capxhuácxtáhuípy íich n'ayuc huíndu'myb ñaaxhuíñ ma tüg'óciy naax cajp. ¹¹Co jáy ajcxy xyajnícxíp mach ma codungdíjic co xytíyúngíxípy, chí ca' ní nej mjot'adíyib, ní ca' mhuínmáyípy nej m'adzóogíxípy. Mgápíxcíxípy je ayuc huídibi Dios xymóoygíxípy, com je ayuc huídibi mgápíxcíxíp, ca' nan miich je' anajty ajcxy m'ayuc. Hue' je' je Espíritu Santo xymóoygíxípy capxy ayuc. ¹²Yéydíjic ajcxy ycíyegamyb ma tungmíidpí ycí'm y'uch ajcxy co huen yaj'ógyíi. E nañ jadu'n je ungedeedy ycíyegamy ycí'm y'ung ajcxy ma tungmíidpí. Nañ jadu'n yí' y'ung ajcxy cíyegípy ycí'mdeedy co huen yaj'ógyíi. ¹³May naaxhuíñjáy ca' xychogípy xyjihuíhuípy miich ajcxy miid íich ycíxpi. Pen miich ajcxy mmíctínaayb ma mmíbíjín, ypaadíp miich ajcxy m'alma nídzooín.

¹⁴Chi Jesús yjacmínañ:

—Co anajty m'íjxcíxy je huídibi Daniel ñímíydac jecy'ajty, co pínjaty jíbic-huíma'ñ tumb ma ca' ypadyíi ma Dios ytíjc,

huidibi ooy ycodzigijity. Miich ajcxy huidibi tzinaayb jim Judea, co jadu'n m'ijxcixipy, chi nicx mgueectzoocix ma tungop. ¹⁵Yi jäy ajcxy huidibi yajpatp ma ytijcnicxy ca' ñáxcity tigoty ma ytijc. E ni ti jiiy cayajpidzimipy. ¹⁶Yi jäy ajcxy huidibi yajpatp camjoty, ca' ajcxy nihuimbidipy je' yjocxy huit huidibi ymiid. ¹⁷Huin'it xii huin'it tiempo ayo'n pada'ñ je töxyjäy huidibi anajty ti y'ungtzimigy, e nañ jadu'n y' ajcxy huidib miid y'ung ma'xung yajtzitzp. ¹⁸May'ajt ajcxy mbijctzoohuipy ma Dios, co jada jadu'mbi ayo'n ca' ytuniyb yjadiyb ma anajty ytiich tiempity. ¹⁹Yi jadu'mbi xii tiempo jäy ajcxy ayo'n tzaachypi minaxipy yajnaxipy. Ni caminaaxii jäy jadu'n tzaachypi mijcajee ti minaxy ti yajnaxy maabi Dios cojy naaxhuiñybi oga'n, ixti chambaad. E caminaxii jadüg'oc ycajadiyb jadu'n. ²⁰Pen ca' Dios capx'aduga'ñ yijiibi ayo'n xii ayo'n tiempo, ca' ni pin chögipy. Per Dios ycapx'adugamyb yijiibi ayo'n tiempo miid je mibijcpidijc ycixpi huidibi Dios ti huin'ixy.

²¹Co yi jadu'mbi xii tiempo anajty ymiin, ca' mmibigipy, pen ji pinjaty xyñimaaygixy: "Ijxcix, cha yajpaady je Cristo", o "jim'amy yajpaady je Cristo." Ca' mmibijccixipy jäy y'ayuc. ²²Minip jäy ajcxy huidibi ñayyajnaxánigixy nej Cristo, e ymináangixipy co capxhuäcxy ajcxy Dios y'ayuc, e ca' yjáncity. Ytunipy ajcxy mij huinma'ñ etz mijpi ijxpejt, ixti jahuin'iina'ñ je mayjäy ajcxy huidibi Dios ti yhuin'ixyii.

²³Nayquend'ajtigix miid yi jadu'mbi

jäy ajcxy, com jayijp iich miich ajcxy yi' ti nyajmiidmiydägy.

Nej jada' je Dios y'ung yminipy jadüg'oc

²⁴Chi Jesús yjacminañ: —Co anajty yi jadu'mbi ayo'n tiempo ti ñaxy, ycoodzihua'ñ etz je po' ca' y'ana'ñ. ²⁵Maymadza' ycähuip, e nañ yücxiy huidijaty mic'ajt miid tzajpjoty. ²⁶Je huin'it xii je huin'it tiempo co jadu'n anajty ytunyii yjadyii, huin'it ajcxy m'ixipy, iich je jäy huidibi tzoon tzajpjoty, co iich anajty nmiiñich jocjoty miid tüg'óciy nmic'ajt n'oy'ajtich. ²⁷Co jadu'n anajty nmiiñich, chi mic'amy nguexipyich iich n'ángeles ajcxy ma xii ypidzimy, ma xii ycidägy, ma jiiimboj ypidzimy etz ma tichpoj ypidzimy. N'ángeles ajcxy yajmuga'ñ tüg'óciy iich njäy, huidibi ti nhuin'ixyich, xim yam ma ajcxy yajpaady ya naaxhuiñ, etz jiiy tzajpjoty.

²⁸Chi Jesús yjacminañ: —Jëb miich ajcxy tiy'ajt mbigipy ma yi higuere jadu'n nej je xii je tiempo mimb cidaacni. Co je higuere jadüg'oc ñihuamiy, chi miich ajcxy mnejhuüy co ti yhuingoni mina ypottigiiñi. ²⁹Nañ tim jadu'n co m'ixipy tuniyyb yjadiyb tüg'óciy ijxpejt nej ti nnimaaygixy, chi mnejhuihuip co ti yhuingoni je tiempo mina nhuimbidipyich jadüg'oc ya naaxhuiñybi. ³⁰Janch iich miich ajcxy nimäy co jada huidibi ti nnimiydacyich tuniib jadiib ca'ni anajty y'öctay je jäy ajcxy huidibi jacjugy'ajtp jadachambi

xii jadachambi tiempo. ³¹Je tzajp etz je naaxhuiñybi cixipy tigoyipy. Hich n'ayuc huidibi ngapxyich, ca' ycixipy ytigoyipy ni caminaxii. ³²Ca' ni pin nejhuüy je xii je tiempo mina ytuna'ñyii yjada'ñyii jadu'n nej ti hich miich ajcxy nnimaaygixy. Ni je ángeles ajcxy jiiby tzajpjoty ca' nejhuüygixy, nañ ni hich, Dios y'ung', ca' nejhuüyich. Jëyi Dios Teedy tügpajc nejhuüy.

³³Ni'ixi' ahujxcix. Mibijctzoogix Dios jabom jabom, com ca' mnejhuüygixy mina anajty ytuna'ñyii yjada'ñyii yi huidibi ti nyajniimaaygixy. ³⁴Yi xii yi tiempo huidibi minip jadu'n nipaady nej tüg comeeñyjäy huidibi ñicxa'ñ ma tüg it lugar huidibi jigüegy yajpatp. Jayjip ca'ni anajty chooñ, chi yajnibijcy je ytumbi ajcxy nidüg nidüg je' ytung. E nimay je' ytumbi huidibi cuend'ajtp je tijc'aguu co huen ni'ixi' y'idipy ma tijc'aguu. ³⁵Ni'ixi' m'idipy miich ajcxy. Com ca' mnejhuüygixy mina je codijc yhuimbida'ñ ma ytijc, pen namgodzïy, o mij coodz, o moñi, o ma anajty ti yxiimiñi. ³⁶Ca' jécyity co yjadipy timetiini, e xyajyöybéjtcixipy anajty mdzachmaagixy. ³⁷Yi huidibi hich miich ajcxy ti nyajniimaaygixy, nañ jadu'n nimäyich tüg'óciy jäy co huen ajcxy nidüg'óciy ahujxcixip ni'ixi' je xii je tiempo mina nhuimbidipich jadüg'oc ya naaxhuiñ.

**Xicmujccixy capxmujccixy
co Jesús madzaangixy**

14 Tigoy'ijtni anajty mejtz xii co judfojäy ajcxy

nixiiduna'ñ je pascua xii, mina ajcxy tzajcaagy cay huidibi ca' levadura miidity. Je judío teedy ajcxy huidibi jacmijtungmiid etz je escribas ajcxy huinma'ñ'ixtaaygixy nej jëb ameech májtzcixipy Jesús, e yaj'ógaangixy, ca'ydi je mayjäy nejhuüy. ²Chi ajcxy ñayñimayi miñ xyipy:

—Ca' y'óyity co nmájtzim Jesús xijoty. Com ca' yjécyity co je mayjäy yjotmätcottähuipy, e ytigihuip huambi jihuiiyb ajcxy.

**Tüg töxyjäy pidacy aceite
ma Jesús ycohuajc**

³E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ymiid nibüdz pa'm. Jesús iñaayb anajty ma caydac co ymiñ tüg töxyjäy miid tüg tzaadüdz quiig ujtz miid perfume huidibi ooy oy yxuugy. Jada perfume ooy anajty chóohuity. Chi je töxyjäy yaj'ahuäch je quiig, e yajcöyogiy Jesús je perfume huidibi ooy oy yxuugy. ⁴E nijëjity jäy ajcxy huidibi anajty jim, ca' anajty ajcxy yjotcúcity miid huidibi je töxyjäy ti tuñ, e ñayñimayi ajcxy miñ xyipy:

—¿Nej jada co ocyaj'ayooni yi perfume huidibi ooy oy yxuugy?

⁵Jac'oy co ixipy yajtoogy yi perfume tugiig mig'opx peexy, jigix yajpuredipy ayoojtijc.

E ca' jadu'n ajcxy tim jäygidacy nej je töxyjäy ytuuñ miid Jesús, chi ix'ojoy ajcxy je töxyjäy ayooob.

⁶Chi Jesús yminañ:

—Ixmajtcix jada töxyjäy. ¿Nej co m'amayiygixy? Yi huidibi ti tuñ miid hich, ooy yi' y'óyity.

⁷Je ayoohtjic ca' ytigoy'idipy ma miich ajcxy nimina. Huen huidibi xii huen huidibi tiempo jëb mbubedip ajcxy ayoohtjic. Per iich ca' n'ida'nich ya jecy miid miich ajcxy. ⁸Jada töxyjäy ti tuñ miid iich jadu'n nej ti ymadägy. Yi' ti pidägy ma iich nninix perfume huidibi ooy oy yxuogy. Yi' jijp'ijxpy mina naaxtigihua'nich. ⁹Janch iich miich ajcxy nimaaygixy co huen yma'amyity ya naaxhuiñ ma anajty yaj'iihuäcxy yajcapxhuäcxy jada ayuc jada tiy'ajt huidibi nidzoocin miid, yajnimiydägyipy huidi jada töxyjäy ti tuñ, jigix capxpaady y'idipy.

Judas cïyecy yi Jesús ma ymidzip

¹⁰Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy miid ñaygapxyii je teedy mijtungmiidpi nej jëb cïyecy Jesús ma yi teedy ajcxy. ¹¹Co je teedy mijtungmiidpi ajcxy jadu'n midoy, co je Judas cïyega'n Jesús ma yi' ajcxy, chi ajcxy ooy yjotcugiiy. Chi ajcxy Judas meñ yajhuinhuaniiy. Chi Judas yhuinma'n'ixtay nej jëb occïyecy Jesús ma yi' ajcxy.

Co Jesús y'adzu'ajty pascua xiijoty

¹²Chi paty je mij xii mina je xii'ajtpidijc tzajcaagy cay huidibi ca'p levadura miidity, e yaj'öccixy je cöbixy huidibi ajcxy yajhuindzigiiy anajty Dios. Chi ydiscípulos ajcxy y'amidooy Jesús: —¿Ma'amy mdzocy co ni'ixiiyim je pascua xii adzu'ajtín?

¹³Chi Jesús quejxy metz ydiscípulos ajcxy cajpjoty, chi nimay:

—Jim miid mnaybadiiyb tüg yëydijc huidibi nii tzimnicxp ma tüg majt. Miich ajcxy mbanicxiyib je yëydijc. ¹⁴Mbanicxipy ajcxy je yëydijc, ixti coon mbajädipy ma ytijc. E miich ajcxy mnimähuipy je codijc: “Je Huindzin Jesús ñejhuñhuam ma miich miidity tüg cuarto ma je Huindzin Jesús miid ydiscípulos ajcxy jëb caaygixy yi pascua xii adzu'ajtín.” ¹⁵Je codijc ci'm xyajni'ixiiygixyiy tüg cuarto mijpi ma je mimetz piso huidibi ti yajni'ixiy. Ma yijimbi cuarto miich ajcxy mni'ixiihuipy yi pascua xii adzu'ajtín.

¹⁶Chi je metz Jesús ydiscípulos ajcxy tüyöychooñ. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp yminañ. E jim ajcxy ni'ixiy je pascua xii adzu'ibi.

¹⁷Nam coodziiyñi anajty co Jesús yja'ty ma je cuarto miid jacjadyii ydiscípulos ajcxy. ¹⁸Co anajty jim ycaaygixy ma je caydac, chi Jesús yminañ:

—Janch iich miich ajcxy nimay co nidüg miich ajcxy huidibi cham caayb miid iich, xycïyegaambich ma nmidzipich.

¹⁹Co je Jesús ydiscípulos jadu'n midooy, chi ooy ytigiiy tajpi maybi ajcxy, e ñay'amidóohuigixy miñ xyipy, e tüg yminañ:

—¿Nej iich jada'ji?

E jadüg yminañ:

—¿Nej iich jada'ji?

²⁰Chi Jesús yminañ:

—Yi' yi' nidügti yi nimajmetzpi huidibi tocxmujcp miid iich ma tügpí texy. ²¹Pues janch iich je', je jäy huidibi tzoön tzajpjoty,

nbadaamybich tzaachypi ayo'n jadu'n nej yjaybétyity ma yi Dios ñecy. Per mij ayo'n pada'ñ je jäy huidibi xyciyeagaamich ma iich nmidzip. Jac'oy co ca' ycadimma'xung'ajty jada yëydijc.

²²Caayb ajcxy anajty, co Jesús conigý tüg tzajcaagy, e jayijp yajnax Dioscojuyip ma Dios, e chi tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chi yminañ:

—Caaygix jada tzajcaagy. Jada tzajcaagy iich jada nninixc.

²³Chi Jesús conigý je ügy vaso, e co Dioscojuyip yajnaxy, chi moyday ajcxy je ügy, e nidüg'óciy ajcxy uucy je ügy. ²⁴Chi Jesús yminañ:

—Jada ügy iich nni'py'ajtpy huidibi temamb yogamb. Je' jada jemybi Dios ycötújcin huidibi Dios yejc miid jäy ajcxy ycixpi.

²⁵Janch tiy'ajt jadu'n nej iich miich ajcxy nimaaygixy, co ca' jadüg'oc n'üga'ñich vino nii, ixti cooni anajty njädyich tzajpjoty ma yi Dios y'ane'my.

Jesús capxidzimy co Pedro ymina'na'ñ co ca' y'ixy'adyii

²⁶E co Jesús etz ydiscípulos ajcxy iiy tüg himno, chi ñicxy ajcxy ma je cop huidibi xiijp Olivos. ²⁷Chi Jesús yminañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n yminañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuip.” ²⁸Per co iich anajty njugypícyich jadüg'oc, co iich anajty ti n'ögyich, nícxibich

jim Galilea jacjayijp, ca'ydi miich ajcxy.

²⁹Chi Pedro Jesús nimaayi: —Oy ixypy yi jacjadyii miich mdiscípulos ajcxy xycöguetäy, per iich ca' miich ngöguëga'ñ.

³⁰Per Jesús nimay Pedro: —Janch tiy'ajt jadu'n nej yam nimäy, jadachambi coodz ma ca'ni anajty tzeyyaxigý mejtz'oc miich xycoyüda'ñich tugiig'oc, mina'na'ñ co miich ca' xy'ixy'adyiijich.

³¹E Pedro ca' anajty cöbiga'ñ nej Jesús yminañ, chi mictägy minañ:

—Ca' iich miich ngoyüda'ñ, oy ixypy ndim'o'cich quipxy miid miich.

E nañ actim jadu'n jacjadyii Jesús ydiscípulos ajcxy yminañ nej Pedro ti yminañ.

Jesús mibijctzoy Dios jim Getsemaní

³²Jesús miid ydiscípulos ajcxy oyja'ty ma tüg it huidibi xíijp Getsemaní, chi Jesús je ydiscípulos ajcxy nimay:

—Iña' miich ajcxy ya, nami n'ocnicxyich jim'amy Dios mibijctzoob.

³³Chi Jesús miid nicxy jëda'ajty Pedro, Jacobo etz Juan ma tüg it ahuingujc. Chi Jesús ytigiüy tajpi maybi jihuiiy jotmay. ³⁴Chi Jesús yminañ:

—Njihuiybich tüg jotmay nej n'öga'ñich. Huí'mgix miich ajcxy ya etz juugy m'íjtcixipy, ca' mmáagixipy.

³⁵Chi Jesús ñicxy jac'amijci'm, Dios mibijctzoy, e may'ajt pijctzoy co ixypy ca' minaxy yajnaxy je tzaachypi huidi anajty ypadamy je

huin'it hora. ³⁶E Jesús anajty Dios mibijctzoy ymina'ñ:

—Dios, miid miich ca' ni ti chípity. Píjicgich jadyaabi tzaachypi ayo'n, per ca' yjadú'nity nej iich ndzójcin, huen tuñyii jadu'n nej miich mdzójcin.

³⁷Co Jesús nihuimbijty Pedro, Juan, etz Jacobo, chi oy ajcxy paady ti anajty ymi'ó'ccixy. Chi Jesús Pedro nimay:

—Simón, ¿nej ti mmi'ógy? ¿Nej ca' mmadaga'ñ m'idipy juugy tüg hora? ³⁸Jugy'íjtcix, e mibijctzoogix Dios ca'ydi jibictuuyb mdigíygixy. Janch tiy'ajt co jotjoty ooy mnijot'ájtixy mdunaangixy yi oybi. Per yi mninícx oy amaayity.

³⁹Chi Jesús jadüg'oc huinhuäctuity je' ydiscípulos ajcxy, e jadüg'oc ñicxy Dios mibijctzoob. May'ajt píjctzoy tim jadu'n nej je jayíjp'atypi anajty ti ymina'ñ. ⁴⁰Chi Jesús yhuimbijty ma anajty ajcxy ydiscípulos yajpaady, e jadüg'oc oy pátcixy ti anajty ymi'ó'ccixy, com ca' ajcxy mimadägy máhuüi, e ni ca' ajcxy jajty nej adzohuípy Jesús. ⁴¹Midugiig'oc Jesús ñicxy ma je' ydiscípulos ajcxy, e ymina'ñ:

—¿Nej ya mjacmäagixp mjacpooxcixp? Maagix pooxcix jadachambi. Ti miid jadu'ñyi. Ti je tiempo huaad'ájtmi mina iich, je jäy huidibi tzoon tzajpjoty, xycíyegípy ajcxy ma yi jibic jäydíjc. ⁴²Maybidígcix, tzoc jámim. Chi ymiñ je jäy huidibi xycíyegaambich ma nmídzípich.

Mach ajcxy Jesús yajníxcixy

⁴³Capxp anajty Jesús, co Judas oyjäty ma Jesús yajpaady. Judas

hue' je' nidügti je majmetzpi huidibi Jesús yhuin'íjx. Judas miid miiñ mayjäy huidibi ajcxy miid pujx etz quipy. Je teedy mijtungmiidpi, je escribas ajcxy, etz je mijjäydíjc ajcxy ti anajty quexy je mayjäy huidibi anajty madzamb Jesús. ⁴⁴Judas, je huidibi anajty cíyegamb Jesús, hue' anajty jayíjp ti moy je mayjäy tüg íjxpejt huidibi miid jéb ajcxy íjxcabip Jesús.

Jadu'n jayíjp Judas ycapxytuñ miid yi' ajcxy, e ymina'ñ:

—Je jäy huidibi anajty ndzücxypich, yi' je' anajty Jesús. Madzípy ajcxy, e myajnícxip miich ajcxy yajxon cuend'aty.

⁴⁵Mic'amy co Judas oyjädy ma Jesús yajpaady, chi nimíjhua'cy, e nimay:

—Huindzin, Huindzin.

E co jadu'n ymina'ñ, chi Judas Jesús tzücx. ⁴⁶Chi mic'amy je mayjäy Jesús mach, e yajnicxy ajcxy mach.

⁴⁷Per nidügti Jesús ydiscípulos juudy ypujxy ma ytíjc, chi je teedy mijtungmiidpi tüg ytumbi yajtzaachíyi, quejtzpujxi tüg ytätzac. ⁴⁸Chi Jesús je mayjäy nimay:

—¿Ti co miich ajcxy xyñimiñich miid pujx etz quipy, jadu'n nej jihuüy iich tüg meetzpi? ⁴⁹Jabom jabom nyaj'ixpíjcyich jäy jiiby ma Dios ytíjc ma miich ajcxy myajpaady, e ni ca' miich ajcxy xymajchich. Paady jadu'n ytunyüi yjadyüi jigix yi' yajcuydumb nej ity jaybety ma Dios ñecy.

⁵⁰Chi je' ydiscípulos ajcxy yajhui'my Jesús naydügpajc. Chi je' ajcxy yqueegy.

Je jäy mutz'anägnip huidibi quectzög

⁵¹Per tüg yujcyeeg anäg huidibi anajty payöy Jesús nímóchity anajty miid tüg sávana. Chi Jesús ymidzip ajcxy majch je yujcyeegpi.

⁵²Chi je yujcyeegpi ciqueegtuty je mayjäy, yajhui'my ysábana, e yquceyztögy nihuädz ixhuädz.

Jesús mij juntijoty

⁵³Chi ajcxy yajnicxy Jesús mach ma je teedy mijtungmiidpi yajpaady. Chi mic'amy ñaymujci tüg'óciy teedy ajcxy huidibi mijtungmiidip, e tüg'óciy mijjäydijc, etz tüg'óciy escribas ajcxy. ⁵⁴Chi Pedro jigüegy anajty panicxy je mayjäy ajcxy ixti oy yja'ty ma je teedy mijtungmiidpi ytiba'. E jim ixtacy quipxy miid policia ajcxy agujc, yxaamgixy anajty ma jänba'.

⁵⁵Je teedy ajcxy mijtungmiidpi etz tüg'óciy je judíojäy ytungmiidpi ajcxy yhuinma'n'ixtaaygixy nej ajcxy jëb Jesús yajpocya' miid ajcxy yxihuin, e jadu'n jëb mooygixy yi öcin. Per ca' ajcxy paady huinma'n. ⁵⁶Mayjäy nihuambejty Jesús miid anii, e ca' ajcxy y'ayuc ytügiy. ⁵⁷Nijëjity jäy ytinayigy juntajoty, e nihuambety ajcxy Jesús, yminaangixy:

⁵⁸—Hich ajcxy amido'ijty Jesús y'ayuc tüg teczy, co jadu'n yminañ: “Njidaamybich jada Dios ytijc huidibi jäy ti cójcixy, e codugiig xii gojtigadzich huingbi huidibi ca' jäy cojy.”

⁵⁹Per ni ca' ytügiy ajcxy y'ayuc nej ajcxy Jesús nihuambejty, ac tigachjaty nidüg nidüg yminañ ajcxy.

⁶⁰Chi je teedy huidibi je jacmijtungmiid ytinayigy juntajoty, chi y'amidooy Jesús e nimay:

—Jesús, ¿ca' nej m'adzohua'ñiy? ¿Ca' mmidooy nej xychachxigixy?

⁶¹Per Jesús amoñ y'ijty. Ca' ti ayuc adzohuimbijty. Chi je teedy jadüg'oc migapxy Jesús nimay: —¿Nej miich je' je Cristo, je Dios y'ung?

⁶²Chi Jesús yminañ:

—Janch jadu'n, iich je' je Cristo, je jäy huidibi tzoon tzajpjoty, e miich ajcxy xy'ixipich iñäyich ma je mijpi Dios ymijc a'oy'amy. Nañ jadu'n xy'ixipyich miich ajcxy jocjoty co anajty nhuimbityich jadüg'oc ya naaxhuiñ.

⁶³Chi je teedy huindzech huinhuocy yci'm yhuít, je' je' tiy'ájtíp co ca' anajty yjotcúcity miid Jesús y'ayuc, chi yminañ:

—¿Ti testigo njac-huaanim?

⁶⁴Miich ajcxy ci'm ti mmidoogixy yi' y'ayuc, jadu'n nej ycapxtigoy miid Dios. ¿Nej miich ajcxy minaangixy?

Chi nidüg'óciy ajcxy yminañ co janch jadu'n Jesús mij oy ti ycapxtigoy miid Dios ytiy'ajt, paady huaad mooygixy yi o'cin.

⁶⁵Chi nijëjity jäy yhuindzujigy Jesús. Chi ajcxy huingoxodziy, cójxcixy, e chi ajcxy nimay:

—Octiygapx. ¿Pin ti xycojxy?

E je policiatijc ajcxy cojxy Jesús ma yhuiniyjijp.

Pedro ycoyüch Jesús

⁶⁶Pedro tibäy anajty y'ahuixy. Chi ñimijhuäci tüg tumbi töxyjäybi huidibi anajty tumb ma je teedy ytijc. ⁶⁷Co je töxyjäy ijxpaty Pedro

ĩñäy anajty jĩnba'áy, yxaamb anajty. Chi huindicxpejty Pedro, e nĩmay:

—Miich nañ miidhuidijtpy anajty je Jesús yi Nazaretpi.

⁶⁸Per Pedro ca' cõbĩjcy je tõxyjäy y'ayuc, e ymĩnañ:

—Ca' n'ixy'adyiijich jada Jesús. Ni ca' nhuinjihuĩyich ti miich nĩmĩydacpy.

E mic'amy Pedro ypidzĩmy jiĩby, e tim huin'itĩy tũg tzeyñi'aa oy yaaxĩgy. ⁶⁹Chi jadũg'oc je tumbi tõxyjäybi huindicxpejty Pedro, e nĩmay je jäy ajcxy huĩdibi jĩm yajpatp huĩgon, e ymĩnañ:

—Jada je' nidũgti huĩdi anajty miid huĩdity Jesús.

⁷⁰Chi Pedro jadũg'oc ymĩnañ co ca' ix'adyii. Co hueeñi, je jäy ajcxy jadũg'oc Pedro nĩmay:

—Janch co miich je' nidũgti ma Jesús yjäy miñ, Galileo jäy miich, com nmidooybich miich m'ayuc nej Galileo jäy ycápxcixy.

⁷¹Co ajcxy jadu'n ymĩnañ, chi Pedro mictägy ñaygogapxi co ca' yi' miidhuidity Jesús, ymĩnañ:

—Dios y'ijxpy ñejhuĩyib co tiy'ajt ngapxyich, co ca' n'ixy'adyiijich yi Jesús huĩdibi miich ajcxy mnĩgapxyp.

⁷²Co Pedro ycapxymaayi tim huin'itĩy tũg tzeyñi'aa yaaxĩgy mĩmejtz'ocpi. Huin'it Pedro jäymetzcoody nej Jesús ñĩmāyii: “Cham coodz jayĩjp ca'ni anajty tzeyñi'aa yaaxĩgy metz'oc, ti anajty miich mĩnañ tugiĩg'oc co ca' xy'ix'adyiijich.” Co Pedro jadu'n jäymejtzcoody Jesús y'ayuc, chi tajy may ñayjihuiiyi, e ytiĩgy yaaxpi.

Jesús ma Pilato yhuĩnduu

15 Co yximĩy, chi je teedy ajcxy huĩdibi mij tung miid, je mijjäydiyc, je escribas ajcxy, etz tũg'õciy judĩõjāy huĩdibi mij tung miid yõymujctay ajcxy. Chi nidũg'õciy ajcxy yajñcxcixy Jesús cĩxoch ma Pilato, je gobernador. ²Pilato Jesús y'amĩdooy, nĩmay: —¿Nej miich rey'ajtp ma yi judĩõjāy ajcxy?

Chi Jesús ymĩnañ:

—Miich jadu'n mĩnamb.

³Je judĩõ teedy ajcxy huĩdibi mijtungmiidpi mictägy tzachxĩgixy Jesús miid canagnax xĩhuin. ⁴Chi Pilato jadũg'oc Jesús y'amĩdooy, nĩmay:

—¿Ca' nej m'adzohua'ñi? Ix nej yi mmĩdzip ajcxy xychachxĩgixy.

⁵Chi Jesús ca' ni nej y'adzooy. E Pilato ooy chachhuĩmay'ahuĩdijty.

Jesús yajmoy ysentencia co y'õgipy

⁶Com xĩjoty anajty, je gobernador Pilato najtzmazĩy tũg machyjäy, je huĩdibi je mayjäy anajty ypijctzoogixyp. ⁷Pujxtĩc iñāayb anajty jĩm Jerusalén tũg machyjäy huĩdibi anajty yxii Barrabás. Barrabás pujxtĩc iñāayb anajty quipxy miid jacjadyii jäy huĩdibi anajty ti midziptzoon je gobierno romano, e ti anajty yjäyyaj'õccixy. ⁸⁻⁹Co anajty je may yxii'ajtpidĩc may'ajt pijctzoogixy ma Pilato co najtzmazĩhuip tũg machyjäy, chi Pilato ymĩnañ:

—¿Nej mdzojccixyp co nnajtzmazĩhuibich je judĩõjāy ajcxy yrey?

¹⁰Pilato ñejhuiyb anajty co mañ'ajtingíxy anajty ajcxy je teedy mǎitungmǎidpi ti cǎyecǎixy Jesús.

¹¹Per co Pilato jadu'n ymǎnañ, chi je teedy ajcxy mǎitungmǎidpi ooy ajcxy yajhuamgoty yajjihuiygoty je mayjǎy co huen je Pilato najtzmazǎy je Barrabás.

¹²Chi Pilato y'amidooy je mayjǎy jadüg'oc:

—¿Nej miich ajcxy mdzocy ndunipyich miid jada yǎyǎjyc huidibi jǎy ajcxy ytǎjpy co yrey'aty ma ya judíoǎy ajcxy?

¹³Chi je mayjǎy mic yminangottay:

—Yajcruutzpet.

¹⁴Chi Pilato ymǎnañ:

—Per ¿ti yi' ti tundǎyoy?

Huin'it je mayjǎy ñǎgi mic ymǎnañ:

—iYajcruutzpet!

¹⁵Co jadu'n je mayjǎy ajcxy mǎictǎy yminanday, chi Pilato anajty yajjotcujc'adaangǎxy je mayjǎy, chi najtzmazǎy je Barrabás. E co yajcǎ'ajttay yi Jesús, chi cǎyecnǎ co huen yajcruutzpedyii.

¹⁶Chi je soldados ajcxy yajnicxy Jesús ma je agujtǎjyc tǎba', e jim ñaymujci tǎg'óciy soldados ajcxy huidibi yajpatp anajty jim Jerusalén. ¹⁷Chi ajcxy yajnijeniǎy je Jesús tǎg rey yhuit, color ucypǎ e yajcojeniǎy ajcxy apy corona. ¹⁸Chi je soldados ajcxy ymǎnañ:

—iViva jada judío rey!

¹⁹Chi je soldados ajcxy huojpy Jesús ma ycohuajc miid paxy, e huindzuj jǎjptzujcǎxy ooy, e huingoxtǎnay'ahuiǎygǎxy janch ypaad nej jihuiy ooy huindzǎgiǎygǎxy. ²⁰Co je soldados

ajcxy nǎxiictay yajxiictay Jesús, chi ajcxy jeeni je yreyhuit color ucypǎ, e yajnijeniǎy ajcxy ycǎ'm yhuit jadüg'oc. Chi ajcxy Jesús miidcǎjppidzimy co anajty yajcruutzpedaangǎxy.

Co Jesús yajcruutzpejti

²¹Tǎ'am ajcxy tǎg jǎy miidnaybati, hue' anajty yxii, Simón, ycogǎjpy jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip ñimay Simón co huen jaccǎjpi Jesús ycruudz.

²²Chi ajcxy yajnicxy Jesús ma tǎg it lugar huidibi yxii Gólgota, je ayuc Gólgota jadu'n yhuimbǎdzimy o'cǎpi cohuajc. ²³Chi ajcxy moy Jesús vino huen ügy tem huidity miid mirra tzoy. Per ca' Jesús cǎbǎjcy je vino ñii. ²⁴Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuit yajhuǎcxaani, oc'ixaangǎxy pin anajty ocjé'ǎjtip.

²⁵Petyxii anajty co ajcxy yajcruutzpejty Jesús. ²⁶Je ayuc huidibi ajcxy yjaay ma Jesús cruudz, jadu'n ymǎnañ:

—Je judíoǎy ajcxy yRey. ²⁷Quipxy miid Jesús ajcxy yajcruutzpejty metz meetzpi. Tǎg meetzpi ajcxy yajcruutzpejty a'oy'amy ma Jesús ymǎjyc, e jadüg anajty'amy. ²⁸Yajcuyduñ nej anajty jaybety miñ ma Dios ñecy, ma jadu'n ymǎnañ: “Yaj'amichoomujc je Cristo miid je pocyjǎy ajcxy.”

²⁹⁻³⁰Je mayjǎy huidibi ajcxy nǎxiǎy anajty ma Jesús yajpaady cruutzcǎxy, ooy anajty ajcxy ycǎjǎgiǎyñ, nǎxiicy yajxiicy ajcxy Jesús, ymǎnañ ajcxy:

—Bah, miich huidibi Dios ytiċe mjidaanip, e codugiig xii huingbi myajpidiġa'ñ, miich ci'm cham naygohuaani, e minac cruutzcixy.

³¹⁻³²Nañ jadu'n je teedy ajcxy mġitungmiidpi etz je escribas ajcxy niixiicy yajxiicy ajcxy Jesús ñayñimayi miñ xyipy:

—Jada Jesús ti cohua'ñ jacyadyii jāy, e ca' jaty nej ci'm ñaygohua'niyb. Pen janch, co jada Jesús yjġity je Cristo huidibi rey'adamb ma yi judíoġāy ajcxy, ymiid ixypy mi'ajt jaydċb ci'm yminagipy cruutzcixy. Co jadu'n ixypy n'ġixim co ci'm ti yminacy cruutzcixy, huin'lit mibġcim co janch jada jġity je Cristo huidibi rey'ajtp ma yi Israel jāy.

Nañ jadu'n je metz meetzpi ajcxy huidibi cruutzpejt quipxy miid Jesús niixiicy yajxiicy ajcxy je Jesús.

Co Jesús y'ögy

³³Co ycuġcxiiġiiy, chi ycoodziygiday tüġ'óciy naaxhuiñ. E jadu'n je naaxhuiñ y'ġity coodz ixti minacyxii. ³⁴Minacyxii Jesús mic yminañ miid aramaico ayuc:

—Eloi, Eloi, ħlama sabactani? —yi jadu'mbi ayuc hue' yhuimbizimy: Tat Dios. Tat Dios. ħNa'amy co ti xy'ix'ixyich?

³⁵Niġġity jāy huidibi anajty ġim yajpatp huington ma Jesús, co midoo jadu'n ajcxy Jesús y'ayuc, chi ajcxy yminañ:

—Midoogix, Elías yi' yaaxtaayb.

³⁶Chi nidüġti ajcxy ninicxy Jesús poġyġy, ti anajty yajxoogy pixy miid vinonii ta'mbi, e yajġixpodziġy je pixy ma tüġ paxy, e jadu'n yajja'ty je vino nii ta'mbi ma Jesús y'ahuac,

huen muucip je vino nii ta'mbi. Co jadu'n tuñ, chi yminañ:

—Tzoc oc'ahuġxim pen mimb Elías, e miñ yajminagyii ma yi cruudz.

³⁷Chi Jesús mic ycapxqueegy, chi y'o'cy. ³⁸Co Jesús y'o'cy, chi je mapxhuit yciitzhua'cxy tinä'amy huidibi anajty miid y'adiydütyity je Dios ycuarto ma je teedy mġitungmiidpi ytiġy tüġ tecypajc ġimġt ġimġt. ³⁹Je soldado huindzin huidibi anajty tinaayb ma Jesús yhuinduu, co jadu'n midoy nej Jesús mic yaaxqueegy, e iġy nej y'ögy, chi yminañ:

—Janch co jadayaabi yġdyġc anajty Dios ung'adyii.

⁴⁰Nañ ġim anajty niġġity töxyjādyġc ymiġ'ġxcixy ġiġuġy. ġim anajty yajpaady María Magdalena, etz je jadüġpi María, Jacobo je mutz'anāġnip ytaj, etz José ytaj. Nañ ġim anajty yajpaady Salomé. ⁴¹Jadayaabi töxyjāy ajcxy miidhuidijt Jesús, e ti anajty pubġtciy taabi anajty Jesús yajpaady ġim Galilea ñaaxjot. Nañ jadu'n anajty ġim yajpaady jacnaagity töxyjādyġc ajcxy huidibi anajty ti ycoody ġim Jerusalén quipxy miid Jesús.

Jesús yajnaaxtiġyii

⁴²⁻⁴³Paady co chu'ġiinyi hue' anajty viernes mina judíoġāy ñayyajpocyñihuātzigixy, jaydċb anajty amay'adaangixy je sábado xii je com jabom. Chi José huidibi anajty cogajp Arimatea yjotmictuñ, chi ytigiġy ma je gobernador Pilato, piġtzooy may'ajt co yajnaaxtiġiġhuaani Jesús ñinicx. E

hue' je' José anajty tungmiid ma yi judíoꝝajy ajcxy. José yijp'ijxpy anajty mina Dios pidäga'n̄ yi' y'ané'min ya naaxhuiñ. ⁴⁴Pilato ooy tzachhuinmay co Jesús tim mic'amy ti y'ögy anajty, paady huodzoꝝy je soldado huindzin, e tiy'ajt pijctzoꝝy pen janch co Jesús ti anajty y'ögy. ⁴⁵Co je soldado huindzin tiy'ajt yejcy co Jesús ti anajty y'ögy, chi nimay José co huen yajnaxtigihuiꝝpy Jesús. ⁴⁶Chi José juy poob huit, e co yajminajcy Jesús ñin̄icx, chi mo'n̄ miid je poob huit, e chi pidacy ma tüg tzaajut huidibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut miid tüg mij tzaa. ⁴⁷E je metzpi töxyjäy María Magdalena etz je jadüꝝpi María huidibi José ytaj'ajtpy huindiicxp anajty ajcxy co Jesús ñaaxtigiiy.

Jesús yjugypijcy jadüꝝoc

16 Com jabom jopy, domingo, chi je tugiiꝝ töxyjäy ajcxy María Magdalena, María Jacobo ytaj etz Salomé juy ajcxy tzoꝝy huidibi ooy oy xuugy, pidägaangixy anajty ma Jesús ñin̄icx. ²Je tugiiꝝpi töxyjäy chooñ domingo, semaan ixtigi', tim jopyñi. Ti anajty ypidzimni je xii co ajcxy oyjädy ma je öcpi jut. ³Chi je tugiiꝝpi töxyjäy ajcxy nayñimaayi miñ xyipy: —¿Pin xy'ocpubéjtim jigihuiꝝpy je mij tzaa huidibi miid agiiyitye je öcpi jut?

⁴Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiguejcnäy huidibi je öcpi jut anajty agiiydujcp. ⁵Chi ajcxy ytiigiiy jutjoty. E chi ajcxy ijxy tüg

yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymiid. Co ajcxy jadu'n̄ ijxy je yeeg'anäg jiiꝝy jutjoty, chi je töxyjäy ajcxy ooy chigiiy. ⁶Chi je yeeg'anäg nimay je töxyjäy ajcxy:

—Ca' ooy mdzigiiygixy. Miich ajcxy je' m'ijxtaaygixp je Jesús huidibi cogajp Nazaret, je huidibi jäy ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci. ⁷Ñicxcix, nimaaygix Pedro etz yi jacjadyii Jesús ydiscípulos ajcxy co Jesús ñicxp jayijp jim Galilea, e jim Galilea ñaybadiiyb ajcxy miid Jesús, jadu'n̄ nej ajcxy ñimaayi jayijp'aty.

⁸Chi je töxyjäy ajcxy jim yqueegy ma je öcpi jut, com ti anajty ooy chigiiygixy. Ooy anajty ajcxy chiꝝyuy miid tzig'iñ. E ni ca' ajcxy nimay ni pin nej anajty ti ijxcixy, com ooy anajty chigiiygixy.

Jesús ñaygue'xici ma María Magdalena

⁹Je domingo, semana ixtigi', co Jesús yjugypicy, chi ñayguëxici jayijp ma María Magdalena, je' je' je töxyjäy huidibi anajty Jesús ti yajpidzimi huixtujc ca'oybi ma yjot yhuinma'n̄. ¹⁰Chi María Magdalena ñicxy ma Jesús ydiscípulos ajcxy huidibi miid yhuidiꝝty, e nimaaygixy nej anajty yi' ti ixy Jesús co ti yjugypicy jadüꝝoc. E Jesús ydiscípulos ajcxy ooy anajty ytajycixy ymáygixy etz yaaxcixy. ¹¹E co ajcxy midoohui je María y'ayuc, co anajty ti ixy Jesús juugy, chi ca' ajcxy mijpidaacci y'ayuc.

Jesús nayguëxici ma metz ydiscípulos

¹²Co hueñi, Jesús ñayguëxici nañ jadu'n̄ ma metz je' ydiscípulos

huidibi ñicxp anajty ajcxy camjoty.

¹³Chi je metzpi discípulos ñicxy ajcxy mic'amy oy nimaaygixy je jacjadyii discípulos ajcxy co ti íjxcixy Jesús. E je jacjadyii discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajnībījc

¹⁴Jac com jecy, Jesús ñayguēxīci ma je majctūgpi discípulos ajcxy ma anajty y'īñaaygixy ma caydac. Chi Jesús ogy ajcxy co ca' ajcxy mībījccixy co ooy ajcxy yjot yjuuñity, ca' ajcxy mijpidāgy jacjadyii pīn anajty ti y'íjxcixy Jesús. ¹⁵Jesús je' ydiscípulos ajcxy nīmay:

—Ñīxcīx mīich ajcxy ma tūg'óciy naaxhuīñyājy, ma tūg'óciy naax cāj, e capxhuāxcīx ajcxy je oybi ayuc nej jāy ajcxy jēb y'almanīdzōgipy. ¹⁶Pīnjaty mībījc etz ñīibejtcixy, ypaadīp ajcxy y'almanīdzoocīn. Per, pīnjaty ca' mījpidāgy tīy'ajt hue' ajcxy y'alma

tīgoyīp mīid ypocy ycīxpi. ¹⁷Yi jāy ajcxy huidibi mībījcp, ooy ajcxy íjxpejt tūngīxipy. Mīid īich nxi īich nmic'ajt yajpidzimīpy ajcxy ca'oybi ma jāy ajcxy yjot yhuinma'ñ. Nañ jadu'n ycāpxgīxipy huingbi ayuc. ¹⁸Ymadzīpy ajcxy tza'ñ, e ca' nej yjājtcīxipy. E co ajcxy veneno ūgīp, ca' ajcxy ypa'mdunīb. E co ajcxy cīnīxājīpy pa'mjāy, tzōgīp je pa'mjāy.

Jesús ypātīgīyñī tzajpjoty

¹⁹E co je Huindzīn Jesús ycapxy ycījxy mīid je' ydiscípulos ajcxy, chi ypātīgīyñī tzajpjoty. Jīiby tzajpjoty Jesús yajpaady ma Dios ymījc a'oy'amy, mīid mīj'ane'mīn.

²⁰Chi Jesús ydiscípulos ajcxy chooñ ñīxcīx cāj cāj capxhuācxī ajcxy Jesús y'ayuc ma nidūg'óciy naax cāj. E je Huindzīn Jesús ooy ajcxy ypubejti ypudīgīyī, mic'ajt moy je' ajcxy mīid je íjxpejt je mījhuinma'ñ huidibi ajcxy tumyb. Jadu'ñyi jadu'n. Amén.

SAN LUCAS

Jaayhui'my Jadu'n Nej Jesucristo Ytun Yjajti

1 Mayjäy ti cojaay je ayuc je tiy'ajt huidi iich ajt nejhuuiyim co janch ytiy'ájtity, tüg'óciy jadu'n nej Jesús chondacy yjugy'ájtin ya naaxhuñ ixti mabaad ycogixiyy. ²Tüg'óciy je tiy'ajt jadu'n nej ajt xyñimaayim huidi ci'm iix midou nej chondacy ixti mabaad ycogixiyy, je' ajcxy huidibi capxhuäcxy Jesús y'ayuc ytiy'ajt. ³Hich nañ jadu'n ti nyajciyöyich ti nyajtecyöyich yajxon je tiy'ajt nej Jesús chondacy je' chinaayin ya naaxhuñ ixti mabaad ycogixiyy. Paady ycixpi iich nhuinma'ñ pidägy co iich miich nyajnijayihua'ñ tüg'óciy je tiy'ajt, miich oyjäybi, Teófilo. ⁴Jigix miich nañ jadu'n mnejhuuihuipy yajxon je tiy'ajt, jadu'n nej miich ti m'ixpicy.

Tüg ángel nigapxy co Juan el Bautista ypi'c'ada'ñ

⁵Jadu'n ytuni yjajti co anajty Herodes grey'aty ma Judea naax cajp, jim anajty tüg judío teedy hue' anajty yxii Zacarías. Je' anajty semandumb miid Abías y'ajugytijc y'amigügtijc. Je Zacarías ypijcy miid Aarón y'ocniix, hue' je' anajty yxii Elisabet. ⁶Dios y'ijxyp

nejhuuiyb co je' anajty ajcxy ytudägyjäyity nimetz. Je' ajcxy ycuydumyb tüg'óciy yi Huindzin Dios ycapxy y'ané'min. ⁷Je' ca'p anajty ajcxy y'ung ni tüg, e jadu'n ajcxy ymijäyhiñ nimetz.

⁸Chi tügtecy Zacarías miid y'ajugy y'amigüg yteedy'ájtciyx anajty ma Dios ytijc. ⁹Jadu'n nej teedy ajcxy ycostumbre miidity, chi ñigooti tung je Zacarías mina ypoomjogipy jiiby ma yi Huindzin Dios ytijc. ¹⁰Tüg'óciy je mayjäy ooy anajty Dios mibijctzoogixy tiba'y. Yam Zacarías tzajtigoty ypoomjocy, ¹¹co ñayquëxiçi Huindzin Dios y'ángel tüg ytinäy a'oy'amy ma je poomjoctac. ¹²Co Zacarías ijxy je ángel, chi ooy chigiyy. ¹³Chi je ángel nimaay Zacarías:

—Ca' mdzigiy, ti Dios midooy yi mjuydácin mnucxtácin. Yi mdöxyijc Elisabet ypaadipy tüg ung yëydijcpi, e mxiiimöhuipy Juan. ¹⁴Mjotcuje'adip mxondägip miich etz mdöxyijc, nañ may yi jäy yjotcugihuipy co anajty m'ung ti ypi'c'aty. ¹⁵Chi yi m'ung ycömay'ida'ñ ma Dios. Ni ca' ügipy vino ni jocni. Ma ca'ni

anajty yma'xung'aty ymiid'adipy yi Dios yjihui'n̄n ymic'ajt. ¹⁶Yi' yajjothuimbidiḡ may Israel jāy ma yi' ajcxy yHuindzin Dios. ¹⁷Je' nicxy ycogapxy'aty ma yi jāy ajcxy huinmic jotmic miid Dios yjihui'n̄n ymic'ajt, tim jadu'n nej Elías jecy'ajty ycogapxy'ajty huinmic jotmic miid Dios yjihui'n̄n ymic'ajt. Je' m'ung yajjothuimbidiḡ je ungedeedy ajcxy huidibi ca' y'ung ixaangixy, nañ yajjothuimbidiḡ je jāy ajcxy huidibi ca' capxycöbicy yi Dios, jigix ajcxy paadiḡ oyjot oyhuinma'n̄. Nañ m'ung ñimähuipy je jāy ajcxy huen nayñi'ixiyigixy miid yHuindzin Dios ycixpi.

¹⁸Chi Zacarías nimay je ángel:

—¿Nej jada iich nejhuihuipy peni janch huidibi xyajnimaaybich? Ti nmijjāyiyñich, cham ndöxyjicich nañ ti ymijjāyiyñi.

¹⁹Chi je ángel y'adzooy:

—Iich Gabriel, ma Dios yhuinduu ni'ixi' n'ityich. Dios ti xyquexyich cogapxy'ajtpi ma miich co nyajnimähuipy jada oybi ayuc.

²⁰Jadachambi miich mhuimipy uum, ni ca' m'ocjājtnip nej mgápxipy, miid co ca' mmibicy jada iich n'ayuc huidibi yajcuydunip co anajty tiempo patni.

²¹Yam je mayjāy ooy ja'ahuíjxcixy Zacarías, ooy anajty ajcxy tzachhuinmaaygixy ti co chachhuäcxipy jiiby ma Dios ytijc. ²²Co Zacarías ypidzimy, chi ca' anajty y'occapxni. Chi je jāy ajcxy huinjihuiy co ti anajty ix tyjaty jiiby ma Dios ytijc. Hue' je' yjacmiydacy a'ixiy'amy, e oyhui'miy uum.

²³Co je semandung yajmay, chi Zacarías ñicxni ma ytijc. ²⁴⁻²⁵Co jadu'n yajty, chi Elisabet jihuiy co ti anajty y'ung tzimigý ciyí gy. Chi yüch'ljty migoox po', e yminañ: “Jadu'n yi Huindzin Dios ti ytuñ miid iich jadachambi tiempo, ti xyjäyamechich ti yajquëgy iich ndzöydu'n ma yi mayjāy ajcxy.”

Tüg ángel nigapxy co Jesús ypi'c'ada'n̄

²⁶Co tudujc po' maabi Elisabet anajty y'ungtzimigý,chi Dios quejxy je' y'ángel Gabriel jim Galilea naaxjot ma je cajp huidi anajty yxii Nazaret. ²⁷Chi Dios quejxy Gabriel ma anajty tüg töxy'anäg y'ity huidibi anajty ca'ni midzinäy yëydijc. Je töxy'anäg ti anajty co'adzoy co piga'n̄ miid tüg yëydijc huidi yxii José. José hue' anajty David y'ap y'oc. Je töxy'anäg hue' anajty yxiijty María. ²⁸Co je ángel ytiigiy ma anajty María, chi nimay: —María, Dios ti xy'ijxtiy, je Huindzin Dios y'oy'ajt miid miich. Miich je' cömay y'idip ma tüg'óciy töxyjäydijc.

²⁹Chi María co y'ijxy je ángel, chi chigiyy miid je' y'ayuc, chi huinmay ooy miid jada copxócxin nej co yjadú'n̄ity. ³⁰Chi je ángel yminañ: —María, ca' mdzigy, miich Dios ti xy'ijxtiy. ³¹Jadachambi, m'ungdzimigip, myajpi'c'adiḡ tüg mang, huidibi mximöhuipy JESUS. ³²Je Jesús mij y'idipy, hue' je' yajtjipy Dios tzajpjoty'p y'ung. Chi je Huindzin Dios möhuiyb je ané'min huidi yi' ymij'ap ymijteedy David ymiid anajty. ³³Je Jesús

ané'mip huinixii ma yi Jacob y'ap y'oc. Je' y'ané'min camina ycixipy.

³⁴Chi María je ángel nimaay:

—¿Nej jada co yjadúnity? Iich ca'ni nyëdyjc miid tzinäy.

³⁵Chi je ángel y'adzooy:

—Je Dios yjihui'n ymic'ajt minip ma miich, je Dios tzajpjotyipi ymic'ájtin xyajñidujttáhuip, je oyjäybi jäy huidi pi'c'adam, hue' yajtjipy Dios y'ung. ³⁶E cham Elisabet miich m'amigüg nañ jadu'n yajpi'c'adamy tüg mang ma ti ymijjäyiyñi. Cham middujyc po'bi maabi y'ung tziimgy je huidibi jäy ytijpy ca' y'ung'ixaani, ³⁷com miidi Dios ca'ni ti chípity.

³⁸Chi María yminañ:

—Jotcujc nguydunipyich yi Huindzin Dios chójcín, huen jadu'n tuñyii jadyii ma iich jadu'n nej miich m'ayuc xymöyich.

Chi je ángel ñicxni.

María y'oy cogapxíy Elisabet

³⁹Huin'it xii María choñ, ñicxy jottigoy ma yugjot, ma tüg cajp jim Judea naaxjot. ⁴⁰Chi ytigiíy ma Zacarías ytijc, e capxocxy Elisabet.

⁴¹Chi jadu'n yjajty co Elisabet midoohui María ycapxpócxin, chi jihuiiy co y'ung yücxy ma yjot. E chi je Elisabet ooy yjotcugiy miid je Dios yjihui'n ymic'ajt. ⁴²Chi yminañ janch mic:

—Cömay miich ma tüg'óciy töxyjädyjc, e cömay y'ida'n m'ung huidibi pi'c'adamb. ⁴³¿Nej iich jada co jadu'n ti n'ahuägyi co nHuindzinich ytaj miñ xyco'ixiyich? ⁴⁴Co ti nmidooyich yi mgapxpócxin, ti iich n'ung yücxy ma iich njot co chachjotcujcity.

⁴⁵Jotcujc'adip pinjaty ti ymibicy, co cuyduñ y'ida'n je ayuc miid je Huindzin Dios ycixpi. ⁴⁶Chi María yminañ:

Ooy mij n'ojadatyich yi Huindzin Dios.

⁴⁷Ooy nxondägyich miid Dios ycixpi, iich nnihuambi nyajtzoocpi,

⁴⁸co yi' ti xyñi'ijxcidägyich, co iich ayoobi xytumbi'adyíjich. Jadachambi etz jacnicxp xii tiempo, tüg'óciy jäy ajcxy oy mina'nip co jotcujc'ájtich.

⁴⁹Yi Dios tügpajc mjíjip, tiibi tun miid iich, ooy yi' yxii ymjíty.

⁵⁰Dios ypa'ayooyb hueñypínity huidibi huindzigíiyip jadachambi etz jacnicxni xii tiempo.

⁵¹Dios ti ooy tuñ mijpi huinma'n, ti jiiibicy pinjaty amij agix nayjihuiiyip ma yjot yhuinma'n.

⁵²Dios ti yajpidzimy yi mijpi rey ma y'ane'my, ti mij'ajt möy ayoobidijc.

⁵³Pinjaty ayuu'ijtp anajty ymooy ti miid yjotcujc'adip, etz yi comeñyjädyjc ajcxy ti ixmach ca' ni ti.

⁵⁴Dios ti pubety yi Israel jäy, yi' ajcxy ytumbi, miid co anajty ti pa'ayogoty je' ajcxy,

⁵⁵jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb miid je' ajcxy huinixii.

⁵⁶Chi María tugiig po' jim y'ijty miid Elisabet, chi yhuimbijtni ma ytijc.

Juan el Bautista co ypi'c'ajty

⁵⁷Co je Elisabet oy yajhuaad'ajtni xii tiempo, chi yajpi'c'ajty tüg

ymang. ⁵⁸Chi ayuc midooy ajcxy je ymijiin ymidijc etz y'ajugy y'amigüg jadu'n nej Dios may'ajt ti tuñ miid Elisabet. Chi ajcxy ooy yjotcugiy miid je' ycixpi. ⁵⁹Chi jadu'n yjaty coductujc xii je ymijiin ymidijc etz y'ajugy y'amigüg miñ ma Zacarías ytijc co anajty tiy'ajttihuaangixy je pi'l'canäg. Chi ajcxy yajxii'adañyii anajty jadu'n nej yteedy yxii Zacarías. ⁶⁰Chi ytaj yminañ:

—Ca' xii'adiiyb Zacarías, hue' yi' huen xii'adyii Juan.

⁶¹Chi je' ymigügtijc ajcxy yminañ:

—¿Na'amy? Ni tüg miich m'amigüg jadu'n ca' xñijty.

⁶²Chi ajcxy y'amidoohui je' yteedy jadu'n a'ixiy'amy, nej yi' yajxii'adañyii. ⁶³Chi Zacarías pijctzoy tüg necy, e jaay jadu'n: “Juan huen xii'adyii.” Chi je ymigügtijc ajcxy nidüg'óciy ooy jihuiiy huinmaay. ⁶⁴Chi mic'amy Zacarías y'ahuac ahua'cxy e ytoodz yungiiy, chi oy ycapxigy e jäymejch cömay yi Dios. ⁶⁵Chi tüg'óciy ymijiin ymidijc ooy chigiiy. Chi ajcxy nimiydactay nej Zacarías ti yjaty ma tüg'óciy jäy huidibi tzinaayb Judea yuugjotypi tzinaaydac. ⁶⁶Tüg'óciy pinjaty anajty midoob je ayuc, chi jäymejtzhui'm ajcxy ma yjot yhuinmañ, chi ñayñimáayigixy: —¿Ti jada' ytunamyb jada pi'l'canäg?

Com je Huindzin Dios je' miid y'ity.

Je Zacarías y'iy

⁶⁷Chi je ungededy Zacarías miid je Dios yjihui'ñ ymic'ajt Dios y'ayuc najtzcaxxiyi yminañ:

⁶⁸Cömay yi Israel jäy yHuindzin Dios, co ti ni'ijxcidägy, ti cohuañ yi' ñaax ycajp,

⁶⁹Dios ti quexy tüg mij nihuaambi yajtzoocpi, ma yi' ytumbi, David y'ap y'oc ajcxy.

⁷⁰Com Dios jadu'n yminañ jecy'ajty miid yi' y'ayuc najtzcaxxiyb huidibi huätzjäyip;

⁷¹je' xyñihuänaanim ma iich ajt nmidzip, nañ xypubedaanim xypudigihuaanim ca'ydi xycigähuiiyim huidibi ca' xy'ixaanim xychogaanim.

⁷²Jaydëbi pa'ayoohuipy iich ajt nmij'ap nmijteedy, etz jäymedziyib jadu'n nej ayuc ahuaniiy miid je' ajcxy.

⁷³Jadu'n nej Dios janch huinjot y'ayuc ahuaniiy miid iich ajt nmij'ap nmijteedy Abraham jecy'ajty huidi anajty xymöhuaanim.

⁷⁴Co nihuätzictuutim ma nmidzip, huin'it jaydëbi miyaaxim n'ojadajtim ca' ma tzigi'ñ jihui'ñ,

⁷⁵miid huätzhuinmañ etz tudägy huinmañ ma yi' yhuinduu jabom jabom ixti mibaad ndzinaayim.

⁷⁶Miich ma'xung, jäy hue' myajtijip mijpi Dios y'ayucnajtzcaxxiybi. Miich n'icxip cogapxy, nicx yajni'ixi jäy miid Huindzin Dios ycixpi.

⁷⁷Yajni'ixi' yi cajpjäy jadu'n nej huaad ajcxy y'alma paadipy nihuaanim yajnidzoocin, etz jadu'n nej huaad ajcxy ypocy huinmecxiyib.

⁷⁸Jadu'n nej Dios iich ajt ti xypa'ayoohuim co

ti xyñi'ijxcidaacim etz
xymooyim tiicxin jájin
huidibi tzomb tzajpjoty,

⁷⁹ Jaydēbi yajmōhuipy jāy ajcxy Dios
ytiy'ajt huidibi ajcxy tzinaayb
agootztuum etz o'c jipp'am,
jigix ajcxy xytümooyim ma je
tudägypi tū'aa.

⁸⁰ Je pi'c'anäg yeeg yjodijy huinmic
jotmic miid yi Dios yjihui'n ymic'ajt.
Chi chinaay adügtuum ma ca' pin, ixti
cooni xii tiempo paty mina ñicxiy
cogapxy ma Israeljäy ajcxy.

Jesús yma'xung'ajty

2 Huin'it xii Augusto César pidacy
y'ané'min huen tüg'óciy jāy nicxy
necypejttaaygixy. ² Je jayjip'atypi
padrón hue' je'yaj'oyiyy Cirenio
huidibi anajty gobernador'ajtp jim
Siria ñaaxjot. ³ Chi jāy ajcxy nidüg'óciy
ñicxtay yajcojayiyybi nidüg nidüg ma
yci'mgajp. ⁴ Chi José choon jim Galilea
naaxjot ma je cajp huidi yxii Nazaret,
ñicxy ajcxy jim Judea naaxjot ma je
David ycajp, huidi yxii Belén. Yi José
ñicxy jim Belén com ymij'ap'ajtpy
ymijteedy'ajtpy je David. ⁵ Chi José
yajcojayiyy padrónjoty miid María, je
töxyjäy huidibi anajty ymiid capxytuñ,
huidi anajty ung tzim'ijtp. ⁶ Chi jadu'n
yjajty co ajcxy anajty yjímity Belén,
chi oyhuaad'aty co María paadipy
y'ung. ⁷ Chi yma'xung'ajty je ungoob,
e chi ñibe'ñ nimüxy miid ymotz, e chi
agögiy ma iyujc pëcxi'ñ, co ca' anajty
ti paady jättac.

Je ángeles ajcxy etz je cöbixyucend'ajtpi ajcxy

⁸ Chi mihuingon je cajp anajty jāy
ycöbixyucend'aty. Hue' anajty ajcxy
yhuin'inaayb huintzuumnajxyp

je' ycöbixy ajcxy. ⁹ Chi Huindzin
Dios tüg y'ánel ñigidaaci je'
ajcxy, e yi Huindzin Dios y'oy'ájtin
y'adicxcoody jühuidity ma je'
anajty ajcxy ymijc, chi ajcxy ooy
chigiyy. ¹⁰ Huin'it je ánel yminañ:
—Ca' mdzigiiygixy, cham iich
miich nyajnimaaaygixy oybi ayuc
huidibi yajjotcugihuiipy tüg'óciy
naax cajp. ¹¹ Miid miich ajcxy
ycixpi ti ypi'c'aty cham ma je David
ycajp tüg jāy huidibi miich ajcxy
xyñihuánaam xycohuánaam ma
ajcxy mmidzip. Hue' je' je CRISTO,
je Huindzin Dios. ¹² Yi' je' iixpéjtíp
huidi miid m'ijxcabipy. Mbáadipy
ajcxy je ung ma'xung ñimóchity
miid ymotz, ycöcnäy ma iyujc
pëcxi'ñ.

¹³ Chi janch mic'amy
ñayguëxici miid je ánel may yi
tzajpjotychinaaybi, chach Dios
ojadájtcixy ymináangixy:

¹⁴ ¡Ooy ycömáiyty ooy ymjity
yi Dios tzajpjoty, ji
naaxhuiñ jotcujc'ajt miid
jāy ajcxy ycixpi huidibi Dios
yjäygidacpy!

¹⁵ Jadu'n yjajty co je ánel ajcxy
ñicxtay tzajpjoty, chi je cöbixy
cuend'ajtpi ajcxy ñayñimay:

—Tzoc jámim jim Belén, jaydēbi
n'fjxim ti ti ytunyi ti yjadyii
huidibi nHuindzin'ájtim Dios ti
xyajnimáayim.

¹⁶ Chi ajcxy ñicxy jottigoy, chi
oy pátcixy María, José etz je ung
ma'xung y'agögiyity ma je iyujc
pëcxi'ñ. ¹⁷ Co ajcxy ijxy je María
etz je ung ma'xung, huin'it ajcxy
nigapxtay nimiydactay jadu'n nej je
ánel ajcxy ñimay miid je pi'c'anäg
ycixpi. ¹⁸ Tüg'óciy jāy huidi midou

ooy jihuüi huinmay jadu'n nej je cöbixycuend'ajtpi ajcxy yminañ.

¹⁹Chi María mido'mbijctay, e yajhui'my ma yjot yhuinma'ñ. ²⁰Chi yhuimbijty je cöbixycuend'ajtpi ajcxy cömay jäymeck ajcxy yi Dios, etz ooy alabanza ajcxy iiy miid Dios ycixpi miid tüg'óciy jadu'n nej anajty ti íjxcixy ti midóogixy, etz jadu'n nej anajty ti ñimáayigixy.

**Pi'c Jesús yajcapxquëxigý
ma Dios ytijc**

²¹Coductujc xii maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yxiimoy JESUS, jadu'n nej je ángel anajty jayijp ti yminañ ca'ni anajty chimigiyi ycüygyii.

²²Co je xii oypaatni mina je María anajty yhuätzpídzimaamni, jadu'n nej Moisés ycótújcín je jécyp yminañ. Chi ajcxy miidnicxy je ung ma'xung jim Jerusalén capxquëxigaangixy ma yi Huindzin Dios yhuinduu. ²³Com jadu'n anajty yjaybétyity ma Huindzin Dios ñecy:

Tüg'óciy ungoob yëydijcpi
huidi ma'xung'ajtp, abicy
yhuí'mipy miid je Huindzin
Dios ycixpi.

²⁴José etz María oy yéjccixy huindzigi'ñ jadu'n nej Huindzin Dios ñecy yminañ co jëbi yecy metzc jam muuxy o pajctza'm muuxy.

²⁵Jim Jerusalén anajty chinäy tüg jäy huidi anajty yxii Simeón, tudägyjäy je', etz ooy Dios jäymeck. Simeón y'ahuijxyp anajty mina Dios miñ yajjotujc'ada'ñ Israeljäy ajcxy, e miid je' anajty Dios yjihui'ñ ymic'ajt. ²⁶Dios yjihui'ñ

ymic'ajt ti anajty yajnejhuüiyii co ca' chojc öga'ñ, jayijpni oc'ixipy je Huindzin Dios yCristo. ²⁷Je Dios yjihui'ñ ymic'ajt yajmin yajmejtzi Simeón yhuinma'ñ huen nicxy ma Dios ytijc; huin'it Jesús ytaj yteedy ymiidnicxi ma Dios ytijc, cuyduñ ajcxy jadu'n nej Dios ñecy y'ane'my. ²⁸Chi Simeón tzendzoy etz capxpaady je ung ma'xung, e chi Dios mibijctzoy miid je' ycixpi, chi yminañ:

²⁹Jadachambi capxcix jotcujc,
Huindzin Dios, miid ich miich
mdumbi, com ti mguyduñ
jadu'n nej ti xñimäyich co
n'ixipyich je Cristo.

³⁰Cham ti n'ixyich je nihuambi
cohuambi,

³¹huidibi ti mni'ixiy ma tüg'óciy
jäy ajcxy yhuinduu.

³²Jada ung ma'xung ytij'ajt
yegip ma yi jäy ajcxy huidi
ca' yjudiojäyity. Jadu'n yi'
nipaady nej tüg jin huidi
codiicxp je jäy. Cömay y'idipy
yi Israel jäy miid yi' ycixpi.

³³José etz Jesús ytaj ooy jihuüi
huinmaay jadu'n nej Simeón
ñigapxy je pi'c ma'xung. ³⁴⁻³⁵Chi
Simeón conuucx yi' ajcxy, e nimay
María, Jesús ytaj:

—Jadayaabi pi'canäg hue'
jada aminiy co may Israel jäy
yjothuinma'ñ yaj'oyihuipy miid yi
Dios etz nañ jadu'n may Israel jäy
yjothuinma'ñ ca' yaj'oyihuipy miid
yi Dios. Yi' je' tüg ijxpejt co ca' jäy
y'ixa'niiyb choga'niiyb, e jadu'n
tüg'óciy yajnejhuüiipy nej ajcxy
nidüg nidüg yjothuinma'ñ miidity.
E miich m'idipy jotmaymiid jadu'n
nejihuüi tüg espada ti xyajtzaachiy.

³⁶⁻³⁷Nañ jim Jerusalén anajty tüg töxyjäy huidibi anajty yxii Ana, Dios je' anajty y'ayucnajtzcapxiybi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägni ypijcy e jäyi huixtujc jimijt chinay miid yña'y, mada'px midaax jimijt anajty cujc col'ögy chinäy, e ca' anajty ytigoy'lity ma Dios ytijc. Ana ytumb anajty tzajtigoty xim tzuum jopy ayuu anajty ycapxtägy. ³⁸Chi Ana nimiñ José etz María jiiy ma Dios ytijc, e quipxy miid ajcxy huingapxtacy je Huindzin Dios. Chi je Ana nimiydacy je pi'c Jesús miid tüg'óciy jäy jim Jerusalén huidi anajty ajcxy jip'ijxp mina Dios cohua'nañ Jerusalén ma ymidzip.

Co ajcxy nicxni jim Nazaret

³⁹Co oy yajcuydundäy tüg'óciy jadu'n nej je Huindzin Dios ñecy yminañ, chi José etz María ñicxcixni jim Galilea ma ajcxy yci'mgajp Nazaret. ⁴⁰Je pi'c Jesús anajty yeegy mic ooy miid huijy'ajt cujc'ajt, etz ymiid je' Dios ymay'ájtin y'oy'ájtin.

Je pi'c Jesús yajpaady ma Dios ytijc

⁴¹Jimijt jimijt yi ungdaj ungedeedy ñicxy anajty ajcxy jim Jerusalén co anajty je Pascua xii paady. ⁴²Co Jesús anajty ymajmetzjimijt'ajty, chi ajcxy ypättigiiy jim Jerusalén jadu'n anajty ajcxy costumbre miidity co xii paady. ⁴³Co je xii ñaxtäy, chi ajcxy huimbíjtcixni, e Jesús yhui'miiy je' jim Jerusalén. Ca' José etz ytaj nejhuiy ajcxy co ti anajty yhui'miy. ⁴⁴Hue' ajcxy anajty tijy je' ymiñ axaam miid ymigügtijc.

Co tüg xii yöygixni, chi ajcxy ixtay je' y'ung ma y'amigügtijc ajcxy, etz huidi miid ñay'ixy'adyii ñaymigüg'adyii. ⁴⁵Co ca' ajcxy y'ung paady, chi yhuimbíjtcixni jim Jerusalén ung ixtaaybi.

⁴⁶Chi jadu'n yjajty codugiig xii oypaatcixy jim ma Dios ytijc, Jesús y'iñäy anajty agujc'amy ma je huindzindijc. Yi' anajty y'amido'ijtyy yi huindzindijc y'ayuc, e nañ yaj'amidooy anajty tijaty. ⁴⁷Tüg'óciy je huindzindijc huidibi midou Jesús y'ayuc, chi ooy ajcxy huinmay etz jihuiy jadu'n nej je Jesús huinjihuiydäy etz jadu'n nej anajty tiydudägy y'adzooy. ⁴⁸Co Jesús ytaj yteedy y'ijxpati, chi ooy ajcxy tzachjihuiy. Chi ungdaj yminañ:

—Aay ung, ¿nej co miich jadu'n xytúngixyich? Yi mdeedy etz iich yam tzachjottigooyb nay'adzigiyyiijich n'ixtáaygixich miich.

⁴⁹Chi Jesús y'adzooy:
—¿Na'amy co miich xy'ixtáaygixyich? ¿Ca' mnejhuiygixy co copity n'idañich ma nDéedyich ytung?

⁵⁰Chi ajcxy ca' huinjihuiyi Jesús y'ayuc huidibi ycapxy.

⁵¹Chi Jesús miid nicxy je' ajcxy jim Nazaret. Chi Jesús capxymidoy ytaj yteedy. Chi yi' ytaj yajhui'mday ma yjot yhuinmañ tüg'óciy nej ytunyii yjadyii. ⁵²Chi Jesús ixpijce'adiitzp anajty ooy, etz yeegy yjäygojy huijycujc. E yi Dios etz jäy ajcxy ooy anajty jäygidaccixy.

Juan el Bautista y'ayuccapxhuäcxy migtigüduum

3 Ma anajty je Tiberio César yjimijtjoty, mimajmocx

jimijt anajty maabi y'ane'mtigäy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je y'uch Felipe anajty rey'ajtp jim Iturea etz jim Traconite ñaaxjot. Chi Lisantias anajty rey'ajtp jim Abilina. ²Chi je Anás etz Caifás je' ajcxy anajty teedy mijtungmiid ma Dios ytijc. Je huin'it tiempo Dios y'ayuc yja'ty ma je Juan, Zacarías ymang, huidibi anajty tzinaayb mijtigäduum. ³Chi Juan choñ ñicxy ma tüg'óciy cajp mihuingon je Jordán mijñi, capxhuijy je jäy ajcxy, co huen jothuimbijttaaygixy etz huen niibejtcixy jigix ajcxy ypocy yajhuinmeecxp. ⁴Jada jadu'n tuni jajtí nej je ayucnajtzcaxhiybi Isaías anajty ti cojaay:

Jim mijtigäduum yajmidooy tüg jäy minañ: "Yaj'oyiigixy yi Dios ytü'aa, tim jadu'n nej jäy ajcxy yaj'oyiigixy yi jibic tü'aa co tüg rey minañ." Yajtiigixy yi tü'aa huidibi ooy y'adijy y'a'och.

⁵Tüg'óciy anii ahuoc huen joyiidyäy, tüg'óciy tungop huen nañ jadu'n joyiidyäy. Tüg'óciy ni'aa tü'aa huidibi tijmin tijxijp huen tiidyäy. Yi tü'aa huidibi ca' quipxyjatyty huen quipxyjaty tiidyäy.

⁶Tüg'óciy yi jäy ajcxy ixipy ñejhuñhiipy nej Dios yega'ñ je nihuambi cohuambi.

⁷Chi Juan oiy ajcxy je jäy pinjaty anajty miimb niibejtpi, yminañ: —iMiich ajcxy tza'ñ ajcxy y'ajugy y'amigüg! ¿Pin miich ajcxy ti xynimäy quég ma yi ayo'n huidibi Dios yquexaamy? ⁸Túngix

oybi, jothuimbijtcix, ca' ajcxy minangixy miñ xyipy: "Abraham iich ajcxy n'ap'ajtpy ndeedy'ajtpy". Hich miich ajcxy nimaayb co Dios ixti jébi yi' yaj'lung'adyii yaj'anäg'adyii Abraham jada tzaa ca'ydí miich ajcxy. ⁹Dios ni'ixí y'ity jaydëbi yajcödigoyipy jäy ajcxy y'alma huidibi jibic-huinma'ñ miid. Tim jadu'n nipaady nej jäy ni'ixí y'ity miid jacha co pujxiga'ñ tüg quipy huidi ca' oy ytiim'aty, etz yajnögtähua'ñ.

¹⁰Chi je mayjäy ajcxy y'amidooy je Juan:

—¿Ti iich ajcxy jébi nduñ?

¹¹Chi je Juan y'adzooy, yminañ:

—Pinjaty yhuit miid metz, jaydëbi möy pin ca' miidity ni tüg. Etz pinjaty caagy miid nañ jadu'n möhuipy pinjaty ca' miidity.

¹²Chi miñ jadyii yajcogüejtpi co anajty ñiibedaangixy, yminañ ajcxy:

—¿Ti huaad iich ajcxy nduñ (jigix Dios xymijotcuje'adipyich)?

¹³Chi Juan y'adzooy:

—Ca' ñigi anaxy myajcogüety jadu'n nej je cötújcin y'ane'my.

¹⁴Chi soldado ajcxy yminañ:

—¿Ti iich ajcxy ndunipy (jigix Dios xymijotcuje'adipyich)?

Chi Juan y'adzooy:

—Ni pin ajcxy ti mgapíjciy, ni mganihuambedipy ajcxy. Nañ jadu'n mijotcuje'ajtcixy nej myajmujuuygixy.

¹⁵Je mayjäy yjijp'ijxyp anajty ajcxy ooy, etz ooy jihuñy huinmaay nejhuñhuaangixy pen yi Juan je' anajty Cristo. ¹⁶Chi Juan nimay ajcxy nidüg'óciy:

—Hich janch nyajniibéjtypich jäy miid nii. Miimb je' axaam huidibi

jacmij ca'ydi iich, ca' huaad yi' yc'ghuin ngejich. Je' miich ajcxy xyajniibedipy miidi Dios yjihui'n ymic'ajt etz miidi jiin. ¹⁷ Je Cristo ni'ixi' y'ity co oybi möhua'n je jäy huidibi ajcxy oyhuinma'n miid, etz ymöhuaamy tzaachypi je jäy ajcxy huidibi jibic-huinma'n miid, tzaachypi huidibi nicamina ycixipy. Tim jadu'n nipaady nej tüg jäy ni'ixi' y'ity co ymoc-huimboja'n, e chi je oybi mocpajc pidäga'n ma che'x, etz je mocjaam ninögihua'n, e caminaxii ycapidza'n je jiin.

¹⁸ Je Juan ooy jäy capxhuijy, etz canaagnax oybi ayuc capxhuäcxy. ¹⁹ Chi yi' ooy je rey Herodes, co y'uch Felipe ytöxyijc Herodías miid tzinaayi, etz jacjaydiiby jibic-huinma'n tiibi Herodes anajty tuñ. ²⁰ Chi je rey Herodes niği pocytuñ co Juan pidacy pujxtigoty.

Je Jesús ñiibejtin

²¹⁻²² Chi jadu'n yjajty co jadu'n tüg'óciy jäy ñiibejtay nañ jadu'n Jesús ñiibejty. Yam anajty Jesús ycapxtägy co je tzajp y'ahuaach, etz je Dios yjihui'n ymic'ajt yminajcy ma Jesús ycöduu miid ñinicx jadu'n nej muuxy ñinicx. Nañ jadu'n yajmidoy tüg ayuc choñ tzajpjoty yminañ:

—Miich n'ung'ajtpy, ooy iich miich ndzocy ooy njihuüy, ooy njotcújcidyich miid miich.

Jesús ymij'ap ymijteedy

²³ Jesús hue' anajty yjimijt oy ni iipxmajc co ytungtigüy. Hue' je' anajty jadu'n jäy tijy José ymang, José yteedy hue' je' Elí, ²⁴ Elí yteedy hue' je' Matat, Matat yteedy hue' je'

Leví, je Leví yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je' Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Leví, je Leví yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram,

je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je' Mahalaleel, je Mahalaleel yteedy hue' je' Cainán, ³⁸je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

Je mujcu' tuñ ijxta'ni ma Jesús

4 Jesús ymiid'ajtpy anajty je Dios yjihui'ñ ymic'ajt. Co Jesús jim choñ ma Jordán mij niñ, chi je Dios yjihui'ñ ymic'ajt yajnicxi mijtig'íduum. ²Jesús y'ijty huixchigui'px xii jim mijtig'íduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xii ñajxni, chi oy yuuböccodyii.

³Chi je mujcu' ñimay:

—Peni janch miich Dios xy'ung'adyii, ñimay jada tzaa huen ahuimbity tzajcaagy.

⁴Chi Jesús y'adzooy:

—Jaybety ity ma Dios ñecy co ca'nan miid tzajcaagy ti'ajty jay

ajcxy yjugy'aty, nañ jadu'n tzocy tüg'óciy Dios y'ayuc.

⁵Chi je mujcu' miidpejty Jesús ma tüg cop janch cixpi, chi tüg jaxigy yajni'ixiyy tüg'óciy je naax cajp huidi jii naaxhuiñbi. ⁶Chi je mujcu' yminañ:

—Hich miich möhuipy tüg'óciy mic'ájtin ané'min etz oy'ájtin, com iich ng'am y'ity tüg'óciy, e nmöhuibich hueñyimpñity. ⁷Pen xyhuingoxtinäybiich xy'ojadajtpich miich, ac miich jada mje' tüg'óciy.

⁸Chi Jesús y'adzooy, yminañ:

—Huinhuägtuutcich miich mujcu', com jadu'n jaybéty y'ity: “Co yi Huindzin miich mDios mhuingoxtinähuiipy m'ojadadipy, etz yi' je' tüg pajc myajmij'adipy.”

⁹Chi je mujcu' miidnicxy Jesús jim Jerusalén, chi miid pejty ma Dios ytjic coduu, e ñimay:

—Pen Dios miich xy'ung'ajtp cödiypnax naaxcixy, ¹⁰com jaybety jadu'n y'ity ma Dios ñecy co quexipy Dios yi' y'ángeles ajcxy e xycuend'adipy. ¹¹Cigixy ajcxy xyhuidzipy, ca'ydi mdzaachiy ma tzaajot.

¹²Chi Jesús yminañ:

—Ji Dios y'ayuc huidi jadu'n minam co ca' mjot'ixipy mhuinma'ñ'ixipy yi mHuindzin Dios.

¹³Co je mujcu' yajcixy jadu'n nej anajty jot'ixa'ñ huinma'ñ'ixa'ñ Jesús, chi huinhuägtuuty tüg tiempo.

Jesús yajtzondägy je' ytung jim Galilea

¹⁴Chi Jesús nicxy jim Galilea, e Jesús miid'ajtpy je Dios yjihui'ñ

ymic'ajt. Chi Jesús ooy cōmay y'lijty ma tüg'óciy cajp huinduy agonbi.

¹⁵Hue' Jesús anajty yaj'ixpicy majaty je' ajcxy naymujctac. Chi je jäy ajcxy tüg'óciy ooy cōmay Jesús.

Jesús yajpaady jim Nazaret

¹⁶Chi Jesús ymiñ Nazaret ma anajty ti yeegy. Chi Jesús ytigi y ma naymujctac, jadu'n nej costumbre anajty miidity pocxxiiduum. Chi ytinaay'ahuüy, chi ytigi y necycapxi. ¹⁷Chi ajcxy mooy je necy huidibi je Dios y'ayucnajtzcaxxiybi Isafas yaay. Chi ciyhuäcxy je necy, paty jiiby tüg it ma anajty yjaybétyity jadu'n:

¹⁸Je Huindzin Dios yjihuiñ ymic'ajt xymiid'ajtpich, co xyajñibicyich co nyajñimähuißich ayoobitijc je oybi ayuc. Ti xyquexyich co nyajjotcugihuißich je jäy ajcxy huidi jotmay ymiid, etz nhuinméecxibich huidibi ajcxy pujxtigótyip, nañ jadu'n ajcxy je huidibi huuintzip nyajhuindiicxigibich, e nbidägibich ahuätztuum huidibi yajtzaachytumb.

¹⁹Ti xyquexyich co ngapxhuäcxibich je tiempo mina Huindzin Dios may'ajt oy'ajt tuna'n miid je jäy ajcxy ycixpi.

²⁰Chi jada' Jesús abidijty je ñecy, yajcidiigi y je tungmiidpi, huin'it y'ixtacy. Chi tüg'óciy mayjäy jiiby ma naymujctac ooy ajcxy huindicxy je Jesús. ²¹Chi Jesús yminandacy:

—Cham yajcuydun je' huidi jaybety ma Dios ñecy jadu'n nej miich ajcxy cham ti mmidooy.

²²Chi nidüg'óciy ajcxy ooy jäygidacy nej Jesús mina'n, etz huinmay ajcxy ooy je ayuc huidibi Jesús ycapxy, chi ñayñimáayigixy: —¿Nej ca'y José jada jada' y'ung?

²³Chi Jesús yminaañ:

—Ca' yjécyity miich ajcxy xyajñimähuißich jada ayuc: “Tzoydumbi naychoyihuii ci'm. Tüg'óciy jadu'n nej iich ajcxy nmidooyich ti mduñ jim Capernaum, nañ jadu'n miich octun ma mgi'mgajp.”

²⁴Chi Jesús yjacminañ:

—Janch iich miich ajcxy nnimäy co ni tüg jäy huidibi Dios y'ayucnajtzcaxxiyb ca' jäy ajcxy cöbicy ma yci'mgajp. ²⁵Janch iich miich ajcxy nimäy co ooy anajty may co'ögy ytöxyjäy ya Israel jecy'ajty co Elías chinaay, co je tzajp adujcy tugig jimijt jatudujc po', co oy yuu miñ ma tüg'óciy naax cajp. ²⁶E Dios ca' quejxy je Elías ma yi Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huidi jim. ²⁷Nañ jadu'n anajty ooy mayjäy püdz pa'm miidity ya Israel jecy'ajty co je Dios y'ayucnajtzcaxxiybi Eliseo chinay. Chi ni tüg jäy huin'it catzoocy, jäyi tügpajc choocy pa'mjäy huidibi anajty yxi Naamán huidi tzoon Siria naaxjot.

²⁸Huin'it tüg'óciy jäy huidi anajty jiiby ma naymujctac ooy yjotma'tcoty co jadayaab ayuc ajcxy midooy. ²⁹Chi je mayjäy ajcxy nibidigy Jesús etz yajpidzimy ma je cajp. Chi ajcxy yajñicxy jim ma je tzaahuingueetz, co je cajp copcixy anajty yajpaady, e jim anajty

cödijpnaxaangixy. ³⁰Chi Jesús ñajxy cujc'amy ma je' ajcxy, chi ñicxni.

**Tüg yëydijc huidibi anajty
miid jibic espíritu**

³¹Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy yaj'ixpajcy pocxxiiduum.

³²Huinmay ooy ajcxy jadu'n nej je' yaj'ixpicy. Ñayñimáayigixy co je Jesús yaj'ixpicy nejihuüy mijtung mij'ané'min mfidity.

³³Jiiby ma je naymujctac jiiby anajty tüg yëydijc huidibi miid tüg ca'oybi, chi je ca'oybi mic yaaxqueecy yminañ:

³⁴—Ixmajtzcich ajcxy, çti mdunamy miid iich ajcxy Jesús je nazaretpi? ¿Nej ti mmiñ co xyajhuindigoyáanigixyich? Hich miich n'ijxcapy co miich je' je Huätzpi Dios.

³⁵Chi Jesús je ca'oybi ogy, nimay: —Amon, pidzim ma yi jäy.

Chi je ca'oybi najtztijäy je yëydijc agujc'amy ma je jäy ajcxy, huin'it ypidzimy, e ca' ni nej jactuuñ. ³⁶Tüg'óciy jäy jim ooy ajcxy ñay'adzigiüyi miñ xyipy yjanayñimáayigixy:

—¿Ti ayuc jada' yi'? Co miid y'ané'min etz mic'ajt ane'my ca'oybi etz yajpidzimy ma jäy.

³⁷Chi Jesús capxaady y'ijty ma tüg'óciy cajp huidi huinduy agónip.

**Jesús yajtzoocy Pedro
ymid töxyjäybi**

³⁸Chi Jesús ypidigüy choñ ma naymujctac, ytigüy ma Simón ytijc. Jadu'n anajty Simón ymid töxyjäybi mic tyoyii. Chi ajcxy cohuaniiy

Jesús miid je' ycixpi. ³⁹Chi Jesús yhuindacy ma je' yhuinduu, ix'ojoy je toyii, e jadu'ñi ñajxy. Chi je' mic'amy ypidigüy, yajcay yaj'uucy ajcxy.

Jesús yajtzoocy mayba'mjäy

⁴⁰Tzoo tzoo anajty jäy ajcxy yajnicxy tüg'óciy jäy ajcxy yajnicxy pa'mmiidpi ma Jesús. Chi Jesús cñixajy nidüg nidüg, e jadu'n anajty ajcxy chögy. ⁴¹Chi ñañ jadu'n je' ca'oybi yajpidzimy ma mayjäy, mic je ca'oybi anajty yhua'ñ yjihuüy, ymina'ñ:

—Miich je' Dios xy'ung'ajtp.

Chi Jesús nigü ix'ojoy, ca' anajty yajhuäcxipy nicxy yjaccapxy, com ti anajty nejhuüygixy co yi' je' je Cristo.

Jesús y'ayuccapxhuäcxy jim Galilea

⁴²Co yxiimiüy, chi chooñ Jesús, ñicxy mijtigüduum. Ooy jäy yja'ixtäyüi, chi ajcxy oy paatcixy, yajhuäcxijpy ajcxy ooy, ca' anajty oc'ixmadzáangixni. ⁴³Chi Jesús yminañ:

—Ooy jada chachcopícity co canaag agajp iich jada ngapxhuäcxibich je oybi ayuc jadu'n nej Dios y'ane'my. Paady Dios ti xyquexyich ya naaxhuñ.

⁴⁴Jadu'n anajty je' capxhuäcxy majaty jäy ñaymujctac jim Galilea.

Je acxmajtzin mijhuinma'nybi

5 Tügtecy jadu'n yjajti, jim anajty Jesús ma je Genesaret mejypa', co jäy ñimiini janch ñay'adijüy ñay'agodüygixy, tzach'amidohuaangixy Dios y'ayuc. ²Chi yi' ijxpaty mejtz

barco jahueengi mejypa'áy. Je acxmajtzpidijc ti anajty ypidzimgixy ma je barco, jim anajty y'acxxuumy pújccixy. ³Chi Jesús yajtigiyiyy tüg barco huidi Simón anajty je'ajtpy. Chi may'ajt pijtzooy co huen yajjihuägy hueeni yi barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjäy ajcxy. ⁴Co ycapxymaayi, chi Jesús Simón nimay:

—Nícx pidäg m'acxmadzi'n mejyjoty, jaydëbi májtzcxixpy acx.

⁵Chi Simón y'adzooy:

—Huindzin, ti iich ajcxy ooy njatuñ tüg tzuum, ni ti ti ngapáatcixyich. Per miid miich m'ayuc ycixpi yi acxmadzi'n nbidägibich mejyjoty.

⁶Co ajcxy pidacy je acxmadzi'n mejyjoty, chi yajco'adujcy ooy may acx, jahueeni acxmadzi'n ycaciich miid je may acx ycixpi. ⁷Chi Pedro yemi ymigügtijc huidi anajty jim ma je jadügpi barco, huen miñ ajcxy pubedyi. Chi ajcxy ymiñ pubejtp, yaj'ujch ajcxy metzpi barco miid may acx, jagoo jagoo ycaquiiñ je barco miid may acx ycixpi. ⁸Co Simón Pedro ijxy jadu'n, chi ycojxtinaay'ahuüiy ma Jesús yhuinduu, nimay:

—Huinhuäctúutcich, Huindzin, com iich pocyjäy iich.

⁹Com Pedro janch tzigiyyb anajty, etz nañ tzigiyyb tüg'óciy huidi anajty miid ti ytuñ, co anajty ooy may acx tzachyajnibéjtcixy. ¹⁰Nañ jadu'n tzigiyyb anajty je Jacobo etz Juan je Zebedeo ymang ajcxy huidibi Simón anajty ti pubety. Chi Jesús ñimay Simón:

—Ca' mdzigy, jadachambi etz jacnicxní xii tiempo mdunipy jaymadzi.

¹¹Co je barco yajmejypidzimy, chi ajcxy y'ixmajch tüg'óciy, chi ajcxy panícx Jesús.

Jesús yajtzögy tüg jäy nibützpa'mmiidpi

¹²Chi jadu'n yjajti co anajty Jesús yjímity ma tüg cajp, co ñimiini tüg yëydijc ymiid anajty pützpa'm. Co je pa'mjäy ijxy Jesús, chi nihuindacy ma yhuinduu, minucxtacy, nimay:

—Huindzin, pen mdzojcpy jëbi xyajtzögibich.

¹³Chi Jesús yci' najtzxajiiy ñidoon, nimay:

—Ndzojcpyich, hui'm huädz.

Chi mic'amy je jäy choocy. ¹⁴Chi Jesús ane'my, nimay:

—Ca' ni pin myajnimähuipy, nícx janchtiy nayguëxigib ma teedy, jaydëbi möhuipy Dios huindzigi'n, jadu'n nej Moisés ycötújcín je jécyip y'ane'my, miid yi' ycixpi co ti mhuäzpidzimy, jaydëbi jäy ajcxy nejhuühuipy co ti mdzögy.

¹⁵Je capxy'ayuc nigí y'oc-huäcx'adiitzni, e janch mayjäy y'ocnimújcín, jim pin ayuc midohuaam, e jim huidi tzögaam.

¹⁶Jesús ycögueecpy anajty je mayjäy, ñícx y anajty mjtigíduum Dios ojadjtpi.

Jesús yajtzögy tüg jäy cixuxypi tecyxuxypi

¹⁷Tüg tecy yjajti, Jesús anajty yaj'ixpijcp, e jim anajty ajcxy iñäy ma Jesús yhuinduu fariseojäy ajcxy, etz huidi jäy yaj'ixpijcp Dios ñecy huidijaty anajty ti choongixy canaag agajp ma Galilea naaxjot Judea naaxjot, etz cham huidijaty

anajty ti chooñ Jerusalén. E Jesús ymiid anajty Huindzin Dios ymic'ajt co jäy yajtzögipy. ¹⁸Chi nijējity jäy yajja'ty cijx'am tüg pa'mjäy yēydijcpi huidi ca' anajty yci' ytecy yücxy. Chi ajcxy ixtaay ma yajtijctigihuiipy pidäga'n anajty ajcxy je pa'mjäy ma Jesús yhuinduu.

¹⁹Com ca' anajty ni ma tigiyiydac miid co je tijc anajty ooy y'újtzy miid mayjäy. Chi ajcxy miidpejty tijc nigíxy, chi ajcxy tijc yajcöhuach, e chi ajcxy cödiñajxy cijx'am je pa'mjäy ma Jesús yhuinduu.

²⁰Co Jesús ijxy jadu'n nej je' ajcxy ymibicy, chi nimay:

—Yēydijc, yajmeecxp mbocy.

²¹Chi je' ajcxy huidi yaj'ixpijcpy Dios ñecy etz je judío ixpicytijc huidi naydijigixp fariseojäy huinmaygoty, ñayñimáayigixy: “Jada Jesús ooy ycapxtigoy miid Dios. Ni pin yēydijc huaad ca' ti pocymeecxy. Tügpaic nHuindzin'ájtım Dios huidi pocyhuinmecxp.”

²²Jesús ñejhuiiy je' ajcxy yjot yhuinma'n, paady ajcxy nimay:

—¿Ti mdzachuinmaayb ajcxy ma mjot mhuinma'n? ²³¿Ti jactzip co minaanım co ti mbocy yajmeecxy o minaanım: “Pidig etz nicxnı”? ²⁴Jaydēbi miich ajcxy mnejhuihuipy co iich je' je jäy huidi tzoon tzajpjoty, nmıdich ané'mın etz mic'ajt ya naaxhuin jēbi jäy nbocyhuinmeecxyıch, paady cham nnimäyıch yi pa'mjäy: “Pidig etz yajpidig mmaabejt, nicx ma mdijc.”

²⁵Chi mic'amy je pa'mjäy ytinayıgy ma je jäy ajcxy yhuinduu, etz yajpidıgy je' ymaabejt ma anajty ycögnäy. Chi ñicxnı ma

ytijc, chi ooy cömay jäymejch Dios. ²⁶Huin'ıt nidüg'öciy je mayjäy ooy ajcxy jihuiiy, e chi ajcxy ooy cömay etz jäymejch Dios. Chi ajcxy ooy chigiıygıxy, yminaangıxy:

—Cham janchtıy n'ıjım mıjhuinma'n.

Jesús huodzooñ je Levı

²⁷Co jadu'n ytuni yjajti, chi Jesús jım choñ, chi ijxy tüg yajcogüejtpi huidi anajty yxii Levı. Levı jım anajty iñäy ma yajcogüejttac. Chi Jesús nimay je Levı:

—Pajaamgıch.

²⁸Chi je Levı ixmajtztay huidi anajty ytuumyb etz padzooñ je Jesús.

²⁹Chi Levı mayjäy yajcay yaj'uucy ma ytijc, cham may yajcogüejtpi ajcxy etz jacjadyii jäy huidi iñaaıyb ma yi mesa miid Jesús etz yi' ydiscıpusos ajcxy. ³⁰Chi je' ajcxy huidibi yaj'ixpijcp Dios ñecy etz je ixpicytijc huidi naydijigixp fariseojäy tzachni'amechycápıxcıxy ni'ojııygıxy je Jesús ydiscıpusos ajcxy, yminaangıxy:

—¿Na'amy co mgaayıgy m'uuccıxy miid yajcogüejtpi etz miid pocyjäy ajcxy?

³¹Chi Jesús ymiñañ:

—Ca' yajmayjaty tzoydumbi huidibi ca' ajcxy ypıgyii, jēyi huidi ajcxy pijcip. ³²Ca' iich ti nmiñıch ma je jäy ajcxy huidibi ca' pocy miidıty. İich ti nmiñıch miid yi pocyjäy ycıxpi co huen jothuimbıjttayıgyıxy ma Dios.

Yaj'amıdooy ajcxy Jesús ti co jäy ajcxy y'ayunas'ájtıcy

³³Chi je mayjäy ajcxy Jesús nimay:

—Nej co yi' (Juan) ydiscípulos ajcxy janam jadojz jaygay y'íjtcixy etz ycapxtáccixy, nañ jadu'n je fariseojäy ydiscípulos ajcxy janam jadojz jaygay y'íjtcixy. Chi miich mdiscípulos ajcxy ca' ajcxy jaygay y'íjtcixy, caaby uucp ajcxy jabom jabom.

³⁴Chi Jesús yminañ:

—¿Nej jëbi yaj'ayuu'aty jäy ajcxy huidi yajpatpi ma je pijcpi yajnixiiduñ, pen quipxyi yam yajpaady miid je huidibi pijcp?

³⁵Minamb je xii je tiempo mina je pijcpi yajtzoniib, huin'it janchtiy ajcxy jëbi y'ayuu'ájtixy.

³⁶Nañ jadu'n ajcxy yajnimay tüg jihuimbit ayuc:

—Ni pin ca' huaad agiyiyi tuc-huit miid jemyhuit, canaan jëyi yciidzip yi jemybi, nañ jadu'n je tucpi ca' oy yhui'ma'ñ miid je jemyhuit agiyi'ñ.

³⁷Ni pin ca' pidägy jemy vino ma je tucpi cochac, pen janch jadu'n octuñ, je vino jemybi yciidzip je tucpi cochac, chi y'ixyojctähuipy je vino etz je cochac ñitigoydähuipy.

³⁸Pidägipy ajcxy jemy vino ma tüg jemybi cochac, chi jadu'n ca' ytigoyipy je vino ni je cochac .

³⁹Ca' ni pin tzocy vino jemybi, pen ti anajty ügy vino tiibi yjejni, co jadu'n ymina'ñ co jac oy je tiibi yjejni.

Je discípulos ajcxy yajmújccixy trigo cojc pocxxiídum

6 Chi jadu'n yajti tüg pocxxiídum co Jesús oy ñaxy ma tüg trigo cam, e yi' ydiscípulos ajcxy oy anajty yajminájccixy trigo tiim, chi ajcxy nixajtzüdy, e chi ajcxy jicxy. ²Chi nidügti fariseojäy yminañ:

—¿Ti co ajcxy jadu'n mdundigooy co mdúngixy huidi ca' ñigodúcyity ajcxy mdunipy pocxin xiídum?

³Chi Jesús yminañ:

—¿Nej ca'ni miich ajcxy mgapxy Dios ñecy nijadu'ñyi? ¿Nej ca' mnejhuiygixy ti David ytuun co anajty yuubögyii etz nañ co ymígügtijc anajty yuubögyii ?

⁴David ytiigiyy ma Dios ytiic, chi conigy je tzajcaagy huidibi anajty jiiby ma Dios yhuinduu, chi caay, nañ jadu'n moy je ymígügtijc ajcxy. Je' tzajcaagy ca' anajty ypanyii nicxy je' ajcxy cay. Teedy je' anajty ajcxy paatip cáaygixip.

⁵Chi Jesús yjacminañ:

—Hich je' je jäy huidibi tzoon tzajpjoty, jëbi nnimäyich je jäy ajcxy ti jëbi huaad ytúngixy sábado xii.

Je yëydijc huidibi anajty yci' tidzip

⁶Chi jadügtecy yajti tüg pocxxiídum, co Jesús ytiigiyy ma tüg naymujctac, chi jäy yaj'ixpijcy. Jiiby anajty tüg yëydijc huidi y'a'oygi' anajty tidzip. ⁷Chi huidi ajcxy yaj'ixpijcp Dios ñecy etz fariseojäy ajcxy ix'ijxy pa'íjxcixy Jesús nej pen jäy yajtzögam pocxxiídum, e je' ajcxy anajty miid ycixpi xihua'ñ. ⁸Jesús ñejhuiiyb je' anajty ajcxy yjot yhuinma'ñ. Chi Jesús nimay je yëydijc huidibi anajty yci' tidzip:

—Pidig, tinayig mayjäy'agujc.

Chi je' ytinaayigy. ⁹Chi Jesús yminañ:

—Nyaj'amidohuaamybich miich ajcxy tüg ayuc. ¿Nej Dios ñecy ymina'ñ, jëbi oybi nduunim pocxxiídum o jëbi jibicpi nduunim,

nyajtzoocim jäy o nyajtigooyim jäy yjuy'ajt?

¹⁰Chi Jesús ajcxy huindixpejtay nidüg'óciy, chi nimay je pa'mjäy: —Xajtiu mgi'!

Chi je' yci' xajtiy, huin'it je' yci' choocy. ¹¹Chi je' ajcxy huidi yaj'ixpíjcp Dios ñecy etz je ixpícytíjc huidi ajcxy mijpidacp judío ycostumbre ooy ajcxy yjot'ambíjcy, ñayñimáayigíxy miñ xyípy:

—¿Nej ajt n'octuunim jada Jesús?

Jesús huin'ixy je majmetzpi discípulos ajcxy

¹²Jadu'n yjajti huin'it xii Jesús ñíxcy mijtigáduum Dios ojadajtpi. Tüg tzuum ooy Dios mibíjctzooy.

¹³Co yxiimíy, chi Jesús huoomiñ yi' ydiscípulos ajcxy. Chi huin'íjxy je majmetzpi, etz yxiimoy ajcxy, apóstoles. ¹⁴⁻¹⁶Chi Jesús yhuin'íjxy je Simón huidi yxiimoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huidi jäy ytíjpy Zelote; Judas, Jacobo y'uch; etz Judas Iscariote huídibi ñañ jadu'n Jesús cäyjc ma ymidzip.

Jesús yaj'ixpícy mayjäy

¹⁷Chi Jesús miid'idacy je discípulos ajcxy, chi oy yhuäcxípy ma tüg ajoy miid ydiscípulos ajcxy etz mayjäy huidi anajty ti choongíxy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayjäy co amidoo'idáani Jesús y'ayuc etz ñañ chögaangíxy je pa'm huidi ajcxy ymiid. ¹⁸Cham je huidi

anajty ayo'n tzachpaatp miid ca'oybi, ñañ tzoocp je' anajty ajcxy.

¹⁹Chi tüg'óciy je jäy ajcxy janch ñüdonamy anajty ajcxy je Jesús, co ymiid mic'ajt co jäy tüg'óciy yajtzög.

Je jotcujc'ajt etz je cajotcujc'ajt

²⁰Chi Jesús huindixpejtay je mayjäy huidi ajcxy ixpígaam yi' y'ayuc, e ymiñ:

—Jotcujc miich ajcxy ayoohtíjc, com miich ajcxy cham xypaat Dios y'ané'min.

²¹Jotcujc miich ajcxy huidi cham yuubó'cip, co mgüxiib miich ajcxy. Jotcujc miich ajcxy huidi cham jotmay miid, co ypáadip xii tiempo mina mxondáaccíxy.

²²Jotcujc miich ajcxy mina anajty jäy ca' xy'ixáangíxy, co pin xy'ixtíjcxípy, e co jäy ajcxy jibic xyñigapxa'ñ xyñixiga'ñ miid iich ycíxpi, je jäy huidi tzoon tzajpjoty.

²³Mxondäg miich ajcxy huin'it xii, etz mjotcugíygyxípy, com ooy chachmíjty huidi ajcxy mbadaamy tzajpjoty. Com jadu'n anajty jecy'ajty miich mmij'ap mmijteedy ca' ixaangíxy je huidi anajty Dios y'ayucnajtzcaxíyípy.

²⁴Miich ayoob ajcxy comeñyjäy, com ca' ti jotcujc'ajtin mjacpadaangíxy huin'it xii (co Dios tíydunip je naaxhuiñyjäy).

²⁵Miich ayoob ajcxy huidi cham oc'agujc'ajtp ocjotcujc'ajtp, ayo'n jotmay ajcxy mbaadip, e myajmayjadípy miich ajcxy tijaty.

²⁶Miich ayoob ajcxy co ajcxy myajni gapxípy myajnimíydägípy, com jadu'n jecy'ajty miich ajcxy mmij'ap mmijteedy nimay je jäy

ajcxy co ooy y'oyjäy huidi ajcxy anajty najtzcaxiïyb ayuc huidibi ca' ytiy yjanchity.

Nej huaad nmigüg ndzójcim

²⁷Chi Jesús yjacminañ:

—Miich ajcxy huidi cham amido'ijtp iich n'ayuc, iich miich ajcxy nïmaayb: Tzójccix mmidzip, mi'oyjäy'ájtci xuidijaty ca' xy'ixaangixy. ²⁸Migapx je jäy ajcxy miid oyjot oyhuinma'n huidi ajcxy jibic xyñigapxp xyñi'ojiiyb. Mibijctzoogixy yi Dios miid je' ajcxy ycixpi huidibi xyñigapxp xyñi'ojiiyb. ²⁹Pen ji pin xycojxy ma yi mhuinjïp, mo' jadüg adu'm'amy ahuin hueñ coxy. Pen ji pin xypigaani yi mjocxhuit, jactimmo' mñijen huen yajnicx. ³⁰Pin xypijctzohuip tijaty, mo'. Pin xypjci huidi miich mjé'ajtpy, ca' mbijctzohuipy jadüg'oc. ³¹Nej mdzocy tunipy jäy miid miich ajcxy, nañ jadu'n miich ajcxy mdunipy miid yi' ajcxy.

³²Pen miich ajcxy jëyi mdzojccixpy pinjaty xychojccixp, éti oyjäy'ájtin jada' miich ajcxy m'ocpaadipy? Nañ jadu'n je pocyjäy ajcxy chojcpy pinjaty yi' ajcxy tzójcip. ³³Pen mdumyb oybi huidijaty mmiid ooy mnaymigüg'adyii. éTi oyjäy'ajtin jada' miich ajcxy m'ocpáadip? Nañ jadu'n je pocyjäy ajcxy tuñ oybi miid ymigügtijc. ³⁴Pen myejcpjctzou miid je jäy huidibi miich ajcxy mjïp'ijxpy co nañ jadu'n xymöhuipy tigatii, éti oyjäy'ájtin miich ajcxy mdumyb? Nañ jadu'n yi jibic jäydijc jayejcpï tijaty pijctzoy co nañ

jadu'n jïp'ijxcixy co ymöhuipy tigatii. ³⁵Miich ajcxy, tzójcix mmidzip, mi'oyjäy'ájtci x mmidzip, yajpïjctzoogix tijaty, e ca' ni ti mjïp'ijxcixipy co ajcxy jac mij mbaadip. Jadu'n miich ajcxy mij mbaadip oy'ájtin e mnaydijiiyb ajcxy je mijpi Dios y'lung. Com Dios pa'ayoodaayb tüg'óciy yi jäy ajcxy huidibi ca' ti jäygidägy, etz huidi jibicjäy. ³⁶Miich ajcxy pa'ayoo migügtijc ajcxy, jadu'n nej mDios Teedy tzajpjotypi ypa'ayooy huenyimpñity.

Ca' mmigüg ni ti myaj'ix'ixipy myajpa'ixipy

³⁷Ca' mmigüg ni ti myaj'ix'ixipy myajpa'ixipy, huin 'it ca' pin xy'ix'ixipy xypa'ixipy. Ca' mmigüg mbocy'ixipy, e huin'it ca' pin xypocy'ixipy. Huinmecx mmigüg, e huin'it nañ jadu'n Dios myajhuinmeecxip. ³⁸Mo' mmigüg etz huin'it miich ajcxy Dios xymöhuipy quipxy ooy tijtäch etz janch yajxon y'újtzyt cödínaayb. Com yi quipxi'n tiibi myajquipxiy, nañ yi' miid xyquipxhuimbidity.

³⁹Chi Jesús yajnimay je mayjäy tüg jihuimbit ayuc:

—éNej jëbi tüg jäy huintzpi ymigüg huintzpi huijtzoyöni? éNej ca' mdijy nimetz yjutcögägixipy?

⁴⁰Ca' ji ni tüg ixpïjcpï huidi nïgi ixpïcyip ca'ydi yhuindzin, pen ji pin huadz yjadim'ixpicy najtzpadihuipy yhuindzin.

⁴¹éNa'amy co mic'amy mbocy'ixy mmigüg co hueeni ytundigoy, e miich jac mij ooy mdundigoy, e ca' mjihu'iñybicy? Tim jadu'n nipaady nej jihuïy ti m'ixy pi'cpüx

ma mmigüg yhuuin, e ma miich mgi'mhuuin jac jiby mij quipy, e ca' m'ixy je quipy ma mgi'mhuuin. ⁴²Ca' huaad mnimähuipy mmigüg: “Nayyegii miñich püx n'ocyajpidzim maabi mhuiin”, e miich ca' m'lijxy mij quipy ma mgi'mhuuin. Jibicjäy miich. Jayijp miich myajhuädzip mjot mhuinma'n, huin'it jëbi mmigüg m'iihuüjip mgapxhuüjip, jadu'n nipaady nej jihuüy ti myajpidzimy je quipy maabi mhuiin, jachuädz m'ijxigipy e chi jëbi yi pi'cpüx myajpidzimipy maabi mmigüg yhuuin.

**Je quipy je ytiim, yi' miid
ycixpi yaj'ijxcapy**

⁴³Ca' yi' y'oyjäyity huidi jibic tuumb, nañ jadu'n ca' jibicjäy huidi oy tuum, tim jadu'n nipaady nej tüg quipy. Ca' ji yi' oyguipy huidi jibic tiim'ajt, nañ jadu'n ni ca' yjibicquipyity huidi oy tiim'ajtp. ⁴⁴Com ni je' quipy yaj'ijxcapj miid ytiim ycixpi. Ca' pin higueri tiim tucy ma quipy apymiidpi. Nañ ni pin ca' uvas cha'm piy ma aadz apymiidpi. ⁴⁵Je jäy oyjäybi ma yjot yhuinma'n yajpidzimy oybi. Je jibicjäybi ma yjot yhuinma'n yajpidzimy jibicpi. Huidibi yhuinmaayb jotjoty huinma'nnyjoty yi' ycapxyp.

Je mejznajxpi poch y'ijx

⁴⁶Chi Jesús yjacminañ: —¿Nej co nigo minaangixy: “Huindzin, Huindzin”, ni ca' ajcxy mdúngixy huidi nyajniimaaygixpy? ⁴⁷Tüg'óciy jäy huidi xyñimimbich etz xymidoohui iich n'ayuc etz cuyduñ, iich nyajni'ixihuipy pin

je' ymidügnax. ⁴⁸Quipxyiib tüg yëydijc huidibi ytijccoyp ma tzaa nïcxy, chi nidajy ooy cicy, chi pidägy poch'ijx tzaa nigíxy, co mijni ycomy nimiñ je tijc, miid tüg'óciy ymijaa jayajpidiga'n je tijc, e ni ca' jadu'nny yajyücx, com tzaagíxy anajty ypojtztzooñity. ⁴⁹Yi jäy huidi midoob iich n'ayuc e ca' cuyduñ, miidquipxyi yjadu'n yi' nej tüg yëydijc co ti ytijccoyp. Ni ca' poch cicy ypojtztzooñity, jëyi naaxhuingíxy nidajy hueeni. Co je mijni ymiñ miid ymijaa, chi yajpidigy je tijc, chi oy yhuindigoydäy.

**Jesús yajtzögy tüg mijtungmiidpi
Romano ytumbi**

7 Co Jesús ycapxtaay ymiydactaay miid je mayjäy huidi anajty jim amido'ijtp, chi ytigiipy jim Capernaum. ²Jim anajty tüg Capitán tüg ytumbi hue' anajty p'jicp, janch tim ögaanip anajty, e je soldado huindzin ooy anajty tzocy je ytumbi. ³Co je capitán ayuc midooy jadu'n nej Jesús ytuñ, chi quejxy judío mijjäydijc, huen nïcxy minuucxtaaccixy Jesús co je' yminiipy ma ytijc yajtzögiiyb je' ytumbi. ⁴⁻⁵Chi je mijjäydijc ajcxy ymiñ ma Jesús, chi ajcxy cohuaniiy ooy, pijctzou may'ajt, nimay: —Jadayaabi capitán ymihuaad co mbubedipy, com yajmij'ajtpy iich ajcxy ngajp, ti cojy iich ajt naymujctac. ⁶Chi Jesús nïcxy miid je' ajcxy. Co ajcxy mihuingooñ je tijc, chi je capitán quejxy ymigüg huen nïcxy jijpcobadiy Jesús, nimähuipy: —Huindzin, ca' nej mnayjihuiy, ca' iich mihuaadity co mdigihuipy

ma iich ndijc. ⁷E paady ca' iich njot ti mictuñ co iich miich ci'm n'ícx n'íxtäy. Jëda'ajty miich nigoo capx, e ti anajty ndumbich chögy. ⁸Nañ jadu'n iich nmíidich soldados ajcxy huidi ajcxy xycapxcöbijcpich. Nimäyich tüg: "Nícx", e nícxp; nimäyich jadüg: "Min", e mimb; nimäyich ndumbi: "Tun jada", e ytumyb.

⁹Co Jesús midoy nej je capitán ymínañ, chi jihuiy ooy, chi ni'íjxhuimbijty nimay ajcxy huidi pamiinip:

—Íich miich yim nimaaygixyp co ca' nbaadyich Israel jäy huídibi xymibjcpich jadu'n nej jadayaab agatz jäy.

¹⁰Co ajcxy je quexyöybi yhuimbjtcixni ma je tíjc, chi oy páatcixni je tumbi ti anajty y'agidägy.

Jesús yajjugypijcy tüg co'ögytöxyjäy y'ung tiibi anajty y'ögy

¹¹Chi jadu'n yjajty huin'it xii co Jesús anajty ñícx ma tüg cajp huidi anajty yxii Naín. Miid anajty ñícx jadyii ydiscípulos ajcxy etz mayjäy. ¹²Co yhuingooñ ma anajty ycajp tigíhuaani, chi minaybaati jäy ajcxy, ñícx anajty ajcxy tüg öcpi yajnaaxtigíygyxy, huidi anajty ungdaj tügpajc y'ung'ajtpy. Hue' je' anajty co'ögy je töxyjäy, e miid anajty ñícx maycajppjäy. ¹³Co je Huindzin Jesús íjxy, chi pa'ayogoty je töxyjäy, chi nimay:

—Ca' myäxy.

¹⁴Chi Jesús ymíjhua'cy, nidoñ je öcpi cajón. Chi ajcxy ytinayxijpy je huidi anajty ajcxy öcpi ciyñícxp. Chi Jesús ymínañ:

—Yëydijc, iich miich yam nimaayb, pídiğ.

¹⁵Chi je yëydijc iñayígy huidi anajty ti y'ögy, e ytigíy miydaacp. Chi Jesús yajcídigiñi je' ytaj. ¹⁶Chi ajcxy nidüg'óciy ooy ñay'adzigiyyoti, e Dios jäymejch cömay, ymínaangixy:

—Tüg mijpi Dios tiy'ajtmítpi cham yajpatp ma iich ajt.

Nañ jadu'n ajcxy ymínaangixy:

—Ti Dios ni'íjxcidägy yi yñaax ycajp.

¹⁷Ooy Jesús yajcömay ma tüg'óciy Judea naaxjot, etz ma tüg'óciy jac huinduy agonbi naax cajp.

Je Juan je Bautista yquexyöybi

¹⁸⁻¹⁹Chi je jäy ajcxy huidi anajty Juan je Bautista yaj'íxpjcpy nimíydactay jadu'n nej miid ytuni yjajti Jesús. Chi Juan huooy metz yi' ydiscípulos ajcxy, e quejxy ma Jesús yajpaady. Chi Juan nimay co huen nícx amidoogixy Jesús, pen yi' je' je Cristo huidi anajty miinaam, o pen n'ahuíjpxy ajcxy huingbi. ²⁰Chi je Juan yquejxyöybi miñ ma Jesús nimay:

—Yi Juan je Bautista iich ajcxy ti xyquéxyich ma miich amidohua'ñ pen miich je' je Cristo huidi minaamb, o ñn'ahuíjxypich ajcxy huingbi?

²¹Tim huin'ítíy Jesús ooy mayba'mjäy yajtzoocy. Yajtzoocy nañ jadu'n huidi anajty ajcxy ooy mij yuu mij pa'm yaj'ayoyii, etz nañ yajtzoocy pinjaty anajty ca'oybi miid ma yjot yhuinma'ñ. ²²Chi Jesús je Juan yquejxyöybi nimaayi: —Nícx nimaaygix je Juan jadu'n nej ti m'íjxcixy ti mmidoogixy,

co yi huintzpi ti yhuindicxígy, yi tecyma'tpi ti yöyígy, yi nibützpa'mmíidpi ti chögy, je cónatpi ti ymidohuëccixy, je öcpi ajcxy ti yjugypíjcy, e ngapxhuäcxyich oybi ayuc ma ayoohtíj. ²³Jotcujc yi' ajcxy huídi ca' huinma'ñytigooygíxy miid íich ycíxpi.

²⁴Co je Juan yquexyyöybi yhuimbíjttay, chi Jesús nimíydaccoty je Juan ma je mayjäy ajcxy, ymínañ:

—Co ajcxy ti m'oy míjtigíduum, éti ti m'íjxcíxy? éNej ti m'íjxcíxy tüg jäy ametz jotmetz, jadu'n nejhuíy tüg náhuaax huídi pojmiimb pojxíj? ²⁵Chi jada', éti oy ti m'íjxcíxy? éTüg yöydíj huídi miid oy yhuít yxöxyíty? Yi jäy ajcxy oy yxojxypi huídi agujc jotcujc tzínaaygíxp hue' ajcxy jajpaady ma yi rey ytíj. ²⁶éTi ajcxy ti m'íxy jím míjtigíduum? éTüg jäy huídi Dios ytíy'ajt miid? Janch ti m'íjxcíxy tüg Dios ytíy'ajtmíidpi, etz jacnígi ymíjítý je' ca'ydi Dios y'ayucnajtzcaxíybi huídi jecy'ajty tzínay. ²⁷Je' jada je jäy huídi Dios ñígapxyp ma ñecy ma Dios jadu'n ymínañ:

Cham nguexyích íich nguexyöybi jajíj ma miich, je' jaj'oyíhuíp je jäy ajcxy yjot yhuinma'ñ miid íich ycíxp, tím jadu'n nipaady nej jíhuíy jäy tü'aa jaj'oyíy co rey ymína'ñ yjáda'ñ.

²⁸Íich miich ajcxy yam nimaayb co huídíjaty ajcxy töxyjäydíj jajpi'c'ajtpy, ca' jí ni tüg Dios y'ayucnajtzcaxíybi huídíbi jacnígi ymí jítý ca'ydi Juan, je Bautista.

Chi jada' je jac mutzpi huídi jíiby tzajpjoty jajpaatp ma Dios y'ane'my, jacmíj je' ca'ydi Juan.

²⁹Co ajcxy je mayjäy jadu'n midoy nañ jadu'n je jajcogüejtpídíj ajcxy huídi anajty níibéjtcíxy ma Juan, chi ajcxy mínañ co Dios ytudägyíty. ³⁰E je fariseos ajcxy etz je escribas ajcxy huídi anajty ca' níibéjtcíxy ma Juan, ca' ajcxy míjpidacy huídi anajty Dios ytunamy miid je' ajcxy ycíxpi. ³¹Chi je Huíndzín Jesús ymínañ:

—éTi miid nyajquípíxíhuíbích jadayaabi jäy huídi tzínayb ma jadachambi tiempo? éHuídi miid nyajtügíhuíbích? ³²Jadu'n nej pí'ctíj huídi ajcxy iyíy ma jäy yjuygíxy ytoocíxy. Míjhuan míjjíhuíygyxy ymígügtíj: “Tí njayajxúxích flauta e ni ca' ti m'éjtcíxy; ti nja'ííhuí ajcxy íiy jotmaymíidpi, e ca' ti myaaxcíxy.”

³³Chi Juan je Bautista ymíñ, e je' ca' anajty cay, ni ca' vino ügy, chi miich ajcxy mínaangíxy co Juan ymíid ca'oybi. ³⁴Chi íich, je jäy huídi tzoón tzajpjoty, nmíñích, chi caaybích uucpích, e miich ajcxy mínaangíxy: “Íjxcíx, cha tüg yöydíj janch cax janch vino uucp, huídi mígüg'ajtpy jajcuéjtpídíj etz pocyjädíj.” ³⁵Je tíy'ajt jí je' ñíguéxígy ma je pínjaty nígapxp nimíydaacp tíy'ajt.

Jesús ma Simón je fariseojäy ytíj

³⁶Chi tüg fariseojäy may'ajt píjctzoy, co Jesús anajty miid ycaya'ñ. Chi Jesús ytígíy ma je fariseojäy ytíj, chi íñay'ahuíy ma mesa. ³⁷Chi jím anajty tüg töxyjäy huídíbi anajty jíbic tzínaayb jíbic

jugy'ajtp ma je jimbi cajp. Co je' nejhuiy jiiy Jesús ma fariseojäy ytije inäy ma mesa, chi mimiin tüg quiiig aceite huidibi ooy oy xuugy, chi midigiyy tigoty. ³⁸Chi ypiguetz'ahuiy ma Jesús ytecy ymijc, e chi yajxooci Jesús ytecy miid huinni e yajpöt miid ycöhuay, chi yajjaaxy je aceite huidi ooy oy xuugy. ³⁹Co jadu'n ijxy je fariseojäy, je' huidibi anajty ti huoy Jesús, chi jot'ajti yminañ:

—Co ixypy jada Jesús y'ocjējity Dios ytiy'ajtmiidpi, y'ijxcajpy ixypy pin jäy nejpy jäy yi töxyjäy huidibi nidoonip co yi' yjibictzinäy yjibicjugy'aty.

⁴⁰Chi Jesús yminañ:

—Simón, cham iich tüg ayuc nmídidyich huidi nyajnimähuamy.

Chi je' y'adzooy:

—Yajnimaaaygich, Huindzin.

⁴¹Chi Jesús yminañ:

—Tüg comeñyjäy ymiid anajty metz jäy huidi ti ñuucxy. Tüg jäy anuucxy miigoox miço'px denario meeñ, e je jadügpí anuucxy huixchigui'px majc. ⁴²Com je' ajcxy ca' anajty miidity ti miid cuedip, chi je comeñyjäy huinmecxy nimetz. Miich ocnimaaygich, ¿je metzpi jäy huidi nuucxy, huidibi je' nigí chojpy?

⁴³Chi Simón y'adzooy:

—Hue' n'a'ixiiyich je tiibi huinmecxy jac'anaxy.

Chi Jesús yminañ:

—Ti mdiygapxy.

⁴⁴Chi Jesús ni'ijxhuimbijty je töxyjäy, e nimay Simón:

—¿Nej m'ijxyp jadyaabi töxyjäy? Co ndigiyyich ma mdiyc, ca' miich nii xymooyich co ndecy nbújbich.

Jadyaabi töxyjäy iich ndecy ti xypújip miid yhuinni, e ti xyméexyich ndecy miid ycöhuay. ⁴⁵Ca' iich miich ti xychücxxy. Jada töxyjäy jadu'n nej ti ytije tigiy, xychücxtyiyb iich ndecy. ⁴⁶Iich miich ca' aceite mbidägy ma iich ngohuajc. Jada töxyjäy ti xyajjaaxi ndecyich aceite huidi ooy oy xuugy. ⁴⁷Paady iich miich nyajnimäy co jada töxyjäy huinmecxi yi' ymaybocy, co tiibi oyhuinma'ñ yajtuñ cixyot huinjot. Pinjaty hueeni ypocy yajhuinmecxi, hueeni yi' chójcin yajniquëxygy.

⁴⁸Chi Jesús je töxyjäy nimay:

—Ti miich mbocy yajhuinmecxtäy.

⁴⁹Pinjaty anajty inäayb ma je mesa ñayñimáayigixy miñ xyipy:

—¿Pin jäy jada jada' co ñañ yhuinmecxiipy jäy ypocy?

⁵⁰Chi Jesús nimay je töxyjäy:

—Ti m'alma ñidzögy co ti xymibicyich. Nicx jotcujc.

Töxyjäydijc huidibi anajty Jesús pubejtp

8 Co jadu'n yjajti, chi Jesús ñicxy ma tüg'ócxy je mij cajp etz mutz cajp, capxhuäcxy je oybi ayuc maabi Dios y'ané'min. Je nimajmetzpi ydiscípulos ajcxy miid ñicxy. ²⁻³Etz ñañ ymiidñicx nijējity töxyjäydijc huidi anajty Jesús ti yajtzögy huidi ca'oybi anajty ymiid etz jac tijaty pa'm. Hue' je' ajcxy anajty je María je töxyjäy huidi anajty xíjip Magdalena, je huidibi Jesús yajpidzimi huixtujc ca'oybi ma je'; etz Juana, je huidibi ñäy anajty xiijip Chuza, e je Chuza hue' je' je rey Herodes ytungmiidpi; etz Susana, etz jacjadyii ajcxy huidi

anajty ajcxy pubejt Jesús miid tijaty anajty ajcxy ymiid.

Je niipi y'ijxpejt

⁴Co mayjäy ooy ñayyömuyc ma Jesús yhuinduu huidi tsoon ma tüg tüg cajp, chi Jesús nimay je mayjäy ajcxy:

⁵—Cha tüg ayuc nyajnimähuaangixy. Jadu'n jäy tüg choñ niipi, ñicxy trigo tiim huijpi. Co je trigo tiim huijy, chi nijëjity ypajc oy ycäy mïjtügujc, chi je jäy ajcxy yajhuägpejty, e huidi ca' yajhuägpejty, chi joon piihuügy. ⁶Chi nijëjity trigo pajc oycäy ma tzaa ñicx. Co ymujxy chi je' ytiich, je' co anajty naax ca' yxoogity. ⁷Chi nijëjity trigo pajc oycäy ma apyjot, chi ymujxy quipxy miid apy'ung, chi y'ujtz'o'ctay. ⁸Chi nijëjity trigo pajc oycäy ma je naax oybi huinnätzcuyc, chi ymujxy, chi yeectzooñ, ytiim'ajty oyjaty, tüg trigo pajc migo'px oyco'ity.

Co Jesús je miydägi yajmay chi yjactimcapxcoty, yminañ:

—Pin midohuamb jada ayuc, huen midooy.

Nej yhuimbizimy je niipi y'ijxpejt

⁹Chi je discípulos ajcxy y'amidooy:

—¿Nej jada jadu'mbi jihuimbit ayuc yhuimbizimy?

¹⁰Chi Jesús yminañ:
—Miich ajcxy jaydëbi mnejhuühuipy huidi Dios ñigapxy ñimiydacpy coyüch'amy ma y'ané'min ycötüjcin. Jacjadyiibi jäy jihuimbit'amy nyajnimayich, jaydëbi pinjaty huidi ijxp ca' ajcxy

y'ixipy, etz pinjaty midoob, ca' ajcxy mido'mbigipy.

Jesús capxticxy je niipi y'ijxpejt

¹¹Jadu'n je jihuimbit ayuc yhuimbizimy: Je trigo pajc Dios je' y'ayuc. ¹²Je trigo pajc tiibi tügujc ycäy, je' je' jadu'n nej jäy huidi midoob Dios y'ayuc, chi mic'amy ñiminyi je ca'oybi, e piibizimday je Dios y'ayuc ma yjot yhuinma'ñ, ca'ydi mibic etz ca'ydi y'alma yajnidzögyi. ¹³Je trigopajc huidi cähui ma tzaajot, je' yi' ajcxy huidi je ayuc midoob, chi cöbicy jotcuyc, chi je' ca' ytictztigiy, tzojccixy y'ocmibicy, co agapxiyb paaty chi ixmajtzní. ¹⁴Je trigo pajc huidi ti cähui apy'agujc, je' je' ajcxy huidibi midoob, chi co ñicxni jäydiigooyñi Dios y'ayuc miid jotcuyc'ájtin tzinaayin etz jugy'ájtin etz comeen'ájtin, e chi ca' Dios y'ayuc yhui'my ma yjot yhuinma'ñ. ¹⁵Je trigo pajc huidi cähui ma oyñaax huinnätzcuyc, je' ajcxy huidi oy etz tudägy yjot yhuinma'ñ miidty. Chi je Dios y'ayuc midohui'my, e oñdägy'amy Dios y'ayuc ymayiy ma yjot yhuinma'ñ.

Je lámpara ñi'ijxpejt

¹⁶Co jäy ajcxy jindicxi'ñ nöctzoy, chi ca' ajcxy cöjupy miid tu'tz, nañ ca' huaad pidägy cijx pätc'i'py, hue' janchtiy pidaaccixy ma jindicxpejt, co pin ytigiy jëbi ixy je jiin. ¹⁷Ca' ni pin ayüch tunipy e nicxy ycayajnejhuüy, ca' ni pin ti tunipy ameech e nicxy ycaniquëxigy. ¹⁸Paady miich ajcxy midoogix yajxon co pin tijaty miid,

jacyajmöhuiip yi'. Pin ti camiid,
yajpigipy je' huidi anajty yjamiid.

Jesús ytaj etz je jugymigüg

¹⁹Chi Jesús ytaj etz y'uch ajcxy ñimiini, ca' ajcxy nimejch Jesús yajxon miid mayjäy ycixpi. ²⁰Chi Jesús yñimaayi:

—Cheeby mdaj etz m'uch ajcxy tiba'y, miich ajcxy xyjamigapxam.

²¹Chi Jesús yminañ:

—Yi jäy ajcxy huidibi Dios ayuc midoohuipy etz cuyduunip, y' iich ndaj'ájttypich etz n'uch'ájttypich.

**Jesús yajxemy je poj etz je
ni co anajty chachpidígy**

²²Chi tüg tecz yjajti Jesús ytiigiyy ma tüg barco miid ydiscípulos ajcxy, chi Jesús yminañ:

—Tzoc jim'amy ñiinaxy náxim.

Chi ajcxy chooñ. ²³Chi niigujc anajty níxcxicy co Jesús ymi'ögy. Chi tüg mic poj miñ ma je meyy. Chi je barco ñii yajtigiyiyyi, janch yinjaty jahueenjaty ycaquiñ. ²⁴Chi ajcxy Jesús nimijhuägy, tijyücxyc ajcxy nimaagyixy:

—iHuindzin! iHuindzin! Cham ajt n'ocquiinim.

Co Jesús oy ymäyhuijy, chi jijpcogapxiyy je poj etz je meyy co anajty chachmijjéztpey ma barco. Chi je poj yhuäcxijtpay, y'amoonday.

²⁵Chi Jesús yminañ:

—¿Ma miich ajcxy je mmibájcín?

Chi ajcxy yjanchchigiyygoty janch yhuinmay ajcxy ñayñimáayigixy miñ xyípy:

—Pin yéydijc jada jada' co je poj etz nií jiiiguexy, etz yajhuäcxipy, etz ycapxycöbigyii.

**Je Gadarajäy huidibi
anajty ca'oybi miid**

²⁶Chi ajcxy ymejch ma je gadarenos naaxjot, huidi hui'm jim'amy ñiinaxy ma je Galilea mijlaguunba'. ²⁷Co Jesús ñiibidzimy, chi jijpcobadiy tüg yéydijc huidi anajty ti choñ ma je Gadara cajp. Je' anajty ymiid ca'oybi, ti anajty yjejcni maabi ypadyii. Ca' je' anajty huit yajtuñ, nañ ni ca' anajty chinäy ma ytijc, öcpijut anajty yajtzinähuiiyb. ²⁸Co je' ixpaty Jesús, chi yaaxqueecy, e ycoxtinay'ahuuiy ma Jesús yhuinduu, yminañ janch mic:

—¿Ti iich miich co xyñimiiñich, Jesús, tügpajc mijpi Dios y'ung? Tun may'ajt ca' nijot xychachchaachytúñich.

²⁹Jadu'n minañ com co anajty Jesús ixquexy je ca'oybi ma je jäy, ti anajty yjejcni ma je ca'oybi anajty tzach'ane'my je jäy. Coxoch anajty ymigügtijc ymiid'adyii miid cadena. Janch ypojtpy cadena, chi ca'oybi anajty yajnicxyii migtigüduum.

³⁰Chi Jesús y'amidooy je locijäy:

—¿Ti miich mxii?

Chi je ca'oybi yminañ:
—Hich nxii Legión (hue' yhuimbizimy nimay).

Jadu'n minañ com nimay anajty ca'oybi ti ytiigiyygixy ma je jäy.

³¹Chi je ca'oybi may'ajt pijctzoy ma Jesús co ca'ydi yquexyii ma ayoodactuuby. ³²Jim anajty tüg quepy idzim chachjiicxicy ma je utzjot. Chi je ca'oybi may'ajt pijctzoy co huen yajtigiyihuijy je' idzim. Chi Jesús ni'adzooy. ³³Co je ca'oybi ypidzimy ma je jäy, chi

ytigiïy ma je may'idzim. Huin'it je may'idzim ñayñajtzjibibiyaayi ajcxy ma tüg ahuoc, chi oy ajcxy ycädäy nijoty, chi y'ögtay.

³⁴Chi je idzim cuend'ajtpi ajcxy co ix y jadu'n nej ti yjadyi miid ajcxy y'idzim, chi ajcxy yqueecy, oy nimiyaaccixy cajpjoty etz majaty tundac. ³⁵Chi mayjäy ajcxy chooñ oy ñxcixy jadu'n nej anajty ti ytunyii ti jadyi, oyja'tcixy ma Jesús. Chi je mayjäy ajcxy paty je yëdyjc, tiibi anajty ca'oybi ñ'ibidzimyii ycöbidzimyii, ñäy ma Jesús yhuinduu, huit miid etz huijy quejy, chi ooy je jäy ajcxy chigiïy. ³⁶Chi pinjaty ajcxy iïx miid miydacy jadu'n nej yi' choocy, je jäy huidi anajty ca'oybi miid. ³⁷Huin'it tüg'öciy je mayjäy ma gadarenos naaxjot etz jadyi cajp huinduy agonbi, chi ajcxy may'ajt pijctzoy ma Jesús co huen jihuägy ma je' ajcxy, co anajty ooy chigiïygixy. Chi Jesús ytigiïyñi barcojoty yhuimbijtni. ³⁸Chi je jäy tiibi anajty ca'oybi ñ'ibidzimyii ycöbidzimyii pijctzoy may'ajt co miid'idan Jesús. Chi Jesús miid capxycíjxy, nimay:

³⁹—Nihuimbit mdïjc, etz nimiydäg jada mijpi tung huidibi Dios ti tuñ miid miich ycixpi.

Chi je' ñicxy capxhuäcxy je tiy'ajt cajp cajp jadu'n nej anajty mijhuinma'ñ Jesús ti tuñ miid je' ycixpi.

**Je Jairo ñiix etz je töxyjäy
huidibi Jesús yhuitpa' nïdoni**

⁴⁰Jadu'n yjajti co Jesús yhuimbijty co chooñ Galilea, chi je jäy ajcxy cöbijcy Jesús janch agujc jotcujc, com nidüg'öciy anajty

ooy jïjp'ñxcixy. ⁴¹Chi tüg yëdyjc huidi anajty yxii Jairo huidibi anajty mijtungmiid ma judíojäy ñaymujctac ymiiñ ma Jesús, chi minucxtacy Jesús pijctzoy may'ajt co huen nicxy ma je' ytïjc. ⁴²Jairo ymiid anajty tügpaic ñiix, hue' anajty yjimïjt majmetz, janch tim ögaanip anajty. Co Jesús ñicxy miid je', chi janch mayjäy anajty chach'adijïyii chach'agodïyii.

⁴³Chi tüg töxyjäy huidi anajty yxii ybo', ca' anajty y'oc-huäcxijpni, mïmajmetz jimïjt anajty cujc jadu'n mï'ijtni. Ti anajty ymeëñ yajtundäy ma je tzoymbi ajcxy, etz ni pin anajty ycayajtzögyi. ⁴⁴Chi je töxyjäy nimijhuägy je Jesús, chi nïdoni yhuitpä. Janch mic mic je yxii ybo' oy yhuäcxipy.

⁴⁵Chi Jesús yminañ:

—¿Pin xyñidoñ iich nhuit?

Chi ajcxy y'adzooy co ca' pin. Chi Pedro etz tüg'öciy miid je' yminañ:

—Huindzin, jäy ti xy'adijïy ti xy'abodïy etz miich mina'ñ: “¿Pin ti xyñidoñich?”

⁴⁶Chi Jesús yminañ:

—Nidügti ti xyñidoñich.

Nnejhuïybich co miid nmic'ájtich ti nyajtzögyich pinjaty.

⁴⁷Co je töxyjäy jihuiïy co ca' coyüch yhuï'ma'ñ, chi nimiñ janch tziyuuyb. Chi yhuindacy ma Jesús yhuinduu, chi capxpïdzimy mayjäy'agujc ti ycixpi anajty co ti nïdooni Jesús yhuitpa', e co anajty mic'amy ti chögy. ⁴⁸Chi Jesús nimay je töxyjäy:

—Töxyjäy, ti mdzögy co ti

xymibicyich, nicx jotcujc.

⁴⁹Yam Jesús anajty ycapxpy, co ymiñ tüg jäy huidi anajty ti

chooñ ma Jairo ytiĵc; je Jairo nihuindzin'ajtp anajty je judiojāy naymujctac, chi nimaayi:

—Ti y'ögy miich mniix, ca' mjac'amayïy niĵi yi Huindzin Jesús.

⁵⁰Co Jesús jadu'n midooy, chi yminañ:

—Ca' mdzigïy, mibijcich janchtiy, etz tzögip yi mniix.

⁵¹Co Jesús ytiĵiyy ma je tiĵc, chi ca' a'ixiyy niĵcxy ytiĵiyy hueñypñity miid je'. Jëyi Pedro, Jacobo, Juan etz je töxy'anäg ytaj yteedy ytiĵiyy miid Jesús. ⁵²Chi tüg'óciy je mayjāy ajcxy janch yaaxp, janch ñé'mgixy miid je töxy'anäg ycixpi. Chi Jesús yminañ:

—Ca' myaaxcixy, ca' yi' ögity, maab yi'.

⁵³Chi niĵoob ajcxy niĵiicy com ti anajty nejhuiyigixy co ti y'ögni.

⁵⁴Chi Jesús majch je töxy'anäg ma yci', chi miĵapxy miĵc, yminañ:

—Töxy'anäg piidig.

⁵⁵Chi je' yjugypijcy, e miĵ'amy ypidigy. Chi Jesús yminañ co huen yajcaaygixy yaj'uuccixy. ⁵⁶Chi ytaj yteedy ajcxy ooy chigiyy yjihuiy. Chi Jesús nimay co ca' huaad pinjaty miidmiydäĵipy jadu'n nej ti tuñiyyi yjadyii.

Jesús quejxy ayuccapxhuäcxp je nimajmetzpi ydiscipulos ajcxy

9 Co Jesús yajyöymujctay je ni majmetzpi ydiscipulos ajcxy, chi moy je miĵ'ajt jaydëbi yajtzögipy pa'mjäy, etz moy ajcxy nañ jadu'n cötüjcin co ajcxy ixquexipy je ca'oybi. ²Chi quejxy je' ajcxy ñicxy capxhuäcxixy jadu'n nej Dios y'ane'my, etz yajtzooocixy pa'mjäy. ³Chi Jesús yminañ:

—Ca' ni ti tül'amgixpi mminíxcixy; ni mgaminíxcip mdajc, ni mmorral, ni mgaagy, ni meeñ, e ni mgaminíxcixipy ajcxy metz mhuit. ⁴Huen tim huidi tiĵc ma anajty mdigiyyigixy, jim ajcxy huí'mgixipy, e jim ajcxy nayyöyhuäcxiiyb. ⁵Hueñyma'amyity ma ca' jāy xycöbñccixy, co ajcxy mbidzimgixipy ma je' cajp mhuinnépcixipy mhuinjáaxcixipy je naaxjoc ma mdecy. Jada je' tiy'ájtíp co Dios tzaachytunipy yi jadu'mbi jāy ajcxy.

⁶Chi ajcxy ñayyöyhuäcxtaayi, ñicxy ajcxy cajp cajp capxhuäcxixy je oybi ayuc, etz yajtzooocixy pa'mjäy hueñytimma'ámyity.

Co Juan el Bautista y'ögy

⁷Je rey Herodes co nejhuiy jadu'n nej Jesús anajty miĵhuinma'ñ tuñ, chi ooy anajty tzachnejhuñhua'ñ pin je' anajty. Com niĵëjty jāy anajty yminaangixy co ti Juan jugypicy.

⁸Chi jacnaagity yminaangixy co Elías ti ñayguëxigiyi, e jacnaagity yminaangixy co tüg Dios y'ayucnajtzcaxiiybi je' ti yjugypicy huidi jecy'ajty octzinaybi. ⁹Chi Herodes yminañ:

—Hich yi' ni'ane'mdiy co huen ajcxy Juan ycohuajc yajminajci. ¿Pin jada jada' huidi iich nmidooybich co tzachnimiydaaccixy?

Herodes ooy anajty ja'ixa'ñ Jesús.

Jesús yajcay miĵoox mil jāy

¹⁰Co je apóstoles ajcxy yhuimbjty, chi yajmiidmiydactay ajcxy Jesús tüg'óciy tiibi anajty túngixy. Chi ac jëyi ydiscipulos miid'ajty Jesús miĵtiĵiduum

huington ma tüg cajp huidi yxii Betsaida. ¹¹Co je mayjäy ajcxy nejhuii, chi ajcxy panicxy Jesús. Chi Jesús je mayjäy cöbïjctay etz yajmiidmiydacy ajcxy Dios y'ayuc ytiy'ajt nej ané'min cötújcïn miidity. Jesús nañ yajtzöcpy anajty huidiyat yajtzoyihuaam.

¹²Co oy chu'iiyñi, chi ymijhuägy je nimajmetzpi ydiscípulos ajcxy ma Jesús, chi ajcxy nimay:

—Capxycijxni miid jadayaabi mayjäy ajcxy, jaydëbi ajcxy ñicxipy ma yi cajp huidi huinduy agon yajpaatpi, huen nicxy ixtaaygixy jättac etz jim ajcxy paadipy caayin uucin. Com hue' jada it ma iich ajt yam nyajpaatim mijtigëduum.

¹³Chi Jesús yminañ:

—Mooygix miich yi' ajcxy ycaayin y'uucin.

Chi je' ajcxy y'adzooy:

—Jëyi iich ajcxy nmiididyich migoox tzajcaagy e mejtz acx, nigo co ca' iich ajcxy njuy caayin uucin miid jadayaab mayjäy.

¹⁴Hue' anajty oy nimigoox mil je jäy. Chi Jesús nimay je discípulos:

—Yaj'ixtaaccix ajcxy yi mayjäy.

¹⁵Chi ajcxy jadu'n cuyduuñ, yaj'ixtactay ajcxy je mayjäy. ¹⁶Chi Jesús conigy je migooxpi tzajcaagy, etz je metzpi acx, chi ypa't'ijxy tzajpcixy conuucxy je tzajcaagy etz acx, huin'it tujc-huäcxy moy je' ydiscípulos ajcxy, huen yajhuäcxixy ma tüg'óciy mayjäy.

¹⁷Chi ajcxy ycaay cüxy, huin'it ajcxy yajmujcy je tzajcaagy yconaxy etz je acx yconaxy majmetz cach.

Pedro capxypidzimy co Jesús yi' je' je Cristo

¹⁸Chi jadu'n yajti co Jesús anajty ycapxtägy ahuingujc miid je'

ydiscípulos ajcxy, chi Jesús je' ajcxy y'amidoy:

—¿Pin iich jäy xytijy?

¹⁹Chi ajcxy y'adzooy:

—Nijëjity jäy xytijy co miich je Juan je Bautista; nijëjity yminaangixy co miich je' Dios y'ayucnajtzcaxiiby huidi jecy'ajty tzinay e ti yjugypicy.

²⁰Chi Jesús yminañ:

—¿Miich ajcxy, pin iich miich ajcxy xytijcixy?

Chi Pedro y'adzooy:

—Dios yCristo.

Jesús capxypidzimy co y'öga'ñ

²¹Chi Jesús pidacy ané'min etz cötújcïn co ca' ajcxy ni pin yajnimähuip co yi' je' Cristo. ²²Chi Jesús yminañ:

—Ooy ycopicyity co iich, je jäy huidi tzoon tzajpjoty, canaag nax ayo'n nbáadibich, ca' xymijpidägibich je mijjäydijc, je teedy tungmiidpi, etz je' ajcxy huidi yaj'ixpicy Dios ñecy, e co n'ögip njugypigipyich codugiig xii.

²³Chi Jesús nimay ajcxy nidüg'óciy:

—Pen ji pin xypanicxa'ñich, huen jäydigoydäy yci'm tzójcïn etz huen xypanicxyich jabom jabom, oy nej ytimyjadipy ytimy'ayoohuipy, tim nipaady nej jihuüy ti cabigy mgruudz jabom jabom etz pajamgich. ²⁴Huen pinjäy huidibi ca' yega'ñ yi yjugy'ájtin ma yi o'cin miid iich ycixpi, hue' je' yajtigoyamy yi' yjugy'ájtin. E huen pinjäy huidibi yegamy yjugy'ájtin ma yi o'cin miid iich ycixpi hue' je' ypadamy yi jugy'ájtin. ²⁵¿Ti tüg jäy ypatpy, pen ti paady tüg'óciy

cohuit'ájtín comeen'ájtín ya naaxhuiñ e naysajtigoyii, etz ca' y'alma yajnidzögy? ²⁶Yi jäy ajcxy pinjaty xymidzöydúnibich n'ayuc, iich je' je jäy huidi tsoon tzajpjoty, nañ nmidzöyduniiybich je' ajcxy co anajty nhuimbityich ya naaxhuiñ, miid iich n'ané'min etz nmic'ajtich etz nDéedyich y'ane'm'ajt, etz ymic'ajt, etz miid je ángeles ajcxy ymic'ajt huidibi huadz yjot yhuinma'ñ. ²⁷Janch iich miich ajcxy nimäy co ji jäy ma miich ajcxy huidibi ixipy Dios y'ané'min jayijp ca'ni anajty y'ögy.

Jesús yajtigach je ñinïcx

²⁸Chi miductujc xiibi maabi anajty jada ayuc jadu'n capxy, Jesús huodzoñ Pedro, Juan etz Jacobo, chi miid'ajtpy jim ma tüg copjijp Dios mibijctzoob. ²⁹Yam anajty Dios ooy mibijctzoy, co Jesús yhuiñyjijp oytigach, e je yhuít yjajty janch poob janch adiicxp. ³⁰Chi metz jäy ñayguëxici, miidgapxy miidmiydägy Jesús, Moisés je' anajty etz Elías. ³¹Huidi ajcxy naygëxici janch jühuidityi anajty ajcxy je tiicxin jájin miidity, nigapxcixy nimiydaaccixy je o'cin huidi Jesús ypadamy jim Jerusalén. ³²Pedro, Jacobo etz Juan ooy anajty ajcxy chachmähuaní, chi ajcxy mi'ögtigooy. Co oy ymäyhuijcixy, ijxy ajcxy Jesús y'adiicxin y'ajajin, etz nañ jadu'n ijxy ajcxy je nimetzpi jäy ajcxy huidi anajty Jesús miidmiydäcxy. ³³Jadu'n yjajty co yi jäy ajcxy puyöduutni Jesús. Chi Pedro Jesús nimay:

—Huindzin, jotcujc iich ajt ya. Tzoc tugiig tijc yaj'oyiiyim, tüg

miich mjëdiiby, jadüg Moisés jëdiiby, etz jadüg yi Elías jëdiiby.

Pedro ca' anajty nehuiiy ti ycapxy. ³⁴Yam ñigi anajty ycapxy co joc ñaaxcidacy huidi yajnidigoy je' ajcxy. Chi ajcxy ooy chigiiy co oy joc yajnidigoydáayigixy. ³⁵Chi tüg ayuc yajmidooy ma je joc yminañ:

—Iich jada n'ung'ajtpy, ooy ndzocyich njihuüyich. Amido'ijti miich ajcxy yi' y'ayuc.

³⁶Co je ayuc y'amoñ, chi ajcxy ijxy Jesús naydüg yhu'i'my, chi ajcxy nañ jadu'n amoñ. Huin'it xii ni ca' ajcxy miydacy miid ni pin jadu'n nej anajty ti y'ijxcixy ti ymidoogixy.

Jesús yajtzögy tüg yeegy'anäg huidibi anajty ca'oybi miid

³⁷Com jabom co Jesús, Pedro, Jacobo etz Juan ajcxy yminajcy ma je copjijp, chi ooy mayjäy chooñ oyjijpcobadiiyii. ³⁸Chi nidügti jäy ycapxy janch mic, yminañ:

—Huindzin tun may'ajt ix iich n'ung, yi' iich tügpajc n'ung'ajtpy.

³⁹Huen mináajity ca'oybi ymachyii, chi timetiini yaaxquëgy yajyachyii yajquidyii, etz yajpidzimy oy yhuin'opy y'aa'opy e adzaach y'ixmachyii. ⁴⁰Ti iich may'ajt nbijctzooyich ma yi mdiscípulos ajcxy, co huen yajpidzimy je ca'oybi, per ca' yi' ajcxy ti mimadägy.

⁴¹Chi Jesús yminañ:

—iMiich jäy ajcxy huidibi ca' mibijcp ca' ajcxy mmijpidäga'ñ yi tiy'ajt! éNaag xii iich njac'idipy ma miich ajcxy nmimecxtújcixipy? Mimin m'ung ya.

⁴²Co anajty yhuingoñ, chi je ca'oybi yajcidaay je yeeg'anäg, chi

ooy yajyatzcooti. Chi Jesús ix'ojy je ca'oybi, e yajtzoocy je yeeg'anäg, chi yteedy yajc'idigiinyi. ⁴³Chi tüg'óciy je mayjäy ajcxy ooy chigiyy miid je mijhuinma'n huidi Dios ytuun.

**Jesús capxidzimy
jadüg'oc co y'óga'n**

Jesús ydiscípulos ajcxy ooy jihuiyigixy huinmaaygixy co Jesús jadu'n yminañ:

⁴⁴—Miich ajcxy yajxon mido'mb'jccix jada ayuc. Iich je' je jäy huidi tzoon tzajpjoty, hue' nyajc'iyega'nich ma pocyjäydijc ajcxy yci'am.

⁴⁵Je' ydiscípulos ajcxy ni ca' anajty huinjihuiyigixy, tzigiyyb anajty ajcxy, paady ca' ajcxy jaty nej yaj'amidóogixipy.

¿Pin je' n'igi jacm'ijip?

⁴⁶Chi Jesús ydiscípulos ajcxy ytigiiy huinmay'ahuidijtp, nejhuíhuaangixy pin je' jacm'ij'idam. ⁴⁷Jesús nejhuiy je' ajcxy yjot yhuinma'n huidi nayajmiidmiydáacip ajcxy, chi tüg pi'c'anäg huijtzigy, ypidacy ma ymijc. ⁴⁸Chi Jesús yminañ:

—Pinjaty xycöb'ijcpich jadu'n nej jada pi'c'anäg xycöbicyich miid iich nxii ycixpi, iich yi' anajty ti xycöbicyich; je huidibi iich xycöb'ijcpich, cöbigiib je huidi ti xyquexyich ya naaxhuiñ. Yi' huidibi jacmútzip ma miich ajcxy, yi' je' jacm'ijpi.

**Pin iich ajt ca'p xymijotma'tim,
je' ajt xym'ijnicxpejtim**

⁴⁹Chi Juan yminañ:

—Huindzin, ti iich ajcxy n'ijxcixy co tüg jäy ti yajpidzimy ca'oybi miid miich mxii miich mmic'ajt. Ti iich ajcxy yi' nyaj'ojyich com ca' yi' iich ajt xypahuidijtim.

⁵⁰Chi Jesús yminañ:

—Ca' myaj'ójcixy yi'; pinjaty ca' xymidzip'ajtim, iich ajt yi' nmiid.

Jesús j'ijpcogapxiy Jacobo etz Juan

⁵¹Jadu'n yjati co tiempo yhuingoni mina Jesús ñicxip tzajpjoty, chi yhuinma'n pidacy co nicxa'n jim Jerusalén. ⁵²Chi Jesús quejxy cogapxy jayijp jättac pijctzoobi. Chi je cogapxy'ajtpi ñicxy ytigiiy ma je samaritano jäy ajcxy ycajp, jättac pijctzoobi. ⁵³Chi je' samaritano jäy ajcxy ca' yega'n jättac, com ñejhuiyigixyp co Jesús etz ymigügtijc ñicxy anajty ajcxy jim Jerusalén. ⁵⁴Co jadu'n Jesús ymigüg ajcxy nejhuiy co je samaritano jäy ca' jättac yega'n, chi Jacobo etz Juan nimay Jesús:

—Huindzin, ¿nej m'al'ixiiyb iich ajcxy n'ocni'ane'mdiyich huen jin cäy huidibi tzomb tzajpjoty, jigix yi samaritano jäy ajcxy ycijxtähuipy jadu'n nej je profeta Elías ytuun jecy'ajty?

⁵⁵Chi Jesús y'ijxhuimbijty, ogy Jacobo etz Juan, nimay:

—Miich ajcxy ca' mnejhuiyigixy ti jot ti huinma'n miich ajcxy miid. ⁵⁶Iich, je jäy huidi tzoon tzajpjoty, ca' ti nmíñich ya naaxhuiñ co jäy yjugy'ajt miñ nyajtgooyich, hue' jáñcht'y ti nmiñich co jäy yjugy'ajt nyajtzoogibich.

Chi ajcxy ñicxni huingbi cajp jättacp.

Je pinjaty anajty Jesús panicxam

⁵⁷Jadu'n yjati co anajty ñicxcixy ma tüg tü'aa, chi tüg jäy Jesús nimay:

—Huindzin, iich miich nbanicxaamy oy tim ma'amy miich mnicxy.

⁵⁸Chi Jesús y'adzooy:

—Yi huaax ymiid yi' ajcxy yjut, etz yi joon ajcxy ymiid ajcxy ype'ñ, iich je jäy huidi tzoon tzajpjoty ca' nmñididyich ma nmähuibich ma nböcxibich.

⁵⁹Chi Jesús nimay jadüg jäy:

—Pajamgich.

Chi je jäy y'adzooy:

—Huindzin, jayijp iich ndeedy n'ocyajnaaxtigihuiipy.

⁶⁰Chi Jesús yminañ:

—Jëbi yajnaaxtigihuiipy huidibi ca' xypanicxa'ñich. Nicx miich capxhuäcxi Dios y'ayuc y'ané'min.

⁶¹Chi jadüg jäy yminañ:

—Huindzin, nbanicxamy yam. Tun may'ajt ocnajtzmazziygich nicxy n'ocmiidcapxycíxyich njuugy nmigügich huidi jim ma iich ndijc.

⁶²Chi Jesús yminañ:

—Pinjaty yhuinma'ñ ti pidägy co Dios ytung tunaani, ca' huaad ixmach je tung, tim jadu'n nipaady nejihuiiy tüg jäy ti ytiigy naaxjidziztzi miid arado, e ca' huaad y'ijxhuimbity com co huinduum arado nicxihuiipy.

Jesús quejxhuäcxy je nidugi'pxmajcpi

10 Huin'it co jada jadu'n ti ñaxy, chi je Huindzin Jesús huin'ijxy jatugi'pxmajc y'ixpijcpidijc, chi quejxigy cogapxy metz metz ma tüg tüg cajp majaty ñicxa'ñ. ²Chi Jesús nimay yi' ajcxy:

—Janch je cosecha ooy ti yhuindiyy, yi midumbi janchtiyy hueeni. Chojcxy co nbjctzöohuim

ma nHuindzin Dios co huen quexy ytumbidijc ma yi cosecha. ³Níxcxcix, iich miich ajcxy nguejxpy jadu'n nej cöbixy y'ung yhuidity pa'uc agujc. ⁴Ca' mminicxcixy mbijty, ni mxäcxuummy, ni mgig, e ni pin ca' mgapxpcöxcixipy tü'am. ⁵Co ajcxy mdigihuiipy huenytmittijcity, jayijp ajcxy mináangixipy: “Ji jotcuje'ajtín ma jada tijc.” ⁶Pen yung naxy je' ajcxy yajpaady, miich ajcxy je mgapxpoccxin jotcuje'ajt myegipy ma je' ajcxy; pen ca' ajcxy yjadú'nity, naadigi'adip huidi anajty ti mgápcxcixy. ⁷Nañ huim'gix ma je tijc, chi ajcxy mgayipy m'ügipy huidi je jäy anajty ajcxy xymooyb, com je tumbi paatip je' je ymuju'ñ. Ca' ajcxy mhuididipy jayjiin jaydijc. ⁸Huenytmihuidi cájpity ma anajty mdigiigyixy, pen je jäy ajcxy xycöbijcp, caaygix uuccix huidi anajty jäy ajcxy xymooyb. ⁹Yajtzóoccx yuujäy pa'mjäy huidijaty jim ma je' ajcxy yajpaady, etz yajnimaaaygix: “Je Dios y'ané'min huingóniñ yi' ma miich ajcxy.” ¹⁰⁻¹¹Huenytmihuidicájpity ma anajty mdigiigyixy, e ca' anajty jäy xycöbigaangixy, co ajcxy mdzoonanip, nimaaygix: “Yi mgajp naaxjoc huidi ti ypety ma iich ndecy nhuinnebéamyich, yi' je' ijxpejt co Dios ajcxy xychaachtunipy. Chi nejhuiigyix miich ajcxy jada co je Dios y'ané'min ti ymihuingoni.” ¹²Iich miich ajcxy nimayb co huin'it xii co anajty yajhuaad'aty, Dios ñigi tzaachtunaangixy je jäy huidi ajcxy ca' miich ajcxy xycöbiga'ñ, ca'ydi Sodoma cajpjäy.

Je cajp huidijaty ca'p ycapxymidoy

¹³Chi Jesús yjacminañ:

—iMiich ayoob ajcxy Corozín jáy! iMiich ayoob ajcxy Betsaida jáy! Co jim ma je Tiro cajp etz Sidón cajp caytuni cayjati je Dios ymijhuinma'n huidi ti ytunyi ti yjadyi ma miich ajcxy, jécyip ixypy ajcxy yjothuimbijtni, etz ti yajniquëxëccixy ixypy miid je yhuít ñaaygixy saci nïjen ñucuyjam ixucuyjam (je' je tiy'ajt co ooy ytajcixy ymaygixy miid ypocy ycixpi). ¹⁴Janch jadu'n yjadipy co anajty Dios yajniögödugiy, ñigi o'ctiy miich ajcxy ayo'n mbaadiyb ca'ydí jadu'n nej Tiro jáy etz Sidón jáy. ¹⁵E miich ajcxy Capernaum jáy ajcxy, ¿nej mminaangixy mjätcixipy tzajpjoty? Hue' m'idaaccixyp miich ajcxy ma yi ayoodactuuby.

¹⁶Je jáy ajcxy huidi miich ajcxy m'ayuc xymidoohuip, nañ xymidoohuüb yi' ajcxy iich n'ayuc. Je jáy ajcxy huídibi miich ajcxy ca' xy'ixa'n, nañ ca' je' ajcxy xy'ixa'nich; e pinjaty ca' xy'ixa'nich, nañ ni ca' yi' ixaangixy je Dios je huidi ti xyquexyich ya naaxhuin.

Chi ajcxy je nidugi'pxmajcpi yhuimbjtcixni

¹⁷Chi je nidugi'pxmajcpi huidi Jesús yquejx ayuccapxhuäcxpi yhuimbjttay ajcxy janch jotcujc, yminaangixy:

—Ixti je ca'oybi ti iich ajcxy xycapxycöbñjccixy miid miich mxii.

¹⁸Chi Jesús yminañ:

—Ti n'ixyich nej je ca'oybi yhuindzin ti ycäy, jadu'n nej jihuüy ti ycäy ti ycödigiüy tzajpcixy, jadu'n nej tüg huídzc. ¹⁹Hich miich ajcxy mic'ajtín ti nmoogixy, jaydëbi ca'oybi ca' xymimadaaccixipy, tim

jadu'n nipaady nej jihuüy tza'n etz ca'ty myajhuäcpéjtcixy e ca' nej mjájtccixy. ²⁰Ñigi miich ajcxy jotcujc'ájtccix co ajcxy mxii y'jtcixy cojay jiby tzajpjoty, ca'ydí co ajcxy ca'oybi xycapxymidoogixy.

Chi ooy Jesús yjotcugiy

²¹Huin'it Jesús yjotcugiy miid je Dios yjihuü'n ymic'ajt, yminañ:

—Nyajnajxypich Dioscojuyip ma miich, Dios Teedy, tzajpjoty pi Huindzin etz je naaxhuinbi Huindzin, co ti myüch jada mijhuinma'n ma yi cohuinma'n jaydjic, etz ti myajnejhuüy je jáy huidi ca' y'ixpicyity. Dios Teedy, jadu'n miich ti mduñ com jadu'n miich ti mjäygidacy.

²²Ndéedyich ti xyajcidiigidäyich tüg'óciy tijaty mic'ajt oy'ajt. Ni pin ca' ijxcajp pin je' Dios y'ung'ajtpy, jëyi nDéedyich tügpajci pin xy'ijxcajpich. Ni pin ca' ijxcapy pin je' nDéedy'ájttypich, jëyi je Dios ung tügpajci huidi ijxcajp, etz jacjadyi ma je ung yajniquëxëga'n.

²³Chi Jesús ni'ijxhuimbijty yi' ydiscipulos ajcxy, ahuingujc ajcxy nimay:

—Jotcujc ajcxy je jáy ajcxy huidi ijxcixp jadu'n nej miich ajcxy ti m'ijxcixy. ²⁴Hich miich ajcxy nimayb co ooy may Dios y'ayucnajtzcaxiyy etz rey ajcxy ja'ixa'n huídibi miich ajcxy m'ijxpy, e ni ca' ajcxy ix; etz jamidoo'lida'n huidi miich ajcxy midooyb, e ni ca' ajcxy midooy.

Ijxpejt ma tüg samaritano oyjäybi

²⁵Chi tüg jáy huidi yaj'ixpijcp Dios ñecy ytinaay'ahuüy jot'ixy huinma'n'ixy Jesús, chi y'amidooy:

—Huindzin, ¿ti huaad ndunipich co ñich jugy'ajtín huinixiibi nbáadibich?

²⁶Chi Jesús y'adzooy:

—¿Ti jaybétyip ma yi Dios ñecy? ¿Nej mhujihuüy co mnecycapxy?

²⁷Chi je ley huindzin y'adzooy:

—Mdzogipy mjihuühuüpy mHuindzin Dios miid tüg'óciy m'aa mjot, miid tüg'óciy m'alma, miid tüg'óciy mmijaa, etz miid tüg'óciy mjot mhujima'ñ, e mdzogipy yi mijjin midijc jadu'n nej miich ci'm naychogyii.

²⁸Chi Jesús y'adzooy:

—Ti ooy yajxon m'adzooy. Tun yi', e mdzinahuüy huinixii.

²⁹E je' nañ jadu'n tim tiy ñejhuühua'ñ, nimay Jesús:

—¿Pin ñich nmidijc'ajtpy?

³⁰Chi Jesús y'adzooy:

—Tüg jäy choñ jim Jerusalén ycidägy anajty jim Jericó, chi oy meetzpi minaybadyii. Chi ajcxy tüg'óciy yhuít e tijaty yi' anajty ymiid pijtaayi. Chi ajcxy ooy huinhuojpy jijphuojpy huingojxy jijpcojxy, chi ajcxy ixmach jahueengi ögy, chi ajcxy ñicxni.

³¹Tüg judío teedy yminagiiy ma je jimbi tü'aa. Co y'ijxy je tzaachijäy, chi jüyöyñajxy. ³²Nañ jadu'n yminagiiy ma je jimbi tü'aa tüg levita jäy huídi tuumb ma Dios ytijc, co jim yjaty mihuingon je tzaachijäy, co oy ixy, nañ chi jüyöyñajxy (ca' pa'ayooy). ³³Chi tüg samaritano jäy anajty jim naxiy, co mihuingoñ je tzaachijäy, co oy ixy, huin'it ooy pa'ayogooty je tzaachijäy. ³⁴Chi je' nimijhuägy, chi puji e xojtzi je chaach'au, nañ tzooyiiyi chaach'au miid aceite etz

vino. Chi yaj'iyujcpety, e yajnicxy jim ma yjättac, e jim cuend'ajty.

³⁵Com jabom co anajty ñicxaani, chi yajpidzimy mejtz denario meeñ, moy je codijc nimay: “Cuend'at jadyaabi tzaachijäy, jadu'n nej anajty mjacmeeñyajuñ, co ñich anajty nhuimbityich huin'it nmigüedipy.” ³⁶¿Ma je nidugiigpi jäy pin je oybi ti tuñ miid je jäy huídi anajty je meetzpi ti ymeechyii ti yajtzaachiyii?

³⁷Chi je jäy huídi Dios ñecy yaj'ijxpjcp Jesús y'adzooy:

—Je huídi ti yajtuñ je pa'ayo'ñ.

Chi Jesús yminañ:

—Ñicx miich, e tun nañ jadu'n pa'ayo'n.

Jesús yajpaady ma Marta etz María ytijc

³⁸Chi jadu'n yjajty co Jesús anajty ytüyöy, chi ytigiiy ma tüg mutz cajp. Jim anajty tüg töxyjäy huídi anajty yxii Marta, yi' yajjättaci ma ytijc. ³⁹Je Marta ymiid anajty tüg y'uch töxyjäybi huídi anajty yxii María, chi je' y'ixtacy ma Jesús ymijc, amidoo'ijti je' y'ayuc. ⁴⁰Chi je Marta ooy anajty jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihuiiyii co ñich naydüg yam tzach nayyajtuñyijichi? Nima' yi María co huen xypubétyich.

⁴¹Chi Jesús yminañ:

—Marta, Marta, yi maytung miich mdzachmijottigooyb. ⁴²Tügpajc ji, huídi ooy ycopícyip. Yi María ti yi' huin'ixy je oybi huídi ni pin ca' ypigiiy.

**Jesús yaj'ixpijc nej jëbi
mibijctzoohuim Dios**

11 Jadu'n yjajti co Jesús anajty Dios mibijctzoy ma tüg it lugar, co yajmay, chi tüg discípulo ñimaayi:

—Huindzin, yajni'ixiiygich ajcxy tzajcapxycapxií, jadu'n nej Juan yajni'ixiiy yi' ydiscípulos ajcxy.

²Chi Jesús yminañ:

—Co ajcxy Dios mmibijctzohuipy, jadu'n mináangixipy:

Dios Teedy, miich huidi tzajpjoty tzinaayb, huindzigiy miich mxii y'ity. Huen miñ ya miich yi m'ané'min. Huen mdzójcin yajcuyduñ ma je jáy yjot yhuinma'ñ jadu'n nej yajcuyduñ jiiby tzajpjoty.

³Mooygich ajcxy ngaayin n'uucin jabom jabom.

⁴Méecxibich ajcxy nbocy ngaydey huidibi iich ajcxy ndundigooyb, jadu'n nej iich ajcxy nmeecxyich huidibi ajcxy xymidundigooybich. Ca' m'a'ixiy co iich ajcxy huinma'ñ tigoyipich.

Yajnihuaatzcich ajcxy ma yi jibicpi.

⁵Chi Jesús yjacminañ:

—Pinjaty ji ma miich ajcxy huidi tüg ymigüg miid, co ninéxcipy mijcoodz e mnimáhuipy: “Migüg, tun may'ajt yajpijctzoogich tugiig mdzajcaagy. ⁶Tüg iich nmigüg ti xyñimiñich huidi tüyöyp, etz ca' nmídidyich ti nmöhuibich.”

⁷Chi je jáy y'adzooy jiiby tigoty, yminañ: “Ca' xy'amayiyich. Ti iich ndijc n'agiinyi, etz n'ungich yam nmiidich cijx'am; ca' njatyich nej

nbidigibich etz nmöhuipy huidi mbijctzooyb.” ⁸Hich miich nimaayb, oy ca' tzojc nipidiga'ñ ymöhuamy huidi pijctzou co migüg'adyii, hue' ymöhuamy jaydëbi ca'ydi yjac'amayiyii, chi yegipy tüg'óciy huidi yajmayjajtpy. ⁹Hich miich ajcxy nimaayb: Pijctzóogix, e myajmöhuipy ajcxy. Ixtaaygix, e mbaadipy ajcxy; cogapxiygix, ahuädzip ajcxy mdijc'aguu. ¹⁰Tüg'óciy je' pin pijctzoob tijaty ma Dios, cídigiñhuib; pin y'ixtaayb, ypaadipy; pin cogapxiyib, yaj'ahuatziib ytjic'aguu.

¹¹¿Pin ungededy ji ma miich ajcxy pen y'ung ypijctzoob tzajcaagy, nej mmöhuipy tüg tzaaji? ¿E pin ypijctzooyb acx, nej jëbi mmöhuipy tüg tza'ñi? ¹²¿Pen ypijctzoyb tzeydüty, nej jëbi mmöhuipy ca'ty? ¹³Pen miich jibicjáy ajcxy mnejhuuyb nej oybi m'ung móoygixipy, ¿nej ca' mdijy yjánchity co mDios Teedy tzajpjotyxi xymóoygixipy je Espíritu Santo, pen miich ajcxy mmibijctzohuipy?

**Yajni'ibijccixy Jesús co
miidity mujcu' ymic'ajt**

¹⁴Chi Jesús anajty yajpidzimy tüg ca'oybi ma tüg jáy huidi anajty uumip. Jadu'n yjajty co je ca'oybi ypidzimy, chi je uum ycapxigy. Chi je mayjáy ooy jihuuy huinmay.

¹⁵Nijjëjity jáy yminaangixy:

—Jesús mijhuinma'ñ ytumyby miid je Beelzebú ymic'ajt, je ca'oybi yhuindzin, paady ca'oybi yajpidzimday.

¹⁶Jacjaydiibi jáy ajcxy co jot'ixaangixy huinma'ñ'ixaangixy

Jesús, pijctzooy ajcxy Dios tüg ym'jhuinma'n. ¹⁷Co Jesús nejhuiy nej je' ajcxy jot'adyii huinma'n'adyii, chi nimay:

—Co tüg gobierno ñayb'ijc-huäcxyii, chi ñaychiptúnigixy miñ xyipy; ñayyajc'jxigixy ñayyajtigóoyigixy; co tüg quëx jäy ñayb'ijc-huäcxyii, nañ jadu'n je' ñayyajc'jxigixy ñayyajtigóoyigixy. ¹⁸Pen je mujcu' ajcxy ñayb'ijc-huäcxip, ¿nej jada je mujcu' y'ané'min yjac'idipy? Miich ajcxy minamb co iich miid ndúnich je Beelzebú ymic'ajt co iich ca'oybi nyajpidzimy. ¹⁹Pen jadu'n yi', ¿pin je mic'ajt mooyb huidi miich ajcxy xypahuidijtp co yajpidzimy je ca'oybi? Paady yi' ajcxy ci'm yajniquëxäcp co miich ajcxy mdundigooygixy mgapxtigooygixy. ²⁰Pen iich miid Dios y'ané'min nyajpidzimyich ca'oybi, janch jada co Dios y'ané'min ti yjätý ma miich ajcxy.

²¹Co tüg micjäybi miidity maydujt, e ñaycuend'adyii yajxon, ca' je' ytigoyipy tijaty ymiid. ²²Co yjätý jadüg jäy jacmicpi ca'ydi je', chi ymimadägyii, e yp'ijctäyii tüg'óciy ytujt huidi anajty ooy jot'amij'adyii, e yajhuäcxipy tijaty anajty ymiid.

²³Pinjaty ca' xymijnicxpétyich, nmidzipich yi'. Pinjaty ca' ytuñ miid iich co jäy nyaj'ixpicyich Dios ytiy'ajt, hue' je' ajcxy jäy yajhuinma'nydigooyb.

Je ca'oybi co jadüg'oc yhuimbijty

²⁴Co je ca'oybi ypidzimy ma je jäy, chi je' ñicxy jim títznaax ijtägy co ypocxa'n. Co ca' paty ypocxtac,

huin'it ymina'n: “Huimbidaambich ma je jäy yjot yhuinma'n ma iich ti n'octzombi.” ²⁵Co je ca'oybi yja'ty ma anajty ti chinäy, chi paady je jäy yhuinma'n janch yhuädzity janch ooy jadu'n nej tüg tijc huidi janch huädz pedigity. ²⁶Chi je ca'oybi ñicxy, e miid miñ jahuixtujc ca'oybi jacjibicpi ca'ydi je'; chi ajcxy ytigiiy ma je jäy yjot yhuinma'n, e chinay ajcxy jiiy; huin'it je jäy jac'o'ctiy oy yjajtni ca'ydi jadu'n nej anajty jayijp'aty.

Huidi ajcxy janch jotcújcip

²⁷Co Jesús jadu'n anajty ymina'n, chi tüg töxyjäy mayjäy agujc mic ymina'n:

—Jotcujc je töxyjäy huidi ti xyajpi'c'aty etz huidi xyajyeegy.

²⁸Chi Jesús ymina'n:

—Je' jacjotcujc pinjaty Dios y'ayuc midoohuip etz cuyduunip.

Jibicjäydic pijctzoogixy tüg tiy'ajt mijhuinma'nybi

²⁹Co je mayjäy ajcxy jübigiiy, chi Jesús yminandacy:

—Jadachambi jäy ooy ajcxy yjibicjäyity, yp'ijctzooyb ajcxy mijhuinma'n iixpejt. Ni camina Dios ajcxy ycamöhuiy iixpejt, jëy tügpajc Jonás y'ixpejt yajmohuip.

³⁰Com jadu'n nej je Jonás jecy'ajty iixpejt yecy ma je Nínive jäy, nañ jadu'n iich, je jäy huidi tzoontzajpjoty, nyegaamyich iixpejt jadachambi tiempo miid jäy ycixpi.

³¹Je töxyjäy reina huidi tzinay jecy'ajty ma madzäcruudz ypidzimy, yi' je' xidähuam jadachambi tiempo jäy co anajty Dios tiyduna'n mayjäy, etz yajpocycähuipy ajcxy. Ixti ma

naaxhuiñybi ycocixiy jim je reina chooñ co anajty amido'idani je rey Salomón ycapxy y'ayuc. Ji naaxhuiñ jadachambi tüg Dios ytiy'ajtmüidpi jacnigi ymñjity ca'ydi Salomón anajty. ³²Co anajty Dios tiyduna'n yi may naaxhuiñyjäy, chi je jäy ajcxy huidibi anajty cogajpüp jim Nínive pidägaangixy etz yajpocycähuaangixy jadachambi naaxhuiñyjäy. Com je Nínive jäy jothuimbijit je' ajcxy co Jonás Dios y'ayucnajtzcaxxiyi. Ji jadachambi tüg Dios y'ayucnajtzcaxxiybi jacnigi ymñjity ca'ydi jadu'n nej anajty je Jonás.

Je tiy'ajt huidibi nipaady nej lámpara ma ajt nninixc

³³Ni pin ca' yüch je jün huidi ti nögpity, ni ca' pidägy jiiy cajón pa'tci'py, jëyi janchtiy pidägy je jün ma jündixpejt, jaydëbi co pinjaty ytiñhuipy tigoty, codicxiib je jün.

³⁴Je jün ma miich ajcxy mninixc je' yi' miich ajcxy mhuiin. Pen oy miich ajcxy mhuiin, nañ jadu'n tüg'óciy miich ajcxy mninixc ymiid yi' tiixcin. Pen ca' y'óyity mhuiin, nañ jadu'n ajcxy yi' mninixc yajpaty agootztuum. ³⁵Cuend'ájtcix yi tiy'ajt huidi miich ajcxy müid, ca' mgoyützcixy, com co jadu'n nicxy y'ahuimbity nej cootzpi. ³⁶Pen miich mdiy'ajt codiicxy y'lity müid Dios ytiy'ajt, tüg'óciy quëxigtähua'n janch huädz.

Jesús ca'p jäygidaci je fariseos etz je escribas ajcxy yhuinma'n

³⁷Co Jesús ycapxtay, chi tüg fariseojäy may'ajt pijctzoy huen nicxy müid cayii. Co Jesús

ytijctigiyy, chi y'ixtacy ma je caybejt. ³⁸Co je fariseojäy ijxy jadu'n nej Jesús ytuñ, chi ooy huinmay nej co Jesús ca' ñayyajpocyuähchyii müid ni jayijpni ma anajty ca'ni ycaayñi.

³⁹Chi je Huindzin Jesús yminañ:

—Miich ajcxy fariseojäy, ooy mnaybidaaccixy tudägyjäy ma jäy ajcxy yhuinduu e ca' yjächity; chi jada' ma mjot mhuiinma'n miich ajcxy ooy m'adzocy, etz müid ajcxy jibic-huinma'n; tim jadu'n nipaady nej myajhuäch ajcxy yi' tasi ninixc, yi texyñinixc e chi ajcxy yajhu'fmgixy jibicpi je tasijoty je texyjoty. ⁴⁰iMiich ajcxy ca' Dios y'ayuc huinjhuñybi! ¿Ca' mnejhuñygyixy co yi' pin ti texyñinixc yajcoy nañ ti yajcoy texyjot? ⁴¹Tun miich ajcxy ooyjäy'ájtin, huin'it janchtiy anajty ajcxy mhuädzity ma mjot mhuiinma'n.

⁴²iAy miich ayoobi ajcxy fariseojäy! Com mbidaaccixy abicy tüg picy je majcpi müid yi' Dios ycixpi ixti yi' tzajnimang, yi ruda, etz tüg'óciy aay ujtz. Chi jada' ca' mduñ je ooyjäy'ájtin etz tiy'ájtin jadu'n nej Dios tzocy. Hue' je' oy mduñ co tijaty abicy mbidägy müid Dios ycixpi, nañ jadu'n copicy ooyjäy'ájtin mdunipy etz Dios ytiy'ajt mguydunipy.

⁴³iAy miich ayoobi fariseojäy ajcxy! Co ooy m'adzójccixy je iñaybejt huidi cöduum ma naysujctac, etz ooy m'adzójccixy co huen jäy ajcxy xycapxpocxcixy oy huindzigiyy mayjäy agujc.

⁴⁴iAy miich ayoobi ajcxy huidi yaj'ijxpjcp Dios yley

etz miich fariseojäy ajcxy! Oy mjanaybidáacigixy oyjäy e ca' yjanchity, ca' mguydungixy Dios ytiy'ajt, jadu'n nipaady miich ajcxy nej öcpi jut huidi ca' yquëxigy, chi jäy yöy nigix, com co ca' ñiguëxigy.

⁴⁵Chi tüg jäy huidibi yaj'ixpijcp Dios y'ayuc yminañ:

—Huindzin, co jadu'n miich mina'ñ, nañ jadu'n iich ajcxy ooy jibic nayjihuiyigixy.

⁴⁶Chi Jesús yminañ:

—iAy ayoob miich ajcxy Dios y'ayuc huindzin! Miich ajcxy mgójcixyp canaag costumbre huidi je jäy ajcxy ca' mimadäga'ñ, e ca' ajcxy mba'ayoogixy, tim jadu'n nipaady nej jihuüy tüg tzimy ti mmooygixy jemxypi huidi ca' je jäy ajcxy mimadäga'ñ, e miich ajcxy ni ca' mgihuäx jëda'ajty mgayajpadaangixy je tzimy.

⁴⁷iAy miich ayoob ajcxy! com myajcojcxixy je ögpi jut ma je Dios ayucnajtzcaxiiby naaxtigiy, je huidi m'ap mdeedy ajcxy yaj'o'c. ⁴⁸Jadu'n yajhuinjihuüy nej jihuiy miich ajcxy ooy mjäygidägy jadu'n nej ajcxy m'ap mdeedy ytundigoy. Janch yi' ajcxy yaj'ögy Dios y'ayucnajtzcaxiiby, e miich ajcxy myajcoj je öcpi jut ma ajcxy je' ñaaxtigiy.

⁴⁹Paady yi Dios jadu'n huinmay, e minañ: Nyajniguexipyich miich ajcxy profetas etz y'ayuccapxhuäcxpi, e miich ajcxy myaj'ögip nijëjity, etz jacnaagity mbahuidijttáccixipy. ⁵⁰Dios yajcomidohuipy jadachambi tiempo jäy ajcxy je ypocy huidi y'ap yteedy ajcxy ytuñ, com maabi naaxhuiñ chondägy, yi' ajcxy yaj'ögy Dios

ytiy'ajtmüidpi. ⁵¹Janch nimaaybich miich ajcxy co Dios yajcomidohuipy jadachambi tiempo jäy ajcxy je y'ap yteedy ypocy co ajcxy yaj'o'cy Dios ytiy'ajtmüidpi chondägy ma Abel, ixti Zacarias huidi jäy yaj'o'c ma Dios ytije tiba'gujc.

⁵²iAy miich ayoob ajcxy Dios y'ayuc huindzin! Ca' miich ajcxy m'ixpiga'ñ Dios ytiy'ajt, nañ ca' mdzocy co yi jäy ajcxy ixpigipy; tim jadu'n nipaady nejjihuiy ti mbicy je tije ahuaast e ca' miich ajcxy mdigihua'ñ, e ni mgatzojccixy co huingbi nicxy ytigiy.

⁵³Co Jesús anajty jadayaab ayuc yajnimaaygixy, chi je Dios y'ayuc huindzin etz yi fariseojäy ajcxy jotmätcooty chi yaj'amidogoty ajcxy may ayuc. ⁵⁴Ñayñimáayigixy miñ xyipy co huen amido'ijt Jesús y'ayuc, jigix jëb páatcixipy huidi jëb müid xigixipy.

Jesús yaj'ixpicy co ca' huaad pinjaty naybidaaci oyjäy pen ca' yjanchity

12 Chi je mayjäy ooy nimujcy Jesús, janch jadu'n ñay'adijy ñay'agodiiyigixy, chi Jesús ñimaydacy je' ydiscipulos jayijp:

—Nigüendi müid yi fariseojäy ajcxy nej ajcxy yjäyay'ixpijccixy. Yajxon yi' ajcxy ycapxy ymiydägy, chi ca' cuydungixy. ²Ca' ji ti huidi ijtp ayüch nicxy ycayajnejhuüy, nañ ni ca' ji ti huidi ijtp ameech nicxy ycaniguëxigy. ³Huen huidi ayuc miich ajcxy ameech mgapxy, yajnejhuühuip yi'. Huen huidibi ayuc huidi ti mnayyajnimáayigixy ameech jiiyby tigoty, mic yajcapxhuäcxip tije nigixy.

Pin jëbi huaad ndzigiïyim

⁴Chi Jesús yjacminañ:

—Miich ajcxy nmigügtijc, iich miich ajcxy nimaayb co ca' mdzigiïygixy yi jäy ajcxy huidibi ninïcx yaj'o'cp, com ca' jac ni ti ajcxy tunipy. ⁵Iich miich ajcxy nyajni'ixïhuipy pin huaad jëbi mdzigiïygixy. Yi' janch mdzigiïygixy yi Dios huidibi jugy'ajt pijep, e huin'it miid je' ymic'ajt jëbi quexipy m'alma ma je mij jïin. Yi' janch mdzigiïygixy yi'.

⁶¿Nej ca' jäy ajcxy ytoogyii migoox joon miid metz pi'cmeñ? Dios ni tüg yi' ajcxy ca' jäydiigooyity. ⁷Ixti mgöhuay ajcxy ac michoy Dios miidity. Ca' mdzigiïygixy, jactzou nïgi miich ajcxy ma Dios ca'ydi pi'cjoon ajcxy.

Je pinjaty ca'p midzöyduñyii**Jesús mayjäyoty**

⁸Iich miich ajcxy nimaayb co pinjaty ma miich ajcxy huidi capxidzimp mayjäyoty co xymibicyich xymijpidägyich, iich, je jäy huidi tzoon tzajpjoty, ngapxidzimipyich co ti ngöbicyich jadu'mbi jäy ma Dios y'angeles ajcxy yhuinduu. ⁹Pinjaty ca' xycöbicyich mayjäy'agujc, nañ jadu'n iich yi' ca' ngöbigipyich jiiby ma Dios y'angeles ajcxy yhuinduu.

¹⁰Tüg'óciy jäy huidi jadu'n iich, je jäy huidi tzoon tzajpjoty, xyñigapxp xyñi'oñiybich Dios huinmecxiib. Chi jada' pinjaty nigapxp ni'oñiyb je' Dios yjihui'n (je Espíritu Santo), yi' janchtiy Dios ca' yhuinmecxiiyb.

¹¹Co mmidzip ajcxy xyajñcxiip ma naymujctac, ma codungdijc,

etz tungmiidpi yhuinduu, ca' mdájip mmáyip nej m'adzóogixipy, e ca' mhuinmayipy nej ajcxy m'adzohuipy. ¹²Com je Dios yjihui'n huin'ítiiy ajcxy xyajni'ixïhuip nej huaad m'adzoogixy.

Naygüend'ajtigixy ca'p adzojccixy comeñ' adii

¹³Chi nidügti je mayjäy yminañ:

—Huindzin, nima' n'ajchich co huen yajhuäcxy miid iich huidi ndaj ndeedyich ñidungiy.

¹⁴Chi Jesús yminañ:

—Yëydijc, ca' iich ni pin ti xypidägyich ane'mbi ma miich ajcxy etz yajhuäcxi.

¹⁵Chi Jesús nimay je jäy ajcxy:

—Ijxcix naygüend'ajtigix, ca' m'adzojccixy comeñ'adii, com je m'alma yjugy'ajtïn ca' je' nïdzoocin'adyii huidijaty miich ajcxy miid.

¹⁶Chi ajcxy yajnimay tüg ayuc, yminañ:

—Jim anajty tüg comeñyjäy huidibi anajty ooy mij ypidägy yajpidigy. ¹⁷Je comeñyjäy anajty ooy ci'm huinmay ma yjot yhuinma'n, yminañ: “¿Ti n'octunipich com ca' nmfididyich ma nyajnidägibich yi tiibi y'ity?” ¹⁸Chi yminañ jotjoty huinma'nyjoty: “Nyajpidicnibich ndzëx, e ngójibich jacmijpi, chi tüg'óciy jiiby nbidactahuibich tiibi y'ity.” ¹⁹Co jadu'n ndunipyich, chi jëbi jotcujc ndzinahuibich, com ooy anajty nmfididyich pidägy yujcpiy, jëbi canaag jimijt niboocxyich etz jëbi ngay n'ügyich jotcujc.

²⁰Chi Dios nimay je comeñyjäy: “Ooy jibic-huinma'n miich

miidity. Cham coodz iich miich nibijctzohuñhuaaniy yi m'alma (m'ögip), e co anajty ti m'ögy yi huidibi ti myujpcicy, ¿pin yi' je'adiib?" ²¹Jadu'n yjajty yi' ajcxy huidibi ymeen'idi'ñ ci'm yujcpijcp, ca' yi' ajcxy jiiby ycomeeñyity ma Dios yhuinduu.

Dios ycuend'ajtpy y'ung y'anäg

²²Chi Jesús nimay je y'ixpijcpidijc:

—Paady ajcxy nimaaygixy co ca' huaad mjottigooygixy ma yi mdzináayin yi mjogy'ájtín, huیدی mjíxcixipy mgáaygixipy, huیدی miid mninícx mxóxcixipy. ²³Yi jugy'ajt jacnigi tzou yi', ca'ydi yi caayin uucin, etz je mninícx jacnigi choohuity ca'ydi huit. ²⁴Ijxcix yi joogy ni ca' ñipy, ni ca' chijccixy, ni ca' miidity ytije ni chëx, e Dios yi' ajcxy mooyipy huیدی yjíxcixyp, ¿nej cayjacnigi miich ajcxy mdzoohuity ca'ydi joon ajcxy? ²⁵Ca' ji ni pin ma miich ajcxy pin jadipy nej ñayjijptzomihuñb jadüg cínuu. ²⁶Pen ca' mjajtciy nej mdúngixipy huیدی hueen huinma'ñ, ¿nej co mdzachmjottigooygixy yi tzinaayin yi comeeñ'ájtín?

²⁷Ijxcix yi aaybijy nej xóxyity, ca' ytaaccixy ni ca' yxuuygixy. Hich miich ajcxy nimaayb, co ni je rey Salomón miid tüg'óciy ymeen' ca' ñayxoxi jadu'n nej jada aaybijy ujtzpíjy. ²⁸Pen jadu'n Dios xoxy yi aay yi ujtz huیدیbi cham jajtíp ma yi tungop, e com jabom ti anajty ñiicxni, Dios xypubedipy xypudigihuipy nigí miich ajcxy huیدی hueen mibijcp. ²⁹Ca' miich ajcxy mhuinmay'ahuidíjtcixipy

ajcxy ti mgáaygixipy m'úuccixipy. ³⁰Yi naaxhuññjáy ajcxy ymjottigoyb anaxy tüg'óciy caayin uucin, huit etz tijaty. Miich ajcxy huیدی mijpidacp Dios, Dios Teedy ñejhuñyib co copicy ajcxy miid'adipy caayin uucin etz huit tucxy. ³¹Jayijp mijottigooygix Dios y'ayuc ytiy'ajt, chi jada' tüg'óciy huیدی ajcxy myajmayjaty mbáatcixipy yi'.

Jugy'ájtín mijpi jiiby tzajpjoty

³²Chi Jesús yjacmínaañ:

—Ca' miich ajcxy mdzigiyygixy, miich ajcxy mnihueeñity, per mDios Teedy yega'ñ ane'mdac tzajpjoty miid miich ajcxy ycixpi. ³³Tooccix tijaty miich ajcxy miid, nimooygix ayoobitijc. Yaj'oyiyygix meeñ'idi'ñ huیدی ca' y'amijihuipy ni camina. Yaj'oyiyygix tüg pidägy, janch mij e janch oy, jiiby tzajpjoty huیدی ca' ycixipy ytigoyipy, ma ca' meetzpi huaad ytigiy, ni ucxyting ca' yajhuindigoyipy. ³⁴Pen miich ajcxy miid mgomeeñ'ájtín ya naaxhuñ, yaayi je mjot mhuinma'ñ ajcxy. Pen mdzocpy ajcxy je oybi huیدیbi Dios yegamy, nañ miid'ájtciy jim jabom jabom mjot mhuinma'ñ ajcxy ma Dios.

Tzoc íjtím ni'ixi'

³⁵Chi Jesús yjacmínaañ:

—Ni'ixiyygix mjot mhuinma'ñ jadu'n nej jihuñy mhuit myujc'ameetcixy co mdunaangixy, etz jadu'n nej jihuñy lámpara mnögpjccixy co mdzumnaangixy m'ahuixaangixy je huindzin. ³⁶Ni'ixi'ijtcix jadu'n nej jáy huیدی yhuindzin ahuijxp, co anajty

yhuimbity co anajty ti y'oy ma jäy ti ypicý, chi co anajty minipy ycocapxý, mic'amy myaj'ahuädzity ytijc. ³⁷Jotcujc ajcxy je tumbi co je yhuindzin anajty yjädy, e paady chumnajx juugy. Janch nimaaybich miich ajcxy co je tumbi ajcxy yhuindzin anajty yjädy, chi yhuít yujc'ameedipy, chi ajcxy yaj'ixtägipy ma caybejt, yajcayipy yaj'ügipy. ³⁸Oy miinipy je huindzin mijcoodz o moñyi, e páadip je tumbidijc ajcxy jim chumnájxcixy juugy, jotcujc je' ajcxy je jadu'mbi tumbidijc. ³⁹Nejhuiygix jada co je codijc ixipy nejhuihuipy ti hora ymina'n je meetzpi, chi juugy ixipy chuumnaxa'n, e ca' c'eyegipy ytijc nicxy jäy tigoty ymeech. ⁴⁰Miich ajcxy nañ jadu'n íjtciy ni'ixi', mina anajty ca' ti mhuinmaaygixy, huin'it miina'nich iich, je jäy huídi tzoon tzajpjoty.

**Je tumbi tudägypi etz je
tumbi ca'pi ytudägýity**

⁴¹Chi Pedro Jesús nimay:
—¿Pin jada ti myajnimayb jada ayuc huídi ti mgapxy, iich ajcxy, o nidüg'óciy jäy?

⁴²Chi je Huindzin Jesús yminañ:
—Huídibi tumbi je' ya huídi tumb miid yhuindzin janch cixyjot huinijot huídi miid yhuíjy'ajt ycuje'ajt huídi je yhuindzin mooyip ané'min ma ytijc, huídi yajnidigädgiyb tumbidijc nej ypaadyii. ⁴³Jotcujc je tumbi co anajty je' yhuindzin yhuimbity e padiiyb ti cuyduñ jadu'n nej anajty ti ñimäyii. ⁴⁴Janch iich miich ajcxy nimäy co je tumbi huindzin yajmihui'mdähuipy jada ytumbi

tüg'óciy pidägy huídi ymiid. ⁴⁵Pen je tumbi yhuinmaayb jotjoty huinma'ñyjoty co je yhuindzin yhuäcxijpni mina ymiina'n, chi midziptzooni jacjadyii tumbidijc ajcxy, huojpni, cojxni, nañ ytigiiyñi caayb uucp anaxy etz ymügyii. ⁴⁶Chi je tumbi yhuindzin miinipy ma je xii hora anajty ca' jijp'ixy e ni canejhuíy anajty, e huin'it ooy tzaachytunipy yi tumbi e chi pidägipy ma je huídi ajcxy ca' ytudägýity.

⁴⁷Je tumbi huídi nejhuiyb nej yhuindzin chójcin, e ca' cuyduñ, ni ca' ycapxymidoy, ni ca' ni'ixi' ity co yhuindzin anajty yhuimbity, je' je' ñigi yajtzaachytunip. ⁴⁸Je tumbi huídi ca' yajxon huinjihuíy nejjihuíy yhuindzin chójcin, hueeni je' yajtzaachytunipy. Huenpínity huídi may yajmooyb, may yi' yajmibijctzohuiyb; etz huenpínity huídi ti mihui'my ooy, yajmibijctzohuiib ñigi.

Jesús ycixpi ñaybijc-huäcxýii jäy

⁴⁹Chi Jesús yjacminañ:
—Íich ti nmiñich ya naaxhuíñ co jiiñ nbidägibich. ¡Ooy njadzocýich ji ixipy ñitooyñ!
⁵⁰Nyajnaxipyich tüg tzaachypí, e iooy ndajy nmayich ixti mabaad yajcuyduñdäy! ⁵¹¿Nej miich ajcxy mdijy co ti nmiñich ya naaxhuíñ co nyajcixipyich je tzipi? Íich miich ajcxy nimaayb co ca'. Hue' janchtiy nyajnaybijc-huäcxáanibich jäy ajcxy. ⁵²Jadachambi etz yjacnicxni xii tiempo ji migoox tüg quëxjäydijc huídibi ajcxy ñaybijc-huäcxiiib, tugiig miid je metzpi, e metzpi miid je tugiigpi. ⁵³Je ungedeedy

tziptunip miid ymang etz je mang miid yteedy. Nañ je ungdaj tziptunip miid yñix etz je niix miid ytaj. Nañ jadu'n je xecy tziptunip miid yxecy.

Je xii tiempo ytiy'ajt

⁵⁴Chi Jesús nimay je mayjáy ajcxy:

—Co ajcxy m'ixy je joc ypidágy ma xii ycidágy, chi mīnaangixy co tūhuuam, e janch jadu'n yjadyii.

⁵⁵Co ymiñ je jīnboj, chi miich ajcxy mīnaangixy co ambigaamb, chi janch jadu'n yjadyii. ⁵⁶iMiich jībic jāy ajcxy! Ooy mjajtcixy nej myajcapxcixy yi xii tiempo huidi ajcxy m'ijxpy tzajpcixy etz ya naaxhuñ: ¿Nej co ca' mjajtcixy nej myajcápxcixipy xii tiempo ymiñ ycidágy?

Naymi'oyihui miid midzip

⁵⁷¿Nej co miich ajcxy ca' ci'm mnaydiyduunigixy nej ytudágyity je tiy'ajt? ⁵⁸Co mníxcipy ma yi codung miid yi mmidzip jac'oy co mnayyaj'oyihuiipy miid yi mmidzip tū'am, ca'ydi miid mjädip ma yi codung, e chi je codung xyciyegipy ma je xueetz, e je xueetz xypidágy pujxtigoty. ⁵⁹Hich miich nimaayb co ca' jilby mbidzimipy, ixti cooni mgüejttáhuipy tūg'ócixy.

Ooy ycopícyity nyajtigajtzim nhuinma'ñ

13 Huin'it jāy miidmiydacy Jesús jadu'n nej je gobernador Pilato yaj'ogy nijējity jāy jim Galilea, chi tem huidiyti ajcxy ñi'py miid iyujc ñi'py huidi je' ajcxy miid huindzigi'ñ tuuñ. ²Chi Jesús y'adzooy nimay ajcxy:

—¿Nej mdijy, ñigi anajty ypcymiiditye je galileojáy ajcxy huidi jadu'n ayo'n patp, ca'ydi nidüg'ócixy galileojáy? ³Hich miich ajcxy nimaayb co ca'. Pen miich ajcxy ca' mjothuimbjtcixy ma Dios etz nay'adzigiigixy ma Dios, nidüg'ociy miich ajcxy mgijxtáhuip mdigoydáhuip. ⁴E je' ajcxy je majmocxtugiipi huidi je mījtjc jim Siloé ñigidaagootti, yaj'ócixy ajcxy. ¿Nej mdijy ñigi ajcxy ypcymiiditye, ca'ydi nidüg'ócixy je jāy huidi tzinayb jim Jerusalén? ⁵Hich miich ajcxy nimaayb co ca'. Pen miich ajcxy ca' mjothuimbjtcixy, nañ mgijxtáhuip mdigoydáhuip miich ajcxy nidüg'ócixy, jadu'n nej je' ajcxy.

Ijxpejt ma je higueri ca'pi anajty ytiim'aty

⁶Chi Jesús yajnimay ajcxy jada ayuc: —Tüg jāy anajty miiditye higueri coy ma y'aguemy, chi ñicxy jilby ma y'aguemy higueri tiim ijxtaaybi, ni ca' paty. ⁷Chi nimay je' ytumbi: “Cham midugiig jimijt mīñich ya higueri tiim ijxtayb ma jada higueri cop, ni tūg ngapaadyich. Huen yajpujxciday jada higueri cop, nej co ñigoobi ñaaxnihua'ñ.” ⁸Chi je' ytumbi y'adzooy: “Huindzin, oc'ixmatz. Huen jadüg jimijt jēyi ocjactināy, octajyich jayjpy yi naax jūhuidityi, etz oc'abonijyich. ⁹Pen tiim'ajt ca' nyajpuxipy, pen ca' ytiim'aty jēbi nbújixigipy.”

Jesús yajtzögy pocxxiiduum tüg töxyjáy jigojopyi

¹⁰Chi Jesús anajty yaj'ixpicy ma tüg naymujctac pocxxiiduum. ¹¹Jim anajty tüg töxyjáy huidi anajty mīmajmocxtugiig jimijt cujc mī'ijtni

yjiibojpa'm, agojojy anajty yöy, ni nej anajty yca'oyïy nej ytinaaygugïhuipy.

¹²Co Jesús ijxy, chi yaaxi, e nimay:

—Töxyjäy, ti mdzögy.

¹³Chi yci' cijxxajy ma je töxyjäy yjiix, e chi je' yjiix ytiïy, huin'it ytiïy Dios ojadajtpi. ¹⁴Huin'it je naymujctac huindzin ooy yjotmäty miid co anajty Jesús jäy ti tzoïy

popcxiiduum. Chi je naymujctac huindzin nimay ajcxy je mayjäy:

—Jëyi tudujc xii jäy huaad ytuñ, huen miñ semaanjoty pin yajtzoïyhuam, ca' ypopcxiiduumity.

¹⁵Chi je huindzin Jesús yminañ:

—iMiich ajcxy naybidaacip nej tudägyjäy, e ca' yjanchity! ¿Nej ca'miich ajcxy mmiguejïy mhujayuubi, etz mburro ma ypecxtac pocxiiduum, e myajnicxy ajcxy ni'ucpi? ¹⁶E jada Abraham y'ap y'oc huidi Satanás ca' y'ixmachii majmocxtugïg jimijt, ¿nej ca' ypadyi nyajtzögïbich pocxiiduum?

¹⁷Co Jesús jadu'n y'adzoy, chi yajtzöyduñ ymidzip. Chi tüg'óciy cajpjäy oy ajcxy yjotcugïyigixy miid je oybi huidi Jesús ytuun.

Ijxpejt ma je mostaza pájc

¹⁸Chi Jesús yminañ:

—¿Nej m'oc'a'ixiïyigixy yi Dios y'ané'min? ¿Huidi miid n'ocyajquipxïhuibich? ¹⁹Jadu'n Dios y'ané'min nipaady nej mostaza pajc huidibi tüg jäy ñiip ma y'aguemy, chi ymujxy etz yeegy ooy janch mij, chi je joon ajcxy oy ype'ñ pidaaccixy ma je mostaza quipy aacxy.

Ijxpejt ma je levadura ca'p óyity

²⁰Chi Jesús jadüg'oc yminañ:

—¿Huidibi miid

n'ocyajquipxïhuibich yi Dios y'ané'min? ²¹Jadu'n Dios y'ané'min ni paady nej levadura huidi tüg töxyjäy ytiyhuidijt miid tugïg quipxi'ñ harina ixti cooni yajxunday je harina.

Je tü'aa xützpi

²²Co Jesús anajty ñicxy jim Jerusalén, chi yaj'ixpicy anajty Dios y'ayuc ytiy'ajt cajp cajp majaty ñaxy. ²³Chi tüg jäy Jesús amidoy:

—Huindzin, ¿nej hueeni yi jäy ajcxy huidi y'alma nïdzögip?

Chi Jesús y'adzooy:

²⁴—Mijpidaaccix Dios ytiy'ajt amuumdügjet, jëbi ajcxy m'alma nïdzögipy, jadu'n nipaady nej jäy ajcxy ñaymic'ïjxigixy co ytiïghuaangixy ma je tijc aguu xützpi. Jadu'n iich miich nimaayb co mayjäy ooy ja'a'ixïy ytiïghuaangixy ma Dios y'ane'my e ca' ajcxy jadipy nej ytiïgyigixy.

²⁵Co je codijc ypidïgipy etz agiïyñip ytiïc, huin'it miich ajcxy pinjaty tibäy hui'm, chi jiiby tibäy miich ajcxy mminandägy: “Huindzin, yaj'ahuädz”, e chi je tijc huindzin miich ajcxy xy'adzohuipy: “Ca' iich miich ajcxy nejhuïyich ma miich ajcxy mdzoongixy.” ²⁶Chi huin'it miich ajcxy minandägy: “Miid iich ajcxy miich ti nmïidgaaygixy ti nmïid'uuccixy, e miich ti myaj'ixpicy ma iich ajcxy ngajp.” ²⁷Chi je Huindzin y'adzohuipy ajcxy: “Iich miich ajcxy nimayb co ca' nnejhuïyich ma miich ajcxy mdzoongixy. Jihuäccix ma iich nhuinduu, miich ajcxy pocy ytumbi.” ²⁸Chi miich ajcxy

jim ooy mdájcixipy mmáygixipy, myáaxcixipy mdiitzquéetcixipy, co miich ajcxy m'ixipy Abraham, Isaac, Jacob etz tüg'lóciy yi Dios y'ayucnajtzcaxxiybi jiiby ma Dios y'ane'my, e miich ajcxy tibäy anajty ti mhui'mgixy. ²⁹Minip yi jäy ajcxy huidibi tzoomb ma xii ypidzimy, ma xii ycidägy, ma jayhuixtujc ypidzimy, etz cham ma madzäcruudz ytinaay'ahuüy, chi y'ixtáaccixipy ma je caydac jiiby ma Dios y'ane'my. ³⁰Paady ji jäy ajcxy huidi cham axam'ajtp, je' ajcxy jayijp'adip, etz ji jäy ajcxy huidibi cham jayijp'ajtp, etz je' ajcxy axam'adip.

Jesús taj may miid Jerusalén ycixpi

³¹Chi nijëjity fariseojäy nimay Jesús:

—Quëg ya com yi rey Herodes xyaj'ögaam.

³²Chi Jesús y'adzooy:

—Nícx nimaaygix yijiibi huaax co nyajpidzimybich ca'oybi etz nyajtzoocypich jäy cham etz jabom, codugiig xii ti ndung mayíjich. ³³Ooy ycopicyity co ñich njactüyöyibich cham, jabom etz huixtic. Com ypaadyi co Dios y'ayuccapxhuäcxpi y'ögip ajcxy jim Jerusalén.

Chi Jesús yjacminaañ:

³⁴—iJerusalén jáy! iJerusalén jáy! huidibi yaj'o'cp Dios y'ayucnajtzcaxxiyb ajcxy, etz ycögädz ajcxy je jäy huidibi Dios ti xyajniuguéjx ajcxy. Janch canaag'oc ñich miich ajcxy njahuijtzmuga'ñ jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixiiygixy. ³⁵Chi jada' ijxcix

cuenditungix, com jadachambi mgajp yhui'my najtz'ixi!. Hich miich ajcxy nimayb co ca' xy'ixipyich jädügtecy, ixti cooni anajty tiempo paaty mina mmináangixipy: “Capxpaaty je' huidi miimb miid Huindzin'ájtin Dios ycixpi.”

Jesús yajtzögy tüg yëdyjc quixypa'mmiidpi

14 Chi jadu'n yjajti co tüg pocxxiiduum Jesús ytigiy ycaya'ñ anajty ma tüg fariseojäy ytijc, hue' anajty judío tungmiidpi. Chi yi judío ixpicytjic ajcxy tzach'ix'ijtcixy Jesús, amidoo'ijtcixy Jesús y'ayuc. ²Huin'it tüg jäy huidibi ymiid anajty quixypa'm miiñ ma Jesús yhuinduu. ³Chi Jesús ymigapxi je' ajcxy huidibi yaj'ixpjc Dios ñecy etz yi fariseojäy ajcxy, nimay:

—¿Nej je Dios ytiy'ajt yminañ?

¿Huaad o ca' huaad chögy jäy pocxxiiduum?

⁴Chi ajcxy y'amonday. Huin'it Jesús ciniixajiïy je pa'm jäy, chi yajtzoocy. ⁵Chi Jesús nimay je fariseos ajcxy:

—¿Nej miich ajcxy pen niijutcögäp ajcxy mhujayuubi o mburro pocxxiiduum, nej ca' mic'amy nicxy yajpidzimgixy oy ypocxxiiduumi?

⁶Chi ca' ajcxy jajty nej y'adzohuimb'ijtcixipy.

Je pinjaty huodzooñyip ma je pijcpi yajnixiiduñyi

⁷Co Jesús ijxy jadu'n nej yi' ajcxy jac'oybi ññaybejt huin'ijxcixy jim ma je caybejt, chi ajcxy tüg ayuc yajnimaayi, je tiibi anajty yajhuomiingixy:

⁸—Co miich myajhuoohuipy ma pijcpi yajnixiuduñ, ca' m'ixtägipy ma je iñaybejt cödumbi, ca' jécyity co yajhuoomiñ huidi je' iñaaybejt ymihuaad. ⁹Chi jada' xyñimähuipy je huidibi anajty ti xyhuoomiñ: “Mo' jada miügü jada iñaaybejt cödumbi.” Chi miich tzöydu'n miid mnicxpy ma je' iñaybejt axambi. ¹⁰Co jäy xyhuoohuipy ma je pijcin yajnixiuduñ, jim m'ixtägip ma je axambi iñaybejt, e co yminipy je huidibi anajty ti xyhuomiñ, chi xyñimähuipy: “Miügü, nax ma yi iñaybejt cödumbi.” Huin'it capxpaady m'idipy ma je' ajcxy huidibi anajty iñayb ma caybejthuinduu miid miich. ¹¹Pinjaty ci'm naygömáyip, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹²Chi Jesús nimay pinjaty huidi anajty ti yhuoomiñyii:

—Co miich mxiiidunipy ca' mhuoohuipy je jäy ajcxy huidibi ooy miid mnaymiüg'ájtigixy, ni mmidügquëx, ni m'ajuugy m'amigüg, ni mmidijc comeeñybi, ca' jécyity co nañ jadu'n xyhuoohuipy, e chi anajty jac mij yejc-huimbijty. ¹³Co mxiiidunipy, chi huoohuipy ayoobitijc, tzaachijäy ajcxy, tecymätpi ajcxy, etz jäy huuintzpi. ¹⁴Huin'it miich mjotcujc'adipy co yi' ajcxy ca' jadipy nej yejc-huimbidipy. Jiini Dios xymigüedipy co anajty yajjugypicy je tudägypi jäy ajcxy.

Je ijxpejt ma tüg adzoo'ájtin mijpi

¹⁵Tüg jäy huidi anajty iñaayb miid Jesús ma caybejt huinduu

co midooy nej Jesús yminañ, chi nimay Jesús:

—Jotcujc je jäy ajcxy huidi cayip jiiiby ma Dios y'ane'my.

¹⁶Chi Jesús y'adzooy:

—Tüg jäy may anajty jäy yaj'adzu'ada'n, chi jayijpni oy mayjäy nimay co anajty yaj'adzuu'ada'n. ¹⁷Co je adzuu'ibi paty, chi quejxy tüg cogapxy huen nicxy huogixy je tiibi anajty ajcxy yajnimäy, nimay ajcxy: “Jámgix, ti jim yajni'ixiy je caayin uucin.”

¹⁸Chi ajcxy nidüg'óciy yminandacy: “Tun may'ajt meexcich, ca' y'oyiy nej nyajníxibich.” Chi je' jayijp jäy y'adzooy: “Ti njuyich tüg rancho je' copicy jayijp nicxy n'ixyich, paady ca' nicxa'nich; tun may'ajt meexcich.” ¹⁹Chi jadüg jäy yminañ: “Ti njuyich migoox par huaj yuubi, nicxy n'oc'ijxmadza'nich jayijp, paady ca' y'oyiy nej níxibyich, tun may'ajt meexcich.” ²⁰Chi jadüg jäy yminañ: “Tim chamni nbicyich, paady ca' oyiy nej níxibyich.”

²¹Co je cogapxy yhuimbijty, chi yajnimay je' yhuindzin jadu'n nej je jäy ajcxy y'adzooy huidi anajty oy ti huoy. Huin'it je huindzin ooy yjotmätcoty, chi nimay je ytumbi: “Níx tzojcyi cajpjoty ma yi jäy ajcxy yöygixy ñajcxixy etz ma yi mij tü, e chi huomiinipy pin mdimypaatyp ayoobitijc, yi tzaachijäy etz huuintzpi.” ²²Chi je' ytumbi yminañ: “Huindzin, ti nduñich jadu'n nej ti xyñimäyich, etz jac chiini iñaybejt.” ²³Chi je huindzin nimay je' ytumbi: “Níx ma yi mij ni mij tü yajmin je jäy ajcxy adzip, huen iich ndije uch.

24 Chi iich miich nimäy co ni tüg yi jäy ajcxy huudi jayijp yajnimay, ca' ajcxy y'adzuu'adipy miid iich."

Nej ooy chípity co Cristo nbanicxim

25 Chi may anajty jäy ñicxy miid Jesús, chi Jesús yhuac-huimbijty, nimay ajcxy:

26—Pen ji pin xypamiñich, e ooy ñigi tzocy yí' ytaj yteedy, yí' ytöxyijc, yí' y'ung, y'ajch o chí', etz nañ ooy ñigi tzocy yí' yjugy'ájtín, ca' iich yí' huaad ndiscípulo'adyiijich. **27** Yi jäy ajcxy huudi xypamiimbich huudi iich ndiscípulo'adaanip, copicy yajnaxipy ajcxy ayo'n, jadu'n nipaady nejjihuüy ycruudz ti cabiccixy e nicxy yajcruudzpeda'ñiyi. **28** Co miich ajcxy mmijtijc mgojañ, chi miich ajcxy jayijp m'ixtaaccixy e m'a'ixiigixy jadu'ñiyi meeñydunaangixy, nej pen miid ajcxy huudi jébi miid myajmaaygixy je mmijtijc, o peni ca'. **29** Ca' yjécyity co anajty je tijc ti yajpojtzigy, chi anajty ca' m'ocjajtni nej myajmayipy, e pinjaty anajty ti xy'ixy, chi ooy xyñixigipy xyajxigipy. **30** Chi jäy ajcxy ymina'nip: "Jadayaabi yéydijc nigoo ti yajtzondägy tijc poch, e ca' ti ocyajmaayñi." **31** O huudi rey ji co chona'n tziptumbi miid huingbi rey, ¿ca' jayijp huinmayipy pen jébi chiptuñ miid majc mil jäy, pen je ymidzip miimb miid iipx mil jäy? **32** Ca' yjécyity co je tügpí rey jiguemni anajty miñ, chi quexipy tüg huingapxpi pijctzohuipy may'ajt ca'lydi yi tzip yjadyii. **33** Hueñyínity ma miich ajcxy pen

ca' m'ixmájtzcixy tüg'óciy tijaty miich ajcxy mmiid, ca' iich yí' huaad ndiscípulo'adyii.

Co je caan ytamtz'ajt ytigooyñi

34 Yi caan ooy yí' y'óyity pen ymiid ytamtz'ájtín. Co je caan ytigoy ytamtz'ájtín ca' ji ni ti xücx'ájtín yegipy. **35** Yi caan huudi ti ytigoy ytamtz'ájtín ni ca' y'oybidágnity ma je naax, ni ma je püx huudi aboon'ajtp. Hue' janchtiy yaj'ixjidejtp tibäy. Pinjaty iich n'ayuc xymidohuaanip huen mido'mbicy.

Ijxpejt ma je cöbixy huudibi tigooy

15 Chi ajcxy je yajcuetpidijc etz pocyjäydijc nimijhuágtay ajcxy Jesús tzach'amidoo'idaani ajcxy je' y'ayuc. **2** Chi ajcxy huudi ooy tzachmijpidägy judíojäy ytiy'ajt etz huudi ajcxy yaj'ixpijc Dios ñecy ameech nigapxcixy ni'ojiiygixy je Jesús, chi ajcxy yminañ:

—Yi Jesús pocyjäydijc ajcxy ymigüg'ajtpy, e yí' miid ycaaygixy.

3-4 Chi Jesús jadayaabi ayuc ajcxy yajnimay:

—Huudi jäy ji ma miich ajcxy pen ymiid migo'px cöbixy co ytigoy nidügti, ¿nej ca' yajhui'mipy je mada'px majmocx midaaxpi jim ma chinaaydac, chi nicxy ixtäy huudi anajty ti ytigoy ixti cooni paadip? **5** Co paadip, chi mic'amy pidägip ma quejycop janch jotcuic. **6** Co yajjädip ma ytijc, chi huomucy ymigügtijc etz ymijiin ymidijc, nimähuipy ajcxy: "Jotcugiiygix miid iich, ti iich ngöbixy nbaady huudi anajty ti ytigooy." **7** Hich

miich ajcxy nimaayb co nañ jadu'n tzajpjoty ooy jotcuje'ájtín nīgi miid co tüg pocyjäy yjothuimbity, ca'ydi miid mada'px majmocx madaax tudägypi jäy huidi ca' ytundigoy.

Ijxpejt ma je meeñ huidibi tigoy

⁸Chi Jesús yjacminañ:

—¿Huidi töxyjäy ji pen ymiid majc ymeeñ, co ytigooy tüg meeñ, nej ca' jiiñ nöctzohuipy, e ytigihuipy pedigpi ixtähuipy ymeeñ oñydägy ixti cooni paadipy? ⁹Co paady, chi huomucy ymīgügtijc etz ymijiiñ ymidijc, e chi nimähuipy: “Xondaaccix miid iich, ti iich nmeeñ nbaty huidibi iich anajty ti nyajtigoy.” ¹⁰Jadu'n iich miich ajcxy nimäy co nañ jadu'n Dios y'ángeles ajcxy ooy yjotcújcicy co yjothuimbity tüg pocyjäy.

Ijxpejt ma je ung huidibi ymeeñ yajtícxstay

¹¹Nañ jadu'n Jesús yjacminañ:

—Tüg yëydijc ymiid anajty metz ymang. ¹²Chi je jacmutzpi nimay yteedy: “Tat, mooygich yi pidägy huidi xypaatpich.” Chi je' yteedy je pidägy yajhuäcxy. ¹³Hueeni anajty xii tzuu cujc ñicxy, co je' ymang mutzpi yajmujctay tüg'óciy huidi yi yjé'ajtpy, chi chooñ ñicxy huingnaax huinggajp. Chi jim mic'amy yajtunday yajtigoyday tüg'óciy huidi anajty ymiid. ¹⁴Co anajty ymeeñ tüg'óciy yajtunday, chi miin tüg mij yuu ma je cajp. Chi ooy je mang mutzpi caayin uucin huit meeñ jayajmayajtni. ¹⁵Chi je' ninicxy tüg jäy ma je jimbi naaxjot ymiduna'ñ anajty. Chi yquejxi ma yrancho idzim cuend'ajtpi. ¹⁶Ooy

anajty janijot'aty ycüxa'ñyii miid je pëtztim huidi anajty idzim y'ojcpy. Chi ni pin anajty ni ti ycamöyii.

¹⁷Co yhuinma'ñ yajmejch, chi yminañ ma yjot yhuinma'ñ: “Jim janch maytumbi ma iich ndeedy ytijc, ymiid ajcxy jiiicxy picy janch may'amy. Hich ya tzach'ayoob miid yuu xii. ¹⁸Tzonaambich ya, nicxa'ñich ma iich ndeedy, nimähuibich: Tat, ti ndundigóyich miid Dios tzajpjotyti etz miid miich. ¹⁹Cham ca' ypadyii miich mina'ñip co miich xy'ung'adyijich. Yajtungich jadu'n nej mdumbidijc.” ²⁰Chi je' choñ, ñicxy ma yteedy. Jeguëgyñi anajty ymiñ co yteedy y'ijxpaati. Chi yteedy ypa'ayogoti, e ñicxy poyigy oy jijpcobadiy. Chi yögminennajxy etz tzücxy. ²¹Chi je ung yminañ: “Tat, ti ndundigooyich miid Dios tzajpjotyti etz miid miich. Cham ca' ypadyii nicxy miich mina'ñ co iich miich xy'ung'adyii.” ²²Chi je ungededy nimay je' ytumbi: “Yajpidzim je huit oybi, mic'amy yajnijeniiygix jada n'ungich, chi mooygix yi cijiitz etz ycig. ²³Ñicx yajtzoongix yi huaj mang nicxpi, yaj'öccix, chi ngaayim n'uucim e nxiiduunim. ²⁴Jada n'ungich jadu'n nipaady nejjihuüy anajty ti y'ögy, e chi ti yjugypicy. Tigooy yi' anajty e ti yjädy.” Chi ajcxy ooy yjotcugiiy.

²⁵Chi je ymang mijpi camjoty je' anajty. Co yja'ty mihuingon je ytijc, chi midoy co jäy ooy yxüxy etz y'ech. ²⁶Chi yaaxi tüg ytumbi y'amidooy: “¿Ti yi' túnip jájtíp?” ²⁷Chi je tumbi y'adzooy: “Ti yjädy m'uch, ti mdeedy yaj'ögy tüg huaj nixcpi, co ymang ti huimbity juugy.”

²⁸Chi je ungoob ooy yjotmäty, ca' anajty ytigihua'n tigoty. Huin'it je yteedy ñibidzimi, ycohuaniiyi co huen tigöy tigoty. ²⁹Chi je' y'adzooy, nimay yteedy: "Janch micanaag jimijt iich miich miid nduñ, ni ca' ngapxhuimbityich. Ca' chambaad miich ni ycamooyich tüg pi'ccöbixy jaydëb njotcujc'adipyich nxiidunipyich miid nmigügtjicich. ³⁰Per co yi mmang ti yjädy huidi oy ti yajtundäy yi ymeeñ miid jibic-huinma'n miid jibic töxyjäydjic ajcxy, chi ti myaj'ögy huaj mang nïcixpi miid yi' ycixpi." ³¹Chi je ungedeedy nimay je' ymang: "Miich ung huinixii ya miid n'ity. Tüg'óciy huidi nmiidich miich yi' mje'. ³²Ooy ycopícyity co nxiiduunim etz njotcugiiyim, co yi m'uch jadu'n anajty nej ti y'ögni, e jadachambi ti yjugypicy, ti anajty ytigoy, e cham ti yajpaady."

Je iixpejt ma je mayordomo huidibi ca' yhuindzin miduñ tudägy

16 Nañ jadu'n Jesús nimay yi' ydiscipulos:

—Jim anajty tügjäy comeeñybi, ymiid tüg ytumbi huidi yi' ypidägy cuend'ájtíp. Chi oy nimäyii co tüg je ytumbi nigoo anajty tzachyajtuñ je meeñ ma ycapaadyii. ²Chi je huindzin oy yajhuoyii je' ytumbi, chi nimay: "¿Nej jada co iich jadu'n nimäyijich miid miich ycixpi? Ya yi cuenti cimoydaaygich nej ti mduñ, etz ca' iich miich n'ocjactumbi'adaanin." ³Chi je pidägy cuend'ajtpi jot'ajti: "¿Ti ndunipich? co yi' nhuindzin xyajpidzima'nich ma yi ytung. Juttajii ca' njatyich, co limosna

nbijctzohuipyich tzöydümbich. ⁴Nejhuiiybich ti ndunipich jaydëb jäy ajcxy xycöbigipyich ma ajcxy ytiyc." ⁵Chi tüg tüg huoy pin anajty minuucx'ajtp je' yhuindzin; chi y'amidooy je jayijpi: "¿Jadu'nyi miich minuucxy'adyii iich nhuindzin?" ⁶Chi je' y'adzooy: "Migo'px garafón aceite." Chi nimay: "Matz mnecy, iña' mic'amy, e cojayi' huixchiguipxmajc." ⁷Chi jadüg nimay: "¿Miich jadu'ni mminuucxy'adyii?" Chi je' y'adzooy: "Migo'px quipxi'n trigo." Chi nimay: "Matz mnecy, cojayi' mida'px." ⁸Chi je pidägy huindzin capxpaaty je jibicjäybi huidi cuend'ajtp yi' ypidägy co oy yhuinma'nybaady mij; co jadachambi naaxhuin'yjäy huidi ca' mibicy Dios, nigü ajcxy ypëgyity miid yhuinma'n, ca'lydi yi jäy ajcxy huidi huinjihuuyb Dios ytiy'ajt. ⁹Iich miich ajcxy yam nimaayb migüg'ájtigixy yi jäy ajcxy miid yi meeñ huidibi ca' ytimytiijyity, jigix co je meeñ anajty myajmayajtcixy ji pin miich ajcxy xycöbigip ma jugy'ajttac huinixiibi. ¹⁰Je' jäy ajcxy huidibi yajxon cuydunam je ané'min huidi hueeni, nañ ycuydunamy je ané'min huidibi mijip. Je jäy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min. ¹¹Pen ca' majajtcixy nej mgüend'ájtixipy yi jugy'ájtin huidibi ya naaxhuin'yajpatp, çpin miich ajcxy m'ocyajmihui'mamy je jugy'ájtin je riqueza oybi janchypí? ¹²Pen ca' m'ajajtcixy nej mgüend'ájtixipy tiibi mihui'mgixy huidi huingjäy yje'ajtpy, çpin miich

ajcxxy yxmöhuip huidibi ajcxxy
y'jé'ajtpy?

¹³Ni tüg tumbi ca' jébi ytuñ miid
metz yhuindzin; com tüg je' ixtijipy
etz jadüg mijnicxpedipy; o tüg
huidi ycapxycöbigipy, etz jadüg ca'.
Miich ajcxxy ca' huaad mijpidägipy
Dios etz nañ jadu'n mijpidägipy yi
comeeñ'ájtín.

¹⁴Nañ jadu'n midooy jada ayuc
yi fariseojäy ajcxxy, com ooy anajty
ajcxxy meeñ adzójccixy. Chi ajcxxy
ooy nixiici yajxiici Jesús y'ayuc.

¹⁵Chi Jesús yminañ:

—Miich ajcxxy fariseojäy jadu'n
mnyabidácigixy ma jäy ajcxxy
yhuinduu nejjuhuüy ajcxxy ooy
m'oyjäyity. Dios ñejhuüydaayb co
miich ajcxxy miid jibicpi ma mjot
mhuinmañ. Tijaty huinmañ huidi
jäy ya naaxhuin y'oy'ijxyp, Dios ca'
yi' oy'ixy.

Je Dios ycötújcin etz je Dios y'ane'mdac

¹⁶Chi Jesús yjacminañ:

—Je taabi je Juan anajty yjiijity,
jii'ajtp anajty Moisés ycötújcin
etz je y'ayucnajtzcaxpiiybi ajcxxy
y'ixpájcín. Huin'it tiempo etz ixti
jadachambi jadu'n yajnajtzcaxpiy
je Dios y'ané'min, e mayjäy ooy
ñaybidácigixy co ytigihuaangixy
ma Dios y'ane'my.

¹⁷Ca'chípity co je tzajp etz
naaxhuinbi ñajxtáhuipy, pero je Dios
ycuydundáhuamy tüg'óciy jadu'n nej
ñecy yminañ. Ni tügi letra oy mabaad
ymúdzity nicxy ycajaycuyduñ.

Jesús capxticxy nej ypöcyity co jäy ytöxyjic ixmach

¹⁸Chi Jesús yjacminañ:

—Huenpinjäyity co ytöxyjic
ixmach etz ypicy miid huingbi
töxyjäy, ooy anajty mij pocy
tuñ. Nañ huenpinjäyity huidibi
pijcp miid je töxyjäy huidi ñäy
ti y'ixmachyii, nañ mij anajty
ypocytuñ.

Je comeeñjyay etz je Lázaro

¹⁹Chi Jesús yjacminañ:

—Ji anajty tüg jäy comeeñybi
ñayxoxyii anajty janch ooy
miid oyjatypi huit, etz janch oy
ycay y'ügy jabom jabom. ²⁰Nañ
ji anajty tüg ayoobi jäy huidi
limosna pijctzoob, hue' anajty
yxii Lázaro. Lázaro jabom jabom
anajty ycögnäy ma je comeeñjyay
ytijc'aguu, janch ni'buutzp anajty
ooy. ²¹Lázaro ooy anajty jani'ixy
cayañ je cayduc tzütztuc huidibi
cáb ma je comeeñjyay ycajbejt. Oy
uc anajty ymiin yhueyii je ñibüdz.
²²Chi jadu'n yjajti co oy y'o'cni je
jäy huidi limosna pijctzoob, chi
je ángeles ajcxxy yajnicxy Lázaro
ma je Abraham yajpaady. Chi je
comeeñybi nañ jadu'n y'o'cni, e oy
yajnaaxtigiyii. ²³Chi je comeeñybi
jiiby ca'oydactuuby tzaachypi
anajty jihuüy, chi mij'ijxy jigüegy
je Abraham etz je Lázaro. ²⁴Chi
je comeeñybi ycapxy janch mic,
yminañ: “Apteedy Abraham, iich
pa'ayoog. Tun may'ajt quex Lázaro,
huen yi' ycihuax yajxoogy miid
nii etz xyajtjtzibich ndootz, co
iich ooy ayo'n nbaadyich ma jada
mij jiiin.” ²⁵Chi Abraham y'adzooy:
“Oc'ungich, ajihuühui co ti mdzinäy
ti mjogy'aty miid mhuit mmeeñ
agujc jotcujc, e yi Lázaro ooy
ayo'n paty. Jadachambi Lázaro

yjotcujc'aty, etz miich jiiby mbatpy tzaachypi. ²⁶E jadügnax, ji tüg mij huoc ma iich ajcxy etz miich ajcxy. Pen iich jim'amy janaxam ma miich, ca' njadipyich, nañ jadu'n miich ajcxy ni pin ca' jadipy nej ñaxipy ma iich nyajpaadyich." ²⁷Chi je comeeñybi jacnimay Abraham: "Apteedy Abraham, tun may'ajt quex yi Lázaro ma iich ndeedy ytijc. ²⁸Jim ma iich ndeedy ytijc jim migoox miguëx nmíididyich, huen nicxy yajmiidmiyaaccixy, ca'ydí je' ajcxy nañ jadu'n ya minipy ma jada ayoodac." ²⁹Chi Abraham y'adzooy: "Yí' ajcxy ymiid necy huidibi Moisés etz Dios y'ayucnajtzcaxxiybi ycojaay, huen cuydungixy." ³⁰Chi je comeeñybi yminañ: "Janch jadu'n apteedy Abraham. Pen nidüg yi ögpi ñicxy ma je' ajcxy, jothuimbidip yi ajcxy." ³¹Chi Abraham yminañ: "Pen ca' je' ajcxy mijpidägy Moisés y'ayuc je jécyip etz huidi ajcxy jecy'ajt Dios y'ayucnajtzcaxxiy, nañ ni ca' mibíjccixipy pen nidüg ögpi yjugypicy."

Huidibi ooy ycodzigíity co n'agánáxim ma pocy

17 Chi Jesús nimay yi' ydiscípulos:
—Janch tiy'ajt jadu'n co yminip jäy ajcxy huidi yajhuinma'nydigoyip yi mayjäy ajcxy miid aanií. ¡Ay yi' ayooob ajcxy! pinjaty jäy ajcxy yajhuinma'nydigoyaangixy. ²Nigi y'óyity co ixypy yajyo'cxodziyíi tüg tzaa janch mijpi, e chi yajcöjibijpnaxipy mejyoty, ca'ydí co yajhuinma'nydigoyipy

jada jäy ajcxy huidibi ixpíjcin hueeni miid ma Dios ytiy'ajt. ³Naygüend'ájtigix miich ajcxy co ca' mgapxtigóoygixipy.

Co m'uch xymidundigooyipy, e chi mgapxhuíjip, e pen jothuimbijit, chi mbocymeecxipy. ⁴Pen m'uch huixtujc'oc xymidundigooy tüg xiibi, nañ huixtujc oc xyñimiiñ tüg xiibi, e ymina'nipy: "Ti njothuimbityich", huinmeecxipy miich yi', chi jada' miich huixtujc'oc mbocymeecxip.

Je mibíjcin ymic'ajt

⁵Chi je apóstoles ajcxy nimay je Huindzin Jesús:

—Yajyeeg iich ajcxy nmibíjcin.

⁶Chi je Huindzin Jesús y'adzooy:
—Co ixypy miich ajcxy mmibicy Dios jadu'n nej tüg pi'c mostaza pajc, e mníma' ixypy jada paadzim quipy: "Nayyajpidígíi, nicx tina' mejyoty, e xycapxymidohuip yi'."

Ti huaad tuñ je pin yajcaayb yaj'uuc

⁷Pen ji miich ajcxy nidüg pin ymiid tüg ytumbi huidi tumb ñaaxjíditzii o yhuaj cuend'aty, co yja'ty ma mdijc, énej jébi nimay: "Tigi', ixtäg ma mesa etz adzu'at?" ⁸Hue' janchtiy mnimáhuipy: "Yaj'oyíiyigich n'adzuu'íbi, co'amedí' mhuit, e xymooygich ngaayin n'uucín. E huin'it miich mgayipy m'ügipy." ⁹Énej yajnaxipy je' Dioscojuyip miid co je' anajty ti tuñ huidibi yaj'ane'my? Íich minamb co ca'. ¹⁰Nañ jadu'n miich ajcxy co ti mguydungixy tüg'óciy tíibi Dios xyaj'ane'mgixy, chi mmináangixipy: "Je' iich ajcxy je tumbi huidibi ca'p ycapxpaadyity, jéyi ti ndúngixich huídibi iich ajcxy huaad ndungixy."

**Jesús yajtzögy majc jäy
jibic pützpa'mmiidpi**

¹¹Nicxp jim Jerusalén anajty Jesús, chi ñaxiy ma Samaria etz Galilea ñaymidziba'n'ájtigixy.

¹²Co anajty mihuingoñ tüg cajp, chi jįpcoyöyiy majc jäy pützpa'mmiidpi. Chi ajcxy yhuäcxijpy jįguëgyñi. ¹³Chi ajcxy mic ycapxcoody yminaangixy:

—Huindzin Jesús, pa'ayoog iich ajcxy.

¹⁴Co Jesús je' ajcxy ijxy, chi nimay ajcxy:

—Nıcx nayguëxıcgıx ma yi teedy ajcxy.

Chi jadu'n yjajtı, co ajcxy ñıcxı, chi tüyöyjoty oy choocıxy.

¹⁵Nıdügtı je' ajcxy co ñay'ıjı co ti anajty chögy, chi nihuimbijty Jesús, ooy Dios jäymech cömay janch cıxyjot huınıjot. ¹⁶Chi je' ycojxtınay'ahuiy ma Jesús ytecymıjı, chi pidacpy yhuıñyjıj naaxcıxy yajnaxy Dioscojuyıpy. Samaritanojy je' anajty. ¹⁷Chi Jesús yminañ:

—¿Nej ca' nimajc miich ajcxy huıdı ti mdzoocıxy? ¿Ma ajcxy je' janıdaxtıjcpı? ¹⁸¿Nej ca' pın jac yhuimbijty miın jäymedza'ñ cömaya'ñ Dios, jäyi tügpajc ti yhuımbity jada samaritanojy?

¹⁹Chi Jesús nimay je jäy:

—Pidıg, nıcxni. Yi mmıbıjcin ti yajtzögy.

Nej je' yminıpy Dios y'ané'mın

²⁰Chi je farıseojy ajcxy y'amıdooy Jesús mına anajty yi Dios ya mıñ ya naaxhuiñ y'ane'ma'ñ. Chi Jesús y'adzooy:

—Je Dios y'ané'mın ca' je' yminıpy jadu'n nej ti yaj'ıxy o yajmıdooy.

²¹Nı mgamináangıxıpy co cha je' o jim'amy je'. Dios y'ané'mın ya je' cham ma miich ajcxy.

²²Chi Jesús nimay yi' ydiscıpusos ajcxy:

—Miim je xıı je tiempo ma miich ajcxy anajty ooy xyjamiid'idáangıxıch tüg xıı, e ca' iich miich ajcxy xy'ıxıpy, iich je jäy huıdı tzoon tzajpjoty. ²³Chi jäy ajcxy yminá'nıp: “Chaa'amy je', je Cristo”, o “Chım'amy je'.” Ca' miich ajcxy yi' mnınıcxıxıpy, e ni mgabanıcxıxıpy. ²⁴Co anajty nmiñıch jadügtecy ya naaxhuiñ, iich, je jäy huıdı tzoon tzajpjoty, co iich anajty nmımiñ n'ané'mın, jadu'n je' yjadıpy nej huıdzuc co y'aa'an ma tüg tzajp'ıjx e nañ jadu'n y'aa'an jadüg tzajp'ıjx. ²⁵Nañ ooy ycopıcyıty co jayıjıpcıpı adıbıch ayo'n, e chi jada xyca'ıxa'nıbıch xycatzoga'nıbıch yi jäy ajcxy huıdı tzınaayb jıgy'ajtp jadachambi tiempo. ²⁶Com jadu'n nej yjajtı jecy'ajty, co je Noé chinaay, nañ jadu'n yjadıpy co anajty iich, je jäy huıdı tzoon tzajpjoty, co anajty nxıı ndıempo paty mına anajty nmiñıch ane'mbı. ²⁷Janch caayb janch uucp anajty je jäy ajcxy agıjı jıtcıjı co je Noé ytıgııy ma ymıjcajıon. Chi je ayo'ndıu ymiñ huıdı cıjx yaj'ögtıgıydy je mayjäy. ²⁸Nañ jadu'n yjajtı jecy'ajty co Lot chinaay. Je jäy ajcxy jim Sodoma etz Gomorra ycaaygıxy y'uuccıxy yjuuygıxy ytoocıxy, etz ytıjccoıjıcy. ²⁹Huın'ıt xıı co Lot chooni jim Sodoma, chi ycäy tzajpjoty jıın etz huıdı jındzaa mıid

conhuidity ytoy, chi cajp ytigoyday.
³⁰Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadiiyb ayo'n co anajty nmiñich jadüg'oc ya naaxhuiñ, iich je jäy huidi tzoon tzajpjoty.

³¹Je huin'it xii huin'it tiempo pin anajty iñaayb ma ytijccop, e ymiid anajty ypidägy jiiby tigoty, ca' niminagipy nicxy ti yajpidzimy, e huidi jäy anajty jim camjoty nañ ni ca' yhuimbidity ma ytijc.

³²Ajihuiiygix jadu'n nej Lot ytöxyijc ayo'n paty. ³³Tüg'óciy jäy ajcxy pinjaty yjugy'ajt tözgam, tigoyipy yjugy'ajt. Tüg'óciy jäy ajcxy pinjaty yjugy'ajt tigooyb (miid iich ycixpi), hue' je' yjugy'ajt ypaadipy chögipy.

³⁴Iich miich ajcxy nimaayb co je huin'it coodz nimetz jäy anajty ajcxy ma cijx, tüg yajnicxiyb etz jadüg yajhui'miyyb. ³⁵Nimetz töxyjäy anajty yjijtzcixy, tüg yajnicxiyb, etz jadüg yajhui'miyyb. ³⁶Nimetz yëydijc anajty ytungixy camjoty, tüg yajnicxiyb etz jadüg yajhui'miyyb.

³⁷Chi je jäy ajcxy huidi ixpijcp Jesús y'ayuc yminañ ajcxy:

—¿Ma jadu'n yjadiiyb nej miich ti mina'ñ, Huindzin?

Chi Jesús yminañ:

—Ma anajty je ögpi yajpaady, jim yi luud ajcxy ñimuga'ñ.

Je iixpejt ma je ayoobitöxyjäy etz je juez

18 Chi Jesús yajnimay ajcxy tüg ayuc huidijaty ixpijcp ma yi' co ooy ycopícyity Dios nmibijctzoohuim jabom jabom, ni ca' nmidziipim. ²Chi Jesús yminañ:

—Ji anajty tüg juez ma tüg cajp, ni Dios anajty ca' tzigüy, etz ni jäy

ajcxy anajty ca' huindzigüy. ³Nañ ma je cajp jim anajty tüg co'ögy ytöxyjäy. Je' anajty yminög janam jadojz ma je juez, nimäy anajty: “Nihuaangich ma je nmidzipich.” ⁴⁻⁵Chi je codung ca' co'adzoy ca' a'ixiy tzojz. Chi je juez jot'ajti, yminañ jotjoty huinma'ñjoty: “Oy Dios ca' ndzigüyich, ni jäy ca' nhuindzigüyich, per com jada co'ögytöxyjäy nigi xychach'amayüyich, miñ n'ocnihua'ñich, ca'ydi jadüg'oc ymiñ e xyajcixich anajty nmecxtüjcin.”

⁶Chi je Huindzin Jesús yminañ: —Mido'mbic miich ajcxy nej je juez jibicjäybi ti nihuañ je töxyjäy co anajty ti yajtzibiyi. ⁷¿Nej ca' Dios ñihuaanip yi huidibi ti huin'ixy, huidibi mibijctzooob xiim tzuum? ¿Huäcxibip, nicx ca' tzojz adzooy? ⁸Iich miich ajcxy nimaayb co Dios ñihuänamy mic'amy yi' yjäy. Co anajty nhuimbity ya naaxhuiñ, iich, je jäy huidi tzoon tzajpjoty, ¿nej nbáadibich mibájcjin ya naaxhuiñ?

Je iixpejt ma je fariseo etz ma je yajcogüejtpi

⁹Jesús ñimiydac je jäy ajcxy huidi ci'm ooy ñaygömayyii co ooy y'oyjäyity, etz pejxy yi jacjadyiibi jäy ajcxy, chi yajnimay ajcxy tüg jihuibit ayuc:

¹⁰—Mejtz jäy ajcxy ytigüy ma Dios ytijc capxtacpi. Tüg hue' je' fariseojäy, e jadüg yajcogüejtpi. ¹¹Chi je fariseojäy ytinay'ahuüy ycapxtägy, chachmina'ñ jadu'n: “Dios Teedy, Dioscojuyip yajnajxpich com co ca' iich nbocytuñich jadu'n nej jacjadyii

jäy ypocytúnngixy, ca' nmeechich, ca' njibicjäyidyich, ca' nmigapxich huingjäy ytöxyjic, ca' nbocytuñich jadu'n nej jada yajcogüejtpi. ¹²Mejtz xii n'ityich jaygay tügpí seamaan. Chi huen ytim ti nmíidich ngüejtpyich ma Dios majcjaty." ¹³Per je yajcogüejtpi jiguem ytinay'ahuuiy, ni ycapät'ixy tzajpcijx, jëyi ycaachtzachoxy ymína'ñ: "Dios Teedy, pa'ayoogich, iich pocyjäyich." ¹⁴Hich miich ajcxy nimaayb co jada yajcogüejtpi y'idacy ma ytije ti anajty yajhuinmecxy ypocy, e je fariseojäy ca' yajpocyhuinmecxy. Huenpínity huídi c'i'm naygömayipy, Dios yajtzöyduniib; e pinjaty ca' ñaygömayyii c'i'm, Dios ycömayiib.

Jesús conucxy je pi'ctijc ajcxy

¹⁵Chi jäy ajcxy miidmiñ pi'c'anäg ma Jesús huen nidoñyii. Co je' ydiscípulos ajcxy ijxy, chi ajcxy ojy ungday. ¹⁶Chi Jesús yaaxi ymígügtijc nimay ajcxy: —Ixmatz, huen yi pi'ctijc xyñimiñich, ca' ajcxy mjijpcogapxiygixy, com yi jäy ajcxy huídibi yajpatp ma Dios y'ané'min, jadu'n ajcxy nipaady nej pi'ctijc. ¹⁷Janch iich miich ajcxy nimäy co hueñypínity huídi ca' cöbijci yi Dios y'ayuc ytiy'ajt jadu'n nej yi pi'ctijc ajcxy cöbijcy Dios y'ayuc ytiy'ajt, ca' yi' ajcxy ytiy'ajtiy ma Dios y'ané'min.

Tüg comeeñ'anäg ymiydägy miid Jesús

¹⁸Chi tüg micjäy y'amidooy Jesús, nimay: —Miich oyjäybi Huindzin, çti huaad nduñich co iich n'alma nídzoocin paadipy?

¹⁹Chi Jesús y'adzooy:

—¿Nej co xytíjich oyjäy? Ni pin ya yca'oyjäyity, je'yi Dios tügpajc y'oyjäyity. ²⁰Miich mnejhuuiyb yi Dios ycötújcín. Ca' mmigapxtigoyipy huingbi töxyjäy, ca' jäyyaj'ögipy, ca' mmeedzip, ca' mmigüg nihuambedipy, yajmij'at mdaj mdeedy.

²¹Chi je' y'adzooy:

—Ti tüg'öciy nguydundäyich jada cötújcín maabi nyeecpidzimyich.

²²Co Jesús jadu'n midooy, chi nimay:

—Tigoy'ijtni ja tüg huídi ca' mduñi. Toocta' tüg'ócíy tijaty miich miid, e mo' je meeñ ayoobtijc, huin'it mgomeeñ'adipy jiiby tzajpjoty; miin, e pajamgich.

²³Co je comeeñybi jadu'n ayuc midoy, chi ooy yjottigoygoty com ooy anajty ycomeeñity. ²⁴Co Jesús ijxy co je comeeñybi anajty ti yjotmaybicy, chi mínañ:

—Ooy chachchípity ytiy'ajtiy tüg comeeñyjäy ma Dios y'ané'min.

²⁵Jac ca' chípity co ñaxipy tüg camello ma yi xu'ñ yxútity, ca'ydi co tüg comeeñyjäy ytiy'ajtiy ma Dios y'ané'min.

²⁶Chi je jäy ajcxy anajty tiibi ajcxy midoogixy Jesús y'ayuc, yminaangixy:

—¿Pin jada' jëbi y'alma paadipy nídzoocin?

²⁷Chi Jesús y'adzooy:

—Huidibi naaxhuiñyjäy ajcxy ca' jaty nej yaj'oyihuipy, Dios jëbi yaj'oyiy.

²⁸Chi Pedro yminañ:

—Hich ajcxy ti nbidägy n'ixmajtztaaygixy, co nbanicxaangixy.

29-30 Chi Jesús y'adzooy:

—Janch iich miich ajcxy nnimaaygixy co yi jäy ajcxy huidi ytijc ixmajtz etz ytaj yteedy, ymiguëx, etz y'ung y'anäg miid Dios y'ané'min ycixpi, ypáadipy ajcxy ya naaxhuiñ nīgi oy'ájtin, etz ypaadipy ajcxy tzajpjoty tzinaayin huidi ca' ycixipy ytigoyipy nimina.

**Jesús capxypidzimy
jadüg'oc co y'öga'ñ**

31 Chi Jesús huodzon je nimajmetzpi, nimay ajcxy: —Jadachambi tzoc jámim jim Jerusalén. Nguydunaamyich tüg'óciy jadu'n nej yi Dios y'ayucnajtzcaxpiiybi ajcxy jaybejty jecy'ajty miid iich ycixpi, iich, je jäy huidi tzoon tzajpjoty. **32** Chi nyajcäyega'ñich ma je romano gobernador, xycamij'ixipy xycamijpidägibich ajcxy. Xy'ójibich xyhuindzújibich xyjijptzújibich ajcxy. **33** Xychaachtunipyich ajcxy, xyaj'ögibich ajcxy, e codugiig xii njugypigipyich jadüg'oc.

34 Chi yi majmetzpi ajcxy ni jadu'ñyi ca' huinjihuüy ajcxy nej yhuimbizimy Jesús y'ayuc. Yüch anajty jada ayuc miid yi' ajcxy ycixpi, paady ca' huinjihuüy nej anajty yajnimaaaygixy.

**Jesús yajhuindicxgy tüg
huintzpi jim Jericó**

35 Chi jadu'n yjajti co Jesús mihuingoñ je cajp huidi yxii Jericó, chi tüg huintzpi anajty inäy tüba'áy pijtzoy anajty limosna. **36** Co midooy mayjäy ñaxy, chi je' yajtiy: —¿Pin yi' ñajxp?

37 Chi ajcxy nimay co Jesús nazareno najxp. **38** Huin'it je huintzpi mic yminañ:

—Jesús, David y'ap y'oc, iich pa'ayoog.

39 Je jäy ajcxy huidi anajty jayijp nicxp ooy ogy je huintzpi, nimay co huen amoñ. E je' nīgi mic yminan'idich:

—David y'ap y'oc, iich pa'ayoog.

40 Chi Jesús ytinayxijpy oy yajhuoyii. Co je' jim ymejch, chi amidoy, nimay:

41 —¿Ti mdzojcpy ndunipyich miid miich?

Chi je' y'adzooy:

—Huindzin, yajhuindicxiccich.

42 Chi Jesús minañ:

—Huindicxig, yi mmibájin ti xyajtzögy.

43 Chi je huintzpi mic'amy yhuin y'ijxgy, chi panixy Jesús, chi ooy jäymejch cömay yi Dios. Cham tüg'óciy je cajp jäy co ajcxy jadu'n ijxy, nañ ycömay yjäymejtz yi ajcxy Dios.

Jesús miid Zaqueo

19 Co Jesús ytigüy jim Jericó, ñajxy cajpcujc anajty. **2** Chi jadu'n yjajty jim anajty tüg jäy hue' anajty yxii Zaqueo. Hue' je' anajty yajcogüejtpi huindzin, e comeñ anajty. **3** Ooy yi' anajty tzach'ixa'ñ Jesús, nejhuñhua'ñ pin jäy je', chi ca' jajty nej ixipy, je' co anajty ñaxity, etz co anajty ooy mayjäy jim. **4** Chi je' ñicxy poyigy jayijp, chi ypejty ma tüg sicómoro quipy, yco'ijxnaxa'ñ co anajty Jesús jim ñaxy. **5** Co Jesús jim ymejch, chi pät'ijxy je Zaqueo, e nimay:

—Zaqueo, tzojc minac, com copicy co nicxy njättäga'nïch ma mdijc.

⁶Chi je' yminajty janch jottigoy, e jotcujc cöbijcy Jesús. ⁷Co jadu'n ijxy, chi je mayjäy ajcxy nigapxy ni'ojiiygixy Jesús, yminaangixy:

—Ti ñicxy jättacpi ma tüg pocyjäy ytijc.

⁸Chi Zaqueo ytinayigy, nimay Jesús:

—Huindzin Jesús, cha je' je njugy'ajtich huidi cup nbjic-huäcxaamyich nmöhua'nïch ayoobitijc. Pen ti iich nyajcujtnaxy, nyajhuimbidityich mïdaax jadu'nïyi.

⁹Chi Jesús yminañ:

—Jadachambi jada jäy ma jadayaabi tijc ti y'alma ñändzögy, com co yi' nañ jadu'n Abraham y'lap'adyii y'oc'adyii. ¹⁰Ïch, je jäy huidi tzoon tzajpjoty, ti nmiñich ya naaxhuiñ co n'ixtähuibich etz nyajnidzögibich tiibi anajty ytigooy.

Je ijxpejt ma je majci meeñ

¹¹Co je jäy ajcxy midooy jadu'n, chi Jesús jacyajnimay ajcxy tüg ayuc, com ytimymihuingónip anajty Jerusalén, etz je jäy ajcxy tzachhuinmaaygixy co Jesús mic'amy anajty pidäga'n y'ané'min.

¹²Chi Jesús yminañ:

—Tüg micjäy, comeeñjäy anajty, ñicxy ma tüg naaxjot jigumbi, nicxy anajty ytungbicy co yrey'ada'n, e chi anajty yhuimbidaani. ¹³Chi je micjäy mijhuooy nimajc ytumbi, chi moy ajcxy majc meeñ nidüg nidüg, chi ajcxy nimay: “Meeñ yaj'ung'ajtcix ji ixti cooni ñich anajty nhuimbityich.”

¹⁴Chi je ymïgogajp ajcxy ca' anajty ixa'nïyi ajcxy je comeeñybi, chi

ajcxy yajpaguejxy huingapxi ma anajty je comeeñybi ñicxy, chi je huingapxi yminañ: “Ca' iich ajcxy ndzocy co jada comeeñjäy rey'adipy ma iich ajcxy.” ¹⁵Chi jadu'n yajty co je comeeñjäy yhuimbijty ti anajty yreytigy. Chi oy yajhuoyii je ytumbi ajcxy, je huidi anajty je meeñ ti yajmihui'mgixy, nejhuihua'n anajty jadu'nï ti yaj'ung'ajtcixy je meeñ nidüg nidüg. ¹⁶Chi tüg jayjip ymiñ yminañ: “Huindzin, yi meeñ majcjadu'nï ti nyaj'ung'atyich.”

¹⁷Chi je rey y'adzooy: “Ooy miich oy mduñ. Jadu'n nej ti mgapxycöbicy miid huidi hueeni, cham m'ané'mipy majc ciudad.”

¹⁸Chi je mimetzpi ymiñ, yminañ: “Huindzin, yi mmeñ migoox jadu'nï ti nyaj'ung'atyich.” ¹⁹Chi je rey nimay je mimetzpi: “Cham m'ane'mipy migoox ciudad.”

²⁰⁻²¹Chi je midugiigpi ymiñ, yminañ: “Huindzin, cha je mmeñ huidi ti nmi'ityich, ti nyujpcicyich ma tüg paayi. Ndzigiibich miich co miich mjäy'aty ahua'n, myajpidigtäy huidi ca' mjë'adyii, nañ mdzijcipy huidi ca' ti mnipy.”

²²Chi je rey yminañ: “Miich jibic ti mduñ, cham ndiyduna'n miid mgi'm'ayuc ycixpi. Miich mnejhuiyb co nyajpidigyich huidi ca' një'adyijich, e ndzicyich huidi ca' ti nnibych. ²³¿Nej co ca' ti mbidägy ñich nmeñ ma je banco, jigix co ixypy nhuimbityich, may meeñ ixypy xycidigyich miid meeñ'ung?” ²⁴Chi je rey nimay huidi anajty ajcxy jimip: “Pijci ajcxy yi' ymeñ, etz mooygixy yi' tiibi meeñ yaj'ung'aty majc

jadu'ñyi.” ²⁵Chi je jäy ajcxy y'adzooy: “Huindzin, ymiid yi' cham majc jadu'ñyi meeñ.” ²⁶Chi je rey y'adzooy: “Hich minaaam co tüg'óciy pinjaty miid, jacyajmóhuip; e huidi ca' ti miidity, oy jamiidity yajpijctáhuip huidi ymiid. ²⁷Nañ jadu'n ajcxy je nmidzipich huidi ca' anajty tzojccixy co iich nrey'adipyich ma yi' ajcxy, yajmiingix ya, yo'cpujxtutaaygix ma iich nhuinduu.”

Jesús ytigiyy Jerusalén

²⁸Co Jesús jadu'n yminanday, chi choñ jim, ñicxy Jerusalén. Jesús jayijp anajty ytüyöy ma je mayjäy. ²⁹⁻³⁰Jadu'n yjajty co jim yja'ty mihuingon Betfagé etz Betania ma je cop huidi yxii Olivos, chi Jesús quejxy metz ydiscípulos, nimay ajcxy:

—Náxcxix ma yijibi cajp huidi ji huingon. Co ajcxy mgajptugihuip mbáatcixipy tüg burro mang ycoxochity, huidi ca' ni pin yaj'iñaayñi. Mgoguejtútcixipy, etz mmimíngixipy. ³¹Pen jim pin xy'amidoogixy, ¿nej co yi burro mgoguejtüdy? Chi ajcxy jadu'n m'adzohuipy: “Je nhuindzinich jim tzojcp.”

³²Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäyii. ³³Jim anajty ajcxy je burro mang coguejtútcixy, co ñihuindzin ñimaayi ajcxy:

—¿Nej co yi burro mang mgoguejtútcixy?

³⁴Chi je' ajcxy y'adzooy:

—Je nhuindzinich jim tzojcp.

³⁵Chi ajcxy huijtz miñ je burro ma Jesús. Chi ajcxy jibe'n miid yhuít, chi ajcxy Jesús yajburripejty.

³⁶Co Jesús anajty ytüyöy, chi je mayjäy ajcxy yhuít yé'pcixy tügujc. ³⁷Co ajcxy mihuingoñ je minac ma je cop huidi yxii Olivos, chi tüg'óciy je mayjäy yjotcugiyday, e ytigiyy ajcxy ooy alabanza iibi Dios ojadjtpi miid je mij huinmañ ycixpi co anajty ti íjxcixy huidi anajty Jesús ti tuñ.

³⁸Chachminaangixy:

—iCapxpaady je rey huidi miimb miid Huindzin Dios yxii ycixpi! iJotcujc'ajt jilby tzajpjoty etz cömáyin ma Dios!

³⁹Huin'it nijëjty fariseojäy huidi anajty ajcxy jilby jäy agujc nimay ajcxy je Jesús:

—Oj yi mjäy ajcxy.

⁴⁰Chi Jesús y'adzooy:

—Hich miich ajcxy nimaayb pen yi' ajcxy amomb, yi tzaa tigihuip mic capxp.

⁴¹Co Jesús yja'ty jim mihuingon Jerusalén cajp, e co ijxy, chi yaaxy miid je cajpjäy ycixpi. ⁴²Chi Jesús yminañ:

—iPen mhujnhuiiyb ixypy miich ajcxy nej mbáatcixipy mjotcujc'ájtín jadachambi xii tiempo! Yüch jada tiy'ajt cham ity ma miich ajcxy, ca' huaad m'íjxcixy. ⁴³Minip je xii je tiempo ma miich ajcxy je mmidzip ajcxy xyajjüdugipy mgajp miid tzaamacxy, e tziptunipy ajcxy miid miich, yajxon xyajco'adugipy ajcxy jühuidity ma je mgajp.

⁴⁴Xyñigidaagoodip mdzaaboch ni'ung ni'anäg, ni ca' yhu'f'mip tzaagop tzaamacxy, jadu'n yjadipy

com miich ajcxy ca' mnejhuüy je tiempo mina je Dios xyñigidäy.

**Jesús yajpidzimy je
jibicjäydijc ma Dios ytijc**

⁴⁵Chi Jesús ytigiiy ma Dios ytijc yajpidzimday tüglóciy jäy huidi anajty jibiy ajuuyb adoocp. ⁴⁶Chi Jesús nimay je jäy ajcxy:

—Jadu'n mina'n̄n ma jaybétyity: “Íich ndijci tzajpcapxycapxtägi'n̄n yi'.” E miich ajcxy hue' mhuaangixy jadu'n nej meetzpi y'ang.

⁴⁷Jesús anajty yaj'ixpijc jabom jabom ma Dios ytijc, chi je teedy tungmiidpi, etz huidi ajcxy yaj'ixpijc anajty Dios ñecy, etz mijjäydijc ajcxy nihuinmayiygixy co yaj'ögaangixy Jesús. ⁴⁸Chi ajcxy ca' ni nej mihuinma'ñybaty nej yaj'öccixy, com tüglóciy jäy anajty ooy tzach'amidoolijt Jesús y'ayuc.

Jesús ycötújcín

20 Chi jadu'n yjajty tüg xii anajty Jesús yaj'ixpicy je cajpjäy ma Dios ytijc, capxhuäcxy anajty oybi ayuc. Chi ñimiini je teedy tungmiidpi ajcxy etz huidi ajcxy yaj'ixpijc Dios ñecy etz mijjäydijc ajcxy. ²Chi ajcxy migapxy Jesús nimay:

—Yajnimaaygich, ¿ma cötújcín ti mbaady co jäy myaj'ixpicy ya ma Dios ytijc? ¿Pín je' tiibi xycötujc möy?

³Chi Jesús y'adzooy:

—Íich nañ jadu'n nyaj'amidohuamy íich miich ajcxy tüg ayuc, e m'adzooígixip. ⁴Co Juan (je Bautista) jäy yajniibejty, ¿pín je' cötújcín moy, je Dios tzajpjotyipi o jäy ajcxy?

⁵Chi ajcxy ytigiiy huinmay'ahuidijtpi ñayñimáayigixy miñ xyipy:

—Pen minaanim co tzajpjoty choñ je Juan ycötújcín, Jesús xyñimaayimip ya: “¿Nej co ca' miich ajcxy mijpidacy yi' y'ayuc?” ⁶Pen minaanim ajt co jäy cötújcín moy je Juan, chi tüglóciy cajpjäy tzojc xycögädzim, com ymibijcpey ajcxy co yi' Juan, Dios yi' y'ayucnajtzcaxiiby.

⁷Chi ajcxy y'adzooy co ca' ajcxy nejhuiyigixy pín Juan ti quexyíi.

⁸Chi Jesús nimay je' ajcxy:

—Íich nañ jadu'n ca' nigapxa'ñich pín ti xycötujcmöyich.

**Je íjxpejt ma je tumbidijc
ajcxy jibicjäybi**

⁹Chi Jesús yminandacy yajnimay tüglóciy je jäy ajcxy tüg ayuc, yminañ:

—Tüg jäy pidacy tüg camuuxy ycam, chi yajpijctzoy ytumbidijc, co anajty chona'ñ ñicxa'ñ jiguem jecy jecy. ¹⁰Co cosecha paty, chi quejxy tüg ytumbi ma je ytumbidijc, huen címöyíi huidibi je' anajty paatip. Chi je ytumbidijc huinhuojpy jijphuojpy je quejxyöybi yajhuimbijty ca' ni ti mooy. ¹¹Chi huingbi ytumbi quejxy, nañ jadu'n ajcxy je' tuñ, huin'ojoy jijp'ojoy ajcxy, yajhuimbijty ajcxy, ca' ajcxy ni ti mooy. ¹²Chi midugiigpi ytumbi quejxy, nañ jadu'n ajcxy je' yajtzaachiyy etz yajhuimbijty ajcxy.

¹³Huin'it je camuuxycam huindzin yminañ: “¿Ti ndunipyich? Oquejxyich nmang huidibi ooy ndzocyich. Ca' jécyity co ajcxy ixipy nmangich, yajmij'adipy ajcxy.”

¹⁴Chi je ytumbidijc co ajcxy ijxy je' yhuindzin ymang, chi ajcxy huinmaygoty nayñimáayigixy miñ xyipy: “Ti ymiñ je cogam ymang, yí' je' jada cam jëdaanip. Tzoc yaj'o'cim jigix iich ajt jada cam një'ajtim.” ¹⁵Chi ajcxy je cogam ymang yajpidzimi camjoty, chi ajcxy yaj'o'cy.

Chi Jesús y'amidooy:

—¿Ti jada' ytunipy je cam huindzin? ¹⁶Minip je', miñ yajtigoydäy je ytumbidijc ajcxy, e chi je' je ycam yegipy miid huingbi tumbi.

Co je jäy ajcxy jadu'n midoy, chi ajcxy yminañ:

—Ni catzogipy Dios, nicxy jadu'n njajtim.

¹⁷Chi Jesús huindicxpejty je mayjäy nimay ajcxy:

—¿Ti tijamy huidi jjaybétyip ma Dios ñecy?

Jadu'n:

Je yëydijc huidi je jäy ajcxy ca' anajty tzocy, ti Dios pidacy mij'ane'mbi. Tim jadu'n nipaady nejihuüy je tzaa oyjatypí huídibi je pojtzpidijc ajcxy ca' yajtuna'ñ, je' oy ti yhuí'mni ma anajty yjaccopícyty.

¹⁸Pinjaty ca' cöbiga'ñ jada mij'ane'mbi, ayo'n ypadamy, tim jadu'n nipaady nej ihuüy jim ycixciday ma je tzaa nicx e tijhuütz yjajtáhuipy; e pen je tzaa nigídagoty, je' ajcxy janch jaam püx nicxy yjajtcixy.

**Yajnidiiygixy pen jëbi
cogüéjtin yajyecy o pen ca'**

¹⁹Je teedy tungmiidpi etz huidi ajcxy yaj'ixpijc Dios ñecy ooy anajty

nihuinmayiiygixy madzaangixy je Jesús mic'amy, co ajcxy huinjihuüy co Jesús nimiydáacigixy miid je jihuimbit ayuc, e chigiüyb anajty ajcxy je cajp jäy. ²⁰Chi ajcxy chachhuinma'ñ'ixtaaygixy nej huaad xägixy Jesús, chi quejxy ajcxy ijx'ijtpí ma Jesús yajpaady huidi naybidaacip janch ypaat tudägyjäy; chi amidoo'íjtcixy Jesús y'ayuc huidi miid xihuaangixy, chi cüyegaangixy ma je gobernador. ²¹Chi je ijx'ijtpí ajcxy y'amidooy Jesús nimay ajcxy:

—Huindzin, nejhuüyb iich ajcxy co miich m'ayuc ooy y'óyity, etz myaj'ixpícy yajxon, ca' huin'ixpety jäy myaj'ixpícy, etz myaj'ixpícy Dios ytiy'ajt nej jäy jëbi huaad chinaaygixy. ²²¿Nej copícy iich ajcxy migüedípy je César je romanojäy mij'ane'mbi, o ca'íji?

²³Chi Jesús huinjihuüy yí' ajcxy yjibic-huinma'ñ, paady ajcxy nimay:

—¿Ti co miich ajcxy xyjot'ixy xyhuinma'ñ'ixyich? ²⁴Yaj'ixcicxh tüg meeñ. ¿Pin y'ahuinax etz pin yxii mimb ma jada meeñ?

Chi ajcxy y'adzooy:

—Yi César.

²⁵Chi Jesús nimay ajcxy:

—Cuet ma César huidi César paatip, e ma Dios huidi Dios paatip.

²⁶Ca' mimadacy ajcxy nej tzu'íjxcixy ma mayjäy yhuinduu. Chi ajcxy ooy huinmaay jadu'n nej anajty Jesús ti y'adzóhuigixy, chi ajcxy amoñyi.

Yajnidiiygixy je jugy'ájtín ycixpi

²⁷Chi nija'tti Jesús tüg saduceojäy, e yi saduceojäy ajcxy yminañ co jäy ögy ca' y'ocjuuyjcní. Chi je' yajtiy:

²⁸—Huindzin, Moisés jaybety ma yi' ñecy, je jécyip, co tüg yëydijc ytöxyjic yajhui'my ix'ögp, e ca' ymang ti paatcixy. Jëbi je yëydijc y'uch miidtzinäy je töxyjäy jaydëbi yaj'ung'ixip miid y'ajch ycixpi. ²⁹Jadu'n anajty tügpicy jäy, nihiuxtujc ajcxy ytügquëx'ájticy, ac yëydijc ajcxy. Je mijpi miidtzinay töxyjäy, chi ix'o'cy, e ca' ymang paty. ³⁰Chi je mimetzpi ypjicy miid je töxyjäy, e ni ca' ajcxy ung paty. ³¹Chi je midugiipci ypjicy miid je töxyjäy, e jadu'n je nihiuxtujcpi miidtzinay ajcxy je töxyjäy, ix'o'cy ajcxy, ni ca' ajcxy ung paty. ³²Chi nañ jadu'n je töxyjäy y'ögni. ³³Co anajty je nihiuxtujcpi jugypjccixy, çhuidi jada' octöxjic'adiiyb je töxyjäy? Com nihiuxtujc ajcxy ti töxyjic'ájtigixy.

³⁴Chi Jesús y'adzooy:

—Jadachambi jäy pjccixp, ñaymooyigixy y'ung huen pjccixy. ³⁵Je jäy ajcxy huidibi paatip anajty chinähuip ma je tiempo huidi mimb co ögpi yjugypjccixipy, ni ca' ajcxy ypigipy, ni ca' ajcxy ñaymóoyigixipy y'ung huen pjccixy. ³⁶Co jäy ajcxy yjugypicy, chi ca' huaad y'ögcixy jadüg'oc, quipxyjaty ajcxy miid je ángeles ajcxy, e Dios yi' ajcxy ung'adiib co yjugypigipy miid jemybi jugy'ájtin. ³⁷Janch co yi' ögpi yjugypigipy, jëbi mbaadip je tiy'ajt ma Moisés ñecy ma jadu'n yjaybétyity, je taab anajty aay'ujtz ytoy, co je Huindzin Dios migapxy Moisés, nimay: “Hich Abraham yDios, Isaac yDios, Jacob yDios.” ³⁸Je ögpi ca' miidty Dios. Je jäy ajcxy huidi juugyip janchtiy ajcxy ymiid Dios, com co miid Dios

ycixpi tüg'óciy jäy ajcxy ymiid yjugy'ajt.

³⁹Chi jäy ajcxy huidi yaj'ixpjcpc Dios ñecy nimay Jesús:

—Oy ti m'adzoy, Huindzin.

⁴⁰Ca' ajcxy ocjajtni nej jac nimáaygixipy.

Pin je y'ung je Cristo

⁴¹Chi Jesús je' ajcxy nimay: —¿Nej co miich ajcxy mina'n co Cristo David y'ap y'oc? ⁴²David ci'm mina'n ma je Salmo necy:

Yi Huindzin Dios nimay iich nHuindzin: “Iña' ya a'oy'amy ma iich.

⁴³Ixti cooni anajty miich mmidzip ti nmimadactäyich, jadu'n nej jihuüy ti nbidägyich yi mmidzip ma miich mddecypocxpejt.”

⁴⁴Co David yxiimoy Cristo iich nHuindzin, çnejtz yi' co y'ap'adyii y'oc'adyii?

Jesús xiy je escribas ajcxy

⁴⁵Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶—Naygüend'ájtigix miid yi' escribas ajcxy ydiscípulos, co ajcxy ooy tzojccixy yhuídidaangixy miid yhuit oyjatypi, ooy ajcxy tzojccixy co huen capxocxyii ma jäy y'amugiy, e ooy ajcxy tzojccixy yi cödumbi iñaybejt ma naymujctac, etz ooy ajcxy tzojccixy cödumbi iñaybejt ma jäy ajcxy yxiidungixy. ⁴⁷Chi ajcxy yajcixtayi yi co'ögytöxyjäy ypidägy, e tungixy ooy jecy tazjpcapxycapxi ma jäy yhuinduu. Yi jadu'mbi jäy ajcxy niği ajcxy Dios chaachytuniy miid ypocycixpi ca'ydi jacnipin.

Je ayoobitöxyjäy co'ögypi y'ofrenda

21 Jiiby anajty Jesús ma Dios ytjic co ijxy comeeñyjäy may'am y ofrenda pidaaccixy ma meeñygaax. ²E nañ ijxy co tüg co'ögytöxyjäy pidägy anajty metz pi'cmeeñ. ³Chi Jesús yminañ: —Janch iich miich ajcxy nimäy co jadayaabi co'ögytöxyjäy ayoob jac anaxy jada, ti pidägy ofrenda ca'ydi jacnipin. ⁴Tüg'óciy comeeñdijc ajcxy ypidacyp ma ofrenda je meeñ huidi conajxp. Jadayaabi co'ögytöxyjäy ti pidägy huidi anajty ñigayamy.

**Jesús yminañ co je Dios
ytjic yhuindigoya'ñ**

⁵Nijējity jäy co ytigiñy ma Dios ytjic nimiydacy ajcxy co Dios ytjic ooy chach'oy'oydúñity miid tzaa oyjatpyi, e miid tiibi jiiby vojxcixy. Chi Jesús yminañ:

⁶—Tüg'óciy jada huidi ajcxy m'ijxpy ma Dios ytjic, minip xii tiempo mina jada nicxy yhui'my taj xit jada tzaa, ca' ma pochycop.

**Je tiy'ajt ma ca'ni naaxhuiñybi
ycixa'ñi ytigoya'ñi**

⁷Chi ajcxy y'amidooy Jesús: —Huindzin, ¿mina jada jadu'n ytuniñyb yjadiñyb nej miich ti mminañ? ¿Ti tiy'ajt ji yaj'ixip co jada anajty jadu'n ytuna'ñyii yjada'ñyii?

⁸Chi Jesús y'adzooy: —Ix mgayajhuin'iingix. Ooy mayjäy ymina'ñ ñaybidägáanigixy co je' ajcxy je Cristo, ymina'ñ ajcxy: “Iich je' je Cristo; huingóniñ anajty je xii je tiempo mina je

naaxhuiñybi ycixa'ñ ytigoya'ñ.”

Ca' ajcxy axam mbanicxipy. ⁹Co miich ajcxy ayuc midohuipy co jäy chachchiptungixy, e ñayñibidäcigixy, ca' mdzig'iigixipy, com ooy ycopícyity co jada jadu'n jayijp ytuniñyb yjadiñyb, ca'nan hue' je' anajty tim cijxp tim tigooyb (je naaxhuiñybi).

¹⁰Chi Jesús yjacminañ:

—Nayñibidägiib naax cajp miid huingbi naax huingbi cajp. ¹¹E minip mic'ujx, etz mij yuu mij pa'm xii yaa. E jadiib mij'adzigi'ñ, etz ooy ijxpejt huidi qüexigip tzajpcíxy.

¹²Ma ca'ni anajty jadu'n jadyii, xypahuidijtcóotcixipy jäy, xymájtzcixipy, xyciyéjcixipy ma judíojäy ñaymujctac. Chi jäy ajcxy xypidägiipy pujxtigoty, xyajñicxcixipy mach ma rey etz ma gobernador ajcxy yhuinduu. Jadu'n jäy ajcxy jibic xytunipy miid miich ajcxy com co anajty ti xymijpidáaccixyich. ¹³Miich ajcxy tiy'ajt myegipy miid iich nxii ycixpi. ¹⁴Co jäy ajcxy yxiñuipy ma codungdijc, ca' ni nej ajcxy mjot'adiñyb, ni ca' ajcxy mhuinmayipy nej m'adzóogixipy. ¹⁵Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadipy nej xy'adzóogixipy, e nej xyjacxigixipy. ¹⁶Miich ajcxy mgi'mdeedy, mgi'm'uch, mgi'm'ajch, etz mgi'm ajuugy amigüg xyciyéjcixipy ma cötujctac. Nijējity miich ajcxy m'ögipy miid co anajty ti mmijpidaaccixy iich n'ayuc. ¹⁷Mayjäy ajcxy ca' xy'ixaanipy xychogaanipy miid co anajty ti mmijpidaaccixy iich nxii. ¹⁸Ni tüg

miich ajcxy mgöhuay ca' ytigoyipy.

¹⁹Pen ooy ajcxy mmecxtucy, chi m'alma ñdzögipy huinixii.

²⁰Co ajcxy m'ixipy Jerusalén anajty ti ñaducy miid ymidzip, huin'it ajcxy mnejhuihuipy co huington je'anajty ma yhuindigoyaani. ²¹Huin'it tiempo je jäy ajcxy huidi jim Judea naaxjot

yquéeccixipy ñcxcixipy ajcxy yuugjoty, etz je jäy ajcxy huidi jim Jerusalén queegipy ajcxy, etz je jäy ajcxy huidi camjoty ca' huaad y'ocajptigiinyi ma je Jerusalén cajp. ²²Je tiempo mina yjadiiyb ayo'n miid co anajty judío jäy ti ytundigooygixy, je' jada yajcuydundaayb jadu'n nej yjaaybétyity ma Dios ñecy.

²³iAyoob yi töxyjäy ajcxy huidi anajty ung tzim'ijtp huin'it xii, etz huidi anajty miid y'ungma'xung! Ooy jadiib mij ayo'n ya naaxhuin etz tzip éjcin ma jada cajp.

²⁴Nijējity ajcxy y'ögipy tzijoty, e nijējity yajnicxip tzumy mach ma huingbi cajp huingbi naax. E Jerusalén naxmihuägydähuiib yi jäy huidi ca' yjudiojäyity, minipy je tiempo mina anajty Dios yajcixaani yajtigoyaani yi' ajcxy y'ané'min.

Nej jada' yminipy je Dios y'ung

²⁵Huin'it xii huin'it tiempo quëxigip ijxpejt ma xii po' etz ma yi madza', ya naaxhuin ooy jäy ajcxy jotmay mi'idipy. Je jäy ajcxy ooy chigihuipy yjihuhuipy yhuinmay'ahuididipy ajcxy ooy, miid je meyy ycixpi co anajty chachpidigy chachnögy chachmina'n. ²⁶Yi jäy ajcxy anucxi'n yajcidahuib co anajty

ajcxy icy nej yjadyii huindu'mybi naaxhuin; e huidijaty mic'ajt yajpatp jilby tzajpjoty yücxtähuipy yi'. ²⁷Huin'it miich ajcxy xy'ixipyich, iich je jäy huidi tsoon tzajpjoty, nmiinich jocjoty miid je nmic'ajtich, nmiinich miid iich ngötújcin etz iich n'oy'ájtin mijpi. ²⁸Co je ayo'n tiempo jadu'n yjatzondägipy, chi mba't'ijxcixipy com huingtoniñ anajty mina Dios xyñihuáangixipy xycohuáangixipy.

²⁹Chi Jesús yajnimay ajcxy tüg ayuc, yminañ:

—Ijxcix yi higuery etz tüg'óciy quipy, ³⁰co yhuamigy huin'it miich ajcxy nejhuüy co ti yhuingtoni mina ypottigiinyi. ³¹Tim jadu'n nej miich ajcxy ijxpejt mbicy ma higuery quipy co pottitempo ytigiinyi, nañ jadu'n co miich ajcxy m'ixipy je ijxpejt tzajpcixy jadu'n nej yam nyajnimaaaygixy, mnejhuihuipy ajcxy co huingónip je tiempo mina Dios y'ane'ma'n ya naaxhuin.

³²Janch nimaaybich miich ajcxy co jadu'n yjadiiyb ytuniiyb jayijp, ca' anajty o'ctäy je jäy ajcxy huidibi tzinaayb jugy'ájtixyp jadachambi xii tiempo. ³³Yi tzajp etz naaxhuinybi naxip tigoyip yi'. Iich n'ayuc ca' ñaxipy ytigoyipy ni camina.

³⁴Naygüend'ájtigix miich ajcxy ca' mnijot'ájtixy yi jocni yi mügii, etz yi tzinaayin jugy'ájtin, jigix ca' ajcxy xyniminipy jotcömoñy je ayo'n xii je ayo'n tiempo.

³⁵Timetiini minipy je ayo'n tiempo miid jäy ajcxy ycixpi huidi ya tzinaayb ma tüg'óciy naaxhuinybi. Tim jadu'n nej tüg iyujc ayo'nbaady co timetiini yajtixuuch. ³⁶Ni'ixi'

ijtcix, mibijctzoogix Dios, ca'ydi ayo'n ajcxy mbaatcixy huidi jadaanip, jigix jilby myajpáatcixipy tzajpjoty ma iich nhuinduu, iich, je jáy huidi tzoon tzajpjoty.

³⁷Xiim anajty Jesús yaj'ixpicy ma Dios ytijc, e coodz anajty chooñ ñicxy jim ma cögop huidi yxii Olivos. ³⁸Jabom jabom jopy jopy ñiminyii tüg'óciy cajpjäy jilby ma Dios ytijc tibäy co y'amidoo'idaani ajcxy Jesús y'ayuc.

**Xiicyöygixy capxyöygixy nej
huaad Jesús májtzcixy**

22 Huigon anajty je xii mina jáy tzajcaagy caaygixy huidi ca' ylevadura miidity, huidi jáy ytijpy pascua xii. ²Chi je teedy mijtungmiidpi etz je escribas yhuinma'ñ'ixtaaygixy nej ajcxy ocyaj'ögipy Jesús. Chigiiyb anajty ajcxy je cajpjäy.

³Chi je mujcu' ytigiyy ma Judas yjot yhuinma'ñ. Je Judas hue' anajty ymimetz xii Iscariote, je' nidügti je majmetzpi discípulos.

⁴Chi Judas ñicxy oy migapxy je teedy mijtungmiidpi etz tzajptijc soldado huindzin, e ycapxytuñ miid je' ajcxy nej jëbi cïyecy Jesús.

⁵Huin'it je Jesús ymidzip ooy ajcxy yxoondaccottay. Chi ajcxy ñaygapxi co meeñ möhuangixy je Judas.

⁶Chi Judas cöbijcy je meeñ, chi yhuinma'ñ'ixtay nej jëbi cïyegipy Jesús ma ca'p mayjäy y'ixyii yhuindicxyii.

Je huindzin Dios y'adzu'ájtin

⁷Chi paty je xii mina jáy cay je tzajcaagy huidi ca' ylevadura miidity com huin'it anajty ajcxy

yaj'ögy cöbixy ymang pascua xiigixp. ⁸Chi Jesús quejxy Pedro etz Juan, nimay:

—Ñicx miich ajcxy yaj'oyi' je pascua adzu'ibi, jaydëbi ajt ngaayim.

⁹Chi ajcxy y'amidooy:
—¿Ma mdzocy co nyaj'oyi'huibich ajcxy?

¹⁰Chi Jesús yminañ:
—Co mdigihuipy ajcxy cajpjoty, mbaadipy tüg yëydijc huidi yajnicxp tüg majt nii. Mbanicxyp ajcxy je yëydijc cooni yjadipy ma ytijc. ¹¹Co miich ajcxy mjädipy ma je jáy ytijc, chi ajcxy mnimähuipy je codijc: “Nhuindzinich jadu'n minaam: ¿Ma yaj'ahuädz yajpaady ma ngayipyich je pascua adzu'ibi miid iich ndiscipulotijci?” ¹²Je codijc miich ajcxy xyajni'ixihuip tüg cuarto ma mimejtzpi piso. Ni'ixi' jim je adzu'ibi. ¹³Chi Pedro etz Juan ñicxy, chi paty jadu'n nej anajty ti ñimäyii, e jim ajcxy ni'ixiyy je pascua caayin uucin.

¹⁴Co je hora paty, chi Jesús y'ixtacy ma je mesa miid je' ydiscipulos ajcxy. ¹⁵Chi Jesús yminañ:

—Ti ooy nijot'atyich co nmiihgayaangixy jada pascua adzu'ibi ma ca'ni n'ögyñich. ¹⁶Iich miich ajcxy jadu'n nimaayb co iich ni mina ca' njaccayipyich jadüg'oc je pascua adzu'ibi, ixti cooni yajcuydundähuipy je pascua xii ytiy'ajt ma Dios y'ané'min.

¹⁷Chi Jesús conigy je ügy co Dioscojúyip yajnaxy, huin'it yminañ:

—Uccix jada ügy, naymóoyigixy miich ajcxy. ¹⁸Cham iich miich

ajcxy nimäy co jadu'n nej yjacnicxa'ñ xii tiempo ca' vino nii üga'ñich ixti cooni Dios y'ané'min yminipy ya naaxhuiñ.

¹⁹Nañ yconïgy Jesús tüg tzajcaagy co miñijctzooy Dios, huin'lit tujehuäcxy moy discipulos ajcxy, e chi ajcxy nimay:

—Jada tzajcaagy iich nninix'ajtpyich huidi ngïyejcpyich ma yi o'cin miid miich ajcxy mbocy ycixpi. Jada iixpejt miich ajcxy miñ'idipy oy jäymeç miid iich ycixpi.

²⁰Co anajty ti ycaйдаaygixy, chi Jesús conïgy je ügy jadüg'oc, chi yminañ:

—Jada vino je' jada Dios y'ayuc ytiy'ajt jemybi jadu'n yi' nej iich nni'py huidi temam yogam miid miich ajcxy ycixpi.

²¹Jadachambi yi jäy huidi xycïyegaambich ma nmidzipich, ya je' cham miid'iñäyich ma jada mesa. ²²Janch jadu'n njada'ñ n'ayoohua'ñich jadu'n nej ti nyajnigodugïyijich. iAyo'n padamy je jäy ayoob huidi xycïyegaamyich ma nmidzipich!

²³Chi je nimajmetzpi ajcxy ñayñimaayi miñ xyipy:

—¿Pin jada' yi' ma iich ajt huidi jadu'n tundigoyam?

Yajcapxcójcixy pin jada' jacnigi ymijity

²⁴Chi je nimajmetzpi huidi Jesús anajty ti huin'ixy ca' ajcxy ñay'ayuc-huinjihuiyi pin jada' jac mijpi oc'idipy. ²⁵Chi Jesús nimay ajcxy:

—Yi reyes ajcxy y'ane'myb ajcxy naax cajp jadu'n nej tüg

huindzin, yi' ajcxy huidibi ane'mb yajtïycixy co ooy oytuungixy. ²⁶Miid miich ajcxy ca'ydi yjadu'nity. Hue' janchtiy je mijpi ma miich ajcxy huen ñaybidägyii nej jihuïy ymützity. E je huidi nigohuajc'ajtp huen ñaybidägyii nej jihuïy je' je' je' tumbi. ²⁷¿Pin je' jacmïjip? ¿Huidi iñaybi ma mesa, o huidi ni'ixiïyb a'ixiïyb caayin uucin? Yi' je' jacmïjip huidi iñayb ma mesa. Per iich ijtpich miid miich ajcxy jadu'n nej huidi ni'ixiïyb aa'ixiïyb caayin uucin.

²⁸Miich ajcxy ti m'ïjtcixy miid iich ma anajty ayo'n ti nyajnaxyich. ²⁹Paady iich miich ajcxy tüg ané'min nmooyb, jadu'n nej iich ndeedy ti xymöyich. ³⁰Jaydebï miich ajcxy mgáaygixipy m'uuccixipy ma iich nmesa jilby ma iich n'ané'min e m'iñähuiipy ajcxy ma je ane'mdac, e mdiydúngixipy m'ané'mgixipy je nimajmetz picy Israel ñaax ycajp.

Jesús capxpizimy co Pedro ymina'na'ñ co ca'p Jesús ix'yadyii

³¹Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ixaangixy xyhuinma'ñ'ixaangixy jadu'n nej jäy trigo huimbojy co yajhuätzaangixy.

³²Per iich Dios nmibijctzooyich miid miich ycixpi, jägix miich ca'ydi mmibïjcin ytigoy'lity. Mina anajty miich ti mjothuimbity, jotmic migápxipy yi mmigügtijc ajcxy.

³³Chi Pedro yminañ:
—Huindzin, jotcuje iich nnicxa'ñich miid miich oy

pujxtigótyity, etz oy ndímy'ögibich miid miich.

³⁴Huin'it Jesús nimay Pedro:
—Hich miich nimaayb co ca'ni anajty tzey yaxígy jabom jopy co miich miná'nip tugig'oc co miich ca' xy'ix'adyijich.

Huingomb hori ma Jesús y'ocyaj'ijxmadza'n

³⁵Chi Jesús nimay ydiscípulos ajcxy:
—Co iich miich ajcxy jayhuin nguejxy, ni mmoral, ni ca' mmeeñydjic, ni mgig ti mmi'oygixy, ¿nej myajtigoy'ijt ajcxy ti jatyi?

Chi ajcxy y'adzooy:

—Ni ti.

³⁶Chi Jesús yminañ:
—Jadachambi pin ymeeñydjic etz ymorral miid, huen minicx; nañ pin ca' miidty y'espada, huen toogy yjocx huit, chi juyipy y'espada. ³⁷Hich miich ajcxy nimaayb co copicy jada yajcuydunipy huidibi mimb jaybety miid iich ycixpi ma Dios ñecy ma jadu'n yminañ: “Yaj'amichomujc (je Cristo) miid yi' ajcxy huidi jibicjäyip.” Tüg'óciy mimb jaybéty ma Dios ñecy miid iich ycixpi, yajcuydunipy yi'.

³⁸Chi Jesús ydiscípulos ajcxy yminañ:
—Huindzin, cha metz espada.

Chi Jesús y'adzooy:

—Huen miid yi'yi.

Jesús Dios mibijctzoy jim Getsemaní

³⁹Chi Jesús jim choñ ñicxy ma je cop huidi yxií Olivos, com jim anajty nicxy coodz coodz, chi je' ydiscípulos ajcxy ypanicxi. ⁴⁰Co ajcxy yja'ty ma je cop, chi Jesús yminañ:

—Mibijctzoogix Dios huen xypubedipy xypudigihuiipy ajcxy ca'ydí mdigiiygixy jibic tuum.

⁴¹Chi Jesús huinhuäctuty je discípulos ajcxy tüg tzaagäch yjiguëgyity, chi ycoxtinay'ahuiiy ytigiiy Dios mibijctzoob. ⁴²Chi Jesús yminañ:

—Dios Teedy, pen miich m'a'ixiiyb pójcigich jada tzaachypi, ca' iich huaad nyajnaxyich, per ca' iich huaad ngi'mdzójcin nguyduñich, miich mdzójcin huen myajcuyduñ.

⁴³Chi ñayguëxici tüg ángel tzajpjoty chooñ, jotmic migapxy je Jesús. ⁴⁴Yam anajty Jesús ooy ytaj ymay, chi Dios mibijctzooyb jacmictägy. E je yxibitnií ypidzimy janch jadu'n yi' anajty nej ni'py janch mijjaty y'ocnajtza'cxiiyñi.

⁴⁵Co ypidigy ma anajty Dios mibijctzoy, chi nihuimbijty je' ydiscípulos ajcxy, chi oy paatcixy maab anajty ajcxy miid jotmay.

⁴⁶Chi Jesús nimay ymigügtjic ajcxy:
—¿Ti co mdzachmaagixy? Pidiccix mibijctzoogix Dios, ca'ydí jibic tuum mdigiiygixy.

Yajnicxcixy mach je Jesús

⁴⁷Jim Jesús anajty ymigügtjic ajcxy miidcapxy miidmiydägy, co je mayjäy oy yjäty. Jayijp anajty ymiñ je huidi anajty xiijp Judas, yi' je'anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzüxca'ñ. ⁴⁸Chi Jesús yminañ:
—Judas, ¿nej miid tüg tzücxin mgiyecy ma ymidzip, je jäy huidi tzoon tzajpjoty?

⁴⁹E je' ajcxy huidi anajty Jesús ymiid, co ajcxy ijxy jadu'n nej ytuñyii yjadyii, chi ajcxy yminañ:
—Huindzin, ¿tzoc ajt nihuimbijtim?

⁵⁰Chi nidüg je' ajcxy yajtzaachiiyi je teedy mijtungmiidpi tüg ytumbi,

quejtzpujxi tüg ytätz'ac a'oy'amybi.

⁵¹Huin'it Jesús yminañ:

—Ixmajtzcix, huen jadu'ñyi.

Chi ñidoni je jäy ytätz'ac, e jadu'n yajtzoozy. ⁵²Chi Jesús nimay ajcxy huidi nimiini, yi teedy tungmiidpi ajcxy, yi Dios ytije policia huindzin etz mijjäydijc:

—¿Nej co xyñimíngixyich miid pujx etz mguipyjijpxu'ñ jadu'n nej jihuüy iich tüg meetzpi? ⁵³Jiiby iich anajty jabom jabom ma Dios ytije, e ca' miich ajcxy ti ti mduñ miid iich. Per cham jëdu'n je tiempo mina miich ajcxy xy'ane'myich etz je jibicpi xymimadägyich.

Pedro yminañ co ca' ix'y'adyii Jesús

⁵⁴Chi ajcxy majch je Jesús, yajnicxy ajcxy, e pidacy ma teedy mijtungmiidpi ytije. Je Pedro jigüegyjihui' anajty ypanicxyii.

⁵⁵Jim ajcxy jijn yajmijiy tibägujç chi ajcxy y'ixtactay nidüg'óciy.

Pedro y'ixtacy nañ jadu'n ma je jäy ajcxy. ⁵⁶Huin'it tüg pödumbi ijxy Pedro iñäy ma jimba', chi huindixpejty nimay:

—Jada yëydijc nañ ymiid anajty Jesús.

⁵⁷Chi Pedro ca' cöbijcy, yminañ:

—Töxyjäy, ca' iich yi' n'ixy'adyii.

⁵⁸Nañ jahueengi huin'it jadüg jäy Pedro yhuindixpejti, ñimaazy:

—Miich, yi Jesús ajcxy anajty miid m'lity.

Chi Pedro yminañ:

—Ca' n'iichity.

⁵⁹Ti anajty tüg hori ninaxni co oy huingbi yminandägy:

—Janch co jada yëydijc yi' anajty miid y'lity Jesús. Com nañ galileojäy yi'.

⁶⁰Chi Pedro yminañ:

—Ca' iich nhuinjihüüy nej miich mmina'ñ.

Capxni anajty je Pedro co tzey oy yaaxigy. ⁶¹Chi je Huindzin Jesús ni'ijxhuimbijty je Pedro. Huin'it Pedro jäymetzcootti je' ayuc nej anajty yHuindzin Jesús ti ñimäyii: “Ni ca'ni anajty tzey yaaxigy cham coodz co miich tugiig'oc xycoyüdziyich.” ⁶²Chi Pedro ypidzimy tibäy, oy jiby yäxy miid tájin máyin.

Nixiiccixy yajxiiccixy yi Jesús

⁶³Je jäy ajcxy huidi anajty Jesús cuend'ajtp, ooy ajcxy nixiicy niyaaxy, etz nañ ooy ajcxy huingojxy jijpcojxy. ⁶⁴Chi ajcxy huingoxodziy, e cojxy ajcxy ma yhuin'yijjç, nimaaygixy:

—Octiygax, çpin ti xycoxy?

⁶⁵E ooy anajty miid yjibic ayuc cixy cuety nimaaygixy.

Jesús mijjuntajoty yajpaady

⁶⁶Co yxiimiyy, chi yöymujcy yi teedy mijtungmiidpi ajcxy, yi mijjäydijc ajcxy, etz yi escribas ajcxy, chi ajcxy y'amidooy:

⁶⁷—Ñimaaygich ajcxy ¿nej miich je' je Cristo?

Chi Jesús y'adzooy:

—Co ixypy nnigapxich, ca' miich ajcxy mibigipy. ⁶⁸E pen iich miich ajcxy n'amidooyb, ca' miich ajcxy xy'adzohuipyich, etz canan huin'it xyñajtzmadzihuibich miich ajcxy. ⁶⁹Jadachambi e ñicxa'ñi iich, je jäy huidi tzoon tzajpjoty, n'ixtäga'ñich a'oy'amy ma Dios mic'ajtmiiidpi.

⁷⁰Chi nidüg'óciy je' ajcxy y'amidooy:

—¿Nej janch co miich Dios xy'ung'adyii?

Chi Jesús y'adzooy:

—Miich ajcxy jadu'n minamb co iich njējity.

⁷¹Chi ajcxy yminañ:

—¿Ti ajt njac-huáanim testigo?

Ti ajt yam ci'm nmidoohuim nej mina'ñ.

Jesús ma Pilato yhuinduu

23 Chi tüg'óciy je mayjáy ajcxy ypidígy, chi yajnicxy ajcxy Jesús ma je gobernador Pilato. ²Chi ajcxy ytigíy xibi yminaangixy:

—Jada jáy naax cajp yaj'ixpijcp huidi ca' ytiy'ájtity. Yi' adujctáhuam co ca' huaad nmigüéjtim César, e ymina'ñ ci'm co yi' je' je Cristo huidi rey'ajtpi.

³Chi Pilato y'amidooy Jesús:

—¿Nej miich je' judío jáy xyrey'ajtp?

Chi Jesús y'adzooy:

—Miich jadu'n minamb.

⁴Chi Pilato nimay je teedy tungmiidpi ajcxy etz je mayjáy:

—Ca' iich ti pocy nbaadyich ma jadayaabi yéydijc.

⁵Chi Jesús ymidzip nígi anajty ajcxy yminan'adiitzcixy:

—Jada Jesús naax cajp tzachyajqueec-huäcxtaayb je judíojáy miid yi' y'ayuc. Yajtzondacy Galilea, e jadachambi ya Judea jadu'n idich.

Jesús ma Herodes yhuinduu

⁶Co Pilato midoy Jesús ymidzip ajcxy nigapxy Galilea, chi y'amidooy pen galileojáy je Jesús anajty. ⁷Chi mic'amy huinjihuui

co yi' jim anajty yajpaady ma Herodes y'ane'my, chi jim quejxy ma Herodes huidi nañ jadu'n anajty yajpatp jim Jerusalén huin'it xii. ⁸Co Herodes ijxy Jesús, chi oy jotcugiíy com tiíyip anajty ooy ja'ixa'ñ, ti anajty may ayuc midoohui, e ahuixy anajty co mijhuinma'ñ tunípy. ⁹Janch may ayuc ooy jayaj'amidoy, e Jesús ni tüg'aa ca' y'adzooy. ¹⁰Jim anajty teedy mijtungmiidpi etz je escribas ajcxy, tzachnigibéjtcixy mictägy. ¹¹Chi Herodes miid yjáy ooy nixiicy yajxiicy Jesús, ca' mij'ijxy mijpidacy. Chi xojxy miid oyhuit etz quejxhuimbijty jim ma Pilato. ¹²Huin'it xii Herodes etz Pilato ajcxy ñaymigügpíjci, com naymijotma'tip anajty ajcxy huin'it tiempo.

Jesús yajmoy ysentencia co y'ögipy

¹³Chi Pilato huomujcy yi teedy mijtungmiidpi, yi cajptungmiidpi, etz yi naax cajp. ¹⁴Chi ajcxy nimay:

—Ti miich ajcxy xyajnimíngixyich jadayaabi yéydijc, jadu'n miich ajcxy minamb co ooy jáy yajqueec-huäcxtay. Ti iich yi' jatiyduñich ma miich ajcxy mhuindu, ca' iich yi' ni ma ypocy ti nbaati, jadu'n nej miich ajcxy mxigixy. ¹⁵Nañ ni ca' Herodes ti pocy ti paady ma jada jáy, com ti njayajniquexyich, ni ti pocy jada Jesús ca' ti tuñ huidi huaad nyajco'ögíyich. ¹⁶Miñ n'octzaachytuñich, jaydēbi nnajtzmazdīhuibich.

¹⁷Jadu'n je gobernador anajty costumbre miidíty co najtzmazdíy tüg machyjáy mijxiíjoty. ¹⁸Chi je mayjáy tūgmucy ajcxy yminaandacy:

—iYaj'ög jadayaab Jesús!
iNajtzmazdi' yi Barrabás!

¹⁹Je Barrabás anajty pujxtigoty ti ypidägyii co anajty ti nibidügy je gobierno, nañ ti anajty yjäyyaj'ögy.

²⁰Chi Pilato nimay ajcxy jadüg'oc co najtzmazdihua'ñ Jesús. ²¹Chi je mayjäy janch mic yminañ:

—iYajcruudzpet miich yi!
iYajcruudzpet miich yi!

²²Chi Pilato yminañ je midugiig'ocpi:

—¿Ti Jesús ti tundigoy?
Ca' yi' ma ypocy nbaatich.
Miñ n'octzaachytuñich, e najtzmazdihuibich.

²³Je jäy ajcxy nigü anajty yminaan'adiitzcixy janch mic, co huen yajcruudzpejty. Chi ajcxy jadu'n mimadacy Jesús co chachne'ngixy je teedy tungmiidpi, etz je cajpjäy ajcxy. ²⁴Chi jada' Pilato cuyduñ jadu'n nej je jäy ajcxy anajty pijctzoy. ²⁵Chi Pilato najtzmazdiiy je Barrabás huidi anajty pujxtigotyip, co anajty chach jäy yajqueec-huäcxy, etz yjäyyaj'ögy, je' huidi yi jäy ajcxy ypijctzou. Chi Pilato cüyejcy Jesús ma yi' ajcxy huen tungixy nej tzojccixy.

Jesús yajcruudzpejti

²⁶Chi je judíojäy ajcxy yajnicxy Jesús. Jim tü'am ajcxy minaybaati tüg jäy huidi anajty ti choon camjoty, huidi anajty yxiñ Simón, e ycogájpity anajty Cirene. Chi adzip ajcxy Simón yajquejycabiý Jesús ycruudz, e yajpanicxy ajcxy Jesús.

²⁷Jac'axam anajty naax cajp panicxcixy, etz nañ may töxyjäydijc ajcxy chachyaaxcixy miid jotmay miid yi' ycixpi. ²⁸Chi Jesús

ni'ijxhuimbijty je töxyjäydijc ajcxy, chi nimay ajcxy:

—Miich Jerusalén töxyjäydijc ajcxy, ca' xyñiyáaxcixich.
Nayñiyaaxigix miich ajcxy ci'm etz m'ung ajcxy ycixpi. ²⁹Chi ypaadipy tiempo co jäy ajcxy ymina'nipy: “Jotcuje je töxyjäy ajcxy huidi ca' y'ung ixxy, huidi ca' ti y'ungtzimigy, etz huidi ca' ti y'ung yajtzitzcixy.”

³⁰Chi je jäy ajcxy nimaydägipy mijtun mijcop: “Nigidagótcich ajcxy”; etz je mutztun mutzcop: “Yajtigooygich ajcxy.” ³¹Pen jäy ajcxy tzaachypi ayo'n mooyb Dios y'ung, nigü ajcxy jacjiini ytundigoya'ñ miid Dios yjäy, tim jadu'n nipaady nej pin puxam tzuxy quipy nañ puxamy quipy titzpi.

³²Nañ jim anajty yajnicxcixy miid Jesús jametz pocyjäy. Tú'ciy miid Jesús anajty yaj'ögaangixy. ³³Co ajcxy oyjäty jim ma tüg it huidi jäy ytijpy ögpi cohuajc, chi ajcxy jim Jesús yajcruudzpejty miid metz pocyjäy: tüg pocyjäy a'oy'amy, jadüg anajty'amy. ³⁴Chi Jesús yminañ:

—Dios Teedy, mecxi ajcxy ypocy, com ca' nejhuiigyixy ti ytungixyp.

Co je soldados anajty ajcxy yajhuäcxaani ac je'y Jesús yhuitt, chi ajcxy ijxy suerte pin ocjediib. ³⁵Jim je cajpjäy anajty yhuindiicxcixy, yam je tungmiidpi nixigy yajxigy Jesús, yminañ ajcxy:

—Jada Jesús huingjäy ti yajtzögy, huen cham ci'm nayyajtözgyii, pen yi' je' je Cristo, je huidi Dios ti huin'ixyi.

³⁶Nañ jadu'n je soldados ajcxy nixiicxcixy yajxiicxcixy Jesús, nimijhuägy ajcxy möhuaangixy

anajty vino ta'mbi. ³⁷Chi je soldados ajcxy yminañ:

—Pen miich Rey'ajt ma yi judíojäy ajcxy, nayñihuaniñ ci'm.

³⁸Ma Jesús ycödu jim anajty yjaayity griego'amy, latin'amy, etz hebreo'amy: JADA JE' YI JUDIOJÄY AJCXY YREY.

³⁹Chi tüg pocyjäy huidi anajty cruudzcíxy ooy níxiicy yajxiicy Jesús yminañ:

—Pen miich je' je Cristo, naygohuaniñ ci'm, e cohuaangich iich ajcxy nañ jadu'n.

⁴⁰Chi je jadügpí pocyjäy oy y'adzooy, ooy ymígü, nimay:

—¿Nej ca' miich Dios mdzigü. Ca' m'ixy co tú'ciy ti nbóycähuim?

⁴¹Iich ajt janch paatip jadu'n, co jadu'n jada ngöbñjim tzaachypí je tiibi ndundigooyim. Jadayaabi Jesús janch ni ti jibicpi jada ti catuñ.

⁴²Chi je pocyjäy nimay Jesús:

—Tun may'ajt xyjäymedzipich co anajty mjäty jilby ma m'ane'mdac.

⁴³Chi Jesús oy y'adzooy:

—Janch iich miich yam nimäy co cham iich miich miid'íjtnipy ma je obyí it.

Jesús y'o'cni

⁴⁴Co cujcxiiñi paty, chi oy ycoodzy tüg'óciy naaxhuñ ixti minacyxiini. ⁴⁵Chi xii ca' y'oc'ani. Chi je huit oy yciitzhuácxy huidi anajty adiiydujcp je Dios y'it jilby ma Dios ytijc. ⁴⁶Huin'it Jesús mic ypätcapxy yminañ:

—Dios Teedy, cham nyajcídigiñ iich n'alma.

Co Jesús jadu'n yminañ chi y'ögy.

⁴⁷Co je soldado huindzin ijxy jadu'n nej anajty ti ytunyii ti

yjadyii, chi ooy jäymejch yi Dios yminañ:

—Janch co jadayaabi yëydijc anajty tudägy yjäyity.

⁴⁸Chi je mayjäy tiibi anajty jim yöymújccixy yhuindñcxcixy, co ajcxy ijxy jadu'n nej ytuuni yjajti, chi ajcxy huimbijttaayñi cajpjoty yam ycaach tzachcójxcixy miid jotmay ycixpi. ⁴⁹Cham tüg'óciy Jesús ymígügtijc ajcxy huidi anajty miid ñay'ixy'adyii, etz töxyjäydijc ajcxy huidi anajty Jesús ti ypadzonyii jim Galilea, jiguëgy je' anajty ajcxy yhuindñcxcixy.

Yajnaaxtigüy ajcxy Jesús

⁵⁰Jim anajty tüg yëydijc huidi anajty yxii José, hue' anajty ycogájpity Arimatea ma Judea naaxjot. Je' anajty judío migtungmiidpi, e je' ooy anajty chach'oyjäyity etz ytudägyjäyity.

⁵¹Je' nañ yjñp'ijxy anajty co yminipy je Dios y'ané'min, e ca' je' anajty jñptigiñy miid jacnaagity migtungmiidpi co ajcxy yaj'ögy Jesús. ⁵²Chi José ñicxy ma Pilato oy pjctzoohui Jesús ñinicx. ⁵³Chi yajminajcy ma cruudz, e mo'ñ miid tüg sávana, chi pidacy ma ögpí jut, ma tüg tzaahuinguetzmiñc ma ca'ni anajty ni tüg ögpí jilby yajpidägyp. ⁵⁴Je' anajty ajcxy ni'ixiiyb a'ixiiyb je pascua xii e je' anajty tim tzondägan je pócxin xii.

⁵⁵Chi je töxyjäydijc huidi anajty ti ypadzoñyii Jesús jim Galilea, panicxy ajcxy je José axam. Chi ajcxy nañ jadu'n ijxy je ögpí jut, etz je ninicx jadu'n nej jilby yajpidacy.

⁵⁶Chi ajcxy yhuimbijttay cajpjoty. Chi ajcxy yaj'oyiiñ ujtz xuucpi,

tzoy, etz unguento, chi amay'ajty je pocxinxii, jadu'n nej anajty cõtújcin y'lane'my.

Co Jesús y'ögy chi yjugypijcy

24 Co je semaan y'ixtigiiy janch tim ticx'cp je töxyjäydijc ajcxy ymiiñ ma je o'cpi jut, chi mimiñ ajcxy ujtz xuucpi, etz tzoy huidibi anajty ti yaj'oyiiygixy. Nañ jadu'n miidjadyii töxyjäydijc miñ. ²Chi ajcxy paty je tzaa ti anajty yjidiguegyii ma je o'cpi jut'aguu. ³Co ajcxy ytigiiy jutjoty, chi ca' ajcxy paty je Huindzin Jesús ñin'icx. ⁴Chi jadu'n yjajty, jilby anajty ajcxy jutjoty huinmaaygixy, co ñayguëxigi ma ajcxy ymijc metz yëydijc janch adicxp anajty yhuit. ⁵Chi ajcxy ooy chigiy, chi ajcxy yhuindactay, chi je metzpi yëydijc yminañ:

—¿Na'amy co m'ixtaaygixy yi jugypi ma yi tiibi y'ögy? ⁶⁻⁷Ca' je' ya, ti je' yjugypicy. Jäyméjtzcix jadu'n nej mina'n ñim Galilea, co yminañ:

—Ooy ycopícyity co iich, je jäy huidi tzoon tzajpjoty, nyajciyegipy pocyjäy c'i'am. Yi' ajcxy xyajcruudzpedipyich, chi njugypigipyich codugiig xii.

⁸Chi ajcxy oy jäymejtzcooty nej anajty Jesús ti ymina'n. ⁹Chi je töxyjäydijc ajcxy yhuimbijttay ma o'cpi jut. Chi ajcxy yajmiidmiydactay jadu'n nej anajty ti i'jxcixy ti midoogixy miid Jesús ydiscípulos ajcxy je nimajmetzpi etz jacjadyii jäy huidi yajpaatp ma je' ajcxy. ¹⁰Je töxyjäy ajcxy huidi ooy ma Jesús ñaaxtigiiy, je' je' anajty ajcxy: María Magdalena, Juana,

etz María Jacobo ytaj, e cham jacnaagity ymidöxyjäydijc. ¹¹Chi Jesús ydiscípulos ca' ajcxy tim mijpidacy je töxyjäydijc ajcxy ayuc, hue' ajcxy tijy nigo y'occapxcixy y'ocmiydaaccix, paady ca' ajcxy mibijcy.

¹²Chi Pedro ypidigy ñicxy poyigy ma anajty Jesús ti ñaaxtigiiy. Chi Pedro yco'ixiiy ma je o'cpi jut, chi ijxy co ca' jilby ni ti, jëyi Jesús yhuit abicy y'ooxnäy. Chi Pedro yhuimbijty ma ytjic jihuiy ooy jadu'n nej ti ytuñiy yjadyii.

Ma Emaús tü'aa

¹³Huin'it xii metz Jesús ydiscípulos ajcxy ñicxy ma tüg cajp mutzpi hue' anajty yxii je cajp Emaús, hue' yjiguemyity miid Jerusalén tugi'px estadios (majmetz kilómetro). ¹⁴Chi amiydaacip anajty ajcxy ñicxy. Nigapxcixy nimiydaaccixy nej Jesús ti yjaty ti y'ayoy. ¹⁵E jadu'n yjaty ma anajty ycapxcixy ymiydaaccixy je nimetzpi, chi Jesús c'i'm nimijhua'cy je metzpi, chi miid ñicxy ajcxy yquipxyi. ¹⁶Oy anajty ja'ijxcixy, ca' ajcxy tuñcuend pin je' anajty. ¹⁷Chi Jesús y'amidooy je' ajcxy:

—¿Ti miich ajcxy miydacpy ma yam mdüyöygixy? ¿Nej co mdájcixy mmáygixy?

¹⁸Chi tüg huidi anajty yxii Cleofas y'adzooy:

—Janch tüg'óciy mayjäy nejhuiydäy je ayo'n ti ytunyii ti yjadyii. ¿E miich naydüg jim jättac Jerusalén, e jadu'n tijy ca' mnejhuiy?

¹⁹Chi Jesús je' ajcxy nimay: —¿Ti ti ytuñiy ti yjadyii?

Chi je' ajcxy yminañ:

—Jesús Nazaretpi, huidi Dios y'ayucnajtzcaxhiyip, yí' anajty mij jánchíp ma yí ayuc etz huinmañ ma Dios yhuinduu, etz cham ma tüg'óciy naax cajp. ²⁰Chi yí' ajcxy je teedy mjtungmiidpi etz iich ajt ndungmiidpi Jesús yajc'idigiiy je gobernador co huen yaj'ögyii. Chi ajcxy yajcruudzpejty. ²¹Hue' iich ajcxy anajty ndzach'ahuijxyp co yí' je' huidi Israeljäy ajcxy cohuánaam ma ymidzip. Jadachambi jada' ymidugiixii ma jadu'n ti ytunyii ti yjadyii. ²²Cham iich ajcxy ndöxyjäydjic ajcxy ooy xy'adzigiigixyich. Ti y'oygixy janch ticxícip ma o'cpi jut. ²³E com ca' ajcxy paaty je ñaaxnicx, chi ajcxy yhuimbijtni yminaangixy co ti i'jxcixy yí' ángeles ajcxy, hue' je ángeles ajcxy yminañ co Jesús yjuugyity. ²⁴Huin'it nijējity nmigügtjicich ooy ma o'cpi jut, paty ajcxy janch jadu'n nej töxyjäydjic anajty yminaangixy. Ca' je' ajcxy ijxy Jesús.

²⁵Chi Jesús yminañ:

—iMiich jäy ajcxy ooy ajcxy m'ajjuuñity mjtjuuñity, ca' ajcxy ti mdzojcmibijccixy co ajcxy mjamibigá'nip huidibi y'ayuc najtzcaxhiybi ajcxy ycapxy! ²⁶¿Nej ca' anajty ycopicyity co je Cristo ayo'n paadip, e huin'it ytigihuip tzajpjoty ma yí' y'it oybi?

²⁷Chi Jesús yajnimaay ajcxy Dios ytiy'ajt, chondägy ma Moisés ñecy, etz tüg'óciy jacjadyii necy huidi Dios y'ayucnajtzcaxhiybi yjaay, yajxon ajcxy yajni'ixiyday jadu'n nej yjaybéyity miid je Cristo ycixpi.

²⁸Chi ajcxy mihuingoñ je mutz cajp ma anajty ñcxcixy, je Jesús

jadu'n ñaybidaaci jadu'n nej jihuüy jacjiguem ñicxy. ²⁹Huin'it ajcxy nimay adzip:

—Hui'm miich miid iich ajcxy, nīgi jada chuu'iiy'adich.

Chi Jesús ytigiiy cajpjoty yhui'my miid je' ajcxy. ³⁰Chi jadu'n yjajty co anajty ti y'ixtaaccixy caaybi, chi Jesús tüg tzajcaagy conigy, e yajnaxxy Dios cojuyip, huin'it tujc-huäcxy moy ajcxy. ³¹Huin'it ajcxy ijxcajpy Jesús. Chi Jesús mic míciy yaj'ijxtigoy. ³²Chi ajcxy ñayñimaay:

—¿Nej ca' yjáncity co iich ajt ooy njihuüiyim jotjoty huinmañjoty co anajty ajt jim xymiidmiydacim tü'am, etz co ajt xyñajtzcaxhiyim je huidi jaybety ma Dios ñecy?

³³E tim huin'ítity ajcxy tübjccixy, chi ajcxy ñcxcixni jim Jerusalén. Ni'amugi' ajcxy paty je majctügpi Jesús ydiscípulos ajcxy e jacjadyii jäy ajcxy. ³⁴Chi ajcxy minaangixy:

—Janch yí' co ti yjugypicy je Huindzin Jesús, com ti oy ñayguëxigyii ma Simón.

³⁵Chi Cleofas nimiydacy jadu'n nej tü'ay anajty ajcxy ti ñaybaatigixy miid Jesús, etz jadu'n nej ajcxy Jesús ijxcajpy co tzajcaagy ti tujc-huäcxy.

Jesús ñayguëxici ma je' ydiscípulos ajcxy

³⁶Jiiby anajty ajcxy tzachnimiydaaccixy co Jesús oy ñayguëxigyii ma je' ajcxy. Chi ytinay'ahuüiy cuje'amy ma je' ajcxy, chi yminañ:

—Jotcugi' miich ajcxy.

³⁷Chi je' ajcxy ooy ñay'adzigiyy ooy huinmaaygixy, hue' ajcxy tijy

ijxmañiib. ³⁸Chi Jesús nimay je' ajcxy:

—¿Na'amy co mjet mhuinma'ñ ti ytigoydaaygixy? ¿Nej co m'aa'ájtigixy mjet'ájtigixy pin iich? ³⁹Ijxcix miich ajcxy iich ngi' iich ndecy, iich jëni iich. Nidongich etz íjxcich ajcxy. Tüg espíritu ca' miiđity chüch ni ypajc, jadu'n nej m'ijxcixy iich nmiđity.

⁴⁰Co Jesús jadu'n ymínañ, chi ajcxy yaj'ijxy yci' ytecy. ⁴¹Per ca'ni ajcxy mibijcy miiđ co anajty ajcxy chachjotcújcity, chi Jesús ajcxy nimaayi:

—¿Miiđ ajcxy ti ii mgayipy?

⁴²Chi ajcxy moy Jesús acxtzäy, etz tüg jiidy serpäg. ⁴³Chi cöbijcy, chi ycaay y'uucy jim ma je' ajcxy yhuinduu. ⁴⁴Huin'it Jesús ymínañ:

—Huidi m'ijxyp cham je' je' huidi nyajnimay jayhuin, co iich miich ajcxy anajty miiđ'ijtcixy, co copicy nguýdundähuibich jadu'n nej yjaybétyity ma je Moisés ñecy je jëcyip, etz jacjadyii Dios y'ayucnajtzcaxiiby ñecy, etz yi salmo necy.

⁴⁵Huin'it je' ajcxy yjot yhuinma'ñ ymiñ ymejch, jaydëbi huinjhuíygixipy huidi jaybétyip.

⁴⁶Chi Jesús yjacmínañ:

—Jadu'n jaybety y'ity ma Dios ñecy co copicy co je Cristo paadip ayo'n e yjugypigipy codugiig xii, maabi anajty y'ögy. ⁴⁷Huen

ajcxy yajcapxhuäcxy Dios ytiy'ajt huindu'my naaxhuiñ, chondägip Jerusalén, co ooy ycopícyity huen jäy ajcxy jothuimbijtcix jaydëbi ajcxy paadip pocyhuinmeecxin.

⁴⁸Miich ajcxy nidiy'ajt'adipy tüg'óciy jadu'n nej cham ti m'ijxcixy ti mnejhuíygixy.

⁴⁹Jadachambi nguexipyich ma miich ajcxy je huidi nDeedyich ti xyaj'ahuaniiygixy. Hui'mgix ya Jerusalén ixti cooni ajcxy xyñ'idigihuip xycödigihip je Dios yjihui'ñ ymic'ajt huidi tzonam tzajpjoty.

Jesús ypa'ttigiinyñ tzajpjoty

⁵⁰Huin'it xii Jesús miiđ tzoñ je' ydiscipulos ajcxy, chi ajcxy ycajppidzimy, ñicxy ajcxy mihuingon je Betania. Chi Jesús xajhuäcxy yci' mibijctzoy Dios miiđ je ymigügtijc ajcxy ycixpi.

⁵¹Chi jadu'n yjajty ma anajty Dios mibijctzoy miiđ yi' ajcxy ycixpi, chi abicy yajhui'mni je' ajcxy e je' ypättigiinyñ jiiiby tzajpjoty. ⁵²Chi yi' ajcxy jim yjac-huäcxijpy Dios ojadajtcixy. Chi ajcxy yhuimbijttaayñi jim Jerusalén janch jotcujc.

⁵³Chi ajcxy jabom jabom anajty ñicxcixy ma Dios ytijc chajpcapxycapxcixy, ojadajtcixy jäymejtcixy yi Dios, Janch jadu'n jada. Amén.

SAN JUAN

Jaayhui'my Jadu'n Nej Jesucristo Ytun Yjajti

Dios y'ung huidibi y'oy ya
naaxhuiñ yejci Dios y'ayuc tiy'ajt

1 Co naaxhuiñybi oga'n chondacy jiiyim anajty Dios y'ung, e yi' yajnejhuiñy jäy ajcxy Dios y'ayuc ytiy'ajt. Dios y'ung tú'ciy anajty yajpaady ma Dios. ²Je' tim oga'n'aty anajty yajpatp ma Dios. ³Tüg'óciy huidijaty yaj'ijxp yajpatp ya naaxhuiñ, yi' yaj'oyiyday yajcojtay. Tüg'óciy huidijaty Dios yajcojy, tú'ciy ytuñ miid y'ung. ⁴Dios y'ung yi' jugy'ajtyejtaayb ma tüg'óciy naaxhuiñyjäy. Miid co jugy'ajtyejtäy ma tüg'óciy naaxhuiñyjäy, je' je' tiy'ajt co Dios y'ung ymiid Dios ymic'ajt. Jadu'n nipaady nej tüg jiin huidibi jäy codiicxp. ⁵Ya naaxhuiñ yajpaady anii. Yi anii jadu'n yi' nej coodzpi. Yi Dios y'ung ti mimiñ ya naaxhuiñ Dios y'ayuc ytiy'ajt. Jadu'n Dios y'ayuc ytiy'ajt ma jäy yjot yhuinmañ nej tüg jiin ytiicxy agoodztuuyb. Yi anii ca' ñaygodigiyii miid Dios ytiy'ajt. ⁶Ma'xung'ajt tüg yëydijc huidibi Dios anajty ti yajniñbicy. Hue' anajty yxii Juan. ⁷Yi' oga'n tiy'ajt yejc co

Dios ymic'ajt etz ytiy'ajt yajpaady ma Dios y'ung, jigix tüg'óciy je jäy ajcxy camibijctähuiipy je Dios y'ung. Dios y'ung jadu'n nipaady nej tüg jiin huidibi codiicxp ma jäy ytüyöy. ⁸Je Juan ca' je' anajty yjējity je Cristo, je huidibi capxhuäcxp Dios y'ayuc ytiy'ajt. Hue' janchtiy je Juan ñidiy'ajt'ajt je Cristo. ⁹Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytiy'ajt ymiid, je janchypi, ma jëb tüg'óciy jäy ya naaxhuiñ patcixy Dios ytiy'ajt. ¹⁰Je Dios y'ung ya anajty yhuidity naaxhuiñyğixy. E jada naaxhuiñ yi' yaj'oyiyday. E may je naaxhuiñyjäy ca' ajcxy ijxcajpy. ¹¹Je ymigügtjic, je judiojäy, je' ajcxy nimiini, e may ajcxy je ymigügtjic ca' ajcxy ycöbijci. ¹²Tüg'óciy je jäy ajcxy pinjaty mijpidac yi' yxii yi' ymic'ajt, yi' ajcxy yajmoy Dios ymic'ajt, e jadu'n nipaty nejjihuiy ajcxy Dios y'ung'adyii. ¹³Canan hue' je' co naydijiiyb Dios y'ung co ti yma'xung'aty jadu'n nej jäy ajcxy y'ocma'xung'aty. Nañ ni ca' yjadu'nity nej jäy tijy, nej jäy jñp'ixy, ni canan jäy jadu'n ti

huinmay. Hue' janchtiy Dios jadu'n ti huinmay.

¹⁴Je Dios y'ung ya naaxhuiñ je' yma'xung'ajty miid ñinïcx etz chinay miid naaxhuiñjyä. E iich ajcxy n'ijxich yi' y'oy'ajt etz ymic'ajt, jadu'n nej Dios Teedy y'ung tügpajc oy'ajt etz mic'ajt miidity. ¹⁵Juan ñidiy'ajt'ajt je Dios y'ung, e chi capxpidzimy, e jadu'n yminañ:

—Jada je' je jäy huidibi iich jadu'n nimiyaacich ma miich ajcxy. Je huidibi miimb jac'axam ma iich, jac mic'ajt miid yi' ca'ydi iich, com jacjayjip yi' jugy'ajt paty ca'ydi iich.

¹⁶Je Dios y'ung oy xychojçim xyjihuiyim mijcajee, paady je' tuuñ may'ajt oy'ajt mijcajee miid iich ajt ycixpi. ¹⁷Com Dios y'ané'min ycötujçin micpi hue' Dios yajniaguejx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ miid je jäy ajcxy ycixpi, e nañ je' ytiy'ajt yajniaguejx je Jesucristo.

¹⁸Je Dios ni caminaabi pin ca'ixyñi , je y'ung tügpajci yajpatp ma Dios Teedy ity. Je Dios y'ung ti xyajnejhuiyim nej Dios yajpaady.

**Juan el Bautista je' tiy'ajt yejc
co Jesús je' anajty Dios y'ung**

¹⁹Jadaabi je' je tiy'ajt huidibi Juan yejc, co judío jäy ajcxy quejxy nijjëjity teedytjç etz tzajptjç tungmiidpi. Jim ajcxy chooñ Jerusalén nicxy ma anajty Juan yajpaady, chi ajcxy y'amidooy:

—¿Mbin miich? ¿Nej miich je' je Cristo huidibi Dios yquexamy?

²⁰Je' ñigapx je tiy'ajt, ca' ñaygoyützi, chi yminañ:

—Ca' iich njëjity je Cristo.

²¹Chi ajcxy jac'amidooy:

—¿E pin miich mnaydijyii? Pen ca' mjëjity je Cristo. ¿Nej miich je' je Elías?

Chi Juan y'adzooy:

—Ca' je' n'iichity.

Chi ajcxy jac'amidooy:

—¿Nej miich je' je Dios y'ayuccapxhuäcxpi, je huidibi ñigapxy ma Dios ñecy co ymiinañ ya naaxhuiñ?

Chi Juan y'adzooy:

—Ca'.

²²Chi y'amidooy ajcxy jadüg'oc:

—¿Mbin miich? Jigix iich ajcxy tiy'ajt nyajniçixbich ma yi tiibi iich ajcxy xyquexyich. ¿Ti miich nayxiigoyäxyii?

²³Chi Juan yminañ:

—Iich je' je jäy huidibi Dios y'ayuccapxhuäcxip ma tüg mijtigäduum, tim jadu'n nej jiiby jaybety ymiñ ma Isaías ñecy, nañ tim jadu'n iich nmina'ñich co copicy nayñi'ixiyigix ma yi mjot yi mhuinma'ñ, jëbi naybaatigixy miid mHuindzin Dios. Jadu'n nej jäy ixypy tü'aa yaj'oyiy co tüg huindzin ymiina'ñ.

²⁴Je teedytjç etz tzajptjç tungmiidpi huidibi oy migapxy Juan, hue' anajty ajcxy fariseojäy ti yquexyii. ²⁵Chi ajcxy jactim'amidooy Juan:

—¿Ti miich co mjäyyajniibety? Peni ca' miich mjëjity je Cristo, ni mgajëjity je Elías, ni mgajëjity huidibi Dios y'ayuc najtzcaxiiyip.

²⁶⁻²⁷Chi Juan y'adzooy:

—Iich hue' jäy nyajniibetyich miid nii. Ya naaxhuiñ ji tüg jäy huidibi miich ajcxy ca' m'ixy'adyii. Je' huidibi jac'axam mimb ma iich,

je huidibi ca' mihuaadity nicxy
yi' xytumbi'adyiijich, nicxyich
ycighuin nguejich.

²⁸Jadu'n ytuni yjajti jim Betábara,
jim'amy ahuin ma Jordán mij
nii, jim anajty Juan jäy yajniibety.
Juan tiy'ajt yejc co Jesús je' anajty
yjygy'ajt yegam miid iich ajt nbocy
ycixpi.

**Jesús nayyajhuindzigihuaanip ma
Dios miid jäy ajcxy ypocy ycixpi**

²⁹Chi je com jabom co ijxy Jesús
anajty ñimiñyii, chi Juan nimay je
jäy ajcxy:

—Cha je' ymiñ je Dios yjäy huidibi
Dios nayyajhuindzigihuaanip miid
naaxhuiñjyäy ajcxy ypocy ycixpi.
Tim jadu'n nej judíojäy ajcxy Dios
huindzigiy miid ypocy ycixpi.

³⁰Jada je' huidibi iich nnigapxypich
co jac'axam ymiina'ñ ma iich tüg
yëydijc huidibi ñigi Dios ymic'ajt
y'oy'ajt miidity ca'ydi iich. Com
jiiyim anajty yi' jygy'aty co
oga'n naaxhuiñybi chondacy. ³¹Oy
iich anajty ca' yi' n'ixy'adyiijich
huingíxy jijpcíxy, nyajniibejtich jäy,
jigix yi judíojäy nejhuihuip ajcxy co
ji yajpaady je Cristo je huidibi Dios
ymic'ajt miid.

³²Chi Juan nigodiy'ajt'ajty je
Cristo co ymina'ñ:

—Iich ti n'ixyich yi Espíritu Santo
jiiby choñ tzajpjoty, jadu'n yquëxigy
nej tüg muuxy, e chi y'ixtacy ma
Jesucristo. ³³Tiydudägy ca' iich
anajty n'ixy'adyiijich. Je Dios
huidibi xyquejich jäy yajniibejtpi,
je' iich anajty jadu'n ti xyñimäyich
co je jäy ma anajty n'ixyich je
Espíritu Santo ñigidägyii anajty etz
yhu'i'my ma je'. Je' je' jadu'n anajty

huidibi y'adigihuiipy yjottigihuiipy
Dios yjihui'ñ ymic'ajt ma je jäy
ajcxy. ³⁴Cham nnigapxypetyich co
iich ti n'ixyich je jäy, e nyejcpyich
tiy'ajt co je' je' je Dios y'ung.

**Jesús yhuin'ijx nijëjity jäy huidibi
anajty ydiscípulo'andaanipy**

³⁵Chi je com jabom jopy jim
anajty Juan yajpaady miid metz jäy
huidibi ixpijcp ma yi'. ³⁶Chi anajty
ajcxy tzachhuindixy Jesús co
anajty jim ñaxy, chi Juan nimay je
metzpi jäy:

—Oc'ijxcix ocnejhuiyigix,
cha je jäy huidibi Dios
nayyajhuindzigihuaanip miid
naaxhuiñjyäy ypocy ycixpi.

³⁷E je metzpi jäy huidibi anajty
ajcxy ixpijcp ma Juan, co jadu'n
ajcxy midoy nej Juan ymina'ñ, chi
ajcxy Jesús padzooñ. ³⁸Chi Jesús
y'ijxhuimbijty, chi ijxy co anajty
ajcxy ypanixxyii, chi jada' nimay
ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiyi ti mja'ttägy?

³⁹Chi Jesús y'adzooy:

—Miingix, jigix ajcxy m'ixipy ma
ti nja'ttägyich.

Chi jada' ajcxy panicxy, e chi
ajcxy ijxy ma anajty ti yja'ttägy.
Je huin'it xiimbi chi jim je' miid
yhu'i'miy, com mijminacyxii anajty
co ajcxy jim ymejch.

⁴⁰Andrés, je Simón Pedro
ymiguëx, je' anajty tüg tzoonip
huidibi nimetz ajcxy midou jadu'n
nej Juan ymina'ñ, etz je' anajty
ajcxy ti padzooñ Jesús. ⁴¹Chi jada'
Andrés oy ixtäy y'uch Simón tim
jayijp, chi nimay:

—Ti iich ajcxy nbaady je Mesías —jadu'n je ayuc Mesías yhuimbídzima'n̄n Cristo.

⁴²Chi Andrés miidnícxy Simón ma Jesús, e chi Jesús huindícxpejty, nímáy:

—Miich je' Simón, Jonás miich xy'ung'ajtp. Miich je' mxii'adiiyb Cefas —huidibi ayuc'amy huimbídzimb tzaa.

Jesús je' yhuin'ijx Felipe etz Natanael

⁴³Chi com jabom Jesús chooñ ñícxy jím Galilea, chi minaybaati Felipe, chi jadu'n nímáy:

—Pajamgich.

⁴⁴Felipe jím anajty ycogajpity Betsaida, nañ je' je' je cajp ma anajty ajcxy ycogajpity Andrés etz Pedro. ⁴⁵Chi Felipe minaybaati je jäy huidibiyxi Natanael, chi jadu'n nímáy:

—Ti iich ajcxy je' nbaadyich je jäy huidibi yajngapxp yajnimíydacp ma Moisés ñecy, etz yi Dios y'ayucnajtzcaxiíybi ñecy. Yi' je' je Jesús, José y'ung huidibi cogajpíp jím Nazaret.

⁴⁶Chi Natanael y'adzohuimbijty: —¿Nej jím Nazaret ti choñ tüg oyjäy? Com ac jadu'n jäy ymina'n̄n co ac jibicjäydjé jím tzinaayb.

Chi Felipe yminañ:

—Jam c'i'm octim'ix.

⁴⁷Co Jesús ijxy co Natanael ñimiñyíi, chi jadu'n yminañ:

—Cha tüg judíojäy huidibi ca' pin huin'iinipy.

⁴⁸Chi Natanael yminañ:

—¿Nej miich ti xy'ijxcapyich pin jäy iich?

Chi Jesús nímáy Natanael:

—Ca'ni anajty Felipe xyñimaayñi: “Jam íxim je Jesús” co anajty miich

jiiiby'emy ma je higueri quipypa't, huin'it iich miich ti n'ijxcapy.

⁴⁹Chi Natanael y'adzooy:

—Huindzin, miich je' Dios y'ung. Miich je' Rey'adam ma je judíojäy ajcxy.

⁵⁰Chi Jesús y'adzooy:

—Miid co ti nnimäy co jiiiby'emy anajty miich ma je higueri quipypa't co iich miich ti n'ijxcapy. ¿E ti mdimjanimibicy? Jactimmijhuinma'n̄n etz jactimmij'oy'ajt m'ixamyb mbadamyb.

⁵¹Chi Jesús jadu'n yminañ:

—Janch tím tiy iich miich ajcxy yam jadu'n nimäy co m'ixipy ajcxy yi tzajp y'ahuäch etz Dios y'ángeles ajcxy chooñ tzajpjoty xyñigidägyich, e ypa'ttigiiygyixy jadüg'oc tzajpjoty. Choongixy yja'tcixy ma iich je jäy huidibi tzoon tzajpjoty.

Jesús y'oy ma anajty jäy nixiíduñ tüg pijcín jím Caná

2 Midugiigxiibi anajty maabi ajcxy Jesús minaymigápzigixy, ma je cajp huidibi yxií Caná ma je Galilea naaxjot jím anajty huinxiidungixy tüg jäy huidibi anajty ti ypicy. E jím anajty nañ jadu'n Jesús ytaj. ²Chi Jesús miid je' ydiscípulos ajcxy yajhuooy jím ma je xií anajty ytuñyíi yjadyíi. ³Ti anajty vino ycijxtaayñi, huin'it Jesús ytaj ñimayñi:

—Ca'p ajcxy miidiñ vino.

⁴Chi Jesús y'adzooy ytaj nímáy:

—Ca' ti jotmay nmiididyich miid miich töxyäy. Hich nhorí ca'ni paady mina jäy ajcxy nyajnejhuíhuibich pin iich.

⁵Chi je ytaj nimay je tumbidijc ajcxy:

—Mdúngixipy nej anajty ajcxy Jesús xyñímaaygixy.

⁶Jim anajty tudujc tzaadu'tz ma anajty nii y'lity. Je nii anajty ajcxy yajtumyb co anajty ajcxy yc'ibujcixy judu'n nej ypocy ixpujcixy, judu'n anajty ajcxy judíojäy costumbre miidity. Tügpi tzaadu'tz ymiid anajty yjot metz majt tugiig majt nii. ⁷Chi Jesús nimay je tumbidijc ajcxy:

—Yaj'ujtcix yi tzaadu'tz miid nii.

E chi ajcxy yaj'ujtcizay mabaat y'a'ujtcizaxy je tzaadu'tz. ⁸Chi Jesús ymiinañ:

—Yajpidzimgix cham yi nii, e yajnicxcix jiiby ma huidibi ane'mb ma yi caydac uuctac.

Chi ajcxy yajnicxy je nii. ⁹Co jada' je ane'mbi jihuiymajch je nii ti anajty yvinocojy, chi mijhuoy je yëydijc huidibi anajty ti ypicy. Je ane'mbi ca' anajty nejhuüy ma anajty je vino ti choñ. Jëyi anajty je ytumbidijc ñejhuiyb co nii anajty ajcxy yajpidzimgixy ma je tzaadu'tz. ¹⁰Chi je ane'mbi nimay je huidibi anajty ti ypicy:

—Tüg'óciy jäy ajcxy huidibi xiidumb, hue' ajcxy yajtumyb jayijp je vino oybi. E co jäy ajcxy ooy yxondaacni, chi oyñihuidibi vino nii jacyajtungixy. Miich janchtiy, ti m'amay'aty yi vinonii oybi ixti chamni myajtuñ.

¹¹Je' je' je oga'nibi mijhuinmañ huidibi Jesús ytuun jim Caná ma Galilea ñaaxjot. Chi yajniguëxigy je ymic'ajt etz y'oyjäy'ajt. E je huidibi anajty ajcxy yaj'ixpijcpy, chi ajcxy ooy mibijcy mijpidacy je Jesús.

¹²Co judu'n tüg'óciy ytuni yjajti, chi Jesús y'idacy jim ma je cajp huidi yxii Capernaum miid ytaj etz y'uch ajcxy, etz huidibi anajty yaj'ixpijcpy. Jim ajcxy yhuäcxijpy tüg xii mejtz xii.

Jesús yajpidzim ajuuybi adoocpi ma Dios ytijc

¹³Tim huingon anajty je pascua xii huidibi judío ajcxy ytumy jim Jerusalén, paady Jesús ñicxy jim.

¹⁴Jim ma Dios ytijc Jesús paty je' huidibi anajty ajcxy ajuuybi adoocpi, judu'n nej ma ymiin huaj, borregi, etz muuxy (huidibi jäy ajcxy Dios yajhuindzigiib). Nañ jim meeñyhuingogombidijc anajty ajcxy y'inaaygixy ma ymesa.

¹⁵Chi Jesús yaj'oyiyy tüg cochac huojp. E chi ixhuojppidzimday je ajuuybi adoocpi ajcxy ma Dios ytijc ñihuaj etz ñiborrego. Chi yi meeñyhuingogombidijc ymeeñ cöxijtnajxtayi, e chi ymesa tijhuimbijttaayi. ¹⁶Chi nimay je muuxytoocpidijc ajcxy:

—Yajpidzimgix jada muuxy ya. Ca' iich nDeedy ytijc yhuaani ajcxy ajuydac adoocac.

¹⁷Je' ajcxy huidibi anajty Jesús yaj'ixpijcpy chi ajihuiygooti ajcxy je ayuc, judu'n nej jaybety ymiñ ma Dios ñecy: “Ooy ndzocy njihuiyich Dios ytijc, paady ooy nnijottigoyich Dios ytijc.”

¹⁸Chi je judío ixpicityc ajcxy y'amidooy Jesús:

—¿Ti mijhuinmañ miich xy'ocyaj'ixambich ajcxy nej tüg ijxpejt, pen janch miidity cötujcin co m'ixhuojppidzimday yi ajuuybi adoocpi ajcxy?

¹⁹Chi Jesús y'adzooy:

—Yajhuindigooygix jada Dios ytiyc, e codugiig xii iich yi' jadüg'oc nyajpidigipy.

²⁰Chi jada' je judío ixpicytjic ajcxy y'adzooy:

—Huixchiguüpx tudujc jimijt yhuäcxijpy co jäy cojy jada Dios ytiyc. ¿E miich tijy myajpidigamy codugiigxiijji?

²¹Per ca' je' anajty nigapxy je Dios ytiyc. Hue' je' anajty ci'm ñayñigapxyii co anajty y'öga'n, etz co yjugypigipy jadüg'oc codugiig xii. ²²Chi jada' co Jesús yjugypijcy codugiig xii maabi anajty y'ögy, je huidibi anajty ajcxy ti yaj'ixpicy, ajihuiygooti ajcxy huidibi Jesús anajty ti yajnimäyigixy. Chi jada' ajcxy mibijcy ooy jadu'n nej anajty ycojaayity ma Dios ylibro, etz com nañ jadu'n anajty Jesús ti ymina'n.

Jesús ñejhuiy nej jäy ajcxy yjot yhuinma'n miidity

²³Co anajty Jesús yjimity Jerusalén pascua xiijoty, mayjäy ooy ymibijci co ajcxy ijxy je mijhuinma'n huidibi anajty ytumyb.

²⁴Jesús ca' anajty yjaty ñaygyegyii ma je mayjäy ajcxy (hue' anajty ajcxy chachyajrey'adamy). ²⁵Com Jesús ñejhuiydaayb anajty nej jäy ajcxy nidüg nidüg yjot yhuinma'n miidity ca' tzocy pin yajnimähuiyb ti anajty ajcxy ytunamy, com ñejhuiydaayb nej jäy ajcxy yjot yhuinma'n miidity.

Nicodemo oy ytiy'ajtpicy ma Jesús

3 Jim anajty tüg yëdyjc, fariseojäy y'ixpjcín anajty yajtuunipy. Hue' anajty

yxii Nicodemo. Je' anajty ñigohuajc'ajtyp ma je judíojäy ajcxy ymiñ. ²Chi jada' Nicodemo ymiñ coodz ma Jesús anajty y'ity, chi nimay:

—Huindzin, nejhuiyb iich ajcxy co miich tüg huindzin huidibi tzomb ma Dios. Com ca' ni pin jaty nej tunipy je mijhuinma'n huidibi miich mdumyb, pen ca' Dios ymic'ajt miidity.

³Chi Jesús y'adzooy:

—Janch janch iich miich yam jadu'n nimäy, co ca' ni pin ixipy Dios y'it, pen ca' jadüg'oc yma'xung'ajttigach.

⁴Chi Nicodemo yajtiy:

—Per, ¿nej tüg jäy tiibi ymij'anäcciyñi y'ocnima'xung'ajttigájtzpity jadüg'oc? ¿Nej jëbi jadüg'oc ytiy ma ytaj y'aa yjot, e chi yma'xung'adity jadüg'oc?

⁵Chi Jesús y'adzooy:

—Janch janch iich miich yam jadu'n nimäy pen ca' jäy yjothuimbity etz ñiibety, pen ca' Dios yjihui'n ymic'ajt y'adigiyii yjottigiyii, ca' jëbi ytiy ma Dios chinäy. ⁶Je jäy huidibi ajcxy ma'xung'ajtp ma töxyjäy, ymiid ajcxy ñinicx yjugy'ajtin. Je jäy ajcxy huidibi Dios yjihui'n ymic'ajt adigiyipy jottigiyipy ymiid ajcxy Dios yjugy'ajtin. ⁷Ca' nej mnayjihuihuüyb co ti nnimäy co copicy mma'xung'adipy hujemy, co Dios yjihui'n ymic'ajt xy'adigihuipy xyjottigihuipy. ⁸Com je poj miiniyb hueñytimyma'amyity, e nmidoohum co y'a'iich, e ca' nnejhuiyim ma choñ e ma

ñicxy. Jadu'n nej je poj ypojoy e nganejhuiyim ma choñ, nañ tim jadu'n yjaty miid je Espíritu Santo, ca' nejhuiyim nej yjaty co adigäy jottigäy jäy.

⁹Chi Nicodemo yajtihuimbijty:
—¿Nej tijy co yjadu'nity? Ca' nhuinjihuüyich.

¹⁰Chi Jesús y'adzooy:
—Miich huindzin'ajtp ma yi judíojäy, ¿ti co ca' mhuinjihuüy jadayaabi tiy'ajt? ¹¹Janch janch iich miich yam jadu'n nnimäy co iich etz nDeedich ngapxyp yi huidibi nejhuiyigixypich, e nyejcpyich ajcxy tiy'ajt yi huidijaty iich ti n'íjxcixyich. Miich ajcxy judío ixpicytije ca' ajcxy mgöbajccixy iich ajcxy ndiy'ajt. ¹²Pen ca' miich ajcxy mibijccixy jada tiy'ajt huidibi njanimiydacypich huidibi yajpatp ya naaxhuñ, ca' ajcxy mmibigipy co njanimiydägibich yi tiy'ajt huidibi tzajpjoty yajpatp.

¹³Ca' ni pin ti y'oy tzajpjoty, iich je jäy tügpajc huidibi ti ndzoñich tzajpjoty, ti ngidägyich ya naaxhuñ. ¹⁴Jadu'n nej Moisés yaj'oyiy je pujx tza'ñ, e chi yajcruudzpety jim mijtigüduum jigix chögipy je jäy ajcxy ma je ahua'n iyujc chüchyii. Nañ tim jadu'n jäy ajcxy xyajcruudzpeda'ñich.

¹⁵E tüg'óciy jäy ajcxy pinjaty xymijpidaacpich, ca' yi' jugy'ajtin cixy ytigoooy ni mina.

Dios ooy mijcajee tzocy jihuüy yi naaxhuñyjäy

¹⁶Ooy mijcajee Dios tzocy jihuüy yi naaxhuñyjäy co yecy y'ung tügpajcpi miid jäy ajcxy ypocy ycixpi. Paady pinjaty mibijcp

mijpidacp yi' y'ung, ca' yjugy'ajtin ycixipy ytigoyipy tücci'yi. Hue' janchtiy y'alma ypaadipy tüg jugy'ajtin huidibi ca' ni mina ycixipy ytigoyipy. ¹⁷Dios ca' quejxy y'ung ya naaxhuñ co tzaachytunipy yi naaxhuñyjäy ajcxy miid ypocy ycixpi. Paady y'ung quejxy co yajpocyñihuáatzcixipy.

¹⁸Je jäy ajcxy pinjaty mibijcp mijpidacp Dios y'ung, ca' ajcxy Dios chaachytunipy miid ypocy ycixpi. Je jäy ajcxy pinjaty ca' mibicy ca' mijpidägy Dios y'ung, pocycähuipy ajcxy ma Dios, co ca' mijpidaci ajcxy Dios y'ung tügpajcpi. ¹⁹Paady ycixpi Dios tzaachytuna'ñ mayjäy miid ypocy ycixpi, com co Dios quejxy y'ung miid ytiy'ajt ya naaxhuñ, e ca' ajcxy mibijcy Dios y'ung, jadu'n je' anajty nej tüg jin huidi codiexcip jäy ajcxy ma chinaayin yjugy'ajtin. Per ca'p ajcxy je naaxhuñyjäy mijpidacy je jin, jadu'n nej jihuüy ajcxy anajty yjacotcujcity co chinaaygixy agoodztuuyb, com je' co nigti tzachnijot'ajtcixy jibic-huinma'ñ. ²⁰Com je jäy ajcxy huidibi jibic-huinma'ñ zach nijot'ajtcixp, ca' ajcxy tzojci Dios ytiy'ajt, jadu'n nej jihuüy ca' chinähuaangixy ma jin ytiicxin. Ca' ajcxy y'amidoo'idani Dios y'ayuc, ca'ydi ñiguëxgy je jibicpi huidibi ajcxy ytumyb. ²¹Je jäy ajcxy huidibi cuydumb Dios ytiy'ajt, je' ajcxy ñiminipy Dios y'ung ytiy'ajt, jadu'n nej jihuüy jin nimiingixy ma ytiicxy, huen jatyimy niguëxgy co oy ytungixy etz co Dios ytiy'ajt ajcxy miidity ma yjot yhuinma'ñ.

Juan (el Bautista) tiy'ajt yejc ma jäy ajcxy miid Jesús ycixpi

²²Co jadu'n ytuni yjajti, chi Jesús ñicxy jim Judea naaxjot

miid ydiscipulos ajcxy. Chi ajcxy jim yhuäcxijpy. Jim ajcxy jäy yajniibejty. ²³Nañ jadu'n Juan anajty yjäy yajniibety jim Enón, com jim anajty ooy comni, e jim anajty jäy ymingixy etz ñiibejtcixy. ²⁴Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵Ca' ajcxy ñay'ayuc-huinjihuiyi nijējity huidibi anajty Juan yaj'ixpījcp etz tūg jāy nej jēbi huaad ypocy ñayajnihuädziyb ajcxy. ²⁶Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jāy huidibi anajty miich jim miid jim'amy Jordán mijniinaxy, je huidibi miich anajty mnidiy'ajt'ajtpy co je' je' je Cristo, nañ ooy chachjäy yajniibety. E janch mayjäy y'ocnimujcin.

²⁷Chi Juan y'adzooy:

—Ca' ni pin ni ti mic'ajt miidity, pen ca' Dios ni ti mic'ajt ymöy. ²⁸Miich ajcxy mnejhuiyb co nminaañich co iich ca' njējity je Cristo. Hue' janchtiy Dios xyquejxich jayjip co nnidiy'ajt'adipyich je Cristo. ²⁹Co jāy ypicy je yēdyjc je' je' miid'idam je ytōxyjc. E je tōxycapxi huidibi ti yaj'oyiy je pijcin, ca' je' miid'idañ je tōxyjāy, jēyi co yjotcugiy co yōcmidoohui je tōxyjāy ñay co yjady ma je' ytijc co ypigaani. Cristo jadu'n je' nipaady nej tūg tōxyjāy ñay, e je tōxyjāy jadu'n je' nipaady nej Dios yjāy. Je Cristo ymiid'idaanipy Dios yjāy. Jadu'n iich nipaady nej tūg tōxycapxi, ti Dios yjāy yajni'ixiiyich jigix mijpidáaccixipy

je Cristo. Jotcujcich cham co je Cristo ti ymiñ, e ñicxy yi jāy ajcxy ma yi'. ³⁰Ooy ytimycopicyity co Jesús ymij'ajt paatnipy, e iich ndung ycixnipy ymayñipy.

Dios y'ung tzoon jiiby ma Dios

³¹Chi Juan yjacmīañ:

—Je Cristo huidibi jiiby tzoon ma Dios jacmij ixpijcin miidity ca'ydī naaxhuiñyāy ajcxy. Je jāy ajcxy huidibi ya naaxhuiñ ijtp, ymīnaaxhuiñyāy ti yaj'ixpījcgixy, e je' ajcxy ñidiy'ajt'ajtpy je naaxhuiñyāy y'ixpijcin. Je Cristo tzoon jiiby tzajpjoty, jacmijcajee yi' ma y'ayuc ytiy'ajt ca'dyī pin. ³²Je Cristo ñigapxyp huidibi ti ixty e ti midooy, e yi'y'ayuc ytiy'ajt ca' jāy ajcxy cōbigaangixy. ³³Je jāy ajcxy huidibi cōbijcp Dios y'ung y'ayuc ytiy'ajt, je' ajcxy ñigapxpejtyp co Dios ytiy'ajt janch yi'. ³⁴Je Jesús huidibi Dios yquejx, ca'pxy Dios ytiy'ajt ñigapxpejti, com Dios ti möy yi' y'ung yi' yjihuiñ ymicc'ajt mijcajee. ³⁵Dios Teedy chojcyp yjihuiyb y'ung, e tūg'óciy ymicc'ajt ytiy'ajt yi'ti yajmigo'ixiiydāy. ³⁶Je jāy ajcxy pinjaty mibijcp Dios y'ung, ymiid'ajtpy ajcxy y'alma je jugy'ajtin huidibi ca' ycixy ytigooy. Je jāy ajcxy pinjaty ca' capxymidooy Dios y'ung, ca' ajcxy y'alma miid'adipy je jugy'ajtin huidibi ca' ycixy ytigooy. Je'yi ypaadipy ajcxy Dios chip y'ejcin.

Jesús ñaybaati miid tūg tōxyjāy jim Samaria

4 Chi je Huindzin Jesús ayuc midoy jadu'n nej anajty je fariseojāy ajcxy ycapxcixy

y miydaaccixy co je Jesús jacmayjä anajty yaj'ixpicy etz yajniibety ca'ydi Juan. ²Oy Jesús ca' anajty jäy yajniibety ci'm. Hue' janchtiy je' ydiscipulos anajty ajcxy jäy yajniibejtp. ³E co Jesús jada nejhuiy, chi jim Judea choni, yhuimbijtni jim Galilea.

⁴Co yhuimbijty, hue' anajty yjatytimyñaxihua'n jim Samaria. ⁵Chi jada' yja'ty huingon ma je mij cajp huidi xiijip Samaria, jim ma anajty tüg pi'cajap huidi xiijip Sicar, mi huingon je naax huidibi Jacob anajty ti möy y'ung José. ⁶Jim anajty Jesús yajpaady ma je Jacob ñiigondac. Com ti anajty Jesús y'anucxiyñi miid je tüyöyii, chi y'ijxtacy jim ma je niigondac anajty. Hue' anajty xii jim cugihuaanip. ⁷Chi jim yja'ty niigombi tüg töxyjäy. Chi Jesús yminañ:

— Hich yajni'uucc. ⁸Com je' ydiscipulos ajcxy huidibi anajty Jesús yjaymiid'ajtip, ti anajty ñicxcixy cajpjoty juuyb pijcp.

⁹Chi je töxyjäy y'adzooy huidibi anajty cogajpip Samaria:

— ¿Na'amy co iich nii xypijctzoohuich? com miich hue' miich judfojyä, e samariajäy iich.

(Co yi judfojyä etz samariajäy ca' ajcxy ñaygodigiyiigixy.)

¹⁰Huin'it Jesús y'adzooy:

— Co ixypy m'ocnejhuüy je oybi huidibi Dios yejcyp miid miich ycixpi, e m'ocnejhuüy ixypy nañ jadu'n pin xypijctzoohuipy yi nii, janch co miich ixypy xyñimäyich: “hich yajni'uucc”. E iich miich ixypy nmooyb nii huidibi jugy'ajt yegipy huinixii.

¹¹Chi je töxyjäy y'adzooy nimay Jesús:

— Huindzin, miich ca' mmiidity ti miid myajpidzimipy yi nii, e yi niijut ciicy yi' ooy. ¿Ma tijy m'ocpada'n yi nii huidibi yajjugy'ajtp? ¹²¿Nej jacnigi tijy miich mij mnayyajnaxyii, ca'ydi iich ajt n'ap ndeedy Jacob? Je'je' huidibi jada niigop yaj'oyiiy. Jacob etz y'ung y'anäg nii'uuc ma jada niigop, e nañ jadu'n yajni'uucy yhuaj y'iyujc ajcxy ya.

¹³Chi Jesús y'adzooy nimay je töxyjäy:

— Tüg'óciy pinjaty nii'uucp ma jada niigop tidzi huiib ajcxy jadüg'oc. ¹⁴Yi jäy ajcxy pinjaty nii'uucp huidibi nmooybich, ca' ni mina ytidzihuiiyb, com hue' yi nii huidibi nyejcypich, ahuimbidipy ma je jäy jadu'n nej tüg niigop huidibi yegam jugy'ajtin huidibi ni ca' ycixy ytigoy.

¹⁵Chi je töxyjäy y'adzooy:

— Huindzin, iich mooyg yi nii, ca'ydi jabom jabom ndidziyijich, e ca'ydi n'ocjacmünibich ma jada niigop nii yajpidzimbi.

¹⁶Chi Jesús y'adzooy:

— Nicx yajtzon mñäy, e miid miin.

¹⁷Chi je töxyjäy y'adzooy:

— Ca' nmiididyich nñäyich.

Chi Jesús y'adzooy:

— Janch tiy'ajt jadu'n nej miich mina'n, co ca' mmiidity mñäy.

¹⁸Com ti miiddzinäy migoox yëydijc, e huidibi cham mmiid, ca' mñäy'adyii. Janch tiy'ajt jadu'n nej ti m'adzooy.

¹⁹Chi je töxyjäy yminañ:

— Huindzin, cham nhuinjihuiyich co miich je' tüg huidibi Dios yhuij'ajt ycuje'ajt miid. ²⁰Hich ajcxy n'ap ndeedyich hue' je'

yminañ co jëbi ya huaad ñich ajcxy nDios'ojadajtcixyich ma jadayaabi huigombi copjijp. E miich ajcxy judíoñjy yminaangixy co jim Jerusalén je' ma huaad jëbi nDios'ojadajtim, ca' jac ma.

²¹Chi Jesús y'adzooy nimay je töxyjy:

—Töxyjy mijpidäg ñich n'ayuc. Co ypadamy je xii je tiempo co ni ya ma miich ajcxy mDios'ojadajttac, e ni jim Jerusalén jäy ca' ojadadipy ajcxy yi Dios Teedy. ²²Miich ajcxy ca' tiy'ajt mnejhuüygixy nej jëbi huaad mDios'ojadajtcixipy. ñich ajcxy judíoñjy nejhuüybich ajcxy je tiy'ajt nej jëbi huaad nDios'ojadajtim. Com tüg judíoñjy je huídibi yajnidzoocähuaam je jäy ajcxy y'alma ma Dios.

²³Ypadamy je xii je tiempo, e jada jëdu'n je tiempo co je huídibi ajcxy tiydudägy Dios ojadajtp, y'ojadadipy ajcxy Dios miid oyot oyhuinma'ñ etz miid Dios ytiy'ajt. Com yi Dios Teedy y'ixtaayb yi jadu'mbi jäy huídibi ojadadiib miid oyot oyhuinma'ñ. ²⁴Dios ca' ñinixc miidity, jadu'n je' nej poj ca' yaj'ixy. Je jäy ajcxy pinjaty ojadajtp Dios, copicy co huen ojadajtcixy miid tudägyjot tudägyhuinma'ñ, etz miid Dios ytiy'ajt.

²⁵Chi je töxyjy yminañ:

—Ñich nejhuüyb co je Mesías ymina'ñ huídibi naydijaanip Cristo, co je' yminipy, huin'it xyajni'ixihuaanim tüg'ócicy tiy'ajt.

²⁶Chi Jesús y'adzooy:

—Ñich jëdu'n je Cristo huídibi miich miidmiydacyp.

²⁷Chi jada' yja'ty ajcxy Jesús ydiscípulos ajcxy. Chi ajcxy

ooy jihuiy ti anajty co Jesús je töxyjy miidmiydägy, e ni pin ca' yaj'amidooy ti anajty chojcyp ti anajty yñimiydacyp miid yi töxyjy. ²⁸Chi je töxyjy jim ymajt ixmajch, chi ñicxy cajpjoty oy mayjäy nimay: ²⁹—Mingix, jam tüg yëydjic ixxim. Ti ñich yi' xyajnimaydäyich tüg'ócicy tijaty ti nduñich. ¿Nej ca' jada' yi' jëjity je Cristo?

³⁰Chi choñ ooy mayjäy cajpjoty, ninicxy ajcxy Jesús. ³¹Yam anajty ajcxy Jesús ydiscípulos chachnimäyii adzip:

—Huindzin, occaay.

³²Chi Jesús y'adzooy:

—Ñich nmiidich tüg caayin uucin huídibi miich ajcxy ca' mnejhuüygixy.

³³Paady je' ydiscípulos ajcxy tzachhuinmay, ac jëyi ajcxy, nayñimayigixy miñ xipy:

—¿Nej ti pinjaty yajcayyii yaj'ügyii?

³⁴Chi Jesús yminañ:

—Jotcujc nayjihuiyijich co ti nguydunich Dios chojcin. Com yi' ti xyquexyich ya naaxhuiñ, e nguydúunibich yi' y'ané'min. ³⁵Miich ajcxy minaangixp co jactigoy'ijtni jamidaax po' mina cosecha nyajpidicim. Oc-huinmay miich ajcxy, ñich nmına'ñich, jëbi nyajpidicim yi cosecha cham cham. Huindixcix yi mayjäy huídibi xyñigidaacim chooñ cajpjoty. Ni'ixi yi' ajcxy y'ity co amido'idaangixy Dios y'ayuc. Jadu'n ajcxy nipaty nej tügi cosecha huídibi ti ymijaani, jëbi nyajpidicim. ³⁶E pinjaty cosecha yajpidicp ypaatyp ajcxy ymuju'ñ. Nañ tim jadu'n miich ajcxy huídibi myajmibijcy yi jäy ajcxy co ñich je' je Cristo, mbaadipy

ajcxjy jotcuje'ajtin, etz huidibi ajcxjy xymibijcpich xymijpidaacpich ypadamy ajcxjy y'alma jugy'ajtin huidibi ca' ycixy ytigooy. Tim jadu'n nej je jäy ajcxjy huidibi niip etz huidibi cosecha yajpidicp yjotcugiiygixy miid co je cosecha ti y'ity, nañ tim jadu'n je jäy ajcxjy huidi cojaay jecy'ajty jada Dios y'ayuc etz miich ajcxjy jotcugiiygixy aguipxy co yi jäy ajcxjy xymijpidägyich. ³⁷Paady tiy'ajt je ayuc huidibi minam: "Tüg jäy niip etz jadüg jäy cosecha yajpidicp." ³⁸Hich ti nguexyich miich ajcxjy myajmibigipy jäy huidibi ti paady Cristo ytiy'ajt ma Dios ñecy. Yi Dios y'ayuc ycojaaybi ti möy je jäy Dios ytiy'ajt, e miich ajcxjy je' mbubedipy co myajmibigipy co iich je' je Cristo.

³⁹Mayjäy huidibi cogajpip jim Samaria ymijpidac ajcxjy je Jesús co je' je' je Cristo, miid co je töxyjäy anajty ti ymina'n: "Ti yi' xyajnimaydäyich tijaty iich ti nduñich." ⁴⁰Co je samariajäy ajcxjy yjädy ma Jesús yhuinduu, chi ajcxjy cohuaniiy huen hui'my. Chi Jesús jim yhu'i'miyy mejtz xii. ⁴¹Janch mayjäy ooy nigü mibijcy mijpidacy Jesús, co je' je' je Cristo co ajcxjy ci'm midomiydacy je Jesús. ⁴²Chi ajcxjy nimay je töxyjäy:

—Canan jëyi co miich ti xyajnimäy iich ajcxjy, paady ycixpi iich ajcxjy yam nmibicyich. Nañ ti iich ajcxjy yam ci'm n'amido'ityich, paady iich ajcxjy nejhuüy co janch jada yjējity je Cristo huidibi yajnidzögam yi naaxhuiñyjäy ajcxjy y'alma ma Dios.

**Jesús yajtzooc tüg gobierno
mijtungmiidpi ymang**

⁴³Mimejtz xiibi anajty co Jesús chooñ jim, nicxy jim Galilea.

⁴⁴Jesús ci'm anajty ti ymina'n:

—Co jäy ajcxjy huidibi miid Dios yhuij'ajt ycuje'ajt yajpaady ma yci'mgajp, ca' pin yajmij'adyii.

⁴⁵Co Jesús yja'ty jim Galilea naaxjot, huidi anajty ajcxjy jimip agujc jotcuje ajcxjy cöbijcy Jesús, com ti anajty ajcxjy ijxcixy tijaty mijhuinma'n anajty ti tuñ jim Jerusalén xiijoty, com nañ ti je' anajty ajcxjy jim y'oygixy xi'ajtpi.

⁴⁶Chi yhuimbijty Jesús jadüg'oc jim Caná ma Galilea ñaaxjot, ma je nii yajvinocojy. Jim Capernaum anajty tüg rey mijtungmiidpi huidibi anajty y'ung pājcip. ⁴⁷Co je' nejhuüy co Jesús anajty ti yhuimbity Galilea co anajty ti y 'oy Judea, chi ninicxy, e chi cohuaniiy co Jesús huen nicxy y'ung tzoyyüi hidibi anajty ögaanip. ⁴⁸Huin'it Jesús yminañ:

—Pen ca' ixypy ti m'ixy mijhuinma'n etz tijaty ijxpejt, ca' ixypy mmibicy.

⁴⁹Chi y'adzoy je rey ymijtungmiidpi:

—Huindzin, tun may'ajt ninicx iich n'ung ma ca'ni y'o'cyñi.

⁵⁰Chi Jesús yminañ:

—Huimbit ma mdijc, je m'ung jugy'ajtni je'.

Chi je yëdyjc mibijcy Jesús nej anajty ti ñimäyüi, chi ñicxy jadüg'oc ma ytjic. ⁵¹Ñicxnip anajty co ytumbi ajcxjy oy yjijpcobadiyüi, e chi ñimaayi co je' y'ung ti anajty y'agidägy.

⁵²Chi yaj'amidooy ajcxjy ti hora anajty ti yhuaadjihuüy, chi ajcxjy y'adzooy:

—Ixiiy cujc yxii naxy je toyii y'ixmajtznü.

⁵³Paady je ungededy jihui'nybijcy co huin'it je' jada' je tiempo co

anajty Jesús ti ñimäyii: “Je m'ung juyg'ajtni je'.” Chi jada' mibijcy mijpidacy Jesús miid tüg'óciy jäy huidijaty anajty yajpat ma yjiin ytijc.

⁵⁴Je' je' je mimetzpi mijhuinmaññ mij'oy'ajt huidibi Jesús ytun co chooñ jím Judea ñicxy jím Galilea ñaaxjot.

**Jesús yajtzoc tüg jäy huidibi
anajty yci' ytecy xuuxy**

5 Co jadu'n ytuni yjajti jím Jerusalén anajty ajcxy judíojäy tungixy tüg mijxii. Huin'it Jesús jím ñicxy jím Jerusalén.

²E jím Jerusalén jím anajty nii abojtzög y'ity, mihuingon je poch aguu huidi xiijp puerta de las ovejas. Je it hue' anajty yajtijy hebreo'amy Betesda, e ymiid anajty migoox it yhuinguembetpa't. ³Ma je huinguembetpa't mayba'mjäy anajty jím chachcöгнаaygixy; je huintzpi, ciducp tecytucpi, cixuxy tecyxuxypi, huidibi anajty ajcxy jím tzach'ahuijxp mina je nii y'ocpu'xhuimbity. ⁴Com tüg ángel anajty yhuimbety y'adijy ma je nii abojtzög y'ity, chi je nii yajyücx. E je jäy pinjaty anajty jayijp jiiby niijoty tigiib co je nii yücx, huin'it anajty ajcxy choocixy, oy ixyipy ti pa'm ajcxy tim miidity.

⁵Jím anajty tüg yëydijc hue' anajty ti ypa'mgögnäy iipx majmoxc tugüig jímijt. ⁶Co Jesús ijxy jím ycögnäy, ijxajpy co anajty je' jecyip chachmijtacni, chi nimay:

—¿Nej mdzögambi?

⁷Chi je pa'mjäy y'adzooy:
—Huindzin, ca' nmiididyich tüg yëydijc pin iich xypidägipy jiiby

niijoty co anajty nii y'ahuidijtcoty. E paady ycixpi co oy iich jím njamechich ma yi nii, ti huingbi ñitigiinyñi.

⁸Chi Jesús yminañ:

—Pidig, yajpidig yi mmaabejt, etz tüyöychon.

⁹Chi mic'amy choocy, chi je' ymaabejt yajpidigy ytigiyy yöybi najxpi janch mic oy. Hue' anajty tüg sábado xii co choocy. ¹⁰Paady je judíojäy ixpicytije ajcxy nimay je huidibi anajty ti chögy:

—Hue' yam sábado xii, paady ca' jadu'n ñigo'aducyity jadu'n nej m'idich co mmaabejt mdzimhuidity.

¹¹Chi y'adzooy je':

—Je jäy tiibi iich xyajtzögy, yi' iich jadu'n ti xyñimäy: “Yajpidig yi mmaabejt etz tüyöychoon.”

¹²Chi ajcxy y'amidooy:

—¿Pin miich jadu'n ti xyñimäy: “Yajpidi yi mmaabejt etz tüyöychoon?”

¹³Per je tiibi anajty chögy, ca' anajty je' nejhuüy pin je' anajty. Com ti anajty Jesús niyöydiigooyñi ma je mayjäy huidibi anajty ajcxy jím tzachjajtip ma je it. ¹⁴Chi jada' jaccomjegy minaybaatti Jesús jím ma Dios ytijc, e chi Jesús yminañ:
—Cuentipic nej ti mdzögy, ca' ni ti bocy mjactunipy. Co pocy mjactunipy ca' jyecyity co tim nigü jibic nicxy mjaty.

¹⁵Chi je yëydijc ñicxy oy je' yajnimäy je judío ixpicytije co hue' je' anajty Jesús, je huidibi anajty ti yajtzögyii. ¹⁶Paady ycixpi je judío ixpicytije anajty tzach'ixhuidijtcixy tzachpahuidijtcixy je Jesús, e yaj'ögaangixy miid co anajty jäy ti yajtzögy sábado xii. ¹⁷Chi Jesús yminañ:

—hich nDeedy tumb je' cham, ca' ypooxxy, paady ycixp iich nañ jadu'n nduñich cham ma miich ajcxy sábado xii.

¹⁸Co Jesús jadu'n yminañ, paady ycixpi je judío y'ixpicytijc ajcxy nigi yjacjtotma'tcoty, ytımy yaj'ögamy anajty aj y Jesús. Ca' ajcxy jadu'n yjotcujcity co anajty Jesús ca' cuyduñ judíojäy ajcxy ytiy'ajt nej ajcxy sábado xii yajmij'ajtcixy, etz co jadu'n yminañ: “Dios yi' nDeedy'ajtypich.” Paady ycixpi ajcxy judío y'ixpicytijc yminañ co Jesús ci'm anajty ytügihua'ñ miid Dios.

Dios ymooy je y'ung ymic'ajt

¹⁹Chi Jesús yminañ:

—Janch janch iich miich ajcxy yam jadu'n nimaaygixy co iich Dios nDeedy'ajtypich. Ca' huaad ti nduñich miid ngi'mjot ngi'mhuinma'ñich. Jëbi janchtiy nduñich huidibi n'ijxpyich Dios Teedy ytumy. Huidibi Dios Teedy ytumyb, ndumybich com Dios yi' nDeedy'ajtypich. ²⁰Com yi' Dios Teedy ooy yi' tzocy jihui' yci'm'ung, paady xyajni'ixiydaaybich tüg'óciy yi' huidibi ytumyb. E nañ xyajni'ixihuaambich jacmijjatypi mijhuinma'ñ, ca'ydi jadayaabi mijhuinma'ñ nej ajcxy ti m'ijxycixy nej jada pa'mjäy ti chögy, paady ycixpi nigi mhuinmayipy ajcxy. ²¹Jadu'n nej Dios Teedy yajjugypicy yi' o'cpi, e chi yajtzinäy jadüg'oc. Nañ jadu'n iich anajty ndımymöhuamyb. ²²Com je Dios Teedy ca' je' ci'm ocyajciyöyaani ocyajtecyöyaani jäy ajcxy ypocy. Hue' tüg'óciy

je ymic'ajt xyajciidigiyaayich co iich ndiydunipyich tüg'óciy naaxhuiñyjäy, com Dios nDeedy'ajtypich. ²³Hue' tüg'óciy je ymic'ajt xyajciidigiyaayich, jigix tüg'óciy jäy xyajmij'adipyich. Je jäy ajcxy huidibi ca' xyajmij'ada'ñich, nañ ca' ajcxy yajmij'ada'ñ Dios Teedy huidibi xyquejxich ya naaxhuiñ.

²⁴Janch janch iich miich ajcxy yam jadu'n nimaaygixy: Co hueñypinjäyity, pinjaty xy'amido'jtibich n'ayuc, e ymibijcyp ymijpidacyp je tiibi xyquejxyich ya naaxhuiñ, ymiid je'je y'alma jugy'ajtin huidibi ca'ycixipy ytigoyipy, e ca' Dios Teedy chaachytuna'ñyii miid ypocy ycixpi. Hue' janchtiy co y'ögipy, chi janchtiy jadügtecy yjugypigipy. ²⁵Janch janch iich miich ajcxy jadu'n nimaaygixy co yi' xii tiempo paatnipy, e cham jëdu'n ti paady, co yi' jäy ajcxy tiibi y'o'ccixy ymidohuipy yi' n'ayucich, co anajty ngapxyich, com Dios yi' nDeedy'ajtypich. Pin jäy anajty midoob n'ayucich jugypigip jadüg'oc ajcxy. ²⁶Com yi' Dios Teedy mic'ajt miid jëbi yajjugypicy jäy tiibi y'o'ccixy. Nañ Dios ti xymöyich ymic'ajt jëbi huaad nyajjugypicyich jäy tiibi y'o'ccixy, com Dios iich nDeedy'ajtypich. ²⁷Ti Dios xymöyich ymic'ajt jëbi ndiyduñich je jäy ajcxy miid ypocy ycixpi, com iich je' je jäy huidibi tzoon tzajpjoty. ²⁸Ca' ooy jada ayuc tiy'ajt mhuinmaaygixy. Com ypaadipy je xii je tiempo co je huidijaty ajcxy yajpatp ma naaxtiyidac,

ymidohuipy ajcxy n'ayucich co iich anajty nmigapxyich ajcxy. ²⁹Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypí miid ypocy ycixpi.

**Dios tiy'ajt yejc co Jesús
ymiid anajty mic'ajt**

³⁰Ca' ni ti huaad nduñich miid ngi'mmic'ajtich ngi'm'ayucich. E ayuc tiy'ajt huidibi nmidooybich ma Dios Teedy, jada ayuc tiy'ajt miid nyajcüyöya'ñich nyajtecyöya'ñich jäy ajcxy ypocy. Jadu'n tiydudägy nduna'ñich, com ca' iich nduñich ngi'mdzójcínich. Yi' iich ndumyb nej Dios Teedy tzocy, yi' huidibi xyquejxich ya naaxhuiñ. ³¹Co ixypiy iich ci'm nayñigodiy'ajt'adyijich, ca' ixypiy miich ajcxy mmijpidägy n'ayuc ndiy'ajtich. ³²Com huingbi yi' huidi xyñigodiy'ajt'ajtpich co iich Dios ymic'ajt nmiididyich, e nejhuuiybich co janch yi' huidibi xyñigodiy'ajt'ajtpich. ³³Miich ajcxy ti mguexy je migügtijc ajcxy tiy'ajtpijcpi ma Juan. E je' yejc tiydudägy ayuc tiy'ajt janchypí pin iich. ³⁴Co jadu'n nmína'ñich co Juan xyajnidiy'ajt'atyich co iich je' je Cristo, ca' jadu'n nmína'ñich co ooy ycopicyity co tüg jäy xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nidzoocin paadipy ma Dios. ³⁵Je Juan mictägy ooy Dios y'ayuc najtzcapxiyi, jadu'n je' anajty nej tüg jiin huidibi tiicxp

jajp, e miich ajcxy tüg jaxigy ti mxondaaccixy miid yi' y'ayuc ytiy'ajt. ³⁶Nigi iich Dios y'ayuc ytiy'ajt nmiididyich ca'ydí Juan. Yi' mijhuinma'ñ huidibi ndumybich miid Dios Teedy ymic'ajt. yi' xyajniguëxigibich co iich ya naaxhuiñ Dios Teedy xyquejxich. ³⁷Yi' Dios Teedy tiibi xyquexyich, yi' ci'm yejc tiy'ajt co iich je' je Cristo. E ni caminaabi miich ajcxy yi' mgamidoohui ycapxin, nañ ni caminaabi miich ajcxy Dios Teedy yhuin'yijp maga'ijxi. ³⁸Ni ca' miich ajcxy mmiidity yi' y'ayuc ma mjot mhuinma'ñ, miid co miich ajcxy ca' xymijpidägyich co iich je' je jäy huidibi Dios ti quexy ya naaxhuiñ. ³⁹Ijxtaaygixy jada tiy'ajt ma Dios ylibro, com jiiby mdijy miich ajcxy mbaadipy tiy'ajt nej jëbi ajcxy mjogy'adipy co anajty ti m'o'ccixy, e yi' Dios ylibro nañ iich yi' xyñigapxp. ⁴⁰E ca' miich ajcxy mgöbigaangixy iich n'ayuc iich ndiy'ajt, jigix ajcxy jugy'ajti mbaadipy huidibi ca' ycixy ytigooy. ⁴¹Dios xycömayipyich, ca' ngöbigipyich co naaxhuiñyäjy ajcxy xycömayipyich. ⁴²Nnejhuuiybich, nej miich ajcxy mjot mhuinma'ñ mmiidity, co ca' ajcxy Dios ytiy'ajt mguyduuni. Ca' ajcxy migüg mdzojccixy mjihuigixy jadu'n nej Dios tzocy jihuüy jäy ajcxy. ⁴³Hich ti nmiñich miid nDeedyich ymic'ajt. Miich ajcxy ni ca' xycöbicyich. Pen ji huingbi jäy ymiin miid yci'mmic'ajt, ca' miidity Dios ymic'ajt, je' janchtiy miich ajcxy ooy mijpidägaangixy. ⁴⁴Ca' mjájtciixy nej iich miich ajcxy xymijpidägibich, miid co ajcxy

ci'm mdzachnaygömayáanigixy ac miich ajcxy jëyi. E co ixipy miich ajcxy xycöbìga'ñich, huin'lit ajcxy Dios xycömayipy. ⁴⁵Ca ajcxy mmina'nipy co iich miich ajcxy nxìhuaamy ma Dios Teedy yhuinduu. Je Moisés miich ajcxy yxìhuam ma Dios, je huidibi miich ajcxy mdzachmijpidaacip ytiy'ajt. ⁴⁶Pen mmijpidaacyp ixipy ajcxy je Moisés y'ayuc ytiy'ajt, nañ jadu'n ixipy iich miich ajcxy xymijpidägyich. Com Moisés iich yì' xychachñimiyaacich ma yì' ñecy. ⁴⁷Pen ca' mmijpidaaccixy Moisés ñecy, ca' mjájtciixipy nej ajcxy mijpidáaccixipy iich n'ayuc.

Jesús ymoy jäy jicxy picy migoox mil

6 Co jadu'n ytuni yjajti, chi Jesús ñicxy jim Galilea mejy nínaxy, huidibi nañ jadu'n xiijp Tiberias mejy. ²Janch mayjäy anajty Jesús ypanicxyii axam co anajty ajcxy ixy je mijhuinma'ñ tijaty anajty Jesús ytumyb ma mayba'mjäy. ³Chi Jesús ypejty ma tüg cögop, chi jim y'ixtacy miid je' ydiscípulos ajcxy. ⁴Tim huingonip anajty je pascuaxii huidibi anajty judíojäy ajcxy ytumyb. ⁵Chi Jesús ijxy co janch mayjäy ti ypamiinyii, chi nimay Felipe:

— ¿Ma jada' caayin uucin n'ocjuyim, ti nyajcaayim jada mayjäy huidibi ti xypamiinim?

⁶Hue' anajty y'oc'ijxmadzamy nej Felipe y'oc'adzooy. Jesús anajty ñejhuuñyib yajxon ti anajty ytunamy. ⁷Chi Felipe y'adzooy:

— Ni ycahuaadñihuip mejtz mil peso meeñ, co ixipy ajt n'ocjuyaanim caayin uucin, e

nmöhuuanim cijp tüg'aa cijp mejtz'aa jëyi.

⁸Tüg Jesús ydiscípulo, hue' anajty yxii Andrés, Simón Pedro y'uch, je' jadu'n nimay Jesús:

⁹— Cha tüg pi'c'anäg huidibi miid migoox cebada tzajcaagy, e mejtz acx ung. E ni ycatiijty yì' yì' migooxpi tzajcaagy, etz mejtz acx ung miid jada mayjäy.

¹⁰Chi Jesús nimay je' ydiscípulos ajcxy:

— Yaj'ixtacta' yì' mayjäy.

Miijyot anajty ooy ma je it.

Chi ajcxy y'ixtactay. Hue' jada' anajty ajcxy ñaybadyii migoox mil ac yëydíctijc, abicy yì' töxyjäydíjcz etz y'ung y'anäg ajcxy. ¹¹Chi Jesús je tzajcaagy conígy, chi yajnajxy Dioscojuyip, chi yajnidídagíyday je jäy ajcxy huidíjaty anajty jim iñaayb, mooy jadu'n nej pin tim tzocy je tzajcaagy etz je acx. ¹²Co je mayjäy cayday, chi Jesús nimay je' ydiscípulos ajcxy:

— Yajmujcta' ajcxy yì' cayduc, ca'ydi huaad ni ti y'iyoy.

¹³Chi ajcxy yajmujctay je cayduc, e yaj'ujch ajcxy majmetz mijjaty cach miid je tiibi anajty yconaxy je migooxpi tzajcaagy. Je' anajty jadu'n ti yjacconaxy. ¹⁴Co ajcxy y'ijxy je mijhuinma'ñ huidibi anajty Jesús ti tuñ, chi je jäy ajcxy ymíñañ:

— Janch jëdim jada je yëydíjcz huidibi Dios y'oy'ajt ymic'ajt miid, je huidibi anajty miinam ya naaxhuñ.

¹⁵Co Jesús nejhuñy co ajcxy anajty yajrey'ada'ñyii, chi jada' jadüg'oc huinhuäctuttay je mayjäy. Chi ñicxy naydüg ma tüg yuugjot.

Jesús yöy niihuingíxy

¹⁶Co oy chu'íyñi, chi Jesús ydiscípulos ajcxy y'idaacni ma mejypa'. ¹⁷Chi ajcxy ybarcotigíy, ñíxcy ajcxy jim Capernaum jadügpí mejypa'. E ti anajty ycoodziyñi, e ca'ni anajty Jesús ajcxy ñihuimbidiyini. ¹⁸Chi tüg mijpoj ymiñ, chi je meyy ytiñy oy yücxpi. ¹⁹Ti anajty ajcxy ytüyöy oy migoox tudujc kilómetro co ajcxy ijxy Jesús yhuingoñ ma je barco, hue' anajty ytüyöy mejyhuingíxy. Chi ajcxy ooy ñay'adzigiíy. ²⁰Chi Jesús yminañ: — Hich yí', ca' mdzigiíyigíxy. ²¹Chi ajcxy jotujc Jesús yajbarcotigíy. Chi tim mic'amy ajcxy ymejch jim ma mejypa' ma anajty ajcxy ñíxcíxy.

Mayjäy ixtaay Jesús

²²Je mayjäy huidibi anajty ajcxy ti yhui'mäy jim'amy y'ahuin, y'íjx ajcxy co ac jëyi Jesús ydiscípulos ajcxy ytiñy ma tüg barco, e Jesús ca' anajty ti ytiñy barcojoty miid je' ajcxy. Ac jëyi anajty ajcxy ti choongíxy barcojoty. ²³Je com jabom nijejty barco huidibi anajty jim tzomb Tiberias, ti anajty yjädy mihuington ma je it, ma anajty Jesús ti yajcaaygíxy je mayjäy miid je Huindzin Dios ymic'ajt, huin'it co Dios mibijctzoy. ²⁴Chi je mayjäy ajcxy ijxy co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigíyday, chi ajcxy oy ixtaaygíxy Jesús jim Capernaum.

Jesús ymöhuamy jäy ajcxy jugy'ajtin huidibi ca' ycixipy ytigoyipy

²⁵Co ajcxy minaybaati Jesús mejy ñínaxy, chi ajcxy nimay:

—Huindzin, ¿mina miich ya ti mmiñ?

²⁶Chi Jesús y'adzooy nimay je mayjäy ajcxy:

—Janch janch co iich miich ajcxy yam jadu'n nimaaygíxy co miich ajcxy xy'ixtaaybich, canan yí' ycixpi co ajcxy ti m'oc'ixy yí' mijhuinma'n huidibi ti nduñich, paady ycixpi miich ajcxy xy'ixtäyich co ajcxy nyajcay cüxyi miid tzajcaagy.

²⁷Chi Jesús yjacminañ:

—Ca' myajjotmaygojicy yí' jüxcy pícy huidibi cijxp tigooyb. Yí' janchtiy mijottigooygíxy yí' jüxcy pícy huidibi xymöhuipy yí' jugy'ajtin huidibi ca' ycixipy ytigoyipy tücci'yí. Hich miich ajcxy je jugy'ajtin nmöhuibich huidibi ca' ycixipy ytigoyipy tücci'yí, com iich je' je jäy huidibi tzoon tzajpjoty, e Dios Teedy xymic'ajtmooyich, jëbi iich miich ajcxy nmöy jugy'ajtin huidibi ca' ycixipy ytigoyipy tücci'yí.

²⁸Chi ajcxy nimay Jesús:

—¿Ti iich ajcxy jëbi huaad nduñ, nej jëbi iich ajcxy Dios xymijotcuje'aty?

²⁹Chi Jesús y'adzooy:

—Dios chojcpy co miich ajcxy xymibicyich, com Dios xyquejxich ya naaxhuin.

³⁰Chi ajcxy nimay Jesús:

—¿Ti ijxpejt mdunamy miid iich ajcxy, jëbi iich ajcxy n'ixipy Dios ymic'ajt etz iich ajcxy nmibigipy co miich je' je Cristo? ¿Ti mijhuinma'n mdunamy? ³¹Hich ajt nmij'ap nmijteedy ajcxy jecy'ajty yjiicxy pijc ajcxy je maná jim ma títznaax'it. Jadu'n ymiñ jaybety ma

jadu'n ymina'n: "Dios yejcpy jicxy picy huidibi tsoon tzajpjoty."

³²Chi Jesús y'adzooy:

—Janch janch iich miich ajcxy yam jadu'n nimaaygixy co canan je' je' je Moisés huidibi miich ajcxy xymooyb je jicxy picy janchypi huidibi tzomb tzajpjoty. ³³Je jicxy picy huidibi Dios yejcpy huidibi tzomb tzajpjoty, je' je' huidibi jugy'ajtin moy je naaxhuiñy-jäy huidibi ca' ycixipy ytigoyipy tücci'yi.

³⁴Chi ajcxy nimay Jesús:

—Huindzin, iich ajcxy mooyg je jicxy picy janchypi jabom jabom huinixii.

³⁵Chi Jesús ymina'n:

—Iich jëdu'n je jicxy picy huidibi miich ajcxy xymöhuip jugy'ajtin huidibi ca' ycixipy ytigoyipy tücci'yi. Co jäy ajcxy xyñimiinich, e xymijpidägyich, huin'it ca' yi' ajcxy yuböccoda'nyii niminaxii, e co jäy ajcxy xymibicyich, ca' yi' ajcxy ytidzihua'nyii niminaxii. ³⁶Com ti iich miich ajcxy nimäy, oy iich miich ajcxy ti xyja'ijxycixy, per ca' mibijccixy. ³⁷Tüg'óciy pinjaty iich nDeedy yquexyp ma iich, xyñimibich yi' ajcxy. E pinjaty xyñimibich etz xymijpidaacpich, ca' iich yi' ajcxy n'ixtijy. ³⁸Canan paady ycixpi iich ti ndzooñ tzajpjoty ngidägich ya naaxhuiñ co nduna'nich ngi'mhuinma'n. Hue' janchtiy yi' ndunaamyich nDeedyich y'ayuc ytiy'ajt, com yi' xyquejxich ya naaxhuiñ. ³⁹Yi' jadu'n tzojcp iich nDeedy huidibi xyquejxich ya, co iich ca' ni pin nyajtigoyipyich, yi' huidijaty xymooybich. Hue' janchtiy yi' ajcxy

nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁰Dios Teedy ti xyquexyich ya naaxhuiñ e yi' jadu'n tzojcp co pin jäy iich anajty xy'ijxpich, e xymijpidaacpich, ymiid'adipy je' ajcxy jugy'ajtin huidibi ca' tücci'y ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñybi ti yhuaad'ajtni mina anajty ytigadza'n.

⁴¹Chi je judíojäy ajcxy ooy yajtzibiiy yajcapxiy co anajty Jesús jadu'n ti ymina'n: "Iich je' je jicxy picy huidibi tsoon tzajpjoty." ⁴²Jadu'n anajty ajcxy chachmina'n: —¿Nej ca' je' yjadaajty je Jesús, je José y'ung, je huidibi ajt ytaj yteedy n'ixy'ajtim? ¿Nej co jadu'n ymina'n: "Iich ti ndzooñich tzajpjoty"?

⁴³Chi Jesús y'adzooy:

—Ca' myajtzibiiygixy myajcapxiygixy ac miichiy ajcxy. ⁴⁴Ni pin jäy xycaniminipyich, pen ca' jayijp Dios Teedy huinma'n ymöyii co xymijpidägibich. E co xymijpidägibich, chi nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁵Com jadu'n ymiin jaybety ma Dios ñecy huidibi je jäy ajcxy anajty Dios ytiy'ajt miid'adipy jecy'ajty yjaay co Dios yaj'ixpigamy je jäy ajcxy tüg'óciy. Paady ycixpi tüg'óciy jäy huidibi midoob Dios y'ayuc etz y'ixpijcp Dios ytiy'ajt xymijpidägibich ajcxy.

⁴⁶Ca' ni tüg jäy ti ixy yi Dios Teedy. Jëyi je jäy tügpajc huidibi ti choñ ma Dios, yi' je' ti ixy yi Dios. ⁴⁷Janch janch iich miich ajcxy yam jadu'n nimaaygixy co pinjaty

xymibijcpich xymijpidaacpich,
ymiid yi' ajcxy yjugy'ajtin huidibi
ca' ycixipy ytigoyipy tücci'yi.

⁴⁸Hich jëdu'n je jïicxy picy huidibi
jugy'ajt mooyb je jäy huidibi
ca' ycixipy ytigoyipy tücci'yi.

⁴⁹Miich ajcxy mmij'ap mmijteedy
yjiicxy'ajti ycaagy'ajti ajcxy je
maná jim títznaaxtuum'it jecy'ajty.
E chi ajcxy y'o'ctay. E ni ca' ajcxy
jugy'ajtin paty huinixiibi. ⁵⁰Je
jïicxy picy huidibi nnigapxypich
huidibi tzoon tzajpjoty, co jäy
ajcxy jïicxipy, ymiid'adipy ajcxy
je jugy'ajtin huidibi ca' ycixipy
ytigoyipy tücci'yi. ⁵¹Hich jëdu'n
je jïicxy picy huidibi ti choon
tzajpjoty, etz ti ycidägy ya
naaxhuiñ huidibi jugy'ajtin yejcp.
Co jäy ajcxy jïicxyp je jïicxy picy,
ymiid'adipy ajcxy je jugy'ajtin
huidibi ca' ycixipy ytigoyipy
tücci'yi. Je jïicxy picy huidibi
nyegaamyich miid naaxhuiñjäy
ajcxy ycixpi, je' je' je nninïcxich.

⁵²Chi je judío y'ixpicytjic ajcxy
ooy yaj'ayucyoon yajcapxyoon, ac
je'yi ajcxy ñayñimáayigixy:

—¿Nej jada yëydijc tijy yi' ñinïcx
njïicxy'ajtim?

⁵³Chi Jesús yminañ:

—Janch janch co iich miich
ajcxy yam jadu'n nimaaygixy,
pen ca' miich ajcxy mdzüdzcixy
iich nninïcx, e pen ca' m'uuccixy
iich nni'py, iich je jäy tügpajc
huidibi tzoon tzajpjoty, ca'
miich ajcxy miid'adipy yi Dios
yjugy'ajtin. ⁵⁴Com pinjaty iich
nninïcx xychu'tzip etz iich nni'py
xy'uucibich, ca' je ajcxy yjugy'ajtin
ycixipy ytigoyipy tücci'yi, oy ajcxy
jya'o'ccixy. Nyajjugypigipyich

je' ajcxy jadyü'oc co anajty
naaxhuiñbyi ti yhuaad'ajtni mina
ytigadzipy. ⁵⁵Hich nninïcx janchypi
jïicxy picy yi', etz iich nni'py
janchypi ügy yi'. ⁵⁶Co yi jäy ajcxy
xymibicyich xymijpidägyich
jadu'n ni paady nej jihuüy iich
nninïcx xychüdzi, etz iich nni'py
xy'uuci. Chi y'idipy ajcxy huinixii
ma iich, etz iich n'idipyich
huinixii ma je' ajcxy. ⁵⁷Dios Teedy
huidibi xyquejxich ya naaxhuiñ
ymiid jugy'ajtin huidibi ca' ycixy
ytigooy. Hich ti nbaadyich ma Dios
Teedy je jugy'ajt huidibi ca' ycixy
ytigooy. Nañ mbadamy miich
ajcxy jugy'ajtin huidibi ca' ycixy
ytigooy ma iich. Co miich ajcxy
xymijpidägyich, jadu'n anajty
nipaady nej jihuüy mjiicxy'ajtigixy
iich nninïcx. ⁵⁸Je jïicxy huidibi
tzoon tzajpjoty, e ycidacy ya
naaxhuiñ co jäy ajcxy jïicxy'adyii,
yajtzinähuiib je ajcxy, ca' ajcxy
yjugy'ajtin ycixipy ytigoyipy
tücci'yi. Yi mmij'ap mmijteedy
huidibi jïicx'ajtigixy je maná
jecy'ajty, o'ctay ajcxy, ca' ajcxy paty
je jugy'ajtin huinixiibi.

⁵⁹Jadu'n Jesús ymiydacy jim ma
je judíojäy ajcxy ñaymujctac jim
Capernaum co anajty jim yaj'ixpicy.

Mayjäy ca' mijotcuje'ajty Jesús y'ayuc

⁶⁰Co ajcxy Jesús y'ayuc
midodaayi, nigujc-huäcxy je
huidibi anajty ixpïjcp ma Jesús. Chi
ajcxy capxpídzimy, e jadu'n ajcxy
yminañ:

—Ooy chachchipity je Jesús
y'ayuc. Ca' huaad ji pin
huinjihuüyday.

⁶¹ Com Jesús ñejhuiyb nej ajcxy anajty yajtzibÿy yajcapxiy, chi ymínañ:

—¿Nej ca' miich ajcxy mijotcuje'aty je tzip ayuc jadu'n nej cham ajcxy ti nyajnimäy?
⁶² ¿Nej xymijpidägibich ajcxy, pen m'ijxpy ixipy ajcxy co anajty nba'ttigÿyich jadüg'oc jiiby tzajpjoty ma ndzooñich? Com iich je' je jäy huidibi tzoon tzajpjoty. ⁶³ Je jäy ajcxy yjihui'ñ, yí' je' ñinícx yajjugy'ajtip, e je jäy ajcxy ninícx ca' yí' ni ma chobaady, pen ca' m'idity yjihui'ñ. Co miich ajcxy mgöbigÿpy yi ayuc tiibi ngapxyich, huin'it ajcxy mbaadÿpy Dios yjihui'ñ (je Espíritu Santo), etz mbaadÿpy ajcxy jugy'ajtin huidibi ca' tücci'yí ycíxy ytigooy, oy mja'o'ccixy. ⁶⁴ Per nigujc-huäcxy ma miich ajcxy pinjaty ca' mibicy iich n'ayuc.

Com Jesús ñejhuiyb anajty jayijpni pinjaty ca' ymibigyii y'ayuc, etz pinjaty anajty cÿyegaanip ma ymidzip. ⁶⁵ Chi Jesús yjacmínañ:

—Paady ycixpi jayijp ti nmína'ñich, co ca' ni pin jëbi iich xymijpidägy, pen ca' Dios Teedy jayijp yhuinma'ñ ymöyii co cöbiga'ñ ymöyii co cöbiga'ñ iich n'ayuc.

⁶⁶ Huin'it mayjäy ajcxy, je huidibi anajty xpijcp ma Jesús, chi ajcxy huinhuäctut ixmajtzní ajcxy Jesús. Ca' ajcxy y'ocjacpanícxni. ⁶⁷ Chi jada' Jesús nimay je nimajmetz discípulos ajcxy:

—¿Nej nañ xy'ixmadzaambich miich ajcxyi?

⁶⁸ Chi y'adzooy Simón Pedro:

—Huindzin, ca' jac ni pin iich ajcxy jëbi huaad nmijpidägyich,

com miich tügpajc miid je ayuc huidibi xyajni'ixiÿyich ajcxy nej jëbi huaad iich ajcxy nbaadÿpy jugy'ajtin huidibi ca' ycixipy ytigoyipy tücci'yí. ⁶⁹ Iich ajcxy nmibijcypich e nnejhuiybich co miich je' je jäy huidibi tzoon ma Dios huidibi huadz yhuinma'ñ ymiid.

⁷⁰ Chi Jesús ymínañ:

—Miich ajcxy je' ti nhuin'ixyich nimajmetzpi, e nidügti miich ajcxy mujcu' huinma'ñ mmiidity.

⁷¹ Je Judas Iscariote, Simón ymang, anajty ytiijpy. Com je' je' anajty cÿyegam Jesús ma ymidzip, oy je' anajty yjajëjity nidüg ma je nimajmetzpi.

Jesús y'uch ajcxy nañ ca' anajty jaty mijpidaaci Jesús y'ayuc

7 Co jadu'n ytundaayi yajtaayi, jim anajty Jesús yhuidity Galilea naaxjot, ca' anajty ñícxan'ñ jim Judea naaxjot, co anajty yi judíojäy ajcxy huidibi midzip'ajtip yaj'öga'ñyii. ² Tim huingon anajty je judíojäy yxií, hue' anajty ajcxy yxiigoyäxy Tabernáculo xií. ³ Chi Jesús ñímaayi y'amigüg y'uch yëydijcpi:

— Tzon miich ya, nícx jim Judea naaxjot nayguëxigíi mayjäyjoty.

⁴ Com huenpínity huidibi nayguëxígaanip mayjäyjoty, ca' ajcxy naygoyüchyii. Mdunipy miich mijhuinma'ñ xiijoty, jigix je mayjäy xycömayipy.

⁵ Ni Jesús y'amigüg ajcxy ca' anajty yjaty ymijpidägyii y'ayuc.

⁶ Paady Jesús y'adzooy:

—Iich nxíi ndiempo ca'ni paty mina ndigíhua'ñich jim Jerusalén

jadu'n nej je Mesías. Janch miich ajcxy oytimyminaajity jëbi mnayguëxícigixy ma je mayjäy ajcxy. ⁷Ca' huaad jëbi miich ajcxy, naaxhuiñyjäy ajcxy, xymidziptzoñ. Janch iich xymidzip'ajtpich ajcxy yi', je' co ngapxpídzimych yi yjibic-huinma'n huídibi ajcxy ytumyb.

⁸Nícx miich ajcxy jim ma xii yjadyii. iich ca' nnícxan'íich cham, com ca'ni iich ndiempo yhuaad'aty mina ndigíhuibych jim Jerusalén jadu'n nej je Mesías.

⁹Jadu'ñydi jëda'ajty yminañ, chi yhui'miyy jim Galilea.

Jesús nícxy jim Jerusalén xiijoty

¹⁰Co Jesús y'amigügtijc ajcxy jayjip nícxtay xii'ajtpi jim Jerusalén, chi Jesús nícxy nañ jadu'n ayüch ameech ma anajty xii yjadyii.

¹¹Xiijoty je judíojäy ooy ajcxy jal'ixtay Jesús, e chi ajcxy yminañ: —¿Ma jada' je Jesús?

¹²Ma je mayjäy ajcxy may anajty ajcxy tzachnigapxcixy tzachnimiydaaccixy Jesús. Nijëjity anajty yminaangixy: “Tüg yëydijc oyjäybi yi'”; e nañ nijëjity yminaangixy: “Ca'p yi' y'oyjäyity, nigo jäy tzachhuin'iiñ.”

¹³E ni pin anajty ca' capxpídzimych mayjäyjoty co y'oyjäyity anajty Jesús, miid co anajty ajcxy je judío ixpícytjic ajcxy tzachtzigiiygixy.

¹⁴E mijxiijoty Jesús nícxy jim ma Dios ytijc, chi jim ytigiyy yaj'ixpíjipi. ¹⁵Je judío y'ixpícytjic tzachmaañhuindíicxcixy anajty je Jesús, chachminaangixy anajty:

—¿Nej jada' tijy jada chach'ixpícyity? e ca' ni ma ti y'escuel'aty.

¹⁶Chi Jesús y'adzooy:

—Jada ixpíjcin ca' iich jada një'adyii. Yi' jada yje' je huídibi xyquejxich ya naaxhuiñ. ¹⁷E pen ji pinjaty cuydunaani yi' ytiy'ajt je huídibi xyquejxich, huinjihuñhuipyy yi' jada ixpíjcin, pen janch Dios yi' ytiy'ajt, o pen iich yi' ngi'm ayuc huídibi ngapxypích. ¹⁸Je jäy huídibi yci'm'ayuc yci'mdiy'ajt miid yaj'ixpícy, ci'm je' ñaygömaya'ñyii. Janch pinjaty tzojcp co ycomayiyb je' yhuindzin huídibi ti yquexyii, tiydudäy je', ca' je' y'aniijity.

¹⁹Janch co Moisés miich ajcxy xymoy Dios ytiy'ajt. E ni tüg miich ajcxy mgacuydungixy je tiy'ajt. ¿Ti ycxipi co miich ajcxy xyaj'öga'nich?

²⁰Chi je jäy ajcxy y'adzooy: —Mujcu' miich miid ma mjot mhuinma'n. ¿Pin miich yam xyaj'ögam?

²¹Chi je' ajcxy nimay: —Miid tügpajc mijhuinma'n tiibi nduñíich sábado xii, yi' miich ajcxy mij mdzachjihuiyy mdzachhuinmaayb. ²²Moisés miich ajcxy xyajnajtz'ane'miyy je cötujcin co ajcxy m'ung mdiy'ajttiiygixy (oy je' ca' yajtzondac, miich janchtiy ajcxy mmij'ap mmijteedy Abraham yajtzondac), e paady ycxipi miich ajcxy m'ung mdiy'ajttiiygixy oy yjapocxxiidumity. ²³E chi jada' ca'ydi miich ajcxy Moisés ytiy'ajt mnixiici myajxiici, paady ajcxy m'ung mdiy'ajttiiygixy oy sábado xiijoty. ¿Ti miich ajcxy co xymijotma'tcixich co tüg jäy ti nyajtzögyich sábado xiijoty? ²⁴Ca' m'ix'ijxcixy mba'ijxcixy mmigüg miid anii. Yajciyöyi yajtecyöyi miich ajcxy jäy ypocy miid tiy'ajt.

Ooy ajcxy tzachhuinmay je jāy,
peni Jesús je' je' anajty je Cristo

²⁵ Chi ajcxy nijējity Jerusalénjāy
yminañ:

—¿Nej ca' jada jada' yjējity je
huidibi ajcxy yjayaj'ögamyi?

²⁶ Oc'ix ajcxy, ta ycapxy ymiydägy
ijxna' que'xna', e ca' ajcxy huam
nimäy. ¿Nej ti jada ajcxy ijxcajpcixy
yajxon tungmiidpi ajcxy co
jada yjējity je Mesías? ²⁷ Hich ajt
nnejhuiiyim ma jada yēydijc chooñ.
Per je Cristo co anajty je' ymiñ, ni
pin je' canejhuñhuipy ma je' anajty
choñ ma ycogajpity.

²⁸ Co Jesús jadu'n midooy, co
anajty yaj'ixpicy ma Dios ytijc,
huin'it Jesús mic yminañ:

—Mnejhuiiyb miich ajcxy pin
hich, e ma ndzooñich. Per ca'p hich
ti nmiñich ya naaxhuñ miid hich
ngi'mdzojcin. Yi huidibi hich ti
xyquexyich, tiydudägy yi' ytuñ, e
ca' miich ajcxy yi' m'ixy'ájtigixy.

²⁹ Hich janchtiy n'ixy'ajtypich je'. Je'
co jim ndzooñich ma je', e je' hich
xyquejxich.

³⁰ Huin'it ajcxy jamadzaañ, per
ca' ni pin cinixajiy, com ca'ni
anajty paady je xii je tiempo mina
ñaygiyegiiyb ma ymidzip ajcxy.

³¹ Per mayjäy ooy mibijcy je Jesús
y'ayuc, e yminañ ajcxy:

—Co anajty je Cristo ymiñ, ca'
jada' nigí mįjhuinma'ñ tuna'ñ ca'ydi
jadayaabi yēydijc.

**Je teedy mįjtungmiidpi yquejx ajcxy
soldadotijc huen majtzcixy Jesús**

³² Co je fariseojāy ajcxy ayuc
midooy co jāy chachminaangixy
jadu'n co je Jesús je' je' je Cristo,

chi ajcxy quejxy tungmiidpi huen
Jesús yajmach. ³³ Paady Jesús
yminañ:

—Hich jac-huäcxijpich hueeni ma
miich ajcxy, chi nnicxa'ñich jadüg'oc
jiiby tzajpjoty ma huidibi xyquejxich.

³⁴ Xy'ixtähuibich miich ajcxy, e
ca' hich miich ajcxy xypaadipy. Ma
anajty hich nnicxyich, miich ajcxy ca'
jaydēbi jiiby mnicxcixy.

³⁵ Huin'it je judíojäy ixpicytjic
acjēyi ajcxy ñay'amidoohui:

—¿Ma jada jada' y'ocnicxa'ñ, e
nicxy hich ajt ngapaatim? ¿Nej
nicxiib jada' ma je judíojäy ajcxy
huidibi yajpaatcixy yxii yaa ma yi
griegojäy ajcxy, e yaj'ixpigaangixy
yi griegos ajcxyi? ³⁶ ¿Nej jada'
yajhuimbidzimy? co yminañ:
“Xy'ixtähuibich miich ajcxy, e
ca' xypaadibich, e ma anajty hich
nyajpaady, ca' miich ajcxy jaydēbi
jiiby mnicxcixy.”

**Je nii huidibi jugy'ajt yejcp
huidibi ca' ycixy ytigoy**

³⁷ Co je mįjxii ycodiicxni, chi
Jesús ytinay'ahuiy, chi mic yminañ:

—Pen ji pinjaty tiy'ajt nejhuihua'ñ
jadu'n nej ixypiy jāy ytīdziiyi
tzocy yi nii, huen xyñimiñich,
etz nmöhuibich tiy'ajt. ³⁸ Je
jäy ajcxy pinjaty xymibijcpich
xymijpidaacpich, ytunipy
ajcxy jadu'n nej Dios ñecy
ymina'ñ ma jadu'n yjaybetyity:
“Ycapxypidzimipy je' ajcxy Dios
ytiy'ajt, etz mayjäy jotcujc'ajtin
etz jugy'ajtin pada'ñ huinixii,
ytimyñipaatyp jadu'n nej nii
ypidzimy janch com ma tüg niigop.”

³⁹ Je' anajty jadu'n Jesús ytijyp
pinjaty je' anajty mibijcip, je' anajty

ajcxy adigihuaanip jottigihuaanip je Espiritu Santo. Ca' ni anajty je Espiritu ymini ma je discípulos ajcxy com ca'ni anajty Jesús yhuimbityni tzajpjtoty.

Jäy ajcxy ca' ñay'ayuc-huinjihuiiyi miid Jesús ycixpi

⁴⁰Je mayjäy ajcxy huidibi anajty ti midooy nej Jesús anajty ti ymina'n, nidüg nimetz ymina'n:

— Jadaabi je' je tiydudägypi jäy huidibi Dios y'ayuc najtzcapxiyip.

⁴¹Jaçjadyii ymina'n ajcxy:

—Je' yi' je Mesías.

Per nijëjity ajcxy huidibi ca' ymibjccixy chachminaangixy:

—Ca' jim Galilea naaxjot chona'n je Mesías. ⁴²Com jadu'n yjaybetyity ma Dios ñecy co je Mesías jim chona'n ma David y'ap y'oc, jim ma je cajp huidi xiijip Belén ma David ycocajpity.

⁴³Je mayjäy ca' anajty ajcxy ñay'ayuc-huinjihuiiyigixy miid Jesús ycixpi. ⁴⁴Nijëjity anajty ajcxy ytimymadzamy Jesús, per ca' ni pin ymajtzi.

Judío ixpicytijc ca' ajcxy mijpidacy Jesús

⁴⁵Chi ajcxy policías huidibi tumb ma tzajptijc nihuimbijty ajcxy je teedy mjtungmiidpi etz je fariseojäy ajcxy, chi ajcxy ñimaayi: — ¿Nej ajcxy co ca' ti mmajtzcixy je Jesús?

⁴⁶Chi ajcxy je' y'adzooy:

— Nicaminaaxii tüg yëydijc jadu'n ti ymiydägy jadu'n nej yijiibi yëydijc.

⁴⁷Chi je fariseojäy ajcxy ymina'n:

— ¿Nej nañ ti miich ajcxy myajhuin'ñinigixyi?

⁴⁸Ca' nminaanim ti ajcxy teedy mjtungmiidpi o fariseojäy ajcxy mibijccixy Jesús. ⁴⁹Je mayjäy huidibi mijpidaaci Jesús y'ayuc, ca' ajcxy y'ixpicyity ma Dios ycötujcin. Dios yi' ajcxy tzaachytuniib.

⁵⁰Nidügti ajcxy je' anajty je Nicodemo huidibi oga'n'aty ni'oy Jesús coodz, je' ymügügtijc jadu'n nimay:

⁵¹— Jadu'n iich ajt ngötujcin xy'ane'mim co ca' huaad ndzaachytuunim pinjäy, pen ca'p jayijp n'ixyöyım nbayöyım ti anajty ti tuñ.

⁵²Chi ajcxy ymügügtijc y'adzohuimbijty oyñinej:

—¿Nej miich nañ jadu'n galileojäyi? Ixta' yajxon ma Dios ñecy, com jiiby mnejhuihuipy co jim Galilea ca' jim chona'n pinjäy huidibi Dios y'ayucnajtzcapxiyip.

⁵³Chi ajcxy ñicxtay nidüg nidüg ma yjin ydijc.

8 Chi Jesús ypa'ttigiiy ma je cögop huidibi xiijip Olivos. ²Com jabom jopyni Jesús yquidacy jadüg'oc ma Dios ytijc. Chi mayjäy ñimiini. Chi y'ixtacy, e chi ytiigiyy yaj'ixpijcp. ³Je jäy ajcxy huidibi Dios ycötujcin yaj'ixpijcp etz je fariseojäy ajcxy miidmiin tüg töxyjäy ma Jesús huidibi anajty ti ytundigooy miid huingbi yëydijc. Chi ajcxy pidacy cujc'amy ma je mayjäy. ⁴Chi ajcxy nimay Jesús: —Huindzin, jadaaabi töxyjäy huingbi yëydijc miid ti ytundigoy. ⁵Moisés ytiy'ajt iich ajcxy xyñajtz'ane'miy jecy'ajty co

yajtzaagögädzipy jada jadu'mbi töxyjäy. ¿Nej miich m'ocminambi?

⁶Jadu'n ajcxy nimay co anajty ajcxy oc-huinma'n'ixa'n. Hue' anajty ajcxy ixtaayb nej jëbi huaad yajpocycäy Jesús. Chi Jesús yhuindacy, chi jada' ytigiiy jaaybi miid ycihuäx naaxcäxy. ⁷Com je' anajty ajcxy chachyaj'amidooyb, chi Jesús ytinayigy. Chi ajcxy nimay:

—Pin jäy ji ma miich ajcxy ca' ti pocy miidity, huen y!' jayjip tzaagäch jada töxyjäy.

⁸Chi Jesús yhuindacy jadüg'oc. Chi ytigiiy jaaybi jadüg'oc naaxcäxy. ⁹Co ajcxy jadu'n ayuc yajhuinjihuiydaayi, chi ajcxy ooy chöyduñ, com yjihuiy ajcxy ypocy. Chi ajcxy yjihüactay. Chi je mijjäydäjc ajcxy ñaybattzondayi. Jesús yhui'miiy nimetz miid je töxyjäy huidibi jim anajty tinaayb huingon. ¹⁰Chi Jesús yhuäccugiy jadüg'oc nimay je töxyjäy jada':

—¿Ma ajcxy je jäy? ¿Ca' ni pin ti ychaachytuñ miid mbocy ycixpi?

¹¹Chi je töxyjäy y'adzooy:

—Huindzin, ca' ni pin.

Chi Jesús yminañ:

—Ni iich miich ngatzaachytunipy miid mbocy ycixpi. Nicx, e ca' m'ocjacpocytuunip.

**Jesús jadu'n nipaady nej
tüg jiin huidibi tiicxi**

¹²Chi jadüg'oc Jesús yjactigiy miydacp yminañ:

—Hich je tiy'ajt nmiid ya ma naaxhuiniyjäy, jadu'n iich nipaady nej tüg jiin huidibi tiicxp ma jäy ajcxy. Pinjäy xymijpidaacpich ymiid tiy'ajt nej jëbi huaad tudägy

chinähuipy, jadu'n nipaady nej jihuiy ytüyöy ma jiin ytiicxin.

¹³Chi je fariseojäy ajcxy nimay Jesús:

—Miich cä'm nayñidiy'ajtip co miich je' je Cristo, e ca' mdiy'ajt chobaady.

¹⁴Chi Jesús y'adzooy:

—Janch co iich cä'm

nayñidiy'ajt'adyiijich co iich je' je Cristo. E iich ndiy'ajt janch y'!. Com nnejhuuiybich ma ti ndzooñich, e ma nnicxa'n'ich. E miich ajcxy ca' mnejhuuiygixy ma ndzooñich, e ma nnicxa'n'ich. ¹⁵Miich ajcxy mmigüg mbocy'ijxyp miid ngi'mhuinma'n. Ca' ni pin nbocy'ixyich miid ngi'mhuinma'n'ich.

¹⁶Pen iich anajty nyajcäyöybich nyajtecyöybich jäy ypocy, tiydudägy anajty jadu'n nduñich. Com iich ca' nyajpaadyich naydüg. Je' xymiid'ijtpich je Dios Teedy huidibi ti xyquexyich. ¹⁷Com cojaay jadu'n y'ity ma miich ajcxy mgötujcin ñecy: “Pen nimetz jäy nigodiy'ajt'aty huentiijity, tzoobatp ajcxy y'ayuc.” ¹⁸Hich cä'm ñayñidiy'ajt'adyiijich co ndzooñich tzajpjoty, etz nDeedyich nañ jadu'n xyñidiy'ajt'ajtpich, co je' ya ti xyquexyich.

¹⁹Chi ajcxy y'amidooy:

—¿Ma miich mdeedy yajpaady?

Chi Jesús y'adzooy:

—Com co ca' iich miich ajcxy xy'ijxcapy co iich je' je Cristo, nañ ca' ajcxy m'ixy'adyii iich nDeedy. Co ixypy ajcxy xy'ijxcapyich, nañ jaydëbi ixypy ajcxy nejhuüy pin iich nDeedy'ajtyp.

²⁰Jim jadu'n Jesús ycapxy miydacy ma je meen'ijttac, co

anajty yjáy yaj'ixpícy ma Dios ytiyc.
E ca' ni pin ymajtzi. Com ca'ni
anajty yxii yhora anajty paadyñi
mina ñaygiyegiiyb ma ymidzip.

**Jesús ñimay ymígügtijc co ca'
huaad ñicxy ma je' anajty ñicxy**

²¹Chi Jesús yjacnímaayi ajcxy:

—Hich nnicxaanip iich, miich
ajcxy xy'ixtáhuibich. Miid ajcxy
mbocy ycixpi m'ogaangixy, com ma
nnicxa'ñich ca' huaad miich ajcxy
jëbi mnicxcixy miid mbocy ycixpi.

²²Huin'it je judíoJay ajcxy ac jëyi
ñayñimaayi:

—¿Nej nicxy jada' ci'm
ñayyaj'oga'ñiyiiji? Com jadu'n
ymina'ñ co ma y' ñicxy, ca' huaad
iich ajt jëbi mnicxim.

²³E Jesús ñigi ñimay'idíich anajty:

—Miich ajcxy ya naaxhuiñ
mmiidity mdiy'ajtcop. Hich tzajpjoty
mmiididyich ndiy'ajtcopich.

Miich ajcxy naaxhuiñyJay ajcxy
ytiy'ajt mmijpidaacipy. Hich ca'
nmijpidägyich naaxhuiñyJay
ytiy'ajt. ²⁴Hich miich ajcxy
jadu'n nnimaayb co m'ogam
miich ajcxy, e ca' ajcxy Dios
mbocy xyhuinmeecxip. Copicy
ajcxy m'ögipy, e ca' Dios mbocy
ajcxy xyhuinmeecxip, pen
ca' xymibigáangixyich co iich
je' je huídibi jëbi mbocy ajcxy
xyhuinmeecxip.

²⁵Chi ajcxy ñimay Jesús:

—¿E miich, pin miich?

Chi Jesús y'adzooy:

—Ti ajcxy nyajnímaaygixy
pin iich, co oga'n ndigiiyich
jáy yaj'ixpícpí. Cham jadüg'oc
nyajnímaaygixy. ²⁶May ooy tijaty
ayuc nyajnímahuaangixy nej ti

mundigooygixy ma Dios ytiy'ajt.
Cham ca' ajcxy nyajnímaydáhuipy.
Je huídibi ti xyquexyich ya
naaxhuiñ je' tüg'óciy tiy'ajt miid. E
ngapxpídzimych je ayuc je tiy'ajt
jëyi huídibi ti nmidooyich ma je'.

²⁷Je jáy ca' ajcxy huinjihuicy co
Dios Teedy anajty Jesús ñigapxyp.

²⁸Paady Jesús ñimay ajcxy:

—Co anajty miich ajcxy ti
xyajcruudzpetyich, iich je jáy
huídibi tzoon tzajpjoty, huin'it
miich ajcxy mnejhuíhuip co
iich je' je Cristo. E co iich ca'
ngi'mhuinma'ñ nduñich. Yi' iich ya
nmíydacypich huídibi Dios Teedy
ti xyaj'ane'myich. ²⁹Je Dios Teedy
huídibi ti xyquexyich, y' iich miid
n'ityich. Ca' iich y' xy'ixmachich.
Com co iich njatytimyutybich
jabom jabom huídibi y' chojcyp.

³⁰Co Jesús jadu'n yminañ, chi
mayjáy ooy ymibijcy.

**Jáy huídibi mibijcp Jesús
ycuychinaayipy y' ytiy'ajt**

³¹Chi Jesús ñimay je judíoJay
ajcxy huídijaty anajty ti ymibicy:

—Pen mmibijc ajcxy cixyot
huinijot tüg'óciy iich n'ayuc, e
ca' m'ijxmadzipy ajcxy iich
n'ayuc, huin'it iich miich ajcxy
jëbi njäy'adyii. ³²Huin'it jëbi ajcxy
mnejhuíhuipy Dios ytiy'ajt. E. Dios
ytiy'ajt xyñihuáangixip ma je
mjibic-huinma'ñ ooy xy'ané'mgixy.

³³Chi ajcxy y'adzooy:

—Abraham iich ajcxy nmij'ap
nmijteedy'ajtpy. Ca' iich ajcxy
huaad ni pinjáy xyjac'ane'my. ¿Nej
co miich jadu'n mina'ñ: “Dios ajcxy
xyñihua'ñip ma y' mjibic-huinma'ñ
xy'ane'mgixy”?

³⁴Chi Jesús y'adzooy:

—Janch janch iich miich ajcxy jadu'n nimaaygixy co tügl'óciy pinjaty pocy ytundiib, jibicp yi' ane'mip. Tim jadu'n nipaady nej tüg tumbi huidi codoogï y ijtp, yi' yhuindzin jatytimy'ane'mip. ³⁵Yi tumbi huidibi codoogï ijtp, ca' yhui'ma'ñ ma je jäy ytijc huinixii. Yi jäy y'ung janchtiy hui'mam huinixii ma yteedy ytijc. ³⁶Pen Dios y'ung miich ajcxy xyajpidzimgixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ane'mgixnipy. Tim jadu'n nej Dios y'ung y'ity, ca' ti jibicpi y'ane'myii. ³⁷Nejhuiybiich co miich ajcxy Abraham mmij'ap'adyii mmijteedy'adyii. Per miich ajcxy chachyaj'ögaambich. Je' co ca' mijpidaaccixy iich n'ayuc huidibi njayajnimaaaygixyp. ³⁸Iich miich ajcxy nyajmiidmiydaacyp tiibi n'ixyich huidibi ndeedyich ytumyb. E miich ajcxy yi' mdumyb nej m'ap mdeedy ti xyajnimaaaygixy.

³⁹Chi ajcxy y'adzooy:

— Hue' iich ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

— Pen janch ajcxy Abraham mmij'ap'adyii mmijteedy'adyii, yi' ixypy ajcxy mdungixyp jadu'n nej Abraham tuñ. ⁴⁰Janch iich miich ajcxy xychachyaj'ögáangixyich, e ti ajcxy njayajnimäy je huidibi iich ti nmidooyich ma Dios. Ca' Abraham yaj'ögy je jäy ajcxy huidijaty anajty Dios ytiy'ajt miid, jadu'n nej miich ajcxy m'iditzaangixy. ⁴¹Miich ajcxy jibic-huinma'ñ mdungixyp, tim jadu'n nej m'ap mdeedy jibic huinma'ñ ajcxy tuñ jecy'ajty.

Chi ajcxy Jesús adzooy:

—Ca'iich ajcxy ndigoy'ungity. Je' tügpajc iich ajcxy ndeedy'ajtyp Dios Teedy.

⁴²Chi Jesús yminañ:

—Peni Dios ixypy ajcxy mdeedy'ajtyp, xychojcpich xymijpidaacpich ixypy ajcxy. Com Dios ti xyquexyich ya naaxhuiñ, e jiihy ndzooñich ma Dios. Ca'iich ngi'mdzojcïn ycixpi nmiinich ya naaxhuiñ. Yi' je' jadu'n tzojcp pin ti xyquexyich. ⁴³¿Ti co ca' miich ajcxy mhuijnihuïy iich n'ayuc? Je' co ca' ajcxy midohuaangixy iich n'ayuc. ⁴⁴Je' miich ajcxy mdeedy'ajtyp je mujcu'. Miid ngi'mdzojcïn mguydungixy je mujcu' chójcïn. Je mujcu'yaj'öctiïyb yi' jäy maabi naaxhuiñybi chondägy. Je mujcu' ca' je' ixaani Dios ytiy'ajt. Ca' ni ti tiy'ajt yajpaady ma je', com je mujcu' indaac je', chi ci'm ooy nijot y'idich. Je' ooy indacy, e je' oga'n anii yajtzondac. ⁴⁵Com miich ajcxy mujcu' yhuinma'ñ miid, paady miich ajcxy ca' xymibijci xymijpidaaci n'ayucich co iich tiy'ajt njamiydägy. ⁴⁶Ni pin miich ajcxy xcayajpocycähuipy. Peni tiy'ajt iich miich ajcxy nyajnimaaayb, ¿ti co ca' mmijpidaaccixy iich n'ayuc? ⁴⁷Je jäy ajcxy huidibi yajpatp ma Dios, y'amido'ijtyp ajcxy Dios y'ayuc. Paady miich ajcxy ca' m'amido'ijtcixy Dios y'ayuc, com ca' ajcxy Dios mDeedy'ajtigixy.

**Jesús jiiyim anajty yjugy'aty
ca'ydï Abraham**

⁴⁸Chi je judío ixpicytjic ajcxy y'adzooy:

— Ti iich ajcxy yajxon nmina'ñ co miich mgogajpity jim Samaria,

e mujcu' miich miid ma mjot mhuinma'ñ.

⁴⁹Chi Jesús y'adzooy:

— Ca' iich mujcu' nmiidity ma njot mhuinma'ñ, com nyajmij'ajtypich nDeedy, e miich ajcxy xy'ixtijpich. ⁵⁰Iich ca' ci'm naygömayijich. Dios Teedy iich xycömaayb, com yi' je' huidibi ixjöyp payöyp jäy ajcxy ypocy.

⁵¹Janch janch iich miich ajcxy nimaaygixy co ji nijjity jäy huidibi iich n'ayuc cuydumb, e ca' y' ajcxy yjugy'ajtin ycixipy ytigoyipy tücci'yi co y'ó'ccixipy.

⁵²Chi je judío ixpicytije ajcxy y'adzooy:

— Cham iich ajcxy janchtiy ti nnejhuüyich tiydudägy co miich mujcu' miidity ma mjot mhuinma'ñ. Abraham o'c je', nañ jadu'n o'c ajcxy je huidibi anajty Dios ytiy'ajt capxhuäcxip, e miich mmina'ñ co pen ji pinjaty miich m'ayuc xymibijcip xymijpidaacip, ca' je' y'ögipy. ⁵³¿Nej mjacmiid miich mic'ajt, ca'ydi Abraham, iich ajt nmij'ap nmijteedy huidibi o'ci? ¿Nej mjacmiid miich mic'ajt, ca'ydi ajcxy huidibi Dios y'ayucnajtcapxiy, huidibi ajcxy o'ci? ¿Pin miich mdiimnaydijyii?

⁵⁴Chi Jesús y'adzooy:

— Pen iich nnaygömayibich ci'm, ca' n'ayucich chobaadipy. Iich nDeedy yi' xycömayipich, je huidibi miich ajcxy mdiipy co ajcxy mDios'adyii. ⁵⁵Per miich ajcxy ca' Dios m'ixy'adyii. Iich janchtiy n'ixy'ajtypich Dios. E co ixypy nmina'ñich co ca' iich Dios n'ixy'adyii, indaacpich ixypy, jadu'n nej miich ajcxy

m'indaaccixy. Janch iich n'ixyich Dios, e nguydumybich yi' y'ayuc.

⁵⁶Je Abraham, miich ajcxy mmij'ap mmijteedy, jotcuyc ooy ñayjihuiyi co anajty ixa'ñ iich nxii ndiempo ya naaxhuiñ. E co ijxy co iich nmiinich, chi ooy yjotcugiiy.

⁵⁷Chi je judío ixpicytije ajcxy nimay Jesús:

— Ni mgamiidity huixchigui'px majc jimijt, e ¿mmina'ñ co m'ijxy Abraham? (Ca' m'ixy'ajti je Abraham, naxy tüg mil jimijt maabi je' y'o'cni.)

⁵⁸Chi Jesús y'adzooy:

— Janch janch iich miich ajcxy jadu'n nimäy co ji anajty iich co ca'ni anajty Abraham yma'xung'aty.

⁵⁹Chi ajcxy tzaa conigy tzaagädza'ñ anajty ajcxy. Chi Jesús yhuingoyüch, e ypidzimy ma Dios ytije.

Jesús yajtzooc tüg huintzpi

9 Hue' anajty Jesús huidijtp co ijxy tüg huintz, jadu'n anajty huiintz ti yma'xung'aty. ²Chi ydiscípulos ajcxy y'amidoohui:

— Huindzin, ¿pin pocy ytuun, jada huintzpi o ytaj yteedy, co huintz yma'xung'aty?

³Chi Jesús y'adzooy:

— Ca' yi' ypocytuun, ni ytaj yteedy, hue' janchtiy paady ycixp jadu'n yjajty, jigix Dios ymic'ajt ñiguëxigity ma yi'. ⁴Copicy njactúunibich yi' ytung huidibi ti xyquexyich ya naaxhuiñ. Miinip je xii tiempo ma ca' pin Dios y'ayuc tunaani. Jadu'n nej jihuiy ixypy je xiimbi ti ñaxy etz je coodzpí ti ymiin. ⁵Jadu'n nej n'ityich ya naaxhuiñ nmiidich Dios ytiy'ajt,

jadu'n iich nipaady nej tüg jiin
huidibi codiicxp yi naaxhuiñyäj.

⁶Co Jesús jadu'n yminanday, chi
nidzujiiy naax, chi mo'ntz yaj'oyiiy
miid chujnii, chi jada' yajjaaxi je
jäy yhuuin miid je mo'ntz. ⁷Chi
nimay jada':

—Nixc quejtzpuj yi mo'ntz jim
ma yi Siloé nii y'abojtzigity —je
ayuc Siloé jadu'n yhuimbizimy:
quexyöybi.

Chi je jäy huintzpi ñicxy jim, chi
oy quejtz puju je mo'ntz, chi oy
huimbity ti anajty yhuindicxigy.

⁸Je ymijiin ymidijc ajcxy etz
tüg'óciy huidijaty anajty ajcxy ti
ixy je huintzpi co jabom jabom
iñäy limosna yajmucy, chi ajcxy
ñay'amidoohui miñ xyipy:

—¿Nej ca' jada yjējity je huintzpi
huidibi anajty jabom jabom
limosna yajmujcpi?

⁹Nijējity ajcxy yminañ:

—Je' yi'.

E jacjadyii ajcxy yminañ:

—Huingbi yi', nigoob jadu'n
yquëxigy nej je'.

E je' yminañ ci'm:

—Iich jëdu'n huidibi anajty huintz.

¹⁰Jadu'n anajty ajcxy
tzech'amidooy:

—¿Nej yi mhuuin ti ñay'ahuäcxyii?

¹¹E je' anajty y'adzooy:

—Yi yëydijc huidibi ajcxy
ytijyp Jesús, yi' mo'ntz yaj'oyiiy
xyajjaaxich nhuiin, e chi
xyñimaayich: “Nixc quejtzpuj
ma yi Siloé nii.” Chi nnicxyich,
e oy nguejtzpujyich, e chi
nhuindicxi'cyich.

¹²Chi ajcxy je' nimay:

—¿Ma je' je yëydijc?

Chi je huintzpi y'adzooy:

—Ca' nnejhuiyich.

**Fariseojäy tiy'ajt pijcy nej je
huintzpi anajty ti chögy**

¹³Chi ajcxy yajnicxy ma fariseojäy
ajcxy yhuinduu, je huidibi anajty
huintz yajpatp. ¹⁴Hue' anajty tüg
sábado xii (judíojäy ajcxy amayxii)
co Jesús mo'ntz yaj'oyiiy, e
yajhuindicxigy je huintzpi. ¹⁵Chi je
fariseojäy ajcxy jadüg'oc yajtiy nej
anajty je jäy ti yhuindicxigy. Chi je
jäy y'adzooy:

—Mo'ntz ti pidägy ma iich nhuiin,
chi iich ti nguejtzpuju, e cham
n'ijxnibich.

¹⁶Nijējity fariseojäy ajcxy yminañ:

—Yi yëydijc huidibi jada jadu'n
ti tuñ, ca' yi' Dios ytiy'ajt miidity,
com ca' yi' amay'aty sábado xii.

Chi ajcxy jacjadyii y'adzooy:

—¿Nej tijy jada mijhuinma'n
octuñ, pen hue' yi' pocyjäy?

Ca' ajcxy nay'ayuc-
hujñijhuíyigixy. ¹⁷Chi ajcxy
jadüg'oc nimay je jäy huidibi anajty
ti y'ijxigy:

—E miich, ¿nej m'ocminambi?
¿Pin jäy yi tiibi xyajhuindicxigy?

Chi je jäy y'adzooy:

—Tüg jäy huidibi Dios y'ayuc etz
ymic'ajt miid.

¹⁸Chi je judío ixpietyijc ajcxy
ca' anajty tim mibigaangixy co je
yëydijc anajty huintz yajpaady, e co
anajty ti yhuindicxigy, ixti cooni
ajcxy ytaj yteedy mijhuoohui. ¹⁹Chi
ajcxy amidoohui ytaj yteedy:

—¿Nej je' jada miich ajcxy m'ung
huidibi huintz ma'xung'ajti? ¿Nej
jada ti yhuindicxigy?

²⁰Chi je' ytaj yteedy ajcxy
y'adzooy:

—Hich ajcxy nnejhuiyb co hich ajcxy yi' n'ung, e co yma'xung'ajty huiintz. ²¹Per jadu'n nej cham ti yhuindicxgy, e pin yi' yhuin ti yajhuäcxyii, ca' hich ajcxy yi' nnejhuiygixy. Amidoo miich ajcxy yi' ci'm. Mij'anäciñ yi', ñigapxipy yi' ci'm.

²²Jadu'n ajcxy ytaj yteedy y'adzooy, miid co ajcxy tzachtzigiiygixy je judío ixpicytije ajcxy. Com je judío ixpicytije ajcxy ti anajty ñaygäpxigixy co anajty yajpidzimaangixy ma ajcxy ñaymujctac je jäy ajcxy pinjaty anajty mibijcp co Jesús anajty yjējity je Cristo. ²³Paady ajcxy ytaj yteedy yminañ:

—Mij'anäciñ yi', amidoogix miich ajcxy yi' ci'm.

²⁴Chi ajcxy y'amidooy mimejtz'oc je yēdyjc huidibi anajty ti y'ijxgy, e chi ajcxy nimay:

—Cömay capxpat yi Dios co ti mdzögy. Ca' mgömay mgapxpaady je Jesús. Com hich ajcxy nejhuiyb co yi Jesús, tüg yi' pocytumbi. Ca' yi' Dios y'ayuc ytiy'ajt miidity.

²⁵Chi je jäy y'adzooy:

—Pen tüg pocytumbi yi Jesús, ca' nejhuiyich. Huidibi janchtiy nnejhuiybich, co anajty hich nhuintzity etz co cham huindicxnibich.

²⁶Chi ajcxy y'amidooy jadüg'oc: —¿Nej ti xytuñ? ¿Ti ti tuñ co ti xyaj'ijxici yi mhuin?

²⁷Chi je' y'adzooy:

—Ti ajcxy nyajnimaaygixy, e ca' ajcxy ti m'amido'idaangixy. ¿Nej nañ ixpigaangixy miich ajcxy ma yi'ji?

²⁸Chi ajcxy je' ogy, nimay ajcxy jadu'n:

—Miich ixpijc ma yi', hich ajcxy n'ixpijcpich ma Moisés ytiy'ajt.

²⁹Hich ajcxy nejhuiyb co Dios Moisés migapxy. Janch yi Jesús ca' hich ajcxy nnejhuiygixy ma yi' chooñ (ma mic'ajt ti paady).

³⁰Chi je jäy y'adzooy:

—Ooy yi' y'oychigiñity y'oyhuinmañity co miich ajcxy ca' mnejhuiygixy ma yi' chooñ (ma mic'ajt ti paady), e ti hich yi' xyajhuindicxgyich. ³¹Yajxon yajnejhuüy co Dios ca' yi' midoohui pocyjädyjc y'ayuc. Pen oy jäy hich ajt, e nguyduunim Dios ytiy'ajt, huin'it ajt Dios n'ayuc xymidoohuim. ³²Ni caminaaxii ycaayamidoy, co pinjäy tüg huintzpi ti yaj'ijxgy huidibi jadu'n ti yma'xung'aty huintz. ³³Co ixypy je Jesús ca' jilby chooñ ma Dios, ca' ixypy jaty nej ti tunipy.

³⁴Huin'it ajcxy y'adzooy:

—Miich jadu'n ti mma'xung'aty pocymiid. Ca' miich huaad ti xyaj'ixpijccixyich.

E chi ajcxy yajpidzimy tibäy'tücci'yi (ma ajcxy ñaymujctac etz ma Dios ytiyc).

Je jäy ajcxy huidibi ca' cöbijccixy Dios ytiy'ajt jadu'n nipaady ajcxy nej jihuüy huintzity

³⁵Chi Jesús nejhuiy jadu'n co anajty ti yajpidzimy tiba'y tücci'yi ma Dios ytiyc. Co minaaybaati chi nimay:

—¿Nej mmibijcyp mijpidaacyp miich je jäy huidibi tzoon tzajpoty?

³⁶Chi je' y'adzooy:

—Huindzin, nimaaygich pin je', jigix nmibicyich.

³⁷Chi Jesús je' y'adzooy:

—M'ijxyp y'i'du'n yam. Yi je' je huidibi xymiidmiydacp.

³⁸Chi jada' huingoxtinay'ahuüy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹Chi jada' Jesús yminañ:

—İich ti nmiñ ya naaxhuñ co n'ixyöyaanich nbayöyaanich jäy ypocy, jigix nyajpocycähuibich pin ca' ypocymiidity, etz nyajpocyni'huädzibich pin ypocy miid. Jadu'n nej jihuüy nyajhuindzäyich je jäy huidibi ijxp, etz jadu'n nej jihuüy nyajhuindicxigiyich yi huintzpi.

⁴⁰Chi nijëjity fariseojäy huidibi anajty jim ma Jesús ymijc jadu'n midoy nej Jesús yminañ, chi ajcxy nimay Jesús:

—¿Nej nañ jadu'n miich mdijy iich ajcxy ca' Dios ytiy'ajt nejhuiiyich, jadu'n nej jihuüy iich ajcxy nhuintzity?

⁴¹Chi Jesús y'adzooy:

—Co ixypiy miich ajcxy janch janch ca' mnejhuüyigixy Dios ytiy'ajt, ca' ixypiy ti pocy ajcxy mmiidity. Per miich ajcxy minam co Dios ytiy'ajt mguyduuniy, e ca' yjanchity. Paady ajcxy mbocymiidity. Nipaaty jadu'n nej jihuüy miich ajcxy mhuintzity, e mminaangixy co m'ijxcixy.

Jesús yaj'ixpijc jihuimbit ayuc

10 Chi Jesús jacnimay je judío y'ixpicytjic, je fariseojäy ajcxy:

—Janch janch iich miich ajcxy yam jadu'n nimaaygixy co je jäy

ajcxy huidibi ca' ytigihuaangixy ma borregi agaj aguu (ma je cuend'ajtpi ycuend'aty), huidibi huingduum ameech tzach tigihuaam ma yborregi agaj, je' je' je meetzpi huidibi meedzam je borregi ajcxy ameech. ²Je jäy huidibi tigihuaam ma yborregi agaj aguu, je' je' je borregi cuend'ajtpi. ³Co je borregi cuend'ajtpi ymiñ ma agaj aguu, chi je agaj aguu cuend'ajtpi yaj'ahuäch je agaj aguu. Chi yborregi ajcxy yöcmidoyii, chi je' migapxy xiibety xiibety, chi yajpidzimy ajcxy. ⁴Co ajcxy yajpidzimdäy, ac je' yje', chi jayjip ñicxy, e axam ajcxy ypanicxyii, com je' co yöcmidoyii. ⁵Ca' je borregi ajcxy jëbi panicxy tüg huingjäy. Nigi ajcxy cöguëgy, com yöcmidooyb ajcxy co yhuingjäyity.

⁶Jadu'n Jesús mayjäy yaj'ixpijcy jihuimbit'amy, jaygue' ajcxy ca' huaad huinjihuüy nej anajty Jesús yjaminänañ.

Jesús je oybi cuend'ajtpi

⁷Chi ajcxy Jesús jadüg'oc ñimaayi:

— Janch janch iich miich ajcxy yam jadu'n nimaaygixy, co je Dios nDeedy'ajtypich. Jëbi jäy ajcxy paady Dios ytiy'ajt ma iich, e huin'it ytigiyigixipy ma Dios y'it. Jadu'n nipaady nej jihuüy iich je agaj aguu ma borregi ajcxy ytigiyigixy. ⁸Tüg'óciy je huindzindijc huidibi ajcxy miin jayjip ca'ni iich anajty nmiñich, e yminaangixy anajty co ajcxy miid'ajti Dios ytiy'ajt, jadu'n je' anajty ajcxy nej meetzpi huidibi meedzaanip Dios yjäy. Per je Dios yjäy ca'p je' ajcxy tuuñ

cuendi, jadu'n nej je borregi ca' yöcmidoogixy je meetzpi. ⁹Jadu'n nej je borregi ajcxy ytiigiigixy ma agaj aguu, nañ tim jadu'n jäy ajcxy paady Dios ytiy'ajt ma iich. Je jäy ajcxy huidibi ypaatyp Dios ytiy'ajt ma iich, nañ ypadaamy jugy'ajtin huidibi ca' ycixipy ytiyoyipy tücci'yi. E huidibi je' ajcxy yajmayajtyp ma yi chinaayin, nmöhuibyich. Tim jadu'n nej borregi ajcxy jabom jabom ypidzimgixy ma agaj aguu nicxcixy miy'ojcpi, etz yhuimbijtcixy tzuu tzuu.

¹⁰Yi meetzpi ajcxy mimb co ymeedzaangixy yaj'ögaangixy yajhuindigoyaangixy. Iich ti nmiñich, jigix miich ajcxy mbáatcixipy jugy'ajtin mijcajee huidibi ca' tücci'yi ycixipy ytiyoyipy.

¹¹Chi Jesús yjacminañ: —Iich jadu'n nipaady nej tüg borregi cuend'ajtpi oybi. Je oybi borregi cuend'ajtpi ycäyeycyp yi' yjugy'ajt ma yi o'cin miid yborregi ycixpi. ¹²Je borregi cuend'ajtpi huidibi mujuy tumb, huidibi ca' yci'mborregi cuend'aty, ni ycajējity je borregi yhuindzin, co ixxy caa ymiñ, chi cöguēy je borregi, e yajqueec-huäcxtäy. ¹³Com je' co mujuy ytuñ, paady cöguēy je borregi ajcxy, ca' tzocy jihuüy borregi.

¹⁴Tim jadu'n nej je oybi borregi cuend'ajtpi ijxajptäy je' yborregi, nañ tim jadu'n iich n'ijxajptäy je njäyich (huidibi xymijpidaacpich), etz je' ajcxy xy'ixy'ajtpich. ¹⁵Tim jadu'n nej Dios Teedy xy'ixy'adyiijich, nañ

tim jadu'n n'ixy'adyiijich Dios Teedy. Tim jadu'n je' nej je oybi borregi cuend'ajtpi ycäyegamy yjugy'ajtin miid yborregi ycixpi. Nañ tim jadu'n iich ngäyegamyich njugy'ajtin miid iich njäy ajcxy ycixpi. ¹⁶Nmiidich jadügpiy jäy, ca' ajcxy yjudiojäyity, je' ajcxy nañ jadu'n nmiid'idaamyich tügmucy (miid je judío jäy ajcxy huidibi xymijpidaacpich). Tim jadu'n nej je cuend'ajtpi ymiid'ajtyp je' yborregi ajcxy tügmucy. E je' ajcxy y'amido'idaamy iich n'ayuc, tim jadu'n nej borregi ajcxy yöcmidoogixy yhuindzin. Ji y'idipy tügmucy jäy (huidibi xymijpidägibich), etz tüg cuend'ajtpi (iich jëdu'n).

¹⁷Chi Jesús yjacminañ: —Paady ycixp Dios Teedy ooy xychocyich xyjihuiyich, co ngäyegaamyich njugy'ajtin ma yi ó'cin (miid jäy ajcxy ypocy ycixpi), etz njugypigipyich jadüg'oc. ¹⁸Ca' ni pin xypijcibich yi' njugy'ajtin, iich yi' ci'm ngäyegamy. Nmiidich mic'ajt nej ngäyegipyich njugy'ajtin, etz nañ nmiidich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ögibich, njugypigipyich jadüg'oc.

¹⁹Chi jadüg'oc ajcxy ca' nay'ayuc-huinjihuiyi je judíojäy ajcxy miid Jesús y'ayuc ycixpi. ²⁰Mayjäy yminañ:

—Ca'oybi yi' ymiid, locjiyib yi', ¿nej co ajt n'amido'ijtim y'ayuc?

²¹E jacjadyii ajcxy yminaangixy: —Jadayaabi tiy'ajt etz mic'ajt ca' yajpaady ma tüg jäy huidibi mujcu' ymiid. Ca' jëbi tüg mujcu' jäy huintzpi yaj'ixigy.

May judíojäy ajcxy ca' cöbïjcy Jesús

²²Jim Jerusalén anajty xii yjadyii, je' anajty ajcxy ñixiïdumyb jimïjt Dios ytïjc. ²³E hue' anajty tiich tiempo. Chi jim anajty Jesús yhuidity ma Dios ytïjc, ma je Salomón ytïjc-huinduu. ²⁴Chi ajcxy je judío y'ixpicytïjc nimujcy ooy Jesús, nimay ajcxy:

—¿Ixti mïnaani miich iïch ajcxy tiydudägy xyajhuinjihuïhuángixyich pen miich je' je Cristo?

Yajhuinjihuïïygich ajcxy tiydudägy.

²⁵Chi Jesús y'adzooy:

—Ti ajcxy nyajnimaaygixy, e ca' miich ajcxy ti nmïbïjccixy. Je mijhuinma'ñ huïdibi ndumybich nmïdïch nDeedy ymic'ajt, yï' je' nidïy'ajt'ajtp co iïch je' je Cristo. ²⁶Paady ycixp miich ajcxy ca' mmïbïjccixy, com ca' miich ajcxy njäy'adyiïjich. ²⁷ïch njäy ajcxy ymïjpïdaacyp iïch n'ayuc, e n'ïjxcajpich ajcxy je', e je' ajcxy xypanïcpxich. Tim jadu'n nej je borregi ajcxy yöcmïdoy je yhuindzin, jadu'n nej je huindzin ïjxcapy je' yborregi, e jadu'n nej yï yborregi ypanïcxyii. ²⁸ïch njäy ajcxy nmooybich yï jugy'ajtin huïdibi ca' tücci'yï ycixa'ñ ytïgoya'ñ. Ca' je' ajcxy yjugy'ajtin ytïgoyïpy ni camina, e ni pin ca' huaad je' ajcxy xpyïjcich. Je' ajcxy ci'am nmïdïdyich. ²⁹Yï Dios Teedy huïdibi iïch njäy ti xymöy, tügpajc yï' ymïjity, e ni pin huaad ni ti capïjciy huïdibi Dios Teedy ymiïd ci'am. ³⁰Dios Teedy etz iïch tú'ciy iïch ajcxy.

³¹Chi je judíojäy ajcxy jadüg'oc tzaa conïg cädzaangixy anajty ajcxy.

³²Chi Jesús je' ajcxy nimay:

—Ti iïch ooy mij oybi nduñich ma miich mhuinduu miïd je nDeedyich ymic'ajt ycixpi. ¿Huïdi ycixpi miich ajcxy xychaagädzaangixyich?

³³Chi je judío ïxpicytïjc ajcxy y'adzooy:

—Ca' nmïnaanim paady iïch ajcxy miich ndzaagädzaangixy miïd je oybi tiïbi mduñ, hue' janchtiy ycixpi ndzaagädzaangixy miïd co ooy Dios myajjotmädy. Com miich nañ jäy, e mnayyajnaxyii Dios.

³⁴Huïn'it Jesús je' ajcxy nimay:

—Jadu'n ycojaayity ma yï judíojäy ajcxy ytïy'ajtnecy, ma Dios jadu'n ymïna'ñ: “Jadu'n nej dios miich ajcxy.” ³⁵Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy huïdibi Dios y'ayuc cöbïjcip (e ca' huaad pinjäy ymïna'ñ co Dios ñecy ca' yjanchity). ³⁶Dios ti xyajni'bicyich jada tung, e xyquejxyich ya naaxhuïñ. ¿Nej co mmïnaangixy co iïch ngapxtigooyich co nmïna'ñich co Dios xy'ung'adyiïjich? ³⁷Pen ca' nduñich nDeedyich ytung, ca' iïch ajcxy huaad n'ayuc xymïbïjcich. ³⁸E pen ndumybich nDeedyich ytung, oy ïxyipy miich ajcxy ca' xymïjpïdaacich n'ayuc, jëbi ïxyipy mïjpïdägy ajcxy je mijhuinma'ñ huïdibi ndumybich. E chi mnejhuïhuïpy miich ajcxy, etz mmïjpïdägïpy miich ajcxy co je Dios Teedy yajpaady ma iïch, e iïch nyajpaadyich ma Dios Teedy.

³⁹Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰Chi Jesús ñïcxy jadüg'oc jim Jordán mij nii nïnaxy ma Juan yjäy yajniïbejty oga'n'aty, chi jim

yhui'miïy. ⁴¹Mayjäy Jesús ooy ñimujci, e yminañ ajcxy:

—Je Juan el Bautista ca' jadu'n ooy mïjhuinma'ñ tuuñ, per tüg'lociy yi tiy'ajt jadu'n nej nimiydactay jada Jesús, janch tiy'ajt je'.

⁴²E janch mayjäy ooy mibijcy Jesús jim ma je jimbi it.

Co Lázaro y'o'cy

11 Jim Betania anajty tüg pa'mjäy, hue' anajty yxii Lázaro. Hue' je' anajty chinäy ma María etz Marta ycogajpity. ²María je' anajty huidibi je Huindzin Jesús anajty ti yajjaxy je ujtzpïjyñii huidibi ooy oy yxuugy, etz po'ti Jesús ytecy miid ycöhuay. Hue' je' anajty María etz Marta ymidügquëx Lázaro huidibi anajty pijcip. ³Chi Lázaro ymidügquëx ajcxy ycapxyquejxy ma je Huindzin Jesús anajty yajpaady, e chi oy yajnimäyii:

—Je mmigüg huidibi ooy mdzocy, pijcip je'.

⁴Co Jesús jadu'n midooy, chi yminañ:

—Je' ypa'm ca' yaj'öga'nyii tücci'yi. Je' ypa'm hue' yajnigüëxigamy Dios ymic'ajt, jaydëb Dios ycömaybidzimipy, e nañ iich nyajcömayipyich, iich je jäy huidibi tzoön tzajpjoty.

⁵Jesús ooy anajty tzocy jihuïy je Marta, María etz je Lázaro. ⁶Oy jadu'n Jesús nejhuïy co anajty Lázaro ypïgyii, jamejtz xii jim yjacxiinajxy ma anajty yajpaady. ⁷Huin'it Jesús nimay ydiscípulos ajcxy:

—Tzoc jamim jim Judea naaxjot.

⁸Chi je' ydiscípulos ajcxy y'adzooy:

—Huindzin, namni jäy ajcxy jim Judea ti xy'ocjaccögädzambi, e ñmnicxaanip jim jadüg'oci?

⁹Chi Jesús y'adzooy:

—Majmetz hora tüg xiimbi miidity. Pïnjäy miid Dios ytiy'ajt, ca' ayo'n pada'ñ, tim jadu'n nej jihuïy yhuidity xiim, e ca' ycönepy, com co xii codiicxy jada naaxhuïnybi. ¹⁰Pïnjäy ca' miidity Dios ytiy'ajt, ca' je' nejhuïy ti anajty jadaanip, chi ayo'n pada'ñ, tim jadu'n nej jäy ycoodzhuidity, e chi ycönepy miid co ca' anajty ixy ma ñicxy.

¹¹Huin'it Jesús je' ajcxy nimay: —Iich ajt nmigüg Lázaro maab je', nicxy nyajpidi'ga'ñich.

¹²Chi je' ydiscípulos ajcxy y'adzooy:

—Huindzin, pen maab, huaadjihuïjhuip yi', ci'm yi' ymäyhuijipy.

¹³Je' Jesús anajty ñimiydaacyp je o'cin, e je' ajcxy tijy Jesús ñimiydaacyp je mähuïi. ¹⁴Chi Jesús yajmiidmiydacy ajcxy tiydudägy, yminañ:

—Lázaro ti je' y'o'cy. ¹⁵E ooy njotcújcidyich miid miich ajcxy ycixpi co anajty iich ca' njimity, jígix ajcxy mmibigipy co Dios ymic'ajt nmiididyich. Tzoc ajt jamim jim Betania.

¹⁶Tomás huidibi anajty ajcxy yxiigoyaaxyp Dídimó, huïdi ayuc-huimbizim: cuate, nimay jacjadyii Jesús ydiscípulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy miid Jesús.

**Jesús yajjugypigipy je jäy ajcxy
etz möhuipy ajcxy jugy'ajtin**

¹⁷Co ajcxy jim yja'ty, chi ajcxy paty tiy'ajt co mimidaaxxiibi anajty maabi Lázaro ñaaxtigy. ¹⁸Betania ca' anajty ooy yjiguëgyity miid Jerusalén, jäyi jada' anajty miidity tugüig kilómetro. ¹⁹May judíojäy ajcxy anajty ti ymiingixy ma Marta etz María, yajjotcugihua'n ajcxy miid je' ymiguëx ycixpi co anajty ti y'ögy. ²⁰Co nejhüy Marta co Jesús anajty jim ymiñ, chi nidzooñ oy jijpcobadiy. E María jim yhui'miyy ma ytjc, tigoty anajty iñäy. ²¹Chi Marta Jesús nimay:

—Huindzin, co ixypy miich ya anajty myajpaady, ca' ixypy ti y'ögy nmiguëxich. ²²Per nnejhuiybich co miich cham jäbi Dios mmibijctzoy, e xymöhuip ti mdimdzojcy.

²³Chi Jesús y'adzooy:

—Je mmiguëx jugypigip jadüg'oc.

²⁴Chi Marta y'adzooy:

—Nnejhuiybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadzañ.

²⁵Per huin'it Jesús y'adzooy:

—Iich je' nyajjugypigipyich je jäy ajcxy, e nmöhuibyich ajcxy jugy'ajtin. Pinjäy ajcxy xymibijcpich xymijpidaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶E tüg'öciy pinjaty ajcxy xymibijcp xymijpidaacpich juugyñi, ca' y'ögipy ajcxy tücci'yi. ¿Ney mibijcyp miich jadaaji?

²⁷Chi Marta y'adzooy:

—Nmibijcypich, Huindzin. Nmibijcypich co miich je' je Cristo,

Dios y'ung, huidibi anajty miinam ya naaxhuiñ.

Jesús taj may ooy miid Lázaro ycixpi

²⁸Co Marta jadu'n yminañ, chi jada' oy huoy y'luch María, e yajnimay ameech:

—Je Huindzin chiiby je', e miich jiiby xymiidmiydägamb.

²⁹Co María jadu'n midooy, chi ypidigy mic'amy, e chi ñicxy ma Jesús. ³⁰Ca'ni anajty Jesús yja'ty cajpjoty. Jimni anajty yhuäcxijp ma anajty Marta ti yjijpcobaadiyyi.

³¹Co ajcxy ijxy co María ypidigy, e ypidziimy janch mic'amy, je judíojäy huidibi anajty ajcxy jim ma je tjc miid je', hue' ajcxy tijy María ñicxy yaaxpi ma anajty ti ñaaxtigy je Lázaro. Chi ajcxy panicxy.

³²Co yjädy María ma je it ma anajty Jesús, co ijxpaty, chi ycojxtinaay'ahuiyy ma Jesús yhuinduu, chi nimay:

—Huindzin, co ixypy miich anajty m'ocyaajity, iich n'ay ca' je' ixypy y'ögy.

³³Co Jesús ijxy yäxy je María etz je judíojäy ajcxy huidibi anajty yjaymiid'ajtip, chi ooy jihuiyy etz ytaj ymaay. ³⁴Chi jada' Jesús yajtiy:

—¿Ma ajcxy Lázaro ti myajnaaxtigy?

Chi ajcxy nimay:

—Huindzin, jam ijxim.

³⁵Chi Jesús yaaxy. ³⁶Chi judíojäy ajcxy ñayñimaayi miñ xyipy:

—Ooydim anajty tzocy je Lázaro.

³⁷Per nijëjity ajcxy yminañ:

—Jadayaabi jäy huidibi huinzjäy yajhuindicxigy, ¿nej ca' jada' ixypy mic'ajt miidity jäbi ixypy ti yajtzögy je Lázaro, e ca'ydí ixypy ti y'ögy?

Jesús yajjugypijc Lázaro

³⁸Chi Jesús jadüg'oc yjotmaybaty, chi ymijhuägy ma je o'cpi jut. Hue' je' anajty tüg ang miid tüg mij tzaa y'lagiyducyitye je jut aguu. ³⁹Chi Jesús yminañ:

—Jiigi' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mimidaaxxiibiñ maabi ñaaxtigy.

⁴⁰Chi Jesús yminañ:

—¿Nej cay ti jadu'n nnimäyi? Pen xymibijcibich yi' n'ayuc, m'ixipy Dios ymic'ajt y'oy'ajt.

⁴¹Chi ajcxy je tzaa jigiyy, chi Jesús cix ypa't'ijxy, yminañ:

—Dios Teedy, jäygi daacin nyajnajxypich ma miich, co miich xymidoohui n'ayucich

⁴²Yajxon nnejhuüyich co miich xy'amido'ijtpich jabom jabom, paady ycixp miich jadu'n ti nnimäy miid jadayaabi jäy ajcxy ycixpi ma iich nhuinduu, huen ajcxy mibicy co miich xyquejxich ya naaxhuñ.

⁴³Co Jesús jadu'n yminañ, chi jada' mic ycapxy:

—Lázaro, pidzim tibäy.

⁴⁴Hue' je o'cpi mic'amy ypidzimy ymo'nity yajxon tüg'óciy ñinicx etz huingoyebiyity miid huit, chi Jesús yminañ:

—Huimbidiittuutcixy, e najtzmaziiygix, huen yöychooñ.

Judío ixpicytijc ymadzamy anajty Jesús

⁴⁵May je judíojäy ajcxy ymibijcy huidibi anajty María yjaymiid'ajtyp, co ajcxy ijxy je huidibi anajty

Jesús ti tuñ. ⁴⁶Per jadyii judíojäy ajcxy oy ixtäy je fariseojäy ajcxy, chi ajcxy yajmiidmiydacy huidibi anajty Jesús ti tuñ. ⁴⁷Je teedy tungmiidpi ajcxy, etz je fariseojäy ajcxy, chi ajcxy ñayhuoomujctayi je tungmiidpi ajcxy nidüg'óciy, chi ajcxy yminañ:

—¿Nej ajt Jesús n'octuunim?

Yijiibi yëydijc ooy yi' mijhuinma'ñ tzachtuuni. ⁴⁸Pen nnaajt'ixiiyim jadu'ñyi, tüg'óciy jäy mibijctähua'ñ yi'. Chi ajcxy ymiinipy je Romano tungmiidpi huidibi ajt xy'ané'mim, e chi yajhuindigoyipy iich ajt nDios y'it, e nañ yajhuindigoyipy iich ajt ndzinaayin njugy'ajtin.

⁴⁹Nidügti ajcxy je jäy, hue' anajty yxi Caifás, hue' anajty mijtungmiid, je' anajty teedy huindzin, je' jadu'n jäy nimayday:

—Miich ajcxy ca' ti mhuinjihuiygixy. ⁵⁰Ca' ajcxy mnejhuüy co jac'oy nyaj'o'cim je Jesús tügpajc, huen yi' codinaydähuiip naax cajp, jigix ca'ydi iich ajt nnaax ngajp yhuindiooyim.

⁵¹Canan yci'mhuinma'ñ jadu'n ycixpi yminañ je'. Hue' janchtiy com je' anajty ymijtungmiiditye je huin'it jimijt ma teedy ajcxy ymiñ, paady Dios huinma'ñ jadu'n yejcy, co jadu'n najtzcaxiy co Jesús anajty y'öga'ñ miid tüg'óciy ajcxy naax cajp ycixpi. ⁵²E ca' nminaanim miid jëda'ajty miid je judío ajcxy ñaax ycajp ycixpi, nañ jëgix co huoomujctähua'ñ tüg'óciy Dios y'ung huidijaty anajty ajcxy yajpatp xii ya. ⁵³Huin'it oga'n ajcxy je tungmiidpi yajnigodugiyy co yaj'ögaangixy Jesús.

⁵⁴Jesús ca' anajty ma y'ocyaj'ijxni mayjäyoty ma je judíojäy ajcxy. Chi jada' ñicxy jiguem mihuingon ma je títznaax'it, ma anajty tüg cajp xiijty Efraín. Chi jim yhui'miy miid ydiscípulos ajcxy.

⁵⁵Huingoonip anajty je pascua xii huidibi anajty judíojäy ytumyb. Ti anajty may judíojäy ajcxy ñinicxni jim Jerusalén xii'ajtp huidibi anajty jiguëgyjaty tzomb. Jayijpni ajcxy ñicxy ca' anajty xii paady, co anajty ajcxy ñayyajpocyñihuádza'ñyii.

⁵⁶Ooy anajty jäy ajcxy ijxtäy Jesús huin'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuiy ma Dios ytijc, jadu'n ajcxy yminañ: —¿Nej m'ocmíanaangixy? ¿Minipy jada' Jesús xii'ijxpi, o cal'ji?

⁵⁷Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpinity huidibi anajty nejhuiyb ma je Jesús, huen nigapxy jigix ajcxy madzipy.

María yajjaax aceite Jesús ytecy

12 Jatudujcxini anajty pascuaxii ca' paady, co Jesús ñicxy jim Betania, jim ma anajty Lázaro yajpaady, je huidi anajty ti yajjugypicy jadüg'oc. ²Chi ajcxy jim yaj'oyiyy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty miid Jesús iñäy ma je mesi. ³Chi María conigy tüg libra ujtzpíjyñii huidibi anajty ooy oy yxuogy. Tzou je' anajty ooy, je' miid Jesús ytecy yajjaaxtaayi. Chi jada' miid ycöhuay po'ttiich. Chi ac ujtzpíjyñii yxuugítay tigoty. ⁴Huin'it je Judas Iscariote je Simón ymang huidibi

anajty yhuindzin cýegam ma ymidzip, je' jadu'n ymina'ñ:

⁵—Jac'oy co ixipy ti ndoocim jada ujtzpíjyñii oy migo'pxpeexyti jadiib ixipy ajt ayoobtijc nbubejtím.

⁶Canan paady Judas jadu'n yminañ co ayoobitijc tzachpa'ayoy. Paady jadu'n yminañ co ajcxy chachmeedza'ñ. Com je' anajty meeñybijty cuend'ajtp, e chachpuugomyb huidijaty anajty jiiby ajcxy yjapídaacy. ⁷Chi Jesús nimay je Judas:

—Ixmatz miich yi', hue' yi' yi María ti yujpcicy jada ujtzpíjyñii co yajtuna'ñ co anajty naaxtigiyich.

⁸Com yi ayoobitijc ajcxy huinixii yi' miich ajcxy miid'idipy. Janch iich ca' iich miich ajcxy miid n'idipy huinixii (ya naaxhuiñ).

Judío ixpicytijc yaj'ögamy anajty Lázaro

⁹Co ajcxy nejhuiy may judíojäy ajcxy co anajty Jesús yjimity Betania, chi ajcxy nimiñ. E canan miid Jesús ycixpi jëda'ajty, je' anajty ajcxy nañ jadu'n chach'ixaamy je Lázaro huidibi anajty ti jugypicy jadüg'oc.

¹⁰Chi je teedy ajcxy yhuindzindijc ñaygapxi, co yaj'ögangixy Jesús etz nañ jadu'n je Lázaro, ¹¹com may judíojäy ajcxy anajty ñayjiibijcin, etz tzachmibijccixni Jesús.

Jesús tigiy Jerusalén jadu'n nej tüg rey

¹²Je com jabom je mayjäy huidibi anajty ajcxy ti ymiingixy xii'ajtpi ñejhuiy ajcxy co Jesús anajty ymina'ñ jim Jerusalén. ¹³Chi ajcxy

cabïgy may ytiixy y'aacx, chi ajcxy nidzooñ Jesús, chachmínaangixy:

—iDios ajt xyñihuaanim xyajtzoocim! Mimb tüg jäy huidibi Dios ti yconucxyii. Ymiid y! Dios ymic'ajt, je' je' je judíojäy yrey.

¹⁴Co Jesús paty tüg burro mang huidibi ca' ni pin yaj'iñaayñi, chi yajpejty, chi cuyduuñ jadu'n nej anajty jaybety y'lity ma Dios ñecy co jadu'n ymiñañ:

¹⁵—Ca' mdzigïy miich ajcxy huidibi tzinaayb ma Sión cajp (Jerusalén). Cha je mrey ymiñ y'iñäy ma tüg burro mang.

¹⁶Je huidibi anajty ajcxy Jesús discípulo'ajtyp, ca' anajty ajcxy huinjihuïygixy ixti cooni Jesús paty jadüg'oc y! y'oy'ajtin ymij'ajtin jiiby tzajpjoty. Huin'it ajcxy ajihuiygooti co jadu'n anajty ycojaayity miid Jesús ycixpi, e nañ co je' anajty Jesús ti yajtunyii ti yajjadyii jadu'n nej jaybety ymiñ.

¹⁷Je jäy ajcxy huidibi anajty ajcxy ymiid Jesús, huin'it co Lázaro ypidzimy ma yajnaaxtigïiyi, e yajjugypijci jadüg'oc, chachyejcy anajty ajcxy tiy'ajt nañ jadu'n huidibi anajty ajcxy ti ijxcixy. ¹⁸Nañ paady ycixpi je mayjäy oy nañ jadu'n yjijpcobadiyiyi, co ajcxy nejhuïy je mijhuinmañ huidibi anajty Jesús ytumyb. ¹⁹Paady je fariseojäy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'óciy yi mayjäy axam ajcxy je' paníxcixy.

Nijëjity anajty griegojäy miidmiydägaangixy Jesús

²⁰Nijëjity griegojäy nañ ti anajty ñíxcixy jim Jerusalén Dios

ojadajtpi xiijoty. ²¹Chi jada' je griegojäy ajcxy nimijhuägy Felipe, huidibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcich, Jesús iich ajcxy nja'ixamy.

²²Chi Felipe oy yajnimay Andrés, chi ajcxy Felipe etz Andrés oy Jesús yajnimay. ²³Chi Jesús ymiñañ:

—Ti je tiempo paady co iich je jäy huidibi tzoon tzajpjoty nyajcömayipyich. ²⁴Janch janch iich miich ajcxy jadu'n nimaaygixy co jäy niiby tüg mocpajc, e co je mocpajc ymuxy, huin'it yhuindigoy, e chi ytiim'ajtni may'amy. Pen ca' ni pin niiby jada mocpajc, ca' ytiim'adañ. Jadu'n iich nipaady nej je mocpajc. Copicy n'ögibyich, huin'it mayjäy jugy'ajtin paadaangixy huidibi ca' ycixipy ytigoyipy ni mina. ²⁵Je jäy huidibi ooy niigi nixondägy yi chinaayin ya naaxhuiñ, yajtigoyamy je' yjugy'ajtin tücci'yi. Per je pin ca'p ooy nijot'aty je chinaayin ya naaxhuiñ, e nixondaaci ooy niigi Dios y'ayuc, je' y'alma nidzoocin paadip ma Dios. ²⁶Pen ji jäy huidibi naybidaacip ma iich, copicy ajcxy xypaníxcibich. Ma iich nyajpaady, nañ jim y! yajpaadipy nañ jadu'n. Yi jäy pinjaty naybidaacip ma iich, Dios Teedy yi' cömayiib.

Jesús capxpídzimy co y'öga'ñ

²⁷Chi Jesús yjacmiñañ:
—Tájñibich mayñibich cham jotjoty huinmañnyjoty. ¿Nej nnimähuibich nDeedyich?
¿Nihuaangich ma jada ayo'n tzaachypí huidibi ti yhuaad'ajtni?

Ca' yjadu'nity. Com paady ycixp ti nmiñich ma jada xii tiempo, jèbi ayo'n nyajnajxich miid jäy ajcxy ypocy ycixpi. ²⁸Dios Teedy tun huidibi copicy, jèbi jäy ajcxy ijxcixy miich mmic'ajt etz miich m'oy'ajt.

Huin'it je jäy ajcxy huidi anajty jim ma Jesús yajpaady midooy tüg ayuc choñ tzajpjoty ymínañ:

—Ti nduñich mijhuinma'ñ, e ti jäy icy iich nmic'ajt n'oy'ajt. E nañ jadüg'oc ndunipyich mijhuinma'ñ, jigix jäy ajcxy íjxcixipy jadüg'oc iich nmic'ajt iich n'oy'ajt (jadu'n Dios y'adzooy y'ung Jesús).

²⁹Je mayjäy huidibi anajty ajcxy jim, je tiibi anajty ajcxy midoogixy je ayuc huidibi tzoon tzajpjoty, ymínañ ajcxy:

—Enee yí' ti yjidity.

Jacjadyii ajcxy ymínañ:

—Tüg ángel ti ymígapxyii.

³⁰Chi Jesús nimay je mayjäy ajcxy:

—Ca' nmínaaním miid iich ycixpi jadu'n ti yajmidoy jadayaabi ayuc huidibi ti chooñ tzajpjoty. ³¹Jadachambi jada' Dios yajpocähua'ñ naaxhuiñyäj, e nañ ypígaanipy je mujcu' ymic'ajt huidibi ane'mb naaxhuiñyäj ajcxy. ³²Co iich anajty jäy ti xyajcruudzpetyich, e co iich anajty ti njugypicyich jadügtecy, e co iich anajty ti nhuimbityich tzajpjoty, huin'it tüg'óciy jäy ajcxy huidibi xymibijcpich, nyajpa'ttigihuibich jiiby tzajpjoty ma nyajpaadyich.

³³Paady jadu'n Jesús ymínañ, jèbi huaad tüg'óciy jäy ajcxy huinjihuñhuip ti o'cin anajty ypadamy. ³⁴Chi je mayjäy ajcxy ymínañ:

—Ma Dios ñecy jiiby jadu'n ymiñ jaybety co je Cristo huinixii je' y'ida'ñ. E ñnej miich co cham jadu'n mína'ñ co copicy co yi jäy huidibi tzoon tzajpjoty, huimbidam jadügtecy tzajpjoty? ¿Pín jedu'n mdijyp huidibi tzomb tzajpjoty?

³⁵Chi Jesús nimay je jäy ajcxy:

—Jahueeni xii tiempo njac'ida'ñich miid miich ajcxy. Jadu'n iich ndiy'ajt nej tüg jín huidibi codiicxp jäy co ytüyöy. Cuychinäy iich ndiy'ajt, co tzojc nhuimbida'ñich tzajpjoty, e miich ajcxy mhui'ma'ñ jadu'n nej jäy huidibi ca' jín miidity. Je jäy ajcxy huidibi ca' cuychinaaygixy iich ndiy'ajt, ca' ajcxy nejhuiiygixy ma ñíxcixy. Jadu'n ajcxy nej jihuüy yöygixy coodz, e ca' ijxcixy ma ñíxcixy. ³⁶Com occhaani iich ma miich ajcxy, nyaj'ixpijcy p iich miich ajcxy Dios ytiy'ajt. Pen xymibíjccixpich, m'íjtcixip ixpicy ma Dios ytiy'ajtín.

Co Jesús jadu'n je jäy ajcxy nimayday, huin'it Jesús je' ajcxy puhua'ctuutni, chi ñícxni, e ca' ma y'ocjac'lijxin.

Je judíojäy ca' mibíga'ñ Jesús

³⁷Ooy anajty canaag mijhuinma'ñ Jesús ti jatuuñ ma jäy ajcxy yhuinduu, e ca' anajty ajcxy ni ti tím mibíjccixy. ³⁸Huidibi Jesús ytun ycapx, jiiby anajty jadu'n ycojayity ma je Dios y'ayuc necy, je Isaías ñecy, co Isaías jadu'n ymínañ:

Huindzin, ca' ni pín ajt n'ayuc ndiy'ajt ti xymibijcím. Ca' ni pín huidibi huinjihuñyib je Huindzin Dios ymic'ajt.

³⁹Ca' anajty ajcxy huaad ymibíjccixy, com nañ ti anajty jadu'n Isaías jay ma jadu'n ymínañ:

⁴⁰ Jadu'n yi' ajcxy nej jihuüy
 Dios ti yajhuindziügixy, e
 ti yajjotjuniügixy, jigix
 ca' y'ljxcixipy miid yhuuin,
 e miid yjot yhuinma'nñ
 ca' huinjihuüyigixyipy, ni
 ycajothuimbjtcixipy nej jëbi
 Cristo yajtzöocigixy.

⁴¹ Paady jadu'n Isaías yminañ je' co
 anajty ti ijxi Cristo y'oy'ajt, e chi
 cojay nej anajty ti ixy.

⁴² Ca' nidüg'óciy judío ixpicytijc
 mijotmädy anajty Jesús. Jim
 anajty nijëjty huindzindijc huidibi
 mibijcp Jesús. Per miid je fariseojäy
 ycixpi co chachjotma'tcixy, paady
 anajty ajcxy ca' capxpizimigixy
 co mijpidaaccixy Jesús. Je' co
 chigiiygixy co jim yajpidzimiiyb
 ajcxy tücci'yi ma Dios ytijc, etz
 ma yi judío ñaymujctac. ⁴³ Jacnëgi
 anajty tzojccixy co huen jäy
 cömáayigixy, ca'ydi co ajcxy Dios
 ycömayiib.

**Dios yajpocycähuij je
 mayjäy miid Jesús y'ayuc**

⁴⁴ Chi jada! Jesús yminañ mic:
 —Je jäy ajcxy huidibi
 xymibijcpich xymijpidaacpich,
 caminaanim iich naydüg
 xymibijcpich xymijpidaacpich, nañ
 ymibijcyp ymijpidacyp ajcxy je tiibi
 iich ya naaxhuiñ xyquexyich. ⁴⁵E
 je jäy huidibi xy'ljxpich, tim jadu'n
 nipaady nej jihuüy ti ixy je huidibi
 ti xyquexyich. ⁴⁶Ich ti nmimiinich
 ya naaxhuiñ Dios ytiy'ajt, jadu'n
 iich nipaady nej jihuüy tüg jiin
 huidibi codicx je jäy ajcxy. Je
 jäy ajcxy huidibi xymibijcpich ca'
 ajcxy yhui'mipy jibictuuby, jadu'n
 nej jihuüy ca' ajcxy chinaaygixy

agootztuuby. ⁴⁷Je jäy ajcxy
 huidibi midoob iich n'ayuc, e ca'
 cuydungixy, ca'p je' iich je' ypocy
 ajcxy n'ixyöyaani nbayöyaani
 cham. Ca'p iich ti nmiinich
 ya naaxhuiñ miid co jäy ajcxy
 ndzaachytunipyich miid ypocy
 ycixpi. Paady iich ti nmiinich ya
 naaxhuiñ co nyajpocyniñhuadza'nich
 yi jäy ajcxy. ⁴⁸Je jäy ajcxy huidibi
 xycapxhuimbjtbich n'ayuc, e ca'
 xycöbiga'nich, ymiid ajcxy huidibi
 yajpocycähuiib. Yi ayuc huidibi
 ti ngapxyich, yi' yajpocycähuiib
 ajcxy co anajty naaxhuiñybi
 ti yhuaad'ajtni co Dios anajty
 yajtigatzaani. ⁴⁹Com iich ca'
 ngi'm'ayuc ngapxhuäcxyich. Je'
 je' Dios Teedy y'ayuc, je huidibi ti
 xyquexyich, yi' ngapxhuäcxbich
 y'ayuc. Je huidibi ti xyquexyich ya
 naaxhuiñ ti xyñajtzcapxiyich yi'
 y'ayuc, jada ayuc ngapxhuäcypich
 nyajniimaaygixyp. ⁵⁰E nejhuiybich
 co Dios y'ayuc ytiy'ajt ymimimyb
 yi' tzinaayin jugy'ajtin huidibi
 ca' tücci'yi ycixy ytigoy. Paady
 ycix je ayuc huidibi ajcxy
 nyajmiidmiydacyp, jadu'n
 nyajmiidmiydaaccixy nej Dios
 Teedy ti xyajnajtz'ane'miyich.

Jesús ypuji ydiscípulos ajcxy ytecy

13 Ca'ni anajty xii paady,
 pascuaxii anajty ajcxy
 tijy. Chi Jesús ñejhuiyb co
 anajty yxii ytiempo yhuaad'ajtni
 mina chonaani ya naaxhuiñ
 yhuimbidaani ma Dios Teedy. E
 Jesús ooy anajty tzocy jihuüy
 ymüggtijc ajcxy huidibi ya
 naaxhuiñ anajty ajcxy hui'ma'nñ.
 Jadu'n tzocy jihuüy huinixii.

²Chi jada' Jesús etz ymígügtijc ytiíy ajcxy adzuu'ajtp (je pascuaxii adzu'ajtin). Ti anajty je mujcu' huinma'ñmöy Judas Iscariote, Simón ymang, co anajty Jesús cäyega'ñ ma ymidzip ajcxy.

³Ñejhuiyb anajty Jesús co je Dios Teedy ti yajcädigäyii tüg'óciy ymic'ajt, e Jesús nañ ñejhuiyb anajty co je' ti choon ma Dios y'it, e nañ jiiy anajty jadüg'oc yhuimbida'ñ. ⁴Chi ypidäy ma mesi, chi je yoñybi yhui ñayyajñijenduutti. Chi huijtzäy tüg huit huídibi miid ñaymextiitzi nayböttiitzi, ñayyajmijxojtpejti yhuindiy. ⁵Co jadu'n ñayñi'ixiíy, chi pidacy nii ma tüg cibují'ñybo. Chi nihuägiiyi ydiscipulos ajcxy ytecy. Chi yajtzondacy tecypujii tüg tüg, e mextiich pöttiich miid je huit huídibi anajty ti ñayyajhuindiyii.

⁶Co nihuägiiyi Simón Pedro ytecy, chi Pedro ymíñañ:

—Huindzin, ca' huaad miich ndecy xypujich.

⁷Chi Jesús y'adzooy:

—Huídibi iich ndumy ca' yi' miich ajcxy mhujñihuiyigixy jadachambi, jacomjey miich ajcxy mhujñihuihuipy.

⁸Chi Pedro y'adzooy:

—Miich ca' huaad iich ndecy xypujich ni caminaabi.

Chi Jesús y'adzohuimbijty:

—Pen ca' mdecy nbuji, ca' iich miich jébi njäy'adyii.

⁹E huin'it Pedro nimay Jesús:

—Huindzin, ca' iich jéda'ajty ndecy xypújibich, hue' janchtiy tüg'óciy ngjích etz ngohuajcích.

¹⁰Chi Jesús nimay Pedro:

—Com tiibi mjot mhujñihuiyb yajhuäch, ca' yi' ocjactzojcní

yajhuächziy mjot mhujñihuiyb jadügtecy. Tim jadu'n nej jihuíy naamni chíy, e cham ca' tzojcní yajtzihuíbyich jadügtecy. Jéda'ajty mdecy nbujich cham. Miich ajcxy huäch mjot mhujñihuiyb ajcxy mmiidíñ, oy ca' miich ajcxy nidüg'óciy.

¹¹Com Jesús ñejhuiyb anajty pinjäy cäyegaanip ma ymidzip, e paady jadu'n ymíñañ:

—Ca' ni tüg'óciy miich ajcxy mjot mhujñihuiyb yhuächziy.

¹²Chi jada' co yajtecpujtay, chi jada' yoñyhuit yajtiíy jadüg'oc. Y'ixtacy ma mesi, e chi jada' nimay ajcxy:

—¿Nej mhujñihuiyb ajcxy ti iich ti nduñich miid miich ajcxy?

¹³Miich ajcxy jadu'n minamb co iich miich ajcxy myaj'ixpijcy, etz iich miich xyhuindzin'ajtpich. E tiydudäy miich ajcxy míña'ñ com iich jédu'n miich ajcxy mHuindzin.

¹⁴Pen iich miich ajcxy nyaj'ixpijcy etz xyhuindzin'ajtpich, e ti iich miich ajcxy nyajtecpujy, nañ jadu'n miich ajcxy myajtecpujiiyb miñ xyipy. ¹⁵Iich miich ajcxy ti nmöy tüg ixpejt, jigix ajcxy jadu'n mdunipy jadu'n nej ti nduñich, e huin'it ca' amij agix nayjihuihuíyb ajcxy. ¹⁶Janch janch iich miich ajcxy yam jadu'n nnimäy co je huindzin jac mij je' ca'ydi yi' ytumbi. E nañ je' huídibi yajquejxyöyb jac mij je' ca'ydi huídibi quejxyöyb. ¹⁷Co ajcxy tiy'ajt mnejhuíhuipy, chi jotcuyc ajcxy m'idipy, pen mbadumy ajcxy jadu'n nej nduñich.

¹⁸Ca' nmíña'ñich co nidüg'óciy miich ajcxy mbocymiidity. Ti iich

yi' nnejhuüy pin ti nhuin'ixyich. Ti nhuin'ixyich tüg huidibi pocymiid, jigix cuyduunip nej anajty yjaybetyity ma Dios ñecy ma je Cristo jadu'n ymina'n: "Yi' huidibi caymujcp miid iich, ti iich yi' xymibidigy." ¹⁹Ti iich yam miich ajcxy jayijp nyajniimaaygixy, jigix co anajty jadu'n ytunyii yjadyii, mmibigipy ajcxy co iich jëdu'n je Cristo. ²⁰Janch janch yam ajcxy jadu'n nnimaaygixy co je jäy ajcxy huidibi cöbijcp je huidibi anajty nguejxypich, tim jadu'n nipaady jadu'n nej iich anajty xycöbijcyich. E je jäy ajcxy huidibi xycöbijcpich, je' ajcxy anajty ycöbijcyp je' huidibi xyquejxich ya naaxhuiñ.

Jesús ñimay ymigügtijc co je Judas anajty cäyegaanip ma ymidzip

²¹Co jadu'n Jesús yminañ, chi tajnip mayñip anajty ooy jotjoty huinma'ñyjoty, chi capxypidzimy:

—Janch janch iich miich ajcxy yam jadu'n ñimäy co nidügti miich ajcxy xyciyega'ñich ma nmidzipich.

²²Chi Jesús ydiscípulos ajcxy ñayhuindixpejttaayi nidüg nidüg. Ca' anajty ajcxy nejhuüy pin anajty jëdu'n Jesús ytijyp. ²³Nidügti je' ajcxy huidibi anajty Jesús ooy miid ñaychogyii iñäy anajty ma mesi tim huingon ma Jesús yhuinduu. ²⁴Chi Simón Pedro yci' yaj'ijxy yajhuinjihuüy co huen yaj'amidooy Jesús pin anajty jadu'n ytijyp. ²⁵Chi je discípulos ajcxy huidibi anajty iñaayb ma Jesús yhuinduu ñimay yhuindzin:

—¿Pin jadu'n mdijyp?

²⁶Chi Jesús y'adzooy:

—Yi' je' pin anajty iich nmooybich yi tzajcaagy huidibi anajty nyajxoocpyich ma je ügy.

Chi yajxoogy tüg pedasi tzajcaagy, chi moy je Judas, je Simón Iscariote ymang. ²⁷Tim huin'ítii co Judas je tzajcaagy cöbijcy, chi je mujcu' ytigiiy ma je' y'ay yjot. Chi Jesús ñimay Judas:

—Yi' huidibi mdunamyb, tungo jadu'n mic'amy.

²⁸Huidijaty anajty ajcxy jim caayb, ni pin cahuinjihuiy je ayuc huidibi Jesús yajñimay Judas, nej je ayuc yhuimbidzimy. ²⁹Com je Judas anajty miid je meeñybijty, paady ajcxy nijëjity huinjihuüy co anajty tijy ñimäyii:

—Ñicx juy yi' huidibi ajt nyajmayjajtim yi xiigixpi.

Jacjadyii ajcxy anajty tijy ñimäyii:

—Mo' tigatii ayoobitijc. ³⁰Tim huin'ítii co je tzajcaagy cayday, chi ypidzimy Judas tiba'y, e ti anajty ycoodziiyñi.

Jesús ñajtz'ane'miy jemybi cötujcin

³¹Co Judas ypidzimy, chi Jesús yminañ:

—Cham je jäy ajcxy ixa'ñ iich nmic'ajt iich n'oy'ajt, iich je jäy huidibi tzoon tzajpjoty. Etz nañ ma iich je jäy ajcxy ixa'ñ Dios ymic'ajt Dios y'oy'ajt. ³²Jadu'n nej je jäy ajcxy ti ijxcixy Dios ymic'ajt ma iich, nañ tim jadu'n Dios yajniuguëxigipy yi nmic'ajtich n'oy'ajtich tim mic'amy.

³³Migügtijc huidibi ooy ndzocy njihuüyich, ca' n'ochuäcxibaanich jecy miid miich ajcxy. Xy'ixtähuibich miich ajcxy. Jadu'n nej ti nnimäaygixyich yi jacjadyii judíojäy ajcxy, nañ jadu'n iich miich ajcxy yam njacniimaaygixy co ma nnicxa'ñich, ca' huaad miich

ajcxy jii by mnicxcixy. ³⁴Cham ajcxy nmöhua'n tüg ané'min huinjemybi. Cham miich ajcxy nyajnajtz'ane'mihuaangixy jädüg'oc jadayaabi tiy'ajt: Naychójcigix nayjihuiyigix ajcxy nidüg nidüg, tim jadu'n nej iich miich ajcxy ti ndzocy ti njihuüy. Naychójcigix nayjihuiyigix aguipxyi. ³⁵Miid jada ycixpi ñejhuühuipy tüg'óciy jäy co iich miich ajcxy ti nyaj'ixpijccixy co ajcxy nidüg nidüg mnaychogiiyb mnayjihuihuüyb.

**Jesús ñimay ymigügtijc co je
Pedro anajty coyüdzanip**

³⁶Chi Pedro ñimay:

—Huindzin, ¿ma miich mnicxa'n?

Huin'it Jesús y'adzooy:

—Ma iich mnicxa'n iich miich ca' huaad xypanicxyich. Jac'axam xypanicxyibych.

³⁷Chi Pedro yminañ:

—E ¿nej co ca' huaad jëbi iich miich nbanicxy? com iich ngiyegamyich njugy'ajtin ma yi o'cin miid miich ycixpi.

³⁸Chi jada' Jesús y'adzooy:

—¿Nej janch co mgiyega'n yi mjugy'ajtin ma yi o'cin miid iich ycixpi? Janch janch iich miich ajcxy yam jadu'n nimäy, co ni ca'ni anajty jabom tugiig'oc tzey yaaxigy, co iich miich anajty tugiig'oc ti xycoyüchich.

**Pinjaty mibijcp Jesús nicxip
ma Dios Teedy yajpaady**

14 Chi Jesús yjacminañ:
—Ca' ajcxy jotmay mjihuüy ma m'aa mjot miid jada ayuc. Mibic ajcxy Dios etz iich nañ jadu'n mibijccich. ²Jiiby ma iich

nDeedy chinäy, jii by migtigydac. Co ixypy ca' yjadu'nity, ca' ixypy ti nnimaaygixy co nnicxyich ma nDeedyich n'ocni'ixiy tzinaaydac miid miich ajcxy ycixpi. ³E co iich anajty ti nba'ttigiyich, e ti ni'ixiyich tzinaaydac jayijp miid miich ajcxy ycixpi, huin'it ajcxy nihuimbidity, jëbi iich ajt naydügmujcim, jigix ma anajty n'ityich, nañ jii by miich ajcxy m'idipy. ⁴Miich ajcxy mnejhuüyb nej jëbi ajcxy mjädip ma nnicxyich oyduuby.

⁵Chi Tomás yminañ:

—Huindzin, ca' iich ajcxy nejhuüygixy ma miich mnicxa'n, e ca' iich ajcxy nnejhuüygixy nej jëbi njá'tcixibych jii by.

⁶Chi Jesús y'adzooy:

—Jadu'n nej ti ndzinäyich jada je' je iixpejt nej Dios tzocy co miich ajcxy mdzinähuipy. Nyejcpyich je tiy'ajt huidibi jëbi huaad mguychinaaygixy. Co jadu'n mguydundáygixipy iich ndiy'ajt, chi mjá'tcixipy ma Dios. Nyejcpyich je jugy'ajtin huidibi ca' tücci'yi ycixy ytigoy. Ca' ni pinjäy yjädipy ma Dios Teedy, peni ca' cuydundáy iich ndiy'ajt. ⁷Jadachambi etz nej xii tiempo yjacnicxa'n miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸Chi Felipe y'adzooy:

—Huindzin, iich ajcxy yi Dios Teedy yaj'ijxcich cham cham, e miid tim y'i yi jotcuje'adipyich ajcxy.

⁹Paady Jesús nimay je Felipe:

—Cham xii jimijt ñicxni maabi iich nja'ityich miid miich ajcxy, e ¿ca'ni miich xytimy'ijxhui'myich

Felipe? Yi jäy ajcxy tiibi xy'íjxcixyich, nañ y'íjxyp ajcxy yi' Dios Teedy. E chi jada', ¿nej miich co jadu'n xyñimäyich: "Yaj'íjxcich je Dios Teedy?" ¹⁰ ¿Naj ca' mmibicy co iich n'ity ma Dios Teedy, e Dios Teedy ijtp ma iich? Yi ayuc huidibi ngapxhuäcxypich, ca' yí' ngi'm'ayuc'adyiijich ngi'mdiy'ajt'adyiijich. Yi mijhuinma'n huidibi ajcxy m'íjxyp ndumyich, yi Dios Teedy huidibi ijt ma iich, yí' jadu'n tumb. ¹¹ Miibijccich ajcxy co iich n'ityich ma Dios Teedy, e Dios Teedy ijtp ma iich. Peni ca' mdimmibigaangixy, mibic ajcxy miid je mijhuinma'n ycixpi huidibi ti nduñich. ¹² Janch janch iich miich ajcxy jadu'n nimaaygixy co je jäy ajcxy huidibi xymibijcpich, nañ ytunipy ajcxy nañ jadu'n yi mijhuinma'n huidibi ti nduñich. Jac tim nigi tunipy mijhuinma'n, com iich nnicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy miid iich nxii, ndunipyich yi'. Dios Teedy huidibi nDeedy'ajtpich, je' cömay y'idip miid huidibi miich anajty ajcxy mdumyb miid iich nmic'ajt. ¹⁴ Co myajmibijctzohuipy tijaty, xycapxpáatibich nxii, huin'it nguydunipyich huidibi anajty ti mbijctzoogixy.

**Jesús yquexamy Dios
yjíhuí'n ymic'ajt**

¹⁵ Peni xychojcpich miich ajcxy, cuydúniigich ajcxy tüg'óciy n'ayuc ndiy'ajt, jadu'n nej anajty ti nnajtz'ane'miyich. ¹⁶ E co ndzoonibych, chi

nbijctzóohuibyich yi Dios Teedy jadüg yjaymiid huidibi ajcxy xyjaymiid'adiib. Dios ajcxy xymöhuipy jadüg jaymiid huidibi ajcxy xycapxhuijip, je huidibi ajcxy m'jot'amij'adiiyb, e je' xymiid'idipy ajcxy huinixii. ¹⁷ Je huidibi xycapxhuijip, je' jada'ajty Dios yjihui'n ymic'ajt, je Espíritu Santo. Je' Dios ytiy'ajt ymiid. Dios yjihui'n ymic'ajt ca' adigíhua'n yi naaxhuiñyjäy huidibi ca' xymibicyich. Com ca' ajcxy icy, e nañ ca' ajcxy icy'adyii je Espíritu Santo. Miich ajcxy m'ixy'ajtyp je Espíritu Santo, com je' tzinaayb ma miich ajcxy, e nañ xy'adigíhuipy xyjottigíhuipy ajcxy. ¹⁸ Ca' miich ajcxy nyajhui'maangixy naydüg jadu'n nej co'ögy'ung. Nnihuimbidipyich miich ajcxy jadügtecy. ¹⁹ Tim huingónip yi xii tiempo mina yi jacjadyii naaxhuiñyjäy ajcxy ca' xy'ocjac'íjxnibich. Com jadu'n nej iich njactzinähua'n, ca' iich njugy'ajtin ycixipy ytigoyipy tücci'yi. Nañ jadu'n miich ajcxy mjactzinähua'n, ca' mjugy'ajtin ajcxy ycixipy ytigoyipy tücci'yi. ²⁰ Co anajty Dios yjihui'n ymic'ajt ajcxy xy'adigíy xyjottigíy, huin'it ajcxy mnejhuíhuipy co nyajpaadyich ma nDeedyich, yi Dios Teedy, e miich ajcxy myajpaady ma iich, e iich nañ jadu'n yajpatpich ma miich ajcxy. ²¹ Je jäy ajcxy huidibi iich n'ayuc ndiy'ajtich xycöbijcip, e cuydungixy, je' je' jadu'n xychojcpich, e tzogiiib je' iich nDeedy. E iich nañ jadu'n ndzogipy njihuíhuibyich je' ajcxy, e nnayajniguëxigíiybich ma je' ajcxy.

²²Je jadügpi Judas, ca' nmînaanîm Judas Iscariote, nîmay Jesús:

—Huindzin, ¿nej co mnayyajniguëxîga'ñiyî ma îich ajcxy, e ca' mnayyajniguëxîga'ñiyî ma je jây ajcxy huidîbî ca' xymîjpidägy?

²³Chi Jesús je' y'adzooy:

—Yî jây ajcxy huidîbî xychojcpîch xyajmîj'ajtpîch, xycuyduunîbîch yî' ajcxy îich n'ayuc ndîy'ajt. E huin'it yî' ajcxy chogîyb îich nDeedy. Je nDeedyîch etz îich miinîp îich ajcxy ma je jây ajcxy huidîbî xycuyduunîp îich ndîy'ajt, e tzînaydacpîgîpyîch ma yî' ajcxy yjot yhuinma'ñ. ²⁴Je jây ajcxy pînjaty ca' xychocyîch, nañ ca' ajcxy îich n'ayuc xycuyduunîch. Paady ca' nnayyajniguëxîga'ñiyîjîch ma je' ajcxy. Com yî ayuc huidîbîch miich ajcxy nyaj'amîdo'îjtyp, ca' yî' îich ngî'm'ayuc'adyî. Yî' je' Dios Teedy y'ayuc ytîy'ajt, com yî' îich ya naaxhuîñ xyquejxîch.

²⁵Jadayaabi ayuc ajcxy cham jadu'n njacyajnimaaayb, jadu'n nej njacyáanîgyîch ya naaxhuîñ miid miich ajcxy, ma ca'ni ndzooñîch.

²⁶Per je Espîritu Santo huidî miinam, je' ajcxy xycapxhuijîp. Dios Teedy yquexamy je Espîritu Santo miid îich nxîi. Je Espîritu Santo xyajnejhuîydähuîpy miich ajcxy tûg'ócîy tîy'ajt, e nañ xyaj'ajîhuîhuîb tûg'ócîy jadu'n nej îich miich ajcxy nnîmaaaygîxy.

²⁷Îich miich ajcxy nyajmîhuî'my jotcujc'ajtin. Jadu'n nej îich njotcujc'atyîch, nañ nyajjotcujc'adîpyîch miich ajcxy. Yî jotcujc'ajtin huidîbî

nyajmîhuîmaamyîch miich ajcxy, ca' yî' yjadu'nîty nej je jotcujc'ajtin huidîbî yajpaatp ya naaxhuîñ. Ca' mdajcîxy maygîxy, nañ ca' mdzîgîiygîxy. ²⁸Tî îich miich ajcxy nnîmaaaygîxy jayîjp'aty co ndzona'ñîch ma miich ajcxy, e nhuimbîda'ñîch jadüg'oc ma miich ajcxy. Penî xychojcpîch miich ajcxy, mxondägîpy ajcxy co nnîcxa'ñîch ma Dios Teedy, com yî Dios Teedy jac mîj yî' ca'ydi îich. ²⁹Tî îich jada tîy'ajt jayîjp nîmiydägyîch ma ca'ni ndzooñîch, jîgîx co anajty je tiempo paady mîna jadayaabi ytunîyb yjadîiyb, huin'it ajcxy mmîbîgîpy îich n'ayuc.

³⁰E ca' îich miich ajcxy mîjcajee ooy njacmîidmîydägaangîxy yam. Com tîm huingónîp mîna je mujcu' huidîbî ane'mb ya naaxhuîñ xyñîmîna'ñîch. Ca' îich yî' huaad jêbî xymîmadägyîch. ³¹Per copîcy yî' nguydunîpyîch Dios Teedy y'ayuc nej xyajnajtz'ane'mîiyîch, jîgîx je naaxhuîñjây nejhuîhuîpy co nyajmîj'atyîch yî Dios Teedy. Pîdîccîx, tzoc'ajt huingduum jamîm.

Je camuuxy'aadz etz y'aacx

15 Chi Jesús jacnimay ydiscîpulos ajcxy:

—Jadu'n îich nîpaady nej camuux'aadz ma tûg muuxy'aadz cam. Îich nDeedy, yî Dios Teedy, jadu'n yî' nîpaady nej je muuxy'aadz cam cuend'ajtpî. ²Tûg'ócîy jây jadu'n ajcxy nîpaady nej muuxy'aadz y'aacx. Je jây ajcxy huidîbî ca' cuychinäy îich ndîy'ajt, yî Dios Teedy yajcödîgoyîb, jadu'n nej je muuxy'aadz cam cuend'ajtpî quejtzpuxy je muuxy'aadz y'aacx

huidibi ca' ytiim'aty. Je jäy ajcxy huidibi cuydundaayb iich ndiy'ajt, Dios yaj'oyiib je' ajcxy yjot yhuinma'n, jëbi oybi tuñ, jadu'n nej je muuxy'aadz cam cuend'ajtpi huijtz'oyi y je muuxy'aadz y'aacx, jigix jëbi nigí ytiim'aty. ³Yi ayuc huidibi ti nyajniimaaygixy, yi' ti yajhuäch yi jibicpi ma miich ajcxy mjot mhuinma'n. ⁴Mibijecich ajcxy, panfcxigich ajcxy ndiy'ajt huinixii. Co ajcxy jadu'n mdunipy, iich miich ajcxy miid'idipy huinixii. Jadu'n nej ixipy camuuxy'aadz y'aacx co ca' ytiim'aty co ahuinggujc y'lity, e ca' mic'ajt paady ma ycop. Nañ tim jadu'n miich ajcxy pen ca' mmic'ajt mbaadipy ma iich, ca' mmimadaáaccixipy mguychináaygixipy iich ndiy'ajt.

⁵Jadu'n iich nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jäy ajcxy huidibi yajpatp ma iich, e iich nyajpaady ma je' ajcxy, je' ajcxy oyhuinma'n tunam mij cajee, tim jadu'n nej camuuxy'aadz huidibi tiim'ajtp may'amy. Co ixipy iich ca' nyajpaady ma miich ajcxy, ca' miich ajcxy huaad ti mdungixy. ⁶Co jäy ajcxy ndiy'ajt xy'ixmájtzbich, Dios ajcxy yajcödigoyiib, tim jadu'n nej jäy yajcödigoy miid jijn yi muuxy'aadz y'aacx huidibi ymibuxiib co ca' ytiim'ajtni. Co je y'aacx ytádzity, chi ajcxy yajmucy, e pidaaccixy jijnjoty, e jadu'n jiiby ñidoyi jijnjoty.

⁷Co miich ajcxy m'ijtcixy ma iich, e co iich n'ayuc nañ jadu'n ijtp ma miich ajcxy mjot mhuinma'n, jëbi mbijetzooigixy ti ajcxy mdzojcp

ma Dios, e nguydunipyich miid miich ajcxy ycixpi. ⁸Chi je jäy ajcxy cömayipy Dios co miich ajcxy mguydunipy iich ndiy'ajt tiydudägy, tim jadu'n nej camuuxy'aadz y'aacx ytiim'aty may'amy. Co je jäy ajcxy ixipy nej tudägy mguydungixy iich ndiy'ajt, chi je jäy ajcxy tiydudägy nejhuihuipy co ti nyaj'ixpicyich miich ajcxy. ⁹Jadu'n nej Dios Teedy xychoyich xyjihuiyich, nañ tim jadu'n iich miich ajcxy ti ndzocy ti njihuüyich. Ndzogipy njihuühuibyich miich ajcxy huinixii co ca' ajcxy xy'ixmájtzbicyich ndiy'ajtich.

¹⁰Co mguydunähuipy ajcxy jadu'n nej nyajnajtz'ane'miiygixy, ndzogipyich njihuühuibyich miich ajcxy huinixii. Tim jadu'n nej nguyduñich yi huidibi Dios Teedy xyajnajtz'ane'miiybich, e yi' xychojcpich xyjihuiybich huinixii.

¹¹Cham jadayaabi ayuc nyajnajtz'ane'miiygixy, jigix jotcujc m'ijtcixipy. Jadu'n nej jotcujc ti n'ityich, e nañ jadu'n miich ajcxy mjotcujc'adipy anaxy. ¹²Jadaabi ayuc iich miich ajcxy nyajnajtz'ane'miiybich co naychójcigix nayjihuiyigix nidüg nidüg, tim jadu'n nej iich miich ajcxy ndzocy njihuü. ¹³Je tiy'ajt jac'oybi co migügtjic ajcxy naychogiiyb nayjihuihuüyb, co tüg jäy ciyegipy yjugy'ajtin miid ymigügtjic ycixpi. ¹⁴Iich miich ajcxy migüg'ajtyp, pen mguydumyb nej ajcxy nyajnajtz'ane'miiygixy. ¹⁵Jadu'n nej xii tiempo yjacnicxa'n, ca' miich ajcxy n'ocnaydijnip iich ndumbi. Com je tumbi ca' huinjihuüy huidibi yhuindzin ytumyb. Hue' miich ajcxy

nyajnagyich nmigügtijcich, com tüg'óciy tiy'ajt tiibi nmidooyich ma iich nDeedy, yi Dios Teedy, ti iich miich ajcxy nnimaaygixy. ¹⁶Ca' nminaanim iich miich ajcxy ti xyhuin'ixy. Iich miich janchtiy ajcxy ti nhuin'ixy. E ti iich miich ajcxy nyajniibicy co nicxy mgapxhuäxcixy iich n'ayuc. E nañ mayjäy mijpidägipy je ayuc huidibi miich ajcxy mgapxhuäcxipy. E nañ iich n'ayuc, huidibi miich ajcxy mgapxhuäcxipy, y'idipy ma je jäy ajcxy yjot yhuinmañ huinixii. Paady ycix tüg'óciy tijaty miich ajcxy mbijctzooyb ma Dios Teedy miid iich nxii, y' ajcxy xymöhuipy. ¹⁷Jada ayuc ajcxy yam nyajnajtz'ane'miiyb co ajcxy mnaychogiiyb mnayjihuihuiiyb miñ xyipy.

**Je maybi naaxhuiñyäjy ca' ajcxy
ixaangixy Jesús etz cham je' yjäy**

¹⁸Co je may naaxhuiñyäjy ca' xy'ixaangixy miich ajcxy, ca' ajcxy ooy mhuinmayipy, com mnejhuiiyb ajcxy co iich nañ jadu'n jac jayijp ca' y' ajcxy ti xy'ixáangixyich. ¹⁹Co ixypy ytügüy miich ajcxy m'ayuc mdiy'ajt miid je jacjadyii naaxhuiñyäjy y'ayuc ytiy'ajt, huin'it ixypy ajcxy xychojccixy xyjihuiygixy, com tú'ciy miich ajcxy mhuinmañ ixypy miid y' ajcxy yhuinmañ. Janch com co ca' ytügüy miich ajcxy m'ayuc mdiy'ajt miid je jacjadyii naaxhuiñyäjy y'ayuc ytiy'ajt, paady je jacjadyii naaxhuiñyäjy ca' ajcxy xy'ixa'nip. Com iich miich ajcxy ti nyajjihphuijtzüdy, jadu'n nej yi jacjadyii naaxhuiñyäjy

ajcxy chinaaygixy yjogy'ajtcixy. ²⁰M'ajihuihuiib ajcxy jadu'n nej ti nnimaaygixy co iich miich ajcxy xyhuindzin'ajtpich, paady jac mij iich ca'ydi miich ajcxy. Jadu'n nej naaxhuiñyäjy ajcxy ti xy'ixhuidityich ti xypahuidityich, nañ jadu'n miich ajcxy y' xy'ixhuididañ xypahuididañ. Nañ may je jäy huidibi ca' ti xycapxymidooyich, nañ jadu'n may je jäy huidibi miich ajcxy ca' xycapxymidohuaangixy. ²¹Nijot ajcxy y'iditzaangixy miid miich ajcxy ycixpi, com ca' ajcxy ix'yadyii Dios Teedy huidibi xyquejxyich ya naaxhuiñ.

²²Co ixypy ca' ti nmiiñich ya naaxhuiñ nyajnimäyich je jäy ajcxy Dios ytiy'ajt, ca' ixypy ajcxy pocy miidity. Per com ti nmiiñich ya naaxhuiñ, paady cham ypocy ajcxy miidity co ca' ajcxy xy'ixa'nich. ²³Je jäy ajcxy huidibi ca' xy'ixa'nich, jadu'n nipaady nej iich nDeedy ca' ajcxy ixaangixy. ²⁴Co ixypy iich ca' ti nduñich ma yi ajcxy yhuinduu mijhuinmañ, huidibi ca' ni pin jäy tuñi, ca' ixypy ajcxy pocy miidity. E janch ti ajcxy ooy ja'ijxcixy je mijhuinmañ, e ca' iich y' ajcxy xy'ixa'n, e nañ ca' ixaangixy iich nDeedy. ²⁵Paady jada jadu'n ytuñyii yjadyii, jigix yajcuydunipy jadu'n nej ycojaayity ma yi judfojyäjy ajcxy ley ñecy, ma jadu'n yminañ: “Ni ti tiy'ajt ycaca'ty, co iich yi ajcxy ca' xy'ixa'nich.”

²⁶E co anajty xyñigidaaccixy yi Espíritu Santo, yi huidibi xycapxhuijip ajcxy, je huidibi miich ajcxy nyajnigüexam, chon ma Dios

Teedy, je huidibi Dios ytiy'ajt miid. Yi' xyñidiy'ajt'adaambich co Dios ytiy'ajt nmiididyich. ²⁷E miich ajcxy nañ jadu'n xyñidiy'ajt'adipich co Dios ytiy'ajt nmiididyich. Com iich miich ajcxy jayijp nyaj'ixpijctzondac Dios y'ayuc ytiy'ajt.

16 Ti ajcxy yam tiy'ajt njacyajnimaaaygixy, jigix ca' ajcxy m'ixtigihüägipy. ²Com judíojäy ajcxy xy'ixhuidzipy ajcxy ma ajcxy yi' ñaymujctac. Ypadaamy yi xii tiempo co miich ajcxy jäy xyaj'ögipy, hue' ajcxy tijipy co Dios anajty ooy jadu'n jäygidägy tiibi anajty ajcxy tuñ. ³Paady ajcxy jadu'n xytunipy jibic, je' co ajcxy ca' ix'yadyii yi Dios Teedy, etz nañ jadu'n ca' xy'ixy'adyijich. ⁴Paady iich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuühuüiyb ajcxy co ti anajty jayijp nnimaaygixy co ayo'n tzaachypi mminaxa'ñ myajnaxa'ñ ajcxy.

**Dios yjihui'ñ ymic'ajt tunam
ma jäy yjot yhuinma'ñ**

Ca' anajty ajcxy jada ti nyajnimäy miid jëgix nmiid'ity ajcxy. ⁵E cham janchtiy nnicxáanibich ma yi huidibi ti xyquexyich ya naaxhuñ. E ni tüg miich ajcxy xyca'amidooyich: "¿Ma mnicxa'ñ?" ⁶Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinjihuüiygixy. ⁷Oy ixypy miich ajcxy cham mjatajy mjamay, tiy'ajt nej mnina'ñich co jac'oy miid miich ajcxy ycixpi co nhuimbidityich ma Dios Teedy. Co ixypy ca' jiiby

nnicxa'ñich tzajpjoty, ca' ixypy xyñiminaangixy Dios yjihui'ñ ymic'ajt, je Espíritu Santo, je huidibi ajcxy xycapxhuijip. Per co iich anajty tzajpjoty ti nhuimbity, huin'it iich yi' miich ajcxy nyajniguexipy. ⁸E co anajty je Espíritu Santo miñ ya naaxhuñ, huin'it yi' yajjihui'ñybigipy jäy ajcxy ypocy. E nañ yajni'ixihuüpy je jäy ajcxy co Dios tiydunib miid ypocy ycixpi. ⁹Yi Espíritu Santo yajjihui'ñybigipy jäy ajcxy ypocy, co iich ca' ajcxy ti xymibicy ca' ajcxy ti xymijpidägyich. ¹⁰Je Espíritu Santo yajnejuhuüipy jäy ajcxy nej huaad cuychinaaygixy Dios y'ayuc ytiy'ajt. Com co iich nba'ttigihua'ñich ma Dios Teedy, e miich ajcxy ca' xy'ocjac'ixnibich. ¹¹Je Espíritu Santo yajhuinjihuüipy je jäy ajcxy co Dios tiydunib ajcxy miid ypocy ycixpi huidibi ajcxy ca' tiydudägy chinaaygixy. Com yi Dios ti yi' mujcu' tiyduñ miid ypocy ycixpi.

¹²Ooy may ayuc iich nmiidity hidibi njayajnimähuaamyich ajcxy per ca' miich ajcxy mhuijnihuüipy cham. ¹³Jacjiini mhuijnihuüipy ajcxy je ayuc hidibi njayajnimähuaamy ajcxy, co Dios quexipy je Espíritu Santo ya naaxhuñ hidibi tiy'ajt miid. Yi' je' miich ajcxy xyajhuinjihuüiydähuüpy tüg'óciy Dios ytiy'ajt. Com yi' ca' yci'mhuinma'ñ tunipy. Yi' janchtiy ñigapxtähuüpy tüg'óciy ayuc tiy'ajt huidijaty anajty ymidooyb ma Dios Teedy, e nañ yajniguëxictähuüpy tüg'óciy tiy'ajt hidibi mimb cidaacp. ¹⁴Je Espíritu Santo iich yi' capxpaady xyaj'idipyich,

com yi' iich ndiy'ajt miich ajcxy xyajhuinjihuñhuaam. ¹⁵Tüg'óciy huidibi Dios Teedy ymiid, nañ njé'ajtypich yi', paady jadu'n ti nmína'ñich co je Espíritu Santo xyajhuinjihuiydáaygixipy ajcxy iich yi n'ayuc yi ndiy'ajtich.

Jesús ñimay ymigügtijc co ajcxy yjotmay ahuimbidity jotcuje'ajtin

¹⁶Tim huaad'ajtp xii tiempo, co iich miich ajcxy ca' xy'ocjac'ixip. Chi co xii tiempo yjacnajtzninixihuip, huin'it iich miich ajcxy xyjac'ixipy jadüg'oc.

¹⁷E huin'it ajcxy nijëjty Jesús ydiscípulos ajcxy ñayñimaayi miñ xyipy ac jëyi:

—¿Ti jadu'n ytijyp? Co jadu'n ymína'ñ, co tim huaad'ajtnip xii tiempo mina iich miich ajcxy ca' xy'ocjac'ixnibyich, e co yjacnajtzninixihuip xii tiempo, huin'it miich ajcxy xyjac'ixipyich jadüg'oc, com nnicxaamich ma Dios Teedy. ¹⁸Chi ajcxy jadu'n ñayñimaayi miñ xyipy:

—¿Ti jadu'n ytijamy? Co jadu'n ymína'ñ co tim huaad'ajtnip xii tiempo. Ca' iich ajt nhuinjihuñyim ti jadu'n ytijamy.

¹⁹Com Jesús ñehhuiyb anajty nej ajcxy yja'amidoohua'ñyii, chi nimay ajcxy:

—Yi' miich ajcxy ooy mjayajtiñhua'ñ. ¿Nej co jadu'n ti nmína'ñich? Tim huaad'ajtnip xii tiempo co iich miich ajcxy ca' xy'ocjac'ixnipy. E chi yjacnajtzninixihuip xii tiempo, e chi miich ajcxy xyjac'ixipyich jadüg'oc. ²⁰Janch janch iich miich yam nnimaaygixy co

mjotmaybaadip ajcxy, e nañ myäxip ajcxy miid jotmay. Chi je naaxhuiñyäjy ajcxy huidibi ca' xymijpidägyich, xondägam ajcxy, e miich ajcxy nañ mjotmaybaadip. Per yi mjotmay ajcxy ahuimbidity tüg xondaacin. ²¹Jadu'n ajcxy mjada'ñ jadu'n nej tüg töxyjäy tzaachypi jihuiy co y'ung yma'xung'ada'ñ. E co ti yma'xung'aty ypi'c'ung, chi jäydgoy yi tzaachypi miid xondaacin co tüg jäy ti ymiñ ya naaxhuiñ. ²²Tim jadu'n nej yjaty miid je töxyjäy, nañ jadu'n yjada'ñ miid miich ajcxy. Cham ajcxy jotmay mjihuñ ma m'aa mjot, e chi co xy'ixipyich jadüg'oc miich ajcxy, huin'it ajcxy m'aa mjot yxondäga'ñ. E ni pin huaad mxondaacin ajcxy xycapijcipy.

²³Je huin'it xiimbi (co anajty je Espíritu Santo ti ymiñ ya naaxhuiñ) ca' iich miich ajcxy ni ti xyjacyajmibijctzohuipyich, com janch iich miich ajcxy yam jadu'n nimaaygixy co tüg'óciy huidijaty myajmayajtcixyp, chi ajcxy mbijctzohuipy ma Dios Teedy miid iich nxii, e xymöhuipy ajcxy yi'. ²⁴Chambaadni ca'ni ni ti ajcxy mbijctzoy ma Dios miid iich nxii. Pijctzoogix, e xymöhuipy ajcxy yi', jigix mjotcugihuip ajcxy anaxy.

Jesucristo ymimadac je jibic-huinma'ñ ya naaxhuiñ

²⁵Tüg'óciy jada ayuc tiy'ajt ac jihuimbit miich ajcxy ti nyajnimäy. Huingomb xii tiempo mina tiydudägy ajcxy nyajmiidmiydactähuipy yi Dios Teedy y'ayuc ytiy'ajt yajxon, e

ca' y'ocjiihuimbitiñ. ²⁶Je huin'tit xii co anajty iich ti nhuimbityich ma Dios Teedy, jëbi miich ajcxy mbijctzoogixy ma Dios Teedy tijaty ajcxy myajmayajtyp. Co ti mbijctzóogixipy miid iich nxii, xymóoygixipy yi' Dios Teedy. Ca' ycopicyity co iich yi' nmibijctzohuipy miid miich ajcxy ycixpi. ²⁷Com yi' Dios Teedy nañ xychojep xyjihuiiyb yi' miich ajcxy. Com miich ajcxy jayijp ti xychocyich ti xyjihuiyich, e ti mmibicy ajcxy co ti ndzooñich ma Dios Teedy, paady Dios miich ajcxy xymóhuipy tijaty anajty myajmbijctzooyb. ²⁸Jiiby iich ndzooñ ma Dios Teedy jajpaady, co nmiñich ya naaxhuiñ, per jadachambi n'ixmájtznibyich jada naaxhuiñybi, e nhuimbijtnich ma Dios Teedy.

²⁹Huin'tit je' ydiscípulos ajcxy yminañ:

—Cham janchtiy tudägy miydägy, ca' m'ocyajtuuni jiihuimbit ayuc.

³⁰Cham iich ajcxy nnejhuüy co miich mnejhuüyday tüg'óciy tiy'ajt. E ti xyajnimaydäyich co anajty ca' ti tiy'ajt iich ajcxy nmibicy co miich mdzooñ ma Dios.

³¹Chi Jesús y'adzooy:

—¿Nej mmibijcyp cham jada ayuc jadu'n nej ti nnimáaygixy'?

³²Jihuiñybijccix co huingonip je xii tiempo, e ti tim paady mina miich ajcxy mgueec-huäcxtáaygixipy nidüg nidüg ma pin timdzocy, e xyajhuí'mgixich naydüg. Per ca'p iich nnaydügity, com yi' Dios Teedy yi' ijtp miid iich. ³³Miich ajcxy yam jada ayuc nyajnimaaayb, jigix ajcxy jotcujc'ajtin mbaadip ma

iich. Ya naaxhuiñ mbadamy ajcxy ayo'n etz tzaachypi. Jotcugiyygix, ca' mdajcixy maygixy, com ti nmimadägyich yi' jibicpi ya naaxhuiñ.

Jesús ymibijctzou Dios miid ydiscípulos ajcxy ycixpi

17 Co Jesús jadu'n yminañ jayijp, chi ypat'lijxy tzajpcíxy, chi Dios Teedy pa'tcapxy nimay:

—Dios Teedy, ti hora paady mina ayo'n nyajnaxa'nñich jadu'n nej miich jayijp'aty myajnihuinmayiyy. Yajniguëxig iich nmic'ajt iich n'oy'ajt, com iich miich nDeedy'ajtypich, jigix iich nañ jadu'n nyajniguëxigibyich miich nmic'ajt miich m'oy'ajt ma yi' jäy ajcxy. ²Com miich ti xymöyich mic'ajt ma tüg'óciy jäy, jëbi nmöyich ajcxy jugy'ajtin huídibi ca' ycixipy ytigoyipy. Nmóhuibyich jada jugy'ajtin tüg'óciy jäy ajcxy huídibi miich ti xymöyich. ³Je jäy ajcxy huídibi ix'y'ajtp je Dios janchypi, je Dios tügpajcpi etz y'ixy'ajtyp nañ jadu'n Jesucristo huídibi ti mguexy ya naaxhuiñ, ymiid ajcxy jugy'ajtin huídibi ca'ycixipy ytigoyipy niminaa.

⁴Ti iich nyajniguëxigyich miich ajcxy yi' nmic'ajt ya naaxhuiñ, co iich ti nduñ yi' mdung huídibi miich xyajniñijcich. ⁵Jadachambi Dios Teedy yajmijtgiiyygich miich, miid je mic'ajtin huídibi anajty nmiidich ma miich mhuiduu co anajty ca'ni naaxhuiñybi chondacyñi.

⁶Ti iich miich ya naaxhuiñ nyajniguëxici yi' nmic'ajt ma yi' jäy ajcxy huídibi miich xymooyich,

huidibi miich mhuin'ijx ma naaxhuiñjyäy ajcxy. Miich yi' ajcxy mjäy, e miich ti xymöyich, e ti ajcxy miich m'ayuc cuydungixy.

⁷Jadachambi ñejhuiñjyap yi' ajcxy, co tüg'óciy tijaty tiy'ajt iich miich yi' xymooyb, jiiby yi' chooñ tzajpjoty ma miich. ⁸Com yi' ayuc huidibi miich ti xymöyich, ti iich yi' ajcxy nyajnimaydäy, e ti yi' ajcxy cöbijccixy. E nañ ti ajcxy huiñjyaygixy tiydudägy co iich jiiby ndzooñich ma miich, e nañ ti ajcxy mibijccixy co miich ya naaxhuiñ xyquejxyich.

⁹Miid yi' ycixpi ajcxy miich Dios Teedy nmibijctzooy, ca' nminaanim miid jacjadyii naaxhuiñjyäy ajcxy ycixpi nmibijctzoy. Miid yida'ajty ycixpi ajcxy huidibi miich ti xymöyich, com nañ mjé'ajtyp miich yi' ajcxy. ¹⁰Tüg'óciy tijaty iich njé'ajtyp, nañ mjé'ajtyp miich yi', e tijaty miich mjé'ajtyp nañ njé'ajtyp iich yi'; e iich nmic'ajt niguéxi'cp yi' ma yi' ajcxy chinaayin yjugy'ajtin.

¹¹E ca' n'ocjacyajpadaanich ya naaxhuiñ. Iich njäy ajcxy jacyajpadam ya naaxhuiñ. Nnícxnibich jiiby tzajpjoty ma miich. Dios Teedy, cuend'at iich ndiscípulos ajcxy miid miich nmic'ajt huidibi miich ti xymöyich, jigix yi' ajcxy tú'ciy yjot yhuinma'n yajpaadipy ma miich, tim jadu'n nej iich ajt tú'ciy njot nhuinma'n nyajpaatim. ¹²Co anajty iich njac'yaajity naaxhuiñ miid iich njäy ajcxy, ti ngüend'atyich anajty ajcxy miid je mic'ajt huidibi miich xymooyich. E ni tüg ajcxy ca' yhuinma'nydigooy. Abicy iich n'octimpidägy je huidibi

nayyajhuinma'nydigooyi (je Judas Iscariote), co yi' anajty jadu'n yajcuydunam jadu'n nej jaybety ymiin miid yi' ycixpi etz miid iich ycixpi.

¹³Cham iich miich niba'ttigihuaani jada!. Miich m'ayuc mdiy'ajt nyajnimaybich jada naaxhuiñjyäy ajcxy huidibi nyaj'ixpijycypich, jigix agujc jotcujc yhui'mip ajcxy. ¹⁴Ti iich ajcxy yi' nyajnimaydäyich miich m'ayuc mdiy'ajt. E ca' ajcxy y'ixa'ñyii yi' naaxhuiñjyäy ajcxy huidibi ca' xymijpidägyich. Com je' co ajcxy yjot yhuinma'n ti yajtigach, ca' ytügüy miid yi' jacjadyii naaxhuiñjyäy yjot yhuinma'n. Jadu'n nej iich ca' ytügüy njot nhuinma'n miid naaxhuiñjyäy ajcxy yjot yhuinma'n. ¹⁵Ca' iich cham miich nmibijctzoy co myajpidzimipy iich ndiscípulos ajcxy ma jada naaxhuiñybi. Hue' janchtiy tun may'ajt cuend'at ajcxy ma yi' ca'oybi ymiin. ¹⁶Yi' ajcxy yjot yhuinma'n ca' ytügüy miid yi' jacjadyii naaxhuiñjyäy ajcxy yjot yhuinma'n. Tim jadu'n nej iich ca' ytügüy njot nhuinma'n miid yi' jacjadyii naaxhuiñjyäy ajcxy yjot yhuinma'n. ¹⁷Yajhuaatzi ajcxy yjot yhuinma'n miid miich m'ayuc, com yi' m'ayuc yi' je' tiy'ajt miid. ¹⁸Jadu'n nej miich xyquejxyich ya naaxhuiñ, nañ jadu'n iich yi' ajcxy nguejxhuäcxyich ya naaxhuiñ. ¹⁹Miid yi' ajcxy ycixpi ti nnaygyeygyiijich amuumdügjot ma miich, jigix yi' ajcxy nañ jadu'n ñaygyeygyiib amuumdügjot ma miich, co ajcxy cuydunipy miich m'ayuc mdiy'ajt.

²⁰E ca' iich jada'ajty ajcxy nibijctzohuüyich. Hue' iich janchtiy nibijctzohuüydaaybich tüg'óciy jäy ajcxy huidibi xymibíjciBich xymijpidägibich miid yi ayuc huidibi iich ndiscípulos ajcxy ycapxhuäcxipy. ²¹Huen ajcxy nidüg'óciy yjot yhuinma'n jaytügüy, jadu'n nej miich Dios Teedy mjot mhuinma'n yajpaady ma iich, e iich njot nhuinma'n yajpaady ma miich. Co yi' ajcxy yjot yhuinma'n jaytügühuipy miid iich ajt njot nhuinma'n, huin'it jacjadyii naaxhuünyjäy ajcxy mibígipy co miich xyquejxyich ya naaxhuüñ. ²²Ti iich ajcxy nmöyich je tiy'ajt etz je oy'ajt huidibi iich miich ti xymöy, jigix ajcxy yjot yhuinma'n jatyimy jaytügühuipy ajcxy, jadu'n nej iich ajt njot nhuinma'n yajpaatim tú'ciy. ²³Hich yajpatpich ma iich njäy, e miich nañ myajpatp ma iich, jigix tiydudägy ajcxy tügmucy y'idipy, e nañ jigix naaxhuünyjäy ajcxy jatyimy nejhuühuipy co miich xyquejxyich ya naaxhuüñ, e nañ co yi' ajcxy ti mdzocy ti mjihuüy jadu'n nej iich miich xychocy xyjihuiyich. ²⁴Dios Teedy ndzojcpych co yi jäy ajcxy huidibi miich ti xymöyich y'idipy ajcxy nañ jadu'n ma anajty n'ityich jilby tzajpjoty, jaydëbi ajcxy ixipy iich nmic'ajt iich n'oy'ajt huidibi miich ti xymöyich. Com miich ti xychocy ti xyjihuiyich jacjayijp ca'ni anajty naaxhuünybi myajcojyñi. ²⁵Dios Teedy, miich ooy mmijity mjanchity, e yi jacjadyii naaxhuünyjäy ca' ajcxy yi' xy'ixy'ajtyp. Hich miich n'ixy'ajtyp. Hich njäy ajcxy ti mibicy ti mijpidägy co miich xyquejxyich

ya naaxhuüñ. ²⁶Ti nyajnimaayich yi' ajcxy pin miich, co miich je' Diosip. E njacyajnimähuaamyich yi' ajcxy tiydudägy, jigix yi' ajcxy nañ jadu'n ñaychogiiyb ñayjihuihuüyb nidüg nidüg, jadu'n nej miich xychocyich xyjihuiyich, e nañ jadu'n jigix iich ndiy'ajt yajpaadipy ma yi' ajcxy yjot yhuinma'n.

Ymajtz ajcxy Jesús

18 Co jadu'n Jesús ycapxymiydacy jayijp, chi jada' ñicxy miid je jäy ajcxy huidibi anajty ajcxy yaj'ixpíjcp. Ñicxy ajcxy jim'amy huoc ninaxy, je huoc hue' anajty xiijity Cedrón. Ñicxy ajcxy jim ma anajty tüg aguemy. Chi Jesús ytigüy ma je aguemy miid ydiscípulos ajcxy. ²Judas huidibi anajty cäyegam Jesús, ñejhuüiyb anajty ma je it ma anajty miid'oy canaag'oc je' ydiscípulos ajcxy. ³Chi jada' Judas miiddzooñ soldados ajcxy etz jacjadyii tungmiidpi huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ymiid ajcxy linterna, ymiid ajcxy chinjiin etz canaagnax tijaty huidibi anajty ajcxy miid chiptuñ. ⁴E Jesús com ñejhuüydaayb anajty tüg'óciy nej anajty yjada'n y'ayohua'n, chi jijpcohuägüy je ymaymidzip ajcxy, e nimay:
—¿Pin ajcxy m'ijxtaayb?
⁵Chi je' ymidzip ajcxy y'adzooy:
—Yi' iich ajcxy n'ixtaayb je Jesús, je Nazaret jäy.
Chi Jesús yminañ:
—Hich jëdu'n.
Je Judas huidibi anajty cäyepc Jesús, jim anajty ytinäy miid

Jesús ymidzip. ⁶Co Jesús jadu'n yminañ: “Hich jëdu'n.” Chi ajcxy yëphuimbijtay jadu'ñyi. ⁷Chi Jesús jadüg'oc y'amidooy ajcxy:

—¿Pin ajcxy m'ijxtaayb?

Chi ajcxy jadüg'oc y'adzooy:

—Yi Jesús, je Nazaret jäy. ⁸Chi Jesús yminañ:

—Ti ajcxy njanimäy co hich jëdu'n. Pen janch hich miich ajcxy xy'ijxtaayb, najtzmazdiydäy jadayaab hich nmigügtijc ajcxy, huen nicxcixy.

⁹E jadu'n yajcuyduñ je ayuc co anajty Jesús c'i'm ti yminañ: “Tüg'óciy jäy huidibi nDeedy ti xymöyich, ca' ni tüg jëbi huaad ytigooy.” ¹⁰Chi jada' je Simón Pedro huidibi anajty miid tüg espada, juudy je y'espada ma ñidijc, e chi yajtzaachiiyi je Teedy mijtungmiidpi ytumbi, tüg yta'tz'ac aa'oy'amybi yajminájciy. Je tumbi hue' anajty xijjity Malco. ¹¹Chi Jesús nimay Pedro:

—Pidäg m'espada ma ñidijc. Ca' mnejhuüy co copicy nyajnapyich je tzaachypi je ayo'n huidibi Dios Teedy ti xyajnigo'adugiyich. Min n'ocminaxy n'ocyajnaxyich jada tzaachypi jadu'n nej ixipy tüg tasi ta'm'ujtznii ngo'uucnaxyich.

Jesús ma je Teedy mijtungmiidpi yhuinduu

¹²Chi je soldados ajcxy, je soldado yhuindzin etz judíojäy ajcxy ytungmiidpi huingohuägiiy ajcxy Jesús. Chi ajcxy majch, e chi ajcxy cixojch. ¹³Chi ajcxy jayijp yajnicxy Jesús ma Anás yajpaady, je' anajty Caifás ymid'ajtyp, je huidibi anajty mijtungmiid ma teedytije ajcxy

yimiñ je huin'it jimijt. ¹⁴Je Caifás je' anajty ti yecy je capxhuijin ma yi judíojäy ajcxy co tügtecy yminañ: jac'oy co tüg jäy y'ögipy miid tüg'óciy naax cajp ycixpi.

Pedro yminañ co ca' ix'y'adyii Jesús

¹⁵Simón Pedro miid jadügpí ydiscípulo ypanicx ajcxy Jesús (co je ymidzip yajnicxi mach). E je jadügpí ydiscípulo ix'y'ajtip anajty yajxon je teedy mijtungmiidpi, paady ytigiüy axam huin'it co Jesús ymidzip yajtigiüy ma je teedy mijtungmiidpi ytijc. ¹⁶E je Pedro jiiby je' yhui'miy ma tijc aguu. E je jadügpí ydiscípulo co anajty ajcxy ñay'ix'y'adyii miid je teedy mijtungmiidpi, chi ypidzimy migapxy je tijc aguu adinaayb, chi Pedro ajcxy yajtigüy jiiby tigoty. ¹⁷Chi jada' je töxy'anäg huidibi anajty tijc'aguu adinaayb, nimay je Pedro:

—¿Nej ca' miich nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸Je tumbidijc ajcxy etz je soldadtijc ajcxy ti anajty ajcxy oy jün yajmijiiygixy co anajty chachtichity, e Pedro nañ jim anajty nañ jadu'n miid xamy ajcxy.

Je teedy mijtungmiidpi yajcomidou Jesús ypocy

¹⁹Chi je teedy mijtungmiidpi y'amidooy Jesús pinjaty anajty ti yaj'ixpicy etz tijaty anajty ti yaj'ixpicy. ²⁰Chi Jesús y'adzooy: —Ti hich oy njacapxy njamiydägy mayjäyoty. E ti hich njatyimy nyaj'ixpicyich ma miich ajcxy

mnaymujctacin etz ma Dios ytiç, ma yi judiojåy ajcxy nidüg'óciy ñaymugyii. Ca' ni ti ameech ti nngapxyich. ²¹¿Na'amy co xyjactim'amidooyich ti anajty ti nyaj'ixpicyich? Yi' ajcxy amidou pinjaty ti xy'amido'ljtich n'ayucich, yi' ajcxy nejhuuiyb ti iich jadu'n ti nyaj'ixpicyich. Yi' ajcxy tüg'óciy ñejhuídaayb nejaty iich ti nmina'ñich.

²²Co jadu'n y'adzooy Jesús, huin'it tüg judío tungmiidpi huidibi anajty jim huigon tinaayb ma Jesús, chi tüg ci' acojxigy Jesús, chi minañ:

—¿Nej co jadu'n jibic m'adzooy yi teedy miitungmiidpi?

²³Chi Jesús y'adzooy:

—Pen jibic iich ti n'adzooy yec tiy'ajt nej co yjibicity. Pen oy iich ti n'adzooy, ¿nej co xycoxyich?

²⁴Chi Anás nimay soldadtijc co huen Jesús yajnicxy cixoch jim ma yi Caifás ytiç, je teedy miitungmiidpi.

Chi Pedro jadüg'oc yminañ co ca' ix'yadyii Jesús

²⁵Simón Pedro jimni anajty ytinäy ma jimba' yxamy anajty, chi ajcxy amidoy jadüg'oc:

—¿Nej cay yi' miich xyaj'ixpijcp nañ jadu'n?

Chi Pedro jadüg'oc coyüch Jesús yminañ:

—Ca' je' n'iichity.

²⁶Nidügti ajcxy je teedy miitungmiidpi ytumbi, je' anajty y'amigüg yi Malco, huidibi Pedro yta'tz'ac quejtzpujxi, chi jadu'n yminañ:

—¿Nej ca' mdijy n'ijxyi jim ma je aguemy miid Jesús?

²⁷Chi Pedro midugiig'oc oy coyüch yhuindzin, e tim huin'itiy tzey oy yaaxigy.

Jesús ma je gobernador yhuinduu

²⁸Chi ajcxy jim yajtzoñ Jesús ma Caifás ytiç yajnicxy ajcxy ma agujctijc, tim jopyñi anajty. Chi je judiojåy ca' ajcxy ytiçiy ma agujctijc, com ca' anajty ytundigoyaangixy miid judiojåy ycostumbre. Ca' ajcxy ytiçihua'ñ anajty ma je romanojåy gobernador ytiç amayxiijoty, e ca' anajty ajcxy ñayyajjibiccihua'ñyii. Com co jadu'n ycanayyajjibicciyi ajcxy, e huin'it ca' ajcxy ycacaay ma je pascua xii adzuu'ajtin. ²⁹Co ca' ajcxy ytiçihua'ñ anajty ma je agujctijc, chi je gobernador Pilato nibidzimy ajcxy tiba'y ma anajty ajcxy miidity Jesús cuend'aty. Chi Pilato yminañ:

—¿Ti xihuín ajcxy mmiid, miid jadayaabi yëdyijc?

³⁰Chi ajcxy y'adzooy:

—Co ixypiy ca' ti jibicpi tuñ, ca' ixypiy iich ajcxy ya yi' nyajmiñ ma miich.

³¹Chi Pilato yminañ:

—Yajnicxcix miich ajcxy. Nicx tiydingix jadu'n nej miich ajcxy mley y'ané'my.

Chi je judiojåy ajcxy y'adzooy: —Iich ajcxy ca' ni ti mic'ajt nmiidity nicxy iich ajcxy njäyyaj'ögy.

³²Co jadu'n ajcxy yminañ, chi jadu'n ajcxy cuyduñ je Jesús yci'm'ayuc jadu'n nej anajty ti yminañ ti o'cin anajty ypadamy.

³³Chi Pilato jadüg'oc ytiçiy jiiby agujctigoty, chi coyaaxiyy Jesús, chi nimay:

—¿Nej miich je' rey'ajtp ma yi judío'jáy ajcxy?

³⁴Chi Jesús y'adzooy:

—¿Nej mgi'mhuinma'ñ miid xy'amidooyich pen iich nrey'ajtpich, o huingjáy ti xyajnimäy co nrey'atyich?

³⁵Chi jada' Pilato y'adzooy:

—¿Nej nañ judiojáy jada' iichi? Mgi'mnaax mgi'mgajp etz je teedy mijtungmiidpi ti xyciyecy ma iich.¿Ti ti mdundigooy?

³⁶Chi Jesús y'adzooy:

—iich ca' n'ane'myich ya naaxhuiñ. Huingduum iich n'ane'min nmiididyich. Co ixypy ya naaxhuiñ n'oc'ane'myich, tüg'óciy iich nmigü'tijc ajcxy ti ixypy ajcxy tziptungixy, ti ixypy ajcxy xyñihua'ñich. E ca' ixypy ti naygyegyijich ma yi judío'jáy tungmiidpi ajcxy. Per janch iich ca' iich ya naaxhuiñ n'ane'myich.

³⁷Chi Pilato y'adzooy:

—¿Nej mrey miichi?

Chi Jesús yminañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jáy pinjaty tiy'ajt cuydumb xy'amido'íjtibich yi' n'ayucich.

Pilato y'ane'my huen Jesús yaj'ögyii

³⁸Chi Pilato y'adzooy:

—¿Ti jadu'n mdiy tiy'ajt tiydudägy pi?

Jadu'nyi je' jada'ajty yjacminañ, chi pidzimy jadüg'oc tiba'y ma anajty je judío'jáy ajcxy. Chi ajcxy nimay:

—Ca' iich ni ti bocy nbaadyich ma jada jáy ma yi romanojáy yley.

³⁹E com miich ajcxy miid tüg costumbre co tüg nnajtmadziyim machyjáy miid jada pascua xii ycxipi, ¿nej mdzojycp ajcxy co nnajtmadzihuibyich jada judío'jáy reyí?

⁴⁰Chi ajcxy nidüg'óciy minanday:

—Jadayaabi jáy ca'

mnajtmadzihuipy, yi' janchtiy mnajtmadzi' yi Barrabás.

Barrabás hue' je' anajty tüg meetzpi.

19 Chi jada' Pilato ané'min pidacy co huen ajcxy Jesús huinhuopy jiphuopy. ²Chi jada' je soldados ajcxy yaj'oyiiy tüg corona mij'apy pa'apy, chi ajcxy yajcojeniy Jesús. Chi ajcxy yajnijeniiy tüg rey yhuít ucypi ycolor. ³Chi soldados ajcxy huingohuägiiy jadüg'oc capxpooxcixy yajxigy'amy, nimaaygixy:

—iViva miich judío'jáy rey!

Chi ajcxy ooy huingojxy jipcojxy.

⁴Chi Pilato jadüg'oc ypidzimy tiba'y. Chi nimay je mayjáy:

—Cham ajcxy nyajpidzimy tiba'y jada Jesús, jigix ajcxy mnejhuihuip co ca' ni ti pocy ti nbaadyich ma yi'.

⁵Co Jesús ypidzimy tiba'y miid je apy corona ma ycohuajc etz je rey yhuít ucypi ycolor. Huin'it Pilato yminañ:

—Ijxcix, cha je yéydijc.

⁶Co je teedy tungmiidpi etz je judiojáy ajcxy ijxy, chi ajcxy yminanday nidüg'óciy aguipxyjatyi:

—Yajcruudzpet, yajcruudzpet.

Chi Pilato yminañ:

—Yajcruudzpejtcix miich ajcxy, janch iich ca' ni ti tiy'ajt nbaadyich nej iich yi' nyajcruudzpedipy.

⁷Chi je judiojáy ajcxy y'adzooy:

—iich ajcxy miid tüg cötujcin, jébi y'ögy miid iich ajcxy ngötujcin

ycixpi, com ti ycapxtigooy co ymina'n co yi Dios yteedy'ajtyp.

⁸Co jada ayuc midooy Pilato, chi nigi chigiygoty. ⁹Chi ytigiiy jadüg'oc ma je cötujctac miid Jesús, chi nimay:

—¿Ma miich tiiyi mgogajpity?

E Jesús ca' y'adzooy.

¹⁰Paady Pilato ymina'n:

—¿Hich miich ca' xy'adzohua'n?

¿Ca' mnejhuüy co nmiididyich mic'ajt jëbi nnajtmadzïy etz nañ jëbi nyajcruudzpety?

¹¹Chi Jesús y'adzooy:

—Ni ti mic'ajt ixypiy mgamiidity ma iich, pen ca' ixypiy mic'ajt ti xymöyich yi huidibi ane'mb jiiby tzajpjoty. E paady ycixpi yi tiibi iich xyciyecyich nigi yi' pocy miidity ca'ydi miich.

¹²E huin'it Pilato ooy yjahuinma'n ixtay nej huaad ca' jëbi ocnajtmadzïy Jesús. E je judíojäy, je Jesús ymidzip, nigi anajty ajcxy chachxi'idich:

—Pen miich mnajtmadzïyb jada Jesús, huin'it ca' m'ocjacnaymigüg'ajtinipy miid yi mhuindzin je César huidibi ane'min ti xymöy. Com tüg'óciy pinjaty naydijip rey, ca' yi' miid nay'ixa'nïyi je César.

¹³Co Pilato jadu'n ayuc midooy, chi yajpidzimy Jesús tiba'y. Chi Pilato y'ixtacy jim ma je y'ane'mdac ycötujctac, jim ma je it huidibi anajty xiijip Empedrado, hebreo'amy xiijity Gabata. ¹⁴Hue' tim cujcxii anajty, e chi com jabom anajty je pascuaxii ycodiicxni, co Pilato jadu'n nimay judíojäy ajcxy: —Cha ajcxy jada mrey.

¹⁵E je' ajcxy y'adzooy:

—Huen ögy, huen ögy.

Yajcruudzpet.

Chi Pilato ymina'n:

—Miich ajcxy mrey, ¿miñ n'ocyajcruudzpétyichi?

Chi je teedy tungmiidpi ajcxy y'adzooy:

—Hich ajcxy ca' iich ajcxy huingbi rey nmiidity, jëyi César iich ajt nrey'ajtim.

¹⁶Chi Pilato cïyejcy Jesús ma je judíojäy ajcxy, huen ajcxy ci'm yajcruudzpety. Huin'it ajcxy Jesús nihuaägiy. Chi ajcxy yajtzoön.

Yajcruudzpejty ajcxy Jesús

¹⁷Chi ajcxy je cruudz Jesús ci'm yajquejycabiïy. Miid nicx ajcxy ma je it xiijity o'cpi cohuajc, hebreo'amy xiijity Gólgota. ¹⁸Jim ajcxy yajcruudzpejty quipxyi miid jametz jäy, tüg anajty'amy, jadüg a'oy'amy etz Jesús cuje'amy. ¹⁹Chi Pilato ane'my huen cijxjay ayuc ma je cruudz, e jadu'n je ayuc ajcxy jay: “Jesús, Nazaret jäy, je judíojäy ajcxy yrey.” ²⁰May ajcxy ooy je judíojäy capxy je ayuc huidibi anajty cijxjay ma je cruudz. Com je it ma anajty ajcxy Jesús ti yajcruudzpejtcixy mihungon anajty Jerusalén. Hue' anajty yjayity: hebreo'amy, latin'amy etz griego'amy. ²¹Chi je teedy mijtungmiidpi ajcxy nimay je Pilato: —Ca' ixypiy jadu'n ti mjay: “Judíojäy yrey”. Hue' ixypiy ti mjay: “Yi' jadu'n naydijip iich judíojäy xyrey'ajtpich.”

²²Chi Pilato y'adzooy:

—Yi tiibi njaayich, ti iich yi' njaay, ca' nyajtigadza'nich.

²³Co soldados ajcxy yajcruudzpejtay je Jesús, huin'it

je' yhuít ajcxy huijtzi'ci. Chi ajcxy je huit yajhuäcxy midaa xpicy. Chi soldados ajcxy cijptüg ciichypijcy. Yi' yjocxhuit jadu'n nej anajty ytügijjpxuyüity. ²⁴Chi ajcxy ñayñimayi ac jëyi soldadtijc:

—Ca' huaad ajt n'agiidziyim jada jocxhuit. Tzoc ajt suerte n'oc'ijxim, jigix ajt nnejhuiyim pin anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n yminañ: “Yajhuäc ajcxy iich nhuit, e ma iich njocxnijen jim ajcxy suerte ijxy.” Je' je' huidibi soldadtijc ajcxy ycuyduun.

²⁵Jim ma Jesús ycruudzmijc, jim anajty ajcxy ytinäy: Jesús ytaj, je ytaj chi', je María (Cleofas ytöxyijc), etz María Magdalena. ²⁶Co Jesús ijxpaty ytaj etz je ydiscípulo huidibí anajty ooy nigí tzocy ma ytaj ymijc, chi nimay ytaj:

—Nan, iich nmigüg huidibi tinaayb ma miich mmijc, yi' xycuend'adip jadu'n nej jihuüy miich yi' xytaj'adyii.

²⁷Chi Jesús nimay je' ydiscípulo:

—Iich ndaj miich mgüend'adipy, jadu'n nej ixypy mgí'mdaj'adyii.

Jadu'n nej xii tiempo jac nicxni Jesús ytaj tzinaydaccpicy ma jada discípulo ytijc.

O'c Jesús

²⁸Co jadu'n ytundaayi yajtaayi, chi Jesús nejhuiy co ti anajty tüg'óciy ytundäyii yajtäyii jadu'n nej Dios tzocy. Huin'it jadu'n yminañ:

—Tidziyinibich.

Co jadu'n yminañ, je' anajty ycuydundaayb nej anajty ycojayity ma Dios ñecy miid yi' ycixpi.

²⁹Jim anajty tüg pi'c uugiñ miid anajty vinoxunni. Chi ajcxy je' yajxoogy tüg esponja (jadu'n yi' nej po't) miid vinoxunni, e chi yajjijp'eedziy tüg paxyijj, je' miid yajjädy je vinoxunni ma Jesús y'ahuac. ³⁰Co jada' Jesús co'uucnajxy je vinoxunni, huin'it jadu'n yminañ:

—Ti tüg'óciy nguydundäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyjijp

³¹Com jabom anajty je pascua mijxii (amayxii ooy), e nañ sábado xii anajty. Paady copicy anajty co ajcxy yajminájcipy ajcxy je jäy ninicx je tiibi anajty yajcruudzpejtcixy. Miid je' ycixpi je jud'ójäy ajcxy ñicxy ma Pilato pijctzoy may'ajt co huen ane'my yi' soldados ajcxy, co huen nicxy yajtijy je jäy ytecy ajcxy huidibi ti yajcruudzpejty. ³²E chi ajcxy je soldados yja'ty ma je it ma ajcxy yajcruudzpejty Jesús. E je metzpi jäy ajcxy ytecy tiji huidibi ajcxy yajcruudzpejt tú'ciy miid Jesús.

³³Co je soldados ajcxy ymijhuägy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴Chi tüg soldado cumy Jesús ma ycaachyjijp miid quipy jijpxu'nybi. E huin'it tim mic'amy ni'py etz nii ypidzimy. ³⁵Tüg jäy jim anajty ixxy nej ytuni yjajti, e nañ yejc tiy'ajt. E je' ytiy'ajt janch je', e je' nejhuüyb co yjanchity. Miid je tiy'ajt ycixpi jëbi miich ajcxy nañ jadu'n mmibijctähuip. ³⁶Paady je' jadu'n ytuni yjajti, co jadu'n anajty

yajcuyduna'n̄ jadu'n nej yjaybetyity ma Dios ñecy, co jadu'n yminañ: "Ca' huaad ni tüg ypajc yajtjy." ³⁷E jadüg'it anajty ycojaayity ma Dios ñecy, ma jadu'n yminañ: "Y'ixipy ajcxy je jäy huidibi ajcxy ycuum."

Yajnaaxtigiyy Jesús

³⁸Jim anajty José huidibi anajty cogájpip Arimatea. Yi' je' huidibi anajty mijpidacp Jesús, oy anajty ca' capxpídzimy, miid co anajty chigiy miid je judiojäy ajcxy huidibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jëbi ñicxy yajtzooni Jesús ñaaxnicx ma anajty ti yajcruudzpedyiy. Co Pilato a'ixiy, chi José ñicxy jim oy yajminajci je Jesús ñaaxnicx, e chi yajnicxy. ³⁹Nañ miid ñicxy José je Nicodemo, je huidibi anajty jayijp ti ni'oy Jesús coodz. Nicodemo yminicx oy nimigo'px libra mirra etz áloes tzooy huidibi ooy oy yxuugy. ⁴⁰Chi ajcxy yajpidici Jesús ñaaxnicx, chi ajcxy mo'n̄ miid poob huit, chi tzoyiy ajcxy miid mirra etz áloes tzooy, jadu'n nej je judiojäy ajcxy ycostumbre miidity co o'cpi yajnaaxtigiyygixy. ⁴¹Huigon ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigiy. ⁴²Jim ajcxy Jesús ñaaxnicx yajnaaxtigiyyi, co anajty jim yjac-huigonity, e janch jottigooy ajcxy yajnaaxtigiyy, miid co anajty ti chu'hiyñi, e je judiojäy ajcxy tzachni'ixiyñi tzach'a'ixiyñi co je amayxi anajty chondägaani com jabom.

Jesús jugypijc jadüg'oc co anajty ti y'oc'o'cni

20 Tim seman ixtigi', moñyi anajty, ca' anajty oy xiimiyyñi. Huin'it María Magdalena ñicxy ma Jesús anajty ti ñaaxtigiy. E chi jim ijxy co je tzaa ti anajty jim yajjidiguecy ma je jut aguu. ²Co ajcxy ijxy je jut ahuädz, chi jada' mic'amy poyigy niñicxy Simón Pedro, etz je jadügpi ydiscípulo huidibi anajty Jesús miid ooy naychogyii, chi nimay: —Ti yajtzoongixy iich ajt nHuindzin ñaaxnicx ma ajcxy yajnaaxtigiyy, e ca' nejhuiyim ma ajcxy ti pidaaccixy.

³Huin'it ajcxy nimetz choon poyigy Pedro etz je jadügpi discípulo, ñicxy ajcxy ma je o'cpi anajty ñaaxtigiyy. ⁴Poyigy ajcxy ñicxy nimetz, per je jadügpi discípulo jayijp ñajxy, e jayijp jim oyja'ty ma je naaxtigiydac. ⁵Chi yco'ixiy jutjoty, huin'it jim oy ixty je mo'nhuít jii by jutjoty y'ooxnäy, per ca' yi' jii by ytigiy jutjoty. ⁶Simón Pedro co ymiñ jac'axam, tim janitigiyy jutjoty, chi ijxy je mo'nhuít y'ooxnäy jii by jutjoty. ⁷E chi ijxy je cöxotz, je huidibi anajty miid ycohuajc yxochity, abicy je' anajty, ca' anajty tú'ciy y'ooxnäy miid ymo'nhuít. Y'ijx ajcxy je cöxotz yajxon y'anëgyity abicy. ⁸Huin'it ytigiy jutjoty je jadügpi discípulo huidibi jacjayijp ja't. Chi ijxy, e huin'it mibijcy co Jesús ñaaxnicx ca' anajty jii by. ⁹Ca'ni anajty ajcxy yajxon huinjihuüy co anajty jadu'n ycojaayity ma Dios ñecy, co anajty je Cristo

yjugypiga'n̄. ¹⁰Chi je metzpi ajcxy ydiscípulos yhuimbijty ma ytijc.

**Jesús nayguëxici ma
María Magdalena**

¹¹E je María jim yhui'miy ma je o'cpi jut ayaaxip. Chi ayaaxip yco'ixiy ma je jut. ¹²E chi ijxy metz ángel, poob huit ajcxy ymiid, y'iñaaygixy jiiby ma je Jesús ñaaxnicx anajty yhuijtzñäy, y'iñaaygixy tüg cöduy, jadüg tecy ixaay. ¹³Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnicx yajnicxi, e ca' nnejhuüyich ma ajcxy ti pidägy.

¹⁴Jadu'n anajty ymina'n̄, co ñayjii'ijxi, chi ijxy Jesús ytinäy ma yjiix, e ca' ijxcajpy pen Jesús je' anajty. ¹⁵Chi Jesús ymina'n̄:

—Töxyjäy, ¿ti co myäxy? ¿Pin m'ixtaayb?

María hue' anajty tijy je aguemy cuend'ajtpi migapxip, paady jadu'n ymina'n̄:

—Huindzin, pen ti myajnicxxy Jesús ñaaxnicx, nigapx ma ti mbidägy, e iich nicxy nyajtzoönich.

¹⁶Chi Jesús ymina'n̄:

—María.

Chi jada' María yhuäg-huimbijty, chi yajxon huindicxpejty, chi nimay:

—iRaboni! —jada hebreo ayuc yhuimbidzimy Huindzin.

¹⁷Chi Jesús nimay María Magdalena:

—Ca' xyñidoönich, com ca'ni iich nba'ttigiy ma Dios Teedy yajpaady.

Nicx miich ixta' nmigügtijcich, e nima' co nnicxaamich ma Dios Teedy, iich nDeedy etz miich ajcxy mDeedy, iich nDios, etz miich ajcxy mDios nañ jadu'n.

¹⁸Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yi' ti xycapxymöyich co nyajnimähuybyich miich ajcxy.

**Jesús nayguëxici ma
ydiscípulos ajcxy**

¹⁹Co je huin'it xiimbi chuu'iiy seman ixtigi', aducy anajty tijc'aguu y'ity ma anajty je discípulos ajcxy yajpatcixy, miid co anajty ajcxy tzigiy je judíojäy ajcxy huidibi anajty midzip'ajtp Jesús. Chi Jesús ytigiiy cuje'amy ma je' ajcxy, e chi jada' capxpoocy ajcxy, nimay:

—Jotcugi' miich ajcxy.

²⁰Yam jadu'n anajty ymina'n̄, chi ajcxy yaj'ijxy je' yci' ma je clavo ytigiiy, etz ycaachyjijp ma anajty jäy ti ycumyii. Chi yjotcugiiy ajcxy co ajcxy ijxy je yHuindzin. ²¹Chi jada' Jesús jadüg'oc capxpoox, nimay ajcxy:

—Jotcugi' miich ajcxy. Jadu'n nej iich nDeedy xyquejxyich ya naaxhuiñ, nañ jadu'n iich miich ajcxy yam nguejxhuäcxy miid iich n'ayuc.

²²Co Jesús jadu'n ymina'n̄, chi jada' ajcxy ni'buxujy cöbuxujy nimay:

—Huen Dios yjihui'n̄ ymic'ajtxy'adigiy xyjottigiy ajcxy.

²³Huenpinjäyity huidibi miich ajcxy mbocyhuinmeecxyp, nañ ypocyhuinmeecxipy Dios Teedy.

Huenpinjäyity huidibi miich
ajcxy ca' ypocy mhuinmeecxaani,
nañ jadu'n Dios Teedy ca' yi'
ypocyhuinmeecxa'ñyii.

**Tomás ymibijc co
yHuindzin yjuyipijcy**

²⁴Tomás je' huidibi anajty miid
majmetz yca'pxy Jesús ydiscípulos
ajcxy, je huidibi anajty yajtijp
Dídimo, ca' je' anajty jim choonity
co Jesús ymiñ oga'n. ²⁵Chi je
jacjadyii ajcxy ymígüg ñmaayi:
—Ti ñich ajcxy n'ixy je Huindzin
Jesús.

E chi je' y'adzooy:

—Pen ca' n'ixyich ma yi' yci' je
clavo'au, e pen ca' ngñhuächich
ngodijjyich ma clavo'au, e ngi'
nbidägyich ma ycaachyjijp ma
anajty ycumyity, ca' nmibigipyich
co yjanchity.

²⁶Chi jacoductujc xii ajcxy
jadüg'oc anajty yajpaady tigoty
nidüg'óciy je discípulos ajcxy.
Tzooñ anajty Tomás nañ jadu'n.
Chi Jesús ymiñ. Agiy anajty tijc co
Jesús ytinay'ahuiy cuje'amy ma
je' ajcxy. Huin'it ycapxocxy, chi
nimay:

—Jotcugí' miich ajcxy.

²⁷Chi jada' nimay je Tomás:

—Pidäg ya mgñhuäch ma clavo'au
ma ngñjich. Najtxxaji' mgi' etz pidäg
ma ñich ngaach ma jäy xycumyich,
e mibic yajxon tiydudägy.

²⁸Chi Tomás y'adzooy:

—Ñich miich nHuindzin'ajtyp etz
ñich miich nDios'ajtyp.

²⁹Chi Jesús Tomás nimay:

—Miid co miich ti xy'ixyich,
paady miich ti mmibicy. Jotcujc
yi' ajcxy huidibi ca' xy'ixyich, e

ti ymibicy co ti njugypicyich co
n'o'gyich.

**Jada ayuc ngojaaybich ma jada
necy, jigix miich ajcxy mmibigipy co
Jesús je' yi' je Cristo, je Dios y'ung**

³⁰Ti anajty Jesús ooy tuñ
mijhuinma'ñ ma ydiscípulos ajcxy
yhuinduu huidibi ca' ycojaayity ma
jadayaabi necy. ³¹Paady ycix jada
ngojaayich jigix ajcxy mmibigipy
co Jesús je' yi' je Cristo je Dios
y'ung. E co miich ajcxy mmibigipy,
huin'it mbaadip jug'yajtin huidibi
ca' tücci'yi ycixipy ytigoyipy miid
Jesucristo yxii ycixpi.

**Jesús ñayguëxigyii ma
ydiscípulos ajcxy nihuixtujcpi**

21 Co jadu'n jayijp ytuni
yjajti, huin'it jadüg'oc
Jesús ñayguëxici ma je' ydiscípulos
ajcxy jim ma mejypa', je huidibi
anajty xiijip Tiberias mejy. E jadu'n
ñayguëxici: ²Jim anajty ajcxy Simón
Pedro miid Tomás huidibi jäy ytijyp
Dídimo. Nañ jim Natanael huidibi
anajty cogajp jim Caná Galilea
naaxjot. E nañ jim anajty je Zebedeo
ymang ajcxy etz jametz discípulos
ajcxy. ³Chi Simón Pedro yminañ:
—Ñicxy n'oc'acxmachich.

Chi ymígügtijc ajcxy yminañ:
—Tzoc ajt jámim.

Chi ajcxy ytigiiy ma tüg barco. E
je huin'it tzuu ca' ni ti ajcxy majch.
⁴Co yjobiiy jim Jesús anajty ytinäy
ma mejypa'. Je' ydiscípulos ajcxy
ca' anajty ajcxy nejhuüy co Jesús je'
anajty.

⁵Chi Jesús yminañ:

—Migügtijc, ¿nej ca' ajcxy
mbaadyñi acxi?

Chi ajcxy y'adzooy:

—Ca' ni ti.

⁶Chi Jesús yminañ:

—Pidaaccix ajcxy je huidibi miid m'acxmajtcixy aa'oy'amy ma yí barco, e huin'it ajcxy mbaadipy acx.

Chi ajcxy pidacy je acxmadzi'n aa'oy'amy, e huin'it janch adzaach ajcxy yajpidzimy, co janch may acx anajty ti ytigy. ⁷Je ymigüg huidibi miid Jesús ooy anajty ñaychogyi, chi nimay Pedro:

—Je' yí, iich ajt nHuindzin.

Co jadu'n midooy Simón Pedro co anajty yjëjty je Huindzin Jesús, huin'it yhuit yajtigiyy. Com ti anajty yhuít jeñ, com jadu'n anajty jac'oy ytuñ. Chi ytigyy mejyoty huitmiid.

⁸Jacjadyi ajcxy ymigügtijc yjady ma mejypa' miid je barco, pahuich pajugucy ajcxy je y'acxmadzi'n janch ujtz miid acx. Hue' anajty ca' ooy yjiguemyty ma mejypa', jëyi anajty migo'px metro yjiguemyty.

⁹E co ajcxy ymejch ma mejypa', chi ajcxy ijxy co jim anajty jimbajc y'ity ni'ixi', e jim anajty acx jimbajc nigix huidibi yajtzaayb, e nañ jim anajty tzajcaagy. ¹⁰Chi Jesús nimay je' ydiscipulos ajcxy:

—Yajmiingix yi acx tiibi ajcxy mmajtcixy.

¹¹Chi Simón Pedro ypejty barcojoty, chi yajpidzimy huindiztuum y'acxmadzi'n ujtz miid may'acx. Chi ajcxy michoy migo'px jahuixchigi'px majtugiig acx mijatypi, e jadu'n ca' je acxmadzi'n yciich miid tzachmay'acx. ¹²Chi Jesús nimay ajcxy:

—Min ajop'ajtcix.

E ni tüg ydiscipulos ajcxy ca' y'amidoohui:

—¿Pin miich?

Com ñejhuiyb anajty ajcxy co je' anajty Huindzin Jesús. ¹³Chi Jesús ymijhuägy ma je acx ci' etz tzajcaagy anajty y'ity, e chi yajhuäcxy, chi moyday ymigügtijc ajcxy.

¹⁴E je' je' anajty je midugiig'ocpi co Jesús ñayguëxici ma je' ydiscipulos ajcxy, huin'it co yjugypijcy co y'o'cy.

Jesús yajni'ixiyy Simón Pedro ti ytunipy

¹⁵Co ajcxy y'ajop'ajttay, chi Jesús nimay je Simón Pedro:

—Simón, Jonás y'ung, ¿nej xyjactzojcpich miich, ca'ydi jada jacjadyi ndiscipulo'ichi?

Chi y'adzooy Pedro:

—Huindzin mnejhuiyb miich co ndzojcpich njihuiybich miich.

Chi Jesús nimay:

—Cuend'at iich njäy, jadu'n nej jihuiy borregi cuend'ajtpi yaj'ocy yí yborregi.

¹⁶Chi Jesús mimejtz'oc yminañ:

—Simón, Jonás y'ung, ¿nej xychojcpich xyjihuiybich miich?

Chi Simón y'adzooy:

—Huindzin, mnejhuiyb miich co ndzojcpich njihuiybich miich.

Chi Jesús nimay:

—Cuend'ajtigich njäy, jadu'n nej yi borregi cuend'ajtpi cuend'aty yborregi.

¹⁷Co midugiig'ocpi oy y'amidooy:

—Simón, Jonás y'ung, ¿nej xychojcpich xyjihuiybich?

Chi Pedro yjotmaybijcni co midugiig'ocpi y'amidoohui: “¿Nej xychojcpich xyjihuiybich?”

Chi Simón yjac'adzooy:

—Huindzin, miich mnejhuiydaayb tüg'óciy, e nañ mnejhuiyb co iich ndzojcpich njihuiybich miich.

Chi Jesús jacnimay:

—Cuend'ájtigich njäy, jadu'n nej borregi cuend'ajtpi cuend'aty yborregi. ¹⁸Janch janch iich miich yam jadu'n nimäy: “Co anajty miich mjac'anägnity, ci'm anajty mhuit nayyajnijeniyii, e mnicxp anajty ma mdimdzocy. E co mjacmijjäyihuipy, huin'it mgi' mnajtxajihuipy, e huingbi mhuit xyajnijenihuipy, e xyajnicxyipy ma anajty ca' mdzocy.”

¹⁹Co Jesús jadu'n yminañ, chi Pedro yajhuinjihuipy jadu'n nej anajty jäy ajcxy yaj'öga'nyii miid Jesús y'ayuc ytiy'ajt ycixpi, e nañ ma yi y'o'cin tiy'ajt yegipy co ymiid Dios ytiy'ajt.

Je discípulo huidibi anajty

Jesús ooy tzocy jihuiy

²⁰Chi Pedro ñayjii'ijxi, chi ijxy co anajty tú'ciy anajty ymiingixy je' ydiscípulo huidibi anajty Jesús ooy tzocy jihuiy je huidibi anajty iñaayb huigon ma Jesús ma je mesa co anajty y'adzuu'ajtcixy. Je huidibi nimay je' yHuindzin:

—Huindzin, ¿pin miich yi' xyciyegam ma yi mmidzip? ²¹Co Pedro ijxy je jadügpí discípulo axam Jesús ypanicxyii, chi yminañ:

—Huindzin, e jadyaabi migüg, ¿ti yi' jadaanip?

²²Chi Jesús y'adzooy:

—Co ixypy ndzocyich co yi' huen jugy'aty ixti mabaad nhuimbityich, ca' miich xypaady mnejhuihuipy ti yi' jadam. Panicxich miich.

²³Paady ycixp huinjihuipy je ymigügtijc ajcxy co je ymigüg huidibi Jesús ooy tzocy jihuiy ca' anajty y'öga'ñ. Per Jesús canan je' anajty jadu'n ytijyp co ca' y'öga'ñ. Hue' anajty ti ymina'ñ janchtiy:

—Pen ndzojycpich ixypy co jada migüg yhui'mipy ixti mabaad nhuimbityich, ca' miich xypaady mnejhuihuipy ti yi' ytunamy.

²⁴Je' je' je Jesús ydiscípulo huidibi tiy'ajt yecp jadu'n nej Jesús ytuñ y'ayoy etz yjajty y'ayoy, e nañ yi' je' huidibi cojay nej Jesús ytuñ y'ayoy, yjajty y'ayoy. E iich ajt nejhuuiyim co janch yi' je tiy'ajt huidibi ti yecy.

²⁵May ooy tijaty mij huinma'ñ Jesús jactuñ. Co ixypy yajcojaydäy tüg'óciy, ca' yi naaxhuinybi ixypy yhuaadiy miid maylibro tzachpidägipy. Jadu'n n'aa'ixiyich.

LOS HECHOS

Jadu'n Nej Jesús Y'ayuccapxhuäcxpi Ytuun Yjajti

1 ¹⁻²Ma je jayijp'atypi necy, migüg Teófilo, ti nyajnijayïy tüg'óciy jadu'n nej Jesús ytuun etz jadu'n nej yaj'ixp'ijctzondacy oga'n'aty, ixti cooni ypättigiïy tzajpjoty. Ca'ni Jesús anajty ypättigïy tzajpjoty co huin'ijxy je' yjäy huídibi yi' y'ayuc yti'ajt capxhuäcxïib, e chi miid je Espíritu Santo najtztuniïy najtz'ane'miïy nej huaad ajcxy ytunipy. ³Co anajty Jesús y'ögy, chi ñayguëxïci canaag'oc ma je' ydiscípulos ajcxy, e huixchiguiïpx xiï ñayquëxïgo'ci ma je' ajcxy, yajniquëxïgy huädz co anajty yjuugyïty, etz nañ yajmiidmiydacy je' yjäy je Dios y'ayuc etz Dios y'ané'min.

⁴Co anajty jim ijtcixy tügmucy miid Jesús, chi Jesús je' ydiscípulos ajcxy ane'my co ca' huaad jim choongïxy jim Jerusalén. Chi ajcxy nimay:

—Ahuijxcix tiibi Dios nDeedy ahuanïy ma miich ajcxy, je huídibi miich ajcxy nyajmiidmiydägy.

⁵Janch Juan je Bautista jäy yajniibejt miid nii, tzojc miich ajcxy xy'adigïhuipy xyjottigïhuipy yi Espíritu Santo.

Jesús ypättigiïyñi tzajpjoty

⁶Ni'amugï anajty ajcxy jim miid Jesús, chi ajcxy yajtiïy:
—¿Huindzin, nej myajcödigoyamy je Israeljäy ymidzip jadachambi?

⁷Chi Jesús y'adzooy:
—Ca' xypaatcixy mnejhuiïgyixy je xiï je tiempo mina anajty ti yhuaad'ajtni, mina Dios Teedy tuna'ñ tijaty, je' tügpajc miid cötújcïn tijaty ytunamy. ⁸Co anajty je Espíritu Santo chinaydacpicy ma ajcxy mjot mhuinma'ñ mbaatcixp mic'ajt. E chi mdzoongïxp ayuc capxhuäcxpi miid iich ycïxpï ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuiñybi.

⁹Ti jada ajcxy jadu'n yajnimäy, jim anajty ajcxy yhuindiicxcixy, chi Jesús chajppejtni. Chi miñ joc yeeg huídi Jesús yajnidigoyday, chi ajcxy ca' ocjac'ijxni. ¹⁰Jadu'n anajty ajcxy chachpät'ijxcixy tzajpcïxy, co Jesús ypättigiïy. Huin'it mejtz yëydijc ñayguëxïci ma je' ajcxy ymïjc, poob huit miid, ¹¹chi ajcxy ñimaayï:

—Galilea jäy ajcxy, ¿nej co mdzachpät'ijxcixy tzajpcïxy? Yi

Jesús huidibi ti chajppety, ti chooñ ma miich ajcxy, minaamb jadüg'oc jadu'n nej ti m'ijxcixy co ti ypättigÿ.

**Matías yajhuin'ijxy co Judas
ytung jÿjtuniÿipy**

¹²Huin'it Jesús ydiscípulos ajcxy chooni ma je cögop huidi xiÿip Olivos, yhuimbÿjtcixni jim Jerusalén, ca' ooy yjiguëgyity, jëbi yajyöy sábado xii, jadu'n nej Moisés ycötújcín y'ane'my. ¹³Co ajcxy yja'ty ma je cajp, chi ajcxy ypejty ma je cuarto mimetz nihuijtzpetypí ma ajcxy anajty miidity yjättac. Jim yí' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymiguëx. ¹⁴Tüg'óciy anajty ajcxy y'ijtcixy tügmucy Dios mibijctzoogixy chajpcapxycapxcixy. Ymiid ajcxy anajty Jesús y'uch etz María Jesús ytaj, etz jacjadyii töxyjäydijc.

¹⁵Huin'it xii Pedro ytinayigÿ aguje'amy ma je ymigügtjic ajcxy huidibi yajmij'ajtp Jesús, huidi anajty ajcxy naybaatip migo'px ja'iipxti jäy, chi nimay ajcxy:

¹⁶—Migügtjic, copicy co jada yajcuydúniÿy nej Dios yminañ ma ñecy huidi jaybety ijtp, ma David jaay Dios y'ayuc, ma Dios nigapxy Judas. Je'huidi coduu'ajt taabi je judíojäy ajcxy majch Jesús. ¹⁷Je Judas yaj'amichomujcp je' anajty miid iich ajt, paatip anajty Dios ytung tú'ciy miid iich ajt. ¹⁸Chi Judas ñicxy juy tüg naax miid je muju'ñ huidibi anajty ti paady miid yjibic-huinma'ñ. Chi jim mic'amy ycäy tzuxcödeëñ, chi

ytopxy ymooxac, e chi ytiinch ypidzimday. ¹⁹Je jäy ajcxy huidibi anajty tzinaayb jim Jerusalén, co nejhuiÿy, chi ajcxy xiiimoy je naax Acéldama, hue' je' yhuimbidzimy ma je' ajcxy ayuc, ni'py ñaaxjot.

²⁰Jada je' je ayuc huidibi David yjaay ma je Salmo necy:

Hui'mip najtz'ixÿ yí'
chinaaydac. E ca' pin
yajtuniÿy.

Nañ jadu'n ymina'ñ:

Huingbi huen yajnicxyii je'
ytung.

²¹⁻²²Copicy co tüg yëydijc huidibi miid ti yhuidity nHuindzin Jesús quipxyi miid iich ajt, huen tuniÿy je tung huidibi Judas anajty ytumy, maab Juan yajniibety ixti taabi xypuyöyduutim co pättigÿy tzajpjot, tüg jëbi testig'aty miid iich ajt co Jesús yjugypijcy.

²³Chi Jesús ydiscípulos ajcxy huin'ijxy mejtz jäy: tüg jäy huidi anajty yxii José, huidi yxii anajty yajtijy Barsabás etz nañ jadu'n anajty yajtijy Justo. E huin'ijxy ajcxy nañ jadu'n Matías. ²⁴⁻²⁵Chi Jesús ydiscípulos ajcxy Dios mibijctzoy, yminañ ajcxy: —Huindzin Dios, m'ijxyp mnejhuiÿy tüg'óciy jäy yjot yhuinma'ñ, yajni'ixiiÿygiçh jada metzpi jäy huidibi miich nidügti ti nhuin'ixy, je huidibi jëbi jÿjptigÿiy miich mdung tú'ciy miid iich ajcxy, etz huidibi apóstol'adip. Huen jada jäy jÿjptigÿiy je tung huidibi Judas ti yajtigooy, co ytundigooy e ñicxy ma ypaadyii.

²⁶Chi ajcxy suerte ijxy, e je suerte ñibidzimni je Matías. E huin'ítÿy je Matías oy ymicho'ndigÿy ma je

nimajtügpi ajcxy huidi ycapxhuäcxy Jesús y'ayuc.

**Co je Espiritu Santo
ycidacy choñ tzajpjoty**

2 Co oy je Pentecostés xii paady, jim anajty Jesús ydiscípulos ajcxy ni'amugi' tú'ciy ijtcixy.

²Huin'it janch timitiini yajmidoy tüg ne'min, choñ tzajpjoty, jadu'n nej poj micpi. Chi yaj'ujtzaay je tigtot ma anajty ñaaygixy. ³Chi nigidaaci nidüg nidügti toodz jadu'n nej jinye'n. ⁴Chi je Espiritu Santo nidüg nidügti ajcxy y'adigiñyi yjottigiñyi. Chi ytigiygixni capxy miydaacp nije' nije' ayuc jadu'n nej je Espiritu ajcxy yajcapxyii.

⁵Jim Jerusalén anajty je huin'it xii may judíoñy ajcxy huidibi tzoomb canaag agajp. Hue' ajcxy chachcuydumb judíoñy ycostumbre.

⁶Co je cajpjäy ajcxy midooy je ne'min, chi ajcxy ooy yömuycy. Chi je mayjäy ooy yhuinmay'ahuidijty, co ajcxy midooy chachcapxcixy chachmiydaaccixy ma yci'm'ayuc.

⁷Je mayjäy ajcxy ooy chigiñy jihuñy, chi ajcxy ñayñimaayi miñ xyipy:

—Ix ñej cay Galilea jäy jada ajcxy nidüg'óciy huidibi jadu'n tzachcapxcixy tzachmiydaaccixy iich ajt ngi'm'ayuc? ⁸¿Nej iich ajt co nmido'mbñjim co tzachmiydaaccixy iich ajt n'ayuc huidibi ti nmibi'c'ajtım? ⁹Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huidi tzinaayb ajcxy jim Asia ñaaxjot, ¹⁰etz huidibi ajcxy tzomb jim Frigia, etz Panfilia, huidibi tzomb jim Egipto, etz huidibi

tzomb jim ma yi Africa ñaaxjot Cirene ninaxy. Nañ jadu'n jim romanoñy huidibi ya adzinaayb. May ajcxy jim huidibi judíoñy etz nijējity huidibi ca' yjudíoñyity huidibi judíoñy ycostumbre ajcxy ti yjijptigiñyi. ¹¹Ya nañ jadu'n Creta jäy etz Arabia jäy; e iich ajt tüg'óciy nmidoohuim jada jäy ajcxy nigapxcixy nimiyaaccixy huidi Dios ti tuñ mijcajee ma iich ajt ngi'm'ayuc.

¹²Nidüg'óciy ajcxy ooy jihuñy, e chi ajcxy ooy yhuinmay'ahuidijty, miñ xyipy ñay'amidóhuigixy: —¿Nej jada yhuimbizima'ñ?

¹³E nijējity jäy jēyi nixigy yajxigy, yminaangixy:

—Muucip jada yi' ajcxy.

Pedro yaj'ixpijcy je mayjäy

¹⁴Huin'it Pedro ytinaygy miid je nimajtügpi apóstoles, e ytigiy capxpi mic yminañ:

—Yēydijctjcy ajcxy huidibi tzinaayb Judea etz tüg'óciy huidibi tzinaayb ya Jerusalén, nejhuñhuipy miich ajcxy jada e midou ajcxy yajxon huidibi ajcxy nyajnimahuamyb. ¹⁵Jada jäy ajcxy ca' ajcxy ymügyii jadu'n nej miich ajcxy minaangixy. Tim petyxiini jada cham. ¹⁶Jada je' huidibi ñgapxy je Joel, Dios y'ayuc najtzcapxiñyi, co jadu'n mina'ñ:

¹⁷Je huin'it xii mina anajty je naaxhuiñyi cixa'ñ, jadu'n Dios minañ, nyajhuäxtähuibich je nEspiritu ma tüg'óciy naaxhuiñyjäy. Miich mñix etz mmang ajcxy capxhuäcxip iich n'ayuc ndiy'ajt, e

je yujcyeecpidijc ajcxy
yhuin'ixipy ooy mijhuinma'n,
e je mijjäydijc cumähuipy
ajcxy.

¹⁸ Nyajhuäcxtähuip iich je
nEspíritu huin'it xii ma iich
ndumbi yëydijcpi töxyjäybi,
e yi' ajcxy capxhuäcxip iich
n'ayuc ndiy'ajt.

¹⁹ Nyajquëxigibich tzajpcíxy
huidijaty oy chigiiyñi, e ya
naaxhuin' nyegipyich tiy'ajt:
ni'py, jün etz jünjoc.

²⁰ Yi xii ahuimbidipy coodz, etz
je po' ahuimbidipy nej ni'py,
ma anajty ca' miñ je xii je
tiempo mina anajty mina'n
je Huindzin Dios. Mij ayo'n
ji tunaanip jadaanip iixna'
quëxna'.

²¹ E tüg'óciy jäy huidi miyaaxp
ojadajtp je Huindzin Dios,
Dios ajcxy yajnödögüib
y'alma.

²² Chi Pedro yjacminañ:

—Amido'ijtcix, miich

judíojäy ajcxy, jadu'n nej cham
nmına'na'nich. Je Jesús huidibi
tzoon jim Nazaret ti xyaj'ijxcixy
Dios ymic'ajt, mijhuinma'n, etz
ijxpejt, jadu'n nej miich ajcxy ti
m'ijxcixy ti mnejhuüiygixy. ²³ Jada
yajciyejc ma miich ajcxy, jadu'n
nej anajty Dios ti yajnigödugiy,
e ti huinmay. Ajcxy mmajch je
Jesús e myaj'ögy ajcxy, chi ajcxy
myajcruudzpejty miid jibic jäydijc
y'ane'min. ²⁴ Chi Dios yajjugypijcy
yajnihuädzäctuty ma yi ó'cin, ca'
huaad yhui'my ögy huinixii. ²⁵ Je
David ñimiydac Jesús chi yminañ:

Nejhüüybich co je nHuindzin
Dios y'ity ma iich nhuinduu.

Yi' ijt ma iich n'a'oy, jigix
ca'ydi pin xy'adzigiyich
xyajhuinma'nydigooyich.

²⁶ Paady ti njotcugiyich, e
ti ngapxypidzimyich co
ooy njotcujcich. Paady co
oy n'ögibich etz ninix
ñaaxtigihuiipy, ca' ndajy
mayich.

²⁷ Co miich Dios ca' myajhui'ma'n
iich n'alma ma ñaaxtigiydac.
Ni mga'aa'ixihuiipy, co
miich mdumbi huidibi ooy
mdzocy, co nicxy ñinix
ñaaxhuindigoydäy.

²⁸ Miich Dios, ti xyajni'ixiyich
yi tzinaayin huidibi ymiid
jugy'ájtin huinixiibi.
Xyajjotcugihuibich miid co
xymiid'idipyich.

²⁹ Chi Pedro yjacminañ:

—Migügtijc ajcxy, huadz miich
mnejhuüiygixy co iich ajt nmij'ap
David y'o'cy etz yajnaaxtigiiyi.
E ma ñaaxtigiiy nmiidni jë'ajt
chambaad. ³⁰ Je David hue' je'
anajty Dios y'ayuc ñajtzcapxiybi,
e ñejhuüiyb anajty co ti Dios
yajnimäyii huidibi ca' y'aniijity.
David ñejhuüiyb anajty co ma y'ap
y'oc ma'xung'adipy Cristo, jaydëbi
ané'mipy ma David y'ane'mdac.

³¹ Jadu'n co David jecy'ajty
huinjihuüiy e nejhüüiy etz nigapxy
jadu'n nej yjugypiga'n je Cristo co
anajty ti y'ögy. E yminañ co ca' yi'
y'alma yhu'f'mipy jutjoty etz ñinix
ca' ypüdzipy. ³² Dios yajjugypijcy
je Jesús co y'o'cy. Jada tiy'ajt iich
ajcxy nidüg'óciy nidiy'ajt'ajtpy.

³³ Jadu'n Dios Jesús mooy mij'ajt
jiiby tzajpjoty, chi yajcädigiiyi je
Espíritu Santo huidibi Dios Teedy

y'ahuaniiy e tüg'óciy huidibi miich ajcxy ti m'ijxcixy ti mmidoogixy jilby yi' chooñ ma yi'. ³⁴Com David ca' je' chajppejty, je David ci'm yminañ:

Je Huindzin Dios nimay iich nHuindzin: "Iña' ma iich a'oy'amy,

³⁵ixti cooni nmimadactähuibich yi mmidzip, jadu'n anajty nipaady nej jihuüy mdecypocxpejt'adyii."

³⁶Chi Pedro yjacminañ:

—Ñejhuühuipy nidüg'óciy yi Israel jäy ajcxy co janch janch co je Jesús huidibi miich ajcxy myajcruudzpejt, Dios yajniñijc co yhuindzin'adipy ma miich ajcxy, etz Cristo huidibi xyñihua'nipy xyajtzögipy ajcxy.

³⁷Co je mayjäy ajcxy jadu'n midoy, chi ajcxy yjotyungiiy, e amidoy ajcxy je Pedro etz jacjadyii jäy huidi Jesús y'ayuc capxhuäcxi anajty, chi ajcxy yminañ:

—Migügtijc, ¿ti iich ajcxy jëbi huaad nduñ?

³⁸Huin'it Pedro y'adzooy:

—Jothuimbijtcix e niibejtcix nidüg nidüg miid Jesucristo yxii, jigix Dios miich ajcxy mbocy xyhuinmeecixpy. E jadu'n Dios xymöhuipy je Espíritu Santo. ³⁹Huidibi Dios y'ahuaniiy miich yi' ajcxy mje' etz m'ung ajcxy, etz m'ap m'oc ajcxy, etz nañ jadu'n je jäy ajcxy huidi jigüémip, etz jacjadyii jäy ajcxy huidi Dios huin'ixamy.

⁴⁰Miid jadayaab ayuc etz jacjadyii ayuc Pedro yajnimay capxhuijy je mayjäy yminañ:

—Ca' mmijpidaaccix je jäy ajcxy y'ayuc huidibi ca' capxmidoy Dios.

⁴¹Jadu'n yjajti, je jäy ajcxy huidijaty mibijc Pedro y'ayuc, chi

ajcxy ñiibejttay huin'it xii. Ñimayiiy ajcxy huidibi mijpidac Jesús y'ayuc oy nidugiig mildi jäy. ⁴²Tüg'óciy ajcxy anajty panixcixy yi ixpíjcin jadu'n nej yi Jesús y'apóstoles ajcxy yaj'ixpijcy. Chinaaygixy yquipxyjot yquipxyhuinma'ñ. Etz Dios mibijctzoogixy e ñayyöymújcigixy co anajty ajcxy chajcaagy tujc-huäcxaangixy.

Jadu'n nej je mibijpidijc chinaaygixy jugy'ajtcixy

⁴³Nidüg'óciy ajcxy anajty ooy mijcajee jihuüy. E Jesús y'apóstoles ajcxy ixpejt etz mijhuinma'ñ ooy anajty tungixy. ⁴⁴Nidüg'óciy je jäy ajcxy huidibi anajty ti ymibijccixy ijtp anajty ajcxy tüg mucy, e yajhuäcxcixy tijaty ajcxy anajty ymiid, mooygixy ymigügtijc. ⁴⁵Ytoocpy anajty ajcxy y' ypidägy huidibi anajty ymiid, e chi anajty yajhuäcxcixy yi meeñ nije' nije' nej pin ti yajmayjaty. ⁴⁶Jabom jabom anajty ajcxy ñayyöymugyii ma Dios ytijc, etz nañ ñayyöymugyii ajcxy ma ytijc tzajcaagy tujc-huäcxcixy etz ycaaygixy y'uuccixy ni'amugi' jotujc miid ajcxy y'oyjot y'oyhuinma'ñ. ⁴⁷Ñi'igixy niyaaxcixy yi Dios, e tüg'óciy jäy nayyajmij'ajtip anajty ajcxy. Chi je Huindzin Dios yajmayiy jabom jabom yi mibijcpidijc, yi' huidibi anajty patp nidzoocin.

Tüg tecyma'tpi chögy

3 Tüg xii Pedro etz Juan ypättigiy ajcxy tú'ciy ma Dios ytijc, mijminacy xii anajty, je' je' anajty je hori mina ajcxy Dios mibijctzoogixy. ²Jabom jabom

anajty jäy yajnicxcixy ma je Dios ytijc'aguu tüg tecyma'tpi, jadu'n je' anajty ti yma'xung'aty. Chi ajcxy pidägy je tecyma'tpi ma je Dios ytijc'aguu huidi anajty yxii la Hermosa, jigix jim pijctzohuipy meen ma je jäy ajcxy huidibi tigiiyb ma Dios ytijc. ³Co je jäy tecyma'tpi ijxy Pedro etz Juan ytigihuaangixy anajty ma Dios ytijc, chi pijctzoy meen. ⁴Co Pedro etz Juan ijxy je tecyma'tpi, chi Pedro yminañ:

—Huindicxpejtcich.

⁵Chi je jäy huindicxpejty, yjijp'ijxpy anajty ti möhuaanip.

⁶Chi Pedro je tecyma'tpi nimay:

—Ca' nmfididyich plata, oori, huidibi janchtiy nmiidich je' nmöhuip. Miid Jesucristo je Nazaretpi ymic'ajt iich miich nimaayb: Tinaayig etz yöy.

⁷Huin'it Pedro majch je tecyma'tpi ma a'oygi', e yajtinaygugiiy.

Huin'tiyy y'oyiiy ymicpijcy je ytecy etz ytecyöy. ⁸Chi je tecyma'tpi ytinaygugiiy etz chi najztzibiyy. Chi jada' yöychoñ e ytigiiy ma Dios ytijc miid Pedro etz Juan yöynip ñidijcni yujctijcni, yam Dios ooy jäymech.

⁹Tüg'óciy je mayjäy ijxy co anajty yöynip etz jäymech yi Dios. ¹⁰Je jäy ajcxy y'ijxy'ajtpy anajty ajcxy je tecyma'tpi e ñehhuiygixyp co je' anajty je' huidibi pijtzohuo'cp pi'c meen ma Dios ytijc'aguu huidi anajty yxii la Hermosa. Paady je jäy ajcxy ooy chigiiy jihuiiy, co ajcxy ijxy nej anajty yam ti ytunyii ti jyadyii.

**Pedro nimiydacy nej anajty
je tecyma't ti chögy**

¹¹Je tecyma'tpi huidibi anajty ti chögy ca' anajty ixmach Pedro

etz Juan, e tüg'óciy yi jäy anajty ooy jihuiygixy huinmaaygixy. Chi mic'amy mayjäy nimujcy Pedro etz Juan jim ma yi Dios ytijc huinduu huidibi jäy ytijpy Salomón. ¹²Pedro co jadu'n ijxy je mayjay, chi yminañ:

—Judío yöydijctijc, ¿nej co mdzachhuinmaaygixy mijcajee? ¿Nej co iich miich ajcxy yxachhuindicxcixy jadu'n nej jihuiy iich ajcxy jada jäy ti nyajtzögyich ti nyajyöychooñich miid ngimmic'ajtich, o miid co iich ajcxy ooy nDios'ojadaty? ¹³Iich'ajt nDios, je Dios huidi nmij'ap nmijteedy, je Abraham, je Isaac, etz je Jacob y'ojadaj, yi' ti yajtzögy jada tecyma'tpi, jigix yajcömayipy yi' y'ung Jesús huidibi miich ajcxy mgäyeyc ma je tungmiidpi. E co je gobernador Pilato je' najtzmazdihuañ, miich ajcxy ca' m'aa'axiiy. ¹⁴Ma yjapadyii ajcxy mgapijctzoy co huen yajnajtzmazdiiy, je huidi anajty yajpaatp huadz etz tudägy, chi miich ajcxy mbijctzoy co huen yajnajtzmazdiiy tüg jäy huidibi anajty ti yjäyayj'o'cy. ¹⁵Jadu'n je jäy ajcxy yaj'o'cy je' huidibi anajty jugy'ajt yejcp. Je huidibi Dios yajjugypijcy ma anajty ti y'ögy e jada tiy'ajt iich ajcxy nidiy'ajt'ajtpyich. ¹⁶Miid co ti mibicy Jesús yxii, je mijhuinmañ huidibi Jesús ymic'ajt ti tuñ miid jada pa'mjäy huidibi miich ajcxy m'ijxyp mnejhuiiyb. Com ti mibicy Jesús paady ti chögy janch yajxondicni, jadu'n nej miich ajcxy nidüg'óciy ti m'ijxcixy.

¹⁷Chi Pedro yjacminañ:

—Nmigügtijcich, nejhuiybich co miich ajcxy etz mhuindzindijc

yaj'o'cy Jesús, miid co anajty mganejhuiiygixy ti anajty ajcxy mduungixy. ¹⁸Jadu'n cham Dios ti cuyduñ jadu'n nej Dios y'ayucnajtzcaxxiybi ymina'n co copicy co yi Cristo yajnaxipy ayo'n. ¹⁹Paady játyim jothuimbijtcix miich ajcxy ma Dios, jigix ajcxy mbocy yajjötztáhuipy. Huin'lit je Huindzin Dios xyajniguxepiy ajcxy jotcujc'ájtin huinixii, ²⁰e yi' quexamb je Jesús, je Cristo, je huidibi Dios jayijp'aty yhuin'lijx co quexa'n ma miich ajcxy. ²¹Oy jadachambi Jesucristo y'oc-hu'ímipy jiiyby tzajpjoty ixti cooni Dios anajty yaj'oyiydäy tijaty, co jadu'n yjaay yi' y'ayucnajtzcaxxiybi huidibi miid huadz yjot yhuinma'n huidibi ajcxy jecy'ajty tzinay. ²²Jadu'n Moisés nimay iich ajt nmij'ap nmijteedy jecy'ajty: “Je Huindzin Dios xyajniguxaan miich ajcxy tüg yi' y'ayucnajtzcaxxiybi, huidibi pidzimamyb ma miich ajcxy mjuugy mmigüg jadu'n nej iich yi' xyguejxy. M'amido'idipy miich ajcxy yi' y'ayuc. ²³Jadu'n yjadipy co tüg'óciy jäy huidibi anajty ca' capxymidooy je Dios y'ayucnajtzcaxxiybi, huadz ajcxy ytigoydähuiipy, e tüg jiihicoy ajcxy idipy ma judíojäy ajcxy yajpaady.”

²⁴Chi Pedro yjacminañ:

—Jadu'n jada tüg'óciy Dios y'ayucnajtzcaxxiybi, chondacy ma Samuel ixti ma jacjadyiini ajcxy, ñigapxtay ajcxy jadu'n nej cham ytuñyii yjadyii. ²⁵Yi Dios y'ayucnajtzcaxxiybi ajcxy, miich je' anajty ajcxy mmij'ap mmijteedy. E je ayuc huidibi Dios yajnimay Abraham ycuydunaamyb

miid miich ajcxy co jadu'n yminañ: “Ngonúucxibich tüg'óciy naaxhuiñyjäy miid tüg miich m'ap m'oc.” ²⁶Co Dios y'ung y'o'cy, chi Dios yajjugypijcy jadüg'oc, e quejxy jayijp ma miich ajcxy, jigix xyconúucxixipy, etz jigix nidüg'óciy miich ajcxy m'ixmadzipy yi' mjiibichuinma'n.

Pedro etz Juan ma tungmiidpi yhuinduu

4 Pedro etz Juan jimni anajty tzachmiidmiydaaccixy je mayjäy ajcxy, co oy miingixy je judío teedy ajcxy, miid je soldado huindzin, je tzajptijc cuend'ajtpi etz miid saduceojäy. ²Ooy ajcxy anajty yjotmätcixy co Pedro etz Juan yaj'ixpijccixy anajty je mayjäy etz nimaaygixy co yi' öcpi jugypigipy yi' ajcxy, com co Jesús yjugypicy co y'o'cy. ³Chi je tungmiidpi ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'iñ. ⁴Mayjäy ajcxy huidibi anajty ti amido'ijtcixy je Pedro y'ayuc ymibijc ajcxy. E hue' je mibijcpidijc, ac yëdyjctijcpi, yajmichomujcy jahueen ycamigoox mlily.

⁵Je com jabom ajcxy ñaymújcci jim Jerusalén judíojäy tungmiidpi, je mijjäydijc etz yi' escribas. ⁶Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tüg'óciy teedy mjtungmiidpi yjugymigüg. ⁷Chi ajcxy pidacy Pedro etz Juan cuje'amy ma anajty ajcxy ñaymugyii, chi ajcxy y'amidooy:

—¿P'in miich ajcxy ti xymöy cötujc'in co jada jadu'n ti mdungixy?

⁸Huin'it Pedro ymiid anajty Espíritu Santo ma yjot yhuinma'ñ, chi yminañ:

—Miich ajcxy tungmiidpi etz judíojäy mijjäydijc, ⁹yí' iich miich ajcxy cham xyaj'amídoob yí oybí tiibi yajtuñ ma tüg pa'mjäy e nejhuihuaangixy nej ti chögy. ¹⁰Cham nimiydactäyich ma miich ajcxy mhuinduu, jaydëbi ajcxy nejhuidähuipy tüg'óciy judíojäy, co jadayaabi jäy huidibi anajty tecyma'tpi, cham yajpaady ya ma miich ajcxy mhuinduu mic oy, miid je mic'ajt huidibi Jesucristo je Nazaretpi yejcpy, je jäy huidibi miich ajcxy myajcruudzpejt, huidibi Dios yajjugypijc co y'o'cy. ¹¹Yí Jesús jadu'n nipaady nej tüg tzaa oybí, huidibi ajcxy potzpidijc, ca' yajtúngixy co ytijcojixy. Jesús cham ti paady mijtung ma Dios, jadu'n yí' ni paady nej tüg mij tzaa huidibi ytungbaatp ma poch ytaatz. ¹²Ca' jac ni pin huidibi jëbi xyajnidzoocim ajt n'alma. Jesucristo yí' je' tügpajc huidibi Dios yejc ma jäy ya naaxhuiñ huidibi jëbi xyajnidzoocim ajt n'alma.

¹³Co je mijtungmiidpi ajcxy ijxy midoy jadu'n nej Pedro etz Juan ajcxy huinmic jotmic ycapxcixy, etz nejhuiy co ca' ajcxy y'ixpicxyjäyity, chí ajcxy ooy jihuüy huinmay. Nañ yí' ijxcajp ajcxy co je' anajty huidibi ajcxy ti miid huidity Jesús.

¹⁴Cha co yjactimjímity anajty je jäy huidibi anajty ti chögy ytinäy miid Pedro etz Juan, paady ajcxy ca'jajty nej midziptzoonipy. ¹⁵Chi je tungmiidpi ni'ane'mdiy huen yajpidzimiyi Pedro etz Juan ma je

mayjäy anajty ñaymugyii, jigix ac jëyi tungmiidpidijc iyöyaangixy capxyöyaangixy Pedro etz Juan ypocy. ¹⁶Chi ajcxy yminañ:

—¿Ti cham nduunim miid yjiibi jäy ajcxy? Com tüg'óciy jäy huidibi tzinaayb ya Jerusalén ñejhuiyb ajcxy co ti túngixy mijhuinma'ñ, e ca' huaad iich ajt nminaanim co ca' yjanchity. ¹⁷Tzoc capx'adujcim co ca' huaad ajcxy jacnimiydägipy Jesús jadachambi etz jacnicxpi xii tiempo.

¹⁸Chi ajcxy mijhuoy Pedro etz Juan, chí ajcxy nimay co ca' huaad ajcxy ni nej ocnimiydaacnjp, ni ca' jacyaj'ixpigipy miid Jesús yxii. ¹⁹Huin'it Pedro etz Juan y'adzooy:

—Huinmaaygix miich ajcxy ci'm pen tiy'ajt jada ma Dios co iich miich ajcxy ngapxcöbigipy jayijp, ca'ydi yí Dios. ²⁰Com iich ajcxy ca' nni'amonaangixy jadu'n nej iich ajcxy ti n'ixy ti nmidoy.

²¹Huin'it je tungmiidpi ajcxy adzigi'ñ migapxy Pedro etz Juan, e najtzmazziy ajcxy. Ca' ajcxy mihuinma'ñybaty nej tzaachytunipy Pedro etz Juan. Com tüg'óciy jäy yjäymejchpy ycömaayb anajty yí Dios jadu'n nej anajty ti ytuñyí ti yjadyí. ²²Je jäy tecyma'tpi huidibi tzooc co Dios mijhuinma'ñ ytuñ, ymiid anajty yjimijt huixchiguijpx naxy.

Je mibijcpidijc ajcxy pijctzoogixy ma Dios jotmic'ajt

²³Chi Pedro etz Juan co yajnajtzmazziy, chí ajcxy ñicxy ma ymigügtijc anajty, yajmiidmiydactay tüg'óciy jadu'n nej teedy huindzin etz mijjäydijc

anajty ti ñimáayigixy. ²⁴Co jada ayuc ajcxy midoy nidüg'óciy ajcxy tú'ciy yjot yhuinma'n pídacy, chi ajcxy Dios mibijctzoy yminañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je mejy etz tüg'óciy tijaty. ²⁵Miich miid mEspíritu je David myajcapxy, e yí' jadu'n yminañ:

¿Nej co jada naaxhuiñybi jäy chachhuaangixy chachjihuiñyigixy, e yí' jäy ajcxy huinmaaygixy huidibi ca' ytimytiijity?

²⁶Yí reydijc ya naaxhuiñybi midziptzooñ ajcxy yí Dios. Etz je tungmiidpi cajp cajp ñaymujci ajcxy, midziptzooñ ajcxy Huindzin Dios, etz midziptzooñ ajcxy Cristo.

²⁷Com janch co je rey Herodes etz yí gobernador Poncio Pilato ñaymujci ya ma jada cajp miid huidibi ca' yjudíojäyity ajcxy etz miid judíojäy ajcxy, midziptzooñ ajcxy yí m'ung Jesús huidi anajty ti mhuin'lixy. ²⁸Yí' ajcxy ti cuydungixy tüg'óciy jadu'n nej miich, Huindzin Dios, ti myajnigödugiy jadu'n nej ytuniñyb yjadiñyb. ²⁹Jadachambi Huindzin Dios, ix jadu'n nej yí tungmiitpi xychachmijotmá'tcixyich. Mo' yí mdumbi ajcxy jotmic'ájtín, jigix m'ayuc ajcxy capxhuäcxipy amic jotmic, ³⁰e miid miich mmic'ájtín chögipy pa'mjäydijc, tunipy ajcxy tijaty iixpejt etz mijhuinma'n miid yí m'ung Jesús yxii, huidibi miid huadz yjot yhuinma'n.

³¹Co ajcxy mibijctzoday, chi je naax chuyuy ma anajty ajcxy tügmucy yajpaatcixy, etz

nidüg'óciy yí' ajcxy ymic'ajt mooyi je Espíritu Santo, e yí Dios y'ayuc capxhuäcxixy anajty amic jotmic.

Je mibijcpidijc tú'ciy anajty ajcxy yjot yhuinma'n

³²Je mayjäy huidibi anajty ti mibicy, tú'ciy ajcxy yjot yhuinma'n. Ni pin anajty ycamina'n co naydüg jé'adyii. Hue' anajty yminaangixy co tú'ciy jé'ájtigixy. ³³Je majmetzpi Jesús y'ayuccapxhuäcxpi amic jotmic capxhuäcxxy je tiy'ajt jadu'n nej je Huindzin Jesús yjugypijcy co y'o'cy. E mij ajcxy Dios ypubejti. ³⁴Ma je' ajcxy ca' ni ti yajmayajtcixy, com tüg'óciy tijaty anajty ajcxy ymiid ñaax o ytijc ytoocpy anajty ajcxy, e yejccixy anajty meen. ³⁵Chi je meen yajcídigiyyigixy je apóstoles ajcxy e yí' ajcxy moy nidüg nidüg pinjaty yajmayajtp. ³⁶Jim anajty miid je' ajcxy tüg levita jäy huidi anajty yxii José, huidibi ma'xung'ajt ma yí ñaaxjot mejy agujc huidibi yxii Chipre, je huidibi je majmetzpi Jesús y'ayuccapxhuäcxpi, yxii moy Bernabé, huidibi huimbizim je yajjotcujc'ajtpi. ³⁷Je Bernabé tocy ytundac huidibi anajty ymiid, e chi mimiñ je meen, e yajcídigiyy je apóstoles ajcxy.

Je Ananías etz Safira ajcxy Dios midundigoy

5 Chi jadüg yëydijc, huidi anajty yxii Ananías, miid ytöxyjic, Safira, toogy ajcxy tüg it ytundac. ²Ananías ñayyajnihu'i'mi jac'anaxy je meen, e yajninicxy Jesús y'apóstoles ajcxy je jac-hueenip, jadu'n nej jihuñy yejctay tüg'óciy,

etz yí' ytóxyijc ñejhuiyb anajty.

³Chi Pedro ñimay Ananías:

—Ananías, ¿nej co myajtuñ je mujcu' yhuinma'ñ, e mhuin'hiina'ñ je Espíritu Santo, e ti mbugoñ jac'anaxypí meeñ nej ti tzoo'adyii yí pidägy tiibi mdoogy? ⁴¿Nej ca' anajty yí' miich mdundac'adyii? E co ti mdoogy, ¿nej ca' anajty je' miich mmeen'adyii? ¿Nej co jadu'n ti mdundigooy? Dios ti mhuin'hiñ, canan jäy.

⁵Co jadu'n midoy, jímiyi Ananías yciday, e chi y'o'cy. E tüg'óciy jäy ajcxy huidijaty nejhuiy, ooy ajcxy chigiiy. ⁶Huin'it ymiñ jadyii yujyeeepidijc, chi ajcxy mo'ñ Ananías ñinicx, e oy ajcxy yajnaaxtigiy.

⁷Codugüg hori naxy, oy ytigiy je Ananías ytóxyijc, e ni ca' nejhuiy anajty ti ti ytuñyii ti yjadyii je ñäy.

⁸Pedro y'amidoohui:

—Yajnimaaaygich, ¿nej janch jadu'n ti mdooccixy yí mdundac jadu'n nej ti mgapxcixy?

Chi je töxyjäy y'adzooy:

—Janch jadu'n ti ndoogyich.

⁹Chi Pedro ymiñañ:

—¿Nej co ti mnaygápxicixy mhuin'hiina'ñ yí Espíritu Santo? Cha ma tijc'aguu je jäy ajcxy ytinäy huidi oy ti yajnaaxtigiy mñäy, e jadachambi miich ajcxy xyajnicxaam nañ jadu'n.

¹⁰Tim huin'itiy Ananías ytóxijc yciday, e chi y'o'cy. E chi oy ycidägy ma Pedro ytecymijc. Co je yujyeeepidijc ytigiiy, chi ajcxy je' paaty ögy. Chi ajcxy yajpidzimy etz oy yajnaaxtigiy ma ñäy ymijc. ¹¹Chi tüg'óciy je jäy ajcxy huidibi Jesús mibijcp etz tüg'óciy huidibi midou

jada nej ti yjadyii ti ytunyii, chi ajcxy ooy chigiy.

Canaag mij'ijxpejt etz tiy'ajt

¹²Je majmetzpi Jesús

y'ayuccapxhuäcxpi ooy anajty ajcxy Dios ymic'ajt yajnicuëxici etz ijxpejt yejccixy ma yí jäy ajcxy. E tüg'óciy jäy ajcxy huidibi Jesús mibijc jabom jabom anajty ñayyöymújcigixy ma Dios ytiyc huinduu huidibi yxií Salomón. ¹³Ca' jac ni pin anajty mijnicxpeda'ñ mijyöyepeda'ñ je' ajcxy. E je jäy ajcxy yjacyajmij'ajtpy huidi Jesús anajty ooy mibijccixyp. ¹⁴Mayjäy oy mibijcni Jesús y'ayuc, yëydijctijc etz töxyjäydijc. ¹⁵Etz ixti pa'mjäydijc anajty ajcxy yajnicxy mijtügucj cijx'aam pidaaccixy, jigix co Pedro ñaxipy jim ycadimjegyty co nicxy y'aa'ap yjäty ma je pa'mjäy. ¹⁶Nañ jadu'n mayjäy chooñ anajty huidijaty huingon ycajp, ymiingixy Jerusalén, miidmiingixy pa'mjäy, etz huidibi ca'oybi miid ma yjot yhuinma'ñ, e tüg'óciy yajtzoocaaayb anajty ajcxy.

Pedro etz Juan yaj'ixhuidijtcixy yajpahuidijtcixy

¹⁷Huin'it je teedy mijtungmiidpi etz huidibi saduceo ijxpjcin ymijpidacp ooy ajcxy yajca'oy'ijxy, ¹⁸e co ajcxy majch je apóstoles ajcxy, chi ajcxy pidacy ma je mijpujxtijc. ¹⁹Chi Huindzin Dios tüg y'ángel je huin'it coodz yaj'ahuaach je pujxtijc aguu, yajpidzimy ajcxy, chi ajcxy ñimay:

²⁰—Nícxix, tinay'ahuiiygix tzajtgoty, yajmiidmiydaaccix yí mayjäy ajcxy Jesucristo ytiy'ajt nej jëbi jäy ajcxy paadipy jugy'ajtín jemybi.

²¹Co jadu'n midoy, chi com jabom ytiigiij ajcxy jopyñi tzajtigoty. Jiilby je' ajcxy anajty ñiyaj'ixpijcco'ni.

Chi je teedy mijtunghiidpi etz jacpinjaty miid, chi ajcxy capxyñiguejxy yi judíoñäy ymijjädijc etz ixpicytije co huen junta jadyii. Chi ajcxy capxyñiguejxy huen ñicxy yajpidzimyii jiiby pujxtigoty yi apóstoles ajcxy. ²²Co je policías ajcxy ymejch ma je pujxtije, ca' ajcxy paady je apóstoles ajcxy. Chi ajcxy huimbijtni miid tiy'ajt, ²³chi ajcxy nimay:

—Hue' iich ajcxy ti nbaadcixy yi pujxtije aducy, etz je soldadtije jim tije aguuy yjaccuend'ajtcixy. Chi co iich ajcxy nyaj'ahuäch je pujxtije, ca' iich ajcxy ni pin ti nbaatyich jiiby pujxtigoty.

²⁴Co jadu'n ajcxy midoy, je teedy mijtunghiidpi etz je soldado huindzin, etz jacjadyii teedy huindzin ajcxy, chi ajcxy ooy huinmay nej jada y'occogixihuip. ²⁵Huin'it tüg jäy miin' huidibi nimaayi ajcxy:

—Je jäy huidibi miich ajcxy mbidac pujxtigoty, chim je' ajcxy tzajtigoty yaj'ixpijccixy yi mayjäy.

²⁶Chi je soldado huindzin miid soldadtije ñicxy ma yi apóstoles ajcxy jäy yaj'ixpijccixy, chi ajcxy yajnicxy oy'amy, com tziigiib anajty ajcxy co je mayjäy chaagädziib. ²⁷Co ajcxy yajmiin', chi ajcxy pidacy ma je maytungmiidpi yhuinduu. Chi je teedy mijtunghiidpi je apóstoles ajcxy nimay:

²⁸—Hich ajcxy ti ngapx'aducy co ca' huaad m'ocjacyaj'ixpijccixni ma

Jesús yxii. E éti ti mdungixy? Ti myajhuäcxtaaygixy yi m'ixpijcin ma Jerusaléngajp, e iich ajcxy miich pocy xyjátyim yajmihui'mam co Jesús y'o'cy.

²⁹Chi Pedro etz jacjadyii apóstoles ajcxy y'adzooy:

—Copicy iich ajcxy ngapxycöbigipyich yi Dios jayijp ca'ydi jäy. ³⁰Je Dios huidibi iich ajt nmij'ap nmijteedy y'ojadajt, yi' yajjugypije je Jesús huidibi miich ajcxy myaj'oc cruudzcixy. ³¹Je Dios Teedy jadachambi hue' Jesús miidty aa'oy'amy jiiby tzajpjoty, e ti pidägy ane'mbi etz yajnidzoocpi jigix yi judío jäy ajcxy yjothuimbidiy e yajhuinmeecxipy ajcxy ypocy. ³²Hich ajcxy tiy'ajt nyejcpy miid jada ycixpi, etz nañ jadu'n je Espiritu Santo huidibi Dios ymooyb pinjaty capxymidoohuip.

³³Co je jäy ajcxy jadu'n midoy, chi ajcxy ooy yjotmätcoty, chi ajcxy jayaj'ogañ. ³⁴Huin'it ytinayigy ma je naymujctac tüg fariseojäy, hue' anajty yxii Gamaliel, hue' je' anajty Moisés yley ñihuindzin'ajtip. E jäy ajcxy ooy anajty yajmij'ajtcixy je Gamaliel. Chi je' ni'ane'mdiij co huen yajpidzimyii tzojcyi jiiby tiba'y je apóstoles ajcxy. ³⁵Chi Gamaliel nimay yi tungmiidpi ajcxy:

—Judío yëdijctije ajcxy, íxcim ti mdungixy miid jada jäy ajcxy.

³⁶Jäymetz miich ajcxy co jecy'ajty je Teudas ypidigy yminañ co je' ymijty yjanchity, e chi ypanicxi oy nimidaax migo'pxti yëdijc. Chi ajcxy yaj'o'ci, chi tüg'ócixy huidibi anajty ti ypanicxyii yöyhuäcxtay, e jadu'ñyi je' ajcxy ñitigoyday.

³⁷ Jacnamni je huin'it xii mina cajpjäy anajty ñecypejtcixy, ypidigüy Judas huidibi tzon Galilea. Mayjäy ypanicxi; nañ jadu'n ajcxy yaj'o'cy, e tüg'óciy jäy huidibi panicxy jadu'ñyi ajcxy yöyhuäcxtay. ³⁸ Paady iich miich ajcxy jadu'n nimaaygixy, ixmajtzcix yi apóstoles ajcxy, e ca' mmijyöybejtcixy. Peni jäy yi y'ayuc ytiy'ajt huidibi ajcxy ymiid, cixip tigoyip yi'. ³⁹ Pen Dios y'ayuc ytiy'ajt yi' ajcxy ymiid, ca' ajcxy mjadipy nej myajcödigóoygixyipy. Jaty nayguend'ájtigixy, ca' jecyity co Dios anajty miid mdziptungixy.

⁴⁰ Nidüg'óciy ajcxy jäygidacy Gamaliel ycapxhuñin. Huin'it ajcxy mijhuoy yi apóstoles ajcxy. Chi ajcxy tzaachytuñ, chi ajcxy c'i'ajty, etz capx'adujcy co ca' huaad Jesús y'ayuc jaccapxhuäcxi. Huin'it ajcxy najtzmadziy. ⁴¹ Je apóstoles ajcxy ypidzimy ajcxy ma tungmiidpi ajcxy yhuinduu ooy yjotujcity co Dios jadu'n ti aa'ixiy co huen tzaachytuñii miid Jesús yxii ycixpi. ⁴² E ooy ajcxy yaj'ixpijccixy etz nimiyaaccixy Jesucristo jabom jabom jadu'n tzajtigoty nañ jadu'n majaty tjc.

Chi ajcxy yajnibejty huixtucj mutztungmiidpi

6 Je huin'it xii ajcxy huidibi ixpijcp Jesús y'ayuc nigü anajty ñimayiy'adiitzcixy. E huidibi anajty capxp griego ayuc ytigüy nayñigápxip miid huidibi judío y'ayuc capxp. Yminaangixy co yi griegojäy co'ögy töxyjädjic, ca' anajty ajcxy paady quipxyjaty miid je judíojäy co'ögy töxyjädjic caayin uucin jabom jabom. ² Huin'it

yi majmetzpi apóstoles ajcxy yajnaymujctaayi je jäy huidibi Jesús mibijcp, chi ajcxy yminañ:

—Ca' huaad iich ajcxy Dios y'ayuccapxhuäcxin n'ijxmajch, e nicxyich caayin uucin yajhuäcxcixy.

³ Paady miich ajcxy migügtijc nayhuin'ixixigix huixtucj yëydijctijc huidibi oy yajmij'ajtni Dios, huidibi huädz oy yhuinmañ ymiid, huidibi je Dios yjihuiñ ymic'ajt miid, e huen ajcxy tung'adiib jada tung. ⁴ Iich ajcxy njacmibijctzohuamy Dios, etz iich ajcxy njacyaj'ixpigamy Dios y'ayuc.

⁵ Tüg'óciy ajcxy jäygidacy je' ayuc. Chi je mayjäy huin'ixy Esteban huidibi ymiid ooy ymibijcin, etz ymiid Espíritu Santo. Nañ huin'ixy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudíojäyity. Hue' je' anajty choon jim Antioquía, jécyip anajty jijptigiyiñi judíojäy ytiy'ajt. ⁶ Chi ajcxy yajnicxy je jäy ma je apóstoles ajcxy. Chi ajcxy je apóstoles Dios mibijctzoy e cünixajy ajcxy.

⁷ Je Huindzin Jesús y'ayuc nigü anajty jäy tzachnehuiñi. E je mibijcpidijc nigü anajty ajcxy chachnimayiyiñi jim Jerusalén, ixti may judío teedy ajcxy ymibijcy.

Majch ajcxy Esteban

⁸ Je Esteban ymiid anajty Dios ymic'ajt etz y'oy'ajt e oy mijhuinmañ tuuñ, etz yejcy ixpejt ma jäy ajcxy. ⁹ Huin'it xii nijëjity ixpijctijc ooy ñay'ixquípigixy y'ixpijcin miid Esteban jim ma judíojäy ajcxy ñaymujctac huidi anajty yxii Libertados. E jim anajty

Cirene jäy, Alejandría jäy, Cilicia jäy, etz huidibi tzomb jim Asia ñaaxjot. ¹⁰Ca' ajcxy mimadacy Esteban com hue' je' anajty ycapxy miid yhuijy'ajt ycuje'ajt huidibi je Espiritu Santo anajty mooyip. ¹¹Chi Esteban ymidzip ajcxy mujuy jäy huidibi jëbi nihuambety Esteban, co ti anajty ooy ycapxtigooy etz ni'ojy Moisés etz Dios. ¹²Jadu'n ajcxy yajyuumiigy yaj'oxigy yi jäy mijjäydijc, etz huidibi ajcxy yaj'ixpijcp Moisés yley. Chi ajcxy mimadacy majch ajcxy Esteban, yajnicxy ajcxy ma je judíojäy ymijtungmiidpi etz ixpicytijc ñaymújcigixy. ¹³Chi ajcxy ixtaayi jäy huidibi nihuambediib, chi ajcxy yminañ:

—Jada Esteban jibic nigapxy yi Dios ytijc etz Moisés ytij'ajt. ¹⁴Ti iich ajcxy midoy co yminañ co Jesús je Nazaretpi yjidamy je Dios ytijc, e yajtigadzañ Dios ytij'ajt jadu'n nej Moisés ajt xymooyim.

¹⁵Huin'it je judíojäy tungmiidpi e tüg'óciy jäy nej anajty ajcxy jim iñaaygixy huindixpejty ajcxy Esteban. E chi ajcxy ijxi yhuiñyjijp jadu'n anajty quëxigy nej y'angel yhuiñyjijp.

Esteban ñaygohuaani ma tungmiidpi yhuinduu

7 Huin'it je teedy mijtungmiidpi yaj'amidooy Esteban:

—¿Nej janch jadaji?

²Chi Esteban y'adzooy:

—Migügtijc ajcxy etz mijjäydijc ocmidoogix. Iich ajt nDios mijpi janchypi nayquëxici ma iich ajt nmij'ap nmijteedy Abraham jecy'ajty co anajty jim

ity Mesopotamia ñaaxjot, ca'ni anajty chinaydacpicy jim Harán. ³Chi Abraham Dios ñimaayi: “Ixmatz mnaax mgajp etz tüg'óciy m'amigügtijc, e nicx ma yi naaxjot huidibi myajnixihuamyb.” ⁴Chi Abraham choon ma yi Caldea ñaaxjot, e nicxy tzinaydacpijcp jim Harán. Co yteedy oy y'o'cni, chi Dios Abraham yajmiin ma jada naaxjot ma miich ajcxy cham mdzinäy. ⁵E ca' Dios moy Abraham jada naaxjot ya, ni ca' ma yhuäcxtägipy. Hue' je' janchtiy yaj'ahuaniy co möhuaaniy y'ap y'oc, e co anajty je' ajcxy jëdiib. Oyñi anajty Abraham ca' y'ung miidty co Dios ymigapxi. ⁶Ñimaayi Dios co y'ap y'oc y'adzinahuipy ajcxy ma huingjäy ñaaxjot, etz chi ajcxy ytumbi'adiiyb etz chaachytuniyb midaax migo'px jimijt. ⁷Nañ jadu'n Dios nimay Abraham: “Ndzaachytunipyich je naax cajp ma yi m'ap m'oc anajty ytumbi'adyii. Chi choonip ajcxy jim, e chi xymidunipyich ma jadayaabi it.” ⁸Dios ytuun tüg capxytuunin miid Abraham, co huen ajcxy yajtiy'ajttihip. Paady co Abraham y'ung Isaac yma'xung'ajty coductujc xii ajcxy oy tiy'ajtti. Nañ jadu'n Isaac ymang Jacob, e Jacob yi ymang nimajmetzpi ajcxy, huidibi ajcxy ñi'ap'ajty yi nimajmetzpicypi Israel ycajp.

⁹Chi Esteban yjacminañ:

—Je' ajcxy Jacob ymang, iich ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios miid anajty y'lity José, ¹⁰etz nihuañ yajtzoocy ma

ayo'n jotmay. Chi Dios moy ixpájcín jigix cōmay ypidzimipy ma Faraón, je Egipto jāy yrey. Chi je rey José tung moy huen ane'my je Egipto naaxjot etz ane'mipy je rey ytijc.

¹¹Huin'it xii ymiñ mjiyuu mij'ayo'n jim Egipto etz jim Canaán ñaaxjot. Je huin'it xii iich ajt nmij'ap nmijteedy ca' anajty ajcxy paady ti ycayipy. ¹²Co Jacob oy nejhuüy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huidibi iich ajt nmij'ap'ajtm nmijteedy'ajtm. Chi ajcxy y'oy tügtecy trigo juuyb. ¹³Je mimejtz'ocpi co ajcxy oy trigo juy, huin'it José ñayñigapxi ma y'ajch ajcxy. E chi je rey nejhuüy pinjāy je' anajty je José. ¹⁴Chi José capxyñiguejxy huen cidaaccixy jim Egipto y' yteedy Jacob miid tüg'óciy yjuugy ymígüg. Hue' anajty ajcxy ñaybaattáayigixy nidugi'px majmocx jāy. ¹⁵E jadu'n yjajty co Jacobo oy chinaydacpicy jim Egipto. Jim oy comjegy y'o'cni. Nañ jadu'n jim ajcxy y'o'cy may iich ajt nmij'ap nmijteedy. ¹⁶E chi Jacob yjuugy ymígüg com jegy yajpidzimy Jacob ypajc ma ñaaxtigy, e chi ajcxy yajnicxy jim Siquem, oy pidaaccixy ma je o'cpi jut huidibi Abraham anajty ti juy meeñygyx ma Hamor ymang jim Siquem.

¹⁷Chi Esteban yjacminañ:
—Ytimypadaanipy anajty tiempo nej anajty Dios ti yaj'ahuany Abraham. Ti anajty yi judío jāy ooy ymayiyni jim Egipto. ¹⁸Chi oy jadüg rey ytigiyy ane'mbi huidibi ca' ix'y'adyii José. ¹⁹Je rey yhuin'iiñ iich ajt nmij'ap nmijteedy, e oy

ajcxy chaachytuun. E chi ane'my co huen y'ung ajcxy ñiguecytaaygixy huidibi anajty ajcxy ma'xung'ajtp, jigix y'ó'ccixipy. ²⁰Huin'it tiempo oy yma'xung'ajty Moisés, je huidibi ooy Dios jāygidacy. Chi Moisés ytaj yteedy tugiig po' yajyeeci ma ytijc. ²¹Co ajcxy yajñigueeci, chi je rey ñiix je' agondigiyy, e yajyeegy jadu'n nej yci'm'ung. ²²Paady Moisés ixpajcy tüg'óciy jadu'n nej Egipto jāy anajty ajcxy y'ixpicity, e ooy ymadacy miid y'ayuc etz miid ytung.

²³Co Moisés anajty miidity huixchiguüpx jimijt, chi pidacy yhuinma'n co nicxy ixa'n je' y'amigügtijc je Israel y'ap y'oc. ²⁴Chi Moisés ijxy co tüg egipcio jāy chaachytuñyii tüg je' y'amigüg. Chi Moisés yaj'o'cy je egipcio jāy, yaj'ahuimbijty nej anajty y'amigüg yajtzaachytuñ. ²⁵Hue' Moisés tijy co je' y'amigügtijc ajcxy huen nejhuüy huinjihuüy co Dios nihua'naanip ma ymidzip miid Moisés ycixpi. Chi ajcxy ca' huinjihuüy co Moisés nihua'naanip. ²⁶Com jabom Moisés paty mejtz Israel jāy chachtziptungixy. Chi Moisés jayaxxemañ je tzip, chi nimay: “Miich ajcxy nay'amigüg'ajtip, ¿nej co mdziptungixy miich ajcxy miñ xyipy?” ²⁷Je huidibi anajty ymígüg tzaachytuumb huin'it najtztijiy Moisés, nimay: “¿Pin ti xypidägy huindzin etz tiydumbi ma iich ajcxy? ²⁸¿Nej xyaj'ögaamich jadu'n nej axiy myaj'o'cy yi egipcio jāy?” ²⁹Co Moisés jadu'n midoy, chi yqueegy, ñicxy jim ma Madián naaxjot. Moisés jegy y'adzinaay jim Madián naaxjot, e jim oy ypicy. Chi ytöxyjcy paty metz ymang.

³⁰Huixchiguipx jimijt naxy, huin'it jim adügtuum ma je cop huidibi yxii Sinaí, ñayguëxici tüg ángel jinjoty ma tüg quipymang huidibi anajty tzachtooyb. ³¹Chi Moisés ooy jihuüü huinmaay miid je' ycixpi huidibi anajty y'ijxyp. Co oy mihuingoñ, chi midoy co je Huindzin Dios ñimäyüi: ³²“Hich Dios huidibi mmij'ap mmijteedy ajcxy Abraham, Isaac etz Jacobo Dios'ajtpy.” Chi Moisés chiyuygoty, ca' anajty ocjac-huindixpedaani. ³³E je Huindzin Dios nimaayü: “Jen mgig, com je it ma miich mdinäy, Dios yi' y'it. ³⁴Hich ti n'ixyich njäyich nej tzaachypi paatcixy jim Egipto. Ti nmidooyich co y'ajcxy yäxy ytinäy miid je tzaachypi ycixpi. Ti ngidägyich co ajcxy ngohuaanip. Hich miich nguexamyb jim Egipto ma yi Israel jäy ajcxy.”

³⁵Chi Esteban yjacminañ:

—Co Moisés oga'n ñicxy ma iich ajt nmij'ap nmijteedy ca' ajcxy cöbijcy huen y'ane'miüy, chi ajcxy yminañ: “¿Pin ti xyñimäy co iich miich ajcxy nhuindzin'adiiyb?” Co mimetz'ocpi Moisés ñicxy ma yi Israel jäy, je taabi anajty je ángel ti ymígapxyüi jinye'ñ agujc, chi ajcxy cöbijcy. ³⁶Je Moisés je' yajpidzim iich ajt nmij'ap nmijteedy jecy'ajty jim Egipto. Moisés ytuun oy mihuinma'ñ etz ijxpejt huixchiguipx jimijt jim Egipto, jim ma tzaptz mejy, etz jim ma mijtigüduum. ³⁷Je Moisés huidibi jecy'ajty nimay je Israel jäy: “Dios y'ijxtihuipy tüg jäy ma miich ajcxy m'ap m'oc huidibi najtzcaxihuipy yi' y'ayuc, jadu'n nej ti xy'ijxtiüyich ma miich ajcxy. M'amido'ijtip

ajcxy yi' y'ayuc.” ³⁸Je Moisés jim je' anajty mijtigüduum miid je mayjäy. Chi jim je Dios y'ángel miid miydacy ma je cop huidi yxii Sinaí, etz Moisés yajnax Dios y'ayuc ma iich ajt nmij'ap nmijteedy. Moisés ycöbijc Dios y'ayuc huidibi jugy'ajtin huinixiibi miid, etz jayhui'my miid iich ajt ycixpi.

³⁹Chi iich ajt nmij'ap nmijteedy ajcxy jecy'ajtpy ca' anajty ajcxy capxcöbígangaixy Moisés, ca' anajty cöbijccixy je' y'ane'min, chachhuimbidaangixy jim Egipto. ⁴⁰Chi ajcxy Aarón nimay: “Ndzojcy pich ajcxy co miich oyduñ tüg Dios huidibi iich ajcxy xyhuinhuoohuip, com ca' nnejhuüiyim ti jada' ti yjadyüi je Moisés huidibi ajt xyajtzoönim Egipto ñaaxjot.” ⁴¹Chi oyduñ ajcxy tüg huajmang. Chi huindzigüiy ajcxy je huajmang huidibi anajty ti yajcojcy, e ooy ajcxy mijotcujc'ajty huidibi ci'm anajty ti yajcojy. ⁴²Huin'it xii ajcxy Dios y'ixmajtzi, huen ajcxy ojadaty yi xii, yi po' etz madza'. Com jadu'n Dios y'ayuc cojaaybi cojaay co Dios jadu'n yminañ:

Israel jäy ajcxy canan iich je' huidibi ti mhuindzigüiygixy jim mijtigüduum huixchiguipx jimijt.

⁴³Ti mgüyníxcixy Moloc ytijc etz yi Renfán ymadza', tzadzech, quipychech etz oori oyduñ huidibi miich ajcxy ci'm myajcoj huidibi anajty ajcxy m'ojadadamy. Paady iich miich ajcxy nyajpidzimaangixy ma yi mnaaxjot, e nguexaangixy jiguem jim Babilonia ninaxy.

⁴⁴Chi Esteban yjacmínañ:

—Jim mǎjtigǎduum ñich ajt nmǎj'ap nmǎjteedy ymǎid anajty cochactǎjc ma anajty ajcxy Dios huindzigǎy. Jiiby anajty ajcxy yujccǎy je tzaa ma Dios ytiy'ajt ycojaayǎty. Je cochactǎjc ajcxy ycoj jadu'n nej anajty ti yaj'ane'myii Moisés, e nej anajty yajni'ixǎyii nej tunǎpy. ⁴⁵Ñich ajt nmǎj'ap nmǎjteedy mǎhu'i'm je cochactǎjc, e ñich ajt nmǎj'ap nmǎjteedy huídibi mǎiñ ma jada naaxjot mǎid Josué, chi mǎimiñ ajcxy je cochactǎjc je taab ajcxy mǎmadacy je ymidzip canaag'agajp. Dios yajpǎdzim je' ajcxy ymidzip ma je naaxjot, jǎgix yajcǎidǎgǎhuip ñich ajt nmǎj'ap nmǎjteedy. Yajtuuñ ajcxy je cochactǎjc, ixti cooni David ytigǎy ane'mbi. ⁴⁶Dios yjǎygǎdaac je rey David, e David yjacoja'ñ anajty tǎg tǎjc oyduñ ma jǎbi yaj'ojadaty yajhuindzigǎy Dios, je Dios huídí Jacob mǎjpidac jecy'ajty. ⁴⁷Per Salomón je' oy cojy Dios ytiyc. ⁴⁸Oy yǎ Dios tzajpǎjoty pi ca' chinǎy ma yǎ tǎjc tiibi jǎy cojy. Jadu'n nej je Dios y'ayucnajtzcaxǎyibi jecy'ajty jaybety co Dios jadu'n ymǎinañ:

⁴⁹Je tzajp hue' je' ñich n'ane'mdac, jada naaxhuíñybi ñich ndecypocxtac. ¿Ti tǎjc ñich mǎich ajcxy xycjoaanǎp? ¿Ma je it huídibi it ma ñich jǎbi nbocxy?

⁵⁰¿Nej cay ñich ti n'oydundǎy tǎg'ócǎy?

⁵¹Mǎich ajcxy ooy mǎjotjuuñity, ca' mgapxymǎdoy Dios. Jadu'n Esteban yjacmǎinañ:

—Jadu'n mǎich ajcxy mǎjot mǎhuinma'ñ mǎidity jadu'n nej

jǎy ajcxy huídibi ca' Dios ytiy'ajt nejhuíyí. Mǎich ajcxy jǎtyim mǎidzip'ajtpy je Espǎritu Santo. Mǎdǎgǎyib ajcxy mǎid mmǎj'ap mmǎjteedy. ⁵²Mǎich ajcxy mmǎj'ap mmǎjteedy chaachytuun tǎg'ócǎy Dios y'ayucnajtzcaxǎyibi. Yǎ' ajcxy yaj'o'c Dios y'ayucnajtzcaxǎyibi huídibi jayǎj'aty najtzcaxǎy co ymǎinañ tǎg jǎy huídibi tudǎgyip. E co je tudǎgy jǎy ymǎiñ, chi mǎich ajcxy agojǎx myaj'o'cy. ⁵³Je Dios y'ǎngel mǎich ajcxy xymooy je Dios ytiy'ajt, e ca' ajcxy mgǎbǎjcy.

Yajtzaagǎgǎtcǎxy Esteban

⁵⁴Co je mayjǎy mǎdoy jadu'n nej Esteban ymǎinañ, chi ajcxy mǎjotmǎtcoty Esteban, chi ytigǎy ajcxy tǎitzmucxpi tǎitzqueetpi. ⁵⁵E chi je Esteban jǎhuíy je Espǎritu Santo ma yjot yhuinma'ñ, chi chajp'ijxy, e ijxy yǎ Dios y'oy'ǎjtin etz ijxy Jesús ytinǎy a'oy'amy ma Dios Teedy. ⁵⁶Chi Esteban nǎmay je mayjǎy:

—Íljxcix! N'ijxypǎch yǎ tzajp ahuǎdz, e n'ijxypǎch je jǎy huídibi tzoon tzajpǎjoty ytinǎy a'oy'amy ma Dios Teedy.

⁵⁷E chi je mayjǎy ajcxy ytǎtz'ac amo'cxy, chi ajcxy ytigǎy huambi jǎhuíyibi, e chi ajcxy nǎmujcy yajmujcy Esteban. ⁵⁸Chi ajcxy yajpǎdzimy Esteban cajppa', je' oy cǎgǎtcǎxy. Je tǎy'ajt yejcpi huídibi jadu'n idǎitz, chi yjocxhuit ajcxy yajmǎhu'i'my tǎg yeeg'anǎg huídibi anajty yxii Saulo. ⁵⁹Jim anajty ajcxy Esteban tzachǎtcǎxy. Chi Esteban Dios mǎibǎjctzoy, ymǎinañ:
—Huindzin Jesús, cǎbǎjcgǎch n'alma.

⁶⁰Huin'it ycoxtinay'ahuuiy, e chi yaaxqueegy mic yminañ:

—Huindzin, ca' mbocy ixipy nej ajcxy xytuñich.

Co jadu'n Esteban yminanday, chi oy y'ögy.

Saulo pahuidijttägy ooy mibijcpidijc

8 Saulo ytuun quipxycapxy miid huidibi ajcxy yaj'oc Esteban.

Huin'it xii yaj'ixhuidijc yajpahuidijc pinjaty anajty Jesús mibijcp jim Jerusalén. Tüg'óciy je jäy ajcxy huidibi Jesús mibijcp anajty yqueec-huäcxtay, ñicxy ajcxy jim Judea ñaaxjot etz Samaria ñaaxjot. Jëyi je majmetzpi apóstoles ajcxy jac-hui'miiy.

²Nijëjity yëydijc huidibi Dios huindzigiiyb oy yajnaxtigiiy Esteban. E ooy ajcxy jotmay jihuiiy, yaaxy ajcxy miid je' ycixpi. ³Chi Saulo ooy ixhuidijtcoty pahuidijtcoty huidijaty Jesús mibijcp etz tijc tijc anajty yajpidzimy pahuich pajuguty yëydijctijc etz töxyjäydijc, e pidaaccixy anajty pujxtigoty.

Jim Samaria ajcxy capxhuäcxy Dios y'ayuc

⁴Je huidi ajcxy queec-huäcxtay ycapxhuäcxyp anajty ajcxy Jesús y'ayuc huen tim ma'amy huidijtcixy.

⁵Nidügti huidibi anajty yxii Felipe ñicxy jim Samaria, ytigiiy y'ayuccapxhuäcxpi, yajnimay ajcxy Cristo ytiy'ajt. ⁶E je jäy ajcxy ñayyöymujci nidüg'óciy ajcxy y'amido'ijtcixy janch amoñyi jadu'n nej Felipe anajty ymiydägy e ijxyp anajty ajcxy je mijhuinma'ñ huidibi Felipe anajty ytumyb. ⁷Com may anajty jäy jim huidibi miid ca'oybi

ma yjot yhuinma'ñ, e tzoocp anajty ajcxy. E co je ca'oybi anajty ypidzimy ma je jäy, chi je jäy ooy yjacyaaxqueecy. Etz ñañ mayjäy anajty chögy huidibi ca' yci' ytecy yücxxy etz tecyma'tpi. ⁸E jadu'n je mayjäy ajcxy anajty jim ooy yjotcujcity.

⁹Jim anajty tüg yëydijc huidibi anajty yxii Simón huidibi anajty ti ni'ixpigiiy huijyjäy huinma'ñ, e ooy anajty may Samaria jäy huin'iiñ, ymina'ñ co je' anajty ymijity yjanchity. ¹⁰Tüg'óciy jäy anajty oy amido'ijtcixy Simón y'ayuc, pi'ctijc etz mij'anäctijc, e yminaangixy: —Jadayaabi yëydijc ymiid jada Dios ymic'ajt.

¹¹Ooy anajty je jäy ajcxy Simón mijnicxpejtcixy, com miid je mañ'ajt anajty jecy ti chachhuin'iniigixy. ¹²Co je Samaria jäy mibijcy je ayuc jadu'n nej Felipe ñimiydacy Dios y'ané'min etz Jesucristo, chi ajcxy ñiibejty yëydijctijc etz töxyjäydijc. ¹³Etz je Simón, je huijyjäy, ñañ jadu'n mibijcy e ñiibejty. Chi Simón puyöyiy Felipe, ooy jihuiiy huinmaay jadu'n nej je mijhuinma'ñ huidibi anajty Felipe ytumyb etz jadu'n nej anajty Dios ymic'ajt ijxi.

¹⁴Co ajcxy je majmetzpi apóstoles ajcxy, huidi anajty jim Jerusalén, nejhuiiy co je Samaria jäy anajty ti cöbijccixy Dios y'ayuc, chi ajcxy quejxy jim je Pedro etz Juan. ¹⁵Co Pedro etz Juan yja'ty jim Samaria, chi ajcxy Dios mibijctzoy miid je mibijcpidijc ycixpi, jigix ajcxy ymöhuiiyb je Espíritu Santo. ¹⁶Com ca'ni anajty je' ajcxy ñicidägyii, jëyi anajty ti ñiibejtcixy ma Huindzin

Jesús yxii. ¹⁷Huin'it Pedro etz Juan cñixajy ajcxy, e chi je Espíritu Santo y'adigiyy yjottigiy ajcxy.

¹⁸⁻¹⁹Co Simón ijxy co je Espíritu Santo y'adigiyyi yjottigiyi co yi apóstoles ajcxy ycñixajy, chi Simón yaj'ahuaniiy je' ajcxy meeñ, yminañ:

—Mooygich nañ jadu'n yi mic'ajt jigix co ngñixájibich hueñypñity nañ jadu'n jébi ajcxy je Espíritu Santo y'adigiyyi yjottigiyi.

²⁰Chi Pedro nimay Simón:

—Mí'ögihuipy miich mmeeñ, miid co mhuinma'ñ ti mbidägy co meeñygix mbada'ñ je huidibi Dios ñiyejcp. ²¹Com miich ca' xypaady jadaaabi tung, com miich mjot mhuinma'ñ ca' ytudägy ma Dios. ²²Jothuimbit e ixmatz yi mjibic-huinma'ñ, e mibijctzou Dios, ca' jécyity xyhuinmeecixpy jadu'n nej jibic mjot mhuinma'ñ mmiidity. ²³Com janch ta'm miich mjot mhuinma'ñ, e yi jibicpi hue' xymiidity mach.

²⁴Chi Simón y'adzooy:

—Mibijctzou je Huindzin Dios miid iich ycixpi, jigix ca' ti xyjadipyich jadu'n nej miich ti xyñimäyich.

²⁵Co Pedro etz Juan tiy'ajt yejcy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxiiy jim Samaria ñaaxjot, e capxhuäcxy Dios y'ayuc nej ajcxy y'alma nidoocin paadipy.

Felipe miid je Etiopía jäy

²⁶Huin'it xii Huindzin Dios y'angel migapxy je Felipe, nimay:

—Tzoon ya, nicx ma madzäcruudz ypidzimy, ma je tü'aa huidi tzomb

jim Jerusalén huidibi nicxp jim Gaza.

Je' je' je tü'aa huidibi adügtuum najxp. ²⁷Felipe tim janitzon e ñicxy, e tü'am naybaatti miid tüg Etiopía jäy. Hue' je' anajty eunuco, mijtungmiid jim Etiopía. Yi' je' tesorero'ajt anajty ma je töxyjäy huidibi anajty yxii Candace huidibi anajty ane'mb jim. Je eunuco jim anajty ti y'oy Jerusalén Dios ojadajtp. ²⁸E chi yhuimbijtni anajty ma ycajp, iñaayb anajty carretijoty yam chachnecycapxy. Hue' anajty chachcapxyp je Dios y'ayuc huidibi Isaías ycojaay. ²⁹Chi je Espíritu ñimay Felipe co huen nicxy najtzpadäy je carreti ma je eunuco anajty y'iñäy.

³⁰Co Felipe mihuingoñ je carreti, chi midoy co je jäy anajty capxy je necy huidi Isaías yjaay, chi y'amidooy:

—¿Nej mhujnhuuiyb huidibi mgapxyp?

³¹Chi je jäy y'adzooy:

—¿Nej iich nhujnhuuiyb pen ca' pin xyajnimäyich?

Chi je eunuco nimay je Felipe co huen miid iñäyii carretijoty.

³²Je huidibi anajty je eunuco chachcapxyp jadu'n je' anajty yminañ:

Jadu'n ajcxy nicxy yaj'ögy nej jäy borregi nicxy yaj'ögy. Je' amoñ'ijty jadu'n nej borregi amoñ'ity co jäy nime'pxy. Ni tüg'aa huam ycaminañ.

³³Ti jäy yajtzöyduñy, ca' ajcxy a'ixiiy co yjanayñigapxtüdaani. Ni y'ap y'oc ycaca'ty pin ocnigapxtüdiib. Co yaj'öci, chi chooni ya naaxhuiñ.

³⁴Chi je eunuco y'amidooy Felipe:
—Tunmay'ajt yajniimaaygich pin
jada ayucnajtzcaxhiybi ñimiydacpy,
¿ci'm ñayñimidyägyii o ji jada
huingbi pin nimiydacpy?

³⁵Chi Felipe yajtzondacy je
ayuc capxtiicxin ma jadyaabi
Dios y'ayuccojaaybi ñecy. Chi
yajmiidmiydaaci nej Jesús yajty
y'ayoy. ³⁶Co ajcxy ñajx ma tüg nii,
chi je eunuco yminañ:

—Cha nii, ¿nej ca' iich jëbi huaad
nniibetyi?

³⁷Chi Felipe y'adzooy:
—Pen mmibijcpy Jesús miid
tüg'óciy yi mjot mhuinma'n jëbi
mniibety.

Chi je jäy y'adzooy:
—Nmibijcpyich co Jesucristo Dios
yi' y'ung.

³⁸Chi je eunuco nimay je carreti
huindzin co huen yajtinayxipy je'
carreti. Chi nimetz ajcxy ñicxy
ma nii, e chi Felipe yajniibejty je
eunuco. ³⁹Co ajcxy ñiibidzimy,
chi je eunuco ijxtigoy je Felipe.
Jadu'ñyi je Huindzin Dios y'Espiritu
yajnixi. E chi je eunuco ytü
yajyöyñi jotucj. ⁴⁰Felipe yajpaty
jim Azoto, chi ñajxy cajp cajp
capxhuäcxi Jesucristo y'ayuc ixti
yja'ty jim Cesarea.

Saulo yjothuimbijty

9 Ooy Saulo tzach'ixhuidijty
pahuidijty Jesús yjäy,
y'ahuändacy ooy, e yaj'öga'n
anajty ajcxy. Paady oy ixty je teedy
mijtungmiidpi, ²pijctzoy cötújcín,
co anajty ñicxa'n jim Damasco
ma yi judfojyäy ajcxy ñaymujctac,
madza'n pinjaty Jesús y'ayuc
mibíjcip. Saulo yajmiina'n anajty

ajcxy mach jim Jerusalén huen
yëydijctjcity huen töxyjäydjcity.

³Jim anajty Saulo ñicxy mihuingoñ
je Damasco cajp. Huin'it jotcómoñyi
je tiicxin huidi tzomb tzajpjoty,
ñigidaaci jühuidity je Saulo.

⁴Huin'it Saulo yciday, e midoy co
ñimäyii:

—Saulo, Saulo, ¿na'amy co
xychachpahuidijttägyich?

⁵Chi Saulo yajtiy:

—¿Mbin miich, Huindzin?

Chi midoy co y'adzoyii:

—Iich je' Jesús, je huidibi miich
mdzachpahuidijttacpy, ci'm
nayyajtzaachytunyii jadu'n nej
huajyuub co jipconebi'y huidi miid
ñuumygumyii.

⁶Chi Saulo chiyuygoty
chachchigiiy, e yminañ:

—Huindzin, ¿ti mdzojcpy
ndunipyich?

Chi je Huindzin Jesús ñimaayi:

—Pidig etz nicx cajpjoty, e jim
nyajnimähuipty ti jëbi mduñ.

⁷Je yëydijctj huidibi anajty Saulo
ymiid ooy ajcxy ñay'adzigiyyi, co
midoy je' ajcxy ayuc e ca' ajcxy ni pin
ma y'ijxy. ⁸Chi Saulo ypidigy, e co
huindicxici ca' pin ma oc'ijxni. Chi
ajcxy majch Saulo ma yci', e chi ajcxy
huijtznicxy jim Damasco. ⁹Tugiig xii
Pablo jim y'ijty huuintz, ca' ycaay y'uucy.

¹⁰Jim Damasco anajty tüg
yëydijc chinäy huidibi Jesús y'ayuc
mibíjcip, huidi anajty yxii Ananías,
cumäyjoty Dios ñimaayi:

—iAnanías!

E chi je' y'adzooy:

—Cha iich, Huindzin Dios.

¹¹⁻¹²Chi je Huindzin Dios ñimaayi:

—Pidig, nicx ma je tü huidibi
yxii Derecha, e jim ma Judas ytijc

yajtiuu tüg Tarso jäy, huidi yxii Saulo. Dios mibijctzoob je' jim cham, cumäyjoty ti huin'ijxy tüg yëydijc huidi yxii Ananías, co oy ñimiñyii, e ycñixajiiy jigix y'ijxigip jadüg'oc.

¹³Chi Ananías y'adzooy:

—Huindzin Jesús, mayjäy ti xyajmiidmiydägyich ajcxy jadu'n nej yi Saulo jibic y'idich jim Jerusalén miid miich mjäy ajcxy.

¹⁴Jadachambi ti mimiñ ya je necy, ma teedy mijtungmiidpi ti ycötujcmöyii, co huen majztäy je jäy, e yajnicxtähuipy jim Jerusalén, tüg'óciy pinjaty ojadajtp miich mxii.

¹⁵Chi je Huindzin Jesús nimay Ananías:

—Ñicx, com ti iich nhuin'ixy yijiibi yëydijc, jigix iich nxii etz n'ayucich capxhuäcxipy ma tüg'óciy naax cajp huidi ca' yjudíojäyity, etz ma yi reydiyjc, etz nañ jadu'n ma yi judíojäy ajcxy.

¹⁶Hich yi' nyajnimähuipy tüg'óciy, nej ayo'n yajnaxipy miid iich nxii ycixpi.

¹⁷Chi Ananías ñicxy ma Saulo anajty ti yjättägy, co ytigiyy tigoty, chi cñixajy Saulo, e chi nimay:

—Migüg Saulo, je Huindzin Jesús huidibi nayguëxici jim tü'am ma miich anajty miñ, yi' ti xyquexyich jigix m'ijxigipy jadüg'oc, etz je Espíritu Santo xyñidigihuip xycödigihiup.

¹⁸Mic'amy ycäy ma Saulo yhuin jadu'n nej acx ñimeeñ, chi y'ijxigy. Huin'it Saulo ypidigy e chi yajniibejti. ¹⁹Chi Saulo ycaay y'uucy, e chi ymic'pajcy jadüg'oc. Chi jim miid'ijty jecy huidibi ajcxy ixpijciy Jesús y'ayuc jim Damasco.

Saulo capxhuäcxy Dios y'ayuc jim Damasco

²⁰Chi janch mic'amy Saulo ytigiyy Dios y'ayuccapxhuäcxp ma je judíojäy ajcxy ñaymujctac jim Damasco, ymíñañ co je Jesús hue' je' Dios y'ung. ²¹Tüg'óciy pinjaty anajty midoohuip Saulo y'ayuc, ooy ajcxy jihuiy huinmaay, etz ñayñimäayigixy:

—¿Nej ca' jada' yjējity je huidibi tzachyajcödígoyam yi jäy ajcxy huidibi Jesús yxii miyaax ojadajtip jim Jerusalén? ¿Nej ca' jada yjējity huidi anajty ti ymiñ ya jäy ymajtzpi, e nicxy cýega'ñ ma teedy mijtungmiidpi?

²²Je Saulo capxhuacxip anajty Jesús y'ayuc huinmic jotmic, e nigapxtäy co Jesús hue' je' je Cristo, chi yi judíojäy ajcxy huidi anajty jim tzinaayb Damasco cijx ajcxy yhuinma'ñ tigoydäy.

Saulo yqueecy ma judíojäy ajcxy

²³Ti anajty hueeni xii tiempo ñajtninicxiyñi, chi je judíojäy ajcxy ñaygapxi co yaj'ögaangixy je Saulo. ²⁴Saulo ñejhuiy co anajty yaj'öga'ñyii. Chi jim anajty ajcxy y'ahuixyii xim tzuum ma je poch aguu cajppäbi, jim anajty yaj'öga'ñyii. ²⁵E je jäy ajcxy huidibi anajty ymijpidacpy Jesús, chi je' ajcxy codiinyñajxy je Saulo mijcachjoty ma je pochycop huidi je cajp miid jübojtz'ahuidítyity, e jadu'n je' choocy.

Saulo yajpaady jim Jerusalén

²⁶Co Saulo yja'ty jim Jerusalén, oy japuyöyihuaañ je mibijcpidijc

ajcxy. Nidüg'óciy anajty ajcxy ooy tzigiiygixy anajty com ca' anajty mibijccixy co je Saulo ti anajty yjothuimbity. ²⁷Chi Bernabé yajnicxy Saulo ma je nimajmetzp apóstoles ajcxy yajpaady, e chi yajmiidmiydactay nej Saulo anajty ti ixty je Huindzin Jesús tül'am, e nej anajty Saulo Jesús y'ayuc ti capxhuäcxi huinmic jotmic jim Damasco. ²⁸Huin'it Saulo yhuim'y jim Jerusalén, e miid huidity anajty ajcxy. ²⁹Aamic jotmic capxhuäcxy je Huindzin Jesús y'ayuc, etz miid miydaaccixy e ñaymicmigápxigixy miid je judíojäy huidibi griego ayuc caxp. E je' ajcxy nihuinmayiyyb co yaj'ógaangixy. ³⁰Co je mibijcpidijc nejhuuiy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹Huin'it tiempo je' ajcxy huidijaty mijpidacp Jesús, jotcujc anajty chinaaygixy, e nigí anajty ixpíjc'idích Dios y'ayuc ytiy'ajt, jadu'n nej yi huidibi ajcxy tzinaayb ma yi Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmij'ajtcixy je Huindzin Jesús, e miid je Espíritu Santo ypubéjtin, nigí anajty yjacmayiigixy.

Pedro yajtzoocy Eneas

³²Co anajty Pedro yhuidijty cogapxíy cajp cajp je mibijcpidijc ajcxy, y'oy nañ jadu'n ma je mibijcpidijc ajcxy huidibi tzinaayb jim Lida. ³³Jim minaybaatti tüg yëydijc huidibi anajty yxii Eneas, huidibi anajty ti ypa'm'ijtni tuctujc jimijt, hue' je' anajty ycíxuxy ytecyxuxy. ³⁴Chi Pedro nimay:

—Eneas, Jesucristo xyajtzoocp, pidíg, etz yajpidíg yi mmaabejt.

Chi Eneas mic'amy ypidígy.

³⁵Chi ijxy tüg'óciy jäy huidibi tzinaayb jim Lida etz Sarón. Chi ajcxy yjothuimbijttay nidüg'óciy, ixmajtztay tüg'óciy yi ñi'ap huinma'n e jijptigiyiyy yi Huindzin Jesús y'ixpíjcin.

Co Dorcas y'o'cy, chi yjugypijcy jadüg'oc

³⁶Je huin'it tiempo jim Jope, jim anajty tüg töxyjäy chinäy huidibi mibijcp Jesús, hue' anajty yxii Tabita, je' huidi griegojäy ytiyyp Dorcas. E je Dorcas oy xii tiempo anajty yajnaxy mi'oyjäy'aty yi jäy ajcxy. ³⁷Jadu'n yjajti huin'it tiempo Dorcas ypa'mbejty, e chi ytimy'o'cy. Co ajcxy yajtziiday, chi ajcxy je öcpi yajnicxy ma je tíjc mimejtnihuijtzpetypi. ³⁸Je Jope cajp naymihuingon'ájtíp anajty miid Lida cajp ma anajty Pedro yajpaady, co mibijcpidijc ajcxy anajty nejhuuiy co je' anajty yjímity, chi ajcxy mejtz yëydijc quejxy co huen nimäyii:

—Min tzojc ya Jope.

³⁹Huin'it Pedro ñicxy miid je' ajcxy. Co jim yja'ty, chi ajcxy yajnicxy ma je tíjc mimejtnihuijtzpetypi, e jim anajty ajcxy je co'ögy töxyjäydijc ajcxy ytinayjühuidityi ma je öcpi, chachyaaxcixy. Chi ajcxy Pedro yaj'ijxy je huit nijen huidibi Dorcas anajty ti yaj'oyíy co anajty yjugy'atyñi. ⁴⁰Mic'amy je Pedro quejxpídzimday je jäy ajcxy. Chi ycoxtinay'ahuuiy, e Dios mibijctzoy. Chi huindícxpejty je öcpi, nimay:

—Tabita, pidīg.

Huin'it Tabita yhuindicxgy, e ijxy je Pedro, chi ñaygugiiy.

⁴¹Chi Pedro majtzi yci', e chi huijtzygy. Chi yaaxi ymigügtijc etz co'ögytöxyjäydijc ajcxy, chi ajcxy yajc'idigiiy juugy. ⁴²Tüg'óciy jäy ajcxy jim Jope nejhuiyday co Pedro yajjugypijcy je Dorcas. E mayjäy mibijcy je Huindzin Jesús. ⁴³Jadu'n yjajty co Pedro y'ijty jim Jope canaag xii ma je coodzpi ytijc huidi anajty yxii Simón.

Pedro etz Cornelio

10 Jim Cesarea anajty tüg tungmiidpi huidi anajty yxii Cornelio, hue' je' anajty capitán'ajtp ma tüg batallón soldado ajcxy yxiijip, la Italiana. ²Je Cornelio ooy anajty ytudägyity, etz je' miid tüg'óciy y'ung ytöxyjyc ooy anajty yajmij'ajtcixy Dios. Je Cornelio nañ jadu'n ypubety miid meeñ je judíojäy ayoobtijc, e je' Dios ojadajt anajty jabom jabom. ³Tüg xii, minacyxii anajty, Cornelio huin'ijxy janch huädz Dios tüg y'ángel ñigidaaci, e ñimaayi:

—iCornelio!

⁴Chi Cornelio huindicxpejty je ángel janch tzigiiyb anajty, e chi yajtiy:

—¿Ti Huindzin?

Huin'it je ángel y'adzooy:

—Jadu'n nej mDios'ojadaty etz jadu'n nej mbubety ayoobtijc ti Dios jäygidägy. ⁵Quex mjäy jim Jope, huen nicxy yajtzon Simón, huidibi nañ jadu'n yajtijp Pedro. ⁶Jim je' yja'ttacy ma jadügpi Simón, je cootzpi huidi ytijc mihuingon mejypa'. Je Pedro xyajnimähuipy ti mdunipy.

⁷Co je ángel ñicxni huidi anajty ti ymigapxyii, chi Cornelio yaaxi mejtz ytumbi, etz tüg soldado huidi Dios capxymidoob, etz huidibi je Cornelio ooy ymijnicxpedyii. ⁸Chi yajmiidmiydactay nej je ángel ñimaayi, chi ajcxy quejxy jim Jope.

⁹Com jabom jim anajty je quejxyöybi ajcxy ñicxy mihuingon Jope, cujc yxii anajty, e chi Pedro ypejty ma tijcnicx Dios ojadajtp. ¹⁰⁻¹¹Ooy Pedro anajty yuubögyii, e ooy jacaya'ñ, jimni anajty yjiicxy yaj'oyiyii. Chi Pedro huin'ixy je tzajp ahuädz, e huin'it ijxy quidägy jadu'n nej poob huit mijpi yxóchity majaty ytaatz. ¹²Jiiby ma je poob huit, jiiby anajty canaagnax iyujc huidijaty midaax yci' ytecy etz tza'ñ etz joon. ¹³Huin'it Pedro midoy co anajty ñimäyii:

—Pedro, pidīg nicxy yaj'ög yi iyujc etz tzüdz.

¹⁴Chi Pedro y'adzooy:

—Ca', Huindzin, caminaabi iich ti njicxy huidibi jibácip etz huidibi ca' ñigödúcyty nicxy judíojäy jicxcixy.

¹⁵Huin'it jadüg'oc ayuc midoy ñimäyii:

—Huidibi Dios yajhuäch ca' huaad mdijy co yi' yjibicity.

¹⁶Tugiig'oc jadu'n yjajti, chi je poob huit ypättigiiyñi tzajpjoty. ¹⁷Jim anajty Pedro tzachhuinmay nej anajty yhuimbidezimy je tiibi ixty co yja'ty ma tijc aguü je Cornelio yquexyöybi huidi ajcxy anajty nidiihuip yajtiihuip je Simón ytijc. ¹⁸Chi ajcxy mic ycogapxiy yajtiy pen jim anajty yjättägy Simón huidibi anajty nañ jadu'n yajtijp Pedro. ¹⁹E je Pedro je' anajty chachhuinmaayb tiibi ixty, chi je Espíritu Santo Pedro ñimaayi:

—Tugiig yëydijc ji xy'ixtäy. ²⁰Pidig e minac, nicx miid je' ajcxy, e ca' ti mhuinmay, com iich jadu'n ti nimäy co huen xy'ixtäy.

²¹Huin'it Pedro yminajcy ma je' ajcxy, je Cornelio quexyöybi, nimay ajcxy:

—Iich je' huidibi miich ajcxy m'ixtaayb, çti ycixpi co ti mmiingixy?

²²Chi ajcxy y'adzooy:

—Yi' iich ajcxy ti xyquexyich yi Cornelio huidibi capitán'ajtpi, je' tudägy jäy huidibi Dios yajmij'ajtp, je' huidibi tüg'óciy judíojäy ooy tzójccixy, etz cömaaygixy. Huindzin Dios tüg y'ángel ñimay Cornelio co miich miñ nyajhuoy, jigix mnácxip ma yi' ytijc, e y'amido'ida'n ajcxy nej miich myaj'ixpiga'n.

²³Chi Pedro yajtjctigiyy je' ajcxy. Chi ajcxy jim ymaahu'i'my. Com jabom Pedro ñicxy miid je' ajcxy, e chi nijējity ypanicxi huidibi mijpīdacp Jesús huidi anajty ajcxy tzinaayb jim Jope.

²⁴Com jabom ajcxy yja'ty jim Cesarea ma Cornelio anajty y'ahuixy tügmucy miid yjugymigüg, etz nijējity pin ooy miid ñaymigüg'adyii, huidijaty anajty ajcxy jayjip ti nimäy. ²⁵Co Pedro oyjaty ma je' tijc, chi Cornelio ytijcpīdzimoy oy yjīpcobadiy je' Pedro, e chi ycoxtinay'ahuixy yajmij'ada'n anajty je' Pedro. ²⁶Chi Pedro huijtztinayigy je' Cornelio, e nimay:

—Tinayig, ca' xyajmij'ida'ñich, nañ jadu'n iich njäyity nej miich.

²⁷Miid anajty ycapxy ymiydägy co ytijctigiy, jilby anajty mayjäy ni'amugi'ahuixcixy. ²⁸Chi Pedro nimay ajcxy:

—Miich ajcxy mnejhuixy co yi judíojäy ycostumbre capx'aducy ca' huaad judíojäy yöymucy miid huidibi ca' yjudíojäyity, ca' huaad ytigiyygixy ma ajcxy ytijc. Per Dios ti xyajni'ixiyich co ca' huaad nmīna'ñich ca' oyjäyity huädzjäyity pinjaty.

²⁹Paady co oy ti xyajhuoyiijich ti nmiñich, ni ca' huam ti nmīna'ñich. Nnejhuixhuaamyich na'amy co oy ti xyajhuoyiijich.

³⁰Chi Cornelio y'adzooy:

—Cham ymimīdaaxxiijy, jadu'n nej jadachambi hora, ya iich anajty ma ndijcich, jaygay jay'ügy nDios'ojadatyich. Com hue' anajty mijminacy xii mina judíojäy ajcxy ycapxtaaccixy, co tüg ñayguēxici jadu'n nej jäy miid ypoob huit janch adīcxp. ³¹E je' ángel xyñimaayich: “Cornelio, Dios ti xymīdoohui m'oración e ti jadu'n jäygidägy jadu'n nej mbubety yi ayoobtjic ajcxy. ³²Quex mdumbi jim Jope, huen nicxy yajtzoñ Simón huidi nañ jadu'n yajtjip Pedro. Jim Pedro yja'ttägy ma je' cotzpi ytijc huidibi yxi Simón, huidibi tzinaayb mihuingon mejypa'. Co je' ymiinipy, chi xymiidmiydägipy.” ³³Paady nguejxyich janch mic'amy huen nicxy xy'ixtäy. E ti may'ajt mduñ co ti mmiñ. Jadachambi cha iich ajcxy nidüg'óciy ma Dios yhuinduu. E n'amido'ida'angixyich tüg'óciy je' y'ayuc huidibi je' Huindzin Dios ti xyaj'ane'my jēbi xyajniimaaygixy.

Pedro Dios ytij'ajt nigapxy nimīydacy ma Cornelio ytijc

³⁴Huin'it Pedro ytigiyy y'ayuccapxhuäcxpi, nimay ajcxy: —Jadachambi huinjihuixyich, co yi Dios ca' ni tüg'ixy'ixy jäy,

y'actzojctaayb hueñypínity. ³⁵Dios ycöbójcpy hueñypinjáyity huídibi tzinaayb huen huídibi naax huen huídibi cajpity, pen chigiiyb ajcxy Dios, pen tumyb oybi. ³⁶Dios ti quexy yi' ytiy'ajt ma yi Israel jáy ajcxy, yajnimay co ji cham jotcuje'ájtín miid Jesucristo iich ajt nHuindzin. ³⁷Miich ajcxy mnejhuiyb yajxon nej ti ytunyii ti yjadyii ma judíoájy ajcxy ñaax ycajp chondacy jim Galilea, Juan el Bautista ti anajty capxhuäcxí Dios y'ayuc ytiy'ajt etz yjáyyajniibety. ³⁸E mnejhuiyb miich ajcxy co Dios yejc je Jesús je Nazarepi je Espíritu Santo, e nej Jesús yhuídijty e tuuñ oy'ájtín, etz mǎjhuinma'ñ, jadu'n nej yajtzocy je jáy ajcxy huídi anajty ane'm'ijtp ma yi mujcu'. Com Dios anajty miid y'itye je Jesús. ³⁹Iich ajcxy je tiy'ajt nmiidich tǔg'óciy jadu'n nej Jesús yjajty y'ayoy jim Judea naaxjot etz jim Jerusalén. Huin'it ajcxy Jesús yaj'o'cy cruudzcíxy. ⁴⁰E Dios yajjugypijcy codugiig xii, e chi yajnayguëxíci ma iich ajcxy. ⁴¹Ca' ti yajnayguëxígyii ma tǔg'óciy jáy, jéyi ma iich ajcxy huídi jayjyp Dios yhuin'ijx jígix tiy'ajt nyegípyich. Iich ajcxy caaymujc uucmujc huin'it co yjugypijcy ma y'o'cy. ⁴²Ti xyquexy iich ajcxy ayuc ngapxhuäcxpi ma mayjáy ajcxy etz nidiy'ajt'adipyich ajcxy co Dios Jesús ti pidágy mij'ane'mbi ma yi juugypi etz ma yi ógyipi. ⁴³Nañ jadu'n jecy'ajty tǔg'óciy Dios y'ayucnajtzcaxpiiybi ñimíydac ajcxy Jesús, e ymínañ ajcxy co tǔg'óciy je jáy ajcxy pinjaty mibijc je Cristo, Dios huinmecxiib ajcxy ypocy.

**Je Espíritu Santo ycidacy ma
je ca'pi ajcxy yjudíoájyity**

⁴⁴Yam anajty Pedro ycapxyñi co je Espíritu Santo ñidigiíyi ycödigiíyi ajcxy nidǔg'óciy huídijaty y'amído'ijt Pedro y'ayuc. ⁴⁵E je judío mibijcpidijc ajcxy tiibi anajty miin miid Pedro, ooy ajcxy jihuiy huinmay co Dios quejx Espíritu Santo ma je jáy ajcxy huídibi ca' yjudíoájyity, ⁴⁶co midoy ycapxcixy miid huingbi ayuc, etz cömaygixy jáymejtzcíxy Dios.

⁴⁷Chi Pedro ymínañ:

—¿Nej ca' jada' y'óyity co ñiibedipy ajcxy huídibi Dios ti ymóoyigixy je yEspíritu Santo jadu'n nej iich ajt xymooyim?

⁴⁸Chi Pedro ni'ane'mdiíy huen niibejtcixy ma Huindzin Jesucristo yxii. Huin'it ajcxy Pedro cohuaníy huen huí'my tǔg xii mejtz xii miid je' ajcxy.

**Pedro yajmiidmiydacy jim Jerusalén
nej anajty ti ytuñyii ti yjadyii**

11 Je apóstoles ajcxy etz je mibijcpidijc ajcxy huídi anajty ajcxy jim Judea, midoy ajcxy ayuc co nijéjity jáy huídi ca' yjudíoájyity ti anajty ajcxy cöbójciy Dios y'ayuc. ²E co Pedro yhuimbijty Jerusalén, chi nijéjity judíoájy ajcxy ooy Pedro, je' ajcxy huídibi tzachmíjpidaaaccixp judíoájy ycostumbre jadu'n nej ajcxy tiy'ajttiígyixy ymang. ³Je' ajcxy nimay Pedro:

—¿Na'amy co oy ti mgo'ixiiy jáy ajcxy huídi ca' yjudíoájyity, etz ti mgay m'úgy miid je' ajcxy?

⁴Chi Pedro nimíydactay tǔg'óciy jadu'n nej anajty ti yjaty, chi ymínañ:

5—Jim iich anajty Jope nDios'ojadatyich. Chi nhuin'ljxyich jadu'n nej tüg mij poob huit chooñ tzajpjoty, cidägy ma iich nhuinduu, xóchity anajty ma midaax ytaatz. ⁶Co nnimijhuägyich n'ixa'n'ich ti jiiby, chi n'ljxyich may iyujc, jiiby iyujc midaaxpi yci' ytecy, jiiby ahua'nbi iyujc, jiiby tza'n, etz joon. ⁷Chi nmidooyich tüg ayuc huidibi xyñimaaybich: “Pedro, pidig, yaj'ög yi iyujc etz tzüdz.” ⁸Chi n'adzooyich: “Ca' Huindzin, com caminaabi ndzüchich iyujc huidibi ca' ñigo'adücyity judíojäy ajcxy tzüdzipy.” ⁹Chi mimetz'ocpi tüg ayuc tzajpcixy xyñimäyich: “Huidi Dios ti yajhuäch, ca' huaad mdijy co ca' y'oychú'tznity.” ¹⁰Tugiig'oc jadu'n yjajti, chi je poob huit ypättigiyyñi tzajpjoty. ¹¹Huin'it xyñimiñich je quexyöybi nidugiig, chooñ ajcxy jim Cesarea. ¹²Chi je Espíritu xyñimaayich, co min n'ocnicxich miid je' ajcxy, ca' ma ni ti nhuinmayipyich. Miid nicxyich nidugiig nmigügtjicich. Chi iich ajcxy ndigiyy ma je jäy ytijc. ¹³Je codijc xyajmiidmiydaacich co je' anajty ti huin'ixy tüg ángel ma ytijc, ñimäyii: “Quex mdumbi ajcxy jim Jope huen nicxy yajtzoongixy Simón huidibi jäy ytijpy Pedro, ¹⁴e je' xyajnimahuip nej jëbi Dios m'alma xyajnidzoocip, miich etz tüg'óciy mjñn mdjic mjuugy-migüg.” ¹⁵Co Jesús y'ayuc ngapxhuäcxtzondaacich, chi je Espíritu Santo ñidigiyyi ycödigiyyi je' ajcxy. Tim jadu'n nej xyñidigiyyim xycödigiyyim je jayijp'atypi. ¹⁶Huin'it njäymejtzcoodyich nej je Huindzin Jesús yminañ: “Janch

Juan, je Bautista, jäy yajniibejt miid ni, e Dios jäy ajcxy y'adigihuiyib yjottigihuiyib je Espíritu Santo.”

¹⁷Pen Dios ti ymöyii je jäy ajcxy huidibi ca' yjudíojäyity tú'ciy miid huidibi iich ajt ti xymooyim co nmibjicim Jesucristo. ¿Ocjactim pin iich co Dios nmidzip'adiiybich?

¹⁸Je mibijcpidijc ajcxy jim Jerusalén, co ajcxy midoy Pedro y'ayuc, chi ajcxy y'amoday. Chi ajcxy Dios jäymejch cömay, chi ajcxy yminaangixy: “Dios jadu'n ti yminañ co je' ajcxy huidibi ca' yjudíojäyity jëbi yjothuimbijtcixy, jigix Dios ymöhuuyb jugy'ajtin huinixibi.”

Antioquía jäy ymidoo ajcxy Dios y'ayuc

¹⁹Taabi jäy yaj'o'cy Esteban, chi jäy ajcxy ooy ixhuidijtcoty pahuidijtcoty Jesús yjäy jim Jerusalén. Chi nijjëty ajcxy yqueecy, nicxy ajcxy jim Fenicia ñaaxjot, etz jim Chipre, etz jim Antioquía. E capxhuäcxy ajcxy je oybi ayuc ma jadyii judíojäy, ca' ajcxy jac ni pin yajnimay. ²⁰E nijjëty mibijcpidijc huidibi jim anajty ajcxy yconaaxip ycogájpip Chipre etz Cirene, chi ajcxy ñicxy jim Antioquía. Chi yajmiidmiydacy ajcxy je Huindzin Jesús y'ayuc miid griegojäy ajcxy. ²¹E je Huindzin Dios ooy ypubejti je' ajcxy, e ooy mayjäy ixmajch je jibic-huinmañ etz mijpidaaccixy yi Huindzin Jesús ytiy'ajt.

²²Co je mibijcpidijc ajcxy jim Jerusalén midoogixy jada ayuc, chi ajcxy quejxy Bernabé jim Antioquía. ²³Co Bernabé jim yja'ty,

chi ixyx jadu'n nej Dios anajty oy'ájtín ti tuñ, chi oy yjotcugiiy je Bernabé. Chi capxhuijy tüg'óciy co huen ajcxy janch cixyjot huinijot cuyduuni yi Huindzin Jesús y'ayuc ytiy'ajt. ²⁴Com Bernabé oyjäy je' anajty, e ooy mijpidägy Dios y'ayuc etz ooy miidity je Espíritu Santo jotjoty huinma'ñyoty. Ymiid je' ycapxhuñin ooy mayjäy mijpidacy Jesús y'ayuc ytiy'ajt.

²⁵Co jadu'n yjajti, chi Bernabé oy ixtay Saulo jim Tarso, e co paty, chi miidmiin Antioquía. ²⁶Jadu'n yjajty jim ajcxy y'ijty tüg jimijt, yaj'ixpíjccixy je mayjäy huidibi ajcxy jijptigiyiiy je Jesús y'ixpíjcin. Jim Antioquía oga'n yxiimoy cristiano, je jäy ajcxy huidibi mijpidacp Jesús.

²⁷Huin'it tiempo nijjéjity tiy'ajtnajtcapxiybi chooñ Jerusalén ñicxy ajcxy jim Antioquía. ²⁸Tüg huidi anajty yxií Agabo ytinay'ahuüiy mayjäyoty, e chi je Espíritu Santo yajcapxi, e yminañ co mijyuu anajty ñaxcidäga'n huindu'ñybi naaxhuiñ. E janch jadu'n yjajti taab anajty Claudio y'ane'my. ²⁹Huin'it je mibijcpidijc ajcxy jim Antioquía pidacy ajcxy yhuinma'ñ co quexaangixy pubéjtin ma ymigügtijc ajcxy huidi tzinaayb jim Judea, jadu'n nej pubéjtin pin tim yega'ñ. ³⁰E jadu'n ajcxy tuuñ. E je meñ tiibi anajty ymucy yajmiguejxy ajcxy je Bernabé etz Saulo ma je mibijcpidijc tungmiidpi jim Judea.

Co Jacobo y'o'cy etz co Pedro yajpujxtijctigiyyi

12

Huin'it tiempo je rey Herodes yajmajtzi nijjéjity

Jesús yjäy, e chi yajtzaachytuuni. ²Chi ni'ane'mdiy huen yaj'ögyii miid espada je Jacobo, je Juan y'uch. ³Co je rey nejhuiiy co je judíojäy ajcxy jadu'n ooy jäygidaaccixy, chi ymajtzi Pedro nañ jadu'n. Hue' jadu'n yjajti xiijoty, je xii mina tzajcaagy caaygixy huidi ca'pi ylevadura miidity. ⁴Co Pedro yajmajch, chi yajpidacy pujxtigoty. E chi je rey ane'my co huen midaaxpicy soldado ajcxy cuend'adyii, tügpicyjaty midaax soldado ajcxy. Hue' anajty je rey ti huinmay xiinaxy anajty tiyduna'ñ Pedro mayjäy agujc. ⁵Pedro jiiby anajty pujxtigoty janch oy cuend'aty. E je mibijcpidijc janch Dios mibijctzodiib anajty ajcxy miid Pedro ycxipi.

Dios y'ángel yajpidzimy Pedro pujxtigoty

⁶Huin'it coodz ma ca'ni anajty yxiimiy, ma je Herodes anajty tiyduna'ñ Pedro mayjäyoty com jabom, Pedro maab anajty, e soldado agujc ajcxy cixoch tecyoch anajty miid cadena, e jadügpicy soldado ajcxy pujxtijc'aguy anajty ajcxy ycuend'aty. ⁷Chi janch timetiini yHuindzin Dios tüg y'ángel ñayguëxici ytinäy ma Pedro yhuinduu, e je pujxtijc yaj'aniyday. E chi je ángel tijyücxxy Pedro ma ycaach, chi yajmäyhuijy, e nimay: —Pidig mic'amy.

Chi je cadena ycáday ma Pedro yci'. ⁸Chi je ángel nimay Pedro: —Ñayhuiini, yajtigi' mgig.

Co Pedro yajtigiyday ycig, chi je ángel ñimaayi: —Yajtigi' mjocxhuit, e pajamgich.

⁹Chi Pedro pujxtijc pidzimy axam ma je ángel, ni ca' nejuhiy pen janch anajty huídibi je ángel tumyb, hue' jihuiy jadu'n nej ycumäy. ¹⁰Chi ñajxy ajcxy ma tügpicy cuend'ajtpi, mic'amy ajcxy mimetzpi ninajxy.

Co ajcxy yjáty ma mijpujxtijc aguu, ma mijtúba', chi je' ci'm'ahuaach. Chi ajcxy ypidzimy.

Ti anajty mijyöygixni co je ángel ixmajtzní Pedro. ¹¹Huin'it Pedro yhuinma'ñmejch, chi yminañ:

—Jadachambi njihuiybich co janch jada' co je Huindzin Dios ti quexy y'ángel, e yi' ti xñihua'ñich ma Herodes, etz jadu'n nej tüg'óciy judíoáy ajcxy anajty xytuna'ñich.

¹²Co Pedro yjot yhuinma'ñ ymejch, chi ñicxy ma María ytijc, je Juan ytaj, je Juan huídi jäy ytijpy Marcos, ma anajty ajcxy jim mayjäy tügmucy y'ijtcixy Dios mibijctzoogixy. ¹³Co Pedro tijc'aguu cojxnojcy, je tiba'y'amybi, chi tüg töxy'anäg ypidzimy huídi anajty yxií Rode, ixa'n pin je' tijc'aguu cojxnojcy. ¹⁴Co oy yögmido y Pedro je' anajty, chi ca' ytijc'aguu yaj'ahuaach. Jëyi co poyigy ñicxy tigoty co anajty tzachjotcúcity, nigapxy co Pedro je' anajty ma tijc'aguu.

¹⁵Chi je jäy ajcxy nimay Roda:

—Mloocjiiyb jada' miich.

Chi je töxy'anäg y'adzooy co janch je' anajty. E je jäy ajcxy yminaangixy co ca' yi' yjējity, hue' jada' Pedro y'ángel.

¹⁶Yam Pedro anajty tijc'aguu tzachcojxnocy co ajcxy yaj'ahuaach, chi ajcxy ijxy, chi ajcxy ooy chigiiy yjihuiy. ¹⁷Pedro cimiid ytiy'ajtyejcy co huen amoñ ajcxy.

Chi yajmiidmiydacy nej je Huindzin Dios anajty ti yajpidzimyii pujxtigoty. E nimay ajcxy co huen ñicxy yajmiidmiydägy jada je Jacobo etz jacjadyii mibijcpidijc.

Chi Pedro ñicxy huingbi cajp.

¹⁸Co yxiimiiy, huin'it soldadtijc ajcxy ooy ytigiyy huambi jihuiybi huinmay'ahuidijty, com ca' nejuhiygyxy nej je' anajty ti ytunyii ti yjadyii miid Pedro ycixpi. ¹⁹Chi Herodes ni'ane'mdiyy huen ñicxy yaj'ixtäy Pedro. E co ca' yajpaty, chi pijctzoy tiy'ajt ma soldado ajcxy huídi anajty Pedro ti ycuend'adyii. Chi ni'ane'mdiy huen ajcxy ñicxy yaj'ögyii. Chi Herodes chooñ jim Judea, chi oy chinaydacpiy jim Cesarea.

Herodes y'ögy

²⁰Herodes janch ymijotmätpy anajty je jäy huídibi tzinaayb jim Tiro etz Sidón. Chi je Tiro etz Sidón jäy ajcxy ñaygapxi nej jëbi huingohuägihuaangixy je rey. E ymimadac ajcxy co migapxy je Blasto je mijtungmiidpi maabi rey Herodes ytijc. E chi ajcxy pijctzoy co huen tzip cixy naxy, com co ajcxy xijc mooc jim anajty yajtzoongixy ma rey ñaaxjot. ²¹Chi Herodes agapxtujcy tüg xii, chi je reyhuit yajtigiyy, chi iñaydac paty ma ycötujctac, chi migapxy ajcxy je jäy. ²²Chi je mayjäy ajcxy ytigiyy mic capxp miydaacp, chi ajcxy yminaangixy:

—iJada jäy huídibi capxp, ca' jada yjáyity, jadu'n yi' nej tüg dios!

²³E huin'ítity Huindzin Dios y'ángel yajpa'mbejty Herodes, com ca' anajty huindzigiy cömay je Dios. Chi y'o'cy, ting je' tzütztaayi.

²⁴Je Huindzin Dios y'ayuc mibijc'idichpy anajty jäy, e yajcapxhuäcxp anajty hueñytimma'ámyity.

²⁵Co Bernabé etz Saulo ajcxy ytungmay jim Jerusalén, huin'it chooni ajcxy jim ymiidnicxy huidibi anajty yxii Marcos.

Bernabé etz Saulo yajtzondaaccixy ytung huidibi ajcxy pátip

13 Ma je' ajcxy huidi mijpidacp Jesús jim Antioquía, jim anajty jadyii huidi Dios y'ayuc yaj'ixpijcp anajty, etz nañ huidibi tiy'ajt najtzcapxiyb. Jim anajty Bernabé etz Simón, huidi anajty ajcxy ytiyjp el Negro, etz Lucio huidi tzoon Cirene ñaaxjot, etz Manaén huidi tüg yeectac miid Herodes, huidibi ane'm jim Galilea, etz Saulo. ²Tüg xii ajcxy ñayyöymújcigixy jaygay jay'ügy Dios ojadajtcixy. E chi je Espíritu Santo ñimaayi:

—Huen pidáacigich ajcxy Bernabé etz Saulo ahuing jigix ajcxy ytuniy ma je tung tiibi nyajnihuohüiyich.

³Chi ajcxy yjacDios'ojadajty etz yjac'ayuu'ajty, e chi je jäy ajcxy cñixajy Bernabé etz Saulo, e chi ycapxycixy miid je' ajcxy.

Je apóstoles ajcxy capxhuäxcixy Dios y'ayuc jim Chipre

⁴Chi jada' je Espíritu Santo yquejxi Bernabé etz Saulo huen nicxy Seleucia, e jim ajcxy ybarcotigiyy nicxy ajcxy jim Chipre mejy agujcpi. ⁵Co jim ajcxy yja'ty ma barco yjättac huidi yxii Salamina, chi ytigiiy Jesús y'ayuccapxhuäcxp ma je judíojäy

ajcxy naymujctac. Tzoon je Juan anajty nañ jadu'n je' anajty Bernabé etz Saulo pubéjtip. ⁶Huidijttay ajcxy ma je naax mejy'agujcpi, e yja'ty ajcxy ma je cajp huidi yxii Pafos. Jim ajcxy paty tüg judíojäy huidi anajty yxii Barjesús, hue' je' anajty huijyjäy, e ñaydijyii anajty co Dios ytiy'ajt najtzcapxiyyi, e ca' anajty yjanchity. ⁷Je huijyjäy ooy miid ñaymigüg'adyii anajty je huidibi ane'm jim, hue' anajty yxii Sergio Paulo. Je Sergio Paulo ooy anajty ycohuinma'ñity, ooy y'ixpícyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty midoohuaani je Dios y'ayuc. ⁸Je huijyjäy, huidi nañ jadu'n yajtijp Elimas, midziptzoñ Pablo etz Bernabé, e tücci'y capx'aduga'ñ ca'ydí je gobernador ymibicy. ⁹⁻¹⁰Chi Saulo, huidibi nañ jadu'n yajtijpy Pablo, miid je Espíritu Santo huindicxpejty je huijy jäy, e nimay:

—iOoy mjibicjäyity miich, ooy m'anijjity, mujcu' miich xy'ung'ajtp, ooy mmidzip'aty pinjaty oyjot oyhuinma'ñ miid! ¿Mina m'ixmadza'ñ nej mdzachyajtigoya'ñ je Huindzin Dios ytiy'ajt? ¹¹Jadachambi je Huindzin Jesús yxachyhtunaamb, e mhuí'mip huiintz, etz ni ca' je xiimbi tzojc m'ixipy.

Chi je huijyjäy mic'amy yhui'my huiintz coodz, chi ixtay pin oc-huijtznicxiib com ca' anajty y'oc'ijxni. ¹²Co je gobernador jadu'n ijy, chi mijpidacy Jesús y'ayuc, e chi ooy jihuiyy huinmaay nej Pablo nimiydägy je Huindzin Jesús y'ayuc ytiy'ajt.

**Pablo etz Bernabé yajpátcixy
jim Antioquía etz Pisidia**

¹³Chi Pablo etz ymígügtijc
ajcxy miid ybarcotigiíy, chi ajcxy
ñicxy Perge ma Panfilia ñaaxjot.
Chi Juan puyöyduutni Pablo etz
Bernabé, e chi ñicxni Jerusalén.
¹⁴Pablo etz Bernabé ñajxy jim
Perge oyja'tcixy jim Antioquía
ma Pisidia naaxjot. Sábado xii
ajcxy ytigíy ma je judíoáy ajcxy
ñaymujctac, chi ajcxy ixtactay. ¹⁵Co
ñecycapxtay ma Moisés ñecy etz
Dios y'ayucnajtzcaxiíybi ñecy, chi
je naymujctac huindzin quejxy ayuc
ma Pablo ajcxy, ñimaayi:

—Migügtijc, pen mmiid ayuc
tiy'ajt miid jäy ycixpi jébi cham
myajnimäy ajcxy.

¹⁶Chi Pablo ytinayígy, yci' miid
ytiy'ajt yecy co huen amoongixy, e
nimay ajcxy:

—Midoogix, miich Israel jäy ajcxy,
etz huidibi Dios yajmij'ajtp. ¹⁷Je
Israel jäy Dios huin'ijxy iich'ajt
nmij'ap nmijteedy jecy'ajty etz
yajyujcpejt ajcxy micho'n co
anajty ajcxy jim yjactzinäy Egipto
ñaaxjot. Chi ajcxy yajpidzihni
miid Dios ymie'ajt. ¹⁸Dios je' ajcxy
mihuindinay huixchigüipx jimijt
jim mijtigíduum. ¹⁹Je Dios huixtujc
it naax cajp yajtigoy huidi anajty
jim tzinaayb Canaán ñaaxjot, etz
yajmoy je naax iich'ajt nmij'ap
nmijteedy jecy'ajty jigix ajcxy jim
chinähuiipy. ²⁰Midaax migo'px
jahuixchigípx majc jimijt Dios
mic'ajt mooy juez ajcxy huen
ane'myii Israel jäy ixti mabaad
Samuel je Dios y'ayucnajtzcaxiíyb
ytungbójcy. ²¹Huin'it ajcxy tüg rey

píjctzoy huidi ane'miib ajcxy. Chi
Dios yajreytigiíy Saul huidi tuun
huixchigípx jimijt. Je Saul yteedy
hue' je' anajty yxii Cis, hue' je'
anajty Benjamín y'ap y'oc. ²²Chi
Dios tungbójcy Saul e yajreytigiíy
David, chi Dios yminañ: “Tí
nbaadyich David, Isaí ymang, tüg
yëydijc huidibi cuydundähuiipy nej
ndimdzocyich.” ²³Ma David y'ap
y'oc Dios yajni'bójcy Jesús, jigix
nihuänipy yajnidzögípy je Israel jäy
ajcxy, jadu'n nej anajty jécyip Dios
yaj'ahuaníy ajcxy. ²⁴Ca'ni anajty
Jesús miin co Juan, je Bautista,
capxhuäcxy Dios y'ayuc ma je Israel
jäy ajcxy, nimaaygixy co copicy
huen jothuimbijtcixy ma Dios, e
huin'it jébi ñiibéjtcixipy. ²⁵Co
anajty Juan y'o'cin huingon, chi
yminañ: “Ca' iich'nejjity je Cristo,
jadu'n nej mminaangixy. Jayjip
ti nmiinich, jac'axam miina'n je
Cristo; jacmic'ajt miid je' ca'ydi iich.
Ca' xypaadyich nicxy y' ycighuin
nguejich.”

²⁶Chi Pablo yjacminañ:

—Migügtijc, Abraham y'ijx y'oc
etz pinjaty yajmij'ajtp Dios, Dios ti
xyajniguexy jada ayuc nej ajcxy jébi
m'alma nidzoocin paady. ²⁷Je jäy
ajcxy huidi anajty ajcxy tzinaayb
jim Jerusalén etz tungmiidpi ajcxy,
ca' ajcxy nejhuíy pin je' anajty je
Jesús, ni ca' anajty huinjihuíyigixy
y'ayucnajtzcaxiíybi ajcxy y'ayuc
huidibi anajty yajcapxp ma ajcxy
ñaymujctac huindüg sábado. E
je' ajcxy ci'm yajpocycäy Jesús, e
cuyduñ nej anajty ajcxy yjaybetyity
ma Dios ñecy. ²⁸Oy ajcxy ca' paty
pocy nej yaj'öccixipy Jesús, chi
ajcxy nibjctzohuíy ma Pilato co

huen nicxy yaj'ögyii. ²⁹Co je jäy ajcxy cuydunday jadu'n nej anajty yjaybétyity ma Dios y'ayuc miid je' ycixpi, chi ajcxy yajminajcy cruudzcíxy, etz oy yajnaaxtigíyigixy.

³⁰E Dios je Jesús yajjugypíjc co anajty ti y'ögy. ³¹Chi canaag'oc ñayguëxigo'ci ma ymigügtíjc huیدی anajty ti ymiidhuیدیyii co chooñ Galilea ñicxy Jerusalén. Jadachambi yí' je' ajcxy huیدی tiy'ajt yejcpy ma je jäy ajcxy.

³²Je oybi ayuc iich miich ajcxy nyajmiidmiydacpy cham, huیدی Dios yajnimay iich'ajt nmij'ap nmijteedy jecy'ajty. ³³Je oybi ayuc ti Dios cuyduñ cham ma iich ajt co yajjugypíjcy Jesús co y'o'cy. Jadu'n yi Dios y'ayuccoajaaybi jaay jecy'ajty ma je Salmo necy mimetzpi ma Dios jadu'n yminañ: “N'ungich cham ti nyajjuugypicyich.”

³⁴Miid jadayaabi ycixpi co Dios ti yajjugypicy Jesús co y'o'cy, jigix ñinicx ca yhuindigoopy jadu'n anajty jaybétyity ma Dios ñecy ma Dios jadu'n yminañ: “Nmöhuaamyich miich ajcxy je conúcxin huیدی nyajnimaa'yich je David.” ³⁵Paady nañ jadu'n Dios y'ayuccoajaaybi jaay jadüglit, ma ymina'ñ: “Ca' Dios a'ixiy nicxy y'ung ñinicx yhuindigooy, je y'ung huیدی miid huádz jot huinma'ñ.”

³⁶Com janch co je David Dios huin'ijxy, jigix ane'mípy yi' yjuugy ymigüg ajcxy. E co ytung yajmay, chi y'o'cy, e je' y'alma ñaybaatti miid je y'ap yteedy y'alma, e je' ñinicx huindigooy je'. ³⁷Je Jesús huیدی Dios yajjugypíjc ca' je' ñinicx yhuindigooy. ³⁸Migügtíjc, jébi mnejhuíyigixy, co je

pocyhuinmeecxin yaj'iíhuäcxy yajcapxhuäcxy miid Jesús ycixpi.

³⁹Miid je' ycixpi pinjaty mibíjcp ti ypocyyajhuinmeecxcixy huیدی Moisés yley anajty ca'p pocyhuinmeecxin yecy. ⁴⁰Nayguend'ájtigix, ix xyajcidacpejtcix je mij ayo'n jadu'n nej Dios y'ayuccoajaaybi jaay jecy'ajty co Dios jadu'n yminañ:

⁴¹Midoogix iich n'ayuc, miich ajcxy nixiicpi yajxiicpi, nay'adzigiíyigixy, ix m'alma myajtigooygixy. Com iich Dios ndumybích tüg mijhuinma'ñ ma miich ajcxy mxii mdiempo. May miich ajcxy ca' mmibígipy, oy pin xyjayajmiidmiydáaccixipy.

⁴²Co Pablo ajcxy ypidzimy ma yi judíojäy ñaymujctac, chi je jäy huیدی ca' yjudíojäyity nimay je Pablo co huen nañ jadu'n yajmiidmiydägiyib ma je jadügpí sábado. ⁴³Co ajcxy yöyhuäcxni ma nayyöymujctac may judíojäy etz mayjäy huیدی ca' yjudíojäyity huیدی jijptigíyiy je judíojäy y'ixpíjcin, panicxy ajcxy je Pablo etz Bernabé. Pablo etz Bernabé capxhuijy ajcxy co huen paníxcixy je tiy'ajt jadu'n nej Dios tiibi tuñ may'ajt miid jäy ycixpi, e ca' ajcxy ixmadzipy.

⁴⁴Co sábado yxii paty, chi jäy ñayyöymujci jahuenjaty cajp jäy ycanícxstay co anajty tzachmidoohuaangixy Dios y'ayuc. ⁴⁵Ca' anajty ajcxy yjotcújcity co je judíojäy ajcxy ijxy je mayjäy. Chi ajcxy ooy yjot'ambijccoty ni'ojiíyigixy etz nimaaygixy oy ni nej Pablo. ⁴⁶Chi Pablo etz Bernabé ytiíy miccapxpi yminañ ajcxy:

—Copicy anajty co iich miich nyajnimähuipy Dios y'ayuc jayijp. Com ca' mgöbìgaangixy Dios y'ayuc, e co ca' mnaybidäacigixy tudägy ma jugy'ájtín miid huinixiibi, nicxyich n'ocyajnimäy ajcxy Dios y'ayuc huidibi ca' yjudíojäyity. ⁴⁷Com jadu'n xy'ane'myich ajcxy yi Huindzin Jesús, e xyñimaayich ajcxy:

Ti iich miich nbidägy jadu'n nej tüg tiicxin jajin ma tüg'óciy naaxhuiñybi jäy jigix myajnejhuñhuipy ajcxy je nidzoocin jiguembaad huindu'my naaxhuiñ.

⁴⁸Co ajcxy jadu'n midoy huidibi ca' yjudíojäyity, chi ajcxy ooy nigi yjotcugiiy, e chi ajcxy yminandacy co je Huindzin Jesús y'ayuc ooy anajty y'óyity. E may ajcxy mibijcy huidibi anajty Dios ti yajinigödungäy co paatip jugy'ájtín huinixiibi. ⁴⁹E jadu'n jim yajcapxhuäcxy Jesús y'ayuc ma je jimbi naax cajp. ⁵⁰E je judíojäy ajcxy minaygapxi nijëjity töxyjäydijc ajcxy tudägypí huidibi Dios yajmij'ajtp, etz je mijjäydijc, e je' ajcxy miid mibidigy Pablo etz Bernabé co pahuojpquëgaangixy ma jejimbi naaxjot. ⁵¹Chi Pablo etz Bernabé ycig huinhuoipy, je' je' tiy'ajtip co ca' jäygidacy ajcxy nej jäy anajty ytungixy. Chi ajcxy ñicxni jim Iconio. ⁵²E je' ajcxy huidibi mijpidaacp Jesús ooy anajty ajcxy yjotcujcity. E ymiid anajty ajcxy je Espiritu Santo ma yjot yhuinma'ñ.

Pablo miid Bernabé jim Iconio

14 Jim Iconio Pablo etz Bernabé ytigiiy ajcxy

yquipxyi ma je judíojäy ñaymujctac, e oy yajxon ajcxy capxhuäcxy Jesús y'ayuc. E may judío etz griegojäy ajcxy ymibijcy. ²Je judíojäy ajcxy huidibi anajty ca' ymibijccixy nigapxcoty ni'ojygoty ajcxy huidibi ca' yjudíojäyity huen je cajp jäy ajcxy mijotmädiipy je mibijcpidijc. ³Miid jada ycixpi Pablo etz Bernabé yhui'my je' ajcxy jecy etz capxhuäccixy ajcxy Dios y'ayuc huinmic jotmic etz je Huindzin mijotcujc'ajtcixy ooy, e mooyi ajcxy je mic'ajt jëbi ajcxy pa'mjäy yajtzögipy etz mijhuinma'ñ tungixy huidibi iixpejt'ajtp ma Dios ymic'ajt. ⁴E je cajpjäy mejtzpicy je' anajty ajcxy, nijëjity ymijpidacpy ajcxy yi judíojäy, etz nijëjity ymijpidacpy ajcxy je Dios y'ayuccapxhuäcxi. ⁵Chi nijëjity judíojäy etz huidibi ca' yjudíojäyity ñaygapxi miid tungmiidpi co mijotmätcodaangixy etz tim tzaagögäzdaangixy Pablo etz Bernabé. ⁶Co Pablo etz Bernabé nejhuñy, chi ajcxy yqueecy ñicxy ajcxy jim Listra etz Derbe jim Licoonia, e majaty naax cajp huidi huinduy'agonbi. ⁷Jim ajcxy capxhuäcxy Jesucristo ytiy'ajt nej jëbi ajcxy huaad y'alma nidzoocin paatcixy majaty cajp huingtonbi.

Tzaagätzcixy Pablo jim Listra

⁸Jim Listra anajty tüg yëydijc iñäy tecyma'tpi, caminaabi anajty yöy, com jadu'n anajty yma'xung'aty. ⁹Je tecyma'tpi amido'ijtpy anajty Pablo y'ayuc, e Pablo iixpy anajty co ymiid mibijcin nej jëbi chögy. ¹⁰Chi Pablo mic nimay:
—Tinaayig.

Chi je tecyma'tpi tüg tipy ytinayuguiy, e chi ytiguiy yöyb.

¹¹Co je mayjäy ajcxy ijxy nej Pablo anajty pa'mjäy ti yajtzögy, huin'it ajcxy ytiguiy huambi jihuiybi miid Licaonia ayuc chachminaangixy:

—iDios ajcxy jadu'n nej jäy ti ycidaaccixy ma iich ajt!

¹²Yminaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³E je Júpiter teedy huidibi anajty tumb jim ma je Júpiter chajptijc cajppäbi, mimiin toro ajcxy etz pijy. E je teedy miid je jäy ajcxy yhuindzigihuaangixy etz ojadadaangixy anajty Pablo etz Bernabé, yaj'ögaangixy je toro ajcxy. ¹⁴Co Pablo etz Bernabé nejhuuiy, ca' ajcxy jäygidacy nej jäy anajty ajcxy y'ididzaangixy, chi ajcxy ci'm yhuic agiidziy, e ytiguiy ajcxy mayjäy'agujc yam chachminaangixy:

¹⁵—iYëdijctijc ajcxy! ¿Nej co jada jadu'n m'iditczixy? Nañ jadu'n iich ajcxy jäyity, jadu'n nej miich ajcxy. Paady iich ajcxy ti nmingixy ma miich ajcxy mgajp jigix ajcxy m'ixmadziy jada jadu'mbi huinma'n huidibi ca' choobaady ma Dios. E mijpidaaccixp je Dios juugypi huidi oyduñ tzajp etz naaxhuiñybi, je mejy etz tüg'óciy tijaty ya n'ijxim. ¹⁶Jecy'ajty Dios ixmajch je jäy ajcxy huen túngixy nej tzojccixy. ¹⁷Oy Dios anajty jayecy tiy'ajt co je' Diosity, jatuñ jadu'n yi oybi miid miich ajcxy ycixpi. Dios yi' yajtuub etz yecy oybi cosecha e xymooyim mijcajee huidi ngaayim n'uucim e xyajjotcuguiyim.

¹⁸Oy anajty Pablo jadu'n jadim tzachnimaaygixy, ca'p ajcxy mimadacy co yi jäy ajcxy ca'p yaj'óccixipy je toro co anajty yhuindzigihuaangixy.

¹⁹Huin'it xii nijëjity judíojäy yja'ty, chooñ jim Antioquía etz Iconio. Chi ajcxy yajnimay je mayjäy co huen midziptzoongixy Pablo etz Bernabé. Chi mic'amy je mayjäy midziptzoon Pablo etz cögäch ajcxy. Hue' ajcxy tijy ti anajty yaj'öccixy. Chi ajcxy oy ixjugucy cajppa'. ²⁰Chi je apóstoles ajcxy jübiguiy je Pablo, chi je' ypidigy, e ñicxy jadüg'oc cajpjoty. Com jabom Pablo etz Bernabé chooñ, ñicxy ajcxy jim Derbe.

²¹Co Pablo etz Bernabé jadu'n capxhuäcxy je Jesucristo y'ayuc oybi jim Derbe, chi mayjäy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio, etz Antioquía. ²²Jim ajcxy jotmicmigapxy je mibijcpidijc ajcxy, e capxhuiy huen tügjijp mibijccixy Dios y'ayuc, nimaaygixy:

—Co ndigihuaanim ma Dios y'ane'my copicy co nyajnáxim may ayo'n. ²³Cajp cajp majaty mibijcpidijc yajpaady jim Pablo etz Bernabé yajnibijcy nijëjity yëdijctijc huen nigohuajc'ajtcixy je jäy ajcxy huidibi mijpidacp Jesús. Co anajty ti yajnibijcy je' ajcxy huidibi nigohuajc'adipy, chi jaygay ajcxy y'ijty etz Dios mibijctzoy miid je' ajcxy ycixpi.

**Pablo miid Bernabé yhuimbijtcixy
Antioquía jim Siria naaxjot**

²⁴Pablo etz Bernabé ñajxy ajcxy Persidia oy ajcxy yja'ty jim Panfilia.

²⁵Chi Pablo etz Bernabé Jesús y'ayuc capxhuácxi jim Perge, chi ajcxy ñícxy jim Atalia. ²⁶Chi ajcxy jim ybarcotigiiy ñícxcixy jadügtecy jim Antioquía ma anajty ajcxy ti yajñibigyii Dios chójcin miid je tung huidibi anajty ti yajcñjxcixy. ²⁷Co ajcxy yja'ty jim Antioquía, chi ajcxy huomujcy je jäy ajcxy huidibi anajty mijpidaacp Jesús, e yajmiidmiydactay tüg'óciy nej anajty Dios ti ytuñ miid je' ajcxy ycixpi, nej anajty Dios ti yaj'ahuäch je tü'aa nej huaad mibicy ajcxy je huidibi ca' yjudíojäyity. ²⁸Pablo etz Bernabé ijt ajcxy ooy jim jecy miid je mibijcpidijc ajcxy.

**Mibijcpidijc ñayyömujei
ajcxy jim Jerusalén**

15 Je huin'it tiempo nijëjity jäy huidi tzoön Judea yja'ty ajcxy jim Antioquía, e ytigiiy yaj'ixpijcp ma ajcxy je huidibi mijpidaacp Jesús, yminaangixy: "Pen myajnidzögamy ajcxy yi m'alma, copicy co ajcxy myajtiy'ajttihuipy jadu'n nej Moisés y'ane'my." ²Chi Pablo etz Bernabé ñaymidziptzongooti ajcxy miid huidi anajty ajcxy tzomb jim Judea, e ca' ajcxy ñay'ayuc-huinjihuüiyi. Chi jada' yajñibejti Pablo etz Bernabé etz jacjadyii mibijcpidijc huen nicxy ajcxy Jerusalén yajtydigiiy ma je apóstoles ajcxy etz huidibi ajcxy nigohuajc'ajt je mibijcpidijc jim Jerusalén.

³Je mibijcpidijc huidibi anajty ajcxy jim Antioquía oy ajcxy tüjijphuohuüy Pablo etz je' ajcxy huidi nicx miid Pablo. Chi Pablo etz miid yjajmiidtijc

ajcxy ñícxy, e ñajxy ajcxy Fenicia ñaaxjot etz Samaria ñaaxjot. Yajmiidmiydaaccixy je mibijcpidijc cajp cajp jadu'n nej jäy ajcxy huidibi ca' yjudíojäyity ti yjothuimbijtcixy etz yajmij'adaangixy Dios. E tüg'óciy mibijcpidijc ooy ajcxy jäygidacy je Pablo y'ayuc.

⁴Co Pablo etz Bernabé ajcxy yja'ty jim Jerusalén, chi je mibijcpidijc ajcxy cöbijci je apóstoles ajcxy, etz je' ajcxy huidi nigohuajc'ajtp anajty je mibijcpidijc. Chi Pablo yajmiidmiydactay nej anajty Dios ti ytuñ miid je' ajcxy. ⁵Chi nijëjity fariseojäy, tiibi anajty mibijccixy Jesús, ytinayigy ajcxy juntijoty, e yminañ ajcxy:

—Copicy co huen yajtiy'ajttiy je jäy huidibi mibijcp Jesús huidi ca' yjudíojäyity, e copicy nyaj'ané'mim co huen ajcxy Moisés ycötüjcin cuyduuni.

⁶Chi ñayyömujei je apóstoles ajcxy etz huidi ajcxy nigohuajc'ajtp je mibijcpidijc, co capxyöyaangixy je fariseojäy y'ayuc nej yhuü'mip.

⁷Ca' ajcxy tzojc ñay'ayuc-huinjihuüiyi, chi Pedro ytinayigy yminañ:

—Migügtijc, mnejhuüiyb ajcxy co jayhuin Dios ti xyhuin'ixyich ma miich ajcxy, jigix nyajnimähuihich jäy ajcxy huidibi ca' yjudíojäyity je Jesús ytiy'ajt oybi nej ajcxy y'alma nidzoozin paadipy. ⁸E Dios huidi nejhuiiyb jäy yjot yhuinma'ñ xyaj'ixyich je tiy'ajt co yecy Espíritu Santo ma yi' ajcxy nañ tim jadu'n nej ytuñ ma iich ajt. ⁹Dios tú'ciy ytuñ miid iich ajt etz miid yi' ajcxy, miid co yi' ajcxy mibicy

Jesús paady Dios yajhuaatzi ajcxy yjot yhuinma'n. ¹⁰Jadachambi, ¿nej co ca' mhuinjihuühuaangixy mibìgaangixy nej Dios ytuñ miid huìdibì ca' yjudíójäyity? ¿Nej co adzip myajnihuidzaangixy je costumbre huìdi ni iich ajt ni n'ap ndeedy ca' ti mimadägy nicxy cuydundaaygixy? ¹¹Janch iich ajt nmibìjçim co miid je may'ajt huìdi Jesús ti tuñ miid iich ajt ycìxpi ti nbaatim n'alma nìdzocìn. Nañ tim jadu'n je' ajcxy huìdi mibìjç Jesús huìdi ca' yjudíójäyity ypaat y'alma nìdzocìn miid je may'ajt huìdi Jesús ti tuñ.

¹²Huin'it je jäy ajcxy y'amonday, y'amido'ljtcixy nej Bernabé etz Pablo nimìydaaccixy nej anajty Dios ti tuñ miid yì' ajcxy, jadu'n nej ajcxy ti yajtzögy pa'mjäy miid Dios ymìc'ajt, etz jac tijaty mìjhuinma'n huìdi ti tuñ ma yì jäy ajcxy huìdi ca' yjudíójäyity. ¹³Co Pablo etz Bernabé ajcxy miydactay, chi Jacobo yminañ:

—Mìgügtjç mido'mbìjçigich ajcxy iich n'ayuc. ¹⁴Simón Pedro ti xyajmiidmiydaacim nej Dios may'ajt ti tuñ oga'n ma huìdibì ca' yjudíójäyity, co huin'ijxy huìdi yì' yjäy'adaañ ma yì' ajcxy. ¹⁵Quipxy jada ñaybadyii miid huìdi je Dios y'ayucnajtzcaxiyybi jecy'ajty ycojay, ¹⁶co jadu'n yminañ:

Co anajty jadu'n ti y'ocjadyii, chi nhuimbìdipyìch ya naaxhuñ. Nyaj'oyìhuìbich jadüg'oc je naax cajp huìdi David anajty y'ane'myb huìdi anajty ti y'octigooybi jadu'n nej tüg tijç huìdi ti yciday. Ma David y'ap y'oc

nyaj'la'oyìhuìbich jadüg naax cajp, jadu'n nej jäy ytjç cojy huinjemybi.

¹⁷Jigix jacjadyii jäy y'ojadadipy ajcxy yì Dios. Nañ jadu'n je' ajcxy huìdi ca' yjudíójäyity, huìdi iich njäy'adaañip.

¹⁸Jadu'n je Huindzin Dios jécyp jada tiy'ajt jadu'n yejcy.

¹⁹Chi Jacobo yjacminañ:

—Paady iich jadu'n nmina'nich co ca' huaad n'amayiyim ajcxy huìdi ca' yjudíójäyity huìdi ajcxy ti mìjpidägy Dios. ²⁰Hue' janchtiy tzoc nijayiyim co ajcxy ca' tzüdzipy huìdi jäy yajhuindzigiyyb ídolos, etz ni ca' huaad migapxcixy huingbi töxyjäy, etz ni ca' huaad tzützcixy iyujc huìdijaty jäy yöc-huìdypì, etz ni ca' huaad jìxcxcixy tijaty iyujc ni'py. ²¹Jecy'ajty ixti chamni tüg tüg cajp, jì pìn iihua'cxp capxhua'cxp Moisés yley majaty nayyöymujctac naag naag pocxinxi.

²²Chi je apóstoles ajcxy etz je huìdi nigohuajc'ajt yì mibìjçpidjç, miid tüg'ócìy Jesús yjäy pidacy ajcxy yhuinma'n co huin'ixaangixy nijèjity jäy ma je' ajcxy etz quexaangixy jìm Antioquía quipxyi miid Pablo etz Bernabé. Chi ajcxy yajni'bejty Judas, huìdi nañ jadu'n yajtjpy Barsabás, etz miid Silas, yèydjctjç huìdi ajcxy capxpaadip. ²³E je' ajcxy yajmìguejxy necy nej anajty ti jaay: “Iich ajcxy apóstoldjç, etz huìdi nigohuajc'ajt yì mibìjçpidjç, etz nidüg'ócìy mibìjçpidjç, cham iich ajcxy nguexy capxpocxin ma ajcxy mibìjçpidjç huìdi ca' yjudíójäyity huìdi ajcxy tzinaayb

jim Antioquía, etz huidi ajcxy tzinaayb Siria etz Cilicia ñaaxjot. ²⁴Ti iich ajcxy nejhuíyich co nijéjity jáy ti xyñinicxcixy, choñ ma iich ajcxy, ca' iich ajcxy ngótujcín mooy, e xy'amayíygixy jim miid y'ayuc, e xyajhuinma'ñytigoya'ñ ajcxy, co ajcxy xyñimaaygixy co copicy co myajtiy'ajttíhuip ajcxy m'ung, etz mbayöyipy ajcxy je Moisés ycötújcín. ²⁵Paady iich ajcxy ti nnyagápxigixy nidüg'óciy co nyajñibedipyich nijéjity jáy huidi yajpaatp ma iich ajcxy co huen nicxy xy'ljxcixy niguipxyi miid nmigügtjicich huidi ooy ndzocyich, je Bernabé etz je Pablo. ²⁶Je huidi ajcxy yjugy'ajt ti yoxy ti toogy miid ajt nHuindzin Jesucristo ycixpi. ²⁷E jadu'n yam nguexyich ajcxy Judas etz Silas, e yi' ajcxy ci'm xyajmiidmiydägipy tüg'óciy iich ajcxy n'ayuc. ²⁸Ti je Espíritu Santo huinma'ñ pidägy ma iich ajcxy nhuinma'ñ etz iich ajcxy ti nhuinma'ñ nbidägyich, co ca' nyajñibigipy ajcxy tijaty ayuc tzaachypi, jëyi janchtiy je huidi copícyip. ²⁹Copicy co ca' ajcxy mdzüdzipy huidi jáy yajhuindzigíyb ídolos, ca' ajcxy ni'py mjíxcixípy, ni ca' ajcxy mdzüdzipy iyujc huidi yöc-huiity ti y'ögy, e ca' ajcxy mmigapxtigoogixipy huingbi töxyjäy. Pen mguydundaayb ajcxy jada ané'min, oy anajty mdungixy. E Dios ajcxy xypubedipy xypudigíhuipy.”

³⁰Jadu'n je' ajcxy huidi ti yajquexy nicxy ajcxy jim Antioquía. Jim ajcxy huoomujcy je mibijcpidijc, e yajcídigiíy ajcxy je necy. ³¹Co

je mibijcpidijc je necy capxy, chi ajcxy ooy yjotcugiíy miid je oybi ayuc tiibi anajty ajcxy yajniguexyii.

³²Com Judas etz Silas hue' je' anajty Dios y'ayucnajtzcaxíybi, paady ajcxy yajjotcugiíy jot'amij moy je mibijcpidijc miid je ayuc.

³³Jecy ajcxy jim yhuäcxípy, chi je mibijcpidijc miid ajcxy ycapxycíjxy, yajmihuaníy ajcxy Dios, chi ajcxy yhuimbijtni ma anajty ti choongixy.

³⁴Chi Silas yhuinma'ñypidacy co anajty yhuí'ma'ñ. ³⁵Nañ jadu'n Pablo etz Bernabé ijt ajcxy jim Antioquía, etz miid jac nijéjity ymigügtjic yaj'ixpijc'idíitzcixy etz capxhuäcx'idíitzcixy je Huindzin Jesús y'ayuc ytiy'ajt.

Pablo mimetz viaje

³⁶Ti xii tiempo anajty ñajtzñinicxiíyñi co Pablo nimay Bernabé:

—Jam'ajt nmigügtjic colixíyim cajp cajp majaty ti ngapxhuäcxim Huindzin Jesús y'ayuc. Ooy njanejhuihua'ñich nej ajcxy yajpaady. ³⁷Bernabé ymiid nicxaamy anajty je Juan huidi yajtijp Marcos. ³⁸E je Pablo ca' a'ixiy co miid nicxip Juan, com ti anajty y'ocpuyöydútubi jim Panfilia, e ca' anajty ti yjacmiidyajtüyöyíi je tung. ³⁹E ca' ajcxy ñay'ayuc-huinjihuíyí miñ xyípy. Chi Bernabé miidnicxy Marcos e ybarcotigíy ajcxy, chi ajcxy ñicxy jim Chipre. ⁴⁰E je Pablo abicy huin'ljxy Silas huidi anajty miid ñicxa'ñ. Chi je mibijcpidijc miid ycapxycíjxy, chi chooni ti anajty je mibijcpidijc yajmihuaníyíi Dios, ⁴¹chi ñajxy jim Siria ñaaxjot

etz Cilicia ñaaxjot jot'amijmooy je mibijcpidijc.

**Timoteo mijhuäcpejty
je Pablo etz Silas**

16 Chi Pablo etz Silas yja'ty ajcxy jim Derbe etz Listra. Jim ajcxy paty tüg jäy huidi anajty yxi Timoteo huidi anajty mijpidaacp Jesús. Judíojäy anajty ytaj'ajtpy, e griegojäy anajty yteedy'ajtpy. Je' ytaj nañ ymibijcpey anajty Jesús. ²Je jäy ajcxy huidi yajmij'ajtp Jesús jim Listra etz jim Iconio ooy anajty oy nimiydaaccixy Timoteo. ³Pablo ooy jatzojcy co Timoteo ycajäymiid'ajti. Chi Pablo yajtiy'ajttiyyi Timoteo, jigix ca' ymijotmädiyyb je judíojäy huidi anajty ajcxy jim tzinaayb, com tüg'óciy ajcxy nejhuüy co griegojäy teedy'adyii. ⁴Cajp cajp ma anajty ajcxy ñaxy yajmiidmiydaaccixy ajcxy je mibijcpidijc je cötujcín huidi je apóstoles ajcxy, etz huidi nigohuajc'ajt je mibijcpidijc jim Jerusalén. ⁵Je' ajcxy huidi yajmij'ajtp Jesús cajp cajp niği anajty yjotmicpíccixy, etz mijpidaaccixy Dios y'ayuc, etz ñimayiy'idiitzcixy jabom jabom.

Pablo yhuin'ijx tüg Macedonia jäy

⁶Je Espíritu Santo ca' a'ixiy nicx capxhuäccixy Dios y'ayuc jim Asia ñaaxjot. Paady ajcxy huingduum ñicxy yajyöyñajxy ajcxy Frigia ñaaxjot etz Galacia ñaaxjot. ⁷Chi ajcxy jim yja'ty ma Misia ñaaxtzi'aba'n. Chi huinmay co ñicxa'ñ ajcxy Bitinia ñaaxjot. E je Espíritu yajnejhuüiy ajcxy co ca' yi' tzocy co jim nícxcixipy. ⁸Chi

ajcxy jüyöyñajxy Misia ñaaxjot, chi ajcxy y'idacy jim Troas. ⁹Chi Pablo cumäyjoty huin'ijxy tüg yëydijc, huidibi yconaaxity anajty Macedonia, ytinay'ahuüiy ma Pablo yhuinduu, e ycohuanüiyi, ñimäyiy: "Tun may'ajt nicx jim Macedonia, e jim xypubedipy iich ajcxy." ¹⁰Co Pablo jadu'n huin'ijxy cumäyjoty, chi iich ajcxy n'ixtay barco huidi nicxamb jim Macedonia. Nhuinjihuüiy iich ajcxy co jim Dios xyquéjxcixyich jigix jim ngapxhuäcxibich Jesucristo ytiy'ajt je oybi nej jëbi ajcxy alma nüzoozin paadipy.

Pablo etz Silas jim Filipos

¹¹Chi iich ajcxy nbarcotigüiy jim Troas nicxy iich ajcxy tiyyi ma naax mejy'agujcpi huidibi anajty yxi Samotracia. Chi com jabom ajcxy nja'tyich jim Neápolis. ¹²Co iich ajcxy jim ndzooñ, chi iich ajcxy nicxy jim Filipos. Filipos hue' je' romanojäy ycajp. Je' je cajp jac mijpi ma je Macedonia ñaaxpa'. Jim iich ajcxy nhuäcxijpy jecy. ¹³Tüg sábadó nicxy iich ajcxy cajppa', mihuingon tüg mijni, ma anajty judíojäy ajcxy miidity Dios ojadajttac. Chi iich ajcxy n'ixtacy jim, e ngapxhuäcxich ajcxy Jesús y'ayuc ma je töxyjäydijc ajcxy huidi jim anajty ajcxy ti yöymujccixy. ¹⁴Je Lidia anajty y'amido'ijtp. Hue' je' anajty Lidia ycogajpity jim Tiatira, e ytocpy anajty ucy huit oy jatypi. Lidia yajmij'ajtpy anajty Dios, e je Huindzín Dios yajyungüiyi yjot yhuinma'ñ, jigix amido'idipy nej Pablo Dios y'ayuc capxhuäcxí. ¹⁵Je Lidia niibejt miid tüg'óciy

yjuugy ymigüg, chi iich ajcxy xycohuaniiy, e xyñimáaygixich:

—Pen minamb ajcxy co nmibicyich je Huindzin Jesús, miin jättaaccix ma iich ndijc.

Chi ooy xycohuaniiy iich ajcxy, ixti cooni jim xyajhui'myich ajcxy.

¹⁶Jadu'n yjajti tüg tecy co iich ajcxy anajty ñicxy ma Dios ojadajttac, chi iich ajcxy nbaty tüg tumbi töxy'anäg mañ'ajt miidpi huidi ooy ytiygapxy. Ymiid anajty yhuindzin ma ytuñ, e je' yhuindzin ooy anajty ymeeñybaaty co je töxy'anäg ytiygapxy. ¹⁷Je töxy'anäg ypanicxy chach yam Pablo etz iich ajcxy yminañ:

—Jada yëydijc Dios tzajpjotyipi ajcxy ymidumyib. Capxhuäcxi ajcxy Dios y'ayuc jadu'n nej jëbi iich ajt n'alma nïdzoocin paady.

¹⁸Canaag xii jadu'n iich ajcxy xychach'amayiyy. Co Pablo chijpin, chi yhuäc-huimbijty nimay je mañ'ajtmiiidpi:

—Miid Jesucristo yxii n'ane'myich, pidzim ma jada töxy'anäg.

Tim huin'ftiy je ca'oybi jayjyöduuty je töxy'anäg.

¹⁹Co je töxy'anäg yhuindzin jadu'n ijxy co ca' y'ocmeeñybadaani, chi miid je' ycixpi ajcxy majch Pablo etz Silas, e yajnicxy ajcxy ma je tungmiidpi ma je' ajcxy y'agujctijc. ²⁰Co ajcxy jiiby miidja'ty ma je tungmiidpi, chi yminañ:

—Jada yëydijc ajcxy judfojyä jada, nigoo ajcxy ñaax yajmäty ycajp yajmäty, ²¹etz yaj'ixpicy ajcxy costumbre huidi ca' huaad iich ajt ngöbjicim, e nihuaad ngatuunim, com hue' iich ajt romanojyä.

²²Chi je mayjäy ajcxy miiddziptzoon Pablo etz Silas, e je tungmiidpi ni'ane'mdiy co huen ajcxy yajnijeñ yaj'ixjeñ huen yajhuojpcixy miid matz. ²³Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. ²⁴Co je pujxtijc huindzin ypaati je cötuycin, chi pidacy Pablo etz Silas jac jiiby öc'am, e chi ajcxy ixmajch co'adzity ytecy ma je quipy huidi yxii cepo.

²⁵Chi jadu'n yjajty mijcuctz anajty, co Pablo etz Silas chach Dios ojadajtcixy chach huin'igixy yi Dios, e jacjadyii machyjäy chach amidool'ijtcixy. ²⁶Chi timitiini uyx huinxijty pujxtijc poch. Chi y'ahuaatztay je pujxtijc agi!, e y'adzittuttay je cadena ma tüg'óciy machyjäy. ²⁷Chi oy ymahuijy je pujxtijc huindzin. Co jadu'n ijxy ac'ahuädz pujxtijc aguu, chi yajpidziimy y'espada ñayyaj'öga'ñiyi anajty. Com hue' anajty tijy ti je machyjäy yqueectäy. ²⁸Huin'it Pablo mic'amy migapxy je pujxtijc huindzin nimay:

—Ix nej mnayduuni, cheeby ajcxy nidüg'óciy.

²⁹Chi je pujxtijc huindzin pijctzoy jiin, e ytiigiyy poyigy pujxtigoty, janch tziyuuyb miid tzig'iñ. Chi ycoxtinay'ahuñy ma Pablo etz Silas ajcxy yhuinduu. ³⁰Chi yajpidzimy Pablo etz Silas, e yaj'amidooy:

—Huindzin, çti iich jëbi nduñ jigix nïdzoocin nbáadibich?

³¹Chi je' ajcxy minañ:

—Mibic Huindzin Jesús etz mbaadipy nïdzoocin, miich etz m'ungdöxyijc.

³²Chi ajcxy yajnimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytijc.

³³Mijcuctz je pujxtijc huindzin puji je Pablo ajcxy chaach'au, e chi je pujxtijc huindzin ñiibejtay ajcxy miid y'ung ytöxyijc. ³⁴Chi je pujxtijc huindzin yajnicxy Pablo etz Silas ma ytijc, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijccixy Dios.

³⁵Com jabom je mjtungmiidpi quejxy mutztungmiidpi jim ma pujxtijc huindzin miid cötujcin huen najtzmazziygixy Pablo etz Silas. ³⁶Chi je pujxtijc huindzin nimay Pablo:

—Ti je tungmiidpi quexy cötujcin co jëbi nnajtzmazziyich miich ajcxy. Nicxcix jotcujc.

³⁷Chi Pablo migapxy je mutztungmiidpi, e chi nimay:

—Romanojyä iich ajcxy. Yi cajptungmiidpi ti xyhuopyich miid matz mayjäy agujc, ni ca' jayijp ti xytyduñich, e ti xypidägyich pujxtigoty. ¿Nej co jadachambi xyñajtzmazzihua'ñich ameechi? Ca' jadu'n y'óyity. Huen mjtungmiidpi ci'm miin xyajpidzimgixich iich ajcxy.

³⁸Chi je mutztungmiidpi cijx nimiydactäy ma mjtungmiidpi tüg'óciy Pablo y'ayuc. Chi ajcxy ñay'adzigiäy co nejhuiy co Pablo etz Silas hue' je' anajty ajcxy romanojäy. ³⁹Chi je mjtungmiidpi ñicxy ci'm oy capxjotcidägy je Pablo etz Silas. Chi yajpidzimy pujxtigoty, e pijctzoy may'ajt huen huingduum ñicxcixni. ⁴⁰Co Pablo etz Silas ypujxtijcpidziimy, chi

ajcxy ñicxy ma Lidia ytijc. Jim ajcxy jadu'n ijxy mibijcpidijc, e jot'amijmoy ajcxy. Chi ñicxcixni.

Jim Tesalónica yjajti ooy capxy ayuc, ca' nay'ayuc-huinjihuihui

17 Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judíojäy ajcxy tüg ñaymujctac.

²Com jadu'n anajty costumbre miidity, Pablo nicxp anajty ma judíojäy ajcxy ñaymujctac sábado xii. E tugiig sábado xii jim capxy miydacy miid je' jim Tesalónica. ³Hue' anajty miid miydaaccixy jadu'n nej jaybecyity ma Dios ñecy co Cristo copicy ayo'n yajnaxtähuip, e chi y'ögipy, huin'it yjugypigipy. Chi Pablo yminañ:

—Je Jesús huidibi y'ayuc ngapxhuäcxibich, je' je' je Cristo.

⁴Nijëjity judíojäy ymibijc ajcxy e mijyöybejty ajcxy Pablo etz Silas. Nañ jadu'n may griegojäy huidi anajty Dios yajmij'ajtp, etz maytöxyjäydijc huidijaty oy ymijpidacni ymijnicxpejt etz mibijc ajcxy Pablo etz Silas y'ayuc. ⁵Je judíojäy huidi anajty ca' ymibicy, yjotmätcoty ajcxy. Huomujcy ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytijc'aguu tzach'ixtaaygixy Pablo etz Silas.

⁶E co ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujcy ajcxy jim ma cajp tungmiidpi. Yam chachminaangixy mic:

—Jada jäy ajcxy je' huidi tzachyajhuinma'nydigooyb tüg'óciy

naax cajp, nañ iyabaad ajcxy ti ymiingixy. ⁷Jada Jasón ti Pablo etz Silas jim yajjättägy ma ytijc, tüg'óciy ajcxy miiddzip'adyii je César huidi ane'mb, yminaangixy co ji jadüg rey, je' je' je Jesús.

⁸Co jadu'n midoy, chi ajcxy ooy yajyumügy yaj'oxügy cajpjäy etz je tungmiidpi ajcxy. ⁹Chi Jasón etz ymügügtijc yajmeen'yejcy, chi najtzmazziy ajcxy.

Pablo etz Silas jim Berea

¹⁰Co oy ycodzäy mic'amy yi miibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judíojäy ñaymujctac. ¹¹Jim Berea judíojäy ajcxy yjacmiid oyjot oyhuinma'ñ, ca'ydi judíojäy ajcxy jim Tesalónica. Je Berea jäy ajcxy ycöbije ajcxy Jesús y'ayuc ymiid oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymina'ñ nej Pablo yaj'ixpicy. ¹²May judíojäy ymiibijcy etz may griegojäy huidibi ooy ymiipidaacni nañ jadu'n ymiibijcy, töxyjäydijc etz yëydijctijc. ¹³Co yi judíojäy jim Tesalónica nejhuüiy co Pablo nañ jadu'n Dios y'ayuc capxhuäcxi jim Berea, chi ajcxy jim ñicxy, etz yajyumügy yaj'oxügy je cajp jäy ajcxy. ¹⁴Mic'amy ajcxy, je miipidaacpi Jesús, yquejx Pablo mic'amy, huen nicxy jim ma mejypa'. Chi Timoteo etz Silas yjac-hui'my ajcxy jim Berea. ¹⁵Je huidibi ajcxy Pablo jaymiid'ajt ymiidnicxy, miid ñicxy ajcxy ixti cooni yja'ty jim Atenas. Huin'it ajcxy yhuimbijty miid tüg

ayuc co huen Timoteo etz Silas nicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

¹⁶Co anajty Pablo ahuixy je Silas etz Timoteo jim Atenas, ooy anajty ytajy ymay co ijxy nejhuüiy co je cajp miid ooy may quipychech, tzaadzech, etz oori oyduñ huidi ajcxy dios'ajtpy. ¹⁷Paady Pablo nimiydacy Jesús ma yi judíojäy ñaymujctac miid je judíojäy etz jacjadyii jäy huidi Dios miyaaxp ojadajtp. E jabom jabom miid miydaaccixy pinjaty y'oymujcp cajp cujc. ¹⁸Nijëjity ixpicytijc ñay'ixquixigixy y'ixpicin miid Pablo. Jim huidibi ni'ixpiciiyb epicúreo ixpicin, etz cham huidi ni'ixpiciiyb estoico ixpicin. Chi ajcxy nijëjity yminaangixy:

—¿Ti jada jada' ajt xyajnimaaayim jada yëydijc capxymaaaybi?

Chi jadyii yminaangixy:
—Hue' jada ycapxhuäcxyp huingbi dios y'ayuc.

Jadu'n ajcxy yminañ co Pablo nimiydacy Jesús etz jadu'n nej jäy yjugypicy huidijaty ti y'öccixyp.

¹⁹Chi ajcxy miidnicxy Pablo ma je it ma je ixpicytijc ñaymugyii huidi anajty yxii Areópago, chi ajcxy Pablo nimay:

—¿Nej jëbi njäjtciyxich jada jemybi ixpicin huidi miich mmimimb?

²⁰Com ti iich miich xyajnimaaaygich ayuc ca'pi yhuinjihuüiyñity, e nejhuühuaamyich ajcxy nej yhuimbizimy tüg'óciy jada ayuc.

²¹Tüg'óciy Atenas jäy etz nañ jadu'n huidi ajcxy jim adzinaayb,

ca' anajty ni ti tungixy, jëyi nigoobi amido'ijtcixy etz miydaaccixy jemybi ayuc tiy'ajt.

²²Huin'it Pablo ytinayïgy mayjäy agujc jim Areópago, e yminañ:

—Atenas jäy, n'lijxypich co miich ajcxy ooy myajmij'ajtcixy canaagnax huídibi miich ajcxy mdios'ajtpy. ²³Com ti xii ya n'ixyich canaagnax huídi ajcxy m'ojadajtpy, chi ti nbaatyich tüg altar ma jadu'n yjaayity: “Je Dios huídi ca' pin ix'y'adyii.” Je Dios huídi miich ajcxy m'ojadajtpy, e ca' ajcxy m'ix'y'adyii, jada je' huídi nyajnimaaayb ajcxy.

²⁴Je Dios huídi oyduñ naaxhuiñybi etz tzajp etz jac tijaty, yi' je' nihuindzin'ajttayb tüg'óciy. Je Dios ca' chinäy ma tzajtpjic huídi jäy ajcxy cojpy. ²⁵Dios ca' ni ti yajtigoy'ity huídi naaxhuiñyäj jamöhuaanip. Dios yi' yejcp jugy'ajtin etz huídibi nxejim, etz tüg'óciy tijaty.

²⁶E tügpí ni'py tügpí jot ti yaj'oyïy tüg'óciy yi jäy, jigix huen tzinaaygixy huindu'my naaxhuiñ. Dios tiy'ajt yejcp nej xii tiempo yöyipy, e ma jäy jëbi huaad chinaaygixy, ²⁷jigix ixtaaygixipy Dios, jadu'n nej jihuïy ixtaaygixy tondäy xajtäy, com ca' je' jiguemity ma iich ajt nidüg nidüg. ²⁸Dios ycixpi iich ajt ndzinaayim nyücxim etz nji'ajtim, com jadu'n minañ miich ajcxy mboeta, huídibi iïy yajcojp: “Dios iich ajt xy'ung'ajtim xy'anäg'ajtim.” ²⁹Pen Dios iich ajt xy'ap'ajt xy'oc'ajtim ca' huaad nhuinma'ñ nbidaacim co Dios yjadu'ñity nej oori oyduñ, plata oyduñ, etz tzaadzech quipychech huídi jäy ti yaj'oyïy miid

yci'mhucinma'ñ. ³⁰Dios ca' miidity jotcöduuyb je jäy chuuhuinma'ñ tiibi ñajxni. Jadachambi ane'mb Dios hueñytimma'amyity huen jäy ajcxy jothuimbijtcixy. ³¹Com ti Dios yajnihuinmayïy tüg xii mina tiyduna'ñ yi naaxhuiñybi jäy miid je yëdyjc huídibi ti huin'ixy, jada tiy'ajt Dios ti yaj'ixy yajnejhuïy tüg'óciy jäy co ti yajjugypicy Jesús co y'o'cy.

³²Co ajcxy jadu'n midoy co yi öcpi yjugypigipy, chi nijëjity ytigiy nixiicpi yajxiicpi. Chi jacjadyii yminaangixy:

—Huaad iich ajcxy n'amido'idipyich miich m'ayuc mina anajty jadüg'oc.

³³Chi Pablo jim chooni ma je' anajty ajcxy. ³⁴Chi nijëjity jäy ypadzooni huídi anajty ti mibicy Pablo y'ayuc. Ma je' ajcxy jim anajty tüg jäy huídibi anajty yxii Dionisio, yi' je' anajty tungmiid jim Areópago. Nañ jadu'n tüg töxyjäy huídi anajty yxii Dámaris ypadzooni, etz jacjadyii jäy.

Chi Pablo ñicxy jim Corinto

18 Co jada jadu'n ytuni yajti, chi Pablo chooni jim Atenas, ñicxi jim Corinto. ²Jim minaybaati tüg judfojäy huídi anajty yxii Aquila, Ponto anajty ycocajpity, namja'tni anajty miid ytöxyjic Priscila. Jim anajty ti chongixy Italia ñaaxjot, jëgixpi co je mij'ane'mbi, Claudio, pidacy cötujcin co huen tüg'óciy judfojäy pidzimdaaygixy jim Roma. Chi Pablo oy cogapxïy Aquila. ³Aquila etz Priscila ytung'ajtpy anajty cochactjxcuyii, com nañ

cochactijcxuuyb anajty Pablo, paady Pablo jim yhui'my miid je' ajcxy. Chi ajcxy tú'ciy ytuuñ. ⁴Tüg tüg sábado xii Pablo ñicxy ma je judíojäy ajcxy ñaymujctac yajmiidmiydaaccixy Jesús y'ayuc ytiy'ajt etz capxjotcidaaccixy judíojäy etz nañ huidi ca' yjudíojäyity.

⁵Co ajcxy Silas etz Timoteo yja'ty jim Corinto, chooñ ajcxy Macedonia, chi Pablo adügijp ytiigi ayuccapxhuäcxpi ma judíojäy ajcxy co Jesús je' je' je Cristo huidi je' ajcxy chach'ahuixyp. ⁶E je judíojäy ajcxy ytiigi jotma'tpi, tziccapxpi ahua'ngapxpi. Chi Pablo yhuít huinxijty, je' je' je tiy'ajt co puyöydüdaani ajcxy, e chi Pablo ymīnañ:

—Miich ajcxy miid mgi'mbocy ajcxy myajtigoya'ñ yi m'alma. Hich ca' ti pocy nmíididyich ma miich ajcxy. Cham nicxy Dios y'ayuc ngapxhuäcxich ma huidi ca' yjudíojäyity ajcxy.

⁷Chi Pablo yöybojtni ma judíojäy naymujctac, chi ñicxy ma Justo ytijc. Justo ooy anajty Dios miyäxy ojadaty, e ymiid anajty ytijc mihuingon je judíojäy ñaymujctac.

⁸E Crispo, je judíojäy ñaymujctac huindzin, ymibijc je' je Huindzin Jesús y'ayuc ytiy'ajt, miid tüg'óciy y'ung y'anäg, yjuugy ymīgüg. Nañ jadu'n nijējity Corinto jäy co midoy Jesús y'ayuc, chi mibijc y ñiibejty ajcxy. ⁹Chi je Huindzin Dios nimay Pablo cumäyoty:

—Ca' mdzigī, capxhuäcx'aditz n'ayucich, e ca' mni'amoñ. ¹⁰Com iich miich nbubedipy, ca' pin jot miid'adipy nicxy nejaty xytuñy.

Hich may hich ya nmīidity jäy ma jada cajp.

¹¹Chi Pablo yhui'my jim Corinto tüg jimijt jacup, yaj'ixpijcy jäy je Huindzin Dios y'ayuc ytiy'ajt.

¹²Huin'it tiempo co Galión ygobernador'ajty jim Acaya ñaaxjot, chi judíojäy ajcxy midziptzoñ je Pablo, yajnicxy ajcxy ma cötujctac.

¹³Chi ajcxy nimay je gobernador: —Jada yēdyjc tzach jäy yaj'ixpijcy co ca' ycopicyty yajcuydunipy Moisés ycötujcin huidi jaybety ijtp.

¹⁴Pablo capxamb anajty co oy yi Galión nimäy ajcxy je judíojäy: —Pen yi Pablo ti ytundigooy o mijpocy ti tuñ, huin'it nmijpidägiäch miich ajcxy m'ayuc, miich ajcxy judíojäy. ¹⁵Pen je Cristo y'ayuc etz miich ajcxy mgötujcin myajtzibiiyb myajcapxyiiyb, ca' iich huaad nyajtigiyiyich yijiibi huinma'ñ.

¹⁶Chi je gobernador y'ané'min pidacy co huen judíojäy ajcxy yajpidzimdäyii ma je cötujctac.

¹⁷Huin'it tüg'óciy griegojäy ma je cötujctac huijtzpidziimyb je Sóstenes, yi judíojäy naymujctac huindzin, e chi ajcxy cujy jibijpy huingojxy jipcojxy ma gobernador yhuinduu, e Galión ca' tuñycuenti.

Pablo yhuimbijtni Antioquía, e yajtzondacy midugiigpi viaje

¹⁸Jac-huäcxijp Pablo jecy jim Corinto. Chi yhuinma'ñypidacy co chonaani. Chi ycapxycijxni miid je mibijcpidijc, e chi ybarcotigiiyñi ñicxni jim Siria ñaaxjot. Ñicxni quipxyi miid Priscila etz Aquila. Jim Cencrea, ca'ni anajty ybarcotigiiyi, Pablo yajcöme'px

cödza'm co anajty cuyduñ yhuandaacin. ¹⁹Co ajcxy yja'ty jim Efeso, chi Pablo ñay'ixmajtz ajcxy miid Priscila etz Aquila, e ñicxy ma je judío'jyä ajcxy ñaymujctac. Chi miidmiydacy je judío'jyä ajcxy huidi jim anajty ti ñayyöymújcigixy. ²⁰Chi je judío'jyä ajcxy jim Efeso cohuaniiy co huen jac-hui'my, e Pablo ca' a'ixiiy co yhui'mipy. ²¹Chi Pablo ycapxycijxni miid je Efeso jäy, chi yminañ:

—Copicy co jim xii nyajnaxa'ñyich Jerusalén, e nhuimbidi'pyich jadüg'oc ma miich ajcxy, pen Dios jadu'n tzojcp.

Chi Pablo ybarcotigiiy chooni jim Efeso. ²²Co anajty ti ypättigiiy jim Cesarea, Pablo nicxy Jerusalén co anajty capxpocxaangixy je mibijcpidijc, chi mic'amy idaacni jim Antioquía. ²³Jim hueeni yhuäcxijpy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicmigapxcixy tüg'óciy yi mibijcpidijc.

Apolos Dios y'ayuc capxhuäcxi jim Efeso

²⁴Huin'it tiempo yja'ty jim Efeso tüg jäy huidi anajty xii Apolos, hue' anajty y cogájpity Alejandría. Ooy anajty oy ayuc capxhuäcxy. E yajxon nejhuüydy Dios y'ayuc huidi jaybety ijtp. ²⁵Apolos ooy anajty ixpicyity ma Huindzin Jesús y'ayuc e ooy yjotmiccapxy, oy anajty yaj'ixpicy nej je Huindzin Jesús yajty y'ayoy. Oy jeda'ajty anajty janehuüy nej Juan, je Bautista, jäy ajcxy yajniibejty. ²⁶Chi Apolos ytigiüy capxi miydaacpi ma je judío'jyä ajcxy ñaymujctac

janch ni ca' chigiiy chöyduñ. Chi co Priscila etz Aquila ajcxy midooy Apolos y'ayuc, chi ajcxy yajnicxy ahuingujc, chi ajcxy oy yajmiidmiydägy jac-huädz Dios y'ayuc ytiy'ajt. ²⁷Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmigapxy, e pubejty ajcxy. Chi ajcxy nijayiiy je mibijcpidijc huidi ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸Chi je Apolos oy capxpizimiy mayjäy agujc co ca' yjanchity nej anajty ajcxy judío'jyä yhuinma'ñ miidity, co Jesús ca' je' yjējity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huidi anajty ajcxy y'ahuijxyp.

Pablo may mibijcpidijc minaybaati jim Efeso

19 Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ²Chi Pablo y'amidooy je mibijcpidijc:

—¿Nej ti xy'adigiüy xyjottigiiy je Espiritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi iich ajcxy pen ji Espiritu Santo.

³Chi Pablo y'amidooy ajcxy:

—¿Ti niibejtin miich ajcxy mbaad?

Chi je' ajcxy y'adzooy:

—Je Juan, je Bautista, niibejtin.

⁴Chi Pablo yminañ:

—Juan jāy yajniibejt je', je' je' je tiy'ajt co huen jothuimbijtcixy. E nimaaygixy anajty co huen ajcxy mibigipy je Cristo huidi jacmiinamni. Je' je' je Jesús, je Cristo.

⁵Co jada ajcxy jadu'n midoy, chi ajcxy oy ñibety miid je Huindzin Jesús yxii. ⁶E co Pablo cñixajy ajcxy, huin'it je Espíritu Santo y'adigiy yjottigiy ajcxy. Chi ajcxy ytigiiy capxpi miydaacpi tigachyaty ayuc, e capxhuäcxy anajty ajcxy Dios y'ayuc. ⁷Jëyi anajty nimajmetz yëydijctijc huidibi ajcxy niibejt.

⁸Tugiig po' Pablo jim yhuäcxijpy, e yöydiib anajty ma judíojäy ajcxy ñaymujctac capxhuäcxy Dios ytiy'ajt janch huinmic jotmic. Chi capxjotcidägy mayjäy miid Dios ytiy'ajt. ⁹Nijëjity jotjuuñdijc ca' ajcxy ymibijcy, jëyi ajcxy jibic tzachnigapxy Jesús ytiy'ajt ma jāy ajcxy yhuinduu. Chi Pablo puyöydúuticxni. Chi abicy yajnicxy je mibijcpidijc ma tüg escueltijc. Hue' je' je escuela huindzin anajty yxii Tirano, e jim Pablo Dios y'ayuc anajty capxhuäcxi jabom jabom. ¹⁰Mejtz jimijt jadu'n jim chachyaj'ixpajcy, e tüg'óciy jāy ma je Asia ñaaxjot ymidoday ajcxy je Huindzin Jesús y'ayuc, je judíojäy etz huidi ca' yjudíojäyity. ¹¹E Pablo mayba'mjäy yajtzoocy miid Dios ymic'ajt etz ooy mijhuinma'ñ ytuñ. ¹²Ixti yajnicxy anajty ajcxy yhuut etz ypaayi huidi Pablo ñinicx anajty ti ypadyii, e yajpaatcixy anajty pa'mjäy, e je' anajty miid choocixy, e nañ je' anajty miid ca'oybi ypidzimy ma jāy ajcxy y'ay yjot.

¹³Chi nijëjity judíojäy huidi anajty huidiitp tzozydumbi, huidibi anajty yajpidzimgixyp ajcxy ca'oybi, jayajtzögaañ tüg pa'mjäy miid je Huindzin Jesús yxii co huen yajyöydüdyii je ca'oybi. Chi ajcxy nimaaygixy je ca'oybi:

—Iich miich yam nimaayb miid Jesús yxii, je huidi Pablo ycapxhuäcxp, yajyöydüt jada jāy.

¹⁴Jadu'n anajty y'idiitcixy je Esceva ymang ajcxy, je nihiuxtujcpi ajcxy. Je Esceva hue' je' anajty judíojäy etz nihuindzin'aty teedy'adii. ¹⁵Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuüybich pin je' Pablo, e miich ajcxy, ¿mbin miich ajcxy?

¹⁶Chi je yëydijc huidi ca'oybi anajty miid, ytijcpigy tüg ma je' ajcxy, ymimadactay je nihiuxtujcpi, e yqueectay ajcxy ma je tijc nihuädz ixhuädz etz tzaachä. ¹⁷Tüg'óciy jāy ajcxy huidi anajty tzinaayb jim Efeso, judíojäy etz huidi ca' yjudíojäyity nejhuyiday ajcxy, chi ooy ajcxy chigiy e nimiydaaccixy e cómaaygixy je Huindzin Jesús yxii.

¹⁸E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹E mayjäy tiibi anajty capxy je mañ'ajt necy yajminday tüg'óciy e no'ctay je necy ma jāy ajcxy yhuinduu. E co ajcxy maymujcy je libro tzou, chi naybaati jada' huixchiguijpx majc mil plata meeñ (moneda mexicana naybaati jacnaxy jahueenjaty ycatüg mig'opx jamajcmocx tüg

mil). ²⁰E je Huindzin Jesús y'ayuc nigi anajty yhuäcx'idich, nigi ymijtiigi'y'idich.

²¹Co anajty jadu'n ti ytuñyii ti yjadyii, chi Pablo yhuinma'ñypidacy co nicxy cogapxihua'ñ je mibijcpidijc jim Macedonia etz Acaya. Chi anajty yjacnicxa'ñ Jerusalén e jadu'n yminañ co jim chondäga'ñ jadügtecy e ñicxa'ñ jim Roma. ²²Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hui'my jecy jim Asia.

Canay'ayuc-huinjihuihuii jim Efeso miid Dios y'ayuc ycixpi

²³Huin'it tiempo tzip oy pidicni jäy y'ocymigni y'oc'oxigni miid Huindzin Jesús y'ayuc ycixpi.

²⁴Co je', je plateri huidi anajty yxii Demetrio, yaj'oyiy anajty ac plata Diana chajptijc'ung, e jadu'n anajty Demetrio etz jacjadyii jäy oy ymeeñybaatcixy miid je ytung. ²⁵Chi Demetrio huomujcy ymigügtijc je huidi jadu'mbi tung tumb, nimay ajcxy:

—Migügtijc, mnejhuiiy ajcxy co miid jadayaabi tung huidi iich ajt nduunim, jada miid jotcujc ndzinaayim njugy'ajtim. ²⁶E miich ajcxy m'ixpxy mnejhuiiy co je Pablo chach yaj'ixpijcy co ca' yi' diosity huidi jäy ajcxy yajcojpy. E Pablo ti ooy mayjäy capxjotcidägy, canan yaayi Efeso, nañ jadu'n ma tüg'óciy Asia naaxjot. ²⁷Mij jada xyajtigoyaanim ma iich ajt n'adogii e nañ jadu'n je mijpi dios, je Diana, ytigoyipy, ca' ni pin occapxpaatniy, je huidi cham mayjäy y'ojadajtpy

tüg'óciy ya Asia ñaaxjot etz huindu'my naaxhuiñybi.

²⁸Co jadu'n ajcxy midoy, chi ajcxy ooy yjotmätcooty, chi ytigiiy ajcxy huambi jihuiiyb, chachminaangixy: —iCömay jada Diana, yi efesiojäy ydiosa!

²⁹Chi ajcxy yajhuinmänydigoyday je cajp jäy e majch ajcxy je Gayo etz Aristarco, huidi tzoon Macedonia, metz yëydijc, huidi Pablo anajty ajcxy ymiid huidijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujctijc huinduu ma jäy ñaymugyii. ³⁰Chi Pablo yjatigihuaañ jäy agujc, miidcapxa'ñ miidmiydäga'ñ anajty je mayjäy. E je mibijcpidijc ca' ajcxy a'ixiiy nicxy jiiby ytigiy. ³¹Nañ jadu'n nijëjity Asia mijtungmiidpi huidi anajty Pablo miid ñaymigüg'adyii, yajnigüeexy ayuc, co ca' huaad ñicxy ma jäy ñaymújcigixy. ³²Je mayjäy tügmucy anajty ijtcixy, ooy anajty yhuaangixy yjihuiiygixy, ca' anajty ajcxy ñay'ayuc-huinjihuiiygixy. E je jacmaaybi ni ca' anajty nejhuiiygixy ti co chachnaymújcigixy. ³³Nijëjity jäy huidibi anajty ajcxy mayjäy agujc, je ajcxy yajmiidmiydactay je Alejandro ti anajty tuunip jajtjp. Chi je judío jäy ajcxy tijpidzimy je Alejandro ma mayjäy agujc. Chi Alejandro cimiid tiy'ajt yejcy co huen amongixy. Je' anajty ñigapxtüdamy judíojäy ajcxy. ³⁴Co je mayjäy nejhuiiy co je' je' yjudíojäyity, chi ajcxy ytigiiy huaambi jihuiiybi jahuenjaty ycamejtzhority, yminaangixy: —iCömay ooy yi Diana, yi Efeso jäy ydiosa!

³⁵Chi je cajp jaaybi co anajty je jāy ti yaj'amoongixy hueeni, chi ajcxy nimay:

—Efeso jāy, tūg'óciy yi naaxhuiñyājāy nejhuūy co jada Efeso cajp yi' cuend'ajtp yi Diana chajptijc, je' Diana huīdi ooy ti yajcōmay, etz yi Diana ñinicx huīdi cā'u tzajpcíxy. ³⁶Ca' huaad ni pñ ymīnañ co ca' yjānchity. Amongix, ca' ti mdúngxipy pen ca' jayjyp yajxon mhuinmaaygixy. ³⁷Com jada yēydijc ajcxy tiibi myajmiingixy, ca' ma ytundigooygixy, ca' yi' ma ajcxy jībīc capcixy ma miich ajcxy mdiosa Diana. ³⁸Pen Demetro etz huīdijaty miid ytuñ pen ymiid xīhuin miid pñjaty, paady tungmiidpi etz tiydundac jiiijty. Jēbi nigapxy ma tungmiidpi, jēbi miñ xyipy ñayñigapxtúutigixy. ³⁹E pen huingbi ayuc huīdi miich ajcxy mbijctzooyb, copity jada y'oyīhuipy ma jāy naymugyī. ⁴⁰Ymiid jada ayo'n co nicxy nayyajīhuim co jāy cham ñaymīhuīdīdyī miid jada ycixpi nej yam ytunyī yjadyī e ni ti tiy'ajt iich ajt nganejhuiyīm nej nminaanīm pen jī anajty xyaj'amidoohuim miid co jāy cham chachhuaangixy chachjihuiyigixy.

⁴¹Co jadu'n miydactay, chi ycapxycijxy miid je naymujcpidijc.

Pablo ñicxy jim Macedonia etz Grecia

20 Co je cajp jāy ycapxy'ayuc xeemy, chi Pablo huoomujcy je mibijcpidijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ²Cajp cajp Pablo oy co'ixiy je mibijcpidijc

jaccapxhuijy ajcxy. Chi Pablo yja'ty jim Grecia ñaaxjot. ³Chi Pablo yhuācxijpy jim tugiig po'. Jim Grecia Pablo anajty ybarcotigīhuañ ñicxañ Siria. Co Pablo oy nejhuūy co judío jāy ajcxy ti yajnihuinmayīyī yaj'ōgañyīī barcojoty, chi yhuinmañybaty co huimbidañ tegyī'm, ñaxañ jadiug'oc Macedonia. ⁴Pablo mayjāy miid ñicxy, miidnicxy je Sópater huīdi anajty cogajp Berea, etz Aristarco, etz Segundo huīdi anajty cogajp Tesalónica, etz Gayo huīdi anajty cogajp Derbe, etz Timoteo, etz nañ jadu'n Tíquico, etz Trófimo huīdi tzoon jim Asia ñaaxjot. ⁵Co jada mibijcpidijc ajcxy ñicxy jayjyp, chi ajcxy xy'ahuixyīch jim ma je cajp huīdi xīi Troas. ⁶Co xīi ñajxtay mīna yajcaay je tzajcaagy je huīdi ca' miidty levadura, chi iich ajcxy ndzooni jim Filipos barcojoty. Co migoox xiini, oy iich ajcxy naybāatigixy jim Troas. Jim iich ajcxy yhuācxijpy huixtujc xīi.

Pablo co'ixiyy je mibijcpidijc jim Troas

⁷Domingo xīi ajcxy ñayyōymujci je mibijcpidijc chajcaagy ytujc-huācxaangixy, e Pablo anajty ymigūgtijc yjacyaj'ixpijcy. Je' co anajty com jabom chonaani, paady oy ayuc jacyajyoñ ixti ycujuhua'cxchumiīy. ⁸Jiiby anajty canaag lámpara ytiicxy ma ajcxy anajty ti yōymujccixy ma tūg cuarto huīdi anajty oy ycixity. ⁹E tūg yeeg'anāg huīdi anajty yxīi Eutico, ma ventana aguu anajty y'ñāy. Com Pablo jecy oy yaj'ixpijcy, chi je yeeg'anāg ymāymajtzī, e tugiig

nihuijtzpety anajty ycixity je tije ma ycäy. Chi ajcxy yajpidigý ögy. ¹⁰Co Pablo yminajcy, chi ñaygijxnajaji amineenmujcy je yeeg'anäg huidi anajty ti ycäy. Chi Pablo nimay ymigügtije:

—Ca' mdzigiiygixy, juugy jada.

¹¹Chi Pablo jadüg'oc ypejty ma je cuarto cixpi, chi chajcaagy tujhuäcxy e yajcaay ajcxy, e jadu'n Pablo yjacmiydacy co oy xiimiiñ. Chi ycapxycijxni miid je' ajcxy, chi ñicxni. ¹²E je yeeg'anäg huidi anajty ti ycäy, chi ajcxy yajnicxy juugy, e ooy ajcxy yjotcugiy nidüg'óciy.

Choñ ajcxy Troas ñicxcixy Mileto

¹³Chi iich ajcxy jayijp nicxigý barcojoty jim Asón co anajty jim nyajtzonángixich Pablo, com ti anajty jadu'n miidnayñimáayigixich co je' tegyi'm anajty ñicxa'ñ. ¹⁴Co iich ajcxy naybaatti jim Asón, chi Pablo ybarcotigiñ miid iich ajcxy. Chi iich ajcxy ñicxy jim Mitilene. ¹⁵Chi iich ajcxy jim ndzoñ, chi com jabom iich ajcxy najxy mihuingon Quío, comaax iich ajcxy nja'ty jim ma barco jättac huidi anajty yxii Samos. Jim Trogilio iich ajcxy nbocxy, com jabom iich ajcxy nja'ty jim Mileto. ¹⁶Chi Pablo ca' ñicxa'ñ jim Efeso co ca' yhuäcxiba'ñ jim Asia ñaaxjot, com tzojc anajty yjada'ñ Jerusalén, com jim anajty yajnaxa'ñ Pentecostés xii.

Pablo yajmiidmiydacy je huidibi ajcxy ane'mb je mibijcpidije

¹⁷Jim Mileto anajty Pablo, chi capxyñigüejxy huidi ajcxy

nigohuajc'ajtp je mibijcpidije huidi ajcxy jim Efeso. ¹⁸E co ajcxy miin, chi Pablo yminañ:

—Miich ajcxy mnejhuiyb jadu'n nej iich ti njäy'atyich ma miich ajcxy tüg'óciy je xii je tiempo nej oga'n nja'tyich ya Asia. ¹⁹Jecy iich ooy ti n'ityich miid miich ajcxy, nduñich ma nHuindzin Jesús ytung miid yung naxy njot nhuinma'ñich, etz miid huinnii jotmay, etz ti may ayo'n nyajnaxyich ma yi judíojäy ajcxy. ²⁰Ca' ti n'ixmachich je ngapx'ayuc huidi oyip miid miich ajcxy ycixpi. Ti nyaj'ixpicyich mayjäy'agujc etz tije tije. ²¹Ti ndiy'ajt yecyich ma judíojäy etz cham ma huidi ca' yjudíojäyity. Nnimaydaayich co huen jothuimbijtcixy ma Dios, etz huen mibijccixy iich ajt nHuindzin Jesucristo. ²²Jadachambi nicxpich jim Jerusalén; adzip je Espíritu Santo xyquexyich e ni nganejhuüyich ti iich jim xyjadamy. ²³Co iich cajp cajp ma nnicxyich, je Espíritu Santo xyajnejhuiybich co jim Jerusalén jäy ajcxy xypidäga'ñich pujxtigoty etz jim ajcxy xychaachytuna'ñich. ²⁴Yi jadu'mbi ayuc ca' iich nduñich cuendi, jada njugy'ajtich ca' ti tzoohuity. Jëyi janchtiy co nyajcixipyich jada tung jotcujc, e nguydunipyich je Huindzin Jesús y'ayuc, je tiibi xyajñibicyich jada tung. Ngapxhuäcxibich yi oybi Jesucristo y'ayuc ytiy'ajt jadu'n nej Dios may'ajt ti tuñ miid jäy ajcxy ycixpi.

²⁵E jadachambi nnejhuiybich co miich ajcxy ma ti ngapxhuäcxxyich Dios y'ayuc, ca' miich ajcxy

xy'ocjac'íjxcixni jadügtecy.
²⁶Paady cham nnimäyich miich
 ajcxy, ca' ni ti ngo'adzohuipyich
 miid miich ajcxy ycixpi. ²⁷Com
 ti ngapxhuäcxyich ma miich
 ajcxy tüg'óciy je Dios y'ayuc je
 Dios yhuinma'ñ. Ni ti ayuc ni ti
 ytiy'ajt ti ngacoyüchich ma miich
 ajcxy. ²⁸Naycuend'ájtigixy ci'm etz
 cuend'ajtcixy tüg'óciy jäy ajcxy
 huidi yajmij'ajtp je Huindzin Jesús,
 jadu'n ajcxy nipaady nej tügpicy
 cöbixy, etz miich ajcxy huidi
 nigohuajc'ajt je mibijcpidijc jadu'n
 miich ajcxy nipaady nej cöbixy
 cuend'ajtpi. Je Espiritu Santo ti
 xyajni'bjccixy co mgüend'adipy
 ajcxy yi Jesús yjäy, huidi ti cojuuy
 ajcxy ypocy miid yci'mni'py co
 y'o'cy.

²⁹Chi Pablo yjacminañ:

—Nejhuiybich co ya ndzoonibich
 miinip huingbi jäy huidi
 yajhuinma'nydigoyam mibijcpidijc,
 jadu'n nej ahua'n iyujc huidi
 cöbixy tzüdzip. ³⁰Ji ma miich
 ajcxy ji jäy yaj'ixpigam anii ma
 yjapadyii yaj'ixpigipy tiy'ajt oybi
 jigix yi mibijcpidijc ypanicxiyb.
³¹Naygüend'ájtigix, mjäymedziyb
 ajcxy jadu'n nej iich tugiig jimijt ti
 nyaj'ixpicyich xiim tzuum jabom
 jabom, miid huinni jotmay ti
 nyaj'ixpijccixy miich ajcxy nidüg
 nidüg.

³²Jadachambi iich,
 nmigügtjicich ajcxy, Dios
 miich ajcxy nyajpuhuaniiyb,
 nyajmihui'maamyich miich ajcxy
 Dios y'ayuc jadu'n nej Dios ajt
 xychojcim xyjihuiyim. Ma Dios
 y'ayuc miich ajcxy mbaadipy
 mic'ajt ma yi mibijcin, e mbaadipy

ajcxy it lugar ma Dios quipxyi
 miid ajcxy nidüg'óciy tiibi
 yajhuäch yjot yhuinma'ñ. ³³Ni ti
 iich ti nga'adzocy, ni pin yhuít
 ymeeñ huídibi n'ocjediibich.
³⁴Miich ajcxy mnejhuuiyb co
 ti nduñich, miid ngi'mgijich
 ci'm ti nnaymöyijich huidi
 nyajmayajtpyich etz nañ jadu'n
 ti nbubetyich nmigügtjicich huidi
 iich anajty nmiid. ³⁵Iich miich
 ajcxy ti nyajni'ixiiygixy nej jëbi
 mdungixy, nej jëbi mbubéjticy
 migügtjic huidi pa'm'ijtp, etz huidi
 tijaty yajmayajtp. Jäy medzi ajcxy
 je Huindzin Dios y'ayuc co yminañ:
 “Jacotcujc je' huidi yejcp, ca'ydi
 huídibi yajmooyb.”

³⁶Co jadu'n ycapxtay, chi Pablo
 ycoxtinay'ahuuy miid je' ajcxy, e
 mibijctzoy ajcxy Dios. ³⁷Ytigiyy
 ajcxy yaaxpi nidüg'óciy, e
 mineeñ ajcxy Pablo etz tzücxy.
³⁸Ooy ajcxy jihuiyb nej anajty ti
 ñimáayigixy ajcxy co ca' yjac'ixiiyb
 ajcxy jadügtecy. Chi ajcxy oy
 najtzhuhuiyb jim ma barco.

Pablo ñicxy jim Jerusalén

21 Co iich ajcxy ngapxycíjxy
 miid je mibijcpidijc, chi
 iich ajcxy nbarcotigiyy, tiyyi nicxy
 iich ajcxy jim Cos. Com jabom
 ndzoonich Cos nicxy iich ajcxy
 jim Rodas. Chi iich ajcxy ndzoon
 Rodas nicx iich ajcxy jim Pátara.
²Jim Pátara iich ajcxy nbaaty tüg
 barco huidi anajty najxp Fenicia
 ñaaxjot. Jim iich ajcxy nbarcotigiyy
 jadüg'oc, chi iich ajcxy nnicxni.
³Chi iich ajcxy mmij'ijxy Chipre
 je naax mejy'agujcpi, anajty'amy
 je' yhui'my. Jacnicxy iich ajcxy

Siria ñaaxjot, chi je barco ytigiiy ma yjättac jim Tiro co jim anajty chimydajc yajhuüma'ñ. ⁴Jim iich ajcxy nbaty jäy huidi anajty yajmij'ajtp Jesús, chi nmüidhuäcxijpich ajcxy huixtujc xii. Je' ajcxy je Espíritu Santo yajnejhuüii co Pablo ayo'n padañ Jerusalén, paady ajcxy nimay Pablo co ca' huaad jim ñicxy. ⁵Co huixtujc xii bi yca'pxy, chi iich ajcxy ndzooni. E tüg'óciy mibijcpidijc müid y'ung ytöxyjc oy xytüüjphuoühygixyich cajppa'. Jim ma mejypa' ngoxtinay'ahuüii iich ajcxy, chi iich ajcxy nmibijctzoy Dios. ⁶Huin'it iich ajcxy ngapxycixni, chi nbarcotigiiyñi iich ajcxy e je mibijcpidijc yhuimbijtni ajcxy ma ytijc. ⁷Co iich ajcxy ndzoon Tiro, chi nicxy iich ajcxy Tolemaida. Jim iich ajcxy ngapxpcxich je huidi anajty ajcxy mijpidaacp Jesús, e nmüidhui'my iich ajcxy jim tüg xii. ⁸Com jabom iich ajcxy ndzoon Tolemaida müid Pablo etz pinjaty iich ajcxy anajty nmiid. Chi iich ajcxy nja'ty jim Cesarea. E chi iich ajcxy nicx ma Felipe ytijc, je huüidibi anajty capxhuäcxy Jesucristo ytiy'ajt je oybi. Je' je' huüi tuun je nihuixtujcpi taabi ajcxy caayin uucin yajhuäcxy jim Jerusalén oga'n. Chi iich ajcxy nhui'my müid je'. ⁹Felipe midaax anajty ñiix müidty, ca'ni anajty ajcxy ypijccixy. E je' ñiix ajcxy anajty Dios y'ayucnajtzcaxiiyipy. ¹⁰Ti anajty iich ajcxy jim nhuäcxipy canaag xii co oy yjäty tüg ayucnajtzcaxiiybi huüi anajty yxii Agabo, jim anajty ti choon Judea.

¹¹Chi Agabo y'oy xycogapxiigixy ma iich ajcxy njättac. Chi Agabo Pablo yhuüin huijtzäcçi, e je' müid ñaygixojtz ñaydecyxoxtzi, chi yminañ: —Je Espíritu Santo jadu'n minamb co jim Jerusalén jadu'n judíojäy ajcxy cixodza'ñ tecyxodza'ñ jada huüin yhuindzin, e nañ ciyega'ñ ajcxy ma huüi ca' yjudíojäyity. ¹²Co jadu'n yajmidoy, iich ajcxy etz je Cesarea jäy ngohuaniiy iich ajcxy Pablo co ca' huaad ñicxy jim Jerusalén. ¹³Huin'it Pablo y'adzooy: —¿Nej co myaaxcixy müid iich ycixpi? ¿Nej iich müich ajcxy co njot nhuinma'ñ xyaj'amutzciiyi? Iich nayyéjibich müid naygixodzii naydecyxodzii, nañ jébi n'ögibich jim Jerusalén müid je Huindzin Jesús ycixpi. ¹⁴Co ca' iich ajcxy mimadacy nicxy nyajhuü'ngixyich Pablo, chi iich ajcxy n'amooni, chi iich ajcxy ñayñimaayi: —Huen cuyduñ je Huindzin Jesús chojcin. ¹⁵Co jadu'n yjajti, chi iich ajcxy ndzooni ni'ixiiy e chi iich ajcxy nicxy jim Jerusalén. ¹⁶Müid nicxy iich ajcxy nijéjity mibijcpidijc huüi tzoon Cesarea, e nañ tzoon anajty tüg Chipre jäy huüi anajty yxii Mnasón, jecyip anajty jijptigiyiiñi jada mibijcin e je' iich ajcxy nicxy xyajjättägaangixy.

Pablo oy cogapxiy Jacobo

¹⁷Co iich ajcxy nja'ty jim Jerusalén, chi je mibijcpidijc iich ajcxy xycöbijcy janch jotcuje. ¹⁸Com jabom iich ajcxy nicxy müid Pablo, y'oy iich ajcxy ngogapxiy

Jacobo, e jim anajty tüg'óciy huidi nigohuajc'ajtp je mibijcpidijc. ¹⁹Chi Pablo ymigügtijc capxocxy, e yajmiidmiydacy ti anajty Dios ti tuñ miid yi' ma yi jäy ajcxy huidi ca' yjudíojäyity. ²⁰Co ajcxy jadu'n midooy, chi ajcxy huin'iiy jäymejch yi Dios, chi ajcxy Pablo nimay:

—Migüg Pablo, miich mnejhuiyb co ya canaag mil jäy ti mibicy Jesús, e yjactimmina'ñ ajcxy co copicy nguyduunim Moisés ycötujcin je jecyip. ²¹Ti ajcxy yajmiidmiydägyii co miich mdzachjäyayaj'ixpicy ma tüg'óciy judíojäy huidi ajcxy jiguëgy adzinaayb co ca' huaad tuñycuenti Moisés ycötujcin je jecyip, etz ca' ycopicyity co tiy'ajttíyigixipy y'ung, etz ni ca' ycopicyity payöyipy iich ajt ngostumbre. ²²¿Ti huaad nduunim? Jotmädam ajcxy co nejhuíhuipy co ya miich ti mjäty. ²³Hue' janchtiy jadu'n miich mdunipy: cha midaax yëydijc huidi cuydunamy tüg huandaacin. ²⁴Miidnicxy je' ajcxy, nicx naysajpocynihuaatzii miid yi' ajcxy, e miich mgojuydayipy nej anajty ajcxy ypadyii je meeñydunii. E chi ajcxy myajcöme'pxipy cödza'm, e jadu'n je jäy ajcxy huinjihuidyähuipy co ca' yjanchity jadu'n nej xyñimiydaaccixy, jëyi co miich nañ jadu'n mguydun je Moisés ycötujcin je jecyip. ²⁵Huidibi janchtiy jadu'n nej yi huidibi ajcxy ca' yjudíojäyity, e ti mijpidaaccixy Jesús, ti iich yi' ajcxy nijayíyigixich co ca' túngixipy cuentí jada jadu'mbi judíojäy ycostumbre. Je' janchtiy co ca' huaad tzützcixipy je tiibi jäy yajhuindzigíy ídolos, ni ca'

huaad jüxcixipy ni'py, etz ni ca' ajcxy tzüdzipy huidi yo'c-huiddy ti y'ögy, etz ca' ajcxy huingbi töxyjäy migapxtigóoygixipy.

Chi ajcxy majch je Pablo ma Dios ytijc

²⁶Chi Pablo miid nicxy je nimidaaxpi yëydijc, com jabom ajcxy naysajpocynihuaatzii ajcxy, chi ajcxy ytigíy ma Dios ytijc, e chi ajcxy ytiy'ajt yejcy ma judío teedy ti xii ycixa'ñ je naysajpocynihuaadzi, etz ti xii huindzigí'ñ iyujc cýyegaangixy nidüg nidüg.

²⁷Ma anajty yca'pxaani je mihuixtuxcxiibi nijëjity judíojäy, choon jim Asia, chi ajcxy ijxy Pablo ma Dios ytijc. Huin'it ajcxy je mayjäy majch Pablo, yajhuangoty yajjihuiygoty, ²⁸chi ajcxy yam chachminaangixy:

—iIsrael jäy ajcxy, pubejtcich iich ajcxy! Jada je' je yëydijc huidi xi ya tzach nigapxp ni'ojíyib judíojäy ycostumbre, Moisés ycötújcin, etz nDios ytijc. E jadüg nax ti yajtigíyigixy griegojäy ma Dios ytijc, yajjibiciyigixy jada it lugar huätzpi. (Com ca' ñigödúcyity nicxy griegojäy ytigiy ma Dios ytijc.)

²⁹Paady anajty jadu'n yminaangixy je huidi ajcxy majtz je Pablo, com co ijxy ajcxy Pablo miidhuidity cajpjoty je Trófimo, huidi anajty cogajp Efeso. Hue' anajty tijcixy co Pablo ti miidtigíy Trófimo tzajtigoty.

³⁰Tüg'óciy je cajpjäy yjotmätcottay, miin ajcxy poyígy majch ajcxy je Pablo yajpidzimy tzajtigoty pahuijch pajugujcy. Chi ajcxy mic'amy agiiy

Dios ytiyc. ³¹Yaj'ögamyb anajty ajcxy Pablo. Chi je soldado huindzin ayuc midoy co tüg'óciy je cajp jäy ajcxy ti chachhuaangixy chachjihuiiygixy.

³²Je soldado huindzin huodzonday ysoldado ajcxy, e chi ajcxy ñicxy poyigy ma je mayjäy yhuaangixy yjihuiiygixy. Co je mayjäy ajcxy ijxy miñ soldado ajcxy miid yhuindzin, chi ajcxy ixmajch Pablo ca' ocjaccóxcixni. ³³Co je soldado huindzin jim ja'ty, chi yajmajtzi je Pablo, ni'anémdiy co huen cixochyii miid mejtz cadena. Chi yajtiy pin je' anajty, e ti ti tuñ. ³⁴Chi je mayjäy ajcxy ytiigy huaambi jihuiiybi, e jadu'n je soldado huindzin ca' ni nej huinjihuiiy miid je ne'mbi. Chi ni'ane'mdiy co huen Pablo yajnicxyii ma cuartel. ³⁵Co jim yja'ty ma cuartel pediydac, chi je soldado ajcxy ciyigy Pablo, co anajty je mayjäy chachjottigoyñáxcixy tzachyaj'ögaangixy anajty Pablo. ³⁶Tüg'óciy je mayjäy pamiingixy axam je soldado ajcxy, yam chachminaangixy:
—iHuen ögy!

Pablo ñaygohuaani ma je mayjäy

³⁷Co anajty yajtigihua'ñyii cuartel tigoty, chi Pablo migapxy je soldado huindzin miid griego ayuc, yminañ:
—¿Nej jëbi ii nmiidmiydägy tüg'aa metz'aaji?

Chi je soldado huindzin y'adzooy:
—¿Nej majtpty miich griego y'ayuc?
³⁸¿Nej ca' jada' miich jëjity je egipcio jäy huidi namni tzip yajpidicp, e huobidzimy midaaax mil jäy yaj'öcp, miid nicxy ajcxy jim mijtigiduum?

³⁹Chi Pablo nimay je soldado huindzin:

—iich judíojäy iich, jim ngogápidiyich Tarso, tüg mijcajp huidi yajpatpi jim Cilicia ñaaxjot. Tun may'ajt miñ mayjäy n'ocmigapxich.

⁴⁰Co je soldado huindzin a'ixiyy, chi Pablo ytinay'ahuiiy ma je cuartel pediydac, e cimiid ytiy'ajt yejcy co huen amoongixy. Co je mayjäy ajcxy y'amunday, chi migapxcoty miid hebreo ayuc yminañ:

22 —Migügtijc etz mij'anäctijc, midoogixy jadu'n nej iich yam nnayñigapxtüdyii.

²Co je mayjäy ajcxy midoy co ymigápxigixy miid hebreo y'ayuc, chi ajcxy y'amunday, chi Pablo yminañ:

³—Judíojäy iich. Jim Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpjicich ya ma Gamaliel, etz yajxon Gamaliel ti xyaj'ixpijcyich ajt nmij'ap nmijteedy ytiy'ajt etz ycötújcín. Njatyim nyajmij'ajtpyich Dios jadu'n nej miich ajcxy Dios myajmij'ajtcixy cham. ⁴Jecy ti n'ixhuidity ti nbahuidityich je jäy ajcxy huidi anajty mijpidaacp Jesús y'ayuc, nyaj'öctähuaamyich anajty, e nyajnicxpyich anajty mach yëdyictijc etz töxyjäydiy, nbidägyich anajty ajcxy pujxtigoty. ⁵Je teedy mijtungmiidpi etz tüg'óciy mij'anäctijc ymiid tiy'ajt, co iich ajcxy xymooyich cötujcín, e nnicxyich anajty jim Damasco ma nmigügtijcich yi judío jäy ajcxy. N'ixtäyich anajty je jäy ajcxy huidi Jesús y'ayuc mijpidaacp, madza'ñich anajty ajcxy, e

nyajmiina'n'ich anajty ajcxy ya Jerusalén huen yajtzaachyunggixy.

Pablo nimiydacy nej yjothuimbijty

⁶Co iich anajty ndüyöyich mihuingon Damasco, cujc yxii anajty, chi janch timitiini ytiicxigy jühuidity jadu'n nej jün ma iich, hue' anajty choon tzajpjoty. ⁷Chi jim ngidaayich, huin'it nmidooyich tüg ayuc xyñimäyich: "Saulo, Saulo, ¿ti co xypahuidijttägyich?" ⁸Huin'it n'amidooyich: "¿Mbin miich, Huindzin?" Chi xy'adzooyich: "¿Ich je' je Jesús je huidi cogajp jim Nazaret, je huidi miich mdzachpahuidijttacy?" ⁹Pinjaty iich anajty nmiid y'ijx je' ajcxy je tiicxin, chi ajcxy ooy chigiiy, e ca' ajcxy huinjhuiiy je ayuc huidi anajty nmigapxyijich. ¹⁰Huin'it nnimaayich: "¿Ti jëbi nduñich, Huindzin?" Chi je Huindzin Jesús xy'adzooyich: "Pidig e yajyöy mdu', nicxy jim Damasco, jim myajnimähuiiyb tüg'ócüy ti jëbi mduñ." ¹¹Je tiicxin hue' je' xy'ixmajchich huiintz. E chi je nmigügtjicich xyhuitzoonich ajcxy cigixy, xyajja'tyich ajcxy jim Damasco.

¹²Jim Damasco anajty chinäy tüg yëydijc huidi anajty yxii Ananías, je huidi anajty ooy cuyduñ Moisés ycötújcjn je jécyip. E judíojäy ajcxy huidi jim tzinaayb ooy cömaaygixy co ooy y'oyjäyity. ¹³Chi Ananías ymiñ ma njättaacich, e ytinay'ihuiiy ma iich nmijc, chi xyñimaayich: "Migüg Saulo, ijxigich jadüg'oc huinjemy." Tim huin'itiy n'ijxigiyich. ¹⁴Chi Ananías xyñimaayich: "Je Dios huidi ajt

nmij'ap nmijteedy ojadajt, je' ti xyhuin'ixy jigix mnejhuíhuipy Dios yhuinma'n, etz m'ixipy je tudäcypí jäy, e mmidohuipy yci'm ayuc huidi ycapxpy. ¹⁵Dios ti xyhuin'ixy jigix nicxy mdiy'ajt yecy ma tüg'ócüy naaxhuiñyjäy, etz mnimiydägipy nej ti m'ixy ti mmidooy.

¹⁶Jadachambi, ¿nej co mhuäcxipy? Pidig etz niibet. Mibijctzou Dios jigix mbocy ñihuädziy."

Pablo nimiydacy nej oy yajquexy ma je huidibi anajty ajcxy ca'p yjudíojäyity

¹⁷Co nicxnich jadüg'oc Jerusalén, chi nnicxich ma Dios ytijc, oy Dios nmibijctzooyich. Chi iich jiiyb tzajtigoty n'ixmañyiyich. ¹⁸N'ijxyich je Huindzin Jesús e xyñimaayich: "Pidzim ya Jerusalén mic'lamy, ca' je Jerusalén jäy ajcxy cöbigipy miich m'ayuc jadu'n nej xyñigapxa'n'ich." ¹⁹Huin'it n'adzooyich: "Huindzin Jesús, yi jäy ajcxy ñejhuiiyb co iich anajty nnicxich huen huidi judíojäy naymujctac n'ixtäyich yi jäy ajcxy huidi miich m'ayuc xymibijcip, ti nbidägyich anajty ajcxy pujxtigoty, ooy iich ajcxy yi' ti ndzachytuñ ti nga'oyduuñich. ²⁰Co ajcxy yaj'ögy je Esteban, miich mdumbi, huidi miich m'ayuc xycapxhuäcxip, jim iich anajty nañ jadu'n yajpaady. E ooy njäygidacyich co ajcxy yaj'o'cy, ixti ngüend'ajtich je' ajcxy yjocxhuit huidi Esteban yaj'o'c." ²¹Chi iich nHuindzin Jesús xyñimay: "Cham iich miich nguexy jigüegy it ma yi jäy ajcxy huidi ca' yjudíojäyity."

Pablo, ma je comandante yci'am

²²E yabaad je mayjäy y'amido'ijty Pablo y'ayuc, chi ytiigiy ajcxy huambi jihuiiybi chachminaangixy:

—iHuen öc yjiiibi yëydjic! iCa' huaad yjactzinäy!

²³Yam yhuaangixy yjihuiyigixy, yam yjocxhuit tzachjengixy, etz naaxhuaay tzachyujc-huijicixy. ²⁴Chi je soldado huindzin ni'ane'mdiïy co huen Pablo yajnicxyii cuartel tigoty, e ni'ane'mdiïy co huen ci'adyii jigix nigapxip ti ti tuñ co je jäy ti ymibiðigiyii. ²⁵Ti anajty ajcxy cïxojtcixy, e chi anajty ajcxy tzaachytunaangixy co Pablo nimay je capitán huidi anajty huindy:

—¿Ti cötújcïn miich ajcxy miid co mdzaachytuna'ñ tüg romanojyä, ni ca' ajcxy jayjip mdiyduñ?

²⁶Co jadu'n midooy je capitán, chi ñicxy oy yajnimäy je comandante:

—Ixcim nej mduñ yi jäy, com hue' yi' romanojyä.

²⁷Huin'it je comandante ymijhuägy ma je Pablo, chi y'lamidooy:

—¿Nej janch co miich mromanojyäyity?

Chi Pablo y'adzooy:

—Janch.

²⁸Huin'it je comandante nimay Pablo:

—Meeñgyíxy iich jada nbaaty co naydijyijich romanojyä.

E chi Pablo y'adzooy:

—Iich ti nmiibi'c'ajtich yi'.

²⁹Miid jëyi, je huidibi anajty ajcxy ci'adam je Pablo, chi puyöydúutcixni. Nañ jadu'n je comandante ooy ñay'adzigiïyi, miid co cïxojch Pablo miid cadena.

Pablo ma je judíojäy ajcxy yjuntitungixy

³⁰Com jabom je comandante co anajty nejhuïhua'ñ ti ycixpi co ti

yxïyii je Pablo yi judíojäy, huen yajminagyii cadena ma Pablo yci'. Chi ane'my co yajhuomujci je teedy tungmiidpi etz je judío mij'anäctijc. Huin'it je comandante yajnicxy Pablo ma je huindzindijc etz ixpicytjic anajty ti ñaymújcigixy.

23 Huin'it Pablo yaj'ijxpejty je mayjäy huidi anajty ti nayyöymújcigixy, e chi ajcxy nimay:

—Migügtjic, Dios y'ijxpy ñejhuiyb nej iich ti nduñ maabi nyecpïdzimych, tudägy n'ityich ixti chambaadni.

²Huin'it je Ananías, je teedy mjtungmiidpi, ni'ane'mdiïy Pablo co huen yaj'accoxgy. ³Chi Pablo yminañ:

—iDios xychaachytunipy miich huidibi mnaybidaacip nej jihuiy ooy mdudägyjäyity, e ca' yjanchity! Paady miich m'iñäy ma cötujctac jigix nyajtydunipyich nej je ley y'ane'my. Chi mmidundigooy je ley co ti xyajcojxyijich.

⁴Je jäy ajcxy huidi anajty jim minañ:

—¿Jadu'n miich mmigapxtigoy yi Dios ymijtungmiidpi?

⁵Chi Pablo yminañ:

—Migügtjic, iich ca' anajty nejhuïyich, pen yi' je! Dios ymijtungmiidpi. Com jaybety jadu'n ma Dios ñecy: “Ca' huaad jibic mnigapxipy huidi tungmiid ijtp ma miich mjäy.”

⁶Huin'it Pablo ijxy nejhuïy co jim juntí'joty mejtzpicy ixpicytjic anajty jim, jim huidi saduceo y'ixpjcïn ymijpidacp etz nañ jadu'n jim huidi fariseo y'ixpjcïn ymijpidacp, chi Pablo yminañ mic:

—Migügtjicich, fariseojäy iich, nañ jadu'n ndeedyich fariseojäy je'. Cham nyajtiyduñich miid jëgixpi co nmibicyich co Dios yajjugypigipy jäy tiibi y'öccixy.

⁷Co Pablo jadu'n yminanday, chi fariseojäy etz saduceojäy miñ xyipy ajcxy ca' ñay'ayuc-huinjihuiyi. Chi je nymujcpidijc ajcxy ñaybijc-huäcxi. ⁸Je' co je saduceojäy yminaangixy co o'cpi ca' yjugypigipy, ni ca' ji ángel ajcxy, nañ ca' jäy y'alma, nañ ca' ji je Espíritu Santo, etz ni ca' ji mujcu' ajcxy. Je fariseojäy ymibijcpi je' ajcxy co yjijity ángel ajcxy, co öcpi jugypigaangixy, co je Espíritu Santo yjijity, co jäy ajcxy miidity y'alma, etz co mujcu' ajcxy yjijity. ⁹Tüg'óciy jäy ajcxy ma je nymujctac ytigiyy huambi jihuiyi. Chi nijëjity fariseojäy huidi nihuindzin'ajtpy je Moisés ycötújcín nigapxtuty Pablo ymiñañ:

—Jadayaabi jäy ca' ti pocy ti tuñ. Ca' yjegyity ti jada' ymígapxyii tüg espíritu o tüg ángel.

¹⁰Chi je mayjäy anajty ooy mic ti ñayyajot'ambjicigixy. Je soldado huindzin tzigiiyb anajty co Pablo y'ahuoonñihuiyb y'agidzihuiyb, paady ni'ane'mdiy huen yi soldado ajcxy yajpidzimgixy juntijoty e yajníxcixipy yi Pablo jadüg'oc ma cuartel.

¹¹Huin'it coodz ñayguëxici je Huindzin Jesús ma Pablo ymijc, nimaayi:

—Jotmicpic Pablo, com jadu'n nej ya Jerusalén ti xyñigodiy'ajt'átyich, nañ jadu'n xyñigodiy'ajt'adipyich jim Roma.

**Ixtaaygixy huinmañ nej
huaad Pablo yaj'öccixy**

¹²Com jabom nijëjity judíojäy ñaygapxi co yaj'ögaangixy Pablo. E chi ajcxy capxycödujcy ñay'iibojci ñaygapxpojci co ca' ycayaangixy y'ügaangixy ixti cooni ajcxy yaj'öccixipy Pablo. ¹³Nihuixchiguipx naxy anajty yëydijctijc huidi ajcxy jadu'n naygapxi. ¹⁴Chi ajcxy ninicxy je teedy ajcxy huidibi mijtungmiid etz judío mij'anäctijc, nimay ajcxy:

—Iich ajcxy ti ngapxycödujccixy co ca' ngayáangixyich n'ügáangixyich ixti cooni iich ajcxy nyaj'öcip Pablo. ¹⁵Jadachambi miich ajcxy, etz jacjadyii ixpicytijc mij'anäctijc nidungiiygixy ma je soldado huindzin, co huen jabom yajminyii Pablo jadügtecy ma miich ajcxy. E aaniidaaccixy co jacyajxon yajtiydunañ, e ni'ixi iich ajcxy anajty n'ijtcixy co Pablo nyaj'ögibich ca'ni anajty yjäty ma nymujctac.

¹⁶Pablo chi' ymang nejhuiy nej je' anajty ti ñaygápigixy, chi ñicxy ma cuartel oy Pablo yajnimäy.

¹⁷Huin'it Pablo yaaxi tüg soldado huindzin, e chi nimay:

—Yajnicx jada yeeg'anäg ma je comandante, ymiid yi' ayuc ti nigapxaamy.

¹⁸Chi je soldado huindzin yajnicxy je yeeg'anäg ma je comandante, e chi nimay:

—Pablo, je machyjäy, ti xyaaxyich, ti xyñimäyich co nmiidminipyich jada yeeg'anäg, ymiid yi' ayuc huidi ñigapxaamy ma miich.

¹⁹Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰Chi je yeeg'anäg yminañ:

—Yi judíojäy ajcxy ti

ñaygápxigixy co xyñimähuaangixy co jabom Pablo myajnicxipy jim ma ñayyöymugáanigixy, y'aaniidägaangixy co jacyajxon tiydunaangixy. ²¹Ca' miich yi' mmibigipy; com nihuixchiguipx naxy yëydjctjtc jim yi' ajcxy ahuixy yüch. Ti capxycödujccixy co ca' ajcxy ycaya'n y'uga'n ixti cooni ajcxy yaj'ögipy je Pablo. Jadachambi ni'ixi jim y'ljtcixy, jëyi miich m'ayuc ajcxy xyjamidohuaani, pen mni'adzooyb.

²²Chi je comandante ycapxycjixy miid je yeeg'anäg. Chi nimay co ca' huaad ymiydägy miid jacpinjaty judu'n nej anajty ti ymiydaaccixy.

Yajnicxy ajcxy Pablo ma je gobernador Félix

²³Chi je comandante yaaxi metz capitán moy cötújcjin huen nayñi'ixíyigixy nimejtzmigo'px soldado huidi nicxip tegyi'm, etz tugi'pxmajc huidi nicxip cohuaaygíxy, etz mejtz migo'px quipyjy'pxu'nmiidpi, huen nicxcixy jim Cesarea mijcoodz. ²⁴Nañ ni'ane'mdiiy co huen cohuaay ni'ixi pidägyii huidi Pablo yaj'iñähuiipy, e moy cötújcjin co huen oy yajxon ajcxy Pablo yajjädipy ma je gobernador Félix. ²⁵Chi yajmiguejxy tüg necy yjaayity judu'n:

²⁶“Hich comandante, Claudio Lisias, cham nguejxyich jada necy

ma miich, mijpi gobernador Félix, e nguejxyich capxpoocxin. ²⁷Je judíojäy ajcxy ti anajty majtzcixy jadayaabi yëydjtc, yaj'ögamy anajty ajcxy co iich oy nejhuüy co je' yromanojäyity, chi nninicxich miid soldadtjtc etz nnihuaañich. ²⁸Co iich ooy anajty nejhuühua'nich ti anajty co ti xigixy, chi nyajnicxich ma anajty ajcxy tungmiidpi etz mij'anäctjtc ti ñayyöymújcigixy. ²⁹Hue' anajty yi' ycixpi ti yajxüy co anajty ti ytundigooy ma yi' ajcxy ycötújcjin. Ca' anajty ytiy'ájtity co yaj'öccixipy, e ni ca' huaad ymach'iñäy. ³⁰Co iich oy nejhuüy co yi' judíojäy anajty ti nihuinmayiigixy co yaj'ögaangixy, cham iich miich yi' nyajniguexy. E ti iich nañ judu'n nimay huidi ti yxüyii huen nicxcixy ma miich, e jëbi ajcxy jim nigapxy ti ycixpi co midzip'ajtcixy. Ji naybaatim.”

³¹Je soldadtjtc nej anajty ti ycötújcjin möyii tim huin'itiy miid tzoon je Pablo mijcoodz ixti yajja'ty ajcxy Antípatris. ³²Je soldadtjtc huidi ajcxy tegyi'm nicxp, com jabom huimbjtcixni, chi yjá'tcixni ma cuartel. E je soldadtjtc cohuaaygixpi jacnicxy je' ajcxy miid Pablo. ³³Co je' ajcxy yja'ty jim Cesarea, chi ajcxy je gobernador necy yajcidiigi, chi ajcxy nañ judu'n yajquëxigy je Pablo ma je' yhuinduu. ³⁴Co ñecy capxtay, chi je gobernador y'amidooy Pablo ma anajty yconaxity. Co nejhuüy co yCilicijäyity, ³⁵chi nimay:

—Jiini nejhuühuibich je tiy'ajt co anajty miingixy huidi ti yxügixy.

Huin'it ni'ane'mdiiy co huen cuend'adyii ma je Herodes ymijtjtc.

Pablo ñaygohua'ñyii ma je
governador Félix yhuinduu

24 Co migoox xii Ananías je teedy ajcxy ymijtungmiidpi yja'ty jim Cesarea miid judío mij'anäctijc ajcxy etz miid tüg huingapxpi huidi anajty yxii Tértulo, chi ajcxy ñayguëxäci ma gobernador co xihuaangixy Pablo. ²Co ajcxy Pablo yajmiñ, chi Tértulo ytigiyy xibi, nimay Félix: —Miid miich ycixpi jotcujc je naaxcajp y'ijty, ca' ma tzip, je' co yajxon m'ane'mdäy miid oyhuinma'ñ. ³Tüg'óciy iich ajcxy njäygidacpyich hueñyma'ámyity, miich mijtungmiidpi Félix. ⁴Ca'ydi mdiempo nyajtigooyi mij, tun may'ajt amido'ljtigich n'ayuc tüg jaxägyi. ⁵Com ti nnejhuüfygixich co jada Pablo, ooy ayo'n yecy hueñytimma'ámyity. Xi ya judíojäy tzach pijc-huäcxy miid y'ayuc huidi ymiid. Yi' je' nigohuajc'ajtp tüg picy jäy huidi jäy ytiypp Nazaret jäy. ⁶Com tundigoy ma iich ajcxy nDios ytijc nej ca' ypadyyi, chi iich ajcxy nmajch, e chi iich ajcxy njatyidunaañich jadu'n nej iich ajcxy ngötújcín y'ane'my. ⁷Per je comandante Lisias je' yajtigiyyi mictägy, chi iich ajcxy xypijci jada Pablo. ⁸E Lisias yminañ co pinjaty anajty ti yxii huen miñ ma miich. Miich ci'm jëbi myajtiy, e mnejhuühuip tüg'óciy je tiy'ajt jadu'n nej iich ajcxy yi' ti nxüy. ⁹E je judíojäy ajcxy huidi anajty jim gobernador yhuinduu, ac jadu'n ajcxy yminaangixy co yjanchity jadu'n nej Tértulo ymina'ñ. ¹⁰Huin'it je gobernador tiy'ajt moy

Pablo címiid co huen capxy, chi Pablo yminañ:

—Janch jotcujc jëbi nayñigapxtüdyiijich ma miich Félix, com nejhuiybich co miich mijtungmiid ma jada naax cajp cham xii jimijt ñicxni. ¹¹Miich ci'm jëb mnejhuüy je tiy'ajt, jëyi anajty ñimajcmetzxiijy maabi anajty nbättigäyich jim Jerusalén Dios ojadajtpi. ¹²Ca' iich yi' ajcxy xypaty ndzipcapxy n'ahua'ngapxyich miid pinjaty. E ni iich ngajäy'axiigiy ngajäy'agapxy ma Dios ytijc, etz ni ma naymujctac etz ni ma Jerusalén cajp. ¹³Jada jäy ajcxy ca' ajcxy miidty pinjaty tiy'ajt yegipy nej iich yi' ajcxy yxüy. ¹⁴Huidi janch ngapxypidziimybich ma miich jadu'n nej je tzinaayin, je jemybi ixpijcin huidibi yi' ajcxy ytiypp ca' y'óyity, je' je' je' ixpijcin huidi iich miid n'ojadajtpich Dios, je Dios huidi iich ajcxy nmij'ap nmijteedy y'ojadajtp. Nmibijcpiyich tüg'óciy jadu'n nej yjaybetyity ma Moisés ñecy, etz je Dios y'ayucnajtzcaxiyyi ñecy. ¹⁵Nañ nmibijcpiyich co Dios yajjugypigipy pinjaty ti y'ögy, tiibi oybi tuñ etz tiibi jibicpi tuñ. ¹⁶Paady ycixpi naymijottigoyiijich co njothuinma'ñich huadz ooy nmiid'idipyich ma Dios etz ma jäy. ¹⁷Canaag jimijt iich anajty ti nhuidityich huingduum, chi nhuimbijtyich ma iich ngajp limosna cuejtp etz nhuindzigihua'ñich anajty Dios. ¹⁸Jadu'n iich anajty nduñ co nijëjity judíojäy xypatyich ma Dios ytijc huidi anajty tzoomb Asia ñaaxjot. Ti anajty naybocyñihuächyijich, ti

anajty nguyduñich costumbre, ca' anajty mayjäy pin yhua'n yjihuiy. ¹⁹Je jäy ajcxy huidi xy'lijxyich ma Dios ytijc, je' ajcxy ixypiy ti ymiingixy ya tiy'ajt yejcp. ²⁰Co ca' ajcxy ti miñ, huen jada jäy ajcxy huidi ya nigapxcixy pen ypaat ajcxy nbocyich je taabi ajcxy xtyiyduñich ma judío jäy tungmiidpi etz huinmij'anactijc ajcxy ñaymujci. ²¹Jëyi co iich mic ngapxyich juntijoty, chi nminaañich: “Xtyiydumbich miich ajcxy cham miid co nmibicyich co Dios yajjugypigipy pinjaty ti y'o'cy.”

²²Co Félix jadu'n midodaay, com ñejhuiydaayb anajty nej tüyöy je mibijcpidijc y'ayuc yhuinma'ñ, chi capxhui'my je ayuc, nimay ajcxy: —Co anajty miñ je comandante Lisias, huin'it njacnejhuiydähuibich nyajtydigihuibich miich ajcxy m'ayuc.

²³Huin'it Félix ane'mdiy je capitán co huen yajcuend'aty yi Pablo, e huen a'ixihuip co pidzim tibiñ tibäy e pen ji ymigügtijc miñ co'ixihuñyii, huen möyii huidi yajmayjajpty.

²⁴Ti anajty xii ñajtninixiyyñi co Félix jadüg'oc miñ miid ytöxyjc Drusila. Je Drusila judíojäy je' anajty. Chi Félix capxyñiguejxy Pablo huen miñ miidmiydägyii nej jäy mibicy Jesucristo. ²⁵E co Pablo yajnimay je tiy'ajt nej Dios tzocy co huen jäy tudägy tzinäy, etz yajnimay jadu'n nej Dios jini jäy tiyduna'ñ tüg'óciy, chi Félix ñay'adzigiyyi, yminañ:

—Nix miich jadachambi, co iich anajty xyñbadfiyigixy huin'it nicxy nyajhuooyii.

²⁶Nañ jadu'n Félix y'ahuixpy anajty mina Pablo y'ocmeeñmöyii, e huin'it anajty najtzmazihua'ñ. Paady anajty janam jadozyc nicxy yajhuoyii, e miid miydägy anajty. ²⁷Mejtz jimijt jadu'n yjajty, huin'it Félix ygobernadorbidzimy. Chi Porcio Festo ygobernadortigiyy ma Félix anajty ytuñ. Co Félix anajty nayyajhui'ma'ñyii ooy miid je judíojäy ajcxy, paady ixmajch Pablo mach.

Pablo ma Festo yhuinduu

25 Jadu'n yjajty co Festo anajty ti ygobernador tigiy, chi codugiig xii choñ Cesarea, ypättigiyy Jerusalén. ²E jim Jerusalén je teedy mjtungmiidpi etz nijjëjity huinmij'anactijc jactimxiy Pablo ma Festo. ³Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ögaangixy tü'am. ⁴Chi Festo y'adzooy co Pablo cuend'aty anajty y'ity Cesarea, e je' anajty nicxa'ñ janch tim tzojc jim. ⁵Chi ajcxy nimay:

—Jëbi nijjëjity miich ajcxy mdungmiidpidijc etz huinmij'anactijc quipxy nixibich miid iich. Pen ti je Pablo ytundigooy jëbi miich ajcxy mxiy jim Cesarea.

⁶Festo jëyi jim y'ijty tuctujc xii taxtujc xii Jerusalén, chi yhuimbijtni Cesarea. Com jabom ñicxy ma tiydundac, huin'it capxyñiguejxy Pablo co huen yajminyii. ⁷Co Pablo ytigiyy ma tiydundac, chi mic'amy je judíojäy ajcxy yjübigiydäy huidi anajty

ti choongixy jim Jerusalén. Chi ajcxy oxyy Pablo co mij anajty ti ytundigoy. E ca' ni ti tiy'ajt ajcxy miguëxigy. ⁸Chi Pablo ñaygogapxi yminañ:

—Hich ca' ni ti ndundigooyich, ni ngamidundigooyich yi judío jäy ycötújcín, etz ni ngamidundigooyich Dios ytijc, etz ni ngamidundigooyich je mij'ane'mbi jim Roma.

⁹Co Festo anajty jatytimaycömaya'ñ ma judíojäy ajcxy, chi y'amidooy Pablo:

—¿Nej mnicxam jim Jerusalén, jigix jim ndiydunípiy?

¹⁰Chi Pablo y'adzooy:

—Cha iich cham ma je cötujctac huidi je romano codung y'ane'myb e ma jëbi yajtiyduñich. Yajxon miich mnejhuüy co ca' ti ti ndundigooyich ma yi judíojäy ajcxy. ¹¹Pen ti ndundigooyich huidi jëbi col'ögüyich, ca' nminá'nibich co iich ca' n'öga'ñ. Pen ca' ji ni ti tiy'ajt jadu'n nej yi' ajcxy ti xyxüyich, ni pin cötújcín camiidity nicxy xycüyeyich ma yi' ajcxy. Hich nbijctzoy co nyajtiyduñich ma César, je emperador, jim Roma.

¹²Co Festo capxyöyday miid ymidungmiidpi, chi nimay Pablo:

—Pen miich jadu'n minamb co jim nicxy myajtiyduna'ñ ma je César ycötujctac, nguexipyich miich jim. Miich ti mbijctzoy co je emperador xytiyduna'ñ. Pis jim mnicxipy miich.

Pablo ma je rey Agripa yhuinduu

¹³Chi yi xii tiempo ñajtninixüyñi co je rey Agripa etz Berenice ycidacy Cesarea,

cogapxihua'ñ anajty Festo. ¹⁴Co ajcxy jim yhuäcxijpy canaag xii, chi Festo yajmiidmiydacy je rey Agripa je Pablo ayo'n, e nimay:

—Ji tüg yëydijc huidi Félix y'ixmajtz mach. ¹⁵Co n'oyich jim Jerusalén, chi je teedy mijtungmiidpi etz judío mij'anäctijc xymixüyich, nibijctzohuüy co Pablo nyaj'ögibich. ¹⁶Chi n'adzooyich co romanojäy ca' cötújcín jadu'n miidity nicxy yaj'ögy yi machyjäy ma ca'ni ñayhuindináayigixy miid je huidi miid ñayxüyii, jigix ñaygogapxiyb nej anajty ti yxüyii.

¹⁷Paady co je judíojäy ajcxy y'oy ya ca' nigoob tiempo nyajtiigooyich com jabom nnicxich ma ngötujctaacich, e nni'ane'mdiüyich co huen yajmiñyii je Pablo. ¹⁸Co ajcxy ñayguëxi'ci, je huidi anajty ti xüy, ca' jac ni ti ayuc anajty ajcxy miidity jadu'n nej iich anajty ti ndiyich. ¹⁹Jëyi janchtiy co jadu'n anajty yminaangixy co Pablo ti ytundigooy ma yi' ajcxy ycostumbre huinma'ñ, etz Pablo capxhuäcxy co je Jesús huidi o'c, juugyñi je'. ²⁰Com iich ca' nnejhuüy nej ndunipich miid jada jadu'mbi huinma'ñ, chi n'amidooyich Pablo, pen nicxam anajty Jerusalén, jigix jim ngatiyduñich miid jadayaabi ycipi. ²¹Pablo ci'm minañ co nigü oy yajtiydunipy jim ma je emperador huidi ane'm jim Roma. Chi nni'ane'mdiüyich co huen jacmach'iñäy, ixti cooni nguexipyich jim Roma ma César.

²²Chi je rey Agripa yminañ:

—Nañ ooy iich nja'amido'idaani Pablo y'ayuc.

Chi Festo y'adzooy:

—Jabom jëbi ayuc midohuipy.

²³Com jabom miiñ Agripa etz Berenice miid mayjäy etz xuuxpidijc, chi ytigiïy ajcxy ma tiydundac miid je soldado huindzin ajcxy, etz huinmij'anäctijc. Chi Festo capxyñiguejxy co huen Pablo nicxy yajtzonyii. ²⁴Chi Festo yminañ:

—Rey Agripa, etz tüg'óciy mij'anäctijc huindzindijc huidi ya ti mnayyöymújcigixy miid iich ajcxy, cha je' je yëydijc huidi oy yi judíojäy ti yxíyii ma iich. Xymixíyich jim Jerusalén, e nañ ya Cesarea, e jatyimyminaangixy co jëbi y'ögy. ²⁵Ca' ti ti tundigooy, paady ca' huaad nyaj'ögyich. Com ti ci'm ñayñibijctzohuüyii co jim yajtiyduna'n ma je emperador jim Roma, paady ti n'a'ixíyich co nguexaañich. ²⁶E com ca' ni ti tiy'ajt nej nijayihuibich nhuindzinich, je emperador César, miid yi' ycixpi, paady nyajmiinich ma miich ajcxy, etz tim jayijp ma miich mhuinduu, rey Agripa, jigix jëbi m'amidohuipy e nmiid'idipyich ti ii njáayibich. ²⁷Ca' jadu'n y'óyity nicxy nguexyich tüg machyjäy jim ma je mij'ane'mbi e ca' ni ti tiy'ajt miidity nej ti yxiyii.

Pablo nimiydägy nej anajty jjatyin ma je rey Agripa

26 Chi je rey Agripa nimay Pablo:

—Jëbi ci'm mnayñimiydägyii.

Chi Pablo yujcxajy yci' e ytigiïy nayñigapxtuutip, yminañ:

²—Jotcujc nayjihuiyijich, co jëbi nmiydägyich ma miich, rey Agripa, jigix nayñigapxtüdiïybich tüg'óciy

jadu'n nej judío jäy ti yxíyich.

³Com miich mnejhuiuïyb vajxon nej judíojäy ajcxy yhuinma'n miidity, etz tijaty tzip yi' ajcxy ymiid, etz jadu'n nej yi' ajcxy y'ixpíjcin oy ñay'ijxquíipxigixy.

Pablo nigapxy nej anajty chinäy ma anajty ca'ni yjothuimbity

⁴Tüg'óciy judíojäy ñejhuiuïyb nej ti ndzinäyich ma yi' ajcxy jim ma nnaaxjotich etz jim Jerusalén maabi nyecpidzimyich.

⁵E yi' ajcxy ñejhuiuïyb nañ jadu'n, e jëbi nigapxcixy jadu'n nej ti nyujcyecpi'atyich. Hue' naydijyijich anajty fariseojäy, je tügpicpyi jäy huidi mictägy je judío jäy ycostumbre etz ycötújcin payöyip. ⁶E jadachambi xytidyduñich miid co njijp'ixyich co Dios yajjugypiga'n yi jäy ajcxy tiibi y'o'ccixy, jadu'n nej Dios yajnimay nmij'ap nmijteedy jecy'ajty. ⁷Je majmetzpicypí Israel ymang y'ap y'oc y'ahuixpy mina Dios cuyduna'n nej anajty ti yajnimäyii je' ajcxy ymij'ap ymijteedy. Paady ajcxy Dios ojadaty huindzigiy xiim tzuum. Miich, rey Agripa, nmibicyich co Dios yajjugypigipy je jäy tiibi y'öccixy, paady ycixpi yi judíojäy yxíyich. ⁸¿Na'amy co ca' miich ajcxy mibiga'n co jëbi Dios yajjugypicy je tiibi ajcxy y'ögy?

Nej anajty Pablo jayijp'aty mibijcpidijc ixhuidity pahuidity

⁹Jecyip iich hue' ndijyich oy nduñich co anajty ndzachmidzip'adyijich je Jesús je Nazaretpi. ¹⁰E jadu'n nduñich jim Jerusalén. Miid je teedy

mijtungmiidpi ycötújcín nbidaacich Jesús yjáy may pujxtigoty. E co ajcxy yaj'ocy, nañ nìgapxpejt ìich co huen yaj'öccixy. ¹¹E nnicxyich anajty majaty judío ñaymujctac jim ndzaachytuñich huìdi ajcxy mijpidacp anajty Jesús, jigix ajcxy y'ixmadzìpy je' ymibíjcín co Jesús je' je' je Cristo. Nìgi anajty nmijotmätcootyich ixti nbahuidijttacyich huingnaax huinggajp.

**Pablo nimiydägy jadüg'oc
nej yjothuimbijty**

¹²Miid yi jadu'mbi huinma'ñ nnicxyich anajty jim Damasco. Je teedy mijtungmiidpi anajty xyquejxpìch, e xymöyich anajty cötújcín. ¹³E tü'am, señor rey, ìich anajty nìcxy, cuje xii anajty co n'ìjxyich tügi tüicxin jacmic ca'ydi xii ytiicxin chooñ tzajpjoty, xyñigidacyich etz nañ jadu'n huìdi anajty ajcxy xymiidnicxich. ¹⁴Huin'it nidüg'öciy ìich ajcxy ngidaday, e nmidooyich tüg ayuc xymìgapxich miid hebreo y'ayuc, xyñimäyich: “Saulo, Saulo, ¿nej co chach xypahuidijttägyich? Cì'm nayajtzaachiyii jadu'n nej huaj yuub co jìjpconebìy huìdi miid ñumygumyii.” ¹⁵Huin'it n'adzooyich, nnimaayich: “¿Mbin miich Huindzin?” E je Huindzin xyñimaayich: “Ìich je' Jesús je huìdi miich mdzachpahuidijttacpy. ¹⁶Pidìg e tìnaaygugi', com ti nnayguèxìgyiijich ma miich jigix xymidunìpyich etz mgodìy'ajt'adìpy jadu'n nej cham ti nyajnimäy ti nyajnejhuìy, etz jadu'n nej jìini njacyaj'ixa'ñ njacyajnejhuìhua'ñ.

¹⁷Ìich miich nnihuänip nyajtzögìp ma yi judíojäy, etz nañ ma huìdi ca' yjudíojäyity. ìich miich jim nguejxpy ma huìdi ca' yjudíojäyity. ¹⁸Nìcx jim myajhuinjihuìiygìxy ìich ndìy'ajt, huen ixmach ajcxy yi jìbic-huinma'ñ e jadu'n ypidzimìpy ajcxy ma je mujcu' y'ané'mìgìxy, etz mijnicxpedìpy ajcxy Dios ytiy'ajt. Co ajcxy mibìgìpy mijpidägìpy ìich ndìy'ajt huin'it nmöhuibìch tìgìy dac tzajpjoty ma yi oyjäydic ity tiibi Dios yajpocyñìhuächyii.”

**Pablo cuyduñ nej anajty
ti y'ìjxmañiyin**

¹⁹Rey Agripa, jadu'n ti ngapxymidooyich huìdi n'ìjxich nmidoohuich tzoon tzajpjoty. ²⁰Jayìp ngapxhuäcxìch Dios y'ayuc jim Damasco, chi ngapxhuäcxìch jim Jerusalén etz tüg'öciy Judea ñaaxjot, etz cham ngapxhuäcxìch Dios y'ayuc ma huìdi ca' yjudíojäyity. Nyajnimäygyich huen jothuimbijtcixy, huen mibìjccixy Dios y'ayuc ytiy'ajt, etz huen yajtungìxy oyjot oyhuinma'ñ jigix ñìguèxìgìpy co ti yjothuimbijtcixy. ²¹Miid jada ycìxpi xymajchìch ajcxy je judíojäy ajcxy ma Dios ytiç, e xyaj'ögäangìxyich anajty. ²²Miid co Dios ti xypubety ti xypudìgìyich cha nyajpaadyich juugy. Ngapxhuäcxìch Dios y'ayuc ytiy'ajt ma tüg'öciy ayoobtiç etz ixpìcytiç. Tüg'öciy huìdi ngapxpyich je Dios y'ayucnajtzcaxìybi jaay jecy'ajty, etz je Moisés nañ jadu'n jaay jecy'ajty co jadu'n ytuna'ñyii yjada'ñyii. ²³Hue' yajmìna'ñ co je Cristo copìcy ayo'n tzaachypi yajnaxìpy, e y'ögìpy e huin'it

jugypigipy, e je' je' je jayijp jäy
huidi jugypigip co anajty ti y'ögy. E
yajcapxhuäcxip je ayuc ytiy'ajt ma
iich ajcxy judíojäy, etz ma huidi ca'
yjudíojäyity.

Pablo jahueeni
cayajjothuimbijty Agripa

²⁴Co Pablo jadu'n yminañ ma
anajty ñayñigapxtüdyii, chi Festo
mic minañ:

—iMlocjiyb miich Pablo! Miid je
ixpájcín niği m'ahuimbity loci.

²⁵Chi Pablo y'adzooy:

—Ca' iich nlocijiy, miich
mijtungmiidpi Festo. Yi huidi
iich ngapxyich je' je' tiy'ajtp
etz janchip. ²⁶Yi rey Agripa
ñejhuiydaayb yi' tüg'óciy jada,
paady nmiydägich aamic jotmic ma
yi' yhuinduu; com nnejhuiybich co
yi' ñejhuiydaayb jada tüg'óciy, com
canan hue' jada yajtuuñ yajmiydacy
ayüchytuum. ²⁷¿Nej mmibijcpy,
miich rey Agripa, jadu'n nej ajcxy
yminañ yi Dios y'ayuccojaaybi?
Nnejhuiybich co miich mmibicy.

²⁸Chi je rey Agripa y'adzooy,
yminañ:

—Janch tim jayinjaty jahuenjaty
miich xycayajmibicyich Jesucristo.

²⁹Chi Pablo yminañ:

—Oy yjayinjaty yjahuenjatyity ooy
mijcajee mgamibicy, chojcpy Dios
co miich mmibigipy Jesucristo etz
ñañ jadu'n tüg'óciy jäy huidi cham
xy'amidoo'jtíp iich n'ayuc. Dios
chojcpy co mmibigipy Jesucristo
jadu'n nej iich nmibicyich, jëyi
janchtiy co ca' mmach'idipy jadu'n
nej iich nmach'ityich.

³⁰Co je Pablo ymiydactay, chi
je rey etz gobernador ytinayigy

quipxyi miid Berenice etz jacjadyii
huidi anajty ajcxy jim. ³¹Chi ajcxy
ahuinguje oy capxyöygixy Pablo
ypocy, ñayñimáayigixy miñ xyipy:
—Jada yëydije ca' jada ti
tundigoy, ca' ypadyii nicxy y'ögy,
ni ca' ypadyii nicxy ymach'iñäy
pujxtigoty.

³²Chi Agripa nimay Festo:

—Jëbi ixypy nnajtzmadziyim
Pablo co ca' ci'm
ycanayñibijctzohuiiyi co huen
tiyduyiyi je emperador César jim
Roma.

Pablo yajnicxi jim Roma

27 Co ajcxy yajnihuinmayiyi
co xyquexáangixyich
jim Italia, chi Pablo yajciyejc miid
jacjadyii machyjäy ma tüg capitán
huidi anajty yxii Julio, je' huidi
nihuindzin'ajtp tügpicy soldadtije
huidi anajty yxii batallón Augusto.
²Chi iich ajcxy ndigiy ma tüg
barco huidi yhuindzin cogajpip
jim Adramitio. Je barco hue' anajty
ñicxa'n ma nijëjity barco jättac jim
Asia ñaaxjot. Chi iich ajcxy ndzooni.
Miid iich anajty ajcxy Aristarco
huidi anajty cogajpip Tesalónica jim
Macedonia. ³Com jabom iich ajcxy
nja'ty ma barco jättac jim Sidón. Jim
je Julio pa'ayoy Pablo, e ahuaatzí
ytu' co huen nicxy co'ixiy ymigügtije,
etz huen je' ajcxy yajcayyiyi yaj'ügyii.
⁴Co iich ajcxy ndzoon jim Sidón,
chi je naax mejy'agujcpi yhu'i'mni
anajty'amy huidi yxii Chipre, miid
co je poj anajty jijpcobojy je barco.
⁵Chi je barco huinyöyñajxy je Cilicia
ñaaxjot etz Panfilia ñaaxjot, oy
njädyich ajcxy jim Mira, tüg cajp jim
Licia ñaaxjot.

⁶Jim je capitán paty tüg Alejandria ybarco hue' anajty ñicxy jim Italia. Chi je capitán iich ajcxy xyajbarcotigiïy.
⁷Canaag xii iich nyöy janch oñdägy, adzaach iich ajcxy nja'ty mihuingon je Gnido co anajty je poj tzach jïjpcobojïy je barco. Najx iich ajcxy mihuingon Salmón, etz njüyöy'ahuidijtyich ajcxy Creta je mejy'agujcpi naax.

⁸Adzaach iich ajcxy nja'ty ma barco jättac huïdi anajty yxii Buenos Puertos, mihuingon Lasea.

⁹Ti iich ajcxy ooy anajty nxiiðigoy, e ooy anajty ycodzigijity je barco yajyöyïi. Ti anajty je ayuuxii ñajxni, e ti mihuingon anajty je poj tuu tiempo huïdi jäy ytiïpy invierno. Paady Pablo je soldado huindzin jaccapxhuijy, ¹⁰chi Pablo yminañ:

—Huindzindijc, jadu'n nej yam codzigi' jada ooy co njacnicxim barcojoty, ca' jyecyity co nicxy ndigooyim miid barco etz miid ñidzimy etz n'o'ctaayim.

¹¹E je soldado huindzin yjacmijpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹²Com je' co je barco yjättac ca' anajty y'öyity, nicxy jim yajnaxcixy je poj tuu tiempo, chi je jacmaybi ajcxy yhuinma'ñypidacy, co jëbi barco yjacyöy, oc'ixaangixy pen yjätcixy jim Fenice ma Creta ñaaxjot. Jim ma tüg barco yjättac huïdi y'aguu najtz'ixiïyb ma xii pidzimy, e jim anajty je poj tuu tiempo yajnaxaangixy.

Je mijpoj mijtigoy ma je mejy

¹³Jadu'n yjajty co je jïinboj hueeni ypidziïmy, huin'it huinmay ajcxy co jëbi yjactüyöy je barco. Chi ajcxy yajpidigy je mij pujx huïdi barco yajtinayxiïp, e yajyöychooñ je barco. Chi ñicxy je barco mejypa' mejypa' ma Creta ñaaxjot. ¹⁴Huin'it hueeni tiempo ñajx, chi je micpoj miiñ ma tiichpoj pidzimy, huïdi jäy ytiïpy Euroclidón, jadu'n yhuimbizim, Noreste. ¹⁵Chi je micpoj yajtütigajch je barco, e com ca' anajty ndimdüyöyigixni miid je poj ycixpi, chi je micpoj iich ajcxy xyajnicxy adzip ma anajty tzocy. ¹⁶Najx iich ajcxy mihuingon tüg naax mutzpi mejy agujcpi huïdi yxii Claudia, e adzaach iich ajcxy nyujcjugujcy je mutz barco huïdi anajty miimb ixrodzïy ma je mijpi. ¹⁷Co ajcxy jugujcpidzimy je mutz barco, chi ajcxy yajtuuñ maychaay e xojtzmujcy je barco aguu. Chi ajcxy yajminajcy je huit huïdi anajty poj mic tzach ymajchyp. Je' co chigiïygixy co chimnicxiïyb je barco jim ma mejy huïdi ca' y'agomity, ma püjot huïdi yxii Sirte. Chi ajcxy ñayyejci huen poj yajnicxigixy. ¹⁸Com jabom, com ooy mic anajty je poj, chi ajcxy je chimy mejy cöjibijptaayi. ¹⁹Je midugiïg xiïbi, chi iich ajcxy nmejycöjibijptay je tungbejt huïdi yajtumyb ma je barco. ²⁰Ti anajty canaagxii ñajxni e iich ajcxy ca' ma xii madza' n'oc'ljxcixni, miid je mijpoj ycixpi huïdi anajty iich ajcxy xychachyajtüyöyp. Hue' iich ajcxy ndijcixy co ti ndigöoyigixyich, ca' ndijy iich ajcxy ndzögipy.

²¹Ti anajty xii tiempo iich ajcxy nyajnajxcixy jaygay, chi Pablo ytinayigy, nimay je jäy ajcxy:

—Yëydijctijc, co iich miich ajcxy xycacapxymido y ca' ngatzoonim jim Creta ñaaxjot, e ca' ixipy jada ayo'n yam jadu'n nbaatim.

²²Jadachambi ca' mdajcixy mmaygixy, ca' ni pin ytigoya'ñ, oy je barco yjatigoy. ²³Amygoodz je nHuindzin Dios tüg y'ángel ti ñayguëxigyii ma iich, je Dios huidi iich ngapxymidooybich, yí' ti quexy. ²⁴Je ángel ti xyñimäyich: “Ca' mdzigy, Pablo, copicy co mjatyjädi py ma je mij'ane'mbi, je César yhuinduu. Miid miich ycixpi, Dios ñihuänamy yajtzögamy tüg'ócüy huidi ji barcojoty, ca' ni tüg y'ögipy.” ²⁵Paady nayjot'amijmóoyigix, yëydijctijc, nmibijcpiych Dios co jadu'n yjada'ñ jadu'n nej yí' y'ángel ti xyñimäyich. ²⁶Ooy ycopicyity nicxy nmijpoipejtim ma tüg naax mejy agujcpi.

²⁷Majmactz xii je mic poj anajty yajyöyii je barco oyñinej jim ma je mejy huidi yxii Adria, chi mijcutz je barco yajyöybi jihui'ñybijcy co anajty ti mihuingoñ naax. ²⁸Chi ajcxy quipxy je nii jadu'ñi anajty ycicyity, e hue' ajcxy quipxy iipx xap ycicyity. Jahuengi huin'it jadüg'oc ajcxy quipxy je nii, e hue' oy quipxcixy majmox xap ycicyity. ²⁹E co anajty chigiiygixy co tijy je barco jipcobonihui py ma tzaagop, chi ajcxy pidacy nijoty midax pujx ma barco y'ijx, je huidi yxiijip anclas, janch tzigiiyb anajty ajcxy y'ahuijxcixy cooni xiimihui py.

³⁰Chi je' ajcxy huidi anajty barco

yajyöyp yhuinma'ñybaty co yquëga'ñ ameech. Chi ajcxy pidacy niihuingixy je mutz barco. Chi ajcxy ñaybidaaci jadu'n nej jihuiiy je ancla jac yajminagaangixy jim ma barco yhuinduu. ³¹Huin'it Pablo nimay je soldado huindzin etz je soldadtijc:

—Pen ca' jada hui'mgixy ma barco, ca' miich ajcxy mejy ypidzimipy.

³²Huin'it ajcxy tzujctujcy je tzaay huidi je mutz barco anajty miid ycoxochity, chi ajcxy yajcäy je mutz barco nijoty, e chi je mejy yajnicxyi.

³³Moñyi Pablo migapxy je jäy ajcxy, chi ajcxy nimay co huen huingayñajxcixy, chi Pablo yminañ:

—Cham majmactz xii ma miich ajcxy ca' mmaagixy, e ni ca' mgaaygixy m'uuccixy. ³⁴Tun may'ajt caaygixy oy jadu'ñyi, copicy jada co njatyñidzooctähuaanim, ni tüg ngöhuay ca' ytigoyaanim.

³⁵Co Pablo jadu'n yminanday, chi tüg tzajcaagy conigy, chi jayijp Dioscojuyip yajnajxy mayjäy agujc, chi tujc-huäcxy etz ytigiiy ajcxy caaybi. ³⁶Mic'amy je jäy ajcxy yjotmigi yday nidüg'ócüy, e chi ajcxy ytigiiy caaybi. ³⁷Hue' anajty ñaybaatigixy barcojoty mejtz migo'px jatugi'px majmoxctüg jäy. ³⁸Co ajcxy ycayday, chi jacniigöjibijpy je trigo, jigix huen cöminacy je barco chimy.

Chi barco tüg yquiiñ

³⁹Co yxiimiyy, chi je barco yajyöybi ca' ijxcapy je naax, e y'ijxpaty tüg it ma mejy huen ycoguegy, e jim anajty pijot. Chi ajcxy yhuinma'ñybaty co'ixaangixy

pen jēbi jim yjāty je barco. ⁴⁰Chi ajcxy tzujctujcy je tzaay huidi anajty miid yxochity je anclas, e chi anclas yhu'i'mni niijoty, huin'it ajcxy miguejiy je niigaap huidi tumb co tümöy je barco. Chi huit jadüg'oc ajcxy pidacy huidibi pojmajtzp. Chi je barco ytigiyy yöyb, tiyy ajcxy yajnicxy ma püjot. ⁴¹E chi oy minaybadyii ma anajty je meyy mejtz it oy mic ycujiin, chi oy yjēpxy püjoty. Je barco jijp oy ytigyy tätzpicy ca' huaad y'ocyücxni, e je barco ijx oy ytigiyyñ aguejthuäcxpi ymiid je meyy püjoty ymijaa. ⁴²Chi je soldado yjayaj'ögaan je machyjäy ca'ydi yqueeccixy ayaahuip. ⁴³Je soldado huindzin ca' a'ixiyy nicxy yaj'ögyii Pablo, chi nimay soldado ajcxy co huen ixmajtzcixy yi machyjäy. Chi je soldado huindzin nimay je jäy ajcxy co huen niidigiyygixy pinjaty jajt p yau. ⁴⁴E huidi ca' jajt cixy yau jaydēbi niidigiyygixy miid pu'y etz miid barco pedasi. Jadu'n ajcxy nidüg'öciy ymeyy ypidzimday.

Pablo yjädy ma tüg naax meyy'agujcpi huidibi yxii Malta

28 Co iich ajcxy niibidzimday, chi iich ajcxy nejhuiy co je naax meyy agujcpi hue' anajty yxii Malta. ²Je conaax ajcxy ooy oyjäy'ajtin tuun miid iich ajcxy, chi ajcxy yajmijiiy jiiin mij, miid co anajty ooy ytiichity, etz co anajty ooy ytuubojy. Chi xyñimay iich ajcxy co miin n'ocxäämgixyich. ³Chi Pablo ytigiyy jäycajpmujcpi, e chi pidacy jiiinjoty. Chi tüg ahua'n iyujc pidzimy, yquēgy anajty miid je anbī, chi Pablo ymajtzī ma yci'.

⁴Co je cogajp ajcxy ijxy je ahua'n iyujc ytiyyñāy ma Pablo yci', chi ajcxy ñayñimaayi miñ xyipy:

—Jadayaabi yēydijc, jäy yaj'öcpi jada. Oy ca' ti y'ögy meyyjoty, je tiydumbi tzajpjotypi ca' a'ixiyy nicxy yjactzināy.

⁵Chi Pablo yci' huinxidicxy, e jiiinjoty oy ycäy je ahua'n iyujc, e ca' Pablo ni nej yjajty. ⁶E tüg'öciy je jäy tzach'ahuijxcixy mina anajty y'ocquixigy, o mina anajty y'oc'ögy. Ti anajty ooy y'ahuijxcixy jecy; co ajcxy ijxy ca' ni nej yjaty, chi ajcxy yhuinma'n yajtigajch. Yminañ ajcxy co Pablo hue' jada' yi' tüg dios.

⁷E mihuigon anajty je Publio ytijc, je huidi nigohuajc'ajty je jimbi naax meyy'agujcpi. Je Publio xyajjättacich ajcxy, e xyajcaay xyaj'uucich iich ajcxy yajxon tugiig xii. ⁸Jadu'n yjajti co je Publio anajty yteedy ypigyyi miid tooy gohuajc etz miidity anajty ni'pypa'm. Chi Pablo oy ixxy je pa'mjäy. Chi Pablo Dios miibijctzoy, e chi ciniixajy, e yajtzoooy. ⁹Miid jadaay miñ ajcxy nijjity pa'mjäy huidi anajty ajcxy tzinaayb ma je naax meyy'agujcpi e chi ajcxy chooctäy. ¹⁰Miid jada yci xipi nyajcömay iich ajcxy, e nyajmooyich iich ajcxy tijaty huidi iich ajcxy nidüyöyipy barcojoty.

Chi Pablo oy yjädy jim Roma

¹¹Tugiig po' iich ajcxy anajty ti ni'ljtni jim. Chi iich ajcxy nbarcotigiyy ma tüg barco huidi anajty je tuuboj tiempo ti yajnaxy jim Malta. E je barco capitán jim anajty ycogajpity Alejandría. E je barco ymiid anajty ahuinax huidi anajty yxii Cástor etz Pólux huidi

ajcxy dios'ajtpy. ¹²Chi iich ajcxy oy njäty ma je barco jättac huidi anajty yxii Siracusa. E jim iich ajcxy nhui'miïy tugiig xii. ¹³Ndzoñich ajcxy Siracusa barcojoty, nicxy iich ajcxy mejypa' mejypa', ixti nja'tyich ajcxy jim Regio. Com jabom oy ypidzimy jünboj, chi co maax oy nja'ty iich ajcxy Puteoli. ¹⁴E jim iich ajcxy nbaaty nijëjty jäy huidi anajty mijpidaacp Jesús. Je' ajcxy xycohuaniiyich co iich ajcxy jim hui'mipy tüg seamaan. Chi iich ajcxy jadüg'oc ndzooñ, nnicxyich ajcxy jim Roma. ¹⁵Je mibijcpidijc ajcxy huidi anajty jim Roma ymidou ajcxy ayuc co iich anajty ajcxy jim nicxy, chi ajcxy chooñ nijëjty oy xyjijpcobadiiygixyich ma je cajp mercado miid huidi anajty yxii Foro de Apio. Jacjadyii mibijcpidijc oy xyjijpcobadiyich ma tüg jättac huidi anajty yxii, Tres Tabernas. Co Pablo jijpcolixiiy je mibijcpidijc ajcxy, chi Dioscojuyip yajnaxy etz ñayjihuiiyi janch jotucj. ¹⁶Co iich ajcxy nja'ty jim Roma, chi je soldado huindzin cïeyjcy je machyjäy ma je comandante, per a'ixiiyb co Pablo tzinäy ahuingujc ma tüg pijctzoydijc, jëyi anajty tüg soldado ycuend'adyii.

**Chi Pablo Dios y'ayuc
capxhuäcxi jim Roma**

¹⁷Tugiig xii maabi Pablo anajty yjäty jim Roma co capxyñiguejxy je judfo huinmij'anäctijc huidi anajty ajcxy tzinaayb jim Roma. E co ajcxy ñaymujci, chi Pablo yminañ:

—Migügtijc ajcxy, oy iich ca' ti ndundigooyich miidi judfo jäy ajcxy etz miid ajt nmij'ap nmijteedy

ycötújcïn, chi je judfojäy ajcxy xymajchich etz xycïeyjcih ma romano tungmiidpi jim Jerusalén.

¹⁸Co je romano tungmiidpi ajcxy xy'amidooyich, huin'it ajcxy xyjanajtzmazdihuaañich, ca' ti ajcxy paaty ma iich huidi ajcxy xyajco'ögihuibich. ¹⁹Co je judfojäy yjotmätcoty ajcxy, ca' ajcxy a'ixiiy co nyajnajtzmazdihuibich, chi nayñibijctzohuiiyich co nyajtiydunipyich ma je mij'ane'mbi ya Roma, oy iich ca' ti xihuïn nmiidity miid iich nmigonaax nmigogajpich. ²⁰Paady ti ngapxyñiguejxcixy co nyajmiidmiydäga'n ajcxy tigix co nmach'ityich. Miid co iich ajt n'ahuixim co Dios nihuäna'n yajnödzöga'n yi Israel jäy etz yajjugypiga'n je jäy tiibi y'öccixy. Paady jadachambi nyajpaadyich mach.

²¹Chi ajcxy y'adzooy:

—Ca'ni iich ajcxy ni ti necy xyñijäty huidi tzoomb jim Judea miid miich ycixpi. E ni tüg ajt nmigügtijc ca' jibic xyñimiydägy.

²²Nja'amido'idaamyich jadu'n nej miich mmiydägy, com nnejhuiybich co huen yma'ámyity jäy ymidzip'ajty je jemybi y'ijxpjcin.

²³Chi tüg xii ajcxy agapxtujcy.

Co oy paady mina anajty ti agapxtujccixy, chi mayjäy ñayyöymujci ma je Pablo anajty jättac miidity. Jopy ajcxy yajtzondacy capxii miydägi ixti ycootztzuu'iiy, jadu'n Pablo tzachyajnimaaygixy je Dios y'ayuc nej Dios yhuinma'n miidity. E yajjothuimbidaangixy anajty ma je Jesús miid co capxticxy je Moisés

ycötujcïn nej anajty yjaybetyity,
 etz jacjadyii ayuc cojaaybi ñecy.
²⁴Nijëjity cöbije ajcxy nej Pablo
 anajty ymïna'ñ, etz nijëjity ca' ajcxy
 mïbijcy. ²⁵Co ca' anajty ajcxy miñ
 xyipy yajtügiy yhuinma'ñ, chi
 ajcxy ixu ca'ixu yöychóongixni. Chi
 Pablo ymïnañ:

—Tiytudägy je Espíritu Santo
 nïmay je nmij'ap nmijteedy ajt
 co yajcapxy je profeta Isaías co
 ymïnañ:

²⁶Nicx nïma' je jäy ajcxy: Miich
 ajcxy oy mjamïdohuipy
 n'ayucich, per ca' ajcxy
 mhuinjihuïhuip; oy
 mjahuindïxcixipy, e ca'
 ajcxy mhuinjihuïhuipy.

²⁷Com jada jäy ajcxy hue'
 yjot'ahuimbijtcixy janch juuñ,
 e ymïdoogixy oyñinej, jadu'n
 nej jihuïy yhuimbïdz'ijtcixy,
 e ni ca' y'oc'ïjxcixy miid
 yhuiin e ni ca' ocmïdoogixy

miid yta'tz'ac, ni ca'
 huinjihuïiygixy miid
 yjot yhuinma'ñ, ni ca'
 minipy ajcxy ma iich jigix
 myajtzögibich.

²⁸Nejhuïiygixy miich ajcxy co
 jadachambi etz jacnicxpi xii
 tiempo Dios y'ahuaniiyb y'ayuc
 ytiy'ajt nej jëbi jäy y'alma ajcxy
 yajñdzögipy ma je jäy ajcxy
 huïdi ca' yjudójäyity, e je' ajcxy
 y'amïdo'idipy.

²⁹Co Pablo jadu'n nïmay
 ajcxy, chi ajcxy ñicxtáaygixni
 chach ñayhuin'iïbéjtigixy
 ñayhuingapxpéjtigixy miñ xyipy.

³⁰Pablo mejtz jimijt jim chinay
 ma je pijctzoydijc jim Roma, e
 yajxon xiic'adzoy capx'adzoy pin
 miñ ycogapxiy. ³¹Janch agujc
 jotcujc anajty capxhuäcxy je
 Dios y'ané'min, e yaj'ixpicy je
 Huindzin Jesús ytiy'ajt, e ni pin ma
 ycapx'adugyii.

ROMANOS

Yi Neczy Huidi San Pablo Yajnieuejx Je Mibijcpidijc Jim Roma

1 Hich Pablo tumbich ma Jesucristo ytung. Jesucristo ti xyajñibicyich co nduna'ñich ma yi' ytung quipxy miid yi' y'apóstol ajcxy. Ti xypidägyich ma jada tung tügjijp co ngapxhuäcxibich Dios y'ayuc ytiy'ajt oybi.

²Dios jecy'ajty y'ayuc yajhui'my cojay ma yi' y'ayucnajtzcaxiyybi ñecy co quexa'ñ anajty je Cristo ya naaxhuiñ. ³Ngapxhuäcxich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinicx paty ma ytaj. E yi' ytaj je rey David je' ymij'ap'ajti ymijteedy'ajti. ⁴Per Jesucristo ti paady ma Dios yi' yjihui'ñ ymic'ajt. Co Dios yajjugypijcy y'ung ma anajty ti y'ögy miid yjihui'ñ ymic'ajt, chi ti yajnejhuüy anajty je naaxhuiñyäjy co Jesucristo hue' je' Dios y'ung, huidibi miid huädz yjot huädz yhuinma'ñ, etz nañ ymiid Dios yjihui'ñ ymic'ajt. ⁵Co Dios yajjugypijcy Jesucristo ma anajty ti y'ögy, chi mijmay'ajt tuñ miid iich ajt ycixpi. E nañ miid Jesucristo ycixpi Dios ti xyajñibicyich co

ngapxhuäcxibich yi' y'ayuc ytiy'ajt ma yi' mayjäy ajcxy ma tüg'óciy naax cajp, jigix jëbi mayjäy mibijccixy e nañ capxymidoogixy Jesucristo. ⁶E miich ajcxy huidibi tzinaayb jim ma yi' cajp huidibi xiijip Roma, nañ jadu'n Dios miich ajcxy ti xyhuin'ijxcixy jëbi ajcxy Jesucristo xyjäy'adyii.

⁷Jada necy nguejxypich ma miich ajcxy nidüg'óciy huidibi jim yajpatcixp ma yi' cajp huidibi xijip Roma. Dios miich xychojccixp xyjihuiygixp, e nañ Dios ti xyhuin'ijxcixy jaydëbi yi' xyjäy'adyii, etz nañ jaydëbi mdzinaaygixy miid huädz mjot huädz mhuinma'ñ. Huen iich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz nañ xyajjotcugihuip ajcxy.

**Pablo nicxy mibijcpidijc
cogapxihua'ñ jim Roma**

⁸Tim jayijp nyajnajxpich jäygidaacin ma Dios, miid Jesucristo yxii, co miich ajcxy ti mmibijccixy Jesucristo. Mayjäy

ma nidüg'óciy naax cajp ti nejhuiiygixy jadu'n nej miich ajcxy ti mmijpidaaccixy Jesucristo. ⁹Hich tumbich cixyjot huinijot ma Dios ytung, co ngapxhuäcxyich Dios y'ayuc ytiy'ajt miid Jesucristo ycixpi. Dios yí' tiy'ajt yegip jadu'n nej jabom jabom Dios nmibijctzooyich miid miich ajcxy ycixpi. ¹⁰Dios nmibijctzooybich pen yí' jadu'n tzojcp co jébi nnicxyich cham tiempo jim ma miich ajcxy myajpaady. Canaag'oc ñich miich ajcxy nícxy nja'ixaangixy, e ca' y'oyíy nej nícxibich. ¹¹Ooy njanijot'atyich co ñich miich ajcxy nícxy n'ixaangixy, jaydëbi ngapxhuäcxybich Dios y'ayuc ma miich ajcxy miid Dios yjihu'iñ ymic'ajt, e nañ ngapxhuäcxybich Dios y'ayuc ma miich ajcxy jaydëbi tiydudägy mmibigipy ajcxy Jesucristo. ¹²Pen oyíyib nej nícxibich ma miich ajcxy myajpaady, chi jébi njotcugihuibyich co anajty n'ixyich nej miich ajcxy mibijccixy Jesucristo, e nañ jaydëbi njotcugihuipy miich ajcxy co anajty m'ijxcixy nej ñich nmibicyich Jesucristo, e jadu'n nayyajjotcugíyim miñ xyipy. ¹³Ndzojcpich co miich ajcxy mnejhuíhuipy co canaag'oc ti njapidägyich nhuinma'ñich co anajty nnicxa'ñich ma miich ajcxy myajpaady, e ca' y'oyíy nej nícxybyich. Njijp'ijxypich co oyíhuip jadachambi tiempo jadu'n nej jébi nnícxybyich jim ma miich ajcxy. Com njacyaj'ixpigaamybich miich ajcxy, e nañ njacyajmibigaamybich

ajcxy Dios y'ayuc. Tim jadu'n nej nduñich canaag agajp ma chinaaygixy yi jacjadyi jáy huidibi ajcxy ca' yjudíojäyity. ¹⁴Dios jadu'n xyajñibijcich jada tung, paady copicy co ngapxhuäcxybich yí' y'ayuc ma tüg'óciy jáy, etz majaty naax cajp. Ngapxhuäcxyamybich Dios y'ayuc ma yi jáy ajcxy huidibi griego ayuc cápxcixp, etz ñan ma yi jáy ajcxy huidibi ca' griego y'ayuc capxcixy. Ngapxhuäcxyamybich Dios y'ayuc ma yi ixpicy jáy ajcxy, etz nañ ma yi jáy ajcxy huidibi ca' y'ixpicyity. ¹⁵Paady ycixpi ooy ndzachcapxhuäcxa'ñich Dios y'ayuc ma miich ajcxy huidibi yajpatp jim Roma nañ jadu'n.

Je ayuc tiy'ajt oybi

¹⁶Ca' nmidzo'yduunyijich Cristo y'ayuc ytiy'ajt. Com je' jada je oybi ayuc huidibi tsoon ma Dios, ymiid yí' Dios ymic'ajt jigix jébi tüg'óciy jáy ajcxy paadipy pocy huinmeecxin, pinjaty cöbigaamb Cristo y'ayuc. Tim jayijp ti ngapxhuäcxy Jesucristo y'ayuc ytiy'ajt ma yi judíojäy ajcxy, e jac'axam ma yi huidibi ajcxy ca' yjudíojäyity. ¹⁷Jesucristo ytiy'ajt xyajnejhuíyim co nmibijcim co Cristo ti jöch ajt nbocy etz nxíhuin, chi Dios xycöbiganim jadu'n nejjihuíy tudägyjäy. Ca' ji jadüg huinma'ñ nej Dios jébi xycöbójcim jadu'n nej jihuíy tudägyjäy. Com jadu'n jaybety y'ity ma Dios ñecy ma jadu'n yminañ: “Pinjaty tudägy'ajtin ti paady miid co ti mijpidägy Dios y'ayuc, hue' je' tznähuip, ca' yjugy'ajtin ycixipy ytiogoyipy.”

Je naaxhuiñjyä ajcxy ypocy

¹⁸Copicy nbaatim tudägy'ajtin ma Dios, com je Dios huidibi tzinaayb tzajpjoty ti xyajnejhuñiyim co yi' tzaachytuna'n mictägy tüg'óciy jäy ajcxy huidibi midundigooyb yi' ytiy'ajt, tüg'óciy huidijaty jibic huinma'n ymiid, tüg'óciy yi' ajcxy huidibi yajtigooyb Dios ytiy'ajt miid je jibicpi huidibi ajcxy ytumyb. ¹⁹Com yi jäy ajcxy huidibi jibicjot jibic-huinma'n miid, y'ijxpy ñejhuñiyb ajcxy Dios ytiy'ajt, com Dios ti pidägy yi' ytiy'ajt ma yi' ajcxy yjot yhuinma'n. ²⁰Ñejhuñiyb jäy ajcxy Dios ytiy'ajt, com mabaad oga'n Dios yajcojy naaxhuiñybi ixti chambaad, quëx'icp ya naaxhuiñ Dios ymic'ajt y'ijxpejt, oy ca' pin Dios ixy, huidibi Dios ti cojy ti macxy yejcpy ijxpejt co Dios yjiijity, etz Dios ymic'ajt huinixii huinitiempo ijtp yi', ca' ycixipy ytigoyipy nimina. Co anajty Dios tzaachytuna'n yi pocyjäy ajcxy, ca' ajcxy ni ti ayuc miid huaad adzohuimbidiq Dios miid ajcxy ypocy ycixpi. ²¹Com ñejhuñiyb ajcxy co ji Dios yajpaady, e ca' ajcxy ojadajtcixy ca' ajcxy huindzigiigixy Dios. E nañ ni ca' ajcxy yajnaxy Dioscojuyip ma Dios. E nañ jadu'n ajcxy ñaybidáacigixy amij agix, yhuinma'n ixtaaygixy huidibi ca' ytiy'ajtity. Yajtigooyi ajcxy Dios ytiy'ajt ma ajcxy yjot yhuinma'n, e nañ miid'ajtcixy tzuuhuinma'n. ²²Yi jadu'mbi jäy ajcxy hue' yhuinma'n pidaaccixy co ajcxy ooy ycohuinma'nity, co ajcxy ooy y'ixpicity, e ca' yjanchity, tzuu huinma'n

ajcxy ymiid. ²³Ma yjapadyii ojadajtcixipy huindzigiigixipy Dios huidibi ymic'ajtin y'oy'ajtin ca' ycixipy ytigoyipy nimina. Chi ajcxy yajtigach yjot yhuinma'n, e huindzigiigixy jäy y'ahuinax e jäy ajcxy yjugy'ajtin etz y'oy'ajtin cixaamb tigoyaamb. Ixti mijpidaaccixy nañ jadu'n joon y'ahuinax, iyujc y'ahuinax etz tza'n y'ahuinax.

²⁴Co jäy ajcxy jadu'n ytundigoy, paady Dios ñajtz'ixiiyim ajcxy, huen tundigooygixy nej anajty ci'm jibichuinma'n nijot'ajtcixy. Ñaymidundigóoyigixy ñinicx miñ xyipy huidibi janch oy midzo'yduuni. ²⁵Ma yjapadyii ixipy mijpidaaccixy je tiy'ajt tiydudägy'icp nej Dios ti yecy, huin'it ajcxy mijpidaaccixy anii huidijaty jäy ti cojy ti macxy. Ma yjapadyii ixipy huindzigiigixy Dios, huidibi ci'm ti yajcojtäy tüg'óciy tijaty ji yajpaatp, huin'it ajcxy huindzigiigixy jäy y'ahuinax joon y'ahuinax, etz iyujc y'ahuinax huidijaty ca' ti mic'ajt miidity. Copicy n'ojadajtim ngömaayim Dios huinixii huinitiempo. Amén.

²⁶Miid co jäy ajcxy tzachhuindzigiigixy jäy y'ahuinax etz jactijaty ahuinax, paady ycixpi Dios ajcxy ñajtz'ixiyii, chi ajcxy tungixy yi jibic-huinma'n huidibi ci'm nijot'ajtcixy huidibi oy ymidzo'yduuni. Töxyjäy ajcxy ma yjapadyii chináaygixipy tudägy miid ñäy, chi ajcxy ñaymiidtzináayigixy e ñaymiidtundigóoyigixy actöxyjäydijc. ²⁷Yëydijctijc ajcxy nañ jadu'n ñaymiidtundigóoyigixy

miñ xyipy. Ñaymiiddzináayigixy ma yjapadyii iyxipy chinaaygixy miid töxyjäy ajcxy, huin'it ytundigooygixy ma Dios ytiy'ajt. Cí'm nijot'ajtcixy jibic-huinma'ñ huidibi oymidzo'yduuni, ypátcixipy ma ajcxy ñinícx je tzaachypi huidibi Dios ypidacpy miid yi' ajcxy ypocy ycixpi.

²⁸Co yi jäy ajcxy jadu'n cí'm yhuinma'ñ ti pidaaccixy co ca' yajmij'ada'ñ Dios, paady ycixpi Dios ñajtz'ixiyii ajcxy. Huen tím tungixy huidibi ajcxy cí'm ñijot'ajtpy, huidibi Dios ca' jäygidägy. ²⁹Jäy ajcxy ooy mij jibic-huinma'ñ canaagnax nijot'ajtcixy; yëydijctijc ooy ajcxy jibic-huinma'ñ tungixy; ooy ajcxy migapxtigoy töxyjäy ajcxy; ooy ajcxy adzocjccixy comeen'ajtin; ooy mi'ljxtinaaygixy ymigügtijc; ca' ajcxy ymigüg ixaangixy; ooy ajcxy yjäyay'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymigüg huin'ingixy; ooy ajcxy ypiitzcapxcixy; ca'p ajcxy ymigüg ixaangixy. ³⁰Jäy ajcxy ooy nigapxy ni'ojiy ymigügtijc; ca' ajcxy ixaangixy Dios; ca' ti jäygidaaaccixy; ooy ajcxy amij agix ñayjihuiiyigixy; ooy ajcxy cí'm ñaygömaayigixy; ooy ajcxy cojy macxy jibic-huinma'ñ, ca' ajcxy capxymidoogixy ytaj yteedy. ³¹Jäy ajcxy ca' y'ayuc-huinjihuiiyigixy; ca' ajcxy cuydungixy yci'm'ayuc; ca' ajcxy ni pin tzojccixy jihuiiyigixy; ca' ajcxy ni pin pa'ayoogixy. ³²Jadayaabi jäy ajcxy ñejhuiyb co Dios ti cojy ti macxy ycötujcin co pinjaty tundigooyb jadu'n miid Dios ytiy'ajt, tigooyip ajcxy yjugy'ajtin. Oy

iyxipy yi jäy ajcxy janejhuiiyigixy co padaangixy y'o'cin, huin'it ajcxy jactimtungixy jibic-huinma'ñ, e nañ jadu'n jotcuje ajcxy co jac pinjaty jibic-huinma'ñ tungixy.

Dios tiydumb jadu'n nej yi' tzocy

2 Paady co miich migüg m'ix'ixy mba'ixy ti ytumyb, ti migüg ycapxyp ti anajty pocy mnaymöyii, oy iyxipy ypinjäy ñejpyjäyity. Miich ooy ti pocy m'ixy ma huing jäy, e nañ jadu'n miich ooy mij mdundigoy, tím jadu'n nej yi' ajcxy ytundigooygixy. ²Nejhuiyim co Dios tudägy ytuñ co tzaachytuñ tüg'óciy pinjaty tundigooyb. ³E miich co migüg m'ix'ixy mba'ixy ti ytumyb ti migüg ycapxyp, nañ jadu'n miich Dios xychaachtuna'ñ. ¿Nej mdiy mdzögip co anajty Dios xytiyduna'ñ? ⁴¿Nej ca' mjäygidägy nej Dios mij ooy may'ajt oy'ajt ti tuñ miid miich, nej ooy mij ti xypa'ayoy, mij ti xymimecxtucy? ¿Nej ca' mnejhuüy co Dios mij ooy xypa'ayoy xymimecxtucy, jigix mjothuimbidity nej mdundigoy ma Dios ytiy'ajt? ⁵Miid co ooy mjothuunüty mgöjuunüty, ca' ajcxy mjothuimbida'ñ, ca' ajcxy m'ixmadza'ñ nej ajcxy mdundigooygixy. Paady ycixpi Dios huidibi tudägy tumb nigü miich yi' ooy mij xychaachtuna'ñ co anajty xii tiempo ycixy ytigoy, e Dios chaachtunamyb jäy ajcxy miid ypocy ycixpi. ⁶Co anajty Dios tiyduñ yi naaxhuin jäy, chi yajnigidagihua'ñ nidüg nidüg nej anajty ti chinäy. ⁷Nijëjity jäy ajcxy oyjot oyhuinma'ñ tungixy jabom jabom, yjijp'ijxpy ajcxy

co Dios oybi ymöhuaanigixy, nañ yjijp'ijxpy ajcxy co Dios ycömayiib, yjijp'ijxyp ajcxy yjugy'ajtin huidibi ca' ycixipy ytigoyipy nimina. Yi jadu'mbi jäy Dios ymöhuaamyb jugy'ajtin huidibi ca' ycixipy ytigoyipy nimina. ⁸Per Dios chaachytunamyb mijcajee yi jäy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy tumb jibic-huinma'n. ⁹Ayo'n tzaachypi ypadamyb tüg'óciy jäy ajcxy huidibi jibic-huinma'n ti tuñ. Nañ jadu'n miich judíojäy ajcxy tim jayijp mbadaangixy tzaachypi, pen mdundigooygixp, e chiini yi jacjadyii jäy padaangixy tzaachypi, pen tundigooygixp. ¹⁰Tüg'óciy pinjaty oyjot oyhuinma'n tungixp, Dios ymöhuaamyb yi' ajcxy oy'ajtin, nañ cömayaanip yi' ajcxy Dios, etz nañ yajjotcugihuiib ajcxy. Tim jayijp yi judíojäy pada'n ajcxy oybi, etz jac'axam yi jacjadyii jäy ajcxy.

¹¹Dios ca' tiyduna'n jäy ajcxy huin'ijxpety, quipxyjaty tiyduna'n nidüg'óciy jäy ajcxy. ¹²Nidüg'óciy jäy ajcxy huidibi tundigooygixp, Dios yajtigoyaanip ajcxy yjugy'ajtin. Yi jäy ajcxy huidibi ca' miidity Dios ycötujcin huidibi cojaayip, Dios yajpocycähuaanip ajcxy, com ymiid ajcxy Dios ytiy'ajt ma yjot yhuinma'n. Yi jäy ajcxy huidibi miid Dios ycötujcin cojay, Dios yajpocycähuaanip ajcxy miid yi' ycötujcin huidibi cojaayip. ¹³Yi jäy ajcxy huidibi nigoob amido'ijtp co yajcapxy Dios ycötujcin, e ca' ycapxymidoogixy, ca' ycöbigan'yii Dios jadu'n nej jihuüy ytudägyjäyity. Yi jäy ajcxy huidibi capxymidoob

Dios ycötujcin, Dios cöbigaanip co ajcxy ytudägyjäyity. ¹⁴Yi jäy ajcxy huidibi ca' miidity Dios ycötujcin huidibi cojayip, co ajcxy nijot'ajtcixy oyjot oyhuinma'n jadu'n nej Dios tzocy, jadu'n nipaady nej jihuüy ajcxy miidity Dios ycötujcin. ¹⁵Co je jäy ajcxy oyjot oyhuinma'n tungixy, huin'it yajniguëxiccixy co ajcxy ymiid Dios ycötujcin ma ajcxy yjot yhuinma'n. E co paatcixy jibic jot jibic-huinma'n, huin'it jibic ñayjihuiiyigixy. E co patcixy oyjot oyhuinma'n, huin'it ooy oy ñayjihuiiyigixy. ¹⁶Jada je'du'n je jemybi oybi ayuc huidibi ngapxhuäcxypich co miinip je xii je tiempo co Jesucristo, miid Dios ycötujcin, tiydunip tüg'óciy jäy ajcxy nej anajty yjot yhuinma'n ajcxy miidity, tüg'óciy pinjaty ti tuñ ayüch ameech tijaty.

Je Dios ycötujcin huidibi Moisés yjay jecy'ajty

¹⁷Miich ajcxy huidibi minamb co mjudíojäyity, miich ajcxy mmijpidaaccixyp Dios ycötujcin, je jecyip huidibi jaybetyip. Miich ajcxy mnyagömáayigixy co miich ajcxy Dios xyjäy'adyii. ¹⁸Miich ajcxy mnejhuiyb nej Dios tzocy nej huaad mjäy'ajtcixy. E nañ ti m'ixpicy Dios ycötujcin huidibi ti xyajnejhuiiyigixy huidibi tiy'ajt jac'oyip. ¹⁹Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huidibi ca' Dios ytiy'ajt miidity, jadu'n nipaady nej jihuüy tüg huintzpi mhuijtzoyöy, e nañ jadu'n nipaady nej jihuüy mgodixy je jäy

ajcxyc huudibi agootztuum tzinaayb. ²⁰Miich ajcxyc judíoꝗäy myaj'ixpǝjꝑy yi jāy ajcxyc huudibi ayooob, huudibi ca' ti tiy'ajt nejhuiigixy, e mgapxhuijy yi jāy ajcxyc huudibi ca' yhuinma'ñymejtzcixy. Miich ajcxyc minamb co m'ayuc etz mdiy'ajt mbaatcixy ma Dios ycötujcǝn huudibi jaybetyip. ²¹Miich ajcxyc myaj'ixpǝjꝑy jacjadyii jāy ajcxyc Dios ytiy'ajt. ¿Nej co ca' ci'm mguydungixy nej ti myaj'ixpǝjꝑy? Myaj'ixpǝjꝑy ajcxyc jacjadyii jāy co ca' huaad ymeetzcixy, e miich ci'm ajcxyc meetzp. ²²Miich ajcxyc myaj'ixpǝjꝑy jacjadyii jāy co ca' huaad migapxtigoy töxyjäy ajcxyc, e ¿miich ajcxyc nej co mmigapxtigooꝗixy töxyjäy ajcxyc? Miich ajcxyc ci'm minamb co ca' huaad yajhuindzigǝy tzaaboch quipychech, e miich ajcxyc ci'm mdzachmeech je meeñ ma je tzajptǝjꝑ ma je quipychech y'ity. ²³Miich ajcxyc mdzachnaygömaáyigixy co mguydungixy Dios ycötujcǝn. Miich ajcxyc m'ixtijy Dios miid co ca' ajcxyc mguyduni yi' ytiy'ajt. ²⁴Paady jadu'n jaybety miiñ ma Dios ñecy, ma jadu'n ymina'ñ: “Com co miich ajcxyc mdundigooꝗixy, paady ycǝxpǝ yi jacjadyii jāy ajcxyc nigapxy ni'ojǝy Dios yxiñ.”

²⁵Co ajcxyc mguyduunip Dios ycötujcǝn, huin'tit Dios xytunǝpcuendǝ co miich ajcxyc miidity je tiy'ajt ma mninǝx co Dios xyjäy'adyii. Co ca' ajcxyc mguyduunip Dios ycötujcǝn, huin'tit Dios ca' xytunǝpcuendǝ co miich miidity je tiy'ajt ma mninǝx co Dios xyjäy'adyii. Jadu'n nipaady

nej jihuǝy ca' mdiy'ajttǝyity. ²⁶Co yi jacjadyii jāy ajcxyc huudibi ca' miidity tiy'ajt ma ñinǝx, e cuyduni ajcxyc Dios ytiy'ajt, jadu'n nej ajcxyc ytiy'ajttǝyity. ²⁷Yi jacjadyii jāy co ajcxyc cuyduñ Dios ytiy'ajt, yi' ajcxyc capxpaady'idǝpy ma Dios. E miich ajcxyc judíoꝗäy mbocycähuip miich ajcxyc, oy miich ajcxyc mjamiidity ixypy Dios ycötujcǝn huudi cojaayip, pen ca' mguydungixy. ²⁸Je iixpejt janchypǝ co pǝnjaty Dios yjäy'ajtyp, canan je' je iixpejt huudibi ymiid ma ninǝx. E nañ jadu'n canan je' je tiy'ajttǝhuuǝ cötujcǝn huudibi jāy cuydun jecy'ajty. ²⁹Je iixpejt janchypǝ co pǝnjaty Dios yjäy'ajtyp, je' je' je iixpejt huudibi ymiid ma yjot yhuinma'ñ, je oyjot oyhuinma'ñ huudibi ymiid, je iixpejt co je Espǝritu Santo ti yajhuächyii yjot yhuinma'ñ, canan je' je tiy'ajt co ti cuyduñ je jecyip cötujcǝn huudibi cojay ijtp. Yi jadu'mbi jāy ajcxyc cömay'idǝpy ma Dios, e ca' ycömay'ida'ñ ma jāy ajcxyc.

3 Pen tiy'ajt jadu'n nej nmina'ñich, ¿ti jāygidaacin yi judíoꝗäy ajcxyc ymiid ma Dios huudibi yi jacjadyii jāy ajcxyc ca' miidity? ¿Ti jāygidaacin ajcxyc ypatpy co ajcxyc miidity tiy'ajt ma ñinǝx co Dios yjäy'adyii? ²Yi judíoꝗäy ooy canaagnax oy'ajtin jamiidity. Tim jayjǝp Dios yajñibjici ajcxyc yi' ycötujcǝn yi' y'ayuc huudibi cojaayip. ³¿Nej mdiy co Dios ca' cuyduna'ñ yi' y'ayuc miid yi judíoꝗäy ajcxyc miid co nijǝjity judíoꝗäy ca' cuyduñ yi' ycötujcǝn? ⁴Dios ca' jadu'n huinma'ñ miidity nej jāy ajcxyc huinma'ñ miidity. Oy ixypy nidüg'óciy jāy y'aniidaaccixy,

Dios ca' y'aniidäga'n nimina. Paady jadu'n jaybety miin ma Dios y'ayuc co David jadu'n ymina'n:

Nejhuihuipy jäy ajcxy co miich, Huindzin Dios, tudägy mguyduñ yi m'ayuc. Ca' huaad pinjaty ymina'nip co ca' miich mguyduñ yi m'ayuc.

⁵Pen Dios cömaybidzimipy miid ajt nbocy ycixpi, ¿nej tiy'ajt jadu'n nej jäy yminaangixy co Dios ca' oy ytuñ, co xychaachytuunim miid ajt nbocy ycixpi? ⁶Ca' yjadu'nity. Co ixypy yjadu'nity, Dios ca' yi' tiydunipy naaxhuiñyjäy miid ajcxy ypocy ycixpi.

⁷Co ixypy ytiy'ajtity jadu'n nej jäy yminaangixy co Dios ooy yjotucjcity co ca' xychaachtunipyich miid nbocyich ycixpi, jac'oy co ixypy ndundigooyich, jigix Dios janch ycömaybidzimipy. ⁸Jac'oy ixypy nminaanim: "Tzoc tundigooyim jigix jëbi Dios cömay ypidzimipy." Ixti nijëjity jäy ti xyñihuambetyich co iich jadu'n ti nmina'nich. Ca' jadu'n nmina'nich co Dios jäy tzaachtunipy ninigoob. Dios chaachtunipy pocyjäy ajcxy, com paatip ajcxy jadu'n yi tzaachypi.

Nidüg'óciy iich ajt nbocymiidity

⁹¿Nej janch jadu'n co iich ajcxy huidibi judfojäy, jac'oyjäy iich ajcxy ca'ydi yi jacjadyii jäy ajcxy? Ca' yjadu'nity, ca' iich ajcxy njac'oyjäyity. Com ti jayijp nyaj'ixpicyich co tüg'óciy jäy ajcxy yajpaady pocymiid, yi judfojäy, etz nañ jadu'n jacjadyii jäy ajcxy.

¹⁰Com jadu'n jaybety miin ma Dios ñecy ma jadu'n ymina'n:

Ca' ji ni tüg jäy tudäcpy, ni tüg.

¹¹Ca' ji ni pin huidibi huinjhuiiyb Dios ytiy'ajt. Ni pin huidibi ixtaayb Dios ytiy'ajt.

¹²Nidüg'óciy jäy ti ixmajtzcixy Dios ytiy'ajt. Quipxy ycapxy ajcxy ytumyb co ytundigooyixy. Ca' ji ni pin, pin huädz oy yjot oy yhuinma'n tumb, ca' ji ni tüg.

¹³Yi jäy ajcxy ooy ycapxtigooyixy, oy ajcxy yhuin'hiñ miid y'ayuc. Jadu'n ajcxy yöcpajc nipaady nej tüg öcpi jut huidibi ahuädz. Ooy ajcxy yajtzachy miid y'ayuc jadu'n nej jihuüy tza'n chüch.

¹⁴Ooy ajcxy ycapxtigooyixy. Ooy ajcxy jibic ayuc capxcixy.

¹⁵Miid yinjaty huenjatypi ayuc, mic'amy ymigüg yaj'l'occcixy.

¹⁶Ma ajcxy yhuidity ooy midundigooyixy ymigüg, e nañ yecy ajcxy tajin mayin.

¹⁷Ca' ajcxy nejhuiiygixy nej huaad chinaaygixy jotucj, ca' ma ti tzip ti capxy.

¹⁸Ni cahuinmaaygixy nej Dios tzig'iyygixipy.

¹⁹Tüg'óciy ayuc ycojaayity ma Dios ycötujcin necy, mic'ajt miidpi miid yi jäy ajcxy huidibi yajmij'ajtp je cötujcin. Dios ti pidägy yi' ycötujcin, jaydëbi pinjaty tundigooyb, huaad ca' ti anii tuñ ma Dios. Dios ytiydunipy tüg'óciy jäy ajcxy miid yi' ycötujcin. ²⁰Dios ca' capxpada'n co ytudägyity, miid co ti cuydunyii ycötujcin. Dios ti pidägy ycötujcin jaydëbi nejhuiiyim co ajt nbocymiidity.

Yi alma nidzoocin, hue' yajpaady miid mibijcin

²¹Jadachambi Dios xyajnejhuiiyim jemybi tiy'ajt jadu'n

nej tudägy'ajtin jëb nbaatim ma yi', e jada jemybi tudägy'ajtin tiy'ajt, ca' yi' yjadu'nity nej yi tiy'ajt huidibi yajpatp ma Dios ycötujcin jecy'ajtpyi. Per yi Dios y'ayucnajtzcaxiibi ñecy etz Dios ycötujcin necy yejc tiy'ajt jecy'ajty co Dios xymöhuaanim tudägy'ajtin.

²²Jadu'n Dios yaj'ahuimbidaangixy tudägy tüg'óciy jäy huidibi mibijcp Jesucristo, ca' ñejty pinjäy ajcxy, pen judíojäy o pen ca' judíojäy ajcxy. ²³Com nidüg'óciy naaxhuñjäy ti ytundigooygixy. Ni tüg jäy yhuádz'ajtin ycanaybadyii miid Dios yhuádz'ajtin y'oy'ajtin.

²⁴(Miid co nidüg'óciy jäy ytundigooygixy), paady ycixpi Dios mijmay'ajt mij'oy'ajt tuñ ninigoob miid tüg'óciy jäy ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jäy ajcxy huidijaty mibijccixp Jesucristo. ²⁵Dios yquejx y'ung ya naaxhuñ, jaydëbi huinmeecixp jäy ajcxy ypocy, miid co Jesucristo ti y'ögy miid ajcxy ypocy ycixpi. Dios yhuinmeecixp jäy ajcxy ypocy co ajcxy mibigipy Jesucristo. Jayjyp ca'ni anajty Jesucristo miin ya naaxhuñ, Dios ooy mímecxtujcy jäy ajcxy, ca' anajty miidity jotcöduuyb jäy ajcxy ypocy. ²⁶Jadachambi xii tiempo Dios ti yaj'oyiy jadu'n nej jëb huinmeecixpy jäy ajcxy ypocy, e jadu'n yaj'ahuimbidity ajcxy tudägy ma yi' yhuinduu. Jadu'n Dios tuñ jigix ñiguëxigipy co Dios tudägy yi', e tudägy'adaamni yi', co cöbicy jäy, yi pinjaty mibijcp Jesucristo.

²⁷¿Ti huaad jäy ajcxy tungixy huidibi jëbi miid ñaygömayiib

ma Dios? Ca' ni ti. ¿Na'amy co yjadu'nity? ¿Nej jëbi ajcxy ñaygömayiib miid co yajmij'ajtcixy Dios ycötujcin? Ca' yjadu'nity. Ca' huaad ñaygömáygixy ci'm, com Dios ti yaj'ahuimbity jäy ajcxy tudägy huidibi mijpidacp Jesús.

²⁸Paady nmína'ñich co jäy ajcxy y'ahuimbity tudägy co ajcxy mibicy Jesucristo, e canan co janch ypaad jacuydungixy canaag cötujcin.

²⁹¿Nej miich ajcxy mdiicixy Dios ytuñ miid ac y'yi judíojäy ajcxy, e ca' jacmiid pinjaty? Ca' yjadu'nity. Dios tuumb miid janch nidüg'óciy jäy ajcxy. ³⁰Ji tügpajc Dios, e yi' tú'ciy ytuñ miid judíojäy, etz nañ jadu'n jacjadyii jäy ajcxy. Dios yaj'ahuimbityaayb tudägy nidüg'óciy jäy ajcxy co ajcxy mibijccixy Jesucristo. ³¹Co jadu'n nbaatim ndudägy'ajtin miid co nmibijcim Jesucristo, ca' nmínaaním Dios anajty yi' ycötujcin je jecyip nyajcödigoooyim. Hue' janchtiy ñigi anajty nmic'ajtmooyim Dios ycötujcin.

Je ijxpejt huidi Abraham yejc

4 ¿Nej n'ocminaaním? ¿Ti oybi ti paady ma Dios je Abraham ñich ajt nmij'ap nmijteedy? ²Co ixypy Dios Abraham tudägy ti ix, miid co oybi ti tuñ, jëbi Abraham ixypy ñaygömayii. Per ca' huaad ci'm ñaygömayii ma Dios. ³Jadu'n jaybety ymiin ma Dios ñecy ma jadu'n ymína'ñ: “Abraham ymijpidaaci Dios, e paady Dios jadu'n cöbijcy Abraham jadu'n nej tüg tudägyjäy.” ⁴Je jäy huidibi ymuju'ñ patp miid ytung ycixpi, jada meen huidibi

ymuju'n'ajtpy ca' nigoo ñimöyii, hue' tim paatip jadu'n miid ytung ycixpi. ⁵Yi jäy huidibi ca' jïjp'ixy co tudägy'ajtin pada'n ma Dios miid oy'ajtin ycixpi huidibi ytumyb, jëyi ymibijcipy ymïpidacpy co Dios yaj'ahuimbida'nyii tudägy. Yi jadu'mbi jäy tudägy'ajtin ypadamy miid ymibijcin ycixpi. ⁶Jaybety ymiñ ma Dios ñecy co je David jecy'ajty nimïydacy tüg jäy huidibi ooy anajty jotcujc ñayjihuiyïi miid co Dios ti y'ixyïi jadu'n nej jihuïy ytudägyjayity miid ymibijcin ycixpi, e ca' nmïnaanïm miid oyyä'ajtin ycixpi huidibi ytumyb. ⁷David jadu'n ymïnañ:

Jotcujc je jäy ajcxy huidibi ypocy ti yhuinmecxyïi, huidibi ypocy ti yajtigoyii.

⁸Jotcujc je jäy huidibi Dios cöbijcip jadu'n nej jihuïy ca' ypocy ymiidity.

⁹¿Nej janch tiy'ajt jadu'n co jada jotcujc'ajtin huidibi David ñimïydac jecy'ajty, co ac yi judíojäy yï' ajcxy padaamb huidijaty miid tiy'ajt ma ñinïcx co Dios yjäy'adyii? Ca' yjadu'nity, yi jacjadyïi jäy nañ jadu'n yï' ajcxy pada'n jotcujc'ajtin. Ti nmïnaangixyïch co Abraham ymibijci Dios, e Dios ycöbijci jadu'n nej jihuïy ytudägyity. ¹⁰¿Nej mdijy Dios ycöbijci Abraham jayïjp ca' anajty yajtiy'ajttïyñi? o çti anajty yajtiy'ajttïy? Dios ycöbijc Abraham jadu'n nej jihuïy ytudägyjäyity ca'ni anajty pidacy tiy'ajt ma ñinïcx co Dios yjäy'adyii. ¹¹Jayïjp anajty Abraham ti mibicy Dios, e ti anajty Dios ycöbigyïi. Jac'axam Dios Abraham je cötujcin mooy co huen tiy'ajttïhuipy y'ung etz y'ap

y'oc. Je' je' ijxpejt'ajtp co Dios anajty jayïjp ti ycöbigyïi jadu'n nej jihuïy ytudägyjäyity, ca'ni anajty ymöyïi cötujcin. Co Dios jadu'n ytuñ miid Abraham jadu'n nipaady nej jihuïy Abraham nmïjteedy'ajtim iich ajt nidüg'óciy huidibi cham mibijcjp Jesús. ¹²Abraham nañ jadu'n ñimïjteedy'ajtp yï judíojäy huidibi mibijcjp mïjpïdacp Dios tim jadu'n nej yï' mibicy anajty Dios, jayïjp ca'ni anajty miidity tiy'ajt ma ñinïcx co Dios yjäy'adyii. Jadu'n nipaady nej jihuïy Abraham ca' nimïjteedy'aty yï judíojäy huidibi ca' mibicy Dios.

Je huidibi Dios ti xyaj'ahuaniïyim ti ycixy yca'px miid je mibijcin

¹³Miid co Abraham etz y'ap y'oc ymibijcipy ymïpidacpy anajty ajcxy Dios, e paady anajty Dios yaj'ahuimbida'anigixy tudägy, e paady Dios nimay Abraham co yï naaxhuiñybi yï' ajcxy je' adaanïp. Canan jadu'n ajcxy Dios ñimayï co ymöhuaanigixy je naaxhuiñybi miid co anajty nidüg'óciy ajcxy ti cuydungixy Dios ycötujcin. ¹⁴Co Abraham etz y'ap y'oc padaangixy je naaxhuiñybi huidibi yaj'ahuaniïyï, miid co ajcxy ti cuydundaayi Dios ycötujcin, paady naadigi'ajtp ixypy co nmibijcim co Dios xyaj'ahuimbidaanïm tudägy. E nañ naadigi'ajtp ixypy co Dios je Abraham nimay: "Je naaxhuiñybi miich je' mje'adaanïp, com ti xymibicyïch." ¹⁵Je pinjaty mïjpïdaacp Dios ycötujcin je jecyïp, Dios yï' tzaachytunaanïp, com ca' cuydundaaygixy. Pinjaty ca' miidity Dios ycötujcin huidibi jaybetyïp,

ca' yi' midundigooygixy jadyaabi cötujcin.

¹⁶Miid co Abraham anajty Dios ti mibicy, paady ycixpi Dios ñimaayi co je naaxhuiñybi yi' je'adaanip. Jadu'n Dios may'ajt tuñ miid Abraham, jaydëbi tüg'óciy pinjaty mibijcp Dios, tim jadu'n nej Abraham mibijcy Dios, jëbi ajcxy paatcixy yi' oy'ajtin huidibi Dios yajnimay Abraham co möhua'ñ je oy'ajtin huidibi yegamyb ninigoobi. Dios ycuydunamyb yi' y'ayuc miid tüg'óciy jäy huidibi mibijcp Dios, tim jadu'n nej Abraham anajty mibicy Dios, canan y'yi judíojäy ajcxy padam oy'ajtin, com Abraham iixpejt yejc ma tüg'óciy jäy ajcxy. ¹⁷Ma Dios yhuinduu jadu'n nipaady nej jihuüy Abraham iich ajt nmij'ap'ajtim nmijteedy'ajtim nidüg'óciy huidibi mibijcp Dios, com Abraham nañ jadu'n ymibijcpcy anajty Dios. Com jadu'n jaybety ymiñ ma Dios ñecy co Dios jecy'ajty jadu'n nimay Abraham: “fich miich nyajnimbijcpcy co miich mnimij'ap'adamyb mnimijteedy'adamyb tüg'óciy je mayjäy huindu'mybi naax huindu'mybi cajp.” E Dios ycuydunipy yi' y'ayuc com mic'ajt miid, xti jaydëbi yajjugypigipy jadüg'oc jäy tiibi y'ó'ccixy. E nañ mic'ajt miid jaydëbi ane'min pidägy co huen yjii'adipy huidijaty ca' ca'tni.

¹⁸Miid co Dios anajty ti ñimäyii co ymiid'adamyb may y'ap y'oc, paady ycixpi Abraham ti jijp'ixy anajty co Sara anajty y'ung'ixa'ñ. Canaag jimijt anajty jajijp'ixy co huen y'ung paadip. Ti anajty

tiempo ñajxni mina y'ung'ixipy. Hue' Abraham ymibijc huidibi anajty Dios ti yajnimäyii co yi' miid'idamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc. ¹⁹Abraham ti anajty ymic'ajt ycixjni com ti anajty ymijäyiyñi. Ymiid anajty migo'px jimijt, e nañ yi' ytöxyjic Sara ni tüg anajty ti yca'ung'ixy, per Abraham yjacmibijcpcy anajty co Dios cuyduna'ñ y'ayuc miid yi'. ²⁰Abraham ca' anajty ixmach yi ymibijcin jadu'n nej anajty Dios ymiidty ymic'ajt jaydëbi cuydunip yi'y'ayuc. Chi Abraham iibaty capxpaty Dios. ²¹Com Abraham ti anajty huinma'ñ ypidägy ma Dios co yi' ymiid ymic'ajt jaydëbi ycuyduniyb yi' y'ayuc huidibi yaj'ahuaniy. ²²Com Abraham ymijpidaacip anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuüy ytudägyjäyity.

²³Dios ymoy Abraham jada y'ayuc huidibi jaybety, canan jëda'ajty Abraham yajmoy, nañ yajmoyday mayjäy. ²⁴Nañ jadu'n jaybety miñ jada ayuc miid iich ajt ycixpi. Dios nañ xycöbiganim jadu'n nej jihuüy ajt ndudägyjäyity miid co nmibijcim Dios huidibi ti yajjugypijcy anajty jadüg'oc ajt nHuindzin Jesucristo. ²⁵Dios ycïyejc Jesús huen yaj'ögyii miid ajt nbocy ycixpi. E nañ Dios yajjugypijc Jesús jadüg'oc jaydëbi xyaj'ahuimbijtim tudägy ma Dios.

Je nej yhuimbidzimni co Dios xycöbijcim tudägyjäy

5 Miid co nmibijcim nmijpidaacim ajt nHuindzin

Jesucristo, paady Dios ti xyaj'ahuimbijtim tudägy. E miid co Dios ti xyaj'ahuimbijtim tudägy, paady jotcuje n'ijtim miid Dios. ²Co nmibijcim nmijpidaacim Cristo, chi nbaatim je may'ajt je oy'ajt huidibi Dios ytumyb miid iich ajt, e jadu'n oy n'ijtim miid Dios, ca' ma ti tzip. Nañ ooy njotcugiiyim, miid co njijp'ijxim co nbadaanim Dios y'oy'ajtin. ³Canan jëda'ajty nmijotcuje'ajtim co nbadaanim Dios y'oy'ajtin, nañ jadu'n tzoc mijotcuje'ajtim ayo'n tzaachypi. Com nejhuiiyim co nminajxim nyajnajxim tzaachypi, huin'it jëbi nyajtunim mecxtujcin. ⁴E co nyajtunim mecxtujcin, cömay najxim ma Dios, e co anajty cömay ti nnajxim, chi njijp'ijxim co nbadaanim oy'ajtin ma Dios. ⁵Com njijp'ijxim co nbadaanim Dios y'oy'ajtin, chi ca' ndajim nmayim com Dios ti yi' yEspíritu Santo xy'adigiyyim xyjottigiyyim huidibi xyajnejhuiiyim jadu'n nej Dios xychojcm xyjihuiiyim.

⁶Jecy'ajty co anajty ca'ni Jesucristo ymiñ, je naaxhuiñyäj ca' anajty mic'ajt miidity nej ci'm y'ahuimbijtcixipy tudägy. Co yhuaad'ajtni je xii je tiempo huidibi Dios ti yaj'ixtägy, huin'it Cristo y'o'cy miid iich ajt nbocy ycixpi miid co ndigooyim miid Dios ytiy'ajt. ⁷Co ixypy n'ijxtaayim pinjaty codinähuij tüg jät tudägypi ma yi o'cin, ca' ni pin nbaatim. Co ixypy n'ijxtaayim pinjaty codinähuaamyb tüg jät huidibi ooy ycömayity ma yi o'cin, ca' yjecyity co nbaatim tüg metz. ⁸Per Dios yajniquëxicy jadu'n nej

xychojcm xyjihuiiyim mijcajee co quejxy Cristo huen o'cy miid ajt nbocy ycixpi, oy anajty iich ajt ooy njacpocytuunim. ⁹Cristo ti xyaj'ahuimbijtim tudägy co ñi'py ti temy ti yocy miid ajt nbocy ycixpi, e nañ Cristo ñigi may'ajt tuna'ñ miid iich ajt ycixpi co anajty xyajñidzögaanim ajt n'alma, jadu'n nej Dios tzaachytuna'ñ naaxhuiñyäj miid ajcxy ypocy ycixpi. ¹⁰Co anajty ca' Cristo ymiñi ya naaxhuiñ, huin'it anajty nmidzip'ajtim Dios. Je tzip capxy ti Dios yaj'oyiy co quejxy y'ung ya naaxhuiñ, e y'o'cy miid ajt nbocy ycixpi. Miid co Cristo xycodinaayim ma yi o'cin, paady ñigi xypubejtim xypudigiyyim cham co yajpaady juugy. ¹¹Canan jada'ajty co Jesucristo xyajñidzögaanim ajt n'alma, nañ jadu'n tzoc xondaacim miid co n'ijtim miid Dios, miid je may'ajt huidibi ajt nHuindzin Jesucristo ti tuñ miid iich ajt ycixpi co yaj'oyiy je tzip nej anajty Dios nmidzip'ajtim, jëbi jotcuje n'ijtim miid Dios.

Adán etz Cristo

¹²Miid jada ycixpi co yi pocytuñi chondacy jecy'ajty ya naaxhuiñ miid tügpä jät. E co jät ytundigoy oga'n miid Dios, paady ycixpi je o'cin ytigiyy ya naaxhuiñ. Miid co tüg'óciy jät midundigooygixy Dios, paady tüg'óciy jät patcixy yi o'cin. ¹³Janch tiy'ajt jadu'n co jät ajcxy ytundigooy jecy'ajty jayijp ca'ni anajty Dios yecy yi' ycötujcin cojaaybi, e co ca' jät anajty ajcxy cötujcin miidity jecy'ajty, paady ca'pin tiyduñ ajcxy nej ajcxy

ytundigooy. ¹⁴Ca' ñejity, oy ajcxy anajty ca' miidity Dios ycötujcin, nañ jadu'n y'o'ctay ajcxy, chondacy miid Adán, ixti yja'ty ma Moisés yxii ytiempo. Nañ o'ctay jäy ajcxy huidibi tigachjaty tundigooy, ca' yjadu'nity nej Adán oga'n ytundigooy. Hich ajt nninixc ymiid je jibicpi huidibi nbaatim ma Adán. Per ajt njemyjot njemyhuinma'n nbaatim ma Cristo.

¹⁵Je pocytonii huidibi Adán yajtzondac, ca' naybadyii miid je tudägy'ajtin huidibi Dios ti xyñimooyim. Miid je pocytonii ycixpi huidibi tüg jäy ti yajtzondägy, tüg'óciy jäy öcin ti paady. Dios miid tüg yëydjic, je Jesucristo, mijmay'ajt tuñ miid jäy ajcxy ycixpi co yaj'ahuimbijtcixy tudägy, chi mayjäy tudägy'ajtin ti paady. ¹⁶Per je tudägy'ajtin huidibi Dios xyñimooyim, ca' jadu'n naybadyii miid huidibi Adán ytuun. Miid co Adán ytundigoy tügtecy miid Dios, paady ycixpi mayjäy o'cin ti paady miid tüg pocy ycixpi. Miid co Dios ti xyñimooyim tudägy'ajtin miid Jesucristo, paady mayjäy tudägy'ajtin y'oy'ajtin ti patcixy huidibi mibijcp Cristo. ¹⁷Miid co tüg jäy capxycömidodacy Dios, paady tüg'óciy jäy ti patcixy yi o'cin. Miid co tüg jäy, je Jesucristo, may'ajt oy'ajt tuñ co xyaj'ahuimbijtim tudägy, paady tüg'óciy jäy ajcxy huidibi mibijcp Jesucristo ypadaangixyp jotcujc'ajtin etz nañ chinähuaangixy jiiby tzajpjoty ma Jesús y'ane'my.

¹⁸Miid co tüg jäy ytundigoy oga'n, paady nidüg'óciy je mayjäy

ypocycäy ajcxy, e patcixy yi o'cin. Nañ tim jadu'n miid tüg jäy huidibi ti chinäy tudägy, Dios mayjäy yaj'ahuimbijty ajcxy tudägy, e ti patcixy yjugy'ajtin huidibi ca' ycixipy ytigoyipy nimina xii.

¹⁹Miid co tüg jäy capxycömidodacy Dios, paady tüg'óciy jäy ti patcixy je pocy. Nañ miid co tügpi jäy capxymidoy Dios, paady je mayjäy tudägy'ajtin ti patcixy huidibi mibijcpi Jesucristo.

²⁰Co Dios moy jäy ajcxy yi' ycötujcin huidibi cojaayip, chi nigi jäy ajcxy nejhuuyigixy co ypocytungixy. Je may'ajt oy'ajt huidibi Dios ytumyb, nigi yi' y'oyity, ca'ydi je mijpocy huidibi jäy ajcxy ytungixyp. ²¹Tim jadu'n nej co jäy ypocytungixy, huin'it ajcxy pocymiid chinaaygixy, ixti mabaad anajty y'öccixy miid ypocy ycixpi. Nañ tim jadu'n co Dios may'ajt tuñ co yaj'ahuimbity jäy ajcxy tudägy, huin'it Dios ane'my yi' ajcxy chinaayin miid tudägy huinma'n, etz nañ xymöhuaanim jugy'ajtin huidibi ca' ycixipy ytigoyipy nimina, co nmijpidaacim ajt nHuindzin Jesucristo huidibi yjugy'ajtin yejc miid ajt nbocy ycixpi.

**O'cy miid yi pocy ycixpi,
jugy'aty miid Cristo ycixpi**

6 ¿Nej n'ocminaanim? ¿Tzoc ooy nigi tundigooyim jigix Dios nigi may'ajt tunipy miid ich ajt? ²Ca' jadu'n ytiy'ajtiy, ca' huaad njacpocytuunim. Co nmibijcim Jesucristo, chi jadu'n nipaady nejhuuyi ti n'o'cim, e cham ca' n'ijtim pocymiid. ³¿Nej

ca' mnejhuiyigixy jada tiy'ajt? Co nniibejtım miid Jesucristo yxii, chi n'ijtıım miid Jesucristo. Jadu'n nipaady nej jihuıy ti n'o'cim quipxy miid Cristo co yı' y'o'cy miid ajt nbocy ycixpi. ⁴Co iich ajt nniibejtım jadu'n nipaady nej jihuıy ti n'o'cim, e ti nnaaxtıgiıyım quipxyı miid Jesucristo. Dios Teedy miid ymic'ajtıın oybi yajjugypıjcy Cristo co anajty ti y'ögy, chi Cristo paty jemybi jugy'ajtıın, nañ jadu'n iich ajt ti nbaatım jemybi jugy'ajtıın quipxy miid yı', paady copıcy ndzınaayım miid jemybi jot jemybi huinma'n.

⁵Co nmıbijcim Jesucristo, chi n'ijtıım miid yı', co yı' ti y'ögy, jadu'n nipaady nej jihuıy ti n'o'cim quipxy miid yı'. Co Jesucristo yjugypıjcy miid jemybi yjugy'ajtıın, nañ jadu'n iich ajt nbaatım jemybi jugy'ajtıın quipxy miid yı'.

⁶Nejhuiyım iich ajt nej anajty jıbic-jot jıbic-huinma'n nmıid'ajtıım jayıjp'aty ca'ni anajty nmıbijcim. Jadu'n nipaady nej jihuıy ajt njıbicjot njıbic-huinma'n ti y'ögy quipxy miid Cristo co yı' y'o'cy cruudzcıxy. Cristo ti y'ögy miid ajt nbocy ycixpi, jıgıx jėbi n'ijxmajtıım pocytıını huinma'n, etz jıgıx jėbi je pocytıını ca' xyjac'ane'mım ajt njot nhuinma'n. ⁷Com pınjaty ti y'ögy, yı' pocytıını ca' ti mic'ajt jacmıidity ma yjot yhuinma'n.

⁸Pen jadu'n nipaady nej jihuıy ti n'o'cim quipxy miid Cristo, paady ndzınähuaanim njugy'adaanim quipxy miid yı'. ⁹Nejhuiyım co Cristo ti yjugypıjcy co y'o'cy, e ca' yı' y'öga'n jadüg'oc. Yı' o'cin ca' ti mic'ajt jacmıidity ma Jesucristo.

¹⁰Co Cristo ti y'o'cy miid jäy ypocy ycixpi, chi y'ögy tüg tecypajc miid nidüg'öciy jäy ajcxy ycixpi. Co Jesucristo yjugypıjcy, chi tüg'öciy huıdibi yı' ytumyb ma yı' chinaydac yjugy'ajtııac, yı' ytumyb miid Dios ycixpi. ¹¹Nañ jadu'n miich ajcxy mhuinma'nıypıdaaccıx jadu'n nej jihuıy ti m'öccıxy, e yı' ypocytıını ca' ti mic'ajt jacmıidity ma miich ajcxy mdzınaayın. E jadachambi xii tiempo tzınaaygıx miid Dios ycixpi quipxy miid Jesucristo iich ajt nHuıdzın.

¹²Paady ycixpi ca' huaad xy'ane'mgıxy je jıbic-huinma'n huıdibi ajcxy mninıcx yjanıjot'ajtıpy.

¹³Ca' huaad mgıyəcııcy yı' mninıcx ma pocytıını. Naygıyəcııgıx ma Dios, ixmajtııcx yı' pocytıını. Jadu'n nipaady nej jihuıy ti m'öccıxy, e ti mjugypıjccıxy jadüg'oc. Hue' janchtıy cıyəcııcx yı' mninıcx ma Dios, jaydėbi mdzınáaygıxıpy miid ajcxy tudägy mjot mhuinma'n, e cuydungıx Dios chojcin. ¹⁴Jadachambi xii tiempo ca' miich ajcxy mdzınaaygıxy pocytıını, jadu'n nej jecy'ajty ajcxy mdzınaaygıxy co anajty ajcxy mguydungıxy Dios ycötııjcin je jecyıp. Hue' janchtıy tzınaaygıx miid Dios ycixpi, com Dios mij may'ajt ti tuñ miid miich ajcxy.

Tüg ijxpejt huıdibi yajpatp ma n'ijtıım yajtuñ

¹⁵¿Ti huaad nduunım? ¿Nej jėbi huaad njacpocytıunım? Com Dios mijmay'ajt ti tuñ co ti jöch ajt nbocy etz nxıhuın, e Dios ycötııjcin, je jecyıp, ca' xyjacıyajpocycähuım. Ca' huaad njacpocytıunım.

¹⁶ ¿Mnejhuiiyb miich ajcxy jada tiy'ajt? Co ixypy pinjaty ñaygïyegyii co ytuna'n miid tüg huindzin huidibi mic yajtumb, copicy co je tumbi capxymidohuipy je yhuindzin. Nañ tim jadu'n nipaady miid pocytunii. Pen mnaygïyejcip miid pocytunii, huin'it anajty pocy xy'ane'my ma mdzinaayin, ixti mabaad anajty m'ögy miid mbocy ycixpi. Co mnaygïyéjcgixipy ma Dios, huin'it ajcxy mgapxymidohuipy Dios, e mdzinähuip ajcxy tudägy.

¹⁷ Jecy'ajty miich ajcxy anajty pocy xy'ane'mgixy, co jibic-huinma'n mdungixy. Nyajnajxpyich jäygidaacin ma Dios co jadachambi tiempo ti mgöbjiccixy cixyjot huin'it Dios ytiy'ajt huidibi xyaj'ixpijccixp, e mgapxymidoogixy Dios. ¹⁸ Cristo ti xyaj'a'oyiyyi ajcxy mjot mhuinma'n, ca'ydi mjactzinaaygixy pocymiid. Ti mhuinma'n mbidaaccixy co mgapxymidohuaangixy Dios e mdzinähuaangixy tudägy.

¹⁹ (Ngapxhuijpyich miich ajcxy cham miid naaxhuiñyäj y'ayuc ytiy'ajt, com ca' yajxon mhuiñihuiygyx Dios y'ayuc ytiy'ajt.) Jadu'n nej jecy'ajty co ca' anajty mmibijccixy Cristo, ooy anajty mnaygïyéjcgixy xii ya ma jibic-huinma'n, e mdundigoogixy xii ya miid mninicx. Ooy miich anajty ajcxy miidity jibicpi ma mjot mhuinma'n, ooy anajty mdundigoogixy. Jadachambi xii tiempo naygïyéjcgix ma Jesucristo, jigix jëbi huaad mdungixy miid tudägy jot tudägy huinma'n, etz jigix jëbi huaad mdzinaaygixy miid huädz jot huädz huinma'n.

²⁰ Co anajty yi jibic jot jibic-huinma'n xy'ane'mgixy, chi ca' je oyjot oyhuinma'n anajty xy'oc'ané'mgixni. ²¹ ¿Ti jotcuje'ajtin miich ajcxy ti mbaatcixy co jibic jot jibic-huinma'n mdungixy huidibi jadachambi tiempo mdzöydu'n'ajtip ajcxy? Yi jibic jot jibic-huinma'n xyyajnicxp ajcxy ma yi o'cin. ²² Jadachambi xii tiempo Dios ti yaj'oyiy nej jëbi m'ixmájtzcixipy yi pocytunii, ca' huaad mjactzinaaygixy pocymiid. Ti m'ahuimbijtcixy Dios ytumbi, jadaaabi tzinaayin xymöhuip ajcxy mjotcuje'ajtin. Tiydudägy cham tzinaaygix miid Dios ycixpi, e mbaadip ajcxy jugy'ajtin huidibi ca' ycixipy ytigoyipy nimina. ²³ Yi pocytunii ycoju'n y' je' yi o'cin. Per je huidibi Dios xyñimooyim, hue' je' je jugy'ajtin huidibi ni caminaxii ycixipy ytigoyipy co n'ljtim miid ajt nHuindzin Jesucristo.

Tüg ijsxpejt huidibi yajpatp ma picychinaayin

7 Miich ajcxy migügtije huidibi ti m'ixpicy Dios ycötujcin huidibi Moisés yjaay, mnejhuiiyb miich ajcxy co yi naaxhuiñyäj ycötujcin ymiid mic'ajt ma ajt ndzinaayin, ixti mabaad anajty n'o'cim. ² Paady co tüg töxyjäy ycivilbicy miid tüg yëydijc, ca' huaad ixmach ñäy mabaad china'y yjugy'aty. Co janchtiy anajty je töxyjäy ñiyëydijc ti y'öcni, huin'it anajty ca' ocmiidñ ñäy y'ane'min. ³ Ooy anajty mij ytundigoy je töxyjäy co ypigipy miid huingbi yëydijc pen jugy'ajtni je ñäy. Cooni janchtiy anajty ñiyëydijc ti y'ögy,

huin'itni janchtiy jëbi ypic y miid huingbi yëydjic, e ca'p je' anajty ytundigoy.

⁴Miich ajcxy nmigügtjicich, judíojäy huidibi mibijcp Cristo, jayijp co anajty ca'ni mmibijccixy Cristo, je Dios ycötujcin huidibi Moisés yjaay xy'ane'mgixp anajty ma mdzinaayin. Jadachambi xii tiempo yi jadu'mbi cötujcin ca' yi' xyjac'ane'mgixni. Jadachambi Cristo ytiy'ajt xy'ane'mgixp, je Cristo huidibi Dios yajjugypjic jadüg'oc co y'o'cy. Jadu'n miich ajcxy nipaady nej je töxyjäy huidibi ñiyëydjic ti y'ögy, e ti ypijctigach. Cristo miich ajcxy xyñigohuajc'ajtp, jigix jëbi mdzinaaygixy miid Dios ycixpi. ⁵Jayijp ca'ni anajty nmibijcim Jesucristo ooy anajty nguyduunim huidibi ajt nninïcx ñijot'ajt. Je huin'it tiempo anajty je jibic-huinma'n xy'ane'mim ma ajt ndzinaayin. Je' je' je jibic-huinma'n huidibi Dios xycapx'adujcim miid ycötujcin. Miid co jibic-huinma'n xy'ane'mim anajty ajt ma ndzinaayin etz xyajnicxaanim anajty ma yi o'cin. ⁶Jadachambi xii tiempo Dios ycötujcin huidibi Moisés xymooyim, ca' ti mic'ajt miidity ma iich ajt, ti n'ixmajtzim. Jadu'n nipaady nejhuüy ti n'o'cim, e njugypjicim jadüg'oc. Paady nguyduunim je jemybi tiy'ajt huidibi je Espiritu Santo xyajnejhuüyim. Canan je' anajty nguyduunim je jecy'ajtpy cötujcin.

Je pocy huidibi ijtp ma iich

⁷¿Nej n'ocminaanim? ¿Nej janch co je cötujcin huidibi Moisés xymooyim xyajpocytuunim anajty?

Ca' yjadu'nity. Co ixypy ca' anajty nmiiididyich Moisés ycötujcin, ca' ixypy iich ti nnejhuüyich co ti ndundigooyich ma Dios ytiy'ajt. Co ixypy anajty ca' n'ocnejhuüyich Moisés ycötujcin ma jadu'n yminañ: “Ca' mmigüg ni ti m'adzojicy.” Ti ixypy ndundigooyich, e ca' ixypy nejhuüyich ma ti ndundigooyich.

⁸Miid co iich jecy'ajty ooy anajty nnijot'atyich pocytunii, paady ycixpi iich anajty ooy ndundigooyich. E jadu'n anajty nigi ooy n'adzocyich, e jaminam anajty Dios ycötujcin co ca' migüg ni ti m'adzojicy. Co ixypy Dios ca' jadu'n cötujcin ti pidägy, ni ca' ixypy njihui'nybicyich co ndundigooyich. ⁹Jayijp co ca'ni anajty nhuinjihuüyich Dios ycötujcin, huin'it tiempo ca' anajty njihui'nybicyich nbocy. E co nбатыich Dios ycötujcin, chi njihui'nybicyich nbocy, e nañ ti nejhuüyich co tigoyaamich njugy'ajtin. ¹⁰Dios ypidac ycötujcin jaydëbi nbaadibich jugy'ajtin huidibi ca' ycixipy ytigoyipy. Per ca' jadu'n ti oyïy miid iich. Yi cötujcin ti xyajpocycäyich anajty, e jadu'n tigoyaambich anajty njugy'ajtin. ¹¹Jadu'n anajty huinma'n nmiiididyich co nguydundähuaamybich Dios ycötujcin huidibi Moisés yjayhui'm. Pero com ca' njatyich nej nguydundähuibyich, chi nbocycäyich ma Dios. Je pocytunii ti xyhuin'iiñich, e miid je' ycixpi nbadaamybich anajty yi o'cin.

¹²Tüg'óciy Dios yley etz Dios ycötujcin huidibi cojay ijtp, huädz yi', tudägy yi', ooy yi'. ¹³¿Nej

tigoyaambich anajty njugy'ajtin miid co anajty nmi'ityich Dios oybi cötujcin? Ca' yjadu'nity. ¿Nej je Dios ycötujcin je oybi ti huimbizimy jibic miid iich co xyajtigoyaanich anajty njugy'ajtin? Ca' yjadu'nity. Nicxpich anajty ma yi o'cin miid nbocyich ycixpi. Je Dios ycötujcin xyajnejhuuiyich co o'cin nbadaamybich miid nbocyich ycixpi. Jadu'n Dios pidacy ycötujcin ya naaxhuin, jigix jëbi jäy ajcxy nejhuihuipy co mij ajcxy ooy tundigooy miid Dios.

¹⁴Nejhuiyim co yi Dios ycötujcin huidibi Moisés xymooyim, jiiby yi' choon ma Dios, paady yi' ooy y'oyity. Hich nninix yi' je' huidibi nijot'ajtp yi pocytunii, paady ndzinäyich pocymiid. ¹⁵Ca' nhuinjihuüyich huidibi ndumyibich. Yi oybi huidibi njatunaamybich, ca' njatyich nej ndunipyich. Yi jibicpi huidibi ca' y'oychojenty, yi' ndumyich. ¹⁶Co nduñich huidibi ca' ndzocyich, jadu'n niquëxgy co Dios ycötujcin ooy oy yi', tudägy yi'. ¹⁷Canan jotcujc iich jadu'n co nbocytuñich. Yi pocy'adzojcin huidibi nmiidich ma njot nhuinma'n, yi' yi' xyajtundigooybich. ¹⁸Nejhuiybich co ca' ti oybi yajpaady ma iich nninix. Ooy njatzocyich co oybi njatuna'nich, per ca' njatyich nej oybi ndunipyich. ¹⁹Je oybi huidibi njatunaamybich, ca' njaty nej ndunipyich. Je jibicpi huidibi ca' ndzocyich, je' ndumyibich. ²⁰Co yi' nduñich huidibi ca' ndzocyich, yi' je' je pocytunii huidijaty njot'ajtibich nhuinma'n'ajtibich, yi' xyajtundigooybich.

²¹Nbaatypich tüg tiy'ajt, co njatunaamybich oyhuinma'n, jiipy jibicpi nbaadyich ma njot nhuinma'nich. ²²Jotjoty huinma'nyjoty ooy nmixondägyich Dios ycötujcin. ²³E nañ miidich jotjoty huinma'nyjoty yi jibicpi huidibi mi'ijxtinaayb je oybi. Yi tundigoyii yajpatp ma iich nninix. Yi nninixich yajpatp pocymiid.

²⁴Paady ca' njotcujcigyich. ¿Pin jëbi xyñihua'nich xyajnidzögibich ma jadayaab nninixich huidibi xyajnicxpich ma yi o'cin?

²⁵Dioscojuyip nyajnajxypich ma Dios co Dios, miid ajt nHuindzin Jesucristo, xyñihuaanim ma jada jibicpi huidibi ajt nninix xyñil'jot'ajtim. Paady miid n'oyjot n'oyhuinma'n nguyduñich Dios ycötujcin. Miid nninixich nijot'atyich pocytunii.

Je jugy'ajt miid je Dios yjihui'n ymic'ajt ycixpi

8 Jadachambi tiempo janchtiy Dios ca' tzaachytuna'n yi jäy ajcxy huidijaty tú'ciy ijtp miid Cristo Jesús, huidibi ajcxy cuydumb Espiritu Santo chojcin, e ca' ajcxy tungixy nej je ninix nijot'ajtcixy. ²Je Espiritu Santo ti xyyajpidzimim ma yi pocytunii etz ma yi o'cin huidibi yi jecy'ajty cötujcin ti xymooyim. Je Espiritu Santo xyajtzinaayim huinixii, iich ajt huidibi ijtp tú'ciy miid Jesucristo. ³Miid co iich ajt ooy ninix nijot'aty jibicpi, paady Dios xymooyim ycötujcin jecy'ajty jaybety. Per je naaxhuiñyjäy yajtigoy ajcxy je cötujcin ymajaa, e ca' ymadacy nicxy xyajtzinaayim miid tudägy jot huinma'n. Paady Dios

yquejxy yci'm'ung huidi ti chinäy ya naaxhuiñ miid ñinïcx jadu'n nej ich ajt nmiidity nninïcx, jigix jëbi ndzinaayim miid huädz jot huinma'ñ. Jadu'n Dios y'ung chinay miid ñinïcx, per ca' ni ti bocy anajty miidity. E yi' ti y'ögy miid ajt nbocy ycixpi, e jadu'n yajtigoy je pocy huidibi ajt ñigix'ajtim. ⁴Jadu'n Dios ytuuñ jigix jëbi xyajtzinaayim miid tudägyjot tudägyhuinma'ñ jadu'n nej yi' ycötujcin y'ane'my. Miid co nmiid'ajtim Dios yjihui'ñ ymic'ajt ma ajt njot nhuinma'ñ, paady jëbi huaad ndzinaayim miid tudägy-jot tudägy-huinma'ñ.

⁵Yi jäy ajcxy huidibi ca' miidity Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je jibicpi huidibi ajcxy ñinïcx ñijot'ajtpy. Yi jäy ajcxy huidibi tzinaayb miid Dios yjihui'n ymic'ajt ma yjot yhuinma'ñ, hue' ajcxy ycapxymidooyb je Espiritu Santo. ⁶Yi jäy ajcxy huidibi capxymidoob je jibicpi huidibi ajcxy ñinïcx ñijot'ajtpy, hue' ajcxy ypadaangixyp o'cin. Yi jäy ajcxy huidibi capxymidoob je Espiritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcujc'ajtin. ⁷Yi jäy ajcxy huidibi capxymidoob je jibicpi huidibi ajcxy ñinïcx ñijot'ajtpy, hue' ajcxy Dios ymidzip'ajtpy, ca' capxymidohuaangixy Dios ycötujcin. Ni ca' jajtcixy nej ajcxy capxymidogixipy Dios ycötujcin. ⁸Ca' Dios jäygidägy yi' ajcxy chinaayin huidibi ajcxy capxymidoob je jibicpi huidibi ajcxy ñinïcx ñijot'ajtpy.

⁹Per miich ajcxy ca' mgapxymidoogixy je jibicpi huidibi mninïcx nijot'ajtpy. Com miich ajcxy mmiid Dios yjihui'ñ ymic'ajt ma mjot mhuinma'ñ, e mguydungixpy je Espiritu Santo chojcin. Huenpinity huidibi ca' miidity Cristo yjihui'ñ ymic'ajt ma yjot yhuinma'ñ, ca' yi' y'ity miid Cristo. ¹⁰Pen miich ajcxy ijtp miid Cristo, yi mjogy'ajtin ajcxy ca' ycixipy ytigoyipy nimina, miid co Cristo ti xyaj'ahuimbijtcixy tudägy ma Dios yhuinduu. Yi mnaaxnicx cixamb tigoyamb yi'. ¹¹Pen ijtp ma miich ajcxy mjot mhuinma'ñ je' yjihui'ñ ymic'ajt je huidibi yajjugypjic jadüg'oc je Cristo co y'o'cy. Nañ jadu'n miich ajcxy Dios xyajjugypigaangixy jadüg'oc, co anajty ti m'öccixy, miid yi' yjihui'ñ ymic'ajt huidi yajpaatp ma miich ajcxy mjot mhuinma'ñ.

¹²Miid co nmiid'ajtim Dios yjihui'ñ ymic'ajt paady ycixpi, miich ajcxy migügtjic, copicy ngapxymidoohuim je Espiritu Santo, e ca' huaad ngapxymidoohuim je jibicpi huidibi ajt nninïcx ñijot'ajtpy. ¹³Pen ooy ajcxy xytimy'ane'mgixy je jibicpi huidibi ajcxy mninïcx ñijot'ajtyp, co m'öccixipy, yi mjogy'ajtin cixip tigoyip yi'. Per pen miid Dios yjihui'ñ ymic'ajt miich ajcxy myajtigoy je jibicpi huidibi mninïcx ñijot'ajtpy, co m'öccixipy, yi mjogy'ajtin ajcxy ca' yi' ycixipy ytigoyipy.

¹⁴Tüg'öciy pinjaty ajcxy capxymidoob je Espiritu Santo, Dios yi' ung'ajtp ajcxy. ¹⁵Je Espiritu Santo huidibi miich ajcxy xy'adigiigyixp xyjottigiigyixp,

ca' xychaachtungixy e nañ ni ca' mdzinähuaangixy miid tzig'iñ jihu'iñ. Ca' miich ajcxy jadu'n paady nej tumbidijc huidibi ooy tzig'iigixy yhuindzin. Co je Espiritu Santo yajpaady ma ajcxy njot mhuinma'ñ, jadu'n nipaady nejihu'i y miich ajcxy Dios xy'ung'adyii. E com nmiid'ajtim Dios yjihu'iñ ymic'ajt, je' jadu'n xyajminaanim: "iDios Teedy!" ¹⁶Je Espiritu Santo tiy'ajt yejcp ma ajt njot nhuinma'ñ, je' jadu'n xyajminaanim co Dios xy'ung'ajtim. ¹⁷Pen iich ajt Dios xy'ung'ajtim, chi nbadaanim it lugar quipxyi miid Cristo jiiby tzajpjoty ma Dios yajpaady. Pen nminajxim nyajnaxim tzaachypi jadu'n nej Cristo minajxy yajnaxxy tzaachypi, chi nbadaanim Dios y'oy'ajtin quipxyi miid Cristo.

¹⁸N'a'ixiibich co yi tzaachypi yi ayo'n huidibi nminajxim nyajnaxim ya naaxhuiñ, ca' yi' ytim ytiijity, ca' ninej yquipxyjatytiy je oy'ajtin etz mijjotcuje'ajtin huidibi Dios xyaj'ixaanim je huin'it xii co Cristo anajty ymiñ jadüg'oc. ¹⁹Tüg'óciy tijaty ya naaxhuiñ huidibi Dios ti yajcojy yaj'oyiy, y'aa'ijxpy yjijp'ijxpy ajcxy mina Dios ymöhuaanigixy y'oy'ajtin ymij'ajtin yi jäy ajcxy huidibi ajcxy Dios ung'ajtip. ²⁰Tüg'óciy tijaty Dios ti yajcojy yaj'oyiy ya naaxhuiñ, hue' je' yjugy'ajtin cixamb tigoyamb, ögam tidzam. E canan ci'm jadu'n tzocy, hue' je' Dios jadu'n ti yajniödugiy. Per ca' yjugy'ajtin ycixipy ytigoyipy tu'ciyi hue' ajcxy y'aa'ijxpy yjijp'ijxpy co padaangixy oy'ajtin jadüg'oc. ²¹Co anajty Dios

yaj'oyiy nej jëbi ajcxy chinaaygixy, e ca' y'öccixipy, ca' y'titzcixipy, etz ca' ypügixipy, chi ajcxy padaangixy oy'ajtin etz jotcuje'ajtin quipxyi miid je jäy ajcxy huidibi Dios ung'ajtip. ²²Com nejhuuiyim co ixti chambaad tüg'óciy huidijaty Dios yajcojy yaj'oyiy ya naaxhuiñ yjihuiyb tzaachypi, e ca' yjotcuje'ajtcixy. Tim jadu'n nipaady nej tüg töxyjäy paady tzaachypi co yhuaad'ajtni mina y'ung yajma'xung'ada'ñ. ²³Canan yi naaxhuiñbi huidi Dios yaj'oyiy yi'yi tzaachypi jihuiyb, nañ jadu'n iich ajt huidijaty miid'ajtp Dios yjihu'iñ ymic'ajt, huidibi Dios xymooyim jayijp'aty ca'ni anajty nyajtigajtzim nninixc. Nañ iich ajt tajim mayim njiiyim nyaaxim ixti cooni anajty Dios xyajtigadzaanim ajt nninixc etz xycöbigaanim ma yi' y'it jiiby tzajpjoty, e xymiid'idaanim ajt jadu'n nej yci'm'ung. ²⁴Miid co n'aa'ijxim njijp'ijxim co Dios xyajnidzögaanim ajt n'alma, paady ti nbaatim jugy'ajtin huidibi ca' ycixipy ytigoyipy. Co ixipy ti nbaatim huidibi anajty njijp'ijxim, ca' ixipy njacjijp'ijxim co nbadaanimni. Com ca' pin jacjijp'ijxni co padaanip je huidibi ti ocpatpi. ²⁵Per co njijp'ijxim co nbadaanim huidibi ca' nmiid'ajtim, huin'it n'ahuixim miid mecxtujcin cooni nbaatim.

²⁶Tim jadu'n nej jotcuje'ajtin nbadaanim co njijp'ijxim huidibi Dios xymöhuaanim, nañ tim jadu'n je Espiritu Santo xypubejtim xypudigiiyim co njotmetzciiyim, com ca' njajtim nej jëbi huaad Dios nmibijctzoohuim nej ypadyii. Paady

je Espíritu Santo xycodinaayim ma Dios, ymibijctzooyb je Dios mictägy miid iich ajt ycixpi miid jüiyin yaaxin, huidi ca' huaad yajcaxpidzimy miid miydacin. ²⁷Dios ñejhuiiyb ti jot ti huinmañ jäy ajcxy ymiid. E Dios nañ huinjihuiiyb tüg'óciy ayuc huidibi je Espíritu Santo yajnaxyp ma yi'. Je Espíritu Santo ypijctzooyb may'ajt jabom jabom ma Dios miid tüg'óciy je mibijcpidijc ycixpi. Nañ jadu'n pijctzoy jadu'n nej Dios tzocoy jäygidägy.

Mij madaacin ma mibijcin

²⁸Yi jäy ajcxy huidibi mijpidacp Dios, huidibi ajcxy Dios ti huin'ixy, jëbi chinaaygixy jadu'n nej Dios jäygidägy ajcxy chinaayin. Nejhuiiyim co huentimtiijity huidibi yi' ajcxy yminajxpy yajnaxpy, pen jibicpi o pen oybi, Dios jadu'n ti a'ixy co huen minajxcixy yajnajxcixy miid yi' ajcxy y'oy'ajtin ycixpi. ²⁹Je' yi' ajcxy huidibi Dios ti yhuin'ixyii, je' yi' ajcxy huidibi Dios ñejhuiiy jayijpni co ymibigañyii y'ayuc. Dios jadu'n tumb ma yi' ajcxy yjot yhuinmañ jaydëbi yquipxyjatyty ajcxy yjot yhuinmañ miid Dios y'ung, jadu'n nej yi' yjot yhuinmañ miidity. ³⁰Yi mayjäy huidibi Dios yajnigödugiyy ca'ni anajty naaxhuiñybi chondacy co ytunañ miid yi', yi' ajcxy Dios huin'ijxi. Yi mayjäy huidibi Dios ti yhuin'ijxigixy, nañ Dios yi' ajcxy yaj'ahuimbijtip tudägy. E yi mayjäy huidibi Dios ti yaj'ahuimbity tudägy, nañ Dios yi' yajquipxyjatytiñhuaanip ajcxy y'oy'ajtin miid yi' y'ung y'oy'ajtin.

³¹¿Ti jada' njacjijp'ijxim ti jada' njactzojcm? Ca' ni ti. Pen Dios iich ajt xypubejtim xypudigiyyim, ¿pin iich ajt jëbi xymimadaacim? Janch ni ca pin. ³²Dios ixti yci'm'ung ti yecy miid iich ajt ycixpi, co oy y'o'cy miid iich ajt ycixpi, co oy y'o'cy ma yi cruudz miid nidüg'óciy ajt nbocy ycixpi. Paady janch janch co Dios xymöhuaanim tüg'óciy oybi quipxyjaty miid yi' y'ung, Jesucristo. ³³¿Pin jada' jëbi ocxäy je jäy ajcxy huidibi Dios ti huin'ixy? Ca' ni pin. Com Dios ci'm yi' ti yaj'ahuimbijttäy tudägy. ³⁴¿Pin yi' ajcxy jëbi ocyajpocycäy? Ca' ni pin. Com Cristo o'c je' miid ajt nbocy ycixpi, etz yjugypijcy jadüg'oc, e jadachambi xii tiempo yajpaady a'oy'amy ma Dios ymijc, e yi' ane'mdaayb tüg'óciy. E Cristo iich ajt xyñibijctzohuiiyim, ypijctzooyb may'ajt ma Dios miid iich ajt ycixpi. ³⁵Com Cristo ooy xychojcm xyjihuiiyim, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixypy tzaachypí ayo'n nminajxim nyajnaxim, oy ixypy tajin mayin nbaatim; oy ixypy jäy xy'ixhuidijtim xypahuidijtim; oy ixypy yuu ayo'n nbaatim; oy ixypy huit tucxy nyajmayajtim; oy ixypy tzigiñ nyajnaxim; oy ixypy jäy xytimyyaj'o'cim. Oy ti ayo'n ndimbaatim, Cristo ca' xy'ixmadzaanim. ³⁶Com jadu'n ymiñ jaybety ma Dios ñecy ma jadu'n ymiñ:

Miid miich, Huindzin Dios ycixpi, je nmidzipich xyjatytimyyaj'ögaambich xiim tzuum. Jadu'n iich ajcxy

nej cöbixy huidibi yajnicxip ma yaj'öctac co yaj'öga'ñyii.
 37 Ca' ti ayo'n nbaadanim. Nmimadactähuaanim tüg'óciy ayo'n, miid co Cristo xychojcim xyjihuiyim. 38-39 Janch nejhuiybich tiydudägy co Dios xychojcim xyjihuiyim. Ca' ji ni pin jëbi huaad xypijc-huäcxim ma Dios chójcin, oy ixypy nja'o'cim; oy ixypy njajugy'ajtim; oy ixypy xymidzip'ajtim ángel ajcxy etz jacjadyii huidibi mic'ajt miid jiiby tzajpjoty. Ca' ajcxy jëbi huaad xypijc-huäcxim ma Dios, ni ti huidibi ji ijtp cham, ni je huidibi mimb cidacp, ni yi' jëbi xycapijc-huäcxim ma Dios chojcín. Ajt nHuindzin Jesucristo ti xyajnejhuiyim jadu'n nej Dios xchojcim xyjihuiyim co y'o'cy ma yi crudz miid ajt nbocy ycixpi.

Dios ti huin'ixy yi Israel jäy ajcxy

9 1-2 Nmiidich je Cristo ytiy'ajt, nyajnijayiybich miich ajcxy yi' ytiy'ajt, ca' n'indägyich, co ooy ndajy nmayich miid n'amigügtjicich ycixpi je Israel jäy co ajcxy ca' cöbiga'ñ je Cristo. Nañ Dios yjihui'ñ, je Espíritu Santo, tiy'ajt yejcp ma iich njot nhuinma'ñ co jadu'n tajin mayin njihuiyich miid yi' ajcxy ycixpi. 3 Com tajy may nayjihuiyijich miid iich n'amigügtjic, iich nmigogajp, ixti njaccodñähuaamybich ajcxy ma Dios miid ypocy ycixpi, ixti jëbi ixypy Cristo nja'ixmachich miid yi' ajcxy ycixpi, ixti jëbi ixypy Dios xychaachytuñich miid yi' ajcxy ypocy ycixpi, co ixypy jëbi Dios pocyhuinmecxy ajcxy. 4 Com

hue' je' ajcxy Israel y'ap'ajtip y'oc'ajtip, Israel jäy ajcxy. Hue' anajty ajcxy Dios ti ycöbigyii jadu'n nej jihuiy yci'm'ung, Dios anajty ajcxy ti ñi'ijxcidägyii, y'ijx ajcxy Dios y'oy'ajtin. Dios nimay ajcxy co ycuend'adip. Dios ajcxy jadu'n yajni'ixiyyi nidüg'óciy tiy'ajt nej ajcxy jëbi huaad Dios huindzigiy, e Dios yajhuinhuaniyy Israel jäy ajcxy je Cristo. 5 Nañ hue' ajcxy ymij'ap'ajtip ymijteedy'ajtip iich ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jiiby tzajpjoty etz ya naaxhuiñ. Je Cristo capxpaady y'idipy huinixii.

6 Co jadu'n mina'ñich co may ajcxy Israel jäy ca' ajcxy Dios yjäy'adyii tiydudägyi, ca' jadu'n mina'na'ñich co Dios ca' cuyduñ yi' y'ayuc huidibi yajhuinhuaniyy Abraham etz Moisés. 7 Canan nidüg'óciy Abraham y'ap y'oc pada'ñ je oy'ajt huidibi yajhuinhuaniyy Abraham, com jadu'n yjaybetyity ma Dios ñecy. Dios jadu'n nimay Abraham: “Yi mmang, Isaac, ti nhuin'ixyich jëbi y'ap y'oc paady je oy'ajt huidibi ti nyajhuinhuaniyy.”

8 Co Dios jadu'n nimay Abraham, paady ycixpi nejhuiyim co ca' nidüg'óciy Abraham y'ap y'oc jëbi naydijyii Dios y'ung. Jëyi Isaac y'ap y'oc jëbi ñaydijyii Dios y'ung com Dios yajhuinhuaniyy co may'ajt tuna'ñ miid yi' ajcxy.

9 Com jadu'n yjaybetyity ma Dios ñecy co Dios nimay Abraham: “Nihuimbidaamybich ma je tiempo huidibi ti n'agapxtucyich, e huin'it mdöxyjc Sara y'ungbaadip.”

¹⁰Ji jadüg tiy'ajt. Hich ajt nmij'ap Isaac ytöxyijc Rebeca metz ymang paty. ¹¹Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxigý ti huinma'ñ ymiid, oyhuinma'ñ o jibic-huinma'ñ. Dios ninigoob anajty jayijpni ti huin'ixy je jacmutzpi. ¹²Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³Tim jadu'n nej jaybety ymiñ ma Dios ñecy, Dios jadu'n minañ: “Jac ñigi ti ndzocyich Jacob, ca'ydí Esaú.”

¹⁴¿Nej n'ocminaanim? ¿Dios ca' tiybi tuñyi? Ca' yjadu'nity. Dios tiydudägy ytuñ. ¹⁵Com jadu'n Dios ñimay Moisés: “Nba'ayohuipiyich ninigoobi pinjaty ndzojpcyich.” ¹⁶Co Dios jadu'n ñimay Moisés paady nejhuiiyim co canan paady ycixpi Dios pa'ayohua'ñ jay miid co ajcxy chachñaymija'ijxigixy co tunaangixy oyhuinma'ñ. Hue' je' Dios pa'ayo'n tuñ miid jäy ajcxy ninigoob co jadu'n tzocy. ¹⁷Com jadu'n jaybety ymiñ ma Dios ñecy co Dios jadu'n ñimay je Egipto rey:

Hich miich ti nmöy m'ane'min, jígix jëbi jäy ajcxy ixipy je mij ayo'n huidibi ndunaamybich ma miich mnaax mgajp, huin'it jäy ajcxy capxpaady xyaj'idipy huindu'nybi ñaaxhuñ.

¹⁸Dios ypa'ayooyb je' pinjaty chojpcy, e nañ jadu'n yjot yajjuuni pin jadu'n yajmidzojpcy.

¹⁹Huin'it miich ajcxy xyñimähuibich: “Peni janch yjadu'nity, çti co Dios jadu'n jadüg'oc pocy'ixy jäy? ¿Pin jada' occapxhuimbidip nej yi' tzocyi?”

²⁰Miich jäy, çmbin miich co ti myajcapxycoja'ñ myaj'ayucchoja'ñ miid Dios? ¿Nej jëbi pochytüdz nimäy je pin anajty ti yajcojyii? “¿Nej co jadu'n ti xyajcojyich?”

²¹Tüdzyajcojpi yi' yaj'oyiib je mo'ntz nej tim tzocy. Pen yajcojamyb tüdz oybi tzooyatypi, yajcojpy je'. Peni yajcojamyb tüdz huidibi ca' oyjatyity, yajcojpy je'.

²²⁻²⁴Tim jadu'n nej je түdzyajcojpi yaj'oyiib mo'ntz nej tzocy, nañ jadu'n Dios tuñ miid jäy nej tzocy. Dios ti yajcojy jäy, e miid ymic'ajt jëb tzaachytuñ miid ypocy ycixpi. E co jadu'n tzaachytunipy, chi ñiguëxigipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachytuniiyb ajcxy. Com Dios ti yajcojy jäy paady jëb nañ jadu'n pa'ayoohuipy etz may'ajt tunipy miid yi' ajcxy, jëbi ajcxy paadip yi' y'oy'ajtin. Dios ich ajt ti xyhuin'ijxim nijjëjty judíojäy, etz nijjëjty huidibi ca' yjudíojäyity, jëbi ajt n'alma nidzocin paady. ²⁵Com jadu'n jaybety ymiñ ma Oseas ñecy ma Dios jadu'n yminañ:

Yi jäy ajcxy huidibi ich ca' anajty njäy'adyii, njäy'adäänibich cham. Yi jäy huidibi ca' anajty ndzocyich, ndzogáanibich cham.

²⁶E nañ jadu'n jadüg'it Oseas cojay: “E je jäy ajcxy huidibi anajty tzinaayb ma canaag naax cajp huidibi anajty ca' Dios yjäy'adyii, jëb ñaydiyii Dios yjäy, je Dios huidibi huinixii tzinaayb.”

²⁷Nañ jotmay miid co Isaías jada tiy'ajt ycojay ma ñecy ma jadu'n yminañ: “Oy ixipy ajcxy

ti yjamayïy jadu'n nej tzaa'ung yajpaady ma mejy ypa', nihueeñ ajcxy y'alma ñidzoocin pada'ñ. ²⁸Com Dios mic ooy cötujcin miidity, e ca' mimecxtugipy jäy ajcxy ypocytunii huinixii. E mic'amy tzaachypi möhuañ naaxhuinyjäy miid ypocy ycixpi co anajty xii tiempo paatni mabaad agapxtujcy." ²⁹Isaías ñajtzcapxiy jadu'n jecy'ajty:

Pen ca' ixypy je Huindzin Dios huidibi ane'mdaayb jiiby tzajpjoty etz ya naaxhuiñ, capubejty yi Israel jäy, co ca' ycajacyajtzooci nijëjity ajcxy, ycacödigoymay yi' ajcxy, tim jadu'n nej je jäy ajcxy yjajty jim ma Sodomo cajp etz Gomorra cajp, cödigoymay ajcxy.

**Yi judíojäy ajcxy etz
Jesucristo y'ayuc ytiy'ajt**

³⁰Jadu'n jëbi mhuinjihuuygixy huidibi ti nyajnijayiygixy jadu'n nej Dios ytun miid jäy ajcxy. Yi jäy ajcxy huidibi ca' yjudíojäyity, huidibi ca' cuyduñ Dios ycötujcin je jecyip, co ajcxy mijpidägy je Cristo, chi ajcxy paady tudägy'ajtin ma Dios. ³¹Per yi judíojäy ajcxy huidibi jïjp'ijxp co tudägy'ajtin padaangixy miid co tzachcuydungixy Dios ycötujcin je jecyip, ni ca' ajcxy mimadägy cuyduñhuipy, e ca' ajcxy tudägy'ajtin paady ma Dios. ³²¿Na'amy co ca' ajcxy mimadägy cuyduñdäy Dios cötujcin? Je' co ajcxy ca' mijpidägy huidibi Dios ti tuñ miid yi' ajcxy ycixpi. Hue' ajcxy tijy co tudägy'ajtin padaangixy ma Dios miid co tzachcuydungixy Dios

ycötujcin je jecyip. Hue' ajcxy ayo'n ypadamyb co ca' Cristo cöbijccixy, tim jadu'n nej jäy ayo'n paady co yconepy ma tüg tzaa. ³³Com jadu'n jaybety ymiñ ma Dios ñecy, ma Dios jadu'n ymina'ñ:

Nguexaamybich jim

Jerusalén tüg jäy. Mayjäy ca' mijpidäga'ñ je jäy, e ayo'n ajcxy ypadamyb ma iich. Tim jadu'n nej ixypy ti nbidägyich tüg tzaa ma jäy ajcxy huaad yconejpcixy, e chi yciday ajcxy. Tüg'óciy jäy pinjaty mijpidaacp je jäy huidibi nbidägaamybich jim Jerusalén, hue' ajcxy yi' ca' ayo'n pada'ñ ma iich, nbocyhuinmecxaamybich yi' ajcxy.

10 Miich ajcxy nmigügtijcich, ooy ndzocyich cixyjt huinjot co yi Israel jäy nidüg'óciy pada'ñ y'alma ñidzoocin. Ooy iich nigü Dios nmibijetzoy miid yi' ajcxy ycixpi. ²Jëbi ndiy'ajt yecyich co yi Israel jäy ooy ajcxy Dios jayajmij'ajtcixy. Hue' janchtiy ca' ajcxy huinjihuuyi Dios ytiy'ajt. ³Com nejhuiyb ajcxy co Dios yajpocyñihuadzamyb jäy ajcxy, hue' ajcxy ca' huinjihuuy nej Dios yhuinma'ñ miidity. Ci'm anajty chachhuinma'ñ ixtaaygixy nej ajcxy jëbi ñayyajpocyñihuadzixixy. Ca' anajty ajcxy cöbicy Dios ytiy'ajt nej jëbi huaad ñayyajpocyñihuadziiyb.

⁴⁻⁵Yi judíojäy ajcxy ca' huinjihuuygixy co je Cristo y'oy ya naaxhuiñ, e chi yajtgooyi Dios ycötujcin ymic'ajt huidibi Moisés yjay, jigix jëbi tüg'óciy jäy pinjaty mijpidacp Cristo ytiy'ajt, huin'it

ajcxy paadip tudägy'ajtin. Moisés yjayhui'm ma jadu'n ymina'n: "Je pinjaty cuydumb je Dios ytiy'ajt, jim mic'ajt paadipy miid chinaayin ycixpi." 6-7 Per yi jäy ajcxy huidibi mijpidaacp Cristo etz cuyduni yi' ytiy'ajt, yi' ajcxy ymina'n: "Ca' huaad judfojyä ajcxy yminaangixy jotjoty huinma'nyjoty: ¿Pin ocpättigihuiip tzajpjoty nicx je Cristo yajtzoon? o ¿Pin nicxamb ca'oydactuuby ma ajcxy öcpidijc y'lity e yajjugypigaanip je Cristo?" 8 ¿Nej Dios y'ayuc ymina'n? Jadu'n Dios y'ayuc ymina'n: "Ti mmido y miich ajcxy Dios y'ayuc ytiy'ajt ma mgi'm'ayuc, ti jäy ajcxy capxhuäcxy ma miich, ti mmido'mbijccixy." Pues jada je' je y'ayuc tiy'ajt nej jëb mijpidaacixy Cristo, huidibi tiy'ajt iich ajcxy ngapxhuäcxp. 9 Pen miich mgapxypidzimyb mayjäy agujc co miich ajcxy Jesús mHuindzin'adyii, etz mmibijcipy ajcxy ma mjot mhuinma'n co Dios ti yajjugypijcy Jesús co y'o'cy, huin'it m'alma paadip nüdzoocin ma Dios. 10 Co mmijpidägipy Jesús cixyot huinijot huin'it Dios xyajpocynihuädzipy. Co mgapxypidzimipy mayjäy agujc co miich mijpidägy Cristo Jesús, huin'it yi m'alma nüdzoocin pada'n.

11 Com jaybety jadu'n miin ma Dios ñecy, ma jadu'n ymina'n: "Nidüg'ociy jäy huidijaty mijpidacp je Cristo, ca' ajcxy ayo'n pada'n ma Dios." 12 Jëbi nidüg'ociy jäy mijpidägy je Cristo Jesús com Dios tú'ciy yajhuinhuaniiy pocynihuaatzin ma yi judfojyä etz ma huidi ca' yjudfojyity. Ji tüg Huindzin je Jesucristo huidibi niHuindzin'ajttaayb. Jesucristo

may'ajt oy'ajt tunam mijcajee miid huentimpinjäyity pinjaty pijczoob pubejtin ma Dios miid yi' yxii. 13 Com jadu'n jaybety ymiin ma Dios ñecy, ma jadu'n ymina'n: "Nidüg'ociy jäy pinjaty Dios mibijctzoob miid Huindzin Jesucristo yxii, yi' ajcxy y'alma paadip nüdzoocin." 14 ¿Nej jëbi jäy ajcxy occohuanïy Jesucristo co huen y'alma nüdögy, pen ca' anajty ti mibijci je ytiy'ajt? Pues ca' yjadu'nity. ¿Nej jëbi jäy mibicy Jesucristo peni ca'ni ajcxy amido'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yi' ajcxy? 15 ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyii ayuccapxhuäcxpi? Com jaybety jadu'n ymiin ma Dios ñecy, ma jadu'n ymina'n: "Ooy oy jäy ñayjihuiyïi co pinjaty mimimb mija'tp oybi tiy'ajt, pinjaty capxhuäcxp oybi tiy'ajt ma yi' ajcxy."

16 Per ca' nidüg'ociy jäy mibicy je oybi tiy'ajt, com Isaías jadu'n cojay ma ñecy ma jadu'n ymina'n: "Huindzin Dios, ¿pin ti mijpidägy iich ajcxy n'ayuc?" 17 Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

18 Per n'amidooybich miich ajcxy: ¿Nej ca' jada' yi judfojyä ajcxy midoy Dios ytiy'ajt? Janch jadu'n ti ajcxy jamido y, com jaybety jadu'n ymiin ma Dios ñecy ma jadu'n ymina'n:

Ti capxhuäcxy ajcxy Dios y'ayuc ytiy'ajt huindu'mybi naaxhuii.

Ti ajcxy Dios y'ayuc midodaayi huindu'mybi naaxhuiñ.

¹⁹Jadüg'oc n'amidoogixy: ¿Nej ca' Israel jäy jada' ajcxy nejhuüy Dios ytiy'ajt? Nejhuüyb ajcxy. Com jecy'ajty Moisés ycojay ma ñecy ma Dios jadu'n ymíñañ:

Nyajpocyñihuaatztähuibyich yi jäy ajcxy huidibi ca' iich njäy'adyii, e huin'it miich ajcxy cohuindoyii mjihuühuipy miid y' ajcxy ycixpi. Ndunipyich may'ajt miid y' ajcxy, e huin'it miich y' ajcxy mmijotmädiip.

²⁰Jadu'n jadüg'it Isaías cojay ma y' ñecy, ma Dios jadu'n ymíñañ:

Yi jäy ajcxy huidibi ca' xy'ixtäyich, ti xypaadyich ajcxy. Ti nyajnigüexygyich ndiy'ajt ma yi jäy huidibi ca' xyñidiy xyajtiyich.

²¹Com jadu'n jaybety ymiñ ma Dios ñecy, ma Dios jadu'n nigapxy yi Israel jäy co jadu'n ymíñañ:

Jabom jabom ti njamimecxtucyich yi Israel jäy ajcxy. Ti njayajnimäyich iich ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmj'öcpich ajcxy.

Yi Israel jäy ajcxy huidibi ti ypcynihuaatzcixy

11 Paady n'amidoogixy: ¿Nej ti jada' Dios ix'ijxni ixtijni yi Israel jäy ajcxy? Pues ca' yjadu'nity, Dios ca' y' ixmachñi Israel jäy ajcxy. Com nañ Israel jäy iich. Abraham nmij'ap'ajtibich nmijteedy'ajtibich e nañ jim

ngogájpidyich ma anajty Benjamín ycogajpity. ²⁻³Dios ca' ixmach y' yjäy huidibi yhuin'ijx jecy'ajty co jäy'ada'ñyii jigix jëbi may'ajt oy'ajt tunipy miid y' ajcxy. ¿Nej ca' ajcxy mnejhuüy nej jaybety ymiiñ ma Dios ñecy jadu'n nej Elías nigapxy y' Israel jäy ma Dios? Jadu'n ymíñañ:

Huindzin Dios, ti yi Israel jäy ajcxy yaj'öctäy huidibi anajty miich m'ayuc xycapxhuäcxip. Ti ajcxy yajhuindigoydäy je tzaa macxy ma anajty jäy xyhuindzigäy. Naydügpajc iich ti njachuü'myich njaccapxhuäcxyich miich m'ayuc, e nañ xyaj'ögaamich jäy ajcxy.

⁴E chi Dios y'adzooy nimay Elías: Ca' mim naydügity, ji iich ahuing nmíididyich yujpcicy jahuixtujc mil yëydijc huidi xy'ojadajtpich xyhuindzigiiybich chambaad, huidibi ca'ni huingoxtinäy yi Baal, yi dios falso, ca'pi ti mic'ajt miidity ni ti tzöc'ajt ca' miidity.

⁵Tim jadu'n nej Dios miidity anajty huixtujc mil yëydijctijc jecy'ajty co anajty Elías yjugy'aty, nañ tim jadu'n cham ma iich ajt nxii ndiempo Dios ymiid nijëjity judíojäy huidibi ti pa'ayoy, e paady ycixpi ti yhuin'ixyii jëbi y' jäy'adyii. ⁶Com co ixypy ajcxy yajxon cuyduni Dios ycötujcin, ca'p ni ti pa'ayo'n Dios jactunaani miid y' ajcxy, com co ti anajty jim Dios y'ayuc ycuycundäyii.

⁷¿Ti ti ytunyii ti yjadyii miid yi Israel jäy ajcxy? May ajcxy

ca' may'ajtin oy'ajtin paady ma Dios jadu'n nej ajcxy jįp'įjxcixy. Jęyi ajcxy huıdı Dios huın'įjxi ti ajcxy paatcixy oy'ajt ma Dios. Yi jacjadyii Israel jįy ajcxy Dios nig ooy yajjotmį'öccixy. ⁸ Com jadu'n jaybety ymiiñ ma Dios ñecy jadu'n nej Dios yajjotmį'ögy yi Israel jįy, ma jadu'n ymınañ:

Tim jadu'n ajcxy nipaady nej jįy ajcxy huıdıbi ti ymį'öctįgooyñi, jadu'n nipaady nej jįy huıdıbi huıntzip, jadu'n nipaady nej huıdıbi cönatip.

⁹ David nañ jadu'n ycojay jecy'ajty ma ñecy, ma jadu'n ymınañ:

Huındzin Dios, cham je jįy tzachnixondągy yi tzınaayın yi jugy'ajtin, ca' ajcxy xyjįymech. Tımıtiini ajcxy ayo'n möhuıpy; tim jadu'n nej iyujc ayo'n paady co yajtįxuuch o co yjut cögįy.

¹⁰ Yajma'ti ajcxy yjot yhuınma'ñ, huen ahuımbįtcixy jadu'n nej jįy huıntzpi. Mö ajcxy tzaachypi huınixii huıntiempo, tim jadu'n nej jįy ajcxy tzaachypi jįhuıy huıdıbi jemxypi tzmıccixp.

Yi ypocyhuınmeecxin huıdıbi ajcxy ca'p yjudıojįyity

¹¹ Co jadu'n yi maybi Israel jįy ca' cöbįccixy Dios ytiy'ajt, ¿nej mdįy, ti Dios y'ixmachyii ajcxy tüccį'yi, e yajtigoya'ñ ajcxy? Pues ca' yjadu'nıty, ca' Dios ixmach yi Israel jįy ajcxy tüccį'yi. Co yi Israel jįy ca' cöbįccixy Dios ytiy'ajt nej Cristo y'o'cy mııd yi' ajcxy ypocy ycįxpı, paady cöbicy yi huıdıbi

ca' yjudıojįyity, jębi ajcxy y'alma nıdzocın paady. Jadu'n Dios ytuñ jįgix jębi yi judıojįy ajcxy cohuındoyii jįhuıhuıpy, e chi nañ jadu'n mįjpidągıpy ajcxy Jesucristo. ¹² Pen yi mayjįy ajcxy huıdıjaty ca' y'israeljįyity mįj'oy'ajtin mįjјotcujc'ajtin ti paady, mııd co yi jacmaybi Israel jįy ca' cöbįccixy Jesucristo, chi nigı oy'ajtin јotcujc'ajtin pada'ñ yi naaxhuıñyjįy ajcxy co anajty nidüg'öciy Israel jįy yјothuımbįjtaaygıy etz cöbįjctaaygıy je Cristo.

¹³ Cham nijayıygıy miich ajcxy huıdı ca' yjudıojįyity, com Dios ti xyquexyich ngapxhuäcxich yi' y'ayuc ma yi jįy ajcxy huıdıbi ca' yjudıojįyity. Ooy nyajcopıcyich jada ndungich, jįgix jębi judıojįy oy'ajtin paady nañ jadu'n. ¹⁴ Ca' jecyity co iich n'amıgügtįc, yi judıojįy ajcxy, cohuındoyii ajcxy jįhuıhuıpy, co anajty mayjįy huıdı ca' yjudıojįyity mįjpidągy iich n'ayuc. Co jadu'n ajcxy cohuındoyii jįhuıhuıpy, chi ajcxy nañ jadu'ñ mįjpidągıpy Jesucristo. ¹⁵ Com pen je naaxhuıñyjįy huıdıbi ca' yjudıojįyity, huıdıbi Dios jecy'ajty ca' jįygidacı ajcxy chinaayın, pen ti ajcxy cöbįcį Dios ytiy'ajt, pen ti ajcxy oy'ajtin paady ma Dios, mııd co Dios ti ixmach yi Israel jįy huıdıbi ca' cöbicy yi' ytiy'ajt, chi yi Israel jįy co ajcxy jadüg'oc yјothuımbıdıpy etz cöbįgıpy Dios ytiy'ajt, nañ jadu'n ooy yјotcugıhuıpy ajcxy, jadu'n nejjįhuıy ti ajcxy y'ögy etz nej jįhuıy ajcxy ti yjugypıcy jadüg'oc. ¹⁶ Com co Abraham, Isaac etz Israel Dios anajty jįy'ajtip, paady nañ jadu'n

tüg'óciy Israel jäy Dios jäy'adyii, miid co Israel y'ap'ajtip y'oc'ajtip ajcxy. Tim jadu'n nejjihuüy judíojäy ajcxy tzajcaagy puuducy möy Dios, nañ jadu'n je ytujctuc huidibi jac-hui'm nañ Dios je' yje', e nañ tim jadu'n nej co jäy ajcxy möy Dios quipy ytictz, tüg'óciyi je' Dios je'ajtäyii quipy y'aacxy.

¹⁷Hue' je' nijëjity Israel jäy ca' mijpidägy Dios ytiy'ajt, paady ñajtz'ixiüyi, e may'ajt oy'ajt tuñ miid huingbi jäy huidi ca' israeljäyity. Tim jadu'n nej jihuüy tüg oyguipy huidi tiim'ajtp yajpubuxy y'aacx, e je ma ti yajjijppujxtüty, je' yjijp yajpidägy ma huingbi quipy y'aacx. Miich ajcxy huidi ca' yjudíojäyity huidibi ti mibicy je Cristo, ti mbaady Dios y'oy'ajt tim jadu'n nej judíojäy ajcxy jecy'ajty miidity Dios y'oy'ajt. ¹⁸Ca' huaad amij agix mnayjihuiüygixy, e ni ca' huaad m'ixtjicixy yi judíojäy huidibi ca' mijpidaaccixy je Cristo. Miich ajcxy yi m'oy'ajt ti mbaady ma Dios, tim jadu'n nej je quipy y'aacx mic'ajt paady ma yi quipy ytictz.

¹⁹Ca' yjecyity co miich ajcxy mina'naangixy co Dios najtz'ixiüy yi judíojäy huidibi ca' mibicy Cristo, jaydëbi miich ajcxy mnaydijyii co Dios xyjäy'adyii. ²⁰Tiy'ajt jadu'n nej miich mina'ñ. Dios ñajtz'ixiüy yi maybi judíojäy miid co ajcxy ca' mibicy Jesucristo. E Dios miich ti xycöbicy miid co ti mmibicy Jesucristo. Per ca' huaad miich amij agix mnayjihuiüyii miid co Dios ti xycöbicy. Naygüend'adii yajxon ma Dios ytiy'ajt, tziği' Dios. ²¹Com Dios ñajtz'ixiy yi judíojäy

ajcxy miid co ca' ymijpidägyii yi' ytiy'ajt. Nañ jadu'n miich ajcxy yi' xyñajtz'ixihua'ñ, pen ca' mmijpidaaccixy yajxon yi' ytiy'ajt. ²²Cuentipic jadu'n nej Dios may'ajt oy'ajt tuñ miid nijëjity jäy, etz mic tzaachytuñ nijëjity jäy. Dios mic tzaachytuñ je judíojäy huidibi ca' ycapxymidooy, etz may'ajt oy'ajt tuñ miid miich ajcxy huidi capxymidoob. Jaccuydun yajxon Dios ytiy'ajt, e niği Dios may'ajt oy'ajt xytuunipy, pen ca' mguyduni yi' ytiy'ajt, huin'it Dios xyñajtz'ixihuiipy. ²³E nañ jadu'n yi judíojäy ajcxy huidi ca' mibijccixy Jesús, co ajcxy yhuinma'ñ yajtigadzipy, e mijpidägy Jesús, huin'it Dios ycöbigiüyb jadüg'oc, etz Dios miid ymic'ajt jëbi may'ajt oy'ajt tunipy miid yi' ajcxy. ²⁴Com pen miich ajcxy huidi ca' yjudíojäyity huidibi jecy'ajty anajty ca' Dios jäy'adyii, pen miich ajcxy Dios mic'amy ti xycöbicy, nañ jadu'n jactzojc cöbiga'ñ huidibi ajcxy judíojäyip, pen ycöbijcy ajcxy.

**Jadu'n nej Dios
yajnidzooccogixihua'ñ
Israel jäy ajcxy**

²⁵Miich ajcxy nmigügtjicich, nyajnijayüyb ajcxy jadu'n nej Dios tuna'ñ miid yi Israel jäy, jaydëbi ca' miich ajcxy amij agix mnayjihuiüyib, etz jaydëbi mnejhuiüipy jada tiy'ajt huidibi ca' pin nejhuüy, co yi Israel jäy ajcxy ooy ajcxy y'aamijity yjotmijity, ca' ajcxy capxymidooy Dios. E jadu'n ajcxy y'ida'ñ mabaad anajty yca'pxy je mayjäy, ca'pi y'israeljäyity je huidi miijpidägam Jesucristo

ytiy'ajt. ²⁶Nejhuiiyim co Dios may'ajt oy'ajt tunamb jadüg'oc miid tüg'óciy Israel jäy ajcxy, com jadu'n jaybety ymiñ ma Dios ñecy ma Dios jadu'n ymina'ñ:

Jacjiini tüg Israel jäy ymina'ñ
huidibi yajnïdzögamb
ajcxy ma yì' ypocy. Yì'
yajtigoyaanip Israel jäy ypocy.

²⁷Jadüg'it jaybety ymiñ ma Dios jadu'n ymina'ñ: Jadu'n nyajhuinhuaniyich yì Israel jäy co yì' ajcxy ypocy nyajtigooybich.

²⁸Co yì Israel jäy ca' mijpidaaccixy Jesucristo ytiy'ajt, chi Dios ajcxy ñajtz'ixiyyi. E co ñajtz'ixiyyi ajcxy, paady ycixpi miich ajcxy Dios ti yxcöbicy, co ti mmijpidaaccixy Jesucristo. Per chambaad Dios jactzojctay yì Israel jäy miid co Dios huin'ijxy yì Abraham, Isaac etz Jacob jecy'ajty jëbi yì' yjäy'adyii. ²⁹Dios ti huin'ixy yì Israel jäy ajcxy jëbi yì' yjäy'adyii, etz tüg'óciy huidi yajhuinhuaniy co möhua'ñ, co may'ajt tuna'ñ miid yì' ajcxy ycixpi. Ymöhuiipy yì', ytunipy yì'. Dios ca' y'ayuc yajxigy. ³⁰Miich ajcxy huidi ca' yjudíojäyity jecy'ajty ca' anajty mmijpidaaccixy Dios.

Jadachambi xii tiempo Dios miich ajcxy ti xypa'ayoy, miid co yì Israel jäy ca' mijpidägy Cristo ytiy'ajt.

³¹Yì judíojäy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjiini Dios pa'ayoohuin tuna'ñ jadüg'oc miid yì judíojäy ajcxy tim jadu'n nej ytuñ miid miich ajcxy jadachambi xii tiempo. ³²Com Dios anajty ti yajpocycädäy tüg'óciy

jäy co ajcxy ycapxycömidodacy, yì judíojäy etz nañ huidi ca' yjudíojäyity, paady ycixpi Dios pa'ayo'n tuñ miid nidüg'óciy jäy, judíojäy etz nañ huidi ca' yjudíojäyity, tüg'óciy pin mijpidacp yì' ytiy'ajt.

³³iOoy ycodzigijity Dios! Dios ooy mijcajee may'ajt oy'ajt tuñ miid jäy ajcxy ycixpi. Dios ooy mijcajee mijhuinma'ñ ti tuñ miid jäy ajcxy ycixpi. Dios ooy mijcajee ycohuinma'ñity. Ca' ni pin jëbi huinjihuüyday je ayuc huinma'ñ huidi Dios ymiid. Etz nañ ca' ni pin jëbi huinjihuüyday huidibi Dios ytumyb. ³⁴Com jaybety jadu'n miñ ma Dios ñecy ma jadu'n ymina'ñ:

Ca' ni pin jëbi huinjihuüyday nej
Dios yhuinma'ñ miidity. Ca'
ji ni pinjäy huidi ti capxhuijy
Dios.

³⁵Ca' ji ni pinjäy huidi tijaty ti ocmooybi Dios. Dios ca' ni ti nuucxy miidity miid ni pinjäy.

³⁶Tüg'óciy huidijaty iich ajt ya nbaatim, ac jiiby choondäy ma Dios. Yì' tüg'óciy ti yaj'oyiyday, e yì' je'ajtaayip tüg'óciy. iTzoc Dios capxpaatim ojadajtim huinixii huinitempo! Jadu'n jadu'n. Amén.

Je jugy'ajtin cixyot ma Dios

12 E jadu'n nmigügtijcich, cham iich miich ajcxy nimaaygixy mictägy, com co Dios ti xypa'ayoogixy, paady ycixpi nay'ayéjcigix naygüyéjcigix amuumdüg'ot ma Dios. Cuychinayy yì ytiy'ajt yajxon jabom jabom. Tzinaaygix miid huädz mjot mhuinma'ñ, jadu'n nej Dios jëbi jäygidägy yì mdzinaayin. Jada je

tiy'ajt nej jēbi Dios m'ojadajtcixy tiydudägy. ²Ca' ajcxy mguydungixy mguychinaaygixy yi naaxhuiñyjäy ajcxy yjibicjot yjibic-huinma'n̄n huidibi tzinaaygixp jadachambi xii jadachambi tiempo. Com Dios ti xymooygixy jemybi mjot jemybi mhuinma'n̄n, paady mguydunipy ajcxy yi' ytiy'ajt. Ixpjccix Dios ytiy'ajt, jigix ajcxy mnejhuñhuipy huidibi tiy'ajt Dios chojcyp mguydunipy, etz jigix mhuiñjihuñhuipy je oyhuinma'n̄n, je tudägyp̄i huinma'n̄n huidibi Dios yjäygidacpy, je huinma'n̄n huidi huädzip ca'pxyip.

³Com Dios may'ajt oy'ajt ti tuñ miid iich etz ti xymöyich jada tung co ngapxhuäcxich yi' y'ayuc, paady iich miich ajcxy nimäy nidüg'óciy co ca' huaad amij agix mnayjihuiñyigixy, ca' huaad niñgi anaxy mnaygömáayigixy ci'm. Nidüg nidüg ci'm huinmaaygixy yajxon huidi tung jēbi myajnicxcixy, jadu'n nej Dios huijy'ajt cujc'ajt ti xymooygixy. ⁴Jadu'n nej iich ajt nninixc ymiid yhuin y'ahuac etz yci' ytecy, je ninixc abicy ytung miidity, je huin abicy ytung miidity, je y'ahuac abicy ytung miidity, etz je ci' tency abicy ytung miidity. ⁵Nañ tim jadu'n iich ajt huidi mijpidacp Cristo, e ni may iich ajt, e tügpicy jäy iich ajt com tú'ciy nmibjicim. E nije' nije' Dios huijy'ajt cujc'ajt ti xymooyim abicyjaty, nej jēbi nije' nije' Dios ytung nyajnicxim.

⁶Com abicyjaty Dios ti xymooyim huijy'ajt cujc'ajt, paady copicy nyajtuunim nije' nije' je huijy'ajt cujc'ajt huidi Dios ti xymooyim. Pen Dios ti xymooyim huijy'ajt

cujc'ajt jēbi ngapxhuäcxim yi' y'ayuc, copicy ngapxhuäcxim mibaad ixpijcin nmiid'ajtim. ⁷Pen Dios huijy'ajt cujc'ajt ti xymooyim co jēbi nbubejtim nmigügtijc, copicy nmigügtijc nbubejtim. Pen Dios huijy'ajt cujc'ajt ti xymooyim jēbi nyaj'ixpijcin nmigügtijc, copicy ndung'ajtim yaj'ixpigii. ⁸Pen Dios huijy'ajt cujc'ajt ti xymooyim co jēbi ngapxhuijim nmigügtijc, co jēbi njot'amijmooyim nmigügtijc, copicy ngapxhuijim nmigügtijc, etz njot'amijmooyim nmigügtijc agujc jotcujc. Pen nyejicim tijaty ma nmigügtijc, copicy agujc jotcujc nyejicim. Je huidi ajcxy nigohuajc'ajtp mibijcpidijc copicy yajxon y'ané'mgixipy. Pen Dios huijy'ajt cujc'ajt ti xymooyim co jēbi nbubejtim jäy ajcxy huidibi ayo'n miid jotmay miid, copicy agujc jotcujc nbubejtim pinjaty ayo'n miid jotmay miid.

Nej mibijcpidijc huaad jugy'ajtcixy chinaygixy

⁹Naychójcigixy nayjihuiñyigixy miñ xyipy amuumdügjot, ca' y'ametz yjotmetzity. Ca' mnijot'ajtcixy jibic jot jibic-huinma'n̄n. Nijot'ajtcixy niñgi oyjot oyhuinma'n̄n. ¹⁰Naychójcigixy nayjihuiñyigixy amuumdügjot, jadu'n nej ypadyii mnaymigüg'ajtigixipy ma Jesucristo. Nayyajmij'ajtigixy niñgi nidüg nidüg miich ajcxy.

¹¹Naymic'íjxigixy cixyot huinijot, ca' mnuux'ajtcixy. Tungix amuumdügjot miid mHuindzin Jesucristo ycipi.

¹²Tzinaaygixy agujc jotcujc, com mnejhuiñy ajcxy co mbada'n̄n

oy'ajtin ma Dios. Mecxtujccix yi tzaachypí ayo'n huídibi mminajxyp myajnajxyp. Mibijctzoogix Dios jabom jabom.

¹³Naybubéjtigix miñ xyipy, pen yajmayajtpy migüg tijaty. Nayyajjättácigix miñ xyipy oy yajxon.

¹⁴Nibijctzohui' ma Dios huídibi ajcxy xy'ixhuídijtp xpahuídjtp. Nibijctzohui' mmidzip huen Dios may'ajt oy'ajt tuñ miid yi' ycixpi. E ca' mnibijctzohuüy co huen ayo'n paadípy.

¹⁵Tzoc jotcujc nayjihuiyim co ajt nmigügtjic jotcujc ñayjihuiyii. Tzoc miidtajim miidmayim nmigügtjic pen tajp mayb.

¹⁶Ooy yajxon nayyaj'íjtigix naygodigíyigix. Ca' amij agix mnayjihuiyigixy. Migüg'adiiyb yi mmigüg huídí ayoob. Yung naxy miid'at mjot mhuinma'n, ca' mnaygömáayigixy.

¹⁷Co jäy xymidundigóoygixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jäy jébi jäygidägy. ¹⁸Oy nayyaj'íjtigix miid nidüg'óciy jäy mabaad mmadägy. ¹⁹Miich ajcxy migügtjic, co jäy jibic xymidundigóoygixipy, ca' nañ jadu'n ajcxy myaj'ahuimbidity, mimecxtugipy ajcxy, com Dios yi' tzaachytunip yi jäy ajcxy huídí anajty xymidundigóoygixp. Com jaybety jadu'n ymiñ ma Dios ñecy jadu'n yminañ: “Hch nyaj'ahuimbiditych nej anajty jäy xymidundigooygixy.”

²⁰Co jäy xymidundigóoygixipy myaj'ahuimbidity ajcxy oybi, com jaybety jadu'n ymiñ ma Dios ñecy,ma jadu'n yminañ:

Pen yi mmidzip yubo'cip, myajcayipy myaj'ügipy, pen yi mmidzip tidziipy, myajni'ügipy. Co jadu'n mdunipy miid mmidzip huin'it tzöydu'n jihuihuipy.

²¹Pen myaj'ahuimbijtpy jibic co jäy xymidundigoy, ti anajty jibic-huinma'n xymimadägy. Hue' janchtiy yajtun mecxtujcin etz oyhuinma'n, e jadu'n jibicpi mimadägipy miid oybi.

13 Copicy co nidüg'óciy jäy capxymidóogixipy yi cajp tungmiidpi etz yi gobierno tungmiidpi. Ca' ji ni tüg tungmiidpi huídibi jébi y'ane'my pen Dios ca' a'ixiy. Com Dios jadu'n cötujcin ti yajhui'my co huen jii'aty tungmiidpidijc, paady ycixpi tungmiidpidijc nidüg'óciy jim mic'ajt paady ma Dios. ²Paady jäy ajcxy pinjaty ca' ycapxymidoy ma tungmiidpidijc, hue' tundigooyb ma Dios e tzaachypí ajcxy ypadaamyb. ³Yi migtungmiidpi ca' yi' ajcxy adzigiy yi jäy huídijaty oyhuinma'n miid. Hue' janchtiy yi' ajcxy chaachytunipy yi jäy huídí jibic-huinma'n miid. Pen mdzojycp co ca' tzaachypí mbaadípy ma yi tungmiidpi, hue' janchtiy oybi mdunipy, e huin'it m'idipy jotcujc. ⁴Com Dios ti pidägy jada tungmiidpi miid miich ajcxy ycixpi, jigix jébi jotcujc ajcxy mdzinaaygixy. Pen mdundigooyb huin'it je tungmiidpi mdzigihuipy, com yi' ymiid mic'ajt jébi tzaachytuñ jäy ajcxy huídibi tundigooyb. Com Dios ytung ytuunipy etz ycuuyduunipy Dios ycötujcin jadu'n nej Dios

xyñajtz'ane'mhiyim, copicy co tzaachytuñ je jäy ajcxy huidibi tundigooyb. ⁵Paady ycixp copicy mgapxymidohuipy tungmiidpidijc, jigix ca' miich ajcxy Dios xychaachytunipy e nañ jotcujc mnayjihuihuiyb co ca' anajty ti ti mdundigoy. ⁶Yi tungmiidpidijc Dios ycixpi ajcxy ytuñ, e ymiid ajcxy ycötujcin, paady ycixpi copicy mmigüedipy ajcxy.

⁷Mgüedipy ma yi tungmiidpidijc huidibi xypaatp. Co ajcxy cajp meñ yajmucy, migüedipy. Co je gobierno tungmiidpi pidägy impuestos, migüedipy. Jäy ajcxy huidijaty tungmiid myajmij'adipy, etz huidi mijtungmiid mgömayipy.

⁸Ca' pin minuucxy'adiiyb. Tzoc jihui' mmigügtijc, e mgüedipy oy'amy huidibi mnuucxyp. Co yi mmigügtijc mdzogipy mjihuihuipy ti anajty mguydundäy Dios ycötujcin. ⁹Jadu'n Dios ycötujcin jaybety ymiñ, ma jadu'n ymina'n: "Ca' mmigapxtigoyipy huingbi töxyjäy. Ca' mmigüg mmeedzipy. Ca' mjäyyaj'ögipy. Ca' mmigüg m'adzojcopy ti ymiid." Pen mdzojcopy mjihuiyb migüg nej miich ci'm mnaychogyii ti anajty mguydundaayi Dios y'ane'min ycötujcin. ¹⁰Je naychojcin je nayjihuiyin ca'p je' ti jibicpi ti tzaachypi tuñ ma je migüg, co jadu'n jada mguydundähuipy ti anajty Dios ycötujcin mguydundaayi.

¹¹Com miich ajcxy mnejhuiyb co huingon je xii je tiempo mina Jesucristo mina'n jadüg'oc ya naaxhuñ, paady ycixpi jijp'ijxcix ajt nHuindzin Jesucristo co tzojce

yminipy. E jadachambi ti yjac-huingoni mina miina'n iich ajt nHuindzin Jesucristo, ca'ydí co oga'n nmibijcim. ¹²Canaag jimijt jäy ajcxy ahuijxy jijp'ijxpy co Dios yajnödzoğa'nyii ajcxy y'alma, jadachambi ti yhuingoni je xii je tiempo mina n'alma ajt nüdzoocin padaanim. Paady ycixp tzoc ixmajtzim yi jibic-huinma'n yi huidibi jäy ycuydumyib huidibi ca' Dios ytiy'ajt nejhuiyi. Tzoc cuychinaayim cuyjugy'ajtim Dios ytiy'ajt. ¹³Tzoc tzinaayim jugy'ajtim tudägy. Tzoc cuyduunim Dios ytiy'ajt. Ca' huaad jadu'n ndzinaayim amügyjäy. Ca' huaad n'agootzhuidijtim xiicyaax xiictinaayim. Ca' huaad ndundigooyim miid huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg nmi'ijxtinaayim. ¹⁴Tzoc cuychinaayim cuyjugy'ajtim Jesucristo ytiy'ajt. Tzoc tzinaayim tiydudägy jadu'n nej Jesucristo tiydudägy ti chinäy ya naaxhuñ. Ca' nguyduunim ti jibicpi ajt n'aa njot yja'adzojcopy.

Ca' migüg mboc'y'ixy

14 Miich ajcxy nmigügtijc, copicy mgöbigipy agujc jotcujc ma miich mnayyöymüjcgixy ajcxy yi migügtijc huidibi mibijcp je Cristo, per ca' tiydudägy huinjhuüy je Cristo ytiy'ajt. Mgöbigipy per ca' mhuingapxpedipy, ca' ti myaj'ayucyoonipy miid yi' ajcxy. ²Ti migügtijc huidibi minamb co Dios ca' ti jicxycapx'aducy, etz jëbi ajcxy jicxy huenytim ti jicxyity.

Etz nañ ji migügtijc huidibi minam co Dios ti capx'aducy tzüch, paady ajcxy jicxy'adyii je'lada'ajty aay ujtz. ³Yi migüg huidibi tzüch tzützp ca' huaad ixtijy je ymigüg huidibi yjicxpy je'lada'ajty aay ujtz. E nañ ni yi migüg huidibi jicxp aay ujtz ca' huaad ixtijy yi migüg huidibi tzüch tzu'tzp, com Dios ycöbïjctaaayb je jäy ajcxy huidibi ti mibïcy Jesucristo. ⁴Ca' huaad miich ajcxy mnimähuipy yi mmigüg co ca' oytuñ, tim jadu'n nipaady nej co tüg jäy nimähuipy huingbi jäy ytumbi co ca' oy ytuñ. Dios ci'm nimähuip huidi ajcxy mibïjcp Jesucristo, pen oytuñ o ca' oytuñ. Dios ypubejtyp pinjaty mibïjcp, paady madaacp ajcxy ma chinaayin.

⁵Nijëjity ajt nmigügtijc ymina'n co ooy ycopicyity n'amay'ajtim nijëjity xii, jacjadyii jäy ymina'n co ca' ycopicyity n'amay'ajtim jada xii. Huen nidüg nidüg yci'mhuinma'n yajtuñ pen y'amay'adamyb, o pen ca' amay'ada'n nije' nije' xii. ⁶Hich ajt nmigügtijc huidi amay'ajtp nijëjity xii, hue' ajcxy tijy co Dios jadu'n tzojcp. E nañ iich ajt nmigügtijc huidi tzüch tzu'tzp, hue' ajcxy tijy co Dios jadu'n tzojcp, etz nañ yajnaxyp Dioscojuyip ma Dios miid yjiicxy ypicxy ycipxi. Nañ tim jadu'n ajt nmigügtijc huidi ca' tzüch tzüda'n, hue' tijy co Dios jadu'n tzojcp, etz nañ yajnaxyp Dioscojuyip miid yjiicxy ypicxy ycipxi.

⁷Ca' iich ajt nayyajtzinaayim amidzooci'm, nañ jadu'n ca' iich ajt ci'm ndzojcin co n'o'cim.

⁸Pen njactzinaayim hue' anajty nguyluunim ajt nHuindzin

Jesucristo chojcin. Pen n'o'cim yi' anajty jadu'n ti yajcöducy. Pen njactzinaayim, o pen n'o'cim, tú'ciy nipaady, com Jesucristo nHuindzin'ajtim ma yi tzinaayin etz ma yi o'cin. ⁹Paady ycixp Cristo y'o'cy etz yjugypijcy jadüg'oc jigix jëb nihuindzin'ajttäy yi' yjäy huidibi jactzinaayb jacjugy'ajtp, etz jigix jëb nihuindzin'aty yi tiibi y'ögy.

¹⁰¿Na'amy co mmigüg mdzachpocy'ixy? o ¿Nej co mmigüg mdzach'ixtijy? Ca' jadu'n y'oyity co ajcxy jadu'n m'idich. Com nidüg'óciy ajt njädaanim ma Dios ytiydundac. ¹¹Com jadu'n jaybety ymiñ ma Dios ñecy, ma jadu'n ymina'n:

Janch janch co iich, je tügpajcpi Dios, jadu'n nmina'nich co tüg'óciy naaxhuiñjyäy xyhuingoxtinähuibich xyhuindzigihuibich, etz nañ tüg'óciy naaxhuiñjay xycapxpaadibich co iich je' tügpajcpi je Dios.

¹²Com Dios nhuindzin'ajtim, paady ycixp nidüg'óciy iich ajt nayguëxictähuaanim ma Dios yhuinduu, chi Dios xy'amidohuaanim nej ti ndzinaayim ti njugy'ajtim nidüg nidüg.

Ca' migüg myajhuinma'nydigooygixy

¹³Paady ycixpi ca' huaad naynixiic naynigapxim miñ xyipy. Hue' janchtiy miich pidaaccix mhuinma'n co ca' ti mdúngixipy huidi mmigügtijc ca' jäygidägy, huidi mmigüg yajpocycähuib.

¹⁴Nnejhuibich tiydudägy co

ajt nHuindzin Jesucristo ytiy'ajt xyajnejhuiyım co jēbi njıxcım huen tım huıdı jıcxı tım huıdı pıcy. Je jıcxı je pıcy ca' ma ycobocy. Per pen tūg mıgūg yhuınma'ñ pidacp co Dios ca' jāygıdāgy co yı' yjıcxpy nıjējıty jıcxı pıcy, pues ca' yhuaadıty co yı' jadu'mbı jāy jıcxı huıdı yı' ytıjpy co ca' huaad njıxcım. ¹⁵Pen ca' m'oy'ity mıid tūg mıgūg co ti mjıcxı je jıcx pıcy huıdıbı yı' ytıjpy co Dios ca' jadu'n yaj'cōducy, chí ca' anajty mdzocy mjıhuıy yı' mmıgūg nej ypadyyı. Com nañ Cristo ti y'ōgy mıid yı' mmıgūg ypcy ycıxpı, paady ca' huaad myajtıgoy yı' mmıgūg, mıid co mjıcxı huıdı yı' ca' jāygıdāgy. ¹⁶Ca' ajcxy m'a'ıxıfygıxıpy co jıbcı yajnıgapx yajnimıydāgıpy huıdıbı mııch ajcxy myajnajxp co y'oyıty. Oy mııch mjahuınjıhuıy Dios ytiy'ajt, per ca' huaad mdunıpy huıdı yı' mmıgūg ca' jāygıdāgy, e huın'ıt xyñıgapxıpy jıbcı. ¹⁷Canan Dios jadu'n ytiy'ajt xyñajtz'ane'mııyım huıdıjaty huaad njıxcım n'uucım, o huıdı ca' huaad njıxcım n'uucım. Hue' janchtıy ti xyñajtz'ane'mııyım nej jēbi tiydudāgyı ndzınaayım njıgy'ajtım. Nej jēbi jotcujc n'ıjtım mıid ajt nmıgūgtıjc. Nej jēbi jotcujc nayjıhuıyım mıid Dios ymıc'ajtı ma njot nhuınma'ñ. ¹⁸Co jadu'n nguyduunım nej Cristo ytiy'ajtı ti xyñajtz'ane'mııyım, huın'ıt jāygıdāgıpy Dios etz nañ jadu'n jāygıdāgıpy jāy ajcxy nej anajty nduunım.

¹⁹Tzoc panıcxım je huınma'ñ jadu'n nej jēbi ndzınaayım agujc jotcujc mıid ajt nmıgūgtıjc, ca' ma

ti tzıp ti capxy nmııd'ajtım. Tzoc yajtuunım je huınma'ñ jadu'n nej jēbi huaad naybubejtım nıdūg nıdūg nej jēbi huaad nguychinaayım Dios ytiy'ajtı. ²⁰Ca' huaad nyajtıgooyım Dios ytung mııd tzıp capxy jadu'n nej huıdı jēbi huaad ndzūdızım, etz huıdıbı ca' huaad ndzūdızım. Janch tiy'ajtı co Dios ca' ti jıcxı ti pıcy capx'aducy, per pen njıxcım huıdıjaty nıjējıty ajt nmıgūgtıjc yajcoboıjpy, e jadu'n nyajhuınma'ñydıgooyım ajtı nmıgūg, chí nmıduındıgooyım Dios ytiy'ajtı. ²¹Tıy'ajtı jadu'n co ca' huaad tzüch ndzūdızım etz ca' huaad vıno n'uucım, o jactıjaty huıdıbı ajtı nmıgūg yajcoboıjpy. Com co jadu'n ajtı n'ıdııdzım, hue' anajty ajtı nmıgūg nyajhuınma'ñydıgoyaanım ma ymıbıjcin. ²²Mııch ajcxy huıdıbı huınjıhuıyıb Dios ytiy'ajtı co Dios ca' capx'aducy ti jıcxın ti pıjcin, ca' mnımıydacconaxıpy mııd jāy ajcxy. Dios ñejhuıyıb co mııch mhuınjıhuıy yı' ytiy'ajtı. Jēbi jotcujc mdzınāhuıpy pen mguychinaayb je huınma'ñ huıdıbı mııch mnejhuıyıgıxıyp co ytudāgyıty, e huın'ıt ca' jıbcı mnayjıhuııhuıyıb ajcxy. ²³Tundıgooyb yı' mıgūgtıjc huıdıbı jotmetz jıcxp nıjējıty jıcxı pıcy, mıid co tzıgııy yı' co Dios ymıjotmādıyıb co ti jıcxı huıdı ytıjpy co ycobocy. Tundıgooyb jadu'n com ca' ti cuydunı Dios ytiy'ajtı nej cı'm ti yajnıguejy. Pen ca' nguyduunım jadu'n nej nhuınjıhuıyım Dios ytiy'ajtı, tundıgooyım anajty.

Tzojıcx mıgūgtıjc, ca' ñaydıg mnaychogyıı

15 İch ajtı huıdıbı tiydudāgy nmıbıjcin etz

nhuinjihuuyim Dios ytiy'ajt, copicy nmimecxtujcim ajt nmigügtijc huidibi ca'ni huinjihuuy yajxon Dios ytiy'ajt. Ca' huaad ti nduunim miid ngi'm jäygidaacin ycixpi. ²Copicy nyajtuunim oyhuinma'n miid ajt nmigügtijc, jadu'n nej jëbi ajt nmigüg jäygidägy, etz jadu'n nej jëbi nbubejtim ajt nmigüg miid ymibijcin. ³Com nañ Cristo ca' ti ytuñ miid yci'm jäygidaacin ycixpi, com jaybety jadu'n miñ ma Dios ñecy, ma je Cristo nimay Dios Teedy: "Miich mmidzip ajcxy huidibi xyñigapxp xyñi'ojiyib, xyñigapxpich xyñi'ojiybich ajcxy nañ jadu'n." ⁴Com tüg'óciy Dios y'ayuc huidibi ycojay jecy'ajty, hue' cojay miid iich ajt ycixpi, jigix jëbi Dios ytiy'ajt nbaatim. Dios ytiy'ajt xyajnejhuuyim co Dios jadu'n tzocy co nmimecxtujcim ajt nmigügtijc. Nañ Dios y'ayuc xyjot'amijmooyim, e nañ xyajnejhuuyim jadu'n jëbi njijp'ijxim pubejtin ma Dios. ⁵Com Dios, yi' je' huidi xypubejtim miid mecxtujcin, e nañ xyjot'amijmooyim, paady huen Dios may'ajt tunipy ma miich ajcxy mjot mhuinma'n, jigix jëbi mmid'idipy tú'ciy mjot mhuinma'n nej Jesucristo yjot yhuinma'n miidty, e jadu'n jëbi mnayyaj'oy'ijtigixy jotcujc ca' ma tzip capxy. ⁶Dios miich ajcxy xypubedipy xypudigihuipy, jigix jëbi myajtügigyixy mjot mhuinma'n, etz tú'ciy m'ojadajtcixipy mhuindzigigyixipy Dios Teedy etz iich ajt nHuindzin Jesucristo.

**Jesucristo y'ayuc yajcapxhuäcxy
ma huidibi ca' yjudíojäyity**

⁷Naygöb'ijcigix nidüg nidüg agujc jotcujc, tim jadu'n nej

Cristo xycöb'ijcixy agujc jotcujc. Co mnaygöb'ijcigixipy nidüg agujc jotcujc, huin'tit Dios capxpaady y'idipy. ⁸Janch tiy'ajt co Cristo y'oy ya naaxhuiñ, oy pubety judíojäy ajcxy, e jadu'n cuyduñ Dios ytiy'ajt huidi yajhuinhuaniy Abraham, Isaac etz Jacob jecy'ajty co jadu'n tuna'n miid yi' ajcxy ycixpi. ⁹Nañ jadu'n Cristo ooy pubejty yi huidibi ca' yjudíojäyity, jaydëbi ajcxy capxpaadipy Dios, miid co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David yminañ:

Com miich Huindzin Dios ti xycohua'nich paady miich ngapxpaady ma yi jäy ajcxy huidibi ca' yjudíojäyity. Hich miich nhuin'ihuipy miid himnos.

¹⁰E nañ jaybety jadu'n ymiñ ma Dios yñecy:

Jotcujc'ajtcixy quipxy miid Dios yjäy miich ajcxy huidi ca' yjudíojäyity.

¹¹E nañ jaybety jadu'n ymiñ ma Dios ñecy, ma jadu'n ymina'n:

Capxpaatcix yi Huindzin Dios miich ajcxy huidi ca' yjudíojäyity. Capxpaatcix yi Huindzin Dios miich ajcxy nidüg'óciy naaxhuiñyjäy.

¹²E Isaías ycojay nañ jadu'n ma yi' ñecy, ma jadu'n ymina'n:

Ma'xung'adamb tüg Isai y'ap y'oc, e yi' ane'mamb yi jäy huidibi ca' yjudíojäyity. Co yi jäy ajcxy huidibi ca' yjudíojäyity mijpidägipy je mij'ane'mbi, hue' ajcxy yjijp'ijxpy co möhuanip oy'ajt.

¹³Nmibijctzooybich Dios miid miich ajcxy ycixpi huidijaty mibijcp Jesucristo, com njijp'ijxim co Dios xymöhuaanim oy'ajtin. Nmibijctzooybich Dios miid miich ajcxy ycixpi co huen xyajjotcugihuij ajcxy, e nañ co huen xyajpooxixipy mjot mhuinma'ñ. Nmibijctzooybich Dios co huen xypubejtcixy xypudigiiygixy miid y' yjihui'ñ ymic'ajt, jaydëbi mjijp'ixipy ajcxy co mbaadip oy'ajtin mijcajee ma Dios.

¹⁴Miich ajcxy migügtijc, jotcuje nayjihuiyijich miid miich ajcxy ycixpi, com nejhuiybich co miich ajcxy miidity oyjot oyhuinma'ñ, e nañ mhuinjihuuiyb ajcxy tüg'óciy Dios ytiy'ajt, paady jëbi mnayyaj'ixp'icigixy nidüg nidüg. ¹⁵⁻¹⁶Jotmic'amy ti nyajjämejtzcodyich miich ajcxy nijëjity Dios ytiy'ajt ma jada necy huidi nyajnijayiyb ajcxy cham, com Dios may'ajt oy'ajt ti tuñ miid iich, e ti xyhuin'ixyich jaydëbi nduñich Jesucristo ytung ma yi jäy ajcxy huidi ca' yjudíojäyity. Jadu'n nduñich miid Dios ycixpi, co ngapxhuäcxyich je oybi tiy'ajt jadu'n nej Jesucristo y'o'cy miid jäy ajcxy ypocy ycixpi. Jadu'n Jesucristo ytuñ jigix jëbi Dios cöbigipy yi mayjäy ca'pi yjudíojäyity huidi ti mibicy Jesucristo etz huidibi yi Espíritu Santo ti yajhuäch je jibicp ma ajcxy yjot yhuinma'ñ.

¹⁷Com Jesucristo ytiy'ajt yajpaatp ma iich njot nhuinma'ñ, paady ycixp ooy jotcuje nayjihuiyijich co nduñich miid Dios ycixpi. ¹⁸Jada janchtiy iich nyajmiidmiydacy

miich ajcxy je may'ajt huidi Cristo ti tuñ co ngapxhuäcxyich y' y'ayuc. Ca' nyajmiidmiydaaccixy huidi Cristo ytumyb miid jacpinjaty. Miid co ngapxhuäcxyich Cristo y'ayuc, e nañ mijhuinma'ñ ndumybich miid Cristo ymic'ajt, paady mayjäy ycapxymidooyb Dios huidi ca'p ajcxy yjudíojäyity. ¹⁹Ti ngapxhuäcxyich tüg'óciy Cristo ytiy'ajt nej jëbi ajcxy y'alma nidoocin paadip. Jim nyajtzondacyich Jerusalén, e ti nhuidijttäyich canaag agajp mabaad nja'tyich jim Ilirico ñaaxjot. E Dios yjihui'ñ ymic'ajt xypubejtich xypudigiiyich co iich mijhuinma'ñ nduñich, etz Dios ytiy'ajt nyéjicibich. ²⁰Ooy nijot'atyich co ngapxhuäcxyich Jesucristo ytiy'ajt ma anajty ca' pin jayijp capxhuäcxyñi. Hich oga'n Jesucristo y'ayuc jim nminicxi ma yi jäy ajcxy huidi ca' anajty midoy Jesucristo ytiy'ajt. Jadu'n nduñich, jigix ca'ydi njijptigiiyich ma huingbi anajty jayijp ti capxhuäcxi Jesucristo ytiy'ajt. ²¹Com jaybety jadu'n ymiñ ma Dios ñecy, ma Dios jadu'n ymina'ñ:

Yi jäy ajcxy ymidohuanip Cristo y'ayuc huidibi ca'ni anajty midoogixy. Yi jäy ajcxy yhuinjihuiahuaamyb je Cristo ytiy'ajt huidibi ca'ni anajty nejhuiygixy co yjijity je Cristo.

Pablo huinmay co ñicxa'ñ jim Roma

²²Com ooy ndzachcapxhuäcxyich Cristo ytiy'ajt canaag agajp, paady ca' nyajnibadiyich nfcxibyich ma miich ajcxy. ²³Canaag

jimijt ndzachnijot'atyich anajty nicxa'ñich ma miich ajcxy. Ixti chamni ti nhuidijttäyich majaty anajty nhuidida'ñich. ²⁴Paady njijp'ijxypich co jëbi nnaxihuibich ma miich ajcxy co anajty nicxyich jim España ñaaxjot. Huäcxibaambich jim ma miich ajcxy jëbi hueeni ajcxy ngapxim nmiydaacim. Nañ hue' njijp'ijxypich co xypubedaambich miich ajcxy miid ndu'amgixpich. ²⁵Jayijp nnicxa'ñich jim Jerusalén, chiini nnicxa'ñich ma miich ajcxy. Nminicxaamybich jim Jerusalén hueeni meen hidibi nyegaamybich ma yi mibijcpidijc jim Jerusalén miid ayoobtjic ycixpi. ²⁶Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoobtjic jim Jerusalén hidibi mijpidacp Jesucristo. ²⁷Ooy ajcxy jotcujc ñayjihuiyii co ymigügtijc pubeda'ñ jim Jerusalén. Paatip co pubedipy ajcxy, com ma yi judíojäy ajcxy, jim ajcxy ti paady Dios ytiy'ajt, paady paatip ajcxy hididi ca' yjudíojäyity co pubedipy yi judíojäy ajcxy. ²⁸Co anajty ti nyajcidigiydaaygixy je meen hidibi yi migügtijc ya Macedonia etz Acaya ti yajmujccixy miid je mibijcpidijc ycixpi hidibi yajpatp jim Jerusalén, huin'it nnicxa'ñich jim España ñaaxjot. Nnaxihuaambich ma miich ajcxy co anajty jim nnicxich. ²⁹Nejhuiybich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt ijxpejt etz nyaj'ixpigiipyich miich ajcxy je Cristo ytiy'ajt.

³⁰Miich ajcxy nmigügtijcich, com miich ajcxy mijpidaaccixyp iich ajt nHuindzin Jesucristo, e com miich ajcxy miid Dios yjihui'ñ ymic'ajt ma m'aa mjot, e nañ ychojcpich xyjihuiybich, paady ycixp nbijctzooyich may'ajt, yajtügiygixy m'ayuc mhuinma'ñ miid iich, jëbi tú'ciy Dios nmibijctzoohuim mictägy miid iich ycixpi.

³¹Mibijctzoogix Dios co huen xyñihua'ñich xycohua'ñich ma yi judíojäy ajcxy jim Judea naaxjot, hidibi yxa'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin hidibi iich jim ngiyegaamy. ³²Mibijctzoogix Dios co huen xypubedipy xypudigihuibich, jëbi nixbich ma miich ajcxy agujc jotcujc, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotcujc, e jim iich mhuinma'ñ nyajpocxip.

³³Mibijctzooybich Dios miid miich ajcxy ycixpi, je Dios hidibi jotcujc'ajtin yejcp, co huen miich ajcxy xypubedipy xypudigihuiy. Jadu'n jadu'n. Amén.

Capxpoox'in nidüg nidüg ma pinjaty y'ixy'ajtyp

16 Cham iich miich ajcxy nyajniybiccixy, cöbijccixy je ajt nmigüg töxyjäy je Febe co anajty ñicxy ma miich ajcxy. Yi' je' nidügti hidibi pubejtin tumb ma je mibijcpidijc jim Cencrea. ²Mdunipy may'ajt mgöbigipy Febe miid ajt nHuindzin Jesús ycixpi. Com jadu'n ycopyity co jäy hidibi mibijcp

Jesucristo huen naymigiüg'ájtigixy. Mbubedip mbudigihuiþ jadu'n nej yi' jotmay miidity. Yi Febe ti ooy mayjäy pubety, e nañ ti xypubetyich.

³Nguejxypyich capxpooocxin ma jada necy miid yi Priscila etz Aquila huidibi iich anajty miid ooy oy nduñ co ngapxhuäcxyich Cristo ytiy'ajt. ⁴Yi Priscila etz Aquila vojx ytooc ajcxy yjugy'ajtin miid iich ycixpi, ca'ydi n'ögyich. Nyajnajxypich jäygidaacin ma Dios miid yi' ajcxy ycixpi, co ti xypubetyich ajcxy. E nañ jadu'n tüg'óciy jäy ajcxy huidibi ca'pi yjudíojäyity yajnajxcixy jäygidaacin ma Dios miid yi' ajcxy ycixpi. ⁵Nguejxypich capxpooocxin nañ jadu'n ma jada necy miid yi mibijcpidijc ajcxy huidijaty naymujccip ma Priscila etz Aquila ajcxy ytiyc. Etz nañ nguejxpyich capxpooocxin ma yi Epeneto huidibi ooy ndzocyich. Yi' je' tim jayijp huidibi mijpidaac Cristo jim Acaya ñaaxjot. ⁶Etz nañ nguejxypich capxpooocxin ma María, yi' ooy ti ytuñ miid miich ajcxy miid Cristo ycixpi. ⁷Etz nañ nguejxpyich capxpooocxin ma yi Andronico etz Junias. iich n'amigüg ajcxy huidibi ti ypujxtijc iñäy quipxy miid iich. Capxpaady ajcxy y'ity miid yi apóstoltijc. Jacjayijp ajcxy mijpidacy Jesucristo ca'ydi iich.

⁸Etz nañ nguejxypich capxpooocxin ma yi Amplias, huidibi ooy yajxon mijpidägy ajt nHuindzin Jesucristo. ⁹Nañ nguejxypich capxpooocxin ma yi Urbano huidibi xymiidtuñich co iich anajty ngapxhuäcxyich

Jesucristo ytiy'ajt. Nañ jadu'n nguejxypich capxpooocxin ma yi Estaquis huidibi oy ndzocy njihuüyich. ¹⁰Nañ nguejxpyich capxpooocxin ma yi Apeles, huidibi ooy tiy'ajt ti yecy co yi' ymibijcipy Cristo tiydudägy. Nañ nguejxypich capxpooocxin ma yi Aristóbulo etz jac pinjaty huidibi yajpatp ma yi' ytiyc. ¹¹Nañ nguejxypich capxpooocxin ma iich n'amigüg yi Herodiön. Etz nañ nguejxypich capxpooocxin ma yi Narciso yjuugy ymigüg huidibi mijpidacp iich ajt nHuindzin Jesucristo. ¹²Nañ nguejxypich capxpooocxin ma yi Trifena etz Trifosa huidijaty tumb ma ajt nHuindzin Jesús ytung. Nañ nguejxypich capxpooocxin ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³Nañ nguejxypich capxpooocxin ma yi Rufo, je huidibi yi mibijcpidijc ycömaayb. Nañ nguejxypich capxpooocxin ma yi' ytaj, com jadu'n njihuüyich jadu'n nej jihuiy yi' ndaj'adyijjich. ¹⁴Nañ nguejxpyich capxpooocxin ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huidi jim yajpatp ma yi' ajcxy. ¹⁵Nañ nguejxpyich capxpooocxin ma yi Filólogo, yi Julia, yi Nereo etz yi' y'uch töxyjäybi, yi Olimpas, etz nañ tüg'óciy yi mibijcpidijc huidibi yajpaatp jim ma yi' ajcxy. ¹⁶Naygapxpóocxigix xic xon nidüg nidüg. Naygimájtzigix miñ yxipy agujc jotcujc. Tüg'óciy huidibi mibijcp Jesucristo ma yi jacjaydyii

cajp, yquejxyp ajcxy capxpooocxin ma miich ajcxy.

¹⁷Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huidibi mimiimb ayuc ca'pi ytiy'ajitity, huidibi nigooob yjäyyajtziptuna'n yjäybijc-huäcxa'n, huidibi ca' ixa'n yi Dios ytiy'ajt huidibi ti m'ixpijccixy. Puuhuäctüd miich yi' ajcxy. ¹⁸Com yi jäy ajcxy huidibi ymigügtijc yajhuinma'n ydigoooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'n yci'mdzojcin. Je' ajcxy huin'iinixixp je jäy ajcxy huidibi ca' mijcajee y'ixpicity. Yi ayuc huidibi ymihuidijtyp, jadu'n yajmidoy nej jihuiy oy ytiyity yjanchity, per ca' yi' yjanchity. ¹⁹Com mayjäy ti xyajmidooyich jadu'n nej miich ajcxy mgapxymidoy Jesucristo, paady jotcujc nayjihuiyijich miid miich ajcxy ycixpi. Ndzojcypich co miich ajcxy mnejhuihuipy huidibi oyhuinma'n jaydëbi mdúngixipy ajcxy etz ca' jibic-huinma'n mdúngixipy. ²⁰Dios oyhuinma'n etz mic'ajt ti xymooyim jëbi ndzinaayim miid ajt nmigügtijc agujc jotcujc, ca' ma tzip capxy. Tim huigon je xii je tiempo mina Dios yajcödigoya'n yi mujcu' ymic'ajt, e yi' xypubedip xypudigihuij jëbi mmimadägipy yi ca'oybi. Nmibijctzooybich Dios miid miich ajcxy ycixpi co iich ajt nHuindzin Jesucristo huen may'ajt oy'ajt tuñ miid miich ajcxy jabom jabom.

²¹Je Timoteo huidibi tumb miid iich co ngapxhuäcxich Jesucristo ytiy'ajt xyajniguejxp ajcxy

capxpooocxin. Nañ jadu'n Lucio, Jasón etz Sosípater iich n'amigüg ajcxy, xyajniguejxp capxpooocxin.

²²Iich Tercio huidibi cojaayb Pablo y'ayuc ma jada necy, nañ nguejxypich capxpooocxin ma miich ajcxy, com iich nañ jadu'n nyajpaadyich ma ajt nHuindzin Jesucristo.

²³Nañ jadu'n Gayo xyajniguejxp capxpooocxin, yi' xyajjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytiy'ajcxy ajcxy capxpooocxin ma miich ajcxy. Erasto je cajp ytesorero etz ajt nmigüg huidibi yxii Cuarto, nañ xyajniguejxp ajcxy capxpooocxin.

²⁴Nmibijctzooybich Dios miid miich ajcxy ycixpi jabom jabom co iich ajt nHuindzin Jesucristo huen may'ajt oy'ajt tuñ ma miich ajcxy. Amén.

Je capxpooocxin ma yaj'iibaady yajcapxpaady Dios

²⁵Tzoc cömayim Dios, tzoc ojadajtim, tzoc huin'ihuum miid himnos. Dios miid ymic'ajt jëbi xypubedipy xypudigihuij ajcxy, jaydëbi ajcxy tiydudägy mmibigipy Jesucristo, ca'yd'i mjetmetzciiyigixy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyii jäy ycapxhuäcxixyp. Jada je tiy'ajt huidibi jecy'ajty ca' pin huinjihuuy huidibi Dios ti xyajnejhuuiyim.

²⁶Dios ti xyajhuinjihuuiyim nej yhuimbizimye je ayuc huidibi je profetas ajcxy ycojay jecy'ajty. Dios huidibi tzinaayb huinixii

huinitempo, ane'mb co huen
 yajcapxhuäcxy jada tiy'ajt oybi
 ma tüg'óciy naaxhuiñyäj, jigix
 jëbi mayjäy mijpidägip etz
 capxymidoohuipy Dios.

²⁷Miid co Jesucristo
 ooy mijhuinma'ñ tuñ miid

iich ajt ycixpi, paady tzoc
 cömayim, tzoc ojadajtim
 etz tzoc huin'ihuim miid
 himnos huinixii huinitempo
 yi tügpajcpi Dios huidibi
 ñejhuiydaayb tüg'óciy. Jadu'n
 ngapxcíxyich. Amén.

1 CORINTIOS

Yi Midügpi Necy Huidibi San Pablo Yajnigüeje Je Mibijcpidije Jim Corinto

1 ¹⁻² Hich Pablo, Dios jadu'n tzojep co Jesucristo xyajñibicyich co ngapxhuäcxibyich yi' y'ayuc. Hich etz ajt nmigüg Sóstenes nijayiybich miich ajcxy tüg'óciy huidibi jim Corinto huidibi mijpidacp Dios etz ñayyömmüjcgixy jim miid Dios ycixpi. Nijayiybich miich ajcxy huidibi Dios ti yaj'ahuimbijttäy tudägy miid Jesucristo co y'o'cy miid ajcxy mbocy ycixpi. Nijayiybich miich ajcxy huidibi Dios ti huin'ixy, jaydëbi mmiid'idipy huädz jot huädz huinma'ñ. Nañ jadu'n nijayiybich tüg'óciy je jäy huenyma'amyity huidibi Dios mibijctzoob ojadajtp miid hich ajt nHuindzin Jesucristo yxi. ³ Ndozocypich co hich ajt nDios Teedy etz ajt nHuindzin Jesucristo oy'ajt may'ajt tunipy miid miich ajcxy, etz xyajjotcugihuipy ajcxy.

Oy'ajt miid Cristo ycixpi

⁴ Nyajnaxypich Dioscojuyip ma Dios jabom jabom miid miich ajcxy ycixpi, miid co Dios may'ajt oy'ajt ti tuñ miid miich ajcxy ycixpi ma Jesucristo. ⁵ Co ti mmijpidaaccixy

Jesucristo, oybi ti mbaatcixy ma tüg'óciy mdzinaayin mjogy'ajtin. May'amy capxy ayuc oybi ti mbaatcixy, etz may'amy huinma'ñ oybi ti mbaatcixy. ⁶ Ma miich ajcxy mdzinaayin mjogy'ajtin etz mgapxy m'ayuc ñiguëxigipy Cristo ytiy'ajt etz ymic'ajt. ⁷ Dios miich ajcxy ti xymöy tüg'óciy ymic'ajt. Ca' ti myajtgoy'ijtcixy ma mdzinaayin mjogy'ajtin huidibi Dios ñiyejcpy, ma je' m'ahuijxcixy co Dios yajniguëxiga'n jadüg'oc ya naaxhuiñ ajt nHuindzin Jesucristo. ⁸ Jesucristo miich ajcxy xyhuijtz'ijtp tudägy, ixti cooni ycixipy tigoyipy je naaxhuiñybi, e co anajty yi' tiyduñ naaxhuiñyjäy ajcxy miid ypocy ycixpi, ca' miich ajcxy mbocycähuipy. ⁹ Dios yjatytimycuydunipy yi' y'ayuc miid miich ajcxy, ca' xy'ixmadzaangixy ni mina xi, com yi' ti xyhuin'ijxcixy co miid mnaymigüg'ajtigixy yi' y'ung, hich ajt nHuindzin Jesucristo.

Naybije-huäcxii ma je mibijcpidije

¹⁰ Migügtijc, hich miich ajcxy nminucxtacy miid Jesucristo

yxii co tungixy may'ajt
 nay'ayuc-huinjihuiyigix, e ca'
 mnaybije-huäcxigixy. Tzinaaygix
 xic xon miid tú'ciy mjet mhuinma'n.
¹¹Miich ajcxy migügtijc, ti je Cloé
 y'amigügtijc xyajnmäyich co ooy
 miich ajcxy mnaychip'l'ixigixy, e ca'
 mnay'ayuc-huinjihuiyigixy. ¹²Miid
 jada ycixpi nmina'n'ñich co nijëjity
 miich ajcxy jadu'n minaangixy:
 "ñich Pablo nmijnicxpejtpyich."
 E nijëjity yminaangixy: "ñich
 Apolos nmijnicxpejtpyich." E
 nijëjity yminaangixy: "ñich
 Pedro nmijnicxpejtpyich." E
 nijëjity yminaangixy: "ñich Cristo
 nmijnicxpejtpyich." ¹³¿Nej Cristo ti
 ñaybije-huäcxyii? Ca'. ¿Nej Pablo
 yajcruudzpejti miid miich ajcxy ycixpi?
 Ca'. ¿Nej ti miich ajcxy mnäibejtcixy
 miid Pablo yxii? Ca' yjadu'nity.
¹⁴Nyajnajxypich Dioscojuyip ma Dios
 co ca' jac ni pin iich ti ngayajniibety.
 Jëda'ajty ti nyajniibetyich Crispo etz
 Gayo. ¹⁵Jadu'n ti nduñich je'gixpi co
 ca' huaad jäy ajcxy yminaangixy co ti
 ajcxy ñiibety miid Pablo yxii. ¹⁶Nañ
 jadu'n ti nyajniibetyich yi Estéfano
 miid yi' yjuugy ymigüg ajcxy. Jac ni je'
 ca' njäymechich pen ti nyajniibetyich.
¹⁷Com Cristo ca' xyquejxyich
 jäy yajniibejtpi. Hue' janchtiy ti
 xyquexyich co ngapxhuäcxibich yi'
 y'ayuc ytiy'ajt oybi. Ca' nyajtuñich
 ixpicytije y'ayuc yhuinma'n. Co ixypy
 nyajtuñich ixpicytije y'ayuc yhuinma'n,
 naadig'i'ajt ixypy co Cristo y'o'cy ma yi
 cruudz miid ajt nbocy ycixpi.

**Cristo ymiid Dios ymic'ajt etz
 yi' y'ixpijcin etz ytiy'ajt**

¹⁸Yi jäy ajcxy huidibi y'alma
 tigoyam, loci huinma'n yi' tijcixy

co Cristo y'o'cy ma yi cruudz
 miid ajcxy ypocy ycixpi. Per iich
 ajt pinjaty y'alma nüdögam, hue'
 minaanim co jada ayuc tiy'ajt
 miid Cristo ycixpi, ymiid yi' Dios
 ymic'ajt. ¹⁹Com jaybety jadu'n ma
 Dios ñecy, ma Dios jadu'n ymina'n:

Nyajtigoyaamybich yi ixpicytije
 y'ayuc yhuinma'n.

Njibijcibich yi
 cohuinma'ñyäjdyjc ajcxy
 yhuinma'n.

²⁰¿Ti mic'ajt ymiid yi
 cohuinma'ñyäjdyjc ajcxy? ¿Ti
 mic'ajt ymiid yi ixpicytije? ¿Ti
 mic'ajt ymiid yi huidibi ajcxy
 nay'ixquipix miid ixpijcin? Ca'
 ti mic'ajt miidity yi' ajcxy, com
 Dios ti yaj'ahuimbity yi naaxhuiñ
 y'ixpijcin tzuu huinma'n loci
 huinma'n. ²¹Com Dios jadu'n ti
 tzocy co jäy ajcxy ca' padaangixy
 Dios ytiy'ajt ma yi naaxhuiñjäy
 ajcxy y'ixpijcin. Dios yjäygidacpy
 co jëbi jäy ajcxy y'alma nüdögipy
 co ajcxy mibigipy je Dios y'ayuc
 huidibi ngapxhuäcxypich. Je Dios
 y'ayuc ytiy'ajt huidibi iich ajcxy
 ngapxhuäcxpy, yi' yi naaxhuiñyäj
 ajcxy huinjihuiyigixyp nej tzuu
 huinma'n loci huinma'n.

²²Yi judfojäy ajcxy ooy
 tzachtzojccixy co Dios tunipy
 ijxpejt mijhuinma'nybi. Yi griego
 jäy y'ixtaaygixyp ayuc huinma'n
 etz huenhuüdiibity ixpijcin. ²³ñich
 ajcxy ngapxhuäcxich co Cristo
 y'o'cy ma yi cruudz miid jäy ajcxy
 ypocy ycixpi. Yi maybi judfojäy
 ajcxy ca' mijpidägaangixy ca'
 cöbigaangixy iich ajcxy n'ayuc.
 Etz yi maybi jäy ajcxy huidibi
 ca'p yjudfojäyity, hue' tijcixy co

tzuu huinma'n loci huinma'n iich ajcxy n'ayuc. ²⁴Per yi jäy ajcxy huídibi Dios ti yhuin'ijxigixy, huen yjudíojäyity, o huen ycajudíojäyity, hue' ajcxy tijcixy co je Cristo ymiid anajty Dios ymic'ajt etz ymiid anajty Dios y'ayuc ytiy'ajt. ²⁵Co ixpicytije tijcixy co Dios ytung, tzuu huinma'n loci huinma'n je', niği jac'oyhuinma'n yi' huídibi Dios tumyb, ca'ydi huídibi jäy ajcxy ytumyb. Co ixpicytije ymınaangixy co Dios ca' ymic'ajt miidity, niği jacmic'ajt miid yi', ca'ydi huídi jäy ajcxy ymiid.

²⁶Migügtije ajcxy, huinmay miich ajcxy jadu'n nej Dios ti xyhuin'ijxcixy. Ni may miich ajcxy huídibi ca' y'ixpicyty, tim nihueeni huídibi ixpicyip ma miich ajcxy. Ni may miich ajcxy huídibi ca' ti mic'ajt, ca' ti ane'min miidity. Ni hueen miich ajcxy huídibi mic'ajt miid etz ane'min miid. Ni may miich ajcxy huídibi oyñipinjäyity. Ni hueeni miich ajcxy huídibi y'ap yteedy rey'ajtp. ²⁷Per Dios ti huin'ixy yi jäy ajcxy huídibi ca' y'ixpicyty co jadu'n yajtzo'yduna'n yi ixpicyjäy yi cohuinma'njäy. Dios ti huin'ixy yi jäy ajcxy huídibi ca' ti mic'ajt miidity, miid co jadu'n yajtzo'yduna'n yi jäy ajcxy huídibi mic'ajt miid, ane'min miid. ²⁸Dios ti huin'ixy huídibi jäy ajcxy ca' mij'ijx mijpidaaccixy, huídibi jäy ajcxy ytiippy co ca' y'oyity. Dios jadu'n tuuñ co yajcödígoya'n yi huídibi jäy ajcxy mij'ijxp mijpidacp, je huídibi jäy ajcxy ytiippy co y'oyity. ²⁹Jadu'n Dios ytuñ co ca' tzocy co ni pinjäy ca' ñaygömayiib ci'm ma yi' yhuinduu. ³⁰Per Dios

ci'm yaj'oyiyy nej jëbi miich ajcxy myajpatcixy miid Cristo Jesús. Dios ci'm yaj'oyiyy nej jëbi ajt nbaatim ixpícin ma Cristo. Nañ jadu'n yaj'oyiyy nej jëbi Cristo xyaj'ahuimbijtim tudägy, jaydëbi Dios xycöbícim nej tudägy jäy. Nañ jadu'n Dios yaj'oyiyy nej jëbi huaad nbaatim ajt nhuádzjot nhuádzhuinma'n ma Cristo. Nañ jadu'n Dios yaj'oyiyy nej jëbi Cristo xyñihuaanim ajt n'alma etz njugy'ajtin. ³¹Paady ycixpi jaybety ymiñ ma Dios ñecy, ma jadu'n ymına'n: "Pinjaty naygömayaanip ci'm, huen naygömayii miid co mibicy ajt nHuindzin Dios."

Je y'ayuc ytiy'ajt, je Cristo huídibi cruudzpejt

2 Per co n'oyich ma miich ajcxy jayhuin, ngapxhuäcxyich anajty Dios y'ayuc ytiy'ajt, oy'amy nyaj'ixpíjcyich, ca' nyajtuñich ixpicyjäy ajcxy y'ayuc, etz nañ jadu'n ca' nyajtuñich tzipjatypi ayuc. ²Co jim n'ijtyich ma miich ajcxy jayhuin, chi nhuinma'nybidacyich co ca' jac ti ayuc ti huinma'n nyajmiidmiydägaangixy, jè'yi janchtiy nyajmiidmiydägaangixy Jesucristo etz jadu'n nej je' yajcruudzpejti miid jäy ajcxy ypocy ycixpi. ³Co jim iich anajty nyajpaadyich ma miich ajcxy, chi ooy yung naxy naybidaacich, ooy ndzigíyy njihuiyich. ⁴E co nmíidmiydaacyich miich ajcxy, co ngapxhuäcxyich Dios ytiy'ajt ma miich ajcxy, ca'pi iich miich ajcxy nyajmibicy miid ixpicytije y'ayuc miid tzipjatypi ayuc. Je

Espíritu Santo xypubejtpich anajty co ajcxy nyaj'ijxy Dios ymic'ajt, e paady ycixpi ti ajcxy mmibijccixy Dios y'ayuc. ⁵Jadu'n je Espiritu Santo xypubetyich anajty, jigix miich ajcxy mijpidägipy Dios, ca' nminaanim miid co ti mmidoogixy oyjatypi ayuc huidibi jäy ajcxy ti cojy ti macxy. Ti mmijpidaaccixy Dios com ti m'ijxcixy ti mjihuiygixy Dios ymic'ajt.

Dios xyajnejhuiyim yi' ytiy'ajt miid y'Espiritu Santo

⁶Oy co ti nyajmibicyich miich ajcxy miid ayuc huidibi ca' chipjatyity, per nañ jadu'n nyaj'ixpicyich oyjatypi ayuc tzipjatypi ayuc yi mibijcpidijc ajcxy tiibi yhuinma'n ymiinni ymejchni. Tigachjaty iich n'ayuc ndiy'ajt e ca' ñaybadyii miid naaxhuiñjyäj ajcxy y'ayuc ytiy'ajt huidibi ca' mibijccixy huidibi tzinaayb jugy'ajtp jadachambi xii jadachambi tiempo. Hich n'ayuc ndiy'ajt ca' ñaybadyii miid je jäy ajcxy y'ayuc ytiy'ajt huidibi ane'mb ya naaxhuiñ, yi jadu'mbi jäy yi' ajcxy yjugy'ajtin cixamb tigoyamb tücc'yi. ⁷Hich ajcxy nyaj'ixpijcpy Dios y'ayuc ytiy'ajt huidibi ca' ni pin jecy'ajty nejhuüy huinjihuüy, je ayuc tiy'ajt huidibi Dios ymiid coyuch, je ayuc tiy'ajt huidibi Dios ti cojy ti macxy jecy'ajty ca'ni anajty naaxhuiñybi chondacy. Dios ycoj ymacx jada ayuc, jaydëbi ajt n'alma ñidzoocim huinixii huinitempo. ⁸Ni tüg mij'ane'mbi huidibi tzinaayb jadachambi xii jadachambi tiempo, ca' huinjihuüy jada ayuc. Co ixypy ajcxy huinjihuüy, ca' ajcxy

cayajcruudzpejty je Huindzin Dios y'ung, je huidibi miid Dios y'oy'ajtin ymij'ajtin. ⁹Com ca' ajcxy huinjihuüy Dios y'ayuc, paady ycixpi jaybety ymiñ ma Dios ñecy, ma jadu'n ymina'n:

Ni tüg jäy ca' icy, ni tüg jäy ca' midoy, ni tüg jäy ca' yhuinma'ñybaady jadu'n nej Dios ni'ixy miidity miid je jäy ajcxy ycixpi huidibi yi' mijpidaacip yajmij'ajtip.

¹⁰Miid co nmijpidaacim Dios, paady ycixpi Dios yaj'oyiij nej jëbi je Espiritu Santo xyajnejhuiyim yi' ytiy'ajt. E je Espiritu Santo yhuinjihuüydaayb ñejjihuiydaayb tüg'óciy, ixti yhuinjihuüydaayb nej Dios yhuinma'n ti pidägy co tuna'n, je huidibi ca' pin nejhuüy.

¹¹Ca' pinjäy jëbi huinjihuüy nej jadügpä jäy yjot yhuinma'n miidity. Je jäy yci'mhuinma'n jëbi huinjihuüy nej je' yci'mjot yci'mhuinma'n miidity, ca' jac pin. Nañ jadu'n ca' jac pin jëbi huinjihuüy nej Dios yjot yhuinma'n miidity. Dios yci'mjihui'n huinjihuüy nej Dios yjot yhuinma'n miidity. ¹²Dios ca' xyaj'adigiiyim xyajjottigiiyim huingjäy yjihui'n ymic'ajt. Hue' Dios xyaj'adigiiyim xyajjottigiiyim yi' yci'mjihui'n yci'mmic'ajt, paady ycixp jëbi nhuinjihuüy tüg'óciy huidibi ti xymooyim. ¹³Hich ajcxy nyajmiidmiydacpy miich ajcxy je ayuc tiy'ajt huidibi je Espiritu Santo xyaj'ixpijccixyich. E ca' nyajmiidmiydaaccixy je tiy'ajt huidibi ti n'ixpicyich ya naaxhuiñ huidibi jäy ajcxy ti cojy ti macxy. Nyaj'ixpijccixy Dios y'ayuc ytiy'ajt huidibi je Espiritu

Santo xyajnejhuhiiyich. Hich ti nyaj'ixpicyich yi' ajcxy huidibi miid Dios yjihui'n ymic'ajt ma y'aa yjot.

¹⁴Pinjaty ca' miidity Dios yjihui'n ymic'ajt, ca' yi' cöbiga'n je tiy'ajt huidibi je Espiritu Santo xyajnejhuhiiyim. Com yi' ajcxy ytijp co jada tiy'ajt tzuu huinma'n loci huinma'n yi'. Nañ ni ca' ajcxy Dios ytiy'ajt huinjihuiyi, com ca' ajcxy miidity Dios yjihui'n ymic'ajt huudibi yajnejhuhiiyb Dios ytiy'ajt. ¹⁵Je jäy huidibi ymiid'ajtipy Dios yjihui'n ymic'ajt, yi' jëbi yajcüyöy yajteccyöy tüg'öciy pinjaty yjot yhuinma'n. Per ca' yi' huaad pinjaty yajcüyöy yajteccyöy yjot yhuinma'n. ¹⁶Com jadu'n Dios ymina'n ma ñecy: “¿Pin jäy huinjihuhiiyb nej Dios yhuinma'nymiidity? Ca' ni pin. ¿Pin jäy huaad Dios yaj'ixpicy? Ca' ni pin.” Oy ca' pin huinjihuhiiy jecy'ajty nej Dios yhuinma'nymiidity, jadachambi iich ajt nhuinjihuhiiyim nej Cristo yhuinma'nymiidity.

Je huidibi ajcxy mibijcp ytungixy ma Dios

3 Migügtijc ajcxy, co ti n'oyich ma miich ajcxy, chi nmiidmiydaaccixy jadu'n nej jihuhiiy miich ajcxy mhuinma'nymiidity nej naaxhuinäjy ajcxy yhuinma'nymiidity huidibi ca' ymibijccixy. E ca' anajty miich ajcxy miidity je mhuinma'n huidibi je Espiritu Santo yejcpy. Miich ajcxy mmibijcin ma Cristo jadu'n yi' nipaady nej ma'xungdijc ymibijcin. ²Ti nyaj'ixpajccixy Dios y'ayuc huidibi ca' jëbi tzip mhuinjihuhiiygixy. Jadu'n

nipaady nej jäy ajcxy yaj'ügy leche yi ma'xungdijc, miid co cacöbiga'n caayin uucin huidibi jemxy cidacp ma yjot. Ca' miich ajcxy anajty ti mnayñ'ixiiygixy ma mjot mhuinma'n nej jëbi mhuinjihuhiiygixy Dios y'ayuc yi tzipjatypi. Chambaadni ca' mnayñ'ixiiyiini ajcxy ma mjot mhuinma'n nej jëbi mhuinjihuhiiygixy yi tzipjatypi ayuc. ³Chambaadni miich ajcxy myajtuñ mjot mhuinma'n jadu'n nej naaxhuinäjy ajcxy miidity huinma'n ca'pi ymibijccixy, chambaad mmi'ijxtinaaygix yi migügtijc, chambaad mnaychip'ixgix naybijc-huäcxigix. Jadu'n m'idiitczixy nej jacjadyii jäy ajcxy y'idiitczixy huidibi ca' ymibijccixy. ⁴Com nijjëjity miich ajcxy minaangixy: “Hich naygomajtzip ma Pablo.” Etz nijjëjity minaangixy: “Hich naygomajtzip ma Apolos.” Jada je tiy'ajt co ca' mnay'ayuc-huinjihuhiiygixy tim jadu'n nej jäy ajcxy ca' nay'ayuc-huinjihuhiiygixy huidibi ca' miidity Dios yjihui'n ymic'ajt.

⁵¿Pin je' je Apolos? ¿Pin je' je Pablo? Hich Pablo etz Apolos nimetz ajcxy nduñ ma Dios ytung, e iich miich ajcxy nyajmibijccixy Cristo. Hich ajcxy nduñ nidüg nidüg je tung huidibi Dios xymooyich. ⁶Hich jayjip'aty miich ajcxy ti nyaj'ixpicyich, e Apolos jac'axam. Jadu'n miich ajcxy nipaady nej tüg moc cam huidibi iich ti nnipy, e Apolos jac'axam ti pidägy nii. Per Dios ti yajyeegy je moc. ⁷Ca' ytimyñejity pin ti yñipy, e pin ti pidägy je nii. Dios yi' tügpaç

copicyip. Com yi' yajyeecp je moc. ⁸Yi' huidibi niip etz yi' huidibi nii pidacp, quipxyjaty ajcxy. Dios yegamb je oy'ajt ma nidüg nidüg jadu'n nej anajty ti ytungixy. ⁹Com iich etz Apolos naymigüg'ájtibich ajcxy ma Dios ytung. Jadu'n miich ajcxy nipaady nej Dios ycam huidibi Apolos ti tuñ etz huidibi iich ti nduñ.

Nañ jadu'n miich ajcxy nipaady nej tüg tijc huidibi Dios ycojpy. ¹⁰Dios ti xyajni'bicyich yi' ytung ndunipyich. Ti nyaj'ixpicyich miich ajcxy Dios y'ayuc ytiy'ajt. Jadu'n iich nipaady nej tüg pojtzpi oybi huidibi ti yajtzondägy je tzaadijc poch. Chi huingjäy xyjacyaj'ixpijccixy. Jadu'n yi' nipaady nej huingbi pojtzpi huidibi je tzaadijc poch jacjijppodziiyb. Copicy co nidüg nidüg huidibi yaj'ixpijcp Dios ytiy'ajt yajxon yaj'ixpijccixipy. ¹¹Dios ti pidägy Jesucristo tügpajc huidibi huaad nmibijcim, e ca' huaad pidacy huingbi. Jadu'n Jesucristo nipaady nej tüg tijcpoch chondägy. ¹²Co pinjaty yaj'ixpicy Dios y'ayuc ytiy'ajt tiydudägy, chi jadu'n nipaady nej jihuüy pinjaty tijcpojtzp miid ori, miid plata etz miid tzaa oyjatypi. Pinjaty ca' yaj'ixpicy yajxon Dios ytiy'ajt, jadu'n nipaady nej jihuüy pinjaty tijcpojtzp miid quipy, miid miy, etz miid moc'aay. ¹³Jiini co anajty xii tiempo paady mina Cristo tiyduna'n yi' yjäy huin'it ñiguëxigipy nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n

nipaady nej Dios jiin pidägy ma je tijc, e je quipy, je miy, etz je moc'aay tigoydähuipy ma je jiin. Etz je ori, plata etz tzaa oyjatypi ca' ytigoydähuipy miid je jiin. ¹⁴Peni oy yajxon pinjaty ti yaj'ixpicy Dios ytiy'ajt, chi Cristo premio möhua'n jada jäy co ooy yajxon ti yaj'ixpicy. E jadu'n yi' ytung nipaadip nej je ori, plata, etz tzaa'oyjatypi huidibi ca' ytigooy ma je jiin. ¹⁵Pen je Dios ytumbi ca' oy yajxon ti yaj'ixpicy Dios y'ayuc ytiy'ajt, chi ca' premio pada'n. Jadu'n yi' ytung nipaadip nej je quipy, je miy, etz je moc'aay huidibi ti ytigoy ma je jiin. Jadu'n nipaadip miid jada jäy nej jihuüy ti ñaxy jiinjoty, e ti ytigoydäy ma je jiin tijaty ymiid, je'yi yjugy'ajtin ti yajtzögy.

¹⁶¿Nej ca' mnejhuüiygixy? Pen Dios yjihuü'n ymic'ajt yajpat ma miich ajcxy, jadu'n nipaady nej jihuüy Dios ci'm ti chinaydacpicy ma miich ajcxy, nej jihuüy miich ajcxy Dios xytijc'adyii. ¹⁷Pen ji pinjaty huidibi yajhuindigoy Dios chinaydac, huin'it Dios yajtigoya'n jada jäy. Yi Dios chinaydac huädz'it amay'it yi', com Dios ti chinaydacpicy ma miich ajcxy huidibi mibijccixp.

¹⁸Ix mnayhuin'íinigix ci'm. Pen nidügti miich ajcxy mnaydiyiyi co oy ixpicyity ma naaxhuünyjäy y'ixpijcin, copicy jäydigoyipy yi' y'ixpijcin, jigix ixpigipy Dios ytiy'ajt. ¹⁹Yi naaxhuünyjäy y'ixpijcin jadu'n nipaady miid Dios nej tzuu huinma'n loci huinma'n. Paady jadu'n yjaybetyity ma Dios ñecy ma jadu'n ymina'n: "Dios yajpocycähuip yi

ixpicytjic miid yci'm'ayuc miid co chachnaygömayii.”²⁰ E jadu'n yjaybetyity jadüg'lit ma Dios ñecy ma jadu'n ymina'n: “Je Huindzin Dios ñejhuiyb co yi xpicitytjic y'ayuc yhuinma'n ca' choobaady.”²¹ Ni pin ca' huaad amij agix ñayjihuiyii, miid co mijnicxpety oyñipin y'ayuc. Miich ajcxy miid'ajttaayb tüg'óciy tijaty.²² Miich ajcxy miid'ajtpy Pablo, Apolos etz Pedro. Nañ jadu'n miich ajcxy miid'ajtpy je naaxhuiñybi, je tzajp, je jugy'ajtín, je o'cin, je xii je tiempo huidibi ji yajpatp, etz huidibi mim cidaacp.²³ Je Cristo miid'ajtpy miich je' ajcxy ci'am etz Dios ymiid'ajtpy Cristo ci'am.

Je apóstoles ajcxy ytung

4 Jëbi jadu'n co iich etz Apolos, iich miich ajcxy xytjicixy Cristo ytumbi huidibi Dios ti xyajniñijcixyich, nyaj'ixpñijcixyich etz nguend'ajtcixyich yi' y'ayuc ytiy'ajt huidibi jecy'ajty ca' pin nejhuüy huiñjhuüy.² Pinjaty cuend'ajtp huingjäy yje', copicy tiydudägy ytunipy, jaydëbi yi' yhuindzin yjäygidägyiyb yi' ytung.³ Per ca' ooy nduñich cuendi co miich ajcxy xyajciyöy xyajtecyöyï iich nbocy. Nañ jadu'n ca' ooy nduñich cuendi co ixypy tüg juez yajciyöy yajtecyöyï iich nbocy. Nañ jadu'n ca' nyajciyöyich nyajtecyöyich ngi'mbocyich.⁴ Ca' nayjihuiyijich co nmidundigooyich miich ajcxy. Ca' jadu'n nmina'nich co ca' ma ndundigooyich. Hue' ajt nHuindzin Jesucristo yi' je' xyajciyöyip xyajtecyöyip iich nbocy, ca' jac pinjaty.⁵ Paady

ycixpi ixmajtzcix jadu'n nej miich ajcxy xypocy'ijxcixy jayijpni ma ca'ni Jesucristo ymiñ jadüg'oc ya naaxhuiñ. Ahuijxcix co Jesucristo yajniuguëxigaani je jäy ajcxy ypocy huidibi cham ca' ñiguëxigy, huidibi jadu'n nipaady nej jihuüy yüch y'ity agootztuuby. Jesucristo co anajty ymiñ jadüg'oc, chi yajniuguëxigipy nej jäy ajcxy yjot yhuinma'n miidity. E Dios nidüg nidüg jäy cömaya'n pen oy ti ytuñ, e ca' cömaya'n pen ca' oy ti ytuñ.

⁶ Mígügtjic ajcxy, ci'm ti naybidägyiijich miid Apolos jadu'n nej tüg iixpejt ma jada tiy'ajt huidibi cham ti nyajniyayiygixp. Jadu'n ti nduñich miid miich ajcxy m'oy'ajtin ycixpi, jigix jëbi miich ajcxy m'ixpñijcixy jadu'n nej jëbi mguydundaygixy Dios ytiy'ajt, e ca' mjactungixy huidibi Dios ycapxcödujc ma ñecy. Nañ jadu'n iich ti nduñich miid Apolos nej tüg iixpejt, jigix miich ajcxy ca' mnaygömayiyb ci'm, e ca' mminaangixy co mnaygomájtzigixy ma tüg Dios ytumbi, e jadüg m'ixtjicixy.⁷ ¿Pin ti xyajnajcixy jadu'n nej jihuiy ajcxy ooy mgömayity? Ca' ni pin. ¿Ti miich ajcxy miidity, huidibi Dios ca' ti xymooygixy? Ca' ni ti. E pen Dios ti xymooygixy tijaty ajcxy mmiidity, çna'amy co mnaygömáygixy ci'm, jadu'n nej jihuiy ci'm ti mgarar'ajtcixy tijaty ajcxy mmiidity?

⁸ Jadu'n miich ajcxy mnaybidáacigixy nej jihuiy ti mgüxigixy, nej jihuiy ti mgomeñygojcixy, nej jihuiy mrey'ajtcixy, e ca' mdzojccixy

co nyaj'ixpigipyich. ⁹Miich xytíjcixyich nej jihuüy iich ajcxy apóstoltijc Dios ti xypidaaccixich nej huidibi ca' ytimecapxaadyity, nej huidibi ypocy co'ögiüyb, co ángeles ajcxy etz jäy ajcxy xyñixíccixyich xyñiyáaccixyich. ¹⁰Miich ajcxy xytíjcixyich co iich ajcxy apóstoltijc jadu'n nej jäy tzuu locip co ndúngixyich miid Cristo ycixpi. E miich mnaybidáacigixy co'ayuc cohuinma'n co ti mmibíjcixy Cristo. Miich ajcxy xytíjcixyich co ca' ti mic'ajt ajcxy miididyich, e miich ajcxy mnaybidaacip nej jihuüy ooy ti mmicpíjcixy, nej jihuüy ooy mgömayity, e iich ajcxy ca' nyaj'ixaangixyich. ¹¹Chambaad iich ajcxy nyuubögyiijich etz ndidzyiijich. Minaajity n'íjtccixyich ca' iich ajcxy nhuit. Jäy ajcxy xyñi'ojíygixich etz xyhuingojxy xyjýpcóxcixich, ni ndíjc iich ajcxy ycaca'tcixy. ¹²Ndúngixyich xuuyii miid ngi'm ngijich. Co pinjaty xyñi'ojíygixyich, chi n'adzóogixyich miid oy ayuc. Co iich ajcxy xy'ixhuidityich xypahuidityich, ooy nmecxtújcixyich yi tzaachypi. ¹³Co pinjaty jibic xyñigápxcixyich, chi huinma'n íxtáaygixyich oy'amy miid mecxtujcin n'iihuíjcixyich ngapxhuíjcixyich nej jébi y'ayuc-huinjihuiygixy. Ca' naaxhuínyjäy ajcxy xychóccixyich. Ixti chambaad jadu'n ajcxy xy'íjxcixyich nej püx, jadu'n iich ajcxy nipaady nej jibicpi huidibi ca' jäy ajcxy tzocy.

¹⁴Ca' iich miich ajcxy nyajnijayiy jada ayuc co

nyajtzöydunaangixy. Hue' janchtiy jada ayuc nyajnijayiyb ajcxy co ngapxhuijáangixy. Jadu'n ndzojccixy njihuüygixy nej ndzocyich njihuüyich ngi'm'ung. ¹⁵Oy ixipy yjanchity co miich ajcxy miid majc mil huindzindijc huidibi xyaj'ixpíjcixy Cristo ytiy'ajt. Per tügpajcpi je mhuindzin huidibi oga'n xyajmibíjcxy ajcxy Cristo, ca' nan canaag. Iich jadu'n oga'n ti nyaj'ixpicxyich miich ajcxy Jesucristo ytiy'ajt nej jébi ajcxy m'alma nñdzógyy. Paady ycixpi jadu'n iich nipaady nej miich ajcxy mdeedy ma mmibíjcin. ¹⁶Iich miich ajcxy nimaayb mictägy, com ti nyajmibíjcixy Cristo oga'n, paady cuydungix ajcxy Dios ytiy'ajt, jadu'n nej iich nguyduñich.

¹⁷Paady ycixp nguexyich Timoteo ma miich ajcxy. Yi Timoteo ooy ndzocyich ooy njihuüyich. Ti iich Timoteo nyajmibicyich Cristo, e ooy xycapxymidooyich yajxon, jadu'n yi' nipaady nej ngi'm'ungich. Yi Timoteo xyajjäy medzip miich ajcxy je ayuc je tiy'ajt jadu'n nej nyaj'ixpicxyich ma tüg'óciy cajp ma yi jäy ñaymújcigixy huidibi mijpidaaccixp Jesucristo. ¹⁸Cham nije' nije' miich ajcxy amij agix mnayjihuiyii co jadu'n minaangixy co ca' nicxy n'ixa'níich miich ajcxy jadüg'oc. ¹⁹Per ca' jadu'n mminaangixy co ca' nñicxa'níich ma miich ajcxy. Tzojc nícxibich ma miich ajcxy, pen Dios jadu'n tzojcp. Co anajty jim nmechich, huin'it ca' n'amidoo'ida'níich yi' ajcxy y'ayuc huidibi amij agix nayjihuiyiy. Hue' janchtiy nejhuíhua'níich pen ymiid yi' ajcxy Dios ymic'ajt chög'ajt.

²⁰Pinjaty miid Dios ymic'ajt Dios chög'ajt, je' yajnguëxíc Dios y'ane'min. Pinjaty miid oyñiti ayuc, ca' je' yajnguëxígip Dios y'ane'min. ²¹Co nnéxcibich jim ma miich ajcxy, éti ajcxy mdzojccixyp ndunipyich? éNej oy nminéxcibich ma miich ajcxy tög matz jigix ajcxy nhuópcixipy? ó Mdzojccixyp co nnéxcibyich ma miich ajcxy miid yungnaxy njot nhuinma'nich, etz oy'amy ajcxy nmigapxipy, jadu'n nej jihuüy ooy ndzojccixy njihuüyigixy?

**Moy ajcxy castigo tög jäy
huidibi anajty ti ytundigooy**

5 Mayjäy nejhuüy co ma miich ajcxy jim tög yéydijc huidibi tundigooyb miid tög töxyjäy. Nigi yi' ytundigooy ca'ydi huidi ajcxy ca' Dios y'ayuc mijpidaci. Ti nnejhuüyich co jim tög yéydijc huidibi miiddzinaayb ycoo'uu. ²Jim miich ajcxy miidity je mijpocytumbi, e miich ajcxy amij agixy mnayjihüüyigixy co ajcxy mdzach'ixpicyity ma Dios ytiy'ajt. Jac'oy co ixypiy mdajcixy mmaygixy. Yajpidzimgix ma miich ajcxy yi jäy huidibi jadu'n tundigooyb. ³Ca' ytimyñejty co ca' nyajpaadyich jim ma miich ajcxy. Jadu'n nipaady nej jihuüy ich njimity, miid co ooy njihuüyich nej miich ajcxy mjaicixy m'ayoogixy. Paady ycixpi ti nyajpocycäyich miid Jesucristo y'ane'min yi jäy huidibi jim ooy mij ytundigooy, tim jadu'n nej ixypiy jim nyajpaadyich ma miich ajcxy. ⁴Huomujctaaygix yi mibijcpidijc, e jadu'n nipaadipy nej jihuüy ich njimity quipxyi miid

miich ajcxy. Huin'it miich ajcxy miid'ajtcixipy ajcxy ajt nHuindzin Jesucristo y'ane'min ymic'ajt. ⁵Miid je ane'min mic'ajt huidibi Jesucristo ti xymöyich, myajpidzimipy je pocytumbi ma miich ajcxy. Jadu'n mijhuin nipaadipy nej jihuüy myajc'idigiigixy je mujcu', jaydëbi yi' ñinícx ytigoyipy, per je' y'alma nídzögip mina anajty ich ajt nHuindzin Jesús yhuimbity ya naaxhuin jaydëbi tiydunipy jäy ajcxy miid ypocy ycixpi.

⁶Ca' mnaygömáayigixy ci'm miid huidibi mdungixyp. éNej ca' mnejhuüyigixy nej jäy mina'n co levadura huidibi ca' y'oyity yajhuindigooyb tög'óciy yi harina jich? ⁷Jadu'n je pocytunii nipaady nej levadura huidibi ca' y'óyity, paady ycixpi yajtigooygix je pocytunii nej anajty mdundigóoygixy taabi anajty ajcxy ca'ni mmibijccixy. Jadu'n mdúngixipy, jigix jëbi m'ijtcixyp huädz ca' ma pocy. Co jadu'n mdúngixipy, jadu'n nipaadip miich ajcxy nej tzajcaagy oyjatypi. Nejhuüybich co miich ajcxy ti mbocyníhuaatzcixy, com Cristo nayyejci huen yaj'ögyii miid ajt nbocy ycixpi. Jesucristo jadu'n nipaady nej ajt ngöbixy mang huidibi miid nhuindzigiyim Dios miid ajt nbocy ycixpi. ⁸Tzoc tzinaayim miid huädz njot huädz nhuinma'n, jadu'n nipaady nej judíojäy co ajcxy amay'ajtcixy yi pascua xi. Tzoc yajtigooyim ma ajt ndzinaayin njugy'ajtin yi jibic jot jibic huinma'n. Tzoc cuydunim Dios ytiy'ajt.

⁹Ti nnijayiyigixy jayhuin co ca' huaad migüg'ajtigixy pinjaty

huidibi tundigooyb miid töxyjäy ajcxy. ¹⁰Ca' nan jadu'n nmina'nich co tücci'yi mbuhuäctütécixipy yi naaxhuiñjäy ajcxy huidibi ca' ymibijccixy, huidibi tundigooygixp miid töxyjäydjic, huidibi ooy y'adzojccixy, huidibi ajcxy meetzp, huidibi ajcxy tzaadzech quipychech ojadajtcixp. Co ixipy tücci'yi mbuhuäctütécixipy yi naaxhuiñjäy ajcxy, copicy co ixipy miich ajcxy mbidzimgix ya naaxhuiñ. ¹¹Jayhuin ti nijayhiygixy co ca' huaad mnaymüg'ájtigixy miid yi jäy ajcxy huidibi naydjicigixp co ymibijccixy, je huidibi tundigooygixp miid töxyjäydjic, huidibi ajcxy ooy adzojccixy, huidibi ajcxy ojadajtp tzaadzech quipychech, huidibi ooy ycapxtigooygixy, huidibi ajcxy amügy jäy, etz huidibi ajcxy meetzp. Nañ ni ca' huaad mgaymujccixy m'uucmujccixy miid yi' ajcxy. ¹²⁻¹³Com ca' yhuaadity co ich nyajcüyöyipy nyajtecyöyipy yi jäy ajcxy ypocy huidibi ca' mijpidaaccixy Jesucristo. Dios ci'm yajcüyöyam yajtecyöyam yi' ajcxy ypocy. Hue' janchtiy copicy co miich ajcxy myajcüyöyip nyajtecyöyip yi mibijcpidjic ajcxy ypocy. Yajpdzimgixp yi pocytumbi ma miich ajcxy.

**Tzip capxy ma je juez ajcxy
huidibi ca' ymibijccixy**

6 Pen xymidundigooyb tüg mibijcpi, ¿nej oy mnayjihuiyii co nicxy mxty yi mmigüg ma yi tungmiidpi huidibi ca' mibijccixy Dios y'ayuc? ¿Cay jac'oy co myaj'abigipy je mibijcpidjic

ajcxy, e jim y'oyihuiy je ayuc nej anajty ti xymidundigoy? ²¿Nej ca' mnejhuiygixy co yi jäy ajcxy huidibi Dios ti ypocyhuinméecxigixy, yi' ajcxy yajcüyöyamyb yajtecyöyamyb yi naaxhuiñjäy ajcxy ypocy huidibi ca' mijpidaaccixy Dios? Pen miich ajcxy myajcüyöyip nyajtecyöyip yi naaxhuiñjäy ajcxy ymijpocy, ¿nej co ca' mjajticy nej ajcxy myajcüyöyipy nyajtecyöyipy yi mibijcpidjic ajcxy ypocy huidibi ca' ytimymij ytimycajejity? ³¿Nej ca' mnejhuiygixy co miich ajcxy myajcüyöyamyb nyajtecyöyamyb ixti yi ángeles ajcxy ypocy? Pen miich ajcxy myajcüyöyamyb ángeles ajcxy ypocy, nigí ca' chipity co ajcxy myajcüyöyipy nyajtecyöyipy yi mibijcpidjic ajcxy ypocy huidibi tzinaayb jugy'ajtp ma jadachambi xii tiempo. ⁴Pen miich ajcxy mnaymidundigoooyigixp, ¿nej co nicxy mbidaaccixy yi mxihuín ma yi jäy ajcxy huidibi ca' yajpaady ma miich ajcxy myöymujccixy? ⁵Jadu'n nnimáaygixyich miich ajcxy, jaydëbi mdzöydu'njihuiygixy miid jada ycixpi. ¿Nej ca' yajpaady ma miich ajcxy ni tüg yëydjic huijy ycupji huidibi jëbi yaj'loyy je capxy je ayuc ma je mibijcpidjic ajcxy? ⁶¿Nej ooy jada ytimycopicyty co yi mibijcpidjic ajcxy ñayxihuigixy ma je tungmiidpi huidibi ca' mijpidaaccixy Dios?

⁷Co miich ajcxy mnayxihuigixy ma cajp tungmiidpi, je' je tiy'ajt co ca' ajcxy mguydüngixy Cristo y'ayuc ytiy'ajt. ¿Nej cay jac'oy co mnaymimecxtújcigixipy, ca'ydi co

mnayxihuigixy? ¿Nej cay jac'oy co xytigóoyigixipy tijaty, ca'ydi co mnayxihuigixy? ⁸Ma yjapadyii ixyipy mnaymimexctújcigixy, chi miich ajcxy ac mibijcpidijc naymidundigóoyigixp, e nañ jadu'n mjanayméetzigixy ti ajcxy ymiid.

⁹¿Nej ca' mnejhuuiygixy co yi jāy ajcxy huidibi tundigooyb, ca' ajcxy it lugar pada'n ma Dios y'ane'my? Ca' mnayhuin'lingixy, ca' ajcxy it lugar pada'n ma Dios y'ane'my yi jāy ajcxy huidibi migapxtigooyb tōxyjāydijc, huidibi ajcxy ojadajtp tzaadzech quipychech, huidibi ajcxy migapxtigooyb ymigüg ytōxyjic, huidibi ajcxy adōxyñ'aa.

¹⁰Ca' ajcxy it lugar pada'n ma Dios y'ane'my huidibi ajcxy meetzp, huidibi ajcxy tijaty adzojcp, huidibi ajcxy amügyjāy'ajtp, huidibi ajcxy capxtigooyb, etz huidibi ajcxy ayucmihuidijt capxmihuidijtp. Nidüg'óciy yi jāy ajcxy huidibi jadu'n tundigooyb, ca' ajcxy it lugar pada'n ma Dios y'ane'my.

¹¹Jadu'n anajty nijējity miich ajcxy mdundigooygixy jecy'ajty, per co ti mmibijccixy Cristo, chi Dios ti xyhuinmecxy ajcxy mbocoy, e ti yajhuäch je jibicpi ma ajcxy mjot mhuinma'n, etz mnayyéjicigixy amumdügjot ma Dios. Co miich ajcxy mmijpidaaccixy je nHuindzin Jesús yxii e xy'adigiigixy xyjottigiigixy Dios yjihui'n ymic'ajt, paady ajcxy ti m' ahuimbijtcixy tudägy ma Dios yhuinduu.

**Je tudägy'ajtin huidibi ijtp
ma ajt ndzinaayin**

¹²Janch tiy'ajt nej jāy yminaangixy co jēbi huaad tungixy

hueñytiijity huidibi ñijot'ajtcixyp. Per ca' tüg'óciy huidibi jāy ajcxy tuñ y'oyjāygidaacnity. Janch jadu'n jēbi pinjaty tunipy hueñytiijity, per ca' huaad ymimadāgyii je huidibi ajcxy ytumyb. ¹³Janch tiy'ajt nej jāy yminaangixy co je jiiçxy piçy ytungbaady ma je jāy y'aa ymōx, e je aa mōx ytungbaady miid je jiiçxy piçy ycixpi. Per Dios yajcōdigoyamyb je jicxy piçy, e nañ jadu'n yajcōdigoya'n je jāy y'aa ymōx. Per nañ tiy'ajt co Dios ca' ti yaj'oyiy je yēydijc ñinixc, co midundigooyipy tōxyjāydijc.

¹⁴Dios ti yajjugypicy jadüg'oc iich ajt nHuindzin Jesucristo co y'o'cy. Nañ jadu'n Dios miid ymic'ajt co xyajjugypigaanim jadüg'oc co anajty ti n'o'cim.

¹⁵¿Nej ca' mnejhuüy miich ajcxy co yi mninixc ajcxy Cristo yi' yje'? ¿Nej cay Cristo anajty midundigooybich co nnicxy miidmāyich yi tōxyjāy huidibi jibic-huinma'n miid? ¡Ca' jadu'n y'óyity nimina! ¹⁶¿Nej ca' mnejhuüyigixy co tüg yēydijc puhuägäy tüg tōxyjāy huidibi jibic-huinma'n tumb, tügity ajcxy y'ijtcixy? Com jadu'n yjaybetyity ma Dios ñecy, ma Dios jadu'n ymina'n: “Nimetz y'idaangixy jadu'n nej tügpi ninixc.” ¹⁷Co tüg jāy miid y'lity yi Huindzin Jesucristo, huin'it je jāy yjihui'n ymic'ajt etz Dios yjihui'n ymic'ajt y'ijtcixy tú'ciy.

¹⁸Ixmajtcix je jibic-huinma'nydunii, ca' mdundigooygixy miid tōxyjāy ajcxy jibic-huinma'nydumbi. Yi jacjadyii pocy huidi jāy ajcxy ytumyb, ca' yi' ajcxy midundigoy ninixc. Per

co ytundigoogixy miid töxyjäy
ajcxy, huin'it janchtiy yci'mninicx
anajty ymidundigoogixyp. ¹⁹¿Nej
ca' mnejhuiygixy co je Espíritu
Santo huidibi Dios xymooyim, ti
chinaydacpicy ma miich ajcxy mjot
mhuinma'ñ? Paady ycixpi miich
ajcxy ca' ci'm nay'ané'migixy.
²⁰Tzohui Cristo ti cojuy miich
ajcxy mbocy, paady ycixpi ooy
ycopicyty co oybi mdúngixip miid
mninicx, jigix Dios cömay y'idipy
miid co oy anajty ti mdungixy.

Capxhuijin ma je pijcin

7 Cham n'adzohua'ñich je
huidibi miich ajcxy ti
xyaj'amidoobich ma je necy
huidibi ti xyajniguéjxcixyich.
Oy jadu'n co tüg yéydijc ca'
ypigipy. ²Per com may yéydijc
huidibi ooy ytundigoya'ñ miid
töxyjäydijc, paady ycixp jac'oy
co nidüg nidüg yéydijc pigipy e
miid'idipy yci'mdöxyjic. E nañ
jadu'n jac'oy co nidüg nidüg töxyjäy
ypigipy, e miid idipy yci'm ñäy.
³Copicy je yéydijc chinähuipy
miid ytöxyjic nej ypadyii, nan
tim jadu'n je töxyjäy chinähuipy
miid ñäy nej ypadyii. ⁴Com je
töxyjäy ca' ane'my yci'mninicx,
hue' ñay'ané'migixy miñ xyipy.
Nañ jadu'n je yéydijc ca' ane'my
yci'mninicx, hue' ñay'ané'migixy
ymiñ xyipy. ⁵Ca' huaad je yéydijc
nimay je töxyjäy co ca' miid
mähua'ñ miid pooxa'ñ. Nañ jadu'n
je töxyjäy ca' huaad nimay je ñäy
co ca' miid mähua'ñ miid pooxa'ñ.
Jëbi janchtiy minaajity ñay'ayuc-
hujnhuiygixy co amay'adaangixy
co Dios mibijctzohuaangixy

ycapxtägaangixy. Co Dios
mibijctzohuin myajmáygixipy,
huin'it jëbi máagixni póxcixni
aguje jotcuje, ca'ydi je mujcu'
mimadägyii ajcxy.

⁶Jada je' tiy'ajt nej jëbi yéydijc
miiddzinäy ytöxyjic, hue' jada
capxhuijin, ca' jada y'ané'minity.
⁷Jadu'n njadzocyich co miich ajcxy
ixyipy m'ijtcixy adüg jadu'n nej
n'ityich adüg. Per Dios ti xymooyim
nidüg nidüg ngi'mhuinma'ñ
ngi'mmic'ajt. Paady ji canaagnax
jäy yhuinma'ñ, e nidüg nidüg miid
yci'mhuinma'ñ nej ytunaangixy,
pen pigaangixp o ca' ypigaangixy.

⁸Jada ayuc nyajnimaaybich yi
adügtjic etz yi co'ögytjic ajcxy.
Jac'oy co ajcxy huen tzinaaygixy
adüg, jadu'n nej iich ndzinäyich.
⁹Pen ca' ajcxy mimadäga'ñ yi
chinaayin adüg, etz nijot'ajtcixy co
ypigaangixy, jac'oy co ypjicixipy.
Com jac'oy co ypjicixipy ca'ydi co
cuydúngixipy ninicx chojcin.

¹⁰Jada ayuc nyajnimaaybich
huidibi ajcxy ti ypjicixy. Ca'
y'oyity co töxyjäy tüg ixmach yi'
ñäy. Nañ jadu'n ajt nHuindzin Jesús
xymooyim jada ane'min. ¹¹Co tüg
töxyjäy ixmach ñäy, copicy co huen
tzinäy adüg, e ca' huaad ypic
miid huingbi yéydijc. Jëbi janchtiy
jadüg'oc pudigiy ñäy. Nañ jadu'n ni
ca' y'oyity co tüg yéydijc ixmadzip
ytöxyjic.

¹²Hch jada ngi'm'ayuc jada
huidibi nyajnimaaybich je jacjadyii
mibijcpidijc. Yi Huindzin Jesús
ca' ti ane'min yecy miid jadayaabi
ycixpi. Pen tüg yéydijc mibijcp
tzinay miid tüg töxyjäy huidibi
ca' mijpidägy Cristo, jac'oy co ca'

ñay'ixmájtzigixipy, pen je töxyjäy jadu'n jotcuje jacmiiddzinähua'nñ je yëydijc. ¹³Nañ tim jadu'n co tüg töxyjäy huidibi mibijcp tzinay miid tüg yëydijc huidibi ca' mijpidägy Cristo, jac'oy co ca' ñay'ixmájtzigixipy pen je yëydijc jotcuje jacmiiddzinähua'nñ je töxyjäy. ¹⁴Je töxyjäy ñay'ixmájtzigixipy pen je yëydijc jadu'n y' nipaady nej jäy huidibi ypocy ti yajnihuäch miid co ytöxyjic ti mijpidägy Cristo. Nañ jadu'n je töxyjäy huidibi ca' mijpidägy Cristo, jadu'n y' nipaady nej jäy huidibi ypocy ti yajnihuäch miid co ñay'ixmájtzigixipy. Pen ca' ixipy yjadu'nity, y' ajcxy y'ung y'anäg, hue' ixipy nipaady nej jäy ajcxy y'ung huidibi ca' mibicy. Per com ti je yëydijc etz je töxyjäy yajpocyñihuächyii, nañ jadu'n je y'ung ajcxy ti yajpocyñihuächyii. ¹⁵Per pen je yëydijc huidibi ca' mibicy Cristo ca' miiddzinähua'nñ ni jadu'nñyi y' ytöxyjic huidibi ti mibicy Cristo, huin'it jëbi ñay'ixmájtzigixy. Nañ jadu'n co je töxyjäy huidibi ca' mibicy Cristo, e ca' miiddzinähua'nñ ni jadu'nñyi y' ñay'ixmájtzigixy. Com Dios jadu'n tzcocy co jotcuje ñay'ixmájtzigixipy. ¹⁶Jëbi ñay'ixmájtzigixy com je töxyjäy ca' tiydudägy ñejhuüy pen mimadacy yñay'ixmájtzigixy Cristo. Nañ jadu'n je yëydijc ca' tiydudägy ñejhuüy pen jëbi ytöxyjic yajmibigipy Cristo. ¹⁷Oy ixipy ñejity jada tiy'ajt cuydungixy. Copicy co nidüg nidüg miich ajcxy mdzinähuiipy mjugy'adipy jadu'n nej Dios ti xyajni'ixiigy mdzinaayin

mjugy'ajtin, e jadu'n nej anajty myajpatcixy co Dios xyhuin'ixy jëbi mibigipy Cristo. Yi jadu'mbi ane'min nyaj'ixpajcypich yi mibijcpidijc ma tüg tüg cajp. ¹⁸Yi jäy huidibi ti yajtiy'ajttiy jayijp, e Dios yhuin'ixyii jac'axam, huen jadu'nity, ca' huaad yajtigoy je ijxpejt nej ti yajtiy'ajttiy. E yi jäy huidibi ca'ni yajtiy'ajttiy e ti yhuin'ixyii Dios, huen jadu'n y'ity, ca' ycopicyty yajtiy'ajttihuipy. ¹⁹Ca' ytimyñejity pen miich ajcxy ti myajtiy'ajttiy, o pen ca'ni myajtiy'ajttiyigy. Huidibi copicyip, mguyduunip ajcxy Dios y'ane'min ycotujcin. ²⁰Nidüg nidüg mibijcpi huen ijtcixy nej anajty yajpatcixy co Dios ajcxy yhuin'ixy. ²¹Pen miich anajty codoogiy tumb ma tüg jäy co Dios ti xyhuin'ixy, ca' mdajy may miid y' ycxipi, hui'm miid mhuindzin. E pen mhuindzin a'ixiyy co mbidzima'n ahuätztuum, jëbi mbidzimy ma codoogiy anajty m'ity. ²²Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús y' yajnihuädziätyyii ma y' pocy y'ane'myii. Pinjaty tungixp yci'mdung, co mibicy iich ajt nHuindzin Jesucristo, chi jadu'n nipaady nej jihuüy codoogiy y'ity ma Cristo. ²³Tzohui ooy Jesucristo xycujuuy miich ajcxy mbocy, paady ycxipi cuydungix ajt nHuindzin Jesucristo y'ayuc ytiy'ajt. E ca' mguydungixy naaxhuinyäy ajcxy y'ayuc ytiy'ajt huidibi ajcxy xypidägip ma pocy xy'ane'mgixy. ²⁴Migügtijc ajcxy, nidüg nidüg mibijcpi, huen ijtcixy nej anajty yajpatcixy co Dios yhuin'ixy ajcxy.

²⁵Jada ayuc nyajnamaaybich yi mibijcpidijc huidibi ajcxy adüg yajpatcixp. Je Huindzin Jesús ca' ti tiy'ajt ahuing ti xymöyich miid miich ajcxy ycixpi. Hue' ajcxy nyajnamaayb ahuing je huinma'nñ huidibi nmiidich. Com Dios ti xypa'ayooyich, paady ycixpi jëbi mgöbigipy ajcxy iich n'ayuc iich ngapxhuijin. ²⁶Jadu'n huinma'nñ nmiididyich co jac'oy co nidüg nidüg mij'anäg huen jac'ljtcixy nej yajpatcixy. Miid co tzaachyp i ayo'n nminajxim nyajnajxim jadachambi xii tiempo, paady ycixpi ngapxhuijyich jadu'n. ²⁷Pen mbijcyp tüg töxyjäy, miiddzina'. Pen ca' ti picy tüg töxyjäy, jac'oy co ca' mbigipy. ²⁸Pen ti mhuinma'nñ mbidägy co mbiga'nñ, jëbi mbicy, ca' anajty mdundigoy co mbigipy. Nañ jadu'n tüg töxyjay mutz'anägnip ca' anajty ytundigoy co ypigipy. Janch tiy'ajt jada co yi' ajcxy huidibi pijccixp ypadamyb ajcxy jotmay ma chinaayin. Paady ycixp ti nimaaygixy co jac'oy co ca' mbijccixipy, e ca'ydi ti jotmay mbáatcixipy.

²⁹Migügtijc ajcxy, jada njacyajnamaaygixpy. Hueeni xii tiempo njactzinähuaanim ya naaxhuiñ. Jadu'n nej je xii je tiempo yjacnixni miich ajcxy pinjaty ti ypicy, tzinaaygix jadu'n nej ixypy ca' mdöxijc ajcxy miidity. ³⁰Miich ajcxy huidibi yaaxp etz ayo'n jihuiyb, tzinaaygix jadu'n nej ixypy ca' ti ayo'n miidity. Miich ajcxy huidibi xondacp, tzinaaygix jadu'n nej ixypy ca' mxondaaccixy. Miich ajcxy huidibi ajuuyb adoocp tzinaaygix jadu'n nej ixypy ca' ti

ajcxy miidity. ³¹Miich ajcxy huidibi mic'ajt comeen'ajtp, tzinaaygix jadu'n nej ixypy ajcxy ca' ti mgomeeñity.

³²Hue' ndzocyich co ca' ti jotmay miich ajcxy mmiid'adipy ma yi mdzinaayin mjugy'ajtin. Yi jäy ajcxy adügpi ymijottigooyb ajcxy je Huindzin Dios ytung, yajjäygidäga'nñ ajcxy je Huindzin Dios. ³³Je tiibi ajcxy ypijccixy, chi ymijottigooyb ajcxy yi' ytung ya naaxhuiñ, jadu'n nej jëbi yajjotcujc'ajtcixy ytöxyjc. ³⁴Nañ tim jadu'n tigachjaty yhuinma'nñ miidity je töxy'anäg huidibi ti ypicy. Je töxy'anäg adügpi ymijottigooyb Dios ytung, etz yecy ñinicx etz yjihui'nñ ymic'ajt cixyjot huinijot ma ajt nHuindzin Jesucristo. Per je töxy'anäg huidibi ti ypicy, hue' je' ymijottigooyb ti ga ti ya naaxhuiñ, jadu'n nej huaad jäygidägyii ñäy.

³⁵Jada jadu'n ti nyajnamaaygixy miid miich ajcxy m'oy'ajtin ycixpi. Ca' nan tzipjaty ane'min ti nmooygixy. Jadu'n ti ngapxhuijicixy jaydëbi jotcujc mdzinaaygixy mjugy'ajtcixy, etz jaydëbi ajcxy amumdügjot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶Pen ji pin jotmay miidity miid ñiix ycixpi, miid co yxii yjimijt ti yujc-huäcni, jada je' ooy ytimycapxpaadyity, jëbi tuñ huidibi y'a'ixiiyb jac'oyip, jëbi ypicy, ca' yi' ypocyity. ³⁷Pen ji pinjaty ñiix yhui'ma'nñ jaybicy, e ca' pin ycohuaniiy, nañ ni pin yca'adugyii co tuñ nej tzocyin, e ñijot'ajtyp tudägy'ajt janch cixyjot huinijot co

yñiix yhuí'ma'n̄ jaybicy, oybi anajty ytumyb. ³⁸Je jāy huidibi yñiix yajpijcp, oybi anajty ytumyb, e pinjāy yñiix cayajpijcp, n̄gi anajty oybi tuñ ca'ydi co ypigipy.

³⁹Copicy co je tōxyjāy miiddzināhuipy yi' n̄āy mabaad yñāy yjugy'aty. Co janch anajty yñāy y'ōgy, huin'it jēbi ypigipy miid huingbi, pen jadu'n anajty najtztzogiy. Hue' janchtiy copicy co pigipy je pin mibijcp je Huindzin Jesucristo. ⁴⁰Ooy n̄gi je tōxyjāy co'ōgyp̄i agujc jotcujc chināhuipy yjugy'adipy pen ca' ypijctigach, jadu'n nm̄iidyich nhuinma'n̄, e nm̄inaambich co naybaatip̄ iich nhuinma'n̄ miid je tiy'ajt huidibi je Esp̄iritu Santo yejcp.

**Je tzūch huidibi ajcxy
yajhuindzigiiyb quipychech**

8 Jadūg nax, jada ayuc ajcxy nyajnijayiiyb ma yi tzūch ymiñ huidibi jāy ajcxy yajhuindzigiiyb tzaadzech quipychech. Janch tiy'ajt co nidūg'óciy iich ajt nm̄iid'ajtm̄ ixpijcin. Per pen ooy mij nayjihuiiyim̄ ajt n'ixpicyity, chi amij agix nayjihuiiyim̄. Per pen naychojcm̄ nayjihuiiyim̄ nidūḡ nidūḡ, huin'it nayyeecim̄ nm̄ibijcin. ²Pen ji nidūḡ ma miich ajcxy n̄aydiyii co y'ixpicyity, ca'ni yi' jajtāy ixpijcin huidibi jaccopicy yjadipy. ³Co tūḡ jāy yajmij'aty Dios, Dios ñejhuiiyb nej jada jāy yjot yhuinma'n̄ miidity.

⁴Jadu'n jada je tiy'ajt maabi je tzūch huidibi jāy ajcxy ti yajhuindzigiiygixy tzaadzech quipychech ajcxy. Nejhuiiyim̄ co

yi tzaadzech yi quipychech ca' ti jugy'ajtm̄ miidity. Ji tūgpajc Dios huidibi tzinaayb jugy'ajtp. ⁵Janch tiy'ajt co yi naaxhuiñyāy ajcxy Dios'ajtigixy canaagnax huidibi yajpatp tzajpcix̄ etz ya naaxhuiñ̄ huidibi ca' Diosity. Etz nañ tiy'ajt co may yhuindzin'ajtcixy huidibi ca' yhuindzinity. ⁶Per iich ajt n'ojadajtm̄ tūgpajcpi Dios, je Dios Teedy. Je Dios Teedy coj macx tūg'óciy huidibi jil'ajtp. Miid yi' ycixpī iich ajt ndzinaayim̄ njugy'ajtm̄. Nañ tim̄ jadu'n nm̄iid'ajtm̄ tūgpajcpī ajt nHuindzin̄ Jesucristo, e yi' huijtz'ijtaayb tūg'óciy tijaty huidibi jil'ajtp, e nañ yi' ajt xyhuijtz'ijtm̄.

⁷Janch tiy'ajt co yi tzaadzech quipychech ca' ti mic'ajt miidity, per nijel'jity mibijcpidijc ca' huinjihuüy jada tiy'ajt. Nijējity ajcxy jecy'ajty ooy huindzigiiygixy tzaadzech, ixti chambaadni tijcixy co yi tzūch huidibi jāy miid huindzigiy tzaadzech, tzaadzech yi' yje'. Co ajcxy tzūdzcixy yi jadu'mbi tzūch, jibic nayjihuiiyigixy, nayjihuiiyigixy nejjihuiȳ ti ytundigoogixy. Ca' tiydudāgy y'ijtcixy ma ymibijcin. ⁸Ca' Dios xycōbigaanim̄ miid je' ycixpī co ti n̄jiicxim̄ ti ndzūdzim̄ tijaty tzūch, o miid co ca' ti n̄jiicxim̄ ca' ti ndzūdzim̄ tijaty tzūch. Nañ tim̄ jadu'n Dios ca' oybi xymōhuanim̄ miid je' ycixpī co ti n̄jiicxim̄ ti ndzūdzim̄ ti tzūch, o miid co ca' ti n̄jiicxim̄ ca' ti ndzūdzim̄ tijaty tzūch. ⁹Oy Dios a'ixiȳ co jēbi ndzūdzim̄ huenhuidibi tzūchity. Per miid je migūgtijc ycixpī huidibi ca' tiydudāgy miidity ymibijcin,

tzoc naygüend'ajtm ca'ydi je' jibic yñayjihuiyii miid huidibi iich ajt ndunim. ¹⁰⁻¹¹Tzoc ocpidaacim co miich ajcxy mnejhuiy je tiy'ajt, e xy'ixipy tüg migüg co mgay m'uucy ma tüg mesa jiiy tigoty me je tzaadzech y'ity. Ca' jecyity co jada jäy huidibi ca' tiydudägy miidity ymibjcin, etz co xy'ixpaadipy jiiy, huin'it je' cöbiga'n je tzüch huidibi huindzigi'n'ajtp. E jadu'n yhuimbizimy co miich jibic iixpejt ti myecy miid yi m'ixpijcin ycixpi, com yi mmigüg ti ytundigoy miid huidibi miich ti mduñ. E Cristo ti y'ögy miid yi' ypocy ycixpi nañ jadu'n. ¹²Co tüg mibijcpi jibic nayjihuiyii miid co ti xy'ixy ma je caydac mdzüch je tzüch huidibi jäy ajcxy yajhuindzigi'yb tzaadzech, miich anajty tundigooyb miid Cristo ytiy'ajt, miid co yi mibijcpi jibic ñayjihuiyii. ¹³Paady ycixp ca' ndzüdza'nich ni mina tzüch huidibi tzaadzech yhuindzigi'n'ajtip. Pen jadu'n nduñich, jibic iixpejt anajty nyejcpyich ma nijëjity migügtijc, e chi yi' ajcxy yhuinma'ñytigoya'n.

Je tung huidibi Pablo paatip

9 Janch janch co jëbi nduñich huentijity huidibi ndzojcpich. Nañ jadu'n janch co Jesucristo ti xyajni'bicyich jada apóstol tung. Etz janch co ti n'ixyich ajt nHuindzin Jesucristo. Nañ jadu'n janch co miich ajcxy iixpejt'ajtp ma iich ndung, com ti ajcxy mmijpidaaccixy je nHuindzin'ajtm Jesús y'ayuc huidibi ti ngapxhuäcxyich ma miich ajcxy. ²Ca' jécyity co jacjadyii jäy ajcxy ca' xycöbiga'nich jadu'n nej Jesús xy'apóstol'adyiijich. Per

com miich ajcxy ti mmijpidaaccixy ajt nHuindzin Jesucristo, etz miich ajcxy mmibijcin nidiy'ajtp co Jesús ti xyyajni'bicyich jada tung, paady ycixpi copicy co iich miich ajcxy xycöbigipyich jadu'n nej Jesús y'apóstol.

³Jadu'n n'adzohuimbityich yi' ajcxy huidibi jibic xyñigapxip iich ndung. ⁴Com Jesucristo xyajni'bijcich jada tung co ngapxhuäcxyich yi' y'ayuc ytiy'ajt, paady ycixpi xypatpich jadu'n co je mibijcpidijc xymöhuibich ngaayin n'uucin. ⁵Nañ jadu'n xypaatpich co nmiid'adipyich tüg ndöxyjicich huidibi mibijcp, etz huidibi nmiidhuididipyich tim jadu'n nej yi jacjadyii apóstol ajcxy miidity, etz je Huindzin Jesús y'uch ajcxy miidity, etz Pedro. ⁶¿Nej miich ajcxy mminaangixy co iich etz Bernabé nimejtzpajc ca' iich ajcxy huaad ixmajtzcixy yi ndungich co ngapxhuäcxyich Cristo y'ayuc ytiy'ajt? ⁷¿Huidibi soldado yi' ma je ejercito ci'm ygasto cojuy? ¿Pin ji cam nidungiyb, e ca' jicxipy je huidibi ti yaj'ity? Pin ychibo cuend'ajtp, ¿e ca' ügipy je chibo yleche? ⁸Ca' miich ajcxy mina'nipy co jäy y'ayuc jada. Nañ jadu'n jaybety y'ity ma Dios ñecy tim jadu'n nej nmina'nich. ⁹Com jaybety jadu'n ymiñ ma Moisés ñecy, ma Moisés jadu'n ymina'n: "Ca' huaad huajyuub y'ajen mbidaaci ma yam ten moody yi trigo co yajpajc'aty." ¿Nej jëyi miid huajyuub ycixpi Dios jadu'n ymina'n? ¹⁰Canan jëyi miid huajyuub ycixpi Dios jadu'n ymina'n. Nañ jadu'n Moisés jaybejty jada

tiy'ajt miid iich ajt ycixpi. Com yi jäy ajcxy huidibi naaxjidzizt, etz yi' ajcxy huidibi trigo yajpajc'ajtp, hue' ajcxy yjijp'ijxyp co padaangixy je moc tiim huidibi ajcxy ti nidungäy. ¹¹Nañ jadu'n iich ajcxy huidibi Jesús ytung tuunip, ti ngapxhuäcxyich Dios y'ayuc ma miich ajcxy, e miich ajcxy oybi ti mbaatcixy ma Dios. ¿Nej ca' jadu'n y'oyity co nbaadyich meen etz jicxy picy miid ndungich ycixpi? ¹²Pen jacjadyii Dios y'ayuccapxhuäcxpi ti paatcixy meen etz jicxy picy ma miich ajcxy miid ytung ycixpi, ¿nej ca' jëbi nigi iich nbaadyich meen etz jicxy picy miidich ndung ycixpi? Oy njamfididyich je mic'ajt nej nja'ane'mgixy co xymöhuibyich ajcxy meen etz jicxy picy miid iich ndung ycixpi, per ca' jadu'n ti n'ane'mgixy. Jadu'n iich tzaachypi nyajnajxich jim ma miich ajcxy, jaydëbi jäy ajcxy cöbijccixy Cristo agujc jotcujc ca' ti adzijpin. ¹³Mnejhuüyb miich ajcxy co yi' huidibi ajcxy tumb ma Dios ytijc, paatcixy ninigoobi caayin uucin. Nañ jadu'n yi' pin ajcxy huidibi iyujc yajhuindzigiiyb Dios, paatip ajcxy je huindzigi'n tzüch. ¹⁴Nañ jadu'n je Huindzin Jesucristo ane'my co huen yajcaaygixy yaj'uuccixy etz mooygixy yhuit ytucx yi' ajcxy huidibi capxhuäcxcixp yi' y'ayuc ytiy'ajt. ¹⁵Iich ca' ti nyajtuñich jada mic'ajt jada ane'min huidi nmiidich. Nañ jadu'n ca' jada ayuc nyajnijayiiygixy, miid co ndzocy co padañich tijaty ma miich ajcxy. Jacjotcujc co n'ögibich miid yuu, ca'ydi co n'ane'mibich caayin

uucin ma miich ajcxy, e jadu'n tzöydu'n nbáadibyich jadu'n nej cham naygömayiijich, miid co ci'm nnayyajcayiiijich miid ndungich.

¹⁶Com ca' huaad naygömayiijich co ngapxhuäcxyich Cristo y'ayuc. Miid co Cristo xyyajniibijcich jada tung, paady ycixpi copicy ngapxhuäcxyich Cristo y'ayuc. Ayo'n nbadaamybich, pen ca' ngapxhuäcxyich Cristo y'ayuc. ¹⁷Pen ngi'mdzójcinich ycixpi ngapxhuäcxyich Cristo y'ayuc, njijp'ijxypich ixypy co jäy ajcxy xymijuyipyich. Per ca' yjadu'nity. Hue' janchtiy je Huindzin Jesucristo xyajniibijcich jada tung, e paady nduñich yi' ytung. ¹⁸¿Ti muju'n nbáadibich miid ndungich ycixpi? Nbáadibich jotcujc'ajtin co ngapxhuäcxyibich Cristo y'ayuc jadu'nyi, ca' ymeenygixyity. Ca' nyajtuñich je ane'min huidibi Cristo xymóyich miid caayin uucin ycixpi.

¹⁹Ca' ji ni pin jäy mic'ajt miidity jaydëbi xy'ane'myijich. Oy ixypy ytimyñejty ti nnyabidägyiijich miid iich njot nhuinma'n jadu'n nej jihuy tüg'óciy jäy ajcxy xy'ane'myich. Jadu'n nduñich jaydëbi jac mayjäy ajcxy nyajmibigipyich Cristo. ²⁰Co ngapxhuäcxyich Cristo y'ayuc ma yi judíojäy, hue' naybidägyiijich judíojäy, jaydëbi nyajmibicyich ajcxy Cristo. Co ngapxhuäcxyich Cristo ma yi judíojäy ajcxy huidibi cuydumybi yi' ajcxy ycötujcin etz ycostumbre, nañ jadu'n iich nguyduñich yi' ajcxy ycötujcin, jaydëbi nyajmibicyich ajcxy Cristo. Ooy yjanchity

co ca' yi judío ycötujcin etz ycostumbre xy'ane'myich. ²¹Co ngapxhuäcxyich Cristo y'ayuc ma yí' ajcxy huídibi ca' yjudíojäyity, chi naybidägyiijich jadu'n nej yí' ajcxy. Ca' nan nminaambich co ca' nguyduñich Dios ytiy'ajt. Hue' njatytimycuydumybich Cristo ycötujcin, jaydëbi nyajmibicyich ajcxy Cristo. ²²Co ngapxhuäcxyich Cristo y'ayuc ma yí' ajcxy huídibi ca' tiydudägy ymibijccixy, chi naybidägyiijich jadu'n nej yí' ajcxy, jaydëbi nyajmibicyich ajcxy Cristo. Ma nidüg'óciy jäy ajcxy ma ngapxhuäcxyich Cristo y'ayuc, chi nbidägyich njot nhuinma'ñ nej yí' ajcxy yjot yhuinma'ñ miidity, jaydëbi nijëjity ajcxy nyajmibicyich Cristo y'ayuc ytiy'ajt. ²³Jadu'n nduñich tüg'óciy miid Cristo y'ayuc ycixpi, je ayuc nej jëbi jäy ajcxy y'alma ñidzoocixy. Jadu'n nduñich, jaydëbi nbaadyich je jotcujc'ajtin etz oy'ajtin huídibi nbaatim nidüg'óciy co nmijpidaacim Cristo.

²⁴Mnejhuiiygixy co jäy ajcxy ñayboyicquípxigixy co premio padaangixy, huin'it nidüg'óciy ajcxy ñaymic'íjxigixy, per tügpajc huídi je premio patp. Nañ jadu'n miich ajcxy mijottigooygix cuydungix Dios y'ayuc ytiy'ajt, jaydëbi Dios xymóoygixipy ajcxy tüg' premio. ²⁵Tüg'óciy pinjaty nayñ'ixiyyip co ñay'ixquixáanigixy ma iyihuijin, ooy ñayguend'ájtigixy mic, jigix jëbi ymadaaccixy co ganar'adaangixy premio huídibi ca' huinixii ajcxy mi'ijtcixy. Pero iich ajcxy Dios y'ayuc capxhuäcxy, yí' iich ajcxy mijottigooygixy nganar'adäängixyich huídibi ca'

nimina ycixipy ytigoyipy. ²⁶E jadu'n iich ndung mijottigooyich, ca' yhuimbídzy agoodzity, jadu'n nejihuüy ngoxich e nipin ca ypegyii. ²⁷Nnaychaachytumybich ngi'mninícxich, jaydëbi ngi'mninícx xycapxymidooyich. Jadu'n nduñich co ti ngapxhuäcxyich Cristo ma je mayjäy ajcxy, ca'ydi nyajtigoyipyich nbremio huídibi Dios xymöhuambich.

Capxhuijin ma yi pin ajcxy jac-huindzigiyyb quipychech

10 Com ndzojcpich co miich ajcxy migügtjic mnejhuüyigixipy co ajt nmij'ap nmijteedy miid yhuídity Moisés co Dios nidüg'óciy ajcxy cuend'ajttay, huinhuoy jecy'ajty miid tüg' joc. E nañ jadu'n Dios yajnihuañ yajtzoocy nidüg'óciy ajcxy ma ymidzip co ajcxy yajnaxxy je tzaptz mejy cujc'amy. ²Co nidüg'óciy ajcxy panícxxy je joc, e co ñidzoocay ajcxy nidüg'óciy ma je mejy, hue' nidüg'óciy ajcxy cöbijcy Moisés y'ane'min, e jadu'n nipaady nej jihuüy ni'amugí ajcxy yñiibejty miid Moisés yxii. ³Nañ jadu'n nidüg'óciy ajcxy caay jicxxy je maná huídibi Dios anajty yejcpy, choñ je' anajty tzajpjoty. ⁴Etz nañ jadu'n y'uuc ajcxy nidüg'óciy je nii huídibi Dios anajty yejcpy, com y'uuc ajcxy je nii huídibi yajpidzim ma je tzaa. E je tzaa hue' je' anajty Cristo, e paady Cristo ymiid'ijtpy etz ypubejtpy ajcxy anajty nidüg'óciy. ⁵Oy ajcxy Dios ooy yjapubejtí, e ni may ajcxy ooy Dios yajjotma'ty, etz jahueen ajcxy yca'óctay jim mijtigíduum jecy'ajty, com ca' Dios jäygidacy je' ajcxy yhuinma'ñ.

⁶Jadu'n nej je ayo'n yjajti miid ajt nmij'ap nmijteedy jecy'ajty, je' iixpejtíp ma iich ajt, ca'ydi n'adzojcm tijaty jibícpí, jadu'n nej je' anajty ajcxy adzojccix jibícpí.

⁷Nañ jadu'n ca' yhuaadity ca' y'oyity co miich ajcxy m'ojadajtcixy tzaadzech quipychech jadu'n nej nijëjity ajt nmij'ap nmijteedy tuñ jecy'ajty. Com jadu'n yjaybetyity ma Dios ñecy ma jadu'n ymina'ñ: “Ixtactay je jäy ajcxy caaybi uucpi, e huin'it ajcxy ypidígy etz ytigiiygixy iyiiybi ejtzpi.” ⁸Nañ jadu'n ca' y'oyity co ndundigooyim miid töxyjäy ajcxy jadu'n nej nijëjity nmij'ap nmijteedy tuñ jecy'ajty, e iipx tugiiig mil ajcxy y'o'cy tüg xiibi.

⁹Nañ ni ca' y'oyity co njot'ijxim nhuinma'ñ'ijxim iich ajt nHuindzin Jesucristo, jadu'n nej ajt nmij'ap nmijteedy ajcxy idiich jecy'ajty, e may ajcxy tza'ñchüdzi, e ytigooy ajcxy yjugy'ajtin. ¹⁰Nañ ni ca' y'oyity co nnigapxim ni'ojiiyim Dios, jadu'n nej nijëjity ajcxy idiich jecy'ajty, e miid je' ycixpi Dios y'ángel yaj'o'cy mayjäy ma yi' ajcxy.

¹¹Tüg'óciy yi' jadu'mbi ayo'n yjajti miid ajt nmij'ap nmijteedy, e jaybety yhui'my ma Dios ñecy, jígix n'ijxpejt'ajtim, e jadu'n tiy'ajt nbaatim, ca'ydi ndundigooyim miid Dios, iich ajt pinjaty tzinaayb ma jadachambi xii jadachambi tiempo huidibi janch tím huingónip ma Dios yajcixa'ñ yajtigoya'ñ jada naaxhuiñybi. ¹²Com miid'ajtim je tiy'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt miidity ma ymibijcin, huen naygüend'adyii, ca'ydi

ytundigoy etz ypocycähuipy ma Dios. ¹³Tüg'óciy tzaachypi ayo'n, jot'ijxin huinma'ñ'ijxin huidibi miich ajcxy mminajxyp myajnajxyp, nañ jadu'n jacjadyii mibijcpidijc ajcxy minajxcixy yajnajxcixy. Per yajmij'ajtcix jot'amij'ajtcix Dios, com Dios ca' a'ixihuip co mjacminájxcixipy mjacyajnajxcixipy tzaachypi ayo'n anaxy huidibi ca' ajcxy mmimadäga'ñ. Co anajty tzaachypi ayo'n mminajxcixy myajnajxcixy mictägy, huin'it Dios xymöhuipy ajcxy huinma'ñ jadu'n nej jëbi mminaxtaygixy myajnajxaygixy yi' tzaachypi ayo'n.

¹⁴Paady miich ajcxy migügtijc, huidibi ooy ndzocy njihuüyich, ixmajtzcixy ca' m'ojadajtcixy tzaadzech quipychech.

¹⁵Nyajmiidcapxy nyajmiidmiydacpy ajcxy jadayaabi ayuc, com nejhuüyibich co miich ajcxy ooy oy huinma'ñ mmiidity. E jëbi ci'm mhuinmaaygixy pen tiy'ajt jada iich n'ayuc, o pen ca'. ¹⁶Ma je “Santa Cena” co nyajnajxim Dioscojuyip ma Dios miid je ügy, e n'uucim. Je' je' ñidiy'ajt'ajtpy co Cristo ti xyajtügmujcim ajt njot nhuinma'ñ co yajcruudzpejtí etz ñi'py yteemy yojcy miid ajt nbocy ycixpi. Nañ jadu'n ma je “Santa Cena” co ndujchuäcxim, e ngaayim je tzajcaagy, je' je' ñidiy'ajt'ajtpy co Cristo xyajtügmujcim ajt njot nhuinma'ñ miid ñinícx co ñaygiyejci ma ymidzip huen yajcruudzpedyíi. ¹⁷Oy ajt ooy njanimaayity, per nidüg'óciy iich ajt ngaayim je tügpi “Santa Cena” tzajcaagy. Jada tzajcaagy tüg yi', paady ycixpi tügpicy jäy iich ajt, e

jadu'n iich ajt nipaady nej tügpi nin'cx.

¹⁸Oc-huinmaaygixy miich ajcxy yi Israel jäy ajcxy, co ajcxy tzützcixy je huidibi ajcxy yajhuindzigiiyb Dios, chi ajcxy naydücmújcigixy miid Dios ycixpi ma je Dios ojadajttac. ¹⁹Iich nmína'n'ich co yi tzaadzech ca' ti mic'ajt miidity, e nañ jadu'n yi tzüch huidibi yajhuindzigiiyb tzaadzech ca' jac nigi oy'ajtin miidity, ca'ydi jac huidibi tzüch. ²⁰Jadu'n nmína'n'ich, co yi jäy ajcxy huidibi ca' mijpidaaccixy Dios, co ajcxy yejccixy yhuindzigi'n, hue' ajcxy yajhuindzigiiyb ca'oybi, e ca' Dios ajcxy yajhuindzigiy. E ca' ndzocyich co miich ajcxy migügpiigipy je ca'oybi. ²¹Co miich ajcxy m'uuccixy je ügy ma je "Santa Cena", ca' huaad m'uuccixy je ügy huidibi ca'oybi ajcxy yhuindzigi'n'ajtipy. Etz co mgaaygixy je tzajcaagy ma je "Santa Cena", ca' huaad mgaaygixy je tzajcaagy huidibi ca'oybi yhuindzigi'n'ajtip. ²²¿Nej tzoc yajjotma'tim yi Jesucristo? ¿Nej jacmic'ajt miid jada' iich ajt, ca'ydi yi'?

Je tzojcin huidibi tüg mibijcpi huaad tuñ miid ymigüg

²³Janch tiy'ajt nej jay yminaangixy co jëbi huaad nduñich huentiijity huidibi nijot'ajtpyich, per ca' tüg'óciy nmigügtijcich jäygidaaccixy huidi ndumybich. Janch jadu'n jëbi huaad nduñich huentiijity huidibi nijot'ajtpyich, per huidibi ndumybich ca' tüg'óciy xypubetyich ma iich nmibijcin. ²⁴Ca' y'oyity nnijot'ajtim

ngi'm'oy'ajtin. Oy co nbubejtim nbudigiiyim nmigügtijc.

²⁵Jëbi ajcxy mdzüch huen ti tzüch huidibi yajtoocp ma je mercado. Ca' ajcxy myajtiihuipy ma je tzüch chooñ, ca'ydi jibic mnayjihuiiyigixy.

²⁶Com Dios y'ayuc jadu'n ymína'n: "Je Huindzin Dios yi' nihuindzin'ajtp je naaxhuiñybi, etz ñihuindzin'ajttaayb tüg'óciy huidibi ji yajpatp."

²⁷Pen jim pinjaty huidibi ca' ymibicy, xyajnihuohüy tüg caayin uucin ma yi' ytijc, e pen ti mhuinma'n mbidägy co nicxy mgaya'n ma yi' ytijc, oy co mgaayipy mdzüdzip huentiijity huidibi ajcxy xymooyb. E ca' mnidiihuipy myajtiihuipy ma je tzüch chooñ, ca'ydi jac pinjaty jibic ñayjihuiiyi miid huidibi ti mduñ. ²⁸Per pen je jäy xyñimaayb: "Jada tzüch ti jäy yajhuindzigiy tzaadzech." Pues ca' mdzüdzip je tzüch, jigix ca' jibic ñayjihuiihuuiyb je migüg huidibi ti xyñimäy co je tzüch ti yajhuindzigiy tzaadzech. ²⁹Hue' nimiydacypich je mmigüg huidibi jibic nayjihuihuuiyb pen miich mdzu'chpyi tzüch huidibi tzaadzech yhuindzigi'n'ajtp. Ca' nnimiydägyich nej miich ci'm mnayjihuiiyi. Ca' yjeczyty co nijëjity jäy xyñimähuibich: "¿Na'amy co xycapx'adujcich tijaty nigoob miid co huingbi jäy jibic ñayjihuiiyi miid jëgixpi?" ³⁰Pen nyajnajxypich Dioscojuyip miid tijaty ycixpi huidibi ngaaybich n'uucypich, ¿na'amy co xyñigapxa'n'ich xyñi'oñhua'n'ich co ti ngay ti n'ügyich tijaty?" ³¹Paady ycixp huentiijity huidibi

mdungixyp, pen mgaaygixyp m'uuccixyp, o jac ti ga ti mdungixy, tungix tüg'óciy miid Dios y'oy'ajtin ymij'ajtin ycixpi. ³²Ca' mdungixipy tijaty huidibi yi judíoJay ajcxy miid huing ñayjihuiyii. Ca' mdungixipy tijaty huidibi yi griegoJay ajcxy miid huing nayjihuiyii. Etz ca' mdungixipy tijaty huidibi yi mibijcpidjic ajcxy miid huing ñayjihuiyii. ³³Tüg'óciy huidibi ndúmybich, hue' nduñich jigix tüg'óciy jay jaygidägipy huidibi ndumybuch. Ca' ni ti nduñich nej jébi iich ci'm nayjägídägyiijich. Hue' nduñich miid jacjadyii jay ajcxy y'oy'ajtin ycixpi, jaydëbi ajcxy y'alma ñidzögipy.

11 Jadu'n ndzocyich co miich ajcxy mdunipy jadu'n nej nduñich. E iich tumbich jadu'n nej Cristo ytuuñ.

**Nej huaad töxyjäydjic
ajcxy yjäy'ajtcixy co
migügtjic naymújcigixy**

²Miich ajcxy migügtjic, ngapxpatypich miich ajcxy, com miich ajcxy xyjatytimyjäymejtzpich, etz nañ mguydungixyp je ayuc je tiy'ajt huidibi iich miich ajcxy ti nyaj'ixpijccixy. ³Per ndzocypich co mhuinjihuüygixipy je tiy'ajt co Cristo nigohuajc'ajpty nidüg nidüg yi mibijcpi yëydjicpi. E nañ nidüg nidüg yëydjic nigohuajc'ajty ajcxy ytöxyjic. E Dios nañ nigohuajc'ajpty je Cristo. ⁴Co tüg yëydjic cöjuuxy cöbe'ñ ihuäcxy capxhuäcxy je tiy'ajt huidibi Dios ti ymöyii, tüg je' tzo'ydu'n anajty naymöyii. ⁵E co tüg töxyjäy cöjuxtüdy cöbe'ndüdy ihuäcxy capxhuäcxy je tiy'ajt

huidibi Dios ti ymöyii, tüg je' anajty tzo'ydu'n ñaymöyii. Jadu'n je' nipaady nej jihuiy je' ycöme'pxity cödza'm. ⁶Pen tüg töxyjäy ca' ñaygöbe'na'ñyii, jac'oy co huen yajcöme'pxy cödza'm. Per pen je töxyjäy cho'ydu'n jihuihuamyb co ycöhuay yme'pxity, o co ycöme'pxity cödza'm, jac nigü oy co ñaygöbe'niy. ⁷Je yëydjictjic ca' y'oyity co ajcxy ycohuajc cöjuuxy cöbe'ñ mi'idipy ma ajcxy Dios mibijtzooigixy o yaj'ixpijccixy Dios y'ayuc. Com je yëydjic jadu'n y' nipaady nej Dios, e Dios yajcoj je yëydjic miid yi' y'oy'ajtin ycixpi. Per Dios yajcoj je töxyjäy miid je yëydjic y'oy'ajtin ycixpi. ⁸Co Dios yajcoj je jayjipi yëydjic, ca' yajtuuñ je töxyjäy ycaachypajc. Hue' janchtiy co Dios yajcoj je jayjipi töxyjäy, je' yajtuuni je ñiyëydjic tüg ycaachypajc. ⁹Dios yajcoj je töxyjäy miid je yëydjic ycixpi. E ca' nan yajcoj je yëydjic miid je töxyjäy ycixpi. ¹⁰Paady ycixp copicy co je töxyjäy ajcxy y'ijtcixy cöbe'ñ co Dios mibijetzooigixy o najtzcapxiygixy Dios ytiy'ajt. Je' je' je tiy'ajt co yajpaady ajcxy ane'my, nañ jadu'n yi ängeles ajcxy yajpaatcixy ane'my. ¹¹Per ca' ñejity, iich ajt huidibi nmibijcim Cristo, ma ajt ndzinaayin je yëydjic ca' je' yajpaady naydüg, etz ni ca' je töxyjäy yajpaady naydüg, hue' ajcxy naymiiddzinäyigixyp. ¹²Com tiy'ajt jadu'n co Dios yajcoj je jayjipi töxyjäy miid je ñiyëydjic ycaachypajc. Etz tiy'ajt jadu'n co je töxyjäy ajcxy yajma'xung'ajtcixy je yëydjic ajcxy. Per Dios ti yaj'oyiydäy, e tüg'óciy jiiby chondäy ma Dios.

¹³Miich ajcxy ci'm ocminaangix oc-huinmaaygix, pen oy jadu'n o pen ca' y'oyity jadu'n co tüg töxyjäy Dios mibijctzoy jaygöbe'n. ¹⁴Jëbi tiy'ajt nbaatim huenma'ámyity ya naaxhuin co je yëydijc huidibi ymiid ycöhuay yoñ ooy cho'ydu'n yecy. ¹⁵E je töxyjäydijc ajcxy ooy ycömaypidzimgixy co ajcxy miidity ycöhuay yoñ. Com yi' je' huidi ycöbe'n'ajtip. ¹⁶Pen jim pinjaty ca' mijotcujc'aty iich n'ayuc, copicy nejhuihuipy co iich ajcxy etz nañ jadu'n tüg'óciy jäy huidibi ajcxy mijpidaaccixyp Dios ma tüg'óciy cajp, cuydungixy nej ti nyaj'ixpicyich miich ajcxy, ca' pin jac huingbi costumbre miidity.

Pin tundigooyb “Santa Cenajoty”

¹⁷Jada ayuc nyajnimähuaangixyp jadu'n nej mdungixy ma mnayyöymújcigixy co Dios m'ojadajtcixy. Ca' ngapxpaadyich miich ajcxy, com jibic yhuimbidzimy jadu'n nej mdungixy. ¹⁸Jayijp nimähuaangixy co nijëjity migügtijc ti xyñimäyich co miich ajcxy mnaybijc-huäcxigixy co mnayyöymújcigixy ma je nayyöymujctac. E iich nmibijcpiyich ma ga ma co yjanchity nej je migügtijc ajcxy ymina'n. ¹⁹Ca' yjecyity paady miich ajcxy mnaybijc-huäcxí miid ajcxy mjibic-huinma'n ycixpi, jaydëbi ñiguëxgy pin je' janch tiydudägy cuydumb Dios ytiy'ajt. ²⁰Co miich ajcxy mnayyöymújcigixy ma je nayyöymujctac, jadu'n yhuimbidzimy co ca' mguydungixy nej ypadyii iich ajt nHuindzin Jesucristo ytiy'ajt co mjatungixy

je “Huindzin je' ySanta Cena”.

²¹Com co je hora paady ma yam mdungixy je “Huindzin je' ySanta Cena” nidüg nidüg miich ajcxy mgaaygixy abicyjaty, e ca' mdungix cuendi yi jacjadyii migügtijc, paady nijëjity migügtijc ayuu y'ljtcixy, e nijëjity anaxy ycaaygixy y'uuccixy, ixti ymuucigixy nijëjity. ²²¿Nej ca' miich ajcxy miidity mjiin mdijc ma jëbi mgaaygixy m'uuccixy? Jadu'n nej miich ajcxy mdungixy ca' mmij'ijxcixy ca' mijpidaaccixy je jäy ajcxy nidüg'óciy huidibi mijpidacp Dios. E nañ jadu'n myajtzo'ydungixy yi ayoobi jäy huidibi ajcxy ca' ti miidity. ¿Huam iich miich ajcxy nimähuiipy? ¿Nej jëbi ngömaaygixy miich ajcxy jadu'n nej mdungixy? Ca' huaad ngömaaygixy miich ajcxy co jadu'n m'idihtzixy.

Jadu'n nej njäymejtzim ajt nHuindzin Jesús ma yi “Santa Cena”

²³⁻²⁴Com iich ajt nHuindzin Jesucristo ci'm xyaj'ixpijcyich je tiy'ajt huidibi ti nyaj'ixpicyich miich ajcxy, co je huin'it coodz co agojix ajcxy cïeyjcy je nHuindzin Jesús, huin'it je' conigy je tzajcaagy, e co jayijp yajnajxy Dioscojuyip ma Dios, chi tujc-huäcxy je tzajcaagy, e moy nidüg nidüg ydiscipulos ajcxy. E co ajcxy moyday, chi nimay ajcxy: “Caaygix jada tzajcaagy. Jadu'n iich jada nninixc huidibi ngïyegaamybich ma yi o'cin miid miich ajcxy ycixpi. Jadu'n iich ti nduñich, jadu'n jada miich ajcxy mdunipy jäymejtziig miid iich ycixpi.” ²⁵Co ajcxy ycayday, chi Jesús nañ jadu'n conigy je ügy

copi'am, e yminañ: "Jada ügy je' jada je Dios y'ayuc jemybi huidibi Dios yajhui'my miid jäy ajcxy ycixpi, je huidibi iich nni'py ñidiy'ajt'ajtpy. Naag'oc naag'oc m'uuccixy jada ügy tungixy jäymejtziig miid iich ycixpi."

²⁶Paady naag'oc naag'oc miich ajcxy mgaaygixy jada tzajcaagy, etz m'uuccixy jada ügy, myegipy ajcxy tiy'ajt jadu'n nej Cristo y'o'cy miid ajt nbocy ycixpi, ixti cooni anajty Jesucristo yhuimbity ya naaxhuiñ.

Nej huaad ngaayim je "Santa Cena"

²⁷Paady ycixp pinjaty miid ca'oyjot ca'oyhuinma'ñ caaygixy je tzajcaagy etz uuccixy je vino'ügy, huidibi ajt nHuindzin Jesús ñinicx'ajtpy etz ñi'py'ajtpy, hue' ajcxy ymidundigooygixy ajt nHuindzin Jesús ñaaxnicx etz yi' yñi'py. ²⁸Paady ycixpi copicy nidüg nidüg mibijcpidijc jayijp yaj'oyihuipy yci'mjot yci'mhuinma'ñ, e huin'it jebi cayipy je tzajcaagy etz ügipy je vino ma je "Santa Cena". ²⁹Com pinjaty caayb je tzajcaagy etz ügy je vino ma je "Santa Cena", e ca' tuñ cuendi co je' je' iich ajt nHuindzin Jesús ñinicx etz ñi'py, hue' je' ci'm ñaymidundigoyii, e Dios tzaachytunib miid ypocy ycixpi. ³⁰Paady ycixp may miich ajcxy myuumiidity mba'mmiidity, pumäy mnayjihuiiyigixy. May miich ajcxy yuu ba'm xyaj'ayoogixy etz may ma miich ajcxy ti m'öccixy. ³¹Co tiydudägy njot nhuinma'ñ nyaj'oyiiyim ci'm, ca' ajt nHuindzin Jesucristo xychaachytuunim. ³²Co ajt nHuindzin Jesucristo

xychaachytunim miid yuu ba'm, paady ycixpi jadu'n xychaachytuunim, jigix ca'ydi nidigooyim ajt n'alma yjugy'ajtin quipxyi miid je naaxhuiñyäjy ajcxy huidibi ca' ajcxy Dios tzigiyyigixy.

³³Paady ycixpi miich ajcxy migügtijc co ajcxy mgaya'nip m'üga'nip je "Santa Cena" nay'ahuixigixy miñ xyipy, e jadu'n mgáaygixipy amugi'. ³⁴Pen jim pinjaty ma miich ajcxy ooy yuubögyii, jac'oy co ycaayipy y'ügipy ma yci'mdijc jacjayijp ma ca'ni ymiñ ma je nayoömujectac. Jadu'n mdüngixipy, ca'ydi Dios xychaachytuungixy miid co ca' oy mduungixy je "Santa Cena". Yi jacjadyii ayuc huinma'ñ jim nyaj'oyihuibich co anajty nicxy ci'm n'ijxcixyich miich ajcxy.

Je mic'ajt huidibi Espíritu Santo yejcy ma nidüg nidüg mibijcpidijc

12 Migügtijc ajcxy, ndzojcpich co miich ajcxy mnejhuihuipy jadu'n nej je Espíritu Santo xymooyim mic'ajt. ²Miich ajcxy mnejhuuiyb co jayijp'ajty co ca'ni anajty mmibijccixy Cristo, ooy anajty je ca'oybi xyajniidigooygixy xyajtüdigoooygixy, co m'ojadajtcixy tzaadzech quipychech huidibi ca' ymidoy ca' ycapxy. ³Paady ycixpi ndzojcpich co miich ajcxy mnejhuihuipy co pinjaty ymina'nipy: "iCa' oy jäy yi Jesús!" je jäy huidibi jadu'n minamb, ca' je' anajty yajcapxyii je Dios y'Espíritu. E pinjaty minamb: "iJesús iich ajt nHuindzin!" je' anajty yajcapxip je Espíritu Santo. ⁴Dios yjihui'ñ ymic'ajt yejcpy ymic'ajt canaag nax, per tügpajc

jëyi je Dios yjihu'i'n huidibi mic'ajt yejcp. ⁵Ji yajpaady canaagnax Dios ytung, per tügpaic ajt nHuindzin Jesús huidibi xyajñibijcim nije' nije' tung. ⁶Ji yajpaady canaagnax huinma'n nej jëbi ndunim Dios ytung. Per tügpaic Dios huidibi xymooyim nidüg nidüg je nhuinma'n nej huaad ndunim Dios ytung. ⁷Dios yajnuëxigyp ma nidüg nidüg mibijcpidijc je tiy'ajt co ajcxy miidity yi' yjihu'i'n ymic'ajt ma ajcxy yjot yhuinma'n. Jadu'n Dios ytuñ miid tüg'óciy ymibijcpidijc y'oy'ajtin ycixpi. ⁸Dios miid yjihu'i'n ymic'ajt ymooyb nijëjity mibijcpidijc ayuc huinma'n nej jëbi ajcxy yaj'ixpicy Dios y'ayuc. E nañ jadu'n Dios miid yjihu'i'n ymic'ajt möy nijëjity mibijcpidijc ixpijcin ma yi' ytiy'ajt, per tügpaic je Espíritu Santo huidibi mic'ajt yejcp. ⁹E nañ jadu'n Dios miid yjihu'i'n ymic'ajt möy nijëjity jäy mibijcin, per tügpaic je Espíritu Santo huidibi mic'ajt yejcpy. E nañ jadu'n jacnaagity möy mic'ajt jaydëbi yajtzögy pa'mjäy. ¹⁰E nañ jadu'n Dios miid yjihu'i'n ymic'ajt ymooyb nijëjity mibijcpidijc mic'ajt, jaydëbi mijhuinma'nytúngixy milagro tungixy. E jac nijëjity ymooyb mic'ajt, jaydëbi najtzcaxiigixy Dios ytiy'ajt. E jac nijëjity Dios ymooyb ixpijcin etz huijy'ajtin, jaydëbi ijxajpcixy je espíritu huidibi ca' tiy'ajt miidity, etz nañ jadu'n ijxajpcixy je espíritu huidibi tiy'ajt miidip. E jac nijëjity Dios ymooyb je mic'ajt, jaydëbi capcixy huingbi ayuc, etz nañ jadu'n jac nijëjity ymooyb je ixpijcin jaydëbi

yajñigüejcixy je huingbi ayuc. ¹¹Per tügpaic je Espíritu Santo huidibi ymooyb nije' nije' mibijcpidijc mic'ajt etz huinma'n. Ymooyb nidüg nidüg nej yi' tzocy.

Nidüg'óciy ajt nyajpaatim ma Cristo

¹²Cristo jadu'n yi' nej tüg ninicx, je ninicx ymiid canaag nax huidibi yu'cxp. Oy canaag jamiidity huidibi yu'cxp, per tügpaic ñinicx'aty. ¹³Co nidüg nidüg iich ajt nniibejtim, chi iich ajt nyajpaatim nej tügpciy jäy. Com Dios yjihu'i'n ymic'ajt tügpaic yajpaady ma nidüg'óciy iich ajt njot nhuinma'n, ca' ñëjity pen judíojäy ajt, o pen ca' ajt njudíojäyity; pen jäy xytumbi'ajtim o pen ndunim ngi'mdung; hue' n'ijtim nej tügpciy jäy. Dios xy'adigiyim xyjottigiyim yi' yjihu'i'n ymic'ajt nidüg'óciy iich ajt, paady ycixpi tú'ciy nyajpaatim, com tú'ciy nmi'ijtim Dios yjihu'i'n ymic'ajt.

¹⁴Tügpi jäy ñinicx miid canaagnax huidibi yu'cxp, huidibi midoob, huidibi ijxp. ¹⁵Co ixypy je teczy jadu'n ymina'n: "Ca'p iich ngëjity, paady ca' nyajpaadyich ma je ninicx." ¿Nej paady ycixpi ca' yajpaady ma ninicxin? ¹⁶O co ixypy je tädzac ymina'n: "Ca'p nhuinity, paady ca' nyajpaadyich ma je ninicx." ¿Nej paady ycixpi ca' yajpaady ma ninicxin? ¹⁷Co ixypy tüg'óciy je jäy ñinicx y'oc-huin'aty, ¿ma ixypy miidity huidi midooyb? O co ixypy tüg'óciy je jäy ñinicx ytädzac'aty, ¿ma ixypy miidity huidibi jëbi miid tijaty xuugyiyi? ¹⁸Dios ti pidaci jäy ytecy yhuin y'ahuac etz jac tijaty ma tügpi

nin'ix jad'u'n nej yi' tzojcy. ¹⁹Pen huiindi'ajty ixypy nin'ix'ajtp, či nin'ix ixypy jada? ²⁰Dios ti möy nidüg nidüg jäy yci' ytecy, yhuin y'ahuac, yjijpuz etz ytádzac, per tüg'pajc ñin'ix'aty.

²¹Ca' huaad je huin ixypy nimäy je ci': "Ca' iich miich nyajmayjaty." Nañ jad'u'n ca' huaad ixypy je cohuajc nimay je tecz: "Ca' iich miich nyajmayjaty." ²²Tügpi nin'ix copicy ca'pxy tijaty miid. Huidijaty je nin'ix ymiid oy yjaquëxigy nej jihuüy ca' y'oy'ojadajntity, per copicy yi'. ²³Jadu'n iich ajt njäy'ajtim. Muum ma ajt nnin'ix ca' oy n'ijxim, paady nayxojxim, jigix jac'oy quëxigip. Nañ jad'u'n muum ma ajt nnin'ix huidi y'oymidzo'yduini, paady nyüdzim miid huit, jaydëbi oy quëxigy. ²⁴Muum ma ajt nnin'ix oy n'ijxim paady ca' nyüdzim miid huit. Jadu'n Dios yaj'oyiay ajt nnin'ix, jigix ma ca' oy y'ijxity, nxojxim miid huit, jigix jëbi oy quëxigy. ²⁵Jadu'n Dios yajcojy yaj'oyiay ajt nnin'ix tú'ciy, jigix ca'ydi ñaychiptünigixy nije' nije' huidibi yücx ma ajt nnin'ix. Tüg'óciy huidibi nmiid'ajtim ma ajt nnin'ix naybubéjtigixp miñ xyipy. ²⁶Pen pijcp muum ma je nin'ix, tüg'óciy je nin'ix jihuüy je pijcin. Pen muum ma ajt nnin'ix ooy capxpaady y'lity, chi tüg'óciy je nin'ix jotcujc ñayjihuiyii.

²⁷Miich ajcxy nidüg'óciy Cristo xyñin'ix'ajtcixyp, e nidüg nidüg miich ajcxy myajpatcixy ma Cristo ñin'ix. Jadu'n nidüg nidüg iich ajt nipaady nej huidi yücxp ma tüg nin'ix. ²⁸Dios yajni'bijcyp nije' nije'

mibijcpidijc, jigix ajcxy yajnicixp nidüg nidüg yi' ytung. Tim jayijp yajni'bijcye je apóstol ajcxy huidibi je mjtung yajnicixp. E mimetz Dios yajni'bijcye nijëjity mibijcpidijc huidibi najtzcapxiyib yi' y'ayuc, je midugiigpi Dios yajni'bijcye nije' nije' je mibijcpidijc huidibi yaj'ixpijcp yi' ytiy'ajt. Dios yajni'bijcye mibijcpidijc nijëjity huidibi mij huinma'ñ tumb. E Dios yajni'bijcye mibijcpidijc nijëjity huidibi yajtzoocp pa'mjäy. E Dios yhuin'ijx huidibi pubejtp ymigügtijc. E Dios yhuin'ijx je mibijcpidijc huidibi ane'mip je ymigügtijc. E Dios yhuin'ijx je mibijcpidijc huidibi jadip nej capxip huingbi ayuc. ²⁹Ca' nan nidüg'óciy mibijcpidijc huidibi Dios huin'ijxyp y'apóstol'ajtcixy. Nañ ni ca' nan nidüg'óciy ajcxy najtzcapxiyigixy Dios y'ayuc. E nañ ni ca' nidüg'óciy yi' ajcxy mijhuinma'ñytungixy. ³⁰Ca' nan nidüg'óciy mibijcpidijc huidibi Dios huin'ijxip ymiid ajcxy mic'ajt cötujc yajtzögipy pa'mjäy. Nañ jad'u'n ni ca' ajcxy nidüg'óciy jajtcixy nej yajni'guéjicixipy huingbi ayuc. ³¹Pijctzoogix cixyot huinjot ma Dios je mic'ajt etz je huinma'ñ oybi. Iich miich ajcxy nyajnixihuiy tüg niia'aa tü'aa jac'oybi.

Je tzojcin je oyjäy'ajtin

13 Co ixypy ngapxyich tüg'óciy jäy ajcxy y'ayuc, etz nañ jad'u'n ngapxyich ángeles ajcxy y'ayuc, e ca' ndzocyich ca' njihuüyich nmigügtijcich, jad'u'n yhuimbadzimy iich n'ayuc jad'u'n nej tüg tambor o tüg platillo huidibi ni'goob ooy ñe'my. ²E co ixypy najtzcapxyich Dios y'ayuc, etz co

ixyipy njatyich tüg'óciy ixpijcin huidibi pinjaty nejhuiy etz huidibi pinjaty ca' nejhuiy, etz co ixypy nmijpidägyich Dios ymic'ajt, ixti jébi nyajpidägyich tüg cop, pen ca' ndzocyich njihuüyich nmigügtijcich, ca' iich ti ndzoohuity. ³E co ixypy nmoydayich ayoobitijc tüg'óciy tijaty nmiidich, e nañ co ixypy ngäyecyich nninïcx ma jäy ajcxy co huen nöctigoydäy, e ca' ndzocyich njihuüyich nmigügtijcich, ni ti oybi ca' nbada'nïch.

⁴Yi jäy ajcxy huidibi ooy tzocy ooy jihuüy ymigügtijc, hue' ajcxy ooy mecxtujcin miidity, nañ ooy ajcxy yung naxy yjot yhuinma'n. Nañ ca' ajcxy ymigüg ti yajcohuindoyii, e nañ ca' ajcxy ñaygömayii ci'm. ⁵Yi mibijcpidijc huidibi ajcxy tzojcp jihuüy ymigügtijc, ca' ajcxy oyñiney ycapxcixy, ca' ajcxy yci'm tzojcin adzip tungixy, nañ ni ca' ajcxy yhuindzipity, nañ ni ca' ajcxy ymigüg mijotma'tcixy. ⁶Yi mibijcpidijc huidibi ajcxy tzojcp jihuüy ymigügtijc ca' ajcxy yjotcujcity co pinjaty ytundigooy. Jotcujc ajcxy co pinjaty tudägy yjäy'ajtcixip. ⁷Co naychojcin nayjihuiyim, huin'it yajtunim mecxtujcin, huin'it nmibijctayim huidijaty tiy'ajtip, huin'it nmibijctaayim co tüg'óciy tijaty oy yhuimbidzimipy, huin'it nmechtujctayim tüg'óciy tzaachypï ayo'n.

⁸Yi naychojcin nayjihuiyïn ca' yi' ycixipy ytigoyipy ni mina. Minip je xii tiempo ma ca' y'ocyaj'ixnipy y'ocyajmidoonipy Dios ycapxy y'ayuc huidi jäy

ajcxy ñajtzcapxiyixyp, nañ ni ycayajmidoohuipy pin huingbi ayuc capxp, ni ycayajtzocy anajty ti diy'ajt. ⁹Com ca' yca'pxity je ixpijcin huidibi iich ajt nmiid'ajtim. Nañ jadu'n ca' yca'pxity je Dios y'ayuc huidibi iich ajt nnajtzcapxiyim.

¹⁰⁻¹¹Per co anajty nmiid'ajtim ca'pxy Dios y'ayuc ytiy'ajt, chi ycixipy ytigoyipy je ayuc huidibi nmiid'ajtim cham huidibi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmiydägyich n'iyiyich nejtyin pi'c'anäcin. Per co oy nmij'anäciyñich, chi n'ixmajtznich je pi'c'anäg'atypï huinma'n. ¹²Nañ tim jadu'n nyajnajxim jadachambi xii tiempo ca' n'ijxpjictaayim, ca' nhuinjihuiydaayim Dios y'ayuc ytiy'ajt. Jadu'n nipaady nej jihuüy nay'a'ixnajxim ma tüg iyx, huidibi ti chijxni ti yjibiciyñi. Co anajty Jesús yhuimbity jadüg'oc, huin'it huädz nhuinjihuiydaayim Dios y'ayuc ytiy'ajt, com naybadaanim miid Jesús ahuin ajijp. Jadachambi magama nhuinjihuiyich. Per co nnaybadiybich miid Jesús, huin'it nhuinjihuiydähuibich nej Dios y'ixpijcin miidity, tim jadu'n nej Dios nejhuidäy nej iich n'ixpijcin nmiidity. ¹³Nmibigaanim Cristo huinixii huinitiempo, ca' n'ixmadzaanim nmibijcin ni mina. Nañ njijp'ixxim co oybi nbadaanim ma Dios huinixii huinitiempo. Nañ jadu'n ndzocjim njihuüyim migügtijc huinixii huinitiempo. Hue' jac nigï copicyip co naychojcin nayjihuiyim ca'ydi jac ti.

Co huingbi ayuc yajcapxy

14 Naychójcigixy nayjihuiyigixy miñ xyipy. Mijottigooygixy nej mbaatcixy Dios yjihui'ñ ymic'ajt canaagnax. Yi Dios yjihui'ñ ymic'ajt huidibi jac'oybi, yi' je' yejcpy mic'ajt jaydëbi mnajtzcapxiygixy Dios y'ayuc ytiy'ajt. ²Yi jäy ajcxy huidibi Dios ymic'ajt miid jaydëbi capxy huing ayuc, hue' ajcxy ymigapxyp Dios, e ca' nan jäy, com yi jäy ajcxy ca' huinjihuiyigixy je' ajcxy y'ayuc huidibi capxp. Je Espíritu Santo yejcp je ayuc ma je huidibi capxp. Jadu'n nipaady nej jihuiy ameech je' ycapxy. ³Pinjaty najtzcapxiyb Dios ytiy'ajt, yi' ycapxhuäcxy Dios y'ayuc ma yi jäy ajcxy, jaydëbi yujcpedipy ajcxy y'ixpijcin ma Dios y'ayuc, nañ jadu'n jaydëbi ajcxy yjotmicpigipy etz yjotcugiygixipy. ⁴Pinjaty capxp huing ayuc, hue' ci'm naybubedyi. Pinjaty najtzcapxiyb Dios y'ayuc ma yci'm ayuc, hue' ypubejtyp tüg'óciy yi mibijcpidijc.

⁵Huaad co ixypy nidüg'óciy miich ajcxy mgapxcixy huingbi ayuc. Per jac nigí oy co miich ajcxy mnajtzcapxiygixy Dios ytiy'ajt, ca'ydi co mgapxcixy huingbi ayuc. Pinjaty huidibi najtzcapxiyb Dios y'ayuc, jac nigí oy tuñ, ca'ydi jac pinjaty huidibi capxy huingbi ayuc, pen ca' pinjaty capxticxipy je huingbi y'ayuc, jigix je mibijcpidijc jotcujc'ajtin pátcixip. ⁶Migügtijc ajcxy, co ixypy nnicxyich ma miich ajcxy, e ngapxyich ixypy huingbi ayuc, çti oybi miich ajcxy mbadamyb ma iich? Pen ca' anajty

ti pubejtin nduñich ma miich ajcxy, pen ca' nyajnejhuiyigixy Dios ytiy'ajt jemybi, pen ca' nyaj'ixpijccixy Dios ytiy'ajt o pen ca' nnajtzcapxiyich Dios y'ayuc, o pen ca' nyecyich ixpijcin.

⁷Tzoc ocpidaacim tüg iixpejt ma je xüxy, jadu'n nej je flauti o je arpa. Pen ca' nmido'mbjicim je nota je tono nidüg nidüg, ca' nmido'mbjicim ti pieza ti xüxy yajxuxp o yajcoob. ⁸Nañ jadu'n co soldados ajcxy chiptunaangixy, pen je trompeta ca' huädz yxüxy, ca' ni tüg soldado ñayñi'ixihua'ñyii ma je tzip ytuna'ñyii yjada'ñyii.

⁹Nañ tim jadu'n miid miich ajcxy, pen mgapxcixyp huingbi ayuc huidibi ca' pin huinjihuiy, çnej yajnejhuihuipy ti miich anajty mgapxyp? Jadu'n je' anajty yhuimbizimni nej nigooob mdim'ixmiydaaccixy. ¹⁰Janch co ji yajpaady canaagnax ayuc ya naaxhuiñ ac tigachjaty. Etz janch co nidüg nidüg jäy ayuc miidity e ci'm je' ajcxy huinjihuiyigixy. ¹¹Per pen ca' nhuinjihuiyich je ayuc huidibi jäy xyajmigapxypich jadu'n iich yi' nyajnaxyich nej agatz. O pen ca', yi' xyajnajxpich nej agatz. ¹²Paady miich ajcxy co ooy mnijot'ajtcixy Dios yjihui'ñ ymic'ajt canaagnax, yajtungix je mic'ajt huidibi pubedam yi mibijcpidijc, jigix yujcpedipy ajcxy ymibijcin etz y'ixpijcin ma Dios y'ayuc.

¹³Paady pinjaty jajtp nej capxip huingbi ayuc, copicy co Dios mibijctzohuipy co mic'ajt ymöhuiib, jaydëbi yajnigüeje je ayuc huidibi ycapxamyb. ¹⁴Pen nmibijctzooybich Dios miid huingbi

ayuc, nmibijctzooybich miid iich n'espíritu, per iich nhuinma'n ca' ti jäygidaacin paady. ¹⁵ ¿Ti huaad ndunipyich? Pues copicy nmibijctzooyich n'ojadatyich Dios miid iich njihui'nich, e nañ jadu'n nmibijctzooyich miid iich nhuinma'nich. N'iibadaamyich ngapxpadaamyich Dios miid iich njihui'nich etz miid iich nhuinma'nich. ¹⁶ Com pen miich mhui'nigixyp mhuingapxtaaccixyp Dios miid yi mjihui'n, je migüg huidibi amidoo'ijtp ca' je' huijihuüy je huing ayuc huidibi mgapxyp, e ca' jäbi ymina'nip "jadu'n jada, Amén." Com ca' yi' huijihuüy ti yi' mgapxyp. ¹⁷ Ca' yjeczyty co oyjaty ayuc ti myajtuñ co ti myajnaxy Dioscojuyip ma Dios, per yi mmigüg huidibi ca' huijihuüy miich m'ayuc ca' yi' ti jäygidaacin paady. ¹⁸ Nyajnajxypich Dioscojuyip ma Dios co nigü njatyich nej ngápxibyich huingbi ayuc, ca'ydi miich ajcxy nidüg'óciy. ¹⁹ Per co nyajpaadyich ma je mibijcpidijc ti ñayyöymújcigixy, jac'oy co ngapxyich migoox ayuc huidibi mibijcpidijc yhuinjihuüygixyp, ca'ydi co ngápxibich majc mil huingbi ayuc huidibi ca' pin huijihuüy.

²⁰ Migügtjic ajcxy, ca' ajcxy mmiid'adipy mhui'nma'n, jadu'n nej pi'ctijc yhuinma'n miidity. Ma yi jibicpi huinma'n ymiñ naybidägi jadu'n nej ma'xungdijc huidibi ca' ti jibic huinma'n huijihuüygixy. Miid'adip miich ajcxy oyjot oyhuinma'n jadu'n nej mij'anäctijc huidibi yhuinma'n ti ymejtzni ti yca'pxni. ²¹ Jaybety y'ity ma Dios ycötujcin necy ma Dios

jadu'n ymina'n: "Nmigapxaamybich je may Israel jäy miid huingbi ayuc, e huingbi jäy najtzcaxihuamb iich n'ayuc ma yi' ajcxy, per ni jadu'n ajcxy xycatuna'nich cuendi." Jadu'n je Huindzin Dios ymina'n. ²² Paady je' je Dios ymic'ajt huidibi yajcapxp huingbi ayuc, yejcp Dios ymic'ajt ijxpejt ma yi jäy ajcxy huidibi ca' mibijccixy Dios. Per je Dios ymic'ajt huidibi jäy ymiid co najtzcaxiy Dios ytyi'ajt, yejcp ijxpejt ma yi mibijcpidijc, ca' yecy ijxpejt ma yi' ajcxy huidibi ca' ymibijccixy. ²³ Ca' yjeczyty jadu'n yjadip, co anajty ti ñayyöymújcigixy je mibijcpidijc, e nidüg'óciy anajty ajcxy ytiigiygixy capxpi miid huingbi ayuc huidibi ca' pin huijihuüy, chi ytigihuip ma ajcxy ñayyöymugyii nijējity huidibi ca' ymibijccixy. ¿Ca' yi' ajcxy ymináangixyipy co je mibijcpidijc anajty ajcxy ti y'ahuimbijtcixy loci? ²⁴ Pen nidüg'óciy je mibijcpidijc ma je nayyöymujctac najtzcaxiygixy Dios ytyi'ajt miid yci'm ayuc, e co ytigihuipy pinjaty huidibi ca' ymibicy, e co yi' midohuipy Dios y'ayuc yjihuihuamby ypocy. E ci'm huinmayip nej anajty ti ytundigooy miid Dios co midohuipy co nidüg'óciy mibijcpidijc anajty najtzcaxiygixy Dios y'ayuc. ²⁵ E Dios y'ayuc yajnejhuühüib nej anajty ameech ti ytundigooy jotjoty huinma'nyjoty. E chi jada' ycojxtinay'ihuühuipy, e ojadadipy Dios, e nañ jadu'n ymina'nip co janch Dios miich ajcxy xymiid'ijtp.

Tungixy tüg'óciy miid tudägy'ajt etz yajxon

²⁶ Migügtjic ajcxy, ¿ti huaad mdúngixipy? Co mnayyöymújcigixipy, nijējity

miich ajcxy mhuin'ixipy
 tüg salmo, tüg ayuc huídibi
 yaj'ixpigamyb, tüg tiy'ajt huídibi
 Dios ti xyajnejhuüiygixy, etz capxip
 huingbi ayuc, etz capxtëcxipy
 nej yhuimbídzimyb je huingbi
 ayuc. Tüg'óciy jadu'n tungix,
 jaydëbi ajcxy jäygidägipy etz
 yujcpedipy ajcxy ymibjcin huídibi
 ti ñayyöymújcigixy. ²⁷Pinjaty
 capxamb ma je naymujctac miid
 huingbi ayuc, huen capxy metz o
 tugiig jäy je'yi, e huindüg padüg
 huen capxcixy, ca' y'animayity.
 E pinjaty capxtëcxamb je' je'
 yajñigüejip nej yhuimbídzimyb
 je ayuc tiibi capxcixy. ²⁸Pen ca'
 yajpaady ma je nayyöymujctac
 tüg jäy huídibi capxtëcxip je
 huingbi ayuc, jac'oy co ca' ni
 ti yajcapxipy miid huingbi
 ayuc, jac'oy co migapxip Dios
 jotjoty huinma'ñyoty, e ca'
 capxip mayjäyjoty. ²⁹Nañ jadu'n
 mayjäyjoty jëbi metz o tugiig jäy
 najtzcaxihuip Dios ytiy'ajt, e
 yi jacjadyii mibijcpidijc huídibi
 amido'ijtp, jëbi ajcxy huinmay pen
 janch Dios je' ytiy'ajt huídibi ajcxy
 ti najtzcaxiy, o pen ca' je' Dios
 tiy'ajt'adyii. ³⁰Pen jim mayjäyjoty
 jadüg jäy Dios yajnejhuüiyi nej
 ycapxip, nej tiy'ajt najtzcaxihuipy,
 huen je jäy y'amonipy huídibi
 anajty jayijp ti ytiy'ajt najtzcaxiyyi
 Dios y'ayuc ytiy'ajt. ³¹Jëbi miich
 ajcxy nidüg'óciy mnajtzcaxiyyigixy
 Dios ytiy'ajt huindüg padüg, jaydëbi
 tüg'óciy je mibijcpidijc ixpijccixy
 Dios ytiy'ajt, e nañ jadu'n jëbi
 nidüg'óciy yjotmicpíjccixipy.
³²Copicy co yi' ajcxy huídibi
 najtzcaxiyyb Dios ytiy'ajt, huen

ajcxy nay'ané'migix ci'm, e huen
 capxcixy mina y'ahuaatzcüy.

³³Dios ca' xyajmidzojcin nicx
 nhuinma'ñyidigooyim, Dios chojcpy
 co servicio ndunim agujc jotcujc.

³⁴Jadu'n nidüg'óciy mibijcpidijc
 ma canaag cajp yminaangixy co
 ca' huaad töxyjäydijc ycapxcixy
 serviciojoty, com Dios ti capx'aducy
 co ajcxy ca' ycapxipy serviciojoty.
 Copicy co je yëydijc ajcxy ane'mip
 je servicio, e ca' töxyjäydijc ajcxy
 huaad ane'mgixy je servicio, com
 jadu'n Dios ycötujcin ymina'ñ.

³⁵Pen ñejhuühuamyb ajcxy
 töxyjäydijc ti ayuc ti tiy'ajt, jëbi
 ajcxy ñiyëydijc amidoogixy co
 anajty ajcxy yhuimbijtcixni ma ytiyc,
 com tzo'ydu'n yejcp töxyjäydijc
 ajcxy co ycapxcixy serviciojoty.

³⁶Miich ajcxy hue'
 mdzachnaybidáacigixy nej jihuüy
 miich ajcxy jayijp tim nejhuüiygixy
 Dios y'ayuc, ca'ydi jac pin. Miich
 ajcxy mnaybidáacigixy jadu'n nej
 jihuüy jimyi jadu'n yajcapxhuäcxy
 Dios y'ayuc, ca' yjacmaajity.

³⁷Pen jim pinjaty ma miich ajcxy
 huídibi naybidaacip nejjihuüy
 Dios ti ymöyii mic'ajt nej jëbi
 najtzcaxihuipy Dios ytiy'ajt, o ti
 yhuinma'ñymöyii je Espiritu Santo
 tijaty tiy'ajt, hue' copicy nañ jadu'n
 yñejhuühuipy co je ayuc huídibi
 iich miich ajcxy nyajñijayiyb, Dios
 jada y'ane'min ycötujcin. ³⁸Pinjaty
 jim ma miich ajcxy huídibi ca'
 mijpidäga'ñ etz ni ca' cöbiga'ñ
 je ayuc tiy'ajt huídibi Dios ti
 xyaj'ane'myich, Dios ca' cöbiga'ñ
 yijadu'mbi jäy.

³⁹Com iich jada ayuc
 nyaj'ixpijcpich, paady cham

nimaaybich nmigügtijcich, co huen najtzogiiygixy nej mnajtzcapxiygixy Dios ytiy'ajt, e nañ jadu'n ca' mgapx'adújjccixipy yi' ajcxy huídibi capxamb huingbi ayuc. ⁴⁰Hue' janchtiy tüg'óciy tungixy yajxon, etz miid tudägy'ajt, ca' oyñinej mdúngixipy.

**Co Cristo yjugypijcy
jadüg'oc co y'o'cy**

15 Jadügnax, migügtijc ajcxy, ndzojcpich co miich ajcxy mjäyméjtzcxixipy je Jesucristo y'ayuc ytiy'ajt huídibi ti ngapxhuäcxyich ma miich ajcxy. Je' je' je ayuc tiy'ajt huídibi miich ajcxy ti mgöbijccixy etz huídi ajcxy tudägy mibijccixyp. ²Jëbi ajcxy m'alma ñidzögipy, pen mguydumy ajcxy iich n'ayuc huídibi ngapxhuäcypich, e pen ca' anajty ti mmibijccixy.

³Ti ngapxnaxiyich ma miich ajcxy je ayuc huídibi Dios jayijp ti xymöyich, etz ti nyajnimaaygixy huídibi jaccopicyip co Cristo y'o'cy miid ajt nbocy ycixpi, jadu'n nej Dios y'ayuc ymina'ñ huídibi jaybety ijtp ma yi' ñecy. ⁴Chi ajcxy yajnaxtigiiy Jesús, e codugiig xii yi' yjugypijcy jadüg'oc jadu'n nej Dios y'ayuc ymina'ñ huídibi jaybety ijtp. ⁵E co je Cristo yjugypijcy, chi ñayguëxici jayijp ma Pedro, e jac'axam ñayguëxici ma yi' jacjadyii ni majmetzpi apóstol ajcxy. ⁶Jahueeni xii tiempo yjacnicxy co je Cristo oy ñayguëxigiyii nañ jadu'n ma migox nimigo'pxnaxy mibijcpidijc tügpi tiempo. E may yijadu'mbi mibijcpidijc jacjugy'ajtni chambaad, etz naagity ajcxy ti

y'ó'ccixni. ⁷Jahueeni xii tiempo yjacnicxy co Cristo ñayguëxici ma Jacobo, etz nañ jadu'n ma nidüg'óciy yi' y'apóstol ajcxy.

⁸Jac tím axam ñayguëxici je Cristo nañ jadu'n ma iich. Jacjayijp Jesús huin'ijxy yi' jacjadyii apóstol ajcxy, etz jac'axam iich xyhuin'ijxyich. Jadu'n iich nipaady nej tüg jäy huídibi ooy ti ninajxni je tiempo co ti yma'xung'aty.

⁹Jaccapxpaady yi' jacjadyii Jesús y'apóstol ajcxy ca'ydi iich. Nañ jadu'n ni ca' iich xypaady co jäy ajcxy xytijibich Jesús y'apóstol, miid co ooy ti n'ixhuidityich ti nbahuídiyich Dios yjäy ajcxy.

¹⁰Iich nje'ajtpich nej nje'atyich miid co Dios may'ajt miid iich tuñ. Je mijmay'ajt je mij'oy'ajt huídibi Dios ti tuñ miid iich, ca' ñaadigi'aty, ti y'oybidzimyb. Nigi mictägy ti nduñich ma Dios ytung, ca'ydi jacpinjaty. Ca' nan co iich ndzachmadägyich ma Dios ytung. Hue' Dios oy xymiid'ityich, etz ooy may'ajt tuñ miid iich. ¹¹Paady pen ti miich ajcxy mbaady Dios ytiy'ajt ma iich, o ma yi' jacjadyii apóstol ajcxy, ca' ñejity. Je' je' je Cristo y'ayuc huídibi iich ajcxy ngapxhuäcypich, e nañ Cristo yi' y'ayuc tiibi mmibijccixy.

**Co öcypi ajcxy yjugypigipy
ajcxy jadüg'oc**

¹²Per pen iich ajcxy ayuc ngapxhuäcypich co je Cristo yjugypijcy jadüg'oc co y'o'cy, çna'amy co nijëjity miich ajcxy minaangixy co yi' jäy ajcxy tiibi y'o'ccixy ca' ajcxy yjugypigaangixy jadüg'oc? ¹³Pues pen janch ca'

yjugypigaangixy tiibi y'o'cy, nañ jadu'n ni Cristo ca' ycajyugypijcy jadüg'oc. ¹⁴Co ixypy yjanchity co Cristo ca' yjugypijcy, nañ tim jadu'n je ayuc huidibi ngapxhuäcxpich ca' ti mic'ajt ixypy miidity.

E nañ jadu'n miich ajcxy mmibijcin ca' ixypy chobaady.

¹⁵Pen tiy'ajt ixypy co je öcpi ca' yjugypigaangixy, huin'it je Dios y'ayuc huidibi ngapxhuäcxpich ixypy yhuimbïdzimyb anii.

Com ngapxhuäcxpich co Dios yajyugypijcy Cristo co y'o'cy, paady pen tiy'ajt ixypy co pinjaty tiibi y'o'ccixy ca' yjugypijcy. Nañ jadu'n ixypy ca' ytiy'ajtity co Dios yjugypijcy Cristo. ¹⁶Pen je öcpiidijc ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajyugypijcy jadüg'oc co y'o'cy. ¹⁷Co je Cristo ca' ycajyugypijcy jadüg'oc co y'o'cy, chi miich ajcxy mmibijcin ixypy ca' choobaady. E ca' miich ixypy ajcxy Dios mbocy xyhuinmecxi. ¹⁸E pen janch tiy'ajt ixypy co je Cristo ca' ycajyugypijcy, huin'it je mibijcpiidijc tiibi y'o'ccixy tigoyaangixy y'alma. ¹⁹Pen janch tiy'ajt ixypy co nmibijcim Cristo jëyi ma jadachambi tzinaayin ya naaxhuiñ, ca' jac ni ti ixypy njijp'ijxim co n'o'cim. Jadu'n iich ajt nipaady nej locijäy, e jäy ajcxy nigì xyñixicim xyajxiicim, ca'ydi jac ni pin.

²⁰Per janch co Cristo yjugypijcy jadüg'oc co y'o'cy, je Cristo yi' je' je jayijp jäy huidibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n miid yi' ycixpi mayjäy yjugypiga'n ajcxy co anajty ti

y'öccixy, e yñicxaangixy ma Dios yajpaady. ²¹Com miid tüg jäy, je Adán, chondacy yi o'cin ya naaxhuiñ. Nañ tim jadu'n miid tüg jäy, je Cristo, chondacy je jugypijcin co jäy y'o'ccixy. ²²Miid jada ycixpi co Adán ytundigooy oga'n, paady nidüg'ócüy jäy patcixy yi o'cin. Miid jada ycixpi co Cristo yjugypijcy jadüg'oc co y'o'cy, paady nidüg'ócüy jäy ajcxy yjugypigaangixy jadüg'oc co anajty ti y'öccixy. ²³Nidüg nidüg jäy yjugypiga'n jadüg'oc jadu'n nej anajty ñigueegiyii. Cristo ti yjayijp'aty co yjugypijcy. Tüg'ócüy yi jacjadyii jäy ajcxy huidibi mijnicxpejtcixp Cristo, yi' ajcxy jugypigamb jadüg'oc co anajty Cristo yhuimbity ya naaxhuiñ.

²⁴Co anajty je Cristo yhuimbity ya naaxhuiñ, chi ycixipy ytigoyipy je naaxhuiñybi. Cristo yajtigoyamyb tüg'ócüy naaxhuiñyjäy y'ane'min, tüg'ócüy naaxhuiñyjäy ycötujcin, etz tüg'ócüy naaxhuiñyjäy ymic'ajt. Jesucristo ypijctähuaanip tüg'ócüy naaxhuiñyjäy ajcxy y'ane'min, e pidactähuiipy ma Dios y'ane'min, e Dios Teedy je' je'ajttähuiib.

²⁵E tim copicy co je Cristo y'ane'mdähuaamyb tüg'ócüy, ixti cooni Dios anajty ti mimadactäy tüg'ócüy Cristo ymidzip, e ti pidactäy anajty ma Cristo y'ane'min. ²⁶Jesús yajcixamyb yajtigoyamyb jac'axam je o'cin, ca' ni pin yjac'öcnipy. ²⁷Com Dios ymimadactähuiip tüg'ócüy je Cristo ymidzip, e pidactähuiip ma je Cristo y'ane'min. Per co Dios y'ayuc huidibi jaybety ijtp yminañ co je Cristo ti mimadactäy tüg'ócüy, ca' nan hue' je' yajhuinjihuicy co

Cristo ti mimadägy Dios. Com Dios yi' je' huidibi ti mimadactäy, e ti pidactäy ma Cristo y'ane'min. ²⁸Co anajty Dios mimadactay tüg'óciy pinjaty etz tijaty huidibi mic'ajt miid, e co anajty pidactay ma je Cristo y'ane'min, chi je Dios y'ung ypidactähuipy yi' y'ane'min ma Dios Teedy, etz ane'my yhuí'mañ ma Dios Teedy, je huidibi anajty ti mimadactay. Jadu'n Jesucristo tuna'n, jigix jëbi Dios miid'ajttäy tüg'óciy mic'ajt etz ane'm'ajt.

²⁹Pen ca' yjadu'nity, ¿na'amy co mdzachniibejtcixy co öcpi tzachcodinaaygixy? Co ixypy ca' pin yjugypiga'n jadüg'oc co anajty ti y'o'cy, ¿na'amy co jäy ñiibejtcixy miid öcpi ycixpi?

³⁰¿E ti ycixpi co iich ajcxy nyajpatcixy ayo'nduum jabom jabom? ³¹Migügtijc ajcxy, janch janch iich miich ajcxy nimaaygixy co ooy njäygidägyich miich ajcxy. Miid co mmibijccixy je nHuindzin Jesucristo, paady ycixpi iich miich ajcxy nimaaygixy co jabom jabom nyajpaadyich öcjijp'am.

³²Minaambich jadu'n co ooy nhuindinäy njijptinäyich nmidzip ya Efeso. Tim jadu'n nipaady nej jibic iyujc ahua'n iyujc nhuindinäy njijptinäyich. Pen ca' yjanchity co yi öcpi ajcxy yjugypigipy jadüg'oc, naadigi'ajtp ixypy co iich ayo'n jabom jabom nhuindinäy njijptinäyich. Nig oy co ixypy nyajtüyöyim jadu'n nej ayuc y'ityin: "Tzoc caayim uucim, agujc'ajtim jotcujc'ajtim, com jabom huixtic njugy'ajtin cixxaanim miid yi o'cin."

³³Ca' mnayyéjicigixy co pinjaty xyhuin'fingixipy. Jadu'n yjadipy

nej y'ayuc y'ityin: "Yi migügtijc ajcxy huidibi jibicjot jibic-huinma'n miid, yajtigooyb ajcxy je oyjot oyhuinma'n." ³⁴Ixmajtzcix jibicjot jibic-huinma'n etz tzinaaygix tudägy ca' mbocytungixy. Nijëjity miich ajcxy ca' mnejhuüygixy Dios ytiy'ajt. Jadu'n nmina'nich, jigix ajcxy mdzo'ydu'n mjihuüygixipy.

Nej ajcxy yi ögyipi yjugypigipy ajcxy jadüg'oc

³⁵Ycadimjegyity co nijëjity miich ajcxy xy'amidohuipyich: "¿Ma mic'ajt pätcixipy je o'cpi ajcxy co jëbi yjugypijccixy jadüg'oc? ¿Huidibi ninicx ajcxy ymi'idamyb?" ³⁶Ca' miich ajcxy ti mhuinjihuüygixy. Ca' mnejhuüygixy co je moc tiim huidibi mniipcixyp ca' ymuxa'n ixti cooni anajty jayijp ti ypüch. ³⁷Ca' miich ajcxy mniipcixy je mocquipy. Hue' miich ajcxy mniipcixyp je tiimmoc o jacjadyii huingbi tiim. ³⁸E co je tiim ymuxy, chi Dios möy je ñinicx, tim jadu'n nej Dios jayijp ti huinmay ti tzocy. E Dios nije' nije' je tiim möy je ñinicx tigachjaty. ³⁹Canaagnax ninicx yajpaady ya naaxhuin, ca' ajcxy ytügnaxity. Tigach yi jäy ajcxy miidity ñinicx, tigachjaty iyujc ajcxy miidity ñinicx, nañ tigachjaty joon ajcxy miidity ñinicx, e nañ jadu'n tigachjaty acx ajcxy miidity ñinicx. ⁴⁰Yi tzajpjoty tzinaayb ajcxy tigachjaty miidity ñinicx, nañ jadu'n huidibi ajcxy tzinaayb naaxhuin tigachjaty miidity ñinicx. Yi tzajpjoty tzinaayb ajcxy ñinicx miid tigachjaty y'oy'ajtin, ca'ydi jadu'n nej yi naaxhuin tzinaayb ajcxy

y'oy'ajtin. ⁴¹Yi xii ytiicxin yjajin ca' ñaybadyii miid po' ytiicxin yjajin, nañ tim jadu'n je po' ytiicxin yjajin ca' ñaybadyii miid madza' ytiicxin yjajin. Etz nije' nije' madza' miidity ytiicxin ca' ñaybadyii miid jacjadyii madza' ytiicxin yjajin.

⁴²Nañ tim jadu'n yjada'n miid yi jäy ajcxy tiibi y'o'ccixy co ajcxy yjugypijccixy jadüg'oc. Jäy ajcxy yajnaxtigiy je öcpi naaxnïc x huidibi yhuindigooyipy, e yjugypigipy jadüg'oc miid tüg ñinïc x jemybi huidibi ca' yhuindigoya'n nimina.

⁴³Je öcpi ñaaxnïc co ñaaxtigiy, ca' ti oy'ajtin miidity, e co yjugypijcni jadüg'oc ymiid y'oy'ajtin. Je öcpi ñaaxnïc co ñaxtigiy, ca' ti mic'ajt miidity e chi yjugypijcni mic'ajt miid. ⁴⁴Co je öcpi ñaaxtigiy, hue' yjugypijcni, miid jemybi ninïc x ca'p yaj'ixy. Pen ji yajpaady ninïc huidibi Dios ti yajcojy miid naax, nañ tim jadu'n ji yajpaady ninïc huidibi Dios yajcojpy miid yjihui'n ymic'ajt ca'p yaj'ixy.

⁴⁵Jadu'n jaybety y'ity ma Dios ñecy ma jadu'n ymina'n: "Je jayijp Adán ymiid anajty jugy'ajtin." Je axambi Adán (je' je' je Cristo) je' tüg espíritu huidibi jugy'ajt yejcp. ⁴⁶Je huidibi Dios yjihui'n ymic'ajt miid ca' je' yjayijp'ajty, je' jayijp'ajt huidi Dios yajcoj miid naax; jac'axam je' huidibi Dios yjihui'n ymic'ajt miid, je' je' je Cristo. ⁴⁷Je jayijpi jäy huidibi Dios yaj'oyiy, hue' je' yaj'oyiy miid naax (e yajpaady ya naaxhuiñ). Je mimetzpi jäy huidibi Dios yaj'oyiy, iich ajt nHuindzin Jesucristo, hue' je' chooñ tzajpjoty. ⁴⁸Je jäy ajcxy huidibi tzinaayb ya naaxhuiñ,

yi' ajcxy ñinïc x tú'ciy ñaybadyii miid Adán ñinïc x huidibi Dios yaj'oyiy miid naax. Yi jäy ajcxy huidibi tzinahuamb tzajpjoty, hue' ajcxy ñinïc x tú'ciy ñaybada'nyii miid je Cristo ñinïc x huidibi tzinaayb tzajpjoty. ⁴⁹Jadu'n nej iich ajt, tügenax nguëxícim miid Adán huidibi Dios yaj'oyiy miid naax. Nañ tim jadu'n tügenax nguëxigaanim miid je Cristo huidibi tzinaayb tzajpjoty.

⁵⁰Migügtijc ajcxy, hue' nnimähuaangixy co je ninïc x huidibi miid yxixy etz yñi'py ca' yi' y'ida'n ma Dios y'ane'my. Je ninïc x huidibi cixamb tigoyamb ca' pada'n it lugar ma yi' ñinïc x ajcxy ity huidibi ca' ycixa'n ytigoya'n.

⁵¹Tungix cuendi jada ayuc, nyaj'ixpigaamybich miich ajcxy tüg tiy'ajt huidibi ca' pin huinjihuüy. Ca' nan nidüg'óciy iich ajt n'ögaanim, per nidüg'óciy iich ajt Dios nninïc x yajtigadzaanim. ⁵²Co anajty Dios yajxüxy yi' ytrompeta, je huidibi anajty cogixiyiñip, chi cixipy je naaxhuiñybi. Chi Dios xyajtigadzaanim ajt nninïc x tim tzojcyi, tim tüg jaxigy tüg huinmipxy. Dios yajxüxamyb yi' ytrompeta, e je jäy tiibi ajcxy y'öccixy jugypigip ajcxy jadüg'oc, e ni ca' mina ajcxy y'öccixniipy. E iich ajt huidibi jacjugy'ajtni Dios iich ajt xyajtigadzaanim nninïc x. ⁵³Com iich ajt nninïc x huidibi ögam, huidibi huen tigoyamb, copicy ytigadzip, e nmiid'adaanim ninïc x huidibi ca' öga'n ca' yhuindigoya'n. ⁵⁴Co anajty ytigajtzim ajt nninïc x huidibi cixamb huindigoyamb, nmiid'ajtim anajty jemybi ninïc

huidibi ca' ycixa'n̄ yhuindigoya'n̄ nimina. Co anajty ytigajtzim ajt nnin̄icx huidibi ògam, e nm̄iid'ajtm̄ jemyb̄i nin̄icx huidibi ca' y'òga'n̄, huin'it cuydunipy Dios y'ayuc huidibi jaybety ijtp̄ huidibi jadu'n̄ ym̄inamb: "Co anajty ajt nHuindzin Dios m̄imadägy yi o'cin, huin'it còdigooyñip̄ je o'cin (ca' jacpin̄ y'oc'o'cnip̄). ⁵⁵¿Ma yi o'cin ocjacpada'n̄ mic'ajt co tijy xy'ocjactzaachytunaanim? ¿Ma yi o'cin ocjacpada'n̄ mic'ajt co tijy xy'ocm̄imadägaanim?" ⁵⁶M̄iid co ti ndundigooyim̄, paady ycixp̄ o'cin nbaatim̄. M̄iid co ca' ti nguydundaayim̄ Dios ycötujcin, paady ycixp̄ o'cin nbaatim̄. ⁵⁷Per nyajnaxim̄ Dioscojuyip̄ ma Dios co m̄ijmay'ajt ti tuuñ m̄iid ñich ajt ycixpi, e ti nm̄imadaacim̄ yi o'cin co ajt nHuindzin Jesucristo y'o'cy m̄iid ajt nbocy ycixpi.

⁵⁸Paady ycixp̄, miich ajcxy m̄igügtijc̄ huidibi ooy ndzocy njihūiyich̄ tiydudägy mm̄ibijccix, ca' m'ixtigihūaccixy ma mm̄ibijcin, ca' m'ixmajtzicixy yi mm̄ibijcin, ca' ajcxy m̄jotmetzciiygixy. Tungix jabom jabom ma Dios ytung agujc jotujc, com mnejhūiyigixyp̄ co ca' ñaadig'i'aty ajcxy mdung ma ajt nHuindzin Jesucristo ytung.

**Je cuejtin̄ m̄iid je hermano
ajcxy ycixpi**

16 Jadu'n̄ nej ymiñ yi meeñ huidibi miich ajcxy myajmujccixyp̄ m̄iid je m̄ibijcpidijc̄ ycixpi huidibi jim̄ Jerusalén. Cuydungix je tiy'ajt̄ huidibi ti nyaj'ané'mgixyich̄ yi m̄ibijcpidijc̄ huidibi canaagpic̄y yajpat̄ jim̄

Galacia. ²Naag naag domingo, je jayijpi xii ma je semana y'ixtigiȳ nidüg nidüg miich ajcxy mbidägip̄ abicy hueenī pi'cmeen̄, jadu'n̄ nej anajty ii ti mbaatcixy. Je pi'cmeen̄ huidibi anajty ti myajmujccixy mgüend'ájtcixipy ooy, jigix co ñich jim̄ njädip̄ ma miich ajcxy, ca' ycopicyitȳ meeñ myajm̄ujcixipy. ³E co anajty jim̄ nmechich̄ ma miich ajcxy, miich ajcxy myajni'bigipȳ nijējitȳ m̄igügtijc̄ huidibi nicxip̄ jim̄ Jerusalén. E ñich nguexipyich̄ jada m̄igügtijc̄ jim̄ Jerusalén m̄iid tüg necy etz m̄iid je meeñ huidibi anajty miich ajcxy ti myajmujccixy, jaydēbī yajc̄idiḡihuip̄ je m̄ibijcpidijc̄ jim̄ Jerusalén. ⁴E pen ooy ytim̄ycopicyitȳ co ñich nañ jadu'n̄ nn̄icxibich̄ jim̄ Jerusalén, jēbī ajcxy ñicxy m̄iid ñich.

Pablo huin̄may co nicxa'n̄ Macedonia

⁵Co anajty ndübicyich̄ nn̄icxaambich̄ ma miich ajcxy, jayijp̄ naxihua'n̄ich̄ Macedonia naaxjot, com copicȳ jim̄ Macedonia naxihua'n̄ich̄. ⁶Ca' jecyitȳ co nicxy nhui'myich̄ ma miich ajcxy jecy jecy. Ca' yjecyitȳ co nyajnaxipyich̄ tüg'óciȳ je tichypōj tiempo m̄iid miich ajcxy. Co anajty ndzooñich̄ jadüg'oc̄ ma miich ajcxy, nn̄icxyich̄ anajty muumjaty, miich ajcxy xyt̄üj̄j̄p̄huohūih̄ūibich̄ ma ñich anajty nn̄icxa'n̄ich̄. ⁷Ca' nan tzojccixy n'ida'n̄ich̄ m̄iid miich ajcxy, hue' jatytimȳ huäcxibaambich̄ ma miich ajcxy jecy jecy, pen ñich ajt nHuindzin Jesús jadu'n̄ tzojcp̄. ⁸Per njac-huäcxibaambich̄ ya Efeso ixti coonī Pentecostés xii anajty ti ñajxtäy.

⁹Com nmiidich it lugar ya ma jēbi ngapxhuäcxyich Cristo y'ayuc, e mayjäy huidibi mijpidacp iich n'ayuc, nañ jadu'n mayjäy ya ooy midzip'aty Jesucristo y'ayuc ytiy'ajt.

¹⁰Co Timoteo anajty yjädy ma miich ajcxy, tungixy may'ajt mgöbñccixipy agujc jotcujc ca' ti mhuinmaaygixy, com Timoteo tumb ma ajt nHuindzin Jesucristo ytung tim jadu'n nej iich nduñich.

¹¹Paady ycixp ca' huaad miich ajcxy Timoteo mga'oy'lixipy etz mdüjñphuohuñhuipy, jaydēbi ca' ti jotmay miid'adipy etz yjactüyöyüp agujc jotcujc, e ymedzipy ya Efeso ma nyajpaadyich. Com njñp'ijxypich co Timoteo xyñijädibich quipxyi miid jacjadyii mibijcpidijc.

¹²Jadu'n nej yjajti miid ajt nmigüg Apolos. May'ajt nbijctzoohuich ma Apolos co yí' miidnicxip nijjējity jacjadyii migügtijc huidibi nicxamb ma miich ajcxy. Per ca' yí' yjotcujcity co ñicxip jadachambi tiempo. Hue' janchtiy jacjiini yñicxipy, pen yaj'ahuätzciyby anajty.

Capxpocxin huidibi cijxnip je necy

¹³Ni'ixi m'idipy ajcxy ma mmibijcin. Naygüend'ajtigix ma mmibijcin. Tiydudägy ajcxy mmibigipy, ca' m'ixtigihuäccixy ma mmibijcin. Naybidáacigix huinmic jotmic ma mhuinma'ñ. Mic m'idipy ajcxy ma mmibijcin. ¹⁴Tüg'óciy tijaty ajcxy mdungixy, tungixp miid tzojcin jihuiiyin etz oyjäy'ajtin.

¹⁵Migügtijc ajcxy, mnejhuuiyb jadu'n nej Estéfanos miid yjugymigüg ti mibijccixy Jesucristo y'ayuc. Yí' je' jayjip ajcxy mibijcp jim Acaya, e

ti yhuinma'ñypidaaccixy co ypubedamyb ajcxy yí' mibijcpidijc.

¹⁶May'ajt nbijctzooybich ma miich ajcxy co myajmij'ajtccixipy Estéfanos, etz jac pinjaty huidibi pubejtp je mibijcpidijc etz huidibi ajcxy tumb Dios ytung. ¹⁷Ooy njotcújcidyich co Estéfanos, Fortunato, etz Acaico ti ymiñ ma iich ajcxy ya Efeso. Yí' ajcxy xymiid'ijtpich, com ca' anajty y'oyiy nej nmiid'idipyich miich ajcxy. ¹⁸E yí' ajcxy ti ooy xyajjotcugiyich, e nañ jadu'n miich ajcxy ti mjetcugiyigixy co yí' ajcxy ymiñ ma iich. Paady ycixp copicy co miich ajcxy myajmij'adip yí' ajcxy etz jacjadyii tim jadu'n nej yí' ajcxy.

¹⁹Yí' mibijcpidijc huidibi canaagpicy ya Asia naaxjot yquejxyp ajcxy capxpooxcin ma miich ajcxy. Aquila etz Priscila etz yí' mibijcpidijc huidibi ajcxy yöymujcip ma Aquila ytijc yquejxp ajcxy capxpooxcin ma miich ajcxy ma ajt nHuindzin Jesucristo yxií. ²⁰Tüg'óciy je mibijcpidijc huidibi ya Efeso yquejxp ajcxy capxpooxcin ma miich ajcxy. Naygapxpóocxigixy miich ajcxy xic xon.

²¹Iich, Pablo, njaaybich miid ngi'mgi' ngi'mletra jada capxpooxcin huidibi nguejxypich ma miich ajcxy. ²²Pen jim pinjaty ca' mijpidägy iich ajt nHuindzin Jesucristo, huen Dios yajtigooyip ajcxy y'alma. ¡Maranata! Huen tzojc yminipy ajt nHuindzin Jesucristo.

²³Huen ajt nHuindzin Jesucristo oy'ajt may'ajt tunipy miid miich ajcxy etz xyconuucxip ajcxy.

²⁴Ndzojcypich njhuiiybich miich ajcxy nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

Yi Mimetz Necy Huidibi San Pablo Yajniguejx Je Mibijcpidijc Jim Corinto

1 Hich Pablo, Dios jadu'n ti tzocy, paady ycixpi Jesucristo ti xyajni'bicyich co ngapxhuäcxibich yi' y'ayuc. Hich miid ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot. ²Huen Dios Teedy etz hich ajt nHuindzin Jesucristo may'ajt oy'ajt tunipy miid miich ajcxy etz xyajjotcugíyigixip.

Nej Pablo yjajty y'ayoy

³Tzoc yajnaxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohuim, je Dios huidibi yejcp jotcuje'ajtin. ⁴Dios xyajjotcugíyim co nminajxim nyajnaxim tzaachypi ayo'n jigix jëbi nyajjotcugíyim jacpinjaty huidibi minajxp yajnaxp tzaachypi ayo'n. Tim jadu'n nej hich ajcxy ti nbaady jotcuje'ajtin ma Dios, nañ tim jadu'n yi' ajcxy pada'n jotcuje'ajtin ma Dios huidibi minajxp yajnaxp tzaachypi ayo'n. ⁵Com tim jadu'n nej hich ajt

nminajxim nyajnaxim tzaachypi ayo'n miid Cristo ycixpi, nañ tim jadu'n miid Cristo ycixpi nbaatim jotcuje'ajtin. ⁶Paady ycixpi hich ajcxy nminajxcixy nyajnaxcixy tzaachypi ayo'n, jaydëbi miich ajcxy mbaadip jotcuje'ajtin etz nañ jadu'n ypaadip ajcxy m'alma ñidzoocin. Dios yejcpy jotcuje'ajtin ma miich ajcxy, jaydëbi miich ajcxy mbaadip jotcuje'ajtin etz nañ jadu'n ñidzögip ajcxy yi' m'alma. E co ajcxy mbaadip jotcuje'ajtin etz ajcxy m'alma nidzoocin, chi jëbi miich ajcxy mmimadägip etz mmecxtugip tzaachypi ayo'n, tim jadu'n nej hich ajcxy nmimadägy etz mmecxtújcixich tzaachypi ayo'n. ⁷Jotcuje nayjihüyijich miid miich ajcxy ycixpi, com njjip'ijxpich co mmadägipy ajcxy ma mmibijcin. Com nejhuüyibich co miich ajcxy mminajxyp myajnaxyp tzaachypi, tim jadu'n nej hich ajcxy nminajxcixy nyajnaxcixy tzaachypi. E nañ jadu'n Dios yejcpy jotcuje'ajtin ma miich ajcxy, tim jadu'n nej yecy jotcuje'ajtin ma hich ajcxy.

⁸Migügtijc ajcxy, hich ajcxy ndzojcpich co miich ajcxy

mnejhuĩhuĩp jadu'n nej canaagnax tzaachypĩ ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njjip'ixyich co nbidzimipyich juugy ma je jimbi it lugar. ⁹Jadu'n iich ajcxy nnayjihuiyii nej jäy ajcxy huidibi yajpatcixp o'cjjip'am. Jadu'n ti njatyich, jigix jēbi n'ixpicyich nej iich huaad nigĩ Dios nyajmij'atyich, je Dios huidibi yajjugypigip yi jäy ajcxy tiibi y'öccixy. E ca' nan ngi'm mic'ajt nmijpidaacpyich. ¹⁰⁻¹¹Ti iich ajcxy Dios xyñihua'n xycohua'ñ, e xyjacnihua'naamb xyjaccohua'naambich ajcxy ma yi jäy ajcxy huidibi xyaj'ögaambich ajcxy. E co miich ajcxy xypubejtyich, copicy co jacmibijctzoogix Dios miid iich ycixpi. Njjip'ixypich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogixy miid iich ycixpi, nañ jadu'n yajnájxcixyipy ajcxy jäygidaacin ma Dios miid je may'ajt oy'ajt ycixpi huidibi Dios ytumyb miid iich ajcxy.

Ti Pablo co yhuäcxijpy, ca' chojc nicxy jim Corinto

¹²Jotcujc nayjihuiyijich miid jada ycixpi com nejhuiybich co ti ndzinäyich miid tudägy'ajtin etz miid oyjot oyhuinma'ñ miid yi mayjäy ajcxy canaag agajp etz jacnigi ma miich ajcxy. Dios miid may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma ndzinäyich. ¹³Hiich miich ajcxy nyajnijayiyb je ayuc tiy'ajt huidibi

miich ajcxy jēbi mgapxcixy etz mhuinjihuiygixy. E nañ jadu'n njjip'ixypich co miich ajcxy mhuinjihuihuipy iich n'ayuc tüg'öciy. ¹⁴Jadu'n nej miich ajcxy cham cujc-huäcxy mhuinjihuiygixy iich n'ayuc ndiy'ajt. Jacjiini co anajty je xii je tiempo ymiñ co ajt nHuindzin Jesús y'ane'ma'ñ ya naaxhuiñ, chi miich ajcxy jotcujc mnayjihuihuib miid iich ycixpi. E nañ tim jadu'n nej iich ajcxy jotcujc nayjihuihuib miid miich ajcxy ycixpi.

¹⁵Com nejhuiybich co miich ajcxy xychojcpich xyjihuiybich, paady ycixpi nhuinma'ñ nbidägyich co nicxy n'ixaangixy miich ajcxy jadüg'oc, e jadu'n nyajjotcugihuaangixich miich ajcxy mejtz'oc. ¹⁶Jadu'n nhuinma'ñ ti nbidägyich co nnicxa'ñich Macedonia. Per jayijp nnaxa'ñich ma miich ajcxy mgajp. E co anajty ndzooñich Macedonia, jadüg'oc nnicxa'ñich ma miich ajcxy. E jadu'n jēbi miich ajcxy xytüjijphuohuihuibich co anajty nnicxyich jim Judea. ¹⁷¿Nej mdijy, co iich aametz jotmetz nduñich co ca' ti nnicxyich ma miich ajcxy nej anajty ti nmina'ñich? ¿Nej mdijy, nhuinma'ñ miididyich jadu'n nej naaxhuiñyäjy huidibi minamb co ñicxa'ñ, e chi ca' ñicxni? ¹⁸Per Dios jēbi tiy'ajt yegipy co je ayuc tiibi nyajnimaaygixy, nguydunipyich yi'. Hiich n'ayuc janch yi'. ¹⁹Hiich miid Silvano etz Timoteo ngapxhuäxcixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuydumyb je' y'ayuc, tudägy je' ycapxy.

²⁰Tüg'óciy je ayuc huidibi Dios yejc jecy'ajty miid iich ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nmínaaním. "Amén, jadu'n jada," com Cristo Jesús ti cuydundäy Dios y'ayuc. ²¹Com je' je' Dios huidibi xyajmibijcim Cristo, e Dios huidibi xyajmiid'ijtim Cristo. Jadu'n Dios ytuñ miid iich ajcxy etz nañ jadu'n miid miich ajcxy. Je' je' Dios huidibi xyajmibijcim etz xypidaacim tügjijp ma y' ytung. ²²Dios ti pidägy ma ajt njot nhuinma'n je tiy'ajt co nyajpaatim ma Cristo Jesús. Co Dios xy'adigiyim xyjottigiyim y' yjihu'iñ ymic'ajt, chi tiy'ajt yecy co nyajpaatim ma Cristo Jesús.

²³Dios jëbi tiy'ajt yegipy co miid tudägy njot nhuinma'n nmíydacyich co ca' jadüg'oc nnicxyñich ma miich ajcxy mic'amy, jadu'n nej anajty nhuinma'n ti nbidägyich, miid co ca' ndzocyich nicxy n'ojcixy huin jijp. ²⁴Ca' nnicxa'ñich mic'amy ma miich ajcxy, com ca' adzip nyajmibigaangixy miich ajcxy huidibi copicy ajcxy mmibigipy. Miich ajcxy tydudägy ti mmibijccixy. Jëyi co nbubedaangixy jaydëbi ajcxy nigí jotcuje'ajt mmíid'adipy ma ajcxy mdzinaayin mjogy'ajtin.

2 Paady ycixpi jadu'n nhuinma'n ti nbidägyich co ca' nnicxa'ñich mic'amy jadüg'oc ma miich ajcxy, miid co miich ajcxy nyajtajipy nyajmayipy co ngapxhuijyich miid ajcxy mbocy ycixpi. ²Com pen iich miich anajty ajcxy nyajtajpy nyajmaayb, çpin

jada' iich xyajjotcugihuibich? Pues miich ajcxy huidibi tajp mayb, miich ajcxy xyajjotcugihuibich. ³Paady ycixpi ti nnijayiiygixy jadu'n co ca' nnicxa'ñich mic'amy ma miich ajcxy, com ca' jadu'n ndzocyich co iich miich ajcxy nyajtajipy nyajmayipy. Jac'oy co iich miich ajcxy nyajjotcugihuiipy. Com nejhuiiybich co iich jotcuje nayjihuiiyijich miid miich ajcxy ycixpi. Nañ jadu'n miich ajcxy jotcuje mnayjihuihuiyb co mnejhuihuiipy co ti njotcugihuibich miid miich ajcxy ycixpi. ⁴Co ti njayich je necy huidibi ti nguexyich ma miich ajcxy, ooy mij jotmay ti njihuüyich, ixti nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtiy ti njaayich je necy jaydëbi mnejhuiiygixy co mijcajee ndzojccixy njihuüiygixy.

**Meecxin ma je pin
anajty jibicpi ti tuñ**

⁵Per pen jim ma miich ajcxy pinjaty ti yecy tajin mayim co ti ytundigooy, pues ca' nan iich tügpajc tajin mayim jihuiiybich. Nañ jadu'n miich ajcxy nidüg'óciy mjihuüiygixyp tajin mayin. Jadu'n nmína'ñich co huenjaty tajin mayin miich ajcxy mjihuüiygixy, jigix ca' anaxy ajcxy nyajtajip nyajmayip. ⁶Yajhuäcxijp je tzaachypi huidibi miich ajcxy mooyb je migüg huidibi ti ytundigooy. Ti miid jadu'ni. ⁷Jadu'n tzocy cham co miich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugihuiipy. Ca' yjeczyty co je migüg anaxy oy jihuihuip

tajin mayin. ⁸Paady ycixp may'ajt nbijctzooyich ma miich ajcxy co myajniguëxigipy ajcxy co mdzocy mjihuüy ajcxy je migüg huidibi ti ytundigooy. ⁹hich miich ajcxy ti nijayüy jayhuin miid je migüg ycixpi huidibi ti ytundigooy, jigix jëbi nnejhuüiyich, pen mguydumyb miich ajcxy iich n'ayuc, o pen ca' mguydungixy. ¹⁰Jadachambi co pinjaty ti ytundigooy ma miich ajcxy, e miich ajcxy mhuinmecxi yi' ypocy, nañ jadu'n nhuinmeecxi iich yi' nej ytundigooy. Com iich co nhuinmeecxyich tüg nmigügich nej ti ytundigooy, jadu'n nduñich miid miich ajcxy ycixpi, com Cristo y'lijxyp ñejhuüiyb tüg'óciy tijaty nduunim. ¹¹Jadu'n nhuinmeecxim nmigüg ypocy, jigix Satanás, je mujcu', ca' xymimadaacim. Nejhüüiyim yajxon nej Satanás mañ'ajt miidity.

**Pablo ca'p anajty
yjotcujc'aty jim Troas**

¹²Co nja'tyich ma je cajp huidibi xiijip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nbatyich, nej jëbi nduñich ma ajt nHuindzin Jesucristo ytung. ¹³Per ca' anajty jotcujc nayjihüüiyijich. Com ca' nminaybatich je iich ajt nmigüg Tito jim Troas. Paady ycixp ngapxycijxyich miid je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴Nyajnajxypich jäygidaacin ma Dios co miid Jesucristo ymic'ajt jatytim y nmimadacypich

jabom jabom tüg'óciy huidibi xymidzip'ajtpich ma tüg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuäcxypich ma tüg'óciy naax cajp. Je mayjäy ma canaag cajp ooy jäygidaaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojüy xi ya. ¹⁵Co ngapxhuäcxyich Cristo y'ayuc ma yi mayjäy huidibi padamb ajcxy y'alma ñndzocin ooy Dios jäygidägy. E ñañ jadu'n Dios ooy jäygidägy co ngapxhuäcxyich Cristo y'ayuc ma yi jäy ajcxy huidibi ajcxy y'alma tigoyaamb. Jadu'n iich ajcxy ndung nipaady nej jihuüy nboomjójcixich jabom jabom ma Dios yhuinduu miid Cristo ycixpi. ¹⁶Pinjaty mijpidacp Cristo y'ayuc huidibi ngapxhuäcxypich, hue' je' y'alma nidzögamb. E pinjaty ca' mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity iich ajcxy ndung. ¹⁷Ca' iich ajcxy nduñ jadu'n nej jacnaagity ajcxy huidibi Dios y'ayuc mihuidijtip meeñgixy. Cixyjot huinjot iich jäy nyaj'ixpijccixy Dios y'ayuc ytiy'ajt. Com Dios ti xayajnbicyich co yi' y'ayuc ngapxhuäcxich. Miid co nyajpaatim ma Cristo, paady ycixp nduunim jadu'n nej jihüüy nyajpaatim jabom jabom ma Dios yhuinduu.

**Je jemybi ayuc tiy'ajt
huidibi Dios xymooyim**

3 Co jadu'n nmina'ñich ñnej m'ijxcixy nej jihüüy huinjemy nyajtzondäga'ñich ayuc co

ndzachnaymayáanigixyich ci'm?
 ¿Nej mdzojccix co ajcxy nyaj'ixipy
 tüg tiy'ajt necy co nduñich ma
 Dios ytung? o ¿Nbijctzohuipich
 tüg tiy'ajt necy ma miich ajcxy,
 jadu'n nej nijëjity jäy ytungixy?
²Ca' iich ajcxy ndiy'ajt necy
 ycopicyity. Com jëbi yi mayjäy
 ajcxy tiy'ajt pigipy ma miich ajcxy
 mdzinaayin mjygy'ajtin co tudägy
 ti nyaj'ixpicyich miich ajcxy Dios
 ytiy'ajt. Jadu'n miich ajcxy nipaady
 nej iich ajcxy ndiy'ajt necy yjaayity
 ma iich ajcxy njot nhuinma'ñ. E
 jadu'n jäy ajcxy ijxcabipy etz
 huinjihuipipy. ³Cristo ci'm
 ti pidägy yi' ytiy'ajt ma miich
 ajcxy mjot mhuinma'ñ miid je
 ayuc huidibi ti ngapxhuäcxyich
 ma miich ajcxy. Jadu'n miich
 ajcxy nipaady nej tüg tiy'ajt necy
 huidibi Cristo ti jaay. E huidibi
 iich miich ajcxy ti nyaj'ijxcixy ti
 nyajniimaaygixy. Miich ajcxy ca'
 jadu'n ocpaatni nej tüg tiy'ajt necy
 huidibi jäy ti jay miid tinta. Nañ
 jadu'n ni ca' yjëjity je tiy'ajt huidibi
 cojayip ma tüg tzaadzech. Hue'
 miich ajcxy janch nipaady nej tiy'ajt
 necy huidibi je Dios jugypí yjihui'ñ
 ymic'ajt ti jaay ma jäy ajcxy yjot
 yhuinma'ñ.

⁴Nejhuiybich tiydudägy co
 janch tiy'ajt nej nmına'ñich co
 Cristo ti xyaj'nibicyich jada tung
 miid Dios ycixpi. ⁵Ca'p iich ajcxy
 jëbi ci'm madägy ma Dios ytung.
 Tüg'óciy mic'ajt etz tiy'ajt jilby
 nbáatcixyich ma Dios, huidibi
 miid jëbi ndúungixich yi' ytung.
⁶Dios ti xymóoygixyich mic'ajt co
 ndunipyich ajcxy ma yi' ytung. Dios
 ti pidägy ma iich ajt jemybi ayuc

tiy'ajt, huidibi miid xy'ane'mim.
 Jada jemybi ayuc tiy'ajt je
 Espíritu Santo pidaacp ma ajt njot
 nhuinma'ñ. E ca' je' yjadu'nity
 nej je ayuc tiy'ajt huidibi Moisés
 yjayhui'm jecy'ajty. Miid je Moisés
 y'ayuc huidibi jaybety ijtp, Dios
 xymooyim je o'cin. Miid je jemybi
 ayuc tiy'ajt huidibi je Espíritu Santo
 yejepy, Dios xymooyim jugy'ajtin
 huidibi ca' ycixipy ytigoyipy ni
 mina.

⁷⁻⁸Je Dios ycötujcin huidibi
 Moisés yjayhui'm hue' jaybejty
 oga'n ma tüg tzaa. E je huin'it
 tiempo ooy Moisés anajty
 yhuinjijp mic y'adixy miid Dios
 y'oy'ajtin. E je Israel jäy ajcxy
 ni ca'p je' anajty huaad y'ijxcixy
 Moisés yhuinjijp, co anajty ooy
 mic chach'adiicxy. E jada Dios
 y'oy'ajtin huidibi Moisés ymiid, ca'
 jecy y'ijty. Hue' je' tigooyñip anajty
 oñydägy'amy. Per pen Dios yaj'ijxip
 anajty yi' y'oy'ajtin co Moisés
 moy je jäy ajcxy je Dios ycötujcin
 huidibi ane'm yi' o'cin, nigí mi'idipy
 Dios y'oy'ajtin je jemybi ayuc tiy'ajt
 huidibi je Espíritu Santo xymooyim.
⁹Pen mij anajty oy'ajtin miidity je
 cötujcin huidibi tuuñ co y'ane'my
 ma iich ajt nbocy n'o'cin. Nigí
 mij'oy'ajtin miidity Dios y'ayuc
 ytiy'ajt je jemybi huidibi minaamb
 co Dios jëbi xyaj'ahuimbijtim
 tudägy. ¹⁰Jëbi nminaanim co je
 jécyip cötujcin y'oy'ajtin ca' yi'
 ytimytiijty co nyajquipxyihuaanim
 miid je jac'oybi oy'ajtin huidibi
 Dios y'ayuc ytiy'ajt jemybi ymiid.
¹¹Com pen ymiid oy'ajtin je
 cötujcin huidibi ymic'ajt ca' y'ida'ñ
 huinixi huinitiempo, nigí oy'ajtin

miiđity Dios y'ayuc ytiy'ajt jemybi huiđibi ca' ycixipy ytiđoyipy nimina.

¹²Miid co njjip'ijxim je oy'ajtin huiđibi Dios xymöhuaanim miid je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³Ca' jadu'n nduunim nej Moisés idiich jecy'ajty co anajty miiđity yhuiňyjjp huingobe'näy, jigix ca'ydi Israel jäy ajcxy icy nej je' anajty ytiđoy je Dios y'oy'ajtin huiđibi anajty quëxäp ma je' yhuiňyjjpin. ¹⁴Per yi Israel jäy jecy'ajty ca' ajcxy yajxon huinjihuüi ti anajty Dios ytumyb miid Moisés, ixti chambaadni yi Israel jäy ajcxy ca' yajxon huinjihuüigixy co ajcxy capxcixy je ayuc huiđibi Moisés yjayhui'm. Jadu'n nipaady nejjuüi Moisés chambaadni y'ityñi huingobe'näy. Co ajcxy mibigipy je Cristo, huin'it ajcxy huinjihuüiipy, e jadu'n je' paadiipy nej juüi Moisés ti ñayhuingobe'ndüdyi. Co yi Israel jäy ajcxy mibjccixipy Cristo, e ijxip ajcxy Dios y'oy'ajtin, huin'itni ajcxy huinjihuüiipy Dios y'ayuc ytiy'ajt je jécyip.

¹⁵Ixti chambaadni co yi Israel jäy ajcxy capxcixy je migooxpi libro huiđibi Moisés yjayhui'm, ca' ajcxy huinjihuüi yajxon Dios y'ayuc, jadu'n nipaady nej ajcxy yhuinma'n ymäđity. ¹⁶Pinjaty jothuimbijtp, e mibicy iich ajt nHuindzin Jesucristo, oyiiñip yi' yhuinma'n, e yhuinjihuüiipy Dios ytiy'ajt. ¹⁷Je Huindzin Jesucristo, yi' je' Dios yjihu'iñ ymic'ajt ymiid. E ma Dios yjihu'iñ ymic'ajt yajpaady, Dios yi' yi jadu'mbi jäy ajcxy yajnihuätzäctutp ma yi Dios

ycötujcin je jécyip. ¹⁸Paady ycixp tüg'óciy iich ajt jadu'n nipaady nej tüg'ijx ma nni'ijxim ajt nHuindzin Jesucristo y'oy'ajtin. Com ca' jadu'n patni nej juüi n'ijtim huingobe'näy. E ñañ jadu'n iich ajt njacyujcpejtım n'oy'ajtin, jayđebi nguipxyjatytiyim miid Cristo. Com jabom jabom iich ajt ñgi nbaatim n'oy'ajtin ma Cristo. Jada je' huiđibi je Dios yjihu'iñ ymic'ajt ytumyb ma ajt njot nhuinma'n. E iich ajt nHuindzin Jesucristo ti pidägy Dios yjihu'iñ ymic'ajt ma ajt njot nhuinma'n.

4 Com Dios ti xypa'ayooyich, e ti xyajniđicyich co ngapxhuäcxibich yi' y'ayuc ytiy'ajt jemybi, paady ycixp ca' njotmetzcäyich. ²Per ooy ti njjpcodijjigixyich ti njjpcogapxäyigixyich yi' jäy ajcxy y'ayuc huiđibi ajcxy ytungixyp etz ycapxcixpy ayüch ameech, etz huiđibi oymidzöyduuni. Ca' iich ajcxy ti nduñich miid jibichuinma'n. Nañ jadu'n ni ca' nyajtigäjtzcixich Dios y'ayuc. Hue' janchtiy ngapxpich ajcxy huiđibi janchip. Jadu'n nyaj'ixpjccixyich yi' jäy ajcxy, jayđebi ajcxy jotcujc ñayjuüiigixy ma Dios yhuinduu. ³Yi' jäy ajcxy huiđibi nicxy y'alma ytiđoyaangixy ca'oydactuuby, ca' ajcxy huinjihuüi Dios y'ayuc oybi nej jëbi ajcxy y'alma nüzögipy. Jada je' je ayuc huiđibi ngapxhuäcxixpich. Pinjaty ajcxy y'alma nüzögip yhuinjihuüiyb ajcxy jada ayuc. ⁴Yi' ajcxy huiđibi y'alma tiđoanip ca' mibjccixy Dios y'ayuc, com Satanás huiđibi ane'mb ya naaxhuiñ ti yajmädyii

ajcxy yhuinma'ñ. Ca' je' ajcxy huinjihuïy Cristo y'ayuc oybi. Cristo tú'ciy yaj'ixy, tú'ciy mic'ajt miidity, nej Dios yaj'ixy nej Dios mic'ajt miidity. E Cristo y'ayuc jadu'n nipaady nej tüg mijtixin huidibi Satanás ti ahuijztucy ca'ydi yticxy ma je' ajcxy. ⁵Co iich ajcxy ayuc ngapxhuäcxyich, ca' iich ajcxy ngapxhuäcxy ngi'm'ayuc ngi'mdiy'ajt. Hue' iich ajcxy ngapxhuäcxy Jesucristo y'ayuc ytiy'ajt. Ngapxhuäcxyich ajcxy co Jesucristo ñihuindzin'ajtaayb tüg'óciy. E ñañ jadu'n ngapxhuäcxyich ajcxy je tiy'ajt co iich ajcxy jadu'n naydijiygixyich nej jihuïy miich ajcxy xytumbi'adyii miid Cristo ycixpi. ⁶Je Dios huidibi jecy'ajty ane'm co huen tiicxin ji'aty huidibi codiicxip ma ycoodzity, yi' ti xymooyim y'ayuc ytiy'ajt. Yi' y'ayuc tim jadu'n nipaady nej tüg tiicxin nmiid'ajtim ma ajt njot nhuinma'ñ, jigix jébi n'ijxim je Dios y'oy'ajtin huidibi quëxícip ma Jesucristo yhuiniyjip.

Je jugy'ajtin co nmibijim

⁷Je Dios y'oy'ajtin oybi nmiid'ajtim ma ajt njot nhuinma'ñ, iich ajt ca' ni ti mic'ajt nmiid'ajtim ma ajt ngi'mjot ngi'mhuinma'ñ. Jadu'n Dios pidägyñi yi' y'oy'ajtin ma iich ajt, tim jadu'n nej jäy ajcxy pidaaccixy pi'cmeen ma pi'c'ídzimboch. ⁸Oy iich ajcxy nminaxyich nyajnaaxyich may ayo'n, per ca' ndajy nmayich ajcxy anaxy. Ooy nhuinmay'ahuidjtcixyich miid je tzaachypi ayo'n ycixpi, per ca' nhuinma'ñyidigóoygixyich. ⁹Oy iich ooy nmidzip xy'ixhuidityich

xypahuidityich, per Dios ca' xy'ixmachich. Canaag'oc iich nmidzip ti xycujy ti xyjibipyich. Per ca' iich njugy'ajtin ti ytigooy. ¹⁰Hueñyama'amyity nhuidityich ajcxy nmiidich je tzaachi'au ma nninixich, ma jäy ajcxy ti xychaachytúungixich. Je' je' je ijxpejt co nhuidityich o'cin jìjp'am, tim jadu'n nej Jesús anajty huidity o'cin jìjp'am. Ngöbìjycypich jada tzaachypi, jigix tüg'óciy jäy ajcxy nejhuïhuip co Jesús xypubejtpich xypudigiiybich. ¹¹Nami jacjugy'ajtnich ajcxy, o'cjìjp'am iich ajcxy nhuidijtcixy jabom jabom miid Jesús ycixpi, jigix jébi tüg'óciy jäy ajcxy nejhuïhuipy co Jesús xypubejtcixyp xypudigiiygixyp. ¹²Jadu'n ndzinäyich o'cjìjp'am, jigix miich ajcxy miid'adip jugy'ajtin huidibi ca' ycixipy ytigoyipy. ¹³Jaybety ymiñ ma Dios ñecy ma jadu'n ymina'ñ: "Ti nmibicyich, e paady ycixpi ti ngapxpídzimybich nej ti nmibicyich." Tim jadu'n nej Dios ñecy ymina'ñ, ñañ tim jadu'n iich ajcxy yminaangixy co nmibìjccixyich Dios, e paady ngapxpídzimigixyich nej nmibìjccixyich. ¹⁴Com nejhuïyim jadu'n nej Dios yajjugypijcy Jesús co y'o'cy. Ñañ tim jadu'n Jesús xyajjugypìgaanim jadüg'oc miid Dios ymic'ajt co anajty n'o'cim. E quipxyi miid miich ajcxy xyajñiximip ma Dios yhuinduu. ¹⁵Tüg'óciy tzaachypi huidibi nminajxypich nyajnajxypich, hue' nminaxyich nyajnaaxyich miid miich ajcxy m'oy'ajtin ycixpi. E co anajty Dios jactuñ may'ajtin miid jacjadyii mayjäy ajcxy, ñañ jadu'n

mayjäy yajnájxcixipy jäygidaacin ma Dios, jigix jëbi mayjäy iibáatcixipy capxpáatcixipy Dios.

¹⁶Paady ycixpi ni mina xii, iich ajcxy ngajotmetzcíhuangixy.

Oy iich ajcxy nninícx yjaccöminajc'idích jabom jabom, per iich ajcxy njot nhuinma'nñ nígi mic'ajt paady jabom jabom.

¹⁷Je tzaachypi je ayo'n huidibi nminajxim nyajnajxim ya naaxhuiñ, ca' yi' ytimytiijity. Cixip naxip yi'. E miid co nminajxim nyajnajxim tzaachypi ayo'n, huin'lit nbaatim oy'ajtin nígi ymijity y'oyity huidibi ca' ycixipy ñaxipy ni mina.

¹⁸Ca' huaad iich ajt nhuinma'nñ nbidaacim ma huidijaty cixamb tigoymb. Tüg'óciy tijaty yaj'ijxp yajhuindiicxp ya naaxhuiñ, cixíp tigoyp yi'. Per huidijaty ca' yaj'ixy yajhuindicxy, idíp yi', ca' ycixípy ytigoyípy nimina.

5 Com nnejhuiyim co n'o'cim, naaxnícx ajt huidibi nmiid'ajtim ya naaxhuiñ cixamb tigoymb yi'. Dios ymiid ni'ixi' jiiiby tzajpjoty huingbi ninícx huidibi yi' ti cojy huidibi xymöhuaanim. Je ninícx huidibi xymöhuaanim jadu'n nipaady ma ajt n'alma nej tüg tije huidibi tinaayb huinixii huinitiempo. Tüg tije huidibi Dios ti cojy, ca' nan huidibi jäy ajcxy ti cojixy. ²Janch tiy'ajt co ca' ooy jotcuje ndzinaayim ya naaxhuiñ miid ajt nninícx. Ooy njjip'ijxim mina nbadaanim ajt je nninícx huidibi nmiid'adaanim jiiiby tzajpjoty. ³Je' nninícx xyüdzim tim jadu'n nej co tüg jemyhuit nyajtigiyim, ca'ydi n'ijtim nihuädz.

⁴Nami njactzinaayim ya naaxhuiñ

miid ajt nninícx, ca' ooy jotcuje nayjihuiyim. Ooy xyajtajim xyajmayim je tzaachypi ayo'n huidibi nminajxim nyajnajxim. Ca' nan co ca' ndzojcim ajt nninícx, o co nyajtigoyaanim ajt nninícx. Hue' ndzojcim co nmiid'ajtim jemybi jugy'ajtin jemybi ninícx jigix co ajt njugy'ajtin huidibi cixamb tigoymb, ahuimbidip yi' jemybi jugy'ajtin huidibi ca' ycixípy ytigoyípy. ⁵Dios yi' ti yaj'oyiy je jugy'ajtin huidibi nmiid'ajtim cham, jigix jëbi nmiid'ajtim huingbi jugy'ajtin huidibi ca' ycixípy ytigoyípy ni mina. Dios ti xymoyim je Espíritu Santo je' je' tiy'ajt ma iich ajtin co nbadaanim jemybi jugy'ajt jembyi ninícx.

⁶Jabom jabom iich ajt jotcuje naybidaacim. Nejhuiyim co nami n'jactzinaayim miid ajt nninícx, ca' nmiid'ajtim jemybi ninícx, ca' nyajpaatim ma ajt nHuindzin Jesús chinäy. ⁷Je' nninícx xyüdzim tim jadu'n nej co tug jemyhuit nyajtigiyim, ca'ydi n'ijtim nihuädz. ⁸Jotcuje etz jotmic nayjihuiyim. Nígi jotcuje ixipy nayjihuiyim, e ooy njatzojcim co mic'amy ixipy n'ijxmajtzim jada ninícx, jigix nícx ndzinaydapijcim ma ajt nHuindzin Jesús chinäy. ⁹Paady ycixp jadu'n njacjugy'ajtim njactzinaayim jigix jëbi ajt nHuindzin Jesús jäygidägipy ajt ndzinaayin. Ca' ñejity pen njactzinaayim ixipy miid ajt nninícx, o pen tzojc n'ijxmajtzim ajt nninícx ixipy, e nícxim ma Jesús yajpaady. ¹⁰Nidüg'óciy iich ajt nayguëxigaanim ma Cristo ytiydundac, e jiiiby nidüg nidüg paadip huidi anajty nipidziimip

jadu'n nej anajty ti chinäy, pen oy, o ca' y'oyity.

**Je ayuc tiy'ajt huidibi
nicy'ajt cidägy'ajt miid**

¹¹Com nejhuiiyim co copicy nhuindzigiiyim ajt nHuindzin Jesucristo, paady ycixpi mictägy nyajmibicyich yi mayjäy ajcxy Cristo ytiy'ajt. Dios ñejhuiyb co tudägy iich njot nhuinma'ñich. E nañ jadu'n ndzocyich co miich ajcxy mnejhuüiyigixipy co tudägy iich njot nhuinma'ñich. ¹²Ca'p iich ajcxy yam naygapxpáatigixy jadüg'oc co iich ajcxy ooy n'oyjäyity, o co iich ajcxy ooy oy ndúngixyich. Hue' janchtiy lugar nyejcpyich, jaydëbi miich ajcxy xycapxpadipyich etz jotcujc mnayjihuiiyigixipy miid iich ajcxy ycixpi. Jigix jëbi miich ajcxy m'adzohuip yi jäy ajcxy huidibi capxpatp pinjaty yhuüinyijp ooy oy yquëxigy, e ca' ajcxy tuñ cuendi pen je' miid oyjot oyhuinma'ñ, o pen ca'. ¹³Pen minamb jäy ajcxy co iich nlocity, huen xyajnáxcixyich loci miid Dios ycixpi. Pen jäy minaangixp co oy huinma'ñ nmiididyich, jëbi jadu'n ajcxy xyajnáxcixyich jadu'n nej oy huinma'ñ nmiididyich miid miich ajcxy m'oy'ajtin ycixpi. ¹⁴Com Cristo ooy xychojcm xyjihuiiyim, paady ycixp njatytimycapxymidoohuim Cristo. Com nejhuiiyim ajt nidüg'óciy tiydudägy co Cristo y'o'cy miid ajt nbocy ycixpi, e paady ycixpi jadu'n nipaady nej jihuüy nidüg'óciy iich ajt ti n'o'cim quipxyi miid Cristo. ¹⁵Cristo o'c miid tüg'óciy jäy ajcxy

ycixpi, jigix co tüg'óciy jäy ajcxy huidibi jactzinaayb jacjugy'ajtp, ca' ajcxy yajtúngixipy yci'mjot yci'mhuinma'ñ ma ajcxy chinaayin. Huen ajcxy tzinaaygixy miid Cristo ycixpi huidibi o'c miid yi' ajcxy ypocy ycixpi, etz yjugypijcy jadüg'oc miid yi' ajcxy ycixpi. ¹⁶Miid co ndzinaayim miid Cristo ycixpi, paady ycixp ca' ndunim cuendi naaxhuiñyäjy ajcxy nej ñayñigápxigixy nayñimiydáacigixy. Jayijp ca'ni anajty nmibijcm, ooy anajty ndunim cuendi nej jäy ajcxy ñayñigápxigixy nayñimiydáacigixy. Jadachambi etz yjacnicxn i xii tiempo, ca' ndunim cuendi nej naaxhuiñyäjy ajcxy capxcixy miydaaccixy. ¹⁷Com tigachjaty cham nhuinjihuüyich Cristo, paady ycixp pinjaty yajpatp ma Cristo, jemyjot jemyhuinma'ñ je' ymiid'ajtnip, jadu'n nipaady nej jihuüy ti ma'xung'aty huinjemy. Je jot je huinma'ñ huidibi anajty ymiid co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'ñ ti y'ahuimbijttäy. ¹⁸Tüg'óciy tijaty huidibi ya yajpatp, jilby chooñ ma Dios, Dios yaj'oyiyday. Miid huidijaty Cristo ytuun miid iich ajt ycixpi, jotcujc n'ijtim miid Dios. E Dios xyajníbjcch co ngapxhuäcxyich Dios y'ayuc jadu'n nej jäy ajcxy jëbi ajcxy jotcujc y'ijtcixy miid Dios. ¹⁹Jadu'n nminaanim co Dios ymiid'ijtpy Cristo. E Dios tuun quipxyi miid Cristo co yi' yaj'oyiijy je tzip nej naaxhuiñyäjy ajcxy midzip'aty Dios. Dios ca' yajcomidohua'ñ jäy ajcxy ypocy huidibi mibijccixp Cristo, miid co

Cristo ti yajpocyñihuächyii. E Dios ti xyajñibicyich co ngapxhuächyich yi' y'ayuc nej jäy ajcxy jëbi paadip pocyhuinmeecxin, etz nañ jadu'n paadip jotcujc'ajtin ma Dios.

²⁰Paady nhuidityich miid Cristo ycixpi ngapxhuächyich Cristo y'ayuc. Jadu'n huimbizimyb nej jihuüy miich ajcxy Dios xymínucxtaaccixy miid iich n'ayuc jigix mmibíjccixipy Cristo y'ayuc. Paady ngodinäyich Cristo co nminucxtacypich miich ajcxy. Jothuimbijtcix nej mdundigooygixy miid Dios ycötujcin e Dios xyhuinmeecxip ajcxy mbocy, jigix jotcujc m'idípy ajcxy ma Dios.

²¹Cristo ca' ma ytundigooy, per miid ajt nbocy ycixpi Dios yajnajx je Cristo jadu'n nej tüg pocyjäy. Jadu'n Dios ytuñ miid je Cristo, jigix co iich ajt n'ijtim ma Cristo, nbaatim je tudägy'ajtin huídibi Dios chojepy nmiid'ajtim.

6 iich ajcxy etz miich ajcxy quipxyi nduunim ma Dios ytung. Nminucxtacpyich miich ajcxy co mgöbigípy ajcxy je may'ajt je oy'ajt huídibi Dios ti tuñ miid miich ajcxy ycixpi, ca'ydi ñaadigí'aty Dios ytung. ²Com jadu'n jaybety y'ity ma Dios ñecy ma Dios jadu'n ymina'n:

Co je xii tiempo ti patni, ti iich miich m'ayuc midoohuí. Ti nbubety nbudigíyich je huin'it xii je huin'it tiempo co ti yhuaad'aty mina jäy ajcxy y'alma ñändzögípy. Jadachambi xii tiempo ti yhuaad'ajtni mina jëbi Dios xyñidzoocim ajt n'alma.

³Ca' pin n'adzipyich co nduñich ma Dios ytung, jigix ca'ydi pinjaty

ymina'n co ca' oy nduñich. ⁴Nañ jadu'n ca' n'adziba'níich miich ajcxy. Nigi ndzocyich co ñiguëxigip tüg'ocíy iich ndung co nduñich miid Dios ycixpi. Ooy nyajtuñich mecxtujcin. Ooy nmecxtucyich ayo'n etz tzaachypi. Ooy nyajmayjatyich nhuit nducxy ngaayin n'uucin. Ooy iich ndzinaayin chipity.

⁵Ti ajcxy xycí'atyich, ti ajcxy xypidáacixyich pujxtigoty. Ti jäy ajcxy xymibidígíyich, e ooy ajcxy yhuaangixy yjihuiygixy. Ti tzaachypi nminaxy nyajnaxyich ma ndungich. Minaajity canaag xii ca' nmäyich, e minaajity ayuu n'ityich.

⁶Nyajniguëxípy iich ajcxy co iich ndúngixyich miid Dios ycixpi, miid co huädz jot huinma'n nmiididyich ajcxy. Ca' ma jibicpi nmiididyich ajcxy, miid co n'ixpíjccixyich ma Dios ytiy'ajt. Ooy mecxtujcin nmiididyich ajcxy. Ooy iich ajcxy nba'ayooyich nmígügtíjich. Dios yjihui'n ymic'ajt yajpatp ma iich ajcxy njot nhuinma'n. Ooy iich miich ajcxy ndzojccixy njihuiygixy cixyot huinijot. ⁷Nyajniguëxípy iich ajcxy co ndúngixyich miid Dios ycixpi, miid co ngapxhuäxcixyich Cristo y'ayuc ytiy'ajt tudägypí, e nañ miid co nmiididyich ajcxy Dios yjihui'n ymic'ajt, etz miid co nmiididyich ajcxy ca'pxy Dios ytiy'ajt tudägypí. Miid yi' ytiy'ajt tudägyp nyajmibicyich jäy ajcxy, etz miid y' ytiy'ajt naygohua'ñiyijich ma nmizipich. ⁸Minaajity jay xycapxpáadygixyich; minaajity jäy ajcxy xyñigapxy xyñi'ojíiygixyich; minaajity jäy yminaangixy co oy nduñich; minaajity jäy yminaangixy co jibic nduñich;

mına ngamina jäy xyťjcixyich co n'íindáaccixyich; e mınaajity jäy ymınaangixy co tiy'ajt ngapxich. ⁹Mınaajity jäy ymınaangixy co ajcxy ca' xy'ixy'ájtigixyich; e mınaajity jäy ymınaangixy co ooy oy xy'ixy'ájtigixyich; e mınaajity ayo'n jıjp'am o'cin jıjp'am nhuid'ıťcixyich. Per jactzınaaybich ajcxy jadu'n. Ti je tungmiidpi xychaachtungixyich, per ca' íich ajcxy xyaj'o'cyi. ¹⁰Ooy íich ajcxy njatajixy njamaaygixy, per jabom jabom jotcujc nayjihuıyigixyich. Ayoobi íich ajcxy ca' ti meen etz ca' ti pidägy nmiid'áťcixyich. Per nañ jadu'n mayjäy oy'ajtin pada'ñ ma Dios miid íich ajcxy ndung ycıxpı, jadu'n jada oy'ajtin nipaady nej meen etz nej pidägy. Oy ca' meen etz ca' pidägy nmiidıdyich ajcxy, per nmiidich ajcxy tüg'óciy huidibi nimina ca' ycixy yťigooy.

¹¹Mıgüťtıc ajcxy, huidibi yajpatp jim Corinto, ti nmiidcapxcixy ti nmiidmiydaaccixy ma jada necy miid tüg'óciy tudägy'ajt. Ti ngapxyich nmiydägyich nej njot nhuinma'ñ nmiidıdyich. ¹²Ca' íich n'ixmach nej íich miich ajcxy ndzojccixy njihuıyigixy cixyot huinıjot. ¹³May'ajt nbıjctzooybich ma miich ajcxy co xyajnimähuıbich nej miich ajcxy mjot mhuinma'ñ miidıty tim jadu'n nej ti nduunich miid miich ajcxy. Jadu'n may'ajt nbıjctzooyich ma miich ajcxy nej ungdeedyťıc ajcxy oy'amy y'ung ajcxy ihuıjcixy capxhuıjcixy.

Íich ajt je' ma Dios jugypı chinaayın

¹⁴Miich ajcxy, ca' mdungmujccixy m'ayoolumujccixy miid jäy ajcxy

huidibi ca' mibıjccixy Cristo. Com ca' huaad tudägyjäy ajcxy miiddzınaaygixy jäy ajcxy huidibi ca' tudägy huinma'ñ miidıty. ¿Nej jėbi je huidibi tiy'ajtip yťügıy miid huidibi ca' yťiy'ajıty? ¿Nej jėbi pinjaty tiy'ajt miid miid'ıdıpy pinjaty huidibi ca' tiy'ajt miidıty? Je huidibi tiy'ajt miid jadu'n nipaady nej chinäy ma jın yťiıcxın. E je huidibi ca' tiy'ajt miidıty nıpatp nej jihuıy chinäy agootztuuby. ¹⁵¿Nej jėbi Cristo etz Satanás ñay'ayuc-huinjihuıyigixy? ¿Nej jėbi tüg mibıjcpı yajťügıy yhuinma'ñ miid tüg huidibi ca' ymıbıcy? ¹⁶Ca' ni nej jėbi tzaadzech quıpychech y'ıdıpy ma Dios yťıjc. Com yı' ajcxy huidibi tzaadzech ojadaťp ca' ajcxy yhuinma'ñ yťügıy miid Dios yťiy'ajt. Je Dios juugypı ymiid chinaydac ma íich ajt njot nhuinma'ñ, paady ycıxp jadu'n íich ajt nipaady nej Dios yťıjc. Com jaybety y'ıty ma Dios jadu'n ymına'ñ:

Ndzınaydac nbıdägaamybich ma yı' ajcxy. Huididaamybich ma yı' ajcxy yajpaady. Yı' ajcxy íich xyDios'adaanıp. E íich ajcxy yı' njäy'adaanıp.

¹⁷Paady nañ jadu'n ajt nHuıdzın Dios ymınañ:

Copıcy co miich ajcxy m'ixmadzıpy yı' jacjadyıı jäy ajcxy, e tızınaaygıx abıcy. Ca' ajcxy mnıjot'adıpy je jıbıcpı, huın'tıt íich miich ajcxy ngöbıgıpyich.

¹⁸Íich miich ajcxy xymiid'adıpyich jadu'n nej jihuıy íich miich ajcxy xyTeedy'adyıı. E jadu'n miich

ajcxy m'idipy nej iich nmang n'anäg.

Jadu'n je mijpi Dios ymina'n.

7 Miich ajcxy huidibi ooy ndzocy njihuüyich, com Dios jadu'n ymina'n co tzinaydac pidäga'n ma ajt njot nhuinma'n, paady ycixp tzoc yajhuaatzim ajt njot nhuinma'n, etz ma ajt n'espíritu, e jadu'n Dios nhuindzigüym etz nyajmij'ajtim cixyot huinijot.

**Co ajcxy jothuimbijt ma Dios
huidibi ajcxy jim Corinto**

²Tungix may'ajt xycöbigipich miich ajcxy cixyot huinijot.

Ca' iich ajcxy ni pin ti nmidundigóoygixyich, nañ jadu'n ca' ni pin iich ajcxy ti nyaj'ixpjccixyich jibic-huinma'n. Nañ jadu'n ni ca' iich ajcxy pin ti nhuin'iñich.

³Ca' jadu'n nmina'nñich miid co nyajpocycähua'nñich miich ajcxy. Com jadu'n jacjayijp ti mina'nñich co ooy ndzocy njihuüyich miich ajcxy, tú'ciy ajcxy ndzinaayim, e tú'ciy ajcxy n'ó'cimipy. ⁴Ooy iich miich ajcxy njot'amij'adyijich. Ooy iich miich ajcxy ngömaaygixy. Ooy jotcujc nayjihuiüyijich miid miich ajcxy ycixpi. Oy njayajpaadyich tzip agujc ayo'n agujc, per co njäymechich miich ajcxy, jotcujc nayjihuiüyijich.

⁵Nej iich ajcxy nja'ty ya Macedonia, ca' njotcujc'ajtcixyich. Hue' nyajpaadyich ajcxy tzip agujc capxy agujc huen ma'ámyity. Jäy ajcxy xymidzip'ajtpich, etz nañ jadu'n tzigüybich jotjoty huinma'nñyoty. ⁶Per Dios je huidibi

yajjotcugüyb yajjotmicpijcp pinjaty tajp mayb, yi' ti xyajjotcugüyich co Tito yja'ty ya ma iich nyajpaady co jim choñ ma miich ajcxy. ⁷Ca' nan ti njotcugüyich miid tim jëyi co Tito ti xyñijädyich. Hue' ti njotcugüyich co yi' ti xyñimäyich jadu'n nej yi' jotcujc'ajtin ti paady ma miich ajcxy. Yi' ti xyajmiidmiydägyich jadu'n nej miich ajcxy tajin mayin mjihuiüygixy miid mbocy ycixpi. E nañ jadu'n nej mhuinmaaygixy nej nyajpaadyich. E miid jada ayuc nigü ti njotcugüyich.

⁸Iich ca' ndajy nmayich miid co iich miich ajcxy ti nyajtajcixy ti nyajmaygixy miid je necy huidibi ajcxy nyajnigüeje. Oy anajty ti njajihuüyich jotmay co nnejhuüyich co miich ajcxy ooy mdajy may tüg xii mejtz xii miid iich nnecy ycixpi. ⁹Jadachambi ooy jotcujc nayjihuiüyijich. Ca' nminaanim miid je tajin je mayin ycixpi huidibi miich ajcxy anajty miid jotcujc'ajtpich, com co je tajin je mayin ajcxy ti xyajjothuimbijtcixy, Dios ti jäygidägy jadu'n nej miich ajcxy ti mmimadaaccixy je tajin mayin. E ca' iich ti ndundigooyich ma miich ajcxy co ajcxy njotmaymoy. ¹⁰Com Dios yjäygidacpyi co jäy njothuimbijtcixy, miid co taj may ñayjihuiüyigixy miid ypocy ycixpi. E co ajcxy yjothuimbijtcixy, huin'it ajcxy je y'alma nidzoocin paadipy. E ca' je' huaad nidajim nimaayim co ajcxy y'alma nüdzygy. Co jäy ajcxy nidajcixy nimaaygixy huiüi yajpat ya naaxhuiñ, e ca' yjothuimbijtcixy, jadu'nñi nicxy je o'cin nipatcixy. ¹¹Miid je tügpi

jäy ypocy ycixpi ti mbaatcixy je tajin mayin. Miich ajcxy jadu'n ti mmecxtujccixy je tajin mayin jadu'n nej Dios jäygidägy. Tungix cuendi jada' cham nej ti yhuimbizimy. Tiydudägy janch cham ti mdiydungixy miid je pocy ycixpi. Ti xyajjotma'tcixy, e ti xy'adzigiigixy, e ni'ixiy miich anajty m'ijtcixy co mdzaachytunaangixy je huidi ti ytundigooy. E miid jada ycixpi ti miich ajcxy myajniguëxiccixy, co ca' miich ajcxy ti pocy mmiidity ma jadayaabi huinma'n. ¹²Co iich miich ajcxy jayhuin nijayiy, ca' nmınaanim miid je l' ycixpi huidibi anajty ti ytundigooy. Nañ ca' nmınaanim miid je huidibi anajty ti yajmidundigooy. Nijayiyich miich ajcxy, jigix jëbi mnejhuiigixy je tiy'ajt nej Dios tzocy co nduunich miid miich ajcxy m'oy'ajtin ycixpi. ¹³Com miich ajcxy ti mmijottigooyb Dios ytiy'ajt, paady ycixpi miich ajcxy ti mbaatcixy jotcujc'ajt, e nañ jadu'n iich ajcxy ti nbáatcixyich jotcujc'ajt miid miich ajcxy ycixpi. Nañ jadu'n ooy ti njotcugiyich ajcxy miid co Tito ooy chachjotcujcity. Oy'amy miich ajcxy ti mgöbijccixy Tito, paady yi' ooy ti yjotcugiy miid miich ajcxy ycixpi.

¹⁴Co ti nniimäyich Tito co njot'amij'adyijich miich ajcxy, ca' ti tzo'ydu'n ti nbaadyich, co yi' oy ti xyco'ixiigixy. Nigi oy ti yhuimbizimy miid co tüg'óciy ayuc huidibi iich miich ajcxy ti nyajnimäy ti yhuimbizimy co yjanchity. Nañ jadu'n ti yhuimbizimy co yjanchity jadu'n nej ti nniimäyich miich ajcxy

miid Tito co njot'amij'adyijich miich ajcxy. ¹⁵Jadu'n nej co Tito oy miich ajcxy xycogapxiy, yi' ooy nigi xychojccixy xyjihuiigixy co yi' nejhuüy jadu'n nej miich ajcxy mmijottigooygixy iich n'ayuc, jadu'n nej mgapxymidoohuaangixy. E nañ jadu'n co yi' ijxy nej miich ajcxy yi' mgöbijcxy miid tzig'iñ jihui'n. ¹⁶Ooy jotcujc nayjihuiyijich, ooy njot'amij'adyijich miich ajcxy.

Ycüejtcixy miid oyjot oyhuinma'n

8 Jadügnax, miich ajcxy migügtijc, nyajnejhuühuaamybich nyajmiidmiydägaamybich miich ajcxy, jadu'n nej Dios may'ajt oy'ajt tuñ miid je mibijcpidijc ajcxy huidibi xii ya yajpatp Macedonia. ²Je mibijcpidijc huidibi ya yajpatp ti ooy ajcxy minaxy yajnaxy tzaachypi etz ayo'n. Per ca' ñejity, ooy ajcxy jotcujc yajpatcixy. Nañ ayoobi ajcxy, per ti ajcxy may meen yajmujccixy, jadu'n nej jihuiy ajcxy ycomeenity. ³Iich testigo co je migügtijc miid yci'm tzojcin meen yejccixy, nej jëbi ajcxy ymadaaccixy miid meen, ixti anaxy ajcxy yejccixy. ⁴Ooy xyminucxtägyich ajcxy co n'a'ixihuibich ajcxy co jëbi ajcxy meen yajmujccixy huidibi miid pubedaangixy jacjadyii je mibijcpidijc. ⁵Nigi anaxy ajcxy ooy meen yajmujcxy ca'yd'i jadu'n nej anajty njijp'ixyich. Jayijp ajcxy ñayyejci ma ajt nHuindzin Jesucristo, e huin'it ajcxy ñayyéjciigixy ma iich ajcxy jadu'n nej Dios tzocy. ⁶E chi jada' iich ajcxy ooy nminucxtacy Tito co huen nicxy jadüg'oc ma miich

ajcxy. Huen nicxy yajcixy yajmay huidibi ti yajtzondägy ma miich ajcxy. Co huen je meen yajmujctäy huidibi cixyot huinjot miid mbubedaangixy je mibijcpidijc ajcxy huidibi yajpatp jim Jerusalén. ⁷Miich ajcxy nigi ooy mmadaaccixy, ca'ydi jacpinjaty ma tüg'ociy Dios ytung. Ooy mij mibijcin miich ajcxy miidity. Ooy myaj'ixpijccixy Dios ytiy'ajt. Ooy mmijottigooygixy mguydunaangixy iich n'ayuc. E nañ jadu'n ooy miich ajcxy xchojccixy xyjihuiygixyich. Nañ ooy ndzocyich co miich ajcxy nigi pubejtin myegipy ma je mibijcpidijc huidibi jim Jerusalén.

⁸Ca' jadu'n n'ane'myich co mbubéjtcixipy je migügtjic huidi jim Jerusalén. Hue' ndzocyich co miich ajcxy mnejhuihuipy jadu'n nej yi jacjadyii mibijcpidijc yhuinma'n bidaaccixyp ci'm co pubedaangixy je ymigügtjic jim Jerusalén. Jadu'n mdunipy ajcxy jigix jëbi nnejhuihuibich pen janch tiy'ajt jadu'n co mdzojccixy mjihuiygixy yi jacjadyii mibijcpidijc. ⁹Com miich ajcxy mnejhuigyixyp jadu'n nej ajt nHuindzin Jesucristo mijmay'ajt mij'oy'ajt tuñ miid iich ajt ycixpi, jadu'n Jesús nipaady nej tüg mijcomeenybi jiiby tzajpjoty, miid co yi' xchojccim xyjihuiyim mijcajee, chi yi' ixmajtztay yi' y'oy'ajtin jiiby tzajpjoty co ycidacy ya naaxhuiñ etz y'ayooy ya. Miich ajcxy ca' anajty ti miidity jiiby tzajpjoty, per jadachambi mbadaangixyp mij'oy'ajtin jiiby tzajpjoty.

¹⁰Miid miich ajcxy m'oy'ajtin ycixpi, ma jada necy nmooybich

miich ajcxy ngapxhuijin jadu'n nej jëbi huaad mdungixy oyjäy'ajtin. Jac'oy co miich ajcxy myajcixipy je huidibi ajcxy myajtzondac jadöjimijt. Miich ajcxy jacjayijp ca'ydi jac ni pinjaty ti myajtzondaaccixy meen yajmugii huidi miid mbubedaangixy je mibijcpidijc huidibi yajpatp jim Jerusalén. Nañ jadu'n miich ajcxy jacjayijp ca'ydi jacpinjaty mijottigooygixy co mbubedaangixy jacjadyii mibijcpidijc. ¹¹Jadachambi tiempo jactungix pubejtin, meen yajmujccix cixyot huinjot jadu'n nej ti myajtzondaaccixy ixti mabaad myajmaygixy je meen yajmugii. Nidüg nidüg yejccix nej ajcxy ii miidity. ¹²Pinjaty y'ofrenda yejcp janch cixyot huinjot Dios ycöbajcip yi' je' y'ofrenda, jadu'n nej ii miidity. Dios ca' yi' pijctzoy huidibi ajt ca' nmiidity.

¹³Ca' nmina'nich co oy jadu'n co mbubéjtcixip jacjadyii mibijcpidijc ixti mabaad mnayyajhuu'migixy ayo'ndumb. ¹⁴Hue' yajmina'n co quipxyjaty mdzinaaygixy, ni pin cayajconaxipy e ni pin cayajmayjadipy. Jadachambi tiempo miich ajcxy mmiidity ca'pxy je huidibi mnidzinaaygixip, ixti miich ajcxy conajxpi, paady ycixp jëbi mbubéjtcixipy migügtjic huidibi yajmayjajtp. Jadüg tiempo miich ajcxy myajmayjadipy, e jacjadyii migügtjic jëbi xypubéjtcixipy, e jadu'n yhuimbidzimipy co mnaybubéjtigixy quipxyjaty miñ xyipy. ¹⁵Com jadu'n jaybety y'ity ma Dios ñecy ma jadu'n ymina'n: "Pinjaty anajty may'amy miid, ca' yajconajxy. E pinjaty anajty hueeni miid, ca' yajmayjajty."

Tito miid ymigügtijc ajcxy

¹⁶Per nyajnajxypich jäygidaacin ma Dios, com Dios ti pidägy ma Tito yjot yhuinma'n co mijottigooy miich ajcxy m'oy'ajtin, tim jadu'n nej iich nmijottigooyich miich ajcxy m'oy'ajtin. ¹⁷Co may'ajt nbijctzooyich ma Tito co nicxipy jadüg'oc ma miich ajcxy, agujc jotcujc cöbicy, com ti anajty jayijp yhuinma'n pidägy ci'm co ñicxa'n jadüg'oc ma miich ajcxy. Jadachambi Tito nicxip ma miich ajcxy miid ci'mdzojcin.

¹⁸Quipxyi miid Tito nguexy iich ajcxy yam tüg nmigüg huidibi ooy chachcapxaadyity majaty mibijcpidijc, co ooy oy ytuñ capxhuäcxi Jesús y'ayuc ytiy'ajt nej huaad jäy ajcxy y'alma nidzoocin paady. ¹⁹Ca' nan jëyi co je mibijcpidijc y'i' ycapxpanyi. Nañ jadu'n ti yhuin'ixyii mibijcpidijc ajcxy co jëbi yhuidity miid iich ajcxy, e tunipy pubejtin miid je may'ajtin oy'ajtin huidibi iich ajcxy ndumyibich miid je migügtijc ycixpi jim Jerusalén. Jadu'n nduñich jaydëbi jäy ajcxy capxpaadip ajt nHuindzin Jesucristo. Etz nañ jadu'n jaydëbi ñiguëxigy co iich ajcxy nbubeda'nich ajt nmigügtijc cixyjot huinijot. ²⁰Ooy ngüend'atyich je meen huidibi je mibijcpidijc ti yajmujccixy, jigix ca'ydi pin huaad xyñigapxy xyñ'ojyich, jadu'n nej iich ajcxy meen nyajmújccixyich. ²¹Jadu'n iich ajcxy nhuinma'n nbidägy co tudägy ndunáangixyich ca' nan jëyi ma ajt nHuindzin Jesús yhuinduu, nañ jadu'n ma je mayjäy ajcxy yhuinduu.

²²Nañ jadu'n nguexypich miid y'i' ajcxy jadüg ajt nmigüg, je huidibi oy ti ytuuñ ma Dios ytung quipxyi miid iich ajcxy e nejhuiybich co tudägy ytuñ cixyjot huinijot. E y'i' miich ajcxy ooy xyjot'amij'adyii, e oy ytuna'n miid miich ajcxy ma Dios ytung. ²³Pen jim pinjaty nidiy yajtiy je Tito, nimaaygix co iich y'i' nmigüg, e y'i' miid nduñich ma Dios ytung ma miich ajcxy. E nañ jadu'n pen jim pinjaty nejhuihua'n pinjäy ajcxy y'i', y'i' jacjadyiibi huidibi ajcxy nicxp miid Tito. Nimaaygix co je mibijcpidijc ajcxy ya Macedonia ti quexy ajcxy, ytungixy miid Cristo ymij'ajtin ycixpi. ²⁴Paady ycixp miich ajcxy y'i' mdzójccixipy mjihuügyixyipy je migügtijc ajcxy huidibi mimb miid Tito, jigix jëbi je mibijcpidijc ma nidüg nidüg cajp ya Macedonia nejhuihuipy co miich ajcxy y'i' mdzójccixy mjihuügyixy je mibijcpidijc tiydudägy. E paady ycixp jëbi iich jotcujc nayjihuiyijich miid miich ajcxy ycixpi.

Je cüejtin miid je mibijcpidijc ajcxy ycixpi

9 Nañ ca' yjaty ycopicyity co iich miich ajcxy njacnijayiygixipy co je mibijcpidijc huidibi xi' ya pubejtin tunaangixyp ma Dios yjäy huidibi ajcxy jim Judea. ²Com nejhuiybich co miich ajcxy nañ jadu'n mbubedaangixy cixyjot huinijot Dios yjäy huidibi ajcxy jim Judea. Paady ycixp jotcujc iich jadu'n nnimäyich je mibijcpidijc ya Macedonia jadu'n nej miich ajcxy jim Acaya mhuinma'n pidacy jidöjimijt

co mbubedaangixy je mibijcpidijc huidibi jim Judea. E miid co miich ajcxy jayijp mhuinma'n ti mbidaaccixy co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'n pidaaccixy co ypubedaangixy nañ jadu'n. ³Paady nguejxypich Tito miid jacjadyii migügtijc ma miich ajcxy, jaydëbi xypubéjtcixipy ma je meen' yajmugii, jadu'n nej ti mbidaaccixy huinma'n. E iich ca' ti tzo'ydu'n nbáadibich miid miich ajcxy ycixpi ma jada pubejtin huidibi ajcxy mguexamyb jim Judea. Com iich ti nnimäyich mayjäy co miich ajcxy ni'ixi' m'ijtcixy miid mbubejtin. ⁴Ca' yjegyity co nijëjity mibijcpidijc huidibi tzinaayb ya Macedonia ñicxa'nip ajcxy miid iich co anajty nñicxyich jim ma miich ajcxy. E co anajty iich ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuühuibich, com ti anajty ooy njot'amij'ájtigixy. Nañ jadu'n miich ajcxy tzo'ydu'n mjihuühuip. ⁵Paady ycixp huinma'n nbidägyich co oy jadu'n co nijëjity migügtijc nicxy jayijp xycogapxiygixy, e huen xypubejtzcixy ma yi meen' yajmugii jadu'n nej jidöjmijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy miidity yi m'ofrenda, e jëbi jäy ajcxy nejhuühuip co yi m'ofrenda ti myejccixy cixyjot huinijot, ca'ydí jäy yminaangixy co iich miich adzip ajcxy ti n'ane'mgixy co m'ofrenda nyajmújccixipy.

⁶Jäymetz miich ajcxy jadu'n nej ayuc y'oc'ity: Pinjaty hueni niip, nañ jadu'n hueni ycosecha

yajpidigy. E pinjaty mij niip, nañ jadu'n mij ycosecha yajpidigy.

⁷Nidüg nidüg mibijcpi yegipy y'ofrenda jadu'n nej anajty ci'm yhuinma'n ti pidägy co yega'n. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuiyb pinjaty cixyjot huinijot y'ofrenda yejcp.

⁸Dios jëbi may'ajt oy'ajt tunipy miid miich ajcxy mijcajee, e miich ajcxy mbáatcixipy tüg'óciy tijaty conuucxin, e ixti mmiid'adipy tüg'óciy huidibi myajmayjajtcixy, e nañ jadu'n conaxpi naadigibi nej huaad jacjadyii mibijcpidijc mbubejtzcixy, e mdúngixipy canaagnax oyjäy'ajtin. ⁹Jadu'n jaybety ymiñ ma Dios ñecy, ma jadu'n ymina'n:

Yi oyjäydijc ajcxy, yi' ajcxy nimooyb ayoobitijc huidibi ajcxy yajmayjajtpy. Yi oyjäydijc ajcxy co oyjäy'ajtin tungixy, yejccixyp ijxpejt oybi huidibi y'idipy huinixii.

¹⁰Dios yejcpy je tiim huidibi jäy ajcxy ñiipy, nañ jadu'n Dios yejcpy je jicxy picy huidibi nidzinaayim nijugy'ajtim. E jadu'n co miich ajcxy oyjäy'ajtin mdungix mijcajee, je m'oyjäy'ajtin ajcxy ñipaadip nej jihuü mgosecha myajpidiccixy may'amy. ¹¹E jadu'n miich ajcxy miid'adipy tüg'óciy jugy'ajtin comeen'ajtin, jaydëbi m'ofrenda myejccixy mij'amy. E mayjäy ajcxy Dioscojuyip yajnaxipy ma Dios miid je m'ofrenda ycixpi, co anajty nyecyich miich ajcxy m'ofrenda ma yi' ajcxy huidibi yajmayjajtp. ¹²Co iich ajt pubejtin nyejcim ma jacjadyii migügtijc,

canan jëyi co nbubejtım miid tijaty yajmayajtcixyp. Nañ jadu'n yi' ajcxy jëbi yajnajxcixy Dioscojuyip canaag'oc. ¹³Yi' ajcxy capxpadamb Dios miid co je m'ofrenda huidibi ajcxy ti myejjcixy, yi' je' tiy'ajtip co miich ajcxy mgapxymidoogixy Cristo y'ayuc ytiy'ajt. Paady ycixp may mibijcpidijc ajcxy Dios ojadajtcixipy e nañ jadu'n Dios iibáatcixipy capxáatcixipy miid je pubejtın huidibi miich ajcxy anajty myejcpy miid yi' ajcxy ycixpi, etz nañ jadu'n miid jacjadyii mibijcpidijc ycixpi. ¹⁴E ci'm yi' ajcxy Dios ojadadipy mibijctzohuipy miid miich ajcxy ycixpi, etz xychóccixip xyjihuíyigixip ooy miid co Dios je mijpi conuucxin ti yecy ma miich ajcxy. ¹⁵Dioscojuyip yi Huindzin'ajtim Dios miid yi ymijconuucxin huidibi ti yecy ma iich ajtin, ni pin canejhuíy nej jëbi yajnajtzcapxäy.

**Pablo miidity cõtujcin
co y'apóstol'adyii**

10 Hich Pablo nmigapxypich miich ajcxy miid yungnaxy njot nhuinmañ, jadu'n nej jihuíy Cristo miich ajcxy xymiidmiydaaccixy. Com Cristo yungnaxy jot huinmañ miidity. Nijëjity miich ajcxy yminaangix co ooy yungnaxy naybidägyiijich co n'lityich miid miich ajcxy, e jadachambi co jiguëgy nyajpaadyich, hue' n'ahuimbityich ahuañ, ndunaamybich ti ndunaamybich. ²May'ajt nbijctzooybich co anajty iich miich ajcxy nicxy n'ijxcixy, ca' jadu'n ndzocyich

co copicy n'ahua'ndägibich miid nijëjity miich ajcxy huidibi xyñihuambejtpich, co nduñich etz ngapxyich ngi'mtzojcin tim jadu'n nej huenpin naaxhuiñjäy ytungixy etz ycapxcixy miid yci'mtzojcin. Janch ni'ixi' n'lityich, co anajty jim nmechich, chi miid nnayhuindinähuiyibich yi' ajcxy huidibi jadu'n xyñihuambejtpich. ³Janch tiy'ajt co ndzinaayich jadu'n nej naaxhuiñjäy chinaaygixy. Per ca' ndziptuñich nej jäy ajcxy chiptungixy. ⁴Ca' iich ajt nyajtunim naaxhuiñjäy ymic'ajt co nnaygohuaanim ma je jibicpi huidibi xymidzip'ajtim. Hue' nyajtunim Dios ymic'ajt, huidibi jëbi miid nmimadaacim tüg'óciy huidibi ca'oybi miid. ⁵Jadu'n iich ajcxy ca' nyajtzobadáangixyich je ayuc tiy'ajt huidibi ca' yjanchity, etz je' ayuc pin amij agix naybidaacip co Dios y'ayuc ytiy'ajt adujci. Tüg'óciy naaxhuiñjäy y'ayuc ytiy'ajt nbidáaccixyich ma Cristo, jigix tüg'óciy jäy ajcxy capxymidohuip Cristo. ⁶Co anajty miich ajcxy mhuinmañybidaaccixy co huädz mgapxymidohuaangixy tüg'óciy Cristo y'ayuc ytiy'ajt, pinjaty cacapxymidooy, hue' ni'ixi' n'ijtcixich co yajmöhuañ castigo pinjaty cacapxymidoo.

⁷Miich ajcxy yi' mdzachcuenditungixy jäy ajcxy nej yjäy'ajtcixy. Pen jim pinjaty ñayjihuíyii janch agujc jotcujc co Cristo yhuin'ixyii miid ytung ycixpi, huen huinjihuíyigixy jotjoty co Cristo ti xyhuin'ijxcixyich nañ jadu'n miid yi' ytung ycixpi. ⁸Hich ca' ti tzo'ydu'n jihuíyich

miid co ci'm nna ygömayiijich hueeni miid co Jesucristo xymooygixyich ane'min cötujcin. Com iich ajt nHuindzin Jesucristo ti xymöoygixyich jada cötujcin, jigix iich miich ajcxy nyajyeecip mmibijcin, canan nyajtigoyip ajcxy mmibijcin. ⁹Ca' jadu'n ndzocyich co yquëxigipy jadu'n nej jihuüy n'adzigi huaangixy miid je necy huidibi nyajniguejxypich miich ajcxy. ¹⁰Yminaangixy co iich necy ooy tzaachyaty chach chaach. E yminaangixy co ma jäy ajcxy yhuinduu yung naxy njäy'aty, e ngapxin nmiydáacinich ca' pin jäygidägy. ¹¹Per yi jäy ajcxy huidibi jadu'n minaaangixp, copicy ajcxy nejhuihuipy co jadu'n nej iich ngapxin necyjoty co nijayiygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹²Ca' huaad n'ocnay'ijxquipxim o nyajtügiyim miid yi' ajcxy ytung huidibi tzach naygömayaanip ci'm. Tzuu huinma'ñ locihuinma'ñ ajcxy ytungixyp, co pin jadu'n nay'ixquipxip naymidoguiplxip miid yci'm'ayuc yci'mhuinma'ñ huidi ii yjajtpy ñejhuüyb. ¹³Ca' iich ci'm naygömayiib ma ycapadyii, huidibi iich ajcxy ca' xypátcixyich. Dios iich ajcxy xyajnejhuüybich nije' nije' it lugar ma yi' tzocy ndúngixibich. E Dios jadu'n tzojc co nicxy ndungixy jim Corinto ma miich ajcxy myajpatcixy. ¹⁴Paady ycixpi ndúngixyich jëyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy iich jayijp ti n'ityich ma miich ajcxy. Pues iich tim

jayijp ngapxhuäcx Dios y'ayuc ma miich ajcxy, e ca' jac ni pin. ¹⁵Pen huingbi jäy je Dios ytung yajtzondaacip ma tüg cajp, pues ca' iich huaad jim nduuñich, jadu'n nej jihuüy iich ti nyajtzondägyich je tung. Ca' jadu'n nduuñich, hue' njijp'ijxypich co miich ajcxy myajyeegip mmibijcin, huin'it jëbi njactunipich ma miich ajcxy, jadu'n nej Dios tzocy co ndunipyich. ¹⁶Co anajty jadu'n ti njactuñich ma miich ajcxy, huin'it xii ya n'iihuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatypi ma miich ajcxy. Per ca' nduna'ñich ma huingbi ti yajtzondägy je tung.

¹⁷Ooy ycopicyity ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm. ¹⁸Com Dios ca' jäygidägy pinjaty ci'm naygömayip. Hue' Dios yjäygidacypi pinjaty ajt nHuindzin Jesucristo capxpatp.

**Pablo etz je' ajcxy huidibi
y'ayuccapxhuäcxp miid anii**

11 Huaad co miich ajcxy ixypy xy'ocmimecxtujcich hueeni iich nloci huinma'ñ huidibi ngapxaamybich. Oy ixypy ñejty mimecxtuccich. ²Ooy ndzocy ooy njihuüyich miich ajcxy. Dios ti xymöyich je tzojcjin jihuiiyin huidibi nmiidich miid miich ajcxy ycixpi. Ndzocypich co cixyjot huinijot miich ajcxy mmijpidaaccixy Cristo. Co miich ajcxy yajmij'adip Cristo cixyjot huinijot, huin'it jadu'n miich ajcxy nipaadipy nej tüg töxy'anäg pi'cniip huidibi pijcp miid tüg

yëdyjc. ³Ndzigiibich co huingbi jäy xyajhuinma'ñdyigoyaangixy miid ixpicytjic y'ayuc huidibi ca' ytiy'ajtity. E miich ajcxy m'ixmadzaangixy jadu'n nej cixygot huinjot ti mmijpidaaccixy Cristo. Tim jadu'n nipada'ñ miich ajcxy mjadaangixy nej yjajty jecy'ajty je Eva co tza'ñ yhuin'iini. ⁴Com miich ajcxy mgöbijccixy huingbi jäy huidibi tigachjaty yaj'ixpijcp Jesús ytiy'ajt, ca' yjadu'nity nej iich ajcxy nyaj'ixpicyich. Etz nañ jadu'n miich ajcxy jotcujc mgöbijccixy huingbi espíritu, ca' yjëjity je Espíritu Santo huidibi ti mgöbijccixy jayjip'aty. Etz nañ jadu'n mgöbijccixy tigachjaty ayuc tiy'ajt, e ca' y'ocjëjñ huidibi ajcxy m'alma xyajnidzoocip. Ca' y'ocjëjñ huidibi ti mmidoogixy ma iich ajcxy. Mic'amy mdzachmijpidaaccixy huingjäy y'ayuc. ⁵Ca' jadu'n ytiy'ajtity co yi huindzindjic ajcxy huidibi naydjigixp Jesús y'apóstol huidi jim ma miich ajcxy, co jac mic'ajt miid ajcxy etz yjacmiid ajcxy ixpijcin ma Dios ytiy'ajt, ca'ydi iich. ⁶Oy iich jada' ca' njatyich nej yajxon ngápxibich, ca' ooy ngo'ayúcgich. Per ca' ñejity com yajxon njatyich nnejhuüyich Dios ytiy'ajt. E ti nyaj'ijxcixy nyajnejhuüygixy co n'ixpicycgich ma Dios ytiy'ajt miid je ayuc huidibi ngapxhuäcxich ma miich ajcxy etz je mijhuinma'ñ huidi nduunich co jim n'ijtyich ma miich ajcxy.

⁷¿Nej tundigoyich jada' co ngapxhuäcyich Jesucristo y'ayuc ma miich ajcxy e ca' nbijctzooyich meen miid ndungich

ycixpi? Jadu'n nnayyajnajxich anajty nej tüg midumbi jigix miich ajcxy jac'oy jacjotcujc mdzinähuip. ⁸Ti ngöbicyich meen huidibi jacjadyii mibijcpidjic ti xymöyich huidibi tzinaayb ma huingbi cajp. Yi' ajcxy ymeen nyajtuunich co nyaj'ixpijcyich miich ajcxy. ⁹Co n'ijtyich miid miich ajcxy jadöjimjt jadöhuix'am ca' nbijctzooyich ma miich ajcxy huidibi nyajmayjajtpyich anajty. Ca' n'adzijpyich ni pin. Yi migügtjic huidibi ajcxy tzoon Macedonia, yi' ajcxy xymooyich huidibi anajty nyajmayjajtpich, paady ycixp ca' anajty meen nbijctzooyich ma miich ajcxy, ca' n'adzijpich miich ajcxy. E jadu'n njactuna'ñich jadu'n nej nduunich miid miich ajcxy co n'ijtyich jim jadöjimjt. ¹⁰Nejhüüyich co yjanchity co nmídidyich Cristo ytiy'ajt, nañ tim jadu'n nnejhuüyich co ci'm nbaadyich huidibi miidnay'ixyijich. E ca' pin ma tüg'óciy je Acaya naaxjot xycapjicbich jada jotcujc'ajtin. ¹¹¿Na'amy co jadu'n nmína'ñich? ¿Je! co iich miich ajcxy ca' ndzojccixy? Ca' yjadu'nity. Dios ñejhuüyb co ndzocy njihuüyich miich ajcxy.

¹²Per njacyajtüöyaamybich je ndungich huidibi ndumyich, e ca' meen nbijctzohua'ñich miid iich ndung ycixpi jigix co yi jacjadyii huindzindjic huidibi yaj'ixpijccixp ma miich ajcxy, ca' jëbi y'iindaaccixy co yi' ajcxy tú'ciy ytungixy jadu'n nej iich nduunich. ¹³Yi' ajcxy ymínaangixy co Cristo ti yajniñjicigixy co ajcxy yi' y'apóstol'adyii, e ca' yjanchity,

nigoob ajcxy huin'ingixy yi mibijcpidijc. Nayyajnáxigixy ci'm nej jihuüy Cristo y'apóstol'ájtigixy, e ca' yjanchity. ¹⁴Nañ ni ca' oy nhuinmaayich co jadu'n idiützcixy, com nañ jadu'n je Satanás ñayyajtigachyüi ñayyajnaxyüi nej Dios y'ángel huidibi tiy'ajt miid, e ca' yjanchity. ¹⁵Paady ycixp nmibijcpich co yi jäy ajcxy huidibi tumb miid je mujcu' nañ jadu'n nayyajnaxyüi jadu'n nej jäy tudägypüi, e ca' yjanchity. Per Dios chaachytunamyb ajcxy jadu'n nej ypanyüi miid je jibicpi ycixpi huidibi ajcxy ytumyüb.

Je tzaachypüi je ayo'n huidibi Pablo yjajtyü co y'ayuccapxhuäcxy

¹⁶Jadüg'oc iich miich ajcxy nnimaaygixy: Ni pin ycamina'nipy co iich locijity. Per pen nijëjity jadu'n yminaangixy, ca' ñejity. Miich ajcxy amidoo'ijtcix iich n'ayuc, jigix jëbi naygömayijich ci'm. ¹⁷Ca' iich ajt nHuindzin Jesucristo xycötujcmöyich, co jadu'n jëbi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jäy co naygömaya'ñyijich ci'm. ¹⁸Mayjäy ajcxy ooy ci'm chachnaygömayáanigixyp miid huidibi ti tungixy miid yci'm mic'ajt ya naaxhuñ. Nañ jadu'n iich nnaygömaya'ñyijich ci'm. ¹⁹Miich ajcxy mdzachcöbajccixyp loci jäy ajcxy y'ayuc, je' co mdzachnayyajnaxáanigixy jadu'n nej jihuüy ajcxy ooy mdzachcohuinma'ñity. ²⁰Mgöbijcypy miich ajcxy co jäy ajcxy xytumbi'adiiyb nej tim

tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'mgixp, xycamij'ijxcixy xycamijpidaaccixy, ixti mgöbijccixyp co xycojxcixy ma ajcxy mhuiñyijp. ²¹Oy njatzo'ydu'njihuiyich co nmina'ñich co ca' jadu'n nmíididyich je jotmic'ajtin, jigix jëbi iich miich ajcxy nduüñich jibic, jadu'n nej yi jadu'mbi huindzindijc ti xytungixy.

Per jadu'n nej yi' ajcxy ñaygapxpanyüi ci'm, nañ jadu'n naygapxpada'ñyijich ci'm. Ca' ñejity pen capxpich jadu'n nej tüg loci jäy. ²²Pen hebreojäy yi' ajcxy, hebreojäy iich nañ jadu'n. ¿Conaax cogajp ajcxy Israel? Iich nañ jadu'n. ¿Abraham ajcxy ymij'ap'ajtpy ymijteedy'ajtpy? Iich nañ jadu'n. ²³¿Nej tumb ajcxy miid Cristo? Nigi nduñyich miid Cristo, ca'ydi yi' ajcxy. Ca' ñejity oy ngapxyich jadu'n nej tüg loci jäy. Jac mic ti nduüñich miid Cristo ca'ydi yi' ajcxy. Canaag'oc codungdijc xychaachytuüñich. Ti nyajci'atyich miid matz etz miid coochac janch canaag ci' janch ycamacho'nity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jijp'am ti nyajpaadyich, e yi' ajcxy ca'. ²⁴Migoox'oc judíojäy ajcxy ytungmiidpi xyci'ajtyich miid cochac iipx majmocx midaax ci'. ²⁵Tugiig'oc xychaachytuüñich miid matz. Tügtecy ajcxy xychaagächich. Tugiig'oc je barco yquñ mejy'agujc je huidibi iich anajty nyajnicxiyb. Co je barco yquñ tügtecy, chi tüg tzuüm etz tüg xii n'ijtyich ma je mejy anajty ooy ypidigy. ²⁶Ooy viaje nduüñich canaag'oc, e

o'cjijp'am n'ijtyich ma mijniigom yjadyii, e nañ jadu'n ooy anajty may meetzpi yajpaady ma anajty nhuidityich. Nmigogajpich, yi judíoñäy, xyjayaj'ögaanich ajcxy. Ti ayo'n nbaadyich ciudadjoty etz ma yuugjot etz mejyoty. E nañ ti ayo'n nbaadyich miid jäy ajcxy huidibi naybidaacip ajcxy nej iich ajt nmigüg, e ca' anajty yjanchity. ²⁷Minaajity ooy mic njihuüyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxiinaxyich miid yuu tidzibi. Janam jatzojc n'ayu'atyich. Minaajity ooy njihuüyich je tiichypi, etz nyajmayjatyich nhuit nducxyich.

²⁸Miid jada ycixpi etz miid jac-huidijaty, nañ jadu'n jabom jabom ooy mic njihuüyich jadu'n nej yajpaady je mibijcpidijc nidüg'óciy canaag picy xi ya. ²⁹Pen nijjity mibijcpidijc yajpaady amutz ma ajcxy ymibijcin, nañ jadu'n iich nayjihuiüijich amutz. Pen nijjity mibijcpidijc ypocytungixy, iich ndzo'ydu'n njihuüyibich etz jibic nayjihuiüijich miid yi' ajcxy ypocy ycixpi. ³⁰Pen naygömayaanibich ci'm, naygömayaanibich co amutz njihuüyijich. ³¹Je Dios iich ajt nHuindzin Jesucristo yTeedy, je huidibi huaad n'ojadajtim n'iibaatim ngapxpaatim huinixii huinitiempo, yi' ñejhuüyib co tity'ajt jadu'n nej ngapxyich.

³²Jecy'ajty co n'ijtyich jim Damasco, je gobernador huidibi anajty tumb miid je rey huidibi yxii Aretas, ypidac soldados ajcxy ma jadyii mijtu' ycajptigiy, jigix jébi xyajnicxyich mach. ³³Per je mibijcpidijc ajcxy xycodiyñajxich

naaxcxy mijcachjoty ma tüg ventana aguu ma je mijpoch huidibi je cajp miid yjübojtz'ahuidityity. E jadu'n ndzoocyich ma je gobernador yci'am.

Huidibi Pablo yhuin'ijx etz nejhuüy

12 Ni ti ycayajpaady ycayajganar'aty co ci'm ndzachnaygömaayim ndzachnayñigapxim ndzachnayñimiyaacim. Per ca' y'ocnejity nimiydägaamybich ti nhuin'ijxypich cumäyoty, je huidibi je Huindzin Jesucristo xyajhuin'ijxpich xyajni'ixiiybich. ²N'ixy'ajtypich tüg yëydijc huidibi mibijcp Cristo. Cham majmactz jimijt ma Dios yajpättigiyi tzajpjoty ma je midugiipci tzajp. E ca' nejhuüyich pen hue' yajpättigiüi miid ñinix o pen ca'. Dios tügpajc nejhuüyib. ³⁻⁴Jadüg'oc nmina'ñich co Dios ti yajpättigiy je yëydijc ma je oybi it. E ca' nnejhuüyich pen janch ti ypättigiy miid ñinix o pen ca'. Dios tügpajc nejhuüyib. E jiiby ma je oybi it midoy capxy ayuc huidibi ca' huaad ni pin jäy capxy miydägy nimina. ⁵Ooy iich amij agix nayjihuiüia'ñiyijich miid je jadu'mbi yëydijc jadu'n nej jëjin huidibi Dios yajpättigiy tzajpjoty. Per ca' iich ci'm nayñimiydäga'ñiyijich naygömaya'ñiyijich. Hue' janchtiy nayñimiydägaanibich ci'm nej nduñ n'ayooyich ma iich ndzinaayin. ⁶Oy ixypy iich ci'm njanayñimiydäga'ñiyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchypi. Per

ca' jadu'n naygömaya'ñiyiijich, com ca' ndzocyich co jäy ajcxy nicxy xycömaayich nīgi anaxy. Huaad jadu'n co ajcxy miid miydacy je miügügtijc huidibi ajcxy ijxcixp huidibi ndumybich o huidibi ayuc ajcxy ymidoogixp huidibi ngaxpich.

⁷Je capxy ayuc huidibi Dios xyajnejhuiyich jiiby tzajpjoty, ooy anajty chach y'oyity. Paady ycixpi Dios pidacy jadu'n nej jihuüy tüg apy ma iich nninix, jigix ca'ydí amij agix nayjihuiyijich. E je apy jadu'n nipaady nej mujcu' xyajtzaachiyich. ⁸Tugiig'oc Dios ti nmibijctzooyich co huen xyajpidzimich je huidibi xyajtzaachiybich. ⁹Per je Huindzin Jesús xyñimaayich: "Jébi jadu'n co may'ajt ndunipich miid miich ycixpi. Co pinjaty pumäy ñayjihuiyii, huin'it nīgi ñiguëxigy iich nmic'ajt." Paady ycixpi njotcugiyich co pumäy nayjihuiyijich, jigix ñiguëxigipy Cristo ymic'ajt ma iich ndzinaayin. ¹⁰Paady ycixpi ooy njotcújcidyich co pumäy nayjihuiyijich, co jäy xyñigapxy xyñi'ojyich, co ti nyajmayjatyich, co jäy xy'ixhuidityich xypahuidityich, co tzaachypi nyajnaxyich miid Cristo ycixpi. Co nayjihuiyijich pumäy, chi nīgi mic nayjihuiyijich miid Cristo ymic'ajt ycixpi.

**Pablo ca' yjotcujc'aty nej
je mibijcpidijc ajcxy jim
Corinto ytungixy**

¹¹Co iich jadu'n ci'm naygapxpadyijich, tim jadu'n nipaady nej jihuüy iich tüg loci jäy.

Adzip miich ajcxy jadu'n xytuunich co copicy naygapxpadyijich ci'm. Hue' yjapaadyii miich ixypy ajcxy xycömaaybich xycapxpatpich. Iich ca'p iich ti ndzoohuity. Oy ixypy iich ca' ti mic'ajt nmiididyich, per jatytimy nīgi mic'ajt nmiididyich, ca'ydí yi huindzindijc huidibi ma miich ajcxy, huidibi ajcxy naydijip apóstol, e ca' yjanchity. ¹²Ma je tung huidibi nduunich miid mecxtujcin ma miich ajcxy, ti ooy ñiguëxigy miid canaag ijxpejt, mijhuinma'n etz milagros, co iich janch Cristo xy'apóstol'adyijich. ¹³Ca' jadu'n ytiy'ajtity co mminaangixy co nīgi oy ti nduunich ma yi jacjadyii mibijcpidijc ma jacjadyii cajp, ca'ydí jadu'n nej ti nduunich ma miich ajcxy. Pen ti ndundigooyich co ca' ti nbijctzooyich meen miid iich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meexcich ajcxy.

¹⁴Jadachambi ni'ixi' n'ityich co nnicxa'nich midugiig'ocpi jim ma miich ajcxy. Ca' ti pubejtin nbijctzohua'nich ma miich ajcxy miid ndungich ycixpi. Ca' ndzocyich miich ajcxy mmeen. Hue' ndzocyich co miich ajcxy xymijnicxpedipyich. Jac'oy co iich miich ajcxy nbubedipy, ca'ydí co miich ajcxy xypubedipyich. Jadu'n iich nipaady miid miich ajcxy nej tüg ungdeedy. Je ungdeedy ypubejtpy y'ung, e ca' nan je ung pubejtpy yteedy. ¹⁵Iich jotcujc nyajtundähuibich ma miich ajcxy tüg'óciy tijaty nmiidich, ixti ngi'mmic'ajtich tüg'óciy

nyajtunaamybich miid miich ajcxy yciłpi, jįgix jębi nbubedįpyich miich ajcxy. Oy janiguęxįgy co iich miich ajcxy njadzoįccįxy njajįhuįyįgy, e miich ajcxy ca' xįhóįccįxyich xįjįhuįyįgyich.

¹⁶Nįjęjįty miich ajcxy mminaangįxy co janch tįy'ajt co ca' ti pubejtin ti nbįjctzooyich ma miich ajcxy, nįjęjįty yminaangįxy co janch nihuinma'ń ti nyajcągįxyich ma tųg trampi miid anii. ¹⁷¿Nej ti iich miich ajcxy nhuin'iingįx miid je migųgtįc huįdibi ajcxy nyajniguejx?

¹⁸Nbįjctzoohuįich may'ajt ma Tito co huen ničxy xycogapxįyįgy jadųg'oc. E nyajpugexįyįch jadųg ajt nmįgųg huįdibi miid ńičxy quįpxyi. ¿Nej ti miich ajcxy Tito xyhuin'iingįxy? ¿Nej ca' yjanchity co iich etz Tito quįpxyjaty iich ajcxy nhuinma'ń nmiidity, e tų'ciy ndųngįxyich?

¹⁹Ca' yjegyity co miich ajcxy mhuinma'ńybidáaccįxy co iich ajcxy ndzachnayńįgapxtųtųtįgy ma miich ajcxy. Ca' yjadu'nity. Ngąpxcįxpich nmiydáaccįxpich ma Dios yhuinduu je ayuc tįy'ajt huįdibi Cristo xymóoygįxich. E tųg'óciy huįdibi ndųngįxpich, hue' ndųngįxich jįgix yeegįp miich ajcxy mmįbįcin. ²⁰Com tzigįyibich co anajty ničxy n'įjxcįxyich miich ajcxy, ca' jegyity co nbadaamybich je tįy'ajt co miich ajcxy ca' mhuinma'ńymiidity jadu'n nej jębi njąygidągyich yi mhuinma'ń ajcxy. E miich ajcxy nań jadu'n ca' mjąygidáaccįxy nej iich nhuinma'ń miididyich. Tzigįyibich co miich jada'

ajcxy mnaychiptųnįgy, ca' mnay'ixáanįgy nidųg, mnaymįjotmá'tįgy; mnayńi'ojįyįgy, e mbiłtzcąpxcįxy; co ooy amį agįx mnayjįhuįyįgy, e ca' mnay'ayuc-huinjįhuįyįgy, ca' oy m'įjtcįxy. ²¹Tzigįyibich co jadųg'oc ničxy n'ixyich miich ajcxy, chi ajt nDios xyajįhuįhuįbich tzo'ydu'n miid miich ajcxy yciłpi, etz njįhuįhuįbich tajįn mayįn miid miich ajcxy mbocy yciłpi, e com ca'ni mjothuimbįjtcįxy mjąyđigooygįxy je mjįbic-huinma'ń jadu'n nej mmįgapxtįgooygįxy e mmįdundįgooygįxy huingbi tųxyjįdyjįc, etz jadu'n nej mmįdundįgooygįxy migųg ytųxyjįc, etz jadu'n nej jįbic-huinma'ń miich ajcxy mmiidity.

Ane'min capxhuįjįn etz capxpoočxin huįdibi cįxnįp je necy

13 Jada je' ymidugįg'oc co iich miich ajcxy ničxy ngo'ixįhuaangįxyp. Pen miich ajcxy mxįhuaangįxyp tųg migųg ma iich co ti ytundįgooy miid Dios ytįy'ajt, hue' tzocy miid metz o tųgįg testigos. ²Co je mimejtz'ocpi iich miich ajcxy oy ngo'ixįy, chi nnimaayich yi' ajcxy huįdibi ti ytundįgooygįxy anajty, e nań jadu'n nnimaayich je huįdibi jacpocytungįxp co iich anajty jadųg'oc ničxy miich ajcxy n'įjxcįxy, ca' nyajtuna'ńich mecxtųjcin ma yi huįdibi ajcxy pocytungįxp. E cham co nyajpaadyich jįguęgy ma miich ajcxy, nnįgapxpejtpyich ma jada necy co jadųg'oc ničxy n'ixa'ńich miich ajcxy, ca' nmįmecxtuga'ńich yi' ajcxy huįdibi pocytungįxp. ³E

jadu'n miich ajcxy mmiid'adipy tiy'ajt co ngapxnajxich Cristo y'ayuc. E Cristo ca' je' yjadu'nity nej tüg jäy huidibi ca' mic'ajt mmiidity. Hue' je' yajnuëxigyp ymic'ajt ma miich ajcxy. ⁴Janch tiy'ajt co jadu'n ajcxy yajcruudzpejty Jesucristo nej jihuüy ca' anajty mic'ajt mmiidity. Per jadachambi Jesucristo jugy'ajtp mmiid Dios ymic'ajt. Nañ tim jadu'n co n'ijtim mmiid Jesús, jadu'n yquëxigy nej jihuüy ca' mic'ajt mmiid'ajtim. Per co n'ida'nich mmiid miich ajcxy, nmiid'adaanibich Dios ymic'ajt mmiid co nyajpaadyich ma Cristo.

⁵Ci'm naydiy'ajtpjicigix nidüg nidüg, pen janch tiydudägy mmibijccixy Cristo. Ci'm huinmaaygix ma ajcxy mgi'mdzinaayin, pen janch mmibijccixy. ¿Nej ca' mdimjihui'mybijccixy, pen mmiid ajcxy Cristo ma mjot mhuinma'n? Pen ca' yjadu'nity hue' anajty Cristo mmibijccixy nigixy cohuajc.

⁶Per njijp'ijxypich co miich ajcxy mnejhuühiipy co yjanchity co Cristo ti xyajñibicyich yi' ytung, e ca' n'indägyich. ⁷Dios nmibijctzooybich mmiid miich ajcxy ycixpi, jigix ca' ti jibic-huinma'n mdúngixipy. Canan co iich ajcxy ndzachcömaybidzimmáangixyich, o co iich ajcxy nigü mmiidity Dios ytiy'ajt ca'ydü jac ni pinjaty. Jadu'n ndúngixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuüy iich ajcxy ca' oy mij n'ixpícyigich. ⁸Com ca' huaad ni ti nej ndunim huidibi ca' yjanchity huidibi ca' ytiy'ajtity. Hue' tzocy co tüg'óciy huidibi

ndunim, naybadiib mmiid Dios ytiy'ajt. ⁹Paady jotcuyc iich ajcxy co nyajpaatcixyich nej jihuüy ca' iich ajcxy mic'ajt mmiidity, jigix miich ajcxy mic'ajt mmiid'adipy ma mmibijcin. Nmibijctzoohuaamybich ajcxy Dios mmiid miich ajcxy ycixpi, jigix ajcxy mmibijcin mi'ijtcixipy ca'pxy. ¹⁰Jada necy iich jayijp nguexamyb ma miich ajcxy, ma yam ca'ni nicxy n'ijxcixyich miich ajcxy jadüg'oc, jigix ca'ydü adzip ahua'n anajty nyajtuuñ iich n'ane'min ma miich ajcxy. Hich ajt nHuindzin Jesucristo ti xymöyich mic'ajt, jigix jëbi iich miich ajcxy nyajyeegipy ma mmibijcin. Ca' nyajtigoyaanich miich ajcxy yi' mmibijcin.

¹¹Migügtijc ajcxy, capxcijxpich mmiid miich ajcxy, huen Dios xypubéjtcixipy xypudigíyigixipy. Mijottigooygix cuydunaangix tüg'óciy Dios ytiy'ajt ma mdzinaayin. Jotcuyc'ajtcix. Chinaaygix mmiid tú'ciy mjot mhuinma'n. Naymiid'ijtigixy agujc jotcuyc. Huen ajcxy Dios xymiid'ijtcixy. Je Dios huidibi jotcuyc'ajtin yejcp, e nañ jadu'n Dios xychojctáaygixipy xyjihuiydáaygixipy.

¹²Naygapxpóocxigix xic xon.

¹³Tüg'óciy Dios yjäy huidibi ya, yquejxyp ajcxy capxpóocxin ma miich ajcxy.

¹⁴Huen ajt nHuindzin Jesucristo may'ajt oy'ajt tunipy mmiid miich ajcxy ycixpi. Huen Dios xychojccixy xyjihuiyigixy. Huen Dios yjihui'n ymic'ajt ity ma nidüg'óciy miich ajcxy mjot mhuinma'n. Jadu'n ngapxcixyich. Amén.

GÁLATAS

Yi Neczy Huidibi Pablo Yajniaguejx Je Mibijcpidijc Jim Gálatas

1 Hich Pablo, Jesucristo xyquejxich co ngapxhuäcxibyich yi' y'ayuc. Ca' nmīnaanīm jāy ajcxy xyajni'bijcīch jada tung. Jesucristo etz Dios Teedy ajcxy ti xyajni'bi'cyīch jada tung. Je' je' je Dios huidibi yajjugypijc Jesucristo co y'o'cy. ²Hich etz tūg'óciy mīgūgtijc ajcxy huidibi ya yajpatp ma hich nyajniaguejxpīch jada necy ma nidūg'óciy pīnjaty mījpidacp Jesucristo, huidijaty naymujcip ma nidūg nidūg cajp jim Gálatas naaxjot. ³Nmībijctzooybīch Dios Teedy etz hich ajt nHuindzin Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugihuip ajcxy. ⁴Hich ajt nHuindzin Jesucristo ti nayyoxyii ti naydogyii ci'm anajty ma yi o'cin miid hich ajt nbocy ycixpi. E jadu'n ti xyñihuaanim ma je jāy ajcxy huidibi jibic huinma'ñ ymiid huidibi tzinaayb ajcxy ma jadachambi xii tiempo. Jadu'n Jesucristo tuñ miid hich ajt ycixpi, com hich ajt nDios Teedy jadu'n tzojcp. ⁵iOoy y'oyity co Dios Teedy huen mij etz cōmay y'idīpy huinixii huinitiempo! Jadu'n jada. Amén.

Ca'p ji huingbi tiy'ajt huidibi jāy y'alma yajnīdzocp

⁶Ooy ndzachhuinmaayich jadu'n nej tim tzojcy ti mījpyōydu'cixy je Huindzin Dios ytiy'ajt. Dios xyhuin'ijxcixy jigix jēbi mmībijccixy je oy'ajt je may'ajt huidibi Jesucristo ytuun miid miich ajcxy ycixpi. E miich ajcxy ti mhuinma'ñ myajtigajtzcixy, e ti mmībijccixy huingbi jāy ajcxy y'ayuc, jadu'n nej ca' jēbi m'alma nidzoocin padaangixy. ⁷Ca' nmīnaanīm co ji jadūgnax Dios ytiy'ajt. Hue' je'nijējity jāy ajcxy ti xyajhuinma'ñyidigooygixy, ooy ajcxy yajtigadzaangixy je Dios y'ayuc ytiy'ajt nej Jesucristo xyajnidzōgaani ajcxy m'alma. ⁸Co ixypy hich, o co ixypy nidūg hich ndiscípulo, o co ixypy tūg ángel huidibi tzajpjoty tzomb capxhuäcx ixypy ma miich ajcxy ayuc tiy'ajt tīgachjaty huidibi ca' ñaybadyii miid je tiy'ajt huidibi nyaj'ixpi'c ajcxy oga'n'aty, ca' mgōb'ijccixipy yijadu'mbi ayuc huidibi ajcxy xyajniidigoyaangixy

xyajtüdigoyaangixy, Dios tzaachytuniib yi' ajcxy y'alma. ⁹Ti jayijp nyajnimay, e cham jadüg'oc nigapxpetyich, pen ji pinjaty capxhuäcxy ma miich ajcxy tiy'ajt tigachyjatypi, huidibi ca' ñaybadyii miid je tiy'ajt je tiibi miich ajcxy m'ixpíjccixy, copicy Dios chaachytunipy jada jäy miid ypocy ycixpi huidibi xychachyajniidigooygixp xychachyajtüdigooygixp.

¹⁰Co jadu'n nmina'ñich, ¿nej mdijy co ndzocyich co jäy ajcxy xyjäygidägipy o co Dios xyjäygidägipy? ¿Nej ndzachyajjot'adaanich jäy ajcxy? Ca' huaad nduunich huidibi jäy ajcxy chojepy, yi' janchtiy ndumyich huidibi Dios chojepy. Co ixypy nduunich huidibi jäy ajcxy yjäygidacpy, ca' ixypy nguyduunich Cristo tyiy'ajt.

Nej Pablo oy paady je apóstol'at

¹¹Paady ndzocyich migügtjic co mnejhuühuip ajcxy jada co je Dios y'ayuc tyiy'ajt huidibi ngapxyhuäcxpich anajty ma miich ajcxy jadu'n nej jëbi ajcxy m'alma ñidzögipy, ca' yi' ayuc'adyii tiy'ajt'adyii huidibi jäy ci'm ti cojcixy ti maacxcixy. ¹²Com je Dios y'ayuc tyiy'ajt huidibi nmiidich, ca' ti nbaadyich ma jäy ajcxy, nañ ca' nminaanim jäy ajcxy ti xyaj'ixpicyich. Jesucristo ci'm ti xyajhuinjihuüyich jada tiy'ajt.

¹³Com miich ajcxy mnejhuüygixp jadu'n nej jecy'ajty iich ti ndzinäyich, co iich anajty nmijpidägyich yi judfojäy ajcxy ycostumbre. E mnejhuüygixp

jadu'n nej jecy'ajty n'ixhuidijtyich nbahuidijtyich mictägy je jäy ajcxy nidüg'óciy huidijaty anajty mijpidaacxip Dios tyiy'ajt. ¹⁴Nigi iich anajty n'ixpícyidyich ma yi judfojäy ajcxy y'ixpíjcin ca'ydi jac pinjaty judfojäy, ca'ydi jac pinjaty nmigügtjicich huidibi tügnax yjimijt miid iich. Com ooy anajty nigi ndzachmijpidägyich n'ap ndeedyich y'ayuc. ¹⁵E Dios xyhuin'ijxich jayijpni ca'ni anajty ma'xung'atyñich co ndúnibich yi' ytung. Miid co Dios ooy ti xychocyich ti xyjihuüyich, paady xyhuooyich miid ytung ycixpi. ¹⁶Dios xyajnejhuüyich yi y'ung y'ayuc tyiy'ajt, jigix ngapxhuäcxibich yi' y'ayuc ma yi jäy ajcxy ca'pi yjudfojäyity ajcxy. Ca' pinjaty n'ixtaayich huidibi jëbi xyaj'ixpicyich Dios tyiy'ajt, hue' Dios ci'm xyaj'ixpíjcyich yi' tyiy'ajt. ¹⁷Nañ jadu'n ni ca' nbättigiyyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tiyyi nnicxyich jim Arabia ñaaxjot. Co iich jim hueeni n'ijtyich, chi nhuimbijtyich jim Damasco.

¹⁸Cooni tugiig jimijt nhuäcxijpyich huin'itni nbättigiyyich jim Jerusalén. Chi n'oyich ma Pedro anajty yajpaady, e chi jim nmiid'ijtyich jëyi majmocx xii. ¹⁹E ca' nminaybaattich yi jacjadyii apóstoles. Jëyi iich miid naybaati je Jacobo, je Huindzin Jesús y'uch. ²⁰Je huidibi cham iich miich ajcxy niyajjayiyyigixp, tiy'ajt yi'. Y'ijxyp ñejhuüyb Dios co ca' n'iindägyich.

²¹Co ndzooñich Jerusalén, chi nnicxyich Siria naaxjot etz

jim Cilicia naaxjot. ²² Je huin'it tiempo yi Cristo yjáy ajcxy huidibi nayoöymujcip cajp cajp jim Judea naaxjot, ca' ajcxy anajty xy'ix'adyiijich huingáxy jijpcáxy. ²³ Jéyi ajcxy nejhuüy anajty co jáy chachmínaangíxy: "Yi jáy huidibi anajty yxhach'ixhuidijtim yxhachpahuidijtim, cham y!' tzachcapxhuácxxy je Cristo ytiy'ajt, je tiy'ajt huidibi anajty ytimyyajcödigoyamyb." ²⁴ Co je mibijcpidijc oy jadu'n tiy'ajt nejhuüyigíxy, chi ajcxy yajnajxy Dioscojuyip ma Dios miid iich yxixpi.

**Jacjadyii Jesús y'apóstoles
ajcxy cöbijccixy yi Pablo**

2 Co majmactz jimijt, chi jadüg'oc nnicxyich jim Jerusalén quipxyi miid Bernabé. Nañ jadu'n Tito xypanicxyich. ² Dios jadu'n ti xyajnejhuüyich co copicy n'cxibich jadüg'oc jim Jerusalén. Chi jim nyajmiidmiydacyich nijéjity jáy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuingujc iich ajcxy nxiicmujcy ngapxmujcy, ca'ydi ymayjáy'agujcity.) Nyajmiidmiydactaayich je Dios y'ayuc ytiy'ajt huidibi ngapxhuácxypich ma yi jáy ajcxy ca'p yjudíoáyity. Jadu'n ngapxtéxxyich n'ayucich ndiy'ajtich, jigix ca'ydi ajcxy xycapx'aducyich, e ti anajty jadu'n'iyi ñaadig'i'aty iich ndung huidibi jayijp ti nduüñich etz huidibi njactunaamybich anajty. ³ Je jáy ajcxy huidibi nigohuajc'ajtp anajty je mibijcpidijc jim Jerusalén

yjáygidac ajcxy iich n'ayuc jadu'n nej ngapxtéxxyich, e nañ ni ca' ajcxy ymíñañ adzip co copicy yajtiy'ajttíhuipy je Tito huidibi xypa'oyich jim, com griegojáy je' anajty, paady ca' yajtiy'ajttíy anajty. ⁴ Ca' ixypy pin huaam ycamíñañ jim Jerusalén co Tito ca' yajtiy'ajttíy, co ca' nijéjity mibijcpidijc ycatigíy ayüch ameech huidibi ca' ymibijccixy cixyot huinjot Cristo ytiy'ajt. Hue' ajcxy amido'ijtcixy n'ayucich nej huaad xyjijpcogapxiygíxyich. Ca' ajcxy yjotcujcity co ngapxhuácxxyich co nmibijcim Jesucristo, e ca' copicy nguudunim judíoáy ycostumbre. Yi' ajcxy adzip xyajnihuidzaambich yi judíoáy ycostumbre, jadu'n nej jáy codoogíy ajcxy adzip ytuungíxy ma yhuindzin ytung. ⁵ Ni catügjaxígy ajcxy xycamimadacyich, e ni xycayaj'amoñ iich ajcxy, com hue' ndzocxyich co huen Dios y'ayuc ytiy'ajt oybi ity huädz ma miich ajcxy ca' ma anii.

⁶ Yi apóstoles ajcxy huidibi Jesús ti yhuin'ixxigíxy huidibi ajcxy nigohuajc'ajtp yi mibijcpidijc, ca' ajcxy ni ti tiy'ajt xyjacmöyich jemybi huidibi ca' jayijp nnejhuüyich. (Peni capxpaady ajcxy o peni ca' ycapxpaadyity, ca' nduüñich cuendi. Com Dios ca' huin'ixpety jáy ajcxy tiyduñ.) ⁷ Co oy ajcxy nejhuüy co Dios ti xyquexyich ngapxhuácxxyich yi' y'ayuc ytiy'ajt ma yi jáy ajcxy huidijaty ca' yjudíoáyity, tim jadu'n nej ti quexy Pedro co capxhuácxxyi yi' y'ayuc ma yi judíoáy ajcxy, ca' iich yi' ajcxy anajty n'ayucich xyjijpcogapxiyich,

ooy ajcxy jäygidacy yi n'ayucich ndiy'ajcich. ⁸Yi Dios huidibi Pedro quejx huen yi' y'ayuc capxhuäcxy ma yi judíojäy ajcxy, nañ jadu'n iich xyquejxich co yi' y'ayuc ngapxhuäcxiyich ma yi jäy ajcxy ca'p yjudíojäyity.

⁹Je Jacobo, je Pedro etz Juan ajcxy, je huidi nigohuajc'ajtcixp yi mibijcpidijc, co ajcxy nejhuüiy jadu'n nej anajty Dios may'ajt oy'ajt ti tuuñ miid iich, chi ajcxy xycöbäjcyich agujc jotcujc Bernabé etz iich. E chi iich ajcxy miid nay'ayuc-huinjihuiiyi co jëbi iich etz Bernabé nıcxibich ma yi ca'p yjudíojäyity ajcxy, etz jëbi yi Jacobo, Pedro etz Juan ajcxy nıcxixy ma yi judíojäy ajcxy. ¹⁰Jëyi ajcxy may'ajt pijctzoy ma iich etz Bernabé co jadu'n pa'ayo'n ndunıpyıch ma yi judíojäy ayoobıtıj. E chi iich ngo'adzoy co ndunamybich jadu'n agujc jotcujc.

Pablo ogy yi Pedro jim Antioquía

¹¹E jadu'n anajty miid ti n'ocnay'ayuc-huinjihuiiyibich ixti coon Pedro ycidacy jim Antioquía. Chi jim nnımaayıch huinjıpp co ti anajty jim Dios ytiy'ajt midundıgooyi co puhuäctuatni je huidibi ca'p yjudíojäyity, ca' y'ocmiidcaymujcni. ¹²Com co ca'ni anajty ymiñ jim Antioquía je judíojäy ajcxy huidibi anajty tzomb ma Jacobo jim Jerusalén, chi Pedro miidcaymujcni je jäy ajcxy ca'p judíojäyity. Co ajcxy ymiñ choon Jerusalén, chi Pedro oy puhuäctuatni je huidibi ca'p yjudíojäyity, ca' y'ocmiidcaymugaani anajty. Com

Pedro tzigııyb anajty co nı'ojıhuiıyb je judíojäy huidibi minamb co ooy ycopıcyıty yajtiy'ajttıhuiıy tıg'óciy jäy ajcxy huidibi mibijccıxp Jesucristo. ¹³Co Pedro jadu'n oy y'idıch, chi je jacjadyıi judíojäy ajcxy huidi anajty jimıp nañ tim jadu'n oy y'idııtzıxy. Oy ajcxy janejhuıy tiy'ajt, e huädz cuydungıxy. Ixti Bernabé nañ jadu'n y'idııch nej Pedro, com ca' anajty yjotmıcity. ¹⁴E co iich jadu'n oy n'ıxyıch co ca' ajcxy cuydungıxy yajxon Jesucristo ytiy'ajt, chi iich nnımaayıch Pedro mayjäy'agujc: “Peni miich judíojäy, e ti m'ıxmajtzni judíojäy ycostumbre co ti mibıcy Jesucristo, e ti m'ocuydumıyb je huınma'nı huidibi judíojäy ca' cuydungıxy, ¿nej tiy cham co adzip mdzachmınaandägy co yi' ajcxy huidibi ca'p yjudíojäyity, copıcy cuydúngıxıpy judíojäy ycostumbre, huıdıjaty miich ti m'ıxmajtzni?”

Yi judíojäy ajcxy quıpxyjatı miid jacpınjatı

¹⁵Jadu'n njacnımaayıch Pedro: “İich etz miich judíojäy iich ajt, huidibi ndaj'ajtim ndeedy'ajtim nañ judíojäy. E ca' iich ajt njadu'nıty nej jäy ajcxy ca'pi yjudíojäyity, huidibi ca' cuydungıxy Dios ycötujcin je jecyıp huidibi Moisés yjayhui'm. ¹⁶Mııch Pedro iich ajt nnejhuııyım co jäy ajcxy ca' jëbi Dios yajpocyñıhuächıyıi miid tim jëyi co ajcxy cuydungıxy Dios ycötujcin je jecyıp huidibi Moisés yjayhui'm. Co yi jäy ajcxy mibijccıxy Jesucristo, huın'ıt janchtıy Dios yajpocyñıhuätziıyb

ajcxý. Nañ tim jadu'n ñich ajt, ti nmibijcim je Cristo jigix jëbi Dios xyajpocyñihuaatzim. E ca' jëbi huaad Dios xyajpocyñihuaatzim ajt miid tim jëyi co ti nguyduunim Dios ycötujcin je jecýip. Ca' ni tüg jäy huidijaty jëbi Dios yajpocynihuächyii, miid tim jëyi co cuyduuni Dios ycötujcin je jécýip.”

¹⁷Co ajt nhuinma'n nbiadaacim co nmibijcim Cristo jigix Dios jëbi xyajpocyñihuaatzim, huin'lit je judíojäy ymínaangixy co jibic-huinma'n nyajtuunim co ca' njaccuyduunim yi' ajcxý ycostumbre. ¿Nej mdijy je Cristo xyajtundigooyim jadu'n nej judíojäy ymínaangixy? Ca' yjadu'nity. Ca' jëbi huaad je Cristo xyajtundigooyim. ¹⁸Co ixypy nmijpidaacim jadüg'oc Dios ycötujcin je jecýip, je huidibi ti n'ixmajtzim, jada ixypy ijxpejt'ajtp co ndundigooyim ma Cristo ytiy'ajt. ¹⁹Jecý'ajty co nguyduunich anajty Dios ycötujcin je jecýip, huin'lit ca' anajty nbaadyich tiy'ajt nej jëbi huaad Dios xyajpocyñihuaachich, e jadu'n nipaady nej jihuüy ti n'ögyich. Paady ycixpi ti n'ixmachich je jécýip cötujcin, e ti nmijpidägyich Jesucristo ytiy'ajt jigix jëbi njactzinäyich miid Dios ycixpi. ²⁰Jadu'n nayjihüiyijich jadu'n nej jihuüy ti n'oc'o'cpich, jadu'n nej jihuüy ti ngruudzpetyich quipxyi miid Cristo. Jadachambi ca' n'octzinaayñich miid ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma ñich njugy'ajtin. E jadu'n nej cham njactzinäyich miid ñich nnin'cx, jactzinaaybich

miid Dios y'ung ycixpi, nmijpidacypich Dios y'ung. Dios y'ung ti xychocyich ti xyjihüiyich, e ti nayoxyii naydogyii ma yi o'cin miid ñich nbocy ycixpi. ²¹Ca' nniyajtigoya'ñich je may'ajtin je oy'ajtin huidibi Dios ti tuuñ miid ñich ycixpi. Co ixypy jëbi Dios xyajpocyñihuaatzim miid co ajt nguyduunim Dios ycötujcin jëyi, huin'it ixypy ti ñaadig'laty je Cristo co y'o'cy miid ajt nbocy ycixpi.

Je ycötujcin huidibi Moisés yejc o je mibijcin

3 Janch loci miich ajcxý migügtijc huidibi tzinaayb jim Gálatas naaxjot. Ti jäy ajcxý xyajhuinma'ñyidigoogyixy miid jibic-huinma'ñ. Paady ycixp mdzach'ixmadzaangixy je Dios ytiy'ajt. ñich oy njacapxhuächyich ma miich ajcxý mhuinduu je tiy'ajt jadu'n nej Cristo yajcruudzpejti miid ñich ajt nbocy ycixpi. ²Yi' nyaj'amidooyb: ¿Nej ti mbaatcixy Dios yjihui'ñ ymic'ajt miid co mdzachcuyduuni Dios ycötujcin je jecýip? o ¿Nej ti mbaatcixy Dios yjihui'ñ ymic'ajt miid co ti mmidoogixy Jesucristo y'ayuc e ti mmibijccixy? Hue' janchtiy ti mbaatcixy Dios yjihui'ñ ymic'ajt co ti mmibijccixy Jesucristo, ca' nmínaaním co ti mguydungixy Dios ycötujcin je jecýip. ³Co Dios oga'n yjihui'ñ xy'adigiigyixy xyjottigiigyixy, chi mguychinaaygixy Jesucristo ytiy'ajt nej Dios yjihui'ñ xyhuinma'ñmoogyixy. ¿Nej co cham miich ajcxý mloci huinma'ñ

mdzachtungixy? Jadachambi jadüg'oc mdzachtunaangixy mgi'mhuinma'n. ⁴¿Nej naadigigixpi miich ajcxy tzaachypi ti mminajxcixy ti myajnajxcixy miid Cristo ytiy'ajt ycixpi? Janch naadigi' jadu'n tzaachypi ti mminajxcixy ti myajnajxcixy, pen janch tücciyi ti m'ixmájtzcixni Cristo ytiy'ajt. ⁵Jada nyaj'amidoogixyp: ¿Nej ti Dios yjihui'n ymic'ajt xy'adigiigixy xyjottigiigixy etz tuñ mijhuinma'n ma miich ajcxy miid co ti mguydungixy Dios ycötujcin je jecyip? Ca' yjadu'nity. Hue' Dios xy'adigiigixy xyjottigiigixy etz tuñ mijhuinma'n miid miich ajcxy miid co ti mmidoogixy Jesucristo ytiy'ajt etz ti mmibijccixy.

⁶Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadu'n nipaady nej jihuüy Dios yhuinmecxi ypocy, jigix jëbi y'lity tudägy ma Dios yhuinduu. ⁷Jadu'n yjajty miid Abraham. Je' ymibijc Dios, e yajpocyñihuaatzí Dios, jëbi ñaydijyíi tudägy jây ma Dios yhuinduu. ⁸Dios jecy'ajty yajnihuinmayiïy co yajpocyñihuädza'n je jây ajcxy huídibi ca' yjudfojâyity, jëbi ajcxy ñaydijyíi tudägy jây ma Dios yhuinduu, miid co ajcxy mijpidägipy je may'ajt huídibi Dios ytunamyb miid yi' ajcxy ycixpi. Paady ycixpi jaaybety ymiñ ma Dios ñecy co jadu'n Dios miidmiydac Abraham jecy'ajty co yi huídibi ca' yjudfojâyity ypaadipy ajcxy y'alma ñidzocin, com jadu'n Dios yminañ: “Miid miich tüg m'ap m'oc may'ajt oy'ajt nduna'ñich miid

naaxhuiñyây ajcxy ycixpi.” ⁹Paady ycixpi jadu'n nej jây ajcxy tüg'óciy pinjaty mibijcp Dios, Dios may'ajt tunamb miid yi' ajcxy ycixpi co mibijccixy, tim jadu'n nej may'ajt tuun miid Abraham.

¹⁰Dios chaachytunamy jây ajcxy miid ypocy ycixpi, pinjaty huinma'n tzachpidacp co y'alma ñidzocin padaangixy miid co cuydungixy Dios ycötujcin je jecyip. Com jadu'n jaybety ymiñ ma Dios ñecy: “Dios chaachytunamyb jây ajcxy miid ypocy ycixpi, pinjaty ca' mijpidägy tüg'óciy Dios ycötujcin, etz nañ jadu'n pinjaty ca' cuydudây jada cötujcin.” ¹¹Jadachambi miid je ayuc huídibi ti nyajnijayiigixy ma jada necy, jëbi miich ajcxy mnejhuíhuip co ca' ni pin jây jëbi Dios yajpocyñihuächyíi miid huídijaty ti tungixy co cuydungixy Dios ycötujcin je jecyip. Com jadu'n ymiñ jaybety ma Dios ñecy ma Dios jadu'n ymina'n: “Yi jây ajcxy pinjaty mibigip iich n'ayuc, yi' ajcxy nyajpocyñihuädzaamybich jëbi ajcxy y'alma paadip ñidzocin.” ¹²Dios ca' jadu'n ymina'n ma yi' ycötujcin huídibi Moisés yjayhui'm co jëbi nmijpidaacim, e huin'it Dios xyajpocyñihuaatzim. Hue' je' ymina'n ma ycötujcin co jëbi ychaachytuunim miid ajt nbocy ycixpi. Com jadu'n ymiñ jaybety ma Dios ñecy: “Yi jây ajcxy pinjaty cuydumb Dios ycötujcin huídibi Moisés ycojay, copicy cuydudáhuip, ni ma ycatundigoyipy.”

¹³Cristo xyñihuaaním xyyajtzocim ma anajty Dios

xychaachytunaanim miid co ca' nguydundaayim Dios ycötujcin je jecyip. Cristo ci'm ti yajnicxy je tzaachypi huidibi Dios ajt xymöhuaanim anajty. Com jadu'n jaybety ymiñ ma Dios ñecy: "Pinjaty anajty yajmijxotzpejtp ma tüg cruudz, hue' anajty je' yco'ayooyb ypocy tiibi tuñ." ¹⁴Cristo o'c je' miid iich ajt nbocy ycixpi, jigix Dios jëbi cuyduñ yi' y'ayuc jadu'n nej yaj'ahuaniiy Abraham jecy'ajty, co may'ajt tuna'n miid yi jäy ajcxy ycixpi huidibi ca'p yjudíojäyity, etz nañ jadu'n may'ajt tuna'n miid iich ajt ycixpi, jigix jëbi iich ajt nbaatim je Dios yjihui'n co nmibijcim je Cristo.

Je cötujcin huidibi Moisés yejc etz huidibi Dios y'ahuaniiy

¹⁵Migügtijc ajcxy, ngapxticxaamybich jadu'n nej Dios ti tuñ miid tüg ijxpejt nej jäy ajcxy ytuñ. Co ixypy tüg jäy necy yajcojy ma nigapxy jadu'n nej ypidägy yajhui'ma'n, e co yajcojtäy je necy, e chi firmijiy, e nañ jadu'n je testigo ajcxy yfirmijiy,huin'it ca' huaad pinjaty nixigy yajxigy jada tiy'ajt, e nañ jadu'n ni ca' huaad yaj'ungiy. ¹⁶Cuenditungixy Dios y'ayuc ytiy'ajt, Dios ma yi' y'ayuc yaj'ahuaniiy Abraham etz tüg yi' y'ap y'oc co may'ajt tuna'n miid yi' ajcxy jëyi. Ca' nminaanim Dios y'ayuc ymina'n co Dios yaj'ahuaniiy Abraham co may'ajt tuna'n miid tüg'óciy yi' y'ap y'oc. Hue' je'Dios y'ayuc ymina'n co may'ajt tuna'n miid tügpajc yi' y'ap y'oc, je' je' je Cristo. ¹⁷Dios ca' yi' nixigy yajxigy ytiy'ajt huidibi jayijp ymoy

Abraham co yajnigüejxy ycötujcin yi Moisés. Co Abraham y'o'cy, ti anajty ñajtninicxiiyñi midaax migo'px ja'iipxmajc jimijt, chiini oy Dios möy Moisés yi' ycötujcin. Tim jadu'n nej ca' huaad yajtigach je jäy ñecy ma nigapxy jadu'n nej ypidägy yajhui'ma'n, nañ tim jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tuna'n miid naaxhuiñjäy ajcxy ycixpi. ¹⁸Dios y'ahuaniiy yi' ytiy'ajt ma Abraham jecy'ajty co may'ajt tuna'n miid yi' y'ap y'oc ycixpi etz miid tüg'óciy naaxhuiñjäy ajcxy ycixpi. Co ixypy jëbi jäy padaangixy y'alma ñidzoocin miid huidibi ajcxy ytumyb co ajcxy cuyduuni Dios ycötujcin je jecyip, ca' ixypy may'ajt ti tuñ co ti quexy je Cristo ya naaxhuiñ co jäy yajnihuädzip. ¹⁹¿Ti ycixpi Dios co moy Moisés je cötujcin huidibi ycojy? Hue' je' Dios moy jada cötujcin jigix jëbi niguëxigy co jäy ajcxy ca' ycapxymidoogixy. Tunamb anajty Dios ycötujcin huidibi Moisés ycojy mabaad ti quexy ya naaxhuiñ yi' y'ung, je' je' je Cristo, je Abraham y'ap y'oc huidibi yajpocynihuätzp jäy ajcxy. Dios ycötujcin hue' je' yajnigüejx Moisés miid ángeles ajcxy. E chi Moisés capxnajxy ma ymigügtijc ajcxy. ²⁰Co Dios ti quexy yi' oybi y'ayuc ya naaxhuiñ miid y'ung, paady ycixpi Dios ca' tzocy co huingbi capxnaxipy yi' y'ayuc. Dios etz Dios y'ung tú'ciy yi'.

Tigixpi Dios je Moisés cötujcin yejc

²¹¿Nej mdijy ca' ñaybadyii yi Dios ycötujcin huidibi Moisés ycojy,

miid je ayuc huidibi Dios yajnimay Abraham? Naybaatip ajcxy y'ayuc. Co ixypy cayejcy Dios cötujcin ma jëbi jäy ajcxy y'alma ñndzoocin padaangixy, huin'it ixypy jëbi nbocynïhuaatzim co ixypy nguyduunim yajxon jada cötujcin. ²²Ca' yjanchity co jëbi Dios xyajpocynïhuaatzim miid co tijaty nduunim. Com ma Dios y'ayuc ymiñ cojay co nidüg'óciy jäy ajcxy ti ytundigooy, ac pocy ymiid ajcxy. Jadu'n Dios y'ayuc ymina'ñ, jigix jëbi Dios yajpocynïhuaäch tüg'óciy pinjaty mijpidacp Jesucristo, jadu'n nej yajnimay Abraham jecy'ajty co jadu'n tuna'ñ.

²³Ca'ni anajty Cristo ymiñ ya naaxhuiñ, huin'it anajty Dios ycötujcin ytuñ, yajpocycäy jäy ajcxy, e ca' Dios yajcomidoy jäy ajcxy ypocy. Jadu'n nej jihuüy jäy ixypy ypujxtijc'iñaaygixy e ahuijxcixy mina je juez ytiydunáanigixy. Jadu'n anajty n'ijtim jadu'n nej jihuüy nbujxtijc'iñaayim, ixti cooni Jesucristo ymiñ ya naaxhuiñ yajpocynïhuaatzp. ²⁴Jadu'n anajty Dios cuend'aty yi judíojäy anajty miid ycötujcin huidibi Moisés ycojay. Tim jadu'n nej jäy cuend'aty huingjäy y'ung. Jadu'n anajty Dios cuend'aty judío jäy ajcxy ixti cooni Jesucristo ymiñ ya naaxhuiñ jëbi yajpocynïhuaäch jäy ajcxy. ²⁵Jadachambi co Jesucristo ti y'oy ya naaxhuiñ, e ti nmibijcim (tzojcingíx) yi' ytiy'ajt, paady ycixp cham ca' n'oc'ijtim cuend'aty miid Dios ycötujcin huidibi Moisés ycojay.

²⁶Com miich ajcxy ti mmijpidaaccixy Jesucristo ytiy'ajt,

paady ycixp jëbi nidüg'óciy miich ajcxy naydijigixy Dios y'ung.

²⁷Tüg'óciy miich ajcxy huidijaty ti mnibejtcixy, ti mnibejtcixy jigix jëbi mdügmujccixy miid Cristo, jadachambi niducy m'ijtcixy miid Cristo. ²⁸Nidüg'óciy miich ajcxy ti mgöbijccixy Jesucristo jadu'n nej ajcxy mHuindzin. Jadu'n miich ajcxy judíojäy etz nañ jadu'n ca'pi yjudíojäyity, nañ jadu'n miich ajcxy midumbidijc etz miich ajcxy huidibi ci'm nay'ane'mip, miich ajcxy yëydijctijc etz miich ajcxy töxyjäydijc; tú'ciy miich ajcxy myajpattaaygixy ma mHuindzin Jesucristo. ²⁹Huenpinity miich ajcxy co mmijpidaaccixy Jesucristo, huin'it jëbi ajcxy mnaydijiiyb Abraham y'ap y'oc, e huin'it jëbi mbáatcixipy tzinaydac jiiyb tzajpjoty, je huidibi Dios yaj'ahuaniiy Abraham, Abraham y'ung y'anäg etz Abraham y'ap y'oc.

4 ¹⁻²Cha jadüg ijppejt nyajnimäyich miich ajcxy huidibi capxticxp Dios ytiy'ajt. Tüg comeeñyjäy ymang hue' anajty mutzní pi'cni je' anajty jëdaanip yteedy ypidägy. E chi yteedy tüg jäy yajniñbicy huidibi jëbi cuend'aty je pidägy etz je pi'e'anäg mabaad paady je tiempo mina yc'idigihuiigy je pidägy. Je comeeñyjäy y'ung com co anajty ca'ni yeegy, ane'my anajty y'ity, tim jadu'n nej ane'my y'ity je jäy huidibi midumb. ³Tim jadu'n nej je comeeñyjäy y'ung anajty y'ity ane'my, nañ tim jadu'n iich yi judíojäy ajcxy ane'my anajty n'ijtcixyich co anajty ca' tiydudägy naydijiiygixyich Dios

y'ung. ⁴⁻⁵Co oy Dios yajhuaad'ajtni, chi oy quejxni y'ung ya naaxhuiñ. Yi' y'ung ma'xung'ajt judfojáy, jigix jébi codináy jáy ajcxy ma Dios ycötujctac. Nañ jadu'n yi' ma'xung'ajt judfojáy jigix jébi yajpocyñihuäch yi jáy ajcxy huidibi ti yajpocycāhuigixy Dios ycötujcin huidibi Moisés ycojay. Dios ti quexy y'ung jigix jébi xycodinaayim miid ajt nbocy ycixpi, e jadu'n Dios jébi xycöbiji jadu'n nej jihuüy xyci'm'ung'ajtim.

⁶Jadachambi miid co naydijim Dios y'ung, paady ycixp Dios ti xy'adigiïyim ti xyjottigiïyim yi' yjihu'iñ ymic'ajt, paady ycixp ajt mīnaanim co Dios ajt nDeedy'ajtim etz nmiinaanim: “iPadre Nuestro!” ⁷Miid co miich ajcxy ti mmibijccixy Jesucristo, jadachambi ca' ane'my m'oc'ljtcixyñi ma Dios ycötujcin je jecyip, jadu'n nej je jáy ytumbidijc miidity ane'my . Paady ycixp jébi Dios xymóoygixipy jugy'ajtin huidibi ca' ycixipy ytigoyipy, jadu'n nej Dios miidity jugy'ajtin. Jadachambi miich ajcxy Dios xy'ung'ajt, etz jébi mbáatcixipy pidägy ma Dios.

**Pablo yjotmaybaady miid
je mibijcpidijc ycixpi**

⁸Jecy'ajty ca' anajty mnejhuüygixy Dios ytiy'ajt tiydudägy, ooy anajty m'ojadajtcixy oyñiti huidibi ca' ymic'ajt miidity. E ca' anajty m'ojadajtcixy je Dios tzajpjotyp huidibi mic'ajt miidity. ⁹Jadachambi ti mnejhuüygixy Dios ytiy'ajt etz Dios ti xycöbijccixy. ¿Nej co jadüg'oc mdzachnihuimbidaangixy yi

judfojáy ycötujcin, ca'p ti mic'ajt miidity, huidibi ti m'ljxmajtcixy? E jadüg'oc xy'ane'mygixy je judfojáy ycötujcin. ¹⁰Jadachambi mdzachcuydunaangixy judfojáy ycostumbre, jadu'n nej ajcxy myajmij'ajtcixy xiibo' xiijimijt. ¹¹Huinmaaybich ooy miid miich ajcxy ycixpi co naadigä ti nyaj'ixpicyich miich ajcxy. Ninigoob ayoohua'n iich ndung ma miich ajcxy.

¹²Migügtijc ajcxy, cham may'ajt nbijctzooyich ma miich ajcxy. Yajtügüygix yi mhuinma'n jadu'n nej iich nhuinma'n. Fich ti nyajtügüyich nhuinma'n miid miich ajcxy mhuinma'n co ti n'ixmachich yi judfojáy ycostumbre. Je taab anajty n'ityich miid miich ajcxy, ca' miich anajty ajcxy iich n'ayuc xyjjpcogapxiyi. ¹³Miich ajcxy mnejhuüyb co anajty n'ityich ma miich ajcxy, pumäy iich anajty nyajpaady miid yuu pa'm ycixpi, paady ycixp iich jim jecy nhuäcxjpyich, ngapxhuäcxych Jesucristo ytiy'ajt je jayjip'aty.

¹⁴Miid iich nba'm ycixpi ooy n'adzjpy miich ajcxy ma mjiin mdijc, e miich ajcxy ca' ti xy'ixtijy e ni ca' miich ajcxy xymidzjpyich. Jadu'n iich miich ajcxy xycöbijcye agujc jotcujc, tim jadu'n nej ixypy ti mgöbijccixy Jesucristo ci'm. ¹⁵Jadachambi çti ti ytunyii ti yjadyii co ca' mmijotcujc'ajtcixy iich n'ayuc? Com nyejcich tiy'ajt co je taabi anajty oga'n jim n'ityich ma miich ajcxy co janch xypubedaambich miich ajcxy. Ixti mgi'm huin anajty ajcxy mjayajpidzimaangixy

etz xymöhuaangixyich anajty co iich ngaa'a'ixiy. ¹⁶ ¿Nej iich ti n'ahuimbityich miich ajcxy mmidzip miid co ti nyajnimaaygixy huidibi janchip?

¹⁷ Yi huindzindijc jim ma miich ajcxy huidibi xychachyaj'ixpijccixp huidibi ca' ytiy'ajtity, ca' ajcxy oyhuinma'n miidity. Hue' ajcxy tzachtzocy co miich ajcxy m'ixmájtzcixip iich n'ayuc ndiy'ajt. Hue' ajcxy tzachtzocy co miich ajcxy yi' mgömayipy. ¹⁸ Hich njajotcujcich jadu'n co huingbi huindzin ajcxy jëbi xyaj'ixpijccixy. Nigoobi co ixypy jëbi ajcxy m'oy'ajtin mbaatcixy. Ca' oy copicyity co iich ci'm miich ajcxy nmiid'ijttiihuipy. ¹⁹ Migügtijc huidibi ooy ndzocy njihuüyich jadu'n nej jihuüy ngi'm'ung'ájtigixy, ooy tzaachypi ndzachjihuüyich miid miich ajcxy ycixpi jadüg'oc. Jadu'n tzaachypi njihuüyich jadu'n nej ungday tzaachypi jihuüy co y'ung yajma'xung'ada'n. Njihuihuaamybich tzaachypi ixti cooni miich ajcxy anajty Cristo mhuinma'n xyaj'oyiyyi. ²⁰ Ooy iich njanay'ijxpada'nyii ma miich ajcxy cham cham. Njamiidcapxaangixy njamiidmiydägaangixy, chi ixypy tiy'ajt njacyajnimaaygixy jac huädz. Ooy iich ndajy nmayich miid miich ajcxy ycixpi, nej n'ocjacnimaaygixyipy.

Je Agar etz Sara y'ijxpejt

²¹ Miich ajcxy huidibi mdzachcuydunamyb Dios ycötujcin je jecyip. Nmimaaygixy ajcxy, ¿nej ca'ni ajcxy midoogixy huidibi Dios ycötujcin nigapxyi? ²² Com

Dios y'ayuc huidibi jaybetyip jadu'n ymina'n co Abraham ymiid anajty metz ymang. Tüg je'anajty ytaj'ajtip huidibi ypödumb'ajtpy. Je jadügpi ymang anajty ytaj'ajtip huidibi ytimytöxijc'ajtpy. ²³ Je huidibi je pödumbi y'ung'ajti, hue' je' ypi'c'ajty jadu'n nej pi'ctijc jadyii yma'xung'ajtcixy. Je huidibi Abraham ytöxyijc y'ung'ajti Dios je' miid ymic'ajt ypi'c'ajty, Dios ycuuduun y'ayuc huidibi yajhuinhuaniiy Abraham. ²⁴ Jada jihuimbit ayuc jadu'n yhuimbizimyb: jada Abraham ytöxyjäy ajcxy metz ijxpejt'ajtp jadu'n nej Dios ti ytuñ miid yi' yjäy. Je ypödumbi huidi anajty yxii Agar, yi' miid yquipxii yi Dios ycötujcin huidibi Dios ymoy Moisés ma je cop huidi yxii Sinaí. E tüg'óciy jäy ajcxy huidibi cuyduungixp Dios ycötujcin huidibi Moisés ycojay, ane'my ajcxy je' yaj'idyii, tim jadu'n nej tüg comeñyjäy ane'my yaj'ity yi' ytumbi ajcxy. ²⁵ Agar yi' nigix'ajtp je cop Sinaí jim Arabia ñaaxjot ma Dios moy Moisés je cötujcin. Agar je töxyjäy huidibi anajty pödumb, je' miid yquipxii yi judíojäy huidibi tzachcuyduungixp Moisés ycötujcin, etz nañ yquipxii miid Dios y'it ya naaxhuiñ jim Jerusalén. Yi judíojäy etz y'ung y'anäg ajcxy huidibi tzach cuyduungixy Moisés ycötujcin je jecyip, ane'my ajcxy y'lity ma jada cötujcin, tim jadu'n nej jäy ajcxy huidibi tumb ma comeñyjäy, e y'ane'my ajcxy y'ijtcixy. ²⁶ Je Sara huidibi Abraham ytöxyijc'ajtpy, yi' miid yquipxii iich ajt huidibi cuydumb je Cristo ytiy'ajt, e je Cristo yi' yajpatp tzajpjoty. ²⁷ Com jaybetyity ymiñ ma Dios ñecy co

mayjäy paada'n oybi ma Dios, com Dios jadu'n ymina'n:

Jotcugi' jadüg'oc miich Sara huidibi ca' y'ungbaady. Xic yäx miich miid jotcujc'ajtin, miich huidibi ca' ungmoy. Nigi ymayihua'n miich m'ap m'oc ca'ydí Hagar y'ap y'oc.

²⁸Ich ajt huidibi nmijpidaacim Jesucristo tügiyim miid Abraham ymang Isaac. Com jadu'n nej Dios cuyduuñ y'ayuc huidibi yajhuinhuaniy Abraham co Isaac yma'xung'ajty, nañ tim jadu'n Dios cuyduuñ yi' y'ayuc miid ich ajt co je Cristo y'oy ya naaxhuiñ. ²⁹Tim jadu'n nej Abraham ymang Ismael jecy'ajty midzip'ajty Abraham ymang huidibi Dios yajhuinhuaniyi Abraham; nañ tim jadu'n yi jäy ajcxy huidibi tzachcuydungixp Dios ycötujcin je jecyip, ooy ajcxy tzach midzip'adyii yi jäy ajcxy huidibi mibijcp Jesucristo.

³⁰Oc-huinmay miich ajcxy nej jaybetyity ymiñ ma Dios ñecy co jadu'n Dios nimay Abraham:

Yajpidzim ma mdijc je mbödumbi miid ymang. Com ca' jadu'n ytiy'ajtity co je pödumbi ymang paadipy miich mbidägy. Yi' je' padamb je mbidägy huidibi miich mdöxyjyc ymang'ajtpy.

³¹Migügtijc ajcxy, ca' ich ajt n'ocjadu'niñ nej je pödumbi y'ung y'anäg ajcxy huidi ane'my ijtp. Jadu'n ich ajt nipaady nej Abraham ytöxyjyc y'ung y'anäg huidibi ca' y'ane'my y'ity.

Cristo ti xyajnihuaatzim ma je cötujcin huidibi Moisés yejc

5 Je Cristo ti xyajpidzimim ma Dios ycötujcin je jecyip

ma anajty n'ijtim y'ane'my, jigix jëbi tzojcingix nguyduunim yi' ytiy'ajt. Mibijccixy tiyudädgy Cristo ytiy'ajt, ca' m'ixmajtzcixy. Ca' mni'ahuimbijtcixipy jadüg'oc Dios ycötujcin je jecyip ma anajty m'ijtcixy tim jadu'n nej comeeñjyät ytumbi ajcxy y'ijtcixy ane'my.

²⁻³Amidoo'ijtcix ich n'ayuc.

Jadachambi ich Pablo minaambich pen miich ajcxy mgöbigamyb jada ayuc co copicy myajtiy'ajthuiipy, huin'it ñaadig'ada'n co mmibijccixy Jesucristo ytiy'ajt. Ca' Jesucristo may'ajt tuna'n miid miich ajcxy pen jadu'n m'ididza'n. Jadüg'oc nmina'nich co pinjaty jadu'n ycuudunamyb tüg Dios ycötujcin, copicy ycuundähuiipy tüg'óciy.

⁴Pen mjiip'ijxyp ajcxy co Dios xyajpocyñihuätzaangixy miid co mguyduungixy tüg Dios ycötujcin, jadu'n nipaady nej jihuiy ti m'ixmajtzcixni Cristo y'ayuc ytiy'ajt. Pen ca' mmijpidaaccixy je may'ajt oy'ajt huidibi Cristo ti tuñ ninigoob miid miich ajcxy ycixpi, huin'it ca' Dios xyajpocyñihuätzcixipy.

⁵Njiip'ijxim co Dios xyajpocyñihuädzaanim jigix jëbi naydijim tudägy ma Dios yhuinduu miid co nmibijcim Cristo etz miid co je Espiritu Santo xypubejtim.

⁶Co nmibijcim ajt Jesucristo, Jesucristo ca' cuendituñ pen ti nyajtiy'ajttiyim o pen ca'. Jëyi yi' tzocy co naychojcin nayjihuiyim nidüg nidüg, e jada je' je ijxpejt co nmibijcim yi' ytiy'ajt.

⁷Jayijp'aty oy yajxon anajty m'occuydungixp Jesucristo ytiy'ajt. ¿Pin ti xy'agapxiygixy co ca' mgapxymidohuaangixy tiy'ajt? ⁸Yi

jäy ajcxy huidibi ti xy'agapxiygixy ca' ajcxy tiy'ajt patcixy ma je Dios huidibi ti xyhuin'ijxim jigix jëbi nmibjicim Cristo. ⁹Miich ajcxy mnejhuiyb co jäy pidaaccixy levadura ma harina jich je levadura yajtiyiydaayb je jich. Nañ tim jadu'n jada anii huidibi jäy ajcxy ti pidaaccixy ma miich ajcxy yajtiyidähuamyb miich ajcxy mjot mhuinma'n. ¹⁰Com iich nmibjicim co ajt je nHuindzin Jesucristo oyhuinma'n xymöhuipy ajcxy, paady ycixp njjip'ijxypich co miich ajcxy mmibigaamyb iich ngapxy iich n'ayuc. Dios chaachytunipy je jäy ajcxy huidibi ti xyajhuinma'nydigooygixy. Oy ooy yjamj yjajanchity ajcxy, ca' ytimyñéjity, Dios yi' ajcxy tzaachytuniib.

¹¹Migügtjic ajcxy, co ixypy yjanchity co iich ngapxhuäcxyich co copicy nidüg'óciy jäy yajtiy'ajttihuiy, ¿nej co je'ni chambaad judíojäy xychach'ixhuidityich xychachpahuidityich? Pen ca' ixypy xy'ixhuidityich xypahuidityich jadu'n nipaady nej jihuüy nyaj'ixpicyich co je Cristo ca' y'o'cy miid iich ajt nbocy ycixpi. ¹²Yi' huidi ajcxy xyajhuinma'nydigooygixyp, ooy ixypy y'oyity co ixypy ajcxy xypuhuäctuatni tücciyi.

¹³Dios miich ajcxy ti xymijhuoogixy ma yi' ytiy'ajt jemybi jigix jëbi m'ixmájtzcixni je Dios ycötujcin je jécyp, etz tzojcingix mijpidägipy Cristo ytiy'ajt. Dios ti ajcxy mdü'aa xy'ahuaatzä, per ca' huaad

mduongixy je jibicpi huidibi mjot mhuinma'n chachñijot'ajtcixpy. Hue' a'oy naymi'oyjäy'ajtigix nidüg nidüg, naybubéjtigix miñ xyipy. ¹⁴Dios y'ayuc ymina'n: "Mi'oyjäy'adipy mmijjin mmidjic, tim jadu'n nej miich ajcxy mdzocy co mmijjin mmidjic xymi'oyjäy'adipy." Co jadu'n ajcxy mnaymi'oyjäy'adiiyb miñ yxipy, ytimyñipatyp jadu'n nej jihuüy ti mguydundäy tüg'óciy je Dios ycötujcin. ¹⁵Pen miich ajcxy mnaymidundigooyip etz mnaymijotma'tip miñ xyipy, ca' yjetyity co ci'm anajty jadu'n mdza chnayyajhuinma'nydigooygixy miñ xyipy.

Je jugy'ajt huidibi yi Espíritu Santo yejcpy

¹⁶Jada capxhuijin iich miich ajcxy nyajnijayiyb. Cuychinaaygix je Dios ytiy'ajt jadu'n nej je Espíritu Santo xyhuinma'nymoogixy ajcxy. Ca' mguyduungixy je jibic-huinma'n huidibi mdzachnijot'ajtcixyp ci'm. ¹⁷Je jibic-huinma'n huidibi mdzachnijot'ajtcixyp, hue'ymidzip'ajtpy je oybi huinma'n huidibi je Espíritu Santo xymoogixp. Dios y'ayuc obyí ca' ñaygodigiyi miid miich ajcxy mjibic-huinma'n. Paady ycixp miich ajcxy ooy mjacyudunaangixy Dios y'ayuc, e ca' ajcxy mmimadäga'n ñicxy mguydundaaygixy. ¹⁸Pen tzojcingix mguyduungixy je Cristo ytiy'ajt huidibi Dios yjihui'n xymooyb ajcxy, huin'it ca' copicy mguydúngixipy Dios ycötujcin je jécyp.

¹⁹Com nnejhuiydaayim jadu'n nej jäy ajcxy yjot

yhuinma'n̄ tzachnijot'ajtcixy jibicipi. Jadu'n nej yëydijctijc tzachmigapxtigoyaangixy töxyjäydijc; e nañ jadu'n nej töxyjäydijc ajcxy ooy yëydijctijc tzachmiid'ügangixy etz miid'edzaangixy etz ma yijiibi ji ajcxy yhuinma'n̄yidigooygixy. ²⁰E nañ nnejhuiiyim jadu'n nej jäy ajcxy tzach'ojadajtcixy tzachhuingoxтинаangixy je huidibi jäy ajcxy ci'm ti yajcojy, etz nej jäy ajcxy tzach'ojadajtcixy tzachyajtunaangixy caxpojcpidijc, nej jäy ajcxy ymügüg tzachmijotma'tcixy; nej jäy ajcxy ca' tzip yjot'ambijccixy miid yinjaty huenjaty ayuc; nej jäy ajcxy tzachmidzip'ajtcixy ymügügtijc; nej jäy ajcxy tzachyajca'oy'ijxcixy ymügüg co tijaty miidity; nej jäy ajcxy chachnaybijc-huäcxáanigixy, huidibi abicy tzachmiid'adamb yjäy. ²¹E nañ nnejhuiiyim jadu'n nej jäy ajcxy abijctigihuaangixy tijaty ymügüg ymiid; nej jäy ajcxy ymügüg yaj'o'ccixy; nej jäy ajcxy nijot'ajtcixy ügii etz adzuuhuididii agoodzhuididii, etz yi jäy ajcxy huidibi tzachnijot'ajtcixp yi jadu'mbi huinma'n̄. Hich miich ajcxy cham njacyajnimaaygixy jadu'n nej iich jayijp'aty ti n'ocnigapxpich, co yi jäy ajcxy huidibi yi jadu'mbi jibic-huinma'n̄ chachnijot'ajtcixp jadu'n nej cham ti nijayiygixy, ca' ajcxy tzinaydac paadaangixy ma Dios y'ane'my.

²²Hue' ajt jadachambi nejhuiydaayim je oybi huinma'n̄ huidibi Espiritu Santo yejcy. Co yi jäy ajcxy huidibi ymiid Dios yjihui'n̄ ymic'ajt ma yjot

yhuinma'n̄, hue' ytungixyp ajcxy yi ooyjäy'ajtin miid ymügügtijc; miid ajcxy xondaacin etz miid ajcxy jotcuje'ajtin; etz ymimexxtujcixyp ymügügtijc; etz chojccixyp yjihuiiygixyp ymügügtijc; etz ytungixp oybi; etz tudägy yjäy'ajtcixyp, ²³nicy xeemy yjäy'ajtcixy ma ymügügtijc; etz ci'm yajxon ñay'ane'migixy ma yi oybi. Ca' ji huingbi cötujcin huidibi jada oybi huinma'n̄ jijpcogapxihiipy. ²⁴Tüg'ócay jäy ajcxy pinjaty Jesucristo Huindzin'ajtp, mimadacpy ajcxy yi jibic-huinma'n̄ huidibi ci'm nijot'ajtcixyp miid Cristo ymic'ajt. ²⁵Miid co nmiid'ajtim je Espiritu Santo ymic'ajt ma ajt ndzinaayin njugy'ajtin, paady ycixp tzoc tzinaayim jadu'n nej xy'ane'mim xyhuinma'n̄ymooyim je Espiritu Santo.

²⁶Ca' huaad amij agix ndzachnayjihuiiyim, etz nañ jadu'n ca' huaad nmügügtijc nyajjotma'tim; etz ca' huaad ni ti nyajca'oy'ijxim.

Naybubéjtigixy miñ xyipy

6 Migügtijc ajcxy, pen mbatpy tüg migüg huidibi jibic-huinma'n̄ ti ymimadägyii, miich ajcxy huidibi mimadacyp yi jibic-huinma'n̄ miid Dios ymic'ajt mbubéjtcixipy jada migüg, e co mbubéjtcixipy jada migüg, nigü jotmic mmigapx miid oy gapxy oy ayuc. Naygüend'adii ajcxy ci'm, ca'ydi jibic-huinma'n̄ xymimadaaccixy. ²Naybubéjtigix nidüg nidüg pinjaty ayo'n jotmay miid. Co jadu'n mdúngixipy, hue' anajty ajcxy mguydungixyp Cristo ycötujcin huidibi ti xymooyim ajt.

³Pen ji pin ñayjihuiyii amij agix etz chach naygömaya'ñyii ci'm co chach y'oyjäyity, ca' je' choobaady ma Dios yhuinduu. ⁴Jëbi nidüg nidüg jäy ñayjihui'ñybigyii nej chinäy yjugy'aty, pen oy o peni ca'y'oyity. Peni ycuychinaayb yajxon Dios ytiy'ajt oybi, jotcuje ñayjihuihuiyib je' ci'm e ca' huaad yajquixpïy chinaayin miid huingbi. ⁵Nidüg nidüg jäy ci'm chinaayin jëbi yajnicxy nej Dios jäygidägy. Ca' huaad ni'ijxtüdy nej ymigüg jibic-huinma'n miidty.

⁶Yi jäy ajcxy pinjaty ti ixpicy Dios y'ayuc ytiy'ajt, copicy co möhuipy tijaty yajmayajtpy je huindzin tiibi yaj'ixpiyiyii.

⁷Ix ajcxy ci'm mnayhuin'ingix com Dios ca' yi' ni pin huaad nixigy yajxigy. Com pen miich ajcxy jibic-huinma'n mdumyib, Dios xychaachtunip ajcxy. Pinjaty oybi tuumb, nañ ypaadipy oybi, e pinjaty jibicpi tumb, nañ jibicpi ypaadipy.

⁸Pinjaty jibic huinma'n tum jadu'n nej jibicpi tzachnijot'aty, co y'ögipy yi' y'alma ñicxip ayoodactuuby. Pinjaty cuydumb Dios ytiy'ajt jadu'n nej je Espiritu Santo huinma'n ymöyii, co y'ögipy yi' y'alma huingbi jugy'ajtin ypaadamyb huidibi nimina ycaacixy ycaatigooy huidibi je Espiritu Santo möhuib.

⁹Peni nduunim jabom jabom oy huinma'n ca' huaad ndzjipim, jëbi nmecxtujcim ixti cooni anajty nbaatim oybi ma Dios. E ca' huaad njotmetzciiyim. ¹⁰Tzoc oyjäy'ajtin tuunim ma nidüg'öciy jäy ajcxy, jadu'n nej Dios xyhuinma'nymooyim. Nigi tzoc pubejtim nmigügtijc huidibi mibijcp mijpidacp Cristo.

**Ane'min, capxhuijin etz capxpooocxin
huidibi cijxnip je necy**

¹¹Ijxcix huindicxcix jada letra mijjatypi huidibi iich ci'm njaayb, com ndzojcpyich co mnejhuiyigixipy nej yam nijayiygixy. ¹²Yi jäy ajcxy huidibi mibijcp co Cristo o'cy ma yi cruudz miid ajt nbocy ycxipi etz nañ jadu'n mijpidacp yi tiy'ajttihuii, hue' ajcxy tzach ñaygömayaanigixy ma yi judfojäy ajcxy, jigix ca' pin y'ixhuididiiyb ypahuididiiyb. ¹³Yi huidi ajcxy tzach mijpidacp tiy'ajttihuii, nañ ni ca' ajcxy cuydundäy tüg'öciy jada Dios ycötujcin je jecyip. Hue' yi' ajcxy tzojccixy co miich ajcxy myajtiy'ajttihuiip jigix ajcxy jëbi ñaygömáayigixy miid co miich ajcxy ti myajtiy'ajttiiygixy. ¹⁴Yi jäy ajcxy huidibi jim yaj'ixpijcp anii, ci'm ajcxy chach ñaygömayaanigixy. Per iich ca' jadu'n naygömaya'ñyijich miid huidibi ndumyibich huidibi nyaj'ixpijcpyich. Hue' janchtiy ngapxpadaamybich iich ajt nHuindzin Jesucristo ytiy'ajt, jadu'n nej yajcruudzpejti miid ajt nbocy ycxipi. Co ti nmibicyich Cristo Jesús, huin'ti ti n'ixmachich je naaxhuiñyäj yjibic-huinma'n. E paady cham ni nga'ocnijot'ajtnich yi jibic-huinma'n. ¹⁵Co nmibijcim Jesucristo, oy ixypiy ti nyajtiy'ajttiiyim o oy ixypiy ca' ti nyajtiy'ajttiiyim, ca' ma choobaady. Huidibi tzoubatp yi' je' co nmibijcim Jesucristo, etz co nmiid'ajtim jemybi jot huinma'n. ¹⁶Huen Dios xyajjotcugihuiipy etz

xypa'ayoohuipy, etz nañ jadu'n yajjotcugihuipy etz pa'ayoohuipy nidüg'óciy jäy huidijaty cuydumb Cristo ytiy'ajt, tüg'óciy Dios yjäy janchypi tiydudägypi.

¹⁷Jadu'n nej jadachambi, etz jadu'n nej xii tiempo jacmiimb jaccidaacp, ca' iich pin huaad xyjac'amayiyich, com nmiidich

je tiy'ajt ma nninixich jadu'n nej jäy ajcxy ti xyhueenduuñich ti xychaachytuuñich miid co ti nduuñich miid Jesucristo ycixpi.

¹⁸Migügtijc ajcxy, huen iich ajt nHuindzin Jesucristo tunipy nīgi may'ajt oy'ajt ma miich ajcxy. Jadu'n jada ngapxycíxyich. Amén.

EFESIOS

Yi Neczy Huidibi San Pablo Yajniguejx Je Mibijcpidijc Jim Efeso

1 Hich Pablo, Dios jadu'n tzojcp co Jesucristo ti xyajni'bi'cyich co n'apóstol'adipyich. Jada neczy cham nguejxypich jim Efeso ma yi jäy ajcxy huidibi Dios yjäy'ajtip, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ²Huen ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugihuij ajcxy.

Nej je Espíritu Santo conucxy Cristo yjäy

³Tzoc iibaatim capxpaatim Dios iich ajt nHuindzin Jesucristo yTeedy. Miid co nyajpaatim ma Cristo, paady Dios ti xyconuucxim miid tüg'óciy huidijaty tzomb tzajpjoty. ⁴Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuinduu huädz oy njot nhuinma'ñ, ca' ti bocy nmiid'ajtim. ⁵Miid co Dios ooy xychojcm xyjihuiiyim, paady ycixp yi' capxcödujcy jecy'ajty, ca'ni anajty naaxhuiñybi

yajcojy yaj'oyiy, co xycöbigaanim nejjihuiy yci'm y'ung. Co Dios jadu'n quejxy je Cristo ya naaxhuingíxy, chi yi' yaj'oyiy nej jëbi xycöbajcm nej yci'm y'ung, e jadu'n xymiid'adaanim tzajpjoty. Dios jadu'n ytuñ jadu'n nej yi' anajty tzocyin. ⁶Tzoc iibaatim capxpaatim Dios ooy miid co mijmay'ajt mij'oy'ajt tuuñ miid iich ajt ycixpi, co quejxy y'ung ya naaxhuiñ miid iich ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzocy jihuiy. ⁷Miid co Dios ooy xychojcm xyjihuiiyim paady ycixpi yi' y'ung ñi'py teemy yojcy co y'o'cy miid ajt nbocy ycixpi, ti ajt n'alma xyajnidzoocim etz nbocy ajt ti xyhuinmeeccim. Co jadu'n ytuuñ, chi Dios mijmay'ajt mij'oy'ajt tuuñ miid iich ajt ycixpi. ⁸Co Dios jadu'n mijmay'ajt mij'oy'ajt tuñ miid iich ajt ycixpi, ti xyajhuinjihuiiyim ti xyajnejhuiiyim yi ytiy'ajt yi yhuinma'ñ. ⁹Dios yjäygidacpy jadu'n co ti xyajnejhuiiyim nej anajty miidty capxcödujcy huidibi ca' pin jecy'ajty huinjihuiy. Nañ

jadu'n Dios ti xyajnejhuuiyim nej ti yhuinma'ñypidacy jecy'ajty nej ytuna'n anajty miid Cristo. ¹⁰Je huidibi Dios jecy'ajty ti yajnihuinmayiïy co tuna'n anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiïy anajty co pidäga'n tüg'óciy huidi yajpatp tzajpjoty etz tüg'óciy huidibi yajpatp ya naaxhuiñ ma tüg ane'min, e je Cristo je' ane'mamb nigohuajc'adamb tüg'óciy.

¹¹Tüg'óciy tijaty tuni yjajti jiiïy tzajpjoty etz ya naaxhuiñ Dios jayijp capxcöduj. Hich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jëbi nbaatim tüg'óciy huidibi Dios xymöhuaanim. E tüg'óciy jada nicxy yjaty tim jadu'n nej Dios jayijp capxcödujcy, e Dios ytumy b jadu'n nej yi' tzocy etz nej jäygidägy. ¹²Jadu'n Dios cuydumy b miid hich ajt ycixpi, huidibi jayijp ti nmibijcim ti nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios miid yi' ymij'ajtin etz yi' y'oy'ajtin ycixpi. ¹³Nañ jadu'n miich ajcxy co mmidooy je ayuc tiy'ajt nej jëbi m'alma ñidzögipy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihui'ñ ymic'ajt huidibi miich ajcxy miid ma mjot mhuinma'n, je' nidiy'ajt'ajtp co myajpaatcixy ma Dios. Jada je' je Espiritu Santo huidibi Dios y'ahuaniiy jecy'ajty co xymöhuaanim. ¹⁴Jada Dios yjihui'ñ ymic'ajt jada je' nidiy'ajt'ajtp

co nbadaanim it lugar ma Dios y'it. Dios xymöhuaanim it lugar ma yi' y'it co anajty xii tiempo yhuaad'ajtni huin'it Dios nihua'na'n yajnidzöga'n pinjaty yjäy'ajtip ajcxy. Jadu'n Dios tuna'n, jigix jëbi hich ajt n'iibaatim ngapxpaatim Dios miid y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cuje'ajt

¹⁵⁻¹⁶Com ti nnejhuuiyich jadu'n nej tiydudägy miich ajcxy ti mmibijccixy hich ajt nHuindzin Jesús, e nañ jadu'n ti nnejhuuiyich jadu'n nej mdzojccixy mjihuiiygixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidaacin ma Dios miid miich ajcxy ycixpi. ¹⁷Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuip ajcxy je huinma'n je ixpijcin huidibi je Espiritu Santo yejcpy, etz nañ jadu'n xyajnejhuuihuipy xyajhuinjhuuihuipy ajcxy jac'oy yi' y'ayuc, e tüg'óciy nej yi' ti ytuuñ. ¹⁸Dios nmibijctzooybich miid miich ajcxy ycixpi, co xyaj'aniiyip ajcxy mjot mhuinma'n miid yi' ytiy'ajt, jigix jëbi mnejhuuiyigixipy tijaty huidibi ajcxy m'ahuijxyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jëbi mnejhuuiyigixy nej ymijaty yjanchity je pidägy huidibi Dios yegamyb miid tüg'óciy ajcxy huidibi Dios yjäy'ajtip. ¹⁹⁻²⁰Dios nmibijctzooybich jigix jëbi ajcxy mnejhuuihuipy jadu'n nej Dios ymic'ajt miidity. Je' ymic'ajt ca'

ycixipy ytigoyipy, e ni pin ca quipxipy. Etz yi' ymic'ajt tumb ma iich ajt njot nhuinma'n nidüg nidüg co ajt nmibijcim. Dios ti xyajnejhuiyim yi' ymic'ajt huidibi ymiid may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jiby tzajpjoty. Yi' iñaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxyi miid Dios. ²¹Cristo jac mij'ane'min ymiid, jac mic'ajt miid, ca'ydi jacpinjaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cömay y'ity nigi, ca'ydi jac pin huidibi cham tzinaayb, etz huidibi jacjiini tzinähuaamni. ²²Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuüy Cristo niñhuäcpejtäy tüg'óciy ane'min. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc. ²³Je mibijcpidijc jadu'n nipaady nej Cristo ñiniex, paady ycixpi yi' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcixtaayb yajca'pxtaayb tüg'óciy tijaty ji ajtp.

Dios chojpy yjihuiyb jäy ajcxy, paady ñidzoocixy y'alma

2 Ca'ni miich anajty ajcxy mmibijccixy Cristo, ooy anajty mdundigoogixy miid Dios ytiy'ajt, ooy anajty ajcxy mbocymiidity, e jadu'n nipaady nej jihuüy ti m'o'ccixy miid mbocy ajcxy ycixpi etz Dios xyajjugypijccixy huiñjemy miid jemybi jugy'ajtin.

²Co ca'ni anajty miich ajcxy mgöbijccixy mmijpidaaccixy Cristo, ooy anajty mguydungixy naaxhuiñjäy ajcxy ytiy'ajt, etz nañ mgapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma yi jäy ajcxy yjot yhuinma'n huidibi ca' capxymidoogixy Dios.

³Ma je tiempo tiibi ñaxy, nañ jadu'n anajty ndzinaayim jadu'n nej yi jacjadyii naaxhuiñjäy ajcxy huidibi capxymidoob yi ca'oybi. Ngapxymidoohuim anajty nniniex chojcin. Ndundigooyim anajty miid ngi'mjot ngi'mhuinma'n. Nguipxyiyim anajty miid yi jacjadyii naaxhuiñjäy ajcxy huidibi Dios tzaachytunaanip miid ypocy ycixpi, etz nañ jadu'n nmihuaad'ajtim co Dios xychaachytuunim miid ajt nbocy ycixpi. ⁴⁻⁵Oy ixipy iich ajt mihuaadity tzaachypi miid ajt nbocy ycixpi, per Dios mij ooy ti xypa'ayoohuim, e mij ooy ti xychojcin ti xyjihuiyim, paady ycixp tuuñ may'ajt miid iich ajt ycixpi co yajjugypijcy je Cristo. E jadu'n quipxyi miid Jesucristo iich ajt nbaatim jemybi jugy'ajtin huidibi ca' ycixipy ytigoyipy ni mina. Jadu'n Dios may'ajt tuuñ miid iich ajt ycixpi co anajty nbadaanim o'cin miid ajt nbocy ycixpi. Miid co Dios may'ajt oy'ajt tuuñ miid miich ajcxy ycixpi, paady miich ajcxy ti mbatcixy jemybi jugy'ajtin huidibi ca' ycixipy ytigoyipy ni mina. ⁶Com jadu'n nipaady nej Dios xyajjugypijccim quipxy miid Jesucristo, paady ycixp Dios xymöhuaanim it

lugar jibby tzajpjoty quipxy miid Jesucristo. ⁷Jadu'n nej xii tiempo mimb cidacp Dios jadu'n oy tuñ jigix jëbi tiy'ajt nmïid'ajtim jadu'n nej Dios xychojcm xyjihuiiyim etz xypa'ayoohuim mijcajee, etz mijmay'ajt mij'oy'ajt tuun miid ñich ajt ycixpi co nyajpaatim ma Cristo. ⁸Miïd co Dios miich ajcxy ti xychojccixy ti xyjihuiiyigixy, paady ycixp yi m'alma ajcxy ti patcixy nidzoocin co ti mmïbijccixy Jesucristo. Ca' nmïnaanim co tijaty ti mdungixy, paady ycixp yi m'alma ajcxy ti patcixy nidzoocin. Hue'l janchtiy Dios ti xymooygixy ninigoob ajcxy m'alma ñidzoocin. ⁹Ca' nmïnaanim huin'it jay ajcxy y'alma nidzoocin paadip co oybi tungixy. Hue'l janchtiy Dios jadu'n ci'm ti yaj'oyiy ninigoob nej jay ajcxy jëbi patcixy y'alma ñidzoocin, jigix ca' pin jëbi huaad amij agix ñayjihuiiyii. ¹⁰Com Dios ci'm ti oyduñ ñich ajt njemybi tzinaayin jugy'ajtin miid je may'ajt huïdibi Cristo ytuun co y'o'cy miid ajt nbocy ycixpi. Jadu'n Dios tuun miid ñich ajt ycixpi, jigix jëbi nduunim oyjy'ajtin ma ajt ndzinaayin. Dios, jecy'ajty ca'ni naaxhuïnybi anajty chondacy, cojy macxy je tiy'ajt jadu'n nej yi' tzocy co nduunim oyjy'ajtin.

**Jotucj cham n'ijtim miid Dios,
com Cristo xyajpocyhuaatzim**

¹¹Jadu'n miich ajcxy ocjyamejtzcodii nej miich ajcxy anajty myajpatcixy co anajty ca'ni mmïbijccixy Jesucristo. Ca' miich anajty ajcxy mjudïojäyity, e ni ca' miich anajty ajcxy

myajtiy'ajttiigixy nej huaad mnyadïjigixy Dios yjy. Paady ycixp yi judïojäy ajcxy ymina'ñ co Dios je' yjy ajcxy, e miich ajcxy ca', miid yi'da'ajty co miich ajcxy ca' myajtiy'ajttiigixy. ¹²Co ca'ni anajty mmïbijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judïojäy xycöbijccixy, etz ni ca' anajty mbadaangixy huïdibi Dios y'ahuaniy ma yi judïojäy ajcxy, etz ni ca' anajty ti mjïjp'ijxcixy ma Dios, etz ni ca' miich anajty ajcxy myajpatcixy ma Dios. ¹³Jadachambi, miich ajcxy huïdibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo miid co yi' ñi'py teemy yojcy miid miich ajcxy mbocy ycixpi. ¹⁴Jesucristo ci'm yaj'oyiy je tzip je capxy nej anajty ñich ajcxy judïojäy etz miich ajcxy huïdibi ca' yjudïojäyity naymidzip'ajtim, e cham jotucj n'ijtim. Jesucristo ci'm yajtigoy je judïojäy ycötujcin huïdibi anajty tzipcoj capxycoj ma ñich ajcxy etz ma miich ajcxy. Jesucristo yajtügmuje judïojäy, etz huïd ca' yjudïojäyity. ¹⁵Jesús miid yci'm ninicx yajtigoy je jecy'ajtypi cötujcin co oy yaj'ögyii cruudzcíxy. Co Jesús y'o'cy, huin'it yajtügmuje judïojäy etz huïdibi ca' yjudïojäyity. Huin'it oy yaj'ahuimbity tügpicy jäy jemybi huïdibi Dios yjy'ajtip. E jadu'n ajcxy yajcixy yajmay je tzip capxy. ¹⁶Co Cristo oy yaj'ögyii cruudzcíxy, huin'it yajcixy yajnaxy je tzip capxy jadu'n nej yi judïojäy anajty midzip'adyii yi' ajcxy huïdibi ca' yjudïojäyity. Etz nañ huin'it Cristo yajtügmuje yi judïojäy

miid huidibi ca' yjudíojäyity.
Paady ycixp Dios ycóbigañyii
judíojäy ajcxy etz huidibi ajcxy ca'
yjudíojäyity aguic jotcuje.

¹⁷Je Cristo miin anajty ya
naaxhuiñ etz capxhuäcxy oybi
tiy'ajt jadu'n nej jébi ajt nbaatim
jotcuje'ajtin ma Dios. Ycapxhuäcxy
anajty ma miich ajcxy huidibi ca'
yjudíojäyity, huidibi ca' anajty
miidity Dios ytiy'ajt. Etz nañ
jadu'n ycapxhuäcxy Dios ytiy'ajt
anajty ma iich ajcxy judíojäy
huidibi jamiid anajty Dios ytiy'ajt.

¹⁸Miid co Cristo may'ajt ti tuuñ
co xy'adigiyim xyjottigiyim Dios
yjihuñ ymic'ajt, paady ycixp
nidüg'óciy iich ajt nyajpaatim ma
Dios jadu'n nej tügpicy jäy, tanto
judíojäy etz nañ jadu'n huidibi ca'
yjudíojäyity. ¹⁹Paady ycixp miich
ajcxy jadachambi myajpaady ma
Dios. Jadu'n miich ajcxy myajpaady
ma Dios tim jadu'n nej je jäy ajcxy
huidibi tzinaayb ma yci'mgajp, ca'
yjadu'nity nej adzinaaybi ajcxy.
Paady ycixp tú'ciy miich ajcxy
mnyagomájtzigixy ma Dios miid
judíojäy ajcxy. Jadu'n miich ajcxy
etz judíojäy ajcxy nipaady cham nej
jihuiy ajcxy mdügjuugy mdügmüg.

²⁰Miich ajcxy ti mmijpidaaccixy
je tiy'ajt huidibi Jesús y'apóstol
ajcxy ti capxhuäcxy etz je tiy'ajt
huidibi Dios y'ayucnajtzcaxiiby
ti capxhuäcxcixy. E yi' ajcxy
ytiy'ajt jadu'n nipaady nej poch'ijx
ma chondägy. E Jesucristo
yi' jédu'n yajpatp nej tüg tzaa
huidibi jaccopicyip ma je poch'ijx
chondägy. ²¹Dios jadachambi
tiempo ycojyp ymacxyp jadügpicy
jäy huidibi yjäy'adaanip huidibi

tügjijp mijpidaaccixy Cristo,
huidibi tú'ciy ijtcixyp miid
Cristo. Jadu'n jadayaabi tügpicy
jäy nipatcixy nej tüg tijc ma jäy
ajcxy Dios ojadajtcixy. ²²Miich
ajcxy myajpatp ma Cristo quipxyi
miid nidüg'óciy yi mayjay ajcxy
huidibi mijpidacp Dios etz huidijaty
mi'ijtp je Espíritu Santo ma ajcxy
yjot yhuinma'ñ, jadu'n miich
ajcxy mjygy'ajtin nipaady nej Dios
chinaydac.

**Pablo yi' je' miid cötujcin
co capxhuäcxy Dios y'ayuc
ma pin ca' yjudíojäyity**

3 Hich Pablo, nyajpatpich
pujxtigoty miid co nduuñich
ma Jesucristo ytung ma miich
ajcxy huidibi ca' yjudíojäyity.
Paady ycixp nmibijctzooybich
Dios miid miich ajcxy m'oy'ajtin
ycixpi. ²Mnejhuiyb ajcxy com
Dios mijmay'ajt ti tuuñ miid
miich ajcxy ycixpi, paady yi' ti
xyajniibicyich ngapxhuäcxbich
ma miich ajcxy yi' y'ayuc ytiy'ajt.
³Dios ti xyajnejhuiyich yi' ytiy'ajt
huidibi jecy'ajty yüch y'ijtp. Jada
tiy'ajt yinjaty hueeñjaty iich miich
ajcxy ti nnijayiygixy jayijp'aty. ⁴Co
miich je necy mgapxip, huin'it ajcxy
mnejhuihuipy co iich nnejhuiyich
je Cristo ytiy'ajt huidibi ijtp yüch.
⁵Jada tiy'ajt maabi Jesucristo, Dios
ca' ni pin yajnejhuiy jecy'ajty.
Jadachambi xii tiempo Dios miid je
Espíritu Santo yajnejhuiy Jesucristo
ytiy'ajt je Jesús y'apóstoles ajcxy
etz je Dios y'ayuc najtzcaxiiby
ajcxy. ⁶Jada je' je tiy'ajt huidibi
jecy'ajty yüch anajty ijtp, co yi'
jäy ajcxy huidibi ca' yjudíojäyity

y padamyb ajcxy Dios y'oy'ajtin quipxyi miid yi judíoJay ajcxy, etz nañ jadu'n yi' ajcxy yajpaady ma Dios tú'ciy miid yi judíoJay ajcxy, etz nañ jadu'n yi' ajcxy padaangixy oybi huidibi Dios jecy'ajty yajnimay yi judíoJay co möhuaangixy pinjaty mibijccixp Jesucristo.

⁷Dios mijmay'ajt ti tuñ miid iich ninigoob co ti xyajñibicyich jada tung, e xymöyich mic'ajt co ngapxhuäcxibich Jesucristo y'ayuc ytiy'ajt oybi ma yi Jay ajcxy huidibi ca' yjudíoJayity. ⁸Iich jactimmudzip ma yi maybi mibijcpidijc ca'ydí jacpin, per ca' ñejity. Dios may'ajt oy'ajt ti tuñ ma iich, e ti xypidägyich ma yi' ytung co ngapxhuäcxych jada oybi tiy'ajt ma jacjadyi Jay ajcxy jigix jëbi ajcxy patcixy ma Cristo Jesús mij'oy'ajtin, huidibi ca' pin huinjihuüy jadu'ñyi ymijity. ⁹Dios ti xyajñibicyich co ngapxtäcxibich ma tüg'óciy Jay ajcxy je Dios y'ayuc ytiy'ajt oybi huidibi yüch anajty ijtp. Yi' je' je ayuc huidibi Dios ti cojy ti macxy jecy'ajty, jadu'n nej yi' tunañ je oybi miid tüg'óciy Jay ajcxy. Yi' je' Dios huidibi ti yajcojtäy tüg'óciy tijaty ya naaxhuñ etz jiiby tzajpjoty yajpatp. ¹⁰Jadu'n Dios capxcödujcy co je tzajpjoty tzinaaybi ajcxy huidibi ane'min etz mic'ajt miid, tiy'ajt padaangixy ma yi mibijcpidijc jadu'n nej Dios mijhuinma'ñ canaagnax tuñ miid Jay ajcxy nidüg'óciy huidibi mibijccixp Cristo Jesús. ¹¹Jadu'n Dios ti cuyduñ miid ajt nHuindzin Jesucristo jadu'n nej jecy'ajty capxcödujcy. ¹²Miid co nyajpaatim ma Jesucristo paady ycixp agujc

jotcujc nmigapxim nmihuingonim Dios. Miid co nmibijcim Jesucristo paady ca' ndzigiiyim ndzo'yduunim ma Dios yhuinduu. ¹³Paady ycixp may'ajt nbijctzooyich miid miich ajcxy co ca' ñigi m'ixtigihuäccixy ma ajcxy mmibijcin. Etz ca'ajcxy xyñidajípy xyñimayípyich co tzaachypi nminaxyich nyajnaxyich miid miich ajcxy ycixpi. Com miid co ti nyajnaxyich tzaachypi miid miich ajcxy ycixpi, paady jëbi miich ajcxy oy'ajtin mbatcixy.

Cristo chojcpy yjihuiyb Jay ajcxy

¹⁴Com Dios mijmay'ajt ti tuñ miid judíoJay etz miid huidibi ca' yjudíoJayity, paady njatyhuingoxtinaaybich Dios, iich ajt nHuindzin Jesucristo yTeedy, e nmibijctzooybich Dios miid miich ajcxy ycixpi. ¹⁵Tüg'óciy tzajpjoty tzinaayb etz tüg'óciy naaxhuñJay hidibi mibijccixp Dios, jëbi nidüg'óciy yminaangixy: “Dios iich ajt nDeedy.” ¹⁶Paady nmibijctzooybich Dios Teedy miid miich ajcxy ycixpi, co Dios je hidibi mic'ajt etz oy'ajt ymiid mijcajee, co xymöhuipy mic'ajt ma ajcxy mmibijcin miid yi' yjihui'ñ ymic'ajt hidibi yajpatp ma ajcxy mjot mhuinma'ñ. ¹⁷Dios nmibijctzooybich miid miich ajcxy ycixpi co Cristo ymic'ajt yajpaadip ma miich ajcxy mjot mhuinma'ñ miid co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'ñ, jigix jëbi miich ajcxy hidibi mmibijccixp Cristo, jëbi mdzójcixipy mjihuüiygixipy mijcajee huinixii huinitempo je mibijcpidijc etz tüg'óciy

jacjadyii jäy. ¹⁸Nañ jadu'n Dios nmibijctzooybich miid miich ajcxy ycixpi co miich ajcxy etz tüg'óciy mibijcpidijc mnejhuüiygixipy jadu'n nej Cristo xychojcim xyjihuiiyim mijcajee. E yi' chojcin yjihuiiyin jadu'n nipaady nej tüg tüjc huidibi jac cixip jac mijip, jac yooñip jac ciicyip ca'ydí ni huídí tüjc. ¹⁹Nmibijctzooybich Dios co xyajnejhuüiygixipy xyajhuinjihuüiygixipy nej Cristo xychojcim xyjihuiiyim mijcajee nidüg'óciy iich ajt, ixti ca' huaad nhuinjihuídaayim jadu'n nej Cristo xychachchojxim xychachjihuiiyim. Nmibijctzooybich Dios co xypubéjtcixip, ixti mabaad mmiid'ajttaaygixy Dios y'oy'ajtin.

²⁰Jadachambi, cömay Dios y'ity huídibi mic'ajt miid, etz huídí yejcp mijcajee jac'anaxy ca'ydí nej njapjctzoohuim etz nej njahuinmaayim, miid je ymic'ajt ycixpi huídí tumb ma iich ajt. ²¹Huen tüg'óciy mibijcpidijc ajcxy jäymejtzcixy ojadájtciy Dios etz Cristo Jesús jabom jabom huinixii huinitiempo. Jadu'n jada. Amén.

**Tú'ciy n'ijtim miid
Espíritu Santo ycixpi**

4 Nyajpatpich pujxtigoty miid ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzináaygixipy jadu'n nej mihuaad jäy chinaaygixy huídibi Dios ti yhuin'fjixigixy, com Dios miich ajcxy ti xyhuin'ljxcixy. ²Pidaaccix mjot mhuinmañ yung naxy, nicy xeemy jäy'ajtcixy, naymecxtújcigix miñ xyipy, naymi'oyjäy'ájtigixy,

jigix ñiguëxigip co mnaychójcigixy mnayjihuiiyigixy miñ xyipy.

³Miid'adipy ajcxy mjot mhuinmañ tú'ciy miid je Espiritu Santo ypubejtin jigix jëbi mdzinaaygixy jotcujc ca' ma tzip capxy.

⁴Nidüg'óciy mibijcpidijc tú'ciy yajpatcixy ma Cristo etz tügpajc Espiritu Santo huídibi yajpaady ma ajt njot nhuinmañ. Dios ti xyhuin'ljxim, jigix jëbi quipxyjaty njjip'ijxtaayim je oybi huídibi nbadaanim jilby tzajpjoty. ⁵Ji yajpaady tügpajc ajt nHuindzin Jesucristo, etz tügpajc je ayuc tiy'ajt huídibi jëbi nmijpidaacim, etz tügpajc nniibejtim miid Jesucristo yxi. ⁶Ji yajpaady tügpajc Dios Teedy huídibi cuendi'ajtp yajtzinaayb nidüg'óciy mibijcpidijc. Yi' je' huídibi nihuindzin'ajttaayb. Yi' je' huídibi may'ajt tumb miid nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinmañ.

⁷Dios may'ajt oy'ajt ti tuñ miid nidüg nidüg iich ajt co Cristo xymooyim mic'ajt, jigix jëbi nidüg nidüg tuunipy Dios ytung nej ypadyii. ⁸Paady ycixp jaybety ymiñ ma Dios jadu'n yminañ:

Co Cristo ypättigiyy tzajpjoty, chi ymiidpättigiyy may machjäy, e nañ jadu'n Cristo moy jäy ajcxy mic'ajt (dones).

⁹¿Nej co jadu'n Dios y'ayuc yminañ co je Cristo ypättigiyy tzajpjoty? Hue' je' jadu'n yminañ miid co je Cristo jayijp ycidacy etz ooy ayooy ya naaxhuüingíxy. ¹⁰Je Cristo yi' je' huídibi cidaac ya naaxhuüiñ chooñ tzajpjoty, nañ jadu'n ypättigiyy jadüg'oc tzajpjoty

jactim'o'c'am. E yi' je' ymic'ajt yajpatp ma tüg'óciy huidijaty jiiyby tzajpjoty etz tüg'óciy huidijaty ya naaxhuiñ. ¹¹ Je Cristo ymooygixyp nidüg nidüg yi' ytumbi mic'ajt. Nijējity mooygixy mic'ajt jēbi nidiy'ajt'ájtigixy co je' je' je Cristo. Nijējity mooygixy mic'ajt jēbi najtzcaxhiygixy Dios y'ayuc. Nijējity mooygixy mic'ajt jēbi capxhuäxcixy yi' y'ayuc. Nijējity mooygixy mic'ajt jēbi capxhuijicixy yi mibijcpidijc miid Dios ytiy'ajt. Nijējity mooygixy mic'ajt jēbi yaj'ixpijccixy Dios ytiy'ajt. ¹² E jadu'n je Cristo mic'ajt moydaaygixy yi' yjäy, e jadu'n yajni'ixiydaaygixy miid ytung ycixpi. E miid yi' ajcxy ytung yjacuyjcpedipy yi mibijcpidijc y'ixpijcin, ixti mabaad jac miid'adipy ajcxy Cristo y'oy'ajtin. ¹³ Jadu'n Cristo mic'ajt xymooyim, jigix jēbi nidüg'óciy iich ajt ytügiyim nmibijcin, etz nañ jadu'n quipxyjaty n'ixpijctaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinma'ñ, nmi'ijtim Jesucristo ytiy'ajt cixy ca'pxy. ¹⁴ Ca' n'idaanim miid ajt nhuinma'ñ nej pi'ctijc yhuinma'ñ ymiidity. Je pi'ctijc ajcxy janam jadojic yhuinma'ñ ytigajtcixy. Jadu'n ajcxy nipaady nej je miy huidibi je poj yajpojmiy yajpojxiy. Co cixy ca'pxy nmiid'ajtim Cristo ytiy'ajt, ca' pinjaty xyhuin'iinim miid huing ayuc oymibijcnip huidibi ca' yjanchity. ¹⁵ Hue' janchtiy ngapxim je tiy'ajt tiybi miid tzojcin jihuiyin, jaydēbi njacyeecom ajt nmibijcin etz njacnejhuiyim tüg'óciy Cristo ytiy'ajt jadu'n nej ytuuñ

ya naaxhuiñ, je Cristo huidibi nigohuajc'ajtp tüg'óciy mibijcpidijc. ¹⁶ Cristo etz je mibijcpidijc nipatp nej tüg ninicx. Cristo ñipatp nej je ninicx cohuajc huidibi ane'mb etz mic'ajt mooyb je ninicx. Etz yi' mibijcpidijc ñipatp ajcxy nej je ninicx huidibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huidibi yajtügiy yajcxy ymibijcin etz nañ jadu'n yaj'ijtigixy tüg'mucy. Nidüg nidüg mibijcpi ymic'ajt patcixy ma Cristo, jēbi tungixy Cristo ytung nej ypadyii. E jadu'n yeecixy nidüg'óciy ma ajcxy ymibijcin, etz nañ jadu'n yajyeecixy chojcin yjihuiyin miid ymiigügtijc.

Je jemybi jugy'ajt huidibi nbaatim ma Cristo

¹⁷ Paady ycixp nnimäyich miich ajcxy etz nyajni'bijccixy miid ajt nhuindzin Jesucristo ycötujcin, co ca' huaad mdungixy loci huinma'ñ huidibi ca' choubaady ma Dios, jadu'n nej jacjadyii jäy ytungixy huidibi ca' mijpidaaccixy ajt nHuindzin Jesucristo. ¹⁸ Ca' huaad mdzinaaygixy jadu'n nej jacjadyii jäy ajcxy chinäy miid loci huinma'ñ. Ca' ajcxy yajpaady ma Dios, je huidibi jugy'ajtin yejcp huinxiibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. ¹⁹ Ca' ajcxy ti tzo'ydu'n jihuiy co ytundigooygixy. Ooy ajcxy minicxnajxcixy yi jibic-huinma'ñ. Ooy ajcxy nijot'ajtcixy mijcajee co túngixipy tüg'óciy tijaty jibic-huinma'ñ. ²⁰ Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy

Cristo ytiy'ajt, ²¹ pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huidibi yajpatp ma Cristo. ²² Ti miich ajcxy m'ixpicy co copicy m'ixmájtzcixipy yi jibic-huinma'n nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy miid je jibicpi huidibi anajty ajcxy mnijot'ajtcixyp, ci'm anajty mnayhuin'finigixy. ²³ Ixmajtcix jibicjot jibic-huinma'n. Pidaaccix mjot mhuinma'n co mguydunaangixy Cristo ytiy'ajt jemybi. ²⁴ Miid'ajtcix jemybi jot jemybi huinma'n com Dios ti yajtigajch huinjemy ajcxy mjot mhuinma'n miid tudägy'ajtin etz huädz'ajtin.

²⁵ Paady ycixp ca'huaad m'iindaaccixy, nidüg nidüg cápxcix huidibi janchip miid migügtijc, miid co quipxyjaty nyajpaatim ma Jesucristo.

²⁶ Pen miich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäydigooygixipy yi mjotmädi jayijp ca'ni anajty xii ycidacyñi. ²⁷ Ca' mnayyécigixy ma je mujcu' co je mujcu' xymimadägiy.

²⁸ Yi jäy ajcxy huidibi meetzcixp, huen ixmajtcixy meedzi, etz ijxtähuipy ytung. Co ytunipy ma ci'mdung jëbi pubedipy ajcxy ymigügtijc huidibi yajmayajtcixp tijaty.

²⁹ Ca' mgápxcixipy jibic ayuc. Cápxcix oy ayuc huidibi jëbi migüg ajcxy jäygiidaaccixy, huidibi pubejtp etz yajyeegy je mibijcin,

huidibi yejcp oy'ajtin ma pin ajcxy amido'ijtp. ³⁰ Ca' huaad mgapxcixy mmiydaaccixy ayuc huidibi yajjotmaybijcp je Espiritu Santo huidibi Dios yje'ajtpy. Je Espiritu Santo huidibi miich ajcxy miid ma mjot mhuinma'n, yi' je' huidibi tiy'ajt yejcp co miich ajcxy Dios yjäy'ájtigixy, co anajty Cristo ymiñ ya naaxhuin' jadüg'oc huin'it mbadaangixy jugy'ajtin etz tzinaayin huidibi ca' ycixipy ytigoyípy ni mina.

³¹ Yajqueeccix yi jibicpi ma ajcxy mjot mhuinma'n, jadu'n nej co mjot mhuinma'n ta'm mjihuiygixy, jadu'n nej co tzojc mjotma'tcootcixy, jadu'n nej co mnaymijotmá'tigixy, jadu'n nej co mnayhuin'ójiigixy nayijp'ójiigixy. Ca' huaad mmigüg mnigapxcixy mni'ojiygixy. Ca' jibicpi mnijot'ajt'adiitzcixy miid ajcxy mmigüg ycixpi. ³² Hue' janchtiy oybi mhuinmáaygixipy miid mmigüg ajcxy ycixpi. Nayba'ayóohuigixy nidüg nidüg. Nayméecxigix nidüg nidüg. Com nañ jadu'n Dios ti huinmecxy miich ajcxy mbocy miid co myajpatcixy ma Cristo.

Nej jëbi chinaaygixy yi Dios yjäy ajcxy

5 Com miich ajcxy ñipatpy nejihuiy Dios y'ung'ájtigixy, e Dios ooy xychojccixy xyjihuiygixy, paady copicy naychójcigixy nayjihuiygixy miñ xyipy, jadu'n nej Dios ti xychojccixy ti xyjihuiygixy. ² Jabom jabom ma mdzinaayin naychójcigix nayjihuiygixy nidüg nidüg, tim jadu'n nej Cristo xychojcin

xyjihuiyim, e yjugy'ajt yejcy miid
ajt nbocy ycixpi, e jadu'n Dios
jäygidacy nej Cristo ytuñ.

³Miid co miich ajcxy Dios
xyjäy'ájtigixy, paady tzinaaygixy
miid huadz mjot mhuinma'ñ.
Ca' huaad m'oc'iibáatcixyñi
m'occapxpáatcixyñi yi töxyjäy
migapxtigoyii, etz yi jibic ayuc
capxii, yi jibic-huinma'ñ nijot'adii
etz yi meen adzogii. ⁴Miid co
mDios miich ajcxy xyjäy'ajtp,
paady ycixp ca' huaad mgápxcixipy
ayuc huidibi tzo'ydu'n yejc, ni
ca' huaad mgápxcixipy huidi ca'
y'oyjäygidacnity, etz ni ca' huaad
mguxiiccixy m'aniidaaccixy, com yi
jibic ayuc ca' Dios jäygidägy. Tzoc
yajnajxim jäygidacn ma Dios
com Dios ti xyajhuaatzim ajt njot
nhuinma'ñ. ⁵Janch tiy'ajt jada co
pinjaty tundigooyb miid huingbi
töxyjäy, pinjaty jibic-huinma'ñ
miid, ca' ajcxy padaangixy
pidägy etz oy'ajtin ma Cristo
etz ma Dios y'ane'min. Pinjaty
meen adzojcp, Dios ca' tzocy, tim
jadu'n nej yi' ca' tzocy pinjaty
ojadajtp tzaadzech etz quipychech.
⁶Ca' mnayyéjcgixy co jäy ajcxy
xyhuin'íngixipy miid ayuc huidibi
ca' ytiy'ajtity ca'p choubaady.
Miid co jäy ajcxy capxcixy ayuc
huidibi ca' ytiy'ajtity, paady ycixpi
Dios tzaachytuna'ñ tüg'óciy jäy
ajcxy huidibi capxycömidodacp
yi' y'ayuc. ⁷Ca' huaad miich ajcxy
mnaymigüg'ájtigixy, ca' miid
mnayyöymújcgixy yi jadu'mbi jäy
ajcxy huidibi ca' capxymidoogixy
Dios.

⁸Jayijp ca'ni anajty mmibijccixy
Cristo, ca'ni anajty Cristo ytiy'ajt

ajcxy mnejhuiy, e jadu'n nipaady
anajty nej jihuüy myajpaady
ajcxy agootztuum. Jadachambi
mnejhuiygixyp Cristo ytiy'ajt,
e jadu'n nipaady nejjihuüy
mdzinaaygixy ma tüg tiicxin.
Paady ycixp jatyim cuydungixyp
Cristo ytiy'ajt ma yi mdzinaayin
mjogy'ajtin ajcxy, jadu'n nej jëbi
huaad quëxigy co mmibijccixy
Cristo. ⁹Co nmiid'ajtim Cristo
ytiy'ajt, chi nduunim huidibi
y'oyip, huidibi tudägyip, huidibi
tiy'ajtip. ¹⁰Ixpjccix je tiy'ajt huidibi
Dios yjäygidacpy. ¹¹Ca' miich
ajcxy mnaymigüg'ájtigixy miid
yi jäy ajcxy huidibi yajpatcixp
agootztuum, huidibi tungixy
huidibi Dios ca' jäygidägy. Miich
ajcxy capxhuijcix miid Dios ytiy'ajt
yi' ajcxy huidibi agootztuum
tzinaayb. ¹²Tzo'yduunim ajt co
jay nigapxcixy nimiydaaccixy
je jibicpi huidibi ajcxy ytummyb
ayüch ameech. ¹³Co n'ixquixim yi
jadu'mbi jäy ajcxy ayuc miid Dios
y'ayuc, chi niguëxigy pen janch
tiy'ajt o pen ca' ytiy'ajtity, jadu'n
nipaady nej ti nayjpidzimim je
ajcxy ayuc ma yi agootztuum, etz
nbidaacim ma yi tiicxin. ¹⁴Paady
ycixpi Dios y'ayuc jadu'n yminañ:
Mäyhuijip miich ajcxy huidibi
jadu'n nipatp nejjihuüy
mdzachmaagixyp. Jugypijccix
miich ajcxy huidibi jadu'n
nipaady nejjihuüy ti m'öccixy.
Cristo xycodíicxixipy miid yi'
ytiy'ajt.

¹⁵Paady naygüend'ájtigixy
huidibi tiy'ajt yajtungixp ma yi
chinaayin. Tzinaaygix jadu'n
nejjihuüy mnejhuiygixy Cristo

ytiy'ajt, e ca' mdzinaaygixy jadu'n nej huidibi ajcxy ca' nejjihuiyigixy Cristo ytiy'ajt. ¹⁶Ni'ixi'ijtcix jabom jabom jëbi mguydungixy Cristo ytiy'ajt. Jadachambi xii tiempo mayjäy ytundigooygixy miid Cristo ytiy'ajt. ¹⁷Ca' loci huinma'n myajtungixy, per nejhuiyigixyp nej Dios tzocy co mdúngixipy. ¹⁸Ca' huaad m'lijtcixy amügy jäy, com yi jocniï xyajñcxcixipy ayo'nduum. Niği oy m'lijtcixy Dios yjihu'iñ ymic'ajt may'amy ma ajcxy mjot mhuinma'n. ¹⁹Naymigápxigixy miñ xyipy miid yi salmo ayuc, miid yi himnos. Huin'igix Dios miid je iy huidibi je Espíritu Santo xymooygixyp. Huin'igix etz ojadajtcix Dios cixy jot huinijot. ²⁰Jatyim yajnajxcixy jabom jabom jäy gidaacin ma ajt nDios Teedy ma ajt nHuindzin Jesús yxi, miid tüg'óciy ycipi nej ndunim n'ayoohuim.

**Nej huaad chinaaygixy
pinjaty picychinaaygixy**

²¹Miid co miich ajcxy mhuindzigiy Dios, paady ycixp miich ajcxy mnayajmij'ajtigixy mnaygapxymidóohuigixy miñ xyipy.

²²Miich ajcxy töxyjäydijc yajmij'ajtcix capxymidoogix yi mnäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo. ²³Com je töxyjäy näy nigohuajc'ajtp ma ytöxyijc ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huidibi nihuänamb yajnödögamb yi mibijcpidijc. ²⁴Tim jadu'n nej yi

mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidóogixipy yi näy ajcxy.

²⁵Nañ jadu'n tzocy co je yëydijc huen tzocy jihuiy ytöxyijc, tim jadu'n nej Cristo tzocy jihuiy yi mibijcpidijc, e paady ycixp yejc yi' yjugy'ajtin miid yi' ajcxy ycixpi. ²⁶Cristo yejc yjugy'ajtin miid je mibijcpidijc ycixpi, jigix jëbi huinmecxy ajcxy ypocy, yajhuaatzip ajcxy yjot yhuinma'n. Cristo yajhuaatzi yi mibijcpidijc ajcxy yjot yhuinma'n miid yi'y'ayuc etz co niibejt ajcxy miid niï. ²⁷Jadu'n Cristo yajhuaäch yi mibijcpidijc ajcxy yjot yhuinma'n, jigix jëbi ajcxy nayguëxigiiyb ma yi' yhuinduu miid huädz yjot yhuinma'n. Je mibijcpidijc ajcxy nipaady nej tüg nijen huidibi huädzip, ca' ma ytiy ymächity. ²⁸Jadu'n tzocy co je yëydijc huen tzocy jihuiy ytöxyijc tim jadu'n nej ci'm naychogyii. Yi yëydijc huidibi tzojcp jihuiyb ytöxyijc nañ jadu'n ci'm näy chogyii. ²⁹Ca' ji ni pin huidibi ca' näy chogyii ci'm. Hue' janchtiy ycuend'ajtpy etz yajcüxyii yajpedyii yci'm ninicx, tim jadu'n nej jäy ajcxy cuend'ajtcixy yci'm ñinicx nañ tim jadu'n Cristo ycuend'ajtpy yi mibijcpidijc. ³⁰Jadu'n Cristo cuend'ajtpy yi' yjäy, com jadu'n ajcxy nipaady nej yi' ñinicx. ³¹Com copicy je yëydijc tzogíp jihuihuip ytöxyijc jadu'n nej Cristo tzocy jihuiy yi mibijcpidijc. Paady ycixp je yëydijc ixmadzipy ytaj yteedy, e ypudigihuipy ytöxyijc, e jadu'n ajcxy chinahuipy nej jihuiy ytügpaicity. ³²Ooy

chachmijhuinma'nñity jada tiy'ajt huidibi yüch anajty ijtp, e yi' iich jadu'n tijpy yi Cristo etz je mibijcpidijc. ³³Cuendipijccix jada tiy'ajt co nidüg nidüg miich yëydijctijc ajcxy huidibi pijccixp copicy mdzogipy mjihuïhuipy ajcxy mdöxyijc, tim jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adipy nãy.

6 Pi'ctijc ajcxy huidibi mibijcp Jesucristo, copicy mgapxymidoohuipy ajcxy mdaj mdeedy, com tiy'ajt jadu'n. ²Yi Dios ycötujcin huidibi minaamb: "Yajmij'ajtcix mdaj mdeedy", yi' ooy ytimycopicyity. Nañ jadu'n co nguuyduunim jada cötujcin, huin'it Dios jecy xyajtzinaayim. ³Co miich ajcxy jadu'n myajmij'adipy mdaj mdeedy, huin'it Dios xymöhuipy ajcxy jotcujc'ajtin, e nañ jadu'n xyajtzinaaygixipy jecy ya naaxhuin.

⁴E miich ajcxy huidibi ungedeedy'ajtcixp, ca' nigoo myajjotma'tcotcixy yi m'ung ajcxy. Ane'mgix yajyeccix yi m'ung ajcxy miid Dios y'ayuc ytiy'ajt, jaydëbi capxymidóogixipy ajcxy Dios.

⁵Miich ajcxy huidibi tumbi'ajtp ya naaxhuin, capxymidoogix yi mhuindzin ajcxy, etz tungix miid tudägy'ajtin, etz yajmij'ajtcix etz tzigiiygix. Tim jadu'n nej jihuïy mgapxymidoogixy yi mHuindzin Jesucristo.

⁶Tungix yajxon miid ajcxy mhuindzin. Ca' janch xypaat oy mic mduungixy co ajcxy mhuindzin jim xyhuindiicxcixy, e chi co je' yjihuäcni, chi nigoo mhuäccixni

mdinaaygixni. Tungix jadu'n nej huaad jäy ytuungixy yi huidibi mijpidaaccixp Jesucristo. Tungix cixyjot huinijot jadu'n nej Dios tzocy mdúngxixpy.

⁷Tumbidijc ajcxy, tungix mdung cixyjot huinijot, tim jadu'n nej jihuïy mdungixy je Huindzin Jesucristo ytung, e ca' yjäydungity.

⁸Mnejhuïiyb miich ajcxy co ajt nHuindzin Jesucristo oybi möhuañ nidüg nidüg jadu'n nej ti ytuuñ, ca' ñejity pen yci'mdung ytumyb, o pen ytumb miid tüg huindzin.

⁹Miich ajcxy huidibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigiigixipy ca' mdzaachytúngxixpy. Ajihuïiyigixy co miich ajcxy etz nañ jadu'n mdumbi ajcxy miid ajcxy mHuindzin tzajpjoty, e yi mHuindzin tzajpjoty quipxyjaty tiyduna'n nidüg'óciy miich ajcxy.

Je mic'ajt huidibi je mibijcpidijc ajcxy ypatcixyp miid Dios yjihui'n

¹⁰Jadügnax, migügtijc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt miidity, paady jëbi miich ajcxy mbatcixy yi mmic'ajtin ma yi'. ¹¹Naygohuaanigixy miich ajcxy ma je mujcu' miid tüg'óciy tiy'ajt huidibi Dios xymooyim, huidi miid naygohuaanim ma je mujcu', e jadu'n ca'ydi je mujcu' xymimadaacim miid anii. Jadu'n Dios ytiy'ajt nipaady nej tujt etz pujxnijen huidibi soldados ajcxy miid naygohuaangixy tzipjoty. ¹²Hue' janchtiy xymidzip'ajtim

poj naaxhuñ, ca'oybi, mujcu'dijc, etz tüg'óciy mic'ajt miidpi huidibi midzip'ajtp Dios ya naaxhuñ etz jiiby tzajpjoty, ca'p iich ajt nmidzip'ajtim naaxhuñjáy. ¹³Paady ycixp yajtúngixy tüg'óciy mic'ajt etz tiy'ajt huidibi Dios ti xymooygixy, jigix jébi mmimadaaccixy je ca'oybi co anajty xyajtundigoyaangixy. E jadu'n jébi mimadaaccixy je ca'oybi miid ajcxy mmibijcin. E co anajty ti mmimadaactaaygixy, huin'it m'íjtcixipy mic ma ajcxy mmibijcin. ¹⁴Ca' m'ixtigihuáccix ma ajcxy yi mmibijcin. Nayñ'ixíiyigix miid Dios ytiy'ajt, jadu'n nej jáy ajcxy ñayhuíndádzigixy co ytunaangixy. Nayñ'ixíiyigix tim jadu'n nej soldados ajcxy ñayñ'ixíiyigixy miid pujx nijen ma caach co chiptunaangixy. ¹⁵Nayñ'ixíiyigix miid Dios y'ayuc, jigix jébi ajcxy nicxy mgapxhuácxí Dios y'ayuc huidibi jotcuje'ajtin yejcp. Co jadu'n mdúngixipy, jadu'n nibaadip tim jadu'n nej soldados ajcxy ñayñ'ixíiyigixy co yajtigiigixy yzapato co ytüyöyaangixy. ¹⁶Yí' huidibi jac copicyip ca'ydi jac ni ti, mibijccix tiydudägy Jesucristo. Miid ajcxy yi mmibijcin jébi mnaygohuáanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygohuáanigix ma je tip huidibi yajnajtziibiibiyb miidi jiin. ¹⁷Nayñ'ixíiyigix miid Cristo ytiy'ajt huidibi miid ajcxy m'alma xyajnidzoocip, tim jadu'n nipaady nej soldados ajcxy ñaygohuáanigixy co pidaaccixy ypujx cójup co

chiptunaangixy. Naygohuáanigix miich ajcxy miid Dios y'ayuc huidibi jadu'n nipatp nej tüg espada huidibi je Espiritu Santo ti xymooygixy. ¹⁸Mibijctzoogix Dios miid tüg'óciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom miid je Espiritu Santo ypubejtin. Huijy ycuje m'íjtcixipy, ca' m'jotmetzcíiyigixipy. Mibijctzoogix Dios miid tüg'óciy mibijcpidijc ajcxy ycixpi. ¹⁹Nañ jadu'n mibijctzoogix Dios miid iich ycixpi, co huen xymöyich ayuc etz jotcuje'ajtin, jigix jébi ngapxhuácxibich huinmic jotmic yi' y'ayuc ytiy'ajt huidibi ca' pin jecy'ajty nejhuíiyigixy. ²⁰Dios ti xyajnbicyich jada tung jébi nyajnicxyich yi' y'ayuc ytiy'ajt ma je mayjáy ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios miid iich ycixpi co xyajjotmicpigipyich jigix jébi ngapxhuácxych yi' y'ayuc huinmic jotmic.

Capxpoocxin huidibi cogixiiyñip

²¹Ooy ndzocy njhuíyich je Tíquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tíquico miich ajcxy xyajmiidmiydägipy tüg'óciy je tiy'ajt nej nyajpaadyich ya, etz tüg'óciy tung huidibi ya ndumybich. ²²Nguexaamybich Tíquico ma miich ajcxy jigix jébi xymiidmiydägipy ajcxy jadu'n nej nyajpaadyich ya, e miid jada tiy'ajt jébi miich ajcxy m'jotcugíiyigixy. ²³Huen Dios Teedy etz ajt nHuindzin Jesucristo may'ajt

tunipy miid miich ajcxy, jigix
 jëbi jotcuje mdzinaaygixy, etz
 nañ jadu'n jëbi mnaychójcigixy
 mnayjihuíyigixy miñ xyipy, etz
 jigix jëbi mjacmibijccixy Cristo.
²⁴Huen Dios may'ajt oy'ajt

tunipy miid miich ajcxy huidibi
 yajmij'ajtcixp ajt nHuindzin
 Jesucristo huinixii huinitiempo. E
 ca' m'ixmájtzcixip nimina nej ajcxy
 mijpidaaccixy Jesucristo. Jadu'n
 jada. Amén.

FILIPENSES

Yi Neczy Huidibi San Pablo Yajniejx Je Mibijcpidijc Jim Filipos

1 Hich Pablo miid Timoteo tumbich ma Jesucristo ytung. Jada neczy iich ajcxy nguejxpy ma tüg'óciy huidibi mibijcp Dios jim Filipos huidibi yajpaatp ma Jesucristo. Nañ jadu'n jada neczy nyajnieguexyich yi' ajcxy mijtungmiidpi etz mutztungmiidpi ma Dios ytung. ²Huen iich ajt nDios Teedy etz ajt nHuindzin Jesucristo may'ajt etz oy'ajt tunipy miid miich ajcxy ycixpi etz xyajjotcugfiygixipy.

Pablo mibijctzoy Dios miid je mibijcpidijc ycixpi

³Naag'oc naag'oc njäyamechich miich ajcxy njatytimyajnajxpyich jäygidaaacin ma Dios miid miich ajcxy ycixpi. ⁴Njatytimjotcuje'ajtpich ooy naag'oc naag'oc Dios nmibijctzooyich miid miich ajcxy ycixpi. ⁵Jotcuje'ajtpich com miich ajcxy ti xypubéjtcixyich co ngapxhuäcxich Jesucristo y'ayuc ytiy'ajt. Jadu'n ti xypubéjtcixyich maabi nyajtzondägyich ngapxhuäcxich Jesucristo y'ayuc ixti chambaad. ⁶Nejhuiyibich

tiydudägy co Dios ti yajtzondägy yi oybi ytung ma miich ajcxy mjot mhuinma'n, etz jactunaamni ma miich ajcxy mjot mhuinma'n ixti mabaad Jesucristo anajty ymiin jadüg'oc ya naaxhuiñ miid y'ane'min etz ymic'ajt. ⁷Ooy ytudägyity co jadu'n jotcuje'ajtpich miid miich ajcxy ycixpi, com ooy ndzocy njihuiyich miich ajcxy. Dios may'ajt oy'ajt ti tuñ co ti xyajniñbicyich jada tung, etz miich ajcxy myajpaady quipxy miid iich ma Dios ytung, miid co miich ajcxy xyjäyamechich etz nañ xypubetyich ajcxy, huenma'amy iich nyajpaady, oy ixypy pujxtigoty, oy ixypy ma tungmiidpi yhuinduu co nnigapxpetyich Dios y'ayuc ytiy'ajt etz nañ nnigapxpetyich co yjanchity. ⁸Dios ñehuiyib jadu'n nej mijcajee ooy ndzocy njihuiyich miich ajcxy miid je tzojcin jihuiyin huidibi Jesucristo ti xymöyich. ⁹Nmibijctzooybich Dios miid miich ajcxy ycixpi co xypubedipy ajcxy jigix jëbi nigi mdzogipy mjihuihuipy migügtijc, etz jigix ajcxy nigi m'ixpigiipy

je tiy'ajt tudägypi, etz nañ nīgi mhuinjihu'ihuipy tüg'óciy nej Dios tzocy co nduunim. ¹⁰Nañ nmibijctzooybich Dios miid miich ajcxy ycixpi jigix jëbi mnejhu'iygixipy, etz nañ jigix jëbi mhuin'íjxcixipy huidibi jac'oy mdúnggixipy. Co oy mdúnggixipy, huin'it jëbi mdzináaygixy miid huädz jot huädz huinma'n, e ca' ni ti jotmay miich anajty ajcxy mmiidiñ, co anajty je xii je tiempo paady co Jesús anajty miñ ya naaxhuiñ jadüg'oc miid y'ane'min miid ymic'ajt. ¹¹Dios nmibijctzooybich miid miich ajcxy ycixpi co ajcxy mbattähuip tüg'óciy oyjot oyhuinma'n, je oyjot oyhuinma'n huidibi Jesucristo tügpajc jëbi xymooygixy. E jadu'n jäy ajcxy capxpaadip Dios etz nañ huin'ügixip Dios co ajcxy ixipy nej tudägy mdzinaaygixy.

**Miid iich, yi njugy'ajtich,
yi' yi' Cristo**

¹²Ndzojcpyich co miich ajcxy mnejhu'ihuipy co miid je tzaachypi ycixpi huidibi nminaxyp nyajnaxypich ya pujxtigoty, nīgi mayjäy ti midoy Jesús y'ayuc ytiy'ajt. ¹³Jadu'n ti yhuimbizimy co tüg'óciy soldattijc etz jacjadyi jäy ya ma je gobierno ymijtjic ti nejhuiydäy ajcxy co nbujxtijc'iñayich miid co nduunich ma Jesucristo ytung. ¹⁴Nañ jadu'n miid co nbujxtijc'iñayich, paady ycixpi yi jacjadyi mibijcpidijc ti yjotmic'ijccixy ma ajt nHuindzin Jesucristo tung, etz ycapxhuäcxy'adiichpy ajcxy Dios y'ayuc ytiy'ajt, ca' ma tzig'iñ jihui'n.

¹⁵Janch tiy'ajt jada co nijëjity jäy capxhuäcxy je Cristo y'ayuc ytiy'ajt miid co ca' xyajmidzojccixy, etz nañ miid co xyajmidzip'ajtcixy. Nañ tiy'ajt jada co jacjadyi migügtijc xychojcp xyjihuiyb ajcxy, e capxhuäcxy ajcxy je Cristo y'ayuc ytiy'ajt miid oyjot oyhuinma'n.

¹⁶Janch tiy'ajt co nijëjity migügtijc capxhuäcxcixy Jesucristo y'ayuc miid co ñaygömaya'nyii ci'm, ca' nminaanim ycapxhuäcxp ajcxy cixyot huinijot. Yi' ajcxy y'ixtaayb nej xyajtajipy xyajmayipyich, jadu'n nej iich pujxtigoty n'ityich.

¹⁷Yi' ajcxy huidibi xychojcpich xyjihuiybich ycapxhuäcxp ajcxy Cristo y'ayuc com ñejhu'iyb ajcxy co iich yam n'ityich pujxtigoty, miid co ti nhuinma'n nbidägyich co nnigapxpeda'ñich Jesucristo y'ayuc ytiy'ajt. ¹⁸Pen jäy ajcxy capxhuäcxp Cristo y'ayuc miid co ñaygömayáanigixy ci'm, o pen ycapxhuäcxyp miid oyjot oyhuinma'n, ca' ñejity, jotcujc'ajtpich co capxhuäcxy ajcxy Jesucristo y'ayuc.

¹⁹Com nnejhu'iybich co miich ajcxy mmibijctzoogixy Dios miid iich ycixpi, e nañ nnejhu'iybich co Jesucristo yjihui'n ymic'ajt xypubetyich, paady nīgi njotcugiyich, e nañ njjip'ijxypich co nbidzima'ñich pujxtigoty.

²⁰Ndzojcpyich etz nañ njjip'ijxypich co nmimadactähua'ñich tüg'óciy ma iich mdzinaayin, e ca' ti tzöydu'n nbáadibich ma Dios yhuinduu. Ndzojcpyich nañ njjip'ijxypich co njaccapxhuäcxibich Jesucristo y'ayuc huinmic jotmic, jigix Jesucristo ycömay'idipy.

Ca' ñejity pen jactzinaayb, o pen n'o'cpich. ²¹Ñich ndzinaayin njuugy'ajtin Cristo yi' ycixpi, e peni n'o'cpich, ti ñich anajty mij nmadäy. ²²Pen njactzinaaybich, mayjäy oybi pada'ñ miid ñich ndung ycixpi. Ca' nnejhuüyich huidibi jac'oy nhuin'ixipyich co tzojc n'ögibich, o co njactzinähuibich.

²³Ooy chachchipy nnejhuühuibyich huidibi jac'oy nhuin'ixipyich, co n'ögybyich, o co njactzinähuibyich. ñich ci'm nayjihuüiyijich ñigi jotcuje co ixypy tzojc n'ögyich, jigix ixypy mic'amy nicxy n'lityich jiiby tzajpjoty ma Cristo yajpaady. ²⁴Per jaccopy miid miich ajcxy m'oy'ajtin ycixpi, co njactzinähuibich.

²⁵Com nnejhuüybich co copicy njacpubeda'ñich miich ajcxy, paady nnejhuüybich co njactzinähuibich, e jigix jëbi nbubejtcixy ma Dios ytung etz ma yi mmibijcin. E jadu'n miich ajcxy ñigi mjotcuje'adipy ma mmibijcin. ²⁶Miich ajcxy huidibi yajpaatp ma Jesucristo, ñigi jotcuje m'idipy co nicxy n'ida'ñich jadüg'oc ma miich ajcxy.

²⁷Jëyi janchtiy co mdzinaayin mjugy'ajtin mi'ijtcixy jadu'n nej Cristo y'ayuc ytiy'ajt y'ane'my. Pen nicxpich anajty ci'm ma miich ajcxy, o pen ca' nnicxyich, per ndzojcypich co xypáadibich tiy'ajt co miich mic m'ijtcixy ma mmibijcin, tú'ciy cixyot huinjot mdungixy. Mic mjanchmidinaaygixy ni'amugi' yi mmibijcin, jadu'n nej ti mmijpidaaccixy Jesucristo ytiy'ajt, ²⁸e ca'ajcxy mdzig'huip co jäy ajcxy xymidziptzóongixipy, jada je'

tiy'ajt co tigoyamb ajcxy y'alma, e nañ jada je' tiy'ajt co miich ajcxy chóocixipy yi m'alma, e nañ jadu'n jada tiy'ajtip co Dios y'lity miid miich ajcxy. ²⁹Dios may'ajt oy'ajt ti tuñ miid miich ajcxy ycixpi co yaj'oyiyy nej jëbi miich ajcxy mibijccixy Jesucristo etz nañ nej jëbi tzaachypi mminajxcixy myajnajxcixy miid Jesucristo ycixpi. ³⁰Ñich etz miich ajcxy quipxyi ti nminajxim ti nyajnajxim tung ayo'n miid Jesucristo ycixpi. Miich ajcxy ti m'ixy ti mnejhuüy jadu'n nej ñich ndung n'ayo'n ti nminaxy ti nyajnaxyich, co jim anajty n'lityich ma miich ajcxy. E nañ miich ajcxy mnejhuüyb nej ñich chambaad nminaxy nyajnaxyich ndung n'ayo'nich miid Cristo ycixpi.

Cristo yung'ajt ñax'ajt etz ymij'ajt

2 Pen Cristo miich ajcxy mjot'amijmooyb miid yjihui'ñ miid ymic'ajt, pen ti jotcuje'ajtin mbatecixy miid co Cristo xychojccixy xyjihuiygixy, pen yi' yjihui'ñ ymic'ajt ijtp ma miich ajcxy, pen mdzojccixyp mjihuiygixyp etz nañ mba'ayoogixy migügtjic, ²jotcuje'adipich miid co mdzinaaygixy ooy yajxon, xic xon, tügyi mnaychójcigixy mnayjihuiygixy miñ xyipy, tzinaaygixy quipxyjot quipxyhuinma'ñ. ³Ca' ajcxy ti mdunipy miid mgi'mdzojcin ycixpi. Nañ ni ca' amij agix naybidáacigixy co ti mdungixy. Tüg'óciy huidibi mdungixyp, mdunipy ajcxy miid yung naxy mjot mhuinma'ñ. Nidüg nidüg myajmij'adipy ñigi migügtjic, ca'ydi nej miich ci'm

mnayyajmij'adyii. ⁴Ca' huaad pin naydügpajc yci'm'oy'ajt ixtäy, nañ jadu'n tzocy co migügtijc mayajmidzogipy y'oy'ajt.

⁵Pidaaccix mjot mhuinma'n tül'ciy jadu'n nej Jesucristo anajty yhuinma'n miidity co ya naaxhuiñ chinay. ⁶Oy Jesucristo yjaDiosity ti yhuinma'nypidägy co jëbi ixmach y' ymij'ajtin huidibi anajty yjamïid. ⁷Jesucristo ahuinguje pidaactay je mij'ajt huidibi anajty ymiid, e chi jadu'n chinay nej tüg tumbi co oy jadu'n ypi'c'aty jadu'n nej jäy. ⁸E co jadu'n ñaybidaaci nej naaxhuiñjyä, chi yung naxy pidacy yjot yhuinma'n, e nañ capxymidooy Dios ixti mibaad ñayyejci, huen jäy yaj'ögyii. E ooy anajty cho'ydu'nity co jäy yaj'o'ci cruudzcäxy. ⁹Paady ycixp Dios ti cömay jacnëgi Jesucristo, e ti pidäci y' yxii jaccömay, ca'ydi jacpinjäy yxii. ¹⁰Jadu'n Dios ti cömay Jesús, jigix jëbi tüg'öciy tzajpjoty tzinaaybi etz tüg'öciy naaxhuiñjyä, etz tüg'öciy jäy ajcxy huidibi ti ñaaxtigëy, co anajty ajcxy nidüg'öciy midoogixy co Dios capxpaatip Jesús yxii, chi ycojxtinaay'ihuiydähuipy ajcxy ma y' yhuinduu, etz y'ojadadipy ajcxy Jesús nidüg'öciy. ¹¹E co nidüg'öciy ajcxy cöbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycömay'ida'n.

Yi pin ajcxy Cristo mibijcp, yi' yi' ajcxy jadu'n nej tüg tiicxin jajin

¹²Migügtijc ajcxy huidibi ooy ndzocy njihuiyich, com Jesucristo jadu'n ijxpejtin ti yecy, capxymidoogich cham co jigüëgy

nyajpaadyich ma miich ajcxy, tim jadu'n nej jayhuin iich miich ajcxy xycapxymidooy co n'ijtyich ma miich ajcxy. Naymijottigöoyigix jabom jabom mguydungixy Jesucristo ytiy'ajt etz mmi'ijtcix huädz mjot huädz mhuinma'n. Tungix Dios ytung miid yung naxy ajcxy mjot mhuinma'n, e huindzigiiygix Dios. ¹³Com Dios yi' tumb jabom jabom ma miich ajcxy mjot mhuinma'n, jigix jëbi miich ajcxy mdunipy y' ytung y' chojcän cixyjot huinjot jadu'n nej Dios tzocy.

¹⁴Tungix cixyjot huinjot Dios ytung, ca'y'aametzity yjotmetzity, nañ ni ca' miid tzip ejcin. ¹⁵⁻¹⁶Jadu'n mdunipy ajcxy ca'ydi pinjaty yxigixy co ti mdundigooygixy. Miich ajcxy Dios xy'ung'adiib, ca' mnigix'adiiyb ajcxy ti jibicpi. Tzinaaygix miid oyjot oyhuinma'n ma yi' jäy ajcxy yajpaady huidi jibic-huinma'n tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjugy'ajtin mooyb ma jibicjäydiy ajcxy, jadu'n nipaady nej tüg madzä ytiicxy coodz. Pen jadu'n mdungixy, co anajty Cristo ymiin jadüg'oc ya naaxhuiñ, jotcuje'adipich co anajty nnejhuüyich co ca' iich ndung etz nxii ndiempo yñadigi'aty co n'ijtyich ma miich ajcxy. ¹⁷Co n'ögibich miid Cristo ytung ycixpi, jadu'n nipaady nejjihuüy iich nni'py ti ndem ti nyocych miid miich ajcxy ycixpi co ti ngapxhuäcch Dios y'ayuc ma miich ajcxy. E co miich ajcxy ti mmijpidaaccixy iich n'ayuc, jadu'n nipaady nejjihuüy

miich ajcxy ti myoxy ti mdoogy yi mjogy'ajtín ma Jesucristo. Jotcujc'ajtpich jadu'n co miich ajcxy mjogy'ajtín ti myoxy ti mdoogy ma Jesucristo. ¹⁸Nañ jadu'n miich ajcxy mjotcujc'adipy quipxy miid iich.

Timoteo etz Epafrodito

¹⁹Pen iich ajt nHuindzin Jesús tzojcpy, njjip'ijxypich co jëbi nguexipyich Timoteo ma miich ajcxy, jaydëbi njotcujc'adipyich co anajty yi' xyajnimiiñich tiy'ajt nej miich ajcxy myajpaady. ²⁰Timoteo tügpajc huídibi huinma'n tú'ciy miid jadu'n nej iich nhuinma'n nmíididyich, etz nañ huídibi janch naybidaacip miid miich ajcxy m'oy'ajtín ycixpi. ²¹Yi jacjadyii migügtijc huídibi yajpatp ma iich, yajcopijcpy ajcxy yci'm'oy'ajtín, e ca' ajcxy yajcopicy Jesucristo ytung. ²²Miich ajcxy mnejhuüiyb jadu'n nej Timoteo tudägy ytuñ miid iich co ngapxhuäcxyich Jesucristo y'ayuc ma miich ajcxy, tim jadu'n nej tüg ung ytuñ miid yteedy. ²³Paady ycixp njjip'ijxypich co jëbi nguexyich Timoteo ma miich ajcxy mina anajty nnejhuüiyich nej ycixipy iich njotmay huídibi nmíidich ya. ²⁴Nañ nmíbijcypich ajt nHuindzin Jesucristo co yaj'ahuädzip iich nniñ'a ndü'a co jëbi iich ci'm nicxy tzojc n'ixyich miich ajcxy. ²⁵Nañ jadu'n nhuinmaayich co copicy jadüg'oc nguexipyich ajt nmigüg Epafrodito ma miich ajcxy, yi' huídibi xypubejtpich ma ndung n'ayo'nich ya. Yi' huídibi miich ajcxy ti mguexy ma iich, jëbi xypubetyich ma tüg'óciy huídijaty najmayajtypich. ²⁶Epafrodito ooy

nijot'aty co jëbi nicxy y'ixaangixy miich ajcxy nidüg'óciy. Ooy yi' ytajy ymaay co miich ajcxy ti mnejhuüiy co ypigyii. ²⁷Janch tiy'ajt co Epafrodito ooy ti ypigyii, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix calydi nigí ayo'n jotmay nbaadyich. ²⁸Paady ycixp nigí ndzocyich co jëbi nguexipyich Epafrodito ma miich ajcxy jadüg'oc, jigix miich ajcxy mjotcugihuiip co m'ixipy. E nañ jadu'n jëbi yquëgy iich ndajin mayin miid yi' ycixpi. ²⁹Cöbjccix Epafrodito jotcujc, jadu'n nej tüg migüg huídibi yajpaatp ma ajt nHuindzin Jesús. Yajmij'ajtcix tüg'óciy migügtijc huídibi yjugy'ajtín vojxp toocp miid Jesucristo ytung ycixpi, jadu'n nej yi' ti ytuñ. ³⁰Com jago jago Epafrodito ti yca'ögy miid Cristo ytung ycixpi. Tzip tzaach yjugy'ajtín ti minaxy ti yajnaxy co ti xypubetyich ya. Com miich ajcxy ca' ci'm jëbi xypubéjtcixyich ya, paady yi' miich ajcxy ti xycodinäy.

Je tudägy'ajt je janchypi

3 Jadügnax, migügtijc ajcxy, jotcujc'ajtcix co myajpatcixy ma ajt nHuindzin Jesucristo. Ca' ti adzjipin njihuüiyich co nnigapxpetyich jada tiy'ajt jadüg'oc huídibi jayhuin ti nyajnijayiygixy. Jadu'n nduñich miid miich ajcxy m'oy'ajtín ycixpi. ²Naygüendi'ájtigix miid yi' ajcxy y'ayuc huídibi ajcxy tundigooyb co ajcxy yajcopijcy yi' tiy'ajt huídibi pidacp ma jäy ñinícx miid tzujc. Jibic jäy yi' ajcxy, jadu'n

ajcxy nipaady nej uc. ³Yi jäy ajcxy huidibi tiydudägy mibijcp Dios, ca' nmīnaanīm je' yi' ajcxy huidibi tiy'ajttīyīp nīnīcx. Yi Dios yjäy ajcxy janchypī, yi' ajcxy cixyjt huinijot mibijcp mijpidacp Dios ytiy'ajt jadu'n nej iich ajt. Hich ajt n'ojadajtim Dios miid ajt n'espīritu, etz miid ajt ntot nhuinma'n.

Jotcujc'ajtim com je' co nyajpaatim ma Cristo Jesús, e ca' nyajcopijcīm tijaty tiy'ajt huidibi jäy ajcxy ytumyb. ⁴Co ixypy ytiy'ajtity yi jadu'mbi huinma'n, jēbi ixypy naygōmayiijich ci'm, com jecy'ajty ca' anajty ni pin huidibi nīgi cuyduun yi jadu'mbi tiy'ajt ca'lydi iich. ⁵Co nductujcxīijīyich ma anajty ti nma'xung'atyich, chi oy nyajtiy'ajttīyīch. Raza hebrea iich, Benjamín nmij'ap'ajtpyich nmijteedy'ajtpyich. Nma'xung'ajtich hebreojäy. Hich ndaj ndeedy hebreojäy ajcxy anajty. Nañ nmijpidaacich fariseo y'ixpijcin, jadu'n nej ajcxy yajniguejy judíojäy ycötujcin. ⁶Hich janchmictägy anajty nguyduñich ngi'mhuinma'nīch, ixti mabaad anajty n'ixhuidity nbahuidityich mictägy yi jäy ajcxy huidibi anajty mijpidacp Jesucristo. Ti nguyduñäyich tüg'óciy judíojäy ycötujcin. Ni pin ca' huaad yxīyich co ti ndundigooyich ma yi' ajcxy ycötujcin. ⁷Tüg'óciy yi judíojäy yhuinma'n huidibi ti nyajcopicyich anajty, jadachambi ca' ytimychobaady miid iich, co ti nmijpidägyich Cristo ytiy'ajt. ⁸Jadachambi janchtiy, huidijaty anajty nyajcopijcpyich, ti nnajtz'ixiidyäyich, jigix jēbi

nnejhuñhuibich etz nguyduñipich yajxon ajt nHuindzin Jesucristo oybi y'ayuc ytiy'ajt. Miid co ti nmijpidägyich Jesucristo, paady nnajtz'ixiidyäyich tüg'óciy huidibi anajty nyajcopijcpyich, yi jadu'mbi huinma'n cham ca' chobaady miid iich, jadu'n nipaady nej pūx. Jadu'n nduñich miid Jesucristo ytiy'ajt oy'ajt ycixpī. ⁹E jadu'n nduñich jigix jēbi nyajpaadyich ma Jesucristo. Jadu'n ti nnajtz'ixiidyäyich je tudägy'ajtin huidibi ti nbaadyich co ti nguyduñich Moisés ycötujcin je jecyīp. Nañ jadu'n nduñich jigix jēbi nbāadibich je tudägy'ajtin huidibi Dios yecpy co nmibijcīm nmijpidaacīm Jesucristo. ¹⁰Ndzojcpyich co njacnejhuñhuibich Cristo y'ayuc ytiy'ajt. Nañ ndzojcpyich co njacnejhuñhuibich Cristo ymic'ajt, jadu'n nej yjugypijcy co y'o'cy. Nañ ndzojcpyich co njacminaxipyich njacyajnaxipyich tzaachypī jadu'n nej Jesús minaxy yajnaxy tzaachypī, ixti mabaad jadu'n njatyich jadu'n nej Cristo yjaty co y'o'cy. ¹¹E paady ycixpī njijp'ijxpyich co n'ögibich njugypigipyich jadüg'oc co anajty Dios yajjugypicy yi jäy ajcxy tiibi y'öccixy.

**Naymic'ijxim jigix nbaatim
huidibi Dios ti xyaj'ahuaniiyim**

¹²Ca' nmīnaanīm jadu'n nmīna'nīch co ti nmimadactäyich nej Cristo ti mimadactäy. Nañ ni ca' jadu'n nmīna'nīch co iich ntot nhuinma'n ti nyajhuätztäyich. Njactumnich, jigix jēbi Cristo y'oy'ajtin nbāadibich. Com

Jesucristo ti xyhuin'ixyich jayijp, jaydëbi jada oy'ajtin nbáadibich. ¹³Migügtjic ajcxy, ca'íich ci'm naygömayijich, co ti nmimadactäyich Cristo y'oy'ajtin. Jada janchtiy ndumbyich, njäydigoydaaybich tüg'óciy huidibi ti ñaxy, e mictägy nduunich jëbi nbáadibich je oy'ajtin huidibi Dios jiiby tzajpjoty xymöhuaambich miid co nyajpaadyich ma Jesucristo. ¹⁴Mictägy nduunich miid tüg'óciy nmic'ajtich, jigix jëbi nbáadibich je oy'ajtin huidibi Dios jiiby tzajpjoty xymöhuaambich. Jadu'n nipaady nejihuüy miid pin nayboyicquipxyijich co nbada'ñich tüg premio.

¹⁵Hich ajt ti nhuinma'n ycixjni yca'pxni, tzoc panixim je ixpijcin huidibi nmiid'ajtim. E pen nidügti miich ajcxy tigachjaty huinma'n miidity, Dios xyajnejhuühuip ajcxy je tiy'ajt. ¹⁶Jada janchtiy, je tiy'ajt huidibi ti nbaatim copicy nguydundaayim, ca' n'ixmajtzim.

¹⁷Migügtjic ajcxy, panixcix ich n'ijxpejt jadu'n nej ti ndzinäyich ma miich ajcxy. Nañ jadu'n miich ajcxy ijxpejt mbigipy ma yi' ajcxy chinaayin huidibi ijxpejt ti patcixy ma ich. ¹⁸Canaag'oc ti nnimaaygixy, e nnimaaygixy jadüg'oc miid tajin mayin co may nmigügtjic chinaaygixy jadu'n nej jihuüy midzip'ajtcixy je Cristo huidibi o'c cruudzcixy miid ajt nbocy ycixpi. ¹⁹Dios yajtigoyip je'ajcxy y'alma. Yi' ajcxy ypidacpy yhuinma'n ma yi caayin uucin jicxy ypicxy, ma yjapadyii huen yjot yhuinma'n pidaaccixy ma Dios. Yi' ajcxy

chachñaygömaáyigixy ci'm ma yjapadyii tzo'ydu'n jihuüyigixipy. Hue' pidaaccixy yhuinma'n ma naaxhuin jay chinaayin. ²⁰Hich ajt hue' nyajpaatim njäy'ajtim tzajpjoty, e njijp'lijxim co ich ajt nHuindzin Jesucristo miinaamb ya naaxhuin jadüg'oc, chona'n tzajpjoty, je huidibi xyajnidzögaanim ajt n'alma. ²¹Jesucristo xyajtigadzaanim ajt nninix pocymiidpi, e xymöhuaanim tüg ninix jemybi oybi, tim jadu'n nej yi' ñinix miidity. Cristo xyajtigadzaanim ajt nninix miid yi' ymic'ajt huidibi miid ane'mdäy mimadactäy.

Jotcuje'ajtcixy ajcxy ma je mHuindzin Jesús

4 Com Jesús xyajtigadzaanim ajt nninix, paady ycixpi migügtjic huidibi ooy ndzocy njihuüyich, tiydudägy mibijccix ajt nHuindzin Jesucristo, ca' m'ixtigihuaccixy ma mmibijcin. Migügtjic ajcxy huidibi ooy nicxy nja'ixa'ñich, ooy njotcuje'atyich miid miich ajcxy ycixpi. Miid miich ajcxy ycixpi nbada'ñich n'oy'ajtin ma Dios.

²Nbijtzooybich may'ajt ma Evodia etz ma Síntique co huen ajcxy ixmajtcixy yi tzip etz huen naymigügpjicigixy jadüg'oc, com hue'ajcxy yajpaady mibijcpi ma Cristo. ³Miich migüg huidibi ti xypubetyich ma Cristo ytung, may'ajt nbijtzooybich ma miich co mgapx'oyihuüpy je tzip ma ajcxy je metzpi töxyjäy. Yijiibi metzpi töxyjäy tumb anajty ajcxy quipxy miid ich co ngapxhuäcxyich Jesucristo y'ayuc ytiy'ajt. Yi' ajcxy

xypubejtich quipxyi miid Clemente etz yi jacjadyii huidibi anajty tumb quipxyi miid iich. Jada metzpi töxyjäy ajcxy yxii ycojayiy ymiin ma Dios ñecy, je necy ma Dios miidity cojay je jäy ajcxy yxii huidibi padamb jugy'ajtin huinixiibi.

⁴Jotcujc'ajtcix huinixii, miid co myajpatcixy ma iich ajt nHuindzin Jesucristo. Jadüg'oc ñgapxpetyich co huen jotcujc'ajtcixy. ⁵Jadu'n tzinaaygix jadu'n nej jëbi jäy ajcxy nejhuiygixy co miich ajcxy myajtungixy mecxtujcin ma mdzinaayin. Com huingon je xii je tiempo mina ymiina'n iich ajt nHuindzin Jesucristo jadüg'oc.

⁶Ca' ni ti mnidajcixy mnimaygixy. Capxpädzimdaaygix ma Dios tüg'óciy ti jotmay miich ajcxy mmiid. Mibijctzoogix Dios, e nañ yajnaxcix jäygidaacin ma Dios. ⁷Co Dios mmibijctzóogixipy, huin'it ajcxy yi' xymöhuip jotcujc'ajtin mijcajee, e mayñaaxhuiñyjäy ajcxy ooy yhuinmay ahuididipy miid miich ajcxy m'oy'ajtin ycixpi. Co myajpaady ajcxy ma Cristo Jesús, paady ycixpi Dios xyajtzinähuiipy ajcxy jotcujc etz xymöhuip ajcxy huinma'n tudägyipi.

Tzojccix nijot'ajtcix huidibi oyip

⁸Jadügnax, migügtjic ajcxy, pidaaccix mhuinma'n ma tüg'óciy tiy'ajt huidibi janchip, tüg'óciy tiy'ajt huidibi jëbi nyajmij'ajtim. Pidaaccix mhuinma'n ma tüg'óciy tiy'ajt huidibi tudägyip. Pidaaccix mhuinma'n ma tüg'óciy huinma'n huidi huädzip etz tüg'óciy huinma'n huidi oy jäygidaacni.

Pidaaccix mhuinma'n ma tüg'óciy huinma'n huidibi jëbi yajcapxaady. Huinmaaygix tüg'óciy jada oybi huinma'n etz huidibi huaad njäygidaacim.

⁹Yajtungix je tiy'ajt huidibi ti nyaj'ixpijicixy, etz je cötujc huidibi ti nmooygixy, etz je ayuc huidibi ti mmidoogixy co ti ngapxyich. Etz nañ tungix je ijxpejt huidibi ti nyecyich. Cuydungix jada tiy'ajt, huin'it yi' Dios yajpaadipy ma miich ajcxy etz xyajjotcujc'idipy ajcxy.

Filipenses ajcxy y'ofrendi miid Pablo ycixpi

¹⁰Iich ajt nHuindzin Jesucristo ti ooy xyajjotcugiyich co je tiy'ajt xypaadyich co miich ajcxy xyjäymechich jadüg'oc. Ca' nminaanim nmina'nich co miich ajcxy ti xyjäydigoydaaynich. Hue' anajty ycanibidzimy nej jëbi xypubejticyich. ¹¹Ca' nminaanim jadu'n nmina'nich co ooy ti jaty nyajmayjajtnich. Com ti nhuinma'n nbidägyich co njotcujc'adipyich miid tijaty nmiidich, oy tim minaaxii tim minaatiempo. ¹²Com iich ci'm nejhuiybich nej jay ajcxy y'ayoy yjottigooy, e nañ nejhuiybich nej jäy ajcxy chinäy co miid'aty tijaty may'amy. Ti nnejhuiydäyich nej jëbi ndzinäyich, nej jëbi nyajnaxich xii tiempo; pen cu'xyi ngaayich, o pen ca' cu'xyi ngayich, pen nmiidich conax, o pen ca' ti nmiididyich. ¹³Jëbi ndzinähuiibich jotcujc huenti huennejity, com Cristo xymic'ajtmooybich. ¹⁴Ooy oy ti mdungixy co ti xypubéjtcixyich ma iich n'ayo'n njotmay.

¹⁵Jadu'n nej miich ajcxy huidi jim Filipos mnejhuiyb ajcxy, je taabi nyajtzondacyich co ngapxhuäcxyich Jesucristo y'ayuc ytiy'ajt, co ndzooñich jim Macedonia miich ajcxy ti xymiyoxyich, e jac tigati ti mguejxcixy ma iich. E miich ajcxy jim Filipos huidibi miibijcp Jesús, miich ajcxy tügpajc xypubejtich ca' jac ni pin. ¹⁶Co n'ljtyich jim Tesalónica miich ajcxy xyajniguejxyich pubejtin metz'oc tugüg'oc, e jadu'n miich ajcxy xypubejtyich miid huidibi anajty nyajmayjajtpich. ¹⁷Ca' nmīnaanīm ooy ndzachjijp'ixynich pubejtin, jada janchtiy ndzocjpyich co miich ajcxy nigī oy'ajtin mbaadipy co anajty mmejtzcixy ma Dios yhuinduu. ¹⁸Ti ooy yhuaadīy yi mbubejtin ixti nyajconajxpich. Miid je pubejtin huidibi ti myajmiguejxcixy Epafrodito cham nmīdidyich ca'pxy, ca'ti n'ocyajmayjajtnich. Miid jada pubejtin huidibi miich ajcxy ti xymöyich, ti ooy njäygidägyich, tim jadu'n nej Dios jäygidacy je

poomjoc huidibi yajhuindzigīiyi. ¹⁹Iich nDios miich ajcxy xymöhuip tüg'óciy huidibi miich ajcxy myajmayjajtpy. Mijcajee yi' miich ajcxy xymöhuip yi oybi mijpi oy'ajtin huidibi yi' ymiid ma yi Jesucristo. ²⁰iHuen iich ajt nDios Teedy cōmay'idipy huinixii huinītiempo! Jadu'n jada. Amén.

Capxpooocxin huidibi cijxnip je necy

²¹Tungix may'ajt capxpooocxcix miid iich ycixpi tüg'óciy migügtijc huidibi yajpatp ma ajt nHuindzin Jesucristo. Je migügtijc huidibi yajpatp miid iich nañ jadu'n xyajniguejxcixy capxpooocxin.

²²Tüg'óciy je miibijcpidijc huidibi yajpatp ya cajpjoty xyajniguejxp ajcxy capxpooocxin, yi' ooy ytimyjajijpity huidibi ajcxy yajpatp ma je mij ane'mbi César ycötujctac xyajniguejxyp ajcxy capxpooocxin.

²³Huen iich ajt nHuindzin Jesucristo may'ajt oy'ajt tunipy miid tüg'óciy miich ajcxy. Jadu'n ngapxycixyich. Amén.

COLOSENSES

Yi Neczy Huidi San Pablo Yajniejx Je Mibijcpidijc Jim Colosas

1 Hich Pablo, Dios jadu'n tzojcp, paady Jesucristo ti xyajniñicyich jēbi ngapxhuācxyich yi 'y'ayuc. ²Hich miid ajt nmigüg Timoteo cham nguexyich jada necy ma miich ajcxy huidibi tzinaayb jim Colosas. Hue' nguexyich jada necy ma miich ajcxy huidibi Dios yjāy'ajtīp e mmibijccixy yi Cristo. Huen iich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugiygixip.

Pablo mibijctzoy Dios miid mibijcpidijc ycixpi

³Jabom jabom co iich ajcxy Dios nmibijctzoy, chi nyajnaxich jāygidaacin ma Dios, nHuindzin Jesucristo ajt yTeedy, miid miich ajcxy ycixpi. ⁴⁻⁵Ti nnejhuüyich jadu'n nej miich ajcxy ti mmibijccixy Cristo Jesús, e nañ jadu'n nej mdzojccixy mjihuiygixy tüg'óciy migügtijc. Miid co miich ajcxy mjijp'ixy co Dios miidity tijaty yujcpicy tzajpjoty huidibi miich ajcxy mbadamyb, paady ycixpi ajcxy mmibijccixy Cristo

Jesús, e paady ycixpi mdzojccixy mjihuiygixy migügtijc. Co jayhuin migügtijc capxhuācxy Jesucristo y'ayuc ytiy'ajt ma miich ajcxy, huin'it ti mnejhuuiygixy co Dios miidity tzajpjoty huidi njijp'ijxyp mbadaangixp. ⁶Jadayaabi tiy'ajt huidibi migügtijc ti capxhuācxy ma miich ajcxy, nañ yajcapxhuācx'adiitzni ma tüg'óciy naax cajp etz mayjāy mijpidaaccixy. Miich ajcxy ti mmibijccixy jadu'n nej oga'n yajnimiydacy e chambaadni co Dios may'ajt ti tuñ miid jāy ajcxy ycixpi, e nañ miich ajcxy mnejhuuiyb tiydudāgy Dios ytiy'ajt. ⁷Jada tiy'ajt ti xyajnejhuuiygixy je Epafra, iich ajt nmigüg huidibi ooy ndzocy njihuüyich, huidibi tudāgy tumb ma Dios y'ayuc quipxyi miid iich. Epafra ti xycodināyich ma miich ajcxy, e tiydudāgy miich ajcxy xyaj'ijxpicy Cristo ytiy'ajt. ⁸Epafra ti xyajnejhuuyich tiy'ajt jadu'n nej miich ajcxy myajpatcixy, etz jadu'n nej je Espíritu Santo ymic'ajt xymooygixy, jigix ajcxy mdzogipy mjihuuihuipy tüg'óciy migügtijc.

⁹Miid jada ycixpi iich ajcxy jabom jabom Dios nmibijctzooyich miid miich ajcxy ycixpi, jadu'n nduunich chondacy co oga'n nnejhuuich co miich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhuinjihuuhuiipy mnejhuuhuiipy tög'óciy Dios chojcín. Dios nmibijctzooybich co yí' Espíritu Santo miich ajcxy xyaj'ixpigiipy xyajnejhuuhuiipy ajcxy tög'óciy yí' ytiy'ajt etz yí' chojcín. ¹⁰Dios nmibijctzooybich jaydēbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jäygidägy yajxon ajcxy mdzinaayin mjugy'ajtin. E nañ jaydēbi ajcxy mdunipy oyjäy'ajtin. E nañ jaydēbi jabom jabom yjacyujcpejtcixy yí' m'ixpijcin ma Dios. ¹¹Dios nmibijctzooybich jigix yí' xymöhuipy ajcxy mic'ajt jadu'n nej yí' miidity ymic'ajt mijpi, jigix jēbi miich ajcxy jotcujc myajnaxipy etz mecxtujctähuiip tög'óciy tzaachypi etz ayo'n. ¹²Dios nmibijctzooybich co miich ajcxy agujc jotcujc myajnaxipy Dioscojuyip ma Dios Teedy, com Dios Teedy ajt xyajpocyñihuaatzim, e jadu'n ti xyñi'ixhiyim jēbi nbaatim tög it lugar tzajpjoty quipxyi miid tög'óciy mibijcpidijc huidibi tiydudägy tzinaaygixp miid Dios ytiy'ajt, jadu'n nipaady nejihuüy nej miich ajcxy mdzinäy ma je tñcxin. ¹³Ti Dios xyajnihuädziactuutim ma yí' jibic-huinma'n ma je mujcu' xy'ane'mim, jadu'n nipaady nejihuüy ti xyajpidzimim

agootztuum. Ti Dios xypidaacim ma y'ung y'ane'my, je' y'ung huidibi yí' ooy tzocy ooy jihuüy. ¹⁴Dios y'ung ti xyajnihuädziactuutim ma yí' jibic-huinma'n co ñi'py temy vojcy ma yí' cruudz miid ajt nbocy ycixpi, e ti xypocyhuinmeecxim.

Co Cristo y'o'cy miid ajt nbocy ycixpi, chi jotcujc n'ijtim miid Dios

¹⁵Ca' pin ti ixyc Dios. Pinjaty ti ixyc Dios y'ung, jadu'n nipaady nej ti ixyc Dios. Dios y'ung yí' je' anajty tim jayijp ma anajty Dios ca' ti yaj'oyiñi. ¹⁶Dios y'ung ti cojtay tög'óciy tijaty yajpaatp jiiby tzajpjoty etz ya naaxhuinǵixy. Dios y'ung cojtay tög'óciy huidibi jēbi huaad n'ijxim etz nañ cojtay huidibi ca' huaad pin ixyc. Dios y'ung pidaactay tög'óciy y'ane'min tög'óciy mic'ajt ya naaxhuin, etz nañ jadu'n pidactay ane'min miid yí' tzajpjoty tzinaaybi. Dios y'ung ti yajcojtäy ti yaj'abadiiydäy tijaty miid yigixp. ¹⁷Je Cristo jayijp y'ane'm'ajt ymic'ajt ti paady, ca' jac ni pin. Je Cristo yaj'ijtpy tög'óciy huidijaty ya yajpatp huijtz'ijtaayb. ¹⁸Je Cristo ñihuindzin'ajttaayb ñigohuajc'ajttaayb, etz y'ane'mdaayb tög'óciy jäy huidibi mibijcip mijpidaacip. Je Cristo yajtzinaayb yajjugy'ajtpy tög'óciy mibijcpidijc, com yí' je' huidibi jayijp ti yjugypicy co y'o'cy. Paady ycixp yí' cötujcin mijpi miidity. ¹⁹Dios hue' tzojcy co tög'óciy yí' ymic'ajt etz ymij'ajt yajpaadip ma yí' y'ung. ²⁰Je naaxhuinñyay etz je tzajpjoty tzinaayb ajcxy ca'oy'ijtcixy miid Dios miid je mijpocy ycixpi. Dios oy jäygidägy ooy jotcujc

nayjihuiyi co y'ung y'o'cy cruudzcíxy miid je mijpocy ycixpi e jadu'n oyiiy nej jëbi je naaxhuiñyäjy etz je tzajpjoty tzinaaybi ajcxy oy'ijtcixy miid Dios.

²¹⁻²² Miich ajcxy co anajty ca' mmibijccixy je Cristo, ca' anajty oy m'ijtcixy miid Dios. E jadu'n anajty m'ijtcixy nej tüg midzip ma Dios, miid co jibicpi anajty mdungixy, etz miidity ajcxy jibic ma m'jot mhuinma'n. Per jadachambi je Cristo ti capx'oyiy miich ajcxy je mdzip m'ejcin huidibi ajcxy miid Dios, co ti chinäy ya naaxhuiñ miid ñinix, e nañ co ti y'ögy miid miich ajcxy mbocy ycixpi. Miid co Cristo y'o'cy miid miich ajcxy mbocy ycixpi, jaydëbi myajpáatcixipy ma Dios yhuinduu janch oyjäy, janch huätzjäy, ca' ti pocy mmiidity, ca' ti xihuin yjac-hui'my ma Dios miid miich ajcxy ycixpi. ²³ Pen myajcopijccixyp tiydudägy je Cristo y'ayuc ytiy'ajt huidibi ti mmidoogixy, jadu'n nej mjijp'ijxcixy co je Cristo xyajnidzögaani ajcxy yi m'alma. Je ayuc huidibi miich ajcxy ti mmidooy, je' je' huidibi migügtijc ti capxhuäcxy etz ycapxhuäcx'adiichñi ma tug'óciy naax cajp, jadu'n nej jëbi jäy ajcxy y'alma yajnidzögipy. Nañ jadu'n iich, Pablo ngapxhuäcxypich jada ayuc quipxy miid nmigügtijcich.

**Pablo cötujemoy co ytunipy
ma mibijcpidijc ajcxy**

²⁴ Jotcuyc nnayjihuiyijcich co tzaachypi nminaxy nyajnaxyich miid nninixcixich miid miich ajcxy ycixpi e jadu'n njacyajcixy njacyajca'pxich je tzaachypi

huidibi Cristo yajtzondac co yi' tzaachypi minaxy yajnaxy miid je mibijcpidijc ycixpi e je mibijcpidijc ni paady nej Cristo ñinix. ²⁵ Dios ti xyvajñibicyich co ndunipyich miid yi jäy ajcxy huidibi mijpidaacip. Dios ti xypidägyich ma jada tung, jigix ngapxhuäcxibich tüg'óciy Dios y'ayuc ytiy'ajt ma tüg'óciy jäy ajcxy. ²⁶ Jecy'ajty canaag jimijt ti ñaxy co Dios ca'ni anajty yajniguëxigy yi' ytiy'ajt. Cham Dios ti yajniguëxigy yi' ytiy'ajt ma yi jäy ajcxy huidibi yi' yjäy'ajtipy. ²⁷ Dios oy nihuinmayiiy co anajty yajnejhuñhua'n yi jäy ajcxy nidüg'óciy je oybi ayuc tiy'ajt huidibi jecy'ajty ca' pin nejhuiy. Yi' je' je' tiy'ajt co Cristo yajpaady ma miich ajcxy m'jot mhuinma'n, paady ycixpi jëbi miich ajcxy mbaadip oy'ajtin jiiby tzajpjoty.

²⁸ Iich ajcxy ngapxhuäcxypich Cristo y'ayuc, n'ihuijpyich ngapxhuijpyich, nyaj'ixpijcpyich yajxon yi Cristo ytiy'ajt ma tüg'óciy jäy ajcxy, jaydëbi nyajquëxigibich ma Cristo yhuinduu nidüg nidüg mibijcpidijc ca'pxy yhuinma'n. ²⁹ Miid jada ycixpi nduñich mictägy miid tüg'óciy je nmic'ajtich huidibi Cristo xymooybich jabom jabom.

2 Ndozjcpyich co miich ajcxy mnejhuñhuiipy jadu'n nej mictägy nduñich miid tajin mayin miid miich ajcxy ycixpi, etz miid yi mibijcpidijc huidi jim Laodicea ycixpi, etz nañ tüg'óciy mibijcpidijc ycixpi huidibi ti xy'ixyich ahuin ajjip. ² Mictägy nduñich jaydëbi yi mibijcpidijc paadipy jotcuyc'ajtin ma y'ay yjot, etz jaydëbi ajcxy ñaychójcigixipy ñayjihuiyigixipy

mabaad jébi mi'ljtcixy yjot yhuinma'n t'ú'ciy. Mictägy nduuñich jaydëbi je mibijcpidijc mi'ljtcixy mij jotcujc'ajtin co ajcxy huinjihuïydähuiib Dios ytiy'ajt, je tiy'ajt huidibi jecy'ajty anajty ca' p'in nejhuïy, je Dios ytiy'ajt maabi Cristo Jesús. ³Ma je Cristo jim tüg'óciy tiy'ajt janchypi etz ixp'ijcin janchypi yajpaady. Jadu'n yi' ytiy'ajt etz y'ixp'ijcin nej tüg jugy'ajtin. ⁴Jadu'n nimaaygixy jigix ca' p'in oy cohuin'iini e midig'ihuïpy oy ayuc ma miich ajcxy ooy ymibijcni, e ca'yjanchity. ⁵Ooy iich ngadim jimity, ixna' guëxna' ma miich ajcxy myajpatcixy. ñich njot nhuinma'n ca' yi' jim ytigoy'lity ma miich ajcxy myajpatcixy. Jotcujc nayjihuïyijich co n'ijxcixy yajxon myajtüyöygixy tüg'óciy etz mic yi mmibijcin miidity ajcxy ma Cristo.

⁶E miid jada ycixpi jadu'n nej miich ajcxy ti mgöb'ijccixy je Huindzin Jesús oga'n'aty, jadu'n ajcxy jactzinaaygix jacjugy'ajtcix ma yi'. ⁷Je tiy'ajt etz je mic'ajt jim yi' mbaatcixy ma Cristo. Yjacyujcpedipy ajcxy yi m'ixp'ijcin ma Cristo ytiy'ajt jabom jabom. Ca' m'ixtig'ihuäccixy ma yi mmibijcin. Jacmibijcix jadu'n nej anajty ti nyaj'ixp'ijccixy Cristo ytiy'ajt. Jatytim myajnájxcixipy jäygidaacin ma Dios cixyjot huinj'ot jabom jabom.

**Je jemybi jugy'ajtin huidibi
Cristo xyajni'ixiïyim**

⁸Ooy naygüend'ajtigix, ca' myajhuin'iingixy, co huingjäy xyajhuinma'nytigöoogixipy miid huingbi ayuc huingpi ixp'ijcin

huidibi jäy ci'm ti cojy ti macxy, huidi ca' choobaady, huidi nigoo yxchachhuin'iingixp miid canaag ayuc huinma'n jadu'n nej poj naaxhuiñ huinma'n. Yi jadu'mbi ixp'ijcin huidibi jäy ti cojy ti macxy ca' ajcxy paady ma Cristo.

⁹Tüg'óciy nej Dios yajpaady nañ jadu'n yajpaady ma Cristo. ¹⁰Com je Cristo ñihuindzin'ajttaayb tüg'óciy ane'min ya naaxhuiñ, etz nañ jadu'n tzajpjoty, paady ycixpi co miich ajcxy myajpaady ma Cristo, miich ajcxy miid'ajttaayb tüg'óciy huidi Cristo ymiid. ¹¹Co anajty Cristo miich ajcxy xyjäy'adyii, chi yi'pidacy ma ajcxy mjot mhuinma'n je tiy'ajt co myajpatcixy ma Dios. Hue' je' yajtigooyb yi pocytunii huinma'n. Jada je' je tiy'ajt huidi Cristo Jesús ypidac, ca' miich ajcxy xyjäy'adyii. Ca' miich ajcxy mdiy'ajttiy ma mninix. T'igach Jesús ytuuñ miid miich ajcxy, ca' yjadu'nity nej judíojäy ajcxy tiy'ajt pidaaccixy ma ñinix miid tzujc. ¹²Co ti mniibejt'icixy miid Cristo yxii, jadu'n nipaady nejihuïy ti mnaaxtig'iygixy quipxyi miid Cristo co yi' ñaaxtig'iy. Co ti mmijpidaaccixy Dios ymic'ajt jadu'n nipaady nejihuïy quipxyi miid Cristo ti mjugyp'ijccixy co Dios yajjugyp'ijcy y'ung co y'o'cy. ¹³Co ca' anajty miich ajcxy Dios xyjäy'adyii, miid miich anajty ajcxy pocytunii huinma'n jadu'n miich anajty m'ljtcixy nej öcpi. E co ti mmijpidaaccixy Cristo, Dios ti xyhuinmeecxi ajcxy tüg'óciy mbocy, e jadu'n nipaady nejihuïy Dios ti xyajjugyp'ijccixy quipxyi miid Cristo. ¹⁴Co Cristo y'o'cy ma

yi cruudz miid ajt nbocy ycixpi, jadu'n nipaady nejihuüy Dios ti xyjödzim xihuín huidi anajty xychaachytunaanim. Co Dios anajty yajtigooy ich ajt nxihuín, jadu'n nipaady nejihuüy ti mijxojtzpety je xihuín necy ma Jesús ycruudz. ¹⁵Co Cristo y'o'cy cruudzcíxy, chi ycödigooy je ca'oybi ymic'ajt, etz je poj naaxhuiñybi ymic'ajt. Chi je Cristo yajtzo'yduñ je ca'oybi etz je poj naaxhuiñybi co yajcixy yajnaxy ma jäy yhuinduu.

**Tzojccix nijot'ajtcix tüg'óciy
huidijaty tzomb ma Dios tzajpjoty**

¹⁶Ca' mdungixy cuenti co pinjaty ajcxy xy'agapxihuipy etz xyñimähuipy:

—Amay'at jada jüicxy picy, etz amay'at jada xii, etz amay'at je jemybo', etz amay'at yi Sábado xii. ¹⁷Jecy'ajty jäy jadu'n ti yajtuñ yjadu'mbi huinma'n, jayijpni ca' anajty Jesucristo ymiñi ya naaxhuiñ. Jadachambi xii tiempo Jesucristo ytiy'ajt tügpajc yi' je' ooy ycopicyity. ¹⁸Ca' huaad yi jäy ajcxy xypijci je Cristo y'oy'ajtin huidibi ajcxy mbadamyb. Yi' ajcxy huidi oygohuin'iñiñi naybidaacip jadu'n nejihuüy ooy yung naxy ajcxy yjäy'ajtcixy, e ca' yjanchity. Yi' ajcxy yi' y'ojadajpty ángeles. Yi' ajcxy naygömayip co ti tiy'ajt patcixy ma cumäy, ninigoob ajcxy amij agix ñayjihuíyigixy miid co tzachmijpidaaccixy yci'mhuinma'n etz ñinixx chojcin. ¹⁹Yi jadu'mbi jäy ca' ajcxy yajpatcixy ma Cristo, je huidibi nigohuajc'ajtp tüg'óciy mibijcpidijc. Je mibijcpidijc Cristo yajyeecp ma ajcxy ymibijcin jadu'n

nej Dios tzocy, e yi' ajcxy patcixy tüg'óciy mic'ajt etz tiy'ajt ma yi'. Miid co Cristo nigohuajc'aty je mibijcpidijc, paady ajcxy y'ijtcixy tügpicy, jadu'n ajcxy nipaady nej tüg jäy ñinixx miid ycohuajc huidi ane'm je ñinixx etz miid emy huidibi yajyücxtaayb je ninixx.

²⁰⁻²¹Co miich ajcxy ti mmibicy Cristo, jadu'n nipaady nejihuüy ti m'öccixy quipxyi miid Cristo, e nañ ti mbidzimgixy ma yi naaxhuiñyjäy yhuinma'n xyaj'ane'mgixy. ¿Na'ámy co chambaad mjactzinaaygixy jadu'n nej jihuüy yi naaxhuiñyjay yhuinma'n xy'ane'mgixy? ¿Na'amy co mjaccuydungixy yi jäy ajcxy ycötujcin huidibi mínaamb co ca' huaad mgonigy jada, ni ca' huaad mjüicxy jada, ni ca' huaad nidoñ yjümbi? ²²Tüg'óciy huidibi ngonixim, njiicxim, e nnidonim, co ytundäy, chi ytigoydäy. Yi jadu'mbi huinma'n ci'm jäy ajcxy cojcixy macxcixy, e nañ ci'm jäy ajcxy yaj'ijxpjccixy huidibi ca' yajpaady ma Cristo. ²³Yi jadu'mbi cötujcin jadu'n yquëxigy nej ooy y'oyity ooy y'oymibijco'cnity, e ca' yjanchity. Co jäy ajcxy cuydungixy ooy ajcxy ñaybidáacigixy tudägy, etz nañ chaachtungixy ñicx ycohuajc. Yi jadu'mbi cötujcin ca' ti mic'ajt miidity, com co ca' jadu'n jëb yajtigoy jibic-huinma'n yi jadu'mbi cötujcin.

3 Miich ajcxy huidibi ti mmibicy je Cristo jadu'n nipaady nejihuüy ti mjugypijccixy quipxyi miid Cristo, e jemybi jugy'ajtin ti myajtzondaaccixy. ²Ixtaaygix je tiy'ajt huidibi tzomb tzajpjoty ma je Cristo yajpaady ma Dios ymijc

a'oy'amybi, e yi' je' je mij'ane'mbi.
³Co ti mmibijccixy je Cristo jadu'n nipaady nejjihuüy co ti m'o'ccixy miid yi', etz ma je Cristo jemybi jugy'ájtin miich ajcxy ti mbaady. Jadachambi yi mjugy'ájtin Cristo miid c'i'am, e yi' yajpaatp ma Dios.
⁴Co anajty je Cristo ñayguëxigyii jadüg'oc ya naaxhuiñ, huin'it xii miich ajcxy mnyabada'ñyii miid yi' jiiyby tzajpjoty ma yi oybi it.

Je jecy jugy'ajt etz je jemybi jugy'ajt

⁵Yajtigooygix je jibic-huinma'ñ huidibi miich ajcxy miid, huidibi naaxhuiñyäjy ajcxy yhuinma'ñ'ajtip. Ca' huaad miidcapxtigoyipy töxyjäydijc. Ca' huaad jibic-huinma'ñ mdunipy. Ca' huaad mdungixy ninicx chojcin, etz huidibi ca'p y'oyhuinma'ñity. Ca' huaad m'adzogipy comeeñ'adii, com ñipaapty jadu'n nej ajcxy huidibi tzaadzech quipychech ojadajtp. ⁶Miid co jäy ajcxy jadu'n ytundigooygixy, paady ycixpi jacjiini Dios tzaachytunip jäy ajcxy huidibi ca' ycapxymidoogixy yi' ycötujcin. ⁷Nañ jadu'n miich ajcxy jayijp co ca'ni anajty mmijpidaaccixy je Cristo, mdzinaaygixy anajty miid jibic-huinma'ñ quipxy miid je jacjadyii naaxhuiñyäjy co anajty mguydungixy yi jäy ycötujcin huidibi ca' ytiy'ajtity. ⁸Jadachambi ixmajtzcix miich ajcxy yi jibic-huinma'ñ jadu'n nej co migüg mmijotma'tcixy, jadu'n nej co ooy mjot'ambijccixy, jadu'n nej co jibic mdungixy, jadu'n nej co migüg mnigapxcixy ni'o'jiigixy, jadu'n nej co jibic ayuc mgapxcixy. ⁹Ca'

huaad mnyahuin'üinigixy miñ xyipy. Co ti mmibijccixy Cristo ti m'ixmajtzcixy je jibicjot je jibic-huinma'ñ huidi anajty ajcxy miid.
¹⁰Jemybi jot jemybi huinma'ñ ti mbatcixy e Dios yjacyejcyj jemybi jot jemybi huinma'ñ jabom jabom ma miich ajcxy co m'ixpijccixy yi' ytiy'ajt. Jadu'n Dios tzocy co mjot mhuinma'ñ mbidáaccixipy jadu'n nej Cristo jot huinma'ñ miidity, je Cristo huidibi ti yaj'oyüy je jemybi jot jemybi yhuinma'ñ.
¹¹Co jäy ajcxy mijpidägy Cristo, chi tú'ciy ajcxy yajpaady ma Dios, ca' ñejty co nijëjty ajcxy miid griegojäy y'ixpijcin etz jacjadyii miid judíojäy y'ixpijcin, ca' ñejty pen ti myajtiy'ajttiy o ca' mdiy'ajttiyity. Ca' ñejty co nijëjty ajcxy jiguëgy chooñ, e ca' y'ixpicyity, etz jacjadyii ooy adzip ahua'n ñaybidáacigixy. Ca' ñejty co nijëjty ajcxy moso'ajtp etz jacjadyii huidibi ci'm naymiduunip. Nidüg'óciy ajcxy tú'ciy ñaybidägyii co ajcxy mijpidägy Cristo. Nidüg'óciy mibijcpidijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'ñ.

¹²Com Dios miich ajcxy ti xyhuin'ixy, e ti xychojccixy ti xyjihuiygixy, e Dios ti xyajhuädzi ajcxy mjot mhuinma'ñ, paady ycixpi pidaaccix mjot mhuinma'ñ co mba'ayoohuaangixy migügtijc. Pidaaccix mjot mhuinma'ñ co oyjäy'ajtin mdunaangixy etz co nicy xemy mnyabidägaangixy. Pidaaccix mjot mhuinma'ñ yung naxy etz mimecxtujccixy migügtijc ajcxy. ¹³Naymimecxtújcgix

nidüg nidüg. Co mmigüg
ajcxy xymidundigooyipy jëbi
mhuinmeecxipy tím jadu'n nej ñich
ajt nHuindzin Jesucristo ti mecxy
miich ajcxy mbocy. Com Cristo ti
xyhuinmeecxcixy, paady copícy
miich ajcxy meecxip yi migüg
huidibi ajcxy xymidundigooyb.

¹⁴Mnaychójcigix mnayjihuiiyigix
nidüg nidüg. Co mnaychójcigixipy
nayjihuiiyigixipy, chi jëb
huaad mdzinaaygixy miid mjot
mhuinma'ñ tú'ciy. ¹⁵Je jotcuj'ájtín
huidibi Dios xymooyim, huen
ajcxy xy'ane'mi mjot mhuinma'ñ.
Dios ti xyajniñijccixy, jaydëb tú'ciy
m'ijtcixy miid mjot mhuinma'ñ.
Mjatytim yajnaxipy ajcxy
jäygidaacin ma Dios jabom jabom.

¹⁶Naybidáacigix co je Cristo
y'ayuc ytiy'ajt yajtigiiydahuamyb
ajcxy mjot mhuinma'ñ.
Nayyaj'ixpíjcgix etz nay'ihuijigix
naygapxhuíjigix miid je Cristo
y'ayuc ytiy'ajt, jadu'n nej Dios
ijxpíjcin yecy. ñigix Salmo etz ñigix
himno etz yi iy huidibi je Espíritu
Santo ypidägip ma mjot mhuinma'ñ,
e jadu'n jäygidaacin mi'ijtcixy ma
ajcxy mjot mhuinma'ñ miid Dios
ycixpi. ¹⁷Huen ti ayuc huidibi ajcxy
mgapxyp, huen ti tung huidibi
ajcxy mdumby, hue' capxcix tungix
miid ajt nHuindzin Jesús yxii. Etz
jatytim yajnaxcixy Dioscojuyip ma
Dios Teedy ma Jesucristo yxii.

**Je mibijcpidijc ajcxy chinaayin
ma ypijccinaaygixy**

¹⁸Miich töxyjäydijc ajcxy,
capxymidoogix mñäy ajcxy com
jadu'n ñich ajt nHuindzin Jesucristo
tzocy co mgapxymidohuipy

ajcxy mñäy. ¹⁹Miich yëydijctijc
ajcxy, tzojccix jihuiiygix ajcxy
mdöxyijc, ca' ejcin mmi'idiipy
miid mdöxyijc. ²⁰Miich ajcxy ung
anäg, mgapxymidohuipy ajcxy
mdaj mdeedy miid tüg'óciy. Jadu'n
Dios jäygidägy co ung anäg ajcxy
capxymidooy ytaj yteedy. ²¹Miich
ajcxy ungdeedy ca' oyñinej
mmigapxcixy m'ung m'anäg ajcxy.
Co jadu'n oyñinej m'ojipy m'ung
ajcxy, ca' yjeyity co ñicxy ajcxy
taj may chinaaygixy yjugy'ajtcixy.

²²Miich ajcxy tumbidijc,
capxymidoogix yi mHuindzin, ca'
janch xypaat oy mic mdungixy co
mhuindzin jim xyhuindíicxcixy,
e chi co je' yjihuäcni, chi ñigoo
mhuäccixni mdinaaygixni. Hue'
janchtiy oy tungixy miid oyjot
oyhuinma'ñ, com je' je' je tiy'ajt
co Dios mhuindzigiyygixy. ²³Je
tung huidibi mdungixyp, tungix
cixyot huinijot. ²⁴Com miich
ajcxy mnejhuiyb co Cristo
xymöhuaangixy it lugar tzajpjoty,
paady ycixpi oy tunggix jigix Cristo
jäygidägipy huidibi ajcxy mdumby.
²⁵Dios chaachtunipy pinjaty
tundigooyb. Ca' Dios huin'ijxpety
tzaachtunipy jäy.

4 Miich ajcxy yajtumbidijc,
yajtungix mdumbi nej ypadyii
etz nej ytudägyity, com miich ajcxy
mnejhuiyb co nañ miid miich ajcxy
tüg mHuindzin jiby tzajpjoty.

²Jabom jabom Dios
mibijctzoogix, ca' m'ixmajtcixy
Dios mibijctzoohuin. Huijy
ycujc m'idiipy ajcxy etz jatytim
yajnaxcixy jäygidaacin ma Dios
co anajty mgapxtaaccixy. ³Nañ
jadu'n miich ajcxy tun may'ajt

mibijctzoogix Dios miid iich ajcxy ycixpi. Mibijctzoogix Dios co huen it lugar xymöhuibiyich ma jëbi ngapxhuäcxyich Dios y'layuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhuüi. Miid co ngapxhuäcxyich Cristo ytiy'ajt, paady ycixp nyajpaadyich pujxtigoty. ⁴Mibijctzoogix Dios miid iich ycixpi, jigix jëbi ngapxhuäcxyich je Cristo ytiy'ajt huädz oy, nej jäy ajcxy jëb huädz huiñihuüiygixy, jadu'n nej ypadyii ngapxhuäcxybyich.

⁵Tiydudägy mdzinäaygixipy miid yi jäy ajcxy huidibi ca' mibijccixy Cristo. Yajniquëxëccix miich ajcxy Dios ytung jabom jabom, ca' huaad xii tiempo myaj'ayoogixy. ⁶Yi mgapxin yi mmiydaacin yajtungix oy'amy huindzigi'n'amy nej jëbi huaad jäy ajcxy jäygidaccixy. Copicy mhuinmayipy ajcxy jayijp nej jäy huaad m'adzoogixy.

Je capxpooocxin huidibi cogixiiñip je ñecy

⁷Tíquico co ñicxipy jim ma miich ajcxy, yi' xyyajmiidmiydáaccixipy tüg'óciy nej ytunyii yjadyii ma iich. Ooy ndzocy njñihuüiyich iich ajt nmigüg Tíquico. Yi' ooy tudägy ytuuñ quipxyi miid iich ajcxy ma ajt nHuindzin Jesucristo ytung. ⁸Paady yam nguexyich Tíquico ma miich ajcxy jigix ajcxy xyajmiidmiydägipy nej yam iich ajcxy nyajpaatcixy, etz nañ jigix xyjotmicmígápcixipy. ⁹Quipxyi miid Tíquico yam nguexyich Onésimo, tüg ajt nmigüg huidibi ooy ndzocy njñihuüiyich, huidibi

tudägy ti ytuuñ miid iich ajcxy. Onésimo miich ajcxy yi mmigogajp. Tíquico y Onésimo xyajmiidmiydägip ajcxy tüg'óciy tijaty tuunip jajtip yam ma iich ajcxy.

¹⁰Je Aristarco, huidibi pujxtijc iñaaayb quipxyi miid iich, cham quexy capxpooocxin ma miich ajcxy. Marcos, je Bernabé y'uch, cham quexy capxpooocxin nañ jadu'n ma miich ajcxy. Ti iich ayuc nguexyich jayhuin ma miich ajcxy co ixypy ñicxy Marcos ma miich ajcxy, mgöbigipy ajcxy agujc jotcuje. ¹¹Nañ jadu'n je Jesús huidibi jäy ytiyyp Justo, cham quexy capxpooocxin ma miich ajcxy. Yi Aristarco, Jesús etz Marcos yi' ajcxy ni tugüigpajc, judíojäy huidibi tumb miid iich ma Dios ytung co ngapxhuäcxyich Dios y'ane'min. Yi nidugiigpi iich ooy ti xyajjotcuje'atyich. ¹²Je Epafras, miich ajcxy mmigogajp je Cristo ytumbi, nañ jadu'n cham quexy capxpooocxin ma miich ajcxy. Je Epafras jabom jabom Dios mibijctzoy miid miich ajcxy ycixpi. Yi' mibijctzoob Dios co miich ajcxy cuydunda' tüg'óciy je Cristo y'ayuc ytiy'ajt, etz co nayyéjicigix amumdügjot ma Dios, e jadu'n ajcxy mguydunipy nej Dios tzocy. ¹³Iich jëbi tiy'ajt nyecyich co Epafras ooy jotmay jñhuüi miid miich ajcxy ycixpi, etz nañ ooy nidajy nimay miid yi' ajcxy ycixpi huidibi tzinaayb jim Laodicea etz jim Hierápolis. ¹⁴Je Lucas, je doctor, huidibi je mibijcpidijc ooy tzojccixy ooy jñhuüiygixy etz Dimas nañ cham ajcxy quexy capxpooocxin ma miich ajcxy.

¹⁵Yajnajxcix iich ngapxpooocxin ma yi mibijcpidijc jim Laodicea. Nañ yajnajxcix iich ngapxpooocxin ma yi Ninfas etz ma yi mibijcpidijc huidibi yömujuccixp ma yi' ytijc. ¹⁶Co anajty jada necy ti mgapxtaaygixy, tungix may'ajt quejxnajxcix jada necy ma yi mibijcpidijc ajcxy jim Laodicea. Huen ajcxy nañ jadu'n capxcixy jada necy, nañ jadu'n miich ajcxy

capxcix je necy huidibi ti nquexyich jim Laodicea. ¹⁷Tungix may'ajt mnimähuiipy je Arquipo co huen cuydundäy je tung huidibi iich ajt nHuindzin je Cristo ti yajnibedyii.

¹⁸Iich Pablo, iich ci'm njaaybich jada capxpooocxin ma miich ajcxy. Ca' ajcxy mjäydigoyipy co iich nbujxtijc iñäy. Huen Dios may'ajt oy'ajt tunipy miid miich ajcxy ycixpi. Jadu'n ngapxcixyich. Amén.

1 TESALONICENSES

Yi Jayijp Neczy Huidi San Pablo Yajniejx Je Mibijcpidijc Jim Tesalónica

1 Hich Pablo miid Silvano etz Timoteo cham nguexyich jada nechy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen iich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugíyigixip.

Je mibijcin huidibi anajty yejepy iixpejt

²Jabom jabom iich ajcxy nyajnaxyich jäygidaaacin ma Dios miid tüg'óciy miich ajcxy ycixpi. Jabom jabom iich ajcxy Dios nmibijctzooyich miid miich ajcxy ycixpi nidüg'óciy. ³Co Dios Teedy nmibijctzooyigixyich, chi njäymeichich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yi' ytung. Nañ njäymeichich jadu'n nej oyjäy'ajtin mdungixy etz jadu'n nej mdzojccixy mjihuiiygixy mmigügtijc. Nañ jäymejtzpich jadu'n nej miich ajcxy mjijp'ixy jabom jabom co iich ajt nHuindzin Jesucristo xymöhuaangixy it lugar jiiiby

tzajpjoty, e ca' mjetmetzciiygixy.

⁴Migügtijc ajcxy, iich ajcxy nejhuiiyb co Dios xychojccixy xyjihuiiygixy, e nañ iich ajcxy nejhuiiyb co Dios ti xyhuin'ijxcixy.

⁵Co iich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcchich, nañ nduunich mijhuinma'n miid Dios yjihui'n ymic'ajt. Jotcujc nduuñich ma miich ajcxy. Miich ajcxy mnejhuiiyb co tudägy nduuñich jägix jëbi mmijpidáaccixipy Jesús y'ayuc ytiy'ajt.

⁶Oy anajty ooy mjayaj'ixhuidijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigíyigixy iich je n'ijxpejt, e nañ jadu'n ajt nHuindzin Jesús y'ijxpejt.

⁷Co tzaachypi ti mminajxcixy ti myajnajxcixy miid Jesucristo ycixpi, chi tiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo

y'ayuc ytiy'ajt. ⁸E jadu'n miich ajcxy ti myejccixy je iixpejt miid Jesús y'ayuc ytiy'ajt, canan jëyi jim Macedonia etz Acaya, nañ ti myejccixy iixpejt ma canaag'it naax cajp. Je mayjäy ti nejhuiydäy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopicyity nicxy iich ajcxy njacyajnimäy je mayjäy jadu'n nej miich ajcxy ti mmibijccixy. ⁹Je mayjäy ma canaag'it naaxcajp ooy ñaymiidmiydáacigixy jadu'n nej iich oy ngogapxäyich miich ajcxy, etz nañ jadu'n nej iich miich ti xycöbñjccixyich e nañ je mayjäy ñaymiidmiydáacigixy jadu'n nej ti m'ixmajtzcixy yi tzaadzech ojadadii, e ti mbadüdigiiygixy je Dios juugypi janchypi etz tudägypi. ¹⁰Nañ jadu'n je mayjäy ajcxy ñaymiidmiydáacigixy jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'ñ ya naaxhuin, chona'ñ tzajpjoty. Je huidibi Dios ti yajjugypjic co ti y'ögy. Yi' je' je Jesús huidi ti xycohuaanim ma yi mijpi tzaachypi huidibi Dios yquexamyb miid co jäy ajcxy chach pocytungixy.

Pablo ytung huibidi anajty ymiid jim Tesalónica

2 Migügtijc ajcxy, mnejhuiiyb ajcxy co ca' ñaadig'i'aty, co iich oy ngapxhuäcxy Dios y'ayuc ytiy'ajt ma miich ajcxy. ²Miich ajcxy mnejhuiiyb co jayijp ca'ni anajty nmechich ma miich ajcxy iich ajcxy ooy tzaachypi etz ayo'n ti nyajnajxcixy jim Filipos. Ti jäy xyhuin'ojoy xyjijp'ojoyich. Co

nmejchich ma miich ajcxy, ca' ñejity co tzaachypi ti nminaxyich ti nyajnaxyich jayijp, chi Dios ti xyajjotmicpicxyich, jigix huinmic jotmic ngapxhuäcxibich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy, oy iich jäy anajty xycal'ixa'ñ xycatzoga'ñ. ³Ca' iich ngapxhuäcxyich anii, ni jibic ayuc, e ni ngamiydägyich jibic ayuc jibic huinma'ñ nej huaad nhuin'lingixy. ⁴Ca' ti nhuin'lingixy. Dios ti xyajni'bicyich co ngapxhuäcxibich yi' y'ayuc ytiy'ajt, e jadu'n nguyduuñich. Ca' nduuñich co huen jäy ajcxy jäygidägy iich ndung. Jada janchtiy ndumyibich jigix Dios jäygidägipy iich ndung. Com Dios yi' ñejhuiiyb nej jäy tüg'óciy yjot yhuinma'ñ miidity. ⁵Miich ajcxy mnejhuiiyb co ca' nyajxondaaccixy miid ayuc oyjatypi huidi ca' choobaady. Nañ ni ca' iich ajcxy nhuinma'ñ 'ijxtäy nej jëbi iich ajcxy nmeenybaat. E Dios nañ ñejhuiiyb co yjanchity jada. ⁶Nañ ni ca' iich ajcxy njijp'ixy co jäy ajcxy xycömayipyich, ni miich ajcxy etz ni jac-huingbi jäy. Com je Cristo ti xyquexyich co ngapxhuäcxibich yi' y'ayuc, paady ycixp jëbi ixypy n'ane'myich co ixypy miich ajcxy xyajmij'atyich etz xypubetyich, per ca' jadu'n ti nduuñich. ⁷Oygixy oy'amy ti nduuñich ma miich ajcxy, jadu'n nej tüg undaj miidity y'ung y'anäg miid oyjot oyhuinma'ñ. ⁸Ti iich miich ooy ndzojccixy njihuiiygixy, canan jëyi Dios y'ayuc ytiy'ajt ti nmooygixy, nañ naygäyegáanibich anajty ma yi o'cin miid miich ajcxy ycixpi. ⁹Co jayhuin ngapxhuäcxyich

Dios y'ayuc ma miich ajcxy, mjäymejchpy miich ajcxy jadu'n nej iich ajcxy nduuñ n'ayooyich anajty xiim tzuum miid iich ajcxy ngaayin n'uucin ycixpi. Ca' anajty n'adzibaangixy, paady iich ajcxy nduuñ n'ayooyich xiim tzuum miid iich ajcxy ngaayin n'uucin ycixpi.

¹⁰Miich ajcxy huidibi mibijcp mnejhuiy ajcxy, e nañ ñejhuiyb Dios, co iich ajcxy ndzinaayich ma miich ajcxy tudägy, huädz iich anajty ajcxy njot nhuinma'n miiididyich. Ca' ma ndundigooyich ajcxy nej pin xy'ocnihuambedipyich ajcxy. ¹¹Mnejhuiyb miich ajcxy nej n'ihuijicixy ngapxhuijicixy etz njotmicmigapxcixy nidüg nidüg, tim jadu'n nej tüg ungedeedy ihuijy capxhuijy y'ung y'anäg.

¹²Ti ngapxhuijicixy co ooy chach copicyity co mdzinaaygixipy nej Dios jëbi jäygidägipy yi mdzinaayin. Com yi' miich ajcxy ti xyhuin'ijxcixy jëbi mdigiiygixipy ma yi' chinaaydac, ma yi' miidity y'oy'ajtin ymij'ajtin.

¹³Paady ycixpi nyajnaxpich jäygidaacin ma Dios jabom jabom, jadu'n nej miich ajcxy anajty ti mmido'mbijccixy etz ti mgöbijccixy Dios y'ayuc ytiy'ajt huidi ngapxhuäcxich ma miich ajcxy. Ti mmibijccixy anajty co iich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'n, miich ajcxy huidibi mibijcp. ¹⁴Migügtijc ajcxy, jadu'n ti mjaicixy jadu'n nej yajty miid je judfojäy huidibi anajty tzinaayb

jim Judea co ajcxy mijpidägy Dios y'ayuc ytiy'ajt, chi je ymigogajp ajcxy ooy y'ixhuidijti ypahuidijti. ¹⁵Je judfojäy ymidziptzoon iich ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huidijaty anajty Dios y'ayuc najtzcapxiyip jecy'ajty. Etz nañ jadu'n ajcxy xyajpidzimyich jim ma ajcxy judfojäy chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymijotmädyii tüg'óciy jäy. ¹⁶Yi judfojäy ajcxy ti capx'adujccixy co ca' huaad ngapxhuäcxyich je Cristo ytiy'ajt ma yi jäy ajcxy huidibi ca' yjudfojäyity, nej huaad ajcxy y'alma ñidzóccixipy. Co jadu'n ajcxy ytundigooy, chi ajcxy ooy nigü ypocy ñibety ma Dios. Per Dios ti ooy chip y'ejcin pidacy ma judfojäy miid ajcxy ypocy ycixpi.

Pablo ñijot'ajtp co nicxy cogapxihuaangixy yi mibijcpidijc

¹⁷Migüctijc ajcxy, cham hueeni xi tiempo ti ñaxy ma ca' n'oc'ijxcixni ajcxy, per ca' iich miich ajcxy njäydigoy. Ooy iich ajcxy nja'nicxa'n ma miich ajcxy jadüg'oc, e ca' y'oyiy nej iich ajcxy nicxiybich ma miich ajcxy. ¹⁸Ooy iich ajcxy njanicxa'n anajty ma miich ajcxy. E iich, Pablo, ci'm anajty njanicxa'nich mejtz'oc tugüg'oc, e je mujcu' nni'aa ndü'aa ti xy'adujcäch. ¹⁹¿Ti mij'ajt miich ajcxy mdijy njijp'ijxpich? ¿Ma mdijy ajcxy nbada'nich njotujc'ajtin n'oy'ajtin? Co anajty ajt nHuindzin Jesucristo yhuimbity ya naaxhuiñ, nbadaamybich jotujc'ajtin etz oy'ajtin mij'ajtin miid je tiibi

nduun'ich ma miich ajcxy co ti mmijpidaaccixy Dios y'ayuc ytiy'ajt. ²⁰Miid miich ajcxy ycixpi nmiidich jotcujc'ajtin etz xondaacin.

3 ¹⁻²Miid jada tajin mayin co iich anajty ca' nmimadaga'n miid miich ajcxy ycixpi, paady iich ajcxy nhuinma'n nbidägy co jëbi nhui'ma'n'ich naydüg jim Atenas, etz jëbi nguexyich iich ajt nmigüg Timoteo ma miich ajcxy. Timoteo nañ jadu'n ytuñ ma Dios ytung quipxyi miid iich co ngapxhuäcxyich je Cristo y'ayuc ytiy'ajt oybi. Yi Timoteo ñigapxpedipy iich n'ayuc etz xyjotmicmigapxip ajcxy, jigix jac mic ajcxy myajpaadip ma mmibijcin. ³Jadu'n Timoteo ytunipy ma miich ajcxy jigix ca' mhuinma'nytigooogyixip miid je tzaachypi huidibi ajcxy mminajxyp myajnajxyp. Miich ajcxy mnejhuüiyb co copicy myajnaxipy ajcxy tzaachypi miid Jesucristo ycixpi. ⁴Co oga'n n'ijtyich ma miich ajcxy, chi iich miich ajcxy nnimaayich co tzaachypi mminájxcixipy myajnáxcixipy miid Jesucristo ycixpi. E miich ajcxy cham mnejhuüiygixyp co janch tiy'ajt jadu'n nej nnimaaygixy, miid co cham tzaachypi mminajxcixy myajnajxcixy. ⁵Com nejhuüiybich co tzaachypi mminajxyp myajnajxyp ajcxy, paady ycixpi tajpich maybich miid miich ajcxy ycixpi. E com ca' nmimadaga'n'ich je tajin je mayin, paady ycixp ti nguexyich Timoteo ma miich ajcxy jaydëbi tiy'ajt xypáadibich pen tiydudägy miich ajcxy mmibicy. Tzigiiybich anajty co ndijy je mujcu' ti

xyajhuinma'nytigoogyixy, etz jadu'n anajty ñaadig'i'ada'n iich ndung ma miich ajcxy.

⁶Jadachambi Timoteo ti xyñihuimbityich, choon ma miich ajcxy jim Tesalónica, etz ti xyajnejhuüiyich jadu'n nej miich ajcxy mmiidity mmibijcin, etz nañ ti xyajnejhuüiyich jadu'n nej mnaychójcigixy mnayjihüüiyigixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäymechich etz xychocy xyjihüüiyich, etz nañ ooy miich ajcxy xyja'ixáangixyich jadüg'oc, jadu'n nej iich miich ajcxy nañ jadu'n ooy nja'ixaangixy. ⁷Migügtijc ajcxy, ooy capxy agujc ayuc agujc nyajpaadyich. E co Timoteo ti mimiñ je oybi ayuc tiy'ajt jadu'n nej miich ajcxy mjacpanixy tiydudägy yi mibijcin, chi mij ooy ti njotcugiyich. ⁸Jadachambi jëbi njactzinäyich jotcujc, com ti nnejhuüiyich co miich ajcxy ca' m'ixtigihuäccixy ma mmibijcin. ⁹Nyajnajxpich jäygidaacin ma Dios yhuinduu miid miich ajcxy ycixpi, miid co janch jotcujc nayjihüüiyijich co miich ajcxy ca' m'ixtigihuägy ma mmibijcin. ¹⁰Xiim tzuum mmibijctzooyich Dios miid tüg'óciy njot nhuinma'n'ich, jigix Dios xyaj'ahuáatzibich nni'aa ndü'aajich, jëbi nnicxyich ci'm ma miich ajcxy, jaydëbi njacyaj'ijxpigipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibijcin ma mjacyajtigoy'ijtcixy.

¹¹Njipp'ijxypich co Dios Teedy ci'm etz ajt nHuindzin Jesús xyaj'ahuáatzibich nni'aa ndü'aa jigix nicxy n'ijxcixy

jadüg'oc. ¹²Hich ajcxy ndzocjpy co ajt nHuindzin Jesucristo xyjacmóoygixipy tzojcin jihuiyin, jigix nigi ajcxy mnaychogiiyb mnayjihuihuiyb miñ xyipy, e nañ nigi mdzójcxipy mjihuüygixipy tüg'óciy je mayjäy, tim jadu'n nej iich miich ajcxy ndzocy njihuüy. ¹³Hich ajcxy ndzocjpy co Dios xyaj'ljtíp ajcxy mjot mhuinma'ñ tücc'y ma Jesucristo ytiy'ajt, e ca' m'ixtigihuáccixy, jigix co anajty iich ajt nHuindzin Jesús ymiñ jadüg'oc ya naaxhuiñ miid tüg'óciy je miijcpidijc huidibi miid huádz yjot yhuinma'ñ, jébi miich ajcxy mnayguëxigiiyb ma Dios Teedy yhuinduu miid huádz mjot mhuinma'ñ, ca' ti xihuin ma Dios miid miich ajcxy.

**Je tzinaayin jugy'ajtin
huidibi Dios yjäygidacyp**

4 Jadüg nax, migügtijc ajcxy, jadachambi may'ajt nbijctzooyich, e nyajnibijccixy miid ajt nHuindzin Jesucristo ycixpi co ajcxy mjaccuychináhuipy Dios y'ayuc ytiy'ajt, jadu'n nej ti nyaj'ixpicyich miich ajcxy, etz mjactzináhuipy ajcxy jadu'n nej jébi Dios jäygidägy ajcxy mdzinaayin, jadu'n nej ti mdungixy.

²Miich ajcxy mnejhuüiyb je cötujcin huidibi ti nyaj'ixpíccixy. Jada cötujcin iich ajt nHuindzin Jesucristo ti xyajni bicyich. ³Miich ajcxy mnejhuüiyb je cötujcin jadu'n nej Dios tzocy co huádz jot huádz huinma'ñ myajtúngixipy ma yi mdzinaayin mjogy'ajtin. Ca' huaad mmigapxtigooygixy tüg töxyjäy. ⁴Miich ajcxy mnejhuüiyb

Jesús ycötujcin co copicy nidüg nidüg yëydijc pigipy tüg töxyjäy etz yajmij'adip ytöxyijc, etz nañ miiddzináhuipy miid oyot oyhuinma'ñ. ⁵Ca' Dios jadu'n tzocy co je yëydijc nijot'aty töxyjäy miid jibic-huinma'ñ, jadu'n nej yi jäy ajcxy y'idich huidibi ca' nejhuiy Dios ytiy'ajt. ⁶Ca' huaad ni pin migapxtigooyi ymígüg ytöxyijc, com Dios yi' tzaachytuniib mijcajee pinjaty migapxtigooyb ymígüg ytöxyijc. Jada cötujcin ti nyajni'ixiiygixy jayhuin. ⁷Com Dios jadu'n ti xyhuin'ixim jigix oyot oyhuinma'ñ ndunim, canan co ndunim jibic jot jibic-huinma'ñ. ⁸Co tüg jäy ytundigooy miid huingbi töxyjäy huidibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espíritu Santo huidibi Dios ti quexy ma iich ajt.

⁹Miich ajcxy mnejhuüiyb je cötujcin co copicy mdzogipy mjihuühuipy ajcxy mmigügtijc huidibi tzinaayb jim Macedonia ñaaxjot. Migügtijc ajcxy, may'ajt nbijctzooybich co jacnaychójcigix jacnayjihuiyigix. ¹⁰Janch tiy'ajt jadu'n co miich ajcxy mdzocy mjihuüy tüg'óciy je migügtijc huidi tzinaayb jim Macedonia ñaaxjot. Nmigügtijc ajcxy, may'ajt nbijctzooybich co jacnaychójcigixy nayjihuiyigixy etz mnayajmij'ajtigixy mij cajee. ¹¹Jatyim tzinaaygix nicy xeemy, agujc jotujc. Pidäg ajcxy mjot mhuinma'ñ ma mgi'mdzinaayin, etz nañ jatytim naymidúunigix. Jada tiy'ajt ti najtzcapxiyi ajcxy

jayhuin. ¹²Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³Migügtijc ajcxy, ndzojycpich co miich ajcxy mhuinjihuñhuij je tiy'ajt ma je' yajpaady y'alma je migügtijc tiibi y'öccixy, jigix ca' mdájcixipy mmáygixipy, jadu'n nej je jäy ajcxy nidajcixy nimaygixy huidibi ca' mibijccixy co Jesús yajjugypiga'n jadüg'oc je tiibi ajcxy y'o'ccixy. ¹⁴Jadu'n nej iich ajt nmibijcim co Jesús yjugypijcy co y'o'cy, nañ jadu'n Dios yajjugypijctähua'n je öcpidijc huidijaty ajcxy mibijc Jesús.

¹⁵Paady ycixpi iich miich ajcxy nnimaaygixy co ajt nHuindzin Jesús tiy'ajt ti yecy co iich ajt huidibi jacjy'ajtp co anajty Jesús yhuimbity ya naaxhuiñ, tügmucy xyajnicxaanim miid yi mibijcpidijc tiibi y'o'ccixy. Ca' iich ajt njayijp'adaanim yi tiibi y'o'ccixy, yi' ajcxy jayijp'adamb. ¹⁶Iich ajt nHuindzin Jesús ci'm yhuimbida'n ya naaxhuiñ chona'n tzajpjoty miid ycötujcin, miid ymic'ajtin, e yi' mic capxamb ane'mamb. Huimbidamb Jesús quipxyi miid tüg ángel mijtungmiidpi huidibi nañ jadu'n mic capxamb ane'mamb. E co anajty yhuimbity, chi Dios yajxuxa'n yi' ytrompeta, e tim huin'ftiy Jesús xyajpidictähuaanim ya naaxhuiñ, e chi ajt naybadaanim miid Jesús jocjoty. ¹⁷E chi iich ajt huidijaty anajty jactzinaayim, naybadaanim miid ajt nHuindzin

Jesús jocjoty quipxyi miid je'ajcxy huidibi anajty ti yjugypicy jadüg'oc. E jadu'n ndzinähuaanim huinixii huinitiempo miid ajt nHuindzin Jesús. ¹⁸Miid jada ayuc tiy'ajt nayyajtotcugüiyigix miñ xyipy.

5 Migügtijc ajcxy, ca' ycopicyity njacnijayiygixipy jadu'n nej je xii je tiempo yca'pxa'n. ²Miich ajcxy mnejhuñiyb co iich ajt nHuindzin Jesucristo yhuimbida'n ya naaxhuiñ tzaachytuna'n yi mayjäy miid ypocy ycixpi. Jesús miinaamb mina anajty je mayjäy ca' ti ocjijp'ijxni. Jadu'n ymiina'n jadu'n nejjihuñy tüg meetzpi ymiñ coodz co ymeedza'n. ³Co anajty je mayjäy yminaangixy: “Cham ooy jotcujc ndzinaayim, ca' ma tzip capxy”, chi timitiina jotcömoñi Dios yajtigoya'n je naaxhuiñybi. Timitiina ayo'n ñimiiniyib jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'n. E ni pin huaad cacöguëgipy je tzaachypi co Dios anajty ymiñ ya naaxhuiñ yajtigoydähua'n yi mayjäy. ⁴Per migügtijc ajcxy miid miich ajcxy Dios ytiy'ajt, paady miich ca' jadu'n myajpaatcixni nejjihuñy mdzinaaygixy agootztuuby. Ca' ajcxy mgixipy mgüedípy mina anajty Jesús miñ jotcömoñi, jadu'n nej jäy nigoobi ycixy ycuety co ti ymeechyii. ⁵Com tüg'óciy miich ajcxy Dios y'ayuc ytiy'ajt mhuinjihuñiygixy, jadu'n nipaady jadu'n nejhuiñy ti mgoximiygixy ti mgodiicxíccixy. Iich ajt ca' njacyajpaatim agootztuuby. ⁶Paady ycixpi ca' huaad njäy digooyim Dios

ytiy'ajt, ca' huaad nmi'óctigooyim jadu'n nej yi jacjaydyii jáy ajcxy huidibi ca' cuendituñ Dios y'ayuc ytiy'ajt, jadu'n yi' ajcxy nipaady jadu'n nejjihuüy ajcxy ti ymi'óctigoy. Ijtcix ni'ixi miid tüg'óciy Dios y'ayuc ytiy'ajt. Mi'ijtcix huijy cujc mjot mhuinma'ñ. ⁷Yi jáy ajcxy huidibi maab, coodz ajcxy ymäy. Yi jáy ajcxy huidibi muucip, coodz ajcxy ymúucigixy. ⁸ñich ajt huidibi nnejhuüyim Dios ytiy'ajt, copicy huijy ycujc ajt ndzinaayim, e nañ copicy nmibijcim Jesucristo e nañ naychójcigix nayjihuiyigix miñ xyipy, jadu'n nipaady nej soldadtijc ñaygohuáanigixy miid pujx huidibi ymiid ma ycaach. E miid co njjip'ijxim co Dios xyajnidzögaanim ajt n'alma, jadu'n nipaady nejjihuüy soldadtijc ñaygohuáanigixy miid ypujxcöjup. ⁹Com Dios xyajjugy'ajtim co xychaachytunaanim xyajtigoyaanim, Dios xyajjugy'ajtim nej n'alma jëbi paatim nidzoocin co nmijpidaacim ñich ajt nHuindzin Jesucristo. ¹⁰Jesucristo ti y'ögy miid ajt nbocy ycixpi, jigix jëbi huaad ndzinaayim jiiby tzajpjoty quipxyi miid yi', ca' ñejity pen ti anajty n'o'cim o pen jiini anajty njugy'ajtim co anajty Jesucristo yhuimbity ya naaxhuiñ. ¹¹Paady ycixpi jacnayjotmicmigápxigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuijy yi mibijcpidijc ajcxy

¹²Migügtijc ajcxy, may'ajt nbijctzooybich co yajmij'ajtcixy ajcxy yi migügtijc huidibi tumb ma miich ajcxy miid Dios y'ayuc ycixpi.

Yi' ajcxy huidibi xyajni'ixiiyb Dios y'ayuc ytiy'ajt, yi' ajcxy xycapxhuijip miid ajt nHuindzin Jesucristo y'ayuc ytiy'ajt. ¹³Copicy myajmij'ajtcixipy ooy, etz nañ mdzójcixipy miid je Dios ytung ycixpi huidibi ajcxy ytumyb ma miich ajcxy. Tzinaaygix jotcujc ca' ma tzip capxy.

¹⁴Nañ jadu'n, migügtijc ajcxy, nyajnibijcipy ajcxy co myaj'ojip yi migüg ajcxy huidibi ca' ti dung tuna'ñ, etz nañ mjotmicmigapxip huidibi ajcxy tajp maayb, etz nañ mbubedipy ajcxy huidibi hueeni miid ymibijcin, etz yajtungix mecxtujcin miid tüg'óciy migügtijc.

¹⁵ñich miich ajcxy nimaayb co ca' ni pin huaad yaj'ahuimbidity jibic ma ymigüg huidibi ti ymidundigoyii. Nañ jadu'n nimaaygixy co naymi'oyjäy'ajtigix nidüg nidügti. Nañ jadu'n oyjäy'ajtin mdunipy ajcxy miid tüg'óciy naaxhuiñyäjy.

¹⁶Jatytim miid'ajtcix jotcujc'ajtin jabom jabom. ¹⁷Capxtaaccix etz mibijctzoogix Dios jabom jabom. ¹⁸Yajnajxcix jäygidaacin ma Dios pen ji ajcxy mjajtcixy ayoogixy nejaty, com Dios ooy yjotcujcity co je migügtijc huidibi mibijcp Cristo Jesús yajnaxy ajcxy jäygidaacin ma yi' jabom jabom miid tüg'óciy huidibi tuunip jajtíp ma yi' ajcxy.

¹⁹Capxymidoogix je Espíritu Santo, co ngacapxymidoohuim je Espíritu Santo huin'it nyajtigooyim Dios yjihuiñ ymic'ajt huidibi yajpatp ma ñich ajt. ²⁰Yajjotcujc'ajtcix huenpinity pin Dios y'ayucpidzimb ma miich ajcxy. ²¹Jëyi janchtiy m'ixipy

peni quipxyiiyb miid Dios
y'ayuc huidibi ajcxy ycapxyp.
Mijpidaaccix je ayuc tiiybi.

²²Ixmajtzcix tüg'óciy jibic ayuc
jibic-huinma'ñ.

²³Dios nmibijctzooybich, je
Dios huidibi yejcpy jotcuje'ajtin,
co ajcxy xyajhuaatztaayip mjet
mhuinma'ñ ma yi jibicpi. Dios
nmibijctzooybich co yi' ci'm
xycuendi'ajtip huädz oy yi
m'alma ajcxy, etz yi mjihui'ñ, etz
mnïcx mgohuajc, ca' ma pocy
yquëxïgy, ixti mabaad anajty iich
ajt nHuindzin Jesucristo ymiiñ
ya naaxhuiñ. ²⁴Je Dios huidibi
ti xyajmibijccixy, tudägy yi', e

ycuydunipy yi' y'ayuc miid miich
ajcxy.

Capxpooçxin huidibi cijxnip je necy

²⁵Migügtijc ajcxy, mibijctzoogix
Dios miid iich ajcxy ycixpi.

²⁶Naygapxpóocxigix xic xon
nidüg nidüg miid oyjot oyhuinma'ñ.

²⁷Nhuindzin Jesucristo ajt ti
xyajnibicyich jada tung, paady
nyajnibijccixy co jada necy
mgápxcixipy ni'abidzimy ma
tüg'óciy mibijcpidijc.

²⁸Dios nmibijctzooybich co
iich ajt nHuindzin Jesucristo
xyconuucxip ajcxy. Jadu'n jada.
Amén.

2 TESALONICENSES

Yi Mimetz Necy Huidi San Pablo Yajniguejx Je Mibijcpidijc Jim Tesalónica

1 Hich Pablo miid Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma iich ajt nDios Teedy etz ajt nHuindzin Jesucristo. ²Huen iich ajt nDios Teedy etz iich ajt nHuindzin Jesucristo may'ajt oy'ajt tunipy miid miich ajcxy etz xyajjotcugüygixip.

**Dios tiydunipy yi pocyjäydijc ajcxy
co anajty Cristo ymiñ jadug'oc**

³Migügtijc ajcxy, njatytimyajnaxypich jabom jabom jäygidaacin ma Dios miid miich ajcxy ycixpi. E jadu'n copicy nyajnaxyich jäygidaacin ma Dios, com miich ajcxy mibijcypy Jesucristo nigí jabom jabom, etz nañ nigí jabom jabom naychójcigixy nayjihuíyigixy nidüg nidüg. ⁴Com miich ajcxy ooy nuucxy meecxy m'ljtcixy ma yi tzaachypi etz ayo'n huidibi ajcxy mminajxyp myajnaxyp, e nañ ooy mmijpidaaccixy Jesucristo, paady ycixpi ngapxpaadyich miich ajcxy ma yi migügtijc

huidibi mijpidaacp Dios majaty tüg tüg cajp. ⁵Miich mmibijcin etz mmecxtujcin yi' je' ijxpejtíp co Dios ytudägyity miid ajcxy ytiyduunin, e xycöbijccixy co jëbi mdigüygixipy ma yi y'ane'mdac miid mmibijcin ycixpi. Miid jada ycixpi miich ajcxy mminajxcixy myajnaxxcixy tzaachypi ayo'n.

⁶Miid co Dios ytudägyity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷E nañ yi' ajcxy xymöhuipy jotcuje'ajtin tim jadu'n nej xymöhuáangixyich jotcuje'ajtin je huin'it xii co anajty ajt nHuindzin Jesucristo ñayguexigyii co anajty miiñ ya naaxhuñ jadug'oc choon anajty tzajpjoty. Nañ je ángeles ajcxy mic'ajt miidpi miinaamb quipxyi miid Jesucristo. Miinaamb Jesús miid ane'min cötujcin e yajtigoydähua'ñ pocyjäydijc, tim jadu'n nej tüg mijjñ yajhuindigoydäy huen ytiijity. ⁸Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidägy ajt nHuindzin Jesucristo y'ayuc ytiy'ajt

oybi. ⁹Yi jäy ajcxý huídibi miich ajcxý xy'ixhuídijtp xypahuídijtp, Dios yi' tzaachytunaanip ajcxý y'alma huinixii huinítieempo. Dios ypidágaanip yi' ajcxý y'alma jiguégy ma ni caminaxii ajcxý ijxcixyp je nHuindzin Jesucristo etz yi' y'oy'ajtin etz ymic'ajtin.

¹⁰Jadu'n yjadipy je huin'it xii huin'it tieempo co anajty ajt nHuindzin Jesús miin ya naaxhuiñ, Jesús je mibijcpidijc yajmij'adañ etz huindzigihuañ, e nañ jadu'n miich ajcxý myajmij'adipy etz mhuindzigihuipy miid co anajty y'ayuc ajcxý ti mmibijcci, je ayuc huídibi ti ngapxhuäcxyich ma miich ajcxý.

¹¹Paady ycixpi jabom jabom Dios nmibijctzooyich miid miich ajcxý ycixpi, jaydëbi tudägy ajcxý mdzinähuipy, e Dios huídibi ti xyhuin'ijxcixy yjäygidägipy yi' miich ajcxý mdzinaayin. Nañ jadu'n Dios nmibijctzoogixy miid jada ycixpi co yi' cuydunipy huídibi miich ajcxý mbijctzooyb m'amidooyb miid oyjot oyhuinmañ. E nañ ycuydunipy yi' huídibi miich ajcxý mdumyb miid mmibijcin. ¹²Com Dios jadu'n tunamb ma miich ajcxý mjot mhuinmañ, paady ycixpi ajt nHuindzin Jesucristo yxii capxpaady y'idipy ma miich ajcxý mdzinaayin etz nañ jadu'n miich ajcxý capxpaady m'idipy ma Jesucristo. Jadu'n yjadipy com iich ajt nDios etz ajt nHuindzin Jesucristo may'ajt oy'ajt tuñ ma miich ajcxý.

Je jibic jäy huídibi huin'iimb mayjäy

2 ¹⁻²Migügtijc ajcxý, cham nyajmiidmiydaaccixy je xii

je tieempo co anajty ajt nHuindzin Jesucristo huimbidaani jadüg'oc ya naaxhuiñ, etz naybadaanim miid yi'. Nminucxtaapcyich miich ajcxý, ca' mhuinmañtyitgooygixy co pinjaty yminañ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi jäy ajcxý y'ayuc huídibi minamb co tüg espíritu ti yajnejhuüyigixy co yjadu'nity, o co muum a'ijxnaxy amidoonaxy capxy ayuc, o co muum ijxpídzimy jada ayuc ma tüg necy huídibi ajcxý ytijpy co iich nnecy'adyii.

³Ca' myajhuin'iingix janch ni nej. Jayijp ca'ni anajty je xii je tieempo yhuaad'atyñi ma anajty Jesucristo ymiinañ jadüg'oc ya naaxhuiñ, mayjäy ajcxý midziptzonañ Dios tiydudägy co ñayguëxigiiyb tüg jibic jäy mic jäy huídibi Dios yajcödígoyamy tücci'yi. ⁴Jada jibic jäy ymidziptzonamyb tüg'óciy tijaty huídibi jäy Dios'ajtpy, e nañ ymidziptzonamyb huídibi jëbi yaj'ojadaty. E nañ yi' naybidägiiib amij agix jadu'n nejhuüy yjacmijity ca'ydi Dios. E nañ yi' ypidägamb y'ane'mdac ma Dios ytijc, e naybidágaanip nejhuüy Diosity.

⁵¿Nej ca' mjäymejtzcixy co jadu'n nimiydacyich tüg'óciy jada tiy'ajt jayhuin je taab anajty n'ityich ma miich ajcxý? ⁶Jadachambi miich ajcxý mnejhuüyib pin yajhuäcxijp jada mic jäy jada jibic jäy, jigix ca'ydi ñayguëxigyii jayijpni ma ca'ni tieempo yhuaad'atyñi mina Dios a'ixihuip co ymiinipy. ⁷Je mic jäy je jibic jäy cham ñi'ixiiyb ameech je jibicpi huídibi ytunamyb, jëyi ytigoy'ityñi mina

je tü'aa y'ahuächyii, je huidibi yajhuäcxijp. ⁸Co anajty je jibic jäy ytü'aa y'ahuäch, chi ajt nHuindzin Jesús yajcödigooyi miid tüg puxujin. Jesús yajcödigooyi je jibic jäy miid yi' y'oy'ajtin etz ymij'ajtin co anajty yhuimbity ya naaxhuin. ⁹Je jibic jäy, yi' je' ymiid je mujcu' yhuinma'n etz ymic'ajt, e ytunamyb mijhuinma'n etz ijxpejt huidibi anijp. ¹⁰Je jibic jäy ytunamyb tüg'óciy tijaty jibic-huinma'n jigix jébi huin'iinip yi jäy ajcxy huidibi y'alma tigoyi, miid co ca' ajcxy cöbijccixy, e nañ ca' tzojccixy Dios y'ayuc ytiy'ajt huidi miid jébi y'alma nidoocixy. ¹¹⁻¹²E je' ycixpi co ca' ajcxy cöbiga'n Dios ytiy'ajt, paady Dios y'ixmadzäänigixy huen yajhuin'iingixy, huen mibijccixy je mujcu' y'ani, e miid jada ycixpi jébi Dios yajtigooyi yi' ajcxy y'alma nidüg'óciy huidibi ca' mibiga'n Dios ytiy'ajt. Jacjotcujc ajcxy co jibic-huinma'n tungixy.

Je jäy ajcxy tiibi Dios yhuin'ixyii jigix ypocyn'ihuädziy

¹³Migügtijc ajcxy huidibi ajt nHuindzin Jesucristo ooy tzocy jihuüy, jabom jabom nyajnaxyich jäygidaacin ma Dios miid miich ajcxy ycixpi, miid co Dios ti xyhuin'ijxcixy oga'n'aty, jigix jébi m'alma nidoocixy miid Dios yjihui'n ymic'ajt, etz nañ miid Dios y'ayuc ytiy'ajt huidibi ti mmibijccixy. Je Dios yjihui'n ymic'ajt xyajhuaatzip ajcxy mjibicjot mjibic-huinma'n. ¹⁴Paady ycixpi Dios ti xyhuin'ijxcixy, e nañ xyajmibijccixy miid yi' y'ayuc ytiy'ajt huidibi iich

ajcxy ngapxhuäcxyp, jigix jébi mbáatcixipy oy'ajtin ma iich ajt nHuindzin Jesucristo.

¹⁵Paady migügtijc ajcxy, mibijccix tiydudägy, ca' m'ixtigihuäccixy, e ca' mjäydiagooygixy je tiy'ajt huidibi iich ajcxy ti ngapxhuäcxyp ma miich ajcxy, etz jadu'n nej ti nnimaaygixy necyjoty. ¹⁶⁻¹⁷Huen iich ajt nHuindzin Jesucristo ci'm etz ajt nDios Teedy may'ajt oy'ajt tunipy miid miich ajcxy, e xyajjotmicp'ijccixipy etz xyajmibijccixipy tiydudägy, jigix oybi ayuc mgápccixipy etz mdunipy ajcxy tüg'óciy oybi huinma'n. iich ajt nDios Teedy etz iich ajt nHuindzin Jesucristo xychojcim xyjihuiyim, e ti xymooyim jotcujc'ajtin huinixiibi, e nañ ti tuñ may'ajt oy'ajt miid iich ajt ycixpi, jaydëbi njjip'ijxim oy'ajtin jiiy tzajpjoty.

Mibijctzoogix Dios miid iich ajcxy ycixpi

3 Jadügnax, migügtijc ajcxy, tungix may'ajt mibijctzoogix Dios miid iich ajcxy ycixpi, jigix jébi ngapxhuäcxibich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jébi yi jäy ajcxy mijpidägipy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. ²Nañ mibijctzoogix Dios miid iich ajcxy ycixpi, jigix iich ajcxy Dios xyñihua'nipy xycohua'nipy ma yi jäy ajcxy huidibi jibic-huinma'n ymiid, huidibi jibic iich ajcxy xytunamb, com mayjäy ca' mijpidägy Jesús y'ayuc ytiy'ajt. ³Iich ajt nHuindzin Jesúsristo tudägy yi', e xypubedip xypudigihuip ajcxy jigix miich ajcxy ca' mjotmetzc'ihuipy ma yi mmibijcin, e nañ xypubedip

ajcxy, jigix ca' xymimadáaccixipy je jibicjáy huidibi Dios ca' capxymido. ⁴Hich ajt nHuindzin Jesús jotcujc'ajtin ti xymóoygixyich miid miich ajcxy ycixpi. Nmibijcxyich co miich ajcxy mguydumyb je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵Com ca' iich njaty nej njijpcogapxihuibich, chi nguejxyich cogapxy, nnejhuíhua'ñich nej anajty ajcxy myajpatcixy ma yi mibijcin, tzigiiyb iich anajty co nicxy mujcu' xypidaaccixy jibictuum, chi iich anajty ajcxy ndung ti ñaadigi'aty.

**Ooy ycopicyity co nduunim
ma ajt ndung**

⁶Migügtijc ajcxy, miid ajt nHuindzin Jesús yxi etz ymic'ajt jada ane'min ajcxy nyajnibijcxy, co copicy ajcxy m'ixmadzipy yi mmigüg huidibi ca' ytuna'ñ ma yci'mdung, etz huidibi ca' cuyduñ Dios ytiy'ajt jadu'n nej iich tiy'ajt ti nyecy. ⁷Miich ajcxy mnejhuíiyb jadu'n nej iich ti ndzinäyich ti njugy'atyich co ti n'ityich ma miich ajcxy. E jëbi tiy'ajt ajcxy mbigipy ma iich ndzinaayin nej jëbi miich ajcxy mdzinaaygixy. Co anajty iich njimity ma miich ajcxy, ca' iich n'ixmajch ngi'mdung. ⁸Tüg'óciy iich ajcxy ngaayin n'uucin ngojuuyich. Nduñ n'ayooyich anajty xiim tzuum, co anajty ca' n'adziba'ñich ni tüg. ⁹Dios ti xymöyich mic'ajt ane'min co ixypy ajcxy mbubejtin ti nbijctzoohuí o ti nbijctzoohuí ixypy ajcxy mgaayin m'uucin, per ca' iich ajcxy jadu'n ti ndúngixyich, jigix ijxpejt ajcxy mbigipy ma iich ajcxy. ¹⁰Com co anajty n'ityich ma miich ajcxy

jada cötujcin ajcxy nyajnibijc co pinjaty ca' ytuna'ñ, ca' ajcxy myajcayipy myaj'ügipy. ¹¹Jadu'n iich ti nnejhuíy co nijëjity miich ajcxy ca' mdunaangixy ngi'mdung, jëyi myöygixy mnajxcixy jayjiin jäydijc. ¹²Yi jadu'mbi jay ajcxy nyajnibijcxyich miid iich ajt nHuindzin Jesús yxi co huen tungixy jabom jabom ma yci'mdung, ca' huaad pin adzijpcix anajxcix jigix jëbi paadip ajcxy ycaayin y'uucin.

¹³Migügtijc ajcxy, oybi jatyim tungixy jabom jabom, ca' mjotmetzcíygixipy. ¹⁴Pen nidügti ma miich ajcxy ca' tuñ cuendi jada ayuc huidibi ajcxy nyajnijayiyb, ijxcix pin je', e chi ca' mjactúngixip cuendi, e ni ca' miid myöymujc mnaxmújcixipy, jigix chöydunipy. ¹⁵Ca' ajcxy huaad midzip'ajtcixy yi jay ajcxy huidibi ca' yajxon cuyduñ Dios ytiy'ajt. Hue' janchtiy mgapxhuijcx oy'amy jadu'n nej tüg mibijcpi.

Capxpooxin huidibi cijxnip je necy

¹⁶Huen iich ajt nHuindzin Jesucristo huidibi jotcujc'ajtin yejcp, ci'm xyajjotcugíygixipy jabom jabom oytim minaxiijity oytim yma'amyity. Huen je Huindzin Dios xypubejtcixy xypudigiigyixy.

¹⁷Hich, Pablo, jada capxpooxin ci'm njaayich. Jadu'n nfirmajiyich tüg'óciy iich nnecy, e jadu'n miich ajcxy mnejhuíhuipy co iich jada necy'adyii. ¹⁸Huen iich ajt nHuindzin Jesucristo may'ajt oy'ajt tunipy miid tüg'óciy miich ajcxy. Jadu'n jada. Amén.

1 TIMOTEO

Yi Jayijpi Neczy Huidibi San Pablo Yajniguejxy Timoteo

1 Hich Pablo, Cristo Jesús xyaj'apóstol'ajtpich. Yi Dios huidibi xyñihuaanim xyyajnidzoocim ajt n'alma, etz Cristo Jesús huidibi xymöhuaanim jugy'ajtin huinixiibi, yi' ajcxy ti xyajñibicyich co yi' y'ayuc ngapxhuäcxiwich. ²Cham iich miich nijayiy Timoteo. Jadu'n njihuiy nej iich miich ngi'm'ung'adyii, co miich Dios ytiy'ajt ti mbaady ma iich. Huen Dios Teedy etz Cristo Jesús iich ajt nhuindzin may'ajt tunipy miid miich, huen xypa'ayoohuipy etz xyajjotcugihuipy.

Nijëjity jäy yaj'ixpicy huidibi ca' ytiy'ajity

³Hui'mi' miich jim Efeso, jadu'n nej nimay je taabi anajty ndzona'nich jim Efeso nnicxa'nich anajty Macedonia. Hui'mi' jim, jigix mgapx'adugipy je jäy huidibi najtzcapxiyb je ayuc ca'p ytiy'ajity. ⁴Mgapx'adugipy je nigoobi y'ayucity. Mgapx'adugipy yi' ajcxy huidibi tzachnigapxp tzachnimiydacpy yi judiojäy ajcxy y'ayuc jadu'n nej huidibi ni'ap'ajtpy ñideedy'ajtpy ajcxy. Yi jadu'mbi

ayuc nigoob yajhuinma'nydigoy pinjaty ixpijcp Dios ytiy'ajt.

⁵Jadu'n Dios tzocy co huen jäy ajcxy naychojctäyyii miid oyot oyhuinma'n. Huen ajcxy Dios yajmij'aty janch cixyot huinijot. Co pin yajmij'aty Dios janch cixyot huinijot, ooy ajcxy oy ñayjihuiyigixy. ⁶Nijëjity jäy ajcxy ti ixmajtzn je Dios ytiy'ajt, ti ajcxy jijptigiyiñi je ayuc huinma'n huidibi ca'p choobaady. ⁷Ooy yi' ajcxy jayaj'ixpiga'n yi Dios ycötujcin, ni ca' huinjihuiyigixy huidibi ycapxcixyp, ni huidibi ajcxy ñigapxpejtpy.

⁸Hich ajcxy nnejhuiyim co yi Dios ycötujcin oy yi' pen nyajtunim nej ypadyii nej ytiy'ajity. ⁹Nejhuiyim co yi Dios ycötujcin ca' yi' tzaachytuñ oyjäydjic, jëyi tzaachytuñ pin ca' capxymidoy Dios, pin midundigooyb Dios ycötujcin. Je Dios ycötujcin chaachytumyb jäy huidibi ca' cuydungixy, jäy ajcxy huidibi ca' ytudägyity, jäy huidibi ca' capxymidoogixy Dios, jäy huidibi pocytungixy, jäy huidibi ca' huindzigi'n yajtungixy miid Dios,

jäy ajcxy huidibi capxtigooyb, huidibi ytaj yteedy yaj'öccixy, huidibi jäy yaj'öccixy. ¹⁰Je Dios ycötujcin chaachytumyb pin migapxtigooyb töxyjäydijc etz yëydijctijc, huidibi miyëydijc ymähua'n. Dios nañ chaachytumyb je jäy huidibi jäy majtzp etz toognaxy, chaachytumyb ìndaacpidijc etz nìhuambejtpidijc. Je Dios chaachytumyb jacjadyii jäy huidibi y'ayuc ca' ytiy'ajtity nej Dios tiy'ajt miidity. ¹¹Jadayaabi tiy'ajt huätzpi oybi tügiyb miid Jesucristo y'ayuc ytiy'ajt oybi huidibi iich nDios, je conuucxy yTeedy, ti xyyajñibicyich co ngapxhuäcxibich.

**Pablo yjäygidacpy co Dios
may'ajt ti tuñ miid yi'**

¹²Ooy njäygidägyich co iich ajt nhuindzin Cristo Jesús ti xyajmicpicyich, yi' ti xy'ijxtiyyich, yi' ti xyajñibicyich Dios y'ayuc co ngapxhuäcxpich. ¹³Iich jecy'ajty jibic anajty nigapxy ni'ojiiyich Jesús. N'ixhuidijty nbahuidijtyich Jesús yjäy. Iich yi' ajcxy nmidundigooyich. Ti yi' Dios xypa'ayooyich com iich jadu'n anajty ti n'adich miid co nganejhuiyyich je tiy'ajt, ngamibicyich Jesús ngamijpidägyich Jesús. ¹⁴Paady ycixpi iich ajt nHuindzin Dios may'ajt oy'ajt ti tuñ mijcajee miid iich, co ti xyajmibicyich Jesús. E Jesús ti xymöyich tzojcin jihuiyyin miid yi' yjäy ycixpi.

¹⁵Ooy jada yjanchity, e nidüg'óciy jäy ajcxy jëbi mibijccixy co Cristo Jesús miñ ya naaxhuiñ co

yajpocynihuädza'n pocyjäydijc. E iich nigí pocy nmídidyich ca'ydí ni pinjäy. ¹⁶Miid jada ycixpi Dios ti xypa'ayooyich ti xymimecxtucyich, jigix co jäy ajcxy ijxip nej Dios ti ytuñ miid iich, huin'it ajcxy mijpidägipy yi' y'ayuc etz ypaadipy jugy'ajtin huinixiibi ma Jesús.

¹⁷Paady chojcpy co ngömayim Dios, je rey huidibi ane'mb huinixii, huidibi niminaa yca'o'cy, etz nipin ca'ixy. Je Dios tügpajc huidibi Dios'ajtp huen ycömay'idipy cham etz tüg'óciy xii tiempo huidibi mimb cidacp.

¹⁸Timoteo, ooy iich miich ndzocy njihuüy. Jada ayuc iich miich nyajnimaydaayb. Mihuindinähuiip Dios y'ayuc ca' mhuinma'ñyidigoyipy. Mgyudunipy jadu'n nej Dios y'ayucnajtzcaxiiybi xy'iihuijy xycapxhuijy co mdung mnimajch. ¹⁹Mihuindinähuiip Dios y'ayuc ytiy'ajt, huin'it ca' jibic mnayjihuihuiyyb, jadu'n nej ajcxy jadyii huidibi nejhuiyyb je tiy'ajt, e ca' cuydungixy, e jadu'ñyi yhuinma'ñyidigooygixy. ²⁰Jadu'n nej Himeneo miid Alejandro ajcxy jaty, huidibi iich ti nyajcidiigiyygixy je mujcu', jigix ajcxy yhuinma'ñyimedzipy, ca'ydí yajjotma'tcixy Dios.

Jadu'n nej jëb Dios nmibijctzoohuim

2 Yi' njatyajnimayb co ooy ycopicyity capxtaaccixy mibijctzoogixy Dios etz yajnajxcixy Dioscojuyip miid tüg'óciy jäy ajcxy ycixpi. ²Copicy nnibijctzoohuim ma Dios: reydiy, ane'mbidijc etz codungdijc, jigix jëbi jotcuje ndzinaayim, ca' ma tzip. Co jadu'n

nduunim, yi' anajty ngoduunim Dios y'ayuc, etz huin'it tiydudägy ndzinaayim. ³Com yi jadu'mbi huinma'n̄ ooy yi' y'oyity, e Dios huidibi iich ajt n'alma yajnidoocp, oy yi' jäygidägy. ⁴Dios chojcpy co tüg'óciy je jäy ajcxy huen y'alma nidoocixy, huen ijxcixy nejhuuiygixy Dios y'ayuc ytiy'ajt. ⁵Tüg je' je nHuindzin'ajtim Dios, etz tüg je' je huingapxpi huidibi jëbi ytiȳi ma Dios miid iich ajt ycixpi, etz huidibi jëb Dios y'ayuc capxnajxy ma iich ajt: je huingapxpi, je' je' je jäy, je Cristo Jesús. ⁶Cristo Jesús nayyojxi naydooci miid iich ajt nbocy ycixpi, ñaygyejei huen jäy yaj'ögyii, jigix jëb iich ajt nbidziimim ma je mujcu' anajty ci'am xymiid'ajtim. Jadu'n nej Dios cham jäy yajnejhuui co je tiempo yhuaad'ajtni, ⁷paady Dios ti xyajniibicyich ngapxhuäcxibich y'ayuc ytiy'ajt, etz Jesús xy'apóstol'adyiijich. Je tiy'ajt jada ngapxpich, ca' n'indägyich. Ti xyajniibicyich jada tung nej jëb huaad nyaj'ixpicyich, nej jëb huaad mibijccixy Dios, etz nyaj'ixpicyich Dios ytiy'ajt ma yi jäy ajcxy huidibi ca' yjudíojäyity.

⁸Ndzojcpyich co yi yëydijctijc huen mibijctzoogixy ojadajticy Dios ma tüg'óciy naymujctac miid oyjot oyhuinma'n̄, ca' y'adzip y'ahuan'nity, ca' y'ametz yjotmetzity. ⁹Nañ jadu'n ndzojcpich co yi töxyjäydijc huen yhuut yxoix yajtungixy nej ypadyii, huidibi quipxpaady ajcxy paatip. Huen yhuut yxoix pidaaccixy nej töxyjäydijc huidib tudägyip. Huen yöhuay cüdgy caaxgy nej ypadyii,

ca' ymigügtijc huinnaxtugipy miid yhuut yxoix, ca' nayxójxigixy miid oori, miid perla, e miid tijaty ooy choohuity. ¹⁰Ca' huaad töxyjäydijc ñaygómáyigixy miid yhuut yxoix, huen janch yajcómaygixy miid y'oyjäy'ajtin, jadu'n nej je jäy ajcxy tungixy huidibi ti ñaygyéjigixy cixyot huiniot ma Dios. ¹¹Co jäy ajcxy yaj'ixpicy Dios y'ayuc ma je naymujctac, huen töxyjäydijc ajcxy amoyñi amidoo'ijtcixy miid yungnaxy yjot yhuinma'n̄. ¹²Yi töxyjäydijc ca'p niducyich yaj'ixpigipy jäy ajcxy ma je naymujctac. E ni ca' ypadyii nicxy yëydijc ane'my. Huen ajcxy amoñi y'ity. ¹³Dios jayijp yajcojy Adán, jac'axam Eva, paady ycopicy yi yëydijctijc huen ane'my yi töxyjäydijc. ¹⁴Adán ca' yajtzu'ijxy. Eva yajtzu'ijx, je' ca' Dios capxymidooy. ¹⁵Paady yi töxyjäydijc ca' ypadyii nicxy nigohuajc'aty yi mibijcpidijc. Dios jotucj ñayjihuiyii miid co jëyi y'ung'ijxcixy, etz yajmij'ajtcixy Dios, etz tzojtaaygixy ymigügtijc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy miid oyjot oyhuinma'n̄.

Nej jëbi ytungixy huidibi ajcxy nigohuajc'ajtp

3 Tiy'ajt jada nej jäy yminaangixy. Pen ji pin najtzogiy nigohuajc'ada'n̄ yi mibijcpidijc tüg yi' oybi anajty ytunamyb. ²Pin nigohuajc'ajtp yi mibijcpidijc ooy ycopicyity je' jadu'n naydijiib huidibi ca' ti tundigoy, huidibi tüg töxyjäy miid ca'p ycanaagity, huidibi

huijycujc jäy'ajtp, huidibi miid oybi yhuinma'n etz tudägypi yhuinma'n, huidibi oyjäy'ajtin tumb, huidibi jajtp nej jäy ajcxy yaj'ixpigipy.

³Pin nigohuajc'ajtp chojcpy tüg jäy huidibi ca' y'amügity, huidibi ca' yhuindzipity, huidibi yajtumb mecxtujcin, huidibi ca' chipcapxy y'ahua'ngapxy, huidibi ca' ti adzocy.

⁴Pin nigohuajc'ajtp chojcpy tüg jäy huidibi tiydudägy tzinaayb ma yjiin ytijc, huidibi y'ung y'anäg yajtzinaayb nicy yxeemy. ⁵Pen ca' jaty nej y'ung y'anäg migapx ane'mip ma yjiin ytijc, ¿nej oc'ane'ma'n yi mibijcpidijc? ⁶Nañ ca'p yjëjity huidibi namni mibicy Dios y'ayuc ytiy'ajt. Ycadimjegyity nicxy ooy amij agix ñayjihuiyüi, e nicxy camadägy je ane'min, e yjadipy jadu'n nej Satanás yjajty co jibic tumb ñayyajhui'mi miid Dios. ⁷Chojcpy tüg jäy huidibi nidüg'óciy je mayjäy oy iixip. Pen ca' yjadu'nity nicxy pin yxiyüi, e chi jada anajty je mujcu' ti ymimadägyii co jäy jibic ñigapxiyb.

**Yi mutz tungmiid nañ chojcpy
huidibi oyjot oyhuinma'n miid**

⁸Yi mutz tungmiid huidibi yajpat ma mibijcpidijc chojcpy jäy tudägypi, huidibi nicy xeemy jäy'ajtp, huidibi ca' jäy'aty agejtmñ agejtxipy, huidibi ca' y'amügity, huidibi ca' y'adzocy ca' y'ameeñity. ⁹Huen naybidáacigixy cixyot huinjot ma je tiy'ajt janchypi. Je tiy'ajt huidibi je mayjäy ca' huinjihuiy. Je tiy'ajt huidibi iich ajt nmibijcim. Je' chojcpy pinjaty huidibi ca' ti jibicpi jot'adyii huinma'n'adyii. ¹⁰Pinjaty

mutztung yajnicxamb, jayijp jot'ix huinma'n'ix pen tudägy yhuinma'n. Huin'it jëbi mdungmöy. ¹¹Yi mutz tungmiidpi ytöxyjic chojcpy co huen tudägy jäy'aty, huidibi ca' ñigapx ñi'ojy ymigüg, huidibi nicy xeemy jäy'ajtp, huidibi cuydundaayb tüg'óciy. ¹²Yi jäy huidibi mutztung yajnicxamb chojcpy tüg jäy huidibi picy chinaayb, huidibi ca'p miidity metz o tugig töxyjäy, huidibi y'ung y'anäg yajtzinaayb nicy xeemy, huidibi tiydudägy tzinaayb ma yjiin ytijc. ¹³Yi mutz tungmiidpi huidibi yajxon ytung cuydungixy, cömay yi' ajcxy idipy ma mibijcpidijc. Nañ ñigi ajcxy ixpijcidich Cristo y'ayuc.

**Dios mijhuinma'n tuun
miid iich ajt ycixpi**

¹⁴Jada necy iich miich nyajniguejxyp. Njijp'ijxypich co tzojc nnicxa'nich jim ma miich. ¹⁵Pen ca' y'oyiy nej tzojc nnicxibich ma miich, ti yam nyajnijayy je janchypi. Miid jada necy huaad jëbi nidüg nidüg mibijcpi yjäy'ajtigixy ma yi mibijcpidijc huidibi mijpidacp Dios juugypi, je Dios huidibi huijtz'ijtaayb etz cohuandaayb je tiy'ajt janchypi. ¹⁶Janch tiy'ajt jada co mij yi' yi Dios y'ayuc ytiy'ajt huidibi ti xyajnejhuiyim, je huidibi jecy'ajty ca' pin nejhuiy. Je tiy'ajt huidibi xyajnejhuiyim co quexy y'ung ya naaxhuiñ.

Dios y'ung hue' je' yaj'ixxy miid ñinix. Tudägy nayguëxici miid Dios yjihui'n ymic'ajt. Je Dios y'ángeles ajcxy ti ixyii. Ti yajnigapxy yajnimiydägy

Dios y'ung ma huidibi
ca' yjudiojäyity nañ ti jäy
yajmij'ajtcixy Dios y'ung ya
naaxhuiñybi. E ti ycöbigyii
tzajpjoty ma yi oybi it.

Mayjäy ixmadza'n yi Dios ytiy'ajt

4 Yi Espíritu Santo minaan co
anajty je xii tiempo ycixa'n,
mayjäy ixmadzaangixy yi Dios
y'ayuc ytiy'ajt. Mijpidaaccixy
anajty jäy ajcxy y'ayuc huidibi
yi huin'iimbi etz ca'oybi ytiy'ajt
miid. ²Jada jäy ajcxy miid
anii anajty naybidáacigixy nej
ytudägyity, e ca' anajty yjanchity.
Ca' ajcxy nej ñajjihuiyii co ajcxy
ytigiiy aniidaacpi. Ti jadu'n
yhuinma'ñypidaaccixy janch mic.
³Yi' ajcxy ymina'n co ca' huaad jäy
ypijccixy, etz ca' huaad caaygixy
nijjéjity caayin uucin. Yi caayin
uucin Dios yi' ti conucxy jigix
jébi jäy ajcxy huidibi mibijccixy
etz huinjihuiygixy je tiy'ajt, jébi
yajnajxcixy Dioscojuyip ma Dios
etz cöbigipy ajcxy agujc jotcujc je
caayin uucin. ⁴Tüg'óciy huidibi
Dios ti yaj'oyiy, oy yi'. Ca' huaad
pin ymina'n co ca' y'oyity. Agujc
jotcujc ngöbijcim, jéyi nyajnajxim
Dioscojuyip ma yi'. ⁵Dios ymina'n
co huen huidibi caayin huidibi
uucin ooy y'oy yi'. Jéyi co
nyajnajxim Dioscojuyip, e huin'it
Dios conucxy je caayin uucin.

**Ca' ajcxy mmijpidägip
yi nigoobi'ayucity**

⁶Pen miich ajcxy jada ayuc jada
tiy'ajt myajnimaaayb yi migügtijc,
oy anajty mduñ ma Cristo ytung.
Co jadu'n yaj'ixpicxy Dios

y'ayuc janch cixyjot huinijot, chi
anajty myajyeegy yi mmibijcin.
Ca' mjäydigoyipy yi oybi ayuc
huidibi nyajnimaaayb, huidibi
ayuc mbanicxyp mbayöyp. ⁷Ca'
mmijpidägxy yi nigoobi'ayucity
huidibi ca' choobaady ma Dios.
Panicxi' payöyi' Dios ytiy'ajt.
⁸Jac'oy co n'ixpijcm Dios y'ayuc,
ca'ydí co ninicx ymic'ajt nbaatim.
Co yajyujctäy jäy ñinicx, chi ñinicx
ymic'ajt paady jéyi. Co n'ixpijcm
nguyduunim Dios ytiy'ajt, chi
tiy'ajt nbaatim nej ya naaxhuiñ
ndzinaayim, etz nañ jadu'n nbaatim
jadüg jugy'ajtin ma Jesús co anajty
n'o'cim. ⁹Jada tiy'ajt huidibi ti
nyajnimäy, janch tudägy jada,
jébi ngöbijctaayim, e nidüg nidüg
jébi mibijccixy. ¹⁰Paady nduunim
n'ayoohuim oy pin xycal'ixaanim.
Njijp'ijxim co je Dios huidibi
jugy'ijtp xyajnidzögaanim n'alma.
Jéyi yajnidzögipy ajcxy y'alma
huidibi mijpidaacip Dios y'ayuc.

¹¹Yajnimaa' yi migügtijc huen
cuydundaaygixy jada ayuc.
Yaj'ixpic jada tiy'ajt. ¹²Huen jäy
ajcxy m'ayuc xymijpidaaci, oy
miich mutz anäcinity. Myegipy
ijxpejt ma migügtijc nej jéb huaad
ycapxcixy ymiydaaccixy, nej jéb
huaad ytungixy, jadu'n nej jéb
huaad oyjäy'ajtin tungixy, jadu'n
nej jéb huaad mibijcin yajtungixy
ma Dios, jadu'n nej jéb huaad huädz
yhuinma'ñ miid'ajtcixy. Co jadu'n
mdunipy, huin'it ajcxy mijpidägipy
miich m'ayuc. ¹³Mabaad hich
anajty nicxy ma miich, capx Dios
ñecy ma yi naymujctac, capxhuäcx
etz yaj'ixpic yi tiy'ajt. ¹⁴Yajtun
yi huinj'ajt cuje'ajt huidibi Dios

xymoy je taabi je mibijcpidijc mijtungmiidpi xycinixajy, e xy'ayucmoy xymic'ajtmoy ajcxy miid je Espiritu Santo ymic'ajt.

¹⁵Naybidägi yajcopijc tüg'óciy huidibi ti nyajnimäy, e niguëxigipy mayjäyduum co ti yajxon m'ixpicy je tiy'ajt. ¹⁶Nayguend'adii miich ooy ci'm, nañ jadu'n naygüend'adii ma yi Dios ytiy'ajt, ca' m'ixmach Dios y'ayuc. Co miich jada mdunipy ci'm anajty nayajnidzögyii, nañ jadu'n anajty myajnidzoocicy huidibi anajty ajcxy amidoo'ijtp miich m'ayuc.

Nej jëbi huaad migügtijc m'ihuijipy mgapxhuijipy

5 Ca'p huijijp m'ojjp mij'anäctijc. Oy'amy ihuijicy capxhuijicy jadu'n nej jihuüy mdeedy'adyii. Nañ jadu'n yi yujyecytijc ihuijicy capxhuijicy oy'amy jadu'n nej jihuüy mgi'mjuugy mgi'mmigüg. ²Yi mij'anäctijc ajcxy töxyjäybi nañ jadu'n oy'amy m'ihuijicy capxhuijicy, jadu'n nej jihuüy y' ajcxy mdaj'adyii mditz'adyii. Yi töxy'anäctijc ajcxy mutz'anäcnip miid'ijtcicy miid tudägyi mjet mhuinma'ñ.

³Huen yi mibijcpidijc ajcxy yajmij'adipy etz pubedipy yi töxyjäydijc ajcxy co'ögyi, huidibi janch ni ypin ycaca'ty. ⁴Pen jim töxyjäydijc co'ögpyi huidibi miid y'ung etz y'oc'ung, huen ajcxy jaty nej ytaj ñambiid yajmij'adipy, huen oybi yajhuimbidity miid ytaj etz ñambiid. Com yi jadu'mbi huinma'ñ Dios yjäygidacpy. ⁵Je töxyjäy co'ögyi ca'p pin tim miidity, yi'

yjijp'ijxyp co Dios ypubediiyb etz Dios ymibijctzooyb y'ojadajtpy jabom jabom xiim tzuum. ⁶Je co'ögy töxyjäy huidibi tzinaayb miid mayñax xondaacin, jadu'n Dios yajnaxyii jadu'n nej jihuüy y'ögity ytigoyity. ⁷Yajnimaj' ajcxy huen cuydungixy Dios ytiy'ajt, jigix ca' jibic ajcxy yajnigapxy. ⁸Pen ji pin huidibi yajmij'ajtp Dios, e ca' pubeda'ñ y'amigüg, pen ca' y'ung ytöxyijc yajxon icy may'aty, ca' y' cuyduni Dios y'ayuc ytiy'ajt. Nigi anajty yjibicity nej ti y'idich ca'lydi jadu'n nej huidibi ca' ymibicy.

⁹⁻¹⁰Yi töxyjäy co'ögyi ajcxy tiibi ytugi'px jimijtiy, jëbi mgojayiyyi yxi ma yi lista huidibi yi mibijcpidijc ypubedamyb. Yi mibijcpidijc ypubedamyb pen tüg ñäy anajty miiddzinäy, pen oyjot oyhuinma'ñ ymiid, pen ti y'ung yajxon yajyeeegy, pen ti migügtijc mi'oyjäy'aty, pen ti may'ajt tuñ miid Dios yjäy, pen ti pa'ayooy huidibi ayooob huidibi jottigooyb, pen ti yajtüyöy yajxon nej ytiy'ajtity.

¹¹Yi co'ögy töxyjäy mutz'anäcnibi ca' mgojayiipy yxi ma yi lista huidibi yi mibijcpidijc ypubedamyb. Pen capxytumb co tuna'ñ miid Cristo ycixpi tijaty tung ma naymujctac, ycajegyity co je oybi anajty yam y'octumyb, chi nijot'ajtni ypigaani, chi ytung ixmajtznip. ¹²Co yi mibijcpidijc ajcxy ca' jäygidacpi y' ytung, chi jibic ñajjihuüy co ca' cuyduñ y'ayuc nej ti ycapxytuñ miid yi Cristo Jesús. ¹³Jadügnax ca' ytung yajcopicy, jëyi yhuidijtni jayjiin jaydijc, e ca' y'i'yity, nañ jadu'n ymigüg nigapxni ni'ojiiyñi, capxni

miydaacni huidibi ca' y'oyity.

¹⁴Ndzojpcyich co yi töxyjäy co'ögy mutz anäcniibi huen pijccixy, huen tzinaaygixy jugy'ajtcixy yajxon, huen ungl'ijxcixy anäc'ijxcixy, huen yajxon cuend'ajtcixy yjiin ytiç, jigix ca' ajcxy nihuambediib ni'ojihuiiyb huidibi ca' Dios y'ayuc ixaani midohuaani.

¹⁵Nijëjity töxyjäy ajcxy co'ögy pi ti ixmajtcixni Dios y'ayuc ytiy'ajt, e ti ajcxy jiptigiyiigixni yi mujcu' yhuinma'n.

¹⁶Pen ji mibijcpidijc yëydijcpi o töxyjäyb miidity y'ajuugy y'amigüg co'ögy pi, yi' je' paatip ixipy may'adipy je y'ajuugy y'amigüg co'ögy pi, e ca' yaj'idipy ma yi mibijcpidijc nigixp. E jadu'n je' huaad je mibijcpidijc ajcxy pubejtcixy co'ögy pi ca' p ti tim miidity.

¹⁷Yi' ajcxy huidibi nigohuajc'ajtp yi mibijcpidijc huidibi yajxon tumb capxpaady y'idipy. Nigi ajcxy capxpaady y'idipy huidibi Dios y'ayuc capxhuäcxip etz yaj'ixpicy.

¹⁸Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo miy co yajpajc'ada'n yi trigo tim." Nañ jadu'n jadüg'it yjaybetyity: "Yi huidibi tumb paatip yi' ymujun." Jadu'n jada ayuc yhuimbizimy: Yi' huidibi yaj'ixpijcp Dios y'ayuc paatip huen yajmujuy.

¹⁹⁻²⁰Ca' mic'amy mdiydunipy pin tungmiidpi ma yi mibijcpidijc pen tügpajc huidibi xihuip. Ca' mdiydunipy pin tungmiidpi ixti cooni metz o tugig testigo yquëxigipy pen janch ti ytundigooy. Pen ytundigooy yi huidibi

nigohuajc'ajtp, capxidzim mayjäydumb jigix jacjadyi chigi'n pijccixipy. ²¹Jada tiy'ajt miich nyajnimaaayb, Dios Cristo Jesús etz yi' y'angeles ajcxy huidibi Dios ti huin'ijxcixy nidiy'ajt'ajtcixy co yjanchity jada ayuc. Co mbanicxp jada tiy'ajt, ca' huin'ixpety mdiydunip mdzaachytunip mibijcpidijc. ²²Ca' mic'amy mginixajipy co myajtungbiga'nip jäy huidibi ca' m'ixy'adyi. Ycajcyity ypcytunipy, e tü'ciy mbocycähuangixy miich miid yi'. Miich nayguend'adii jigix ca' mbocycähuipy.

²³Miich Timoteo, pen pijcp mjot, tzo'y'adii hueen vino, com jac'oy yi' ca'lydi co m'ügipy huädz ni.

²⁴Jadyi jäy huidibi jibic-huinma'n miid yajnejhuihuipy yi' ajcxy yjibic-huinma'n ma anajty ca'ni yajtiyungixy. Jacjadyi jäy ca' yajnejhuüy yjibic-huinma'n ixti cooni yajtiyungixy. ²⁵Nañ jadu'n jadyi jäy yajnejhuihuip co oyjäy'ajtin anajty ti tungixy, jacjadyi jäy ca' mic'amy yajnejhuihuipy co oyjäy'ajtin ti tungixy. Yi oyjäy'ajtin ca'p yi' yhuimipy coyuch.

6 Tüg'öciy tumbidijc huidibi ajcxy mibijcp huidibi ajcxy ijtp cojuyiy codoogiy, huen yajxon yajmij'ajtcixy yhuindzin. Pen ca' jadu'n tungixy, chi je huingjäydijc jibic nigapxaani ni'ojihuaani yi Dios etz yi' ytiy'ajt. ²Pen yi tumbi miid yhuindzin huidibi yajmij'ajtp Dios, ca' y'oyity co nixigipy yajxigipy yhuindzin. Huen ajcxy nig yajxon yajmij'ajtcixy, com hue' je' Dios yjäy. Yi huidibi nihuindzin'ajtp

ypadamyb je oybi huidibi je'
ytumbi ytung'ajtpy. Jada tiy'ajt
yaj'ixpic etz capxhuäcx.

Jotcujc'ajtin nbaatim ma Dios ytiy'ajt

³⁻⁴Pen ji pin huingbi tiy'ajt
yaj'ixpicy huidibi ca' ñaybadyii
miid je Huindzin Jesucristo
y'ayuc ytiy'ajt, e ni ycanaybadyii
miid je tiy'ajt huidibi iich ajt
nmijpidaacim, hue' jada nej tüg
jäy huidibi amij agixip huidibi
ca' ni ti nejuüy. Chachnijot'aty
tzip capx, e jadu'n yhuimbizimy
jada tzip capxy co migüg ca'
yaj'oy'ixy, chi ñaymidziptzoongixy
nihuambejtcixy etz jibic nigapxcixy
ymigügtijc. ⁵Yi jadu'mbi jäy huidibi
ca' mijpidägy Dios ytiy'ajt cojpy
ymacxpy tzip capxy huidibi ca'
ycixy ytigoy. Yhuinma'nydigoy
ajcxy, ca' huinjihuüiygixy tiy'ajt.
Hue' ajcxy yaj'ixpicy Dios y'ayuc
miid co ycomeen'adaangixy.
Puhuäctuat miich jadu'mbi jäy
ajcxy. ⁶Co Dios y'ayuc ytiy'ajt
nguydunim, huin'it jotcujc
ndzinaayim, etz nbaatim oy'ajt
mijpi. ⁷Ni ti iich ajt ya naaxhuiñ
ca' ti nmimiinim co nma'xung'ajtim,
nañ ni ti ngaminicxim co n'o'cim.
⁸Pen nmiiid'ajtim caayin uucin
huit tucxy, jëbi njotcujc'ajtim
miid yi'yi. ⁹Je' ajcxy huidibi ooy
nijot'aty comeen'adii, hue' je'
ajcxy jibic tumb ajcxy yähua'ñ.
Je' ajcxy chachtunamyb huidibi
ca' oyhuinma'ñity, huidibi
nayjotmayduunip. Ayo'n ajcxy
ypadamyb, tigoyamb ajcxy y'alma.
¹⁰Yi meeñy'adzojcim yi' je' yi
jibic-huinma'ñ cop'ajtip. Miid yi
meeñy'adzojcim may yi jäy huidibi

jäydigoy Dios ytiy'ajt. Hue' je' ajcxy
nayjotmayduunip.

**Timoteo, tiydudägy
mdzinähuipy miich**

¹¹Timoteo, Dios yjäy, cöguëg
yi jäy huidibi miid yi jadu'mbi
jibic-huinma'ñ. Tiydudägy
mdzinähuipy, cuyduni Dios
y'ayuc ycötujcin, mijpidäg Dios
y'ayuc ytiy'ajt, tun oyjäy'ajtin,
mihuindina' yi tung, miid'at mjet
mhuinma'ñ yung naxy. ¹²Mic mjet
mhuinma'ñ pidäg ma Dios ytiy'ajt,
ca' mjetmetzcüy. Tun jadu'n nej
jäy huidibi nayboy'icquixigixy
naymic'ixigixy. Nijot'at cixyot
huinjot yi jugy'ajtin huidibi
m'alma ypadamyb ma Dios. Dios
xyajni bicy jigix mgapxhuäcxip jada
tiy'ajt. Ti miich mgapxypidzimy
nej mmibicy mayjäyjoty.
¹³Dios je huidibi yajjugy'ajtaayb
tüg'öciy, yi' nidiy'ajt'aty co ooy
ycopicyity jada ayuc jadu'n nej
cham nyajni maayb. Nañ jadu'n
je Cristo Jesús je huidibi tiy'ajt
capxypidzim ma Poncio Pilato
ñidiy'ajt'ajt co oy ycopicyity jada
ayuc jadu'n nej cham nyajni maayb.
¹⁴Copicy cuydun jada ayuc
ane'min. Huädz mguydundähuipy,
huädz myaj'ixpigipy je tiy'ajt
jigix ca' pin jibic ni'ojihuipy Dios
ytiy'ajt. Jadu'n mdunipy ixti
cooni iich ajt nHuindzin Cristo
Jesús ñayguëxigiiyb ya naaxhuiñ
jadüg'oc. ¹⁵Dios yajni guëxigamyb
Cristo Jesús mina anajty je tiempo
yhuaad'aty. Dios je' je mij'ane'mbi,
je mijpi rey, etz je mijpi huindzin.
Yi' je' je Huindzin Dios huidibi
ane'mdaayb. ¹⁶Yi' je' tügpaic je

jugy'ajt cop ymiid. Yi' ijtp ma je tiicxin je jajin huidibi ca' pin huaad ninej mihuingoñ. Janch ni tüg jäy ti ca' icy, e ni ca' ixalñ. Yi' je' cömay'idipy etz yi' ane'mdaayb tüg'óciy. Amén. Jadu'n jada.

¹⁷Yi' comeeñydijc huidibi jadachambi tiempo tzinaayb jugy'ajt, nima' miich yi' ajcxy co ca' huaad amij agix ñayjihuíyigixy, ni ca' nigi adzojccixy anaxy yi' meeñ huidibi jadu'ñyi tigoйдаayb. Huen ajcxy mijpidägy yi' Dios huidibi xymooyim tüg'óciy mijmay mijcajee jigix njotcujc'ajtim. ¹⁸Huen yi' comeeñydijc oybi tungixy, jigix ajcxy cömay ypidzimipy co oyjäy'ajtin tungixy. Huen ajcxy pa'ayoogixy ymigügtijc

huidibi ca' ti miidity miid oyjot oyhuinma'ñ. ¹⁹Co ajcxy jadu'n tungixpy, chi padaangixy je oybi huidibi miimb gidaacp. Ypadamyb ajcxy je jugy'ajtin huinixiibi.

Timoteo, mijpidäg jada tiy'ajt

²⁰Timoteo, mijpidäg jada ixpijcin huidibi ti myajni'bic'aty. Ca' mmijpidägipy yi' nigoobi y'ayucity, yi' huidibi ca' Dios huindzigiy. Ca' mmijpidägipy yi' jäy huidibi ajcxy naybidaacip jadu'n nej jihuíy ooy ycohuinma'ñity, e ca' yjanchity, huidibi midzip'ajtp Dios ytiy'ajt. ²¹Jadu'n nej nije' ajcxy panixcixy jada ca'pi ytiy'ajtity, e jadu'ñi ñitigoy.

Huen Dios je oy'ajtin tuñ miid miich. Amén. Jadu'n jada.

2 TIMOTEO

Yi Mimetzpi Necy Huidibi San Pablo Yajniejx Timoteo

1 Hich Pablo, Dios ti xyajni'ibicyich huen Cristo Jesús xy'apóstol'adyiijich. Yi' ti xyquexyich co yi' y'ayuc ngapxhuäcxibich. Dios ti yajhuinhuaniiygixy yi jäy co pin mijpidägiy Cristo Jesús yajjugypigipy co anajty ti y'ögy. ²Ooy iich miich ndzocy njihuüy nej ngi'm'ung'adyii. Dios Teedy etz iich ajt nHuindzin Cristo Jesús huen tuñ oy'ajt may'ajt miid miich, huen xypa'ayooy, huen xyyajjotcugiy.

Pablo jotcujc co Timoteo ti mijpidägy Dios y'ayuc

³Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios miid miich ycixpi jabom jabom xiim tzuum. Janch cixyjot huinjot nyajmij'atyich Dios, paady ooy oy najjihuiiyijich. Nañ jadu'n n'ap ndeedy jecy'ajty janch cixyjot janch huinjot yajmij'ajty Dios. ⁴Ooy miich nicxy njaco'ixihuañ jigix njotcugihuibich. Ooy njajäymejtzcoodyiijich nej miich mjiy myaax miid iich ycixpi je taabi jim ndzoönich.

⁵Njäymejtzpich jadu'n nej miich mmijpidägy yi Dios janch cixyjot huinjot co xymiid'ityich. Nañ njäymejtzpich co jayijp mnambiid Loida etz yi mdaj Eunice mijpidacy Dios janch cixyjot huinjot. Minambich co chambaad miich mmijpidägy Dios janch cixyjot huinjot.

⁶Jada nyajjäymejtzcootpy: Nijot'at yi mic'ajtin huidibi Dios ti xymöy, je taab anajty Dios ytung mnimadzaani co ngi'nixajy, jigix Dios ytung jacyajxon mduunipy. ⁷Dios ca' xyajhuindzigy'aty, hue' xyajjotmic'ajtp. Miid Dios ymic'ajt jëb mnaychójcigixy mnayjihuiiyigixy, jëb oyjot oyhuinmañ myajtuungixy. ⁸Paady ca' mmidzöyduniiyb iich ajt nHuindzin Cristo Jesús ytiy'ajt. E nañ ca' xymidzöyduniiybich co ti nbujxtjic iñäyich miid iich ajt nHuindzin Cristo Jesús ytiy'ajt ycixpi. Mecxtuc yi ayo'n yi tzaachypi huidibi myajnajxpy co mgapxhuäcxy yi Cristo Jesús ytiy'ajt. Dios xyajjotmicpigipy. ⁹Canan paady ti xyajni'dzoocim n'alma co ajt ndzach'oyjäyity. Com

Dios jadu'n ti yajnihuinmayïy tuna'n oy'ajtïn miid iich ajt ycixpi co quejxy Cristo Jesús ya naaxhuiñ. Dios jayijp ti huinmay co quexa'n je Cristo Jesús ca'ni anajty pin ya naaxhuiñ. ¹⁰Dios ti cham jada oy'ajtïn yajniügëxy co yaj'ijxy ya naaxhuiñ iich ajt nnihuambi nyajnidzoocpi, je Cristo Jesús, huidibi ti yajcödïgoy yi o'cin. E ti yajnejhuïy yi jäy miid yi' yti'ajt nej jëb huaad ndzinaayim huinixii ma yi Dios y'it oybi.

¹¹Dios ti xyajni'bicyich co y'ayuc ngapxhuäcxich, etz xy'apóstol'adyiijich jigix nyaj'ixpïgïpyich yi huidibi ajcxy ca' yjudíojäyity. ¹²Paady ycixpi tzaachypi nbaadyich. Per ca' ndzo'yduñich, com iich nejhuïyb pin nmïjpidacpyich, nejhuïybich co yi' ymiid cötujcin etz mic'ajt jëb xycuend'adïpyich, ixti huin'it xii minaa Cristo Jesús tiyduna'n yi naaxhuiñyjäy.

¹³Mïjpidäg je tiy'ajt tiydudägypi huidibi ti nyaj'ixpicy, jada je' tiy'ajt ijxpejt nej jëb mbanicxy mbayöy. Yajmij'at Cristo Jesús, ca' m'ixmajtzi yi' yti'ajt, mdunipy oyjäy'ajtïn jadu'n nej yi' tzocy. ¹⁴Mihuindina' yi oybi ayuc tiy'ajt huidibi ti nyaj'ixpicy. Huen je Espíritu Santo huidibi miich miid jotjoty huinma'nyjoty xypubedipy xypudïgïhuipy.

¹⁵Ti jada' mnejhuïy co tüg'óciy yi mibïjcpidïjc jim Asia naaxjot ti ixmach je tiy'ajt jadu'n nej ti nyaj'ixpicyich. Yi Figelo etz Hermógenes etz jacjadyii jadu'n ajcxy ti y'adihtcixy. ¹⁶Yi Huindzin Jesús yi' pa'ayoohuipy yi Onesífero

yjuugy ymigüg, com ooy iich mij xypa'ayooyich etz xypubejtyich, ca' xymidzo'yduñiijich co nmach'iñäyich. ¹⁷Co Onesífero oyja'ty ya Roma, chi mictägy xy'ixtaayich cooni xypatyich. ¹⁸Huen yi Huindzin Dios ypa'ayoohuïgy Onesífero co anajty Cristo Jesús tiyduna'n naaxhuiñyjäy. Huädz miich mnejhuïy nej yi Onesífero xypubejtyich jim Efeso.

Huen Cristo Jesús may'ajt tunipy miid miich Timoteo

2 Miich Timoteo, jadu'n njihuïy nej ngi'm'ung ngi'm'anäg. Huen Cristo Jesús may'ajt tunipy ma miich, huen xyajjotmicpïgïpy. ²Miich ti mmïdoy may'ayuc tiy'ajt huidibi ti nyaj'ixpicy. Jada ayuc mayjäy midoy e jëb ajcxy nidiy'ajt'ajtcixy. Jada tiy'ajt miich mgapxnaxipy mgapxhuäcxipy ma jacjadyii yëdyjctïjc huidibi oyhuinma'n ymiid, jigix yi' ajcxy nañ jadu'n capxnaxipy ma jacjadyii jäy.

³Miich mimadäg yi ayo'n yi tzaachypi huidibi mminajxyp myajnajxyp, jadu'n nej tüg Cristo Jesús ysoldado huidibi oy tumb. ⁴Yi soldado huidibi soldad'ajtp ca' huaad huingbi tung nicxy tuñ, jigix je' yjotcujc'adïpy pin anajty ti ypidägyii soldado, nañ jadu'n miich adügïjïp Dios ytung mdunipy. ⁵Pin jäy nayboyicquipxip ca' yi' premio pada'n, oy ti yjamadägy, pen ca' cuyduñ yi tiy'ajt. Nañ tzocy co miich mguydunipy yi tiy'ajt. ⁶Je jäy huidibi tumb ma ycam ytu' je' jayijp huidib huen yajpidïgy yi utztiim huidibi ti

y'ity. Nañ jadu'n miich co Dios ytung mduunip mbaadip yi oy'ajtin.

⁷Yajxon mhuinmayipy huidibi nyajnimaaayb, yi Huindzin Cristo Jesús xyajnejhuidähuiipy tüg'óciy je' ytiy'ajt.

⁸Jäymetz jadu'n nej Jesucristo, yi David y'ap y'oc, y'o'cy, chi Dios yajjugypijcy jadu'gtocy. Jada je' je ayuc tiy'ajt oybi huidibi nnajzcapxiybich. ⁹Miid y' y'ixpi n'ayooyich etz tzaachypi nyajnajxyich. Nbuixtijc inäyich jadu'n nej jihuiy njibicjäyich. Oy njapujxtijc inäyich ca' nejity, Dios y'ayuc ca' yi' mach y'ity, yajcapxhuäcx'adiitzp nigi. ¹⁰Paady iich tüg'óciy jada tzaachypi ngöbictäy nmeextujctäy, jigix jëbi je jäy ajcxy huidibi Dios ti yhuin'ijxigixy chinähuiipy ajcxy huinixii ma yi' y'it oybi, Cristo Jesús yajnidzögiiib yi' ajcxy y'alma.

¹¹Tiy'ajt jada ayuc:

Pen ti iich ajt n'o'cim miid
Cristo y'ixpi, yi' miid
ndzinaayim tzajpjoty.

¹²Pen nyajnajxim tzaachypi ayo'n miid Jesús y'ixpi, nañ quipxyi miid yi' n'ane'maanim. Pen ca' ya Jesús y'ayuc ngöbictim, nañ ca' jiiib tzajpjoty xycöbigaanim.

¹³Oy iich ajt nyajmij'ajtim Cristo Jesús o ngayajmij'ajtim, Dios y'ayuc y'ayuc. Com ca' huaad yci'm ayuc yajxigy.

**Naybidägi cixyot huinjot
ma Dios ytiy'ajt**

¹⁴Yajjäymejtzcood yi mibijcpidijc jada tiy'ajt huidibi ti nyajnimäy.

Nima' je jäy ajcxy co je Huindzin Dios ca' oy'ixy tzip capxy ayuc huidibi ca' choobaady. Miid yi tzip capxy ca' ni ti oybi nbaatim, jëyi yajhuinma'nydigoy huidibi amidoolijtp. ¹⁵Naybidägi cixyot huinjot ma Dios y'ayuc ytiy'ajt, nej jëb huaad cömay mbidzimy ma Dios, jadu'n nej Dios ytumbi huidibi ca' ni ti midzöyduyiyi, huidibi Dios y'ayuc ytiy'ajt yajxon yajhuinjihuydaayb ymigügtijc.

¹⁶Ca' mgöbigipy yi ayuc huidibi ca' ytiy'ajtity, yi nigoob ayuc huidibi yajtüyöyp mayjäy ajcxy, yi tiy'ajt huidibi ca' Dios ytiy'ajt'adyii.

¹⁷Yi huidibi ajcxy y'ayuc ca' ytiy'ajtity yajhuinma'nydigooyb ymigügtijc. Yi' ajcxy miid jibic ayuc yajhuinma'nydigoy yi mayjäy ajcxy, jadu'n nej pützpa'm huidibi ninixc jicxp önyädgy. Jadu'n nej ti yjaty miid Hemeneo etz Fileto co ajcxy yhuinma'nydigooy. ¹⁸Yi' ajcxy anajty Dios y'ayuc cuyduuni, chi oyhuinma'nydigooyñi. Chi ajcxy ymináangixni co je tiibi y'öccixni, ti ajcxy je' yjugypicy, e jadu'n ajcxy yajhuinma'nydigoy nijjity jäy. ¹⁹Huidibi Dios ti cojy ti macxy, niminaxii ycacixy ycatigooy, com yi' ytiy'ajt ijtp yi' huinixii. Tiy'ajt jada co yi Huindzin Dios y'ijxcaypy pinjaty yjäy'ajtpy. Tüg'óciy pin mijpidacp yi nHuindzin Jesucristo y'ayuc, huen jijphuäctüdy yi jibic-huinma'n yi jibic-tung.

²⁰Ma tüg mij comeenydijc jim oori taasi, oori texy, etz oori cuchara, etz tijaty oyjatypi. Nañ ymiid jim naax taasi, naax texy, quipy cuchara etz jactijaty ca'p y'oyjatyity. Yajtuñ yi oori taasi etz

oori texy ma tügi caayin uucin oybi. Yajtuñ yi naax taasi etz naax texy oyñiminaa. ²¹Jadu'n yi' pin jäy jibic-huinma'n ixmajtzp etz tuñ oyhuinma'n, jadu'n yi' nej oori taasi oori texy. Cömay'idip yi' ma yi Dios. Huädz yi' yjot yhuinma'n, jëbi nHuindzin'ajtim Dios yajtunipy ma tüg'óciy oybi tung.

²²Ixmartz miich yi yujcyec'anäg ajcxy yjibic-huinma'n. Tudägy mdzinähuipy. Yajmij'ajtcix Dios cixyot huinijot. Mdunipy oyjäy'ajtin. Ixmartz yi tzip. M'ojadadipy yi Huindzin Dios miid oyjot oyhuinma'n. ²³Ixmartz yi nigoobi'ayucity yi loci huinma'n, ca' yi' y'oyity. Mnejhuyiyb co yi nigoobi'ayuucity tzipcojp capxycojp yi'. ²⁴Yi Huindzin Dios ca' yi' tzocy co yi' ytumbidijc nicxy tzip capxy yajtzondägy. Hue' janchity tzocy huen jäy'ajtcixy yung naxy miid tüg'óciy jäy etz pe'cy y'idipy miid yaj'ixpijcin. Nañ chojcpy co mimecxtugipy ymügütijc ajcxy. ²⁵Miich miid yung naxy mjot mhuinma'n capxhuj je jäy huidibi midzip'ajtp je tiy'ajt. Ycadimjecyity co Dios ytiy'ajt nijothuimbijtcixipy, e nejhuyigixyipy je tiy'ajt oybi. ²⁶Co anajty ajcxy ti ymejtzcixy yhuinma'n, chi ajcxy ycöguëgiyb je mujcu' huidibi ajcxy ycapxymidooyb ma anajty ymiid'ajtcixy cijoty etz ycapxymidoogixpy yi Dios.

Jäy jotmay miid y'idaangixy

3 Miich mnejhuyiyb ma je xii tiempo anajty ycixaani jadaanip ayo'n, je jäy ajcxy jotmay miid y'idaangixy. ²Ji adipy jäy

huidibi adzojcp, huidibi amij agix nayjihuiyiy, jäy huidibi ameeñ, jäy huidibi ci'm naygömayiib, huidibi oyñinej capxtigooyb ma Dios, jäy huidibi ca' capxymidohua'n ytaj yteedy, jäy huidibi ni ti ca' jäygidäga'n, jäy huidibi ca' yajmay'aty Dios. ³Co anajty tiempo ycixaani, ji adipy jäy huidibi ca' ymügüg ixa'n tzoga'n, jäy huidibi ca' pa'ayo'n miidity, jäy huidibi ymügüg nihuambejtp, jäy huidibi oy ahua'nity, jäy huidibi midzip'ajtp yi oybi. ⁴Ji adipy jäy huidibi ymügüg agojix midundigooyb, jäy huidibi ytunamyb ti ytunamyb, ca' ajcxy tuñ cuendi capxhujin, jäy huidibi amij agix nayjihuiyiy, huidibi tzachnijot'ajtcixy mayñaxy xondaacin, e ca' cuyduna'n Dios ytiy'ajt. ⁵Ji adipy jäy huidibi naybidáacigixp jadu'n nej jihuiy ajcxy mijpidaaccixp Dios ytiy'ajt e ca' yjanchity. Chi ma ajcxy chinaayin ma ajcxy yjugy'ajtin ñiguëxip co ca' tiy'ajt yajtuñ. Cöguëg yi jadu'mbi jäy. ⁶Ma yi jadu'mbi jäy ajcxy jim choonity huidibi coyöyiyb conaxiib ma je töxyjäy huidibi ca' ytudägy, huidibi oy ypocyjäyity, huidibi jibic-huinma'n nijot'ajtp. ⁷Yi jadu'mbi töxyjäy ajcxy panixp payöyp canaagnax huinma'n, e niminaa ajcxy cahuinjihuihuipy yi Dios ytiy'ajt. ⁸Jadu'n nej Janes etz Jambres midziptzoon je Moisés, yi jadu'mbi yëydijc ajcxy nañ jadu'n midziptzoonip yi tiy'ajt. Jibicjot jibic-huinma'n ajcxy ymiid. Naybidägiib ajcxy jadu'n nej jihuiy cuydungixy yi tiy'ajt, e ca' cuydungixy. ⁹Ca' ajcxy

mimadägipy nej huin'ihinipy Dios yjäy. Niguëxägipy yi' ajcxy yjibic-huinma'n jadu'n nej Janes etz Jambres yjajty.

Tüg'óciy Dios ñecy Dios ci'm ti huinma'ñymöy je huidibi jaay

¹⁰Miich ti mhuinjihuiydäy nej iich ti nyaj'ixpicy Dios y'ayuc nej njäy'atyich, nej nhuinma'n nduunich, nej Dios nmijpidägyich cixyot huinjot, nej iich jäy nmimecxtucyich, nej oyjäy'ajtin nduunich, nej ti nmihuindinäyich Dios ytung. ¹¹Miich m'ixyp mnejhuiyb nej ti nyaj'ixhuidityich nej ti nyajpahuidityich, miich mnejhuiyb je ayo'n je tzaachypi huidibi ti nminaxyich ti nyajnaxyich jim Antioquía, jim Iconio, etz jim Listra. Jadu'ñyibaad yi ayo'n tiibi nbaadyich Dios ti xyñihua'n ti xycohua'ñich. ¹²Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyyaj'ixpicyich, nañ tim jadu'n ajcxy yaj'ixhuididipy yajpahuididipy. ¹³Yi jibic jäydjic huidibi naybidáacigixp jadu'n nej jihuüy cuydungixy yi tiy'ajt, e ca' yjanchity, nigü jibic y'ididzaangixy. Huin'iinaangixy ymigügtjic ajcxy, e ñayhuin'iinäänigixy ci'm.

¹⁴Miich Timoteo, ixmatz yi jadu'mbi jäy ajcxy etz panixc yi tiibi m'ixpicy, yi tiibi myajñibic'aty. Mnejhuiyb co iich ti nyaj'ixpicyich je tiy'ajt. ¹⁵Com miich pi'cni mutzn ti mjaty ti mnejhuüy yi Dios ñecy. Jada necy ti xyajnejhuüy nej huaad mijpidägy yi Cristo Jesús, e nigü jadu'n jeb huaad yi m'alma nidzoocin paady. ¹⁶Tüg'óciy Dios

ñecy Dios ci'm ti huinma'ñymöy je huidibi jaay. Paady jebi nyajtuunim co jäy nyajni'ixiiyim nyaj'ixpijicim. Jeb nyajtuunim co njijpcogapxiyim huidibi ca' ytiy'ajtity, etz co n'ihuijim ngapxhuijim. Jeb nyajtuunim co nyaj'ixpijicim nej jeb huaad tiy'ajt nbanicxim, ¹⁷jigix yi jäy ajcxy huidibi mijpidacp Dios ytiy'ajt, jeb ni'ixi' y'idipy, tunipy tüg'óciy oybi huinma'n oybi tung.

4 Ooy ycopicyity mido'mbic jada ayuc jadu'n nej cham iich miich nijayy. Dios etz iich ajt nHuindzin Cristo Jesús tiy'ajt yej co copicy jada ayuc. Cristo Jesús ytiydunamyb yi jäy ajcxy juugypi etz yi jäy ajcxy tiibi y'o'ccixy, e chi yajjugypigipy jadüg'oc ajcxy. Yi' yajtiydunamb ajcxy co anajty ymiñ ya naaxhuiñ pidäga'n y'ane'min. ²Nyajñibijcyp mgapxhuäcxip Dios y'ayuc ytiy'ajt hueñtimyminaajity, oy pin midoohua'n o camidoohua'n. Copicy co mjijpcogapxihuiipy huidibi ca' ytiy'ajtity, capxhuij pin yinjaty huenjaty camadacp, ihuij capxhuij yi jäy ajcxy miid Dios y'ayuc ytiy'ajt. Mimecxtuc etz yaj'ixpic yi jäy ajcxy. ³Minip je xii je tiempo ma jäy ajcxy ca' cöbiga'ni oybi tiy'ajt. Nijëjity miid yci'mdzojcin miid yci'm-huinma'n ixtahuip ajcxy yhuindzin huidibi yaj'ixpigib nej ajcxy jäygidägy, oy ca' ytiy'ajtity. ⁴Chi ajcxy anajty jijphuäctútucixni camidoohuäängixni je Dios y'ayuc ytiy'ajt. Mijpidaacni anajty ajcxy nigü yi nigoobi'ayucity. ⁵Miich huijy ycuje m'idipy. Mecxtujta' nej jäy ajcxy xy'ixhuidity xypahuidity. Yajñima' jäy ajcxy Dios ytiy'ajt, jeb

ajcxy mijpidägipy etz jothuimbidity
ajcxy Dios. Yaj'ixpic Dios y'ayuc
ytiy'ajt nej ypadyii.

⁶Jadu'n miich cham njacnimäy,
je' co ti yhuaad'ajtni je
tiempo minaa ndzinaanich ya
naaxhuiñ xyaj'ögaamich jäy, ti
nayxoxyiijich naydogyijich
miid Cristo Jesús ycixpi. ⁷Ti
iich ooy mic nmihuindinäy Dios
y'ayuccapxhuäcxii ma anajty
ypadyii. Ti nyajcixy nyajmayich
je tung huidibi anajty xypatpich.
Ooy ti nyajmij'atyich Cristo Jesús,
ni ca' ti n'ixmajchich yi' y'ayuc
ytiy'ajt. ⁸Cham njijp'ixypich co
Cristo Jesús je tiydumbi tudägypi
xycömayipyich jiiby tzajpjoty,
miid co tiydudägy ti ndzinäyich ti
njugy'atyich.

Pablo pijctzoy may'ajt ma

Timoteo co tzojc yminipy ma yi'

⁹Tun may'ajt tzojc yminipy
ma iich. ¹⁰Yi Demas ti iich yam
xycögueecni co yjactzojcpy yi
mayñax xondaacin ya naaxhuiñ.
Hue' ti ñicxy jim Tesalónica.
Crescente nañ hue' ti ñicxni Galacia.
Yi Tito ti ñicxy Dalmacia. ¹¹Jëyi
naydügpajc Lucas yam miid iich.
Co mminipy, miidminipy Marcos,
com ooy ti xychachpubetyich
ma Dios ytung. ¹²Yi Tíquico ti
nguexyich jim Efeso. ¹³Je jocxhuit
huidibi nyajhu'i'miyyich jim Troas
ma Carpo ytijc miminipy. Nañ
jadu'n mimindähuipy je necy. Je'
ooy ytimycopicyity yi pergamino
necy.

¹⁴Alejandro je ca'tzpi ti yi'
ooy mij xymidundigooyich. Yi
nhuindzin'ajtim Dios paatip nej

yajmidzogyii. ¹⁵Naygüend'adii
ca' miich yi' mmijyöybedipy, com
ooy mic ti jijpcogapxiy Dios y'ayuc
huidibi iich ajcxy nyaj'ixpijcpy.

¹⁶Co yi' oga'n xyxiyich ma
je mij tungmiidpi, naydüg
ayuc nmihuindinaayich. Nipin
xycapubejtyich, ñigi ajcxy
xycögueectaayich. Huen
Dios ocmeecxy nej ajcxy ti
y'idiitzcixy. ¹⁷Ca' y'ocnejty Dios
ti xypubetyich ti xypudigiyich.
Dios ti xyajjotmicpicyich, jigix
ngapxhuäcxtähuibich ytiy'ajt
ma tüg'öciy jäy. Jëb tüg'öciy jäy
huidibi ca' yjudiojäyity huen
mido'mbijtaaygixy Dios ytiy'ajt.
Dios ti xyñihua'ñich ti xycohua'ñich
ma yi' o'cin. ¹⁸Yi Huindzin Dios
yi' xyñihua'ñ xycohua'ñibich ma
tüg'öciy jäy huidibi ajcxy jibic-
huinma'ñ miid. Yi'xycuend'adipich,
ca' ni ti xyjadipyich, cooni anajty
njädyich jiiby tzajpjoty ma
y'ane'my. iHuen Dios cömay idipy
janch huinixii huinitempo!

**Pablo ymigügtijc
capxpooxixn yajniuguey**

¹⁹Yajnax iich ngapxpooxixn ma
yi Prisca etz ma Aquila etz ma
Onesifero yjuugy ymigüg. ²⁰Erasto ti
je' yhui'my jim Corinto. Je Tróximo
com pijcip anajty, iich je' n'ixmajch
jim Mileto. ²¹Tzojc mjatyminiy ma
ca'ni tiichpy ymiini. Yquejxyp ajcxy
capxpooxixn ma miich, je Eubulo,
je Pudente, je Lino, je Claudia etz
jacjadyii migügtijc.

²²Huen je Huindzin Cristo Jesús
xypubedipy xypudigihuipy. Huen
Dios tuñ may'ajt miid miich ajcxy.
Amén. Jadu'n ngapxcixyich.

TITO

Yi Necy Huidibi San Pablo Yajniejx Tito

1 Hich Pablo, Dios jada miid nduunich, Jesucristo xy'apóstol'ajtpich. Yi' ti xyquexyich ma yi jäy ajcxy huidibi Dios ti yhuin'ixyii, jigix ajcxy mibigipy yi' ytiy'ajt. Nañ nyajnimähuibich nej jëb ajcxy cuyduuni Dios ytiy'ajt. ²Jadu'n nduunich jigix co anajty y'o'ccixy, chi jadüg'oc yjugypfjccixipy e tzináaygixipy huinixii. Dios yajhuinhuaniiy je jäy ajcxy je jugy'ajtin huinixiibi, ca'ni anajty naaxhuiñybi chondägy. Jada tiy'ajt jëb nmijpidaacim com Dios ca' yi' y'aniidägy. ³Jada jugy'ajtin huidibi ijtp huinixii, Dios ti yajnejhuüy je jäy ajcxy cham co je tiempo ti yhuaad'ajtni, miid yi' y'ayuc huidibi ngapxhuäcxibich. Je Dios huidibi xyajnidzoocim iich ajt n'alma ti xyajni'bicyich co yi' y'ayuc ngapxhuäcxpyich. ⁴Miich Tito, cham nijayiy jadu'n nej jihuüy nijayiyich ngi'm'ung. Com tú'ciy nmij'ijxim nmijpidaacim Dios. Huen Dios iich ajt nDeedy tzajpjotpy etz Cristo Jesús iich ajt nihuambi yajtzoocpi tuñ may'ajt oy'ajt miid miich, huen xypa'ayooy etz xyajjotcujc'adipy.

Myajni'bigipy yëydijc huidibi jëb nigohuajc'aty ymigügtijc

⁵Paady iich miich jim Creta ñaaxjot nyajhui'my, jigix mjacyajni'ixihuipy je migügtijc jadu'n nej iich ca' ti nyajni'ixiydäyich ajcxy. Tügpi cajp nidüg nidüg myajni'bigipy yëydijctijc huidibi nigop'adiib nigohuajc'adiib yi mibijcpidijc, jadu'n nej ti nyajnimäy. ⁶Yi' myajni'bigipy yi huidibi ca' ti tundigoy; huidibi tüg töxyjäy miid, ca'p ycanaagity; huidibi y'ung ajcxy ca' nijot'aty mayñaax tzinaayin; huidibi y'ung ajcxy ycapxymidooyb. ⁷Copicy huidibi nigohuajc'adamb yi mibijcpidijc huen jäy'aty tiydudägy, ca' huaad ti tundigoy; huen yajxon cuend'adipy huidibi Dios yje'ajtpy; jäy huidibi ca' y'cöjuuñity; huidibi ca' yhuindzipity; huidibi ca' y'amügity; huidibi ca' chip'ixtäy; huidibi ca' y'adzocy. ⁸Yi' jëbi myajni'bigipy huidibi oyjäy'ajtin tuñ miid hueñyitimypinity; huidibi ooy y'amigügity; huidibi huijycujc; huidibi tiydudägy yhuinma'ñ; huidibi huindzigiib Dios; huidibi

ci'm vajxon naygüend'ajtip. ⁹Huen cixyot huinijot naybidáacigixy ma je ayuc tiy'ajt huidibi ti ixpijccixy, jigix jébi ajcxy jot'amijmöhuiipy jacjadyii jäy ajcxy miid tiy'ajt janchypi, e capxjotcidägipy ajcxy je pin ajcxy ca' ixal'n Dios y'ayuc.

¹⁰Com ji may judíojäy huidibi ca' ycapxymidoogixy, huidibi nigoobi tijaty ayuc tzachnimiydacp; huidibi ajcxy huin'iimb ymigügtijc, jadu'n nej yi' ajcxy huidibi minamb co copicy tüg'óciy mibijcpi huen yajtiy'ajtiy ymang ajcxy, jadu'n nej judíojäy tungixy. ¹¹Copicy co mgapxadugipy yi' ajcxy huidibi ymigügtijc yajco'iniiyb tüg jän tüg tijc; huidibi ajcxy yaj'ixpijcp mujuy; huidibi ca' tiy'ajt yaj'ixpijccixy.

¹²Nidüg yi' ajcxy cohuinma'n'ybi nigapxy ymigügtijc ymina'n co yi Creta jäy ooy ajcxy y'aniijity, ooy ajcxy huinducity, ooy ajcxy ñuuxity, ooy ajcxy ycaaxity. ¹³Tiy'ajt jadu'n nej jada cohuinma'n'yjäy ymina'n. Yaj'oj ajcxy mictägy, huen huinjihuüygixy vajxon Dios y'ayuc. ¹⁴Ca'p ajcxy mijpidaacipy yi judíojäy ycostumbre etz ni ca' ajcxy mijpidaaccip yi y'ane'min huidibi jäy ci'm ti nihuinma'n'aty, huidibi ajcxy ti jijpyöyduutni Dios y'ayuc ytiy'ajt.

¹⁵Pin jäy huadz yjot yhuinma'n miid, oy ti jacuyduñ costumbre, o oy ca' ti cuyduñ, Dios yjäygidacpy yi' co oyjot oyhuinma'n miidity. Pin jäy ca' huadz yjot yhuinma'n miidity, oy ti jacuyduñ costumbre, Dios ca' jäygidägy yi' com jibic ajcxy yjot yhuinma'n miidity, ca' ajcxy nej ñayjihuiiyigixy. ¹⁶Yi jadu'mbi jäy hue' ñaybidáacigixy

jadu'n nej jihuiy nej ooy Dios ytiy'ajt ajcxy mijpidaaci, chi ma huidibi ajcxy ytumyb ji yajniguëxcccixy co ca' ajcxy cuydungixy Dios ytiy'ajt. Dios ca' yi' oy iix ajcxy yhuinma'n, ca' ajcxy capxymidoogixy Dios, ca' ajcxy Dios ytung mihuaadity.

Nej jëb huaad chinaaygixy yjugy'ajtcixy

2 Miich huadz myaj'ixpigipy yi migügtijc nej jëb huaad cuydungixy Dios ytiy'ajt. ²Miich m'ihuijip mgapxhuijip yi mijjäydijc huen ca' ajcxy y'amügyjäy'adipy; huen huijycujc jäy'ajtcixy; huen miid'ajtcixy oyjot oyhuinma'n; huen mijpidaaccixy Dios ytiy'ajt cixyot huinijot; huen oyjäy 'ajtin tungixy miid huentimypinjäyity; huen ajcxy mecxtujcin yajtungixy ma yi chinaayin. ³Nañtityjadu'n mijjäydijc ajcxy töxyjäybi huen ajcxy jadu'n jäy'ajtcixy nej huidibi ajcxy Dios yajmij'ajtp; ca'p ajcxy ymigügtijc nigapxip ni'ojihuipy, ni ca' ajcxy nihuambedipy; nañ ni ca' ajcxy y'amügyjäy'adipy; huen ymigügtijc ihuijicixy capxhuijicixy miid ayuc oybi tudägyi. ⁴⁻⁵Yi mijjäydijc ajcxy töxyjäybi huen ihuijicixy capxhuijicixy yi mutz'anäg töxyjäydijc ajcxy nej jëb huaad chinaaygixy yjugy'ajtcixy; nej jëb huaad ytijc ñay yajmij'ajtcixy; nej jëb huaad tzojccixy jihuiygixy y'ung y'anäg; nej jëb huaad oyjot oyhuinma'n yajtungixy. Ihuij capxhuij yi töxyjäy mutz'anäcpi co huen tiydudägy chinaaygixy, ca' ti jibic-huinma'n ajcxy mibidzimipy. Huen ihuij capxyhuij ajcxy nej

jëb huaad yjiin ytiç cuend'ajtcixy yajxon; nej jëbi y'amigüg'ajtcixy, nej jëb huaad capxymidoogixy ñäy. Pen jibic-huinma'ñ anajty ajcxy ytumyb, chi anajty Dios ytiy'ajt yajniçapxy yajni'ojïy.

⁶Miich Tito, nañ jadu'n jaty iihuij jaty capxhuij yujcyeeçpidijc etz anäctijc nej jëb huaad oyjot oyhuinma'ñ yajtungixy, ca' huaad ytundigooygixy ycapxtigooygixy. ⁷Tito, tiydudägy mdzinähuipy, oyjot oyhuinma'ñ myajtunipy. Jim yi migügtijc iixpejt pigipy ma miich, nej jëb huaad ytungixy. Huädz ajcxy myaj'ixpigipy yi tiy'ajt, huijycujc m'idipy. ⁸Tito, m'iihuijip mgapxhuijip yi migügtijc miid oy'ayuc oyhuinma'ñ, jigix co pinjäy jijpcogapxihuaanip miich m'ayuc, chi tzo'ydu'ñ jihu'hua'ñ, e jadu'n ca' jadipy nej jibic xyñigäpçixixipy xyñi'ojïyigixipy.

⁹⁻¹⁰Je tumbidijc huidibi ijtp cojuyiy codoogiy, huen yhuindzin iimidoogixy capxymidoogixy nej ypadyii. Huen tungixy nej huaad yhuindzin jäygidägy, ca' adzo'nmay yjäy'adipy. Ca' meedzip tijaty yhuindzin yjë'ajtpy, huen yajmij'adipy yajxon yhuindzin, huen yajxon ytung tundaayi. Pen jadu'n ajcxy yhuindzin midungixy yajxon, huin'it cömay y'idipy yi Dios ytiy'ajt, je Dios huidibi xyajniçzoocim ajt n'alma.

¹¹Cham n'ijxim nnejhuiiyim nej Dios may'ajt ti tuñ miid tüg'óciy jäy ajcxy ycixpi, co ti yaj'oyiy nej jëb huaad hueñypinity pinjaty mijpidaacip yi' y'ayuc, ypadamyb ajcxy y'alma ñidzoocin co anajty y'o'ccixy. ¹²Dios cham ti

xyajnejhuiiyim pen tzögamb iich ajt n'alma, chojçpy co n'ixmajtzim je jibic-huinma'ñ huidibi Dios ca' jäygidägy. Ca' huaad ooy nijot'ajtim yi mayñaxpi tzinaayin ma jadachambi xii tiempo yjacyöy. Copicy ndzinaayim huijycujc etz tudägy, e nguydunim Dios y'ayuc ytiy'ajt. ¹³Njijp'ijxim mina Jesucristo, je huidibi xy'ane'mdaayim, ymiina'ñ ya naaxhuiñ jadüg'oc miid iich ajt ycixpi. Njotcugiyim iich ajt co n'ijxim ymiin miid y'oy'ajtin ymic'ajtin, yi Dios huidibi yajniçzögam iich ajt n'alma.

¹⁴Yi Cristo Jesús ti ñayoxyii ti ñaydoogyii co y'o'cy ma yi cruudz miid iich ajt ycixpi. Yi' ti xyjuybidzimim ma anajty yi mujcu' ci'am xymiid'ajtim, co anajty ti nbocytuunim. Yi' ti xyajpocyñihuätztaayim nidüg'óciy, jigix Dios xyjäy'ajtimip miid huädz jot huädz huinma'ñ, jëb nduunim oyyäy'ajtin cixyot huinijot.

¹⁵Tito, jada tiy'ajt migügtijc myajnimaydähuipy. M'iihuijip mgapxhuijip ajcxy yajxon. Dios ti xymöy cötujcin co m'ojipy pinjaty xycacapxmidoob, jëb ajcxy yi m'ane'min xyajmij'ajtip.

Huen mijnicxpejtcixy yi gobierno ytungmiidpi

3 M'iihuijip mgapxhuijip yi migügtijc huen capxymidoogixy yi gobierno ytungmiidpi etz cajpjäy ytungmiidpi. Huen capxymidoogixy jadu'n nej y'ane'myii ajcxy. Huen tungixy huidibi tiydudägyip huidibi ajcxy yaj'ane'mip. ²M'iihuijip

mgapxhuijip yi migügtijc ajcxy ca'p ajcxy ni pin nigapx ni'oj'huip, nañ ni ca' tzipcapxy ajcxy ixtähuip, huen ñaybidáacigixy amigüg, huen mimecxtujctaaygixy yi ymigügtijc ajcxy, huen nicy xyeemy jäy'ajtcixy miid yi mayjäy ajcxy.

³Jecy'ajty ma ca'ni anajty nmijpidaacim Cristo Jesús, hue' anajty nyajpaatim miid jibic-huinma'ñ. Ca' anajty n'hiimidoohuim ngapxmidoohuim. Je mujcu' anajty ti xyhuin'linim, paady anajty nniidigooyim ndüidigooyim. Ndzachnijot'ajtim mayñaxpi tzinaayin, ni ngajajtim anajty nej n'ixmajtzim yi jadu'mbi huinma'ñ. Jibic-huinma'ñ nduunim. Jadu'n njäy'ajtim nijot anajty n'idiitzim, nga'oy'ijxim anajty nmigügtijc. Paady jäy anajty xymiiddziptzoonim, chi naymijotma'tcootim miñ xyipy.

⁴Jadu'n anajty nduunim ixti cooni Cristo Jesús ñayguëxigiiyb ya naaxhuiñ, etz nnejhuiiyim jadu'n nej Dios iich ajt nihuambi yajtzoocpi may'ajt oy'ajt ti tuñ miid tüg'óciy jäy ajcxy ycixpi. ⁵Yi' xyajnidzoocim ajt n'alma canan co iich ajt ndzach'oyjäyity. Hue' je' jadu'n ti tuñ miid co pa'ayo'n ti yajtuñ miid iich ajt ycixpi. Ninigoob ti tuñ may'ajt oy'ajt miid iich ajt ycixpi. Chi yaj'oyiiyñi ajt njot nhuinma'ñ huinjemy miid je Espíritu Santo huidibi xyajtigiyyim njot nhuinma'ñ, e jadu'n ajt njugy'ajtin ndzinaayin chondaacni huinjemy. ⁶Dios ti yecy yi Espíritu Santo janch mijcajee ma iich ajt njot nhuinma'ñ. Jadu'n Jesucristo xytuunim, je huidi iich

ajt nihuaanim yajtzoocim. ⁷Yi' ti xyaj'ahuimbijtim tudägy miid je may'ajtin oy'ajtin huidibi ti tuñ co yi' ti y'ögy miid iich ajt ycixpi. Jëyi cham y'oy'ahuijxnity mina anajty nbadaanim je jugy'ajtin huidibi Dios miid huidibi ca' ycixipy ni minaa xii.

⁸Jada ayuc jada tiy'ajt ndzojcpyich co miich mnigapxpedipy. Ooy ycopyity co yi' ajcxy huidibi mijpidacp Dios huen oyjäy'ajtin tungixyp. Ooy y'oyity co oyjäy'ajtin tungixyp ajcxy. Yjäygidägipy yi jäy ajcxy miid je oyjäy'ajtin huidibi anajty ajcxy ytumyb etz ypaadipy ajcxy oy'ajt. ⁹Ixmatz yi jäy ajcxy huidibi nigapxy nimiydägy yi nigoobi'ayucity, yi huidibi ca' choobaady. Nañ jadu'n yi' ajcxy huidibi nigapxp nimiydacp huidibi ñi'ap'ajtpy ñideedy'ajtpy. Ca' mjijptigiyihuiipy yi tzip capxy ma yi judiojäy ycötujcin huidibi ajcxy ypanicxyp. Yi jadu'mbi tzip capxy ninigoob yi', ca' yi' ni ma choobaady, ca' jugy'ajt miidity.

¹⁰Yi jadu'mbi jäy huidibi tzip capxy ixtaayb, miid tüg'oc mejtz'oc myaj'ojipy pen ca' ycapxcöbicy, tim ix'oj, huen nicxy. ¹¹Mnejhuiiyb co yi jadu'mbi jäy ajcxy ti ixmajtzicixy je tiy'ajt, tundigooyb yi' ajcxy, ci'm jadu'n nayyajpocycähuiiygixy.

Pablo nimay Tito co miid naybadaanip

¹²Nyajnigüexipich nidüg, aver huidibi iich anajty n'ocquejxyp yi Artemas o yi Tíquico. Co yi' jim yjädipy, chi miich xyjatyñiminipyich mic'amy jim

Nicópolis com jim nyajnaxa'nñich yi tich poj tiempo. ¹³Co yi Zenas, yi huingaxpi, etz Apolo ajcxy jim yjädipy, quejxnajxcix miich yi', e mooygixy ytu'amgixpi ca'ydi ti yajmayajtcixy tü'am. ¹⁴Huen yi nmigügtijc'ajt xpijccixy nej jäy y'oyjäy'aty, huen pubejtcixy pñ tijaty yajmayajtp. Pen ca' jadu'n tungixy, Dios ca' yi' jäygidaacip yi' ajcxy yhuinma'nñ.

Pablo ycapxcíxy miid Tito
¹⁵Yi migügtijc ajcxy huidibi ya yquejxyp ajcxy capxpoocxin ma miich. Nquejxpich ngapxocxin ma tüg'óciy yi nmigügtijc ajt huidijaty jim yajmij'ajtp Cristo Jesús. Huen Dios mij may'ajt tunip miid miich ajcxy ycixpi. Amén. Jadu'nñyi ngapxcíxyich.

FILEMÓN

Yi Necy Huidibi San Pablo Yajniejx Filemón

¹ Hich Pablo etz Timoteo, ich ajt nmigüg, nijayiybich miich Filemón huidibi ooy ndzocyich, huidibi quipxyi miid nduunim. Nmach'inäyich miid co nyajmij'atyich Cristo Jesús. ² Nañ jadu'n nijayiybich yi Apía, ich ajt nmigüg töxyjäybi, etz yi Arquivo, huidibi capxhuäcx Dios y'ayuc tú'ciy miid ich ajcxy, etz tüg'óciy yi migügtjic huidibi naymújcigixp ma miich mdjic Dios ojadajtcixy. ³ Huen Dios Teedy etz yi Huindzin Jesucristo tuñ may'ajt oy'ajt ma miich ajcxy etz xyajjotcugfiygixipy.

Pablo capxpaady Filemón co mijpidägy Dios

⁴ Nyajnaxpyich Dioscojuyip ma Dios miid miich ajcxy ycixpi. Njatyimjäymejtzpich miich ajcxy jabom jabom co Dios nmibijctzooyich. ⁵ Ti ich ayuc nmidoy jadu'n nej miich mdzocy mjihuüy yi Huindzin Jesús etz tüg'óciy pinjaty yajmij'ajtp Jesús. ⁶ Nañ jadu'n nmibijctzooybich Dios miid miich ajcxy ycixpi, huen oyjäy'ajtin mdunipy miid je migügtjic, jadu'n nej Dios ti

xyajnejhuüy yi tiy'ajt jigix ajcxy tiy'ajt paadipy ma miich nej jëb ajcxy cuyduñ Cristo y'ayuc. ⁷ Hermano, ti ich ooy njotcugiyich miid yi m'oyjäy'ajtin huidibi miich mdumy co ti mbubety yi Dios yjäy.

Pablo pijctzoy tüg may'ajt ma Filemón miid Onésimo ycixpi

⁸⁻⁹ Njapijctzoohuamybich tüg may'ajt ma miich. Oy njamídidyich cötujcin huidibi Jesús xymooyich jëb nja'ane'my co miich mgöbigipy Onésimo oy'amy. Per ca' jadu'n n'ane'ma'ñ miid co ooy ndzocy ooy njihuüyich miich. Paady cham may'ajt nbijctzooyich ma miich co mgöbigipy yi Onésimo oy'amy. Hich Pablo, ti nmijjäyiyñich. Cham jäy ti xypidägyich pujxtigoty miid co ngapxhuäcxich Jesús y'ayuc ytiy'ajt. ¹⁰ Cham may'ajt nbijctzooyich ma miich co mba'ayoohuipy yi Onésimo. Jadu'n njihuüyich nej n'ung'adyiijich miid co yi' ti mijpidägy Jesús ya ma ich nbujxtjic'inäyich co ti nyajnimäyich Dios y'ayuc.

¹¹ Tiibi xii tiempo ñaxy co yi Onésimo ca' yi' ti xy'iimidoy

ti xycapxymidoy. Jadachambi janchtiy capxymidoohuam jadu'n ma miich etz jadu'n ma iich.

¹²Cham nyajniguexy Onésimo. Ooy njajihuüyich co yam nguexyich.

¹³Ooy iich yam njayaj'ida'ñich ma iich jigix ixypiy yam xymiidtuñich. Ytimyñipaapty ixypiy jadu'n nej miich xymiidtuñich ma yam nbujxtijc'iñäyich miid co ngapxhuäcxyich je jemybi oybi ayuc nej Jesucristo yjaty ayoooy.

¹⁴Per ca' iich n'a'ixiyich nicxy nyajhuí'myich, pen ca' miich jadu'n mīna'ñ. Ca'p ndzocyich adzip ahua'ñ tijaty miich mdunipy. Jëyi ndzocyich co miich oy'amy xypubedipyich. ¹⁵Ca' yjeyity paady ycixpi ti xycöguëgy jëbi mijpídägy Jesús. Hueeni xii tiempo ti y'ity ya, e cham co yhuimbidity ma miich, miid y'idipy jim huinixii.

¹⁶Ca' jadu'n m'ocmiid'ajtnip cham jadu'n nej jac'oyñipin cojuuyi codoogiy tumbi. Hue' je' mmií'adip jadu'n nej Jesús yjáy huídibi ooy mdzocy mjihuüy. Pues ooy iich yi' ndzocy njihuüyich. Jac ñigi cham miich mdzogipy mjihuühuipy miid co yi' cham y'oyjáyity, etz co cham mijpídägy yi Huindzin Jesús.

¹⁷Pen janch miich xymigüg'adyiijich cöbic yi Onésimo jadu'n nej iich miich ixypiy xycöbicyich. ¹⁸Pen ti yi' yinjaty huenjaty xymidundigoy o xyminucx'adyii iich miich

nmigüedipy. ¹⁹Iich Pablo, iich miich njaaybich nfirmajiyich miidich ngi'mgi' ngi'mletra. Hermano, nmigüedipyich nej Onésimo xyminucx'adyii. Oy iich yam ca' n'iibaady ngapxpaady co miich xyminucx'adyiijich miid co Dios ytiy'ajt ti mbaady ma iich. ²⁰Xypubedipich miid Onésimo. Yi nHuindzin'ajtim Jesús yjägídägy pen jadu'n mduñ. Mdunipy may'ajt miid Onésimo miid Jesús ycixpi, e jadu'n iich jëb huaad njotcujc'atyich.

²¹Nnejhuüybich co ooy m'iimidoy mgapxmidoy, e jadu'n nej yam njacnijayiy, jac'anaxy mduna'ñ. ²²Nañ jadu'n yam nimäy. Tun may'ajt ni'ixi tüg jättac. Njijp'ijxypich co nbujxtijcpidzimipyich tzojc miid co miich ajcxy Dios mibijctzoogixy miid iich ycixpi, e jadu'n jëbi n'icxibich ma miich.

Pablo ycapxycijxy miid Filemón

²³Nañ nbidacpyich necyjoty yam. Xycapxpooocp Epafras iich nmibujxtijc jáy miid Cristo Jesús ycixpi. ²⁴Nañ xycapxpoooc Marcos, Aristarco, Demas etz Lucas. Iich yi' ajcxy xypubejtp ya. ²⁵Huen yi' nHuindzin'ajtim Jesucristo may'ajt oy'ajt tunipy ma miich ajcxy, jëb miich ajcxy oy m'ity. Amén. Jadu'n ngapxcxyich.

HEBREOS

Yi Necy Huidi Pinjaty Yajnigüeje Je Hebreo jäy

1 Jecy'ajty Dios ayuc yecy ma ajt nmij'ap nmijteedy canaag'oc etz canaagnax miid je yprofetas ajcxy, je' ajcxy huidibi najtzcapxiy Dios y'ayuc. ²E jadachambi ma xii tiempo yhuingooni co je naaxhuiñybi ycixani, Dios ayuc yecy ma iich ajt miid je' y'ung. Dios miid y'ung yaj'oyiyy je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³Dios y'ung ymiid Dios y'oy'ájtín, yi' je' Dios ytiicxin'ajtpy yjajin'ajtpy. Yi' je' codinaayb etz yajnigüexigy nej je' je Dios. Dios y'ung huijtz'ijtaayb tüg'óciy miid je' y'ayuc etz ane'min mic'ajt miidpi. Co Dios y'ung ti xyajhuaatzim ajt nbocy, chi cöbijcy je mij'ane'min jiiby tzajpjoty, jadu'n nej jihuüy y'ixtacy a'oy'amy ma je mijpi Dios ymijc jiiby tzajpjoty.

Dios y'ung jacmij yi'ca'ydi ángeles ajcxy

⁴Je Dios y'ung jac mij je' ymic'ajt y'ane'min miidity, ca'ydi je ángeles ajcxy. Com yi' je' Dios y'ung, paady ycixpi mic'ajt miidity jaydëbi

ane'my huidibi Dios yje'ajtpy, e ca'ydi yi ángeles ajcxy yi jadu'mbi mic'ajt miid. ⁵Com Dios ca' yi' ni tüg ángel nimay:

iich miich n'ung'ajtpy. iich miich ti nyajpi'c'aty jadachambi xii.

Nañ jadu'n ca' Dios ni tüg ángel nimay:

Miich xyteedy'adiibich, iich miich n'ung'adiiyb.

⁶Co Dios y'ungoob oy quexy ma naaxhuiñyjäy chinäy, chi yi' ane'min pidacy:

Huen je ángeles ajcxy nidüg'óciy huindzigihuipy pa'tjihuihuipy je' y'ung.

⁷E miid je ángeles ycixpi, Dios yminañ:

Yi ángeles jadu'n yi' ajcxy nej poj. Yi' ajcxy huidibi tzajpjoty tzinaayb, jadu'n yi'ajcxy nej huidzuc, nej jiiñye'n.

⁸Jadu'n Dios yminañ miid y'ung ycixpi:

Miich, Dios'ajtp, miich m'ane'min huinixii huinitiempo yi' y'idipy. Miid mdudägy'ajtin miich m'ane'mipy.

- ⁹ Ti mdzocy je tiy'ajt tiybi, e ca' ti m'ixa'n̄ je jibicpi. Paady ycixpi Dios, miich mDios, ti xyhuin'ixy, e ti yejctäy nigi ma miich je jotcuje'ajtin je xondaacin, ca'ydi ma yi mmi'ane'mbidijc.
- ¹⁰ Dios nañ jadu'n ymina'n̄:
Miich, Huindzin Dios, oga'n'aty mbidac nej naaxhuiñybi chondacy, e miid miich mmic'ajt myaj'oyi'y je tzajp.
- ¹¹ Cijxtähui'p yi naaxhuiñybi etz yi tzajp, per miich huimip huinixii huinitempo. Jadu'n yi naaxhuiñybi etz yi tzajp y'amijiydähui'py nej huit.
- ¹² Jadu'n miich yi naaxhuiñybi etz yi tzajp m'anëgipy nej tüg huit yaj'anëgyin. Jadu'n miich yi naaxhuiñybi etz yi tzajp myajtigadzipy nej jäy ajcxy yajtigach yhuit. Chi miich je'ni m'idipy, je mxii mjimijt ni mina ycacixipy ycatigoyipy.
- ¹³ Ni camina Dios canimay ni tüg je ángeles ajcxy:
ña' ma iich nmijc a'oy'amy, ixti mabaad iich miich je mmidzip nmimadactäyich, jadu'n yi'ajcxy nipaadipy nej yi' miich mdecypocxpejt'adyii.
- ¹⁴ Tüg'óciy je ángeles ajcxy ac espíritu yi' ajcxy, e ytungixy ma Dios, yquexyöygixy jigix pubedipy je jäy ajcxy huidibi ajcxy y'alma padam ñidzoocin.

Ca' n'ijxnajx nmidonajxim nigoo yi pocyhuinmeecxin

2 Miid jadayaabi tiy'ajt ycixpi, oy co yajxon n'ocjäygugiiyim Dios ytiy'ajt huidibi ti nmidoohuim,

jigix ca' njijpyöyduutim je Dios ytiy'ajt huidibi jadu'n nipatp nej tü'aa oybi. ² Pen je ayuc tiy'ajt huidibi ángeles ajcxy yejc jecy'ajty, huim je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii miid ypocy ycixpi. ³ ¿Nej tijy iich ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jëbi xyajnidzoocim ajt n'alma? Yi Huindzin Jesús jayijp'aty ci'm nigapxy Dios ytiy'ajt jadu'n nej jëbi Dios xyajnidzoocim ajt n'alma. E jac'axam je discípulos ajcxy nañ jadu'n najtzcapxixy Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma iich ajt. ⁴ Jadu'n anajty capxhuäxcixy Jesús y'ayuc ma iich ajt, chi Dios yajniguëxëcp Jesús y'ayuc co yjanchity co tuñ ijxpejt, mijhuinma'n̄ etz milagro. E co Dios xymooyim je yjihui'n̄ ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymügü

⁵ Dios ca' yi ángeles ajcxy ti cötujcin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi iich ajt nmimiydaacim. ⁶ Hue' janchity jii tüg'it yjaybetyity ma Dios ñecy, ma ymina'n̄:

Miich Dios, çti yi' je naaxhuiñyjäy, co miich yi' ajcxy mjäymedziyby? ¿Ti yi' je naaxhuiñyjäy, co miich je' ajcxy mjotmay'adyii?

⁷ Janch con xii tiempo miich ti mmöy yi naaxhuiñjây ajcxy e nañ ti mmöy jacminacy ymic'ajt y'ane'm'ajt ca'ydi yi ángeles ajcxy. Per jac'axam miich mmöhuañ naaxhuiñjây ajcxy nigí ymic'ajt y'ane'm'ajt, ca'ydi je ángeles ajcxy. Tüg'óciy huidijaty miich ti myaj'oyïy anajty ti mbidactáhuip yi' ma yi naaxhuiñjây ajcxy ane'min.

⁸ E co anajty ti mbidactây anajty ma yi' ajcxy y'ane'min, jadu'n nipaady nej jihuïy tüg'óciy tijaty huidibi ti myaj'oyïy, y'idipy ma yi' ajcxy ytecpa't.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixypy ca'ni cham n'ijxim co tüg'óciy tijaty ya naaxhuiñ etz tzajpjoty ca'ni amugi' ycapxycöbigyii. ⁹Dios ti xyaj'ijxim co Jesús miid mij'ajt ane'm'ajt. Je ángeles ajcxy nigí mic'ajt oy'ajt anajty miidity, ca'ydi Jesús co yi' chinay ya naaxhuiñ. Jadu'n Dios tuñ jaydëbi Jesús y'ögy miid jäy ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay miid je tzaachy'o'cin huidibi ypaat.

¹⁰Tüg'óciy huidijaty ya yajpatp, ji'ajtp yi' miid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuuñ co yajca'pxi Jesucristo y'oy'ajtin miid je tzaachypi huidibi ti minaxy ti yajnaxy. Miid co Jesucristo tzaachypi ti minaxy ti yajnaxy, paady ycixp jäy ajcxy padaangixy

Cristo y'oy'ajtin. ¹¹Miid co Jesucristo, je huidibi jäy ajcxy yajpocyñihuaatzp, jiiby mic'ajt ti paady ma Dios Teedy, paady ycixp yi' ajcxy huidibi patcixp pocyñihuaatzin nañ jim mic'ajt patcixy ma Dios Teedy. E miid co Jesucristo etz yi' yjäy mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuïy co yi' ymina'ñ co je mibijcpëdijc jadu'n nipaady nej yi' yjugytijc ymigügtijc. ¹²Paady je Cristo ymina'ñ ma yjaybetyity:

Miich Dios, iich miich ngapxpadipyich ma nmigügtijcich. N'ihuipyich iy miid miich ycixpi ma je jäy ajcxy ti nayoöymújcgixy.

¹³Nañ jadu'n Cristo ymina'ñ ma yjaybetyity:

Nmijpidägibyich Dios.

E jadüg'oc yminaanip:

Cha iich, miid je ung anäg ajcxy tiibi Dios xymöyich.

¹⁴Ma jäy ajcxy ytügquëx'ajtcixy, tügpi yxiixy, tügpi ni'py je' ajcxy. Nañ jadu'n Jesús ymiid je' anajty yxiixy ni'py jadu'n nej jäy ajcxy ymiidity jägix jëbi y'ögy, e jadu'n je' yajhuindigoydähuipy je' huidibi anajty jamic'ajtmiid co jäy yaj'ögiyib, je' je' je mujcu'. ¹⁵E jadu'n je' Cristo yajnihuädzictuty tüg'óciy pinjaty anajty cojuyïy codoogïy y'ijtp ma je mujcu', miid co tzigüygixy yi y'o'cin. ¹⁶Janch co Jesús ymiin ya naaxhuiñ, ca' nminaanim co pubeda'ñ je ángeles ajcxy, je' janchtiy ypubedamyb Abraham y'ap y'oc. ¹⁷E miid jada ycixpi, Jesucristo jadu'n anajty miidity ninicx etz yjugy'ajtin

tú'ciy miid je jugytjic ymígügtjic ninícx etz jugy'ajtin, jigix jébi yi' naydügpajc codináy naaxhuiñjáy ajcxy ma Dios yhuinduu miid tudägy'ajt etz pa'ayoohuin. Etz nañ jadu'n jigix jébi huindzigíy Dios miid yci'm ñinícx miid jáy ajcxy ypocy ycixpi, e jadu'n yajpocyhuaatzáhuiip yi mayjáy ajcxy. ¹⁸Com Jesucristo cí'm tzaachypi minajx yajnax, etz nañ jadu'n je mujcu' Jesucristo jot'ijxy huinma'ñ'ijxy, paady ycixp Jesucristo jébi pubety pinjaty jadu'n tzaachypi minajxp yajnaxp, etz ma yjot'ixyii yhuinma'ñ'ixyii je mujcu'.

Jesús jacnigi mijity yi' ca'ydí Moisés

3 Miid co Jesucristo jadu'n ti tuñ, paady ycixp miich ajcxy migügtjic huidibi cixyjot huinijot mijpidacp Jesucristo, je huidibi ajcxy Dios ti xyhuin'ijxcixy co xyje'adäänigixy. Pidaaccix mhuinma'ñ yajxon ma je Cristo Jesús, je huidibi nejhuiiyim co Dios ti quexy ya naaxhuiñ, je huidibi tügpajc mijtungmiid ma Dios, huidibi tügpajc xycodinaayim ma Dios. ²Jesús tudägy yi' ti y'ity ma Dios yhuinduu, je Dios huidibi ti yajñibigyii je mijtung, tim jadu'n nej Moisés y'ijty tudägy ma je ytung miid tüg'óciy jáy huidibi anajty ti cöbijccixy Dios ycötujcin ma Moisés. ³Jesús ymihuaad nigí huindzigí'ñ etz cömayin, ca'ydí Moisés. Tim jadu'n nej pin tüg tijcojpi je' je' ijtp cömay, ca' nminaanim je tijc ijtp cömay. ⁴Tüg tüg tijc jim je' pin cojp. Per Dios yi' ti yajcojtäy yaj'oyíydäy tüg'óciy huidibi ji'ajtp. ⁵E jadu'n je Moisés

tudägy je' ytuuñ miid tüg'óciy jáy huidibi ti paady Dios ycötujcin ma yi'. Je Moisés je' ytung'ajti yejcy je tiy'ajt huidibi anajty Dios jac'axam yegamyb. ⁶Je Cristo tudägy ytuñ miid tüg'óciy iich ajt huidibi mijpidacp Dios, tim jadu'n nej tüg jáy y'lung tudägy ytuñ ma yteedy ytjic yteedy ypidägy. Jadu'n iich ajt nbaady nej Dios ytjic, e Cristo tudägy ytuñ miid iich ajt, pen tudägy nmibijcim Dios y'ayuc, ca' n'ixmajzim ajt nmibijcin. Pen nmijpidaacim Dios agujc jotcujc ixti mabaad n'o'cim miid je' ycixpi huidibi njjip'ijxim ma Dios.

Dios yjáy ajcxy ypooocxin

⁷Paady ycixp jadu'n yjaybetyiyi ma Dios ñecy ma je Espiritu Santo jadu'n yminañ:

Jadachambi pen midooyb miich ajcxy nej Dios ymina'ñ,

⁸ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huidibi mibidigy Dios jecy'ajt (co ajcxy y'ijty jim mijtigídium). Je xií je tiempo jecy'ajty co ajcxy jot'ijxy huinma'ñ'ijxy Dios.

⁹Chi Dios ymina'ñ:

Miich ajcxy mmij'ap mmijteedy ajcxy jim mijtigídium xyjot'ijx xyhuinma'ñ'ijxich ajcxy jecy'ajty. Ca' ajcxy jáymech co ajcxy y'ijxy anajty canaag mijhuinma'ñ huidibi ndumybich anajty miid yi' ajcxy ycixpi huixchiguiipx jimijt.

¹⁰Paady njotma'tyich miid miich ajcxy mmij'ap mmijteedy

jecy'ajty, e nminaañich:
 “Niidigoy tüdigoy ajcxy jabom
 jabom ma yjot yhuinma'ñ. E
 ca' ajcxy nejhuñhuaangixy
 anajty iich nni'aa ndü'aa.”

¹¹ Paady yi' ajcxy nmijotma'tyich,
 e janch janch nniimaayich
 ajcxy, e ca' n'iindägyich, co
 ca' ajcxy ytiğihuiipy ma iich
 nbocxtac.

¹² Migügtijc, naygüend'ájtigix
 nidüg nidüg co ni tüg miich
 ajcxy mgamiid'adip jibicjot jibic-
 huinma'ñ, e ni mga'ixmájtzcixipy
 Dios juugypi y'ayuc, miid co
 ca' mmibijccixy. ¹³ Hue' janchtiy
 nayjot'amijmóoyigixy miñ xyipy
 jabom jabom nami xii tiempo
 yjacnixñi. Jadu'n miich ajcxy
 mdunipy, ca'ydí ajcxy yi pocytuni
 xyhuin'iingixy, e chi anajty
 mnaybidáacigixy jotjuuñ. ¹⁴ Pen
 nmibijcim nmijpidaacim Cristo
 y'ayuc tiibi nbaatim oga'n'aty, e ca'
 n'ixtiğihua'cim mabaad n'o'cim, chi
 jëbi n'ijtim miid Cristo.

¹⁵ Je' je' je huidibi jaybetyity ma
 Dios y'ayuc:

Cham, pen mmidooyb miich
 ajcxy nej Dios ymina'ñ, ca'
 ajcxy m'ijtcixy jotjuuñ, jadu'n
 nej je' anajty ajcxy huidibi
 Dios mijotma'tp anajty miid
 co ajcxy mibidigy Dios.

¹⁶ ¿Pinjaty ajcxy huidibi jecy'ajty
 midou Dios y'ayuc e mibidigy
 Dios? Nidüg'óciy je' ajcxy huidibi
 tzomb Egipto naaxjot jecy'ajty
 miid Moisés. ¹⁷ ¿Pinjaty je Dios
 ymijotma't jadu'n huixchiguipx
 jimij? Je huidijaty ajcxy tundigoy
 miid Dios ytiy'ajt, e je' ajcxy cijx
 y'öctaaygixy jim mijtiğiduum.

¹⁸ ¿Pinjaty Dios ñimay co ni camina
 ytiğihuiipy ma je Dios y'it ylugar ma
 jëbi ypoocxcixy miid yi'? Je' ajcxy
 huidibi ca' ycapxymidoy. ¹⁹ Paady
 nnejhuñiyim co janch ca' ajcxy
 jaty nej ytiğiygixyipy ma Dios y'it
 ylugar miid co ajcxy ca' mibijcy
 Dios y'ayuc.

4 Com nmiidni ajt Dios y'ayuc,
 jadu'n nej ti xyaj'ahuaniiyim
 co ndigiiyim ma yi' chinaydac
 yjogy'ajttac, e nboocxim miid yi'.
 Paady ooy tzocy co ndzigiiyim Dios.
 Ca' jecyity co nidüg miich ajcxy ca'
 mdigihuiipy miid co ca' mmibijccixy
 Dios y'ayuc. ² Nañ jadu'n ti iich ajt
 nmidoohuim je Dios y'ayuc oybi,
 tim jadu'n nej yi' ajcxy jecy'ajty ti
 midooy. Per ca' Dios y'ayuc ma ti
 ypubedyii ajcxy co ti jamidoogixy
 je tiy'ajt. Com hue' ajcxy ymidou, e
 ca' ajcxy mijpidacy. ³ Hich ajt com ti
 nmibijcim je Dios y'ayuc oybi, iich
 ajt je' tigiiyimip ma je it huidibi
 Dios ti tijy ma jëbi nboocxim miid
 yi'. Com Dios jadu'n yminañ:

Paady yi' ajcxy nmijotma'tyich,
 e nniimäyich ajcxy,
 n'iibaadyich ngapxpaadyich
 n'ayuc, co ni camina xii yi'
 ajcxy ypocxtac capaadiipy ma
 iich.

Tüg'óciy huidibi Dios yajcojy
 yaj'oyiiy, hue' ti yajcojy ti yaj'oyiiy
 jayijpni ca'ni anajty naaxhuñybi
 chondacy. ⁴ Com ma yjaybetyity
 je tiy'ajt jiiby muumity nigapxy je
 mihuixtujcxiiibi ma jadu'n yminañ:

Dios ypoocxy je mihuixtujcxiiibi
 miid je' ytung ycixpi tiibi
 anajty tuñ.

⁵ E jadüg it yjaybetyity ma Dios
 ñecy ma jadu'n yminañ:

Ca'p yi' ajcxy ytigíyigixipy ma iich nbocxtac.

⁶Hue' janchtiy Dios yjacmiid'ajtyñi it lugar ma y pocxtac ma jébi pinjaty ytigíhuip. Yi' ajcxy huidibi tzinay jecy'ajty huidibi jayijp midou Dios y'ayuc, ca' je' ajcxy ytigíy ma Dios y pocxtac, miid co ajcxy capxycómídoody Dios. ⁷Paady ycixpi Dios ti pidägy tüg xii tüg tiempo mina jébi pinjaty tigíhuipy ma yi' y pocxtac. Je' jadachambi xii tiempo Dios ti pidägy. Dios ti xyñimaayim nej David yminañ tzach com jecy, nej miñ jaybety huidibi ti yajngapxy co jadu'n yminañ:

Jadachambi pen midooyb miich ajcxy nej Dios yminañ, ca' ajcxy mnaybidáacigixy jotjuuñ.

⁸Co Josué je Israel jäy ajcxy camoy je pocxin, ca' Dios canigapxy huingbi xii mina ytigíhua'n ajcxy ma Dios y pocxtac. ⁹Paady ycixp, jadu'n yjac-hui'myñi jadüg xii tiempo mina Dios yjäy ytigíhua'n ma Dios y pocxtac. ¹⁰Com pinjaty tigíyib ma Dios y pocxtac hue' je' y pocxy miid je' ytung ycixpi tiibi anajty tuñ, tim jadu'n nej Dios y pocxy je mihuixtuxxiibi miid je' ytung ycixpi tiibi anajty tuñ. ¹¹Hue' tzocy co naymic'ijxim nej huaad ndigíyim ma je Dios y pocxtac, ca' jyecyity co nijéjity miich ajcxy mbaduunipy nej ajcxy y'idiich huidibi ajcxy ca' mibijcy Dios y'ayuc, e ca' mdigíyigixipy ma Dios y pocxtac.

¹²Com yi' Dios y'ayuc ijtp yi' huinixii huinitempo, e ymiid mic'ajt. Nigi yajtigiyñajxtäy

ninícx, jot almi, ca'ydi tüg espada huidibi mejtz'adu'm'amy jijpíp etz yjijpxu'nñity. E Dios y'ayuc nejhuiydaayb nej jäy ajcxy yjot yhuinma'n miidity, e tüg'óciy tijaty ajcxy ñijot'ajtcixyp. ¹³Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tüg'óciy nej ajt njot nhuinma'n nmiidity ñiguëxictähuip yi' ma Dios, je Dios ma iich ajt nguendi ngíyegaanim, yi' ijxtaayb ajt njot nhuinma'n.

Jesús yi' je' je mijhuingapxpi ma Dios

¹⁴Jesús, je Dios y'ung, yi' je' tügpajc jacmijtungmiid huidibi xycodinaayim ma Dios miid ajt nbocy ycixpi. E Jesús ti ytigíy ma Dios yhuinduu, paady ycixp tzoc ijtim tudägy ma ajt nmibijcin.

¹⁵Pues com Jesucristo, je huidibi tügpajc mijtungmiidip ma Dios, je huidibi xycodinaayim etz xyhuingapxim ma Dios, com Cristo tzaachypí etz ijxta'ni canaagnax ti yajnaxy, tim jadu'n nej iich ajt tzaachypí etz ijxta'ni nyajnajxim, per je' ca' ma ti bocy tuuñ. Paady ycixpi jébi Cristo ajt xypa'ayoohuim co ajt nyajnajxim tzaachypí etz ijxta'ni. ¹⁶Tzoc agujc jotcujc nmihuingoonim je Dios y'ane'mdac e n'ojadajtim nmibijctzoohuim Dios, jaydëbi co anajty jotmay nmiid'ajtim, chi Dios may'ajt oy'ajt tunipy miid iich ajt ycixpi.

5 Tüg tüg mijtungmiidpi huidibi huingapx jäy ajcxy ma Dios, hue' je' yajhuin'ijxp ma yëydijctijc, etz yajngapxpejty, jaydëbi yhuingapx jäy ajcxy ma

Dios etz yajnaxipy Dioscojuyip miid jäy ajcxyc ma Dios, etz yegipy huindzigi'n ma Dios miid jäy ajcxyc ypocy ycixpi. ²Je mijtungmiidpi jäy ajcxyc yajni'bijc huidibi huingapxp jäy ajcxyc ma Dios, jëbi yi' ajcxyc pa'ayooy huenpinity huidibi pocy ymiid, com nañ jadu'n yi' ajcxyc pocy jihuiy. ³E miid yci'mbocy ycixpi copicy yegipy huindzigi'n ma Dios etz miid jacjadyii jäy ajcxyc ypocy ycixpi.

⁴Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxp ma yi' miid jäy ajcxyc ycixpi, tim jadu'n nej Dios huin'ijxy Aaron jecy'ajty etz yajni'bijcy yi jadu'mbi tung. ⁵Jadu'n yjaty miid je Cristo, ca' ci'm nayñibijctzoohuuiyi ma yi jadu'mbi tung. Dios yajni'bijci co huingapxp miid jäy ajcxyc ycixpi, e ti ymöyii je mij'ajt jadu'n nej anajty ti nimäy:

Miich je' iich n'ung. iich miich mjogy'ajt ti mmöy cham.

⁶Nañ jadu'n ymina'n jadüg'it ma Dios ñecy:

Miich je' mhuingapxyp je jäy ajcxyc ma Dios huinixii huinitiempo, tim jadu'n nej Melquisedec ytuuñ.

⁷Co Cristo chinay ya naaxhuiñ, chi ooy mijuydägy minucxtägy Dios, chi ooy mibijctzoy janch mic je Dios huidibi jëbi ycohua'nyii ma je o'cin. Miid co ooy mibijcy ooy huindzigiyy Dios miid yung naxy yjot yhuinma'n, paady Dios ymidoohui. ⁸Je Cristo oy je' anajty Dios ja'ung'adyii, yjajti nej ycapxymidoohuiipy Dios, miid je' ycixpi nej anajty ti y'ayoy ya

naaxhuiñ. ⁹Co Cristo yajca'pxy yi' y'oy'ajtin miid je tzaachypi huidibi yminajxy yajnaxxy, chi ni'ixi' anajty y'ity jëbi cop'adyii alma nidzoocin huinixii, jaydëbi tüg'óciy pinjaty capxymidoob Cristo, ypaadip ajcxyc y'alma nidzoocin. ¹⁰Dios jadu'n yajni'bijcy Jesús co yajnicxip je jac mijpi tung ma yi' co huingapxp jäy ajcxyc ma Dios, tim jadu'n nej Melquisedec ytuñ jecy'ajty.

Je ayo'n co njijpyöduutim yi mibijcin

¹¹Ooy iich miich ajcxyc mij nmiidmiydäga'n ma jadyaabi tiy'ajt, per ooy chachchip nimiydaacnity, com ca' miich ajcxyc mic'amy mhuinijihuuihuipy Dios ytiy'ajt. ¹²Jadu'n nej jada xii tiempo ti yjecni ma miich ajcxyc oga'n ti mmibicy. Hue' miich ixypiy ajcxyc mniyaj'ixpijcnip Jesucristo ytiy'ajt je tzipjatypi. Per miich ajcxyc mdzojcyñi co myajnajtzcaxihuipy huinjemy je Dios y'ayuc huidibi ca' chipity. Ti miich ajcxyc m'ahuimbijttaaygixy ca' mic majaa ma mmibijcin. Hue' jëyi miich ajcxyc jadu'n nipaady nej pi'ctijc huidibi leche uucp, e ca' jadu'n paady nej mij'anäctijc huidibi caagy caayb. ¹³Pinjaty yajpatp ma jada ixpijcin huidibi ca' chipity, jadu'n yi' nej ma'xungdijc com ca' jajtciy je ayuc tiy'ajt tiybi. ¹⁴Je' tzipjatypi tiy'ajt je je' winjihuiyigixp, je' huidibi ymibijkin mij may mid'ajtkixpin, jidu'n nej je' huidibi y'aa ytiitz jim ajkixyin je' titzpi jich kaagy je' ykaaygixpy, je' ko yjajtkixpy je' nej winjiwiyyigixichin je' huidibi oy, etz je' huidibi ka'oyin.

6 Paady tzoc nigi yajyujcpejtim n'ixpijcin ma Dios ytiy'ajt, tzoc ajt yajyeecim nmibijcin, jigix jadu'n nipaadip jadu'n nej jäy tiibi yhuinma'n yca'pxtaayni. Ca' n'agapxiyo'cim canaag'oc jabom jabom je tiy'ajt huidibi ti nbaatim co oga'n nmibijcin Cristo. Ca' janam jatzojc n'ixpijco'cim huidibi oga'n ti n'ixpijcin jadu'n nej co njothuimbijtim nej anajty ndunim jibicpi huidibi xyajnicxim ma yi o'cin, e jadu'n nej nmibijcin Dios oga'n. ²Ca' jadüg'oc n'ixpijco'cim je xpijcin miid je niibejtin ycixpi, etz jadu'n nej yajcinixajy je mibijcpidijc jaydëbi paadip ajcxy je Dios yjihui'n ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'n huinixii pocyjäydijc. ³Chi nja'ixpijcin Dios y'ayuc je tzipjatypi, pen Dios jadu'n tzojcpy.

⁴Com pinjaty ti huinjihuüy Dios y'ayuc ytiy'ajt, e jäygidägy huidibi Dios yejcpy, etz miidty Dios yjihui'n ma y'ay yjot, jadu'n je' nipaady nejjihuüy chinay ma jün ytiicxin. ⁵Etz ti ajcxy jäygidägy Dios y'ayuc ytiy'ajt, e ti jihuiygixy Dios yjihui'n ymic'ajt huidibi yajtzinaayip ajcxy y'alma ma je xii je tiempo huidibi miimb cidacp. ⁶Yi jadu'mbi jäy, pen tundigooyb ajcxy jadüg'oc miid Dios ytiy'ajt, e ixmach ajcxy nej anajty ti mibijccixy Jesucristo, ca'p jëbi jadüg'oc jothuimbijtcixy ma Dios miid pocy ycixpi e pijtzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbizimy nej ajcxy jadüg'oc yajcruudzpejtcixy je

Dios y'ung miid ajcxy ypocy ycixpi, e nixiiccixy yajxiiccixy nej Jesucristo y'o'cy miid ajcxy ypocy ycixpi. ⁷Jadu'n yi' ajcxy nej naax ni'uuctich naag'oc naag'oc ytu'y. E pen je naax yejcpy ooy cosecha ma pin ti niipy ti ytuñ, Dios je' anajty yconuucxin ymiid. ⁸Pen actim apy etz actim jibic ujtz ypidzimy ma je naax, ca' je' ti tzoohuity, e Dios je' yajtigoyamb etz nöctähuip ma je mij jün. (Jada naax jadu'n jada' nipaady jadu'n nej jäy huidibi ti ixmach ymibijcin.)

Yi huidibi nmibijcin yi' xyhuijtz'ijtim tudägy

⁹Migügtijc ajcxy huidibi ooy ndzocyich, oy iich ajcxy jadu'n njamiidmiydägyich miich ajcxy, janch nejhuüybich co ca' ajcxy ti m'ixmach yi mibijcin, etz nejhuüybich co oybi conuucxin mbaadaangixyp ma Dios etz m'alma ajcxy nidzoocin paadaangixy. ¹⁰Com Dios ooy yi' ytudägyity, e ca' yi' jäydigoy huidibi miich ajcxy mdumyb miid yi' ycixpi, jadu'n nej oyjäy'ajtin ti mdungixy miid jacjadyii mibijcpidijc, e chambaad jadu'n mdungixy. ¹¹Hue' iich ajcxy ndzocyich co miich ajcxy nidüg nidüg mnixondaaccix tungix oyjäy'ajtin ixti mabaad m'öccixy, jigix mbaadipy ajcxy tüg'öciy huidibi ajcxy mjijp'ijxyp ma Dios. ¹²Ca' iich ajcxy ndzojccixy co miich ajcxy m'ahuimbidity nuux. Padungix miich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydëbi mbaatcixy tiibi Dios xyaj'ahuaniygixy.

¹³Co jecy'ajty Dios moy Abraham je' y'ayuc, ci'm je' nġapxpejty y'ayuc, com ca'anajty ji jac mijpi pin nġapxpedipy je' y'ayuc. ¹⁴Chi Dios Abraham nimay: "Janch co iich miich ngonucxip, e nmöhuipy may m'ap'ung m'apmang." ¹⁵E jadu'n Abraham y'ahuijxy miid mecxtujcin, e jadu'n ycidiġiyyi huidibi anajty Dios ti yaj'ahuanġyii. ¹⁶Co ajcxy jāy ycapxcixy co yjanchity, jim je' pin nġapxpejtp je y'ayuc, je pin jacmijp, je' nġapxpejtpy jada ayuc. E co nġapxpety je' y'ayuc, chi je ayuc y'lity, e ca' huaad pinjaty ymina'n co ca' yjanchity. ¹⁷Paady ycixpi Dios nġapxpejty yci'm'ayuc, miid co anajty yajnejhuġhua'n je jāy ajcxy co cuyduna'n y'ayuc tiibi ahuanġy. ¹⁸Ji yajpaady mejtznax Dios y'ayuc huidibi ca' huaad capxtigach, e Dios ca' y'aniidägy nimina. E co Dios jadu'n tuñ, chi xyajjotcugġyym mij, iich ajt huidibi n'ixtaayim e ndzojcin yi' ypubejtin. E ti nmijpidaacim yi' y'ayuc jadu'n nej jġjp'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹E miid co njġjp'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcujc ġtim ca' ma tzigi'n ġhui'n. Jadu'n Dios y'ayuc nipaady miid iich ajt ycixpi nej tüg pujx huidibi je barco huon'ijtp mejyjoty, ca'ydi nej yjaty je barco. Iich ajt njġjp'ijxim co ndġġhuaanim ma Dios y'it tzajpjoty, tim jadu'n nej je judío sacerdote mġtungmiidpi ytigġy anajty jecy'ajty ma Dios y'it ma je Dios ytġc, je it huidibi anajty adiyducyip

miid huit. ²⁰Tigġhuaanim iich ajt ma je Dios y'it tzajpjoty ma Jesús ytigġy miid iich ajt ycixpi, Jesús ti yaj'ahuäch nej jġbi ndġġyym ma Dios y'it. E jadu'n Jesús naydügpajc huingapxy etz codināy mayjäy ma Dios yhuinduu huinixii huinġtiempo. Jesús ytung tim jadu'n nipaady nej Melquisedec ytuñ jecy'ajty.

Yi Jesús tim jadu'n ymġjity nej Melquisedec

7 Je Melquisedec hue' je' anajty rey'ajtp ma je cajp huidi yxii Salem, e je' anajty huingapxp ma je mijpi janchyp Dios tzajpjoty. Co anajty Abraham yhuimbity co anajty oy ti chiptuñ, ma anajty je reydġc oy ti yajqueec-huächxtāy ti mimadactāy, chi Melquisedec choon oy jġpcoyöyġ Abraham, e chi ooy Dios mġjuydacy minucxtacy miid Abraham ycixpi. ²Huidibi anajty Abraham ti paady ma anajty oy ti chiptuñ, chi je' pġc-huächxy majcpicy, chi pugooñ tüg-picy mooy je Melquisedec. Melquisedec yxii hue' yhuimbġzimy "rey tudägy". E com co anajty yrey'aty jim Salem, hue' Salem yhuimbġzimy "jotcujc'ajtin", paady jġbi nminaanim jadu'n, "je rey huidibi jotcujc'ajtin yejcp". ³Je Melquisedec ca'p anajty yajnejhuġy ytaj yteedy, ni y'ap yteedy. Ni ycajajnimġdägy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huidibi huingapxp jāy ajcxy ma Dios huinixii huinġtiempo.

⁴Occuenditungixy miich ajcxy nej je Melquisedec anajty ooy ymġjity. Je Abraham, iich ajt nmġ'ap

nmijteedy ci'm mooy Melquisedec je tüg picypi huidibi anajty ti pijci je rey ajcxy ma oy chiptuñ. ⁵Nej Moisés ycötujcin y'ane'my je' anajty ajcxy yhuingapxy ma Dios ytijc je pinjaty Leví y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc miid co jäy ajcxy yajcuend'adipy tügpicy je majc-picypi huidibi xii diezmo. Oy je' anajty ajcxy ja'ajugy'adyii ja'amigüg'adyii, com hue' anajty ajcxy Abraham y'ap y'oc nidüg'óciy. ⁶Per Melquisedec oy je' anajty ca' Leví ap'adyii teedy'adyii, yajcujt je Abraham tügpicy je majc-picypi. Je' je' anajty huidibi cidigiiyi tiibi anajty Dios yaj'ahuaniiyi. Jadu'n Melquisedec yajpuhuaniiyi Dios je Abraham. ⁷Ni pin ycamina'nip co ca' yjanchity co je pin conuucxin yejcp, jac mij je', ca'ydi je pin yajconuucxp. ⁸Ya ma iich ajt, pin cidigiiyip tügpicy je majcpicypí (diezmo), hue' je' ajcxy jäy huidibi öcp. Per jadu'n nej anajty Melquisedec, jadu'n ymina'n ma yjaybetyity co je' yjactzinaayni. ⁹E jëbi yajmina'n co je Leví etz jadu'nyibaad je y'ap y'oc huidibi ajcxy huingapxp ma Dios, e yajcujtcixy Israel jäy huidibi Dios patip, nañ jadu'n nipaady nej jihuüy ymigüety je' ajcxy je Melquisedec huin'lit co Abraham ymigüejti. ¹⁰Jadu'n nipaady nej jihuüy Abraham ñigix'ajtyñi y'ap'ajtin yteedy'ajtin Leví etz jacjadyii je huidibi anajty ajcxy ca'ni ypi'c'atyñi yma'xung'atyñi co oy Melquisedec yjijpcobadiiyi. ¹¹Je Israel cajp yajcidigiiyi je' je Dios y'ane'min ycötujcin je Levita

ajcxy huidibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcin payöyb, ca'p tim je' anajty ycopicyity co ycajacquëxigy jadüg huidibi codinähuip je mayjäy ma Dios, ca' y'ocje'jiñ ma ymiin Aarón y'ap y'oc. Je jadügpi huidibi codinähuamyb je mayjäy ma Dios, hue' copicy co tú'ciy naybadiiyb miid Melquisedec. ¹²Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcin. ¹³Iich ajt nHuindzin Jesucristo, je huidibi ñimiydacpy ma Dios ñecy co huingapxa'n je mayjäy ma Dios, huingbi ap huingbi Teedy je' anajty, ca' y'ocLevijin. E ni tüg yi' y'amigüg ca' yhuingapxy ma Dios. ¹⁴Huädz yajnejhuüy co iich ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacy pinjaty anajty huingapxp je mayjäy ma Dios ytijc. ¹⁵Jacniguëxicp jada ooy co jadüg ytigiüy huidibi tumb ma Dios, huidibi tú'ciy naybaatip miid Melquisedec. ¹⁶Ca'p Jesucristo yajtungbijci co huingapxip je mayjäy ma Dios miid je cötujcin huidibi minaamb co yi' y'amigügtijc pátip yi jadu'mbi tung, je huidibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxip je mayjäy ma Dios. ¹⁷Com miid je' ycixpi jadu'n Dios tiy'ajt yejcy co jadu'n ymina'n:

Miich je' cham mhuingapxyp
je mayjäy ma iich. Tüg
nax miich mhuingapxin
nej Melquisedec anajty
yhuingapxy.

¹⁸E jadu'n je oga'nbi je ane'min
cötujcin huidibi Moisés yejc,
ca' y'octuni cham, ca' jac ti
mic'ajt miidity co jaydëbi
yajtözögiy jäy ajcxy y'alma. ¹⁹Je
Dios ycötujcin huidibi Moisés
jayhui'm jecy'ajty, ca'p je' ni ti
yay'oybidzimy yajhuätzpidzimy.
Miid je huingapxi ycixpi huidibi
nmiid'ajtim cham jac'oy yi' huidibi
njijp'ijxim ma Dios.

²⁰Co Dios Jesucristo yajtungbicy,
chi nigapxpejty yci'm ayuc co
yjanchity. ²¹Jacjadyii ajcxy huidibi
anajty tungixp ma Dios ytijc, hue'
je' ajcxy tungmooyi, e ca' Dios
nigapxpejty yi' ajcxy y'ayuc. Per
co Jesucristo ytungbijcy, chi Dios
nigapxpejty yci'm'ayuc. Com
jaybety jadu'n ma Dios ñecy ma
jadu'n ymina'ñ:

Je Huindzin Dios ti nigapxpety
yci'm'ayuc, e ni mina
ycajotmetzcähiupy.

Jadu'n Dios nimay y'ung:

Miich mhuingapxamyb etz
mgodinähuaryb je mayjäy
ma iich huinixii huinitiempo.
Jadu'n miich mdunipy nej
Melquisedec ytuuñ.

²²Com Dios nigapxpejty yci'm'ayuc
co yjanchity co Jesucristo
ytungbijcy, paady yi' Jesús
yi' je' majamoy mic'ajtmoy je
jemybi ayuc huidibi yajhui'm
miid jäy ajcxy ycixpi, je jac'oybi
cötujcin. ²³Jacjadyii huidibi
anajty yhuingapxcixy ma Dios

ytijc, nimay anajty ajcxy ooy. Com
co tüg y'o'cy, chi huingbi ytigy
ma je' ytung. ²⁴Jesús com ca' yi'
yjogy'ajtin ycixipy ytigoyipy ni
mina, paady ca' ytung ixmach, etz
ca' yi'ytungmöy ni pin. ²⁵Miid je'
ycixpi Jesucristo mic'ajt miidity
jaydëbi yajnidoocipy jäy ajcxy
y'alma huinixii huinitiempo, pinjaty
mibijctzooyb Dios ma Jesucristo
yxii. Jesucristo jëbi tunipy jadu'n,
com yi' yjogy'ajtin ca' ycixipy
ytigoyipy ni mina. E yi' Dios
mibijctzodiib miid jäy ajcxy ycixpi
jabom jabom huinixii huinitiempo.

²⁶Je Jesús je' je' tügpajc je
mijtungmiidpi ma Dios, huidibi
iich ajt nyajmayajtim, je huidibi
miid huädz yjot huädz yhuinma'ñ,
e ca' je' miidity ni ti jibicpi ni ti
pocy. Je' ca' tügnax y'ity miid
pocytumbidijc. Nigi je' ymijity
ycixity, ca'ydä jac ti huidibi yajpat
tzajpjoty. ²⁷Ca' Jesús yjadu'nity
nej ajcxy jacjadyii huidibi tuun ma
Dios ytijc jecy'ajty, co yaj'öccixy
iyujc, e je' ajcxy yejcpy huindzigi'ñ
jabom jabom, midüg co je' ajcxy
ñayyapocynñhuächyii, e chi jada'
miid jäy ajcxy ypocy ycixpi. Jesús
tügtecypajc je' yejc huindzigi'ñ
miid mayjäy ycixpi, co je' ci'm
ñayyejci ma yi' o'cin jadu'n nej tüg
huindzigi'ñ. ²⁸Je Dios ycötujcin
huidibi Moisés yjayhui'm jecy'ajty,
hue' y'ane'my co huen tungmöy
jäy ajcxy huidibi pocy miid, co
mijtungmoy ma Dios ytijc. Chi
jac'axam Dios yajhui'my jemybi
ayuc jemybi cötujcin, e nigapxpejty
yci'm'ayuc co yjanchity. E miid
je jemybi ayuc Dios tungmoy
yci'm'ung, huen yajnicxip je mijpi

tung ma yi' y'it, je Dios y'ung
huidibi ijtp huinixii ca' ti bocy
miidity.

**Jesús yi' je' je mijhuingapxpi
ma yi Dios y'ayuc jemybi**

8 Huidibi ooy nīgi ycopicyity,
huidibi yajnimiydaacp, co iich
ajt nmiid'ajtim pin xycodinaayim
ma Dios, je' je' je Cristo, je huidibi
jiiby ijtp mij'ane'mbi tzajpjoty,
jadu'n nipaady nej jihuüy yi' y'iñäy
a'oy'amy ma Dios ymijc. ²Jiiby
je' ytuñ ma je janchypi Dios
y'it ylugar, je amaaybi, huidibi
oyhuindzigiy ijtp. Je it huidibi
Dios yajcoj, e ca' nminaanim jäy
ajcxy yajcoj. ³Tüg'óciy pinjaty
huingapxp ma Dios, yajñibicy
je' paady, e copicyity co cäyegipy
ofrenda etz tijaty huindzigi'ñ ma
Dios miid jäy ajcxy ypocy ycixpi.
Paady ooy ycopicyity nañ jadu'n
co Jesucristo yegipy ofrenda etz
huindzigi'ñ ma Dios miid jäy
ajcxy ypocy ycixpi. ⁴Co Jesucristo
ixyipy ya y'ocyajpaady naaxhuiñ,
ni ycahuingapxy ixyipy mayjäy
ma Dios. Com jiini ya yajpaady
pin huingapxip ma Dios ytijc, pin
yeycp ofrenda etz huindzigi'ñ jadu'n
nej Moisés ycötujcin y'ane'my.
⁵Jadayaabi huingapxpi ajcxy
ytungixy ma Dios ytijc ya naaxhuiñ.
Je' je' tüg ijxpejt nej Dios y'it jiiby
tzajpjoty, jadu'n yi' nipaady nej
tüg anecpi huidibi tzomyb jiiby
tzajpjoty. Co Moisés jecy'ajty Dios
ytijc je' coji miid huit, chi Dios
ñimaayi: “Cuenditun yajxon co
anajty mgojy je tije tügnax jadu'n
nej je ijxpejt huidibi nyaj'ijx jim
copcixy.” ⁶Per je migtung huidibi

Jesús ytumyb ma Dios miid jäy
ajcxy ycixpi, jac'oydung yi' ca'ydi
je tung huidibi je jäy ajcxy ytumyb
huidibi migtung miid ma Dios
ytijc ya naaxhuiñ. Com jemybi etz
jac'oy etz jacmic'ajt miid je cötujcin
huidibi Dios ymoy Jesús, ca'ydi je
cötujcin huidibi Dios ymoy Moisés
jecy'ajt. Com hue' je' jac'oy alma
nidoocin Dios yaj'ahuaniiy jäy
ajcxy ma je jemybi cötujcin.

⁷Co je jayijp'atypi cötujcin huidibi
Moisés ymooyi cayaj'oyiydaayi jäy
ajcxy ypocy miid Dios, ca' yi' ixyipy
ycopicyity je mimetzpi cötujcin
huidibi Dios ymoy jäy huinjemy.
⁸Per Dios y'ijx co je jäy ajcxy ca'
yajxon cuydungixy je cötujcin
huidibi Moisés ymoy, jadu'n nej
ymina'ñ ma yjaybetyity ma Dios
ñecy miid je' ajcxy ycixpi, ma
jadu'n ymina'ñ:

Jadu'n je Huindzin Dios
ymina'ñ: “Mimb xii tiempo
ma huingbi cötujcin
nmöhuibich yi Israel jäy etz
Judá jäy ajcxy.

⁹Ca' y'ocjadu'niñ nej iich
ngötujcin huidibi nmooyich
je' ajcxy y'ap yteedy
jecy'ajty, je huin'it tiempo
taabi nyajtzoönich ajcxy jim
Egipto naaxjot. Ca'p je' ajcxy
cuyduñ je cötujcin huidibi
ajcxy nmooyich, e paady ca'
nduüñich cuendi yi' ajcxy.”
Jadu'n ymina'ñ je Huindzin
Dios.

¹⁰Jadu'n je Huindzin Dios ymina'ñ:
Je cötujcin huidibi
nyegaamybich ma Israel jäy
ajcxy co anajty yijadu'mbi
xii tiempo ti ñaxy, jadu'n je'.

Nbidägibich ngötujcin ma yì' ajcxy yhuinma'n, e jadu'n nipaady nej jihuÿy ti njayich n'ayuc ma ajcxy y'ay yjot. E iich yì' ajcxy xyDios'adiib, e yì' ajcxy njäy'adiiybich.

¹¹ Tüg'óciy ajcxy nejhuïhuipy pin iich. Ni pin ji cayaj'ixpigipy pin je' je Huindzin Dios, ni pin, ni ymigüg, ni ymijjin ymidijc, ni pi'ctijc ni mij'anäctijc. Com nidüg'óciy ajcxy nejhuïhuipy pin iich; ypi'city ymutzity, ymijjäyity, etz ymij'anäcity.

¹² E iich yì' ajcxy nmeecxip yjibicjäy'ajtin, ni camina ngajac'ajihuïhuïybich ajcxy ypocy. Jadu'n Dios ymina'n.

¹³ Co Dios je' ycötujcin jemybi nimidyägy, je' je' co yaj'amijiiyñi je jayijp'atpyi cötujcin. Je huidibi amijiiyñip ca' je' y'octuunip, tzojc yì' yaj'ijxtigoyaani.

Je Dios ytijc huidi ya naaxhuiñ etz Dios y'it huidi tzajpjoty

9 Je Dios ycötujcin jayijp'atpyi ymiid je' anajty ñidiy'ajt nej huaad ytuñ ma Dios ytijc ya naaxhuiñ, ma jäy ajcxy huindzigihuipy Dios. ² Je Dios ytijc jadu'n je' ycojity. Je jayijpi cuarto hue' anajty xiijity Lugar Santo, jiiiby anajty y'ity je candelero etz je mesa ma tzajcaagy y'ity ma Dios yhuinduu. ³ Jiixci'py'amy ma je mimetzpi huit y'agiyducyity jiiiby jadüg'it huidibi xiijip Lugar Santísimo (ma Dios ni'ixcidägy je jäy). ⁴ Jiiby anajty tüg mij mesa ac tim ori je' anajty ma ajcxy ypoomjojcixy, e ma je' jim

anajty y'ity tüg cajoon ac ori je' anajty yñinixc huidityi. Jiiby cajoonjoty anajty y'ity tüg tu'tz ac ori huidibi anajty miid je jicxy ijxpejt huidibi Dios Israel jäy ajcxy ymooy jecy'ajty. Etz jiiiby anajty Aarón ytajc huidibi huijp huam. Etz jiiiby anajty je tzaa y'ity ma je' anajty ycijxjayity Dios y'ane'min.

⁵ Ma je cajoonnixc jim anajty je querubines ñigojtüdyity huidibi Dios y'oy'ajtin miid. Je querubines anajty codinaayb Dios, e je' anajty ajcxy yajnidigooyb miid yqueec je cajonnixc ma ajcxy je huindzigi'n ñi'py ypidacy miid jäy ajcxy ypocy ycixpi. Ca' huaad yjacyajnimidyacy mijcajee jadachambi tijaty huidibi anajty yajpatp jiiiby ma Dios ytijc.

⁶ Jabom jabom co anajty jadu'n y'ijttäy ni'ixi', chi je huingapxpi ytigiiygixy ma Dios ytijc ma je jayijpi cuarto, je Lugar Santo, tuñ ajcxy huindzigi'n etz cuydungixy yì' ajcxy ytiy'ajt miid Dios ycixpi. ⁷ Jimijt jimijt ma je mimetzpi cuarto huidibi je huit adiydujcp, jiiiby ytigiy tügtecpajc je huingapxpi huidibi jacmijtungmiid ma Dios ytijc. E co jiiiby ytigiy, chi midigiy huaj ñi'py, huidibi miid huindzigi'y Dios miid yci'mbocy ycixpi etz miid tüg'óciy jäy ajcxy ypocy ycixpi etz miid ajcxy ypocy ycixpi co ca' nejhuïygixy co ytundigoogyixy. ⁸ Miid jada ycixpi je Espíritu Santo xyajnejhuïyim co je tungmiidpi huidibi huingapxi je mayjäy ma Dios, ma ajcxy jacyajtungixy anajty je jayijp cuarto ma Dios ytijc, chi ca'ni je' anajty y'ahuächñi nej jëbi pinjaty ytigiy ma je it lugar Santísimo ma Dios

yhuinduu. ⁹Je Dios ytijc huidibi ijtp anajty ya naaxhuiñ ca' je' yjējity je janchypi. Hue' je' anajty ijxpejt'ajtp huidi Dios y'it'ajtpy tzajpjoty. Jiiby je tungmiidpi huindzigiy Dios miid ofrendas etz miid huindzigiñ. Per jada huindzigiñ ca' yajtigoy je poytunii ma je jāy ajcxy yjot yhuinmañ. ¹⁰Je judíoajy ytiy'ajt huidibi tuun ma Dios ytijc jecy'ajty, hue' je' ñigapxy caayin uucin, etz jadu'n nej ajcxy ñayyajpocynñi huáatzigixy miid nii etz canaag costumbre huidibi ajcxy cuydumyb. Jadu'n ajcxy ytuñ ixti cooni Dios yajtigajtzay tūg'óciy yi' ycōtujcin.

¹¹Per ti y'oy ya naaxhuiñ je Cristo, e yi' je' cham ijtp jacmijtungmiidpi ma Dios, yi' ti mimiñ jemybi cōtujcin jac'oybi. E yi' je' codinaayb je mayjāy ma Dios y'it tzajpjoty, je it jac'oybi jacmijpi, jacca'pxypí, ca' nmīnaanīm jāy ti cojy, e ca' yaajity naaxhuiñ. ¹²Cristo ti ytigiy ma je Dios y'it, je lugar Santísimo. Ca' ti ytigiy miid co jiiby yajquēxigañ pi'cchivo ñi'py o toro ñi'py, hue' yci'mni'py jiiby yejcpy ma Dios. Jadu'n ti ytigiy tūgtecy tigiy huinixii huinitiempo, etz xyyajnidzoocim ajt n'alma huinixii. ¹³Ooy yjanchity co yi' toro ñi'py etz je chivo ñi'py etz yi' cuyjam co ajcxy nõccixy huaj niix ma je Dios ojadajttac, co ajcxy je pocyjāy yajnihuāxcixy je ni'py etz yajnixidujtcixy je cuyjam ymiid mic'ajt co yajpocyhuáatzigixy ñinīcx, per jotjoty ca' yajhuāch. ¹⁴(Je huingapxpi huidibi tumb ma Dios ytijc ya naaxhuiñ ca' ymadāgy co jāy yajpocyhuādzipy miid toro

ñi'py), Jesucristo ñigi ti ymadāgy yajpocyhuāch jāy ajcxy miid yci'mni'py. Com Jesucristo ymiid je Dios yjihuiñ ymic'ajt huidibi ca' ycixipy ytigoyipy ni mina, chi ñaygēyeci ci'm ma Dios miid Dios yjihuiñ ymic'ajt, jadu'n nej tūg huindzigiñ huātzpi, com ca' ni ma ni ti tundigoy. E miid yci'mni'py Jesucristo xyajhuāatzim je jibīcpi ma ajt njot nhuinmañ, ca'ydī ndunīm huidibi Dios ca' jāygidāgy, e jadu'n ajt huaad ndunīm ma je Dios juugypi ytung.

¹⁵Paady yi' Jesucristo yi' je' huingapx'ajtp ma Dios miid iich ajt ycixpi miid je jemybi ycōtujcin huidibi Dios yajhui'm. Yi' Jesucristo co y'o'cy, yi' ajt je' nbocy xymeeccim tīibi ndundigooyim ma je jayijp'atyp cōtujcin huidibi Moisés jayhui'm. E jīgix pīnjaty Dios ti yhuin'ixyīi, jēbi ajcxy ycīdigiyīi je tzīnaydac ma jēbi n'ijtim huinixii. Je tzīnaydac huidibi Dios ti xy'ahuaniiyim. ¹⁶Co tūg jāy jījp'ixy y'o'cin, e yajcojy tūg testamento, ooy ycopicyty co yajnejhuīhuīpy pen janch je' ti y'ōgy je pīn yajcoj je tiy'ajt jīgix je' ytigīhuīpy tumbi je tiy'ajt. ¹⁷Co tūg jāy jījp'ixy y'o'cin e yajcojy tūg testamento, ca' je' ti mic'ajt miidity je testamento pen jugy'ajtni pīn je' anajty ti yajcojy. Huin'itni janchtiy co anajty ti y'ōgy, huin'it je testamento mic'ajt miidity. Je jemybi tiy'ajt huidibi Dios xyajhui'my jadu'n yi' nipaady nej jāy testamento yajcojy co anajty jījp'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸Paady ycixpi jecy'ajty

co Dios Moisés moy cõtujcín, yajtzoobaat je' miid iyujc ñi'py. ¹⁹Moisés je' capxhuácx je Dios ytiy'ajt ma tüg'óciy mayjäy. Chi jada' huijtzigüy tüg lana tzaptzpi miid tüg quipy aacx huidibi ooy oy yxuugy. Je' yajxoooc ma huaj mang ñi'py etz chivo ñi'py teemhuidity miid ñi, chi Moisés yajnihui'ch je libro miid je ñi'py, je libro huidibi anajty ti capxy etz nañ jadu'n jäy ajcxy yajnihui'ch je ñi'py. ²⁰Co Moisés jadu'n ytuuñ, chi yminañ: "Jada je' je ñi'py huidibi yajtzoobatp je ane'mín je tiy'ajt huidibi Dios ti yecy ma miich ajcxy." ²¹Moisés nañ jadu'n ñi'pyñihui'ch je cochac tije ma anajty yDios ojadajtcixy, e tüg'óciy tumbajt huidijaty jiiby tumb. ²²Dios ycõtujcín, je jecyip, yminañ co tüg'óciy huidijaty yajtungixyp co Dios ojadajtcixy, copicy yajhuádzipy miid ñi'py. E pen ca' ajcxy teemy yocy ñi'py, Dios ca' huinmecxa'n yi' ajcxy ypocy.

Co Cristo y'o'cy miid ajt nbocy ycixpi, yi' yajnicxy ajt nbocy

²³Ooy jada anajty ycopicyity iyujc ñi'py huindzigi'ñ, jigix yhuádzip huidijaty tumb ma Dios ytije ya naaxhuiñ, je huidibi ijxpejt'ajtp anajty nej Dios y'it jiiby tzajpjoty. Per je Dios y'it huidibi jiiby tzajpjoty chojcpy jac'oybi huindzigi'ñ ca'ydi huidi ya naaxhuiñ. ²⁴Com Cristo ca' je' ytigiy ma Dios ytije huidibi jäy ajcxy ti cojy. Je tije huidibi jäy ajcxy ti cojy, je' je' ñigojtuutin je it lugar janch janchypi huidi jiiby tzajpjoty. Cristo tigiyy ma je Dios y'it ylugar jiiby tzajpjoty, ma

je' cham xycodinaayim ma Dios yhuinduu. ²⁵Je judío mįjtungmiidpi huidibi huingapxp ma Dios ytije, huinjimįtity ytigiyy ma je Dios ytije co yecy ñi'py huidibi ca' ci'mni'py'adyii. Cristo ca' y'i ñay'ahuanıyii y'ögipy canaag'oc, jeyi tųgtecypajc ytigiyy ma Dios y'it miid yci'mni'py. ²⁶Co ixıyipy ca' yjadu'nıty, canaag'oc Cristo ixıyipy patni chaachy'öcin maabi naaxhuiñybi chondagy. Per jadachambi ma xii tiempo ycıxaani ytıgoyaani, Cristo tųgtecypajc ñayguëxıci ya naaxhuiñ, jigix codınähuiipy tųg'öciy jäy ma Dios miid ajcxy ypocy ycıxpi. Jadu'n Cristo tuuñ jigix yajtıgoyıpy pocytunii. ²⁷Dios ane'mın pidac ya naaxhuiñ co nidüg nidüg jäy paadıp yi o'cin tųgtecypajc. E Dios ti pidägy je xii je tiempo mına tiyduna'ñ nidüg nidüg jäy miid ypocy ycıxpi. ²⁸Je Cristo jotujc tųgtecypajc nayyejci ma je o'cin co yajpocyñihuaatztäy je mayjäy. Chi jada' ñayguëxıga'ñyii je mımejtz'ocpi ya naaxhuiñ, e ca' nmınaanim co yajpocyñihuaatzaanıp jadüg'oc je mayjäy, hue' je' nihua'namyb ycohua'namyb tųg'öciy pınjaty jįjp'ıjxıp cıxyjot huinįjot co je' miına'ñ miid yi' ajcxy ycıxpi.

10 Je Dios ycõtujcín huidibi Moisés jayhui'my jecy'ajty, hue' je' anajty ñidiy'ajt je oybi huidibi miinamb. Ca'p je' anajty yjējıty je oybi. Paady je cõtujcín huidibi Moisés yjayhui'm ca' je' jēbi huádz yaj'ahuimbity pınjaty pocy ytumb, pınjaty mijhuäcp anajty ma Dios miid je iyujc

huidibi ajcxy Dios yajhuindzigiib, huidibi ytun'ahuimbijtcixyp jimijt jimijt. ²Co ixypy je cötujcin y'ocmadägy huidibi Moisés yjayhui'm yaj'ahuimbity ixypy huadz ajcxy je pocy ytumbi, ca' ixypy je jadu'mbi huindzigi'n y'ocyajtuuni jimijt jimijt. Com pin je jadu'mbi huindzigi'n yejcp, co ixypy je' ypocy yajnicxtäy, ca'p je' ma ñajjihuühuiyb ti bocy miidity jadüg'oc. ³Co jadu'n yaj'öccixy je iyujc miid ypocy ycixpi, je' je' je tiy'ajt co ajihuiygootigixy ypocy jimijt jimijt. ⁴Com yi huaj mang ñi'py etz yi chivo ñi'py ca' mic'ajt miidity co pocyajnicxtähuipy nimina.

⁵Paady co Cristo ymiin ya naaxhuiñ, chi ñamay je Dios:

Ca' miich ni ti huindzigi'n mdzojcní ma ymiin iyujc'ögy, ti miich xyñi'ixi'yich tüg ninicx.

⁶Ca' m'ocjäygidaaacni huindzigi'n iyujc huidibi yajno'cp. Ca' miich m'ocjäygidaaacni co jäy xyajhuindzigi'y iyujc miid ypocy ycixpi.

⁷Chi nmína'nich: “Dios, cha nmiinich jigix miich mdzojcin yajcuydunipy, jadu'n nej yjaybetyity ma miich mnecy miid iich ycixpi.”

⁸Tim jayijp, Cristo ymina'n co Dios ca' octzojcní, ni cajäygidägy je iyujc ögy huidibi yajhuindzigi'yip, ni je huidibi yajno'cp, jigix je pocyñicxtähuipy, oy yi' yjajëjity huidibi ñigapxy yajtunipy ma je Dios ycötujcin huidibi Moisés yjayhui'm. ⁹Chi jada' jadüg'it yjaybetyity co Cristo jadu'n

ymina'n: “Cha iich nmiin, jigix miich mdzojcin yajcuydunipy, miich huidibi Dios'ajtp.” Hue' minaanim, yajtigoy je cötujcin huididi ane'mb co jäy ajcxy huindzigi'y iyujc miid ypocy ycixpi, etz mic'ajt mo' je jemybi cötujcin huidibi Jesucristo xymooyim.

¹⁰Dios jadu'n ti xyajhuaatzim ajt nbocy, com Jesucristo ti tuuni Dios chojcin co ci'm ñinicx tügtecpajc yejcy ma yi o'cin miid tüg'öciy jäy ypocy ycixpi.

¹¹Tüg'öciy judío sacerdote huidibi tungmiid ma Dios ytijc jabom jabom jadu'n tun'ahuimbijtcixy tügpi huindzigi'n, huidibi ni camina yajnicxtaayi jäy ajcxy ypocy. ¹²Yi Jesucristo tügtecpajc yi' yejcy ñinicx ma yi o'cin huinixii huinitiempo, chi jada' y'ixtacy a'oy'amy ma Dios ymijc ma ane'mdäy tüg'öciy. ¹³Jiiby tzajpjoty Jesucristo cham y'ahuixy, ixti cooni Dios yi' ymidzip mimadactaayip, e jadu'n ajcxy nipaadipy nej jihuüy Jesucristo ytecpocxpejt. ¹⁴Miid tügpajc je huindzigi'n huidibi Jesucristo yejcp, tudägy yaj'ahuimbijttäy huinixii huinitiempo pinjaty ti ypocyhuäch. ¹⁵Yi Espíritu Santo nidiy'ajtp ma iich ajt jadu'n nej Cristo ti tuñ. Com jaybety miin ma Dios ñecy ma Dios jadu'n ymina'n:

¹⁶Je huin'it xii je huin'it tiempo nyajmihu'i'maamybich je Israel jäy jemybi ayuc jemybi tiy'ajt. Nbidägibich ngötujcin ma ajcxy yjot, e njayamybich ngötujcin ma ajcxy yhuinma'n.

¹⁷Chi jac'axam Dios ymina'n:

Ni camina njäy medzaanich
ajcxy ypocy, etz jadu'n nej
ajcxy ytundigooy.

¹⁸Co je pocy ti yajhuinmecxtäy,
ca'p ycopycicyty yjacyajtunipy tijaty
huindzigi'n miid pocyhuinmeecxin
ycixpi.

Chojcxy nmihuingoonim yi Dios

¹⁹Paady miich ajcxy migügtijc,
jëbi iich ajt ndigiiyim agujc
jotcujc ma Dios yajpaady miid co
Jesucristo ti temy ti yocy ñi'py miid
iich ajt nbocy ycixpi. ²⁰Cristo ti
yaj'ahuäch je ñi'aa je tü'aa miid
iich ajt ycixpi miid yci'm ninëcx,
je ñi'aa tü'aa jemybi oybi huidibi
tigiiyb ma Dios y'it. E je' yñinëcx
jadu'n nipaady nej je huit huidibi
anajty adujc je Lugar Santísimo
ma Dios ytijc ya naaxhuiñ, je huit
huidibi ciichhuäch co Cristo y'o'cy.
²¹Jesucristo yi' je' je migtungmiidpi
huidibi xycodinaayim ma Dios
ytijc jiiby tzajpjoty. ²²Paady ycixpi
jëbi nmihuingoonim Dios miid
oyjot oyhuinma'n, etz miid je
mibijcin janchypi. Cristo ajt ti
xyajhuaatzim njot nhuinma'n co
ñi'py temy yojcxy miid ajt nbocy
ycixpi jigix ca'ydi nayjihuiyim
pocymiid, jadu'n nej jihuiy ti
ndziihuim miid huädz ni. ²³Tzoc
tudägy n'ijtim ma nmibijcin, ca'
nyajtigajtzim nmibijcin, com Dios
cuydunipy yi' tiibi xyaj'ahuaniiyim.
²⁴Tzoc nhuinma'ñypidaacim co
njot'amijmooyim ajt nmigügtijc,
jaydëbi naychojcin nayjihuiyim
miñ xyipy, e nduunim oyjäy'ajtin.
²⁵Ca' n'ixmajtzim je nayoymugii,
jadu'n nej ajcxy nijëjity
costumbre miidity co ca' ajcxy

yöy ma naymujctac. Nigi tzoc
nayjot'amijmooyim, e jadu'n nej
cham yaj'ijxni co yhuingooni ma
je Huindzin Jesucristo ymiinaani
jadüg'oc ya naaxhuiñ, chona'n
tzajpjoty.

²⁶Pen iich ajt jacpocytunim
tzojcingíxy ma anajty ti
nejhuiyim Dios ytiy'ajt, ca'p
ji huingbi huindzigi'n huidibi
xyajpocyhuaatzim. ²⁷Je'
janchtiy njacjijp'ijxim miid
tzigi'n jihui'n je tzaachypi co
anajty Dios xytiydunim, e
xypidaacim mijjiinjoty huidibi
yajhuindigoydähuamb Dios ymidzip.
²⁸Co pin cacuyduun Dios ycotujcin
huidibi Moisés yjayhui'm, e jim
metz o tugiig testigo co yjadu'nity,
yajmoy je' y'o'cin ca' miid'ajty ti
pa'ayoohuin. ²⁹¿Nej miich ajcxy
mınaangixy? ¿Nej cay jac'öctiy
je tzaachypi mihuaad'ajtcixy? Je
pinjaty ca' ixa'n Dios y'ung etz
nixiici yajxiici Cristo ñi'py huidibi
yajpocyñihuaatzp, jadu'n nej je
jemybi ayuc ymina'n huidibi
Dios yajhui'm. Etz nañ jadu'n
ajcxy ni'ojiiygixy Dios yEspíritu
huidibi may'ajt oy'ajt tumb
miid je' ajcxy. ³⁰Nejhuiyim co
je Huindzin Dios ymina'n: “Hich
xypatp ndzaachytunipyich jäy
ajcxy miid ypocy ycixpi. Hich yi'
nyajcomidohuipy ajcxy ypocy.”
Etz nañ jadu'n yjaybetyty ma
Dios ñecy: “Yi Huindzin Dios
yi' yjäy tiydunipy.” ³¹¡Ooy chach
mij y'ayo'nity pen je Dios juugypí
xychaachytunim miid ajt nbocy
ycixpi!

³²Per ajihuüiyigixy miich ajcxy je
xii je tiempo tiibi ñaxy, je taabi miich

anajty ajcxy ti xycidigñiyigixy je tiy'ajt janchypi, ñipatyep je' anajty nej tüg tiicxin jain ajcxy miidity. Ti ooy mhuindinaaygixy mijiptinaaygixy tzaachypi ayo'n miid yi mmibijcin ycixpi. ³³Nijëjity miich ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n jacjadyi ti abaatcixy tzaachypi jadu'n nej je tiibi ajcxy ooy yajtzaachtungixy. ³⁴Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcujc ajcxy ti myajtungixy mecxtujcin co ajcxy xypjci tijaty anajty ajcxy miid. Nejhuüyim co jiiby tzajpjoty miich ajcxy miidity ti jaty jac'oybi huidibi huinixi huinitiempo ijtp. ³⁵Jacmijpidaaccixy Dios, ca' mjetmetzciygixy. Co mmijpidáaccixipy Dios, huin'it ajcxy mbaadipy oybi may'amy ma Dios. ³⁶Chojcxy co miich ajcxy myajtúngixipy mecxtujcin co mguydunaangixy nej Dios tzocy, e Dios xyajcidigñiyigixip huidibi yi' ti ahuanüy. ³⁷Jaybety jadu'n ma Dios ñecy ma jadu'n yminañ:

Tzojc, janch tzojc ymiinañ je huidibi tzonamb tzajpjoty, e ca'p je' jecyñity.

³⁸Jadu'n Dios yminañ:

Pinjaty iich ti ngöbicy co ytudägyjäyity, tzinahuip je' miid ymibijcin. E pen ixtigihua'cp ma ymibijcin, ca' jadu'n njotcujc'adipyich miid je'.

³⁹Ca'p iich ajt njëjity huidibi ixtigihua'cp ma nmibijcin, e ytigoy y'alma, je' iich ajt pin mibijcp, e jadu'n n'alma paadipy nidzoocin.

Yi mibijcin

11 Jotcujc nayjihuiyim jadu'n co huidibi nmibijcin

janch yi', oy co ca' n'ijxim. Je huidibi nmibijcin je' xymooyim jotcujc'ajtin miid huidibi njijp'ijxim ma Dios. Je huidibi nmibijcin nejhuüyim co janch janch jadu'n, oy ca' n'ijxim. ²Com miid co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³Miid ajt nmibijcin ycixpi nejhuüyim co Dios oyduñ tüg'óciy huidibi jii'ajtp miid y'ayucti'ajty, jigix huidibi cham n'ijxim je' yi' yaj'oyiyy huidibi ca' yaj'ixy.

⁴Miid co Abel mibijcy Dios, paady Abel ymoy Dios huindzigi'ñ jac'oybi ca'ydi Caín, e Dios cöbijci Abel yhuindzigi'ñ, e miid je' ycixpi Abel ooy ycömaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuiy yjacmiydägyñi chambaad. Com miid je mibijcin huidibi anajty ymiid yejc ijxpejt ma iich ajt.

⁵Miid co Enoc mibijcy Dios paady yajnicxi jadügpi tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n yminañ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayin." ⁶Pen ca' nmiid'ajtim mibijcin ni jadu'nñiyi, ca' Dios jäygidägy ajt ndzinaayin. Com co nmihuingonaanim Dios, hue' tzocy co nmibijcin co Dios yjiijity, e co yaj'ahuimbidity oybi miid pin mibijcip.

⁷Miid co Noé mibijcy Dios, paady Dios ñimaayi jayijp co ytuna'nyii yjada'nnyii mijniigom huidibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg

ñiigomdzögipy. Miid co anajty Noé miidity mibijcin, paady yajpocycäy je naaxhuiñyjäy ajcxy ca'pi ymibicy. Chi Dios cöbicy Noé jadu'n nej tudägyjäy miid co mibijci Dios y'ayuc.

⁸Miid co Abraham anajty Dios mibicy, paady Dios yhuin'lijxi e ycapxymidouhui. Chi je' choon ma ñaax ycajpin ñicxy ma je it lugar huidibi Dios anajty möhuaanip co je'adiiyb. Choñ, ni ca' anajty nejhuiy ma ñicxy. ⁹Miid co Abraham mibijcy Dios, paady chinaydacpijcy nej tüg huingjäy ma je naax huidibi Dios yaj'ahuaniiyi, huidibi ca' yjējity. Chinay ma huittijc, nañ jadu'n ajcxy y'idiih Isaac etz Jacob huidibi ajcxy nañ jadu'n Dios yaj'ahuaniiyi je naax. ¹⁰Abraham je' anajty y'ahuijxyp mina jēbi chinaydacpijcy ma Dios y'it ylugar huidibi jadu'n nipatp nej tüg cajp huidibi miid y'ijx ta'tzpcy y'oyduñity, je huidibi Dios ñihuinmayiiy, je huidibi Dios yajcojy yaj'oyiiyb.

¹¹Sara hue' anajty pumäy, ti anajty ymijäyñi, ti ñajxni tiempo mina jēbi y'ung'ixy. Per miid co mibijcy Dios y'ayuc huidibi ti ñimaayi co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tiibi ahuaniiy. ¹²Miid tügpäy jäy, je Abraham, ti choondacy tügpicy y'amigügtijc huidibi oy ti ymayiy. Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³Tüg'öciy je jäy ajcxy huidibi ya yajnimiydacp, öctay ajcxy ni ycacidigiyyi je tzinaydac huidibi anajty Dios ti yaj'ahuaniiyi. Miid co ajcxy mibijcy Dios, paady nejhuiiy ajcxy co jacjiini Dios ymöhuiiyb je huidibi ti yaj'ahuaniiyi. Com ymibijc ajcxy Dios, paady jotcuyc ñayjihuiiyi co Dios möhua'ñyii jacjiini huidibi ti yaj'ahuaniiyi. Yminañ ajcxy co anajty y'adzinaaygixy ya naaxhuiñ. ¹⁴Pinjaty jadu'n minamb co adzinaaybi ajcxy yajpaady, hue' yajhuimbizimy co chinaydac yjugy'ajttac ajcxy y'ixtaayb. ¹⁵Co ixyipy ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶Per je' ajcxy ñigi anajty nijot'ajtcixy it lugar jac'oybi, je' je' je tzajpjoty. Miid jada ycixpi Dios ca' yi' cho'yduñ co ñaydiyiyi Dios ma je' ajcxy. Com ti ni'ixiiyi ajcxy chinaydac jiiby tzajpjoty.

¹⁷Abraham mibijcy Dios, e co Dios Abraham y'ijxmajtzä, chi yajmiin Isaac co anajty yajhuindzigihua'ñ Dios. E janch cixyot je y'ung tügpajc anajty yecy, je y'ung huidibi Dios ti yaj'ahuaniiyi anajty. ¹⁸Dios ñimay Abraham co miid Isaac miid'ada'ñ may y'ap y'oc. ¹⁹Abraham yhuinmaayb anajty ooy co Dios tügpajc cötujcmiidip yajjugypigipy öcpiyi. Paady jēbi iich ajt nminaanim co Abraham ycidigiyyi jadüg'oc y'ung co anajty ti yjugypicy co anajty ti y'ögy.

²⁰Isaac mibijcy Dios, paady Isaac Dios mibijctzoy miid Jacob etz Esau ycixpi co huen ajcxy oybi paadip ma je tiempo huidibi mim

cidacni. ²¹Jacob ymibijcy anajty Dios, paady co anajty y'ögaani, chi ahuaniiy conuucxin ma nidüg nidüg José y'ung y'anäg. E jadu'n Dios ooy huindzigiiy ojadajty yam ñaygodajc'adyii miid ytajc co anajty ooy ti ymijjäyiiiñi. ²²José co anajty Dios mibicy ma anajty y'ögaani, yminañ co Israel jäy ajcxy anajty ypidzimaangixy comjegy jim Egipto, chi yajhui'my tiy'ajt nej ypajc ytuniiyb co anajty choñ ajcxy jim Egipto.

²³Miid co anajty ajcxy mibicy Dios, paady co Moisés yma'xung'ajty, chi ytaj yteedy yützi tugiig po'. Com co ajcxy ijxy co anajty ooy y'oyity je ma'xung, ca' ajcxy anajty tzigiy je rey y'ane'min co anajty yaj'öctähuañ tüg'öciy ungma'xung yëydijcpi. ²⁴Miid co Moisés mibijcy Dios, paady co oy ymij'anäccojni, ca' tzojcy co ñaydijiiyb co rey ñiix y'ung'adiib. ²⁵Hue! janchtiy Moisés nigü nijot'ajty co ayo'n tzaachypi minaxipy yajnaxipy quipxy miid Dios yjäy, ca'ydi co nixondägipy je jugy'ajtin ma je rey ytijc huidibi Dios ca' jäygidägy. ²⁶Moisés nigü ñayjihuiiyi jotucj co tzaachypi ayo'n anajty minaxy yajnaxy miid Cristo ycixpi, ca'ydi co miid'ajttähuiipy jugy'ajt comeeñ'ajt jim Egipto. Com Moisés ti anajty yhuinma'ñypidägy co Dios yegañ je oybi. ²⁷Miid co Moisés mibicy anajty Dios paady choñ jim Egipto, ni catzigiy co anajty rey yjotmädy, jadu'n y'ijty tudägy nej jihuüy ixy je Dios ca'pi yaj'ixy.

²⁸Miid co mibijcy Dios paady Moisés tuuñ je pascuaxii, chi

ni'ane'mdiy co huen tijc'aguu tüg tüg yajni'pyiy, jigix co je ángel huidibi yaj'öcp, ca'p je' je israelitajäy y'ungoob yaj'o'cipy. ²⁹Miid co ajcxy mibijcy Dios paady je israelitas ajcxy yajnaxxy je tzaptz mejy jadu'n nej jihuüy ñajxcixy huinditztuuy, e co ajcxy je Egipto jäy nañ jadu'n yjanaxañ,cijx ajcxy ñii'o'ctäy.

³⁰Miid co ajcxy mibijcy Dios, paady ycidäday je poch ma je Jericógajp, taab anajty je israelitas ajcxy ti jühuidijtcixy huixtucj xii.

³¹Miid co Rahab, je töxyjäy jibic tzinaaybi, mibijcy Dios, paady ca' y'o'cy quipxyi miid je huidibi anajty ca' capxymidoogixy Dios. Com co je' yajjättacy ma ytijcin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajcüyögyxy yajtecyögyxy Canaán naaxjot.

³²¿Ti njacmiydägibich? Nyajtigoy'idaamybich tiempo co nimiydägibich Gedeón, Barac, Sansón, Jefté, David, Samuel, e jacjadyii Dios y'ayucajtzcapxiybi. ³³⁻³⁴Miid co ajcxy mibijcy Dios, paady ymimadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuaniiyigixy. Yaj'adujc ajcxy caa y'ahuac, yajxeem ajcxy jiin huidi anajty ooy ymijity, tzooc ajcxy co anajty yaj'ögaangixy miid espada. Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chiptungixy, e ymimadactay ajcxy maymidzip. ³⁵Jim anajty töxyjäy yjätjigixy huidibi ajcxy cidigiiyi y'ung juugy

huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nïdzoozin. Jadu'n ajcxy paty o'cin, jaydëbi patcixy jugy'ajtin etz tzinaayim jac'oybi ma Dios. ³⁶Jadyii Dios y'ayucnajtzcaxiïybi ooy ñixiici yajxiici, yajc'ajty, etz tzummy mach ypujxtijc'iñäy. ³⁷Jadyii Dios y'ayucnajtzcaxiïybi y'o'cy ajcxy tzaagögäch, jadyii yaj'ajidiïy ajcxy janch tim cup y'ijxmajtzi ajcxy, jadyii yaj'o'ci miid espada. Ymiñ xyijpy xii yaa yhuidijtcixy ymiid ajcxy ñinixc yüch miid cöbixy'ac etz miid chivo'ac, ayoob jäy ajcxy, jotmay miid, yajtzaachytungixy yajca'oydungixy. ³⁸Yi jadu'mbi Dios y'ayucnajtzcaxiïybi ajcxy ni je naaxhuiñyjäy anajty camihuaadity. Miid ymidzip pahuidijtcixy, paady yhuidijtcixy anajty tïtznaaxtuum etz yuugjoty, chinaagyixy naaxpa'tci'py etz majaty ang. ³⁹Nidüg'öciy je' ajcxy oy cömay ajcxy yjanajxy miid co mibijcy ajcxy Dios, ca' ajcxy paty tiibi anajty Dios y'ahuaniy. ⁴⁰Com Dios jac'oybi je' anajty yegamyb miid iich ajt, paady ca' ajcxy paty je oybi tiibi Dios y'ahuaniy. Ti anajty Dios nihuinmayïy co yajca'paaani yi' ajcxy ytudägy'ajtin quipxyi miid iich ajt co Cristo y'o'cy miid iich ajt nbocy ycixpi.

Tzoc iich ajt nhuinma'ñybidaacim ma Jesús

12 Com nmiid'ajtim canaag ijxpejt nej jäy jecy'ajty mibijcy Dios, paady iich ajt jadu'n nipaady nej jihuïy huinduy jajiixci'py nmiid'ajtim jäy huidibi

ti yajniguëxigy ymibijcin. Paady ycixp tzoc ahuing pidaacim je huidijaty xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñydidgooyim, e tzoc naymic'ijxim cuydunim yi tiy'ajt miid mecxtujcin ma ajt ndzinaayin, jadu'n nej jäy ñaymic'ijxigixy co nayboyicquixigixy. ²Tzoc nhuinma'ñybidaacim ma Jesús. Jim ijxpejt nbaatim ma Jesús nej jëbi nmibijcin Dios. Jesús yi' je' ti xyajnejhuïyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuïyib anajty co jadu'n y'oc'ayoohuipy, chi ypaadipy jotcujc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³Huinmaagyixy miich ajcxy je Jesús y'ijxpejt, nej pocyjäydijc chaachytuungixy etz ñi'ojiigyixy, etz ca' y'ixaani, paady ca' mdzïjpcigixy ni mgamijotmetzcïygyixy. ⁴Ca'ni miich ajcxy ayo'n tzaachypi myajnaxy mabaad ni'py ajcxy mxiiibidyii jadu'n nej Cristo yjajty. ⁵¿Nej ti miich ajcxy mjäydidgooygyixy je capxhuijin huidibi Dios ti xymooygyixy nej jihuïy yci'm'ung? Jadu'n ymina'ñ ma Dios ñecy:

Miich n'ungich, ca' mbidägy nej jihuïy ca' ytim ytiijty je tzaachypi huidibi Dios miid xycapxhuijy, ni ca' mjotmetzcïhuipy co xyaj'öjipy.

⁶Dios ycapxhuijpy yi' pinjaty chojcpy yjihuiyib. Dios chaachytummy yi' ajcxy co

ytundiꝑooꝑ, pinjaty yi' ti
 cöbicy nej jihuüꝑ yci'm'ung.
⁷Mimadaaccix miich ajcxy je castigo,
 com Dios jadu'n yi' xymiidity ajcxy
 nej jihuüꝑ yci'm'ung. ¿Nej ji jada' tüꝑ
 ung, e ca' yteedy chaachytunüꝑ co
 ytundiꝑooꝑ? ⁸Pen ca' miich ajcxy
 Dios ti tzaachypi xymooygixy, jadu'n
 nej yi' moy castigo tüꝑ'óciꝑ y'ungdijc
 y'anäctijc, ca' miich ixypy ajcxy Dios
 xy'ung'adyii tüꝑdudäꝑ. Jadu'n miich
 ajcxy m'idipy nej tüꝑ pi'c'anäg huidibi
 yteedy ca' y'ixa'nyii. ⁹Jadüꝑ nax, taabi
 anajty ajt nbi'cnity, iich ajt ndeedy ya
 naaxhuüꝑ xy'iühuijim xycapxhuijim
 anajty, e xychaachytuunim co ca'
 ngapxymidoohuim nhuindzigiꝑim
 ajcxy. ¿Nej co ca' huaad n'lijtim
 ane'my ma ajt ndeedy huidibi
 tzajpjoty yajpatp? E jadu'n jëbi
 nbaatim je jugy'ajtin huidibi ca'
 ycixipy ytigoyipy nimina. ¹⁰Iich
 ajt ndeedy ya naaxhuüꝑ xy'iühuijim
 xycapxhuijim anajty miid jada conbi
 jugy'ajt ycixpi, jadu'n nej je' anajty
 ajcxy oy'ixy. Nañ jadu'n Dios iich ajt
 xychaachytuunim miid ajt n'oy'ajt
 ycixpi etz jigix nmiid'ajtim huädz jot
 huädz huinma'n nej Dios ymiidity
 huädz yjot huädz yhuinma'n. ¹¹Oy
 yjanchity co ca' ti tzaachypi ndzojcin
 ma yam nbaatim je tzaachypi, com
 ooy ndzachjihuiꝑim je tzaachypi, e
 ca' jotcujc nayjihuiꝑim. Per pinjaty
 ixpijcpí Dios chojcin miid je tzaachypi
 ycixpi, chi je' yhuimbizimiꝑigixy tüꝑ
 jugy'ajtin tüdäꝑipi etz jotcujcpi.

**Je huidibi ayo'ngoꝑ co Dios
 y'ayuc ngacöbiganim**

¹²Paady miich ajcxy jotmicpijccix
 ma mmibijcin, jadu'n nipaadip
 nej jihuüꝑ myajpidiccixy mgi' tiibi

y'anucxiinyñi, etz mgoxcohuajc
 mic'ajt paady huidibi anajty ca'
 mic'ajt miidity. ¹³Ixtaaygix nii'aa
 tü'aa tüꝑybi ma mdzinaayin, jadu'n
 nipaadip nej jihuüꝑ yi mdecy
 huidibi mäðip ti chöꝑy, e camina
 jadüꝑ'oc yhuidip.

¹⁴Tzinaaygix miid oyjot
 oyhuinma'n miid nidüꝑ'óciꝑ
 jäꝑ. Ca' mdüꝑgixipy ti tzip.
 Miid'ajtcix tüꝑ tzinaayin huätzpi,
 pen ca' jadu'n mdungixy, ni pin
 ca'ixipy je Huindzin Jesucristo.
¹⁵Ooy cuenditungixp co ni pin
 cajjpyöydüðipy je pubejtin huidibi
 Dios ti ahuanꝑy, jigix nañ jadu'n
 ni pin ycayajpaadipy janch mäð
 yjot yhuinmañ, e yajhuindigoydäꝑ
 yajmättäꝑ jacjadyii ymiügütiꝑc, tim
 jadu'n nej tüꝑ ujtz ta'mbi ypa'mduñ.

¹⁶Ni tüꝑ miich ajcxy ca' huaad ti
 ayuc miid'aty miid huingbi töxyjäꝑ
 huidibi ca' miich mdöxyjyc'adyii.
 Ca' nañ jadu'n m'ixtiꝑipy je ayuc
 huidibi Dios yajhui'my miid miich
 ajcxy ycixpi, jadu'n nej y'idiich
 Esaú. Miid tüꝑ caayin uucin
 Esaú toocnax je huidibi anajty
 möhuaanip yteedy co y'unggoobity.
¹⁷Miich ajcxy mnejhuiꝑ co Esaú
 tocy huidi anajty paatip co japada'n
 je conuucxin huidibi anajty
 yteedy möhuaanip, ca' jadu'n Dios
 cöbijcy, chi Esaú ooy yjayaaxni,
 per ca' anajty ñihuinma'n nej
 yjothuimbidip miid je' ycixpi tiibi
 anajty tuñ.

¹⁸Ca' miich ajcxy ti mjaty ti m'ixy,
 nej jecy'ajty yi israelitas ajcxy yjajty
 etz y'ixy co ajcxy mihuingoñ je
 cop Siná ma anajty Dios ti piðäꝑ
 mij jiin, ma anajty ooy yhuidzucy
 yjidity etz mijpoj miꝑtigoy ñaxy, ma

anajty ooy y'agoodziy anaxy. ¹⁹Ni mgamidooy ajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigápxigixy com ooy anajty chigiigixy.

²⁰Je' je' anajty ycixpi co anajty ca' mimadägaangixy je ane'min cötujcin huidibi anajty minamb: "Pin anajty ytecy pidacp ma yi cop, hue' yi' y'oyyaj'o'cnity cögäch miid tzaa o miid quipyijpxu'n, oy ixypy y'iyujcity." ²¹Oy chigiinyiñi huidibi anajty yaj'ijxp, Moisés ci'm minaan: "Tziyuuybich yam miid tzig'iñ."

²²Per miich ajcxy jadu'n nipaady nej jihuüy ti mmihuingoongixy yi cop huidibi yxii Sión etz je Dios juugypi ycajp. Je' je' je Jerusalén tzajpjotypi ma canaag mil je ángeles ajcxy yöymujccixy. ²³Ti miich ajcxy mmihuingoongixy ma ti yöymujccixy je jaccömaaybi jäy huidibi ajcxy yxii cojaay ma Dios ñecy jiiby tzajpjoty, je huidibi ajcxy huin'iib huingapxtacp Dios. Ti miich ajcxy mihuingoongixy Dios je huidibi nijuez'ajtp tüg'óciy. Nañ jadu'n ti miich ajcxy mihuingoongixy je' ajcxy je oyjäydijc y'espíritu huidibi Dios ti yaj'ahuimbijttäy tudägy. ²⁴Miich ajcxy ti mihuingoñ yi Jesús, yi huidibi xycodinaayim ma Dios miid je jemybi cötujcin huidibi Dios yajhui'my miid iich ajt ycixpi. Yi Jesús huidibi mic'ajtmoy je Dios y'ayuc jemybi, co ñi'py teemy yojcy miid ajt nbocy ycixpi. Yi Jesús co ci'm ñi'py teemy yojcy miid jäy ajcxy ypocy ycixpi, nigí oy yi' ca'ydi co Abel iyujc ñi'py teemy yojcy miid ypocy ycixpi.

²⁵Paady ycixp ooy cuenditungix miich ajcxy, ca'ydi yaj'ixtijy Dios, je pin ti xyajmihui'mim jemybi y'ayuc. Je jäy ajcxy huidibi tzinay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naaxhuiñ. O'ctíy iich ajt ca' ndzoocim, pen nmooyim ajt njiix je Dios, je pin y'ayuc xyajmihui'mim huidi tzoon tzajpjoty.

²⁶Co Dios y'ayuc yejcy jecy'ajty, chi yajtziyuuy ooy naax. Jadachambi Dios ymina'n: "Jadügtecypajc nyajtziyuuya'ñich je naax, e ca' nminaanim naaxti'ajty, nañ jadu'n nyajtziyuuya'ñich je tzajp." ²⁷Co jadu'n Dios ymina'n: "Jadügtecypajc nyajtziyuuya'ñich je naax." Hue' yajhuinjihuüy co ytigoydähuüpy huidijaty yücxp huidibi Dios yaj'oyiiy, e je' hui'mip je huidijaty ca' yu'cxy. ²⁸Paady je Jesucristo ycötujcin huidibi Dios xyajmihui'mim, ca' yi' huaad ytigoy. Tzoc yajnaxim Dioscojuyip miid Jesús y'ayuc ycixpi, e nyajmij'ajtim n'ojadajtim Dios miid tudägy'ajt etz miid huindzig'iñ nej je' jäygidägyin. ²⁹Iich ajt nDios jadu'n yi' nej tüg jün huidibi nöctaayb tüg'óciy.

Nej jëbi nyajjäygidaacim Dios

13 Miich ajcxy huidibi mibijcp Jesucristo, ca' mjäydgooogixy co ajcxy mnaychójcigixipy miñ xyipy nej jihuüy ajcxy mdügquëxyity. ²Ca' ajcxy mjäydgooogixipy co oyjäy'ajtin mdúngixipy miid pinjaty ajcxy xycojädiyb. Miid co oyjäy'ajtin ajcxy tuuñ, chi nijëjity ajcxy yajjättacy ángeles ajcxy, ni ca' ajcxy huinjihuüy co ángeles anajty ti yajjätaaccixy.

³Mjäy medzip ajcxy pinjaty tzumy'iñaayb mach'iñaayb jadu'n nej jihuiy miich ajcxy nañ jadu'n mdzumy'iñaaygixy mmach'iñaaygixy quipxy miid je' ajcxy. Jäy medzip miich ajcxy pinjaty tzaachypí ayo'n minajxp yajnajxp, com nañ jadu'n miich ajcxy miidity je ninicx huidibi jébi y'ayoy.

⁴Huen nidüg'óciy jäy huindzigiygixy yajmij'ajtcixy je pijcin casada'ajtin. Huen je yéydijc etz je ytöxyjic naymiidtzináayigixy yajxon, com Dios yí' tzaachytunipy pinjaty tundigooyb miid huingbi töxyjäy.

⁵Ca' m'adzojccixy meen. Mijotujc'ajtcixy ti ajcxy ii miid. Dios ti je' ymína'n: "Camina xii iich miich ajcxy n'ixmadzipy, ni iich miich ajcxy ngajäy digoyipy."

⁶Jadu'n jébi nmínaaním agujc jotujc: "Yí Huindzin Dios yí' xypubejtpich, ca' ndzigihua'ních jäy nej xyjatuna'ních."

⁷Jäymejtzcix miich ajcxy je pinjaty ti xyñigohuajc'ajtcixy, je pinjaty ti xyajmiidmiydaaccixy Dios y'ayuc ytiy'ajt. Huinmaaygix nej je' ajcxy anajty ytudägy'aty, padungix nej je' anajty ajcxy miidity ymibijcin.

⁸Jadu'n nej Jesucristo oybi tuñ jecy'ajty, nañ tím jadu'n oybi tuñ chambaad, etz oybi tuna'n huinixii huinitiempo, ca' yí' yajtigadzip yí yhuinma'n ni mína. ⁹Ca' miich ajcxy myajhuin'ingixy miid canaag ixpijcin huidibi ca' ytügnaxity miid Jesucristo ytiy'ajt. Nígi oy co ajt nbidaacim nhuinma'n ma je Dios y'ayuc, nej yí' xyojocim

xyjihuiyim, nej yí' may'ajt tuñ miid iich ajt. Ca' mbidaacim mhuinma'n ma je cötujcin huidibi adujcp nijéjity caayin uucin. Ni ti jotujc'ajt ajcxy capaty pinjaty panícxp yí jadu'mbi cötujcin.

¹⁰Je judío tungmiidpi huidibi huindzigi'n tumb anajty ma Dios yhuittijc je jecyip, ca' yí' jébi yjactuuni ma iich ajt nmibijcin jadu'n nej Jesucristo tuñ huindzigi'n miid iich ajt ycixpi.

¹¹Je judío mijtungmiidpi ma Dios ytijc ypidac iyujc ñi'py ma je Lugar Santísimo nej tüg huindzigi'n huidibi yajpocyñihuaatzp je mayjäy. Je iyujc ögy ñinícx jiguem je' yajnögy, ca' jiiybyty cajpjoty ma je Dios anajty huindzigiygixy.

¹²Tím jadu'n nej je judío sacerdote yajnögy je huindzigi'n iyujc ñinícx cajp nínaxy, nañ tím jadu'n Jesús paty tzaachy'o'cin cajp nínaxy jigix miid je' yci'mni'py pocyñihuádzip je mayjäy. ¹³Tzoc mijpidaacim je Jesús tiibi y'ögy cajp nínaxy miid iich ajt nbocy ycixpi. Tzoc minajxim yajnajxim je canayyajmij'adii je canay'ixa'nii, tím jadu'n nej Jesús minajx yajnajx je canayyajmij'adii je canay'ixa'nii.

¹⁴Ya naaxhuiñ ca' ya ajt nmiidity tüg ciudad ma jébi n'ijtim huinixii huinitiempo, je' iich ajt njijp'ijxim je tzinaayin huidibi miimb cidaacp.

¹⁵Paady ycixp chojcpy co Dios n'ojadajtim nmibijctzoohuim jabom jabom huinixii miid Jesucristo yxii. Co jadu'n n'ojadajtim nmibijctzoohuim Dios jadu'n nipaady nej tüg huindzigi'n nmooyim. Tzoc ii mibijctzoohuim, tzoc ojadajtim miid ajt ngi'm'ahuac

ngi'm'ayuc. ¹⁶Ca' mjäydidgöoygixipy co oybi mdúngixipy etz naybubéjtigix naybudigíyigix miñ xyipy. Co jadu'n mdúngixipy jadu'n nipaady nej tüg huindzigi'ñ ti myejccixy ma Dios huidibi yi' ooy jäygidägy.

¹⁷Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi' m'alma. Nejhuuiyim co ciyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb miid yi' ajcxy, jotcujc ajcxy ñayjihuihuiyb. Pen jibic miich ajcxy mduñ miid yi' ajcxy, tajp mayip ajcxy. E pen yi' ajcxy tajp maayb, chi miich ajcxy ca' ni ti jotcujc'ajt mmiid'adipy.

¹⁸Mibijctzoogix Dios miid iich ycixpi etz je pinjaty xymiidhuidijtpich. Jatytim naymic'íjxibich tudägy nduuñich ma tüg'óciy iich ndung, paady ycixp jotcujc nayjihuiyijich.

¹⁹May'ajt nbijctzooybich ma miich ajcxy co Dios mmibijctzoogix miid iich ycixpi, jigix Dios a'ixihuipy co n'cxibich tzojc ma miich ajcxy.

Oy'ajt etz capxpooxín huidibi cogixiiyñip je necy

²⁰Dios nmibijctzooybich miid miich ajcxy ycixpi. Je Dios huidibi yajjugypijc jadüg'oc iich ajt nHuindzín Jesucristo co y'o'cy, je huidibi cuend'ajtp je

maymibijcpidijc. Co Jesucristo ñi'py teemy yojcy, chi mic'ajt moy je jemybi cötuycin huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yi' nipaady nej tüg cöbixy cuend'ajtpi huidibi cuend'ajtp may ngöbixy. ²¹Je Dios huidibi xyajjotcujc'ajtim je' huen xyaj'ahuimbijctcixy huädz etz oyjäy ma tüg'óciy ajcxy mmibijcin etz ma tüg'óciy ajcxy mdzinaayin, jigix ajcxy mdunipy nej yi' tzocy. Dios huen tuñ ma iich ajt njot nhuinma'ñ miid Cristo ymic'ajt nej yi' tzocy. iHuen Cristo y'idipy mij cömay huinixii huinitiempo! Amén. Jadu'n jada.

²²Nmigügtijc, nbijctzooybich may'ajt yajtungixy mecxtujcin ma jada ayuc capxhuijin. Ti ajcxy ii con nijayiyigixy. ²³Nejhuiyigix miich ajcxy co ajt nmigüg Timoteo y'ity ahuätztuum. Pen tzojc yjädy ya ma nyajpaadyich, chi yi' xymiidn'icxibich co iich anajty miich ajcxy nicxy n'ijxcixy.

²⁴Nguejxpyich ngapxpooxín ma nidüg'óciy pin ajcxy xyñigohuajc'ajtp etz je migügtijc ajcxy huidibi mibijccixyp. Je migügtijc huidibi ajcxy yajpatp ya Italia yquejxyp ajcxy capxpooxín ma miich ajcxy.

²⁵Dios ajcxy xyconuucxip nidüg'óciy miich ajcxy. Amén. Jadu'n jada.

SANTIAGO

Yi Neczy Huidi Santiago Yajniguejx Je Judío Mibijcpidijc

1 Hich Santiago, ndzojcingix hich nduñ ma Dios etz je Huindzin Jesucristo ytung. Cham jada necy nyajnigexyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajp cajp miid co yqueecpidizimy ajcxy Judea naaxjot co ymidzip ajcxy chach'ixhuididyii chachpahuididyii ajcxy.

Je tiy'ajt huidib tsoon ma Dios

²Migügtijc ajcxy co yi mmidzip ajcxy xychach'ijxmadzaangixy nej miich ajcxy mjot mhuinma'n miidity, co yi' ajcxy xy'ixhuidijtcixy xypahuidijtcixy, co xyñigapxcixy xyñi'ojiiygixy, co xyajhuinma'nydigoyaangixy, ca' mdajipy mmayipy ajcxy, jotcujc ajcxy mnayjihuihuiyb. ³Miich ajcxy mnejhuiygixyp co jadu'n mmimecxtujccixyp je tzaachypi ayo'n huidibi mminajxcixyp myajnajxcixyp miid co ti mmijpidaaccixy Jesucristo, huin'it mbáatcixipy mic'ajt, jigix jëbi mimadactaygixy tüg'óciy jibic-huinma'n. ⁴Copicy miich ajcxy mimadactáaygixipy tüg'óciy jibic-huinma'n, ca' ma

mdundigóoygixipy, e huin'it huädz mjot mhuinma'n mmiid'adipy ajcxy, ca' ti myajtigoy y'idipy ajcxy.

⁵Pen nidüg miich ajcxy myajmayjajty oyhuinma'n, co jäy ajcxy xychach'ijxmadzaani mjot mhuinma'n nej miidity, mibijctzou Dios huen xymöy je oyhuinma'n, com yejcpy yi' oyhuinma'n miid tüg'óciy jäy co pijctzoy. Ca' yi' cohuindugyii, ca' huaad xy'ojim co nbijctzoohuim oyhuinma'n.

⁶Copicy pijctzohui Dios huijy'ajt cuje'ajt cixyot huinijot, ca' y'ametz yjotmetzity. Pinjaty ametz jotmetz Dios mibijctzooob, ca' tú'ciy miidity yjot yhuinma'n, janam jatzojc yajtigach yhuinma'n jadu'n nej je mejy co ypidigy y'ixtägy miid je poj. ⁷Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸Yi jadu'mbi jäy ajcxy ametz jotmetzpi canaagnax yhuinma'n ajcxy miidity, ca' tügjijp yhuinma'n pidaaccixy ma Dios.

⁹Yi ayoobitijc huidibi mijpidaaccixyp Dios, ooy jäygidägaangixy co Dios ypubediiyb ypudigihuiyb. ¹⁰Yi comeenyjäy ajcxy huidibi mijpidaacp Dios, ooy

jotcuje ajcxy ñayjihuihua'nyii co ajcxy ymeeñ ytiictähuiipy jadu'ñyi. Com yi' ajcxy ymeeñ tigoyamb yi' jadu'n nej tüg pijy co ñiicxni miid xii an. ¹¹Co xii ypejtni, chi ooy y'andaacni mic, e chi je jünboj ypidzimy, chi je pijyquipy ytiich, chi yhuingädaayni je pijy, e jadu'ñyi ytigoydäy je pijy oy'ajtin. Jadu'n nej yjaty yi pijy, ñan tim jadu'n yjada'ñ comeenydijc ajcxy, jadu'ñyi ñitigoyaangixy yjugy'ajtin.

**Co yjot yhuinma'ñ
chach'ijxmadza'ñyii**

¹²Jotcuje pinjaty mimecxtujctaayb jadu'n nej ajcxy yjot yhuinma'ñ chach'ijxmadza'ñyii. Co jadu'n mimecxtujctäyagixipy, Dios möhuib ajcxy jugy'ajtin huinixiibi, huidibi yajhuinhuaniy tüg'öciy jäy ajcxy huidijaty Dios tzojcp yajmij'ajtp. ¹³Co pin nijot'aty co tuna'ñ ti jibicpi, ca' ymina'nipy co Dios anajty jadu'n yajtundigoyaanip. Dios ca' ti jibicpi tuñ miid jäy ajcxy. E nañ ni pin ca' huaad ijxmach Dios nej yjot yhuinma'ñ ymiidity. ¹⁴Ci'm ajcxy jadu'n ñaydunyii, co tzachnijot'ajtcixy canaagnax jibic-huinma'ñ. ¹⁵Co jäy ajcxy nijot'ajtcixy jibic-huinma'ñ, pocy anajty ytungixy. Ti ajcxy anajty ooy ypocyñibejtni co nicxy y'ó'ccixni. ¹⁶Migügtijc ajcxy, huidibi ooy ndzocy njihuüyich, ca' mnayhuin'ñinigixy. ¹⁷Hich ajt nDios Teedy huidibi tzajpjoty tzinaayb, yi' huidibi jajp tiicxp, yi' je' yejctaayb tüg'öciy tijaty oybi, tüg'öciy yhuinma'ñ huidibi ich ajt nmiid'ajtim. Dios ca' yi' yjot

yhuinma'ñ yajtigach jadu'n nej yi xii madza' yjajin ytiicxin ytigach. ¹⁸Dios y'oydumyb huinjemy ich ajt njot yhuinma'ñ miid yi' y'ayuc ytiy'ajt, jigix jëbi ich ajt nmi'lijtim oyjot oyhuinma'ñ. Yi jäy ajcxy huidibi yajmij'ajtcixp Jesucristo, Dios nigü tzocy ajcxy ca' jac ti huidibi oyduñ.

Je tiy'ajt tiydudäcypü

¹⁹Migügtijc huidibi ich ooy ndzocy njihuüyich, mnejhuühiipy miich ajcxy jada co ooy ycopicyty mmido'mbijctähuiipy ajcxy Dios y'ayuc ytiy'ajt, ca' mjäydigooygixipy, ca' mgapxmayiyygixipy, pen mjotmätcotp ajcxy ca' anajty mguydungixy Dios ytiy'ajt. ²⁰Je jäy huidibi jotma'tp, ca' je' tuñ huidibi Dios yjäygidacyp. ²¹Ixmajtztaaygix yi jibic ayuc, ca' mnijot'ajtcixy yi jibic-huinma'ñ. Cöbijccix miid oyjot oyhuinma'ñ yi Dios y'ayuc ytiy'ajt, yi huidibi Dios ti yajnicödugy, huin'it jëbi ajcxy m'alma nidzoocin paady.

²²⁻²⁴Cuydungix ajcxy Dios y'ayuc ytiy'ajt, ca' ajcxy mjotcuje'adipy miid yi'yi co m'amidoo'ijtcixy, hue' anajty nigoo mnayhuin'ñinigixy. Peni nigooob Dios y'ayuc m'amidoo'ijtcixy, e ca' mmijpidaaccixy ca' mguydungixy, naadigi' anajty m'amido'ijtcixy. Jadu'n miich ajcxy nipaady nej pin yhuünyjijp aa'ijxnajxp ma tügü iix. Co ñay'aa'ijxnajxtäyü, chi yjihüägy, e mic'amy jäydigoydäy nej yhuünyjijp ti ixy. Naadigi' anajty ti ñay'aa'ijxnaaxyii. ²⁵Pen miich ajcxy yajxon m'ixpjycyp Dios ytiy'ajt, je tiy'ajt huidibi yaj'oyiühiip ajcxy mjot

mhuinma'n, pen mmijpidaaccixyp, pen mguydungixyp Dios y'ayuc, e ca' mjäydingooygixy, chi jada' Dios xyconuucxip ajcxy miid jägixpi huidibi anajty mguydungixyp.

²⁶Pen ji pin ñayjihuiyüii co cuyduni Dios ytiy'ajt, e ca' ñay'ahuijtzäyüii, ci'm anajty ñayhuin'iiñyüii, tundigooyb anajty, e ca' yjanchity co mijpidaaci Dios ytiy'ajt. ²⁷Pen miich ajcxy huädz mijpidaaccixy Dios etz mguydungixy yi' ytiy'ajt jadu'n nej jäbi Dios jäygidägy, hue' tzocy co mbubéjtcixipy mba'ayóogixipy co'ögy'ungdijc, etz co'ögy ytöxyjäydijc ma ayo'n jotmay ajcxy patcixy. E ca' huaad jäbic-huinma'n mjactungixy, jadu'n nej jadyii naaxhuiñyäj y'idäitzcixy, huidi ca' mijpidaaccixy Dios.

**Ca' huin'ijxpety migüg
myajmij'ajtcixipy**

2 Migügtijc ajcxy, co m'ojadajtcixy co mmijnicxpejtcixy iich ajt nHuindzin Jesucristo, yi huidibi tzajpjoty ane'm, ca' ajcxy huin'ijxpety migügtijc myajmij'ajtcixipy. ²Pen jim jäy ytiy' ma mnayyöymújigixy comeñybi miid oori cijiitz, etz miid yhuitt yxoxj janch oybi, etz pen nañ tigüyb tüg jäy ayoob huidibi yhuitt ytucxy ciitz tuc nübüdy ixpüdy. ³Chi miich ajcxy je' jac nigi myajmij'ada'n je comeñybi huidibi oyxoxy, e chi mnimähua'n: "ñña' miich ya ma jada oybi ññaaybejt." E je ayoob jäy mnimähuaangixy: "ñña' naaxcixy o jim jadu'n tina'." ⁴Co jadu'n m'idäitzip ajcxy, ca'p anajty

jadu'n ytiy'ajtity. Mdundigooygixy anajty ma Dios ytiy'ajt co huin'ijxpety ajcxy migüg mdzogipy. Hue' anajty myajtungixyp jäbic-huinma'n co jadu'n m'ixtjicixipy jäy huidibi ayoob.

⁵Migügtijc ajcxy, Dios ti huin'ixy yi ayoobitijc, jäbi ajcxy mijpidägy Dios etz jäbi ajcxy paadipy it lugar ma Dios y'it tzajpjoty. Jadu'n Dios yajhuinhuaniy pinjaty tzocjip jihuiyip co it lugar möhua'n jiiyb tzajpjoty. ⁶Myajtzo'yduungixyp miich ajcxy ayoobitijc. ¿Nej cayi comeñyjäy ajcxy huidibi miich ajcxy xychachxip ma cötujctac, e xyajnicxcixy ma tungmiidpi yhuinduu, oy ajcxy mdzocy mgatzocy? ⁷¿Nej ca yjéjity ajcxy huidibi jäbic nigapxp ni'ojiiyb Jesucristo, je oyjäy huidibi miich ajcxy myajmij'ajtcixyp?

⁸Pen janch miich ajcxy mguydungixy je tiy'ajt huidibi jaybety ma Dios ylibro: "Mdzogipy mjihuihuipy mmigügtijc hueñyitimypinity, jadu'n nej miich ajcxy ci'm mnaychogyii mnayjihuiyüii." Pen jadu'n anajty mdungixy, tüg anajty oybi mdungixyp. ⁹Pen huin'ijxpety ajcxy anajty jäy myajmij'ajtcixy jadu'n nej yhuitt yxoxy ajcxy miidity, mdundigooygixp, e ti anajty mnayajpocycähugixy ma Dios ytiy'ajt. ¹⁰Pen tüg jäy cuydundaayü Dios ycötujcin, co nicxy tüg cacuyduñ, jadu'n nipaady nej jihuiy anajty janch ni tüg cötujcin ti cacuyduñ. ¹¹Je Dios je cötujcin ti pidägy co ca' huaad mmigapxtigooyipy töxyjäydijc, etz nañ ti cötujcin pidägy co ca' huaad

njäyyaj'o'cim. Pen mmigapxtigooyb töxyjäydjic, oy ca' ti mjäyyaj'ögy, ti anajty mdundigooy mij ma Dios ytiy'ajt. ¹²Capxcix miydaccix, tungix nej jëbi huaad jäygidägy iich ajt nHuindzin Jesucristo nej je' cuyduñ yi' ytiy'ajt. ¹³Ca' ti pa'ayoohuin paadipy ma Dios, pin ca' tuñ ti pa'ayoohuin ma ymigügtjic. Pin pa'ayoohuin tumb ma ymigügtjic, je' capxpaady y'idip co anajty Dios tiyduñ yi' yjäy.

Je mibijcpi etz je oyjäy'ajtin

¹⁴Migügtjic ajcxy, ni ti m'alma capadañ pen miich mminaamb co myajmij'ajtyp Dios, e pen ca' myajniüexigy ni ma co oybi mduñ. Ca' Dios yajnidzögañ yi m'alma miid co nigoob mminañ co Dios mmijpidägy, e ca' mguyduni yi' ytiy'ajt. ¹⁵⁻¹⁶Pen miich ajcxy miid tüg migüg yëydjicpi o töxyjäybi huidibi yajmayajtp yhuit ytucxy caayin uucin, e chi nigoo miich ajcxy mnimähuipy: "Nixc agujc jotcujc, Dios xypubedipy xypudigihuipy, ca' mdiich'ögipy ca' myuul'ögipy." E miich ca' anajty ti ti mmöy huidijaty yajmayajtpy. ¿Ti oyjäy'ajtin anajty ti mduñ? ¹⁷Pen miich minamb co myajmij'ajtyp Dios, e ca' oyjäy'ajtin mduñ miid mmigügtjic, ytimyñipatyp jadu'n nej ixypy ca' mmibicy yi' Dios ytiy'ajt.

¹⁸Ca' yjegyty co tüg jäy xyñimähuibich jadu'n: "Miich mdzachmijpidacpy yi' Dios ytiy'ajt, e iich ndumybich oybi." Iich n'adzohuipyich yi' jadu'mbi jäy co ca' jadu'n ytiy'ajtyty nej miich minañ. Pen ca' miich mmijpidägy

Dios y'ayuc, ca' mjadipy nej mdunipy oybi jadu'n nej Dios huaad jäygidägy. Co iich oybi nduñ, jadu'n ñigüexigy co nmijpidägyich Dios. ¹⁹Miich mmibijcpy co Dios ji tügpaic, e oy jadu'n co mmibicy. Nañ jadu'n yi' ca'oybi ajcxy mibijcp etz chigiiyb ajcxy Dios. ²⁰Loci miich, ca' mhuinjihuñhuañ je tiy'ajt. Co pinjaty mibicy Dios, e ca' yajniüexigy co oybi tuñ, ca' tiydudägy mibicy Dios. ²¹Je Abraham yejc tüg ijxpejt nej jëbi huaad ngapxymidoohuim Dios co jecy'ajty je' ymang Isaac cïeyecy nej tüg huindzigiñ ma Dios. ²²Je Abraham ymibijc co Dios yjijity etz nañ ycapxymidou nej Dios ñimaayi. Paady nejhuiiyim co yjanchity co Abraham mijpidacy je' Dios miid co cuyduñ jadu'n nej Dios ñimaayi. ²³E jadu'n oy cuydundäy nej yjaybetyty ma Dios ñecy: "Yi Abraham ymijpidac Dios, paady Dios ymecxtaayi ypocy, e ycöbijci jadu'n nej jihuiy ca' anajty ytundigoy." Paady ycixpi Abraham oyñaydijy: "Co Dios minaymigüg'adyii."

²⁴Cham nejhuiyigix co Dios ycöbijcpy jäy huidibi cuydungixp yi' ytiy'ajt, e ca' nminanim miid jëyi co ymibijccixy. ²⁵Tim jadu'n nej Abraham yjajty, nañ tim jadu'n yjajty miid je töxyjäy huidi anajty yxiñ Rahab, huidibi anajty ooy ti ytundigoy miid mayyëydjic. Je Rahab ycoyüdz ma ytjic nimetz jäy huidibi anajty Israel jäy yaj'ijx'ijtyp, e chi yajqueegiyy ma huingbi tü'aa, e jadu'n ajcxy yajzoooy ma ymidzip. Miid co jadu'n oyjäy'ajtin tuñ miid je Israel jäy, chi Rahab oy

paady je nidzoocin ma Dios. ²⁶Je ninicx huidibi ca' alma miidity, ca' ni ti mic'ajt miidity. Nañ tim jadu'n pinjaty mibijcp co Dios yjiijity, e ca' cuyduñ Dios ytiy'ajt, yi' ymibijcin ca' Dios cuendipicy.

Co pinjaty nigapxy ni'ojy ymigüg

3 Migügtjic ajcxy, huinmaygix yajxon pen janch mnajtztzogiigixy co ajcxy mnihuindzin'adaangixy Dios y'ayuc. Com iich ajt huidibi nyaj'ixpijcin Dios y'ayuc, pen tundigooyim nigi mij nyajtydunaanim. ²Nidüg'óciy iich ajt ndundigooyim minaaity. Pen ji pin ca' y'iidigooy ycapxtigooy, yi' tydudägy anajty yjäy'aty, jëbi ñaygüend'adyii yajxon, e ca' huaad y'ocjactundigooyi. ³Ypidacpy jäy freno ma cohuay y'ahuac jigix jëbi ane'my je cohuay nej tzocy. Nañ jadu'n tzocy co jäy ajcxy huen y'ahuac ahuijtzcixy jadu'n nej jäy cohuay ane'my miid freno. ⁴Nañ jadu'n yi barco oy mabaad ooy yjamijity, per ooy poj ytiiminyii ytiyxibyii. Je barco yaj'ane'm yajxon miid tüg pi'c pujx yindi'cni huidib xiijip timón. Yajxon ytüyöy je barco ma je' timdzocy je huidibi ane'mip. ⁵Nañ jadu'n yjaty miid yi tootz, janch tim yindi'cni yi', per ooy mij cajee tuñ jibicpi, jëbi y'iidigooy ycapxtigooy mij cajee. M'ijxyp miich ajcxy nej tim yindi'cni jiin mij ooy nögy quipychaa miy'ujtz. ⁶Yi jäy ajcxy y'ahuac nañ tim jadu'n nej pi'c jiin, miid nhuin n'ahuac mijcajee n'iidigooyim ngapxtigooyim. Co jadu'n n'iidigooyim ngapxtigooyim, chi jëbi mijcajee midundigooyim mayjäy. Co n'iidigooyim ngapxtigooyim, etz

nayyajpocycáhuim, chi ñiguëxigy canaagnax jibic-huinma'n huidibi nmiid'ajtim. Jada jibic-huinma'n jim yi' nbaatim ma je mujcu' huidibi tzinaayb ma yi infierno. ⁷Yi naaxhuiñyäjy ti mimadaaccixy yi iyujc animal huidibi queegäcp queec-huidijtp, naag iyujc ahu'a'nbi, etz iyujc nijjotyt. Ti ooy yajmaxiiygixy yajxon iyujc huindzäcypi etz ahu'a'nbi. ⁸Yi naaxhuiñyäjy oy ti mimadaaccixy yi iyujc animal, per nitüg ycaca'ty pin yajxon y'ahuac ahuijtzigipy, ac'iidigooygixp capxtigooygixp ajcxy. Pin ymigüg nigapxy ni'ojiiyb, huin'it je ymigüg ooy jibic ñayjihuihua'nyii, jadu'n nej jihuüy veneno ti möy ymigüg. ⁹Miid jada' nhuin n'ahuac ajt ngapxpaatim iich ajt nHuindzin Jesucristo etz iich ajt nDios Teedy. Nañ jadu'n miid nhuin n'ahuac nigapxy ni'ojiiyim nmigügtjic. Dios ti yajcojy yi jäy miid oyjot oyhuinma'n jadu'n nej yi' oyjot oyhuinma'n miidity, paady ca' y'oyity co n'iidigooyim ngapxtigooyim. ¹⁰Miid nhuiin n'ahuac ajt miid ngapxim oybi ayuc etz jibic ayuc. Miid nhuin n'ahuac yi' miid ngapxpaatim etz ni'ojiiyim nmigügtjic. Ca' jadu'n y'oyity co jadu'n n'adiitzim. ¹¹¿Nej jëbi jada' ma tüg niigop ypidzimy nii päcpi etz nii ta'mbi? ¹²Migügtjic ajcxy, ¿nej jëbi jada' yi higueryi ytiim'aty aceituna etz yi muuxy'aadz ytiim'aty higos? Nañ tim jadu'n ma nii ymuxy tamtzpi, ca' jim ypidzimy nii päcpi. Paady ycixp ca' y'oyity co jäy ajcxy capxcixy oybi etz jibicpi.

Je tiy'ajt janchypi

¹³Pen miich ajcxy huijycujc mnayjihuiiyi, pen oyhuinma'n ajcxy

mmiid, yajtungix m'oyhuinma'nñ ma mdzinaayin mjugy'ajtin. Ca' huaad ci'm ñaygömáayigixy. Miid je oyjäy'ajtin huidibi ajcxy mdumyb huen jäy ci'm nejhuiiyigixy co oyhuinma'nñ miich ajcxy miid'ajtcixyp. ¹⁴Pen ta'm mjot mhuinma'nñ mjihuiiyigixy, pen mga'oy'ijxcixyp ymigügtjic, pen mhuinnaxtugaangixyp ymigügtjic, pen jadu'n mjihuiiyigixy mhuinmaayigixy, huin'it ca' huaad mñaygömáayigixy ci'm co mdzachcuydungixy Dios ytiy'ajt, com ca' yjanchity, nigoo m'aniidaaccixy. ¹⁵Jada jibic-huinma'nñ ca' jada chooñ ma Dios huidibi tzinaayb tzajpjoty. Ya naaxhuiñ jada jibic-huinma'nñ yajpaady, miid co jäy tzachnijot'ajtcixy jibic-huinma'nñ. Yi mujcu' yejcpy jada jibic huinma'nñ, e ca' nminanim co Dios yecy jada jibic-huinma'nñ. ¹⁶Paady ycixp co jäy ajcxy ycanay'ixa'ñyii, co huinnaxaangixy ymigüg, chi ca' oy y'ijtcixy, oy ajcxy ñaymidundigóoyigixy mijcajee. ¹⁷Je huijy'ajt cujc'ajt huidibi Dios yejcpy, ooy yi'. Yi Dios huidi tzinaayb tzajpjoty oyhuinma'nñ ymiid. Pen nyajtuunim je tiy'ajt huidibi Dios ti xymooyim, chi jotcuje ndzinaayim, ca' ma tzip capxy, etz nmimecxtujcim nmigügtjic, etz yung naxy jot huinma'nñ nmiid'ajtim, etz nba'ayoohuim nmigügtjic, etz nduunim oyjäy'ajtin, etz tudägy nhuinma'nñ nmiid'ajtim. E ca' nigoo naybidaacim jadu'n nej jihuiy nmijpidaacim Dios, e ca' yam yjanchity. ¹⁸Co nyajtuunim je

huijy'ajtin cujc'ajtin huidib Dios yejcpy, chi jotcuje ndzinaayim miid tudägy njot nhuinma'nñ, jadu'n nej jëb Dios jäygidägy.

Co pinjaty nijot'ajtcixy mayñax tzinaayin

4 ¿Ma'amy ajcxy mdiyy chooñ je tzip capx huidibi yajpatp ma miich ajcxy? Tüg'óciy yi jadu'mbi jibicpi yajpatp ma ajcxy mjot mhuinma'nñ, paady ycixp mganay'ayuc-huinjihuiiyigixy, e tzipcapxy myajcojcxixy myaj'abadiiyigixy. ²Ooy miich ajcxy tijaty mjatzojccixy, e ni ti mgapaatcixy, e huin'it mjäyayj'öccixy. Ooy m'adzojccixy tijaty migüg yjë'ajtyp, paady ycixpi mdziptungixy, etz mganay'ixáanigixy. Ca' ti jotcuje'ajtin mbaatcixy, com ca' ajcxy mbijctzoogixy ma Dios. ³Co mjamibijctzoogixy Dios, chi ca' ti mbaatcixy, miid co mbijctzoogixy miid jibic-huinma'nñ. Mbijctzoogixyp co myajtunaangixy ma ca' ypadyyi. ⁴Mdundigooyb ajcxy. ¿Nej ca' mnejhuiiyigixy co Dios ca' jäygidägy pen mdzachnijot'ajtyp ajcxy yi mayñax tzinaayin? Pinjaty nijot'ajtcixyp yi mayñaxpi tzinaayin, jadu'n yi' ajcxy nej yi jacjadyi jäy ya naaxhuiñ huidibi ca' yajmij'ajtcixy Dios ytiy'ajt. Hue' je' ajcxy y'ahuimbity Dios ymidzip. ⁵Nej miich ajcxy mdiyy, naadigi' ymiñ jaybety ma Dios yñecy: “Je Espíritu Santo huidibi Dios ti xy'adigiyyim ti xyjottigiyyim ooy xychojcim xyjihuiiyim mijcajee.” ⁶Dios ninigooobi may'ajt oy'ajt

tuuñ miid iich ajt ycixpi, paady ycixpi ymina'n ma Dios ñecy co ca' yi' oy'ixy pinjaty amij agix nayjihuiyip. Dios yejcpy may'ajt oy'ajt ma yi jäy ajcxy huidibi yung naxy jot huinma'n miidity.

⁷Naybidáacigix cixy jot huinjot ma yi Dios. Mic mihindinaaygix yi mujcu', e jihuägipy yi' ma miich ajcxy. ⁸Ojadajtcix Dios miid oyjot oyhuinma'n, e Dios xypubedipy xypudigihuiyipy ajcxy. Miich ajcxy pocyjäydijc, ixmajtcix yi jibic-huinma'n. Yajhuaatzcix yi mjot yi mhuinma'n miich ajcxy huidibi ametz jotmetz mibijcp. ⁹Tajcix maygix, amutzciygix. Huen yi mxiiicin yi mxondaacin ahuimbity jiiyin yaaxin. E yi mjotcujc'ajtin huen ahuimbity tajii mayii.

¹⁰Pidaccix yung naxy yi mjot yi mhuinma'n ma yi mHuindzin Dios, e yi' may'ajt oy'ajt tunipy miid miich ajcxy ycixpi.

**Ca' huaad nigapxcixy
ni'ojiiygix ymigügtijc**

¹¹Migügtijc ajcxy, ca' mnayñigápxigixy mnayñi'ojiiygixy miñ xyipy. Pen mnigapxyp mni'ojiiyb mmigügtijc, hue' mnixiicpy myajxiicpy Dios ytiy'ajt huidibi minaamb co myajmij'adipy yi mmigüg jadu'n nej mnayajmij'adyii ci'm. Pen mnixigamyb myajxigamyb Dios ytiy'ajt, ca' anajty mguyduñ yi tiy'ajt, e jadu'n yhuimbizimyb nej ixypy miich mina'n co Dios ytiy'ajt ca' yi' y'oyity. ¹²Dios tügpajc huidibi ane'min pidägy, e yi' je' tügpajc huidibi tiydunamb pocyjäy. Yi Dios tügpajc huidibi yajtzögip o

yajtigoyip jäy ajcxy y'alma. Paady ycixpi miich ajcxy ca' ypadyii nicxy migüg mnigapxcixy mni'ojiiygixy.

**Dios tügpajc nejhuiy nej je
jabombi mimb cidacp**

¹³Tungix cuendi iich n'ayuc miich ajcxy huidibi minamb: "Cham o jabom nniexim ma yijmbi naax cajp, e jim nyajnajxim jimijt agujc jotcujc, jim negocio nduunim, ooy mijcajee nbaatim." ¹⁴E miich ajcxy ni mganejhuiygixy ti je' anajty je jabombi mimb cidacp. Je jugy'ajtin ni pin ca' nejhuiy nej pin chinähua'n yjugy'ada'n. Jadu'n miich ajcxy mjogy'ajtin nej joc co y'ocquëxigy cham, e tim tügjaxigy ti ñitigooyñi.

¹⁵Jac'oy ajcxy mmina'nip: "Pen Dios jadu'n tzojp, pen xymooyim jugy'ajtin, jëbi cham o jabom nduunim tijaty." ¹⁶Miich ajcxy ci'm mdzachyajnihuinmaaygixy ti mdunamyb, ci'm mdzachnaygömayyii ajcxy. Ca' jadu'n y'oyity co ci'm mnaygömáayigixy; co ci'm mnaybidáacigixy amij agix, ni Dios mgamibijccixy. ¹⁷Pin janejhuiyb je oybi, e ca' tuñ, pocytumb anajty.

Je comeñyjäy yjugy'ajtin nitigoyam

5 Comeñydijc, oc'amidoo'lijtcix nej cham mmina'nich. Amutzciygix, tajcix maygix co xyñiminaangixy ayo'n. ²Miich ajcxy mmeñ etz ajcxy mjogy'ajt ñitigoyamb yi', miich ajcxy mhuit mduxy ti uucxyting yjicxtäyii. ³Miich ajcxy m'oori, ajcxy mplata, ajcxy mmeñ naadigi' ti myujpijccixy ti m'amay'ajtcixy.

Ti ixyipy myajtungixy miid oyjäy'ajtin. Co ti myujcpijccixy ti m'amay'ajtcixy ji jadu'n je tiy'ajt co mdundigooygixy ma Dios. Miid co yi mmeen' ca' ti myajtungixy miid oyjäy'ajtin, paady ycixpi ayo'n mbadaangixy miid je xii tiempo huidibi mimb cidacp, mina Dios tiydunaangixy pocyjäydijc. Nitigoyamb miich ajcxy m'oy'ajtin. ⁴Mdundigooygixyp co ca' ca'pxy ti mmjuuygixy mdumbidijc huidibi ti myajtungixy ma ajcxy mgamdu'. Yi mdumbidijc cham ooy miich ajcxy xiy ma Dios. Yi Dios, je Huindzin mijpi, huidi ane'mdaayb tüc'óciy jiiyby tzajpjoty etz ya naaxhuiñ, yi' ñejhuiydaayb nej miich mdumbi ajcxy yminaangixy. ⁵Ti miich ajcxy agujc jotcujc mdzinaangixy ya naaxhuiñ miid mayñax xondaacin. Ti miich ajcxy mgüxyii mbedyii, ti ajcxy mjotcujc'ajtcixy. Cham m'ahuijxcixyp yi tzaachypi yi ayo'n huidibi ajcxy mbadamyb ma Dios, jadu'n nej huaj nücxpi ahuixy co jäy ajcxy chüdzal'nyii. ⁶Miich ajcxy comeen'yjäydijc ti miich ajcxy mxigixy mnihuambejtcixy, mdzaachytungixy ti myaj'öccixy jäy ajcxy tudägyi, e ca' yi' ajcxy xymihuimbijty.

Je mecxtujcin etz je capxtägi

⁷Migügtijc ajcxy, yajtungixy mij yi mecxtujcin mabaad anajty je Huindzin Jesús ymiñ jadügtecy ya naaxhuiñ. Tim jadu'n nipaady nej naymidumbidijc ahuijxcixy je tiibi nidungiygixy, ahuijxcixy miid mecxtujcin je oga'n tuu etz je poj tuu huidi miid je' ypidägy yhuindihuipy. ⁸Miid'ajtcix nañ

jadu'n ooy mecxtujcin, etz ca' mjotmetzciiygixy, com huingomb je tiempo mina ymiina'n je Huindzin Jesús ya naaxhuiñ jadügtecy. ⁹Migügtijc ajcxy, ca' jadüg jadüg mnayñigápxigixy nayñi'ojiiygixy. Pen jadu'n mdungixy Dios miich ajcxy xyajpocycähuiy, com tim huingonip je xii je tiempo mina Dios tiyduna'n jäy ajcxy miid ypocy ycixpi. ¹⁰Migügtijc ajcxy, pijccix je ijxpejt jadu'n nej tzaachypi minajxy yajnaxxy je profetas ajcxy huidibi ajcxy ihuäcxp capxhuäcxp je Huindzin Dios y'ayuc. ¹¹Minaanim jadu'n, miid co ajcxy ooy mímecxtucy nej jäy jibic ytuuñ miid yi' ajcxy, e chi jotcujc cham yajpaady ma Dios. Ti jada' mjatymidoogixy je ayuc nej Job ayo'n tzaachypi minajxy yajnaxxy, e ymímecxtujc je'. Miid co ooy anajty mijpidägy Dios, paady Dios pa'ayoy Job, e conuucx mijcajee.

¹²Migügtijc ajcxy, co tijaty ayuc m'adzohuimbidity, tiydudägy ajcxy m'adzohuiy: "Janch jadu'n o ca' yjadu'nity", ca' ajcxy m'iindägipy. Ca' Dios nigoo m'iibaadipy mgapxpaadipy. Ni ca' m'iibaadipy mgapxpaadipy yi naaxhuiñybi o tijaty ya naaxhuiñ. Huin'it ca' mnayyajpocycähuiy ma Dios.

¹³Pen ji pin ma miich ajcxy ti ayo'n miidity, huen mibijctzoogixy Dios miid yi jäy ycixpi huidibi ayo'n miid. Pen miich ajcxy jotcujc nayjihuiyiy, huen huin'iigixy Dios. ¹⁴Pen ji pin nidügty ypiyiy ma miich ajcxy, huoomiingix yi' huidibi ajcxy nigohuajc'ajtp yi mibijcpidijc, jigix ajcxy mibijctzoohuiy Dios miid je pa'mjäy ycixpi, etz

pidägipy hueeni aceite ma je jäy ycohuajc etz capxpaadipy yi Huindzin Jesús yxi. ¹⁵Miid co miich ajcxy mmijpidaaccixy e mmibijctzoogixy Dios, paady ycixpi tzögipy yi pa'mjäy. Chi je Huindzin Dios yejcnip mic'ajt oy'ajt, etz ymecxtaayipy yi' ypocy huidibi anajty ti tuñ. ¹⁶Capxpídzim yi mbocy nidüg nidüg. Ñayñibijctzoohuüiyigix nidüg nidüg ma Dios, jigix ajcxy mdzögipy. Pen tüg tudägypi jäy ymibijctzooyb yi Dios cixyot huinijot, madägipy yi' miid y'oración. ¹⁷Elías nañ tim jadu'n anajty yjothuinma'ñ miidity nej iich ajt. Janch cixyot huinijot

mibijctzooy Dios ca'jity ytüy, e ca' je' jadu'n ytuuy tugüig jimijt ja tudujc po'. ¹⁸Chi jadüg'oc Elías mibijctzoy Dios co huen tüy, chi Dios yajtuuy, e chi ya naaxhuiñ yhuindiüy je jäy ajcxy ypidägy.

¹⁹⁻²⁰Migügtijc ajcxy, pen ji miich ajcxy nidüg ñiidigoy ytüdigoy ma yi Dios ytiy'ajt, e huin'it tüg quëxigipy pin ymigüg yajhuimbidity ma Dios ytiy'ajt, nejhuüiygix miich ajcxy co pin huidi yajhuimbijtp ymigüg ma Dios ytiy'ajt, huidibi ti ñiidigooy ti ytüdigoooy, ti je' anajty tüg alma yajtzögy ma yi o'cin, e ti anajty yaj pocyñihuaatztäy.

1 PEDRO

Yi Neczy Huidibi San Pedro Yajniguejx Je Judio Mibijcpidijc

1 Hich Pedro, Jesucristo ti xyajni'bicyich ngapxhuäcxibich yi' y'ayuc. Jada necy nyajniguejxyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ²Miich ajcxy migügtijc Dios Teedy ti xyhuin'ijxcixy, jayjip Dios ti nejhuüy co xyjäy'adañyii ajcxy. Dios ti yajtigiyäy yi' yjihuñ ymic'ajt ma miich ajcxy mjot mhuinma'ñ, huen oyjot oyhuinma'ñ myajtunipy ajcxy jadu'n nej Dios huinma'ñ xymooygixy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuj miid miich ajcxy ycixpi. Pidaaccix mhuinma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajnixidicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcujc mdzináaygixipy.

Jijp'ijxcix jugy'ajtin huinixiibi

³Yi Dios, iich ajt nHuindzin Jesucristo yTeedy, huen

capxpaady y'ity, miid co may'ajt oy'ajt ti tuñ miid iich ajt co ti oyduñ huinjemybi iich ajt njot nhuinma'ñ, jëbi n'ijtim Dios yjäy. Jadachambi ooy njijp'ijxim je jugy'ajtin huinixiibi, miid co Jesús yjugypijcy huinjemy ma anajty ti y'ögy. ⁴Nañ ooy njijp'ijxim tijaty Dios xymöhuaanim jiiiby tzajpjoty, huidibi ca' yhuindigoy, huidibi ca' yjibicäy, etz huidibi ca' ycixy ytigoy. ⁵Dios xycuend'adip ajcxy miid yi' ymic'ajt, ixti jiini co anajty ajcxy je m'alma nidzoocin padaangixy, co anajty je naaxhuñ ycixy ytigoy. Mbadaangixy m'alma nidzoocin miid co ti mmijpidaaccixy Dios ytiy'ajt.

⁶Paady miich ajcxy ooy jotcujc'ajtcixp. Oy cham tzaachypi m'ocminajxcixy m'ocyajnajxcixy miid co jäy tzach'ijxmadza'ñ miich ajcxy mjot mhuinma'ñ. Nigi ooy jotcujc nayjihuiyigixy co ajcxy yi' m'alma nidzoocin pada'ñ. ⁷Dios y'ixamyb ñejhuñhuamyb pen janch miich ajcxy cixy'ajty huinjot mmijpidaaccixy yi' y'ayuc. Paady miich ajcxy ayo'n tzaachypi mminajxcixy myajnajxcixy jëbi nigi

myajhuaatzcixy mjet mhuinma'ñ, tim jadu'n nej jäy yajhuaatzcixy yi oori miid jiin. Dios nigi tzocy miich ajcxy huidib yi' ytiy'ajt mijpidaaccip, ca'ydi oori. Pen tudägy miich ajcxy mhuinma'ñ, pen ca' mhuinma'ñytigajtzcixy co tzaachypi mminajxcixy myajnajxcixy, chi capxpaady ajcxy m'idipy etz mbaadipy ajcxy jotcujc'ajtin co anajty Jesús ñayguëxigyii jadügtecy ya naaxhuiñybi.

⁸Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtpy ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjihuiyii nigi jotcujc anaxy. Je jotcujc'ajtin huidib mmiid Dios je' yejep. ⁹Paady ycixpi ti mmijpidaaccixy Jesucristo co ajcxy m'alma xyajnidzögaani.

¹⁰Jadu'n nej Jesucristo xyajnidzögaani miich ajcxy m'alma je Dios y'ayuc najtzcapxiybi ooy anajty jecy'ajty janejhuihuaangixy nej Dios y'ayuc ñigüeje, e ca' ajcxy huinjihuiy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ miid miich ajcxy ycixpi. ¹¹Je Dios y'ayucnajtzcapxiybi jecy'ajty ooy ajcxy jahuinmay, ooy ajcxy jahuinjihuihuañ nej yhuimbizimye je ayuc huidibi ajcxy ymiid jotjoty huinma'ñyjoty, je ayuc huidibi Jesucristo yajmigüeje yi' yjihui'ñ ymic'ajt, je Espíritu Santo, jadu'n nej ajcxy najtzcapxiy co je Cristo tzaachypi minaxa'ñ yajnaxa'ñ, etz co ñicxa'ñ jadüg'oc tzajpjoty. ¹²Dios yajnejhuiy yi' y'ayucnajtzcapxiybi

co je' huidib ajcxy ycapxhuäcx jiini je' ytuna'ñyii yjada'ñyii, ca' ajcxy ixa'ñ. Migügtijc ajcxy, Dios ti yajtuunyii ti yajjadyii ma miich ajcxy je mxii mdiempo nej anajty je' y'ayucnajtzcapxiybi najtzcapxiy jecy'ajty je tiy'ajt. E jadachambi jadu'n nej Dios ti yajtuñyii ti yajjadyii ti jäy capxhuäcxty ma iich ajt nidüg'óciy. Je jäy huidibi capxhuäcx je tiy'ajt ymiid anajty ajcxy je Dios yjihui'ñ ymic'ajt huidibi Dios anajty yajnigüejejp, choon tzajpjoty. Ixti je ángeles huidibi ajcxy tzajpjoty tzinaayb yjanejhuihua'ñ nañ jadu'n nej Dios ti yajtuñyii ti yajjadyii ma miich ajcxy, e ni ca' ajcxy nejhuiy.

Chojcyp Dios co tudägy ndzinaayim

¹³Paady ycixp ni'ixi pidaaccix mjet mhuinma'ñ. Huijy ycuje ajcxy mdzinähuij. Jijp'ijxcix je may'ajtin oy'ajtin huidibi Dios tunamyb miid miich ajcxy ycixpi co anajty Jesucristo yhuimbity ya naaxhuiñ. ¹⁴Capxymidoogix Dios jadu'n nej pi'c'anäg capxymidoogixy ytaj yteedy. Ca' huaad m'octundigóoygixni jadu'n nej anajty mdundigóoygixy co anajty ca'ni mnejhuiyigixy Dios ytiy'ajt. ¹⁵Oyjot oyhuinma'ñ ajcxy myajtunipy jadu'n nej Dios oyjot oyhuinma'ñ yajtuñ, je huidibi ti xyhuin'ixy ajcxy. ¹⁶Com jadu'n ymiin jaybety ma Dios ñecy, jadu'n Dios migapxy je' yjäy: “Mi'idip ajcxy oyjot oyhuinma'ñ jadu'n nej iich nmi'ityich oyjot oyhuinma'ñ.”

¹⁷Miich ajcxy m'ojadajtpy je Dios Teedy. Dios ca'p tzaachytuna'ñ yi jäy ajcxy huin'ixpety. Hue' je'

chaachytunipy ajcxy nidüg nidüg jadu'n nej ajcxy yhuinma'nñymiidity, pen jibic-huinma'nñ ymiid, chi tzaachytunipy nigí. Paady ycixp tiydudägy ajcxy mdzinähuiipy. Tzigiiygix Dios. ¹⁸ Je Dios canan hue' ti xyajpocyññhuaatzim co ti cojuy iich ajt nbocy miid oori o plata, jadu'n nej anajty nbocytuunim co nmijpidaacim n'ap ndeedy y'ayuc ytiy'ajt huidibi ca' ytiy'ajty. ¹⁹ Hue' janchtiy Dios ti xyajpocyññhuaatzim miid Cristo co y'o'cy cruudzexy, e chi ñi'py teemy vojcy miid iich ajt nbocy ycixpi. Jadu'n nej anajty Israel jäy ñayajpocyññhuaatzigixy co yaj'ögy tüg boregi ung, huidibi ca' anajty ti jibicpi miidity, e chi ñi'py teemi cuji. ²⁰ Jadu'n nej Cristo y'o'cy miid iich ajt nbocy ycixpi, Dios jayjipni jadu'n yajnihuinmayiyy co jadu'n tuna'n, ca'ni anajty naaxhuiñybi chondägy. Jecy'ajty ca'ni anajty pin nejhuüy, e jadachambi Dios ajt ti xyajnejhuüiyim. ²¹ Paady ycixp miich ajcxy mijpidägy Dios. Dios yajjugypijc huinjemy je Cristo co y'o'cy, e Cristo cömay ooy ypidzimy jii by tzajpjoty. Yajmij'ajtcix Dios etz jii'p'ijxcix co Dios xyajnidzögaanip ajcxy m'alma.

²² Ti myajhuaatzcixy mjot mhuinma'n co ti mmijpidaaccixy Dios ytiy'ajt. Naychójcgix nayjihuiyigix nidüg nidüg cixy jot huinjot, ca' y'ametz yjotmetzity. ²³ Com ti Dios oyduñ miich ajcxy mjot mhuinma'n huinjemybi miid yi' y'ayuc ytiy'ajt, co ti mmijpidaaccixy je tiy'ajt huidibi tudägyip, je huidibi ca' ycixy ytigoy, huidibi huinixii ijtp, je tiy'ajt

huidibi jugy'ajt yejcpy. ²⁴ Jadu'n ymiin jaybety ma Dios y'ayuc:

Je jäy ninix nidigooyb yi' etz je ninix y'oy'ajtin nidigooyb yi'. Tim jadu'n nej tüg pijy co ñidecy ytiitzni, chi je pijy jadu'ñyi yca'ni, e chi jadu'ñyi je pijy y'oy'ajtin ytigooy.

²⁵ Dios y'ayuc ytiy'ajt huinixii y'lity, ca' ycixy ytigooy nimina.

Jada je ayuc je tiy'ajt huidibi Dios yjäy ycapxhuäcxyp ma miich ajcxy.

2 Paady ycixp copicy co m'ixmájtzcixipy yi jibic-huinma'n nej migüg ajcxy jibic mnigapxcixy. Ca' m'aniidáaccixipy. Ca' ajcxy mnaybidägiyyb jadu'n nej jihuiy ooy m'oyjäyity, e ca' yjanchity. Ca' mmigüg ajcxy ti myajca'oy'ixipy. Ca' ajcxy m'iidigoyipy mgapxtigoyipy. ² Jadu'n nej yi ma'xungdijc tzocy chüd, nañ tim jadu'n miich ajcxy tzojccixy jot'ajtcixy Dios y'ayuc ytiy'ajt, jigix jëbi ca'pxy yi mhuinma'n mi'idipy ajcxy miid je ixpijcin huidibi Dios xymooygixp, e chi ajcxy m'alma paadipy nidzocin. ³ Nidzögip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhuüiyigixy nej Dios may'ajt oy'ajt ti tuñ miid miich ajcxy ycixpi.

Cristo je tügpajcpi jaccopicyip

⁴⁻⁵ Yajmij'ajtcix yi Huindzin Jesucristo. Dios ti yhuin'ixyii jëbi yHuindzin'aty ma naaxhuiñyjäy etz ooy tzocy. Yi naaxhuiñyjäy ca' ajcxy ti tuñcuend, tim jadu'n nipaady nej tüg tzaa huidibi pojtzpidijc ninigoob ca' yajtuna'n ma yi tzaadijce ycojy. Yajmij'ajtcix miich

ajcxyc je Huindzin Jesucristo. Dios yaj'oyi' huamyb miid miich ajcxyc tügpicy jäy huidibi yi' yjäy'adaanip, huidibi ojadadaangixp Dios, huidibi Dios ytung tunaangixp. ⁶Jadu'n yjaybetyity ma Dios ylibro, Dios jadu'n ymina'n:

Jim ma Israel jäy nbidägibich tüg mij'ane'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njäygidägibich. Je mij'ame'mbi jadu'n je' nipaady nej tüg tzaa oybi huidibi tigihuamb ma tijctaatz co tzaadijc ycojy.

⁷Miich ajcxyc huidibi mijpidacp Jesús, miid miich ajcxyc je mij'ame'mbi ooy je' ymijity yjanchity. Per yi' ajcxyc ca' mijpidägy Jesús, je' yi' ajcxyc ycuydumyb nej ymina'n ma jaybetyity:

Pinjaty ca' capxymidohua'n Dios, ca' ajcxyc ixaangixyc je Cristo, e jadu'n ajcxyc nipaady nej pojtzpidijc huidibi ca' yajtunaangixyc tüg tzaa oybi co tzaadijc cojcixyc. Yi Cristo yi' je' je' mij'ane'mbi huidibi ane'mdähuamb tüg'óciy.

⁸Nañ jadu'n yi' ajcxyc huidibi ca' mijpidägy Jesús cuydumyb nej ymina'n ma yjaybetyity:

Jadu'n je Cristo nipaady nej tüg tzaa ma jäy ajcxyc ycönejpcixyc etz ycidaagixyc.

Je jäy ajcxyc huidibi ca' mijpidägy Jesús, jadu'n nipaady nej jihuiy ycönejpcixyc ma tüg tzaa co ajcxyc ca' tungixyc cuendi Jesús y'ayuc, paady ycixpi padaangixyc tzaachypi miid ypocy ycixpi, jadu'n nej Dios ti yajcöduyc.

Je huidibi Dios yjäy'adyii

⁹Miich ajcxyc huidibi yajmij'ajtp Jesucristo, ca' miich ajcxyc mjadu'nity nej yi' ajcxyc huidibi ca'capxymidoy Dios. Dios miich ajcxyc ti xyhuin'ijxcixyc. Je rey Jesús je' miich ajcxyc ytung mduunip. Oyjot oyhuinma'n miich ajcxyc myajtumyb. Dios miich ajcxyc xyjäy'ajtip. Miich ajcxyc je' xypaat mnidiy'ajt'adipy jadu'n nej Dios ti xyajpidzimgixyc ma anajty mdundigooygixyc, e ti xyajhuinjihuiygixyc je' ytiy'ajt nej jëb huaad mguydungixyc. Jadu'n nipaady nej jihuiy Dios ti xyajtzoongixyc agootztuuyb, e ti xyajtigiigixyc ma ytiicixyc yjajy. ¹⁰Co anajty ca'ni mmijpidaaccixyc Jesucristo, ca' anajty Dios xytungixyc cuendi. Cham co ti mmijpidaaccixyc Jesucristo, Dios ti xypa'ayoogixyc. Dios miich ajcxyc xyjäy'ajtp cham.

Yajtungix Dios y'ayuc ma mdzinaayin

¹¹Migügtijc ajcxyc huidibi ooy ndzocy njihuiyich, jada nyajnimaaaygixyp, jadu'n nej tüg adzinaaybi huidibi ca' chinäy ma ycajp, huidibi nihuidijtp, ca' tüg it mdzinaaygixyc, copicy co ca' mnijot'adipy ajcxyc yi jibic-huinma'n, jadu'n nej je jäy ajcxyc ma m'adzinaaygixyc nijot'ajtcixyc jibic-huinma'n. Je jibic-huinma'n ca' ñaygodigiiygixyc miid oyhuinma'n. ¹²Tiydudägy mdzinähuipy ajcxyc, yajtúngix oyhuinma'n miid je jäy ajcxyc ma miich ajcxyc m'adzinaaygixyc, je jäy ajcxyc huidibi

ca' nejhuiyigixy Dios ytiy'ajt. Oy ajcxy ca' xy'ixaangixy etz jibic xyñigapxcixy xyñi'ojiiygixy, miid co oyjäy'ajtin mdungixyp, chi ajcxy jäygidägipy, etz miich yi' ajcxy xycapxpátcixipy ma Dios, mina anajty Dios ñinmiñyii ajcxy.

¹³Miid je Huindzin Jesucristo ycixpi, capxymidoogixy tüg'óciy gobierno tungmiidpi etz cajp tungmiidpi y'ane'min ycötujcin, nañ capxymidoogixy jadu'n nej je mij'ane'mbi y'ane'my. ¹⁴Nañ capxymidoogix tungmiidpi ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'n ytumy.

¹⁵Dios chojcyp co tiydudägy mdzináaygixipy, jigix jëbi je jäy ajcxy huidibi ca' huinjihuiyigixy Dios ytiy'ajt, huidibi tzuu huinma'n miid, ca' ajcxy mihuinma'nybaady nej jibic xyñigapxip.

¹⁶Tzinaaygix jadu'n nej jäy chinäy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiyity. Pen mmidundigooyb ajcxy tunmiidpi y'ane'min ycötujcin, ca' huaad mnaybidáacigixy jadu'n nej jihuüy Dios xylugarmooygixy jigix jëbi mdundigooygixy. Copicy mdzinähuipy ajcxy jadu'n nej Dios ytumbi huidibi oy tumb. ¹⁷Migüg'adii ajcxy tüg'óciy jäy. Naychójcigix nayjihuiyigix nidüg nidüg huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypi yajnajx

¹⁸Tumbidijc ajcxy, iimidoogix capxymidoogix mhuindzindijc. Pen oyjäy yi mhuindzin huidibi yung

naxy yjot yhuinma'n miidity, o pen ahua'njäy jibicjäy, ca' yñejity, capxymidoogix. ¹⁹Yjäygidägipy Dios pen mmecxtujctaaygixyp nej jäy ajcxy ychaachytungixy miid co oyhuinma'n miich ajcxy mmiidity. ²⁰Pen ti anajty mdundigooygixy, e paady anajty myajtzaachytungixy, ca' pin xycómáaygixipy xycapxpáadygixipy, oy ti mjamecxtujctaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jäygidägipy nej mmimecxtujctaaygixy. ²¹Dios chojcyp co mmecxtujctáaygixipy je tzaachypi huidibi mminajxyp myajnajxcixyp miid co oybi mdungixy. Paady ycixpi je Cristo tzaachypi ayo'n minajxy yajnajxy miid iich ajt ycixpi, e yejc iixpejt jadu'n nej jëbi huaad mminajxcixy myajnajxcixy tzaachypi ayo'n, nañ nej jëbi huaad mbanicxcixy mbayöygixy yi' y'ijxpejt. ²²Je Cristo ca' je' ma ytundigooy, e nañ ca' pin huin'iin. ²³⁻²⁴Je Cristo co jäy ajcxy y'oji, ca' je' y'adzouhuimbijty; e co jäy ajcxy chaachytuuni, ca' mijotmäthuimbijty je jäy ajcxy, nigü Dios yajpuhuaniiy. Com Dios je' paatip nej chaachytuna'n huidi ajcxy tundigooyb. Je Cristo ci'm yajnicx iich ajt ndzaachypi co y'o'cy cruudzcixy. E miid co jadu'n y'o'cy cruudzcixy miid ajt nbocy ycixpi, chi jëbi n'ixmajtzim jibic-huinma'n etz tudägy jëbi ndzinaayim. Miid co Cristo je tzaachypi minajxy yajnajxy miid iich ajt nbocy ycixpi, paady nidzoocim ajt n'alma. ²⁵Miich ajcxy jecy'ajt mmiidigooyb mdüdigoooyb anajty ajcxy ma

Dios, mgi'mhuinma'n anajty ajcxy myajtumyib nidüg nidüg, jadu'n nej jäy yborregi ñiidigoy ytüdigoy ma yuugjot. Cham miich ajcxy ti mnijothuimbijtcixy Dios, ti ajcxy mhuinma'ñymech ti mmijpidaaccixy Jesucristo je huidibi xycuend'ajtp ajcxy.

**Nej huaad chinaaygixy
pinjaty ti pijccixy**

3 ¹⁻²Jadu'n nej tumbidijc capxymidoy yhuindzin, nañ tim jadu'n miich ajcxy töxyjäydijc capxymidoogixy mñäy. Pen mñäy ca' capxymidoy Dios, ca' mijpidäga'n Jesucristo, miid co miich oyjot oyhuinma'n myajtunipy miid yi', ycadimjetyity huin'it mñäy yhuinma'ñymedzip etz mijpidägipy Jesucristo, co y'ixipy nej miich mmiidity tudäy'ajtin. ³Töxyjäydijc ajcxy, ca' mnaygömayiyb miid mhuit mxojx oyjatpyi tzoujatyp, miid oori cijiitz etz oori taatztiy, miid co mgöhuay mdzachcüdigy miid cüd oyjatyp. ⁴Hue' janchtiy jäy miich ajcxy xycömayip miid co oyjot oyhuinma'n anajty myajtungixy, miid co yung naxy mjot mhuinma'n ajcxy miidity. Co jadu'n mdúngixipy jada je' oy jäygidaacni ma Dios huinixi. Yi mhuit yi mxojx etz oori taatztiy cixip tigoyip yi'. ⁵Nañ tim jadu'n anajty jecy'ajty je töxyjäydijc huidibi anajty ajcxy cömay ijtp, yajtuun anajty ajcxy oyjot oyhuinma'n, ymijpidacyp anajty ajcxy Dios, nañ ycapxymidooyb anajty ajcxy ñäy. ⁶Jadu'n nej Sara capxymidooy Abraham. Sara xiigoyäxy Abraham: "ñich

nhuindzin." Pen myajtumyib miich ajcxy oyjot oyhuinma'n jadu'n nej Sara, jadu'n miich ajcxy anajty nej jihuüy Sara ajcxy xy'ung'adyi, pen ooybi mdunipy ajcxy, ca' ti ajcxy mdzigiñhuipy.

⁷Nañ jadu'n miich ajcxy yëydijctijc, yajtungix pa'ayo'n miid mdöxyijc, yajmij'ajtcix. Com jac mic miich ajcxy ca'ydi yi töxyjäydijc. Dios may'ajt ti tuñ tú'ciy miid miich ajcxy, paady ycixpi copicy yajxon naymiiddzináayigix jigix Dios cuendipigipy etz xymöhuipy tijaty ajcxy myajmibijctzooyb.

**Co pinjaty xymidundigooy,
ca' myaj'ahuimbidipy**

⁸Jada ayuc cham njacyajnimaydaayb nidüg'óciy miich ajcxy. Tú'ciy mjot mhuinma'n mi'ijtcix, naymigüg'ajtigix yajxon, naychójcigix nayjihuüiyigix nidüg nidüg, nayba'ayouhuigix nidüg nidüg, pidaaccix yung naxy mjot mhuinma'n. ⁹Co ajcxy migüg xymidundigoyipy, ca' myaj'ahuimbidipy jadu'n nej anajty ti xytuñ. Co ajcxy migüg xyñ'ojñhuipy, ca' myaj'ahuimbidipy jadu'n nej anajty ti xyñ'ojy. Nigi nibijctzohui' ma Dios miid yi' ajcxy ycixpi, nigi mi'oyjäy'at mmigüg. Huin'it nigi Dios xyconuucxip. ¹⁰Com jii by ymiñ jaybety ma Dios ñecy:

Pinjaty jotcuyc tzinähuamb e yajnaxa'n xii tiempo agujc jotcuyc, nay'ahuijtzigiib ca'ydi y'iidigooy ycapxtigooy, ca'ydi y'aniidägy.

¹¹Huen jihuägy ma je jibicpi e huen oyjäy'ajtin tuñ. Huen

ixmach tüg'óciy tzipcapxy, ca' tzipcapxy ixtáhuipy.

¹² Je Huindzin Dios ycuend'ajtpy yí' je jáy huidibi tiydudägy tzinaayb etz ypubejtcixyp ypudigiygixyp migügtijc co tijaty mibijctzoy. Dios ymijotma'tpy je jáy ajcxy huidibi jibic-huinma'n tumb.

¹³ Pen mdumyb oyjot oyhuinma'n ajcxy, huin'it ca' pin ajcxy xymijotmädiy. ¹⁴ Co oyjot oyhuinma'n myajtunipy ajcxy e huin'it jáy xychaachtungixy, huin'it Dios xyconuucxip ajcxy, e ca' mdzigäyigixipy, ni ca' mhuinma'nydigóoygixipy.

¹⁵ Mijpidaaccix yi Jesucristo iich ajt nHuindzin Dios cixyot huinjot. Pen ji jáy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy miid yung'ajt nax'ajt jadu'n nej mjijp'ijxcixy co Jesucristo xyajnidzögaani ajcxy yi m'alma.

¹⁶ Ca' mgapxipy ajcxy je ayuc huidibi xyajtzo'yduunip. Pen jáy ajcxy xymi'iidigooygixp xymigapxtigooygixp, chi ajcxy jihuuhuamyb tzo'ydu'n miid co ca' yjanchity nej ajcxy ymina'n com oybi anajty ti mdungixy. ¹⁷ Pen Dios miich ajcxy jadu'n xyajnijot'ajt co tzaachypi mminájxcixipy myajnáxcixipy, jac'oy co tzaachypi mminájxcixipy myajnáxcixipy miid yi m'oyjäy'ajtin ycixpi, e ca' anajty tzaachypi mminajxcixy myajnajxcixy miid co anajty ti mdundigooygixy.

¹⁸ Je Cristo nañ jadu'n tzaachypi minajxy yajnajxy co y'o'cy cruudzcixy miid jáy ajcxy ypocy

ycixpi. Oy je' anajty ca' tibocy miidity, chi je' ti codinäy je jáy ajcxy ypocy, e jadu'n iich ajt ti naymi'oyiiyim miidi Dios. Oy je Cristo ñinix y'o'cy, per je' y'alma ca' je' y'o'cy, jugypijcy je' jadügtecy miid jemybi ninix. ¹⁹ Huin'it co Cristo y'o'cy, chi je' y'alma ñicxy, e capxhuäcxy yí' y'ayuc ma jáy y'alma ajcxy huidibi jibictuuyb ijtp. ²⁰ Je jáy ajcxy je' jiby y'alma ijtp jibictuuby huidibi anajty ca' capxymidoy Dios. Je taab Noé yajcojy je mij barco, ooy Dios ajcxy jecy ymimecxtujci, huen tijy cayjothuimbijty ajcxy. Jëyi niductujc je jáy choocy ma je mijtuu je mijniigom. Je' co je jacjadyi ca' ajcxy yjothuimbijty.

²¹ Jadu'n nej je niductujepi ajcxy mijpidacy Dios y'ayuc, e chi ajcxy choocy, nañ tim jadu'n iich ajt co nniibejtim je' iich ajt ndiy'ajt'ajtim co nmijpidaacim Jesucristo je huidibi co y'o'cy jugypijc miid jemybi ninix, etz ti xyajhuaatzim njot nhuinma'n jigix ooy oy nayjihuiiyim, etz nañ jadügtecy co anajty n'o'cim xyajjugypijcim miid jemybi ninix. Co nniibejtim, je' je' je tiy'ajt co Dios ti xyajhuaatzim njot nhuinma'n. ²² Je Cristo ti je' ñicxy tzajpjoty. Jiby je' cham y'lity mij'ane'mbi ma Dios, yí' je' ane'mb je ángeles ajcxy huidi tzajpjoty tungmiid etz huidijaty mic'ajt miid tzajpjoty.

Yajtungix je mic'ajt huidibi Dios ti xymooygixy

4 Je Cristo ayo'n tzaachypi minajx yajnajx co yhuidijty ya naaxhuiñybi, e chi yajtuun oyjot

oyhuinma'nñ miid jäy ajcxy ycixpi. Paady ycixpi copicy miich ajcxy myajtunipy oyjot oyhuinma'nñ miid migügtijc jadu'n nej Cristo yajtuuñ. Pen miich ajcxy mminajxyp myajnajxyp tzaachypi miid co oyjot oyhuinma'nñ myajtuñ, chi ca' mjacnijot'ajtip ajcxy jibic-huinma'nñ. ²Jadu'n nej ajcxy mjactzinähua'nñ mjacjugy'ada'nñ, ca' huaad mjacnijot'ajtcixy je jibic-huinma'nñ. Hue' janchtiy mdunipy ajcxy jadu'n nej Dios tzocy. ³Jecy'ajty co anajty ca'ni mnejhuiygixy Jesucristo ytiy'ajt, jibic-huinma'nñ anajty ajcxy myajtumyb ma mdzinaayin mjogy'ajtin, jadu'n nej jäy ajcxy jacjadyii huidibi ca'ni nejhuiygixy Dios ytiy'ajt. Chi anajty myajtungixy canaagnax je jibic-huinma'nñ, ooy ajcxy mnijot'ajtcixy maynax jibic-huinma'nñ. Ooy anajty anaxy mdzach'üccixy vino, huin'it anajty ooy ajcxy ymügyii. Ooy anajty mnixondaaccixy coodz huididi, huin'it anajty ooy m'uuccixy anaxy. Ooy mnijot'ajtcixy xii, ooy anajty m'ojadajtcixy tzaadzech quipychech huidibi Dios ca' jäygidägy. ⁴Paady ycixpi je jäy ajcxy huidibi ca' nejhuiygixy Dios ytiy'ajt, ca' ajcxy jäygidägy co ca' miich ajcxy cham jadu'n m'idich jadu'n nej yi' ajcxy y'idich, chi ajcxy jibic xyñigapxcixy xyñi'ojiiygixy. ⁵Ca' mdungixy cuendi yi' ajcxy, com Dios paatip nej ytiyduna'nñ ajcxy. Je Dios je' tiydunamb nidüg'óciy jäy ajcxy huidibi cham jugy'ajtp, etz tiibi y'öccixy. ⁶Paady ycixpi ti yajnimäy Jesucristo ytiy'ajt je jäy tiibi y'öccixy jigix yajtiydunipy

ajcxy miid Dios ytiy'ajt jadu'n nej yajtiyduna'nñ yi' ajcxy huidibi jacjugy'ajtp cham. Jëbi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷Ti ytimyhuingoni je xii je tiempo mina ycixaani ytigoyaani tüg'óciy tijaty ya naaxhuiniybi. Paady ycixp tzocy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzoohipy ajcxy Dios. ⁸Ooy ycopicyity co jacnaychójcigix jacnayjihuiygixy nidüg nidüg. Miid co mnaychójcigixy, paady ycixpi jëbi mnayméecigixy. ⁹Naymi'oyjä'yajtigixy nidüg nidüg agujc jotcujc, ca' y'ametz yjotmetzity. ¹⁰Yajtungixy miid je migügtijc jadu'n nej Dios xymooygixy ixpijcin nidüg nidüg. Naybubéjtigixy naybudigiiygixy miñ xyipy jadu'n nej jäy ajcxy huidibi yajxon Dios ytiy'ajt padungixp. ¹¹Pen Dios ti xymooygixy ixpijcin jigix jëbi capxhuäcxy yi' y'ayuc, yajxon Dios y'ayuc mgapxhuäcxip. Pen miich xypaat pujigii jëdzigii, yajxon mdunipy ajcxy jadu'n nej Dios huinma'nñ ti xymooygixy. Co yajxon Dios ytiy'ajt mguyduunipy, huin'it Dios cömaya'nñ miich ajcxy, miid co ti mmijpidaaccixy Jesucristo. Je Jesucristo je' cömay'idip etz ane'mip huinixii huinietiempo.

Mimeextujccixy tzaachypi ayo'n

¹²Migügtijc ajcxy huidibi ooy ndzocy njihuüyich, ca' ooy mhuinmay'ahuidijtcixy co jäy xy'ixhuidijtcixy xypahuidijtcixy, co jäy xychaachytunaangixy

jigix jēbi ñiguëxigipy pen janch mmibijccixy Jesucristo. ¹³Ca' ajcxy mdajipy mmayipy, jotcuje ajcxy mnayjihuihuiyb jigix jēbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigiyi ya naaxhuiñ miid ymic'ajt y'oy'ajt, jēbi ajcxy jotcuje mnayjihuihuiib. ¹⁴Pen xymi'iidigooyb xymigapxtigooyb jäy ajcxy, miid co miich ajcxy ti mmijpidaaccixy Jesucristo, jotcuje mnayjihuihuiipy, miid co miich ajcxy miid je Dios yjihuiñ etz Dios ymic'ajt ma mjot mhuinma'ñ. ¹⁵Pen nidüg miich ajcxy ayo'n tzaachypi mbaatcixy, oy ca' anajty ti mjäyyaj'öccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjäy ti ytundigooy, ¹⁶pen miich ajcxy tzaachypi mminajxyp myajnajxp miid co ti mmijpidaaccixy Jesucristo, ca' ti tzo'ydu'n mjihuihuiipy, ñigi Jesucristo cömay'idipy.

¹⁷Ti xii tiempo tim paatni mina Dios tiyduna'ñ je jäy ajcxy huidibi cuydumb je' ytiy'ajt. Pen Dios iich ajt huidi nmibijcim xytyiduunim e nbaatim hueeni tzaachypi, ñigi tzaachypi padaangixy ajcxy huidibi ca' mijpidaaccixy Dios. ¹⁸Pen je jäy huidibi oyjot oyhuinma'ñ miid mic tzaach padaangixy je' y'alma nidzoocin, çti jada ytunaangixy pinjaty jibic-huinma'ñ miid, pinjaty pocytungix? ¹⁹Pen tzaachypi mminajxyp myajnajxyp ajcxy miid co Dios jadu'n chojcyp, ca' ajcxy mjotmetzcihuipy, ñigi ajcxy

panicxcix payöygix oyhuinma'ñ, ñigi cixyot huinijot mijpidägipy ajcxy Dios; com yi' miich ajcxy xyajcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

Pedro capxhuijp je mibijpidijc

5 Jada iich miich ajcxy yajñimaayb huidibi nigohuajc'ajtp je mibijcpidijc, iich nañ jadu'n nigohuajc'ajtpyich mibijcpidijc. Iich n'ijxyich co je Cristo ayo'n tzaachypi minajxy yajnajxy. Nañ jadu'n iich yi' nmii'd'idaamybich jadüg'oc co anajty ymiñ ya naaxhuiñ miid y'oy'ajtin ymij'ajtin. ²Jada iich miich ajcxy nyajñimaayb: yaj'ixpijccix etz cuend'ajtcix Dios yjäy agujc jotcuje. Ca' myaj'ixpigipy ajcxy ametz jotmetz, cuend'ajtcix Dios yjäy, tim jadu'n nej jäy ycöbixy cuend'aty. Ca' meeñgixy myaj'ixpigipy ajcxy. Miid oyjot oyhuinma'ñ myaj'ixpijccixy. ³Ca' adzip ahua'n m'ane'mipy Dios yjäy. Hue' janchtiy ijxpejt oybi yejccix. Cuydungix Dios ytiy'ajt. ⁴Co anajty Jesucristo, je huidibi nihuindzin'ajttaayb tüg'óciy, ñayguëxigiyi ya naaxhuiñ jadüg'oc, chi cömay miich ajcxy mbidzimipy. Tim jadu'n nej jäy ajcxy co y'iyiygixy e co ymadaaccixy, chi cömay ypidzim ajcxy. Miich ajcxy cömay nañ jadu'n m'idipy huinixii.

⁵Myajmij'adipy anäctijc ajcxy, je' ajcxy huidibi nigohuajc'ajtp je mibijcpidijc. Ooy ycopicyity co nidüg'óciy miich ajcxy mnayyajmij'ajtigixipy miñ xyipy miid oyjot oyhuinma'ñ. “Dios ca'

je' jäygidägy pinjaty amij agix jäy'ájtigixy. Dios ypubejtyp miid y'oyjot pinjaty yung naxy yjot yhuinma'n miid." ⁶Mgapxcöbigipy ajcxy tiydudägy Dios, je mij'ane'mbi, chi Dios xycömayipy mina anajty. ⁷Mibijctzougix Dios miid tüg'óciy tijaty jotmay ajcxy miid'ajtyp, chi jëbi Dios xypubedipy xypudigihuiipy ajcxy.

⁸Huijycujc m'idipy ajcxy. Nixi' m'idipy ajcxy. Com je mujcu' huidibi xymiidzip'ajtim, ooy je' xy'ix'ijxim xypa'ijxim. Hue' xyajhuinma'nydigoyaanim, tim jadu'n nej je caa co ixtay ti chüdzaamyb. ⁹Huindina' jijptina' ajcxy je mujcu'. Yi jacjadyi jäy huidibi mijpidaaccixy Jesucristo, nañ yminajxcixyp yajnajxcixyp tzaachypi nañ jadu'n. ¹⁰Co anajty ajcxy hueeni tzaachypi ti m'ocyajnaxy, huin'it Dios xyaj'oyiiyipy ajcxy yi mjot yi mhuinma'n, xyajmibigip ajcxy yi' ytiy'ajt, xyajjotmicpigip ajcxy. Com Dios yi' je' huidibi may'ajt ti tuñ mijcajee miid nidüg'óciy jäy ajcxy. Yi' je' huidibi ti yaj'oyiy nej jëbi cömay huinixi n'ijtim miid Jesucristo jiby tzajpjoty. ¹¹Huen

Dios y'oy'ajtin etz ymij'ajtin idipy huinixi.

Capxpooocxin yajnajxp

¹²Jada necy nyajniguejxy ajcxy miid Silvano iich ajt nmigüg huidibi ndijpyich co ooy yajmij'aty Jesucristo. Hueeni jada ayuc huidibi nyajnijayiiyb, nañ ti nbidägyich necyjoty capxhuijin etz ti nbidägyich necyjoty yi Dios ytiy'ajt tudägy, nej Dios may'ajt oy'ajt tuuñ miid miich ajcxy ycixpi. Mijpidaaccix nigi Dios ytiy'ajt, ca'ydi mhuinma'nydigooygixy.

¹³Je jäy huidibi ya Babilonia huidibi ajcxy yajmij 'ajtcixp Jesucristo, je jäy ajcxy huidibi Dios ti huin'ixy, xyajniguejxp ajcxy capxpooocxin. Nañ jadu'n Marcos iich nmigüg, je huidibi njihuiybich nej jihuüy ngi'm'ung'adyiijich xyajniguejxp capxpooocxin nañ jadu'n.

¹⁴Naygapxpóocxigix xic xon nidüg nidüg miñ xyipy. Je' je' je tiy'ajt co mnaychójcigixy mnayjihuiiyigixy miñ xyipy.

Jotcujc mnayjihuiiyib ajcxy nidüg'óciy huidib yajmij'ajtp Jesucristo. Amén.

2 PEDRO

Yi Mimetzpi Neczy Huidibi San Pedro Yajniguejx Yi Mibijcpidijc

1 Hich Simón Pedro, tumbich ma Jesucristo ytung. Yi' xy'apóstol'ajtpich etz ngapxhuäcxpyich yi' y'ayuc. Cham iich miich ajcxy jada necy nyajnijayiiygixy huidibi ajcxy ti mbaatcixy mibijcin janch oybi, tim jadu'n nej iich ajcxy ti nbáatcixyich mibijcin janch oybi. Hich ajt nDios je Jesucristo huidibi xyajnidzoocim ajt n'alma tudägy je', e tudägy ytuñ miid iich ajt nidüg'óciy. ²Huen Dios mijmay'ajt tunipy miid miich ajcxy, etz jotcujc'ajtin xymöhuipy mijcajee, miid co tiy'ajt ti mbaatcixy ma Dios etz ma je Jesús iich ajt nHuindzin.

Je mibijcpidijc chinaayin jugy'ajtin

³Dios miid je' ymij'ajt ti xymooyim tüg'óciy huidibi nyajmayajtim ma ajt njugy'ajtin, nej huaad nguyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun miid iich ajt ycixpi co ti xyajnejhuiiyim Jesucristo y'ayuc ytiy'ajt. Je Jesucristo ti xyhuin'ijxim jigix jëbi nmiid'ajtim yi' ymij'ajtin y'oy'ajtin, etz jigix jëbi nduunim oyyäy'ajtin

nej Jesucristo tuuñ. ⁴Dios ti xymooyim huidibi janch oydi'cni e janch copicyip jigix jëbi miich ajcxy mbaatcixy Dios yjihui'n ymic'ajt huidibi xyajtzinaaygixy miid huädz jot huinma'n, etz jigix jëbi miid jada ycixpi tiibi xyaj'ahuaniiyim, miich ajcxy mjijpyöyduutcixy je jibicpi huidibi naaxhuiniyäjy ajcxy ñijot'ajtcixyp. ⁵⁻⁷Com Dios miid ymic'ajt ti xymooyim huidibi nyajmayajtim, paady ycixp miich ajcxy naymic'ijxigixy co ajcxy mmibijcin mjacyajmijtigiiygixipy tudägy'ajtin; e miid mdudägy'ajtin mjacyajmijtigiiygixipy ajcxy Dios y'ixpijin; e miid je Dios y'ixpijin mjacyajmijtigiiygixipy yi Dios yjihui'n ymic'ajt ma ajcxy mjot mhuiinma'n huidibi miid mmimadägiy ajcxy yi jibicjot jibic-huinma'n; e miid je mic'ajt ma ajcxy mjot mhuiinma'n jacyajmijtigiihuipy ajcxy mecxtujcin; e miid je mecxtujcin mnejhuüygixipy nej jëb huaad myajmij'ajtcixy etz mdzigiüygixy Dios; e miid je mecxtujcin mjacyajmijtigiiygixipy je tzojcin

je jihuuiyin miid migügtijc; e nañ mjiitigihuiipy nañ jadu'n je mibijcin nej jëb huaad Dios myajmij'ajtcixy etz nej jëb huaad cixyot huinijot mjacyajtungixy oyjäy'ajtin.

⁸Pen ma miich ajcxy mdzinaayin mjugy'ajtin yajpattäy e ymijiy ymayiy, yi mjugy'ajt ajcxy ca' yi' ñaadig'aty; nañ ca' anajty ajcxy naadigi' ti mmibijccixy iich ajt nHuindzin Jesucristo, ti mnejhuuiygixy yi' y'ayuc ytiy'ajt.

⁹Pin jada ca' capxymidooy tüg'óciy jadayaabi capxhuijin ma yjugy'ajtin, jadu'n yi' nipaady nej tüg huintzpi o huidibi y'ijxin con, ti jäydigoy co Jesucristo ti yajpocynñhuaatzp.

¹⁰Paady ycixp miich ajcxy migügtijc, naymic'ijxigixy tungix tüg'óciy jada jigix mnejhuuihuipy ajcxy tiydudägy co Dios ti xyajmibijccixy e ti xyhuin'ijxcixy. Pidaaccix mhuinmañ co jada tiy'ajt huen copicy, huen tictztigiy ma miich ajcxy mjugy'ajtin. E pen mdumyb ajcxy jadu'n, nimina mgapocycägixipy. ¹¹E jadu'n miich ajcxy myajmöhuiipy tiydudägy tigiydac mijpi ma iich ajt nHuindzin Jesucristo y'ane'my, je huidibi xyajnidzoocim ajt n'alma. E yi' y'ane'min ca' ycixipy ytigoyipy nimina.

¹²Paady ycixp iich miich ajcxy jatyimy yajjäymejtzcoodaangixy jada tiy'ajt. Oy miich ajcxy jada tiy'ajt mjajajtcixy mjanejhuuiygixy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham miid. ¹³Minaambich co yjanchity nami njactzinaayñich co iich miich ajcxy nmöhuiipy capxhuijin. ¹⁴Iich ajt nHuindzin

Jesucristo ti xyajnejhuuiyich co tzojc n'ixmadzipyich jada njugy'ajtin (n'ögibich). ¹⁵Paady ycixp naymic'ixyijich mictägy ma miich ajcxy co ngapxhuijicixy jigix co anajty n'ögyich mjäymetziyib ajcxy tüg'óciy jada tiy'ajt.

Yi' ajcxy huidibi y'ijxy je Cristo ymij'ajtin y'oy'ajtin

¹⁶Iich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt miidty, e jadu'n nej je' yhuimbidañ jadüg'oc ya naaxhuin. E ca' iich ajcxy nyaj'ixpicy nigoo'ayuc ani'ayuc huidibi ci'm ti ngojyich ti nmacxyich. Miid iich ngi'mhuuin ti n'ijxcixyich je Huindzin Jesús ymij'ajtin. ¹⁷N'ijx iich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: "Jada je' iich n'ung huidibi ooy ndzocyich njihuuyich, e ooy jotcuje nayjihuuyijich miid yi' ycixpi."

¹⁸Iich ajcxy nañ jadu'n ci'm ti nmidoogixyich je ayuc huidibi anajty tzomb tzajpjoty. Jim iich ajcxy anajty quipxyi miid je Huindzin Jesús ma je amay gop.

¹⁹Nañ jadu'n nmiid'ajtim je ayuc jac'oybi jactiybi. Je' je' je tiy'ajt je ayuc huidibi ajcxy yjay je Dios y'ayucnajtzcaxiyybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huidibi jadu'n nipaady nej tüg jiin tiicxp agootztuum etz jadu'n nipaady nej je xii co yximiydäy, etz jadu'n nipaady nej je mijmadza'

jayhuixtucpi co ypidzimy. Jada tiy'ajt xycodiicxip ajcxy mjet mhuinma'n. ²⁰Cuendtungix miich ajcxy jada: tüg'ócüy je tiy'ajt, huidibi Dios ytiy'ajtmiiidpi yejc huidibi ijtp jaybety ma Dios ylibro, ca' huaad pin yajni'gejip miid yci'mhuinma'n. ²¹Com je Dios y'ayucnajtzcaxiiby camina je' ajcxy ayuccapxhuäcxy miid yci'mdzojcín yci'mhuinma'n. Dios anajty ajcxy huin'ixyip jëbi ayuccapxhuäcxy miid Dios ycixpi com je Espíritu Santo anajty ajcxy mooyip ayuc huidibi ajcxy ycapxhuäcxyp.

Yi' ajcxy huidibi yaj'ixpijcp anii

2 Per nañ ji anajty nañ jadu'n ayucnajtzcaxiiby huidibi anajty ajcxy anii daacp ma je Israel jäy. E nañ jadu'n yji'adipy ayuccapxhuäcxpi huidibi anii yaj'ixpijipy ma miich ajcxy. Je' ajcxy ayüch ameech yaj'ixpijipy yci'm'ayuc yci'mhuinma'n huidibi ajcxy yajhuinma'n ydigoooyipy je mibijcpidijc. Ymina'n ajcxy co ca' yjanchity je Huindzin Jesús y'ayuc, je huidibi yajnidzooc ajt n'alma, e jadu'n ci'm ñay'ayo'nmoooyigixy miid Dios mic'amy. ²Mayjäy ooy panicxa'n je jibicpi huidibi ajcxy ytungixyp, e miid je' ajcxy ycixpi yajni'gäpxipy yajnimiydägiipy ajcxy jibic je huidibi ajcxy cuydumb je tiybi ayuc, je Jesucristo y'ayuc oybi. ³Miid co anajty tzach'adzojccixy meñ, chi anajty xyhuimbijccixy xyhuimmeetzcxixy miid ajcxy y'ixpijcin ca'p yjanchity. Per je pocycähuin ajcxy ahuijxip, ca' ma ñidzooy. Ti yjejcní maabi

ajcxy ypocyc'a'ni ma Dios. Dios tzaachytuniib ajcxy miid ypocycixpi.

⁴Dios ca' je' huinmeecxy je ángeles ajcxy huidibi tundigooygixp. Hue' janchtiy ycötijnajxtaayb ayoodactuuyb etz yajhui'my agootztuuyb, cadeniñy y'ijtcixy cuend'aty, ixti cooni anajty paady xii tiempo co anajty yajtiyduna'n naaxhuiñyjäy miid ypocycixpi. ⁵Nañ ni ca' Dios huinmeecxy je naaxhuiñyjäy huidibi tundigooy jecy'ajty. Chi quejxy ayo'nduu etz mijniigom ma je jibicjäydijc. Jëyi yajtzoocy je Noé huidibi capxhuäcx je tiy'ajt. Quipxy miid Noé yajtzoocy jahuixtuc y'amigügtijc. ⁶Dios nañ jadu'n tzaachytuñ miid ypocycixpi etz yajhuindigoy miid jün metz cäp, Sodoma etz Gomorra, ixti cooni yajhui'my accuyjam jigix y'idipy je iixpejt ma je jibicjäydijc huidibi ajcxy jac'axam jactzinähuam jacjugy'adam. ⁷Dios yajtzooc je Lot, hue' je' anajty janch oyjäy, e janch ymiid anajty jotmay co anajty je jibicjäydijc ajcxy iixi chinaayin yjugy'ajtin janch jibic. ⁸Jabom jabom anajty je Lot, je jäy oyjäybi huidibi anajty tzinaayb quipxyi miid je jibicjäydijc, ni ca' anajty yjotcujc'aty co anajty ixy midoy nej anajty ytundigooygixy je jäy ajcxy ca'pi ytudägyity. ⁹Dios miid mic'ajt jëbi nihua'n yajtzögy pinjaty mibijccixp cixyjot huinjot co je mujcu' yjot'ijxigixy huinma'n'ijxigixy. Nañ jadu'n Dios mic'ajt miidity jigix jëbi yaj'ijtcixy je jibicjäydijc miid tzaachypi ayo'n, huidibi ymöhuamy co anajty

naaxhuññyäjy tiyduñ miid yocoy ycixpi.

¹⁰Dios ymiid mic'ajt jëbi tzaachytunipy pinjaty tumb jibic-huinma'ñ nej ñinicx nijot'ajtcixy, e ca' ixaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuiyii. Ytumb ajcxy yci'mjot yci'mhuinma'ñ. Ni ycatzigiigixy co oyñinej ajcxy ni'ojiigixy pinjaty mic'ajt miid ma Dios ytung. ¹¹Oy je ángeles ajcxy miidity mijcötujcin etz ane'min, ca'p je' ajcxy yjot yhuinma'ñ miidity nicxy ni'ojiigixy ma Dios yhuinduu pinjaty mic'ajt miid ma Dios ytung.

¹²Per jadayaab jibicjäydijc ajcxy jadu'n ajcxy yi' nej iyujc, ca' yhuinma'ñ; nigoob ytimyhuidity etz yma'xun'ajtcixy jigix jäy ymadziyb etz yaj'ögiyb. Ñixiicpy yajxiicpy ajcxy yi' huidib ca' huinjihui'y. Per nañ tim jadu'n ajcxy y'ögipy nej iyujc y'ögy ytigoy. ¹³Cobadihuaangixy jadu'n nej ti ytundigooygixy. Hue' nayjihuiygixy capin yjadu'nity, yxondaaccixy tüg jaxicyjaty. Jadayaab jäy ajcxy pocy ypa'tcipy ajcxy yi' chinaaygixy yjugy'ajtcixy. Tüg tzo'ydu'n co ajcxy nañ jadu'n xymijyöybejtcixy ma m'amugiigixy.

¹⁴Co ajcxy huindiicxcixy töxyjäydijc, chi ajcxy ooy nijot'ajtcixy co miid tundigoya'ñ. Ca'p ajcxy chíjpigixy y'anucxiigixy miid pocytuni. Yajtundigooygixy pinjaty amútzip ma mibijcin, ooy ajcxy yhuijity yucjcity ycohuinma'ñity ma meen'adzoogii. Dios yajtigoyiib ajcxy y'alma.

¹⁵Tigoyjäy yi' ajcxy, je' co ti ñiidigajtcixy ti ytüdigajtcixy ma je tiybi je janchypi tiy'ajt. Je' ajcxy ypanicxy ypayöyp je profeta Balaam y'ijxpejt, je Beor y'ung, co ooy ymeefybadan anajty miid yjibic-huinma'ñ. ¹⁶Chi Balaam oy yaj'ojyii yocoy tüg töxyburro, ycapxy jadu'n nej tüg jäy, e jadu'n je' yajhuäcxipya je profeta Balaam miid je' ylocihuinma'ñ.

¹⁷Com jada jäy ajcxy ca' panicxcixy je janchypi tiy'ajt, paady ycixp jadu'n ajcxy nipaady nej tüg niipozojut ca'pi ñii miidity, etz jadu'n ajcxy nipaady nej joc huidibi poj yajyöyip (ca' ytu'y).

Dios möhuib ajcxy tzaachypi miid yocoy ycixpi, idam ajcxy agootztuuyb huinixii huinitempo.

¹⁸Com ycapxyp ajcxy ayuc huidibi ca' choubaady. E miid je jibic-huinma'ñ ycixpi huidibi ajcxy chachnijot'ajtpy yajtundigooygixy pinjaty tiibi choongixy ma je huidibi ajcxy tzinaayb miid jibic-huinma'ñ. ¹⁹Yi' ajcxy yaj'ixpijcp je mayjäy co jëbi tungixy huentim ti huidibi ajcxy ñijot'ajtpy. Per yi' ajcxy huidib jibic-huinma'ñ yaj'ixpijcp, ci'm ajcxy ñay'ijtigixy pocypa'tcipy, je pocy tzach'ane'mb ajcxy yjot yhuinma'ñ, ixti jadu'n nipaady nej jihuiy ajcxy ane'my y'ity. ²⁰Pinjaty ti ymibijccixy ti ñejhuiygixy je Huindzin Jesucristo ytiy'ajt huidibi yajnidoocp ajcxy y'alma, e jadu'n ti yjihüaccixy ma je naaxhuññyäjy yjibictzinaayin yjibicjugy'ajtin, pen jadüg'oc anajty y'ayöyiyñip ma je jibicpi, e je jibicpi ymimadägyii ajcxy, o'ctiy anajty nigí yhui'ngixy ca'ydi nej

je jayijp'atypi. ²¹Nīgi oy co ixypiy je' ajcxy ca' ytimnejhuuiygixy je janchyp'i tiy'ajt. Com ti ocnejhuuiygixyp, e chi jada' y'ixtigihuaccixy ma je huätzpi Dios ycötujcin huätzpi Dios ytiy'ajt tiibi anajty y'ocjamóoyigixy. ²²Per je' yi' ajcxy ytimycuydumy nej je ayuc y'lity: "Je uc yci'm'iich ñihuimbijtpy, e je idzim huidibi namdziidaayb, nicxy je' yajtnip yquintip mo'ntzjoty jadüg'oc."

Je Huindzin Jesús

huimbidaamb ya naaxhuiñ

3 Miich ajcxy miügütiyc huidibi iich ooy ndzocyich ooy njihuuiyich, jada je' je mimetzpi necy huidibi ajcxy nyajnijayiyb. Ma jada metzpi necy hue' iich ndzoga'ñich co nyajhuinma'ñymedzip ajcxy ma Dios ytiy'ajt miid jada capxhuijin huidibi ti njaayich. ²Ti nnijayiygixy jigix m'ajihuuihuuyb ajcxy je ayuc huidibi ajcxy pa'tcipy'aty ñajtzcapxiy je Dios y'ayucnajtzcaxiybi ajcxy huidibi huadz yhuinma'ñ anajty ymiid. Nañ ajihuuiygix je Huindzin Jesucristo je' y'ane'min huidibi yajnidzooc ajt n'alma, je ane'min huidibi apóstoltijc miich ajcxy xyajnimaaayb.

³Nejhuuiygixy miich ajcxy jada jayijp ma yam ca'ni yhuaad'ajtni mina naaxhuiñ ycixipy, miinip jäy ajcxy huidibi nixigip yajxigip huidibi Dios yjé'ajtpy. Chínaaygixy yjugy'ajtcixy anajty miid jibic-huinma'ñ huidibi ci'm ñijot'ajtcixyp. ⁴Chi ajcxy ymina'nip: "¿Ti co mdzachmibjccixy co Cristo yhuimbida'ñ jadüg'oc ya

naaxhuiñ? Nej ajcxy je' y'o'ctay je mij'ap je mijteedy, je'ni y'ijttäy tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbida'ñ jadüg'oc ya naaxhuiñ," jadu'n yminaangixy. ⁵Yi' ajcxy ca' huinjihuuihuaangixy cuendtunaangixy co miid Dios y'ayuc yi' tzajp ji'ajtp anajty yi' tzachjeyip, e miid Dios y'ane'min huin'it je naax oy yguëxigy huidibi ijtp anajty niijoty. ⁶Nañ jadu'n miid Dios y'ayuc je jecy'ajtpy naaxhuiñyjäy y'ayo'nbaty, ñiijicxtay nidüg'óciy e ytigoyday niijoty. ⁷Per Dios miid yi' y'ayuc yaj'ijtpy jada naaxhuiñybi etz tzajp huidibi cham ji'ajtp ixti coon yajtigoydähuipy miid jin. Je jin huin'it je' nöctähua'ñ co anajty yhuaad'ajtni ma Dios tiyduna'ñ je camadacpidijc je jibicjäydijc, etz yajtigoya'ñ ajcxy y'alma.

⁸Jadügnax miich ajcxy miügütiyc huidibi ooy ndzocy njihuuiyich, ca' mjäydigooygixy co ma yi' Huindzin Dios, tüg xii jadu'n yi' nej tüg mil jimijt, e tüg mil jimijt jadu'n yi' nej tüg xii. ⁹Ca' nminaanim co yi' Dios yajhuäcxibaamyñi yi' mina cuyduna'ñ huidibi yi' ti ahuaniy, jadu'n nej nijëjity jäy a'ixiyyigixy. Dios yajtumyb mecxtujcin miid miich ajcxy, com hue' yi' tzocy co ni tüg jäy ayo'n paadipy. Yi' chojcpy co nidüg'óciy jäy huen jothuimbijtcixy etz ixmajtzcixy pocytuni.

¹⁰Co anajty je Huindzin Jesús ymiin jadüg'oc ya naaxhuiñybi chaachytunipy je' tüg'óciy jibicjäydijc, hue' je' ytuniiyb yjadiiyb ma anajty ca' pin jijp'ixy,

jadu'n nej tüg meetzpi ymiin coodz co meedza'n tijaty. Huin'it je tzajp yhuindigoydähuipy miid tüg ne'min jidijtin oychigiinyip. E tüg'óciy huidibi miid ndzinaayim njugy'ajtim toydähuip yi' miid jiin, yi naax toydähuip yi', etz tijaty yajpatp ya naaxhuiñ toydähuip nañ jadu'n.

¹¹Com tüg'óciy tijaty huidibi jiajtp yhuindigoydähua'n miid jiin, paady ycixpi nigi copicy miich ajcxy co mdzinaayixp tudägy e myajmij'ajtcixyp Dios. ¹²Ahuixcix ajcxy je xii tzuu mina Dios anajty yajhuaad'aty co yajhuindigoya'n je naaxhuiñybi. Naymic'ixigix co tzojc yminipy yi jadu'mbi xii tzuu. Co yhuaad'ajtnip huin'it xii, je tzajp yhuindigoydähuip miid jiin; je xii po', je poj p xemembi, je tuu enee jadu'niyi yticxtähuipy yjiydähuipy jijnjoty. ¹³Per iich ajt n'ahuixim je jemybi tzajp jemybi naax huidibi Dios ti xyaj'ahuaniiyim, tüg tzinaaydac janch'oybi ma ca' ti jibicpi.

¹⁴Paady ycixp miich ajcxy migügtijc huidibi iich ooy ndzocyich njihuüyich, nami m'ahuixyp miich ajcxy co Dios yajhuindigoyaanip jada naaxhuiñ, naymic'ixigix ma tüg'óciy ajcxy yi mdzinaayin co mguydunipy ajcxy Dios ytiy'ajt jigix ajcxy Dios xypaadipy, ca' ajcxy ti tzip ti gapxy, ni ti jibicpi, e ni ti pocy, ac huädz jot huädz

huinma'n anajty miid'ajtcixy.

¹⁵Cuenditungix je mecxtujcin huidibi iich ajt nHuindzin Jesucristo yajtumyb miid iich ajt jigix jébi xyajnidzoocim ajt n'alma. Nañ jadu'n yi', iich ajt nmigüg Pablo huidibi ooy ndzojcim, ti miich ajcxy xyñijayiygixy, jadu'n nej ixpijcin Dios ti ymöyii ma yi' y'ayuc. ¹⁶Ma tüg'óciy Pablo ñecy tiibi xyajniguejxcixy, jada tiy'ajt ti xyajmiidmiydaaccixy. Nijējity Pablo ñecy ooy chachchiphuinjihuiñity, e nijējity jāy ajcxy tigach ajcxy huinjihuüy Pablo y'ayuc, ca' ajcxy huinjihuüy nej Pablo yjamina'na'n. Huingjaty ajcxy nigüej Pablo y'ayuc, e ci'm ñayyajhuinma'nydigóoyigixy.

¹⁷Paady ycixp miich ajcxy migügtijc huidibi ooy ndzocy njihuüyich, miich mnejhuyidaaygix jada tiy'ajt. Nayguend'ajtigix ca'ydi jibicjāydiyic miid y'aniñ xyajnidigajtcixy xyajtüdigajtcixy, e ca'ydi m'ixtigihuäccixy ma ajcxy mmibijcin jadu'n nej tiydudägy ti mmibijccixy. ¹⁸Huen iich ajt nHuindzin Jesucristo huidibi yajnidzooc ajt n'alma nigi may'ajt oy'ajt tunipy miid miich ajcxy, e nañ nigi yujcpedipy ajcxy yi m'ixpijcin ma yi' ytiy'ajt. Huen Jesucristo cōmay y'idipy etz mi'idipy oy'ajtin mij'ajtin jadachambi xii tiempo etz jadu'n nej xii tiempo miimb cidacp. Jadu'n ngapxycixyich. Amén.

1 SAN JUAN

Yi Jayijpi Neczy Huidibi San Juan Yajniaguejxy Je Mibijcpidijc Nidüg'óciy

1 Dios y'ayuc jiiyim anajty co naaxhuiñybi chondacy. E tiy'ajt nyejcy pich jadu'n nej nmidooyich ci'm yi' y'ayuc, jadu'n nej n'ijxyich miid ngi'mhuinich, jadu'n nej nhuindiicxyich yi' ci'm, e nañ jadu'n nej nnidoñich miid ngi'mgijich. Nyajnijayiybich miich ajcxy jada necy jadu'n nej je Cristo je Dios y'ung yjugy'ajtin yega'n huidibi ca' cixa'n tigoya'n niminaabi. ²Ti ñayguëxigyii ya naaxhuiñ je Dios y'ung huidibi ymiid jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyéjccixyich co ti ñayguëxigyii ya naaxhuiñ, etz ti n'ixyich jigix jëbi nyajniamaaygixy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jiiby ijtp ma Dios Teedy, nayguëxici je' ma iich ajcxy. ³Je huidibi iich ajcxy n'ijxich nmidoahuich, cham miich ajcxy nyajniamaaygixy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴Paady ycixp jada

tiy'ajt nyajnijäyiy ajcxy jigix ajcxy jotcujc'ajtin mbattáaygixipy miid jada ayuc tiy'ajt.

Dios yi' je' je tiicxin jájin

⁵Jadayaabi Dios y'ayuc ytiy'ajt Jesucristo ti xyajnimäyich e nañ cham iich miich ajcxy nyajniamaaygixy. Dios huadz ytiy'ajt miidity, ca' ma Dios aniidägy. Jadu'n Dios nipaady nej tüg jün ytiicxy ma tüg it e ni ca' ni mina ypich. ⁶Co nminaanim co Dios ajt miid n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuiy ndzinaayim agootztuum. Nigoo n'iindaacim, ca' anajty ajt nguyduunim Dios ytiy'ajt. ⁷Co nguyduunim Dios ytiy'ajt jadu'n nej yi' ytiy'ajt miidity, jadu'n nipaty nej jihuiy ndzinaayim ma jün ytiicxy. Huin'it jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy miid iich ajt nbocy ycixpi. ⁸Co ixypy nminaanim co ca' nbocytuunim, nigooob nayhuin'iinim

ci'm, e ca' jadu'n Dios ytiy'ajt yajpaady ma iich ajt ntot nhuinma'ñ. ⁹Pen ngapxypidzimim ajt nbocy ma Dios, yi' ñidinaayb yi' y'ayuc huidibi ti xyajnimaaayim co ymecxamy ajt nbocy, e nañ tudägy ytuñ miid iich ajt ycixpi. Dios xyhuinmeecxim ajt nbocy etz xyajhuaatzim ntot nhuinma'ñ jëbi n'ixmajtzim jibic-huinma'ñ. ¹⁰Co ajt nminaanim co ca' nbocytuunim, hue' anajty Dios nyajnajxim anii, e ca' anajty ti ngöbixim cixyot huinjot yi' ytiy'ajt.

Cristo, iich ajt nhuingapxpi ma Dios

2 Miich ajcxy migügtijc huidibi ooy ndzocy njihuüyich jadu'n nej ixypy ngi'm'ungich ngi'm'anäcich, cham jada tiy'ajt nyajnijayiygixy, jigix ca' ajcxy mdundigoooygixipy. Pen ji nidügti miich ajcxy huidibi tundigoooyb, jada migüg huidibi tundigoooyb huen mibijctzoy Dios ma Jesucristo yxi miid ypocy ycixpi. Jesucristo yi'je' huinapxp ma Dios Teedy miid ajt nbocy ycixpi. Tudägy je', e jëbi xyhuinapxim ma Dios Teedy. ²Com Jesucristo ti y'ögy miid iich ajt nbocy ycixpi, paady ycixp jëbi capx'oyiy ma Dios miid iich ajt ycixpi e xycapx'oyiyim iich ajt nbocy etz nañ capx'oyiyip tüg'öciy naaxhuüny jäy ajcxy ypocy, yi' jäy ajcxy pinjaty yi' y'ayuc ytiy'ajt mijpidaacip.

³Co Jesucristo ytiy'ajt nguyduunim yajxon, huin'it nejhuiiyim tiydudägy jadu'n nej Dios may'ajt oy'ajt ti tuñ miid iich ajt ycixpi. ⁴Co ixypy pinjaty ymina'ñ co ñejhuiiyi Jesucristo

ytiy'ajt e ca' cuychinaayi yi' ytiy'ajt hue' yi' tzach aniidaacpi, e ca' miidity Dios ytiy'ajt. ⁵Yi jäy ajcxy pinjaty cuychinaayb cuyjudy'ajtp yajxon Jesucristo y'ayuc ytiy'ajt, janch tiydudägy anajty yajmij'aty Dios. Co nguychinaayim nguyjudy'ajtim yajxon Jesucristo ytiy'ajt, huin'it jëbi nejhuiiyim co nyajmij'ajtim Dios. ⁶Yi jäy ajcxy pinjaty minamb co ymiid Jesucristo y'ayuc ytiy'ajt ma je' y'ay yjot, copicy ajcxy chinäygyixyipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷Miich ajcxy migügtijc huidibi ooy ndzocy njihuüyich, ca' nminaanim jemybi tiy'ajt ajcxy nyajnimähuamy ma jada necy. Je' jada je' tiy'ajt huidibi jecy'ajty ti mnejhuiiygixy co oga'n ajcxy mmijpidacy Jesucristo. Jada tiy'ajt jecyip jada je' huidibi cham ajcxy mmidooyb jadüg'oc. ⁸Nañ jemy jada tiy'ajt nañ jadu'n huidibi nyajnimaaaygixyp ma jada necy. Jada je'je' tiy'ajt huidibi Jesucristo ymiid ma yjot yhuinma'ñ etz nañ iich ajt nmiid ma ajt ntot nhuinma'ñ. Yi jecyip ayuc huidibi ca' ytiy'ajty, ti yi' ñaxy e cham Dios ytiy'ajt tiydudägy nyajtuunim, jadu'n nej jihuüy je coodzpi ti ñaxy e cham ti xiiimiy.

⁹Yi jäy ajcxy huidibi minam co Dios y'ayuc ytiy'ajt ajcxy cuyduuni e ca' ixäänigixy ymigügtijc, ca' yi' ajcxy tiydudägy Dios y'ayuc yajtuuni, jadu'n yhuimbizimy jadu'n nej jihuüy agootztuuy ijtcixy. ¹⁰Yi jäy ajcxy pinjaty tzojcp jihuiiyb

ymigügtijc hue' yi' yajpaatcixy miid Dios ytiy'ajt ma ajcxy yjot yhuinma'n, jadu'n nipaady nej jihuiy y'ljtcixy ma xii ytiicxy, ca' ajcxy ñiidigoy ytüdigoy ma Dios ytiy'ajt. ¹¹Yi jäy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuiy agootztuuby y'ljtcixy, ca' ajcxy chinaaygixy nej Dios ytiy'ajt yja'ané'migixy, ca' ajcxy nejhuiygixy huidibi tiy'ajt jébi yajtungixy, com jibic-huinma'n chachtuumyb ajcxy huidibi ca' Dios tiy'ajt'adyii.

¹²Miich ajcxy migügtijc huidibi ooy ndzocy njihuiyich ajcxy jadu'n nej ixypy ngi'm'ung ngi'm'anäcich, com Dios ti miich ajcxy mbocy xyhuinmecxtayi co Jesucristo y'o'cy miid ajcxy mbocy ycixpi, paady ycixp cham nnijayiygixy.

¹³Cham nnijayiygixy miich ajcxy mij'anäctijc, com ti mmijpidaaccixy Jesucristo huidibi jii'ajt co naaxhuiñybi oga'n choondacy etz chambaad yjii'atyñi. Cham nnijayiygixy miich ajcxy anäctijc, com ti mmimadaaccixy je ca'oybi.

Cham nnijayiygixy miich ajcxy pi'ctijc mutztijc com ti mmijpidaaccixy Dios Teedy.

¹⁴Cham nnijayiygixy miich ajcxy mij'anäctijc, com ti mmijpidaaccixy ajcxy Jesucristo huidibi jii'ajt co naaxhuiñybi oga'n chondacy etz yjii'atyñi chambaad. Cham nnijayiygixy miich ajcxy anäctijc, com mic mjot mhuinma'n miidity ajcxy etz Dios ytiy'ajt yajpatp ma ajcxy mjot mhuinma'n, paady ycixp ajcxy ti mmimadaaccixy yi ca'oybi.

¹⁵Migügtijc, ca' anaxy m'adzójccixip yi huidibi miid ndzinaayim ya naaxhuiñ. Yi jäy ajcxy huidibi adzojctaayb anaxy yi huidi miid ndzinaayim, ca' ajcxy Dios Teedy yajmij'ajtcixy. ¹⁶Ca' anaxy m'adzojctähuiipy ajcxy tüg'óciy huidijaty ya naaxhuiñ yajpatp, jadu'n nej njot nhuinma'n tzojcm, jadu'n nej tijaty n'ijxim, jadu'n nej huidibi amij agix miid ndzachnayjihuiyim. Com yi jadu'mbi huinma'n ca' yajpaady ma Dios Teedy, hue' yi' yajpaady ya naaxhuiñ. ¹⁷Huidijaty ya naaxhuiñ yajpatp cixipy tigoyipy yi', nañ jadu'n ytigoya'n huidijaty yi huinma'n y'adzojcpy. Yi jäy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je tiy'ajt etz je anii

¹⁸Miich ajcxy migügtijc huidibi ooy ndzocy njihuiyich nej ixypy ngi'm'ung ngi'm'anäcich, tim cijxnip tiempo ya naaxhuiñ. Ti jada mnejhuiygixy co miinaam jäy ajcxy huidibi nayyajnaxaanip nej Cristo' e ca' yjanchity. Miid co cham ji mayjäy ajcxy huidibi nayyajnajxip jadu'n nej Cristo, paady nejhuiyim co tim cijxnip yi tiempo miid iich naaxhuiñyjäy ajt ycixpi. ¹⁹Yi jäy ajcxy huidibi nayyajnaxaanip jadu'n ixypy nej Cristo, naybijc-huäcxaanip yi' ajcxy miid iich ajt, ca' anajty ajcxy ytügüy yi' ajcxy yhuinma'n miid iich ajt nhuinma'n, tügmucy ixypy ajt xymiid'ijtim. Ji jadu'n ñiguëxigy co ca' ytügüy

yhuinma'n miid iich ajt nhuinma'n co ti ajcxy xypuhuäctuutim.

²⁰Ti miich ajcxy xy'adigiy xyjottigi'y Dios yjihui'n ymic'ajt, paady miich ajcxy mhuinjihu'y tüg'óciy Dios y'ayuc ytiy'ajt. ²¹Ca' nminaanim paady miich ajcxy nijayiiygixy co ca' mhuinjihu'yigixy Dios ytiy'ajt. Paady nnijayiiygixy miich ajcxy jigix mnejhuuyigixyip Dios ytiy'ajt etz mnejhuuyigixyip co yi jäy ajcxy huidibi indaacp, ca' yi' ajcxy Dios ytiy'ajt miidity.

²²Yi' je' indacp huidibi minamb co Jesús ca' yi' yjéjity je Cristo huidibi Dios yquejx. Yi indacpi je'midzip'ajtp Jesucristo etz ca' mibicy Dios Teedy etz nañ ca' mibijci Dios y'ung. ²³Je jäy ajcxy huidibi indacp minam co Jesús ca' yjéjity je Cristo, e nañ ca' ajcxy miidity Dios Teedy ytiy'ajt. Yi jäy ajcxy huidibi minam co Jesús yjéjity je Cristo je Dios y'ung, nañ ymiid ajcxy Dios Teedy ytiy'ajt.

²⁴Je ayuc tiy'ajt huidibi miich ajcxy mmidou co oga'n ajcxy mmijpidacy Jesucristo, jada ayuc tiy'ajt mguydúngxixyipy e ca' mjäydigóoygixipy. Pen mmi'ijtcixp yi ayuc huidibi Dios yjäy oga'n ajcxy xyaj'ixpijc, huin'it jébi miich ajcxy myajpatcixy ma Dios y'ung etz je' jajpaady ma Dios Teedy.

²⁵Dios ti xyajhuinhuaniyim co xyajtzinähuaanim ajt n'alma huinixii huinitempo.

²⁶Jada tiy'ajt ajcxy nyajnijayiyb jigix ca' mmijpidáaccixipy yi' ajcxy y'ayuc huidibi xyajhuinma'nydigoyaam ajcxy.

²⁷Yi Dios yjihui'n ymic'ajt huidibi ti xy'adigiigixy ti xyjottigiigixy

ijttiib yi' ma miich ajcxy mjot mhuinma'n. Paady ycixp ca' myajmayjajtcixy pin xyaj'ixpigip ajcxy com je Espíritu Santo xyaj'ixpigip ajcxy. Je Espíritu Santo xyajni'ixiydaayb ajcxy tüg'óciy Dios ytiy'ajt, tiydudägy yi', ca' yi' y'aniijity. E jadu'n nej je' xyajni'ixiiygixy, jadu'n mguydunipy ajcxy. Mi'ijtcix Dios yjihui'n ymic'ajt ma mjot mhuinma'n ajcxy.

²⁸Miich ajcxy migügtijc, mi'idipy ajcxy Jesucristo ytiy'ajt ma mjot mhuinma'n jigix co ñayajniguëxigiiyb Jesucristo ya naaxhuiñ jadüg'oc, huin'it jotcujc ajt nnayjihuiyim etz ni ca' jibic nayjihuiyim co anajty xyñimiinim. ²⁹Ti mnejhuuyigixy co yi Jesucristo tiydudägy ytuñ, e ti mnejhuuyigixy nañ jadu'n co tüg'óciy yi jäy huidibi tiydudägy tumb, yi' je' ajcxy Dios y'ung'ajtip.

Dios iich ajt xy'ung'ajtim

3 Jihui'nybijccix tüg'óciy je mijpi may'ajt Dios Teedy ti tuñ miid iich'ajt ycixpi jigix jébi naydijim Dios y'ung. Yi naaxhuiñjäy ajcxy huidibi ca' mijpidaaccixy Jesucristo ca' ajcxy nejhuuyigixy huinjihuuyigixy Jesucristo ytiy'ajt, paady ycixp ca' ajcxy nejhuuy huinjihuuy co Dios xy'ung'ajtim. ²Miich ajcxy migügtijc huidibi ooy ndzocy njihuuyich, jadachambi Dios iich ajt xy'ung'ajtim. Jadachambi ca'p y'ocniguëxigyñi nej iich ajt jiini n'idaanim. Co anajty Jesucristo ymiin jadüg'oc ya naaxhuiñ, huin'it nguipxyjatyyim miid je', com n'ixaanim ajt Jesucristo jadu'n

nej je' yajpaady. ³Tüg'óciy jäy ajcxy huidibi jįp'įjxp co Jesucristo ymiina'n jadüg'oc ya naaxhuiñ, copicy yajhuädziy ajcxy yjot yhuinma'n. Huen mi'įjtcixy oyjot oyhuinma'n jadu'n nej Jesucristo mi'lity oyjot oyhuinma'n.

⁴Tüg'óciy jäy ajcxy huidibi pocyumb, hue' ajcxy ymidundigooyb Dios ycötujcin. Co ajcxy ytundigoy, ca' ajcxy ymadägy nej cuydunipy Dios ycötujcin. ⁵E mnejhuiyb miich ajcxy co yi Jesucristo ti ñayguëxigyii ya naaxhuiñ jigix jëbi xyajpocynñhuaatzim. Jesucristo ca' anajty ti pocy miidity, ca' anajty ma ti ytundigoy. ⁶Tüg'óciy jäy ajcxy huidibi cuydundähuam Jesucristo ytiy'ajt, ca' huaad pocytuñ. Yi jäy ajcxy huidijaty pocytundiib, ca'ni icy ajcxy yi Jesucristo, nañ ca'ni ajcxy huinjihuiyi yi' ytiy'ajt. ⁷Miich ajcxy migügtjic huidibi ooy ndzocy njihuiyich jadu'n nej ngi'm'ung ngi'm'anäcich, ix ni pin xychahuin'ingix. Yi jäy ajcxy huidibi oyjot oyhuinma'n yajtumb, tiydudägy yi' ajcxy chinäy yjugy'ajty, tim jadu'n nej Jesucristo tiydudägy chinay yjugy'ajty. ⁸Yi jäy ajcxy huidibi tzachpocytundiibni, yi' ajcxy mujcu' yjäy'ajtíp. Com jadu'n nej chondacy je naaxhuiñybi oga'n yi mujcu' jëni anajty jadu'n chachpocytuñ. Paady ycixp Dios quejxy y'ung ya naaxhuiñ co je mujcu' yhuinma'n yajcödígoyaañi.

⁹Yi jäy huidibi Dios ajcxy ti ymöyii jemybi jot jemybi huinma'n, ca' ajcxy ypocytundiyy com je'co tú'ciy ajcxy yjot yhuinma'n miidity, jadu'n nej anajty Jesucristo yjot

yhuinma'n miidity, ca' huaad ajcxy ypocytundiyy com Dios ti ymöyii ajcxy jemybi jot jemybi huinma'n. ¹⁰Paady ycixp yñiguëxigy yi jäy ajcxy pinjaty Dios y'ung'ajtíp etz pinjaty mujcu' ung'ajtíp. Yi huidibi ajcxy ca' tiydudägy cuydungixy Dios ytiy'ajt etz ca' ajcxy ixa'n ymigügtjic, etz ca' ajcxy tzocy jihuüy ymigügtjic, hue' ca' ajcxy Dios ymöyii jemybi jot jemybi huinma'n, mujcu' ajcxy y'ung'ajtíp.

Naychojcin nayjihuiyim miñ xyipy

¹¹Jada je' je ayuc tiy'ajt huidibi miich ajcxy ti mmidoogixy co oga'n ajcxy mmįpıdacy Jesucristo co copicy naychojcin nayjihuiyim nidüg nidüg. ¹²Ca' huaad jadu'n n'ıdiıtzim nej Caın y'ıdiıch co anajty mujcu' huinma'n miidity, chi y'uch yaj'o'cy. ¿ Nej co y'uch yaj'o'cy? Je' co anajty je' jıbic-huinma'n yajtuñ, e je' y'uch oyhuinma'n anajty yajtumyby paady ycixp je y'uch yaj'o'cy.

¹³Miich ajcxy migügtjic, ca' ooy mdzachhuinmaay ajcxy co ca' yi naaxhuiñyjäy ajcxy xy'ıxa'n, huidibi ajcxy ca' Dios y'ayuc mįpıdaaci. ¹⁴Com iich ajt nnejhuiyim co je nmigügtjic ajcxy ndzojcin njihuiyim co n'o'cim, huin'it njugypıgaanim e ndzinähaanim jıiby tzajpjoty huinixii huinitiempo. Yi jäy ajcxy pinjaty ca' ymigügtjic ixa'n ajcxy co ajcxy y'ögıpy, huin'it ca' ajcxy chinähua'n jıiby tzajpjoty. ¹⁵Huenpinjäyity huidibi ca' ymigüg ixa'n, nipatpy nej ytundigoy jadu'n nej jäyyaj'o'cpi ytundigoy e nañ jadu'n nejhuiyim, co je' y'ögıpy, ca' chinähua'n

jiiby tzajpjoty. ¹⁶Ya ixypiy jēbi iich ajt iixpejt nbijcim nej huaad migügtijc ndzojcm njihuiiyim, jadu'n nej Jesucristo iixpejt yejcy co ñayyojxi ñaydooci co y'o'cy miid iich ajt nbocy ycixpi. Paady ycixp iich ajt jēbi huaad ndzojcm njihuiiyim nmigügtijc, oy jada ndimco'ögiiyim. ¹⁷Janch pinjaty yjamiid ymadaacin, e yja'ixpy co ymigüg tigati yajmayjaty, e amij agix ñayjihuiiyii, ca' pa'ayo'n miidity, ca' pubeda'n ymigüg, ca' je' anajty tzocy jihuiy ymigüg jadu'n nej Dios chogyii yjihuiiyii. ¹⁸Miich ajcxy migügtijc huidibi ooy ndzocy njihuiyich jadu'n nej ixypiy ngi'm'ungich, miid oyjäy'ajtin etz miid Dios ytiy'ajt tzoc yajxon naychojcm nayjihuiiyim miñ xyipy. Ca' nminaanim nigoo ngapxim nmiydaacim ahuac aguuy.

**Cixyjot huinjot
naybidaacim ma Dios**

¹⁹Co nyajtuunim oyjäy'ajtin miid iich ajt nmigügtijc, huin'it nejhuiiyim co Dios ytiy'ajt nguyduunim e jotcujc nayjihuiiyim co Dios n'ojadajtim. ²⁰Co jibic njot nhuinma'n ajt njihuiiyim, miid co ca' oyjäy'ajtin nduunim, jac nigü Dios jibic ñayjihuiiyii com yi' jacmijhuinma'n miid, ca'ydi iich ajt, e yi' nejhuiydaayb tüg'óciy tijaty ajt nduunim. ²¹Miich ajcxy migügtijc huidibi ooy ndzocy njihuiyich, co ca' ti jibicpi njihuiiyim ma ajt njot nhuinma'n miid co oybi nduunim, huin'it jotcujc ajt n'ijtim miid Dios. ²²E huentimtiijity huidibi iich ajt Dios nayjamibijctzoohuim, yi' xymooyim

miid co yi' y'ayuc nguyduunim, e nduunim je huidibi yi' yjäygidacpy. ²³Dios jada ti xyajnajtz'ane'miiyim co tzoc mibijcim mijpidaacim yi' y'ung Jesús etz tzoc naychojcm nayjihuiiyim miñ xyipy, jadu'n yi' ti xyajnajtz'ane'miiyim. ²⁴Yi jäy ajcxy pinjaty cuydumb Dios ytiy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuiiyim co Jesucristo ytiy'ajt yajpaady ma iich ajt miid co je Dios yjihui'n ymic'ajt ti xy'adigiyyim xyjottigiyyim.

**Dios yjihui'n ymic'ajt etz
je ca'oybi yjihui'n**

4 Miich ajcxy migügtijc huidibi ooy ndzocy njihuiyich, ca' ajcxy mmibijctähuipy tüg'óciy jäy huidibi Dios y'ayuc capxhuäcxip. Mido'mbijccixy jayijp peni janch ajcxy miidity Dios yjihui'n ymic'ajt. Com ji mayjäy ya naaxhuiñ huidibi minam co Dios y'ayuccapxhuäcxii yi' ajcxy e ca' yjanchity. ²Jada je' je tiy'ajt ma huaad mjihui'ñybijccixy pen janch miidity ajcxy Dios yjihui'n ymic'ajt, yi' ajcxy huidibi Dios y'ayuccapxhuäcxip: tüg'óciy jäy huidibi capxhuäcxp co Jesucristo yma'xung'ajty ya naaxhuiñ miid ñinicx, Dios yi' ytiy'ajt ymiid. ³E tüg'óciy jäy ajcxy huidibi ca' ñigapxpety ajcxy co Jesucristo chinäy ya naaxhuiñ miid ñinicx, ca' yi' Dios ytiy'ajt miidity. Ti miich ajcxy ayuc midoogixy oga'n co miinaam yi' naaxhuiñyjäy ajcxy miid je mujcu' yjihui'n ymic'ajt, huidibi midzip'ajtp Jesucristo. E ti je'du'n ajcxy ymiingixy. Jada je'du'n

ajcxy huidibi ca' nġapxpejtcixy co Jesucristo yma'xung'ajty ya naaxhuiñ miid nġnġcx.

⁴Mġgŭgtjġc huidibi Dios yjihui'ñ ymic'ajt ti xy'adġġġygixy ti xyjottġġġygixy, e ti miich ajcxy mmġmadaaccixy yi huidibi ajcxy nġapxpejtp co Jesucristo ca' ma'xung'ajty ya naaxhuiñ miid nġnġcx. Com Dios huidibi miich ajcxy xy'ane'mb, jac mġj yi' ca'ydi je mujcu', paady miich ajcxy ti mmġmadaaccixy je mujcu'. ⁵Je huidi ajcxy jadu'n jamġnaamb co Dios y'ayuc capxhuäcxġ e ca' yjanchġty ya naaxhuiñ ajcxy tiy'ajt ti patcixy ma je mujcu', paady ycixp yi naaxhuiñ yhuġjy'ajtġn ajcxy tzachcapxhuäcx, e yi naaxhuiñjyäy tzachmġjpidaacixy etz amidoo'ġjti ajcxy y'ayuc. ⁶ġġch ajt tiy'ajt ti nbaatġm ma Dios. Tŭg'öciy jġy ajcxy huidibi Dios ytiy'ajt huġnjhuiġyġp, y'amidoo'ġjtyp ajcxy ġġch ajt n'ayuc. Yi jġy ajcxy huidibi ca' Dios ytiy'ajt mġidġty, ca' ajcxy amidoo'ġjtcixy ġġch ajt n'ayuc, paady ycixp n'ġjxcajpġm je jġy ajcxy huidibi tudägyġp, etz je jġy ajcxy huidibi nġgoo tzach'anġdaacp.

Dios ooy xychojġim xyjihuiġyim

⁷Miich ajcxy mġgŭgtjġc huidibi ooy ndzocy njġhuiġyġch, tzoc oy yajxon naychojġim nayjihuiġyim mġñ xyġpy. Dios ti yecy ymic'ajt ma ajt njot nhuġnma'ñ jġgġx jġbi ajt naychojġim nayjihuiġyim mġñ xyġpy. Tŭg'öciy jġy huidibi ymġgŭgtjġc chojġcixyp yjihuiġygixyp, ti Dios yjihui'ñ y'adġġġygixy yjottġġġygixy etz nġjhuiġyġp yhuġnjhuiġyġp ajcxy Dios y'ayuc

ytiy'ajt. ⁸Pinjaty ca' ymġgŭg tzocy jġhuġy, ca' yi' nġjhuiġy huġnjhuiġy Dios ytiy'ajt, com Dios tŭg'öciy yi' tzojctäy. ⁹Jada je'je tiy'ajt co Dios ajt xychojġtaayim co je y'ung huidibi tŭgpajġpġ ymġd, quejxy ya naaxhuiñ jġgġx ġġch ajt nbaatġm Dios yjihui'ñ ymic'ajt mġd yi' ycixpġ. E Dios yjihui'ñ ymic'ajt ca' ycġxa'ñ ytġgoya'ñ nimġna, paady ġġch ajt njugy'ajtġn ca' ycġxa'ñ ytġgoya'ñ. ¹⁰Dios ti xychojġim ti xyjihuiġyim, paady quejxy y'ung ya naaxhuiñ jġgġx jġbi xycodġnaayim ma yi Dios ycötuġctac mġd ġġch ajt nbocy ycixpġ. Ca' nmġnaanġm mġd co Dios ti ndzachmġjpidaacim ooy mġjcajee, hue' janchġty yi' ninġgoob may'ajt tuñ mġd ġġch ajt ycixpġ.

¹¹Miich ajcxy mġgŭgtjġc huidibi ooy ndzocy njġhuiġyġch, mġd co Dios jadu'n ajt ti xychojġim ti xyjihuiġyim mġjcajee oga'n, paady ycixp tzoc ġġch ajt naychojġim nayjihuiġyim mġñ xyġpy. ¹²Ni mġnaabi pġn ca' ġxyñġ Dios. Co naychojġim nayjihuiġyim mġñ xyġpy, huġn'it Dios yjihui'ñ ymic'ajt ġjttġy ma ġġch ajt njot nhuġnma'ñ. Jadu'n Dios yjihui'ñ ymic'ajt xypubejġim xypudġġġyim, jġbi nġġi naychojġim nayjihuiġyim nidŭg nidŭg jadu'n neġ Dios jġyġdägy. ¹³Nġjhuiġyim ġġch ajt co nyajpatġm ma Dios, e nañ jadu'n Dios yajpaady ma ġġch ajt, mġd co yi' yjihui'ñ ymic'ajt ti xy'adġġġyim ti xyjottġġġyim. ¹⁴E ġġch ajcxy, ti ġġch ajcxy yi Jesucristo n'ġxyġch, paady ġġch ajcxy nidġy'ajt'ajtyġch co je Dios Teedy quejxy y'ung ya naaxhuiñ co yajnġdzöga'ñ tŭg'öciy naaxhuiñjyäy co anajty Dios nbocy ajt xyajcomġdoohuanġm.

¹⁵Tüg'óciy jäy huidibi nigapxp co Jesús je' yi' Dios y'ung, Dios yajpatp ma ya' e nañ yi' yajpatp ma Dios.

¹⁶Ich ajt nnejhuiyim etz nmijpidaacim jadu'n nej Dios ajt xychojcim xyjihuiyim nidüg'óciy. Dios chojctaayb yi' nidüg'óciy yi jäy. Pinjaty tzojccixp jihuiyigixp ymügügtijc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷Miid co yajxon nmijpidaacim Dios paady jotcujc nnaxaanim ma Dios ycötujctac, mïna anajty xyajcomidouhuim ajt nbocy. Com tú'ciy ich ajt nyajpaatim ya naaxhuiñ, tim jadu'n nej yi' Jesucristo. ¹⁸Co nmijpidaacim Dios, huin'it ca' ajt nmidzigiiyim nmidzo'yduunim. Peni yajxon nmijpidaacim Dios, huin'it jëbi tzig'iñ nyajqueecim. Yi jäy ajcxy huidibi tzig'iyb etz tzo'ydum, ca' ajcxy Dios mijpidägy yajxon.

¹⁹Com Dios jayijp ti xychojcim ti xyjihuiyim, paady ycixp tzoc ajt naychojcim nayjihuiyim nidüg nidüg etz nañ nmijpidaacim Dios. ²⁰Yi jäy ajcxy pinjaty jadu'n minamb co mijpidaaccixy Dios, e ca' ymügüg tzogaangixy ixaangixy, hue' je' ajcxy aniidaacp. Com peni ca' jajtciyx nej tzójccixipy jihuihuigixipy yi ymügügtijc huidibi ajcxy ix'yajtpy, ca' ajcxy jadip nej mijpidaaccixipy Dios huidibi ca' ix'y'ajtigixy. ²¹E Dios ich ajt xyñajtz'ane'miiyim co pin Dios mibijcp mijpidacp, huen nañ jadu'n ymügügtijc tzocy jihuiy.

Yi pin huidibi ca' ixa'ñ midohua'ñ Cristo y'ayuc

5 Tüg'óciy jäy huidibi mibijccixp co Jesús je' je'

je Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jäy huidibi mibijccixp mijpidaaccixp Dios Teedy, nañ jadu'n huen tzojccixy yjihuiyigixy je' ajcxy huidibi Dios y'ung'ajtip. ²Co ndzojcim njihuiyim huidibi Dios y'ung'ajtip, je' jada je' je' ixpejt co nañ jadu'n jëbi nmijpidaacim Dios etz jëbi nguyduunim nej xyñajtz'ane'miiyim. ³Co nmijpidaacim Dios, huin'it nguyduunim jadu'n nej Dios xyñajtz'ane'miiyim e yi' y'ayuc ca' ooy chipity co nguyduunim. ⁴Com tüg'óciy yi jäy ajcxy huidibi Dios ti y'adigiyii ti yjottigiyii yjihui'ñ ymic'ajt, ymihuindinaayb ajcxy yi jibic-huinma'ñ ya naaxhuiñ. Co nmibijcim Dios, huin'it jëbi mihuindinaayim yi jibic-huinma'ñ ya naaxhuiñ. ⁵Yi jäy ajcxy pinjaty mibijcp co Jesús Dios je' y'ung, yi' ajcxy mihuindinaayb yi jibic huinma'ñ ya naaxhuiñ.

**Je ayuc huidibi nidiy'ajt
yi Dios y'ung**

⁶Yi Jesucristo je' je' huidibi miin ya naaxhuiñ, je' je' huidibi niibejt etz ñi'py teemy guj co y'o'cy miid jäy ajcxy ypocy ycixpi. Ca' nminaanim jëyi anajty ti niibety, hue' nañ jadu'n ti y'ögy miid ajt nbocy ycixpi. ⁷E yi Espiritu Santo yi' tiy'ajt yejcp co Dios Jesús y'ung'adyii, com je Espiritu Santo yi' Dios ytiy'ajt ymiid. ⁸Ji tugignax huidibi tiy'ajt yejcp co Dios Jesús y'ung'adyii: je Espiritu Santo, je niibejtin, etz Jesús ñi'py co teemy cujy miid ich ajt nbocy ycixpi. E jadu'n nidugiig ñaybaatigixy tügnax, e tügnax ytiy'ajt yejccixy.

⁹Mijpidaacim iich ajt jäy y'ayuc co Dios Jesús y'ung'adyii, nigi copicy co nmijpidaacim Dios ytiy'ajt huidibi ti yecy miid y'ung ycixpi, com jac mic'ajt miid yi' ca'lydi jäy ajcxy.

¹⁰Yi jäy huidibi mijpidaaccixp Dios y'ung, ymi'ijtpy ajcxy je tiy'ajt ma yjot yhuinma'n. Yi jäy ajcxy huidibi ca' mibijccixy mijpidaaccixy je Dios y'ayuc ytiy'ajt, hue' ajcxy yajnaxcixy Dios nej aniidägyin co ca' mibijccixy yi Dios ytiy'ajt co y'ung nigapxy.

¹¹Jada je' tiy'ajt co Dios ti xymooyim ajt n'alma yjugy'ajtin huidibi ca' ycixipy ytigoyipy nimina. Dios y'ung ca' y'alma ycixipy ytigoyipy nimina, paady yi' ti yaj'oyiy nej jëbi ajt n'alma y'ijtim huinixii huinitiempo.

¹²Pinjaty ti mijpidaaccixy Dios y'ung, yi' ajcxy y'alma ca' ycixipy ytigoyipy nimina. Pinjaty ca' mijpidägy Dios y'ung, yi' ajcxy y'alma cixipy ytigoyipy co y'ögipy.

Capxycijxin etz capxhuijin

¹³Jadayaabi ayuc ajcxy nyajnijayiygixp ma jada necy jigix jëbi mijpidäaccixipy Dios y'ung, etz jëbi mnejhuiiygixy tiydudägy co mjugypijccixipy jadügtecy co anajty ti m'o'ccixy e ca' ajcxy m'alma ycixipy ytigoyipy.

¹⁴Jada jotcuje'ajtin iich ajt nmiid'ajtim co nmibijctzouhuim Dios jadu'n nej Jesucristo xyñajtz'ane'miyyim, yi' iich ajt jëbi xymidouhuim.

¹⁵Miid co nnejhuiiyim co yi' ajt xymidouhuim ma tijaty Dios nyajmibijctzouhuim, paady ycixp nejhuiiyim co nmiid'ajtim tijaty anajty ti nyajmibijctzou.

¹⁶Co pinjaty ixxy co ymigüg ypocytuñ huidibi huaad jëbi Dios meecxy, huen mibijctzooyi Dios miid yi' ycixpi, e Dios yajtzinähuiiyb pen ca' anajty ooy ymijpocyty je tiibi anajty tuñ. Com ji tüg mijpocy huidibi Dios ca' huinmecxy. Pen ti mijpocytuñ ca' huaad Dios ocjacmibijctzooni com ca' yi' y'oc-huinmecxaani. ¹⁷Tüg'óciy jibic-huinma'n huidibi jäy ytumyb, pocy yi', per ji jibic-huinma'n huidibi jäy ytumyb, huidi jëbi Dios huinmecxy e ca' y'alma ytigoyip.

¹⁸Nejhuiiyim co tüg'óciy pinjaty Dios ti ymöyii jemybi jot huinma'n, ca' yi' y'ocpocytuni. Yi Dios y'ung, huidibi ti ymöoyigixy jemybi jot huinma'n, cuend'ajtip yi' ajcxy, ca'lydi je mujcu' xyajhuinma'nydigóoyigixy.

¹⁹Nejhuiiyim iich ajt co Dios jadu'n xy'ane'mim njot nhuinma'n etz nejhuiiyim co tüg'óciy jacjadyii naaxhuiñyjäy huidibi ca' mijpidaaccixy Dios, je mujcu' jadu'n yjot yhuinma'n y'ane'mip ajcxy.

²⁰E nejhuiiyim co yi Dios y'ung ya y'oy naaxhuiñ e ti xyajnejhuiiyim yi' y'ayuc ytiy'ajt, jigix jëbi nejhuiiyim huinjihuiiyim yajxon je Dios janchypi tudägypí. Nmi'ijtim ma iich ajt ndzinaayin je janchypi je tudägypí je Dios y'ung je Jesucristo. Jada jëdu'n je tiydudägypí Dios, etz je Dios yjugy'ajtin caminaabi ycacixy ycatigoy. ²¹Miich ajcxy migügtijc huidibi ooy ndzocy njihuñyich jadu'n nej ixxyipi ngi'm'ung ngi'm'anächich, ca' nigoo mdzachDios'ajtigixy tijaty huidibi ca' ni ti mic'ajt miidity, jadu'n nej Dios Teedy tzajpjotyipi ymic'ajt miidity.

2 SAN JUAN

Yi Mimetzpi Necy Huidibi San Juan Yajniguejx Tüg Mibijcpi Töxyjäybi

¹Hich Juan huidibi nigohuajc'ajt Dios yjäy. Nyajniguejxpich miich töxyjäy jada necy, miich Dios xyjäy'ajtp, e ti mmijpidägy Jesucristo. Nañ nyajniguejxpich jada necy tüg'óciy miich m'ung m'anäc ajcxy. Ooy ndzocy njihuüyich miich ajcxy. Ca' nmīnaanīm iich naydügpajc ndzojcy p njihuüybich miich ajcxy, nañ jadu'n tüg'óciy jäy ajcxy, huidibi huinjihuüygixp Dios ytiy'ajt, xychojccixp xyjihuiügixp ajcxy.

²Hich miich ajcxy ndzojccixp njihuüygixp com Dios ytiy'ajt yajpatp ma iich ajt njot nhuinma'n, etz y!' ijtp huinixi ma iich ajt.

³Huen Dios Teedy etz iich ajt nHuindzin Jesucristo, yi Dios y'ung oy'ajt may'ajt tuñ miid miich ajcxy, huen xypa'ayoogixy huen xyajjotcugiügixy miid co mguydungixy y!' ytiy'ajt etz mnaychójcigixy mnayjihuiügixy miñ xyipy.

⁴Ti nmīnaybadyiijich nijējity miich m'ung m'anäc, e ooy njotcugiügixy miid co tiydudägy ajcxy payöyi Dios ytiy'ajt, jadu'n nej

Dios Teedy ajt ti xyñajtz'ane'miüyim.

⁵Cham njacnīmāyich miich ajcxy co jēbi ajcxy mnaychójcigixy mnayjihuiügixy miñ xyipy. Ca' nmīnaanīm huinjemy jada tiy'ajt huidibi cham nyajnijayüygixipy. Je' jada je ayuc huidibi oga'n'aty ti nbaatim co ti nmibijcim Jesucristo. ⁶Co ndzojcm njihuüyim nmigügtijc, jada je' tiy'ajt co nguyduunim nej Dios ajt ti xyajnajtz'ane'miüyim. Jada huidibi Dios ti xyajnajtz'ane'miüyim huidibi miich ajcxy ti mbaatcixy, co oga'n ti mmibijccixy Jesucristo, copicy co ajcxy mnaychójcigixipy mnayjihuiügixipy.

Yi jäy ajcxy huidibi aniidaaccixp

⁷Com ji mayjäy ya naaxhuiñ huidibi huin'iimb yi jäy ajcxy. Yi' ajcxy ti puhuäctüdy mibijcpidijc, yaj'ixpājcp ajcxy co Jesucristo ca' ñayguëxici ya naaxhuiñ miid ñinicx. Jadayaabi jäy ajcxy yhuin'iimyb yhuēñypinity etz Jesucristo ymidzip'ajtyp ajcxy.

⁸Naygüendi'ajtigix ci'm. Ix mgamijpidaaccixy yi' ajcxy y'ayuc.

Co ajcxy myajhuin'íngixipy, huin'it anajty myajtigooygixy je oy'ajt huidibi mbadaangixyp ma Cristo. Co mguydúngxixipy Jesucristo ytiy'ajt, huin'it mbáatcixipy tüg oy'ajt ca'pxypi jibzy tzajpjoty.

⁹Tüg'óciy jäy huidibi ca' cuydungixy je Jesucristo y'ayuc ytiy'ajt, ca' ajcxy miidity Dios ytiy'ajt ma ajcxy yjot yhuinma'ñ. Je jäy ajcxy huidibi cuydundiib je Cristo y'ayuc ytiy'ajt, ymiid ajcxy Dios Teedy etz je y'ung ytiy'ajt ma ajcxy yjot yhuinma'ñ.

¹⁰Peni ji pinjaty ñicxy ma miich ajcxy huidibi yaj'ixpijcp huidibi ca ytiy'ajtity, ca' ajcxy mgöbiguipy ma mdijcin, e ni ca' ajcxy mjijp'ixihuipy. ¹¹Com Dios yjäy pinjaty anajty jijp'ixiyyb je

jäy ajcxy huidibi yaj'ixpijc huidibi ca' ytiy'ajtity, hue' je' tundigooyb ma Dios ytiy'ajt. Hue' je' anajty paady jadu'n nej jihuiy ti jijptigiyyñi ajcxy je huingbi xpijcin huidibi ca' ytiy'ajtity.

Capxycíjxin

¹²Oy iich ooy mij may miich ajcxy njamiidmiydägaangixy per ca' miich ajcxy jadu'n nijay'ihuaangixy necy'am. Hue' janchtiy njijp'ixyich co ci'm nninicxaangixy jim, e nmiid miydägaangixy au'am jigix ajcxy ooy jotcuje mnayjihuiyigixipy.

¹³Je mdzi' y'ung ajcxy huidibi ya yajpatcixp xyajniguejxp ycapxpocxin, je huidi ajcxy Dios nañ jadu'n ti yhuin'íjxigixy. Jadu'n ngapxycíxyich miid miich. Amén.

3 SAN JUAN

Yi Necy Huidibi San Juan Yajniguejx Gayo

¹ Señor Gayo:

Nguejxypich capxocxin ma miich. Hch miich nyajniguejxyp jada necy. Nnigohuajc'ajtypich ma je mibijcpidijc. Ooy ndzocy njihuüyich miich.

² Miich migüg, ooy nmigüg'adyii. Dios nmibijctzooybich miid miich ycixpi, huen agujc jotcujc mdzinähuipy etz mmic'idipy m'oy'idipy. Nejhuüyich co oy m'ity ma Dios. ³ Com oy ti njotcugüyich co je mibijcpidijc ajcxy ymiin ya huidibi jim tzoon ma miich ajcxy, e yi' ajcxy xytiy'ajtmooyich jadu'n nej tiydudägy mdzinäy e nañ jadu'n nej yajxon mguyduni Dios ytiy'ajt. ⁴ Ooy njotcújcidyich jac nigü co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵ Miich migüg huidibi ooy ndzocy njihuüyich, ooy njäygidägyich co oyjäy'ajtin mduñ miid je migügtijc. Nigi oy co oyjäy'ajtin mduñ miid je migügtijc huidibi ca' m'ixy'adyii. ⁶ Yi mibijcpidijc, huidibi ti choon ma miich ajcxy, ti tiy'ajt yejccixy ma je mibijcpidijc ya jadu'n nej miich oyjäy'ajtin mdzachtuñ. Ooy oy mduñ co mmöy yi migügtijc yi

ytü'amgixpi e mguejxnaxy yajxon jadu'n nej Dios jäygidägy. ⁷ Yi jadu'mbi jäy huidibi mguejxnajxyp anajty hue' Dios y'ayuc ycixpi yhuidity, e ca' yi' ajcxy ti pijctzoy ma je jäy ajcxy huidibi ca' Dios ytiy'ajt nejhuüiyi. ⁸ Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuiditycixy. Co jadu'n nbubejtim, chi jadu'n paady nej jihuüy tú'ciy nduunim miid yi' ajcxy ma Dios y'ayuc capxhuäcxii.

Je Diótrufes yjibic-huinmañ

⁹ Ti nnijayüyich jayhuin je mibijcpidijc huidibi nayoymújcgixp jim. Jim yajpaady tüg jäy huidi xii Diótrufes huidibi ca' cöbigañich n'ayucich etz ngötújcínich. Amij agix jada jäy chachñayjihuüyii, yi' ci'm tzach'ane'mam ma miich ajcxy. ¹⁰ Paady ycixp co nnäcxibich jim ma miich ajcxy nyajnimähuamy ajcxy tüg'ócüy yi jibic-huinmañ huidibi Diótrufes ytumy, jadu'n nej jibic xyñigapxy xyñi'ojüyich etz jadu'n nej anii yaj'ixpicy. E nañ ni yi' ca' mmiidity jotcujc'ajtin jadu'n nej

chach'idich. Nigi ytundigoy co ca' yajjättäga'n ajt nmigügtijc huídibi Dios miid ycixpi yhuídity. E co iich ajt nmigüg pinjaty yajjättäga'n, chi yi' capx'aducy e yajpidzimy je mibijcp huídibi jäy yajjättäc, e ca' je' cöbäga'n ma miich mnayyöymujctac.

¹¹Miich hermano, huídibi ooy ndzocy njihuüyich, ca' mguydunipy jada jibic-huinma'n. Cuydun janchtiy yi oybi huinma'n. Yi jäy ajcxy huídibi oybi tungixp, yi' ajcxy ymiid Dios ytiy'ajt ma yjot yhuinma'n. Yi jäy ajcxy huídibi jibic tungixp, ca' yi' ajcxy Dios ytiy'ajt nejhuüiyi.

Je Demetrio tüg y'ijxpejt oybi

¹²Yi jäy, huídibi yxii Demetrio, tüg'óciy jäy ajcxy ymínaangixy co ooy y'oyjäyity, e janch yajpaady

ma Dios ytiy'ajt. Hich nañ jadu'n nmína'nich co ooy y'oyjäyity yi Demetrio, e miich mnejhuüiyb co iich ajt ndiy'ajt janch janch yi'.

Capxycíjxin

¹³Ooy iich anajty miich mijcajee ayuc njayajmiidmiydäga'n. Per ca' nijayihua'n necy'am.

¹⁴Hue' janchtiy njijp'ixyich co nnicxa'nich tzojc ma miich ajcxy, e nmíidmiydäga'nich miich ajcxy ci'm.

¹⁵Jotcujc'ájtci. Yi mibijcpidijc ajcxy huídibi ya yajpatp yajnajxpy ajcxy capxpocxin ma miich ajcxy. Tun may'ajt yajnájxigich ngapxpocxin ma nmigügtijcich jim nidüg nidüg etz xiibety xiibety. Cham ngapxycíxyich, Juan je Apóstol.

SAN JUDAS

Yi Necy Huidibi Judas Nijayiy Je Huidibi Dios Ti Huin'ijxigixy

¹Hich Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jëbi mibijccixy yi' y'ayuc huidibi jëbi xyajpocyñihuaatzcixy. Nijayiybich miich ajcxy tüg'óciy huidibi Jesucristo ycuend'aty ymiid.

²Huen Dios miich ajcxy mijcajee xypa'ayoogixy etz xyajjotcugiiygixy etz chojccixy xyjihuiygixy.

Yi' ajcxy huidibi yaj'ixpijcp anii

³Miich ajcxy migügtijc huidibi ooy ndzocyich njihuiyich, miid je nidzoocin ycixpi miid ajt n'alma huidibi miich ajcxy etz iich cham nmiiid'ajtm , ooy chachycopicity co nijayihuibich miich ajcxy miid yi mibijcin ajcxy ycixpi, e ngohuaniiyb ajcxy co jëbi mic m'ijtcixy ma ajcxy yi mibijcin e ca' m'ixtigihua'ccixy ma yi ayuc tiy'ajt huidibi Dios yejc ma tüg'óciy naaxhuiñyäj. ⁴Naagity jäy ajcxy ti ytiigixy ma miich ajcxy ayüch ameech miid anii. Jecy'ajty Dios tiy'ajt yejcy ma yi'

y'ayuc co yi jadu'mbi jäy tigoyam ajcxy y'alma miid ypocy ycixpi. Hue' yi' ajcxy jibic jäy huidibi ca' huindzigiiygixy Dios. Aniidaacp yi' ajcxy co yminaangixy co Dios ti xypa'ayoohuim etz ti xyhuinmeecxim ajt nbocy paady ycixpi jëbi nduunim huen tiijity huidibi nijot'ajtm. Ca' cöbijccixy je Dios huidibi nHuindzin'ajtm, etz ca' cöbijccixy iich ajt nHuindzin Jesucristo.

⁵Oy miich ajcxy ti mjanejhuiydaagixy jada tiy'ajt, per nyajjäymetzcodamy ajcxy jadu'n nej Dios jayijp yajpidzimy jecy'ajty jim Egipto je Israel jäy ajcxy, e jac'axam tzaachytuuñ miid o'cin je huidibi anajty ajcxy nijëjity ca' ymibijccixy. ⁶Je ángeles huidibi ajcxy ca' yhu!'my ma Dios ytung huidibi ajcxy capxycömidodacy Dios, y'ixmajtzay ajcxy y'it chinaydac. Dios je' cham miid'ajtp ajcxy ahuing. Mach ajcxy y'lity agoodztuuby huinixii huinitiempo ixti cooni je mij xii anajty Dios ti yajhuaad'aty, mina anajty tiydunañ naaxhuiñyäj ajcxy miid ypocy

ycixpi. ⁷Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycuudungixyp ñinix chojcin, naygiyejci ajcxy ma je jibic-huinma'ñ. Yëydijctijc ytundigooygixy miid huingbi yëydijc. Je' jadu'n hui'm iixpejt ma tüg'óciy jäy co je tzaachypi ajcxy paatcixy.

⁸Jim yajpaady ma miich ajcxy jäy huidibi nejhuiyb co Dios jecy'ajty tzaachytuñ ángeles ajcxy etz cajp jäy huidibi ajcxy tundigooy. Yi' ajcxy chinaayin jadu'n yi' nej tüg cumäy. Yajjibicxiygixy je ñinix miid pocytunii. Jijpcogapxiygixy je Dios ycotujcin, nigapxcixy ni'ojiiygixy je huidibi ajcxy Dios mooyip mij'ajtin. ⁹Je arcángel, Miguel, je ángel huidibi mij'ane'min miid, co anajty ychiptuñ miid je mujcu', yajcapxyoongixy yaj'ayucyoongixy je Moisés ñinix, ca'p je' miid'ajty huinma'ñ nicxy yajpocycäy je mujcu' miid nay'ojii. Jëyi janch co nimay: “Yi Huindzin Dios miich xy'ix'ojip.” ¹⁰Per jada jäy ajcxy jibic ooy nigapxcixy huidibi ca' nejhuiygixy. Tügiyb ajcxy yhuinma'ñ miid iyujc animal yhuinma'ñ, etz iyujc animal ca' ajcxy miidity huinma'ñ tiydudägyi. Ci'm jada jäy ajcxy ñayyajhuinma'ñdigoooyigixy, e jadu'n ajcxy y'alma yajtigoyaangixy.

¹¹Ypadamyb ajcxy tzaachypi mijcajee miid pocy ycixpi com je' yi' ajcxy ypadumyby nej Caín y'idiih. Miid co meen' tzach'adzocxixy, paady ñidigooygixy ytüdigooygixy jadu'n nej Balaam ñiidigoy

ytüdigoy jecy'ajty, e jadu'n ajcxy y'ayoogixy jadu'n nej Coré, co y'o'cy co ycacapxymidohuañ anajty co Moisés oy y'ayucjijpcogapxiyi. ¹²Yi jadu'mbi jäy tzo'ydu'n yejcp ma miich ajcxy co mgaaygixy m'uuccixy tügmucy miid yi' ajcxy, e jadu'n iixpejt yejccixy co mnaychójcigixy. Caaygixp uuccixp tügmucy miid miich ajcxy agujc jotujc per ni ca' ajcxy miidity huindzig'iñ miid ymigügtijc. Jadu'n ajcxy nipaady nej cöbixyuend'ajtpi huidibi ci'm ñaygüend'ájtigixyp, e ca' tungixy cuendi je cöbixy. Jadu'n ajcxy nej joc huidibi ca'pi nii miidity, huidibi je poj yajhuidijtip. Jadu'n ajcxy nej quipy huidibi ca' ytiim'aty mina yjapadyi, jayijp y'ocniicxy, e chi jada ytiich, e ytimypidägy miid ñidictz. ¹³Yi' ajcxy ytundigoyii ooy cho'ydu'n yecy, tim jadu'n nipaady nej je mejy y'oobigy co ypidigy. Jadu'n ajcxy nipaady nej madza' huidibi ytu' ti yajtigach. Hue' y'ijtcixy pocypa'tci'py huinixii huinitiempo, mij'agootztuuyb y'idipy ajcxy.

¹⁴⁻¹⁵Nañ jadu'n Enoc, je mihuixtucpí co anajty Adán ti yjayijp'aty, yminañ co Dios yhuinma'ñmooyi miid jada ycixpi, e yminañ: “N'ijxich je Huindzin Dios co anajty ymiin miid janch canaag mil je huidibi ajcxy tudägyity etz huätzip. Co anajty tiyduna'ñ ajcxy tüg'óciy naaxhuiñyjäy miid ypocy ycixpi, chi yajpocycähua'ñ je jibic jäydijc ajcxy jadu'n nej ajcxy ti ytundigooygixy miid yjibicjäy'ajt etz miid jibic ayuc tiibi miid nigapxcixy ni'ojiiygixy Dios.”

¹⁶Jada jibic jäydijc ca' ajcxy ni ti mijotcuje'ajtcixy, ooy nigapxcixy ni'ojiiygixy ymigügtijc. Jëyi ajcxy yci'm jotcuje'ajt ixtaaygixy. Ycapxcixy amij agix. Ooy oy nigapxcixy nijëjity jäy miid co ti oybi padaangixy ma je' ajcxy.

Judas capxhuijp je' ymigügtijc ajcxy

¹⁷Per miich ajcxy migügtijc huidibi iich ooy ndzocy, jäymejtzcix je ayuc huidibi jëcyip ti najtzcapxiygixy je Huindzin Jesucristo y'apóstones ajcxy. ¹⁸Je apóstones miich ajcxy xyñimay: “Ma anajty xii tiempo ycixaani, ji'adip jäy ajcxy huidibi nixigipy yajxigipy huidibi Dios yje'ajtpy, e chináaygixipy jadu'n nej yi' ajcxy ci'm tzachnijot'ajtcixy jibic-huinma'ñ.” ¹⁹Je' ajcxy yajnaybijc-huäcxiiib mibijcpidijc co ca' ajcxy miidity je Dios yjihui'ñ ymic'ajt.

²⁰Per miich ajcxy migügtijc huidibi ooy ndzocyich njihuüyich, ijtcix miich ajcxy tudägy ma yi mmibijcin. Jäymejtzcix mibijctzoogix Dios miid je Espiritu Santo ypubejtin. ²¹Naygüend'ájtigix jigix jëbi Dios xychojccixy xyjihuiygixy ajcxy, e ahuijxcix je xii mina anajty iich ajt nHuindzin

Jesucristo xymöhuaanim je jugy'ajtin huidibi ca' ycixipy ytigoyipy ni mina miid co ti xypa'ayoohuim.

²²Capxjotcidaaccix pinjaty ca' ti mijpidägy janchypidägy. ²³Yajmiidmiydaaccix jacjadyii migügtijc jigix ajcxy jëb paatcixy nañ jadu'n nidzoocin miid ajcxy y'alma. Jadu'n anajty paady nej jihuüy myajpidzimgixy jijnjoty. Yajtungix pa'ayo'n miid jacpinjaty pocytumbi. Naygüend'ájtigix ma yi' ajcxy ypocytunii, ca' mbocytungixy nañ jadu'n. Jadu'n yi' ajcxy ypocytunii nipaady nej huit huidibi ti yjibicci'y.

Judas capxycixy miid je' ymigügtijc

²⁴⁻²⁵Je Dios tügpajcpi, je Dios huidibi xyajnidzoocim ajt n'alma, je huidibi yajtaayb ñejhuüydaayb, ymiid je' mic'ajt etz cötujcin jëbi miich ajcxy xycuend'adipy jigix ca' mbocycägixipy, etz je' ymiid mic'ajt jigix jëbi xyajja'tcixy agujc jotcuje ma Dios yhuinduu, ma yi' yajpaady miid y'oy'ajtin ymij'ajtin ca' ti mbocymiidity ajcxy. Yi' paatip je oy'ajtin etz mij'ajtin etz mic'ajt etz cötujcin miid nHuindzin Jesucristo ycixpi, tiüyip etz cham etz huinixii. Amén. Jadu'n ngapxycixyich.

EL APOCALIPSIS

O Je Huidibi Dios Yajhuin'ijx San Juan

1 Jayhui'my ity ma jada necy je Jesucristo y'ayuc ytiy'ajt huidibi ca' pin nejhuüy huinjihuüy jecy'ajty. Dios moy Jesucristo jada tiy'ajt jigix yajni'ixiydähuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt miid tüg ángel ma Juan. E je ángel yajhuin'ijxy Juan jada y'ayuc etz ijxpejt. ²E Juan yejcy tiy'ajt janchypí tüg'óciy jadu'n nej anajty ti huin'ixy ti huinmidoy. E Juan ñidiy'ajt'ajtpy jada Dios y'ayuc etz nañ jadu'n nidiy'ajt'aty je ayuc tiy'ajt huidibi Jesucristo yajnejhuüiyi.

³Janch jotucj je' pinjaty capxp jada necy etz pinjaty mido'mbñijc jada Dios y'ayuc huidibi Juan nidiy'ajtpy etz ñajtzcapxiyb. E jotucj je' pinjaty cuydumb tüg'óciy huidibi jaybety ma jada necy, com je xii je tiempo huingooniñ je' mina ytuna'ñyii yjada'ñyii.

Juan nijayiiy huixtujc'itpi mibijcpidijc

⁴Hich Juan nijayiiybich yam je mibijcpidijc huixtujcpicypi huidibi

yajpatp jim Asia naaxjot. Huen Dios etz je huixtujcpi espíritu huidibi yajpatp ma je' y'ane'mdac may'ajt oy'ajt tunipy miid miich ajcxy etz xymóoygixipy jotucj'ajtin. Dios je' huidibi cham ijtp, je huidibi jecy'ajty ijtp, etz je huidibi miinaamb. ⁵Huen Jesucristo may'ajt oy'ajt tunipy miid miich ajcxy etz xymóoygixipy jotucj'ajtin. Jesucristo je huidibi tiydudägy Dios ytiy'ajt yejci, je jayijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'öccixy. Jesucristo nigohuajc'ajtp etz ane'my tüg'óciy reydiyc huidibi ane'mb ya naaxhuiñ. Je Cristo, huidibi xychojcm xyjihuiiyim, ti xyñihuaanim miid ñi'py ma je tzaachypí huidibi mihuaad'ajtim miid ajt nbocy ycixpi. ⁶Jesucristo ti xycötujcmooyim etz ti xytungmooyim miid Dios Teedy, huidi yi' yteedy'ajtpy. Jadu'n iich ajcxy ndung etz ngötujcin nipaady nej je tung etz cötujcin huidibi reydiyc etz teedytjyc ajcxy ymiid. Huen Jesucristo y'idipy cómay huinixii huinitiempo etz huen yi'

y'ane'min cōtujcın y'idipy huinixii huinĩtiempo. Jadu'n jada. Amén.

⁷Cuendtungix iich n'ayuc, iCristo miinaamb jocjoty e tũg'óciy je mayjāy y'ixa'ñyii! E y'ixamyb je' ajcxy huidijaty Cristo yaj'ayoo yajtzaachypijc. Tũg'óciy naaxhuiñyāy yjihuñhua'ñ yāxa'ñ ytaja'ñ ymaya'ñ miid je'ycixpi. Jadu'n jada. Amén.

⁸Jadu'n je mijpi Dios huidibi tũg'óciy mic'ajt miid ymīna'ñ: —iich je' huidibi yajtzondacp je naaxhuiñybi, je tzajp etz je huidibi jaccogixiīyb. Jadu'n iich nej letra A huidibi yajzondacp je alfabeto etz je letra Z huidibi cogixiīyb ma je alfabeto. iich je' huidibi cham'ijtp, etz huidibi jecy'ajtyp ijt etz huidibi miinaamb.

Juan ijxy yi Cristo oybi ymijity

⁹iich Juan, miich ajcxy mmigũg, quipxyi miid miich ajcxy nminaxy nyajnaxyich ayo'n tzaachypi. Quipxyi miid miich ajcxy ndzināyich ma Dios y'ane'my. Etz quipxyi miid miich ajcxy nyajtuñich je mecxtujcın ma ndzinaayin huidibi Jesucristo ti xymooyim. Jim iich anajty mach n'ityich ma je naax huidibi mejy agujc, huidibi xii Patmos, miid Dios y'ayuc ytiy'ajt ycixpi, je ayuc tiy'ajt huidibi Jesucristo xyajnejhuiiyim. ¹⁰Jadu'n tũgtecy ti njatyich, hue' anajty tũg domingo xii co iich Dios n'ojadajtyich, e Dios yjihuñ ymic'ajt ti anajty xymimadactayich njot nhuinma'ñich. Chi nmidooyich jixci'py'amy tũg huidibi mic capx, jadu'n yi' ycapxin nmidooyich nej tũg trompeta yxũy. ¹¹Chi

je huidibi xymigapxpich anajty ymīnañ:

—iich je' huidibi yajtzondacp etz je huidibi yajcogixiīyb tũg'óciy tijaty ya naaxhuiñybi etz tzajpjoty. Jadu'n iich nej je letra A huidibi yajtzondacp je alfabeto etz je letra Z huidibi yajcogixiīyb je alfabeto. Cojaay miich ma tũg libro huidibi mhuiñ'ijxyp, e quex je necy jim Asia naaxjot ma je huixtujc picypī mibijcpidijc ma je huixtujcpi cajp: Efeso, Esmirna, Pérgamo, Teatira, Sardis, Filadelfia etz Laodicea.

¹²Chi n'ijxhuimbityich n'ixa'ñich pin iich anajty xymigapxpich. Co nnayji'ijxich, huin'it nhuin'ijxyich huixtujc candelero ac tim oori. ¹³E cujc'amy ma je huixtujc candelero nhuin'ijxyich tim jadu'n nej je jāy huidibi tzoon tzajpjoty (je Cristo), yxoxyity miid tũg huit yjādy anajty mabaad ytecy, e yhuññity ma ycaach miid tũg oorihuñ. ¹⁴Yi' ycohuajc etz ycōhuay janch poob, jadu'n nej lana huidibi janch poob, jadu'n nej nieve ypoobity, e je yhuñ jadu'n nej jĩnye'n. ¹⁵Je' ytecy tim jadu'n nej latón huidibi janch oy, nej jihuñ jĩnjoty ornojoty yam ypidzimy. E je ymiydaacin janch mic, tim jadu'n nej canaag mijñi y'a'iich y'agimimy. ¹⁶E ymiid anajty ma a'oygi' huixtujc madza'. E ypidzimy ma y'ahuac tũg espada mejtz'adu'm'amy yjijpity. E yhuñyijp jadu'n anajty nej xii janch mic y'añ.

¹⁷Co je' nhuin'ijxyich, chi janch ögy oy ngidāgyich ma ytecy ymijc, chi xycinixajyich miid y'a'oygi', chi xyñimaayich:

—Ca' mdzigy; iich je' huidibi jayijp'ajtp ya naaxhuiñ etz

tzajpjoty etz iich je' je huidibi cogixihuamb. ¹⁸Jugy'ajtpich; ti n'ögyich, e ti njugypicyich jadüg'oc, e jugy'adipich huinixi huinítiempo. Nmíidich mic'ajt jigix ane'mibich yi o'cin etz je it ma je öcpi ajcxy y'alma ity. Jadu'n nipaady nej jihuüy nmíididyich je öcpi it ahuaazti. ¹⁹Cojay cham tijaty mhuin'ijxpy mhuinmidooyb, jadu'n nej huidibi tunaanip jadaanip jadachambi xii tiempo, etz huidibi tunaanip jadaanip jacjiini. ²⁰E jadu'n yhuimbizimy je tiy'ajt janchypi huidibi ca' pin nejhüüy maabi je huixtujcpi madza' tiibi mhuin'ixy ma iich n'a'oygi', etz je huixtujcpi oricandelerero. Je huixtujcpi madza', je' je' je ángeles ajcxy huidibi cogapxy'ajtp miid Dios ycixpi ma je huixtujcpi cypi mibijcpidijc. E je huixtujcpi candelero huidibi ti m'ixy, je' yi' je huixtujcpi cypi mibijcpidijc.

Je ayuc huidi yajmoy yi mibijcpidijc jim Efeso

2 Nijayi' miich je ángel huidibi cogapxy'ajtp jim ma je huidibi ajcxy mibijcp jim Efeso: “Nima' ajcxy co jadu'n yminañ je huidibi huixtujc madza' miid ma y'a'oygi', je huidibi jim yajpatp agujc'amy ma je huixtujcpi candelero, je' jadu'n minamb: ²Iich nejhüüybich tüg'óciy ti miich ajcxy mdumyb, jadu'n nej mictägy mdungixy ma Dios ytung, etz jadu'n nej mmimecxtujccixy migügtijc. Nejhüüybich co ca' m'ocmimexctugaani ajcxy jibicjäydijc, e ti m'ijxmajtcixy je ajcxy huidibi naydijip co Cristo ti huin'ijxigixy, per ca' je' ajcxy ytudägyity, e miich

ajcxy ti mnejhuüy co ajcxy ooy y'aniidaaccixy. ³Nejhüüybich co ooy ayo'n mij miich ajcxy mminajxcixy myajnajxcixy miid iich ycixp, etz ooy mij mecxtujcin ajcxy myajtungixy, etz ooy janch mic mdungixy miid iich ycixp, e ca' ti mmidzjipigixy iich ndung. ⁴Per nejhüüybich ma miich ajcxy mdundigoy. Ca' miich ajcxy xyajmij'atyich mijcajee, jadu'n nej anajty xyajmij'atyich ajcxy mijcajee co oga'n ajcxy mibijcy. ⁵Miid jada ycixpi jäymetz miich ajcxy ma oy m'agänajxcixy. Jothuimbijtcix, e tungix nej anajty m'octungixp co ogañ ajcxy mmibijcy. Pen ca' ajcxy jadu'n mdungixy, chi tzojc nícxibich ma miich ajcxy, chi huingbi nbidägyibich ma miich ajcxy xyjapaady, tim jadu'n nipaady nej jihuüy nbicyich yi mgandelerero. Jadu'n ndunipyich pen ca' anajty mjothuimbity ajcxy. ⁶Per njäygidaacypich jadu'n nej miich ajcxy m'ijxtigoydaaygixy mjäydgoydaaygixy je jibicjäydijc ajcxy yhuinmañ. Nej je nicolaítas ajcxy ytungixy, miich ajcxy ca' mjäygidaaccixy e nañ jadu'n iich ca' njäygidägyich. ⁷Pinjaty ytädzac miid huen amidoo'ity nej je Espiritu Santo yminañ ma je mibijcpidijc huidibi yajpatp xi ya. Pinjaty madacp ma ymibijcin, iich yi' nmöhuipy tzinaayin jugy'ajtin ma Dios y'ane'my, jaydeb jotujc chinahuipy ma Dios y'it, jadu'n nipaady nej jihuüy ajcxy jicxy je quipytiim ma Dios y'it huidibi jugy'ajtin yejcp.”

Je ayuc huidi yajmoy yi mibijcpidijc ajcxy jim Esmirna

⁸Nijayi' je ángel, je cogapxy'ajtpi huidibi yajpatp ma je mibijcpidijc jim Esmirna: “Jadu'n yminañ je

huidibi yajtzondac je naaxhuiñybi etz tzajp etz huidibi cogixihuip, je huidibi o'c e yjugy'aty jadüg'oc: ⁹Hich nejhuiybich tüg'óciy ti miich ajcxy mdumyb. N'ijxcaypyich nnejhuiybich je m'ayo'n mjotmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuiybich co ayooob jäy miich ajcxy, per miid miich ajcxy Dios y'oy'ajtin, e jadu'n nipaady miich ajcxy nej comeeñdijc. Nejhuiybich co nijējity jäy miich ajcxy xyñigapxyp xyñ'ojñyb. Ñaydiyii ajcxy co yjudíojäyity, e ca' yjanchity. Hue' ajcxy miid y'ijtcixy je mujcu'. ¹⁰Ca' ni ti mdzigy miich ajcxy nej mjadaangixy m'ayoohuaangixy. Yi mujcu' miich ajcxy nijējity xyajpujxtijccähuamb, m'ocyaj'ijxmadzangixy pen janch miich ajcxy nidüg'óciy myajpatcixy ma Dios. Jadu'ñyi miich ajcxy m'ayohuipy majc xii. Ijtcix tudägy mabaad ajcxy m'öccixy. E iich miich ajcxy je jugy'ajtin huinixiibi nmöhuipy jadu'n nej premio co ti mmadaaccixy ma mmibijcin. ¹¹Pinjaty miid ytädzac, huen mido'mbijccixy nej je Espiritu Santo nimäy je pinjaty mibijcp Dios. Pinjaty mimadacp cuyduñ Dios y'ayuc ytiy'ajt, ca' je' y'alma ayoohuipy ayoodactuuyb, ca' y'öga'ñ mimejtz'ocpi."

Je ayuc huidi yajmoy yi mibijcpidijc jim Pérgamo

¹²Nijayi' je ángel huidibi cogapxy'ajtp jim ma je mibijcpidijc ajcxy jim Pérgamo: "Nijayi' je ayuc co jadu'n yminañ je huidibi

y'espada miid mejtz'adu'm'amy yjijpity: ¹³Hich nejhuiydaaybich jadu'n nej miich ajcxy mdzinaaygix mjugy'ajtcix. Nejhuiybich co miich ajcxy mdzinaaygixy mjugy'ajtcixy ma tüg cajp ma je mujcu' y'ane'my. Per mi'ijtyñi je nxiijich, e ca' m'ixmach je mmibijcin ma iich. Ni mga'ixmajch je mmibijcin je huin'it xii co Antipas yaj'o'ci jim ma miich ajcxy, tüg iich nmigüg, je tudägy pi testigo, jim je' y'o'cy ma mujcu' chinäy. ¹⁴Nmiidich tigati huidibi ca' n'oy'ixyich ma miich ajcxy huidibi mdumyb ajcxy jim Pérgamo. Nijējity miich ajcxy ca' m'ixmadza'ñ je Balaam y'ixpijcin, je huidibi yaj'ixpijc jecy'ajty co huen jiixcixy je huidibi anajty tzaadzech quipychech ti yajhuindzigiiygixy. E nañ jadu'n yaj'ixpic co huen tundigooygixy miid huingbi töxyjäy. ¹⁵Nañ jadu'n miich ajcxy mmiidity nije' jäy huidibi ajcxy ca' ixmadzaangixy nicolaítas y'ixpijcin, je ixpijcin huidibi iich ca' ndim'ixa'ñich. ¹⁶Paady jothuimbijtcixy miich ajcxy, yajtigajtzni ajcxy mjobt mhuinma'ñ. Pen ca' jadu'n mdunipy, níxcibich jim tzojc ma miich ajcxy. Chi jada' ndziptunipyich miid yi' ajcxy huidibi midundigooyb iich ngötujcin huidibi ngapxich. Hich n'ayuc jadu'n nipaady nej espada. ¹⁷Pin ytädzac miid, huen mido'mbicy je ayuc huidibi je Espiritu Santo ñigapxyp ma je huidibi ajcxy Dios y'ayuc ytiy'ajt mibijcip. Pin jada tiydudägy mimadacp cuyduunni Dios ytiy'ajt, iich yi' nmöhuipy oy'ajtin huidibi Dios yjé'ajtpy. Jada oy'ajt jadu'n

nipaady nej maná huidibi yüch ijtp ma Dios chinaydac. Nañ jadu'n iich yi' nmöhuibich tüg pi'cpoobtzaa, e ma je poobtzaa jim yaayity tüg xii jemybi huidibi ca' ni pin ijxcabipy, jëyi janchtiy ijxcabip je xii pin anajty cöbijcp je tzaa.”

**Je ayuc huidi yajmoy yi
mibijcpidijc jim Tiatira**

¹⁸Nijayi' je ángel huidibi cogapxy'ajtp ma je mibijcpidijc jim Tiatira: “Nima' ajcxy, jadu'n je Dios y'ung ymina'n, je huidibi yhuin miid jadu'n nej jihuüy jiinye'n, e ytecy jadu'n miidity nej bronca tiibi ytoyhuäch ma jiiin: ¹⁹Jadu'n yi' ymina'n: Nejhuüybich tüg'óciy ti ajcxy mdumyb. Nejhuüybich jadu'n nej miich ajcxy mijcajee myajmij'ajtcixy Dios etz mdzocjccixy mjihuüygixy ymigügtjic; jadu'n nej mmibijccixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuüybich co cham nigü mdungixy ma Dios ytung, ca'ydi jadu'n ajcxy nej myajtzondacy. ²⁰Ji tüg huidibi miich ajcxy mdumyb huidibi iich ca' n'oy'ixyich. Mdzachmimexctujccixy yi töxyjäy Jezabel huidibi naydijp co ycapxyp Dios y'ayuc e ca' yjanchity. Je' yajniidigooyb yajtütügooyb iich ndumbi miid anii. Jadu'n je' ymina'n co jëbi huingbi töxyjäy migapxtigooygixy e co jëbi caaygixy jiixcixy je huidibi ajcxy yajhuindzigiiyb quipychech tzaadzech. ²¹Ti iich je Jezabel nmöy tiempo co ixypy yjothuimbity, per yi'

ca' ixmadza'n yjibic-huinma'n. ²²Jadachambi nyajcähua'nich je Jezabel cijx'am miid pa'm, e jadu'n ajcxy nmöhua'nich ayo'n je yëydijc ajcxy huidibi miid chachtundigoy. Jadu'n ndunipyich pen ca' ajcxy yjothuimbijtcixy nej ajcxy chachpadungixy je jibic-huinma'n huidibi je Jezabel ymiid. ²³E nyaj'öctähuibich tüg'óciy ajcxy pinjaty panixp cixyjt huinjot je Jezabel y'ixpijcin jigix nidüg'óciy je mibijcpidijc ajcxy nejhuüydähuipy co iich je' nejhuüydaayb tüg'óciy jäy ajcxy yjibic-huinma'n. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴Per jacjadyii miich ajcxy jim Tiatira ca' mbanicxcixy mbayöygixy Jezabel y'ixpijcin, e ni ca' mmijpidaaccixy huidibi ajcxy ytijpy mujcu' y'ixpijcin huidibi tzip huinjihuüyb. Iich miich ajcxy nimaayb co ca'p iich miich ajcxy huingbi ixpijcin njacmóoygixipy. ²⁵Mi'ijtcixy je Dios ytiy'ajt huidibi miich ajcxy miid, ixti cooni anajty nhuimbityich. ²⁶Pin madacp ma ymibijcin etz pin cuydumb iich ndiy'ajt mabaad anajty je' y'ögy, iich je' nmöhuibich je cötujcin, jaydëb ane'my naaxhuünyjäy ajcxy. ²⁷Iich je' nmöhuipy je ane'min cötujcin ma naaxhuünyjäy huidibi Dios Teedy, iich nDeedy, ti xymöyich. E je' ane'mipy miid Dios ymic'ajt. E je' yajhuindigoydähuipy naaxhuünyjäy y'ane'min, tim jadu'n nej jäy püy pochtu'tz miid pujxtajc. ²⁸Nañ jadu'n iich je' nmöhuipy iich nmic'ajt huidibi nipaady nej je

madza' jayhuixtujc. ²⁹Pin ytádzac miid, pin midoohuamb, huen midoy nej je Espíritu Santo ymina'nñ ma yi mibijcpidijc nidüg'óciy."

**Je ayuc huidi yajmoy yi
mibijcpidijc jim Sardis**

3 Nijayi' je ángel huidibi cogapx'ajtpi ma yi mibijcpidijc ajcxy huidibi yajpatp jim Sardis: "Jadu'n ymina'nñ je pin miid je huixtujcpi Dios y'espíritu, huidibi miid je huixtujcpi madza': Hich nejhuiiyb ti mdumyb. Nejhuiiybich co cömay ajcxy m'ijtcixy co mmiidity yjugy'ajtin huinixiibi e ca' yjanchity. Jadu'n miich ajcxy nipaady nej öcpi. ²Cuenditungix miich ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huidibi ajcxy mjacmiidity. Ti iich n'ixy co huidibi ajcxy mdumyb ca' yi' yhuädzity ytudägyity ma Dios yhuinduu. ³Jäymejtzcotcixy je Cristo ytiy'ajt je tiibi m'ixpijccixy, je tiibi mmidoogixy. Panicxcix Cristo ytiy'ajt e jothuimbijtcixy ma yi oybi. Pen ca' mgüenditungixy yi mmibijcin, nicxibich ma miich ajcxy jadu'n nej tüg meetzpi, ni mganejhuihuüyigixipy anajty nnicxyich. ⁴Miich jacmiidni mibijcpi ajcxy jim Sardis huidibi ca'ni ajcxy ymibijcin yajtigooygixy, ca'ni ajcxy ytundigooygixy, tim jadu'n nipaady nej jihuüy ajcxy miidity poob huit huidibi ca' yjibicixy. Yi' ajcxy xymiid'idipich miid huädz jot huädz huinma'nñ, tim jadu'n nipaady nej ypoob huit ajcxy miidity, com ajcxy ypadyii

jadu'n. ⁵Pin mimadacp cuyduñ etz mijpidägy Dios y'ayuc ytiy'ajt, ymiid'adipy ajcxy je huätzpi jot huinma'nñ, huidibi jadu'n nipatp nej poob huit ajcxy miidity. E ni ca' ajcxy yxii yajjödzip ma je libro ma ycojaayity je tudägyipi jäy ajcxy yxii. E iich yi' ajcxy ngapxquëxiccixy yxii ma nDeedyich yhuinduu, e nañ jadu'n ma nDeedyich y'ángeles yhuinduu ajcxy. ⁶Pin midoohuamb, pin ytádzac miid, huen midoy nej je Espíritu Santo ymina'nñ majaty je huidibi ajcxy Dios y'ayuc ytiy'ajt mibijcip."

**Je ayuc huidi yajmoy yi
mibijcpidijc jim Filadelfia**

⁷Nijayi' je ángel huidibi capxy'ajtp ma je mibijcpidijc jim Filadelfia: "Jada ayuc tiy'ajt ñgapxyp je tügpajcpi huätzpi, tügpajcpi janchypi, huidibi ane'my Dios yjäy jadu'n nej David ane'my Dios yjäy jecy'ajty. Je huidibi yaj'ahuatp e co yaj'ahuäch ni pin ca' huaad yaj'aducy. Je huidibi yaj'adujcp e co yi' yaj'aducy, ni pin ca' huaad yaj'ahuäch: ⁸Cuenditungix nej nmina'nñich: Hich nejhuiiybich nej mdungixy. Ti nyecyich mic'ajt ma miich ajcxy huidibi nipaady nej tüg tigiydac ahuätzpi ma miich mhuinduu, huidibi ni pin ca' huaad yaj'aducy. Nejhuiiybich co hueeni Dios yjihuü'n ymic'ajt miich ajcxy miidity. Per ti mguydungixy iich n'ayuc, e ca' nxiijich xycoyützi. ⁹Cuenditungix nej nmina'nñich. Yi' ajcxy huidibi mijpidacp Satanás y'ayuc, je huidibi aniidacp ajcxy co ñaydíjigixy judíojäy, e ca' yjanchity.

hich yi' ajcxy nmimadägibich jigix yi' ajcxy miich xyhuingoxtinähuipy xyajmij'adipy. E chi nejhuihuip ajcxy co hich miich ajcxy ti ndzocy. ¹⁰Miid co ti myajtungixy mecxtujcin ma mdzinaayin, ti mguydungixy iich n'ayuc n'ane'min. Paady iich nihua'nip yajtzögip miich ajcxy ma anajty jäy ajcxy mictägy xyjot'ijxcixy xyhuinma'n'ijxcixy ajcxy. Miinipy je xii je tiempo mina je mujcu' jot'ixipy huinma'n'ixipy tüg'óciy je mayjäy huidibi yajpatp ya naaxhuiñ. ¹¹Hich tzojc nnicxa'n'ich jii by naaxhuingixy. Mi'ijtcixy yi Dios y'ayuc huidibi miich ajcxy miid jigix ni pin xycapijcp ajcxy mbremio, huidibi ti mganar'ajtcixy ma Dios. ¹²Pin mimadacp cuyduñ Dios y'ayuc ytiy'ajt etz cuyduñ yajxon, iich yi' nbidägibich mij'ane'mbi ma iich nDios y'it, jadu'n yi' nipaadip nej tüg pilar huidibi midinaayb jemxypi ma Dios ytiyc. E yi' ni camina ypidzimipy ma Dios y'it, e njayiiybich ma yi' ñinix iich nDios yxii, e nañ jadu'n njáayibich je iich nDios ycajp yxii, je Jerusalén jemybi huidibi tzoon tzajpjoty ma Dios yajpaady. E nañ jadu'n njáayibich nxii jemybi ma yi' ñinix. ¹³Pin ytädzac miid huen midoy ti je Espíritu Santo ñigapxyp ma tüg'óciy je mibijcpidijc.”

**Je ayuc huidi yajmoy yi
mibijcpidijc jim Laodicea**

¹⁴Nijayi' je ángel huidibi cogapxy'ajtpi ma je mibijcpidijc jim Laodicea: “Jadu'n ymina'n je huidibi janchip tudägyip, je huidibi tudägy yejcp Dios ytiy'ajt

e ca' yajtigach y'ayuc, je huidibi yajtzondac tüg'óciy tijaty huidibi Dios ti oyduñ: ¹⁵Nejhuiybich nej mdungixy. Nejhuiybich co miich ajcxy mibijccixy huenjaty, ca' myajtigoydaygixy yi mmibijcin, e ni ca' ooy mij mmibijccixy. Jadu'n miich ajcxy nipaady nej nii huidibi ni ca' ytichity, e ni ca' y'anity. Jac'oy ixypy co ooy mij mmibijccixy, o co ca' ixypy mdimmibijccixy. ¹⁶Miid co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaaygixy, miid jada ycixpi iich miich ajcxy njijpcogapxihiipy miid je ndzip n'éjcinich, tim jadu'n nej jäy ajcxy ixtzujy huidibi y'ahuac yca'tzojcpy. ¹⁷Miich ajcxy minamb co ooy ajcxy mgomeeñity, ooy ajcxy mij mdzinaayin mjugy'ajtin mmiidity, e ca' ti ajcxy myajmayajtcixy, e ni ca' miich ajcxy nejhuiygixy co ayo'nduum myajpatcixy. Jadu'n miich ajcxy nipaady nej ayoobitijc, nej huiintzpi,nej huidibi nihuädz ixhuädz huidijtp. ¹⁸Paady iich miich ajcxy nimaaygixy co copicy ajcxy mbaadip ma iich Dios ytiy'ajt janchypi, huidibi jadu'n nipaadipy nej jihuüy ajcxy mjuuygixy huädz oori ma iich, huidibi ti y'oybidzimy miid jiiin jigix mgomeeñ'ajtcixip. Nañ jadu'n iich miich ajcxy nnimaaygix co copicy ajcxy mbáatcixip pocyhuinmeecxin ma iich, huidibi jadu'n nipaady nej jihuüy huit oyjatypi poopjatypi mjuuygixy ma iich, jigix mxójxcixipy mninix ca'ydi tzo'ydu'n mbáatcixipy.

Nañ jadu'n iich miich ajcxy nnimaaygix co mbaadip tiy'ajt ma iich nlibro, huidibi jadu'n nipaady nej jihuüy huindzooy mjuuygixy, jigix mdzoydúngixipy mhuin e huin'it ajcxy m'ijxcixipy huádz. ¹⁹N'ojypich etz ndzaachytumyb tüg'óciy pinjaty ndzojcpyich njihuüybich, paady ycixpi miich ajcxy mhuindina'mjijptina' mic iich ndiy'ajt etz jothuimbijtcix nej mbocytungixy. ²⁰Cuenditungix nej cham nnimaaygix. Jadu'n nipaady nej jihuüy ndinayich ma nidüg nidüg jäy ytijc'aguu e ngojxnojcich ajcxy ytijc agi'. Nbijctzooybich co xyajtigihuibich ajcxy ma ytijcin. Pinjaty xyyöcmidoobich, e yaj'ahuäch ytijc, tigihuibich ma yi', e cayipich miid yi', e yi' miid iich. ²¹Pinjaty cuydundaayb Dios y'ayuc ytiy'ajt, iich je' nmöhuipy it lugar tzajpjoty quipxyi miid iich ma iich n'ane'mdac. Ti nguydundaayich Dios y'ayuc, e nmiidich it lugar ma iich nDeedy y'ane'mdac, paady ycixp jëbi nmöhuibich miich ajcxy it lugar ma nyajpaadyich. ²²Pin ytádzac miid, pin midoohuamb, huen midoy huidibi je Espiritu Santo ycapxyp majaty mibijcpidijc huidibi canaagpicy yajpatp.”

**Iibaatcixy capxpaatcixy yi Dios
huidibi tzajpjoty tzinaayb**

4 Co jada jadu'n yjajt, chi nhuindiicxyich tzajpjoty, e nhuin'ijxyich tüg tijc aguu ahuádz jiiby tzajpjoty. E nmidooyich tüg ayuc janch tim jadu'n nej tüg trompeta yxüxy huidibi iich anajty jayijp ti xy'ocmigapxpi, xyñimäyich:

—Pet ya ma iich, cham nyajni'ixihua'n tijaty copicy tunaanip jadaanip co anajty jadayaabi xii tiempo ñaxy.

²Chi Dios yjihui'n ymic'ajt xymimadactaayich njot nhuinma'nich, e nhuin'ijxyich tüg ane'mdac jiiby tzajpjoty. E ma je ane'mdac jim anajty tüg iñäy. ³E je huidibi anajty jim iñäayb ma je ane'mdac, jadu'n anajty yquëxigy nej tüg tzaa janch oybi janch adiicxp. E jühuidity ma je ane'mdac je Dios yhuätz'ajt quëxigy nej tüg i'nich janch oycolor huidibi janch adiicxp nej tüg tzaa tzuxjatypi. ⁴Nañ jadu'n jühuidity ma je ane'mdac jiiby anajty iipx madaax silla, e ma je silla iñäy iipx madaax mijjäy, ac poob huit miid. E ymiid anajty ajcxy ma ycohuajc coroni ac tim oori. ⁵Ma je ane'mdac anajty ypidzimy huidzuc, e ooy anajty enee yjidijtin ñe'my. E ma je ane'mdac huinduu jiiby anajty Dios yjihui'n ymic'ajt je huixtujcpi, huidibi quëxig nej huixtujc tzinhuaty huidibi ooy mic ytiicxy. ⁶E je tigot ma je ane'mdac huinduu jadu'n quëxigy nej vidrio mejy, janch huádz janch adiicxp.

E cujc'amy jühuidity ma je ane'mdac midaax iyujc huidibi miid mayhuin jahuinduuy jajixcipy. ⁷Je midügpi iyujc tim jadu'n anajty nej tüg jamгаа. Je mimetzpi iyujc tim jadu'n nej tüg huajmang. Je midugiigpi tim jadu'n anajty yhuinyijp nej jäy. Je mimadaaxpi tim jadu'n nej me'ty yqueec-huidityin. ⁸Je nimidaaxpi iyujc ymiid anajty ajcxy nidüg nidüg tudujc yqueec,

e ymiid anajty ajcxy yhuin queecnigixy etz queecpa'tci'py. E ca' anajty ajcxy ypocxy xiim tzuum, chachminaangixy:

Santo, Santo, Santo, je Huindzin Dios huidibi tüg'óciy nejhuiydaayb, huidibi tüg'óciy mic'ajt miid, je huidibi anajty ji'ajtp, je huidibi cham ji'ajtp, etz je huidibi miinaamb.

⁹Je iyujc ajcxy huin'iigixy etz huindzigiigixy etz yajmij'ajtcixy Dios, etz yajnajxcixy Dioscojuyipy ma Dios je huidibi anajty iñaayb ma je ane'mdac, je huidibi tzinaayb jugy'ajtp huinixi huinítiempo, e ni camina y'ögipy. ¹⁰Co je iyujc ajcxy jadu'n ytuñ, chi je iipx madaaxpi mijjáy ycojxtinaydaaccixy ma je' yhuinduu huidibi anajty iñaayb ma je ane'mdac. E ooy anajty huindzigiigixy je huidibi tzinaayb huinixi huinítiempo. Pidaaccixy anajty ajcxy ycorona ma je' yhuinduu, cham chachminaangixy:

¹¹Miich, iich ajt nHuindzin, iich ajt nDios, miich mihuaad co mmiidity tüg'óciy oy'ajtin mij'ajtin etz mic'ajtin, mihuaad co miich nyajcömayip, mihuaad co miich miid'ity tüg'óciy mic'ajt etz mij'ajt. Jadu'n miich mihuaad, com miich ti myajcojy, ti myaj'abadiy tüg'óciy huidibi ji'ajtp. Com miich jadu'n ti mdzocy, paady ycixpi tüg'óciy tijaty ji'ajttäy.

Je libro etz je Dios y'ung, je Cordero

5 Chi jada' nhuin'ijxyich ma je huidibi anajty iñaayb ma je ane'mdac miidity anajty

ma y'a'oygi' tüg libro abugucy, yjaayity jotjoty'amy etz nigixy'amy, yco'aducyity miid huixtujc selli.

²Chi nañ jadu'n nhuin'ijxyich tüg ángel huidibi mij cötujcin miid, yajtiy miid ycapxin janch mic:

—¿Pin jada' janch tudägyip co yaj'ahuädzip jada libro etz miigiidziydähuipy yi yseli?

³Ni tzajpjoty, ni naaxhuiñ, ni naaxpa'tci'py ycacá'ity pin tudägyip huidibi mihuaad je libro co yaj'ahuädzip, o oy nigoodi'ajty ja'ixaanip. ⁴Hich janch yaaxpich miid tajin mayin anajty, com ca' anajty yajpaady pin je libro mihuaad co yaj'ahuädzip, o oy nigoodi'ajty huindiicxip. ⁵Chi nidüg je mijjáy xyñimaayich:

—Ca' myäxy. Chi je' je mic'ajt miidpi ma yi judfojáy, je David y'ap y'oc huidibi nipatp nej tüg ama'ycaa, yi' ti mimadactäy tüg'óciy jibicpi. Yi' mihuaad yi libro yaj'ahuädzip, etz miguejyidähuipy je huixtujcpi yseli.

⁶Chi nhuindicxpejtyich, e agujc'amy ma je ane'mdacin, etz agujc'amy ma je midaaxpi iyujc, etz agujc'amy ma je mijjädjic ajcxy, jim anajty ytinäy je Dios y'ung, je Cordero. Ooy anajty ñiguëxigy chaachi'au nej anajty ayo'n tzaachypi ti yajnaxy. Ymiid anajty huixtujc ymu'n, e huixtujc yhuin, je' je' je huixtujcpi Dios yjihui'n ymic'ajt huidibi yquejx huindu'my naaxhuiñ. ⁷Chi je Cordero, je Dios y'ung, ninicxy je huidibi anajty iñaayb ma je mij'ane'mdac, e chi oy cychoy je libro huidibi je mij'ane'mbi anajty ymiid ma je a'oy'amybi yci'. ⁸Co

je' anajty ti cicychoy je libro, chi je midaaxpi iyujc etz je iipxmidaaxpi mijjáy ycojxtinay'ahuiyday ajcxy ma je Dios y'ung, je Cordero, yhuinduu. Ymiid anajty ajcxy nidüg nidüg y'arpa etz oori copi ujtzyty miid poom, je' je' anajty nipaady nej ajcxy chajpcapxy capxy je huidibi ajcxy mibijcp Dios. ⁹Janch y'iiyb anajty ajcxy iy jemybi, ymínaangixy:

Miich mihuaad co mgiiygy yi libro, e mmiguejydaayi je huixtucpi yseli. Com miich ti myaj'ögyii, ti mgojuy jáy ajcxy ypocy ma Dios miid mgi'mni'py. Ti mgojuy ma Dios nidüg'óciy jáy ajcxy ypocy, huen huidibi razity, pinjaty capx huen huidibi ayucity, pinjaty tzomb huen huidibi cajpity huen huidibi naciónity.

¹⁰Miich ti xymóoygixyich ane'min etz je tung mijpi nej huaad iich ajcxy n'ojadajtcixy nmibijctzoogixy Dios, jigix jébi iich ajcxy n'ane'mgixy yi naaxhuin'yjáy etz n'ojadajtcixy nmibijctzoogixy Dios miid jáy ajcxy ycixpi.

¹¹Chi iich oy nhuin'ixyich e nhuinmidooyich may ángeles ajcxy ycapxin ymiydaacin júhuidity ma je ane'mdac, ma je iyujc ajcxy yajpatcixy, etz ma je mijjáy ajcxy yajpatcixy. E janch canaag millon je ángeles anajty ajcxy. ¹²Janch mic je' anajty ajcxy chachmínaangixy:

Je Dios y'ung, je Cordero, je huidibi óc miid jáy ajcxy ypocy ycixpi, yi' mihuaad paadip ane'm'ajtin,

comeeñ'ajtin, xpijcin, mic'ajt, cómayin, oy'ajt mij'ajt, etz huin'iihuin huinyaaxin.

¹³E tüg'óciy iyujc animal je huidijaty Dios ti yajcojy ti yaj'abadiy huidibi jiiby tzajpjoty, etz huibi ya naaxhuin' etz naaxpa'tci'py, huidibi jiiby mejyoty, nhuinmidooyich co tüg'óciy ajcxy chachmínaangixy:

Tzoc huin'iihuim tzoc cómayim, tzoc mooyim oy'ajtin etz mij'ajtin huinixii huinitiempo je Dios y'ung, je Cordero, etz je huidibi iñaayb ma je ane'mdaacin.

¹⁴Je midaaxpi iyujc anajty chachmínaangixy:

—Jadu'n huen tuñyii jadyii. Amén.

Chi nañ jadu'n je iipxmidaaxpi je mijjáy ajcxy ycojxtinaygidactay, chi ajcxy ooy huindzigiiy patjihuiiy je huidibi huinixii huinitiempo tzinaayb.

Je huixtucpi selli

6 Huin'it nhuin'ijxyich je Dios y'ung, je Cordero, quejtzciich tüg selli ma je huixtucpi chi nmidooyich, co nidüg je midaaxpi iyujc ycapxy, jadu'n nmidooyich nej enee yjidity, chi ymiñañ:

—Min ya, e chi m'ixipy.

²Chi nhuindixpejtyich, chi nhuin'ijxyich tüg poob cohuay. E je huidibi yaj'iñaayb je poob cohuay ymajtz'ijtpy anajty tüg tip ma yci'. Chi je' yajmoy tüg coroní co yrey'adipy. Chi jada' choñ tziptunaangixy jigix jacmimadägipy ymidzip.

³Co je Dios y'ung, je Cordero, yaj'ahuaach je mimetzpi selli ma

je necy, huin'it nmidooyich je mimetzpi iyujc ma je midaaxpi ymina'n̄:

—Min ya, e chi m'ixipy.

⁴Chi ypidzimy jadüg cohuay tzaptzpi ycolor. E huidibi yaj'iñaayb je cohuay chaptzpi, yc'idigiipi cõtujcin co je naaxhuiñyäjy canayyajotcujc'adiib ajcxy, e ñayyaj'öcigixipy miñ xyipy. E yajmooy tüg espada mijpi.

⁵Co je Dios y'ung, je Cordero, agiitztuudy je midugiigpi selli ma je necy, chi nhuinmidooyich je midugiigpi iyujc ma je midaaxpi, ymina'n̄:

—Min ya, e chi m'ixipy.

Chi nhuindixpejtyich, chi nhuin'ijxyich tüg cohuay tzixypi. E je huidibi anajty yaj'iñaayb je cohuaychixy, ymiid tüg pujxtzim ma yci'. ⁶Huin'it nhuinmidooyich tüg ayuc choñ ma je midaaxpi je iyujc ajcxy yajpaatcixy, ymina'n̄:

—Tüg denario meñ chohuiy tüg libra trigo; nañ jadu'n tüg denario meñ chohuiy tudujc libra cebada, ca' myaj'ayoohuipy aceite etz vino.

⁷Co je Dios y'ung, je Cordero, yaj'ahuaach je mimadaaxpi selli ma je necy, chi nhuinmidooyich co je mimadaaxpi iyujc ma je madaaxpi ymina'n̄:

—Min ya, chi m'ixipy.

⁸Huin'it nhuin'ijxyich tüg cohuay nitzuxy pu'tz, e je huidibi anajty yaj'iñaayb je cohuay, hue' anajty yxii öcpi. Axa anajty ymiin je huidibi ane'mb je it ma je öcpi ñimucy. Chi ajcxy yajmoy cõtujcin je huidibi yaj'iñaayb je cohuay, jigix yaj'ó'ccixipy je tügpicypí ma je madaaxpicypí naaxhuiñyäjy ajcxy.

Chi yaj'ögip ajcxy miid tzip, miid yuuba'm, etz miid iyujc ahua'nbi huidibi ya naaxhuiñ.

⁹Co Dios y'ung yaj'ahuaach je mimigooxpi selli ma je necy, chi nhuin'ijxyich pa'tci'py'amy ma y'ane'mdac yhuinduu, je' ajcxy y'alma huidibi ajcxy yaj'öcpat miid Dios y'ayuc ycixpi, huidibi anajty ajcxy capxhuäcxcixp etz nidiy'ajt'ajtcixp Dios y'ayuc. ¹⁰Je' anajty ajcxy huidibi yaj'ögy patp miid Dios y'ayuc ycixpi chachminaangixy janch mic:

—Huindzin, janch mijpi janch huätzpi, huidibi cuydundaayb yi m'ayuc huidibi myejc ma iich ajcxy. ¿Jadu'ñyi jada' mjac-huäcxiba'n̄ mina anajty yi jäy ajcxy mdiydunaangixy mdzaachtunaangixy miid ypocy ycixpi huidibi xyaj'o'c iich ajcxy, yi' ajcxy huidibi tzinaayb naaxhuiñyگیxy?

¹¹Huin'it ajcxy yajmoy nidüg nidüg poobhuit, e yajnimay ajcxy co huen jacpooxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huidibi quipxy miid miich ajcxy tumb ma Dios ytung, je' ajcxy huidibi yaj'ögy paadipy miid Dios y'ayuc ytiy'ajt ycixpi, tim jadu'n nej miich ajcxy ti mbaatcixy yaj'ögy.

¹²Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuiñyxijty, chi je xii yjajty janch tzixy, jadu'n nej tzixyhuit huidibi co'ögytjic ypidacpy, e je po' y'ahuimbijty nej ni'pyin. ¹³Chi madza' ooy yca'y naaxcixy tim jadu'n nej piidztim

tzuxpi ycäy co micpoj mixidïy.
 14 Chi je tzajp yjihuäcni jadu'n
 nej tüg libro'abidity. Tüg'óciy
 tungop huidibi naaxhuiñgixy
 etz huidibi mejy'agujc, cijx
 chondägy ypidictäy ma anajty
 y'ity. 15 Huin'it ñayyützaayi je
 reydijc, je mïjtungmiidpidijc,
 generaltijc, comeenydijc, pinjaty
 ymic'ajt miid, je tumbidijc etz je
 midumbidijc ñayyützaayi ajcxy
 nidüg'óciy majaty tzaajut tzaa'ang.
 16 Tzachnimaaygixy anajty tungop
 tzaajot:

—Nïgägootcich nïgägootcich,
 ca'ydi iich ajcxy njac'lijxi
 yhuiñyjijp je huidibi iñaayb ma
 Dios y'ane'mdac, e nañ ca'ydi
 nbáatcixyich je tzaachypi ayo'n
 huidibi yegamyb Dios y'ung, je
 Cordero.

17 Com ti je xii je tiempo
 yhuaad'ajtni mina Dios etz Dios
 y'ung y'ahua'ndägaangixy etz
 tzaachytunaangixy naaxhuiñyäjy.
 ¿Pin je' ocmimadägip ajcxy chip
 y'ejcïn?

Huidibi anajty ajcxy tiy'ajtmiid ma je Israel jäy ajcxy

7 Chi co jadu'n yjajti, chi
 nhuin'ijxyich madaax ángeles
 ajcxy ytinaaygixy ma madaax'itpi
 naaxhuiñybi ytatzcïy. Adujccixy
 anajty je midaax'it poj ca'ydi
 ypojy ya naaxhuiñ, ni ma mejy,
 ni ma quipy. 2 Chi nhuin'ijxyich
 jadüg ángel ymiinïy anajty
 xiibidzimy'amy, miidity ma yci' je
 Dios juugypi yselli. Jadayaabi ángel
 ooy mic miyaaxy je jamidaaxpi
 ángeles ajcxy huidibi anajty ajcxy ti
 ycidigïyigixy je mic'ajt je cötujcïn

nej huaad yajhuindigooygixy tijaty
 ya naaxhuiñ etz ma nii mejy.

3 Chi je ángel ymina'ñ:

—Ca' ti ayo'n mdungixy naaxhuiñ,
 ni ma mejy, ni ma quipy chaa, ixti
 cooni anajty Dios ytiy'ajt y'ijxpejt
 nbidaacim ma je' ajcxy yhuimbocïn,
 je tiibi ajcxy huin'ixy huidibi
 tungixp ma Dios ytung.

4 Chi nmidooyich jadu'ñiyi je'
 tiibi anajty ajcxy Dios ytiy'ajt
 y'ijxpejt ti ymóoyigixy. Migo'px
 jahuixchiguïpx midaax mil je'
 ñaybaati huidibi anajty ajcxy tiy'ajt
 miid ma yhuimboc ma nidüg'óciy
 Israel jäy ajcxy. 5-8 Majmetz
 mil anajty ajcxy tiy'ajt y'ijxpejt
 miidity je Judá jäy, majmetz mil je
 Rubén jäy, majmetz mil je Gad jäy,
 majmetz mil je Aser jäy, majmetz
 mil je Neftalí jäy, majmetz mil
 je Manasés jäy, majmetz mil je
 Simeón jäy, majmetz mil je Leví jäy,
 majmetz mil je Isacar jäy, majmetz
 mil je Zabulón jäy, majmetz mil
 je José jäy, etz majmetz mil je
 Benjamín jäy.

Je mayjäy ajcxy huidibi yxoxip miid poob huit

9 Chi jada' nhuin'ijxyich janch
 mayjäy chooñ ma canaag nación,
 hue' ajcxy canaagnax raza'adyii, e
 capxy ajcxy canaagnax ayuc, etz
 chooñ ajcxy ma canaag cajp. Hue'
 je mayjäy ytinay'ahuiyday ma je
 mij'ane'mdac huinduu, etz ma Dios
 y'ung, je Cordero yhuinduu. Janch
 mayjäy ñimujcy ma je Dios y'ung
 yhuinduu, ni pin je' anajty huaad
 camichoudäy ajcxy. Ac poob huit
 anajty ajcxy miid yxoxyity, e ymiid
 anajty ajcxy tiixya'ay ma yci'. 10 E

janch mic anajty ajcxy miyaaxcixy Dios, chachmínaangixy:

Hich ajt nDios yi' je' tügpajc
huidibi xyajpocyhuaatzim.

Hich ajt nDios yi' je' huidibi
ane'mdaayb tüg'óciy, e nañ
jadu'n yi' y'ung, je Cordero.

¹¹E nidüg'óciy je ángelestijc
anajty ajcxy ytinaaygixy
jühuidityi ma je Dios y'ane'mdac.
E cham je mijjáy ajcxy etz je
midaaxpi iyujc huíjoj'ihuiiy
ajcxy ma je ane'mdac huinduu,
huindzigiigixy yajmij'ajtcixy je
Dios. ¹²Chachmínaangixy:

Jadu'n jada. Amén. Hich ajt
nDios, je' mihuaad huinixii
huinítíempo tüg'óciy je iihuín,
je xondaacín, je oy'ajtin, je
ixpijcin, je jáygidaacín, je
cómayín, je ane'mín, je
mij'ajtin. Amén. Jadu'n jada.

¹³Huin'it nidügti je mij jáy ycapxy,
e xy'amidooyich:

—¿Pín jada ajcxy jada' huidibi
poob huit miid yxoxyity, e ma yi'
jada' ti choongixy?

¹⁴Chi iich je' n'adzooy:

—Huindzinich, miich mnejhuiiyb.

Huin'it je' xy'adzooyich:

—Jada je' ajcxy tiibi je mij
ayo'n minajxcixy yajnajxcixy, e
ti ypocyhuaatzcixy miid je Dios
y'ung, je Cordero ñi'py, tím jadu'n
nej jihuüy yhuit ti yajhuaatzcixy
janch poob ma Dios y'ung ñi'py.

¹⁵Paady yi' ajcxy yajpaady ma Dios
chinaydac yjugy'ajttac, e ytungixy
xiim tzuum ma Dios ytijc tzajpjoty.
E yi' Dios y'ung huidibi iñaayb ma
je mij'ane'mdac, yi' yi' mi'ijttaayb
cuend'aty ma yi' yhuinduu. ¹⁶Ca'p
ajcxy jacjihuífyigixipy yuu tidzibi,

ni xii'an ycajacnögiiyb ajcxy, ni
anbi ycajacyajtzibiiyb ajcxy. ¹⁷Com
je Dios y'ung, je Cordero, huidibi
cujc'amy yajpatp ma je Dios
y'ane'mdac, je' yi' cuend'ajtp ajcxy,
jadu'n nej jihuüy cöbixy cuend'aty,
e yajnicxip ma je nii huätzpi
ymuxy huidibi yejcp jugy'ajtin.
Dios yajquägipy yi' ajcxy ytajin
ymayín jigix ca' yjacííygixipy
yjacyáaxcixipy miid tajin mayín.

Je mihuixtucpi selli etz je poomjogi'ñ ac oori

8 Co Dios y'ung, je Cordero,
yaj'ahuaach je mihuixtucpi
sellí, huin'it y'ijty oy jahuengi cup
hora amoñi jiiyb tzajpjoty. ²Chi
nhuin'ijxyich Dios y'ángeles huixtuc
ajcxy ytinaaygixy anajty ma Dios
yhuinduu, e yajmoy ajcxy huixtuc
trompeta. ³Huin'it jadüg ángel miñ,
chi je' ytinaay'ihuiiy ma mesi huinduu
ma je Dios ojadajttac. Je ángel ymiid
anajty tüg poomjogi'ñ ac oori. Chi
ymooyi poom may'amy huidibi jojcp. E
je poomjoc tigiiyb ma Dios yhuinduu
quipxi miid juydacín nuuctacín
huidibi je jáy ajcxy ytumyb huidibi
Dios ti huin'ixy ajcxy. ⁴Ma je ángel
yci'am jim je poomjoc chooñ ñicxy
ma Dios yhuinduu quipxyi miid je
oración huidibi ajcxy ytumyb je tiibi
ypocyhuaatzcixy. ⁵Huin'it je ángel
majch je poomjogi'ñ, chi yaj'ujch miid
jiiñbajc huidibi anajty jim ma je Dios
ojadajttaacín, chi najtzjibiiyb naaxcixy,
huin'it ooy yajmidooy jidijtin micpi etz
huidzuc e je naax ooy yüxcy.

Je maytrompeti

⁶Je huixtucpi ángeles ajcxy
huidibi anajty miid je huixtucpi

trompeti, ñayni'ixiíyí ajcxy co yajxúxaangixy.

⁷Je midügpí ángel yajxuuxy je ytrompeti, e huin'it ooy eneediitz yca'y mihuididíi jiin etz ni'py. Chi oy ycäy naaxcíxy. E jahueengi cujc-huäcxy oy nögy je naax, je quipy etz je aay ujtz tzuxjatypi etz nöctay miiy.

⁸Je mimetzpi ángel yajxuxy ytrompeti, chi ooy ycäy mejjyoty jadu'n nej tüg mijcop janch tooyb anajty miid jiiin, e jahuengi cujc-huäcxy je mejy oy y'ahuimbity ni'py. ⁹E jahuengi cujc-huäcxy oy y'ögy huidijaty anajty tzinaayb ma je mejy. E je maybarco huidijaty anajty ma je mejy, nañ jadu'n jahuengi cujc-huäcxy oy ytimyhuindigoydäy.

¹⁰Chi je midugiigpi ángel yajxuxy je' ytrompeti, e huin'it oy tüg madza' mijpi ycäy. Je madza' jadu'n nipaady nej tüg mijjiiin huidibi nayyajcodiicxim. Je madza' oy ycäy ma jahuen cacujc-huäcxy mijnií, etz ma nii muxy. ¹¹Je madza' hue' je' anajty xii'adyii ta'm'ujtz. E je nii jahuen cacujc-huäcxy oy yjajtni ta'm, jadu'n yta'mity nej ta'm'ujtz, e ooy jäy may y'o'cy miid je nii ycixpi co anajty ti y'ahuimbity ta'm.

¹²Je mimadaaxpi ángel yajxuxy je' ytrompeti, e huin'it jahuen cacujc-huäcxy je xii oy yhuindigooy, e nañ jadu'n je po' etz je madza' jahueng cacujc-huäcxy oy yhuindigooy. E miid jadu'n ycixpi je po' etz je madza' yhuí'mgixy jahuen cacujc-huäcxy agootz, e jahuen cacujc-huäcxy ytiicxin ocyejcní ajcxy xiim tzuum.

¹³Chi nhuin'ijxyich tüg me'ty anajty yqueec-huidity cuptzajp, e nmidooyich co ymina'ñ janch mic:

—¡Ay! iNaaxhuiñyjäy ajcxy ayoobidijc! co anajty trompeti yajxuxy je jatugiigpi ángeles ajcxy, huin'it ayo'n ypada'ñ je naaxhuiñjäy ajcxy, ayo'n ypadamy ajcxy, ayo'n ypadamy ajcxy.

9 Chi je migooxpi ángel yajxuxy je' ytrompeti, chi nhuin'ijxyich tüg madza' anajty ti ycäy naaxcíxy. E chi je madza' yajmoy je ahuaasti huidibi miid yaj'ahuädzip je ayoodac ma Dios cuend'aty miidity je ca'oybidijc. ²Chi je ángel yaj'ahuaach je jut ma je ayoodac, e ma je jut jiiiby ypidzimy jadu'n nej jiiinjoc huidibi pidzim ma tüg horni. ³E ma je joc ypidzimy ooy maymu' naaxhuiñygiíxy chachqueec-huidijtcixy ooy, e je mu' ajcxy ymooyi mic'ajt, jadu'n nej ca'ty miidity ytijp. ⁴Chi je' ajcxy yajcötujcmoy co ca' ni ti aay ni ti ujtz yajhuindigooygixipy huidibi yajpatp naaxhuiñ, ni ujtz ni quipy. Jëyi janchtiy ycötujcin mooyi co huen yajtzaachihuiipy je jäy ajcxy huidibi ca' miidity Dios ytiy'ajt y'lijxpejt ma yhuimboc. ⁵Ca' ajcxy yajcötujcmoy co yjáyaj'ó'ccixipy, jëyi co janchtiy ayo'n ajcxy yegipy migoox po'. E je ayo'n huidibi anajty ajcxy yejcpy jadu'n je' nej co ca'ty jäy yajtzaachiy miid ytijp. ⁶Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pátcixipy. Ooy anajty janijot'ájtciy o'cin, e cöguëgiib ajcxy je o'cin.

⁷Je maymu' jadu'n je' anajty yquëxïgy nej maygohuay huidibi ni'ixi'ijtcixp co yajnicxáanigixy ma tzip ytuna'ñyii. Ymiid anajty je maymu' ma ycohuajc jadu'n anajty quëxïgy nej oori coroni. E je maymu' yhuiniyjijp jadu'n yquëxïgy nej jäy yhuiniyjijp. ⁸Je maymu' ymiid anajty ycöhuay jadu'n nej töxyjäy ycöhuay, e ytiitz jadu'n nej jamгаа ytiitz. ⁹E je maymu' ymiid anajty ajcxy jadu'n nej pujx huidibi miid ñinïcx cohuangixy. E co ajcxy queec-huidity, ooy ajcxy yqueec yaj'amüy jadu'n chachne'mïy nej je carro huidibi cohuay ajcxy yjugujcyp co ñicxcixy ma tzip ytuñyii. ¹⁰Je maymu' ymiid anajty ajcxy ypïxy tim jadu'n nej ca'ty ypïxy, e ma ajcxy ypïxy ymiid anajty ytijp. E ma ajcxy ypïxy miidity anajty je mic'ajt co jäy ajcxy yajtzaachihiuipy migoox po'. ¹¹E je maymu' je' ajcxy yrey'ajtp je ángel huidibi nigohuajc'ajtp je ayoodac, hue' xii'adyii hebreo'amy Abadón, e griego'amy yxiiijity Apolión, hue' je yxii yhuimbidezimy: je huidibi yajhuindigooyb.

¹²Najx je' je ayo'n jayijpi, e ytigoy'ity je jametzpi ayo'n co je jayijpi ti y'ocjadyii.

¹³Je midudujcpi ángel yajxuuxy je ytrompeti, chi nmidooyich tüg ayuc choón ma je midaaxpi huaj mu'n ity ma je altar ac óoribi, huidibi anajty ijtp ma Dios yhuinduu. ¹⁴Je ayuc ymina'ñ:

—Nima' je midudujcpi ángel huidibi anajty trompeti miid: “Najtzmazdi' yi midaaxpi ángeles huidibi ajcxy coxoch ijtp ma Eufrates mijniiba'.”

¹⁵Huin'it oy yajcoguejtтуtcixy je midaaxpi ángeles, jigix yjäyyaj'o'ccixipy jahuen cacujc-huäcxy huidibi yajpatp ya naaxhuiñ. Je midaaxpi ángeles ni'ixi' je' anajty y'ijtcixy, je huin'it hori, je huin'it xii, je huin'it po', je huin'it jimijt co anajty yaj'ögaangixy jahuen cacujc-huäcxy je naaxhuiñybi jäy ajcxy. ¹⁶E nmidooyich co ajcxy michoy je soldadtijc huidibi anajty ajcxy cohuaygix. E hue' mejtz migo'px millón anajty ajcxy ñaybattáayigixy je soldados ajcxy.

¹⁷Jadu'n nhuin'ijxyich je cohuay ajcxy, e miid je ñijäy ajcxy huidibi anajty yaj'iñaayb. E je ñijäy ymiid anajty ajcxy pujx ma ycaach, je' miid ñinïcx cohuaangixy. E je pujx hue' anajty ycolor tzaptz, azul etz pu'tz. Je cohuay ajcxy jadu'n anajty ycohuajc nej jamгаа ycohuajc, e ma ajcxy y'ahuac ypidzimy nej jiin, nej jijnjoc, etz nej azufre. ¹⁸E miid jada jahueng cacujc-huäcxy naaxhuiñyjäy chach'o'cy ajcxy miid je jiin, je jijnjoc etz je azufre ycixpi huidibi anajty pidzimb ma je cohuay ajcxy y'ahuac. ¹⁹Je cohuay ajcxy ymiid anajty mic'ajt ma y'ahuac etz ma pïxy. Com je' ajcxy ypïxy jadu'n je' anajty nej xoox miid ycohuajc, e je cohuay ajcxy chach'ahua'ndaaccixy miid ypïxy.

²⁰E je jacjadyii jäy ajcxy huidibi ca' y'o'cy miid jadayaabi ayo'n, ca' ajcxy yjothuimbijty ma Dios, ca' ajcxy ixmajch je jibicpi huidibi ytungixp. E ni ca' ajcxy ixmajch nej ajcxy je ca'oybi huindzigiigixy. Nañ jadu'n ca' ajcxy ixmajch nej ajcxy huindzigiigixy huidijaty ajcxy oyduñyip miid plata,

míid bronce, etz tzaadzech etz quipychech. Je huidijaty ajcxy y'oydumyby etz ñidzejtztuutcixy, ni yca'ijxcixy, ni ycamidoogixy, ni ycaýöygixy. ²¹E ni ca' je jáy ajcxy yjothuimbijtcixy ma Dios, ca' ajcxy ixmajch jadu'n nej ajcxy chachjáyyaj'o'ccixy, jadu'n nej ajcxy tzachcaxpojccixy ymigügtijc, jadu'n nej ajcxy huingbi töxyjäy tzachmígapxtigooygixy, etz jadu'n nej ajcxy chachmeetzcixy.

Je ángel míid je mutz libro

10 Nhuin'ijxyich co chooñ tzajpjoty tüg ángel micpi ñiducyity míid joc, e miidity i'ñch ma ycohuajc. Je yhuiñyijjp yquëxígy nej xii. Je' ytecy jadu'n yquëxígy nej mijjiñye'n. ²E ma yci' miidity tüg libro yëphuäcxy, e pidacy y'a'oydecy mejyhuingíxy, e y'anajytecy pidacy naaxhuiñgíxy. ³Chi je ángel oy janch mic yaaxquency jadu'n nej tüg jamgaa yäxy. E co anajty jadu'n ti yaaxquëgy, chi oy yajmidoy huixtujc jidijtin huidibi ycapx yci'm'ayuc. ⁴Co je huixtujcpi jidijtin oy ycapxtaaygixy, chi iich anajty njaaya'ñich huidibi ti capxy. Chi nmidooyich tüg ayuc chooñ tzajpjoty xyñimäyich:

—Mi'it jada ayuc yüch huidibi yi huixtujcpi jidijtin ti capxy, ca' mjaay.

⁵Chi je ángel huidibi nhuin'ijxich co mejyhuingíxy etz naaxhuiñgíxy ytinäy, yujcxajy yci' a'oy'amybi tzajpcíxy. ⁶Chi je ángel capxcödujcy co je Dios huidibi jugy'ajtp huinixii huinitempo, je huidibi yajcojy je tzajp, je naaxhuiñybi, je mejy etz

tüg'óciy huidibi jiiby yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachypi ayo'n ya naaxhuiñ. ⁷Co yhuaad'ajtnip je xii je tiempo ma anajty je mihuixtujcpi ángel yxuux yajxutzondägy, chi cuyduunip je Dios y'ayuc ytiy'ajt huidibi ca'pin anajty huinjihuüy, je ayuc huidibi je Dios ytumbidijc je profetas ajcxy ñajtzcapxy jecy'ajty.

⁸Je ayuc huidibi nmidoohuich, je huidibi anajty ti chooñ tzajpjoty, ycapxy je' jadüg'oc, e xyñimaayich:

—Nícx miich etz ciyig yi libro huidibi yëphuäcxy yi ángel ymiid ma yci'. Je' je' je' je' ángel huidibi anajty tinaayb mejyhuingíxy etz naaxhuiñgíxy.

⁹Chi n'óyich ma je ángel nbijctzooyich co huen xymöyich je pi'clibro, chi je' xyñimaayich:

—Matz e cojücxnax, e xyajta'mmiyip mjot e ma miich m'ahuac mjihuñhuipy päg jadu'n nej ceripäg.

¹⁰Huin'it iich je pi'clibro ngiyigy huidibi je ángel anajty ymiid ma yci', e chi iich je' ngöjicxnajxy. Ma iich n'ahuac njihuñyich janch päg jadu'n nej ceripäg. Co oy ngojüicxnajxtäyich, chi oy y'ahuimbijtni janch ta'm ma iich njot. ¹¹Chi mic'amy nyajnimayich:

—Nícx miich capxhuäcx jadüg'oc je ayuc huidibi Dios ti xymöy, je huidibi ti mgapxhuäcxy ma je mayñaax maygajp, ma je mayñaciones, huidibi canaag ayuc capxcixp, etz ma je reydijc ajcxy.

Je metzpi testigo

11 Chi jada' nyajmooyich tüg paxy, jahuengi jadu'n

anajty yquëxïgy jadu'n nej baari huidibi quipx yajhuamb. Chi ajcxy xyñïmaayich:

—Pidïg e quipxta' yi Dios ytiç, nañ jadu'n quipx je mesi ma Dios yajhuindzigïy, etz nañ jadu'n michou naag jäy ajcxy jiiiby Dios huindzigïygïxy. ²Je Dios ytiba' ahuing miich je' pidäg, ca' mguipxïpy. Com yï' yï' ti ycidïgïyïi yi jäy ajcxy huidibi ca' yjudïójäyïty. Yi jäy ajcxy huidibi ca' yjudïójäyïty ymïmadägamyb ajcxy je Jerusaléngajp ma Dios miidity tzïnaydac etz ane'mamb ajcxy jiiiby huixchiguïpx metz po'. ³ïch metz testigo nguexipyïch ma je cajp ma Dios miidity tzïnaydac, e yï' ajcxy capxhuäcxamb ïich n'ayuc tüg mil jametzmiçgo'px jatugi'px xii. Yxoxyïty ajcxy miid huit nicuyjaam ixcuyjaam.

⁴Je metzpi testigo jadu'n nipaady nej je metzpi olivo cop etz je metzpi candelero huidibi tinaaygixp ma je Dios yhuinduu, je huidibi ñaaxhuiñybi ane'mb. ⁵Pen ji pin nej jaty midundïgoya'ñ je metzpi testigo, je' ajcxy yajpidzimip je' ajcxy jïin ma y'ahuac, yjicxtähuïpy yjïindähuïpy je' ymidzip. E jadu'n je' y'ögïpy pinjaty anajty je metzpi testigo midundïgooyb. ⁶Je metzpi testigo ymiid yi' ajcxy cötujc co ahuäctüjccixity je tzajp, ca'ydi ytüy jadu'nyï tiempo anajty ïihuäxcixy capxhuäxcixy Dios y'ayuc ytiy'ajt. E nañ jadu'n ymiid ajcxy cötujcin co ñii yaj'ahuimbïjtçixïpy ni'py. Yi' ajcxy yajtuniib yaj'jadiib canaagnax ayo'n ya naaxhuiñ, naag'oc anajty ytimdzójccixy. ⁷E co anajty je metzpi testigo

ajcxy yajmaaygïxy ytung, chi je iyujc huidibi anajty pidzimb ma je ayoodac, je abismo, je' je' tziptuunip miid je metzpi testigos etz yaj'öctähuïp je metzpi testigo. ⁸Chi je metzpi testigo ñinïcx ajcxy yhui'mïpy mijniigujc mijtügujc jim ma je mij ciudad ma je Huindzin Jesucristo yajcruudzpejti, je cajp huidibi tundïgooy miid Dios tim jadu'n nej Sodoma etz Egipto ytundïgooy jecy'ajty. ⁹Nijëjïty jäy ajcxy huidibi xi ya conaaxip cogajpïp, oy ypinjäyïty, oy ti ayuc capxcixy, y'ixïpy ajcxy tugiig xiijagup je metzpi testigo ñaaxnïcx mijtügujc, e ni ca'a'ixïhuïpy ajcxy co yajnaaxtigïhuïyïb. ¹⁰Huidijaty ajcxy tzïnaayb ya naaxhuiñ ooy yxondäaccixïpy etz yjotcugïygixïpy miid je' ycixpi co je metzpi Dios ytestigos ajcxy anajty ti y'o'ccixy. Chi je mayjäy ajcxy miñ xyïpy ñaymóoyigixïpy tijaty, e ñayyajniçguéjxigixïpy tijaty. Com je metzpi yëdyjç huidibi nidïy'ajt'ajtp anajty Dios ytiy'ajt, ti anajty ooy ayo'n yejccixy ma naaxhuiñyjäy ajcxy. ¹¹Codugiigxiï jacup naxy, chi Dios cijx yajjugypïjctäy je metzpi öcpi, e chi ajcxy jadüg'oc ypidïgy, e pinjaty je' iïx, ooy je' ajcxy chachchigïy. ¹²Je metzpi testigo huidibi nidïy'ajt Dios, midoy ajcxy tüg ayuc janch mic jiiiby tzajpjoty anajty ñimäayigïxy:

—Pejtçix yeeby cix.

Chi ajcxy ypa'ttigïy tzajpjoty ma tüg joc, e iïxi ajcxy ymidzïptïjç. ¹³E janch huin'ftïy ooy naax yïcxy miid tüg mic ujx. E tüg picypï je majc picypï jäy jim Jerusalén oy ymïjahuiïygïxy. E miid je ujx ycixpi

y'o'cy ooy mayjäy, ñaybaati je öcpi huixtujc mil yëydijc. E jacjadyii jäy ooy chigiiygixy yjihuiiygixy, e ojadajtcixy mibijctzoogixy ooy je Dios tzajpjoty.

¹⁴Ti ñaxy je mimetzpi ayo'n, chi tzojc ymiin je midugiigpi.

Je mihuixtujcpi trompeti

¹⁵Chi je mihuixtujcpi ángel yajxuxy je' ytrompeti, e huin'it oy yajmidooy may'ayuc tzajpjoty mic yminañ:

Je ane'min huidibi ya naaxhuiñ, yi' je' cham miid ajt nHuindzin Dios etz yi' yCristo, e yi' je' ane'mip huinixii huinitiempo.

¹⁶Je iipxmidaaxpi mijjäy huidibi anajty ajcxy iñaa'yb ma y'ane'mdac ma Dios yhuinduu, cijx je' ajcxy yhuioj'ihuiydaaygixy, e chi ajcxy ooy Dios iibaty capxpaty, yminaangixy:

¹⁷Huindzin Dios, Dioscojuyip nyajnájxcixpich ma miich, huidibi jac mic'ajt miid ca'ydi jac pin. Miich tüg'óciy mdundaayb mjahtaayb mnejhuiydaayb. Miich je' huidibi ijtnaayb, e ti m'ijtnäy, e m'ida'ñyi, com miich ti m'ijxcugiy je mgötujcin, e ti mbidägy m'ane'min.

¹⁸Mayñaax maygajp mayñaaxhuiñyäjy ooy yjotmäty ajcxy, miid co ti xii hori paady co miich mdzaachtuna'ñ je jäy ajcxy miid ypocy ycixpi. Ti je xii je hora paady co miich mdiyduna'n je jäy ajcxy tiibi y'o'ccixy. Ti je

xii je hori paady co miich mmöhua'ñ je mdumbidijc ypremio, je mdumbidijc huidijaty najtzcapxiy ajcxy miich m'ayuc, huidijaty tudägy'ajtin ti patcixp ma miich, je huidijaty miich mxii xychigiiyip, huen ymij'ana'city huen ymutz'ana'city. Ti je xii je hora paady co miich myajtigoya'ñ je pinjaty yajhuindigooygixyp naaxhuiñyäjy ajcxy.

¹⁹Je huin'it tiempo oy Dios je ytijc y'ahuäch jiiyb tzajpjoty, e chi nhuin'ijxyich je caax ma Dios ycötujcin y'ity. Nañ jadu'n oy nhuin'ijxyich huidzuc, etz nmidooyich co ooy ñe'my, etz nmidooyich enee yjidijtin, etz njihuiiyich tüg ujx, etz ooy yca'y eneediitz mijaty.

Tüg töxyjäy etz je ama'y tza'ñ

12 Je huin'it hora oy yquëxgy tzajpcixy tüg ijxpejt mijpi. Tüg töxyjäy ñidigooyity miid xii, jadu'n nej jihuüy miid tüg huit ñimochity, e jadu'n yquëxgy nej jihuüy anajty po' yajhuäcpety, e ymiid ma ycohuajc tüg corona ac oori huidibi majmetz madza' miid. ²Jadayaabi töxyjäy hue' anajty ungmijäy'ajtp, e janch yaax tinaayb je' anajty miid je tzaachypi, miid co y'ung anajty yajma'xung'ada'ñ. ³Huin'it oy yquëxgy jadüg tiy'ajt ijxpejt tzajpcixy. Tüg ama'y tza'ñ janch mij, tzaptz ycolor, e miidity huixtujc ycohuajc, majc ymu'n, e tüg corona majaty ycohuajc. ⁴Je mij tza'ñ miid je' ypixy jugujcmujc

jahueng cacujc-huäcxy je madza' jim tzajpcíxy. Chi je' najtzyemiyday je maymadza' naaxhuiñyáxy. Je mij tza'n oy yhuäcxy ma je töxyjäy yhuinduu huidibi anajty ungbadamb tzojc, chi tzüdzan je pi'c'ungma'xung janch tim jëyi anajty yma'xung'aty. ⁵Chi je töxyjäy yajma'xung'ajty tüg pi'cyëdyjc, huidibi ane'mip miid Dios ymic'ajt, ymiid yi' tüg pujxtajc huidibi ijpexjt ajt co mij ane'min miidity ya naaxhuiñ. E yajpjcy je y'ung, chi yajnicxi ma Dios etz ma je' y'ane'mdac. ⁶Chi je töxyjäy yqueecy ñicxy mijtigüduum, ma anajty Dios ti ñi'ixäyii y'it ylugar co jim y'idipy, e jim ymöhuiyb ycaayin y'uucin tüg mil jamejtmigo'px jatugi'px xii.

⁷Je huin'it tiempo tüg tzip yjajti tzajpjoty miid je' ycixpi. Chi Miguel huidi mij cötujcin miid, miid jadyii y'ángeles ajcxy, ooy chiptuñ miid je ama'y tza'n etz yi' y'ángeles ajcxy. ⁸E ca'p je ama'y tza'n ajcxy ymadacy ma je tzip, e ca'p je' ajcxy miid'ajty tigiydac tzajpjoty. ⁹E jadu'n Dios yajqueecy je mujcu', je ama'y tza'n mijjäybi, jilby tzajpjoty. Je' je' je ama'y tza'n huidibi xii'ajtp diablo etz Satanás, je huidibi huin'imb tüg'óciy naaxhuiñyäy. Je mujcu', je ama'y tza'n, miid je' y'ángeles ajcxy oy yajcötijnajxtäy ya naaxhuiñ.

¹⁰Je huin'it hora nhuinmidooyich tüg ayuc janch mic tzajpjoty choon, yminañ:

—Ti je xii je tiempo nigoody mina Dios ti nihua'n ti yajnidzögy jäy ajcxy ma je mujcu'; mina Dios ti yajniguëxigy yi' ymic'ajt;

mina Dios ti yajniguëxigy yi' y'ane'min; etz mina Cristo ytigiüy ane'mbi miid ymic'ajt. Com ti Dios cötijnaxy je mujcu' huidibi tzachxip iich ajt nmigügtijc, je mibijcpidijc. Je mujcu' anajty tzachxip ajcxy xiim tzuum ma Dios. ¹¹Iich ajcxy nhermanotijc ti yi' mimadaaccixy je mujcu' miid je Dios y'ung ñi'py, etz miid je' y'ayuc ytiy'ajt tiibi mibijccixy, je huidibi ajcxy nidiy'ajtcixp ma yi mayjäy. Ca' ajcxy tzigy anajty co yjugy'ajt ytigöoygixip. Nigi ni'ixi y'ljtcixy anajty miid ymibijcin oy ytimy'ó'ccixipy. ¹²Jotcujc'ajtcix etz jotcugiygix huidibi jilby tzinaaygixp tzajpjoty. Ayo'n ypadamyb ajcxy huidibi tzinaayb naaxhuiñyáxy etz mejyjoty. Com je mujcu' ti je' ycidägy ma miich ajcxy miid chip y'ejcín. Com je mujcu' ñejhuiyb co tim jayinjaty jahuenjaty xii tiempo jacmiidity.

¹³Co je mujcu' ijxy co ti yajcötijnaxy ya naaxhuiñyáxy, chi ooy pahuidijttacy je töxyjäy huidibi anajty ti yajpi'c'aty pi'cyëdyjc.

¹⁴Chi je töxyjäy metz me'tyqueec mijpi yajmoy, jigix cöguëgipy je ama'y tza'n, ñicxip agueegiccip mijtigüduum ma je ama'y tza'n ca' ñijädiby. Jim mijtigüduum yajmoy ycaayin y'uucin tugiig jimijt ja cup. ¹⁵Chi je ama'y tza'n ooy nii yajpidzimy ma y'ahuac, jigix y'ahuimbidity mij nii huidi je töxyjäy pagujip mij nijoty. ¹⁶E yi naax ooy je töxyjäy pubejty, chi je naax y'ahuäcxy, e uuctiitztay je nii huidibi anajty je ama'y tza'n ti yajpidzimy ma y'ahuac. ¹⁷Miid jada ycixpi je ama'y tza'n ooy

y'ahua'ndacy miid je töxyjäy, chi ñicxy tziptumbi miid je töxyjäy y'ap y'oc huidibi jacjimip, je' ajcxy huidibi cuydumb Dios y'ane'min ycötujcin, je' ajcxy huidibi cuydumb je ayuc huidibi Jesucristo anajty capxhuäcxyp.

Je metzpi ca'oy'iyujc

13 E jim ndinay'ihuiiyich ma püjot mejypäbi. Chi nhuin'ijxyich co tüg iyujc janch oy chigiinyñi ypidzimy mejyoty ymiid anajty huixtujc ycohuajc, e majc ymu'n. E ma ymu'n miidity majc corona. E ma ycohuajc miidity anajty cojaay yxii huidibi yajjotma'tp Dios. ²Jadayaabi ca'oy'iyujc huidibi nhuin'ijxyich, jadu'n anajty yquëxigy nej tüg cuuxyubijy. E ytecy jadu'n anajty yquëxigy nej osi ytecy, e y'ahuac jadu'n anajty yquëxigy nej jamgaa y'ahuac. Chi je ama'y tza'ñ oy cötujc möy, mic'ajt möy, mij'ane'min möy, je ca'oy'iyujc. ³E n'ijxyich tüg ycohuajc ma je ca'oy'iyujc co mij chaachijity, nej jihuüy je' yaj'ögiib. Chi je chaachi'au oy choogy, e tüg'öciy naaxhuiñyjäy ooy janch jihuiygixy huinmaaygixy miid jada ycixpi co ti choocy. Chi je mayjäy ajcxy panicxy je ca'oy'iyujc. ⁴Je mayjäy ajcxy ooy huindzigiiygixy je ama'y tza'ñ, je mujcu', com je' co anajty ti möy cötujcin ane'min je ca'oy'iyujc. Chi ajcxy nañ jadu'n ooy huindzigiiygixy je ca'oy'iyujc, chachminaangixy:

—¿Pin jada' ocjadu'nip nej jadayaabi ca'oy'iyujc, e pin jada' octziptuunip miid yi'? Ca' pin.

⁵Chi je ca'oy'iyujc yajmooyi mic'ajt, jaydëbi amij agix capxip etz nigapxip Dios oy jibic, nej huaad Dios yajjotmäty. E nañ jadu'n mic'ajt moy, jaydëbi miid'adipy ane'min cötujcin huixchiguipx metz po'. ⁶E jadu'n je' tuuñ. Nigapxy ni'ojiy ooy Dios. Nigapxi Dios yxii oy ca'oy, etz nigapxi ni'ojiy Dios ytijc. Nañ jadu'n nigapxy ni'ojiy huidibi ajcxy jibby tzinaayb tzajpjoty. ⁷Chi mic'ajt ymooyi, jigix chiptuunip miid je huidijaty mibijcp Dios, huidijaty miid ity Dios, ixti mibaad mimadaaccixy. Nañ jadu'n mooyi cötujcin mic'ajt, jigix ane'mip naaxhuiñyjäy huen huidibi razaity huen huidibi cajpity, huidibi capxcixp huen huidibi ayucity. ⁸Tüg'öciy mayñaaxhuiñyjäy ajcxy huidijaty janch ni ycamiiñ yxii jaybety ma je jugy'ajt libro huidibi je Dios y'ung, je Cordero, ymiid. Dios yhuinma'ñypidacy jayijp ca'ni naaxhuiñybi anajty chondägy co y'ung y'öga'ñ miid jäy ajcxy ycixpi, jaydëbi cijxaayi ajcxy yxii ma yi jugy'ajt libro.

⁹Pinjaty tädz'ac miid, pinjaty mido'mbigamb jada ayuc, huen mido'mbijccixy. ¹⁰Pen Dios ti yhuinma'ñypidägy co pinjaty ymigüg yajnicx mach, nañ jadu'n je' ajcxy nicxip mach ci'm. Pinjaty ymigüg yaj'öcp nañ jadu'n y'ögip jadu'n nej ymigüg anajty yaj'ögy. Paady ycixp yi' ajcxy huidijaty mibijcp Dios, huen yajtungixy miid ymigügtijc mecxtujcin etz mibijcin.

¹¹Huin'tit nhuin'ijxyich jadüg ca'oy'iyujc chooñ naaxjoty, e ymiid anajty metz ymu'n, tim jadu'n nej

pi'ccöbixymang ymu'n. E je' jadu'n anajty ycapxy nej je ama'y tza'n ycapxy. ¹²Je mimetzpi ca'oy'iyujc ymiid ane'min huidibi je jayijpi ca'oy'iyujc ti ymöy. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñyäj huen ojadajtcixy huindzigiigixy je jayijp'atypí ca'oy'iyujc huidibi anajty je chaach'au ti chögy. ¹³Nañ jadu'n ooy anajty tijaty mijhuinma'n tuñ, ixti jün yajcödigiiyb tzajpcíxy, yajcäy naaxcíxy ma jäy ajcxy yhuinduu. ¹⁴E miid je mijhuinma'n huidibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'iiñ huidijaty ajcxy tzinaayb naaxhuiñ. Nañ jadu'n je' pidacy y'ane'min co yajniogjtútcixipy je ca'oy'iyujc huidibi anajty tzachijip miid espada, e ca' y'ögy, jadu'n anajty jactzinäy. ¹⁵Je mimetzpi ca'oy'iyujc yajmic'ajtmoy co yajjugy'adip je tzaadzech tiibi anajty yajniogjtútcixy, jigix je' ycapxipy etz nañ jadu'n jigix je' ane'min pidägipy co yaj'öctähuiipy pinjaty ca' y'ojadadyi. ¹⁶Chi je mimetzpi ca'oy'iyujc ane'my yi pi'ctijc, mij'anäctijc, mijjäydijc, comeñydijc, ayoo bitijc, tumbidijc, midumbidijc etz jac pinjaty co huen ajcxy tiy'ajt iixpejt jadu'n pidaaccixy ma ajcxy y'a'oygi', o pen ca', ma yhuimboc. ¹⁷Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymiid je ca'oy'iyujc tiy'ajt y'l'ixpejt, o yxii, o je' yxii ñinúmero. ¹⁸Jadayaabi ayuc chojcpy ixpjcin, pinjaty huinjihuuiyb jëbi mihuinma'nybaady ti número je

ca'oy'iyujc miid. Je' je' je número huidibi tüg jäy miidity. Je jäy ñinúmero hue' je' tudujc migo'px jatug'px tudujc.

Je nimigo'px jahuixchiguipx milbi yëydijc ajcxy y'iy

14 Chi jada' nhuin'ixyich cumäyjoty je Dios y'ung, je Cordero, anajty ytinäy ma je cögop huidi yxii Sión. Ymiid anajty migo'px jahuixchiguipx madaax mil jäy huidibi anajty ajcxy miid cojay ma yhuimboc je Dios y'ung yxii, etz yi' yTeedy yxii, je Dios Teedy. ²Nhainmidooyich tüg ayuc choon tzajpjoty, jadu'n nmidooyich nej mijni y'a'lich, nej enee yjidity. Hue' je' anajty nmidooyich nej mayjäy y'arpa yajcoogixy. ³Ooy anajty ajcxy igixy tüg iy jemybi ma je mij'ane'mdac yhuinduu, ma je midaxpi iyujc jugy'ajtmidpi yhuinduu, nañ jadu'n ma je mijjäy ajcxy yhuinduu. Jac ni pin je' anajty ca' huaad ixpicy je iy, jëyi ajcxy je huixchiguipx midaax milbi jëbi ixpjccixy je iy, je huidibi ajcxy Dios ti yhuin'ixyii etz ti yajnidzögy ya naaxhuiñ. ⁴Jada je' ajcxy huidibi ca' ajcxy migapxtigoogyixy töxyjäydijc, huadz tudägy ajcxy yjot yhuinma'n miidity, ca' ajcxy pijccixy. E ypanicxyp ajcxy je Dios y'ung, je Cordero, oy tim ma'ámy ñicxy. Yi' ajcxy je jayijp'atypí jäy ya naaxhuiñ huidibi Dios ti jyuybidzimy ma anajty ijtcixy codoogiy miid ypocy ycixpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayijpi je almas ajcxy huidibi ti yajpidzimy ya naaxhuiñ. ⁵Ni ti anii

ti ycajajpaady ma je' ajcxy. Com ca' ajcxy tibocy miidity, ca' ti xihuín ajcxy miidity ma Dios y'ane'mdac.

**Je nidugiigpi ángeles
ajcxy y'ayuc ytiy'ajt**

⁶Chi nhuin'ljxyich jadüg ángel yqueec-huidity cuptzajp, e ymiid anajty Dios ytiy'ajt jemybi oybi huidibi ijtp huinixii. Hue' je' yajcapxhuácxip ma huidibi anajty ajcxy tzinaaygixp naaxhuiñ, huindu'my nación, huen huidibi jáyity, huidibi capxp huen huidibi ayucity, huidibi tzinaayb ma huen huidibi cajpity. ⁷E je ángel ymina'ñ anajty janch mic:

—Tzigiiygix Dios, huin'iigix huinyaaxcix cömaygix Dios. Ti paady je xii je hori mina Dios tiyduna'ñ yajtigoya'ñ yi' ajcxy huidibi jibic tumb. Ojadajtcix je huidibi yaj'oyiiy je tzajp etz je naax, je mejy etz majaty nii ymuxy.

⁸Co je midügpi ángel ycapxtaay, chi je mimetzpi ángel ymina'ñ:

—Ti ymic'ajt ytigoydäy je Babilonia je mijpi cajp. Yi Babilonia jäy ti yajhuinma'ñydidogoydäy je naaxhuiñyjäy miid yjibic-huinma'ñ, paady yi Babilonia jäy ayo'n miidity cham, com je Dios ti ymijotmättäyii ajcxy. Jadu'n Babilonia nipaady nej tüg töxyjäy huidibi huin'imb yëydjctjic miid anii etz jocni.

⁹⁻¹⁰Co je mimetzpi ángel ycapxtay, chi je midugiigpi ángel ymina'ñ janch mic:

—Pen pinjaty huindzigiyyb yajmij'ajtíp je ca'oy'iyujc etz je ñigojtuutin etz nañ jadu'n cöbijccixy je ca'oy'iyujc ytiy'ajt y'ijxpejt ma yhuimboc o ma yci',

hue' Dios tzaachytuniib yi jadu'mbi jäy ajcxy mictägy, ypaadip ajcxy Dios chip y'ejcin. Tim jadu'n nipaady nej jihuüy Dios yaj'tügyii ajcxy je vino nii huidibi yi' ti ni'ixiy. Dios ti ni'ixiy je it ma ajcxy ayo'n pada'ñ, tim jadu'n nipaady nej je tasi ma Dios yvinonii ijtp. Chi je' ajcxy ayo'n paadipy ma ytoy je mijjiin miid azufre ma je Dios y'ángeles yhuinduu etz je Dios y'ung, je Cordero, yhuinduu. ¹¹Je jijnjoc huidibi anajty pidzimb ma anajty je mayjäy ayo'n paatcixy, pidzimip je' huinixii huinitempo. E ni pöccxin ycaca'ty xim tzuum miid je pinjaty anajty huindzigiyyb pa'tjihuiyb je ca'oy'iyujc etz miid y'ahuinax, o pen ycöbijccixy anajty je ca'oy'iyujc yxii ycojayity ma yhuimboc o ma yci'. ¹²Com Dios chaachytunamyb je jäy ajcxy huidibi ijtp miid je ca'oy'iyujc, paady ycixp copicy co yi jäy ajcxy huidibi ijtp miid Dios huen cuydungixy yajxon Dios y'ane'min ycötujcin etz huen mibijccixy mijpidaaccixy tudägy Jesús, etz nañ jadu'n yajtungixy mecxtujcin ma ajcxy chinaayin.

¹³Nmidoohuich tüg ayuc tzajpjoty choon xyñimäyich anajty:

—Cojay jada ayuc: “Jadachambi etz jancixpi xii tiempo, jotcujc ajcxy huidijaty öccixp co mibijccixy je Huindzin Jesús.” Je Espíritu Santo ymina'ñ co jadu'n tunamb jadamb, pocxnip ajcxy nej ytungixy, e co ajcxy yjadipy tzajpjoty, chi ajcxy nejhuñhuip je' ajcxy tzajpjoty tzinaaybi jadu'n nej je mibijcpi ajcxy anajty oybi ti tungixy.

**Co Jesús anajty miñ tiyuñ
tzaachytuñ jibicjäydijc**

¹⁴Chi jada' nhuin'ijxyich tüg joc janch poob. E ma je joc nïcx inäy tüg yquëxïgy nej je jäy huidibi tzoon tzajpjoty (je Cristo). Je' ymiid anajty ma ycohuajc tüg corona ac oori, e ma yci' miidity tüg hoz janch jïjpi. ¹⁵E ypidzimy ma je Dios chinaydac jadüg ángel, je' tzachmiyäxy anajty janch mic je huidibi anajty inäayb jocnigíxy, ymina'n:

—Pidäg yi mhoz, e yajpidig yi cosecha, com ti paady je xii je hori etz je cosecha ti chamni jilby naaxhuiñ.

¹⁶Huin'it je' pidacy je' yhoz ya naaxhuiñ, je huidibi anajty inäayb jocnigíxy, chi ya naaxhuiñ yajpidigy je ycosecha.

¹⁷Nañ tim jadu'n huin'it jadüg ángel ypidzimy ma je Dios chinaydac jilby tzajpjoty. Nañ jadu'n je' anajty miidity yhoz janch jïjp. ¹⁸Chi jadüg ángel ypidzimy ma je Dios ojadajttac huidibi anajty cötujc miid ma je jïin. Chi yaaxi janch mic je huidibi anajty je' yhoz janch jïjpi miid, chi nimay:

—Pidäg yi mhoz janch jïjpi ma yi muuxycha'm cosecha huidibi yajpatp jilby naaxhuiñ, com ti ooy chamni.

¹⁹Chi je ángel yajnaxjy je' yhoz naaxhuiñ, chi yajpidigy je camuuxycha'm cosecha, chi tüg'ftiy yajnigidacy ma huaad yajhuinmïxcy. Hue' je' yhuimbizimy co je' je' je mij ayo'n je mijtzaachypi huidibi Dios yquexamyb miid jäy ajcxy ypocy

ycixpi. ²⁰Je camuuxycha'm hue' je' oy yajhuinmïxcy Jerusalén cajppa'. Ma anajty ti y'ocnigidacpi ypidzimy ooy ni'py janch com, ycoody mabaad je cohuay ajcxy miidity yfreno, e ymijhuin'ajtin hue' anajty miidity tugiiig migo'px kilómetro.

**Yi ángeles ajcxy miid je
huixtucnajxpi ayo'n**

15 Huin'it nhuin'ijxyich jadüg tiy'ajt ijxpejt janch mijpi tzajpjoty, e janch oy huinmaayni. Huixtuc ángeles anajty miidity c'lam je huixtucpi tzaachypi ayo'n huidi cogixiiyñip, e miid jadu'n ycixa'n ytigoya'n Dios chip y'ejcin.

²E nhuin'ijxyich jadu'n nej tüg mejy ac vidrio, e je vidrio mihuudidii jïin. E jim anajty je jäy ajcxy huidijaty madac co ca' huindzigiy anajty je ca'oy'iyujc etz je' y'ahuinax, je huidijaty ca' ajcxy cöbijci je ca'oy'iyujc yxii ñinúmero. E jim anajty ajcxy ytinaaygixy nigixy ma je mejy ac vidrio huidibi janch adïicxp ajajp anajty, ymiid ajcxy je arpas huidibi ajcxy Dios mooyi. ³Ooy anajty igixy je Moisés y'iy, je Dios ytumbi etz nañ jadu'n anajty igixy je Dios y'ung, je Cordero, y'iy huidibi minamb:

Mij ooy, etz janch mijhuinmañ huidibi miich ti mduñ.

Huindzin, miich Dios huidibi jac mic'ajt miidip ca'ydi jac pin. Janch tudägy miich mni'aa mdu'aa. Miich rey'ajtp huindu'myñaaxhuiñ huinixi huinitiempo.

⁴¿Pin miich xyca'octzigihuamb, Huindzin? ¿Pin miich xyca'occömayaanip

mxii? Tug'óciy
naaxhuiñyäjy xyajmij'adipy
xyhuindzigihuiipy, com miich
naydügpajc je huätzpi Dios,
com miich nyaj'ijxp mgötujcin
co ytudägity.

⁵Co jadu'n yjajti, chi n'ijxyich co
y'ahuaach je Dios y'it jiiby ma Dios
ytijc huidibi yajpatp tzajpjoty, ma
y'ity je tzaa ma yjaybetyity Dios
ycötujcin. ⁶E ma je Dios yajhuindzigy
yajpa'tjihuiy, jiiby ypidziimy huixtuc
ángeles. Ymiid anajty ajcxy yci'am
huixtuc ayo'n tzaachypi. Hue' anajty
ajcxy yxoxity miid huit janch oybi
janch huätzpi, e janch adicxp ajajp
anajty. Ymiid anajty ajcxy oorihuiin
mabaad ycaachyjip. ⁷Nidüg je
midaaxpi iyujc jugy'ajtmiidpi moy
je huixtucpi y'ángeles huixtuc
tasi ac tim oori, janch ujtz je tasi
miid je Dios chip y'ejcin. ⁸E je it
ma Dios yajhuindzigy yajpa'tjihuiy
yajpa'tjihuiy ujtztay je' miid je jijnoc
huidibi jadu'n ñipatpy nej je Dios
y'oy'ajtin etz Dios ymic'ajtin. E ni
pin anajty huaad ca' jiiby ytigy ma
je Dios ytijc jiiby tzajpjoty, ixti cooni
je' yciyctähuiipy je huixtucpi ayo'n,
je tzaachypi huidibi je huixtucpi
ángeles ajcxy ymiid.

**Je tasi huidibi ujtz miid
ayo'n tzaachypi**

16 Chi nmidooyich tüg ayuc
chooñ ma Dios ytijc jiiby
tzajpjoty, nimay anajty janch mic je
Dios y'ángeles nihuixtucpi:

—Nixc ajcxy yajyojctuticix jiiby
naaxhuiñ yi huixtucpi tasi huidibi
ujtzity miid Dios chip y'ejcin.

²Chi ñicxy je midügpi y'ángel, chi
je' ytasi yajtemduty jiiby naaxhuiñ

ujtz miid may'ayo'n. E tüg'óciy je
mayjäy huidibi anajty ajcxy miid
ma yhuimboc je ca'oy'iyujc ytiy'ajt,
pinjaty anajty je ñigojtuutin
huindzigiiyip pa'tjihuiiyip, chi je'
ajcxy ypaati ñibidzim tüg ñibüdz
janch jibicpi, e huidibi janch pijcp.

³Je mimetzpi y'ángel yajyojctuty
je' ytasi huidi anajty ujtz miid
ayo'n mejyhuingíxy. Chi je mejy
y'ahuimbijty ni'py, jadu'n nej jihuiy
öcpi ni'py. E huidijaty iyujc jiiby
tzaaayb mejyjoty, cijx je' y'öctäy.

⁴Je midugiigpi y'ángel yajyojctuty
je' ytasi huidi anajty ujtz miid
may'ayo'n maajaty je mijni, etz
maajaty ni ymuxy, nañ jadu'n
ac ni'py je' y'ahuimbijttay. ⁵Chi
nmidooyich co je ángel ymina'n
huidibi ane'mb je ni:

—Huindzin Dios, tudägy mduñ
co ti mdiyduñ je naaxhuiñyäjy
ajcxy miid ypocy ycixpi, e jadu'n
ti mguexy mij ayo'n ya naaxhuiñ,
Huindzin Dios, janchypi huätzpi
miich, huidibi ijtnaayb etz ti
m'ijtnäy. ⁶Com je naaxhuiñyäjy
ajcxy tundigooy co ajcxy teemi
yojci je mibijcpidicje ni'py, je
huidibi mhuin'ijx, je huidibi ajcxy
miich m'ayuc najtzcaxiib anajty.
Paady ycixp miich je ni huidibi
yi naaxhuiñyäjy y'uuccixyp, ti
myaj'ahuimbity ni'py, com jadu'n
ajcxy mihuaadity je tzaachypi miid
ajcxy ypocy ycixpi.

⁷Nmidooyich co pinjaty ma je it
ma yajhuindzigy Dios, ymina'n:

—Janch jadu'n, Huindzin Dios,
huidibi tüg'óciy mic'ajt miid, miid
mdiy'ajt etz miid mdudägy'ajtin,
ti mdiyduñ je naaxhuiñyäjy ajcxy
miid ypocy ycixpi.

⁸Je mimadaaxpi Dios y'ánel yajyojctuty ma je xii je' ytasi huidi anajty ujtz miid Dios chip y'ejcin. Chi je xii yajmoy ymic'ajt co jäy nögiib miid je' yjiin. ⁹E tüg'óciy jäy ajcxy yxiidzaydaayi janch mic. E ni ca' ajcxy yhuinma'n yajtigajch, ni ca'ojadajtcixy ni ca' cómaygixy Dios. Nigi ajcxy ooy jibic Dios nigapxy ni'ojiiy, je Dios huidibi ane'mdaayb tüg'óciy ayo'n miid ymic'ajt.

¹⁰Je mimigooxpi y'ánel yajtemduty je ytasi, huidi anajty ujtz miid Dios chip y'ejcin, ma je ca'oy'iyujc y'ane'my etz ma tüg'óciy it lugar ma je ca'oy'iyujc y'ane'min, e huin'it oy ycoodziygidactäy. Yi jäy ajcxy ooy ytoodz oc'adzütmújccixni miid je ayo'n tiibi anajty ytuñyijadyii. ¹¹Per ni jadu'n ajcxy ca'ixmajch je jibicpi huidibi anajty ajcxy ytumyb. Nigi ajcxy ooy oyñinej ycapxcixy etz ni'ojiiygixy Dios tzajpjotypi miid je jübi pa'mii etz je nibüdz ycixpi.

¹²Je midudujcpi y'ánel yajtemduty je ytasi huidi anajty ujtz miid Dios chip y'ejcin ma je Eufrates mijni. Chi je mijni ytiich jigix jébi ajcxy je reydijc ñaxy huidibi ajcxy tzoomb xiibdzimy'amy.

¹³Chi huin'ijxyich co ypidzimy ma je ama'y tza'n y'ahuac, etz ma je ca'oy'iyujc y'ahuac, etz ma je profeta falso y'ahuac ypidzimy tugiig ca'oybi. E je tugiigpi ca'oybi jadu'n anajty yquëxigy nej tugiig tüc. ¹⁴E je tugiigpi tüc hue' ajcxy ca'oybi ymiid, e tungixy anajty mijhuinma'n miid je mujcu' ymic'ajt. E oy ajcxy

huoomucy huidijaty anajty rey'ajtp huindu'my naaxhuiñ, jigix je' ajcxy chiptúngixipy miid je mijpi Dios huidibi tüg'óciy mic'ajt miid, co anajty je xii je tiempo yhuaad'ajtni huidibi Dios ti yajniigödugiy.

¹⁵Jadu'n Dios ymina'n:

—Cuenditungix iich n'ayuc.

Ameech nhuimbida'nich naaxhuiñ jadu'n nej meetzpi ameech nicxy meech tijaty. Paady ycixp jotcuyc pinjaty ni'ixi xy'ahuixpich, je huidibi ypocy ti ymecxyii, e tudägy'ajtni ti paady ma iich jigix ca' jadu'n paadip nej tüg jäy huidibi yhuit ti meechyii, e jadu'n je' yhui'my ni'huädz, e tzo'ydu'n jihuüy co jäy yhuindixyii. ¹⁶Chi je tugiigpi ca'oybi huoomujctay ajcxy je reydijc ma tüg it huidibi yxii Hebreo'amy Armegecón.

¹⁷Je mihuixtujcpi angel yajyojctuty je' ytasi jim pojgoty, e ma je it ma ajcxy huindzigiy Dios etz ma je' y'ane'mdac tzajpjoty, jiiby tüg ayuc choon janch micpi ymina'n anajty:

—Ti ytuñyijadyii.

¹⁸Huin'it ooy yajti huidzuc, ne'min micpi etz jidijtin, ooy naax yüxcy miid tüg ujc janch micpi, niminaabi jadu'n ycajadyii maabi jäy chinay'íjtigixy naaxhuiñ. ¹⁹Chi je mij ciudad, je Jerusalén, oy yhuäcxy tugiig picy, nañ jadu'n je may ciudad huidibi huindu'myñaaxhuiñ, cijx ymijähuiydäy. Chi Dios jäymejtzcoty je Babilonia cajp nej je jäy ajcxy jim ytundigooygixy, e chi quejxy may ayo'n jim miid chip y'ejcin ycixpi. ²⁰Tüg'óciy je naax mejy'agujcpi ytigoyday. Etz

tüg'óciy tungop naaxhuiñyíxy cijx je' ytigoydáy. ²¹Nañ jadu'n ooy ycäy chooñ tzajpjoty eneedíitz mijjatypi majaty jäy ajcxy, janch jempxy anajty je eneedíitz, tügjatypi huixchiguípky kilo. Chi jäy ajcxy ooy oyñinej nigapxy ni'ojiy je Dios miid je eneedíitz ycixpi, com ooy je' mij chachjajti je ayo'n je castigi.

**Je töxyjäy jibictzinaaybi
chaachypi ycastigi**

17 Nidüg je huixtujcpi ángeles huídibi anajty ajcxy miid je huixtujcpi ytasi ymiñ. Chi ajcxy ymiydacy miid íich, xyñimaaygixich:

—Min yam, miñ nyajni'ixiy je tzaachypi huídibi ypadamyb je töxyjäy pocyumbi, huídibi íinaayb mejyhuingíxy. ²Je reydiyc ya naaxhuiñ ti ooy ytundiigooygixy miid jada töxyjäy, e je naaxhuiñyjäy ajcxy ti ooy huinma'ñydiigooygixy miid jada töxyjäy ypocytunii huinma'ñ, jadu'n nej jihuüy ajcxy ooy ti ymúucigixy.

³E Dios yjihui'ñ ymic'ajt xyajcumäyich e cumäyjoty xyajnicxyich je ángel mijtigídium. E jim n'ijxyich tüg töxyjäy yaj'íñäy tüg ca'oy'iyujc huídibi ycolor tzaptz, e janch niducy miid pinjaty yxii cojaayip huídibi yajjotma'tp Dios, e ymiid anajty huixtujc ycohuajc etz majc ymu'n. ⁴Je töxyjäy hue' anajty yxojx miidity miid huit janch oyjatypi, ycolor ucy etz tzaptz, ooy anajty yaj'oyguëxigy miid oori, miid pi'ctzaa janch oybi etz perla. Ymiid anajty ma yci' tüg tasi ac tim oori janch ujtz je' anajty miid jibic-huinma'ñ huídibi

ca' y'oyjäygidaacnity, huídibi pocytunii huinma'ñ miid. ⁵E ymiid anajty cojaay tüg xii ma yhuimboc huídibi ca' pin huinjihuüy. Je letra jadu'n ymina'ñ: “Je mijpi Babilonia, huídibi nigop'ajtip pocytunii huinma'ñ etz tüg'óciy tijaty ca' y'oyjäygidaacnity ya naaxhuiñ.”

⁶Mic'amy íich oy nhuinma'ñ nyajmiñ nyajmech co je töxyjäy hue' je' anajty ti yaj'loccixy je huídibi ajcxy mibijcp Dios etz huídibi ajcxy Jesús yjäy'ajtip, e jadu'n nipaady nej jihuüy je töxyjäy ti ooy ymügyii miid je mibijcpidiyc ñi'py. Co jadu'n nhuin'ijxyich, chi ooy ngijxy ngüejtyich njihuüy nhuinmaayich.

⁷Chi je ángel xyñimaayich:

—¿Nej co mgixy mgüety?

Íich miich nyajnimähuipy nej yhuimbidzimy huídibi ca' pin huinjihuüy ma yi töxyjäy etz ma yi ca'oy'iyujc huídibi yaj'íñäy, huídibi ycohuajc huixtujc miid etz majc ymu'n. ⁸Yi ca'oy'iyujc huídibi ti m'ixy, je' yi' tiibi chinäy e cham ca'p je' ma. Chi ypidzimipy ayoodactuuyb, jayijp ma anajty ca'ni nicxy y'ayoy ytigoy tücc'i'yi. E je jäy ajcxy huídijaty tzinaayb naaxhuiñ, e ca'p yxii y'ity cojaay ma je jugy'ajt libro huídibi oyíy ca'ni anajty naaxhuiñybi chondägy. Ooy je' ajcxy huinmáaygixipy jihuyigixipy co íjxcixipy je ca'oy'iyujc huídibi jecyip ti y'octzinaaybi, e cham ca' je' ma, e chi jada' jadüg'oc yhuimbida'ñ.

⁹Ya ii tigati pin jëbi huinjihuüy je huixtujcpi cohuajc, je' je' je huixtujcpi copjot ma je cajp y'ity. E je cajp jadu'n je' nipaady nej jada töxyjäy pocyumbi. ¹⁰Je huixtujcpi

cop jadu'n ajcxy nej huixtujcpi rey. Ma je huixtujcpi rey migoox je' ajcxy tiibi ymic'ajt ytigooygixy. Nidüg je' cham y'ane'my. Je jadügpi ca'ni je' ymiin. E co je' ymiinipy je huidibi cogixiib, ca'p je' mijcajee yhuäcxibiipy. ¹¹Je ca'oy'iyujc huidibi jecyip tzinay, e cham ca' ma, je' je' je miductujcpi rey, oy je' yjajjity nidüg ma je nihuixtujcpi rey. Huin'it je' ñicxnipy ayoobi jottigooybi tücc'i'y ayoodactuuby.

¹²Je majcpi mu'n tiibi m'ixy, je' je' je majcpi rey huidibi ca'ni ajcxy ytigiigixy ane'mbi. E cidigihuiib ajcxy ycötujcin co yrey'ajtcixipy tüg hora quipxyi miid je ca'oy'iyujc. ¹³Jada majcpi rey ajcxy tú'ciy ajcxy y'ljtcixy, tú'ciy ajcxy yhuinma'ñ, e yegipy ajcxy y'ane'min ycötujcin ma je ca'oy'iyujc. ¹⁴Tziptuunip ajcxy miid je Dios y'ung, je Cordero. E je Cordero ymimadactähuipy je' je majcpi rey ajcxy. Com je' je' tügpajc Huindzinip ma pin janaydjip huindzin. Je' je' tügpajc reyip jac mic'ajt miidpi ma je reydiyc ajcxy. E pinjaty Cristo miid y'lity, Dios je' ti huin'ixy, e tudägy je' panixy Dios y'ung.

¹⁵Nañ jadu'n je ángel xyñimaayich:

—Yi mejy tiibi m'ixy ma je töxyjäy pocytumbi ñäy, hue' je' jadu'n nipaady nej maygajp, nej mayñación ma mayjäy chinaygixy huidibi capxcixp canaagnax ayuc. ¹⁶Je majcpi mu'n tiibi m'ixy ma je ca'oy'iyujc, je' ajcxy ca'ixa'nip catzoga'nip je töxyjäy pocytumbi. Chi ajcxy ix'ijxnip je töxyjäy pocytumbi, yajhu'i'mipy ajcxy niñuadz. Chi ajcxy je töxyjäy

pocytumbi ñinix tzu'tzipy, e nöccixipy miid jün. ¹⁷Dios ti pidägy ma ajcxy y'aa yjot huen tungixy nej Dios tzocy, miid co anajty ti pidaaccixy tú'ciy yhuinma'ñ. E cötujc möhuaangixy ane'min möhuaangixy co yrey'adipy je ca'oy'iyujc, ixti cooni yajcuydundähuipy je ayuc huidibi Dios anajty ti capxy. ¹⁸Je töxyjäy tiibi mhuin'ixy, je' je' je mij cajp huidibi ane'mdaayb je reydiyc ajcxy huindu'myñaaxhuiñ.

Babilonia cajp oy yhuindigooy

18 Co jada jadu'n yjajti, chi nhuin'ijxyich jadüg ángel ycidägy naaxhuiñgixy, choon tzajpjoty miid ymij'ane'min ymijcötujcin, e ooy je naax yaj'aniñ miid je ytiicxin yjajin. ²Chi je ángel ooy mic yaaxqueecy ymina'ñ anajty:

—Ti ymic'ajt ytigooy, ti ymic'ajt ytigooy je mijpi Babilonia cajp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joonmaadac joondzinaaydac, je joon ajcxy huidibi ca' yhuädzity, huidibi ca' y'oyjäygidaacnity.

³Com ti je mayjäy huidibi tzinaayb ma tüg'ócixy nación yhuinma'ñyidigooygixy miid je Babilonia yjibic-huinma'ñ pocytunii huinma'ñ. Ti je reydiyc huidibi ane'mb ya naaxhuiñ miid ytundigooygixy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeeñbatcixy miid je Babilonia pocytunii ñegocio. Je Babilonia

jadu'n yi' nej tüg töxyjäy jibic-huinma'n miidpi.

⁴Chi nmidooyich jadüg ayuc chooñ tzajpjoty, e ymina'n anajty: —Pidzimgix ma yijiibi cajp com iich miich ajcxy një'ajtpy, jigix miich ajcxy ca' m'aminmugipy ma yi' ajcxy ypocy, e ni xycapaadip miich ajcxy je ayo'n tzaachypi huidibi Dios yquexamyb ma je Babilonia cajpjäy. ⁵Yi jadu'mbi cajpjäy ypocy ti oy mayiinyi e Dios yi' ajcxy tzachytuniib miid ajcxy ypocy ycixpi. Dios yjäymejchp yi' yjibic-huinma'n ajcxy huidibi ti tungixy. ⁶Dios ymoyhuimbiditye je tzaachypi yi Babilonia cajpjäy, jadu'n nej ajcxy yi' je' tzaachytuñ Dios yjäy ajcxy, Dios ymoyhuimbiditye je Babilonia cajp tzaachypi mejtz jadu'ni ca'ydi jadu'n nej yi' ti yecy. ⁷Mo' yi Babilonia cajp yi tzaachpyi ayo'n, tim jadu'n nej yi' ti ñaymöyii ma yi chinaayin etz ñayjihuiyi amij agix. Yi' ymina'n jotjoty huinma'nyjoty: “Iich mij'ane'mbi iich. Ca' nyajpaadyich nej tüg co'ögytöxyjäy miiditye tajin mayin. Ni nga'ixipyich jiiyin yaaxin.” ⁸Miid je' ycixpi tügxiyi ymiinipy je mij'ayo'n o'cin, tajin mayin, jiiyin yaaxin etz yuuba'm ma je Babilonia cajp. Chi ninögihiupy je Babilonia cajp miid jiin. Com yi Huindzin Dios ooy yi' ymijity, e yi' ti yajpocycäy yi Babilonia cajp, huidibi nipatp nej tüg töxyjäy pocytumbi.

⁹Je reydiyca yaaxhuiñ huidibi jibic-huinma'n pocytunii huinma'n tungixp quipxyi miid je Babilonia jäy, chi ajcxy ytájcixipy ymáygixipy yjiygixipy yáaxcixipy co anajty

ijxcixyp je Babilonia cajp jiiinjoty co anajty ytooybicy. ¹⁰Jiguem ajcxy yjacmij'ijxcixipy miid co anajty chigiygixy co páatcixipy ayo'n quipxy miid Babilonia, e ymináangixipy:

—iAy, miich Babilonia mij cajp, huidibi ooy mgapxpaadyity, ooy mmijity, ooy mmic'ajt miiditye! Per janch tim tüg jaxigy ti xñimiin je' ayo'n huidibi Dios ti quexy miid mbocy ycixpi.

¹¹Je ajuybidijc adoocpidijc huidibi ajcxy naaxhuiñ jiiygixipy yáaxcixipy ajcxy miid je Babilonia cajp ycixpi, com ca'p anajty pin juuyip ajcxy yjuy ytoocy. ¹²⁻¹³Je ajuybidijc adoocpidijc ajcxy ymiid oori, plata, tzaa oyjatypi, perla oyjatypi, lino huit oyjatypi, sedi huit oyjatypi, rey yhuit, huit color tzaptzpi, nañ jadu'n ymiid ajcxy canaagnaxpi quipy huidibi oyjaty xuucp, pajc vaso, quipy vaso oyjatypi, cobre vaso, pujx vaso, marmol vaso. Ymiid ajcxy canela, etz tijaty ooy oy xuucin miiditye, poom, mirra, perfume, vino aceite, trigo tiim, iyujc animal huidibi tzimy yajyöyb, cöbixy, cohuay, carreti, tumbi huidibi codoogiyip, etz jacjadyii jäy juugypi. ¹⁴Je ajuybidijc adoocpidijc ajcxy ñimähuipy je Babilonia jäy ajcxy: —iCa' ajcxy m'ocmiidiñ je tiim tza'm huidibi ajcxy mjot yjatzojcpy, ca' ma anajty y'ocyajpatni. Ti tigoydäy miich ajcxy mjogy'ajt, je mgomeeñ'ajt, etz m'ijxin huidibi anajty miich ajcxy mmiid, ca' ma ocyajpatnip jadüg'oc!

¹⁵Je huidijaty anajty huit ixtaayb meeñ ixtaayb, e ti ycomeeñygojcixy

ma yijimbi cajpín, jiguem ajcxy yhui'mdähuiipy miid tzig'iñ jihu'iñ, co nañ jadu'n je tzaachypí castigi padaangixy. Yäxip ajcxy etz nidájicixipy nimáaygixipy je Babilonia cajp. ¹⁶Chi ajcxy ymínaanipy:

—iAy! iMiich mij cajp huidibi ayo'n patp! Jadu'n miich anajty nej tüg töxyjäy huidibi xoxyip miid huit oyjatypí, huidi ycolor ucy etz tzaptz, yaj'oyguëxigy miid oori, miid pi'ctzaa oyjatypí, miid perla. ¹⁷iJanch tím tüg jaxigy, janch tím tüg hori, ti ycixy miich mmijjugy'ajtin mmijcomeeñ'ájtin!

Tüg'óciy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huidibi ajcxy tumb ma je mejy, ti je' ajcxy yhui'mdaaygixy jiguëgy. ¹⁸Co ajcxy ijxy nej anajty ytoy yjocy je mij ciudad, chi ajcxy ymínañ:

—¿Huidibi cajp jada' ji jadu'nip nej jada anajty jadayaabi mij cajp?

¹⁹Chi ajcxy ooy naax ñayyajcöhuoogiiyi miid jotmay, cham ooy yaaxcixy, ytajcixy ymaygixy, e mic chachmínaangixy:

—iAy! iJe mijpi oybi cajp huidibi ayo'n patp, ma je tüg'óciy pinjaty anajty ymiid barco ma mejy, ti ycomeeñyógicixy anajty miid je! iJanch tím tüg mij jaxigyí, tím tüg hori, ti yhuindigoydäy miich mmijjugy'ajtin mgomeeñ'ajtin!

²⁰Jotcugiiygix miid je Babilonia cajp ycixpi, miich tzajpjoty tzinaayb ajcxy, etz miich ajcxy huidibi Dios xyhuin'ijx co jëbi m'apóstol'ajtcixy, etz nañ jadu'n miich ajcxy huidibi najtzcapxiy Dios y'ayuc ytiy'ajt, etz nañ jadu'n

pinjaty ijtp ma Dios. Com co Dios ti yajpocycäy Babilonia cajp, je' yi' ti yaj'adigach jadu'n nej ajcxy xymiiddundigoy.

²¹Huin'it tüg ängel janch mic'ajtmíidpi conigy tüg tzaa, jadu'n nej tüg molino paandzaa mijpi, chi je' cogädziy mejyjoty, e ymínañ:

—Nej jada tzaa ti ytigooyin, nañ tím jadu'n je mijpi oybi Babilonia cajp ytigoydähuiipy. E janch ni mína pin cajan'ixipy. ²²E ni camína ajcxy mgajac'midohuiipy jim Babilonia co pin arpi coob etz flauta yajxuuxp trompeti yajxuuxp mijnií mijtu!. E ca' jacyajpaadip pinjaty ti dung ii jajtp, ti oficio jajtp, ni mgamidohuiipy je molino paandzaa ñe'min. ²³Ni mína ti ycatiicxipy jadüg'oc ma je Babilonia cajp. Ni mína ycayajmidohuiipy jadüg'oc je xií je xondaacin huidibi jajtíp co jäy ypicy. Oy je Babilonia ajuuybi y'adoocpi ajcxy anajty ooy yjamicjäyity ya naaxhuiñ, e ti ajcxy huin'íñ mayñaaxhuiñyjäy miid ajcxy brujerías.

²⁴Jim ma je Babilonia cajp jim yajpaady je' ajcxy ñi'py je tiibi ajcxy Dios y'ayuc najtzcapxiyi, je huidibi ajcxy huin'ixyí ma Dios etz tüg'óciy mibijcpidijc tiibi yaj'ögypaatcixy naaxhuiñyígxy.

19 Co jadu'n yjajti, chi nmidooyich may'ayuc micpi co mayjäy ajcxy ooy ycapxcixy ymiydaaccixy tzajpjoty, ymínañ ajcxy:

iAleluya! Hich ajt nDios yi' tügpajc ti xyajnidzoocim ajt n'alma. Yi' je' tügpajc mij'oy'ajt miid.

² Com janch etz tudägy Dios y'ane'min ycötujcin. Ti je' möy ycastigo je Babilonia cajp huidibi ti yajhuinma'ñydgoy je naaxhuñyäjy miid je ycatudägy'ajtin ycixpi. Yi' je' ti yaj'adigach ma je Babilonia cajp je Dios ytumbi, huidibi yaj'ögy ajcxy, pat jim.

³ Chi ajcxy jadüg'oc yminaap: —iAleluya! Je jijnoc huidibi jim Babilonia co ytoy je cajp, pa'ttigihuij tzajpcíxy huinixii huinñtiempo, ca' yjñin ypídzip ni mina.

⁴ E je iipx madaaxpi mijjäy etz je madaaxpi iyujc, huidibi jugy'ajt miid ñaygojxtinaygidaaci naaxcíxy, chi ajcxy ooy Dios ojadajty huidibi anajty ane'mb ma je mij'ane'mdac, e yminaangixy:

—iJadu'n jada! iAleluya!

⁵ Huin'it yajmidooy jiiby ma je Dios y'ñaydac ycötujctac tüg ayuc ymina'ñ:

Huindzigiiygix iibatcix capxpatcix iich ajt nDios nidüg'óciy pinjaty tumb miid yi', pinjaty yi' tzigiib, huen mutztijcity huen ymij'anäctijcity.

Je jotcujc'ajtin huidibi nbadaanim co anajty Cristo yjäy nimiñ

⁶ Nmidoohuich nañ jadu'n nej jihuüy ooy mayjäy ycapxy ymiydägy, nej canaag mijñii y'a'iich, nej enee micpi yjidity, yminaangixy:

iAleluya! Ti y'ane'mdägüy jiiby naaxhuñ je Huindzin Dios huidibi tügpajc mijip.

⁷ Agujc'ajtim jotcujc'ajtim, tzoc cömaayim Dios, tzoc

mooyim mij'ajt. Com ti paady je xii je tiempo mina Dios y'ung naybadáanigixp tümugáanigixp miid yi' yjäy, tim jadu'n nej jihuüy ypiga'ñ miid yi' ajcxy. Ti Cristo yjäy ñayñ'i'ixíyigixy, jaydëbi ñaybáatigixip ytügmúccixip miid yi', tim jadu'n nej tüg jäy ñayxoxyii co ypiga'ñ.

⁸ Dios ti a'ixiy co Cristo yjäy ajcxy ñayxoxiiyb miid yhuít oyjatypi, huidibi adíicxp ajajp.

Je huit xojx oyjatypi jadu'n nipaady miibijcpidijc ti paatcixy ma Dios.

⁹ Chi je ángel xyñimaayich:

—Jaay jada ayuc. “Jotcujc ajcxy pinjaty huoooyip ma yajhuinxiiiduna'ñ Dios y'ung, je Cordero, co naydügmugáanigixy miid yi' yjäy ajcxy.”

Chi je ángel xyñimaayich:

—Jada je' Dios y'ayuc janchypi.

¹⁰ Chi ngojxtinay'ihuiiyich ma je ángel yhuinduu co njahuindzigihuaañich. Chi je' xyñimaayich:

—Ca' jadu'n m'idich. Dios iich xytumbi'ajtp jadu'n nej miich etz nej jacjadyii migügtijc huidibi mijpidaaccixp cixyot huinijot je ayuc tiy'ajt janchypi huidibi Jesús ycapxhuäcx. Huindzigi' Dios.

Jadayaabi ayuc tiy'ajt janchypi huidibi Jesús ñidiy'ajt'ajt, yi' je' je Dios y'ayuc huidibi je profetas ajcxy ñajtzcapxiy.

Je mij'ane'mbi huidibi poobcohuay yaj'iñaayb

¹¹ Chi nhuin'ijxyich tzajp'ahuädz, chi yquëxgy tüg poobcohuay, e je

pin anajty yaj'iñaayb hue' anajty naydiyii je tudägypi je janchypi. Je huidibi tiydumb naaxhuiñyäjy miid tudägy'ajtin etz huidibi tziptumb miid tudägy'ajtin. ¹²E je' huidibi yaj'iñaayb je poobcohuay, je' yhuuin jadu'n je' nej jiinye'n, e ymiid anajty ma ycohuajc maycoroni huidibi nidiy'ajt'ajtp co yrey'aty ma tüg'óciy jäy. E je' ymiid anajty tüg xii cojaay, e je' anajty naydügpajc nejhuiyib yxii ca' jac pin. ¹³Hue' anajty yxoxyity miid huit y'uucyity miid ni'py, e je' yxii hue' anajty xii'adyii Dios y'ayuc. ¹⁴Je ángeles ajcxy huidibi soldad'ajtp tzajpjoty ypayöyii anajty ajcxy ac poobcohuaygixpi, yxoxyity ajcxy miid sedi huit janch oybi, poobi etz huätzpi. ¹⁵Je huidibi yaj'iñaayb je poobcohuay, ma yi' y'ahuac ypidzimy anajty tüg espada janch jijpi, e je' miid yajtzaachihua'n je maynaaxhuiñyäjy. E je' ane'ma'n miid Dios ymic'ajt. E miid yi' y'ayuc castigi möhua'n je mayjäy miid ypocy ycixpi huidibi tzinaayb ma je may it lugar ya naaxhuiñ. Yi' y'ayuc jadu'n yi' nej tüg espada janch jijpi. E yi' miid'adaanip je mijpi Dios chip y'ejcín, je Dios huidibi tüg'óciy mic'ajt miid. E mictägy tzaachypi castigi yega'n ma je mayñaaxhuiñyäjy miid ypocy ycixpi, jadu'n je maynaaxhuiñyäjy nipaady nej jihuüy Dios y'ung tenmicx uvas miid ytecy. ¹⁶E ymiid anajty cojaay ma yhuut etz ma ypuj jadyaabi ayuc: “Reydijc ajcxy yrey. Huindzindijc ajcxy yHuindzin.”

¹⁷Huin'it nhuin'ijxyich tüg ángel ytinäy xii'agujc, chi ooy janch mic miyaaxy tüg'óciy je joon huidijaty queec-huidijtp tzajpcujc yminañ:

—Miingix naymujctáayigix ma Dios adzuu'ibi yecy. ¹⁸Miingix, jigix mdzüdzcixipy reydijc ajcxy ñin'icx, capitán ajcxy etz micjäydijc ajcxy ñin'icx, cohuay chüch etz nañ jadu'n je' ajcxy ñin'icx huidibi yaj'iñaayb. Mdzüdzip tüg'óciy jäy ñin'icx: tumbidijc midumbidijc, je huindzindijc, comeeñydijc etz je ayoobidijc.

¹⁹Chi nhuin'ijxyich je ca'oy'iyujc etz je rey ajcxy huidibi yajpatp ya naaxhuiñ miid tüg'óciy ypubejtpidijc ysoldadotijc ajcxy. Nhuin'ijxyich co ti ñayyöymújcigixy co chiptunaangixy midziptzonaangixy je huidibi poobcohuay yaj'iñaayb quipxyi miid je' ypubejtpidijc ysoldadtijc ajcxy. ²⁰Chi je ca'oy'iyujc ymachycäy quipxyi miid je profeta ca'pi yjanchity, je tiibi anajty tuñ mijhuinma'n ma je ca'oy'iyujc yhuinduu. Miid je mijhuinma'n ycixpi je profeta, ca'piy yjanchity, ti anajty ooy huin'iiñ tüg'óciy je huidijaty ajcxy nayyejci co je ca'oy'iyujc ytiy'ajt ijxpejt cöbijci ma yhuimboc etz co huindzigiñy je ñidzejtztuutin. Jadu'n je ca'oy'iyujc etz je profeta, ca'piy yjanchity, yajcötijnajxy ajcxy ma jiiñ ytoy miid azufre, jadu'n je jiiñ nej tüg meju huádz jiiñ. ²¹Jacjadyii jäy hue' ajcxy o'cin patcixy miid espada huidibi anajty pidzimb ma je' y'ahuac je huidibi anajty poobcohuay yaj'iñaayb. E tüg'óciy je joon etz luud huidibi ajcxy queec-huidijtp cijx je' ajcxy ytimycuuxtáayigixy ytimypejttaayigixy miid may öcpi chüch.

Je mil jímijtpi

20 Huin'it nhuin'ijxyich tüg ángel ycidägy chooñ tzajpjoty miidity je ahuasti huidibi miid yaj'ahuäch je mij jut huidibi oy yciicyity, ymiid anajty nañ jadu'n tüg mijcadena ma yci'.² Jadayaabi ángel majch je ama'y tza'nñ huidibi yajtjip mujcu' etz Satanás, chi yajcadenitigiiy, e yajhuim'y mach tüg mil jímijt.³ Chi je ángel cötijnajxy je mujcu' ma je mij jut, chi cö'agiiy. Chi tüg selli pidacy ma je mij jut aguu. Pidacy je mujcu' ma je mij jut, ca'ydi jac-huin'iiñ je mayñaaxhuiñyäj, ixti cooni tüg mil jímijt yca'pxipy. E co jadu'n anajty mil jímijt ti ñaxy, ooy ycopicyity co yajnajtzmazdihuiipy je mujcu' tzojccíxy.

⁴Chi canaag ane'mdac nhuin'ijxyich ma anajty ajcxy iñäy tiibi ajcxy patcixy cötujcin co tiyúngixipy naaxhuiñyäj. Nañ jadu'n nhuin'ijxyich ajcxy y'alma huidibi anajty ajcxy ti yajyöctzujctuutcixy miid co ajcxy capxhuäcxy je Dios y'ayuc ytiy'ajt huidibi Jesús ñidiy'ajt'ajt. Ca'p je' ajcxy anajty huindzigiigixy je ca'oy'iyujc, ni je' ñidzejtzuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxyi miid Cristo tüg mil jímijt.⁵ Je jacjadyi je öcpi, huidibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy tüg mil jímijt huin'itni. Co tüg'óciy je mibijcpidijc yjugypigipy jadüg'oc, jada je' je ogá'nibi tiempo

mina öcpi ajcxy yjugypijccixy, e ca' y'oc'ó'ccixnip jadügtecy.⁶ Jotcujc etz huädz, ca' tibocy miidity, je' ajcxy öcpidijc huidibi jugypigipy co Jesús yajjugypigipy yi tügpicoy öcpi huidibi yajjip'adamb. Je mimetzpi o'cin ca' ni ti mic'ajt miidity ma je' ajcxy. Hue' janch ajcxy ytung'adiiyb huingapxi ma Dios etz Cristo. E je' ajcxy Cristo quipxy miid y'ane'mip tüg mil jímijt.

⁷Co anajty ti ñaxy je mil jímijt, huin'it je Satanás yajcoguetjtüdiy ma ymach'ity.⁸ Chi Satanás nicxy huin'iiñ je mayñaaxhuiñyäj huindu'mybi ñaaxhuiñ. Je' nicxy huin'iiñ Gog jäy etz Magog jäy. E y' ajcxy y'ane'mbidijc yajmujctähua'n soldado ajcxy, jigix chiptúngixipy miid je Dios y'ung. Jadu'n je' ajcxy soldados ymayity jadu'n nej pu' ymayity huidibi mejypá'am.⁹ E jadu'n ajcxy ypediiy ma ymijhuinity naax, chi ajcxy yajnaadujcy je it ma chinaaygixy huidibi Dios ti huin'ijxigixy etz yajnaadujccixy je ciudad huidibi Dios chojcpy. Chi Dios quejxy jiin huidibi tzoomb tzajpjoty, huidibi oy ñöcigixy huädz huädz je may soldados ajcxy.¹⁰ Je mujcu', huidibi anajty ti huin'iiñ je mayjäy, oy yajcötijnaxy ma je mij jiin tyoy miid azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiiby je' ajcxy ayo'n tzaachypi paadipy xiim tzuum huinixii huinitiempo.

Je tiyduunin ma je mij'ane'mbi yhuinduu

¹¹Nhuin'ijxyich tüg mij'ane'mdac janch poob, miid je huidibi anajty

ĩnaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'ljtcixipy. ¹²Chi nhuin'ljxyich je öcpi ajcxy, mij'anäcpi mutz'anäcpi, ytinaaygixy ma Dios yhuinduu.

Chi yajciyhuäcxtay maylibro. E nañ jadu'n yajciyhuäcxy jadüg libro huidibi miid je jäy yxii cojay huidijaty ajcxy jugy'ajtin huinixii miid. Chi je' ajcxy yajtiyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjaybetyity ma je maylibro. ¹³Je mejy ycıyejctay je' je öcpi ajcxy huidibi anajty jii by yajpatp. E je o'cin etz je öcpijut ycıyejctay je' je öcpi huidibi jii by yajpatp, e tüg'öciy je' yajtiydunday nidüg nidüg nej anajty ti chinaaygixy. ¹⁴Je o'cin etz je it ma je öcpi y'ity yajnajtztijyday jijnjoty ma je mijjiiin ytoy. Je' je' je mimetzpi o'cin ma je mijjiiin ytoy. ¹⁵E huidijaty anajty ajcxy ca' yxii ymiiñ ma je libro huidibi jugy'ajtin huinixiibi miid, hue' je' ajcxy yajnajtztijy jijnjoty ma je mijjiiin ytoy.

21 Huin'it nhuin'ljxyich tüg tzajp jemybi etz tüg naax jemybi, com je jayjipi tzajp etz je jayjipi naax ti je' anajty ytigoydäy, e ni ma anajty mejy ycacädy. ²Hich, Juan, nhuin'ljxyich je ciudad huätzpi jemybi, je Jerusalén, ycidägy anajty chooñ tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñyii ñayxoxyii co ypigañ miid yëydijc. ³Nmidoohuich tüg ayuc micpi chooñ anajty tzajpjoty, e yminañ:

—Cuenditun iich n'ayuc. Dios tzinaydac pigamb ma naaxhuiñyjäy

ajcxy. Yi' tzinähuipy miid yi' ajcxy, e yi' ajcxy Dios yjäy'adiiyb. E Dios ci'm idaamb miid yi' ajcxy jigix yi' ajcxy Dios'adiiyb. ⁴Dios yajquëgiib ajcxy ytajin ymayin etz yajtiidziib ajcxy yhuinni, e ca'p yjadiib o'cin ni jiyin ni yaaxin, ni jotmay, ni pin ycajihuihuip je ju'pin je pa'min. Com je huidibi anajty ijtnaayb, ti je' ñaxy.

⁵Huin'it je' yminañ huidibi anajty ñnaayb ma je mij'ane'mdacin:

—Cuenditungix iich n'ayuc. Huinjemy ngojtigadza'ñich tüg'öciy huidibi jii'ijtp.

Nañ jadu'n yminañ:

—Jaay jada ayuc. Com jadyaabi ayuc ooy jada yjanchity, e ooy yi' jot'amij'ajt miidity.

⁶Huin'it je mij'ane'mbi xyñimaayich:

—Ti tüg'öciy ytunyii yjadyii. Hich je' nyajtzondacp tüg'öciy tijaty, etz iich nyajcogixiıyb tüg'öciy tijaty, tim jadu'n nej je letra A huidibi yajtzondacp je alfabeto etz je letra Z huidibi yajcogixiıyb je alfabeto. Pinjaty tzojcp jemybi jugy'ajtin iich yi' nmöhuip. Jadu'n nipaady nej jihuiy ajcxy ytidzıyigixy, e nyaj'ügich ma ymuxy je nii huidibi yejcp jugy'ajtin, ni ca' ajcxy mimeeñyduunip ni jadu'ni. ⁷Pinjaty mimadactaayb jibic-huinmañ etz pocytunii, yi' je' cidigihuiib huidibi një'ajtpy, e iich yi' xyDios'adiib, e yi' iich n'ung'adiiyb. ⁸Je huindzıctijc ajcxy, pinjaty ca' ymibicy iich ndiy'ajt, pinjaty tumb huidibi ca' y'oyjäygidaacnity, pinjaty jäy yaj'öcp, pinjaty migapxtigooyb töxyjäydijc, pinjaty tumb capxpogii, pinjaty mijpidacp

huijyäjy yhuinma'ñ, pinjaty huindzigiıyb quipychech tzaadzech, etz pinjaty aniıdacc, je' ajcxy nidüg'óciy nibıdzimiıb ñıcxıpy ma mijjiın ytoy miıd azufre, huidibi quëxıcp nej jıınmejy. Je' je' je' mimetzpi o'cin.

Yi jemybi Jerusalén

⁹Huin'it nidüg ángel je nihiuxtujcpi huidibi anajty miıd huixtujc tasi ujtzjatypi miıd je huixtujcpi ayo'n tzaachypi huidibi jac'axam tunaanıp jadaanıp, je' xyñımaayıch:

—Min, e cham nyajni'ixıhua'ñ je miıbjcpıdıjc huidibi tügmugamb miıd Dios y'ung, je Cordero, jadu'n nej tüg yëydıjc ytügmucy miıd ytöxyıjc co ajcxy ypıcy.

¹⁰Je huidibi Dios yjıhui'ñ ymic'ajt xyaj'ıjxıch cumäyjtıy, chi je ángel cümäyjtıy xyajıncıyıch ma tüg cop mıjpi etz cıxpi, chi xyaj'ıjxyıch je mıjpi ciudad santa. Je ciudad santa hue' je' yxii Jerusalén, e ycidägy anajty choon tzajpjıy jııby ma Dios yajpaady. ¹¹Je mıj ciudad santa janch adııcxp je' anajty miıd Dios y'oy'ajtıın. Jim jadu'n anajty y'adııcxı nej tüg tzaa janch oybi nej mármol, janch yaj'ıjxnajxp nej ıjxin. ¹²Jühuıdıtyı anajty miıdıty je ciudad santo ac poch janch mıj etz cıxy. Je poch ymiıd anajty majmetz y'aguu. E ma je majmetzpi y'aguu majmetz ángel ajcxy y'ıjtcıxy, tügpi ángel ma tügjaty ciudad aguu. Etz jıyabetyıty je' ajcxy yxii je majmetzpi Israel tribu, tügpi tribu yxii yjıyabetyıty ma tüg tüg poch y'aguu. ¹³Tugiıg anajty y'aguu miıdıty xiıbidzim'amy, tugiıg

y'aguu ma tıchıpoj ymiıniıy, tugiıg y'aguu ma jıınboj ymiıniıyın, etz jatugiıg y'aguu ma xiıgidägy'amy. ¹⁴Je poch huidibi anajty ymiıd je cajp, ymiıd anajty majmetz tzaa huidibi y'ıjx'ajtıp, e majmetzpi tzaa ymiıd anajty cojaay je nimajmetzpi apóstoles ajcxy yxii huidibi Jesús, je Cordero, yhuin'ıjx, tügpi apóstol yxii ma tüg tüg tzaa.

¹⁵Je ángel huidibi anajty mıydacc miıd iıch, ymiıd anajty tüg quıpx ac tím oori je' anajty. Je' anajty miıd quıpxa'ñ je cajp, je poch y'aguu, etz je poch. ¹⁶Je cajp, je ciudad, hue' je' anajty cuadradı; nej anajty yoñ'ajıt, nañ jadu'n anajty y'agon'ajıt, etz nañ jadu'n ycıx'ajıt. Chi je ángel quıpxy je ciudad santa miıd je' yquıpx. E hue' quıpxy mejtz mil jamejtz mıgo'px kilómetros, y'ayoñ'ajtıın ycıx'ajtıın etz y'agon'ajtıın quıpxyjtıy je' anajty. ¹⁷Huin'it je ángel quıpxy je poch, hue' quıpxy mıgo'px jahuıxchıguıpx mıdaax cınuux, jadu'n nej naaxhuıınyäjy ajcxy ycınuux, huıdı je ángel yajtıımyb.

¹⁸Je poch hue' je' anajty ypochıty miıd tzaa oyjatypi, e je cajp hue' je' anajty ac tím oori, yguëxıgy nej ıjx huätzpi. ¹⁹⁻²⁰Je tzaa huidibi je poch y'ıjx'ajtıp hue' je' anajty y'oyduñıty huıdı miıd y'oyguëxıgy, tzaa janch oyjatypi canaagnax color. Je jayıjpi poch y'ıjx hue' anajty y'oyduñıty miıd jaspe tzaa, je mimetzpi poch y'oyduñıty miıd safiro tzaa, je mıdugiıgpi poch y'oyduñıty miıd ágate tzaa, je mımadaaxpi y'oyduñıty miıd esmeralda tzaa, je mımıgooxpi poch y'oyduñıty miıd ónice tzaa, je mıduıujcpi poch y'oyduñıty miıd coralina tzaa, je

miich myajmij'adipy. Je Huindzin, je Dios huidibi ayuc moy je profetas ajcxy jecy'ajty, quejxy y'ángel jigix yajni'ixihuiipy je' ytumbidijc tijaty tzojc tunaanip jadaanip.

⁷Jesucristo jadu'n yminañ:

—iMiimbich tzojc! Jotcujc pinjaty tumb cuendi etz cuydumb Dios y'ayuc ytiy'ajt huidibi jaybetyip ma jada libro.

⁸Hich Juan, nmidoohuich etz nhuin'ijxich jadyaabi huidibi jaybety ma jada necy. E co oy jadu'n nhuin'ixyich, chi nhuijoj'ihuiiyich ma je ángel ytecymijc huidibi anajty yam xyajni'ixiibich. ⁹Chi je' xyñimaayich:

—Ca' jadu'n m'idich. Hich, Dios xytumbi'ajtp jadu'n nej miich etz jacjadyi migügtijc huidibi Dios y'ayuc najtzcapxiyip, e tüg'óciy pinjaty tumb cuendi huidibi jaybetyip ma jada necy. Huindzigi' etz ojadat Dios.

¹⁰Chi je' xyñimaayich:

—Capxhuäcxi je Dios y'ayuc huidibi ti mjay ma jada necy, ca' myüdzip. Com ti yhuingoñ je tiempo mina Dios cuyduna'n yi y'ayuc huidibi yjayhui'm ma jada necy. ¹¹Pinjaty ca' ytudägyity, huen jadu'n jacyajpaady miid ycatudägy'ajt. Pinjaty jibicjot jibic-huinma'n tumb, huen nigü jibicjot jibic-huinma'n tuñ. E pinjaty tudägyi tumb, huen jactuñ tudägy'ajtin. Pinjaty huädz yjot huädz yhuinma'n miid, huen huädz yjot huädz yhuinma'n jacmi'ity ma Dios.

¹²Chi je Cristo yminañ:

—Timetiini nhuimbidityich jadüg'oc naaxhuiñ. Co

anajty ti nmiñich, huin'it nyajjotcugihuibich pinjaty oybi ti tuñ, e ndzaachytunipyich pinjaty jibicpi ti tuñ. ¹³Hich je' ti njayjip'atyich ya naaxhuiñ, etz iich je' cogixihuamb, tim jadu'n nej je letra A chondägy ma je alfabeto etz je letra Z ycogixiy ma je alfabeto. Hich ti nyajtzondacyich je naaxhuiñ etz nyajcixipyich.

¹⁴Jotcujc ajcxy pinjaty ti ypocynihuäch, jadu'n nipaady nej ajcxy yhuit ti pujcixy e miid ajcxy yhuit huätzpi. Com ti ajcxy ypocynihuaatzcixy, paady jëbi jíxcixip je ujtz tza'm huidibi jugy'ajt yejcpy huidibi ca' ycixipy ytigoyipy ni mina, e jadu'n jëbi ytigy ma je jemybi Jerusaléngajp.

¹⁵Dios ca' yi' ajcxy cöbigañ ma je jemybi Jerusalén etz hui'mip ajcxy cajppa' tüg'óciy pinjaty huidibi jibic-huinma'n miid, pinjaty ca' mibicy Dios, pinjaty mijpidacp huijyäjy yhuinma'n brujo yhuinma'n, pinjaty ajcxy migapxtigooyb midundigooyb töxyjäydijc, pinjaty ajcxy jäy yaj'öcp, pinjaty ajcxy huindzigiiyb quipychech tzaachech, etz tüg'óciy pinjaty tzachnixondacp anii ayuc.

¹⁶Hich Jesús huidibi capxp. Ti nguexyich n'ángel ma miich jigix jada tiy'ajt capxticxipy majaty mibijcpidijc ma tüg tüg cajp. Hich je' ijx'ajtp cop'ajtp ma je rey David miñ. Etz iich je' nmij'ap'ajtpyich nmijteedy'ajtpyich je rey David. Jadu'n iich nipaady nej je mijmadza' huidibi yajtjip jayxim.

¹⁷Je Espiritu Santo etz je mibijcpidijc huidibi jadu'n nipatp nej Cristo ytöxyijc yminaangixy:

—Min ma Jesucristo.

E pin amidoo'ijtp iich n'ayuc ymínáangixipy:

—Min ma Jesucristo.

E pin tzojcp jugy'ajtin huidibi ca' ycixipy ytigoyipy nimina, jadu'n nej jihuüy ytidzïyii e tzocy jada nii, huen miiñ, e nmöhuibyich jugy'ajtin, jadu'n nej jihuüy nyajniï'ügich je nii huidibi jugy'ajtin miid e ni ca' mímeeñydunipy ni jadu'ñyi.

¹⁸Tüg'óciy pinjaty amidoo'ijtp Dios y'ayuc ytiy'ajt huidibi jaybetyip ma jada libro, iich miich ajcxy nimaaybich co pinjaty jacyaj'anajxp jada ayuc ma jada necy, Dios jac'anaxy möhuüib tzaachypï ayo'n, ca'ydi huidi

jaybetyip ma jada libro. ¹⁹E pin puuhuijtzp hueeni jada Dios y'ayuc huidibi jaybetyip ma jada Dios ylibro, Dios yi' jötziib yxii huidi cojaayip ma je jugy'ajt libro. Nañ jadu'n ypuhuidziïyb huidi anajty japaatip ma je jemybi Jerusaléngajp, huidi jada libro ñimiydacy.

²⁰Yi Jesucristo huidibi jada ayuc capxp, yi' minamb:

—Ca' ooy jecy njac-huäcxiba'ñich co nhuimbidiipyich naaxhuiñ jadüg'oc.

Jadu'n jada. Amén. iMin, Huindzin Jesús!

²¹Huen je nHuindzin Jesucristo may'ajt oy'ajt tunipy miid miich ajcxy huidibi mibijcp. Jadu'n ngapxycíxyich. Amén.